

清
實
錄

聖祖仁皇帝實錄(一)

卷一至卷九九
順治十八年至康熙二十年

清實錄

第四冊

中華書局影印

清 實 錄

(第 四 冊)

聖祖實錄(一)

*

中 華 書 局 出 版

(北京王府井大街36號)

北京市中國書店發行

中國建築工業出版社印刷廠印刷

*

787×1092毫米 1/16·78 7/8 印張

1985年9月第1版 1985年9月北京第1次印刷

印數 0,001——1,500 冊

統一書號: 11018 · 1355—4 定價: 58.00 元

清實錄第四冊目錄

聖祖仁皇帝實錄（一）

首卷一	雍正序	一
	乾隆序	四
	凡例	六
首卷二	目錄	一二
首卷三	雍正朝進實錄表	二九
	修纂官	三二
卷一	順治十八年正月至二月	三九
卷二	順治十八年三月至五月	五二
卷三	順治十八年六月至七月	六九
卷四	順治十八年閏七月至九月	八〇
卷五	順治十八年十月至十二月	九〇
卷六	康熙元年正月至七月	一〇二
卷七	康熙元年八月至十二月	一二八
卷八	康熙二年正月至三月	一三二
卷九	康熙二年四月至八月	一四三

卷一〇	康熙二年九月至十二月	一五七
卷一一	康熙三年正月至四月	一六七
卷一二	康熙三年五月至七月	一八一
卷一三	康熙三年八月至十二月	一九五
卷一四	康熙四年正月至三月	二〇七
卷一五	康熙四年四月至六月	二二三
卷一六	康熙四年七月至九月	二三四
卷一七	康熙四年十月至十二月	二四八
卷一八	康熙五年正月至四月	二五七
卷一九	康熙五年五月至八月	二六九
卷二〇	康熙五年九月至十二月	二七九
卷二一	康熙六年正月至四月	二九〇
卷二二	康熙六年閏四月至六月	三〇二
卷二三	康熙六年七月至八月	三一三
卷二四	康熙六年九月至十二月	三二七
卷二五	康熙七年正月至四月	三四三
卷二六	康熙七年五月至八月	三五八
卷二七	康熙七年九月至十二月	三七一
卷二八	康熙八年正月至四月	三八四

卷二九	康熙八年五月	三九五
卷三〇	康熙八年六月至七月	四〇四
卷三一	康熙八年八月至十二月	四一五
卷三二	康熙九年正月至三月	四二八
卷三三	康熙九年四月至八月	四四〇
卷三四	康熙九年九月至十二月	四五六
卷三五	康熙十年正月至四月	四七〇
卷三六	康熙十年五月至九月	四八二
卷三七	康熙十年十月至十二月	四九四
卷三八	康熙十一年正月至四月	五〇三
卷三九	康熙十一年五月至八月	五一七
卷四〇	康熙十一年九月至十二月	五三二
卷四一	康熙十二年正月至三月	五四四
卷四二	康熙十二年四月至七月	五五五
卷四三	康熙十二年八月至十月	五六九
卷四四	康熙十二年十一月至十二月	五七九
卷四五	康熙十三年正月	五九一
卷四六	康熙十三年二月至三月	五九九
卷四七	康熙十三年四月至五月	六一一
卷四八	康熙十三年六月至七月	六三四
卷四九	康熙十三年八月至九月	六三八
卷五〇	康熙十三年十月至十一月	六五一
卷五一	康熙十三年十二月	六六二
卷五二	康熙十四年正月	六七四
卷五三	康熙十四年二月至三月	六八四
卷五四	康熙十四年四月	六九六
卷五五	康熙十四年五月至閏五月	七〇七
卷五六	康熙十四年六月至七月	七二三
卷五七	康熙十四年八月至十月	七三三
卷五八	康熙十四年十一月至十二月	七四八
卷五九	康熙十五年正月至二月	七六一
卷六〇	康熙十五年三月至四月	七七八
卷六一	康熙十五年五月至六月	七八八
卷六二	康熙十五年七月至八月	七九八
卷六三	康熙十五年九月至十月	八〇九
卷六四	康熙十五年十一月至十二月	八一九
卷六五	康熙十六年正月至二月	八三三
卷六六	康熙十六年三月至四月	八四三

卷六七	康熙十六年五月至六月	八五七
卷六八	康熙十六年七月至八月	八六七
卷六九	康熙十六年九月至十月	八七九
卷七〇	康熙十六年十一月至十二月	八九四
卷七一	康熙十七年正月至二月	九〇五
卷七二	康熙十七年三月至閏三月	九一九
卷七三	康熙十七年四月至五月	九三四
卷七四	康熙十七年六月	九四七
卷七五	康熙十七年七月	九五七
卷七六	康熙十七年八月	九七〇
卷七七	康熙十七年九月至十月	九七九
卷七八	康熙十七年十一月至十二月	九九一
卷七九	康熙十八年正月至二月	一〇〇三
卷八〇	康熙十八年三月至四月	一〇一六
卷八一	康熙十八年五月至六月	一〇三二
卷八二	康熙十八年七月	一〇四三
卷八三	康熙十八年八月	一〇五四
卷八四	康熙十八年九月	一〇六七
卷八五	康熙十八年十月	一〇七六
卷八六	康熙十八年十一月	一〇八八
卷八七	康熙十八年十二月	一〇九七
卷八八	康熙十九年正月至二月	一一〇八
卷八九	康熙十九年三月至四月	一一二一
卷九〇	康熙十九年五月至六月	一一三三
卷九一	康熙十九年七月至閏八月	一一四四
卷九二	康熙十九年九月至十月	一一五九
卷九三	康熙十九年十一月至十二月	一二七三
卷九四	康熙二十年正月至二月	一二八四
卷九五	康熙二十年三月至四月	一二九五
卷九六	康熙二十年五月至七月	一二〇六
卷九七	康熙二十年八月至九月	一二三一
卷九八	康熙二十年十月至十一月	一二三二
卷九九	康熙二十年十二月	一二四三

聖祖仁皇帝實錄序

粵稽古載籍以來。聖帝明王。德隆業茂。莫不揚休紀美。照耀簡編。若夫上天純佑下民。聚扶輿積厚之氣。篤生至聖。備道德之崇廣。集皇王之大成。經綸宇宙。彪炳帝紀。巍巍乎。蕩蕩乎。自義軒至今。未有如我

皇考聖祖仁皇帝之盛者也。洪惟

太祖

太宗肇構鴻基。發祥垂裕。

世祖開天建極。統一寰區。暨我

皇考天亶神靈。丕承

先烈。以徇齊敦敏之質。而學有緝熙。以繼

體守成之時。而事兼開創。以光華格

被之勲。而日新盛德。以邳隆熙洽之

運。而時教幾康。

臨御寶祚六十餘年。曆服縣長。超越千古。

仁漸義摩。文經武緯。典章大備。聲教

覃敷

峻德崇功。蟠天際地。有如敬

天凜昭事之誠尊

祖切覲揚之志。

郊壇禋祀。歲必躬親。

廟享薦馨。心虔對越。用致

蒼穹之昭格。聿彰

謨烈之顯承。奉事

兩宮尊養備極。承歡致敬。閱數十年。巡幸

則躬扶

鸞輅。侍疾則步禱

南郊。送龍輶而親行。瞻

寢園而灑淚。自古天子之孝。莫與比隆。友

愛裕親王等。垂老靡間。視疾臨喪。恩

禮交至。推仁宗室。教育天潢。展親悖

族。誼莫厚焉。宵衣旰食。明目達聰。

親政六十餘年。夙夜勵精。始終惟一。

臨軒召對。虛己求言。敷陳有益於民生。必

蒙採錄。廉能實見諸治效。立荷

寵褒。眷耆舊而體貌優崇。簡俊乂而程材

器使。小廉大法。百僚皆得其人。網舉

目張。庶司各修其職。四方之利弊周

知。萬里之情形洞燭。愛民如子。軫恤

維殷。普樂利於農桑。裕蓋藏於積貯。

偶遇水旱。立沛恩施。發帑蠲租。動以

數百萬計。即在屬國。運粟賜糧。視同

一體。德洋恩溥。故黎庶樂業。中外阜

聖訓

康。慎重刑章。哀矜庶獄。每於奏讞明

允之中。施仁法外。嚴寒停遣。盛夏弛

刑。大逆寬族誅。叛人無孥戮。如天好

生之德。洽於民心。欽恤之仁。無以加

矣。

講幄弘開。精研道要。考六藝之折中。抉性

理之精義。

宸翰則鸞迴鳳翥。

天章則玉振金聲。

御定諸書。包涵萬有。融貫百家。紺帙瑤編。

充牣冊府。生知天縱。莫名

聖學之高深。加以重道尊

師。表章儒術。

親詣闕里。瞻拜加虔。賜博士於五賢。躋紫

陽於十哲。

訓飭多士。敦崇實學。加科廣額。惠浹儒林。

壽考作人。於斯極盛。

聖武布昭。

聖訓

神謨密運。天戈所指。立奏膚功。平三逆。收

臺灣。布爾尼應期而授首。鄂羅斯望

風而請命。

躬率六師。三臨朔漠。殲噶爾丹而藩服乂

安。

命將徂征。長驅絕域。復達賴喇嘛而西陲

寧謐。銷鋒灌燧。俾薄海內外。永慶昇

平。厘念河防。

親臨指授。覽全河之形勢。運疏濬之神功。

開中河。築高堰。而淮黃底績。東南獲
衽席之安。濬永定。隄子牙。而漳滏順
流。畿甸享膏腴之利。地平天成。萬世
永賴。至若

躬行節儉。而大官服御。務崇樸素之風。

秉德謙冲。而

徽號鴻名。屢却廷臣之請。

至誠不息。而朝乾夕惕。本行健以法天。

聖敬日躋。而肅廟雖宮儼動容之中禮。凡

十一

上

茲盛美。莫罄名言。是以久道化成。太
和翔洽。天庥滋至。歲奏屢豐。戶樂盈
寧。人登仁壽。自古未賓之國。重譯踵
至。戴高履厚。莫不尊親。

升遐之日。自僻壤遐陬。遠暨蠻夷荒服。含
生負氣之倫。感慟哀號。如喪考妣。羣
臣恭擬

廟謚。曰

聖曰

仁。祇薦

祖號。萬口一心。允孚公論。猗歟休哉。至矣
大矣。朕纘承鴻緒。念切紹庭。踐阼之
初。即簡命大臣等。董率儒臣。開館纂
修。發金匱之秘藏。稽綸言於政地。表
年繫日。敬謹編輯。紀言紀事。鉅細靡
遺。朕齋肅展禮。親加詳閱。歷今九載。
敬成

聖祖仁皇帝實錄若干卷。又於尊藏皇史

十一

下

宓外。恭繕全帙。虔供几案。時時展讀。
以遂朕敷時繹思。繼志述事之意。於
戲。帝載難名。而歲功昭布。日月之運
行。星辰之經緯。可以仰觀成象焉。聖
德難名。而治法昭垂。條理之精詳。規
模之宏遠。可以仰求成憲焉。我
皇考參贊位育之神。欽明精一之蘊。雖非
簡牒所能殫述。而

鴻謨駿業。炳於紀載。與天無極。萬世勿謏。

後之紹作君作師之任。求治統道統之全者。於是乎在。敬弁言簡端。以昭示我子孫。俾永永敬承於億萬世。謹序

雍正九年十二月二十日

中書

聖祖仁皇帝實錄序

皇祖聖祖仁皇帝臨御六十一年。耿光大

烈。融燦古今。積惠襲恩。淪浹寰寓。功

德之盛。具載

實錄。垂千萬禩。我

皇考世宗憲皇帝御製序文。推本

上天孚祐下民。

列祖垂裕後嗣。篤生

至聖。開邃古以來未有之盛業。煌煌乎言

實錄序

之廣大精密。至矣茂以加矣。予小子

寅承丕緒。紹聞衣德。兢兢業業。仰思

繼述

皇祖

皇考成憲。日於治事之先。展誦

列祖實錄。周而復始。

皇祖實錄。卷帙浩繁。排日敬覽。寒暑靡間。

至自今。凡數閱矣。緬惟尚書史記所

載。古帝王治化之隆。各極其至。而孔

子於堯曰惟天爲大惟堯則之蕩蕩乎民無能名焉於舜曰無爲而治孟子則曰王者之民皞皞如也予嘗推繹其旨想見唐虞中天之盛乃今思皇祖之世之民有以知孔孟之言信乎其能知聖人也

皇祖自親政之始即手鉏三蘂蕩定南疆滇黔閩粵之輿揭日月而掃氛霧海內赤子喁喁向風由是亭之毒之煦

齊錄片

二

以淳風沃以甘澍浸以醲化甄以大鈞數十年之間南奠臺澎北犁沙漠命將肆征而閭左無徵發之警

親臨淮河指授方畧歷吳會陟會稽登岱宗謁闕里西巡關隴抵雲中三觀

祖陵觀於東海歲出塞外獮狩上都

天行之健古無以加而庠序詠仁黜庶樂業市廛殷阜卒伍服習熙熙然相忘於無所事事於焉正晷緯考律度定

宸章灑爲元聲煥爲

奎翰集古帝王文治之大成而

穆清宥密凝然不見經營之迹簡任公卿百執事器使而責其成俊壽魁碩布列有位外自節鉞連帥以至守令賢否清濁立判剔侵蠹勵廉平吏治蒸蒸日上無綜核之煩而德意宣究蠲逋賑卹肆赦緩刑指揮

齊錄片

三

深宮之中風馳萬里匹夫匹婦無不浸濡涵育鼓舞德化而不能自己當其時誠所謂不識不知順帝之則者耶歷今二十餘年遺澤餘烈深入人心固結而不可解迴溯

鼎成之初謳思如一日夫乃恍然曰是所謂至仁如天民無能名者也無爲而治恭己南面者也孟子所謂王民皞皞者也於戲四海九州之民無得而

名予小子又烏能名之。憶自幼冲蒙皇祖撫愛日侍

左右。用行政。皆睹記所及簡冊紀載。政如杓衡。規天。躔次。測日。可見者迹象而已。於穆之運。重離之明。終無能言其所以然者。盟誦之次。稽首敬爲之序。以志紹庭繼序之忱。於罔敷云。

實錄序

乾隆六年三月二十四日

聖祖仁皇帝實錄

修纂凡例

一

登極

親政典禮皆書

一恭上

三朝帝后尊謚書冊實文全錄

一恭上

太皇太后

皇太后徽號書冊實文全錄

一祀

天

地

太廟

山陵

日月

社稷

郊祀躋配

太廟

奉先殿升祔配享祭

堂子拜神書

一。

太皇太后

皇太后聖壽節。

萬壽節及元旦冬至凡大慶賀禮儀筵宴皆書。

御殿視朝書

一。

太皇太后

皇太后慈諭全錄

一尊養

太皇太后

皇太后問安侍奉禮儀筵宴書

一。大喪禮儀書奉安

地宮禮儀書

一。冊立

皇后冊封皇妃書。冊立皇太子冊封皇子書。

冊封皇太子妃王妃公主書。廢降革亦書

一。皇子生書

一。恭謁

山陵臨幸闕里禮儀宴賚書。

親征朔漠閱視河工指示方畧書。省方行圍皆

書

一。祈穀耕藉視學經筵日講大閱皆書。其

禮儀宴賚亦書

一。謁

陵巡幸命諸皇子隨駕書。諸皇子恭請臨幸王

園書

一。

御製

三朝神功聖德碑文。

兩宮上壽文及奏書皆全錄。

詔敕。

上諭全錄。

御製各體文。有關文教武功。民生國政者全錄。

纂修

實錄。

聖訓。

玉牒。

國史。

起居注。

典訓。方畧。一統志。明史。皆書。

欽定各種書籍書。

一。宗室分爵。親王郡王以下。奉恩將軍以

上。冊封襲封。晉封。及降革。皆書。冊封郡

王。郡君等。亦書。

一。公主下降。郡主。郡君等出嫁。授固倫額

駙。和碩額駙。多羅額駙。固山額駙。書。

一。異姓王。公。侯。伯。精奇尼哈番。阿思哈尼

哈番。封授襲替書。陞降黜革。亦書。

一。外藩王。貝勒。貝子。公。封授襲替書。陞降

黜革。亦書。

書

一。文武大臣。加三公三少。及宮銜書。革。亦

一。宗人府總領府事。宗正宗人府丞。領侍

衛內大臣。大學士。學士。六部。理藩院。尚

書。侍郎。都察院。左都御史。左副都御史。

倉場督捕。盛京五部侍郎。內務府總管

陵寢總管。翰林院掌院學士。通政使司通政使。

大理寺卿。太常寺卿。光祿寺卿。太僕寺

卿。詹事府詹事。順天奉天府尹。及直隸

各省總督。漕運。河道總督。巡撫。提督學

政。布政使司布政使。按察使司按察使。

提學道等官。除授。皆書。

一。鑾儀衛掌衛事。鑾儀衛鑾儀使。八旗都

統。副都統。前鋒統領。護軍統領。提督九

門步軍統領。奉天等處直隸各省鎮守

將軍。都統。副都統。提督總兵官等。除授

皆書。

一。滿漢文武官員奉使外國外藩書。奉差

直隸各省事關大典者亦書

一。差遣大臣。往四十九旗蒙古會盟書。勸農訓俗書。特遣官員緝拏口外竊賊書。

一。鎮守將軍。都統。副都統。督撫。提鎮。

陞辭

陞見書。直隸各省布政使。按察使。朝覲亦書

一。文武大臣。以老疾乞休書。蒙

恩旨加銜獎賚書。慰留及起用皆書。緣事休致

降革亦書

一。京察。大計。軍政書。文武大臣自陳降革

亦書

一。滿漢文武內外大小官制。添設更改裁并皆書。衙署移駐亦書

一。文武選法品級考及考課則例。有大更定者書

一。開拓疆土。設立邊鎮。及府州縣衛所書。改設。分置裁并亦書

一。每歲人丁戶口。田地。稅糧。茶鹽鑄錢之

數。並於歲暮書。凡開墾軍屯。圈撥地土。

編審人丁。折徵漕糧。蠲除賦役。停罷歲辦諸物并漕運錢法茶鹽權關則例。有更定者皆書

一。王以下。文武各官俸祿軍士月糧則例。有更定者書

一。遇

恩詔及奉

特旨蠲免直隸各省新舊額賦書。遇災荒發粟

蠲賦及於常例外。

特恩賑恤皆書。賑濟外藩蒙古亦書

一。定禮儀。正樂律。治曆法。勘方輿。一切經欽定者皆書

一。天象雲物。氣候徵應。及日食星變。地震書

一。頒曆進春書

一。頒詔天下書。詔文全錄

一。王以下文武官員軍民人等。凡有奏請

稱頌

聖德神功。

聖意謙讓婉卻俱書

一。每歲祭

歷代帝王。

先師孔子及

先農太歲凡在祀典諸神書。遣官祭長白山。

嶽。鎮海。瀆。歷代陵寢。先師闕里書。

敕封山川神號書。釐定祀典。亦書

一。修葺前代陵寢。撫恤後裔書

一。授先賢後裔五經博士世襲書

一。王以下。文武大臣。蒙

特恩賜予書。賜宴。亦書

一。優禮高年。

特恩宴賚書

一。直隸各省鄉試。文武會試。殿試傳臚書。

殿試

制題全錄。

特恩開科書。增廣鄉會試中額書。及增加取進

府州縣衛學文武生員書。

御試博學宏詞及

欽賜舉人一體會試殿試書。選庶吉士及教習

授職。皆書

一。國子監及直隸各省學政。條例有更定

者書

一。遠方外國。慕化歸誠。遣使進貢書。

賜封爵。給敕印書。外藩來朝及遣使進年貢遣

侍子入學。請通市。皆書。定年貢則例及

特恩減免貢物書。宴賚。亦書

一。王以下。奉恩將軍以上。民公以下。阿思

哈尼哈番以上。及在京文武官三品以

上。在外將軍都統副都統督撫提鎮等

官。及外藩王貝勒貝子公故。卹典皆書。

於常例外。

特恩優卹。亦書

一。文武大小官員及軍士有歿於王事者

卹典皆書。於常例外。

特恩優卹亦書。卹典條例有更定者亦書。

一。旌表孝子順孫義夫節婦烈婦烈女並

照例書。有奇蹟奉

特恩者另書

一。建言有關國體政事者書。彈劾大臣之

罪亦書

一。命將出征調兵籌餉一切方畧書。軍中

奏報軍機納降獻捷及凱旋迎勞書。其

山海賊寇地方官兵剿撫平定亦書

一。出征大將軍王以下文武大臣侍郎副

都統以上及督撫提鎮等以軍功加銜

陞賞授世職書。以失誤軍機降革問罪

亦書。其文武大小官員能立勲勞

特恩陞賞者並書

一。投誠官弁。

特恩給與世職及授將軍提鎮等官皆書

一。興滅繼絕。綏定喀爾喀拉藏疆土。安集

所屬人衆書

一。平定察哈爾羅刹所屬兵丁編設佐領

分隸八旗書。平定三逆臺灣等處安插

投誠兵丁書

一。平定朔漢安插厄魯特降人書

一。邊遠地方土司酋長歸化投誠書。宣撫

宣慰。招討等使授職襲職書。改土為流

亦書

一。籌畫海疆事宜書

一。八旗分設佐領增添甲兵書

一。直隸各省水陸標營兵制及驛傳烽堠

添設裁減歸并書。更定督捕條例亦書

一。八旗及直隸各省綠旗兵奉

恩詔及

特旨頒賞書。扈從出征戍防兵於常例給餉外

特恩加賞亦書

一。文武大臣犯罪拘禁遷謫及正法書。

特恩寬宥亦書。不論官吏軍民。犯叛逆大罪正

法者皆書

一。肆赦。停刑。恤刑。皆書。律例有更定者亦書

一。修葺

壇

廟

奉先殿書。營建

山陵書。重建闕里文廟。及凡在祀典諸神廟宇

並直隸各省先賢廟宇書院皆書。岳瀆

等廟宇。

賜御書匾額書

一。重建

太和殿修葺

乾清宮書

一。黃淮兩河。運河。永定河。疏築事宜書。直

隸各省及邊塞地方建築城垣疏濬河

渠濱海濱江地方築隄捍水。一切大工

役。皆書

大清聖祖合天弘運文武睿哲恭儉寬裕孝敬誠信中和功德大成仁皇帝實錄目錄

卷之一

順治十八年正月至二月

卷之二

順治十八年三月至五月

卷之三

順治十八年六月至七月

卷之四

順治十八年閏七月至九月

卷之五

順治十八年十月至十二月

卷之六

康熙元年正月至七月

卷之七

康熙元年八月至十二月

卷之八

康熙二年正月至三月

卷之九

康熙二年四月至八月

卷之十

康熙二年九月至十二月

卷之十一

康熙三年正月至四月

卷之十二

康熙三年五月至七月

卷之十三

康熙三年八月至十二月

卷之十四

康熙四年正月至三月

卷之十五

康熙四年四月至六月

卷之十六

康熙四年七月至九月

卷之十七

康熙四年十月至十二月

卷之十八

康熙五年正月至四月

卷之十九

康熙五年五月至八月

卷之二十

康熙五年九月至十二月

卷之二十一

康熙六年正月至四月

卷之二十二

康熙六年閏四月至六月

卷之二十三

康熙六年七月至八月

卷之二十四

康熙六年九月至十二月

卷之二十五

康熙七年正月至四月

卷之二十六

康熙七年五月至八月

卷之二十七

康熙七年九月至十二月

卷之二十八

康熙八年正月至四月

卷之二十九

康熙八年五月

卷之三十

康熙八年六月至七月

卷之三十一

康熙八年八月至十二月

卷之三十二

康熙九年正月至三月

卷之三十三

康熙九年四月至八月

卷之三十四

康熙九年九月至十二月

卷之三十五

康熙十年正月至四月

卷之三十六

康熙十年五月至九月

卷之三十七

康熙十年十月至十二月

卷之三十八

康熙十一年正月至四月

卷之三十九

康熙十一年五月至八月

卷之四十

康熙十一年九月至十二月

卷之四十一

康熙十二年正月至三月

卷之四十二

康熙十二年四月至七月

卷之四十三

康熙十二年八月至十月

卷之四十四

康熙十二年十一月至十二月

卷之四十五

康熙十三年正月

卷之四十六

康熙十三年二月至三月

卷之四十七

康熙十三年四月至五月

卷之四十八

康熙十三年六月至七月

卷之四十九

康熙十三年八月至九月

卷之五十

康熙十三年十月至十一月

卷之五十一

康熙十三年十二月

卷之五十二

康熙十四年正月

卷之五十三

康熙十四年二月至三月

卷之五十四

康熙十四年四月

卷之五十五

康熙十四年五月至閏五月

卷之五十六

康熙十四年六月至七月

卷之五十七

康熙十四年八月至十月

卷之五十八

康熙十四年十一月至十二月

卷之五十九

康熙十五年正月至二月

卷之六十

康熙十五年三月至四月

卷之六十一

康熙十五年五月至六月

卷之六十二

康熙十五年七月至八月

卷之六十三

康熙十五年九月至十月

卷之六十四

康熙十五年十一月至十二月

卷之六十五

康熙十六年正月至二月

卷之六十六

康熙十六年三月至四月

卷之六十七

康熙十六年五月至六月

卷之六十八

康熙十六年七月至八月

卷之六十九

康熙十六年九月至十月

卷之七十

康熙十六年十一月至十二月

卷之七十一

康熙十七年正月至二月

卷之七十二

康熙十七年三月至閏三月

卷之七十三

康熙十七年四月至五月

卷之七十四

康熙十七年六月

卷之七十五

康熙十七年七月

卷之七十六

康熙十七年八月

卷之七十七

康熙十七年九月至十月

卷之七十八

康熙十七年十一月至十二月

卷之七十九

康熙十八年正月至二月

卷之八十

康熙十八年三月至四月

卷之八十一

康熙十八年五月至六月

卷之八十二

康熙十八年七月

卷之八十三

康熙十八年八月

卷之八十四

康熙十八年九月

卷之八十五

康熙十八年十月

卷之八十六

康熙十八年十一月

卷之八十七

康熙十八年十二月

卷之八十八

康熙十九年正月至二月

卷之八十九

康熙十九年三月至四月

卷之九十

康熙十九年五月至六月

卷之九十一

康熙十九年七月至閏八月

卷之九十二

康熙十九年九月至十月

卷之九十三

康熙十九年十一月至十二月

卷之九十四

康熙二十年正月至二月

卷之九十五

康熙二十年三月至四月

卷之九十六

康熙二十年五月至七月

卷之九十七

康熙二十年八月至九月

卷之九十八

康熙二十年十月至十一月

卷之九十九

康熙二十年十二月

卷之一百

康熙二十一年正月

卷之一百一

康熙二十一年二月至三月

卷之一百二

康熙二十一年四月至五月

卷之一百三

康熙二十一年六月至七月

卷之一百四

康熙二十一年八月至九月

卷之一百五

康熙二十一年十月

卷之一百六

康熙二十一年十一月至十二月

卷之一百七

康熙二十二年正月至二月

卷之一百八

康熙二十二年三月

卷之一百九

康熙二十二年四月至五月

卷之一百十

康熙二十二年六月至閏六月

卷之一百十一

康熙二十二年七月至八月

卷之一百十二

康熙二十二年九月至十月

卷之一百十三

康熙二十二年十一月至十二月

卷之一百十四

康熙二十三年正月至三月

卷之一百十五

康熙二十三年四月至六月

卷之一百十六

康熙二十三年七月至九月

卷之一百十七

康熙二十三年十月至十一月

卷之一百十八

康熙二十三年十二月

卷之一百十九

康熙二十四年正月至二月

卷之一百二十

康熙二十四年三月至四月

卷之一百二十一

康熙二十四年五月至八月

卷之一百二十二

康熙二十四年九月至十月

卷之一百二十三

康熙二十四年十一月至十二月

卷之一百二十四

康熙二十五年正月至二月

卷之一百二十五

康熙二十五年三月至四月

卷之一百二十六

康熙二十五年閏四月至六月

卷之一百二十七

康熙二十五年七月至十月

卷之一百二十八

康熙二十五年十一月至十二月

卷之一百二十九

康熙二十六年正月至三月

卷之一百三十

康熙二十六年四月至七月

卷之一百三十一

康熙二十六年八月至十一月

卷之一百三十二

康熙二十六年十二月

卷之一百三十三

康熙二十七年正月至二月

卷之一百三十四

康熙二十七年三月

卷之一百三十五

康熙二十七年四月至六月

卷之一百三十六

康熙二十七年七月至八月

卷之一百三十七

康熙二十七年九月至十一月

卷之一百三十八

康熙二十七年十二月

卷之一百三十九

康熙二十八年正月至二月

卷之一百四十

康熙二十八年三月至四月

卷之一百四十一

康熙二十八年五月至八月

卷之一百四十二

康熙二十八年九月至十月

卷之一百四十三

康熙二十八年十一月至十二月

卷之一百四十四

康熙二十九年正月至二月

卷之一百四十五

康熙二十九年三月至四月

卷之一百四十六

康熙二十九年五月至六月

卷之一百四十七

康熙二十九年七月

卷之一百四十八

康熙二十九年八月至九月

卷之一百四十九

康熙二十九年十月至十二月

卷之一百五十

康熙三十年正月至三月

卷之一百五十一

康熙三十年四月至五月

卷之一百五十二

康熙三十年六月至八月

卷之一百五十三

康熙三十年九月至十二月

卷之一百五十四

康熙三十一年正月至三月

卷之一百五十五

康熙三十一年四月至七月

卷之一百五十六

康熙三十一年八月至九月

卷之一百五十七

康熙三十一年十月至十二月

卷之一百五十八

康熙三十二年正月至三月

卷之一百五十九

康熙三十二年四月至七月

卷之一百六十

康熙三十二年八月至十月

卷之一百六十一

康熙三十二年十一月至十二月

卷之一百六十二

康熙三十三年正月至三月

卷之一百六十三

康熙三十三年四月至閏五月

卷之一百六十四

康熙三十三年六月至八月

卷之一百六十五

康熙三十三年九月至十二月

卷之一百六十六

康熙三十四年正月至四月

卷之一百六十七

康熙三十四年五月至七月

卷之一百六十八

康熙三十四年八月至十月

卷之一百六十九

康熙三十四年十一月至十二月

卷之一百七十

康熙三十五年正月

卷之一百七十一

康熙三十五年二月至三月

卷之一百七十二

康熙三十五年四月

卷之一百七十三

康熙三十五年五月

卷之一百七十四

康熙三十五年六月至七月

卷之一百七十五

康熙三十五年八月

卷之一百七十六

康熙三十五年九月

卷之一百七十七

康熙三十五年十月

卷之一百七十八

康熙三十五年十一月至十二月

卷之一百七十九

康熙三十六年正月

卷之一百八十

康熙三十六年二月

卷之一百八十一

康熙三十六年三月

卷之一百八十二

康熙三十六年閏三月

卷之一百八十三

康熙三十六年四月至五月

卷之一百八十四

康熙三十六年六月至七月

卷之一百八十五

康熙三十六年八月至十月

卷之一百八十六

康熙三十六年十一月至十二月

卷之一百八十七

康熙三十七年正月至三月

卷之一百八十八

康熙三十七年四月至六月

卷之一百八十九

康熙三十七年七月至八月

卷之一百九十

康熙三十七年九月至十月

卷之一百九十一

康熙三十七年十一月至十二月

卷之一百九十二

康熙三十八年正月至三月

卷之一百九十三

康熙三十八年四月至六月

卷之一百九十四

康熙三十八年七月至八月

卷之一百九十五

康熙三十八年九月至十月

卷之一百九十六

康熙三十八年十一月至十二月

卷之一百九十七

康熙三十九年正月至二月

卷之一百九十八

康熙三十九年三月至四月

卷之一百九十九

康熙三十九年五月至六月

卷之二百

康熙三十九年七月至八月

卷之二百一

康熙三十九年九月至十月

卷之二百二

康熙三十九年十一月至十二月

卷之二百三

康熙四十年正月至三月

卷之二百四

康熙四十年四月至六月

卷之二百五

康熙四十年七月至九月

卷之二百六

康熙四十年十月至十二月

卷之二百七

康熙四十一年正月至四月

卷之二百八

康熙四十一年五月至閏六月

卷之二百九

康熙四十一年七月至九月

卷之二百十

康熙四十一年十月至十二月

卷之二百十一

康熙四十二年正月至三月

卷之二百十二

康熙四十二年四月至七月

卷之二百十三

康熙四十二年八月至十月

卷之二百十四

康熙四十二年十一月至十二月

卷之二百十五

康熙四十三年正月至三月

卷之二百十六

康熙四十三年四月至七月

卷之二百十七

康熙四十三年八月至十月

卷之二百十八

康熙四十三年十一月至十二月

卷之二百十九

康熙四十四年正月至三月

卷之二百二十

康熙四十四年四月至閏四月

卷之二百二十一

康熙四十四年五月至七月

卷之二百二十二

康熙四十四年八月至十月

卷之二百二十三

康熙四十四年十一月至十二月

卷之二百二十四

康熙四十五年正月至三月

卷之二百二十五

康熙四十五年四月至六月

卷之二百二十六

康熙四十五年七月至九月

卷之二百二十七

康熙四十五年十月至十二月

卷之二百二十八

康熙四十六年正月至二月

卷之二百二十九

康熙四十六年三月至五月

卷之二百三十

康熙四十六年六月至九月

卷之二百三十一

康熙四十六年十月至十二月

卷之二百三十二

康熙四十七年正月至四月

卷之二百三十三

康熙四十七年五月至八月

卷之二百三十四

康熙四十七年九月

卷之二百三十五

康熙四十七年十月至十二月

卷之二百三十六

康熙四十八年正月至二月

卷之二百三十七

康熙四十八年三月至四月

卷之二百三十八

康熙四十八年五月至八月

卷之二百三十九

康熙四十八年九月至十月

卷之二百四十

康熙四十八年十一月至十二月

卷之二百四十一

康熙四十九年正月至三月

卷之二百四十二

康熙四十九年四月至七月

卷之二百四十三

康熙四十九年閏七月至九月

卷之二百四十四

康熙四十九年十月至十二月

卷之二百四十五

康熙五十年正月至三月

卷之二百四十六

康熙五十年四月至六月

卷之二百四十七

康熙五十年七月至九月

卷之二百四十八

康熙五十年十月至十二月

卷之二百四十九

康熙五十一年正月至三月

卷之二百五十

康熙五十一年四月至八月

卷之二百五十一

康熙五十一年九月至十月

卷之二百五十二

康熙五十一年十一月至十二月

卷之二百五十三

康熙五十二年正月至二月

卷之二百五十四

康熙五十二年三月至四月

卷之二百五十五

康熙五十二年五月至七月

卷之二百五十六

康熙五十二年八月至十月

卷之二百五十七

康熙五十二年十一月至十二月

卷之二百五十八

康熙五十三年正月至四月

卷之二百五十九

康熙五十三年五月至七月

卷之二百六十

康熙五十三年八月至十月

卷之二百六十一

康熙五十三年十一月至十二月

卷之二百六十二

康熙五十四年正月至三月

卷之二百六十三

康熙五十四年四月至五月

卷之二百六十四

康熙五十四年六月至七月

卷之二百六十五

康熙五十四年八月至十月

卷之二百六十六

康熙五十四年十一月至十二月

卷之二百六十七

康熙五十五年正月至三月

卷之二百六十八

康熙五十五年閏三月至五月

卷之二百六十九

康熙五十五年六月至九月

卷之二百七十

康熙五十五年十月至十二月

卷之二百七十一

康熙五十六年正月至三月

卷之二百七十二

康熙五十六年四月至六月

卷之二百七十三

康熙五十六年七月至八月

卷之二百七十四

康熙五十六年九月至十月

卷之二百七十五

康熙五十六年十一月

卷之二百七十六

康熙五十六年十二月

卷之二百七十七

康熙五十七年正月至二月

卷之二百七十八

康熙五十七年三月至四月

卷之二百七十九

康熙五十七年五月至六月

卷之二百八十

康熙五十七年七月至八月

卷之二百八十一

康熙五十七年閏八月至十月

卷之二百八十二

康熙五十七年十一月至十二月

卷之二百八十三

康熙五十八年正月至三月

卷之二百八十四

康熙五十八年四月至六月

卷之二百八十五

康熙五十八年七月至九月

卷之二百八十六

康熙五十八年十月至十二月

卷之二百八十七

康熙五十九年正月至四月

卷之二百八十八

康熙五十九年五月至八月

卷之二百八十九

康熙五十九年九月至十月

卷之二百九十

康熙五十九年十一月至十二月

卷之二百九十一

康熙六十年正月至三月

卷之二百九十二

康熙六十年四月至五月

卷之二百九十三

康熙六十年六月至七月

卷之二百九十四

康熙六十年八月至九月

卷之二百九十五

康熙六十年十月至十二月

卷之二百九十六

康熙六十一年正月至二月

卷之二百九十七

康熙六十一年三月至五月

卷之二百九十八

康熙六十一年六月至八月

卷之二百九十九

康熙六十一年九月至十月

卷之三百

康熙六十一年十一月

大清聖祖合天弘運文武睿哲恭儉寬裕孝敬
誠信中和功德大成仁皇帝實錄目錄

進

實錄表

光祿大夫太保兼太子太傅保和殿大學士兼戶部尚書
二等伯加四級臣馬齊光祿大夫經筵日講官起居注少
保兼太子太保保和殿大學士仍兼管吏部戶部尚書翰
林院掌院事加二級又加一級臣張廷秀光祿大夫經筵
講官太子太傅文華殿大學士仍兼理戶部尚書事務加
五級又加二級臣蔣廷錫等誠惶誠恐稽首頓首
上言伏以

帝治開天謨烈垂萬年之燕翼。

皇猷炳日覲揚昭百代之鴻規。

式政教於宮廷蒼生永賴。

煥典章於簡冊藻采長新慶流清晏之黃

輿帙富古今之青史用伸揚扆祇慎編

摩欽惟

聖祖合天弘運文武睿哲恭儉寬裕孝敬誠信
功德大成仁皇帝

中 and 建極。

位育成能。

峻德巍巍樹邁帝超王之軌範。

神功廣運擴蟠天際地之經綸。備作述於一

身。統君師於萬國。事

天敬

祖誠心歷九獻而彌虔。盡孝尊

親隆禮奉

兩宮而交摯。恩覃錫類弘教育於宗支。禮重引

年。賸勲勞於耆舊。敝官方而澄吏治。大

齊錄本

二

一

法小廉。訓士習而礪廉隅。風醇俗厚。宵

衣旰食。時思稼穡艱難。鄙屋窮簷咸俾

室家康樂。駐

翠華於六壩波靜淮壖。停

玉輦於三門。

恩流砥柱。紀東南之底績。屢厯

宸衷。溯畿輔之安瀾。俱由

廟算。詩陳太史。域中徧補助之施。獄慎士師。法

外沛矜全之德。蠲賦則動盈億萬。按省

分年。恤災則發賑再三。含哺鼓腹。道宗

洙泗表萬世之師型。學契考亭闡千秋

之理奧。牙籤層疊時勤午夜丹黃。寶墨

淋漓常帶

九天雨露。性通太極定律曆之淵源。學貫羣

書。證圖經之同異。拔多士而頻加慈榜。

羅才俊而咸列駕班。文教覃敷既躋隆

平之治。武功赫濯復彰捷伐之勲。靖方

夏而芑蘩俱銷。莅邊庭而塵氛永靖。榆

齊錄本

三

溪梓嶺。頒曆者四十九家。蟠木流沙貢

賁者千八百國。然猶躬行節儉。志切謙

冲。屆耄期而益勵精勤。際邳隆而彌深

乾惕。藩服請加

尊號。惟慰諭其悃忱。臣民齊上

徽稱。胥恭聆夫教誡。是以深仁厚澤。若乾施坤

載之靡涯。盛業隆猷與日照月臨而並

著。迨乎

升遐之日。遠鄉僻壤。亦哀慕無窮。即今紀載之

官。述燉揚麻。實名言莫罄也。欽惟

皇帝陛下

盛德日新。

孝思維則。

總萬幾而無逸。常存繼述之心。

徧九域以宣恩。咸仰率由之治。

監於成憲。梓材之丹。獲勤修。

緬厥前徽。冊府之規。繩備美。特稽舊典。爰

簡詞臣。乃於雍正元年二月。

聖訓

命臣馬齊臣張廷玉臣蔣廷錫為監修總裁官。臣朱軾為總

裁官。臣勵廷儀臣鄂爾奇臣特古武臣拉錫臣俞兆晟臣杭奕祿為副

總裁官。臣吳家驥臣李錦臣陳邦直臣吳龍應臣徐學柄臣周爾巽臣索珠臣拉爾巴漢

臣花善臣湯儀臣費揚古臣星載泰臣常英臣常保臣文保臣阿必達臣舒禔克

臣多爾濟臣朱爾略臣為纂修官。近紫宸而開館。披

黃帕以翻書。發蘭臺秘集之藏。做金匱

琅函之式。年經月緯。謹據事而成編。部

晰條明。共分曹而紀要。恪勤九載。璀璨

千函。恭成

聖祖仁皇帝實錄聖訓合目錄。凡例。清漢蒙古

文。共一千二十九卷。繕寫進

呈。臣等幸遇昌期。愧膺史職。濡毫授簡。每

歎繪天賦海之難。捧篋陳書。不勝蠡測

管窺之懼。伏願

紹庭永式。

繩武聿昭。

本深宮寤寐之瞻依。

示寰宇勲華之運會。

飭綱陳紀。睹家法於美牆。

秉道綏猷。闡心傳於簡牘。昭茲來許。長展

寶錄以凝床。佑啟後昆。永鞏鴻圖。而錫

福。臣等無任瞻

天仰

聖激切屏營之至。謹奉

表隨

進以

聞

雍正九年十二月二十日光祿大夫太保兼太子太

傅保和殿大學士兼戶部尚書二等伯加四級臣馬齊

光祿大夫經筵日講官起居注少保兼太子太保保

和殿大學士仍兼管吏部戶部尚書翰林院掌院事

加二級又加一級臣張廷玉光祿大夫經筵講官太子

太傅文華殿大學士仍兼理戶部尚書事務加五級

又加二級臣蔣廷錫等謹上表

纂修官

監修總裁

光祿大夫保兼太子太傅保和殿大學士兼戶部尚書二等伯加四級臣馬齊

光祿大夫經筵講官太子太傅保和殿大學士仍兼管吏部戶部尚書翰林院掌院事

總裁

總裁

光祿大夫文華殿大學士兼吏部尚書臣朱軾

副總裁

光祿大夫經筵講官太子少傅吏部尚書加三級臣勵廷儀

光祿大夫議政大臣協理學務兼理戶部事務臣鄂爾奇

光祿大夫議政大臣領侍衛內大臣都統加三級臣拉

資政大夫戶部左侍郎加一級臣俞兆晟

資政大夫禮部左侍郎兼副都統加一級臣杭

纂修滿漢文

纂修滿漢文

通奉大夫內閣學士兼禮部侍郎加一級臣德齡

通議大夫通政使兼詹事府掌印學士臣留保

中憲大夫日講官起居注翰林院侍讀學士加一級臣許王猷

中議大夫翰林院侍講學士加二級臣顧仔

奉政大夫左春坊左諭德兼翰林院修撰加一級臣王希曾

奉直大夫日講官起居注左春坊左贊善兼翰林院檢討加二級臣吳家驥

文林郎翰林院編修臣李錦

奉直大夫翰林院編修加五級臣陳邦直

文林郎翰林院編修臣吳龍應

文林郎翰林院檢討加一級臣徐學柄

儒林郎翰林院修撰臣周霽

朝議大夫鴻臚寺少卿御書房總管加一級臣索珠

奉政大夫內閣侍讀臣拉爾巴漢

奉政大夫內閣侍讀臣花善

奉政大夫掌山西道事河南道監察御史臣湯倭

通議大夫三等侍衛兼佐領加一級臣費揚古

中憲大夫原任內閣學士佐領臣星我泰

朝議大夫工部給事中加一級紀錄二次臣常英

憲奏原任講官詹學以原隨侍嘉二級紀錄臣常保

纂修蒙古文

資政大夫理藩院侍郎加一級臣衆佛保

通奉大夫內閣學士兼禮部侍郎加一級臣僧格

通奉大夫內閣學士兼禮部侍郎加一級臣班第

通議大夫理藩院郎中食三品俸加三級臣文保

中憲大夫理藩院郎中加二級臣舒祿克

奉政大夫理藩院郎中臣多爾濟

奉政大夫唐古特學司業加二級臣阿必達

文林郎國子監助教臣朱爾哈斌

收掌

朝議大夫掌河南道事監察御史加一級臣鄂爾寨

中憲大夫佐領臣薩克薩哈

中憲大夫佐領臣都五福

中憲大夫內閣侍讀兼副佐領加二級臣三保柱

奉政大夫兵部員外郎兼副佐領臣拉布坦

奉政大夫內閣撰文中書舍人兼副佐領臣額仲布

奉政大夫內閣撰文中書舍人兼副佐領臣永琦

登仕郎翰林院待詔臣佛成

翻譯滿文

中議大夫戶部郎中兼佐領加一級臣覺羅勒爾珠

修職郎八品筆帖式臣查爾泰	修職郎八品筆帖式臣卓佛和	修職郎八品筆帖式臣官泰	修職郎八品筆帖式臣三圖	修職郎八品筆帖式臣歷祝	修職郎八品筆帖式臣都四德	文林郎七品筆帖式臣台柱	文林郎七品筆帖式臣元德	文林郎七品筆帖式臣常能	奉政大夫筆帖式兼副佐領臣瑞珠	徵仕郎內閣撰文中書舍人臣常海	徵仕郎內閣撰文中書舍人臣福基	徵仕郎內閣撰文中書舍人臣納敏	奉政大夫內閣撰文中書舍人兼副佐領臣馬爾吉	奉政大夫中書科掌印中書舍人兼副佐領臣官勤	奉政大夫通政使司經歷兼副佐領臣旅寶珠	奉直大夫步軍統領衙門員外郎臣欣泰	朝議大夫刑部員外郎兼副佐領加一級臣薩哈諒
--------------	--------------	-------------	-------------	-------------	--------------	-------------	-------------	-------------	----------------	----------------	----------------	----------------	----------------------	----------------------	--------------------	------------------	----------------------

文林郎國子監助教臣吾濟脉	文林郎國子監助教臣集爾泰	奉政大夫國子監助教兼副佐領臣阿爾善	徵仕郎內閣撰文中書舍人臣丹柱爾	徵仕郎內閣撰文中書舍人臣春品爾	徵仕郎內閣撰文中書舍人臣查式策丹	承德郎欽天監五官正臣黃茂	奉直大夫工部主事加一級臣觀音保	奉政大夫刑部主事兼副佐領臣海明	奉直大夫禮部主事加一級臣僧國	承德郎戶部主事臣伊靈河	承德郎吏部主事臣拔特烏	奉政大夫理藩院員外郎兼副佐領臣德成	中憲大夫工部郎中加三級臣泰明山	翻譯蒙古文	五品廕生臣覺羅博麟	大理寺試用筆帖式臣富琦	修職郎八品筆帖式臣福山
--------------	--------------	-------------------	-----------------	-----------------	------------------	--------------	-----------------	-----------------	----------------	-------------	-------------	-------------------	-----------------	-------	-----------	-------------	-------------

奉政大夫筆帖式兼副佐領臣法全

修職郎八品筆帖式臣拔雅恩胡郎

修職郎八品筆帖式臣吾巴士

修職郎八品筆帖式臣齊布坦

修職郎八品筆帖式臣常泰

修職郎八品筆帖式臣尚圖

騰錄滿洲字

中憲大夫拜他喇布勒哈番臣武祿立

奉政大夫戶部員外郎兼副佐領加一級臣恒文

奉政大夫內閣撰文中書舍人兼副佐領臣常寶柱

奉政大夫內閣撰文中書舍人兼副佐領臣官保

奉政大夫內閣撰文中書舍人兼副佐領臣穆通阿

徵仕郎內閣撰文中書舍人臣素諡

徵仕郎內閣撰文中書舍人臣福琛

徵仕郎內閣撰文中書舍人臣佛爾欽

徵仕郎內閣撰文中書舍人臣祜祿順

徵仕郎內閣撰文中書舍人臣五珠

徵仕郎內閣撰文中書舍人臣皂保

徵仕郎內閣撰文中書舍人臣德禮

徵仕郎內閣撰文中書舍人臣德魁

徵仕郎內閣撰文中書舍人臣同泰

內閣副中書舍人臣尼唐阿

內閣副中書舍人臣佟義

內閣副中書舍人臣佟德

內閣副中書舍人臣納錫泰

朝議大夫筆帖式兼副佐領加一級臣托莫海

徵仕郎八品筆帖式加一級臣明寶珠

修職郎八品筆帖式臣廣弘

修職郎八品筆帖式臣魯保

修職郎八品筆帖式臣永福

修職郎八品筆帖式臣恩特赫默

修職郎八品筆帖式臣興德

修職郎八品筆帖式臣三達色

修職郎八品筆帖式臣和達色

修職郎八品筆帖式臣寶善

修職郎八品筆帖式臣增壽保

修職郎八品筆帖式 <small>臣常元</small>	修職郎八品筆帖式 <small>臣福衍</small>	修職郎八品筆帖式 <small>臣盛福</small>	修職郎八品筆帖式 <small>臣傳文</small>	修職郎八品筆帖式 <small>臣武登額</small>	修職郎八品筆帖式 <small>臣傳崑</small>	修職郎八品筆帖式 <small>臣諾穆齊</small>	修職郎八品筆帖式 <small>臣傳寧德</small>	筆帖式 <small>臣明泰</small>	筆帖式 <small>臣德祿</small>	筆帖式 <small>臣蘇基</small>	筆帖式 <small>臣永明</small>	筆帖式 <small>臣豐隆額</small>	筆帖式 <small>臣穆克敦布</small>	筆帖式 <small>臣鄂爾博</small>	禮部試用筆帖式 <small>臣五雲保</small>	工部庫使監生 <small>臣倭陞峨</small>	六品廕生 <small>臣寧泰</small>
-----------------------------	-----------------------------	-----------------------------	-----------------------------	------------------------------	-----------------------------	------------------------------	------------------------------	------------------------	------------------------	------------------------	------------------------	-------------------------	--------------------------	-------------------------	-----------------------------	----------------------------	-------------------------

監生 <small>臣蘇通阿</small>	監生 <small>臣倭可成額</small>	監生 <small>臣費成額</small>	監生 <small>臣班第</small>	監生 <small>臣薩哈齊</small>	膳錄蒙古字	奉政大夫內閣辦事中書舍人兼副佐領 <small>臣多</small>	奉政大夫內閣辦事中書舍人兼副佐領 <small>臣色楊金式</small>	奉政大夫內閣辦事中書舍人兼副佐領 <small>臣僧德</small>	徵仕郎內閣撰文中書舍人 <small>臣扳查爾</small>	文林郎七品筆帖式 <small>臣小格</small>	修職郎八品筆帖式 <small>臣常佳</small>	修職郎八品筆帖式 <small>臣四達色</small>	修職郎八品筆帖式 <small>臣查隆阿</small>	修職郎八品筆帖式 <small>臣褚爾漢</small>	修職郎八品筆帖式 <small>臣羅卜藏</small>	修職郎八品筆帖式 <small>臣廷柱</small>	修職郎八品筆帖式 <small>臣扳達克圖</small>
------------------------	-------------------------	------------------------	-----------------------	------------------------	-------	------------------------------------	---------------------------------------	-------------------------------------	---------------------------------	-----------------------------	-----------------------------	------------------------------	------------------------------	------------------------------	------------------------------	-----------------------------	-------------------------------

修職郎八品筆帖式 <small>臣常在</small>	修職郎八品筆帖式 <small>臣集泰</small>	修職郎八品筆帖式 <small>臣玉齊</small>	修職郎八品筆帖式 <small>臣丹巴</small>	修職郎八品筆帖式 <small>臣九格</small>	修職郎八品筆帖式 <small>臣伍爾圖那蘇圖</small>	修職郎八品筆帖式 <small>臣克隆額</small>	候補筆帖式 <small>臣德寅</small>	監生 <small>臣常德</small>	監生 <small>臣依靈阿</small>	監生 <small>臣常明</small>	監生 <small>臣壽山</small>	監生 <small>臣塞布騰</small>	官生 <small>臣富德</small>	官生 <small>臣莽鼐</small>	官生 <small>臣花廉泰</small>	官生 <small>臣拔特馬</small>	官生 <small>臣明壽</small>
-----------------------------	-----------------------------	-----------------------------	-----------------------------	-----------------------------	---------------------------------	------------------------------	--------------------------	-----------------------	------------------------	-----------------------	-----------------------	------------------------	-----------------------	-----------------------	------------------------	------------------------	-----------------------

官學 <small>生臣巴武馬</small>	官學 <small>生臣根敦布</small>	官學 <small>生臣圖桑阿</small>	官學 <small>生臣陀木濟圖</small>	官學 <small>生臣富樂賀</small>	官學 <small>生臣春丕爾</small>	官學 <small>生臣福湧</small>	膳錄漢字		徵仕郎內閣辦事中書舍人 <small>臣段之璠</small>	徵仕郎內閣辦事中書舍人 <small>臣徐熊</small>	徵仕郎內閣辦事中書舍人 <small>臣霍備</small>	徵仕郎內閣辦事中書舍人 <small>臣陳邦勳</small>	內閣額外中書舍人 <small>臣田志勤</small>	六品廕生 <small>臣王令</small>	舉人 <small>臣陸嘉穎</small>	舉人 <small>臣張錦</small>	即用州 <small>同臣芮時行</small>	候選州 <small>同臣鄒程鳳</small>
-------------------------	-------------------------	-------------------------	--------------------------	-------------------------	-------------------------	------------------------	------	--	---------------------------------	--------------------------------	--------------------------------	---------------------------------	------------------------------	-------------------------	------------------------	-----------------------	--------------------------	--------------------------

候選州	同臣汪宗灃
候選州	同臣袁國霖
候選州	同臣謝王生
候選州	同臣胡振鸞
候選州	同臣李升旭
候選州	同臣楊俊
候選州	同臣張繼齡
候選州	同臣王燮
候選州	同臣沈顯文
候選州	同臣顧居莊
候選州	同臣沈光裕
候選州	同臣彭閏
候選州	同臣張書洛
候選州	同臣陸容錫
候選州	同臣俞允中
候選州	同臣嚴夢桂
候選州	同臣莊景淶
候選州	判臣沈樹栢

候選州	判臣郭峻
候選州	判臣莊今範
候選州	判臣劉文煥
候選縣	丞臣管復禮
候選縣	丞臣虞潢
候選縣	丞臣蔣天寅
候選縣	丞臣魯國維
拔貢	生臣方求義
副榜貢	生臣董文白
監	生臣陸調元
監	生臣路學乾
監	生臣張廷元
生	員臣查米
生	員臣王應麟
生	員臣繆慧

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之一

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

聖祖合天弘運文武睿哲恭儉寬裕孝敬誠信

功德大成仁皇帝諱玄燁

世祖體天隆運定統建極英睿欽文大德弘功

至仁純孝章皇帝第三子也。

母孝康慈和莊懿恭惠溫穆崇天育聖章皇后

佟氏太子太保定南將軍都統一等公贈少

保謚勤襄佟圖賴之女。賦性端凝。居心淑慎。

動嫺內則。德合坤儀。

天心眷佑。聿肇厥祥。年十五。誕

上於景仁宮。乃順治十一年甲午三月十八日

已時也。先是。

孝康章皇后詣

慈寧宮問安。將出。衣裾若有龍繞。

太皇太后見而異之。問知有娠。顧謂近侍曰。朕

曩孕皇帝時。左右嘗見朕裾褶間有龍盤旋。

赤光燦爛。後果誕生聖子。統一寰區。今妃亦

有此祥徵。異日生子。必膺大福。至

上誕降之辰。合宮異香。經時不散。又五色光氣

充溢庭戶。與日並耀。是時。宮人以及內侍。無

不見者。咸稱奇瑞云。

上天表奇偉。神采煥發。雙瞳日懸。隆準岳立。耳

大聲洪。徇齊天縱。稍長。舉止端肅。志量恢宏。

語出至誠。切中事理。讀書十行俱下。畧不遺

忘。自五齡後。好學不倦。丙夜披閱。每至宵分。

凡帝王政治。聖賢心學。六經要旨。無不融會

貫通。洞徹原委。至孝性成。繼志述事。仰承

太祖

太宗肇造鴻基。以守兼創。追念

世祖章皇帝耿光大烈。孺慕終身。奉事

太皇太后

皇太后。竭誠盡敬。歷久彌殷。大德好生。民物在宥。屬精求治。日理萬幾。六十餘年。孜孜如一。戶口繁增。風俗淳美。遠過唐虞之世。料敵制勝。廟算如神。闢前古未闢之封疆。服從來未服之方國。巡閱河工。指授方畧。准黃底定。世賴平成。且多藝多能。允文允武。著作則上婉典謨。吟咏則直追雅頌。精嫺細楷。妙擅擘

實錄卷一

三

窠。挽弓十五鈞。用矢十三握。左右騎射。發必中的。仁至義盡。久道化成。如天之幬。如地之載。如日月之照臨。雨露之濡潤。蓋泰運光昌。世當極治。故篤生

聖人。以贊化育。盛德大業。冠於百王。景福遐齡。超於萬禩。六齡時。嘗偕

世祖皇二子福全。皇五子常寧。問安宮中。

世祖各問其志。皇五子甫三齡未對。皇二子以願為賢王對。

上奏云。待長而效法

皇父。詎勉盡力。

世祖皇帝於是遂屬意焉。八齡踐阼後一日。

太皇太后問

上何欲。奏曰。惟願天下乂安。生民樂業。共享太平之福而已。蓋撫馭萬方。馴致太平。其基已肇於此。

順治十八年辛丑春正月辛亥朔。越七日丁巳。夜子刻。

實錄卷一

四

世祖章皇帝賓天。先五日壬子。

世祖章皇帝不豫。丙辰。遂大漸。召原任學士麻勒吉。學士王熙。至養心殿。降旨一一自責。定皇上御名。命立為皇太子。并諭以輔政大臣索尼。蘇克薩哈。遏必隆。鰲拜。姓名。令草遺詔。麻勒吉。王熙。遵旨於乾清門撰擬。付侍衛賈卜嘉進奏。諭曰。詔書著麻勒吉懷收。俟朕更衣畢。麻勒吉賈卜嘉爾二人捧詔奏知。

皇太后宣示王。賈卜嘉。大臣至是。麻勒吉賈卜嘉

捧遺詔奏知

皇太后。即宣示諸王。貝勒。貝子。公。大臣。侍衛等。宣訖。諸王。貝勒。貝子。公。大臣。侍衛等。皆痛哭失聲。索尼等跪告諸王。貝勒等曰。今

主上遺詔。命我四人輔佐

冲主。從來國家政務。惟宗室協理。索尼等皆異姓臣子。何能綜理。今宜與諸王。貝勒等共任之。諸王。貝勒等曰。

實錄卷一

五

大行皇帝深知汝四大臣之心。故委以國家重務。詔旨甚明。誰敢干預。四大臣其勿讓。索尼等奏知

皇太后。乃誓告於

皇天上帝

大行皇帝靈位前。然後受事。其詞曰。茲者

先皇帝不以索尼。蘇克薩哈。遏必隆。鰲拜等。為

庸劣。遺詔寄託。保翊

冲主。索尼等誓協忠誠。共生死。輔佐政務。不私親戚。不計怨讐。不聽旁人。及兄弟子姪教唆

之言。不求無義之富貴。不私往來諸王。貝勒等。府受其餽遺。不結黨羽。不受賄賂。惟以忠心。仰報

先皇帝大恩。若復各為身謀。有違斯誓。

上天殛罰。奪算凶誅。

大行皇帝神位前。誓詞與此同。是日。鹵簿大駕

全設。王以下文武各官俱成服。齊集舉哀。○

戊午。宣讀遺詔。遣官頒行天下。○孟春。享

太廟。遣輔國公賴護行禮。○遣官祭太歲之神

實錄卷一

六

○己未。

上即皇帝位。是日黎明。遣輔國公都統穆琛祭告

昊天上帝。祝文曰。順治十八年辛丑正月辛亥

朔初九日己未。皇太子臣玄燁昭告於

昊天上帝之前。曰。

皇考大行皇帝上賓。臣恪遵遺詔。俯徇輿情。於

正月初九日。即皇帝位。伏祈

昭鑒。謹奏。遣都統濟世哈告

地祇都統穆里瑪告

太廟理藩院尚書明安達禮告

社稷文與告

天同。

上具孝服詣

大行皇帝几筵前祇告。行三跪九叩禮。受命畢。

具禮服詣

皇太后宮行禮畢。御

太和殿。陞寶座。鳴鐘鼓。中和樂設而不作。王

實錄卷一

七

以下文武各官朝服序立。贊禮官贊上表慶賀。

上命免宣賀表。各官行禮畢。頒詔大赦。詔曰。惟

我國家受

天眷命。

祖功

宗德。肇造丕基。我

皇考大行皇帝。盛德至仁。英資大度。續承曆數。統一寰區。恩澤洽於多方。政教臻於上理。方

期邦國永底雍熙。不幸奄棄臣民。遽升

龍馭。顧以太寶屬於眇躬。朕兢兢在疚。本不忍

聞。而諸王貝勒大臣文武官員人等。僉謂神

器既已攸歸。天位不宜久曠。堅請再三。朕是

以俯徇輿志。勉抑哀衷。於是月初九日。祇告

天地。

宗廟。

社稷。即皇帝位。仰惟

上天眷佑之篤。

實錄卷一

八

祖宗付託之隆。涼德冲齡。膺茲重寄。敬圖觀光。揚烈。用紹無疆之休。其以明年為康熙元年。與天下更始。式衍舊恩。聿弘新化。於戲。孝思惟則。永深繼述之懷。忠悃載摠。實賴勗勗之佐。凡爾親賢文武。其尚輔翼菲躬。共矢嘉謨。以成至治。布告天下。咸使聞知。○詔內恩赦。凡十四條。○諭禮部。朕惟自古聖賢之君。必有顯號徽稱。用昭功德之隆。垂於萬世。此國家不易之鉅典也。仰惟我

皇者大行皇帝續紹鴻緒統一寰區十有八年
敬

天尊

祖勤政愛民奉侍

慈闈克諧孝道敦睦宗族攸敘彝倫典學日新
修身思永制禮作樂振武崇文敕法明刑立
綱陳紀盛德之事不一而足朕方與天下臣
民均切恬戴不幸

龍馭上賓顧予冲人嗣膺大統仰承佑啟之恩

敢後顯揚之禮謹考彝章宜升

尊謚爾部詳察典禮具奏○庚申王貝勒貝子

公等公主王妃等各歸齋宿部院官員於各

衙門齋宿仍照常供事閒散官員於午門外

齋宿○辛酉遣官頒

登極詔於天下○癸亥

皇太后諭諸王貝勒貝子公內大臣侍衛大學
士都統尚書及文武官員等爾等思報朕子
皇帝之恩偕四大臣同心協力以輔幼主則

名垂萬世矣○

上諭禮部及議政王貝勒大臣等禁中設立

上帝壇及

奉先殿祭典著查歷代有無舊例定議具奏尋
議歷代舊制祇有冬至祀

天於南郊宮中

上帝壇應請罷祭至

奉先殿應照洪武三年例朝夕焚香朔望瞻拜
時節獻新生忌致祭用常饌行家人禮從之

○禮部等衙門請

上節哀親政得旨朕哀痛方深未忍遽理政務

但國事重大不可久曠各衙門章疏著於二

十一日進奏○免直隸各省總督鎮巡三司

差官進香○甲子王以下及大臣官員齊集

大光明殿設誓親王岳樂傑書率貝勒貝子

公內大臣侍衛大學士都統尚書及在廷文

武諸臣誓告於

皇天上帝曰

冲主踐阼。臣等若不竭忠効力。萌起逆心。妄作非為。互相結黨。及亂政之人。知而不舉。私自隱匿。挾讐誣陷。徇庇親族者。

皇天明鑒。奪算加誅。

大行皇帝神位前誓詞與此同。○乙丑。議政王貝勒。大臣等。遵旨詳議祀典。議得。

園丘方澤。祈穀壇太廟。時享。祫祭。朝日壇。夕月壇。社稷壇。三皇廟。先農壇。歷代帝王廟。文廟。太歲壇。關帝廟。城隍廟。紅衣礮等祀。應照舊。

致祭外。其大享合祀。

太廟階下合祭之禮。相應罷祭。又金朝諸陵應照前致祭。明朝諸陵亦應照前供獻。從之。○己巳。

上詣

梓宮前。行常祭禮。

上每日三次尚食。哀慟不已。

皇太后揮淚撫慰。左右無不感動。○庚午。諭宗人府吏部等。大小各衙門。朕以冲齡踐阼。初

理萬幾。所賴爾大小臣工同心協力。矢効贊襄。爾等職掌各有攸司。國計民生關係甚重。必精白乃心。公廉正直。力圖振作。謹慎勤敏。始可仰報。

先帝厚恩。匡輔朕躬不逮。嗣後務須敬修職業。凡事之得失。言之是非。果有真知確見。即當商酌力行。期於上裨國事。下濟民生。其一切處分問罪。尤當虛公平恕。使情法允孚。無縱無枉。乃不負朕委任爾等之意。如或視為虛文。必罪不宥。○諭吏部都察院。國家設立言官。職司耳目。凡發姦剔弊。須據實指陳。乃可澄肅官方。振揚法紀。嗣後指陳利弊。必切實可行。糾彈官吏。必確有証據。如叅款虛誣。必不寬貸。爾部院即通行嚴飭。○辛未。改會試期於三月初九日。○封多羅豫郡王多鐸子董額為多羅貝勒。○兵部尚書管左都御史事阿思哈等。遵旨嚴議巡方事宜十款。一。禁地方官諂媚巡方。私派供應。一。察州縣官於

額外私派。果有私派。即行糾叅。如巡按不糾。以溺職論。○巡按於屬官內。清廉賢能者。不舉。而反劾。貪酷闇茸者。不効。而反舉。被臣衙門及科道訪察糾叅。革職從重處分。○糾叅大貪。應首嚴於藩臬道府。今後若但以庸冗老病塞責者。將該御史從重治罪。○巡按於地方利弊。要必實心詳察。差滿後。曾與何利除何弊冊報臣衙門詳核。真實者。以優等論敘。草率虛誑者。題叅懲處。○訪拏衙蠹。必先本院衙門姦惡。其次督撫司道府廳州縣分司衙門。及地方棍豪。實係大姦大惡之人。務須嚴拏。毋致巧脫漏網。其該管官隱匿。即行叅處。如已揭報。而御史故為寬縱。指稱訪拏名色。捉拏無罪之人。詐取財物。隨復縱放者。該撫即行糾叅。○巡按入境。及出巡地方。鋪陳等物。應自攜帶。蔬薪發銀買辦。如地方官獻媚取榮。及巡按攜帶主文書役家人厨役前站之類。以致擾驛累民。督撫訪確。即行題

叅。○巡按入境後。屬員不得越境叅謁。其隨巡該道刑官。辦理公事之後。即令速回。其督撫按互相饋遺結納。照舊禁革。○互糾之法。原欲彼此覺察。然從未有督撫指叅一巡方者。今後御史倘有不法。而督撫明知不糾者。一并議處。○考核御史。立為上中下三等。其在地方清慎端嚴。恪遵

上諭。潔己愛民。獎廉去貪。興利除害。聽斷明恪。鋤蠹捍患。軫恤民瘼。察核錢糧。招撫流移。墾荒興學等事。無不修舉。又能大破情面。糾察地方惡官劣衿者。臣等照例酌量分別加級紀錄。回道管事。其次謹慎奉法。察吏安民者。准其回道管事。其行事碌碌。無實政及民者。叅送吏部降調外用。至於有徇情貪賄等弊。臣等訪確。即據實糾叅。革職治罪。得旨。這所議各款。務須恪遵力行。不得視為虛文。著通行嚴飭。○安徽操江巡撫宜永貴。以病請代。慰留之。○壬申。免湖廣蘄州廣濟縣順治十

七年分蝗災額賦有差○兵部議覆江南總督郎廷佐疏言隨征右路總兵官劉芳名標下官兵奉有發回本鎮之旨。但寧夏健卒。方到江寧。一旦撤回。慮省會單虛。且往返滋擾。應准暫住江寧。以資防禦。從之○廣西道御史張志日條陳三款。一州縣久任宜恤。一盜案叅罰宜清。一序俸則例宜平。下部議○癸酉。戶部議覆福建道御史胡文學疏言江南浙江江西三省漕糧。改折收銀。恐有雜派。乞嚴飭撫按。痛除積弊。止許照價徵收。不得仍借兌漕為名。恣行科索。以致輸納稽遲。有誤兵餉。應如所請。從之○巡按蘇松六府御史張鳳起疏言。蘇松常鎮四府。差繁賦重。漕米折價。請仍照原議。每石折銀一兩。下部知之○陝西巡撫張璠疏。請除宜君縣荒地錢糧。從之○丁丑。吏部議覆山西道御史胡來相條奏科道糾叅。必據所聞具奏。定有具揭之人。嗣後科道糾叅。應註明身經目擊。或某人

具揭字樣。若審係情虛。即行反坐。誣揭之人。亦反坐。從之○戊寅。和碩安親王岳樂等議上

大行皇帝尊謚。謹按自古有天下者。祖有功而宗有德。故凡勲高大定功。垂奕業者。類皆稱祖以尊之。其廟祀百世弗祧。此世所由稱也。又按謚法。法度大明。敬慎高明。曰章。洪惟大行皇帝。神武止戈。崇文勸學。恩澤覃敷於庶物。孝治立極於人倫。德固懋昭。功尤隆著。是以化行教洽。遠至邇安。生民以來。莫斯為盛。臣等謹咨羣議。載考彝章。

大行皇帝尊謚宜

天錫之曰

體天隆運。英睿欽文。大德弘功。至仁純孝。章皇帝廟號

世祖。得旨是。著該衙門擬撰冊文進覽○轉刑部左侍郎宜理布。為吏部右侍郎。陞原任工部啟心郎雷虎。為工部右侍郎○己卯。諭吏

部。戶部錢糧係軍國急需。經管大小各官。須加意督催。按期完解。乃為稱職。近覽章奏。見直隸各省錢糧。拖欠甚多。完解甚少。或係前官積逋。貽累後官。或係官役侵那。借口民欠。向來拖欠錢糧。有司則叅罰停陞。知府以上。雖有拖欠錢糧未完。仍得陞轉。以致上官不肯盡心督催。有司怠於徵比。支吾推委。完解愆期。今後經管錢糧各官。不論大小。凡有拖欠叅罰。俱一體停其陞轉。必待錢糧完解。無欠。方許題請開復陞轉。爾等即會同各部寺。酌立年限。勒令完解。如限內拖欠錢糧不完。或應革職。或應降級處分。確議具奏。如將經管錢糧未完之官陞轉者。拖欠官。并該部。俱治以作弊之罪。○諭吏部。兵部。國家設官分職。立法黜陟。用示勸懲。其有法應懲創。而罪不致於實降黜革者。降級留任。以觀後效。乃使過之鉅典也。向來題定京官降級留任者。一年之後。題請開復。並未議及外官。內外各

官開復之例。自應畫一。嗣後凡內外大小文武官員。有因事降級。仍留任者。三年無過。准與題請開復。如三年之內。復有過被降。即以後降之日為始。計滿三年。方與題請開復。其三年之內。如有罪過罰俸。仍照日月扣除。至於拖欠錢糧。能作速完解。緝拏盜賊。能依限捕獲者。俱即准題請開復。○吏部議覆。江南總督郎廷佐保奏。崇明縣革職知縣陳慎留任。得旨。崇明縣知縣陳慎。當賊圍攻崇明。堅心守禦。全成功大。因拖欠錢糧革去之官。著復還。再於此上加一級。以知州用。新選知縣龔榜。仍著留崇明縣任。○山西道御史余縉疏言。舟山宜守。小門宜防。請於小門。安置礮位。嚴添防戍。以保全東南疆土。下部速議行。○翁牛特固山貝子搜色。台吉親達哈布路。魯格隆等各進香。并獻馬。酌納之。二月。辛巳朔。以奉移梓宮日期。告祭。

大行皇帝○戶部議准禮科給事中成肇毅疏言浙江南米不宜濫委通判收放並令督撫釐革一切勒索陋規從之○壬午奉移

梓宮至景山

壽皇殿。

上扶

龍輿步行號泣王以下滿漢文武官員伏地悲慟既至

壽皇殿安奉畢。

上哀戀不已。

皇太后再三慰諭乃回宮○轉工部右侍郎介山為兵部右侍郎刑部右侍郎尼滿為左侍郎陞左副都御史對喀納為刑部右侍郎通政使科爾科代為工部左侍郎原任都察院啟心郎圖爾特為左副都御史○癸未

上詣

梓宮前行初祭禮○是日釋服○甲申

上詣

梓宮前行釋祭禮○丁亥

上詣

梓宮前行月祭禮○遣大學士額色黑祭

先師孔子○戊子祭

大社

大稷遣都統穆里瑪行禮○

聖祖母皇太后聖壽節遵

懿旨免行慶賀禮○己丑免江南崇明縣順治十六十七年舊欠錢糧以被賊圍城時城內

人民協力保守故也○庚寅兵部議覆巡視

南城御史徐越條奏校尉干連詞訟不服拘

提應令承審衙門移關該衛提究如有校尉

親屬冒稱校尉名色者巡城御史竟行提究

重處得旨嗣後校尉等犯罪者著先拏議罪

後移文鑒儀衛○壬辰諭禮部

皇考大行皇帝御宇時妃董鄂氏賦性溫良恪

恭內職當

皇考上賓之日感

恩遇之素深。克盡哀痛。遂爾薨逝。芳烈難泯。典禮宜崇。特進名封。以昭淑德。追封為貞妃。所有應行禮儀。爾部察例具奏。○乙未。諭吏部。刑部等大小各衙門。朕惟歷代理亂不同。皆係用人之得失。大抵委任官寺。未有不召亂者。加以僉邪附和。其間則為害尤甚。我

太祖

太宗痛鑒往轍。不設宦官。

先帝以宮闈使令之後。偶用斯輩。繼而深悉其

姦。是以

遺詔有云。

祖宗創業。未嘗任用中官。且明朝亡國。亦因委用宦寺。朕凜承

先志。釐剔弊端。因而詳加體察。乃知滿洲佟義。內官吳良輔。陰險狡詐。巧售其姦。熒惑欺蒙。變易

祖宗舊制。倡立十三衙門名色。廣招黨類。恣意妄行。錢糧借端濫費。以遂侵牟。權勢震於中

外。以竊威福。恣肆貪婪。相濟為惡。假竊威權。要挾專擅。內外各衙門事務。任意把持。廣興營造。糜冒錢糧。以致民力告匱。兵餉不敷。此二人者。朋比作姦。撓亂法紀。壞本朝淳樸之風俗。變

祖宗久定之典章。其情罪重大。稔惡已極。通國莫不知之。雖置於法。未足蔽辜。吳良輔已經處斬。佟義若存。法亦難貸。已服冥誅。著削其世職。十三衙門。盡行革去。凡事皆遵

太祖

太宗時定制行。內官俱永不用。又劉正宗亦當仰遵

遺詔置之重典。但念其年老。姑從寬免。其黨類亦皆赦宥。爾等即傳布中外。刊示曉諭。咸使知悉。用昭除姦瘴惡大法。○戶部議覆雲南貴州總督趙廷臣條奏。滇黔田土荒蕪。當亟開墾。將有主荒田。令本主開墾。無主荒田。招民墾種。俱三年起科。該州縣給以印票。永為

已業其滇省衝路殘黎如楊林永昌等處請將順治十七年本省秋糧借貸為春種之需應如所請從之○工部題請停止臨清甄差從之○丙申命和碩簡親王濟度子德塞襲封和碩簡親王○丁酉戶部議覆江寧巡撫朱國治疏言江南屯政錢糧屯田道專責應與都司一例考成應如所請從之○免河南磁州安陽等十三州縣順治十七年分旱災額賦有差○予故鎮國公喇都護祭葬謚端純○戊戌以原任兵部督捕左侍郎吳達禮為通政使司通政使○山東道御史趙祥星疏言在京棍徒招搖嚇詐應責司坊官挨戶稽查置循環簿朔望赴五城御史查驗得旨京城內重大之地惡棍挾詐官民肆行擾害殊屬可惡以後實係光棍俱著照強盜例擬罪餘如所奏○予故鎮國公郭蓋祭葬謚端純○己亥予故一等阿達哈哈番副都統舒理渾祭一次○庚子春分朝

日於東郊遣兵部尚書阿思哈行禮○辛丑祈殺於

上帝遣多羅貝勒諾尼行禮○癸卯吏部議覆吏科給事中楊雍建疏言六科係緊要衙門應仍添設滿洲官各二員應如所請從之○免直隸新安縣順治十七年分水災額賦十二○甲辰禮部題會試取士原分南北中卷後因雲貴等省未經平定將中卷分入南北卷內今各處省分俱全應仍將浙江江西福建湖廣廣東五省江寧蘇松常鎮徽寧池太淮揚十一府廣德一州為南卷直隸及山東山西河南陝西四省奉天等處為北卷四川廣西雲南貴州四省廬鳳安慶三府徐滁和和三州為中卷其南北中卷中式額數照赴試舉人之數均派從之○乙巳大學士會同禮部遵旨議覆歷代帝王祀典如遼太祖金太祖元太祖俱係開創之主仍宜入廟崇祀至商中宗高宗周成王康王漢文帝宋仁宗

明孝宗守成七帝。應照會典。在各陵廟致祭。宋臣潘美。張浚。已經罷祀。無庸議。從之。○丁未。遣官祭

先農之神。○予故一等精奇尼哈番額駙顧爾布西。祭葬如例。○兵部題。漢中興安。壤接蜀楚。伏莽未靖。請將暫駐興安之提督王一正。率標兵三千。移鎮漢中。其興安總兵于奮起。標兵三千。應再添撥附近標營兵一千。以資守禦。從之。○工部議。覆寧夏巡撫劉秉政

請令靈州營兵疏濬河道一疏。得旨。設立營兵。原以防守邊方。剿禦賊寇。平時須休養訓練。方於戰守有裨。若疏濬河道。原非營伍事務。劉秉政輒請靈州營兵疏濬。不致勞民傷財。既恐勞民。何獨不念勞兵。大不合理。劉秉政著吏部議處。河道作何疏濬。爾部另議。○戊申。戶部議覆江南總督卽廷佐疏言。臨江臨海百姓。修理烽墩。奉法惟謹。應予豁免丁徭。畧示優恤。從之。○又議覆陝西巡撫張璠

疏言鳳翔所屯地八十五頃。山磧荒蕪。丁糧應准豁免。從之。○阿霸垓多羅郡王沙克沙僧厄土默特鎮國公古睦歸化城土默特都統古魯格。台吉訥爾布。喀喇沁塔布囊厄林陳。敖漢多羅郡王馬濟克蘇尼特多羅貝勒額駙薩穆札。察罕達爾漢綽爾濟五臺山居住阿旺羅卜藏喇嘛。四子部落台吉諾木齊。盛京薩哈爾圖噶布楚喇嘛。吳喇忒鎮國公褚崇克。巴林額駙齊門。克西克騰。台吉馬納虎。阿祿科爾沁多羅郡王朱爾札哈。察哈爾和碩親王額駙阿布柰科爾沁水圖郡王額參。萬齊忒多羅額爾德尼郡王阿賴充。烏朱穆泰和碩車臣親王蘇達尼。札魯特多羅貝勒桑噶爾。鄂爾多斯固山貝子古祿西希卜等。各進香獻馬。酌納之。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之一

實錄卷一

二十七

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之二

監修總裁官光祿大夫太僕寺卿太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院學事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

順治十八年辛丑三月庚戌朔遣官祭

實錄卷二

一

歷代帝王○鄖陽撫治白秉真題留總兵官
穆生輝得旨鄖鎮嚴疆彈壓需人穆生輝久
歷其地洞悉地利賊情兵民倚賴著留原任
○定直隸各省巡撫以下州縣以上徵催錢
糧未完分數處分例○辛亥諭吏部設官用
令國家大務除授陞遷宜立畫一之規方可
永行無弊所進品級考為時已久官銜品級
尚有未符宜再詳訂務期允當以垂永久不
得各為本衙門起見但計目前致日後紛更

著九卿科道會同詳酌妥議。以成一代典制。
○戶部題。總理漕務侍郎巴格。三年差滿。并
標下員兵。俱請更換。得旨。專理漕儲侍郎。職
任重大。須賢能之人。巴格練達素著克勝。此
任。且更換往返。滋擾驛遞。巴格並筆帖式兵
丁。俱著久任。不必更換。○甲寅。諭吏部。凡進
奏本章。關係政務。應切實陳奏。若於事理之
外。牽引比擬。多用繁詞。事情正理。反不明悉。
嗣後內外一切本章。須直據事理。明白敷陳。
不得用浮泛文詞。爾部即傳諭內外大小衙
門。一體遵行。○以原任吏部侍郎覺羅碩博
會為都察院左副都御史。○免順天豐潤縣
順治十七年分。水災額賦十之二。○刑部議
覆。保定巡撫王登聯條奏。大盜橫行。恃窩主
為與援。藏身打點。無所不至。又有引線者。潛
通消息。以作嚮導。二者共謀造意。分股得財。
應將窩主審實。照例擬罪。引線之人。審有造
意共謀實情。即以窩主論。從之。○乙卯。清明

實錄卷二

二

節。

上詣

梓宮前致祭。○遣官祭

永陵。

福陵。

昭陵。○丙辰。

上詣

梓宮前。行月祭禮。○以大學士成克鞏。為會試

正考官。衛周祚。為副考官。○丁巳。諭戶部。八

實錄卷二

三

旗水淹田地。每田二日。給米一斛。近聞食用
不敷。殊堪憫念。著每田一日。給米一斛。應給
之米。候糧船抵通。即於船上支給。不必等候
入倉。既省搬運腳價之費。又杜倉中攪和糠
粃。且船隻早得回空。其支兌時。該管官務嚴
加稽察。不得疎忽滋弊。擾害船丁。○戊午。諭
戶部。近觀直隸各省錢糧。逋欠甚多。徵比難
完。率由紳衿藐法。抗糧不納。地方官瞻徇情
面。不盡法徵比。嗣後著該督撫責令道府州

縣各官立行禁飭嚴加稽察。如仍前抗糧。從重治罪。地方官不行察報。該督撫嚴察。一并題叅重處。○以翰林院編修汪煉南提督順天學政。○平西王吳三桂疏報擒獲龍吉兆。克平馬乃土司。下部知之。○庚申。工部尚書管都察院左都御史事霍達以病乞假。令暫假調理。○廣東廣西總督李棲鳳疏報雷縣西海賊黃占三等率眾投誠。下部知之。○辛酉。以故江南崇明縣知縣陞授知州陳慎。有守城功。追贈布政使司右叅議。廕一子入監讀書。○雲南巡撫袁懋功請減雲南屯田賦額三之一。下部議。○袁懋功又疏言。投降人眾。皆無藉亡命之徒。雖令歸農。實有難歸之勢。應令所到地方。准其入籍。酌量安置。隨編保甲。嚴查出入。或有無主田畝。聽其開墾。照例起科。下部議。○壬戌。陞前鋒叅領阿穆爾圖為正黃旗蒙古副都統。○癸亥。命保定府滄州德州三處水淹田地。照京城八旗例。每

田一日給米一斛。○刑部議覆。巡按蘇松六府御史張鳳起條奏姦民隔屬赴控。請發被告所住地方官審結。如事虛陷。將赴控并代書之人。俱以光棍例治罪。從之。○甲子。江南桐城縣生員周南詣闕條奏十款。○請復鄉舉里選之舊。○請善海防之策。○重巡方之差。○裁監司之兼任。○重民牧之揀選。○施法外之仁。○覈錢糧而慎赦免之條。○察荒墾以清賦稅之原。○培舊人以作後起之彥。○請垂簾以勸盛治之隆。得旨。生員雖有禁不許建白。此所奏款內。亦有可採。著議政王貝勒大臣九卿科道會同詳確議奏。○乙丑。授浙江提督田雄二等侯。福建提督馬得功三等侯。○丙寅。諭吏部等大小各衙門。國家紀綱法度。因革損益。代有不同。必開創之初。籌畫精詳。貽謀弘遠。所定典例。可以垂之奕世。永行無弊。我

太祖

太宗創制立法垂裕後昆自當世守勿替今應將大小各衙門見行事務如銓法兵制錢穀財用刑名律例内外文武各官一應恩卹廕贈諭祭造葬款項繁多難以枚舉或滿漢分別參差不一者或前後更易難為定例者著議政王貝勒大臣九卿科道會同詳考

太祖

太宗成憲斟酌更定彙集成書勒為一代典章永遠遵行其有今昔異宜時勢必須變通有

滿漢懸殊定例難於歸一者亦須斟酌至當

詳明具奏○丁卯

萬壽節停止行禮○遣官祭

福陵

昭陵○遣官祭真武東嶽城隍之神○巡按湖

南御史仵昉疏報順治十七年湖南所屬

州縣開墾田地共二千八百九十頃七十二

畝下部知之○戊辰諭禮部次日於大高圓

殿祈雨○己巳免湖南澧州石門縣順治十

七年分旱災額賦十之二○予故工部侍郎巴進泰祭一次○壬申以上

大行皇帝尊謚遣官告祭

天地

太廟

社稷○吏部議覆都察院奏京師五城原各設有滿御史二員於順治十五年八月遵旨裁

汰一員今五城事繁請仍各添滿官一員應

如所請從之○郭爾羅斯鎮國公昂阿車根

之多羅貝勒古穆喀拉車里克之鎮國公奇

他忒台吉達爾瑪等各進香獻馬酌納之○

以原任河南按察使王原膳為福建按察使

司按察使○癸酉奉冊寶上

大行皇帝尊謚冊文曰承先啟後恢大業於無

疆揚烈觀光薦徽稱於有永載考顯名之典

用摠報本之誠允合輿情肇修殷禮洪惟

皇考大行皇帝聖神天縱睿哲性成帝命溥將

紹萬年之寶錄先猷式廓大一統之鴻圖敷

政而陳紀立綱。弘備燕詒之遠畧。典學而朝乾夕惕。直符精一之真傳。敬

天昭事以寅恭。倍肅明禋之舉。尊

祖單心於繼述。特虔聖訓之修。孝治丕崇。極

慈宮之隆養。彝倫攸敘。睦宗族以深仁。慎庶獄

而敕祥刑。軫民依而施大賚。恩膏普洽。躋海

甸於雍熙。聲教遐宣。合殊方而王享。乃聖不

自聖。億萬民之疾苦。時切其咨。而勤以益勤。

十八載之憂勞。日新靡倦。盛美莫勝。夫揚扆

于萬世

八

聲名洵冠乎古今。簡冊流徽。賁光華於日月。

雲初蒙澤。同高厚於乾坤。屬祔廟以升中。敬

揚休而昭德。爰咨有衆。請命於

天。謹奉冊寶上尊謚曰

體天隆運英睿欽文大德弘功至仁純孝章皇

帝。廟號

世祖。伏惟

聖靈赫鑒。景制茂膺。益篤垂裕之庥。永衍熾昌

之祚。寶文曰

世祖體天隆運英睿欽文大德弘功至仁純孝
章皇帝之寶。是日。頒詔天下。詔曰。朕聞帝王有
豐功盛德。表著於當時。則必有顯號。徽稱。昭
垂於奕世。斯國家之令典。古今之隆規也。洪
惟我

皇考大行皇帝。聰明睿智。文武聖神。恢一統之
鴻圖。躬兼勦守。繇萬年之寶曆。道叶神人。以
誠孝奉

于萬世

九

慈闈。以寬仁惇九族。典學而朝。乾夕惕。勵精而
旰食宵衣。軫念民依。水旱切其咨之警。澄清
吏治。激揚收明作之功。血氣共識尊親。海宇
咸通聲教。夫何遽升

龍馭。莫逮攀號。朕以涼德。嗣守丕基。方繼述之
是圖。豈追崇之敢後。景慕遺烈。率由舊章。謹
命諸王。貝勒。大臣。文武羣臣。稽考禮文。恭薦
謚號。僉言允合。肇舉上儀。乃於今年三月二十
四日。祇告

天地

宗廟

社稷奉冊寶恭上

皇考大行皇帝尊謚曰

體天隆運英睿欽文大德弘功至仁純孝章皇帝廟號

世祖於戲

帝德難名固揄揚之莫罄

聖謨丕顯期昭示於無窮布告萬方咸使知悉

○甲戌戶部題各省清漢字新錢鑄造無多

實錄卷二

請將舊鑄厘字錢暫准行使限一年收燬得

旨厘字制錢准行使二年收燬以便小民貿

易○禮部議覆雲南巡撫袁懋功疏言滇省

土酋既准襲封土官子弟應令各學立課教

誨俾知禮義地方官擇文理稍通者開送入

泮應試應如所請從之○予故漢軍都統三

等伯少保兼太子太保石廷柱祭葬謚忠勇

○丁丑命文武各官有恩詔後病故者仍照

原銜給與誥封○戊寅諭吏部禮部

太宗皇帝時蒙古各部落盡來歸附設立理藩

院專管外藩事務責任重大今作禮部所屬

於舊制未合嗣後不必兼禮部銜仍稱理藩

院尚書侍郎其印文亦著改正鑄給○諭戶

部理藩院外藩蒙古當

太祖

太宗皇帝時同滿兵各處爭戰効力不分內外

皆一體敘功給與世職今在內各官俱給俸

祿外藩世職亦應給俸兩部院即會同酌議

實錄卷二

妥確具奏○命禮部祈雨并飭大小臣子修

省圖治以格

天心

夏四月庚辰朔享

太廟遣都統宗室羅託行禮○以原任吏部尚

書覺羅科爾昆為鑲黃旗蒙古副都統○巡

按湖北御史顧豹文疏言襄陽彝陵荊州等

鎮下將弁招撫賊寇行令該地方文武官分

別歸農入伍下部知之○壬午以一等阿達

哈哈番侍衛傳達理隨殉

世祖予祭葬。謚忠烈。○予故授誠二等精奇尼哈番王世選祭葬。○兵部題軍政之後缺多人少。故將歷俸一年以上者請旨挨俸陞補。各武職有專防統轄之責。若止歷俸年餘即行陞轉。營伍事務未能練達。嗣後俱俟俸滿三年以上者。方行陞轉。見在員缺應儘俸滿者陞補。從之。○癸未定外藩蒙古世職俸祿例。視在內世職俸祿之半。○巡按順天御史

實錄卷二

十二

陳洪柱疏報順天所屬州縣共墾田一千三百三十九頃六十九畝。下部知之。○以鑒儀衛冠軍使劉永灝署都督同知協理衛事。○甲申吏部議覆原任左都御史魏裔介疏言湖廣總督宜駐荊州。查前此湖督春駐荊州秋駐武昌。今應專駐荊州以資保障。從之。○禮部題安南國王黎維祺傾心向化有協力討賊之勞。應照例賞銀一百兩錦四端紵絲十二表裏。令兵部撰給敕書。得旨交趾傾心

向化復協助剿賊深可嘉尚。爾部以故明卑視外國之禮議覆殊不合禮。著另議。尋議應賜銀五百兩大蟒緞二疋。粧緞二疋。錦二疋。綵緞表裏各十二。仍令兵部撰給敕書付差官齎歸。從之。○乙酉兵部遵旨議覆粵西接壤苗獠土司誠屬要地。都統線國安應以都統太子少保三等伯鎮守廣西。加征剿將軍總管定藩下官兵。再撥與綠旗官兵三千員名駐劄桂林府。令廣西提督楊遇明領廣西提標兵六千赴廣東。再於廣東稍緩地方兵丁酌調一千改為廣東提督標兵。楊遇明以原銜充廣東提督。楊遇明缺應將廣西左翼總兵官馬雄陞補。統原額兵五千仍駐梧州。原任兩廣總督王國光應加鎮海將軍。撥八旗漢軍兵二千。每翼副都統各一員。每旗統領二員。每叅領下防禦二員。驍騎校各一員。俱令攜帶家口赴廣東駐防。王國光沈永忠楊遇明應駐潮州等處要地。著會同平南王

實錄卷二

十三

尚可喜及督撫商確具奏。至軍機事務亦公同酌議從之。○丙戌月祭

世祖章皇帝○陞兵部督捕左侍郎喇哈達為工部尚書○補行雲南鄉試以員外郎劉紱為正考官。中書張灝為副考官○調鑲紅旗蒙古都統特晉為滿洲都統○奉天府府尹張尚賢進盛京地圖○丁亥諭吏部兵部近例文武各官凡緣事應降級者每一級抵銷紀錄二次。今後武功所得紀錄應降一級。即以一次紀錄抵銷。餘仍舊例行○兵部題湖廣總督既駐劄荊州。督鎮不應同駐一城。應將荊州總兵官馮源淮并標下官兵移駐荊門州。荊門州舊撥駐防安陸副將下官兵應移駐當陽縣。又經畧前標總兵官南一魁原領官兵隨經畧進取雲貴。今經畧奉旨回京。南一魁并標兵二千名見駐衡州。雲貴已闢衡州係腹裏地方。既有城守副將官兵駐防。總兵官並官兵二千名均應議裁。又南陽汝

寧亦屬腹裏。天津逼近京師。不必設立重鎮。總兵官並標兵均應議裁。得旨南汝界連三省與賊逼近。天津近接海口。此二處總兵官及官兵不可裁。衡州係腹裏地方。總兵官及官兵俱著裁去○戊子。贈陣亡駐防江寧佐領巴薩禮拜他喇布勒哈番。予祭葬如例○四川道御史夏人全條奏。田賦正額每畝多不過二三錢。少止幾分。惟地方官攤派科斂較正額多且十餘倍。少或數倍。乞通行禁飭責成督撫巡按嚴加訪察。凡州縣私派私徵及司道府廳不克檢察。一并叅處。如督撫按身先作俑。有不互糾。事發坐罪。即使兵行地方。事有難已。尤必多方調濟。不得藉口濫派小民。其在內經管錢糧各部院衙門。禁止各役勒取使費。犯者即坐該管官失察之罪。臣更有請者。閩滇地方見在用兵。百姓苦憊難堪。臣請做照崇明恩例。敕下該省巡撫確察供應最苦地方。分別奏聞。重者免其田賦一

年。次者免其田賦之半。下部知之。○庚寅。贈故隨征江南右路總兵官左都督劉芳名太子太保。賜葬。加祭九次。○壬辰。諭戶部。旗下滿官。世職大者。照世職支俸。所管職任大者。照職任支俸。今在外各武官。有世職者。世職雖太。止照見管職任支俸。殊非滿漢一體之意。嗣後在外武官。世職大者。照世職支俸。職任大者。照職任支俸。其心紅紙張等項。係衙門公費。不應算入俸銀數內。著另給柴薪等項。在內各官。已經裁革。外官亦應裁革。其在外無世職武官。應照在內武官一體支俸。爾部即確議具奏。○吏科給事中嚴沆疏言。海氛不靖。非戰艦不能撲滅。上年臣鄉修造海船時。地近省會者。尚不敢盡派民間。至僻遠小邑。督撫見聞稍有不及。皆均攤地畝。加派催徵。近日正供糧餉。逋欠猶多。而復加攤額外。勢必至失業拋家。若重念民艱。別圖補救。莫如量行捐款。暫應急需。既助缺額之費。亦

杜擾派之端。得旨。著將加派地方。指實明白回奏。○癸巳。陞原任啟心郎馬希納為兵部督捕左侍郎。以一等侍衛綽克託為理藩院左侍郎。○乙未。以原任都察院左都御史魏裔介補原官。○陞左副都御史朱之弼為戶部右侍郎。○以護軍統領伯車爾布為鑲紅旗蒙古都統。○予故都統鎮國將軍巴思漢祭葬如例。○丙申。

孝端文皇后忌辰。遣官祭

昭陵。○

上詣

世祖章皇帝梓宮前。行百日致祭禮。○是日。命

大學士進

觀德殿。恭捧入

太廟。神位至

壽皇殿門外黃幄內。滿漢大學士各一員。於

神宇空點處填青。又於

觀德殿內。恭捧入

奉先殿神位隨入

太廟神位輿後由景山東門出至景運門

上素服奉迎隨輿後行至乾清宮先捧入

太廟神位安設黃案上次捧入

奉先殿神位安設入

太廟神位之右行安神位禮俟欽天監擇吉奉入

太廟

奉先殿○丁酉封鎮國公珣色子傳勒赫為鎮

國公○以二等侍衛劉芳標為隨征江南右

路總兵官○旌表孝子直隸易州呂世奇節

婦大名縣張昭妻趙氏雄縣董光綬妻解氏

子懇妻閻氏南皮縣湯橋妻穆氏各給銀建

坊如例○戊戌吏科給事中嚴沆遵旨回奏

伏見浙江造船分派各州縣皆取辦於地方

里甲如遂安知縣錢周鼎計派一千七百餘

兩烏程知縣程雲步計派一萬二千餘兩諸

暨知縣張士琳計派七千餘兩伏乞敕下該

撫將各縣攤派情弊嚴行查訊臣前疏未及

指參實屬愚昧得旨這奏內私派等項情弊

著嚴察議奏嚴沆身為言官既知此等情弊

即應指參何待奉旨回奏方行指出殊不合

理著嚴飭行○己亥添設廣東協鎮將軍下

副都統二員參領四員防禦八員驍騎校七

員每一佐領下設小撥什庫六名○轉福建

右布政使于際清為廣東布政使司左布政

使陞江南按察使藍潤為山西布政使司右

布政使○庚子祭

世祖章皇帝行奉安

寶宮禮○以謝國寶出首叛寇李之春功授三

等阿達哈哈番襲四次○朝鮮國王李柵遣

陪臣洪柱元等恭上

世祖章皇帝香○壬寅諭吏部滿洲郎中員外

郎向來俱照漢官定為五品職銜雖有正從

頂帶相同全無分別今思漢官郎中員外郎

原有內外陞轉之例滿洲郎中員外郎例不

外陞。每多久任。難與漢官相同。且由員外郎陞郎中者。品級仍同。何謂之陞。以後滿官郎中。應改為正四品。員外郎。應改為正五品。爾部仍酌議妥確具奏。○吏部議覆吏科給事中楊雍建疏言。科道據揭糾參。恐揭報之人。非謀詐。即挾讐。請行禁止。查科道糾參。有虛即反坐之例。應無庸議。得旨。楊雍建原奏甚明。科道不許據揭糾參。則光棍不敢挾私逞刁。平人不致無辜被陷。著照所請。通行禁飭。

平定本二

二十

○兵部議覆廣西巡撫于時躍疏言。安南都統使莫敬耀。向化投誠。請給印敕。應如所請。得旨。授都統使。給與印敕。係故明之例。本朝不宜沿習。安南遠方一國。莫敬耀傾心向化。自當另授官職。以示鼓勵。應照何國歸附例。授何官銜。給何印信。爾部會同禮部確議具奏。○癸卯。敕諭安南國王黎維祺曰。朕惟修德來遠。盛代之弘謨。納款歸仁。人臣之正誼。既輸誠而向化。用錫命以宣恩。褒忠勸良。典

甚重也。爾安南國王黎維祺僻處炎荒。保有厥眾。乃能被服聲教。特先遣使來歸。循覽表文。忱恂具見。古稱識時俊傑。主庶幾有之。朕心深為嘉尚。用賜敕獎諭。仍賚爾差官釵仁根。銀幣衣服等物。遣安南館通事序班一員。伴送至廣西境上。并敕廣西巡撫沿途撥發兵馬。導之出疆。昭朕嘉與懷柔至意。爾受茲寵命。其益勵忠勤。永作藩屏。恪修職貢。丕承無數。欽哉。特諭。○江寧巡撫朱國治議覆巡

平定本二

一

按蘇松六府御史馬騰陞疏言。海防官駐劄事宜。請將蘇州海防同知移駐常熟縣。松江海防同知移駐上海縣。各令其督修沿海橋梁。馬路整堡。協催兵餉。嚴行保甲之法。稽查出洋船隻。有警與各營汛將弁相機商酌。庶責任專而事無貽悞。下部知之。○甲辰。策試天下貢士陳常夏等奏。太和殿前。制曰。朕惟帝王平治天下。開創守成。其道並隆。締造維艱。續承匪易。政治修明。

羣黎安遂。文德覃敷。遠邇武功。克奏教寧。乃可祇紹先猷。茂登上理。朕以冲齡誕膺丕緒。仰惟

太祖

太宗肇開大業。逮我

世祖。式廓鴻圖。亦既治定功成。顯垂謨烈矣。朕

茲欲紹述

祖宗。必何如而後可以久安海宇歟。繼治之道

首重典章。今紀綱法度。雖已彰明。然因革損

益。豈無順時制宜者。何以酌定章程。以為萬

世之規。歟。閭閻愉悌。視吏治污隆。何以示之

激揚。以奠民生歟。風俗淳漓。由人心邪正。何

以使之樸誠。以敦教化歟。至於底定四方。賴

師武臣力。然必賞明罰當。而後可以鼓勵勲

庸。凡行間功罪。宜如何清敘。以昭勸懲歟。爾

多士。蘊懷有素。各抒所學。毋泛毋隱。詳著於

篇。用裨維新之治。朕將親覽焉。○予故三等

輔國公舒淑。祭葬如例。○予故原任吏部左

侍郎禪代。祭一次。○乙巳。以故義王孫可望

子孫徵湛襲爵。○丙午。陞宗人府府丞楊時

薦。為都察院左副都御史。○以原任通政使

司通政使高辛印。補原官。○以巡按江西御

史內陞侍郎許世昌。為福建巡撫。陞宗人府

啟心郎朱昌祚。為浙江巡撫。原任兵部督捕

理事官張朝珍。為安徽操江巡撫。○大學士

金之俊。以病乞休。慰留之。○經畧大學士洪

承疇。乞休。優旨允之。仍命察例加恩。○戊申。

傳臚。賜殿試貢士馬世俊等三百八十三人。

進士及第出身有差。

五月。己酉朔。○庚戌。吏部議覆吏科給事中

嚴沆條奏。凡督撫具疏請告。即開門養安。距

奉命之期。將及數月。必致廢事。今議嗣後督

撫。具疏告病之後。且宜候代。勉強理事。不得

偕端曠廢。從之。○辛亥。

上詣

世祖章皇帝寶宮前。行大祭禮。○壬子。行繹祭

禮○以山東巡撫許文秀督率屬員查解逃人四百六十二名。加兵部尚書兼太子少保○命八旗都統確查八旗廕子世次遠近。以防虛偽○都察院議覆兵部尚書管左都御史事阿思哈條奏。各省巡按差宜停止。俟二三年之後。選重臣巡察。應劄行各省巡按。將事務交與撫臣。速行來京。從之○乙卯。月祭世祖章皇帝○丁巳。諭吏部。戊戌。己亥。兩科。修撰。編修。庶吉士等。教習已久。今加考試。應分別授職。除宗德宜。孫一致。徐元文。華亦祥。葉方藹。五員。已經授職。仍留翰林院衙門外。其庶吉士王吉人。田麟。楊正中。杜臻。王鼎。蘇宣化。周之麟。劉雯。曠。陳志紀。周漁。王颺。昌。王鍾靈。李天馥。陳廷敬。朱之佐。詹養。沉。蔣弘道。吳珂。鳴。金國用。十九員。俱著授為編修。檢討。彭之鳳。王曰高。俞之琰。趙之符。朱訓誥。劉如漢。王追騏。許瑋。八員。俱著以給事中用。王遵訓。甯爾譟。馬大士。楊維禱。戈著。鄭為光。六員。俱

著以監察御史用。郭諫。曹鼎望。鄭端。朱錦。趙濟。美。周訓。成。羅繼謨。劉元勳。周燦。盧乾元。鍾朗。唐寅清。鄭日奎。李為霖。十四員。俱著以部屬用。顧高。嘉。楊大鯤。翟世琪。三員。俱著照甲第外用○贈殉難江南江浦縣知縣許立達。按察使司副使。廕一子入監讀書○奉天府府尹張尚賢。疏言。盛京形勢。自興京至山海關。東西千餘里。開原至金州。南北亦千餘里。又有河東河西之分。以外而言。河東北起開原。由西南至黃泥窪。牛莊。乃明季昔日邊防。自牛莊。由三岔河。南至蓋州。復州。金州。旅順。轉而東。至紅嘴。歸復。黃骨島。鳳凰城。鎮江。鴨綠江口。皆明季昔日海防。此河東邊海之大畧也。河西自山海關以東。至中前所。前衛。後所。沙河。寧遠。連山。塔山。杏山。松山。錦州。大凌河。北面皆邊。南面皆海。所謂一條邊耳。獨廣寧一城。南至閭陽驛。拾山站。石屯。衛海口。相去百餘里。北至我朝新插之邊。相去數十里。

東至盤山驛高平沙嶺。以至三岔河之馬圈。此河西邊海之大畧也。合河東河西之邊海以觀之。黃沙滿目。一望荒涼。倘有姦賊暴發。海寇突至。猝難捍禦。此外患之可慮者。以內而言。河東城堡雖多。皆成荒土。獨奉天遼陽海城三處。稍成府縣之規。而遼海兩處。仍無城池。如蓋州鳳凰城金州。不過數百人。鐵嶺撫順。惟有流徙諸人。不能耕種。又無生聚。隻身者逃去大半。畧有家口者。僅老死此地。實

實錄卷二

二十六

無益於地方。此河東腹裏之大畧也。河西城堡更多。人民稀少。獨寧遠錦州廣寧。人民湊集。僅有佐領一員。不知於地方如何料理。此河西腹裏之大畧也。合河東河西之腹裏觀之。荒城廢堡。敗瓦頽垣。沃野千里。有土無人。全無可恃。此內憂之甚者。臣朝夕思維。欲弭外患。必當籌畫隄防。欲消內憂。必當充實根本。以圖久遠之策。下部議。○戊午。以阿達哈哈番宋文科馬進功。俱為廣東副都統。○戶

部議覆都察院左副都御史朱之弼條奏。一。

淮庫宜核收支應。請飭漕運總督將節年出入掛欠。并餘庫各項銀兩。造冊具題。嗣後於歲底造冊奏報。以憑核銷。一。楚漕宜還原項。查楚省接連滇蜀。大兵征調。必由之地。南糧一項。恐不足用。漕項銀米。仍應留濟軍需。一。漕折宜清完欠。應請飭下江南浙江巡撫。嚴查解交細數造冊。其未完之銀。有無侵蝕。查明具題。以憑核追。一。錢局宜查銅本。應請飭錢法侍郎。即將各局未完本息。嚴限追完報部。得旨。依議嚴行。○己未。陞散騎郎覺羅伊爾門。為鑲紅旗護軍統領。○庚申。陞通政使司右通政王天眷。為宗人府府丞。○戶部議覆。巡按江寧御史何可化條奏。蘆課六弊。坍塌之賠。累宜豁。收解之耗。費宜革。豪強之隱。佔宜清。洲書之飛。洒宜禁。佃蠹之侵。欠宜究。蠲免之條例。宜溥。俱應如所請。從之。○辛酉。遣官祭

實錄卷二

二十七

關聖帝君○朝鮮國王李柵遣陪臣表都朔洪專表賀

登極賞賚如例○癸亥陞湖廣按察使王孫蔚為福建布政使司右布政使以原任湖廣按察使劉興漢為江南按察使司按察使○禮部尚書王崇簡以衰病乞休慰留之○甲子諭吏部向來各部院事務設有王貝勒等管理因設啟心郎後止設尚書等官故將啟心郎盡裁去後該部議稱漢啟心郎練習事務

實錄卷二

三十八

請旨有改為主事留部者有候缺未補者此等俱係四品年久仍應以四品用今將在部以主事用者并候補者俱著照原品用○乙丑廣東巡撫董應魁疏報逆渠鄧耀竊踞廉州之龍門歷有年所撫之愈驕頻寇雷陽臣與平南靖南二王督臣商調水陸官兵直搗龍門蕩其巢穴救彼難民鄧耀遠遁交趾交彝發兵逆擊殺溺賊衆無算鄧耀削髮竄匿粵西被獲應請正法下部知之○丁卯定六

部滿洲蒙古漢軍郎中員外郎員數吏部三十二員四司不論旗分文選司考功司郎中各四員員外郎各六員驗封司稽勲司郎中各二員員外郎各四員戶部五十六員旗分司每旗郎中一員員外郎二員廣東司山西司江南司福建司郎中各一員員外郎各二員山東司雲南司浙江司四川司湖廣司廣西司陝西司貴州司河南司江西司郎中各一員員外郎各一員禮部二十員四司不論旗分郎中各二員員外郎各三員兵部四十員四司不論旗分郎中各四員員外郎各六員刑部四十八員十四司不論旗分江南司福建司山東司雲南司郎中各二員員外郎各二員浙江司四川司郎中各一員員外郎各三員湖廣司陝西司貴州司河南司廣東司廣西司山西司江西司郎中各一員員外郎各二員工部四十八員旗分司每旗郎中一員員外郎二員營繕司屯田司郎中各三

實錄卷二

三十九

員。員外郎各三員。虞衡司都水司郎中各二員。員外郎各四員。○內大臣郭邁哭臨時託疾規避。部議應絞立決。得旨免死。著革職。○戊辰諭吏部等衙門。向來各衙門議覆本章。係一衙門者限二十日。與別衙門會議者限一月。其限內難完者。具題寬限。近見各衙門。曾經題請寬限。因無再定期限。往往任意遷延貽誤。以後各衙門事務。必須限內完結。如限內難完。題明寬限。自寬限之日計算。一衙

字彙卷二

三十

門者。仍限二十日。會議者限一月完結。若不能完。將緣由開明具奏。其行文直隸各省察問事情。及提取人犯等事。以回文及人犯到日計算。亦照前限完結。如仍前含糊遲悞。任意遷延。治罪不貸。○陞大理寺少卿盧興祖為廣東巡撫。○山西巡撫白如梅疏言。原任文水縣知縣曹之賢。順治六年姜逆叛亂。同士民守城三晝夜。值安國臣等內變。拘繫獻賊。全家受戮。忠節可憫。請加卹典。下部察議。

○賜故多羅貝勒齊克辛謚懷思。輔國公滿都謚懷思。○己巳。陞總督倉場戶部左侍郎高景為工部尚書。以原任戶部左侍郎傅維鱗為工部左侍郎。○以散秩大臣劉良佐為江安提督。○延綏巡撫張中第。以病乞解任。從之。○庚午。賜故義王孫可望謚恪順。○壬申。江南沐陽縣知縣段上彩殉難。廕一子段公黼入監讀書。尋病故。以其弟段公弼代之。○癸酉。夏至祭。

字彙卷二

三十一

地於

方澤。遣鎮國公敦齊行禮。○朝鮮國進貢使臣盜買硫黃。其民越江剽奪。盜買銅馬。國王李柵上疏引咎。云臣守藩無狀。民各為心。致令進京從人。邊上頑抵節次。冒犯禁制。臣誠惶悚無以自容。恭候大朝處分。乃蒙

皇上特施寬典。非但不加譴責。亦不許遣官查問。止令該部移咨詳審擬罪。字小之恩。柔遠之德。視古無前。與天同大。臣與一國臣民。不

勝感戴。謹將各犯責供擬罪奏聞。得旨該部核擬其本內有不合處免其察議。○乙亥初。世祖章皇帝時。選大臣之子傅爾察等十四人在。

長春宮讀書。至是改令入監讀書。○兵部等衙門議覆安南國都統使莫敬耀帶領高平等處地方效順。應增本秩。封為歸化將軍。以示鼓勵。印信敕書。俟進貢到京之日給發。從之。○工科給事中袁懋德疏請本色物料自

實錄卷二

三十三

順治十八年為始。暫行改折。以佐軍需。部議歲所需用。仍解本色。其餘自康熙元年為始。各照數折價。從之。○丙子。諭工部。朝房關係重大。蓋造尚未全備。未肅觀瞻。兩旁空地著俱蓋造。○命湖廣鄖陽總兵官李逢茂改充湖廣沅州總兵官。○以慕義侯譚弘下投誠偽總兵嚴啟俸等四十八員。著有勞績。俱授都督僉事。賞賚如例。○喀爾喀台吉達賴楚虎爾等遣使進貢。賞賚如例。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二

實錄卷二

三十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

順治十八年辛丑六月戊寅朔以兵部督捕

實錄卷三

二

右侍郎陳協為總督倉場戶部左侍郎○左都御史魏裔介疏言請定司道三年久任之法除拏解逃人及漕糧足額題有定例此外非歷俸三年不與遷轉庶久任在職諳練民事部議如所請從之○魏裔介又言巡按已經停止事務盡屬撫臣但有按臣可行而撫臣不便行者宜加變通敬陳六款一考察賢否宜責成道府一綜核錢糧宜責成藩司一察點兵馬宜轉委該道一祀典旌表宜責成

道府一刑名宜責成臬司一嚴拏蠹役應報部者報部應彙題者彙題下部知之○兵部議覆駐防西安總管傅喀禪疏請添甲兵一千名應將本省督標兵五百名撫標兵五百名裁去改給該總管從之○浙江提督田雄疏辭侯爵兼請解提督任得旨卿擒獲福王投誠功大又隨大兵攻戰勞績甚多鎮守海疆宣力有年故特授侯爵用示眷酬宜祇遵成命益殫忠猷以副倚任不必遜辭○己卯

實錄卷三

三

以原任雲南巡撫林天擎為延綏巡撫○庚辰禮部題喪禮百日期滿大祭禮畢恭請皇上陞殿文武各官見朝辭朝謝恩等禮照舊舉行從之○吏部題康熙元年朝覲官員請照順治十六年例各省藩臬各一員各府佐一員代覲雲貴地方初開需員料理應暫行免覲從之○以宗人府啟心郎韓世琦為順天巡撫○定張家口額稅每年一萬兩殺虎口額稅每年一萬三千兩兩翼額稅每翼一

年六千兩○江寧巡撫朱國治疏言蘇松常鎮四府屬并溧陽縣未完錢糧文武紳衿共一萬三千五百一十七名應照例議處銜役人等二百五十四名應嚴提究擬得旨紳衿抗糧殊為可惡該部照定例嚴加議處○辛巳授一甲進士馬世俊為翰林院修撰李仙根吳光為編修○廣本年武會試額一百名○以兵部郎中鍾繼達為寧古塔左翼副都統圖喇為寧古塔右翼副都統赫業為鑲紅旗滿洲副都統○飛牙喀奚蘇克等七屯奇勒爾塞馬爾姓之郎阿等三屯初來歸順進貂皮賞賚如例○甲申月祭

聖祖實錄卷三

三

世祖章皇帝○戶部尚書王弘祚乞假回籍葬親允之○乙酉浙江總督趙國祚疏言科臣姚延啟條奏沿海之地應照邊俸陞轉今台灣屬之臨海黃巖太平寧海溫屬之永嘉樂清平陽瑞安寧屬之鄞縣奉化定海象山俱作邊俸其三郡之道府廳各官請一體照邊俸

陞轉從之○丙戌諭翰林院選拔庶常原以作養人材今科進士特加簡閱取葉映榴鄭之謀申涵芬張玉書朱世熙劉芳詒鄭開極田喜霽王豫嘉徐誥武等十員俱著改為庶吉士教習滿書○戊子陞通政使高辛印為兵部督捕右侍郎○己丑給致仕經畧大學士洪承疇三等阿達哈哈番襲四次○贈山西殉難文水縣知縣曹之賢按察使司僉事予祭葬廕一子入監讀書○庚寅命多羅信郡王鐸尼子鄂扎襲封多羅信郡王○封和碩敬謹親王尼堪子蘭布為多羅貝勒○陞一等侍衛勒貝為正藍旗蒙古都統○陞光祿寺卿哈代為太常寺卿○壬辰山西巡撫白如梅疏言陽和巨鎮僅一守備生鎮單弱新平恭將及處閒僻今議官兵更調緩急得宜又馬邑縣居三邑之中乃設守備朔州係雲西極邊止一操守不足彈壓今亦議更調衡僻適宜天陽二衛屯糧舊多逋欠今議中

聖祖實錄卷三

四

路通判。移駐陽和。稽屯清餉。至和順縣。距栢井驛遠。今議每年原額站銀。解協該驛。無鞭長不及之慮。下部議。○癸巳。吏部題。巡按已經停差。其地方事務。俱交巡撫管理。今議定。巡撫薦舉額數。順天巡撫。應薦方面官一員。有司佐貳官共三員。教官三員。保定巡撫。應薦方面官一員。有司佐貳官共五員。教官五員。江寧巡撫。應薦方面官二員。有司佐貳官共三員。教官三員。操江巡撫。應薦方面官一員。有司佐貳官共三員。教官三員。鳳陽巡撫。應薦方面官二員。有司佐貳官共四員。教官四員。山東巡撫。應薦方面官二員。有司佐貳官共六員。教官六員。山西巡撫。應薦方面官二員。有司佐貳官共六員。教官六員。河南巡撫。應薦方面官三員。有司佐貳官共七員。教官六員。陝西巡撫。應薦方面官四員。有司佐貳官共七員。教官六員。甘肅巡撫。應薦方面官一員。有司佐貳教官共二員。延綏巡撫。應

薦方面官一員。有司佐貳官共二員。教官一員。寧夏巡撫。應薦方面官一員。有司佐貳教官共二員。浙江巡撫。應薦方面官三員。有司佐貳官共六員。教官五員。福建巡撫。應薦方面官二員。有司佐貳官共四員。教官四員。江西巡撫。應薦方面官三員。有司佐貳官共五員。教官五員。南贛巡撫。應薦方面官二員。有司佐貳官共三員。教官二員。鄖陽撫治。應薦方面官一員。有司佐貳官共二員。教官二員。湖廣巡撫。應薦方面官四員。有司佐貳官共七員。教官六員。偏沅巡撫。應薦方面官二員。有司佐貳官共四員。教官三員。廣東巡撫。應薦方面官三員。有司佐貳官共六員。教官六員。廣西巡撫。應薦方面官二員。有司佐貳官共四員。教官四員。四川巡撫。應薦方面官三員。有司佐貳官共七員。教官六員。貴州巡撫。應薦方面官二員。有司佐貳官共三員。教官二員。雲南巡撫。應薦方面官三員。有司佐貳

官共四員。教官三員。漕運總督應薦方面官七員。有司官十六員。佐貳官六員。著為例。從之。○給假大學士傅以漸。以病再疏乞休。令回籍調理。○甲午。陞河南管糧道馬元為湖廣按察使。司按察使。○吏部議覆降調科臣朱紹鳳疏。奏李紳霄以承差起家。冒籍薊州。濫竽中翰。歷陞按察使。又任江寧守道時。穢跡素著。物議沸騰。茲據山西巡撫臣白如梅覆稱。李紳霄原籍山西絳州。曾充巡按衙門書辦。應請革職。從之。○兵部議覆平西王吳三桂疏言。李黨餘孽。偷生房竹。地接漢興。布置隄防。正須嚴密。以王一正標兵駐漢。計畫甚周。惟是房竹之可達漢中者二路。一為興安。一為西鄉漁渡壩。實為漢南門戶。今興安駐兵五千。足資捍禦。惟西鄉無兵。雖設有漁渡壩遊擊。寧足以當一面。且漢中尚有臣下存城官兵。王一正兵馬宜駐西鄉。以防逆賊入漢之路。漢城去西鄉不過二百餘里。呼吸

可通。聲勢聯絡。守西鄉。即所以守漢也。倘臣下官兵家口遷移之後。漢中照設一鎮。以資彈壓。庶為妥便。應如所請。從之。○乙未。予故太子太保工部尚書管都察院左都御史事霍達祭葬如例。○丙申。戶部題各省應解本色物料。量行改折。以濟急需。從之。○丁酉。諭禮部。我國家誕膺天命。撫御寰區。實由太祖皇帝神功聖德肇造丕基。太宗皇帝偉烈顯謨。恢弘大業。暨世祖章皇帝克紹鴻緒。奄有多方。朕以眇躬。繼承大統。追思祖宗詒謀燕翼。啟佑無疆。欲抒孝悃。仰報隆庥。稽考古制。宜進尊稱。以昭功德於奕世。茲擬加上太祖皇帝尊謚為二十字。加上太宗皇帝尊謚為十八字。庶展朕追崇孝思。應行典禮。爾部即詳察開列具奏。其舉行之期。

或在

世祖章皇帝

祔享之前或在

祔享之後著一并察例議奏○諭吏部

世祖章皇帝遺詔內云紀綱法度用人行政不能仰法

太祖

太宗謨烈漸習漢俗於淳樸舊制日有更張朕茲於一切政務思欲率循

祖制咸復舊章以副

先帝遺命內三院衙門自

太宗皇帝時設立今應仍復舊制設內秘書院內國史院內弘文院其內閣翰林院名色俱停罷內三院應設滿漢大學士學士等官爾部即開列銜名具奏○九卿導旨議覆巡按已裁各省督撫奏事件應互相責成擬議從之○戊戌雲南貴州總督趙廷臣疏言平西王吳三桂所得五象臣派官送進京師今

遵諭停止請嗣後境外進獻之物一概停止

以免地方解送之勞下部知之○己亥陞太

常寺卿冀如錫為通政使司通政使○予故

內大臣額爾克戴青祭葬謚勤良○予故副

都統席喇擺牙喇祭一次○庚子戶部議覆

巡按河南御史劉源濬疏言南陽汝寧荒地

甚多應急議開墾但無人承種之荒地耕熟

後往往有人認業興起訟端官即斷明而資

產蕩然矣三年起科雖有定例開種之初雜

項差役使不能免此所以官雖勸耕民終裹

足不前也嗣後請先給帖文以杜爭端開列

姓名年月並荒田四至坐落每歲由縣申府

而道而院則刁訟自息再寬徭役以恤窮黎

除三年起科之外如河工供兵等項差役給

復十年以示寬大之政則人尤鼓舞再借常

平倉穀以資農本分別地方官開墾之多寡

以示勸懲應如所請從之○辛丑戶部議覆

巡視長蘆鹽政御史張冲翼疏言長蘆舊例

引存戶部。先課後引。順治十五年。戶部發引到司。皆爭先求售。減價而沽。以致鹽賤引壅。逋課甚多。請仍循舊例。將引歸部。庶引不虛發。課無逋欠。應如所請。從之。○癸卯。罷進士觀政例。○吏部遵旨議覆。四川陝西總督李國英。未將遊擊楊璟題參。遽爾擅責三品職官。應削去少保。兼太子太保。從之。○福建巡撫徐永楨疏報提督馬得功。剿平逆賊李月高。許于敬。其餘黨下海者。皆掩殺無餘。下部察敘。○乙巳。四川陝西總督李國英疏報。逆賊郝承裔降而復叛。臣提兵親赴嘉定。密檄提鎮諸臣。合營進剿。賊鼠竄沉黎。我兵星馳尾襲。旋就擒俘。其潰散菁莽者。或擒或招。靡有漏網。恢復千餘里之封疆。拯救數萬人於水火。有功人員。均請議敘。得旨。官兵分路進剿。斬關長驅。郝承裔旋就擒俘。具見調度有方。將士効力。在事有功人員。俱著察敘具奏。○丙午。免直隸霸州保定等四州縣水災。慶

雲縣蝗災。本年分額賦有差。○戶部議覆盛京總管吳庫立。侍郎費齊等疏言。積年流徙。今除在鐵嶺係佐領劉國彪所轄。不議外。在尚陽堡者。應設佐領一員。在衛元堡者。與開元相近。應設佐領一員。駐劄衛元堡兼管。在撫順者。應設佐領一員。連盛京兼管。此編過佐領下短少者。應將以後流徙人補給。但新編佐領。若設立佐領。驍騎校筆帖式等。所管之人不多。又需俸餉。應令劉國彪等。遴委能幹撥什庫四名。駐劄鐵嶺尚陽堡衛元堡。撫順等處。令佐領劉國彪等。住盛京總管。其以後流徙人。驗看此四處均勻安插。候居住人多。應編佐領。再行酌議。得旨。人丁雖少。仍設佐領八員。將見在人丁。均分給與。○溧陽縣妖人端應國。妖婦曹氏。妄稱大乘邪教。煽惑愚民。江寧巡撫朱國治捕獲以聞。秋七月。戊申朔。享太廟。遣都統特晉行禮。○乙酉。授投誠偽咸陽

侯祁三昇左都督加少保兼太子太保○免江南宿州鹽城蕭縣順治十七年分旱災額賦有差○吏部遵旨開列復設內三院衙門應用官員人數具奏得旨內三院各設滿洲大學士一員漢大學士一員滿洲學士二員漢軍學士一員漢學士一員內秘書院著巴哈納金之俊胡世安為大學士鄂謨克圖胡兆龍為學士內國史院著額色黑成克鞏衛周祚為大學士查布海折庫納艾元徵為學士內弘文院著蔣赫德李蔚為大學士布顏王熙為學士其見缺滿洲大學士一員滿洲學士二員漢軍學士三員推舉應補者具奏見在漢大學士六員內後有缺出不必推補止定三員以後推補內三院衙門大學士學士照見定六部尚書侍郎品級○吏部議覆廣西巡撫于時躍疏奏投誠土司二十處未頒印信請敕下吏部查明鑄造應如所請從之○庚戌命給駐防西安江寧副都統園地

各二十日家口三十八口馬十八匹准支給芻糧其杭州京口福建駐防副都統協領等無園地副都統家口五十口馬三十匹協領等家口四十口馬二十匹並支給芻糧○福建總督李率泰疏報偽總兵林俊奇等共六十一員偽兵人等共一千三十九名口投誠下部議敘○辛亥吏部尚書孫廷銓乞假省親允之○戶部議覆山西巡撫白如梅疏言天成陽和二衛屯糧銀共一萬七千有奇委之衛弁致多逋欠應令中路通判移駐陽和兼管東路以便稽屯清餉從之○癸丑陞通政使司左通政董篤行為太常寺卿○戶科給事中彭之鳳疏請恭修

太祖

太宗

世祖實錄得旨該部詳議速奏○甲寅月祭世祖章皇帝○轉刑部尚書杜立德為戶部尚書○陞通政使司右通政王度為大理寺卿

○吏部議覆刑科給事中張松齡疏言選官之法。無論進士舉人等項。核定職銜。概令在籍候選。其赴部點卯近例。一切停止。吏部查照年月。先後挨次掣選。發憑各省巡撫。催令赴任。應如所請。但見在赴部點卯者。應儘其先選。在籍候選各官。有丁憂病故患疾等項。應令該撫隨時報部。以憑註冊扣選。免致選後更張。從之。○乙卯。吏部議覆雲南貴州總督趙廷臣疏言。馬乃土司。應改為普安縣。設知縣一員。又分設土司巡檢。准令世襲。聽其土俗自治。仍節制於縣官。并將姓名報部。以便後裔承襲。從之。○設立理藩院四司名目。為錄勲清吏司。賓客清吏司。柔遠清吏司。理刑清吏司。給印信。○戶部議覆戶科給事中柯聶條奏。江南浙江編審弊端五款。一。里甲田畝之額數宜均。一。花分子戶之積弊宜清。一。詭寄之陋規宜懲。一。冒籍之立戶宜除。一。冊書之買充宜禁。俱應如所請。敕直隸各省

撫臣嚴加察處。以清蠹弊。從之。○丙辰。封故固山貝子特爾祜子噶爾哈圖。固山貝子薩弼子巴喀。俱為鎮國公。○丁巳。命河南南汝總兵官移駐鄧州。○吏部議敘投誠偽布政使朱企鰲。例應以五品官用。但係故明宗室。不便錄用。亦無授與職銜之例。請令入旗酌量畜養。得旨。朱企鰲傾心向化。應入旗下。給與文官品級養贍。其給何銜品。爾部議奏。○己未。吏部議覆戶科給事中蘭挺達疏言。候補內外各官。項款不一。缺少人多。經年守候。請一概准其回籍。照名次先後題補。應如所請。凡候降。候補裁缺。起復降調等項。京官以奉旨之日為前後。外官以咨文到部之日為前後。挨次敘用。從之。○戶部議覆土科給事中陰應節條奏錢糧之弊。一。州縣那移。一。紳士包攬。一。土豪冒名紳戶。一。隔縣寄莊抗糧。祈敕該撫嚴查懲治。俱應如所請。從之。○庚申。授和碩額駙馬爾渣海。一等阿思哈尼哈

番○戶部尚書王弘祚條奏滇疆事宜五款
一司道宜久任。一州縣宜部選。一投誠宜解
散。一荒殘宜軫恤。一廬座宜多設下部議○
免陝西同州臨潼岐山扶風郿縣本年分電
災額賦有差○辛酉以吏部尚書覺羅伊圖
為內弘文院大學士○禮部遵旨議覆加上
太祖皇帝

太宗皇帝尊謚典禮重大似應在

世祖章皇帝神牌

祔享之後再為舉行得旨是○以少保兼太子
太保左都督祁三昇為雲南援剿後鎮總兵
官原任湖廣沅州總兵官張鵬程為貴州安
順總兵官調湖廣右路總兵官王平為貴州
思南總兵官○旌表節婦江西廬陵縣胡良
弼妻劉氏永豐縣宋元卿妻鍾氏各給銀建
坊如例○壬戌中元節祭
世祖章皇帝○遣官祭
永陵

福陵

昭陵○癸亥轉工部尚書高景為刑部尚書○
旌表節婦河南真陽縣許大金妻周氏苦節
六十年烈婦濟源縣商彝妻宗氏夫亡自盡
郭之翰妻段氏奉姑年久姑葬自盡各給銀
建坊如例○乙丑免江南睢寧縣順治十七
年分旱災額賦○丙寅諭吏部國家政務委
任庶官分理必大小臣工各稱其職乃可收
得人之效近見在京部院各衙門官員有稱
職者有不稱職者宜速加甄別以示勸懲內
三院滿漢大學士學士各部院尚書侍郎等
官俱著自行陳奏其滿郎中向來亦係自陳
今同漢郎中以下至筆帖式俱著部院各該
衙門堂官實心詳加考核稱職與否應去應
留開送爾部再嚴加考核具奏如將不稱職
者草率徇情姑留倘後事發覺將當日考核
之官即以徇庇治罪以後京察考滿郎中不
許自陳永著為例○予故湖廣荊州總兵官

鄭四維祭葬如例○戊辰以原任學士麻勒吉拜他喇布勒哈番劉清泰為內秘書院學士大理寺少卿屈盡美郎中常額為內弘文院學士御史董衛國為內國史院學士○湖廣總督張長庚疏報陣斬偽總兵劉傳並獲其黨周文棟命誅之○庚午吏部題甄別京官請仍照順治十七年例會同都察院吏科河南道考察從之○免直隸新河縣本年分電災額賦十之三○兵部議覆禮科給事中姜希轍疏言盜賊撲滅宜早隣寇會剿宜嚴請令督撫嚴飭所屬凡遇盜賊竊發在隣省歧地者即申報本省并隣省督撫剋期會剿不得以隣省分界藉口推諉得旨依議嚴行○巡按江寧御史何可化疏報獄囚董文等九名被海賊縱放賊遁自行投監命概釋之○辛未諭吏部戶部禮部固倫公主固倫額駙和碩公主和碩額駙親王女和碩格格和碩額駙郡王女多羅格格多羅額駙多羅貝

勒女多羅格格多羅額駙貝子女固山格格固山額駙等當

太宗皇帝時定例止授虛級今授精奇尼哈番阿思哈尼哈番與舊例不合且外藩額駙止授虛級在內額駙實授職銜殊非內外一體之誼應照舊例確定又親王女和碩格格和碩額駙郡王女多羅格格多羅額駙品級相去太懸今格格額駙等品級應以次更定至額駙等俸祿自當照格格品級支給今額駙等俸反多於格格等亦屬不合爾等即會同遵照

太宗皇帝時定例詳酌妥議具奏○命四川陝西總督駐劄漢中○壬申戶部題

世祖章皇帝守陵內侍共四十四名官員人役共六十六名應給園地共三百八十餘晌請將附近地畝圈取撥給從之○又議覆山西巡撫白如梅疏言太平潞汾四府設爐十座所造制錢不足搭放大同僅一府設爐二十

座。錢法必致壅滯。請將大同留爐十座。其餘十座。增入省城。共作二十座鼓鑄。應如所請。從之。○癸酉。命內國史院大學士衛周祚。暫署吏部尚書事。○甲戌。以隨征江南左路總兵官楊捷。署理廬鳳提督。○刑部遵旨議覆。嗣後刑部審擬案內。凡係見任官員。應援赦者。請交與吏兵二部議奏。著為定例。從之。○丁丑。以偏沅巡撫袁廓宇。捐賑饑民。加右副都御史。○喀爾喀卓禮克圖郡王古木布故

遣官致祭

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四

監修總裁官光祿大夫太保建太子太傅保和殿大學士兼戶部尚書二等伯加四

級臣內齊光祿大夫經筵日講官起居注少保兼太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

順治十八年辛丑閏七月戊寅朔○己卯吏

實錄卷四

一

部議覆工科給事中胡悉寧疏言大選急選之日令吏科河南道各滿漢官一員赴部驗明缺籤公同封固臣部堂官掣名籤科道官掣缺籤從之○雲南貴州總督趙廷臣疏言馬乃土司應改設流官俟三年後風俗漸移人心漸正立之學宮以廣文教從之○庚辰轉戶部尚書車克爲吏部尚書兵部尚書管都察院左都御史事阿思哈爲戶部尚書○以原任副都統福喀爲

世祖陵總管○工科給事中王曰高疏請舉行經筵大典以光

聖德以端化源下部知之○壬午戶科給事中

彭之鳳疏言徵糧名目繁多請將各州縣額

徵起解存留銀兩各款彙算總數均派每畝

該徵若干某部某寺額解若干各州縣總徵

分解各部寺按額查收其繁雜款項名目盡

行除去既便稽查亦免影射下部議○癸未

工科給事中胡悉寧疏言紳衿抗糧已定新

實錄卷四

二

例無不凜遵其大小衙門吏役倚勢規避甚於紳衿請令有司直申督撫解京治罪得旨這所奏衙役抗糧情弊宜立畫一之法該部速議具奏○安南將軍內大臣達素疏報據海澄公黃梧招撫鄭芝龍屬下偽都督萬儀萬祿等擒偽中匡伯張進偽總兵朱受拆燬所據銅山城垣房屋率偽官一百八員兵四千四百名兵民家口萬餘渡海來歸得旨萬儀萬祿等識時向化傾心投誠殊可嘉尚著

從優議叙。海澄公黃梧實心効績。招徠有方。著并議叙。○予陣亡拜他喇布勒哈番西爾恭祭葬如例。○甲申。月祭。

世祖章皇帝○陞廣東嶺西道金鏐為四川按察使司按察使。○乙酉。諭吏部。戶部尚書王弘祚。因其前奏情詞懇切。特准暫歸。今思部務殷繁。王弘祚素稱敏練。急需綜理。著於康熙二年春。即到京供職。○己丑。偏沅巡撫袁廓宇。以病乞休。命加兵部右侍郎。致仕。○予故致仕工部侍郎段國璋祭葬如例。○刑部等衙門覆奏。鑲黃旗溫揅佐領下巴徒等二十五人。告家主鄂齊爾九款。內六款皆虛。應照奴僕告主。輕罪是虛。重罪是實。原告斷出。例將巴徒等二十五人。斷出鄂齊爾之家。得旨。奴僕告主所告事情俱實。始應斷出本主。今巴徒等告鄂齊爾事。款虛多實少。原被告俱各有罪。巴徒等著各鞭一百。不准斷出。○庚寅。兵部議覆。京口鎮海將軍劉之源。請補

漢軍缺甲一疏。得旨。劉之源等帶去閒甲。著仍充入綠旗兵數。其漢軍向係五丁披甲一副。今著四丁披甲一副。○辛卯。諭吏部。兵部。海寇入犯江南時。提督梁化鳳奮勇効力。同滿兵擊敗賊衆。及賊奔竄。往犯崇明。梁化鳳星往應援。保全孤城。功亦不小。叙功時。授世職。阿達哈哈番止足償其江寧捷功。應再叙崇明捷功。加授世職。以示鼓勵。至於崇明守城文武各官。堅心竭力。拒賊全城。深為可嘉。亦應各加世職。以示鼓勵。俱著察明從優議叙。彼時江南地方數百里內。從賊者多。惟安慶固守城池。不肯從逆。亦屬可嘉。守城各官亦著察叙具奏。○癸巳。陞禮部右侍郎寧古禮為都察院左都御史。○甲午。陞工部左侍郎傅維麟為工部尚書。以原任吏部左侍郎郝惟訥為戶部左侍郎。○丙申。以原任兵部侍郎額黑里為光祿寺卿。○吏部題奉旨行查事件。各省督撫。因無限期。任意遲延。今量

其遠近酌定限期。自文到日為始。直隸山東山西河南陝西限四個月。江南浙江湖廣江西限五個月。福建廣東廣西限六個月。雲南貴州四川限七個月。有繁大事件。許令題明寬限。違限者按年月處分。各部院題覆違限亦照此處分。從之。○丁酉。以原任延綏巡撫周召南為偏沅巡撫。○予故鳳陽巡撫都察院右副都御史趙福星祭葬如例。○己亥。諭戶部。漢人節婦曾經賑給米糧。滿洲漢軍節婦應否給與。爾部議定。畫一具奏。尋議滿洲漢軍節婦已經給銀建坊。其動常平倉米賑給之處應停止。得旨。滿漢節婦俱准一體給米。○叙剿獲土酋龍吉兆功。加雲南貴州總督趙廷臣兵部尚書貴州巡撫卞三元兵部右侍郎○庚子。陞直隸石叵副將柳同春為江南狼山總兵官。○先是安南黎維祺於順治十七年七月奉表歸順。部臣以其但稱表貢未請繳換敕印。行令廣西督撫檄查。至是

黎維祺回稱前代舊制原不繳換敕印。惟待奉准貢例。依限上進。巡撫于時躍具題。并請另頒敕印。永為藩臣世守。下部議行。○辛丑。轉吏部右侍郎宜理布為左侍郎。以內國史院學士折庫納為吏部右侍郎。內弘文院學士布顏為禮部右侍郎。○禮部題金黃帶紅帶。所以分別宗室覺羅。親王以下宗室以上。繫金黃帶。覺羅繫紅帶。其異姓王內外額駙及各官俱不許繫。若欽賜者許繫。壞破後亦不許自行換繫。固山貝子戴三眼孔雀翎。鎮國公輔國公戴二眼孔雀翎。內大臣一等二等三等侍衛。內大臣額駙前鋒統領護軍統領前鋒參領護軍參領諸王府長史一等護衛戴一眼孔雀翎。俱根綴藍翎。貝勒府司儀長王府貝勒府二等三等護衛貝子公府護衛及護軍校俱戴梁藍翎。內外額駙俱不許戴。諸王府散騎郎有阿達哈哈番以上世職者許戴一眼孔雀翎。根綴藍翎。其餘雖加

級不准戴得旨凡係

世祖章皇帝所賜者俱著仍舊餘如議○壬寅叙崇明守城功授提督梁化鳳三等阿思哈尼哈番襲替八次文武官弁各依功次授世職○丙午陞叅領傅格為寧古塔左翼副都統○宗人府府丞王天眷以親老乞終養允之○喀爾喀土謝圖汗遣使進貢賞賚如例○以翁牛特故多羅杜楞郡王博托和子畢禮袞達賴襲爵

八月丁未朔秋分夕

月於西郊遣都統特晉行禮○遣大學士覺羅伊圖祭

先師孔子○戊申祭

大社

大稷遣都統宗室羅託行禮○諭吏部理藩院職司外藩王貝勒公主等事務及禮儀刑名各項責任重大非明朝可比凡官制體統應與六部相同理藩院尚書照六部尚書入議

政之列該衙門向無郎中今著照六部設郎中官爾部議奏尋議覆理藩院見設錄勳賓客柔遠理刑四司今應增設各司郎中共十一員員外郎共二十一員得旨依議理藩院尚書銜名著列於工部之後○諭工部河間冀州趙北口等處隄岸從前修築未堅處處皆圯致水泛濫爾部速議具奏其隄工遣都統副都統等官監修○己酉諭吏部禮部兵部國家用人文武並重職任雖異効績維均明朝陋習偏重文臣以致武臣灰心不思報効國祚傾覆實由於此今應將文武職掌分別更定向來滿官考滿賜羊酒綬足漢官考滿賜羊酒蔭子入監滿漢之例互異滿官已故卹典止給紙張羊酒祭一次漢官已故卹典祭至九壇造葬此外又有加祭及父母妻室亦有祭葬滿漢參差殊非一代典制宜酌議畫一以垂永久著議政王貝勒大臣九卿科道會同速議妥確具奏○庚戌予故義王

孫徵淇祭葬。以年幼不賜謚立碑。○增設貴州湄潭鎮。以投誠右都督王友進為湄潭鎮總兵官。○辛亥。以吏部左侍郎伯宜理布為正白旗蒙古都統。○壬子。吏部遵旨議覆。尹大器舉首鄭芝龍在獄私與逆子鄭成功往來通信密行事款。鞫勘俱實。應授拖沙喇哈番。得旨。尹大器著授拜他喇布勒哈番。○癸丑。月祭。

世祖章皇帝○甲寅。陞護軍叅領希佛為鑲白旗滿洲副都統。○戶部遵旨議覆查明季加增練餉。並無舊案。止有遺單一紙。每畝派徵一分。直隸。山東。河南。江南。山西。浙江。江西。湖廣。廣東。福建。陝西。廣西。四川。十三省共計五百七十七萬一千餘頃。每畝一分派徵計銀五百餘萬兩。請敕該撫於十八年為始。限三月徵完解部。至雲貴。係新闢地方。無舊案可查。敕該撫於見徵田地內。照數徵派。彙冊報部。得旨。如議速行。○達賴喇嘛及干都台吉。

請於北勝州互市。以馬易茶。允之。○乙卯。太宗文皇帝忌辰。遣官祭。

昭陵。○平西王吳三桂疏言。遵旨鑄行滿漢字制錢。其雲南厘字錢。應請停鑄。下部知之。○平西王吳三桂又疏言。元江克平。其土民糧差。仍照舊例。至酋長私莊。應徵錢糧。請編入元江府賦役全書。下部知之。○丁巳。

太祖武皇帝忌辰。遣官祭。

福陵。○戊午。叙安慶守城功。給推官黃熙纘守備張琦三等阿達哈哈番。准襲四次。其餘官弁各授世職。○己未。遣官祭。

歷代帝王。○遣官祭城隍之神。○諭戶部。前因江南。浙江。福建。廣東。瀕海地方。逼近賊巢。海逆不時侵犯。以致生民不獲寧宇。故盡令遷移內地。實為保全民生。今若不速給田地。居屋。小民何以資生。著該督撫詳察酌給。務須親身料理。安插得所。使小民盡沾實惠。不得但委屬員草率了事。爾部即遵諭速行。○

命直隸各省各設總督一員。駐劄省城。○丁卯。兵部議覆雲南巡撫袁懋功疏言衛所屯田與府州縣同城者宜歸并有司官催徵。其不同城如楊林所等處。山阻路遙難以無攝。應照舊設衛所官管理。又雲南省全係山路轉輸必須夫役。差務繁多軍餉孔急。每堡請加夫一百名。均應如所請。從之。○戊辰。浙江總督趙國祚以病乞休。慰留之。○戶部題請改鑄康熙字錢。輕重如舊制。從之。○庚午。授四川投誠偽廣平伯陳建右都督職銜。偽總兵傅汝友等各授職銜有差。○蘇松提督梁化鳳以病乞休。慰留之。○壬申。轉吏部右侍郎折庫納為左侍郎。陞通政使吳達禮為吏部右侍郎。光祿寺卿額黑里為通政使司通政使。○甲戌。諭吏部。父母之喪。天下通義。治喪守制。人子至情。滿洲原有守制之禮。後因文武各官內外職任不同。姑定限月治喪之禮。今思在內各官尚得躬親治喪。在外各官

不得回家。躬盡送終之禮。揆諸人子之情。殊為未憮。爾部詳察。

太祖

太宗時舊例。參酌時宜。另行確議。定例具奏。務於職任無妨。子情克展。以稱朕孝治天下之意。○吏部等衙門。遵旨甄別各官。請照例處分。得旨。甄別各官。俱如議。內陰應節於順治十七年甄別時。

世祖章皇帝念其曾發江南科場奸弊。留用。今仍著留任。○以喀爾喀故卓禮克圖郡王古木布子達爾扎吳喇忒鎮國公白爾圖勒第白爾圖各襲爵。

九月。丁丑朔。吏部遵旨議覆。湖廣。福建。廣東三省左布政使員缺。應轉右布政使。內雖無俸滿之人。與其將按察使及支三品俸加一級。郎中優陞。不如將右布政使不拘俸滿無事故者。轉補。廣東。陝西二省右布政使員缺。將應陞按察使內不拘俸滿無事故者。陞補。

至山東兩淮福建河東運使員缺與其將支四品俸郎中陞轉不如將應陞知府運同不拘俸滿無事故者陞補從之○工部議覆工科給事中王曰高條奏蘆政利弊四款一嚴催徵以懲積欠一清踏勘以核實數一按地形以清課額一酌久任以專責成俱應如所請得旨江南江西湖廣每省差滿漢司官各一員筆帖式一員嚴行清查○以鄂爾多斯故固山貝子額林臣子達爾扎襲爵○己卯陞太僕寺卿祁通格為內國史院學士工部郎中羅敏為內弘文院學士○陞都察院左僉都御史苗澄為左副都御史兵部督捕理事官阿世熙為光祿寺卿○辛巳命阿達哈哈番覺羅緝愛守

福陵○諭兵部向來提督總兵官缺出應陞各官俱係九卿會推今思武官戰守功績案卷俱在爾部九卿未必悉知嗣後專著爾部詳查開列不必會同九卿○壬午兵部議覆吏

科給事中何澄條奏武闈考試之法較射之時如馬步嫻熟箭數合式者選取其馬步生疎式樣不如法者雖倖合箭數不准選取仍照舊例詳註卷面以便閱卷分別名次不得專憑策論定為高下得旨武闈著先試策論後試馬步箭○癸未月祭

世祖章皇帝○以太子少保兵部尚書蘇納海為內國史院大學士○甲申予故總兵官連得成祭葬如例○乙酉以太常寺卿董篤行為宗人府府丞○丙戌設兵一千名守護世祖章皇帝陵○諭刑部近覽爾部章奏徐勝等被擄下海旋經投歸仍按律擬罪但念此輩先雖從賊乃能不忘故土乘間來歸著免罪以後凡有此等投誠者俱著免罪○轉工部右侍郎李呈祥為左侍郎陞通政使冀如錫為工部右侍郎兵部督捕理事官杭愛為太僕寺卿○兵部題銅山偽都督郭義蔡祿羅瑞等率眾投誠應請議叙得旨郭義蔡祿

俱授左都督。加太子太保。仍給三等阿思哈尼哈番。世襲八次。羅璫授右都督。仍給三等阿達哈哈番。世襲四次。○丁亥。調雲南貴州總督趙廷臣為浙江總督。浙江總督趙國祚為山東總督。改四川陝西總督李國英為四川總督。江南江西總督卽廷佐為江南總督。廣東廣西總督李棲鳳為廣東總督。陞江西巡撫張朝璘為江西總督。山西巡撫白如梅為陝西總督。貴州巡撫卞三元為雲南總督。○陞內秘書院學士劉清泰為河南總督。廣西巡撫于時躍為廣西總督。○庚寅。吏部遵旨詳查。

太祖

太宗滿洲守制舊例。吏禮二部。並無舊冊可考。惟順治十年三月。禮部覆原任廣東道御史陳啟泰請行通制一疏。奉有三年喪禮著照會典定例遵行。有難拘常制者。請旨定奪之旨。又順治十年六月。臣部題滿洲蒙古漢軍

各官不便離任。丁憂奉有依議之旨。遵行已久。今議得在京部院滿洲蒙古漢軍大小文官。仍應照定例守制一月。服滿卽出理事。私居持服。盡三年喪禮外。其奉差出兵文官。以回京聞喪之日為始。亦照定例遵行。至各省駐防及在外出仕漢軍文官。伊父母在任病故者。仍應照例遵行。父母在京病故者。准其解任回京。以到日為始。守制半年。仍私居持服。盡三年喪禮。所遺員缺。相應另補從之。○

辛卯。轉福建布政使司右布政使王孫蔚為左布政使。山西右布政使藍潤為湖廣布政使司左布政使。河南右布政使祁彥為廣東布政使司左布政使。廣西右布政使顏敏為陝西布政使司左布政使。陞陝西按察使甯之鳳為陝西布政使司右布政使。河南按察使范廷元為廣東布政使司右布政使。○吏科給事中雷一龍疏言。三年大計國典攸關。民生所係。勿得遺大吏而摘微員。懲去位而

寬見任。請敕部院定議。閱冊之日。令該藩臬兩司赴部面同指實。按冊詳察。如大計之後。或有敗類。貽害地方者。即治兩司以徇庇之罪。再藩臬入覲。例有條奏。本省應行應革事宜。據實敷陳。不許浮泛塞責。庶不負表率有司之責。下部議。○免山東金鄉。定陶。二縣本年分旱災額賦有差。○壬辰。裁江安提督。廬鳳提督二缺。改蘇松提督。梁化鳳。為江南通省提督。○添設直隸。山東。山西。河南。雲南。五省提督。調江安提督劉良佐為直隸提督。廬鳳提督楊捷為山東提督。湖廣提督柯永盛為山西提督。陞隨征福建中路總兵官許天寵為河南提督。雲南臨元廣西總兵官張勇為雲南提督。○癸巳。以侍講學士楊永寧為武會試正考官。侍讀熊伯龍為副考官。○以禮部郎中孔印樾為河南按察使司僉事。提調學政。兵部郎中王成功為陝西按察使司僉事。提調學政。刑部郎中李可喬為湖北按

察使司僉事。提調學政。侯良翰為廣東按察使司僉事。提調學政。孫允驥為湖南按察使司僉事。提調學政。○吏部開列本部司官內陞外轉職名具奏。得旨。吏部司官與各部例應一體。此內陞外轉不必行。以後著與各部司官一體陞轉。○戶部題民間地土房屋禁止旗人置買。已於順治七年三月內定例遵行。後順治十三年奉有順治七年未禁以前所買地土房屋入官。戶部給發原價其錢糧行文地方官除免之旨。應將未禁以前所買地土房屋發覺者。請不給原價免其入官。禁止以後所買地土房屋仍照定議盡行入官。買者賣者一并治罪。從之。○甲午。轉理藩院尚書明安達禮為兵部尚書。○以原任通政使司通政使曹國柄補原官。○以內國史院學士董衛國為江西巡撫。○陞隨征浙江總兵官董學禮為湖廣提督。○乙未。以原任侍讀學士楊熙為山西巡撫。順天府府尹羅繪

錦為貴州巡撫○喀爾喀車臣濟農遣使進九白年貢宴賚如例○戊戌刑部遵旨議覆各省審結叛案內流徙入官家產人口應令各省督撫以文到為始定限一月起解仍將起解日期報部違者督撫以下各官從重議處其臣部移咨應解者立限兩月起解途間定限起發違者聽本部題叅從之○己亥吏部左侍郎石申以病乞假令解任調理○庚子諭吏部兵部向來文武各官捐助銀米各部議定有紀錄加級授官之例今思捐助急公雖應激勸但大小臣工各有職業必實著勞績方可加級授官若止以捐助銀米遽行加級授官非慎重名器之意嗣後凡捐助銀米者俱不必加級授官仍與紀錄除有事故准其抵銷外若後有應加卹賚者作何定議爾等酌議具奏○以內大臣博羅色冷為理藩院尚書○辛丑陞通政使司左通政劉鴻儒為太常寺卿○癸卯

孝慈武皇后忌辰遣官祭

福陵○戶部議覆江南總督卽廷佐疏報江南旱災應委官履畝踏勘分別分數得旨時已入冬苗禾俱無爾部猶云履畝踏勘殊屬無益著該撫詳加分晰取具官民甘結明白造冊報部○兵部題推陞總兵官銜缺相當俸滿合例之人甚少得旨以後總兵官員缺著并將副都統推舉○乙巳吏部題查順治十六年奉

上諭人才經歷外任然後諳練事情克稱任使科道官俱照舊例按年內陞外轉今後翰林官除照常陞轉外亦與科道一體按年外轉臣部議每年外轉二次講讀以叅政道用修撰以副使道用編檢以叅議道用今翰林已歸併內三院本年秋季例應外轉將侍讀以下等官開列職名引見得旨翰林院官見在無多且皆經酌量選用以後不必外轉○禮部題親王郡王貝勒貝子公將軍正室及女

封詰冊文內請用滿漢蒙古文字樣從之○
予故寧古塔副都統二等阿思哈尼哈番鍾
繼達祭葬如例

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之五

監修總裁官光祿大夫太僕寺卿太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

順治十八年辛丑冬十月丁未朔享

實錄卷五

太廟遣都統輔國公穆琛行禮○

上詣

世祖章皇帝寶宮前致祭○遣官祭

永陵

福陵

昭陵○頒康熙元年時憲曆○戶部進呈寶泉

局鑄成康熙錢式○戊申新建

太廟神廚門

社稷壇左門成○以都察院左副都御史苗澄

為直隸總督。陞甘肅巡撫。終年。為貴州總督。○已酉。喀爾喀車臣汗。土謝圖汗。各遣使進九白年貢。宴賚如例。○陞鳳陽巡撫林起龍為漕運總督。○海賊鄭芝龍。并其子鄭世恩。鄭世蔭等。照謀叛律族誅。鄭芝豹。當鄭成功變叛時。即投誠來歸。并其子俱免死。○庚戌。陞右通政蔣國柱。為內秘書院學士。宗人府啟心郎劉斗。為內國史院學士。○辛亥。陞大理寺少卿王來任。為順天府府尹。○戶部題。山東省臨街房屋徵收銀兩。乃明末加增之積弊。本朝錢糧。俱照從前則例徵收。並未。有房號銀兩。且各省俱未開徵。東省亦當一體豁免。從之。○封科爾沁鎮國公額駙綽爾濟為多羅貝勒。台吉圖納黑。為輔國公。○癸丑。月祭。

世祖章皇帝。○兵部查議。故明蜀藩內江王下宗室朱奉鋼。應照原籍編氓當差。得旨。朱奉鋼既經投誠。應照投誠人員例議叙。不宜因。

明宗室輒議。令為編氓。著另議具奏。○甲寅。諭吏部。兵部。向來故明宗室投誠者。主等以下。起送來京。分別祿養。鎮國將軍以下。令照各籍編氓樂業。今思投誠各項人員。俱加叙錄。惟故明宗室。槩為編氓。非一視同仁。鼓勵招徠之意。以後故明宗室投誠者。王等以下。仍照前起送來京。其鎮國將軍以下。查照投誠功績酌量錄用。○陞宗人府啟心郎劉兆麒。為都察院左副都御史。○乙卯。調山東總督趙國祚。為山西總督。山西總督祖澤溥。為山東總督。○吏部議。覆大學士等奏。文武職掌。既分。敕書不便照舊。查總督原係統轄文武。無庸議改。其敕書內。應添提督。亦聽總督節制等語。巡撫已罷。其管理軍務。敕書印文內。俱不用提督軍務。贊理軍務字樣。至道臣。敕書內。亦不用查點兵馬語。請改給敕印。從之。○丙辰。裁雲南臨元廣西總兵官缺。○安南國歸化將軍莫敬耀。子莫元清。遣使進貢。

并奏偏方褊小。嗣後請免貢獻。從之。宴賚如例。○丁巳。陞內秘書院學士胡兆龍為吏部左侍郎。○陞江南江寧總兵官祖永烈為蘇州寧海將軍。駐劄蘇州。○以正紅旗漢軍副都統王之鼎為隨征福建中路總兵官。○戊午。戶部題新投誠官員應分旗安置。見到偽漢陽王馬進忠子都督僉事馬自德准入正黃旗。偽國公沐天波子沐忠顯准入正白旗。未到偽延安王艾能奇子左都督艾承業准入鑲黃旗。照依品級賞賚。內沐忠顯無職銜。應不給俸。得旨沐忠顯著照阿思哈尼哈番品級賞賚。○庚申。以浙江定海縣舟山地方人民內徙。免其順治九年至十二年未完額賦。○少傅兼太子太傅大學士成克鞏以母病請假。溫旨留之。○戶部議覆陝西巡撫張璠疏言。各府應解藩司兵餉銀兩。請貯府庫就近兌支。各境內營路官兵月餉。又鳳翔運至漢中米豆。經過雲棧車道不通。應准改折。

令於漢中道府就近召買。均屬兵民兩便。應如所請。從之。○辛酉。命內大臣監試武舉等步射。於左翼門外。○吏部題直隸已設總督其順天保定兩巡撫應裁去一員。得旨順天巡撫著裁去。韓世琦調江寧巡撫。其順天等處地方著保定巡撫王登聯兼管。○壬戌。諭吏部各部事務雖巨細不同。於國政民情均有關係。理宜速結。今各部一切奉旨事件及科抄俱定有限期。六科按月察核註銷。其餘不係奉旨事件及無科抄者。若不專令稽察。必致稽遲。除刑部已差科員稽察外。吏戶禮兵工五部亦應照刑部例。各差科臣一員不時稽察。如有遷延遲悞事件。即行奏。仍於差滿未交代之前。將已完未完事件明白具奏。○癸亥。兵部題請殿試天下武舉。得旨武闈已考過步箭及策論。又經內試選定。著停止殿試。○甲子。陞湖廣下湖南道塗應泰為陝西按察使。司按察使以原任四川按察使

佟彭年為河南按察使司按察使○以山東巡撫許文秀沂州總兵官李永盛登州總兵官范承宗失察叛賊于七提問來京○乙丑尊

皇祖妃為壽康太妃冊文曰勲坤教以開基令名有俶炯發輝而受祉徽範長昭爰考彝章肇行隆典

皇祖妃賦姿淑慎秉德安貞在昔創業艱難佐咏雞鳴而贊治於今深宮頤養共欽鶴算之垂庥分既處夫崇高禮宜臻夫備美載揚懿行特晉榮稱謹以冊寶尊為

皇祖壽康太妃義問攸宣益篤邦家之慶昌齡日茂永凝康豫之祥○以內國史院學士劉斗為甘肅巡撫內弘文院學士屈盡美為廣西巡撫奉天府府尹張尚賢為鳳陽巡撫○戊辰予故少師兼太子太師內國史院大學士額色黑祭葬謚文恪○以鑲黃旗漢軍副都統范達理為隨征浙江總兵官趙宗科為

江南江寧總兵官陞叅領塞白理為隨征江南左路總兵官○己巳傳臚賜中式武舉霍維鵠等三百一人武進士及第出身有差○陞侍讀學士范承謨為內國史院學士周有德為內弘文院學士○添設六科滿右給事中各一員○庚午諭吏部原任大學士額色黑於

太宗

世祖兩朝勤勞効力有年敬慎素著始終克盡職業其子塞色黑著陞補內秘書院學士○吏部推補鑲黃旗蒙古副都統得旨叅領羅錫出征時

世祖皇帝曾諭遇副都統缺補用著羅錫補授副都統又推補正黃旗滿洲都統得旨

世祖皇帝遺旨原任都統圖海情罪原屈欲改未及遇有滿洲都統缺補用著圖海補授都統○辛未命都統濟世哈為靖東將軍統領滿漢官兵征剿山東叛賊于七○陞福建同

安副將施琅為同安總兵官○壬申吏部都察院議覆掌河南道御史白尚登條奏科道停止列名糾拾一事應如所請嗣後科道糾叅係何官真知確聞者本官即行糾叅其眾員列名舉行停止從之○甲戌以內秘書院學士蔣國柱為山東巡撫○陞國子監祭酒章雲鷺為內秘書院學士

十一月丙子朔冬至祀

天於

圜丘

上親詣行禮○祭

世祖章皇帝○遣官祭

永陵

福陵

昭陵○丁丑戶科給事中柯聶疏言有司考成見任去任俱有則例處分而年終奏銷又別紳名衿名役名照新例議處獨奸胥侵欺捏報尚無定律其弊不可勝言或於正額之外

妄立名色而多派私徵或將已完之糧不登收簿而註欠重比或受本戶囑託而糧數飛砌隔圖或侵一人銀兩而零星散灑各戶一經冊報無不照數賠完如不立法嚴懲漏卮將何底止即如二等侍衛臣金世漢臺臣周李琬詞臣宋德宜葉方鵠等各疏稱照由單之數早已透完而經承妄捏報欠身列朝班之令靈書尚敢舞法作奸以完作欠則村野愚民受若輩之私增暗砌不知其幾矣乞敕部從重議一定例頒行勒石抑臣更有請者每年由單務必照申部單式依限早發以便小民明知應完之數又宜立四季徵比循環簿申送藩司用印先期發縣許納戶完後自填印簿每季起解錢糧即將印簿申繳該司如經承稍有別弊許納戶據由單完票告發加等治罪州縣官一併叅處下部知之○戊寅陞叅領劉光為京口副都統○己卯授歸化將軍莫敬耀之子莫元清為安南國都統

使○辛巳平西王吳三桂疏言臨安府屬枯木八寨牛羊新縣四處編徵糧米本色差撥課程戶口食鹽銀兩自順治十七年為始編入蒙自縣經制全書下部知之○兵部題凡掌印都司行掌印都司屯局都司僉書衛守備守禦所千總衛千總雖係武官不管兵馬止司錢穀仍照舊聽巡撫統轄撰入巡撫教內至漕糧船沿河撥兵護送之事撰入沿河總督提督教內從之○壬午月祭

世祖章皇帝○禮科給事中姜希轍疏言大典不宜久缺請尊

聖祖母皇太后兩宮

聖母皇后徽稱遵循典禮擇吉舉行得旨是○少傅兼太子太傅內秘書院大學士胡世安以病乞休命以原官加少師兼太子太師致仕○陞右通政徐繼煒為奉天府府尹○先是左都御史魏裔介疏參撫臣張自德婪黷著聞又科臣孫光祀疏糾道員劉澍向魏裔

介營求私書轉囑張自德張自德受書不舉魏裔介據實回奏

世祖以其直吐真情特旨寬宥將張自德劉澍俱革職至是陝西巡撫張璠審覆原參事情俱無憑據得旨張自德劉澍並復原官○甲申四川巡撫佟鳳彩疏報涼山各寨番猺劫掠建昌兵巡道張元凱會同廣羅鎮抒誠侯狄三品擊却之斬首一百三級下部察叙○乙酉吏部推陞方面官開列內院侍讀學士孫代等具奏得旨前克勝格不識文字竟以副都御史推陞督撫恐此中亦有不識文字之人著察明具奏○丙戌諭吏部戶部兵部滿洲大小各官因老疾致仕者仍應給俸作何給與察明酌議具奏其滿洲曾經効力兵丁有因戰陣殘廢及老疾退閒無子嗣披甲者作何給與錢糧養贍一併酌議具奏○命禮科稽察光祿寺錢糧○丁亥禮部題京城內喇嘛在白塔住者九名在噶旦廟住者

八名及厄木齊喇嘛。均照舊留住外。其崇國寺喇嘛應令出京。在四天王廟居住。嗣後官民有為喇嘛班第者。悉令出京。往察罕達爾漢綽爾濟喇嘛處居住。並嚴禁婦女入廟焚香。違者治罪。從之。○四川陝西總督李國英疏報偽伯楊秉印率衆投誠。命授左都督職銜。仍給全俸。賞裘馬等物。○戊子。免陝西伏羌縣本年分電災額賦。○己丑。四川北道楊素蘊遵旨回奏。臣官御史時見平西王吳三桂題補方面官。不論內外遠近。一例坐缺定銜。有礙國體。是以具疏駁正。至於防微杜漸等語。原屬概論。古今通義。未嘗專指該藩臣與該藩素不識面。有何嫌隙。不過據理而陳。非別有意見。下部知之。○壬辰。以侍讀學士孫代為江南布政使。司右布政使。陞監察御史劉顯貴為湖廣布政使。司左布政使。吏部郎中金光祖為福建布政使。司右布政使。戶部郎中李迎春為廣西布政使。司右布政

使。禮部郎中何中魁為山西布政使。司右布政使。刑部郎中郎廷相為河南布政使。司右布政使。○癸巳。命山東總督移駐濟南府。提督移駐青州府。湖廣總督移駐武昌府。提督移駐荊州府。○甲午。免江南靈璧縣本年分電災額賦。○乙未。禮部尚書王崇簡以病乞解任調理。允之。○丁酉。刑科給事中阿世圖疏言。部告之事限一月即完。而通狀以三月彙覆。嗣後請將通政司所告之事亦定限一月歸結。從之。○予故內秘書院學士拜他喇布勒哈番鄂謨克圖祭葬如例。○予故一等侯又一拖沙喇哈番都統宜爾德祭葬。謚襄敏。○戊戌。以奉

世祖章皇帝神主升祔

太廟。遣官告祭。○江南道御史胡秉忠疏言。直隸各省州縣衛所編審花戶人丁。俱沿襲舊數。壯不加丁。老不除籍。差役偏枯不均。或流入邪教。或逃藏盜藪。或投遁他鄉。漏戶逋糧。

為弊匪細。請教有司核實。年十六以上成丁六十。七十准與豁免。其有充僧道無度牒者。悉令為農安插。附入丁冊當差。從之。○己亥奉

世祖章皇帝神主升祔

太廟。是日。

上素服。詣乾清宮

世祖章皇帝神主前行禮。奉請

神主安黃輿內。

上易祭服。陞輦後隨進

太廟。恭捧

世祖章皇帝神主奉安於

太祖高皇帝神主西旁。東向。行禮畢。回宮。○陞

福建福寧道法若真為浙江按察使司按察

使。○免直隸新城縣本年分水災額賦。○癸

卯。甘肅巡撫佟延年乞休。命仍赴新任。○甲

辰。原任巡按湖南御史仵劻昕坐貪賂狂言

誣告虛謊。三法司核奏得實。得旨仵劻昕著

處斬。其餽賂司道等官二十三員分別議處

○乙巳。加廣西巡撫于時躍都察院右都御

史。以遣守備表文舉招撫安南并偽德陽王

功也。○戶科給事中柯聶疏言白糧向僱民

船。不無多派。今以漕船帶運。其費半可節省。

至於佐貳官押運。不能彈壓旗丁。應勅漕臣

嚴加禁戢。若旗丁於原領工食外妄立名色

苛派使費者。責令糧道就近申禁。下部議

十二月丙午朔。廣東總督李棲鳳以老疾乞

休。命以原官致仕。○丁未。諭兵部武官內營

頭千總把總曾經効力行間。因原未入經制

內。皆無品級。殊非激勸武臣之意。以後千總

把總俱應入經制內。給與品級。爾部即酌議

妥確具奏。○陞禮部左侍郎沙澄為禮部尚

書。○廣西巡撫于時躍疏報順治十七年分

粵西九府開墾民田一千五百餘頃。屯田五

十七頃有奇。下部知之。○戊申。江南總督郎

廷佐疏言崇明知縣龔榜因未完鹽課降調

百姓懇乞題留。得旨：崇明海外危疆，地方荒殘，知縣龔榜加意料理，撫綏殘黎，致百姓哭泣請留，著留任，用勸勤勞之吏。○己酉，陞大理寺卿吳瑪護為盛京戶部侍郎。○庚戌，調浙江寧紹台總兵官張承恩為溫金衢總兵官。○授安慶府通判李皇詔拖沙喇哈番，准襲一次，仍候員外郎缺補用。以海逆犯境，固守城池功也。○戶部議覆江南總督郎廷佐疏言：崇明縣地丁錢糧雖已蠲免，其鹽課仍應完解。得旨：崇明孤懸海外，逆賊來犯，皆賴兵民同心協力，固守全城，所欠鹽課著與豁免。○辛亥，命廣東提督駐劄惠州府，江西提督移駐贛州府，陝西提督移駐秦州，四川提督移駐雅州，廣西提督駐劄南寧府，雲南提督駐劄永昌府，貴州提督移駐安順府。○命浙江總督自溫州府移駐杭州府。○壬子，月祭。

世祖章皇帝○命保定巡撫移駐真定府。甲

寅，陞京畿道御史蔡毓榮為內秘書院學士。○奉天府府尹張尚賢疏言：河西錦州廣寧寧遠地方有佐領一員協管，或屬永平，或屬奉天，其間流民甚多，入籍甚少，應改為州縣，招募為民。又近有流徙人犯，修造工程贖罪之例，有力者已認工程，無力者應准招民贖罪。若得數千家，立為京縣，實萬年根本之圖。下部議。○乙卯，以原任侍郎常魯為大理寺卿。○吏部等衙門遵旨議覆滿洲蒙古致仕無世職及任佐領外省駐防以老疾辭職無子弟襲授更換他人者，年六十以上悉照原品給半俸銀米終其身。漢軍為京官佐領及外省駐防致仕者亦如之。滿洲蒙古兵丁曾經効力以戰陣殘廢及老疾退閒別無披甲當差人丁者歲給米十二斛從之。○丙辰，命故義王孫徵淇之弟孫徵淳襲王爵。○賜內大臣精奇尼哈番噶爾瑪內大臣布代散秩大臣精奇尼哈番哈代札木蘇沙里代二等

侍衛精奇尼哈番隆義一等侍衛杜爾瑪等
莊田奴僕有差○命湖南殉難靖州總兵官
閻芳馨之子閻懋功以守備錄用○丁巳命
內弘文院學士王熙以禮部尚書管左侍郎
事○以原任宣大總督盧崇峻為廣東總督
○戊午給尚陽堡新增七佐領印各一顆○
已未陞吏部郎中柳天擎為江南按察使司
按察使○吏部題江西廣信一府介在閩浙
之間先因閩海用兵分隸浙督兼轄今江西
既設總督衙門宜專歸江西督臣管理從之
○都察院左都御史魏裔介疏言本朝應天
順人平定六合凡所以優恤生民者無不備
至惟因海寇連年作亂兵興不休今歲司農
告匱議及加派天下地畝錢糧五百餘萬實
為百姓禦災捍患無可奈何非忍於取民財
也近聞直隸各省百姓莫不輸將恐後解赴
軍前然雖勉完此項而窮苦之民不可名狀
伏祈敕下戶部速為籌算每年兵餉若干直

隸各省正賦若干如果足用其加派錢糧即
應停止為百姓即所以為國家乃培根本而
長治久安之要也下部知之○庚申順天府
進春○諭吏部三等侍衛護軍校等陞補護
軍叅領驟為三品太優以後一等侍衛二等
侍衛補授護軍叅領仍為三品三等侍衛護
軍校等陞補護軍叅領其頂帶俸祿著為四
品○諭兵部向來副都統以總兵官用叅領
以副將用今吏部題定無阿思哈尼哈番阿
達哈哈番叅領職任郎中監察御史以布政
使用文官布政使武官總兵官相等其陞轉
理應一體以後副都統阿思哈尼哈番等官
著以提督推用叅領阿達哈哈番等官著以
總兵官推用○免湖廣沔陽州本年分水災
額賦○辛酉諭戶部前因
世祖皇帝山陵大工及滇閩用兵錢糧不足不
得已於直隸各省田賦照明末時練餉例每
畝暫加一分以濟軍需今思各省水旱盜賊

民生未獲蘇息。正賦之外。復有加徵。小民困苦。朕心殊為不忍。若不急停。以舒民困。必至失所。除順治十八年已派外。康熙元年通行停止。爾部作速刊示。徧行曉諭。使小民咸知。○諭刑部。向來死罪重犯。因定有祖父伯叔兄弟。陣亡。及身有重傷者。免死一次之例。以致惡人豫知定例。希圖倖免。臨陣退縮。殺人刦財。肆行無忌。以後死罪犯人。該部不得論功議免具奏。著照其應得之罪。擬定題請。應否准其論功。候旨定奪。○壬戌。授廣東陣亡廣州水師總兵官孫一鵬子孫望京。拖沙喇哈番。○原任鎮國公傅勒赫妻博爾濟錦氏。夫亡自盡。特予旌表。給還封誥。○癸亥。陞福建邵武副將馬士秀。為浙江寧紹台總兵官。○山東道御史余司仁疏言。頃者禁止私鑄。及明季廢錢。立法甚嚴。但從前小錢廢錢。積聚民間者。不可勝數。今止禁攬和行使。而未講求收買變通之方。請於京師并直隸各省

地方。立法收買。俾民無所行使。則私鑄廢錢自息。下部知之。○甲子。免浙江錢塘等二十九縣。本年分旱災額賦有差。○乙丑。定營千總為正六品。把總為正七品。給部劄。○丙寅。戶科給事中蘭挺達疏言。舊例卓異官員。不論俸滿即陞。其有已在俸滿應陞之列。復舉卓異者。應議作何陞轉。以示優異。又言外官內陞京堂。原取其敦歷民事。練達政務。不宜用俸淺無薦紀之員。下部議。○巡視中城御史何可化。條奏四款。一。武弁當照文職定銜。不宜再加署字。一。司坊官歲終甄別薦者。必俸滿一年。劾者必詳開劣蹟。一。停解黃冊。以省派費。一。飭禁鼓狀通狀。以警刁風。下部議。○丁卯。纂修玉牒成。進呈御覽。○戊辰。諭吏部。在京部院各衙門官員。已經甄別。在外直隸各省督撫。亦應加甄別。以示勸懲。除新經簡用者。不必甄別外。其舊任

各督撫。爾部會同都察院。將伊等任內功過。稱職與否。詳察甄別。議奏。○兵部遵旨。議覆。漢世職注衛之例。除一、二、三等精奇尼哈番。照順治八年定例。注入鑾儀衛外。將阿思哈尼哈番以下各官。停注鑾儀衛。仍照題定舊例。各注原注衛所。其前注入鑾儀衛各官。亦應改歸原注衛所。從之。○庚午。左都御史甯古禮等疏言。邊外蒙古。到京多置兵器。因而間散蒙古。托名兵丁。任意購買。甚且有買去轉鬻者。請敕關津。嚴行搜索。又直隸各省。設立官兵。原以撲滅賊寇。平定地方。頃者小醜竊發。或嘯聚數千人。總督提鎮等官。不率所屬官兵。預為堵禦。竟請大兵。以此觀之。在外營伍。有名無實。請敕總督提鎮。嗣後無得輒請大兵。以致糜餉擾民。又直隸各省。有罪人犯。應解部審問者。請敕部密行文督撫。遞解停止差官。以省驛遞供應之費。從之。○壬申。諭兵部。盛京邊外居住莊村。俱著移居邊內。

其錦州以內。山海關以外。應展邊界。著議奏。○癸酉。歲暮。裕祭。

太廟。

上親詣行禮。○遣官祭。

永陵。

福陵。

昭陵。○遣官祭太歲之神。○陞湖廣巡撫楊茂勲為貴州總督。以都察院左副都御史劉兆麒為湖廣巡撫。○甲戌。

上詣。

世祖章皇帝寶宮前行除夕致祭禮。○旌表八旗節婦。滿洲布舒庫妻衛氏等二十七人。漢軍甯古德妻高氏一人。烈婦滿洲吳邁妻塞氏等二人。各給銀建坊如例。○是歲。人丁戶口。一千九百一十三萬七千六百五十二。田地。山。蕩。畦地。五百二十六萬五千二十八頃二十九畝。徵銀。二千五百七十二萬四千一百二十四兩有奇。米。豆。麥。六百一十萬七千。

五百五十八石有奇。草二百二十六萬四千六百四十束。茶十五萬七千八百二十三引。行鹽四百一十二萬八千三百八十七引。徵課銀二百七十二萬一千二百一十二兩有奇。鑄錢二萬九千一百五十八萬四千六百有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六

監修總裁官光祿大夫太保兼太子太傅保和殿大學士兼戶部尚書二品頂戴四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙元年壬寅春正月乙亥朔

實錄卷六

上詣

世祖章皇帝實宮前行禮還宮詣

聖祖母皇太后兩宮

聖母皇后前請安遵

懿旨免行慶賀禮○免王以下文武各官外藩

王及使臣等朝賀○朝鮮國王李裪遣陪臣

柳慶昌等進

世祖章皇帝上尊謚表文曰世德作求既孚下土之式尊親為太率舉上謚之儀慶同遐邇

歡均內外。欽惟

皇帝陛下聖自天縱。孝冠人倫。誕受多方命維新於邦國。肇稱殷禮。事有光於宗祊。益衍錫類之休。用覃普被之渥。伏念臣叨守先緒。偏荷

皇靈。迹滯箕封。莫預虎拜之列。心懸魏闕。第切鰲忤之誠。又表賀冬至元旦。

萬壽節。及進歲貢禮物。宴賚如例。○辛巳。

上詣

實錄卷六

世祖章皇帝寶宮前行期年致祭禮。○乙酉。孟

春。享

太廟。

上親詣行禮。遣官祭太歲之神。○丙戌。工部遵旨議覆。遣官發帑修築近京八旗護莊隄岸。應遣臣部司官同八旗官監視修理。其取土。創挖地畝。戶部另撥補給地主。從之。○丁亥。吏部議覆。山西巡撫白如梅疏言。布政使王顯祚。請將本身封誥。移贈本生祖父母。查

會典。移封移贈。雖止開京官。但覃恩內外自

應一體。王顯祚應准移贈。嗣後內外官遇詔

有奏。請移封移贈者。俱准一體遵行。從之。○

己丑。賜朝正外藩王貝勒貝子公台吉等銀

幣鞍馬有差。○江南提督梁化鳳丁父憂。令

在任守制。○平南王尚可喜疏言。許龍自投

誠以來。屢建功績。已奉諭旨。以總兵官用。查

南洋與南澳相對。最為要地。請授許龍為潮

州水師總兵官。駐劄南洋。以資彈壓。從之。○

實錄卷六

庚寅。諭吏部。原任大學士希福。范文程。寧完

我。額色黑。皆自

太宗文皇帝時。歷任內院。贊理機務。効力最久。

勤勞素著。其子宜加擢用。以示鼓勵。范文程

子范承謨。額色黑。子塞色黑。已補內院學士。

希福。寧完我。各一子。亦著以學士用。○辛卯。

祈穀於

上帝。遣都統輔國公穆琛行禮。○壬辰。陞都察

院左僉都御史董安國為左副都御史。○癸

已。以精奇尼哈番濟世。為正藍旗滿洲副都統。○予故原任工部左侍郎孫肇興。祭葬如例。○刑部題。凡官吏審實贓銀。內有短少民間價值之類。追給原主。其詐騙逼勒者。被害之人。自行首告。給還原主。非自行首告。經督撫科道叅發者。繫追入官。著為定例。從之。○甲午。陞內秘書院侍讀學士王清為內弘文院學士。○陞禮部郎中石琳。為山東按察使司按察使。○予故原任都統三等精奇尼哈番朱馬喇。原任副都統三等阿思哈尼哈番吳士俊。各祭葬如例。○平南王尚可喜疏報。逆賊蕭國隆。剽掠廣肇二府。臣分遣官兵。水陸進剿。自順治十八年八月。至九月。平賊寨。武定屯等一十三處。蕭國隆窮迫焚巢。投水身死。擒殺賊黨一千五百餘人。獲軍器船馬無算。廣肇地方悉平。下部議叙。○丁酉。以故三等侯墨勒根侍衛之子海爾圖襲爵。○吏部以正白旗議政大臣員缺。請補。得旨。滿洲

蒙古都統及尚書。俱係議政大臣。其每旗所設議政大臣二員。可以裁去。著議政王。貝勒大臣會議具奏。○禮部尚書烏赫。以年老乞休。令以原官致仕。○己亥。上御太和殿。陳大駕鹵簿。奏中和樂。王以下文武各官。及外藩俱謝恩行禮。賜王以下文武各官坐。茶畢。上回宮。○陞叅領佟輔聖。為山東沂州總兵官。張公諒。為山東登州總兵官。○吏部議江寧巡撫朱國治。藉口已報丁艱。不候交代。委棄職掌。遽行離任。應降五級調用。得旨。巡撫職任關係重大。朱國治遽委棄職掌離任。殊違法紀。著革職。○庚子。給廣東陣亡博羅營守備何瑞。拖沙喇哈番世襲。○辛丑。山東道御史趙祥星條奏。江南省上江下江學道二員。湖廣省湖北湖南學道二員。應俱裁併歸一部議。如所請。從之。○壬寅。子陣亡。拜他喇布勒哈番索布杜。祭葬如例。

二月乙巳朔春分朝

日於東郊遣都統圖海行禮○丁未遣大學士

衛周祚祭

先師孔子○戊申祭

大社

大稷

上親詣行禮○兵部題漢世職各官已遵旨註

入原籍衛所應改給敕書從之○浙江總督

趙國祚疏報鄭逆下偽官柳會春等五十九

人率衆投誠繳偽關防下部知之○己酉兵

部議覆福建總督李率泰疏言漳州為全閩

門戶應添水師兵二千副將一員遊擊二員

應如所請從之○庚戌陞禮部左侍郎祁徹

白為禮部尚書○辛亥遣官祭

歷代帝王○吏部都察院遵旨甄別督撫得

旨郎廷佐朱之錫張長庚李率泰趙廷臣李

國英王登聯白秉真劉秉政佟鳳彩袁懋功

俱留任趙國祚著解任彭有義著休致蘇弘

祖著以原官致仕張璿著降一級調用○理

藩院題請差大臣往科爾沁烏朱穆泰等四

十七旗會盟得旨著內大臣尚書博羅色冷

侍郎綽克託前往○予故二等阿思哈尼哈

番薩畢圖祭葬如例○壬子

聖祖母皇太后聖壽節

上率王以下文武大臣侍衛等詣

聖祖母皇太后宮行禮遵

懿旨停止筵宴○以故三等精奇尼哈番朱馬

喇子博通俄襲職○給江南陣亡浦口營守

備吳應昌子吳宗起拖沙喇哈番○癸丑雲

南總督趙廷臣以廣羅鎮總兵官狄三品病

故疏請選補得旨狄三品投誠功大其標下

官兵不應令他人管轄應令伊子或伊兄弟

接管該督察明速奏○乙卯轉禮部右侍郎

布顏為左侍郎陞內國史院學士查布海為

禮部右侍郎○丙辰諭吏部翰林院已裁并

內三院其侍講學士侍講俱著裁去內三院

各增設侍讀學士二員。侍讀二員。○改廣西全州總兵官劉應志為貴州鎮遠總兵官。移駐鎮遠府。○丁巳。免湖廣黃梅廣濟三縣及沔陽一衛。順治十八年分水災額賦十之三。○庚申。清明節。祭。

世祖章皇帝。遣官祭。

永陵。

福陵。

昭陵。○陞鄖陽撫治白秉真為山西總督。○以。

原任陝西巡撫張自德為河南巡撫。原任河南巡撫賈漢復為陝西巡撫。陞廣西左布政使胡文華為南贛巡撫。○予故一等阿思哈尼哈番張成祭葬如例。○駐防江寧佐領垢勒深。以臨陣受傷。創發身故。給拖沙喇哈番。予祭葬如例。○辛酉。以原任大學士希福子廕生帥顏保為內國史院學士。○癸亥。遣官祭。

先農之神。○陞監察御史崔澄為江南布政使。

司左布政使。○己巳。以順天府府尹王來任為鄖陽撫治。○庚午。先是。平西大將軍平西王吳三桂。定西將軍內大臣公愛星阿等奉命征緬。兩路進兵。於順治十八年十一月初八日。會師木邦。偽晉王李定國。先奔景線。偽鞏昌王白文選。遁據錫波。憑江為險。官兵自木邦晝夜行三百餘里。臨江造筏將渡。白文選復奔茶山。吳三桂愛星阿遣總兵官馬寧等率偏師追之。自領大軍直趨緬城。先遣人傳諭緬酋。令執送偽永曆朱由榔。否則兵臨城下。後悔無及。十二月初一日。大軍至緬城。緬酋震懼。遂執朱由榔獻軍前。殺偽華亭侯王維恭等一百餘人。總兵官馬寧等追及白文選於猛養。白文選降。滇南平。十二月初十日。大軍凱旋。吳三桂愛星阿等彙疏上聞。得旨覽王等奏。大兵進抵緬城。偽永曆及其眷屬全獲無遺。偽鞏昌王白文選逃奔茶山。大兵晝夜追及白文選。並偽官四百九十九員。

兵丁三千八百餘名家口七千餘名。全軍歸降。獲馬象甚多。具見王等調度有方。將士同心戮力。克奏膚功。朕心深為嘉悅。在事有功官兵著從優議叙。○諭禮部。向因逆賊李定國敗逃。挾偽永曆奔竄緬甸。遺孽未靖。疆圉弗寧。特命平西大將軍平西王吳三桂統領大兵。同定西將軍愛星阿等。出邊進討。茲據奏大兵於去年十二月初一日進抵緬城。偽永曆及其眷屬全獲無遺。偽鞏昌王白文選並偽官全軍歸降。偽永曆為賊黨所附。梗化有年。今一旦就擒。蕩平立奏。斯皆仰賴

天地

祖宗眷佑。克集大勲。捷音布聞。神人胥悅。應行祭告典禮。爾部速行察例。擇吉具奏。○湖廣總督張長庚疏報東鄉土司覃繩武殺賊歸順。得旨嘉獎。下部議叙。○壬申。戶部議覆。陝西巡撫張璘請清理各犯侵冒錢糧一疏。得旨。據奏將各犯妻孥變賣。追比犯人。果家產

盡絕。不能賠償。該撫理應明白具奏。且原無分離父子夫妻之例。此變賣妻孥係何官令其變賣。果係違例。該撫何不叅奏。張璘著明白回奏。此等違例之事。爾部竟未議及。殊非實心任事之誼。著嚴飭行

三月甲戌朔。尊

世祖章皇帝陵。曰

孝陵。○諭禮部。偽永曆率逆賊竊踞一隅。不遵王化。致數年以來。大兵征剿。轉運糧餉。地方困苦。生民弗寧。今平西大將軍平西王吳三桂定西將軍愛星阿等統領大兵。出邊進征。直抵緬甸。獲偽永曆。降白文選。誠天下之大慶也。仰荷

天地

祖宗眷佑。已命爾部行告祭禮。念永曆既獲。疆圉底定。從此大兵得以休息。糧餉不致糜費。宜詔告中外。咸使聞知。爾部速議具奏。○贈和碩安親王岳樂父多羅饒餘郡王阿巴泰

和碩康親王傑書父鎮國公祜塞俱為和碩親王○乙亥兵部遵旨議覆巡撫不理軍務安徽操江巡撫所屬十一營官兵應聽江南總督管轄安徽巡撫止管安徽等五府一州事務從之○又遵旨議覆以後推陞官員時不論缺之多寡將福建廣東雲南投誠官分用一半見任俸滿年久并候缺等官分用一半俟用完日將各省投誠官及應陞應補各官仍照舊例分項均用從之○刑部議覆吏科都給事中嚴沆疏言叩關必實有奇冤方可仰干宸聽若係一己私情希圖報復應照例治罪從之○丙子吏部遵旨議覆凡未習滿書侍讀學士以正三品通政使大理寺卿太常寺卿陞用從之○巡視北城監察御史祝鍾靈請解佐領并御史任養親部議以漢軍無解任侍養之例不准所請

上特允之○浙江道御史范平疏言國之大計在農農之所望惟雨自去年三冬絕雪今一

春無雨請敕禮部順天府等衙門虔誠祈禱嚴飭大小臣工實心供職共圖修省得旨天氣亢暘不雨與羣工無涉皆由朕才德涼薄政理未當

天心所致祈雨事宜著速議具奏○辛巳諭兵部向來綠旗武官叙功加至左都督仍應加級者授宮保銜今思宮保乃取裁自上酌示優異之銜不應作官員陞遷之階槩給且旗下官員軍功授以世職以後綠旗武官至左都督仍應以軍功加級者應授世職爾部酌議妥確具奏○以兵部督捕理事官劉格為順天府府尹○壬午定內三院滿漢侍讀學士為正四品滿漢侍讀為正五品○癸未吏部遵旨議覆嗣後大計布政使按察使俱停其親行入覲布政司以叅政或叅議道一員按察司以副使或僉事道一員代覲從之○乙酉以偽永曆朱由榔就擒告祭

世祖章皇帝○遣官告祭

天地。

太廟。

社稷。

福陵。

昭陵○是日。

上御太和殿。王以下文武各官。上表朝賀。頒詔天下。詔曰。自古帝王。又安海宇。衽席生民。必使逆孽無有稽誅。庶幾治化遐宣。兵民休息。此歷代之隆規也。我

世祖章皇帝。宅中定鼎。混一四方。惟偽永曆。率逆賊奔竄遐荒。尚逋天討。數年以來。大兵征剿。轉運糧餉。地方困苦。生民弗寧。特命平西大將軍平西王吳三桂。同定西將軍愛星阿等。統領大兵。出邊進討。直抵緬甸。於順治十八年十二月初一日。擒偽永曆及其眷屬。偽鞏昌王白文選。及偽官全軍投降。此誠

天地

祖宗之鴻庥。薄海內外之大慶也。捷書奏聞。朕

心嘉悅。已命所司虔行祭告典禮。念永曆既獲。大勲克集。士卒免征戍之苦。兆姓省輓輸之勞。疆圉從此奠安。閭閻獲寧幹止。是用詔告天下。以慰羣情。於戲。武烈維揚。式恆觀成之意。綸音載煥。聿昭求莫之心。布告萬方。咸使知悉。○給陝西殉難延綏總兵官沈朝華子沈源龍。三等阿思哈尼哈番。准世襲。○丙戌。以

王牒告成。賜總裁和碩安親王岳樂等及副總裁纂修各官銀幣有差。○己丑。贈故左都督楊秉英太子少保。予祭葬如例。○庚寅。陞廣東嶺東道蘇銑。為江西按察使。司按察使。○吏科給事中宋訓誥疏言。我朝當一代創興之始。革明季末流之弊。立法不得不嚴。而用法未嘗不寬。故雖屢定成案。必下三法司核擬者。誠恐畸輕則縱。畸重則苛也。乃刑部識案內。情輕而反比重律。法重而反從輕擬者。不可勝舉。今畿輔三冬少雪。一春無雨。未必

非刑罰不中。上干天和之所致。請嚴飭刑部嗣後凡兩造口供不全錄。即為作弊。引律不確合者。即為欺公。嚴治以不職之罪。下三法司議。○辛卯。

萬壽節。

上率諸王。貝勒。貝子。公。內大臣。大學士。都統。尚書。精奇尼哈番。侍衛等詣

聖祖母皇太后兩宮。

聖母皇后前行禮。御殿。王以下文武各官。上表

朝賀。○遣官祭

福陵。

昭陵。○遣官祭真武。東嶽城隍之神。○甲午。河道總督朱之錫疏言。南。汝。二府。領墾荒田。一應雜差。請俟五年後起派。從之。○乙未。兵部議准。江西總督張朝璘疏言。南昌城守水師請併立一營。除水師見兵五百名。再增五百名。以為城守。設立中軍守備等員。從之。○戊戌。授銅山投誠偽官黃順。柯鵬。右都督銜。仍

給三等阿達哈哈番。襲替四次。○義王孫徵淳疏請。以屬下投誠各官。均撥三旗。從之。○己亥。遣郎中岳諾惠等六員。分往浙江。福建。廣東。三省。安輯投誠官民。○庚子。兵部右侍郎李棠馥。以疾乞解任。允之。○癸卯。命江西提督。駐劄建昌府。○以一等公噶布喇。為領侍衛內大臣。

夏四月。甲辰朔。享

太廟。遣都統宗室羅託行禮。○戶部議覆。鳳陽巡撫林起龍疏言。東海居民。既經遷移。田地拋棄。錢糧請予豁免。應如所請。從之。○乙巳。四川巡撫佟鳳彩疏言。川省初定。土滿人稀。請將岳池縣歸併南充。江油縣歸併平武。從之。○丁未。兵部遵旨議覆。駐防京口。廣東。蘇州。杭州。漢軍都統。各定馬三十匹。副都統。各定馬二十匹。協領。各定馬十七匹。支給草豆。得旨。劉之源。王國光。沈永忠。祖永烈等。係統兵將軍。應准馬五十匹。副都統以下。應與各

王下官員相同。著再議具奏。○庚戌福建總督李率泰疏報定海小埕賊衆盤踞。臣密會靖藩各調官兵擊走之。又萬安所先經遷毀。續被偽鎮楊宣等復壘新城。臣復密會提臣馬得功調發官兵夾剿。賊不能支。揚帆遠遁。下部知之。○辛亥以原任吏部左侍郎熊文舉為兵部左侍郎。管右侍郎事。○吏部遵旨議覆總督加兵部銜巡撫既停止。提督軍務應加工部銜。從之。○壬子予故阿思哈尼哈番王月祭葬如例。○乙卯以加上

太祖

太宗尊謚。

上親詣

郊壇祭告

上帝。遣輔國公穆琛等祭告

地祇。

社稷。○丙辰加上

太祖武皇帝尊謚曰。

太祖承天廣運聖德神功肇紀立極仁孝睿武弘文定業高皇帝。

孝慈武皇后尊謚曰。

孝慈昭憲敬順慶顯承天輔聖高皇后。

太宗文皇帝尊謚曰。

太宗應天興國弘德彰武寬溫仁聖睿孝隆道

顯功文皇帝。恭奉

神牌入

太廟。

上親詣行禮。○丁巳轉刑部右侍郎吳正治為

左侍郎。以原任刑部右侍郎張爾素補原官

○四川總督李國英疏報偽石泉王朱奉鎰

煽惑土彝糾集逆黨。突犯叙州馬湖二府。提

督鄭蛟麟發兵撲剿。擒獲朱奉鎰。恢復兩郡。

下部知之。○庚申。

孝端文皇后忌辰遣官祭

昭陵。○辛酉叙恢復雅黎功。加四川建昌總兵

官王明德永寧總兵官高宗都督僉事陳建

俱為左都督。○甲子。叙督墾荒田功。加雲南總督趙廷臣太子少保。巡撫袁懋功。工部尚書。○丁卯。江南道御史胡秉忠疏言。臣核議江南審理案件。有沉閣十有餘年者。江南如是。他省可知。乞敕直隸各省督撫。將舊案立限清查。凡重大之罪。應奏請者。請旨處分。應發落者。即行批結。并飭司道府廳州縣官。凡有詞訟。速行結案。使被犯干証。免受拖累之苦。得旨。刑名關係重大。如此沉閣日久。其中顯有情弊。著察議。○己巳。吏科給事中周明新疏言。查大選官員內。有已故多年而猶然選授者。請敕各撫。將在籍候選各官。查明已故者。報部以便扣選。有已成進士。而仍以舉人選授者。請敕禮部。著曾經揀選之舉人。復中進士者。開送吏部。以便彼此詳查。下部議行。

五月。癸酉朔。吏部議覆。四川總督李國英疏言。通誅巨寇。環伺於下東地方。若仍駐成都。

僻在西偏。去夔東三千里。鞭長難及。查重慶居蜀之中。容臣率領兵馬。暫駐重慶。緩急可以就近調度。待下東底定。另移駐成都。應如所請。從之。○甲戌。贈山東殉難陽穀縣知縣李可愛為按察使司僉事。廕一子入監讀書。予祭葬如例。○戊寅。夏至。祭

地於方澤。

上親詣行禮。○庚辰。奉天府府尹徐繼煒疏言。新投盛京居民。生計未遂。應暫免一切工役。下部議行。○吏部尚書孫廷銓省親假旋。命即入部辦事。署理部務。大學士衛周祚仍回內院。○癸未。諭禮部。平西王吳三桂鎮守秦蜀。綏輯滇黔。撫順剿逆。茂著勲勞。偽永曆朱由榔。以明室遺孽。煽集黨羽。妄稱尊號。竊據一隅。歷年以來。屢煩王師征剿。疆圉弗寧。今王奉命統領滿漢大兵。出邊進討。於順治十八年十二月內。直抵緬甸。擒偽永曆及其眷

屬。又降偽鞏昌王白文選。并偽官全軍。此皆王殫忠奮力。運籌謀畧。調度有方。遂使國威遠播。逆孽蕩平。功莫大焉。宜加殊禮。以示眷酬。著進封為親王。應行事宜。爾部察例具奏。○甲申。授投誠故明宗室奉國將軍朱議瀾為拜他喇布勒哈番。○乙酉。遣官祭

闡聖帝君。○以兵部郎中張光祖為四川按察使。司僉事。提調學政。刑部郎中陸求可為福建按察使。司僉事。提調學政。刑部郎中孟述緒為雲南按察使。司僉事。提調學政。○戊子。予故副都統一等阿達哈哈番又一拖沙喇哈番俄貝。祭葬如例。○辛卯。陞左副都御史楊時薦為兵部督捕右侍郎。○以原任湖廣湖南提學道孫允驥為江南按察使。司僉事。提調學政。戶部郎中史允琦為山西按察使。司僉事。提調學政。○陞廣東按察使郭一鶚為陝西布政使。司右布政使。○壬辰。以大學士覺羅巴哈納為鑲白旗滿洲都統。○以

廣東鎮海將軍王國光補正紅旗漢軍都統。○癸巳。諭吏部。向來京察考滿各官。由本衙門堂官註定考語。有註稱職者。有註平常者。及至陞轉時。全不察照。殊非鼓勵盡職之意。今後京察考滿。俱著堂官詳加察議。註定考語。日後陞轉。即將稱職者。照考語次序。先令陞轉。仍註明歷俸年月。其各衙門堂官。須於考察考滿之時。矢公矢慎。以副倚任之意。不許瞻徇。○兵部題。巡撫既裁兵馬。見任福建巡撫標下効用投誠各弁。應令總督提督酌量分入各標營効用。從之。○乙未。吏科都給事中嚴沆疏言。在京三品以上及督撫等官。自陳。宜將任內何事加敘。何時紀錄。何事曾經鐫罰。何日曾被糾彈。何項應罰而蒙恩寬宥。一一開列。以明悉無遺為準。不宜侈張勤勞任事之浮詞。以混干澄叙官方之大典。臣見近時督撫諸疏。竟有鋪張累幅。稱誦不已者。殊失告君之體。請敕部嚴行申飭。下部議。

行○丁酉添設刑部翻譯滿漢字滿洲主事一員○庚子靖東將軍都統濟世哈蕩平山東賊寇班師○辛丑都察院左都御史寧古禮等疏請上

聖祖母皇太后兩宮

聖母皇后尊稱徽號命議政王貝勒大臣九卿科道會議具奏○平南王尚可喜疏報總兵官許龍擒獲海寇鄭成功之弟鄭成賜於厦門得旨嘉獎下部議叙

六月壬寅朔吏部議覆都察院左都御史魏裔介疏言直隸各省衙門事件向來未定規程每至多年不結請除奉旨急限外其餘一切部院文移督撫批發軍民告理事情每一衙門不得過二十日之限有難結者亦必申請明白不則糾叅治罪應如所請從之○乙巳陞通政使曹國禔為都察院左副都御史○丁未廣東道御史朱裴疏言都下以靡麗相競四方以奢侈為尚一鞍一騎不惜百金

之費一衣一帽可破中人之產婚嫁葬祭漫無等級滿漢效尤莫可底止甚至奴隸胥役優伶賤工毫無顧忌請敕下該部將一切貴賤典禮詳加考較昭示中外不得踰閑干分下部議○辛亥兵科給事中金漢鼎疏言總督巡撫諸臣責任最重近年來兩番甄別例皆移咨各部查取功過以定官評如捐輸而邀紀錄修城而蒙晉秩因公里悞而擬奪俸逋賦未清而亦鐫銜諸如此類何預封疆所貴乎節鉞重臣必能為朝廷大振紀綱力圖戡定使禁旅之驅馳漸省軍需之輸輓少寬若僅與有司較尺寸之勞謂足盡職亦已謬矣宜敕部院諸臣博採輿論嚴覈生平必取才守兼優始定上考下部知之○壬子以宋一炳舉首叛賊于七授拜他喇布勒哈番給與于七家產○予故少保兼太子太保二等公羅璧祭葬如例○丙辰陞內秘書院侍讀學士左敬祖為通政使司通政使○平西王

吳三桂疏請以曲尋武雷總兵官移駐尋甸彈壓東川從之○戊午裁雲南大鶴麗永總兵員缺改總兵官閭鎮為臨元廣西總兵官駐劄臨安府○庚申諭吏部都察院內外大小官員歷俸三年考滿視其稱職與否即可分別去留以示勸懲此外又有京察大計之例實屬故套且考察之時多有營求徇庇被處之官縱有屈抑不准申辯無罪被誣者甚多今思澄肅官方祇在實行勸懲不在踵襲繁文多立名色以後官員貪酷昭著及不能稱職者在外督撫不時叅劾在內各衙門堂官及科道糾察其京察大計應行停止內外大小官員俱著三年考滿考滿之時在外責成該督撫在內責成各衙門堂官矢公矢慎開註事蹟考語移送部院嚴加考察分別去留以昭勸懲如開送不公併原衙門考察之官糾叅治罪爾部院詳議定例以聞○陞正白旗滿洲副都統穆福為護軍統領○以散

騎郎阿思哈尼哈番和布素為鑲紅旗蒙古副都統○陞雲南叅政道李本晟為廣東按察使司按察使○癸亥諭兵部近見在外地方山湖盜起止令守備千總把總等弁領兵搜剿未見提鎮各官身率士卒前去剿賊亦不聞駐防滿官撥兵剿殺凡小賊嘯聚蔓延即成大盜宜預先剿滅爾部議奏○旌表河南寧陵縣節婦赫氏給銀建坊如例○甲子雲南總督趙廷臣疏言曹滴司改土為流請令黎平府經歷管理從之○乙丑諭兵部京口水師船發往浙省定海合浙省水師船著設提督一員總兵二員駐劄定海福建水師亦應設提督一員總兵二員此水師官兵應駐何處每處宜設官兵船若干爾部會同大學士蘇納海尚書車克達議奏聞○以署副都統馬通賽為正白旗滿洲副都統○丙寅靖南王耿繼茂疏報海逆鄭成功因其子鄭錦為各偽鎮所擁立統兵抗拒鄭成功不勝

忽怒驟發顛狂。於五月初八日。齧指身死。下部知之。○戊辰。予故原任浙江巡撫陳應泰祭葬如例。○庚午。裁河南大梁。河南。河北。兵巡道三缺。○以霸州。文安。二營附近天津。令歸天津總兵官統轄。○辛未。裁山東濟南。登州。濟寧。兵巡道三缺。

秋七月。壬申朔。享

太廟。遣都統宗室羅託行禮。○以吏部尚書車克為內秘書院大學士。○諭吏部。趙開心。龔鼎華。降調處分已久。著遇侍郎缺補用。○戊寅。吏部議覆。刑科給事中黃熙縝疏言。官員革職之後。於原任內有應議敘紀錄加級者。則曰既經革職。無庸議敘。至罰俸降級。則照民例議罪。是功不敘而罪及之。未為法之平。以後革職休致之官。如遇原任內有應得功次。加級紀錄者。亦應照見任官一體議敘。註冊。若後遇有處分。亦應照見任官一體准抵。至於未革職之先。有加級紀錄。註冊。後經革

職者。例不留抵。惟老病休致之官。其原任有加級紀錄者。仍留註冊內。遇事故准與抵銷。從之。○庚辰。兵部議准。平西王吳三桂。請添設雲南省城副將一員。中軍守備一員。千總二員。把總四員。馬步兵一千名。從之。○辛巳。裁山西太原。大同。平陽。兵巡道三缺。驛傳道一缺。○壬午。靖南王耿繼茂疏言。漳州水師經制兵三千。原設遊擊二員。分為二營。恐兵多不便約束。請增遊擊一員。改為中左右三營。從之。○甲申。浙江巡撫朱昌祚議。覆陝西按臣扈申忠條奏。軍民丁徭一體當差。查浙省各衛所原有運糧之責。取有閒丁。每年每丁徵銀四錢。為貼造新船之費。運衛所既有丁徭。自難復肩民役。不便與秦省無運衛所一例。下部知之。○乙酉。吏部都察院遵旨議覆。三年考滿。滿漢三品衙門堂官以上。及在外督撫。俱各自陳。其餘官員應立五等考語。一等稱職者加一級。二等稱職者紀錄一次。

後緣事降級。准其抵銷。辦事平常者仍留原任。辦事不及者降一級調用。不稱職者革職。以後陞轉。照考語次敘。一等者先用。又在京四品僉都御史。卿員。國子監祭酒。六科滿漢都給事中。中書科。行人司。上林苑掌印官。並在外。僉都御史。銜之巡撫。任滿三年。咨送部院考核。註考語。此外各官在京者。各部院堂官。註考語。在外者。各督撫。註考語。仍咨送部院覆核。如註考語。官員徇情不公。及明知屬員俸滿不考。或地方盜案。錢糧未清。冒稱考滿。及各官歷俸已滿。規避不考者。在內部院。在外督撫。及本官。一併治罪。從之。○刑科給事中黃熙纘疏言。茶馬一差。應專用滿官。部議請照戶工二部。滿漢無差。例差滿漢御史各一員。從之。○丙戌中元節。祭世祖章皇帝。遣官祭永陵。福陵。

昭陵。○兵部題。文職官員。既定舉劾例。二年歲終。奉行一次。其直隸各省總督提督所屬武職官員。除有大貪大惡。仍不時糾叅外。應照文職例。二年歲終。令總督提督會同舉劾一次。從之。○庚寅。裁江西驛傳道一缺。湖西湖東。兵巡道二缺。○辛卯。轉戶部尚書阿思哈為吏部尚書。○以原任山西按察使李芝蘭為江南按察使。司按察使。○壬辰。改錦州為錦縣。設知縣典史各一員。隸奉天府。其寧遠縣人民。暫歸錦縣管理。○甲午。靖南王耿繼茂疏言。福建長樂營增兵一千。請設遊擊一員管轄。從之。○乙未。戶科給事中俞之琰疏言。甄別之例。統衙門而計賢否。則其綱易舉。考滿之典。就一人而核功過。則其目易張。謹陳四款。一。外吏之實俸難滿。宜三年冊報。以稽政績。一。陞轉之遲速不同。宜通俸并考。以免遺漏。一。優考之名實難副。宜詳列事實。以杜冒濫。一。賢否之評。隲貴詳。宜公同考核。以

昭大公。下部知之。○丙申。裁福建漳南巡海道。三缺。○丁酉。贈湖廣殉難武陵縣知縣袁夢吉。按察使司僉事。予祭葬如例。○戊戌。陞左都御史甯古禮。為戶部尚書。○陞江南京口左路水師總兵官張杰。為浙江水師提督。福建同安總兵官施琅。為福建水師提督。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七

監修總裁官光祿大夫太保兼太子太傅保和殿大學士兼戶部尚書二等伯加四級臣馬齊光祿大夫經筵日講官起居注少保兼太子太保保和殿大學士仍兼管吏部戶部尚書翰林院掌院事加二級又加一級臣張廷玉光祿大夫經筵講官太子太傅文華殿大學士仍兼理戶部尚書事務加五級又加二級臣蔣廷錫總裁官光祿大夫太保兼太子太傅吏部尚書臣朱軾等奉

敕修

康熙元年壬寅八月辛丑朔給假大學士金

之俊以年老乞休命以原官致仕○癸卯予故福建副都統包有亮祭葬如例○丙午諭戶部糧船經由漕河領運官丁恪遵條約依期抵通回空方為盡職乃有姦頑員役不守成法多有夾帶私販貨物隱藏犯法人口倚恃勢力行兇害人借名阻礙河道毆打平民託言搜尋失物搶劫民船且有盜賣漕糧中途故致船壞以圖貽累地方種種姦惡難以枚舉藐法病民莫此為甚以後如有仍前作

弊違禁肆行無忌者。督漕各官并該地方官。一有見聞。即行奏。務將官丁嚴提治以重罪。若知而徇情不奏。督漕各官及地方官亦從重處治。爾部即傳諭遵行。○諭禮部宗女封號應有定例。今見格格封號從其生父。父陞則陞。父降則降。又有從養父封者竟無定例。或應從生父。或應從養父。爾部同宗人府會議畫一定例具奏。○丁未。遣大學士覺羅伊圖祭

先師孔子○戊申。祭

大社。

大稷。遣都統穆里瑪行禮。○裁湖廣上江下江。

武昌荆西四道缺。○己酉。

太宗文皇帝忌辰。遣官祭

昭陵。○命協鎮廣東將軍駐劄肇慶府。○裁廣

東肇慶總兵員缺。添設廉州總兵官。高雷廉

總兵官。止轄高雷二府。○庚戌。改福建閩安

水師總兵官韓尚亮為福建水師左路總兵

官。浙江定海水師總兵官常進功為浙江水師左路總兵官。○辛亥。

太祖高皇帝忌辰。遣官祭

福陵。○諭都察院巡視茶馬一差。近經部議滿

漢兼差。已經奉旨准行。今思巡視茶馬差。原

係漢御史從無兼差滿官之例。以後著仍照舊

例止差漢官。不必兼差滿官。○壬子。秋分。夕

月於西郊。遣都統圖海行禮。○甲寅。以原任山

東沂州總兵官李永盛為廣東廉州總兵官

○丙辰。調刑部尚書覺羅雅布蘭為都察院

左都御史。陞鑲黃旗蒙古副都統覺羅科爾

昆為刑部尚書。○丁巳。調江南京口右路水

師總兵官石國璽為京口左路水師總兵官

○戊午。轉山西右布政使何中魁為福建布

政使司左布政使。福建右布政使金光祖為

廣西布政使司左布政使。陞貴州按察使王

鐸為江西布政使司右布政使。○己未。遣官

祭

歷代帝王○遣官祭城隍之神○直隸總督苗澄疏請懷來道事務歸并口北道管理。易州道事務歸并霸州道管理。霸州道移駐蠡縣。從之。○辛酉。吏部題。漢軍外官革職解任。不回旗者頗多。皆因無處分督撫。及地方官之例。遂爾瞻徇。嗣後直隸各省革職解任官員。任內錢糧未清。及緣事未結者。仍候議結起行外。其錢糧已清。緣事已結者。急催回旗。仍將起程日期報部。該旗亦將到京緣由咨部。其有仍留原處。或於別處居住者。該督撫及地方官。交部議處。其在途逗遛者。將該地方官。照逗遛例議處。得旨。依議。本內逗遛不回之人。未經議及處分。著再議定例具奏。尋又議遲延不速歸旗者。交刑部從重治罪。從之。○吏部左侍郎胡兆龍。以病乞解任。允之。○乙丑。以阿達哈哈番張夢吉。為廣東副都統。○丙寅。授固山貝子尚善女為縣君。塔阿思哈尼哈番王摩。為固山額駙。○戊辰。陞浙

江寧波副將蔴蔭揚。為江南京口右路水師總兵官。○己巳。宗人府禮部。遵諭議。王貝勒貝子等。有願撫養女者。奏准撫養。隨養父陞降。如未奉旨。私自撫養者。仍照生父陞降。得旨。格格不便。照養父品級。俱著照生父品級。其從前。照養父給過品級者。仍著存留。○庚午。諭禮部。朕惟君國之道。必崇夫孝理。化民之務。首重乎尊親。欽惟我

聖祖母昭聖慈壽恭簡安懿章慶皇太后。仁承

天德。順協坤儀。佐

皇祖太宗文皇帝。肇建丕基。啓

皇考世祖章皇帝。宅中定鼎。朕纘荷鴻圖。恭承

懿訓。仰惟恩德。愛戴彌殷。

母后皇后。懋昭淑配。克嗣徽音。表正六宮。母儀

四海。

母后溫恭慈惠。誕育眇躬。聖善之德。並隆尊顯

之儀。宜備粵稽古制。詢於僉謀。尊上

聖祖母皇太后尊號曰。

昭聖慈壽恭簡安懿章慶敦惠太皇太后。

母后皇后尊號曰。

仁憲皇太后。

母后尊號曰。

慈和皇太后。爾部即擇吉以聞。

九月辛未朔。旌表雲南趙州烈婦。時際明妻。

王氏陸萬頃妻楊氏。各給銀建坊如例。○甲

戌。轉吏部右侍郎馮溥為左侍郎。以原任吏

部左侍郎梁清寬為吏部右侍郎。○陞貴州

督標中軍副將趙良棟為雲南廣羅總兵官。

○丙子。予故三等輔國將軍席爾圖。祭一次。

○戊寅。以原任常德總兵官胡茂禎為陝西

寧夏總兵官。○己卯。兵部議覆。總督提督。統

轄全省。除山海巨盜。嘯聚成羣數百以上。搶

掠地方。攻陷城池。仍照例議處。至管轄汛地。

有小寇。刦傷官民。及鎮店道路。刦失餉鞘。將

提督罰俸九月。總督罰俸六月。從之。○壬午。

裁延綏巡撫缺。○丙戌。陞山西按察使張颺

為福建布政使。司右布政使。○平西王吳三

桂疏言。雲南土司。傾心向化。大則抒忠獻土。

小則效職急公。勤勞既著。勸勵宜先。查滇志

可據。忠悃有憑者。文職五十六員。武職十六

員。請敕部給與號紙。下部議。○喀爾喀車臣

汗。遣使進九白年貢。宴賚如例。○丁亥。陞廣

西蒼梧道陳弘業為山西按察使。司按察使。

山東青登萊道楊奇烈為貴州按察使。司按

察使。○吏部題。內大臣二等伯郎肅。緣事革

退。其伯爵應令其兄綽爾濟承襲。得旨。郎肅

父明安貝勒。投誠有功。著郎肅子班第襲替。

○戊子。諭吏部。都察院。近定各官考滿之例。

一等加級。二等紀錄。太過。以後考滿。一等稱

職者。著紀錄一次。後有緣事降級。准其抵銷。

二等稱職者。應加賞賚。作何給賞。爾等酌議

具奏。餘仍照前例行。○以一等侍衛鄂其禮。

為鑲黃旗蒙古副都統。○己丑。禮部等衙門。

遵旨會議。

孝陵興工動土。應遣武職大臣一員。內院大學士一員。禮部工部堂官各一員。總管內務府官一員。科道官各一員。率領欽天監看風水官。同往詳視。從之。○辛卯。陞正紅旗滿洲副都統覺羅巴爾布。為都統。○朝鮮國王李柵遣陪臣鄭太和等。表賀平偽永曆。并貢方物。宴賚如例。○廣東總督盧崇峻疏言。鎮守肇慶總兵官。已經裁汰。其所屬營寨。在河南者。新興。開平。陽江。恩平。四縣。應歸羅定副將管轄。在河北者。封川。開建。德慶。廣寧。四會。高要。高明。等州縣。應歸肇慶城守副將管轄。廣州水師總兵官。止管附近江海營寨。其陸路城守原俱守巡道管轄。今各道既罷。管兵事務。則陸路城守。應并責廣州總兵官統轄。其自清遠以至連陽各營汛。與韶州相近。應歸韶州副將統轄。從之。○壬辰。授故抒誠侯狄三品之子狄從仁。為抒誠伯。○癸巳。設守視孝陵副將一員。左右兩營守備各一員。把總二

員。兵六百名。○陞叅領金萬鎰。為湖廣彝陵總兵官。○甲午。工部題。黃河水性洶湧。以後修築隄岸。如一年之內。衝決者。叅處修築之官。過一年。衝決者。叅處防守之官。至運河與黃河不同。修築隄岸。三年之內。衝決者。叅處修築之官。過三年。衝決者。叅處防守之官。如限年之內。修築官已去。防守官不行料理。致有衝決者。一并叅處。從之。○丁酉。

孝慈高皇后忌辰。遣官祭。

福陵。○陞王府長史噶爾漢。為正紅旗滿洲副都統。○戊戌。工部議覆。河道總督朱之錫疏言。商船至瓜洲。由閘通行。不用盤剝。船戶無從覓利。瓜洲剝船。濟工銀兩。請予豁免。應如所請。從之。

冬十月。辛丑朔。享。

太廟。遣都統宗室羅託。行禮。○祭。

世祖章皇帝。○遣官祭。

永陵。

福陵。

昭陵。頒康熙二年時憲曆。壬寅。以上

太皇太后。

仁憲皇太后。

慈和皇太后尊號。遣官告祭

天地。

太廟。

社稷。○以內國史院大學士成克鞏為內秘書

院大學士。○以故阿思哈尼哈番胡世巴之

子說塞襲職。○癸卯黎明。直班內大臣侍衛

內院禮部官俱朝服齊集。設

太皇太后兩宮

皇太后冊寶綵亭六座。內院禮部官前引

太皇太后冊寶綵亭。至

太和殿正中陳設。

仁憲皇太后。

慈和皇太后冊寶綵亭東西旁陳設。

上禮服。陞殿。閱冊寶畢。內院禮部官導綵亭次

第前行。

上陞輿。隨後。內大臣以下官隨

駕出右翼門。至

太皇太后宮門外。

上降輿。捧冊寶官從綵亭內。捧

太皇太后冊寶進宮。置黃案上。禮部官導

上於丹陛正中跪。大學士捧冊寶跪進。

上受冊寶。次第獻畢。上奏言恭惟

聖祖母皇太后陛下承天厚德。配地弘庥。臣嗣

纘鴻圖。仰蒙懿訓。璇基永保。環海重熙。宜修

尊顯之儀章。用祝生成之福履。敬稽彝典。晉

薦徽稱。伏祈

聖慈鑒俞。禮儀備舉。慰四海瞻依之願。迓萬年

昌熾之祥。冊文曰。昌源茂衍。荷慈訓之貽謀。

景曆初膺。奉彝章而晉號。歡騰宮籙。慶洽寰

區。欽惟

聖祖母昭聖慈壽恭簡安懿章慶皇太后至仁

厚德。配地承天。輔

皇祖以式廓丕基懋著肅雝之化。啓

皇考而載恢大業。益隆聖善之規。顧眇躬之嗣

續。洪猷賴懿教之恩。隆誨迪。敬循顯揚之典。

用抒孝養之忱。謹告

天地。

宗廟。

社稷率諸王。貝勒。文武羣臣。恭奉冊寶。加上徽

號曰。

昭聖慈壽恭簡安懿章慶敦惠太皇太后。伏願

休徵滋至。純嘏彌增。綿鶴算於無疆。耀鴻名

於有永。寶文曰。

昭聖慈壽恭簡安懿章慶敦惠太皇太后之寶。

大學士跪接奏書。並冊寶。仍置各案上。女官

舉冊寶案進宮畢。

上出。陞輿。率內大臣侍衛內院禮部官至。

仁憲皇太后宮。進獻冊寶。如前儀。上奏言恭惟

聖母陛下。順德弘昭。徽音茂著。臣紹聞先緒。承

誨

慈闈。世澤方長。天休滋至。用舉尊親之典。以彰

燕翼之謀。爰備隆儀。上尊徽號。伏祈俞鑒。俾

遂微誠。用抒孝養之忱。益大邦家之慶。冊文

曰。德弘祚胤。啓萬年顯世之符。禮重徽稱。合

四海尊親之戴。喜諧禁籙。慶溢寰區。欽惟

母后皇后。柔順承天。安貞配地。贊襄

皇考。敷內治而化洽宮庭。撫育眇躬。紹丕基而

思深訓迪。仰慈仁之備至。宜尊養之兼隆。載

考彝章。晉崇鴻號。謹告

天地。

宗廟。

社稷率諸王。貝勒。文武羣臣。恭奉冊寶。上徽號

曰。

仁憲皇太后。伏願嘉祥駢集。茂祉愈增。昭令聞

而卜世卜年。迓休徵而彌昌。彌熾。寶文曰。

仁憲皇太后之寶。次至

慈和皇太后宮。進獻冊寶。上奏。如前儀。冊文曰。

德弘祚胤。啓萬年顯世之符。禮重徽稱。合四

海尊親之戴。喜諧禁籙。慶溢寰區。欽惟

母后。仁承乾始。道合坤貞。秉淑範而襄內治。化

洽宮庭。誕眇躬而纘鴻圖。恩深顧復。仰慈仁

之備至。宜尊養之兼隆。載考彝章。晉崇鴻號。

謹告

天地。

宗廟。

社稷。率諸王。貝勒。文武羣臣。恭奉冊寶。上徽號
曰。

慈和皇太后。伏願嘉祥駢集。茂祉愈增。昭令聞
而卜世卜年。迓休徵而彌昌。彌熾。寶文曰。

慈和皇太后之寶。進獻畢。

上還宮。○是日。

太皇太后兩宮

皇太后。

皇上。鹵簿儀仗。俱不設。免諸王大臣官員朝賀

○甲辰。以尊上

太皇太后。

仁憲皇太后。

慈和皇太后尊號。頒詔天下。詔曰。朕惟自古帝

王。統御寰區。首崇孝治。遡宮闈之世德。備尊

養之彝章。隆號推恩。甚盛典也。欽惟我

聖祖母。昭聖慈壽恭簡安懿章慶皇太后。佐

皇祖太宗文皇帝。肇建丕基。啓

皇考世祖章皇帝。宅中定鼎。

母后。皇后。克嗣徽音。母儀四海。

母后。溫恭淑惠。誕育眇躬。朕嗣纘鴻圖。並承慈

訓。仰惟恩德。愛戴彌殷。爰稽古今之典儀。用

協臣庶之誠悃。謹告

天地。

宗廟。

社稷。於康熙元年十月初三日。率諸王。貝勒。文

武羣臣。恭奉冊寶。上

聖祖母。皇太后尊號曰。

昭聖慈壽恭簡安懿章慶敦惠太皇太后。

母后。皇后尊號曰。

仁憲皇太后。

母后尊號曰。

慈和皇太后。盛典告成。爰頒恩賚。於戲。詒孫翼子。綿介祉於千秋。大德顯名。合懽心於六宇。○詔內恩欸。凡五條。○禮部奏請賞琉球國使臣。得旨。琉球使臣前來年久。殊為可憫。其賞賚著比前加一倍。以彼國貴重之物給與。○丁未。以原任延綏巡撫林天擎為南贛巡撫。○兵部議覆。偏沅巡撫周召南疏言。楚省路險途長。驛馬倒斃甚多。請按站立驛。自大龍驛起。至晃州驛止。共計十五驛。各設馬百匹。應如所請。從之。○戊申。禮部題尊上

太皇太后。

仁憲皇太后。

慈和皇太后尊號。大禮既成。詔告天下。各藩王。并直隸各省文武官。五品以上諸司。例應齋進慶賀表文。嗣後凡遇元旦。

聖壽冬至。各進表入賀。得旨是。○丁巳。陞雲南

按察使崔之瑛為雲南布政使司右布政使。管左布政使事。浙江溫處道席式為雲南按察使司按察使。○己未。定西將軍內大臣公愛星阿。平定雲南凱旋。○雲南巡撫袁懋功疏報。據車里宣慰使刀木禱報稱。偽晉王李定國。逃奔景線地方。染病身死。下部知之。○庚申。禮部題。凡承襲公侯伯精奇尼哈番年。至十八。應上朝者。病故。各照品級。給與祭葬。應否與謚。候旨定奪。其未及上朝年歲者。不必賜卹。從之。○辛酉。吏部題。請補用恩蔭公噶播拉之子秦保等十四人。得旨。長春宮讀書大臣之子。均蒙

世祖章皇帝選入。今當補用。不應止照伊父品級。在內。俱著授以二等侍衛。在部院。俱著授以郎中。

十一月。辛未朔。○壬申。陞浙江溫州副將李榮為浙江右路水師總兵官。○甲戌。兵科給事中周明新疏言。急選并未職。俱請照大選

例在天安門外掣籤從之○予故副都統三等阿思哈尼哈番蘇祿邁巴圖魯祭葬謚勤勇○刑部等衙門以朝審情實各犯具奏內絞犯衛正元一案得旨衛正元身為江南巡按當海賊入犯時理應前進保守江寧乃由太平退回鳳陽本當處死念其在

世祖章皇帝時曾經摘發奸弊糾劾貪官盧慎言今姑從寬免死流徙尚陽堡○乙亥戶科給事中史彪古疏言河工官員宜久任以專考成請將沿河州縣陞沿河府廳沿河府廳陞沿河道員庶駕輕就熟為久安長治之計下部議行○丁丑予故三等輔國將軍倭赫納祭葬如例○戊寅授投誠偽鞏昌王白文選為承恩公給三等公俸○辛巳冬至祀

天於

圜丘

上親詣行禮○祭

世祖章皇帝○遣官祭

永陵
福陵

昭陵○停止次日朝賀○吏部遵旨議覆步軍總尉應為三品步軍副尉應為四品步軍校仍為五品從之○戊子添設戶部滿洲翻譯主事一員○庚寅陞四川按察使金鉉為山西布政使司右布政使廣西桂林道彭而述為貴州按察使司按察使○辛卯諭兵部督捕衙門窩隱逃人鄰佑及干連人犯向來流徙寧古塔以後俱著流徙尚陽堡○吏部以刑部蒙古員外郎員缺開列拖沙喇哈番阿穆瑚瑯等請補得旨

世祖章皇帝時部院補授蒙古官仍准留任以後補授之蒙古官俱著裁去○癸巳旌表江西新喻縣節婦張昇妻劉氏給銀建坊如例○乙未禮科給事中胡悉寧疏言據福建撫臣許世昌疏報海上新遷之民死亡者八千五百餘人臣思去年

上諭責成督撫安插得所。諄誠嚴切。年來未見督撫設法安置。以慰

皇上恤民至意。乃輒云時疫流行。水土難調。所致。則知此外未經冊報者。又不知凡幾。請敕部通行該督撫。嚴飭有司。務期多方撫育。不得聽其轉徙溝中。違者以不職治罪。得旨。著許世昌察明回奏。○靖南王耿繼茂疏報。偽振威將軍左都督楊學臯。率所屬官兵三千餘名。人民家口三萬有餘。投誠。請從優議叙。得旨。覽王奏。楊學臯率領官兵。真心投誠。深可嘉尚。著議叙具奏。其歸順人民。聽其自便安插。○丙申。吏部遵旨查覆阿哈尼堪所得一等阿思哈尼哈番。伊長子。次子。俱已承襲物故。所遺世職。應令無職之子達賴承襲。從之。○戊戌。以故三等阿思哈尼哈番蘇祿邁巴圖魯子孫塔哈襲職。○免直隸南宮等三縣本年分水災額賦有差。○己亥。免江南潁上等五縣本年分水災額賦有差。○予故一

等阿達哈哈番都統濟世哈。祭葬如例。十二月。庚子朔。和碩安親王岳樂等遵旨議覆吏部實錄及品級考。俱經會議訂正。成一代典章。此外如有奉

上傳為例之事。即應增入。得旨。據奏品級考。止議漢官陞轉。滿官未經議及。著將滿官陞轉定例並議。又太常寺。光祿寺。鴻臚寺。各官。在內陞轉者多。六部司官。不得在內陞轉。俱係明末陋規。非明初之制。又太常。光祿。鴻臚。既經歸并禮部。應與六部司官一體陞轉。俱著再行會議具奏。○辛丑。定考滿各官。一等稱職者。在內。四品五品職官。紀錄一次。給表裏各一疋。六品以下職官。紀錄一次。給表一疋。在外。巡撫及布政使以下。四品職官。紀錄一次。給表裏各一疋。五品以下職官。紀錄一次。給表一疋。○甲辰。裁浙江金衢兵巡道缺。歸守道兼理。驛傳道缺。歸杭嚴道兼理。○吏科給事中劉如漢疏言。四川初闢。多將白身之

人。委署有司。今後應擇鄰封正印官用之。庶幾以愛惜功名之故。愛惜百姓。亦澄清吏治之一助。下部議。○乙巳。授福建投誠偽都督楊學臬。為左都督。加太子太保。仍給三等阿思哈尼哈番。○定在京十衛武生。春秋二考。各取五十名。○丙午。禮部題請明年元旦慶賀典禮。得旨。奉

太皇太后。

仁憲皇太后。

慈和皇太后懿旨。

世祖章皇帝寶宮。尚在景山。免諸臣行禮。惟朕躬行禮。其進表禮儀。照舊例行。筵宴亦著停止。○丁未。京口鎮海將軍劉之源疏報。偽肇敏將軍陳文達。擁兵海上十餘年。今十月中。統領舟師。抵台受撫。又偽總兵羅永德。脫身來歸。呈繳偽印。下部察叙。○戊申。定直隸各省駐劄王與公將軍。督撫提督。副都統。總兵官。文移相見儀注。○己酉。靖南王耿繼茂疏

報。總兵官吳萬福。奉命招撫偽總兵王士鰲等歸誠。下部察叙。○辛亥。喀爾喀戴青台吉等遣使進九白年貢。宴賚如例。○壬子。裁江西巡西。巡東。二道缺。歸守西。守東。二道兼理。○癸丑。靖南王耿繼茂疏報。自順治十八年九月起。至康熙元年七月止。陸續招撫偽將軍。都督。總兵。并副。叅。遊。守。千。把。總等官。共二百九十員。兵共四千三百三十四名。家口共四百六十七名。請敕部酌議。各官給與銜俸。兵丁入伍支糧。下部知之。○甲寅。裁福建巡海道缺。歸驛鹽道兼理。裁巡漳道缺。歸守漳道兼理。○工部議覆。河道總督朱之錫疏言。宿遷縣遙隄。自直河口起。至皂河西止。黃水大溜。直射坍潰。搶築小隄。恐不足恃。請展築月隄。以資防禦。應如所請。從之。○乙卯。兵部議覆。河南提督許天寵疏言。各府州縣當設公衙門。令大小文武各官。五日一會。兵有不便於民者。有司面議。民有不便於兵者。武將

面議使一切機務商確咸當。應如所請從之。
○丙辰陞河南按察使佟彭年為江南布政使司右布政使。四川西道朱之瑤為四川按察使司按察使。○己未和碩安親王岳樂等遵旨議覆六部漢郎中照科道官例。每年內陞四員。春秋二季開列。每季欽點二員。其內陞太常寺光祿寺鴻臚寺等缺。并請更定得旨。前以太常寺光祿寺鴻臚寺歸并禮部。故欲更定官制。今思將此三衙門官更改。則各官陞轉愈致壅滯。太常寺光祿寺鴻臚寺提督四譯館卿少卿寺丞等官俱著照舊存留陞轉。各部司官每年內陞四員。依議。其科道員缺向來以推知考選。以後推知俱應陞部屬補授科道。仍著酌議定例具奏。尋議科道員缺應將各部司官考選停止。推知中行評博開列。其各部主事員缺將推知等官推陞從之。
○庚申授故輔國將軍倭赫納子吳禮為三等奉國將軍。○辛酉諭吏部兵部貴州接壤

雲南皆係巖疆要地。且苗蠻雜居與雲南無二。其一切文武官員兵民各項事務俱照雲南例著平西親王管理。○甲子裁江南潁州道缺。改鳳宿道為鳳陽道。轄鳳陽一府。安廬道為廬州道。轄廬州一府。滁和二州及安慶府歸并池太道管理。○乙丑順天府進春。○丙寅停止五城兵馬司年終考核。○以隨征左都督杜永和為福建右路水師總兵官。○丁卯裁福建海澄總兵官缺。○命福建水師提督帶兵四千駐劄海澄縣。左路水師總兵官帶兵三千駐劄閩安縣。右路水師總兵官帶兵三千駐劄同安縣。○戊辰歲暮。祭太廟。
上親詣行禮。○遣官祭永陵。
福陵。
昭陵。○遣官祭太歲之神。○陞大理寺少卿吳爾嘉齊為光祿寺卿。○己巳。

上詣

世祖章皇帝寶宮前行除夕致祭禮○旌表八
旗節婦滿洲那桑阿妻滿氏等十人。漢軍俞
曰昌妻呂氏一人。烈婦滿洲阿拉米妻莫氏
等八人。漢軍張文禮妻閔氏一人。各給銀建
坊如例○是歲人丁戶口。一千九百二十萬
三千二百三十三。田地。山。蕩。畦地。五百三十
一萬一千三百五十八頃一十四畝。徵銀。二
千五百七十六萬九千三百八十七兩有奇。
米。豆。麥。六百一十二萬一千六百一十三石
五斗有奇。草。二百二十六萬五千七百三十
四束。茶。一十五萬七千九百二十八引。行鹽
四百二十萬四千五百九十八引。徵課銀。二
百七十三萬三千五百七十八兩六錢。鑄錢
二萬九千七百八十九萬六千三百八十有
奇。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八

監修總裁官光祿大夫太保保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二年癸卯春正月庚午朔

實錄卷八

上詣

堂子行禮還宮拜神畢詣

太皇太后

仁憲皇太后

慈和皇太后宮行禮御殿王以下文武各官外

藩王及使臣等上表朝賀停止筵宴○朝鮮

國王李柵遣陪臣呂爾載等表賀冬至元日

萬壽節及進歲貢禮物宴賚如例○甲戌孟春

享

太廟遣都統輔國公穆琛行禮○遣官祭太歲之神○丙子

上詣

世祖章皇帝寶宮前行再期致祭禮○戊寅吏

部都察院遵旨議覆文武大小官員惟遇軍

恩准給封贈誥敕其文官以考滿給誥敕之

例應行停止從之○辛巳賜朝正外藩王貝

勒貝子公台吉等銀幣鞍馬有差○壬午諭

兵部凡查解逃人有主認識始行照例擬罪

實錄卷八

二

今見靈壽縣所解逃人李大增督捕傳撥什

庫七人到部俱不認識即李大增自供並地

方十家長俱云並未投充滿洲李大增明係

民人督捕不行審明即議李大增等入官李

九山等流徙恐屬冤枉且陳氏等七人何以

盡斃於獄爾部即將該縣典史楊煦快役高

應正溫起家并出首李大增之高萬臣作速

差人提取到部請旨定奪○盛京戶部侍郎

吳瑪護等遵旨議覆蓋州熊岳地方安插新

民查有附近荒地房基酌量圈給並令海城縣督率勸墾從之○癸未授多羅豫郡王多鐸庶子篇古輔國公宋固圖子吳立渾俱為三等奉國將軍○丙戌吏部以通州知州倪嘉賓等失迎詔書分別議處得旨頒送詔書豈可不論地方遠近稟令迎接其入城經過及駐宿城池有前站者作何迎送失悞者作何處分著再定議具奏○設廣西泗城軍民府流官同知經歷儒學教授等官○戊子陞四川東道許纘曾為河南按察使司按察使○予故一等伯班肫祭葬如例○東部虎爾哈額駙僧額進貢方物賞賚如例○己丑命開列御史差員凡差回者論回道日期未差者論到任日期差未滿撤回及復補者論繳敕及補任日期將其中日月深者在前列具奏○陞叅領孫思克為陝西甘肅總兵官○予故原任湖廣中路總兵官李茹春祭葬如例○兵部題凡機密事務應令專官收掌

請添設滿郎中員外各一員協同漢主事辦理從之○奉天府府尹徐繼煒疏言海城牛莊等處安插新民民多地少查各蒙古頭目移居邊外有遺下熟地又馬廠地方官馬已經移養棄地亦多請分給新民得旨馬廠地准給民墾種○辛卯戶部議覆兵科給事中碩穆科疏言錢糧拖欠皆由地土不清地丁確冊未立請差滿漢官員遍歷府州縣親行確丈查地丁錢糧恐有紳衿富戶串通書吏共相隱匿者應先敕各省撫臣查戶口之增減田地之荒熟務將欺隱人丁地畝徹底查出備造清冊於二年內題報再行請旨差廉幹官員清查從之○壬辰禮部題外藩貨物有該國王印文開送者准其貿易今朝鮮國陪臣下人應山等所帶貂皮一百張印文內並未開載請敕議罪得旨應山春金免議罪交易貨物聽其隨便攜帶至日報部於會同館交易該王印文著停止應禁之物同時令

邊關官員詳細嚴察○陝西巡撫賈漢復疏言近因酌省繁費令無驛站州縣裁里馬三分之一但查陝省興安州所屬洵陽漢陰石泉三縣山路險遠額銀無多又西安府屬之朝邑縣鳳翔府屬之汧陽隴州皆孔道差繁往來絡繹需用里馬勢不能裁請照衝煩之例免裁里馬下部議○乙未免直隸保定文安二縣康熙元年分水災額賦十之三○丙申四川總督李國英遵旨議覆四川水師總兵官駐劄汛守地方及管轄事宜查巫夔昌寧等處為諸寇出沒之所而濱江之雲陽縣首當其衝總兵官應駐雲陽分屯一旅於白帝城但川江路遠支繁未免鞭長不及請上自黔彭下抵巫山責令汛守凡鎮臣所駐地方境內土司俱應屬其統轄今川東土司已隸重遵二鎮惟石柱地界濱江而酉陽錯壤黔彭當楚逆王光興入犯之路應并聽該鎮節制以便防禦下部知之○戊戌免江南太

和縣康熙元年分水災額賦十之三○免山西太原等二十州縣康熙元年分水災額賦有差○兵部右侍郎介山以奉差粵東查勘邊海條奏粵東事宜四款一沿海州郡缺兵餉數月請敕隨時給發一地方官委署匪人民受其累請敕選廉幹職官署理一沿途驛遞疲累宜恤請每省內頒詔之員止差一起其部差各項人員亦應酌減一各省解送馬匹倒斃甚多請於叅領郎中等官擇其廉能者差遣下部議行○江寧巡撫韓世琦疏言崇明縣大糧田九千六十頃五十畝零除正賦外復徵蘆課銀八千三百八十餘兩實係一田兩賦亟請蠲豁部議如所請從之○己亥工部題營建孝陵於二月十五日開工照例請差督工人員得旨武職大臣內院大臣科道官不必差遣著禮部堂官同相擇人員去工部堂官輪班前往八旗選用才幹官八員餘如議○廣東

總督盧崇峻奏請大兵往來封借商民船隻不許

二月庚子朔停止六部漢司官內陞京堂例

○免河南陳留等十五州縣康熙元年分水

災額賦有差○停差江寧蘇州杭州織造工

部揀選內務府官各一員久任監造○壬寅

諭禮部冬至慶賀典禮明洪武十四年方定

例舉行其後隨令在外各衙門官齋進表文

今思官員往返有誤職掌且驛遞繁苦以後

在外各衙門官員除元旦聖壽節照舊齋進

外冬至齋進慶賀表文著停止惟於各本衙

門行禮其在京慶賀表文典禮仍照舊行○

正紅旗滿洲副都統朱孔格以目疾乞解任

允之○工部議覆吏科給事中雷一龍疏言

河工關係漕運滿漢自宜同差應如所請將

滿漢司官一并差遣從之○湖廣提督董學

禮疏報前奉命會剿湖廣西山巨寇李來亨

馬騰霄党守素等隨同鄖陽總兵官穆生輝

襄陽總兵官于大海辰常總兵官高守貴統

領官兵三萬人鑿山開道以正月初五日進

至李家店遇賊兵萬餘人各路奮擊斬馘過

半生擒偽總兵宋段獲旗幟器械無算賊黨

焚巢遁走又別遣彝陵鎮將恢復歸州巴東

巫山等處直達夔州并撫輯各處洞寨得旨

嘉獎下部議叙○癸卯禮部議覆雲南巡撫

袁懋功疏言滇省貢院見在起工重建八月

鄉試之時恐不能告竣請展期於十月入闈

應如所請從之○丙午浙江道御史張吉午

疏言三年考滿之法一二等稱職者即係薦

舉應將督撫二年薦舉一次之例槩行停止

從之○丁未

太皇太后聖壽節遵

懿旨免行禮○遣大學士成克鞏祭

先師孔子○刑部題海賊入犯江南案內罪

犯奉有諭旨除康熙元年以前審結外其餘

亦從寬免今有先結案內干連緝獲人犯及

未獲人犯或仍緝獲審擬或一并寬免得旨此罪犯既有旨寬免不論已結及見在告發者但係康熙元年以前之事俱著寬免○陝西總督白如梅疏報提督王一正率興安總兵官于奮起河北總兵官鮑敬進剿逆賊郝搖旗至房縣橫水地方偽羅軍門將萬餘人拒戰大敗之殺賊兵無算生擒賊一百七十人徇於軍大獲盔甲器械下部察叙○戊申祭

大社

大稷遣都統覺羅巴哈納行禮○己酉陞王府長史覺羅外庫為正紅旗滿洲副都統○庚戌春分朝

日於東郊遣都統覺羅巴爾布行禮○是日亥刻

慈和皇太后崩先是

慈和皇太后違豫

上朝夕虔侍親嘗湯藥目不交睫衣不解帶及

大漸

上憂悴弗勝寢膳俱忘輔臣近侍等見

聖容清減請

上節勞少休不允時

太皇太后以

慈和皇太后疾軫念日切

上數詣

慈寧宮請安強斂威容冀慰

聖懷退輒涕泗交頤至是

慈馭上賓

上擗踊哀號水漿不御哭無停聲近侍無不感

泣○辛亥黎明儀仗全設

上成服王以下文武官員齊集宮門外公主王

妃以下大臣命婦等齊集宮門內皆成服舉

哀嗣是每日三次上食

上親奠獻號泣王以下官員公主王妃以下命

婦等俱隨行禮舉哀○壬子諸王貝勒大臣

等以

上哀痛過甚。叩請節哀。○癸丑宣

大行慈和皇太后哀詔。詔曰。朕繼承

祖宗鴻緒。方欲奉事

慈闈。抒誠孝養。不意

皇妣慈和皇太后。於康熙二年二月十一日亥

時崩逝。嗚呼。仰惟

教育隆恩。難酬高厚。乃孝思未展。忽焉見背。哀

痛彌切。抱恨終天。一切喪制。禮儀已命所司

舉行外。布告天下。咸使聞知。○甲寅。遣官頒

詔天下。自詔到日。為始持服二十七日。○

太皇太后

仁憲皇太后見

上泣涕不已。頻降

懿旨慰諭。○命各部院官員。編素辦事。○免直

隸各省遣官進香。○丙辰。先是。順治十八年

戶部請禁厘字錢。

上恐不便於民。命俟二年三月收毀。至是。戶部

復請嚴禁。本部給價收買。發寶泉局改鑄新

錢。暫停各關買解銅觔從之。○丁巳。兵部議

准平西王吳三桂疏。請將雲貴二省總督巡

撫敕書。撰入聽王節制四字。從之。○戊午。授

投誠偽侯陳豹為慕化伯。給三等伯俸。○初

設四川雲陽等處水師總兵官。以向化侯譚

詣為之。○吏部題一等精奇尼哈番陣亡。授

三等伯覺羅莫洛渾。無子。所遺世職。應令伊

同祖弟拜他喇布勒哈番。席特庫并襲。得旨。

世職。理應給莫洛渾養子諾爾遜承襲。念原

職三等阿思哈尼哈番。係席特庫之祖。拜山

所得。著將莫洛渾所得之職。與諾爾遜承襲。

拜山原職。令拜他喇布勒哈番。席特庫并襲。

○己未。以奉移

梓宮日期。遣輔政大臣索尼。告祭

大行慈和皇太后。○陞湖廣湖北道吳嵩印。為

湖廣按察使。司按察使。荆南道郎永清。為山

東按察使。司按察使。○庚申。奉移

大行慈和皇太后梓宮。安奉壩上。

享殿是日儀仗全設內大臣侍衛等齊集宮門外王貝勒等齊集東華門外文武官員齊集東安門外公主王妃以下大臣命婦俱先期一日赴壩上。

梓宮啟行

上奠酒行禮攀號益切

太皇太后

仁憲皇太后念

上冲齡荷

宗社之重不便遠離紫禁親送

梓宮頻降

懿旨諭止

上雖勉遵

慈諭仍哭踊不輟○阿霸垓達爾漢貝子綽博

會喀喇沁塔布囊巴爾藏等進

大行慈和皇太后香并貢馬匹酌納之○兵部

議覆廣東鎮海將軍王國光疏報總兵官許

龍標下官兵奪獲賊船生擒偽都督邵應祚

殺賊八十餘名擒賊夥十三名為數無多例不議叙應令該督酌量獎賞以示鼓勵得旨據奏官兵入海奪獲賊船生擒偽都督爾部比照陸地以擒殺無多不准議叙不合仍著議叙具奏○辛酉吏部遵旨察議尚書杜立德孫廷銓於內地會議時爭鬪不合應議處得旨孫廷銓當會議之所有所見即當面向議政王貝勒大臣等商議乃不言於會議之所止約三人私奏杜立德等既知伊等上疏不告於議政王貝勒大臣等復率眾上疏均不合理應議處念係因公事爭辯俱從寬免罰○壬戌免湖廣荊門州鍾祥漢川二縣康熙元年分水災額賦有差○封土默特鎮國公古睦為固山貝子○吏部遵旨議覆凡頒詔官經過駐宿及五里內府州縣衛所各官俱迎出城跪道右候詔過臨行出送亦如之違者降二級留任其路傍五里以外官不得迎送從之○平西王吳三桂疏請雲南提督

駐劄大理府。從之。○癸亥。湖廣巡撫劉兆麒疏報安陸岳州。寶慶。永州。郴州。常德。辰州。靖州。八府州。開墾田地八百八頃六十畝有奇。新州。岳州。九谿。茶陵。荆右銅鼓。伍開。鎮谿。各衛所。開墾田地六百頃三十畝有奇。下部察叙。○甲子。阿祿科爾沁多羅郡王朱爾扎哈。科爾沁卓禮克圖親王吳克善等。進

大行慈和皇太后香。○廣西總督于時躍疏報。

安南國王黎維祺薨。王嗣黎維禧繼襲。進本

告哀。下部議。○乙丑。工部題。臣部司官差繁

額少。不敷料理。請補設缺額司官三員。增設

司官八員。從之。○漕運總督林起龍疏報。淮

安羣盜鈕思塘。王海雲等。阻水結黨。出沒黃

河。洪澤等湖。二十餘年。殺掠商民。搶奪婦女。

截刦解部顏料船隻。非他盜可比。項嚴督文

武官。四布緝捕。相繼就擒。鈕思塘等應駢斬。

餘流徙決杖有差。得旨。三法司核擬具奏。○

林起龍又疏報。開濬涇河閘。自淮城迤南運

河東岸。至金吾莊。延袤七十餘里。下流淤塞。

處約可十餘里。令山陽寶應民疏濬計田出

夫。衆志鼓舞。甫二十日。畢事。河道深通。閘流

無阻。直達射陽湖入海。居民田廬。可無水害。

下部知之。○浙江總督趙廷臣疏言。浙省錢

糧逋欠。不清多由徵解繁雜。請以一條鞭徵

收之法。即用為一條鞭起解之法。行令各州

縣。隨徵隨解。每次解文內。開列歲額。填寫所

解條銀若干。尚餘未解若干。布政司查明完

欠分數。開註奏銷。歲恭二冊。至為簡便。從之。

○丙寅。清明節。祭

世祖章皇帝。○遣官祭

大行慈和皇太后。○遣官祭

永陵。

福陵。

昭陵。○是日。

端敬皇后梓宮發引。暫安奉黃花山。○丁卯。兵

部題請武職考滿。一等稱職者。亦應照文職

例。紀錄一次給賞。從之。○貴州總督楊茂勲疏報。丹平土官莫之廉。前於康熙元年二月內。擅用坐纛旗幟。盔甲與官兵接戰二次。又窩藏叛逆劉鼎。訛言煽惑聚眾弄兵。為謀巨測。隨會同提督李本深。遣官兵分路擒剿。莫之廉擁眾高巖。弩矢亂發。官兵奮勇進攻。前後斬賊六百四十六級。生擒莫之廉。并其妻妾子女。莫之廉自知罪大。絕食死。請將行間戮力諸臣。分別議叙。下部察叙。○戊辰。戶部議覆工科給事中于可託疏言。江南屯糧。改并驛傳道兼攝。不便。宜仍令都司總理。使衛弁有所畏忌。屯丁易於輸將。應如所請。從之。○兵部議覆浙江總督趙廷臣疏。請將邊海投誠官兵。分插內地各營。入伍食糧。應如所請。投誠兵卒。由寧波至者。發紹興。杭州二府。由台州至者。發金華。嚴州二府。由溫州至者。發衢州。處州二府。距海甚遠。庶令陰消異志。從之。○鄂爾多斯多羅貝勒善達故。遣官致

祭

三月己巳朔。命廣東總督移駐廣州府。○庚午。都察院左都御史覺羅雅布蘭疏。請酌定茶馬額數。完欠多寡。作何鼓勵處分。以便考核。下部議。○四川總督李國英疏。報進剿昌寧直搗逆巢。渠寇袁宗第。乘夜遁去。當陣殺死偽總兵以下六十餘員。招降偽新化伯馮起鳳。偽總兵黃守庫等。得旨。事平。察叙。○癸酉。兵部議覆平西王吳三桂疏。言偽右都督馬思良。自邊外率眾投誠。應授職銜。并偽總兵胡順等以下各員。均應請叙。賞賚給俸。應如所請。其餘令該藩安插得所。得旨。馬思良著授右都督職銜。餘依議。○甲戌。命大學士蘇納海管戶部尚書事。○吏部遵旨議覆嗣後由吏員例監准貢出身者。俱准陞正印。得旨。納銀授官。於理不合。以後吏員年滿果勤勞。無過。准其考職。免納銀兩。其納銀例。監准貢。以後亦著停止。○乙亥。

大行慈和皇太后享殿行初祭禮。儀仗全設。王以下文武各官。公主。王妃以下命婦等俱齊集。禮部堂官讀文。輔臣索尼奠酒。舉哀行禮。○是日除服。○丙子。行繹祭禮。○工部議覆奉天府府尹徐繼燁疏。請嚴禁包衣佐領下打魚網戶。擾害地方。應如所請。敕鎮守遼東將軍。嚴行申飭。得旨。包衣佐領下及王貝勒屬下魚戶。指稱進魚名色。違法擾民。自當察獲治罪。爾部瞻徇。並不查以前擾民之人。止議申飭。殊屬不合。著再議。○戊寅。以考滿。加都察院左都御史魏裔介太子太保。○己卯。月祭。大行慈和皇太后。○辛巳。陞護軍叅領塞冷為鑲黃旗蒙古副都統。○吏科給事中薛奮生疏言。在內部院大臣。在外督撫。為庶官表率。黜陟之典。不可不嚴。近停止京察。專行考滿。法誠至善。但有歷俸及期。得與考滿者。亦有因降級罰俸。逾期不得與考滿者。使降級罰

俸者。必待復級。并扣除月日。而後考滿。則新舊叅罰。牽連積日累月。終無考滿之期。是無過者方凜三載考績之條。而有過者反借為優游藏拙之地。請將降級罰俸者。不必待其復級。并扣除月日。計歷任三年。即據實自陳。著為定例。下部議。○四川總督李國英疏報。故偽岐侯賀珍子偽富平伯賀道寧。率所部納款。下部議叙。○壬午。免江南青浦等十二縣。江寧前衛等十五衛。順治十八年分旱災額賦有差。○癸未。以內弘文院大學士蔣赫德為內國史院大學士。○乙酉。予故戶部尚書寧古禮祭葬。謚勤敏。○予故蒙古副都統羅錫祭葬如例。○予福建陣亡長史艾圖。穆書二等護衛。託克退。各祭葬如例。○丙戌。萬壽節。停止行禮。○遣官祭福陵。昭陵。○遣官祭真武。東嶽。城隍之神。○丁亥。授巴哈塔。四品職。守。

福陵○己丑祭

大行慈和皇太后行奉安

寶宮禮○庚寅裁江南揚州府船政同知缺○

壬辰命四姓庫里哈等進貢貂皮照赫哲等

國例在寧古塔收納○荷蘭國遣出海王統

領兵船至福建閩安鎮助剿海逆又遣其戶

部官老磨軍士丹鎮總兵官巴連衛林等朝

貢

上嘉之各賜銀幣有差○癸巳於

大行慈和皇太后寶宮前行大祭禮儀仗全設

供獻行禮與初祭同○甲午行繹祭禮○裁

江南蘇松兵備道缺○裁貴州思石兵巡道

缺歸思仁守道兼理○以故一等伯班肫子

巴特馬藏襲爵○以輔臣公鰲拜子那摩佛

為領侍衛內大臣○予福建陣亡一等侍衛

雅圖哈爾璧二等侍衛渣克旦拜哈拉三等

侍衛宋吉納塞祿塞勒拉薩禮額赫馬護前

鋒侍衛董阿拖沙喇哈番赫達塞達都護佐

領滿都護各祭葬如例

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九

監修總裁官光祿大夫太保兼太子太傅保和殿大學士兼戶部尚書二品伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二年癸卯夏四月戊戌朔享

太廟遣都統穆里瑪行禮○以平南王下副都統班際盛為廣東左翼總兵官○己亥予福建陣亡拜他喇布勒哈番顧論德護軍叅領尼什哈納各祭葬如例○庚子追封靖南王耿繼茂生母郭氏為妃○辛丑湖廣總督張長庚疏報提督董學禮同各鎮將等由魚刺坡進抵長坪地方於三月初九初十日大破逆賊李來亨擒殺賊黨攻進雙龍觀三白岬二關逆賊焚巢遁走下部知之○壬寅予福

建陣亡拖沙喇哈番海陸弘三等侍衛鄂爾希納各祭葬如例○癸卯免福建閩縣等十二縣順治十八年分水災額賦有差○甲辰予故輔國公胡什塔祭葬如例○丁未免江西南昌等府六十五州縣康熙元年分旱災額賦有差○戊申月祭

大行慈和皇太后○免河南祥符等七縣康熙元年分水災額賦有差○原任廣州府通判屠彪子屠之煥為偽總兵董方策所執不屈

實錄卷九

死命照外委官殉難例賜卹○己酉遣官祭歷代帝王○遣官祭

先農之神○免山東淄川等四縣順治十七年分蝗災額賦有差○予福建陣亡阿達哈哈番寨撒錦桂海山泰拜他喇布勒哈番護軍叅領宜爾圖各祭葬如例○福建提督三等侯馬得功以老病乞休慰留之○壬子福建道御史王鼎疏言適者

山陵大事次第將畢宜及時舉行經筵請於滿

漢詞臣中擇其老成淵博者授為講官。將經史有關治道之言採輯翻譯以備進講。并請蚤修。

三朝實錄撮其要旨編為

祖訓一書。每次同經史進講。

皇上監於成憲率

祖攸行。其裨益

聖學更大也。報聞。○京口鎮海將軍劉之源以

病乞休。慰留之。○癸丑。免陝西。西鳳。興安等

屬康熙元年分水災額賦有差。○甲寅。

孝端文皇后忌辰。遣官祭

昭陵。○大學士成克鞏以疾乞假。令解任調理

○叙剿平貴州逆苗王應兆功。加總督楊茂

勲。兵部尚書。○廣東道御史李秀。疏叅吏部

尚書孫廷銓。左侍郎馮溥。溺職徇私。命孫廷

銓馮溥明白回奏。○戶科給事中吳愈。聖疏

言品級考一書。乃銓部用人之成憲。因此書

未成。銓部每選一官。則曰相應請旨。每立一

法。則曰理合題明。法非畫一。似可移甲以就乙。事屬游移。未免朝四而暮三。何如早頒成書。使臣工共喻。永遠遵行。庶杜凌躐之端。成謹嚴之法。下部知之。○乙卯。添設滿漢御史各一員。協理河南道事。○免工部項下順治十八年浙省旱災額賦。已經徵解者。准抵康熙元年額賦。○丙辰。以原任雲南左布政使黃志遴。為貴州布政使。司左布政使。陞刑部郎中徐國相。為山東布政使。司右布政使。○

戊午。以

世祖章皇帝寶宮移送

孝陵。遣官告祭

天地。

太廟。

社稷。○庚申。以奉移

寶宮。往

孝陵。日期。告祭

世祖章皇帝。儀仗全設。王以下文武各官齊集。

讀文奠酒。行禮○辛酉。奉移

世祖章皇帝寶宮。往

孝陵。先是。諸王大臣。引古禮止

駕遠送。

上未允。至是。以

太皇太后懿旨。諄切。

上不得已。勉遵

慈命。是日黎明。王以下。奉恩將軍以上。內大臣

侍衛。分翼集

壽皇殿門外。公。侯。伯。以下。滿漢文武各官。齊

集東安門外。

上奠酒哀慟。悲不自勝。

靈輿啟行。王以下。文武各官。隨後行。其不往送

公。侯。伯。以下。滿漢文武各官。隨出土城關方

回。

靈輿經過門。橋。俱奠酒。每至宿次

享殿。供獻奠酒。舉哀。行禮○癸亥。予福建陣

亡拜他喇布勒哈番。叅領格紳佐領納海。各

祭葬如例○甲子。陞原任福州水師副將李

長榮。為福建水師左路總兵官○乙丑。諭兵

部。武官職任緊要。居家候選。懸缺遲久。著仍

令單月投供。雙月選授。如投供不到者。雖名

次在前。不准選授○陝西提督王一正。疏報

三月二十五日。進剿郝搖旗於張老河。擒斬

賊黨。奪獲器械。逆賊焚巢遠遁。下部知之○

丙寅。以大理寺評事符渭英。為貴州鄉試正

考官。中書易道沛。為副考官

五月。戊辰朔。予福建陣亡三等阿達哈。哈番

吳庫。祭葬如例○己巳。江寧巡撫韓世琦。疏

報建築鎮江府金山城寨礮臺工竣。下部知

之○辛未。湖廣總督張長庚。疏報。忠建。高羅

木冊三處土司。繳印投誠。下部知之○癸酉。

山西巡撫楊熙。疏請發常平倉穀。賑恤孤貧。

從之○甲戌。諭禮部。滿漢官員卹典。已有定

例。其一品官員與謚者。宜加優異。以示酬庸。

以後一品官員。曾經予謚者。除造墳外。仍著

予立碑○以考滿。加戶部尚書杜立德。太子太保○予福建陣亡三等伯覺羅莫洛渾祭葬。又加祭一次。謚剛勇○予福建陣亡一等阿達哈哈番阿哈達。叅領多木星阿。各祭葬如例○丙子。以吏部尚書孫廷銓。為內秘書院大學士○廣西巡撫屈盡美疏報慶遠府土知縣莫宗詔。土司鄧世廣。韋盛春。繳印投誠。下部知之○丁丑。陞杭州副都統圖爾白紳。巴圖魯為杭州將軍○多羅溫郡王孟俄妃薨。予祭一次○予福建陣亡三等阿思哈尼哈番黑特黑。二等阿達哈哈番。擢得赫武大。闡拜他喇布勒哈番。佟吉。噶布拉。各祭葬如例○陞福建同安副將黃翼。為同安總兵官○戊寅。月祭

大行慈和皇太后○以內弘文院學士周有德

為山東巡撫○予福建陣亡拖沙喇哈番蘇

黑臣。納代。黑虎。馬木皮。納泰。拜胡賴。各祭葬

如例○兵部題。直隸各省巡撫奉旨停止管

理軍務。給護衛兵五十名。應於原帶壯丁內。准其披甲。如無壯丁。照數另募。於附近標營內。支領錢糧。從之○庚辰。遣官祭關聖帝君○癸未。夏至。祭地於

方澤。遣都統覺羅巴爾布行禮○甲申。以原任侍郎巴格。為戶部右侍郎○予福建陣亡三等精奇尼哈番納穆生格。祭葬。謚直勇○兵部議覆。山東總督祖澤溥疏言。寧海州之黃島等二十島。及蓬萊縣之海洋島。皆遠居海中。遊氛未靖。奸宄可虞。請暫移其民於內地。酌量安插。免其輸糧。從之○乙酉。陞吏部郎中祖澤深。為湖廣布政使司右布政使○戶部議覆。平西王吳三桂疏言。滇省初定。請開鼓鑄。應頒給康熙錢式。從之○禮部議覆。鳳陽巡撫張尚賢疏言。節婦向氏。誘姦不從。遭毆立斃。節操可嘉。應照例旌表。從之○丙戌。命山西河東道移駐平陽府○朝鮮國王李

擢遣陪臣鄭維城等進賀尊上

昭聖太皇太后。

仁憲皇太后。

慈和皇太后徽號表文。曰。敦孝理於萬方。化洽錫類。進顯號於三殿。禮隆尊親。率普均歡。遐邇胥慶。欽惟

皇帝陛下。聖自天縱。行冠人倫。為文子文孫。誕膺寶命。奉長樂長信。克承徽音。肆崇章之並揚。宜景福之益衍。伏念臣幸際熙運。猥荷洪休。鯁岑迹遠。雖阻玉帛之班。象闕心懸。第切岡陵之祝。○戶部議覆。工科給事中吳國龍疏言。直隸各省解京各項錢糧。自順治元年起。總歸戶部。至七年。復令各部寺分管催收。以致款項繁多。易滋奸弊。請自康熙三年為始。一應雜項。俱稱地丁錢糧。作十分考成。除每年正月扣撥兵餉外。其餘通解戶部。每省各造簡明賦役冊。送部查核。其易知由單。頒給民間者。盡除別項名色。至各部寺衙門。應

用錢糧。年前具題數目。次年於戶部支給。仍於年終核報。應如所請。從之。○丁亥。予福建陣亡拖沙喇哈番戴穆祭葬如例。○孫廷銓疏辭大學士。溫旨慰留之。○湖廣提督董學禮疏報。提鎮各標將弁。共招撫西山餘黨洞寨一百四處。繳到偽敕印一百六十餘件。下部知之。○戊子。於

大行慈和皇太后寶宮前行百日致祭禮。○陞左都御史魏裔介為吏部尚書。○叙剿平山東崑崙招虎兩山賊寇功。加總督祖澤溥兵部尚書。副將劉進寶。右都督。○己丑。戶部議覆。陝西茶馬御史孫錫齡疏言。寧鎮孳生馬匹。每馬一匹。原給地一項五十八畝四分。開除一匹。即將所給地畝起科納糧。今孳生騾馬。既已停止。地畝應歸附近州縣納糧。其職司馬匹寺監等衙門。請敕部議裁。應如所請。從之。○庚寅。陞宗人府啓心郎王之科為內弘文院學士。○以大理寺少卿圖喇為杭州

副都統○江寧巡撫韓世琦疏言。崇明靖江丹徒丹陽等四縣民遷賦缺。拋棄田畝。應請蠲除額賦。從之○辛卯。以戶部郎中徐謂弟為四川鄉試正考官。中書杜鎮為副考官。兵部郎中王天成為廣東鄉試正考官。行人洪琮為副考官。刑部員外郎李為霖為廣西鄉試正考官。中書陳廷樞為副考官○壬辰。免湖廣興國黃梅等七州縣。沔陽一衛。康熙元年分旱災額賦有差○吏部議覆甘肅巡撫劉斗疏言。洮岷道缺奉裁。歸併隴右道兼理。查洮岷所屬州縣衛所。俱距鞏昌府八九百里。深山窮谷。奸宄易生。應請仍留洮岷道彈壓。靖遠道所轄縣衛。距府不遠。事務無多。應請裁併隴右道兼理。應如所請。從之○癸巳。以上

大行慈和皇太后尊諡。遣官告祭天地。

太廟。

社稷○旌表雲南節婦生員楊朝祿妻蘇氏。罵賊自刎。孝子杜桂穎代父捐軀。各給銀建坊如例○甲午。恭上

大行慈和皇太后尊諡。

上御素服。出太和門。閱冊寶。禮部鑾儀衛堂官內務府官奉冊寶至

享殿安設。冊文曰。慈恩罔極。報莫殫夫。追崇厚德。難名。號宜尊乎。顯懿。用表無前之美。以彰不匱之思。中外咸孚。典儀惟備。欽惟皇妣。大行慈和皇太后淑慎柔嘉。溫恭慈惠。飭躬靜好。流藹吉之徽音。逮下雍和。著肅雖之雅化。內承

皇考。匡贊惟勤。上奉

重闈。虔恭匪懈。眇躬纘緒。方期申尊養之忱。驚馭升遐。遽永結終天之慕。仰惟盛德。宜薦鴻名。載考舊章。博咨公議。謹奉冊寶。上尊諡曰

孝康慈和莊懿恭惠崇天育聖皇后。伏惟慈靈昭格。彝典懋膺。益弘佑啓之仁。永衍邦家之

慶寶文曰。

孝康熙和莊懿恭惠崇天育聖皇后之寶○是日。以奉移

寶宮至

孝陵日期。告祭

孝康熙后。王以下文武各官。齊集。宣冊寶。讀文。

奠酒。隨送大臣命婦等。俱先一日赴壩上○

免浙江西安。餘姚等五縣康熙元年分旱災

額賦有差○乙未寅時。奉移

孝康熙后寶宮往

孝陵。

上以

太皇太后再三諭止。不克親送。呼搶哀痛。彌日

不止。命諸王。貝勒。內大臣。侍衛。文武各官。詣

享殿。奠酒。行禮。儀仗全設。

寶宮啓行。王以下文武各官。隨後行。經過門。橋。

俱奠酒。每至宿次

享殿。供獻。奠酒。舉哀。行禮。

六月。丁酉朔○戊戌。以內國史院檢討熊賜

瓖。為福建鄉試正考官。工科給事中何澄。為

副考官○己亥。以

世祖章皇帝寶宮奉安

地宮。遣官告祭

天地。

太廟。

社稷○辛丑。遣輔臣。及文武三品以上官。詣

陵致祭○壬寅。恭奉

世祖章皇帝。

孝康熙后。

端敬皇后。寶宮送至

地宮。至戌時。安奉石牀畢。掩

地宮石門○癸卯。奉安

世祖章皇帝。

孝康熙后。

端敬皇后。神位於

享殿。致祭○丁未。兵部議覆。兵科給事中王

承祖疏言武職官員捐軀報國所得戰功與捐貲紀錄不同以後推陞武職官員有紀錄軍功者應照多寡以次加等應如所請從之○戊申以降調候補侍郎龔鼎孳為都察院左都御史○陞左副都御史圖爾特為兵部右侍郎○以兵部主事蔡驪為雲南鄉試正考官行人朱張銘為副考官○除山東長清縣藩產加增額賦○免江南瓜洲鎮南新復生二洲荒地額賦○己酉裁甘肅苑馬寺卿一員主簿一員監正七員○授投誠偽官袁韜子袁紱龍副都統銜○庚戌免四川邛州名山等七州縣黎州一所康熙元年分水災額賦有差○陝西提督王一正疏報石洞口賊踪出沒圖刦磬口屯糧官兵埋伏擒剿俘獲無算下部察叙○辛亥予福建陣亡一等阿達哈哈番吳沙二等阿達哈哈番莫洛宏拜他喇布勒哈番又一拖沙喇哈番白奇拜他喇布勒哈番鄂山拖沙喇哈番鄂邁海色

噶賴達爾馬各祭葬如例○兵部議覆江西總督張朝璘疏言浮梁縣當徽饒之衝盜賊出沒不常請撥建昌營兵三百名設浮梁營守備一員把總一員以資防禦仍聽饒州營叅將管轄其建昌餘兵三百名止留守備一員把總一員專司城守原設叅將千總缺應裁從之○壬子陞刑部左侍郎尼滿為刑部尚書○乙卯兵部議覆平西王吳三桂疏報李定國之子李嗣興從邊外投誠繳偽冊寶印劄帶領官兵丁家口一千二百餘名象馬無算應照例議叙得旨李嗣興著授都統品級以下各官從優再議○丁巳轉刑部右侍郎對喀納為左侍郎陞宗人府啓心郎覺羅勒德洪為刑部右侍郎○廣西巡撫屈盡美疏言粵西當兵燹之後人民稀少武藝未嫻請停癸卯科武鄉試下部知之○戊午兵部遵旨議覆鑒儀衛應照舊例改為三品衙門鑒儀使正三品冠軍使正四品雲麾使正

五品。治儀正。正六品。整儀尉。從六品。鑒儀使。許其自陳。以下各官。聽堂官詳註考語。送兵部。都察院。考覈。應調外用之員。聽該衛咨部補用。本衛員缺。亦聽該衛指名送部題用。從之。○己未。以內國史院侍讀學士李儀古。為浙江鄉試正考官。吏科給事中李鵬鳴。為副考官。弘文院侍讀陳鼐。永為江西鄉試正考官。吏科給事中劉如漢。為副考官。國史院檢討王鍾靈。為湖廣鄉試正考官。戶科給事中俞之琰。為副考官。○以廣東按察使李本晟。管雲南布政使司左布政使事。○庚申。吏部題。大選官員。於單月十三日投供。十五日點卯。雙月二十三日照次分行。二十五日封籤。擊選。急選官員。於雙月十三日投供。十五日點卯。單月二十三日照次分行。二十五日擊籤補授。領憑時。取具印結給發。得旨。大選急選官未得缺者。俱於擊籤後第五日投供。餘依議。○雲南巡撫袁懋功疏言。滇南初定武

生數少。策論弓馬。俱未嫻習。請停癸卯科武鄉試。下部知之。○壬戌。諭兵部。提督張勇前鎮守甘肅地方。威名素著。屬番警服。著以提督職銜。調回甘肅鎮守。其陝西提督王一正所轄地方。應與張勇作何分管。爾部議奏。○湖廣巡撫劉兆麒疏言。鄭襄等屬地方。向為賊踞。錢糧屢經蠲豁。今雖大兵會剿。蕩平可期。但康熙二年分額賦。尚無從出。仍請照例蠲免。下部議。○甲子。陞正紅旗蒙古副都統噶褚哈。為蒙古都統。○陞通政使額赫里。為都察院左副都御史。○乙丑。陞陝西延安總兵官哈爾庫。為浙江提督。○秋。七月。丙寅朔。享太廟。遣都統特晉行禮。○以內國史院編修王勗。為江南鄉試正考官。工科給事中王曰高。為副考官。吏部員外郎劉子正。為陝西鄉試正考官。兵部主事許暢。為副考官。○己巳。命給承恩公白文選。世襲敕書。如海澄公例。○

庚午。陞太僕寺卿杭愛為通政使司通政使。
○辛未。陞叅領褚庫巴圖魯為正紅旗蒙古
副都統。○戊寅。陞叅領陳奇策為陝西延綏
總兵官。○己卯。以吏部主事王士祿為河南
鄉試正考官。禮部主事柯賡昌為副考官。○
庚辰。中元節。遣官祭

永陵。

福陵。

昭陵。

孝陵。○辛巳。吏部題京察大計。已經停止。內外
官員俱三年考滿。今查督撫叅劾及臣部處
分各官。仍用八法之語。但京察大計。既經停
止。其叅劾各官。或酌量罪之輕重處分。或仍
照八法處分。得旨著酌量罪之輕重處分。○
壬午。先是直隸各省布政使缺。吏部將按察
使與漢軍管叅領阿達哈哈番。郎中等官較
俸推陞。至是奉旨照品級考。止推按察使。○
免陝西禮縣康熙元年分水災額賦。○予故

漢軍副都統阿思哈尼哈番吳學禮。祭葬如
例。○甲申。贈故浙江提督二等侯田雄太傅。
予祭葬。謚毅勇。○廣東總督盧崇峻疏報東
莞新安二縣土寇出沒不常。檄遣副將曹志
統官兵三路進剿。擒斬九百四十人。下部察
叙。○乙酉。正白旗蒙古副都統顧魯古。以原
銜解任。○丙戌。以原任雲南按察使席式為
廣東按察使司按察使。○免貴州新添衛所
屬丹平司。康熙元年分荒田額賦。○朝鮮國
王李欄。遣陪臣李侯等進

孝康皇后香。賞賚如例。○丁亥。以刑科給事中
張維。亦為山東鄉試正考官。禮部郎中張應
瑞為副考官。太常寺少卿楊璫為山西鄉試
正考官。戶部郎中王象天為副考官。○大學
士衛周祚乞假遷葬。允之。○吏部題八旗滿
洲漢軍文武官員廕生。監生內有不能兼習
滿漢字者。有蒙古廕生。監生內不識滿字者。
亦有全不識字者。不便以部院衙門用。得旨

廢生監生全不識字者。照例給俸隨旗上朝。滿洲漢軍不能兼習滿漢字蒙古不識滿字者應俱傳至爾部。逐一問明。或願學習。或願以子弟頂補。或願隨旗上朝。分別開列具奏。○辛卯。授固山貝子傅喇塔女為縣君。壻精奇尼哈番賴善為固山額駙。○壬辰。刑科給事中查培繼疏言。錢糧新例不分款項。總作十分考成。帶徵舊欠之法。亦當依新例酌定。除順治十五年以前民欠。俱經蠲免外。其見在應徵銀米。不分四部二寺款項。彙算總數。區作十分。徵解戶部。其三部二寺額數。有未完解者。亦但移咨戶部。陸續支補。庶追舊徵新。統歸畫一。至處分帶徵之例。亦將民欠數目。統算若干。總作十分考成。酌議年限。分別完欠。以課功罪。庶吏殫慮以催科。民遵限以輸納。下部議。○予故內大臣二等伯伊爾登祭葬。謚忠直。○癸巳。戶部題請三庫各設郎中一員。其各司分員外郎。筆帖式。有不足者。

亦准添設從之。○甲午。予故南贛巡撫胡文華祭葬如例。○湖廣提督董學禮疏報逆賊李來亨遁踞潭家寨。大兵四面圍守。六月二十七日。五鼓大霧。賊乘勢突出。分犯塘汛。各鎮標兵夾擊。斬首七百六十五級。生擒七十名。得首事平察叙。○乙未。吏部左侍郎馮溥乞假遷葬。允之。

八月丙申朔。以精奇尼哈番光泰為正白旗蒙古副都統。○以故二等伯伊爾登親兄之孫噶都襲爵。○陞四川按察使朱之瑤為湖廣布政使。司右布政使。○厄魯特鄂齊爾汗遣使進貢。賞賚如例。○西藏班禪胡土克圖故遣官致祭。○浙江總督趙廷臣水師提督張杰會疏言。水師提標應設五營。中左二營各設水戰兵一千名。右前後三營各設水手八百。左右二路鎮標各設四營。中營各設水戰兵一千名。前左右三營各設水手八百。應設各標將備。坐名題補。從之。○丁酉。遣大學

士蔣赫德祭

先師孔子○戊戌祭

大社

大稷遣左都御史覺羅雅布蘭行禮○庚子諭兵部綠旗官員任滿三年病故有加贈等第滿洲官員病故者無加贈等第今滿漢俱應一體著議奏○予故陝西寧夏總兵官周國正祭葬如例○辛丑以內弘文院檢討白乃貞為順天鄉試正考官檢討詹養沉為副考官○予故致仕都統馬光遠祭葬如例○都察院左都御史龔鼎孳疏言錢糧新舊並徵叅罰疊出那見徵以補帶徵因舊欠而滋新欠請將康熙元年以前催徵不得錢糧槩行蠲免有司既并心一事得以畢力見徵小民亦不苦紛紜得以專完正課下部知之○壬寅吏部議覆刑科給事中張惟赤疏言六部郎中例陞道府但一體掣籤曾無分別則考覈竟為虛文嗣後或道或府有一項缺出者

除仍照舊例將內外應陞各官推陞外若道府兼出應將考覈一等者以道缺籤補二等平常者以府缺籤補若有應補道缺而考覈一等之人不足仍應將考覈二等者以道缺一體籤補若二等不足即考覈平常者亦一體籤補若考覈一等之人數多道府員缺俱籤補一等之人從之○癸卯以雲南右布政使董顯忠為貴州布政使司左布政使○禮部遵旨議覆鄉會考試停止八股文改用策論表判鄉會兩試頭場策五篇二場用四書本經題作論各一篇表一篇判五道以甲辰科為始從之○甲辰

太宗文皇帝忌辰遣官祭

昭陵○乙巳復行滿洲蒙古漢軍翻譯鄉試以內弘文院學士羅敏內國史院侍讀學士蘇魯本禮部左侍郎布顏為主考官○以原任太僕寺少卿趙開心為總督倉場戶部右侍郎加工部尚書銜○丙午

太祖高皇帝忌辰遣官祭

福陵○丁未遣官祭

歷代帝王○遣官祭城隍之神○命都統伯
宜理布同廣東總督盧崇峻查勘邊海○陝
西提督王一正疏報叅將張自臣等會剿逆
賊郝搖旗於白玉坪等地方招撫偽官賊兵
及家口二千餘人下部知之○己酉靖南王
耿繼茂疏報偽尚書叅知軍政事蔡雷鳴委
曲開導海寇嚮化之路密令其子偽侍郎蔡
協吉偽通政使蔡源等攜眷來歸真心効順
應請叙錄下部議○庚戌福建投誠偽同安
伯鄭鳴駿疏報伊兄鄭泰集衆投誠為姪鄭
錦設計羈留投繯自經遺命子鄭纘緒統所
部文武各官四百餘員水陸兵丁七千三百
餘名各帶家眷駕舟艦一百八十餘號直抵
泉郡港口投誠并繳偽敕印等件

上深嘉之下部議叙○癸丑以河南右布政使
郎廷相為四川布政使司左布政使陝西右

布政使郭一鶚為廣東布政使司左布政使
原任福建右布政使郭鳴鳳為廣東布政使
司右布政使○以原任四川按察使司按察
使李翀霄補原官○甲寅以流賊餘孽郝搖
旗劉體純李來亨等竄伏鄖襄山中猖獗梗
化命都統穆里瑪為靖西將軍都統圖海為
定西將軍同都統輔國公宗室穆琛護軍統
領孫達里都統覺羅巴爾布護軍統領科爾
昆統率大兵前往征剿○轉吏部右侍郎梁
清寬為左侍郎以戶部左侍郎郝惟訥為吏
部左侍郎管右侍郎事○陞製造庫郎中希
佛為太僕寺卿○增設江南湖廣陝西三省
按察使各一員○戶部議覆漕運總督林起
龍條奏漕運重船原令各關盤詰夾帶私貨
但關口甚多處處盤詰必多悞運應如所議
止於儀真瓜洲淮安濟寧天津等五處地方
嚴加盤查又水次附載沿途包買運官通同
奸商諸弊均關漕運要務亦應如所議嚴禁

又運丁舊例。每船許帶土宜六十石。恐南北關司。槩作私貨。查每船土宜。載在議單。應仍許帶。以恤運丁勞苦。從之。○乙卯。浙江巡撫朱昌祚疏報。偽候周崔芝。乃鄭逆腹心。其子周家政。棄逆効順。齎送偽印關防。同其兄弟及偽鎮將領兵丁家口。百姓男婦。齊進溫州黃華關。隨就近安插。下部知之。○丁巳。秋分夕。

月於西郊。遣都統特晉行禮。○庚申。以福建副都統徐智通。為正白旗副都統。陞叅領祖良棟。為鑲黃旗副都統。叅領柯昇。為鑲紅旗副都統。○授福建投誠偽同安伯鄭鳴驤。為遵義侯。偽永成伯鄭纘緒。為慕恩伯。○辛酉。改鎮安土府。為鎮安府。設通判一員。○壬戌。河南總督劉清泰。疏請河南城守。嵩縣。王祿店。磁州。四營。歸河北鎮管轄。歸德營。歸南汝鎮管轄。惟開封城守二營。地方遼濶。不便歸并一鎮。應將襄城城守營。歸南汝鎮。開封城守

營。歸河北鎮。從之。○甲子。江西巡撫董衛國疏報。江西省。新增男婦七萬六千六百二十丁口。共增丁銀七千六百二十兩有奇。下部察核。○喀爾喀車臣汗。遣使進九白年貢。宴賚如例。○蘇尼特多羅貝勒噶爾瑪故。遣官致祭。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十

監修總裁官光祿大夫太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

秋修

康熙二年癸卯九月乙丑朔○丙寅命都統

實錄卷十

噶褚哈為鎮西將軍同副都統光泰統領滿

洲官兵鎮守西安以西安將軍傅喀禪征剿

西山故也○戊辰免直隸霸州本年分水災

額賦十之三○己巳免江南鳳淮揚三府所

屬二十五州縣衛本年分旱災額賦有差○

辛未鄉試八旗取中舉人滿洲齊蘭保等二

十一名蒙古布顏等十七名漢軍姚啟聖等

一百一十八名咨送吏部錄用○靖南王耿

繼茂疏報偽慶都伯王秀奇投誠下部知之

○福建總督李率泰疏報偽忠靖伯陳輝率文武偽官一百三十三員兵一千六百名家口八百餘名投誠得旨嘉獎下部議敘○癸酉改造

福陵

昭陵地宮○免直隸武清縣本年分水災額賦

十之三○廣東總督盧崇峻疏報廣東香山

等縣如黃梁都三竈諸處皆在海島為盜賊

淵藪駕艇剽掠因遣發各營水陸官兵令廣

實錄卷十

州總兵官張國勛總統分布搜剿共擒斬逆

賊趙劈石等二千三百餘名邊界頓清張國

勛躬親調度諸將分猷効力下部察敘○盧

崇峻又疏報粵東賊首李宗翰攻劫長樂永

安興寧等縣界臣會同提督楊遇明遣官討

平下部察敘○乙亥轉戶部右侍郎朱之弼

為左侍郎以內國史院學士艾元徵為戶部

右侍郎○免甘肅莊浪衛寧夏寧州本年分

雷災額賦有差○戊寅免直隸雄縣等十二

州縣本年分水災額賦有差○已卯甘肅巡撫劉斗疏言靖遠道已裁併隴右道兼理請將臨鞏道改為臨洮道專轄臨洮府狄河蘭金渭五州縣洮岷道專轄階文成漳四州縣洮岷二衛西固一所至隴右道專管隴寧伏秦清醴西徽兩安會通秦十三州縣靖遠一衛各道既不管軍職銜內兵備二字均應刪去部議如所請從之○庚辰以土官冉奇鑣為酉陽等處軍民宣慰使司給予印敕○辛巳陞陝西寧夏道李嵩陽為廣東按察使司按察使○刑部題先據奉天府府尹徐繼燁疏稱將軍吳庫立審事不公恣意妄斷又據吳庫立告訐何事不公何事妄斷請差大臣察審得旨著尚書祁徹白侍郎科爾科代與盛京戶禮工三部侍郎會同質問具奏○乙酉封多羅豫郡王多鐸女為縣主授其壻科爾沁固倫雍穆長公主子台吉鄂齊爾為多羅額駙○免江西玉山等十二縣本年分旱

災額賦有差○丙戌調廣東潮州總兵官黃應傑為瓊州總兵官瓊州總兵官高進庫為高雷總兵官高雷總兵官栗養志為潮州總兵官○丁亥陞刑部郎中田起蛟為陝西布政使司右布政使○免江南滁州全椒縣滁州衛本年分旱災額賦十之二○戊子予故原任總督倉場戶部左侍郎陳協祭葬如例○已丑管理福建安輯投誠事務郎中賁岱疏報偽統領掛寧南將軍印左都督陳舜穆率轄下總兵二員副總兵六員叅將二十員遊擊十九員都司三員守備一員兵部主事一員工部郎中一員監紀推官二員兵丁一千名投誠願隸海澄公標下効力家口安插漳州府長泰縣下部速議○庚寅予故致仕太子太保陝西四川總督金礪祭葬如例○授和碩簡親王濟度女為郡主授其壻阿祿科爾沁郡王朱爾扎哈子台吉色楞為和碩額駙○辛卯

孝慈高皇后忌辰遣官祭

福陵○壬辰陞叅領肯車黑為鑲紅旗滿洲副都統○海澄公黃梧下守備葉兩陣亡廕一子拖沙喇哈番○甲午免直隸新樂等七州縣本年分水災額賦有差○兵部左侍郎管右侍郎事熊文舉以病乞假允之○喀爾喀車臣濟農遣使進九白年貢宴賚如例
冬十月乙未朔享

太廟遣輔國公賴護行禮○遣官祭

永陵

福陵

昭陵

孝陵○頒康熙三年時憲曆○丁酉

皇太后聖壽節遵

懿旨免行禮○吏部議覆四川道御史李之粹條奏部屬陞轉之法戶工二部舊例在差陞郎中者回部辦事一年始准陞轉今六部司官缺出既按俸互相陞轉則戶工二部不便

獨異應與各部一體較俸序陞有在差者差回赴新任辦事至假滿起復之官應仍補本衙門後再與各部序俸互陞以杜趨避從之
○福建總督李率泰疏報偽副統領何義乃鄭錦所倚為左右臂指得力之人今同偽總兵魏明等率眾來歸請從優錄敘以示鼓勵下部知之○蘇尼特多羅郡王騰機忒故遣官致祭○己亥陞內弘文院侍讀學士張士甄為內國史院學士○陞大理寺卿王度為總督倉場戶部右侍郎○平西王吳三桂疏報粵西苗蠻焚掠安籠總兵官王會聞信救應屢敗羣蠻重圍立解遊擊高汝礪出城協戰勞績可嘉下部察敘○庚子以內弘文院侍讀蕭惟豫為順天武鄉試正考官內秘書院侍讀張貞生為副考官○四川總督李國英疏報巨寇劉二虎李來亨郝搖旗袁宗第黨守素塔天寶馬騰雲七家出犯巫山水陸諸將戮力戰守得全危城乞迅發大兵乘勝

剿滅下部知之。○壬寅。福建總督李率泰疏報。延建等處。皆高山峻嶺。賊首王鐵佛等。倚險結巢。建寧。延平。邵武。將弁。統兵。尅期夾剿。三路齊進。奮勇力戰。殺賊一百一十七人。生擒王鐵佛等六十八人。審明正法。下部知之。○李率泰又疏報。海逆鄭錦。遣發偽副將林維等。率舟師由海門。欲乘風直入海澄。燒新造船隻。提臣施琅。密遣守備汪明等。統率水師。夜半直抵海門。賊踪前來拒敵。我兵奮勇陣殺偽副將林維等。生擒賊將兵丁共一百二十五名。奪獲船隻器械。得旨嘉獎。下部察敘。○癸卯。平西王吳三桂。密奏。隴納妖人阿仲叛逆。得旨。阿仲僭稱偽號。聚眾狂逞。屢經平西王奏報。雖係貴州。作亂起於廣西。廣西將軍。總督。提督。將此大事。若為弗知。屢經鄰省奏聞。猶隱匿不報。著明白回奏。○丙午。陞湖廣按察使吳嵩印。為河南布政使。司右布政使。○免直隸慶雲縣。本年分水災額賦十

之一。○辛亥。禮部題。請換造中和樂。丹陛樂等項樂器。從之。○三等阿思哈尼哈番李朝雲。老病解職。以其子李人龍襲替。○壬子。陞左副都御史曹國柄。為兵部右侍郎。○乙卯。免浙江江山等十四縣。本年分旱災額賦有差。○一等阿思哈尼哈番王眷。故。無子襲替。命以其職授伊父王孟寅。○丙辰。吏部議覆江南總督郎廷佐。疏請。准徐道事務。歸併淮海道管理。揚州道事務。歸併驛鹽道統轄。再查江寧路當孔道。過往大兵。船隻應付。難以稽遲。儀真縣在揚州境內。舊有鹽道衙門。去江寧百里而近。亦係過往必由之路。揚州有事。令驛鹽道移駐儀真。無事則仍歸江寧。往來照應。彼此職掌。兩不曠廢。應如所請。從之。○戊午。以故三等阿思哈尼哈番吳學禮之子吳爾鼎襲職。○免湖廣衡陽。安仁。耒陽。三縣。本年分旱災額賦有差。○授福建投誠偽伯施福。都督僉事銜。○己未。授福建投誠偽

官何義。左都督銜。林雄。李勝。都督同知銜。呂勇。吳建。魏明。都督僉事銜。○庚申。諭吏部。庶吉士吳本植等。教習已久。今加考試。應分別授職。除馬世俊。白乃貞。李仙根。吳光等。已授修撰。編修外。其吳本植。朱世熙。翟延初。張玉書。劉芳詰。王豫嘉。鄭之謨。鄭開極等八員。俱著授為內三院編修。檢討。○授福建按察使。官陳舜穆。周家政。周騰。陳蟒。左都督銜。林必遊。王秉耀。陳應。詹世好。林先。都督僉事銜。○雲南道御史梁熙疏言。近畿田地。分發八旗。今歲夏雨連綿。各處隄岸潰決。田禾損壞。收成絕少。河間一帶莊屯。淹沒更甚。請遴差才幹官員。周行相看。凡隄岸之應修者。實行培築。淤淺之應疏者。實行挑濬。庶河流有歸。潦不為災。下部知之。○甲子。予故少師兼太子太師大學士致仕胡世安。祭葬如例。○給八旗水淹地方米二百五十八萬石。○禮部議覆陝西總督白如梅疏報。當哈爾佛僧進貢。

查會典並無當哈爾佛僧進貢之例。但傾心嚮化。應准其進貢。從之。

十一月乙丑朔。戶部遵旨議覆。凡外國進貢之人。帶來貿易物件。應令崇文門監督。止記冊報部。不必收稅。從之。○刑部議覆。山東總督祖澤溥。審鞫原任按察使宋琬等。通同于七謀反一案。兩議上請。一擬極典。一擬流徙。將原審總督祖澤溥議處。得旨。據審宋琬等。原無通賊情節。干証唐進夏。吳八等。亦堅稱烏有。叛逆重罪。理應詳審。情實即應正法。如虛即應免罪。爾部將無確據之事。懸揣定擬。兩議俱屬不合。宋琬等著免罪。總督祖澤溥亦免議處。○福建總督李率泰疏言。汀州城守兩營。歸併鎮標。其左右營遊擊。守備。千把總等官。俱改鎮標統轄。從之。○丁卯。陞宗人府府丞董篤行。為都察院左副都御史。○免直隸東安。南皮。靜海。三縣本年分水災額賦有差。○福建總督李率泰疏報。海寇五百餘。

人由梁山侵犯海疆。總兵官王進功。叅將折光秋。夾擊大敗之。殺賊一百六十餘人。生擒九人。下部察敘。○戊辰。靖南王耿繼茂疏報。偽平國公鄭芝龍子鄭世襲。素蓄歸順之心。緣鄭成功。擄往臺灣。及鄭成功暴亡。復被逆孽鄭經。帶回廈門。脫身無術。至是乘間率偽文武官二百二十四員。水陸兵一百二十名家口船隻。盛甲器械等物。投誠。又偽都督鄭賡。係同安伯鄭鳴駿之弟。攜帶官兵共三百一十五員。名家屬共三百四十二名口。投誠。下部議敘。○庚午。廣東道御史張志尹疏言。百爾臣工。品秩不同。宣力則一。必遷轉無礙。立法均平。庶無壅滯之虞。近見銓政。如陞補方面一項。守巡二道。經年有補無陞。致俸滿各官。一槩停滯。請敕部確議。凡遇方面缺出。俱照大小各官。雙月推陞。單月急選之例。使陞者與補者。兩不相礙。庶銓法畫一。永久無弊。下部議。○甲戌。免江南太和。來安。霍山。三

縣本年分旱災額賦有差。○喀爾喀土謝圖汗遣使進九白年貢。宴賚如例。○乙亥。靖南王耿繼茂疏報。偽左都督楊富。統率偽都督僉事陳宗等。文武官二百三員。兵丁三千二百五十五名。并戰艦。盛甲器械等物。投誠。下部議敘。○浙江總督趙廷臣疏報。偽靖波將軍侯阮美。率弁兵家口共三千六十六員名。投誠。下部議敘。○戊寅。河道總督朱之錫疏言。管河分司。舊例三年為滿。今部議改為一年更替。第河工關係甚重。與他事不同。若一年一換。初則生手未諳。及稍熟練。而差期已滿。年復一年。不免貽誤。請仍以三年為滿。俟回部考覈。准與敘陞。從之。○己卯。免四川建昌等衛。順治十八年分水災額賦。○庚辰。陞大理寺少卿李昌祚為大理寺卿。○以江西右布政使王鏐為江南布政使司左布政使。原任山東按察使石琳為江南按察使司按察使。陞貴州貴寧道陳丹陞為湖廣按察使。

司按察使○壬午。免直隸滄州。薊州。獻縣。本年分水災額賦有差○癸未。禮部題。

福陵。

昭陵。

孝陵。四季大祭之時。

神牌安設座位致祭。其

聖誕。忌辰。十月初一日。及每月朔。望。祭祀。既無

祝帛。應不動

神牌。揭幔祭獻。得旨是○乙酉。冬至。祀

天於

圜丘。

上親詣行禮○遣官祭

永陵。

福陵。

昭陵。

孝陵○丙戌。

上御殿。王以下。文武各官。上表朝賀○庚寅。戶

科給事中吳愈聖條奏。州縣因錢糧被忝。繼

經督撫報完開復。部議輒以未經題明本官

任內續完。或接管官續完。其續完銀兩。見貯

何處。推敲不已。重疊駁查。保無奸胥夤緣索

詐。嗣後開復各官。如某年忝欠錢糧。於某年

某月續完。其銀係交該司。或該府。或發某處

兵餉。俱一一開明。該部據疏。即為註銷。下部

議行○陝西西寧臨鞏總兵官栢永馥。進黃

鸚鵡。却之○癸巳。以原任宗人府府丞宋徵

輿。補原官○四子部落達爾漢卓禮克圖郡

王巴拜故。遣官致祭○以鄂爾多斯故多羅

貝勒善達子索諾慕。蘇尼特故多羅貝勒噶

爾瑪子丹津。各襲爵

十二月。甲午朔。靖南王耿繼茂。福建總督李

率泰等疏報。十月二十一日。臣等統率大軍

渡海。攻克廈門。賊眾驚潰。登舟。水師提督施

琅。會荷蘭國夾板船。邀擊之。斬首千餘級。乘

勝取浯嶼。金門。二島。逆賊鄭錦。周全斌等勢

窮宵遁。得旨。據奏官兵進剿海逆。克取廈門。

金門焚毀賊巢。具見王等調度有方。將士用命。克奏膚功。深可嘉尚。荷蘭國出海王。率領舟師。協力擊賊。亦殊可嘉。在事有功人員。俱著察明議敘。○乙未。陞浙江按察使法若真。為湖廣布政使司右布政使。○贈陝西殉難按察使司僉事袁生芝。光祿寺卿。予祭葬如例。○丙申。靖南王耿繼茂等疏報。十月二十八日。逆賊鄭錦等。遣兵五千人。突犯雲霄。右路總兵官王進功。率官兵逆擊之。斬殺過半。餘衆盡赴水死。請將官兵分別賞賚。以示鼓勵。得旨嘉獎。下部察敘。○丁酉。陞雲南永順總兵官張國柱。為雲南提督。○庚子。授四川投誠偽富平伯賀道寧。左都督銜。○甲辰。以順天府府尹劉格。為四川巡撫。○陞雲南騰越副將李世耀。為永順總兵官。○免湖廣安鄉等十四縣衛。本年分旱災額賦有差。○免雲南昆明縣。及左右六衛。本年分水災額賦有差。○乙巳。予故蒙古副都統塞冷。祭葬如

例。○戊申。免江西鄱陽等四縣。本年分水災額賦有差。○己酉。平南王尚可喜疏報。官兵進剿蜚賊。擒偽恢粵將軍周玉。偽軍師林輔邦。及賊兵二百七十六名。斬首二千六百三十七級。焚賊船一百三十一隻。下部察敘。○庚戌。授福建投誠偽平國公鄭世襲。左都督銜。○戶部題定徵收地丁錢糧。總作十分考成。則例。○辛亥。授福建投誠偽官楊富。左都督。加太子少師。鄭賡。楊忠。王明。顏立勲。陳義。左都督銜。陳一鵬。陳斌。謝元。朱德。陳奇策。許廷珪。右都督銜。陳琪。陳宗。都督同知銜。陳增。陳振。王超。辛球。黃成章。方晉。李義。楊亨。陳祖。陳耀。洪福。劉崇會。程偉。曾偉。張朱。都督僉事銜。○授浙江投誠偽侯阮美。偽官鄭繩安。左都督銜。鄧嘉玉。阮驊。阮述。右都督銜。焦華岳。都督同知銜。林鸞。陳大興。杜卿。王鼎勲。高捷。李隆。陳義忠。阮復增。林朝。張秦。都督僉事銜。○免浙江桐鄉縣。本年分水災額賦有差。

○壬子。以平南王下副都統尚之廉。為廣東右翼總兵官。○甲寅。改造

昭陵地宮成。安奉

太宗文皇帝寶宮。設

寶座

神牌於享殿。○乙卯。陞山東按察使郎永清。為

湖廣布政使司右布政使。山西按察使陳弘

業。為江西布政使司右布政使。浙江寧紹道

馮瑾。為浙江按察使司按察使。○予故鎮國

公噶爾哈圖。祭葬立碑如例。○丙辰。吏部議

覆。遼東將軍吳庫立。疏請添設盛京刑部郎

中二員。員外郎六員。應如所請。得旨。如議。仍

添設侍郎一員。爾部將應補官員。開列具奏

○己未。禮部題。定南武壯王孔有德之女孔

四貞。呈稱伊父孔有德。於順治九年。在廣西

殉難。奉

世祖章皇帝諭旨。建祠致祭。請於祠前立碑。以表忠節。查孔有德祠。工部見在建造。告竣後

每歲春秋遣太常寺官致祭。至所請立碑之

處。孔有德墳所已經立碑。不便另立。得旨。仍

與立碑。○庚申。陞大理寺少卿甘文焜。為順

天府府尹。○辛酉。改造

福陵地宮成。安奉

太祖高皇帝寶宮。設

寶座

神牌於享殿。○以戶部郎中王象天。為浙江按

察使司僉事。提調學政。○陞廣西巡撫屈盡

美。為廣西總督。○免貴州都勻等六衛普市

一所。本年分水災額賦有差。○安南國王嗣

黎維禧。遣陪臣黎敷等。表謝降敕褒獎恩。附

貢方物。表文曰。聖聰作后。鼎光輯瑞之朝。懋

賞勸功。渙及奉琛之壤。葵心懇款。楓陛遽嚴。

欽惟

皇帝陛下。濬哲溫恭。聰明睿智。式九圍受命。政

布湯初。詔八統保庸。禮循周舊。致令異數。猥

及遐方。臣教沐暨南。星趨共北。寵頒師二。仰

惟懷遠之仁。享用有三。願效來王之義。○刑部以歲終彙報病故監犯得旨。據奏監犯病故者甚多。人命關係重大。罪不至死者。久淹獄中。管獄官役。不與犯人飲食。餓斃亦未可知。獄官獄卒。如此疎忽。殊為不合。著嚴加申飭。○壬戌歲暮。裕祭

太廟。

上親詣行禮。○遣官祭

永陵。

福陵。

昭陵。

孝陵。○遣官祭太歲之神。○旌表八旗節婦。滿洲濟馬胡妻得氏等十九人。蒙古布顏圖妻蔡氏一人。漢軍姜國明妻于氏等四人。烈婦滿洲劉柱妻那氏等八人。各給銀建坊如例。○是歲。人丁戶口。一千九百二十八萬四千三百七十八。田地。山。蕩。畦地。五百三十四萬九千六百七十五頃一十畝。徵銀三千五百

七十九萬八千三百六十五兩有奇。米。豆。麥。六百一十四萬二千三百三十八石有奇。草。二百二十七萬二千三百五十二束。茶。十五萬七千九百五十五引。行鹽。四百三十萬一千八百四十引。徵課銀。二百七十四萬二千三百五十二兩有奇。鑄錢。三萬九千五百七十三萬五千三百六十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十一

監修總裁官光祿大夫太保兼太子太傅保和殿大學士兼戶部尚書二等伯加四級臣馬齊光祿大夫經筵日講官起居注少保兼太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙三年甲辰春正月甲子朔

上詣

堂子行禮還宮拜神畢詣

太皇太后

皇太后宮行禮御殿王以下文武各官外藩王

及使臣等上表朝賀照例筵宴○朝鮮國王

李欄遣陪臣趙璜等表賀冬至元早

萬壽節及進歲貢禮物宴賚如例○庚午

世祖章皇帝三週忌辰遣官祭

孝陵○添設四川夔州府知府缺○湖廣總督

張長庚疏報偽部院毛壽登始為偽永曆朱由榔所倚恃繼為眾逆寇所推重今革面來歸請敕優敘下部議○辛未孟春享

太廟遣都統宗室羅託行禮○遣官祭太歲之

神○順天府進春○四川總督李國英疏報

巫山巨寇郝搖旗下偽總兵馬進玉等率眾

投誠下部察敘○壬申賜朝正外藩王貝勒

貝子公台吉等銀幣鞍馬有差○甲戌陞廣

西左布政使金光祖為廣西巡撫○新設盛

京刑部侍郎以內國史院學士祁通格為之

○先是正黃旗副都統穆占奏稱伊牛泉下

四百四十名壯丁地畝不堪祈給地更換奉

有各旗村莊有地畝不堪者壯丁一百名以

下仍令留住一百名以上准其遷移之旨至

是戶部查覆鑲黃正黃正白正紅鑲藍各旗

壯丁一百名以上地畝不堪者共二萬六千

四百五十名應將順天保定河間永平等府

屬州縣圈出地畝十三萬二千二百五十畝

分給各旗。每壯丁一名。給地五晌。准令遷移。並請差部員旗員會同地方官。酌量換給。得旨。右翼著尚書去。左翼著侍郎一員去。其更換不堪地畝各旗著副都統去。餘依議。○江西總督張朝璘疏言。南昌府屬浮糧係陳友諒橫行徵派。明季相沿。今蒙恩恤。照袁瑞二府一例減免。其漕米一項。奉部文復行查覈。臣按漕米浮多。亦明季踵行弊政。並無虛假。請槩行減免。下部知之。○丙子。以王府長史桑格為鑲白旗蒙古副都統。○陞隨征福建右路總兵官王進功為福建提督。○管理福建安輯投誠事務。戶部郎中賁岱疏報鄭芝豹生母黃氏。率子姪眷屬等赴閩投誠。下部察敘。○戊寅。禮部題。安南國所貢方物與會典不符。嗣後入貢。請令遵照會典。得旨。外國慕化入貢。所進之物。著即收納。不必遵照會典。○庚辰。命各省學道缺出。將進士舉人出身者。一併開列。增入品級考。○陞光祿寺卿

佟弘器為奉天府府尹。○陞雲南按察使李本晟為河南布政使。司右布政使。湖廣驛鹽道宋可發為山西按察使。司按察使。湖廣荆西道王廷諫為山東按察使。司按察使。○壬午。賜安南國陪臣黎敷等宴於禮部。○禮部議奏鑲白旗兵沙木哈為弟三太毆傷瀕死。妻哈氏誓以身殉。沙木哈以止有一弟身死。弟又抵罪。無人守先墓。撫諸孤。令言於官。活三太之命。沙木哈死。哈氏遵遺言叩閭求貰三太罪。得旨寬宥。哈氏即自盡。應予旌表。上命立碑墓上。書其事於石。○癸未。刊刻清字通鑑告成。○甲申。四川總督李國英等疏報蜀中巨寇劉二虎。郝搖旗。袁宗第。抗撫負固。狡謀不測。蒙遣西安將軍傅喀禪。副都統杜敏。統領大兵。會同督提進剿。於康熙二年十二月二十三日。師次陳家坡。逼近賊巢。滿漢兵奮勇剿殺。賊遁入天池寨。副都統杜敏等統兵追剿。劉二虎勢窮自縊。郝搖旗。袁宗第。

夜遁。杜敏等復追至黃草坪。大敗賊衆。擒郝
搖旗。袁宗第。并偽王朱宗浪等。數萬巨寇。一
朝掃平。無一漏網。得旨嘉獎。下部察敘。○丙
戌。福建總督李率泰疏言。原任提督侯馬得
功妻劉氏。子馬三奇等。呈稱馬得功統領水
陸官兵。攻取廈門。金門。二島。力戰身死。請賜
恩卹。以慰忠魂。得旨。馬得功捨身死戰。墮水
殞生。著從優議卹。○刑科給事中彭之鳳疏
言。刑名關係至重。請敕提牢司官。矜全監犯。
所與飲食。必親加驗視。分給。無得假手獄卒。
給以不堪食物。如有飢斃。及行拷掠者。該管
官役。作何議罪。并請敕部通行直隸各省按
察推官。一體遵行。下部議。○丁亥。改陝西靖
遠衛為靖遠縣。裁同知。守備。千總。經歷。四缺。
設知縣。典史。二員。○以刑部郎中王自新。為
湖廣按察使司僉事。提調學政。戶部郎中徐
明弼。為陝西按察使司僉事。提調學政。○予
故致仕太子少保廣東總督李棲鳳。祭葬如

例。○戊子。先是蘇尼特多羅郡王騰機思故。
以其弟騰機忒。承襲王爵。至是。騰機忒故。命
仍以騰機思子多羅貝勒額駙薩穆扎襲郡
王爵。騰機忒子博木博。襲封貝勒。○免陝西
臨鞏二府。未完練餉銀兩。○己丑。予故總督
倉場戶部右侍郎加工部尚書趙開心。副都
統鄂思海。一等阿思哈尼哈番邵占。各祭葬
如例。○授福建投誠偽伯陳輝。為慕仁伯。○
授四川投誠偽官馬進玉。馮盛世。王之炳。張
大盛。武自強。鄧秉志。楊詢。趙雲。都督僉事銜
○工部題。定南武壯王孔有德。祠堂祭器等
物。已即行造辦。其祠前立碑之處。請俟
孝陵立碑工竣。再令匠役開採。得旨。不必立碑。
著懸牌匾。俟祠堂完日。遣官致祭一次。其每
歲春秋致祭。及祠前掘井。俱著停止。○平西
王吳三桂疏報。進剿廣西隴納山寇。官兵奮
勇爭先。生擒妖人阿仲。逆寨悉平。得旨嘉獎。
下部察敘。○靖南王耿繼茂疏言。臣生長邊

陞幼嫺武備前蒙

太宗

世祖恩加世襲。今年雖未邁疾病相仍。臣子耿精忠侍從有年。未諳軍旅。懇賜遣歸。俾臣力疾教訓。以備驅策。

上以其情辭懇切。允之。○庚寅。以原任督理織造工部右侍郎周天成。為光祿寺卿。○壬辰。以內國史院侍讀蕭惟豫。提督順天學政。○癸巳。恭鐫

太祖高皇帝

太宗文皇帝尊謚於

陵前石碑。○裁會試中式副榜。○禮部議奏。謁陵禮儀。王以下。三品官員以上。凡有事往盛京。至

福陵

昭陵祇謁者。應於城門外行禮。開城門。盛京禮部官同看守值班官員導引進謁。來時不必進謁。若往

孝陵石門。王以下。三品官員以上。應於

享殿大門外行禮。開

享殿大門。

陵上禮部官同看守值班官員導引進謁。來時不必進謁。至往湯泉養疾者。詣

陵進謁。應准行禮。若遇祭祀供獻。不必隨班行禮。得旨。王。貝勒。行禮。開殿門。城門。貝子以下。

三品官員以上。行禮。不必開門。餘依議

二月。甲午朔。免江南壽州等五州縣衛康熙

二年分水災額賦有差。○免陝西秦州康熙

元年分水災額賦十之三。○乙未。兵部議覆

禮科給事中廖丹疏言。邊省投誠官員。應於

各省分用。其武進士候推選者甚多。請暫停

武闈會試。查會試大典。不便停止。應於本科

減去一百名中額。止取中武進士一百名。從

之。○丁酉。遣大學士孫廷銓祭

先師孔子。○戊戌。祭

大社

大稷遣都統覺羅巴哈納行禮○授福建投誠偽官伍濟益洪徵董時行洪弼都督僉事銜○已亥以內弘文院大學士李蔚戶部尚書杜立德為會試正考官吏部左侍郎郝惟訥內弘文院學士王清為副考官○東部木里雅連頭目朱木藍那木都喇頭目賽必那祁他喇頭目鈎勒甚等歲貢貂皮令就近於寧古塔收納○庚子敘剿平逆番功加四川提督鄭蛟麟左都督副將何德成署都督僉事有功將士各陞賞有差○辛丑

太皇太后聖壽節遵

懿旨免行禮○旌表直隸南樂縣孝子李立春親故年久廬墓給銀建坊如例○兵部題提督總兵責任重大舊例擬正陪二員開列難以得人請嗣後提督缺出將俸深副都統阿思哈尼哈番及俸深有軍功薦紀總兵官酌選十員列名具題總兵缺出將俸深叅領阿達哈哈番及俸深有軍功薦紀副將酌選十

員列名具題庶地方得人便於選補從之○壬寅遣官祭

歷代帝王○戶部議覆長蘆巡鹽御史張吉午疏言請增天津衛鹽引一千二百道查各州縣行鹽俱有定例天津衛議增之引恐為民累應無庸議從之○禮部以本年會試分派外簾各官照例題明得旨考試進士掄才大典前都察院將內場監試外場巡察官專開四員豫行題奏不合曾令將應遣官員俱送禮部俟臨期開列具奏其正考副考同考等官兩部列名具題時朕因求賢念切故將正考副考官增遣二員諭令不謝恩不赴宴即時入場亦未拘照舊例恐謝恩筵宴時彼此會聚瞻徇請託以致庸流入彀賢才見遺今場內執事各官亦應臨期與考官一併具題候旨選用乃故託舊例豫將各官派定執事入場之後方行題知是何意見殊負朕求真才除弊端至意著速行明白回奏○癸卯

靖南王耿繼茂等疏報。福寧總兵官吳萬福。招撫偽鎮林國樑投誠。隨遣游擊李應先等。協同攻克長腰東蚶二島。寇巢破滅。偽兵部阮春雷逆渠張煌言。僅以身免。請敕議敘。得旨。據奏逆賊阮春雷。張煌言等。竊踞東蚶長腰等島。合觔狂逞。官兵奮勇夾剿。擒斬賊將。奪獲船隻。焚毀賊巢。深可嘉尚。在事有功人員。著察明議敘。其偽鎮林國樑。帶領家口。傾心投誠。復奮勇自効。同官兵搗賊巢穴。克奏捷功。非尋常投誠可比。著從優議敘。○甲辰。孝康皇后期年忌辰。遣官祭。

孝陵。○乙巳。命平西王吳三桂。斬隴納山妖人阿仲於軍前。○兵部議敘捐馬人員。凡文武各官。有捐馬百匹者。准紀錄二次。捐馬五十匹者。准紀錄一次。得旨。依議。捐助緊急軍需者。著即准行。尋常捐助者。仍送總督提督分別具奏。○丁未。以達達海為鑲黃旗蒙古副都統。○予故太子太保一等阿思哈尼哈番。

又一拖沙喇哈番哈什屯。祭葬。謚恪僖。○兵部議覆。平南王尚可喜疏言。銅山諸逆鄭錦。周全斌等。各思歸誠。請以招撫事宜。專責饒平總兵官吳六奇。相機料理。應如所請。從之。○戊申。管理廣東安輯投誠事務刑部郎中。花善等疏報。偽都督杜輝。於康熙二年十一月。率所屬將領一百二員。水陸兵丁二千九十六名。大小戰船六十二隻。繳偽印關防牌。割獻南澳地。又偽總兵吳陞。率所轄偽官三十三員。兵六百九十三名。大小船十一隻。繳偽觀武將軍印。並傾心投誠。下部知之。○己酉。轉廣西布政使司右布政使李迎春。為左布政使。○免湖廣澧州等六州縣衛康熙二年分水災額賦有差。○庚戌。陞內弘文院侍讀學士岳思泰。為內國史院學士。○辛亥。遣官祭。

先農之神。○免湖廣嘉魚等十四州縣衛康熙二年分水災額賦有差。○壬子。予故副都。

統三等精奇尼哈番教善。祭葬。謚敏勇。○予故湖廣蕪陵總兵官右都督三等阿思哈尼哈番張大元祭葬如例。○敘平緬甸功。加總兵官王輔臣。王會為左都督。王永祚。吳子聖。塔新策。沈應時。為右都督。楊威。楊朝欽。為署都督同知。餘進秩有差。○癸丑。添設甘肅按察使司按察使員缺。命統轄平慶臨鞏四府駐劄鞏昌府。○陞原任廣東韶州副將張偉為廣東廉州總兵官。○禮部遵旨議覆。泰領阿達哈哈番品級散秩大臣。一等侍衛鑾儀使。冠軍使各王府長史。一等護衛。前鋒叅領。按察使。病故者。以後不必給與祭葬。其有陣亡。并得傷病故者。仍各照品級。給與全葬。遣官讀文致祭一次。得旨。精奇尼哈番。阿思哈尼哈番品級散秩大臣。仍著賜卹致祭。其叅領品級散秩大臣等官。不必賜卹致祭。餘依議。○甲寅。命優賞安南國王嗣黎維禧。以初次入貢故也。○議政王貝勒貝子大臣等遵

旨會議。朝鮮人民。不許出界採參伐木。請移文朝鮮國王。令嚴行禁止。從之。○福建總督李率泰疏報。寧化縣山寇聚黨八百餘人。剽掠地方。總兵官董大用。調兵進剿。執斬賊首錢禾餘黨悉平。下部知之。○丙辰。春分。朝日於東郊。

上親詣行禮。○陞叅領覺羅朱滿為鑲黃旗蒙古副都統。○丁巳。予故致仕太子少保吏部侍郎胡兆龍祭葬如例。○命山東驛鹽道事務歸併濟南守道兼理。○戊午。陞駐防京口協領劉邦柱為鑲黃旗漢軍副都統。○己未。一等精奇尼哈番唐通。年老致仕。命伊子唐翰輔襲替。○免湖廣沔陽州。臨湘縣康熙二年分旱災額賦有差。○湖廣總督張長庚疏報。西山巨逆馬騰雲黨守素塔天寶等率眾歸誠。下部知之。○庚申。禁督撫等衙門。私設賞功。將材。傳宣。聽用等材官。○辛酉。科爾沁多羅郡王張繼倫故。遣官致祭。○壬戌。予山

東陣亡一等阿達哈哈番阿納海祭葬如例
○禮部題殿試定例於三月十五日。今三月十八日恭遇

萬壽節。請將殿試之期。改於三月二十二日舉行。從之。○刑部遵旨議覆。凡犯過失殺人者。旗下照盛京定例。鞭一百。賠人。民人責四十板。追銀四十兩。給付死者之家。旗民有彼此過失殺者。俱照給銀四十兩之例。從之。

三月癸亥朔。加授福建福寧總兵官吳萬福都督同知。以叙攻剿海寇阮春雷等有功也。

○丙寅。靖南王耿繼茂疏報海逆洪旭。黃廷等擁鄭錦殘黨遁踞銅山。所轄偽將張傑吳盛等率領兵民渡海投誠。羣賊分踪來追。意欲乘機入犯內地。總兵官王進功統兵馳剿。殲賊衆於陸鰲。破賊巢於下蔡。斬首千餘級。接應投誠人等入界。在事有功鎮將及張傑等。均請敘錄。以勵將來。下部察敘。○戊辰。以原任湖廣祁陽總兵官陳德為廣東海豐總

兵官。○己巳。予故蒙古副都統鄂齊禮祭葬如例。○授廣東投誠偽官杜輝。吳陞。左都督銜。杜騰。郭惠。都督同知銜。吳鵬。都督僉事銜。○庚午。諭刑部。直隸各省民有冤抑。許赴原問衙門。及部院等控告。如不准行。方許叩閤。前諭甚明。近見有不赴原問衙門。及部院控告。竟叩閤者。有已經叩閤。不候原問。及部院審結。輒行再叩者。有覓人代告者。嗣後通行禁止。其奸棍代人控告者。論死。爾部曉諭直隸各省軍民人等一體遵行。○辛未。清明節。遣官祭

永陵。

福陵。

昭陵。

孝陵。○予故定西將軍內大臣一等公愛星阿祭葬。謚敬康。仍賜賻銀三千兩。○免湖廣黃岡等十三縣衛康熙二年分水災額賦有差。○壬申。平西王吳三桂疏報進剿隴納。已經

報捷。惟狡逆賀雲潛逃。遂於二年十二月十五日發兵搜剿。全無踪影。因上下木咱地方離此不遠。蠻目陸亮等係賀雲至親。平日連結甚於別寨。恐賀逆逃匿彼中。隨令總兵官王會趙良棟張鵬程等分三路進剿。逆苗礮弩交發。我兵奮力衝殺。陣斬陸亮。擒殺逆蠻一千三百八十六名。賀雲聞敗。自刎家口悉擒。下部核議。○癸酉。予故一等侍衛阿思哈尼哈番古素祭葬如例。○甲戌。以故三等阿思哈尼哈番姜永基子姜雲慶襲職。○以湖廣武昌。漢陽。黃州。安陸。德安。荊州。襄陽。鄖陽八府。歸湖廣巡撫管轄。以長沙。衡州。永州。寶慶。辰州。常德。岳州。七府。郴州。靖州。歸偏沅巡撫管轄。○添設湖廣按察使司按察使員缺。駐劄長沙府。○予故內大臣二等精奇尼哈番杜爾瑪巴圖魯占祭葬。又加祭一次。謚忠直。○乙亥。以吏部郎中張九徵為河南按察使司僉事提調學政。○陞四川威茂道陳子

達為陝西按察使司按察使。直隸口北道潘超先為甘肅按察使司按察使。○吏部題前奉

上諭。凡官員較俸推陞。衙門相同。即與同品官較俸。但衙門品級各有大小。不便一體較俸。應另行定議。今議。大學士缺。以各部尚書左都御史推補。如不用。以各部侍郎。學士推補。各部尚書缺。照衙門次序。以尚書左都御史轉補。如不用。以各部侍郎推補。吏部侍郎缺。以各部侍郎轉補。各部侍郎缺。以學士左副都御史。通政使。大理寺卿。宗人府府丞推補。如不用。以府尹。太常寺卿推補。左副都御史缺。以通政使。大理寺卿。宗人府府丞推補。如不用。以府尹。太常寺卿推補。如不用。以光祿寺卿推補。如不用。以左通政推補。通政使。大理寺卿缺。以府尹。太常寺卿推補。如不用。以光祿寺卿推補。如不用。以侍讀學士。左右通政。大理寺少卿。照考語俸次推補。府尹。太常

寺卿缺。以光祿寺卿推補。如不用。以左右通政。大理寺少卿推補。如不用。以太常寺少卿。鴻臚寺卿。太僕寺少卿。督捕理事官。照考語。俸次。推補。光祿寺卿缺。以左右通政。大理寺少卿。推補。如不用。以太常寺少卿。太僕寺少卿。鴻臚寺卿。督捕理事官。照考語。俸次。推補。其小四品京堂缺。將每年內陞京官四員。用完後。用五品京堂一員。再用內陞司道一員。得旨。學士既推侍郎。以後大學士缺。停其推用。餘依議。○丙子。以一等待衛額思特。為鑲白旗蒙古副都統。○丁丑。陞貴州按察使彭而述。為廣西布政使。司右布政使。○己卯。以故鎮國公噶爾哈圖之弟登色。為輔國公。○庚辰。

萬壽節。

上詣

太皇太后

皇太后宮行禮。御殿。王以下。文武各官上表朝。

賀照例筵宴。○遣官祭

福陵。

昭陵。

孝陵。○遣官祭真武。東嶽城隍之神。○癸未。予故理藩院侍郎席達禮祭葬。謚僖敬。○予故原任浙江巡撫史國珍祭葬如例。○甲申。策試天下貢士沈珩等於

太和殿前。制曰。朕惟古帝王撫育羣生。莫不以興行振德為首務。以故俗尚醇茂。賢才衆多。更有廉善之風。民無匪棄之習。其時刑措不用。登於上理。何其盛也。朕荷

上天眷佑之隆。承

祖宗付託之重。勵精求治。三年於茲矣。每思更化善俗。俾吏稱其職。民安其業。乃治效猶未即臻。豈廣厲之道有未盡歟。今欲誕敷教化。使天下蒸蒸振興為善。其道何由。至於考績課吏。所以澄敘官方。何以使賢否不淆。激揚咸當。明罰敕法。所以大畏民志。何以使庶

獄平允從欲以治歟爾多士其各抒所見詳切敷陳朕將親覽焉○丙戌傳臚賜殿試貢士嚴我斯等一百九十九人進士及第出身有差○丁亥宴衍聖公孔興燮於禮部○禮部議覆順天府府尹甘文焜疏請印刷國子監四書大全五經等書裝潢成帙頒發順天府及各省布政司以備科場之用應如所請從之○辛卯以四子部落故達爾漢卓禮克圖郡王巴拜子沙克都爾襲爵○陞郎中圖巴明珠色哈為內務府總管

夏四月癸巳朔享

太廟遣輔國公賴護行禮○以喇哈為鑲黃旗蒙古副都統○命湖廣右布政使移駐長沙轄長寶衡永辰常岳等七府榔靖二州○甲午管理福建安輯投誠事務郎中賁岱疏報偽左都督陳昇率大小文武官一百二十三員兵丁二千六百餘人渡海投誠請隸海澄公黃梧標下効力下部察敘○丙申免湖廣

興國州安陸應城二縣德安所康熙二年分水災額賦有差○己亥輔政大臣鰲拜等與內大臣飛揚古有隙及飛揚古子侍衛倭赫與侍衛西佳折克圖覺羅塞爾弼四人同值御前不敬輔臣輔臣惡之遂以勸幸景山瀛臺擅騎

上所乘馬用

上弓矢射鹿論斬又以飛揚古守

陵怨望并其子尼侃已出征之薩哈連俱坐絞

惟色黑以不知情免死後仍發寧古塔房產籍入鰲拜之弟穆里瑪家其折克圖之父鄂莫克圖西佳之兄圖爾喀塞爾弼之同祖兄塔達等俱以明知子弟所犯重大不即請旨治罪分別革職鞭責○福建總督李率奏報偽左鎮林國標率眾投誠所有偽劄關防已移送安輯部臣恭繳應邀恩優敘以示鼓勵得旨嘉獎下部察敘○理藩院題請差往科爾沁烏朱穆秦等四十七旗會盟大臣得旨

著尚書喀蘭圖侍郎達哈塔前往○癸卯吏部議覆奉天府尹徐繼燁疏言盛京為發祥重地請陞遼陽為京縣與宛大一例查遼陽不與奉天同城且外縣京縣品級不合不便改為京縣得旨奉天府內著設一縣山海關以外開原以內應添設府州縣爾部酌議以聞○乙巳予故一等精奇尼哈番祁塔特車爾貝二等阿思哈尼哈番又一拖沙喇哈番雅賴各祭葬如例○廣東道御史李秀疏言政莫大於銓衡事莫重於職掌我

皇上所定實錄品級考二書乃

太祖

太宗已定之成模勒成一代憲典垂為萬世紀綱請照律例刊刻頒行下部議○李秀又言凡推陞內外各官前次之陪即為後次之正此定例也近見吏部推補廣西按察使一正一陪次日推補陝西按察使復另擬一正一陪不過一日之間而兩正兩陪不候命下即

行開列此端一開混亂無紀請敕吏部嗣後應推官員正推既用即以陪推作正如同時缺出必俟命下再議推補庶銓政畫一而撓越無由矣下部議○李秀又言刑獄出入生死攸關在外督撫成招在內刑部定案自繯首以上必敕三法司核擬此誠明慎用刑之至意也近見三法司衙門會審皆勉強趨赴當其承問時出論多有參差及至成招看語仍然照舊依樣畫題數十年來未見翻駁一案出入一囚者總因法司諸臣彼此恐招嫌怨不肯力破情面嗣後請敕三衙門各出看語通列具題專候審裁得旨三法司議奏○喀喇沁多羅杜楞貝勒圖巴色冷故遣官致祭○丙午諭祭安南國王黎維祺以內秘書院編修吳光為正使禮部司務朱志遠為副使○丁未免陝西禮縣康熙元年分水災額賦十之三○戊申裁鄭陽撫治缺○以考滿加兵部尚書明安達禮太子太保○兵部題

順治七年。臣部曾題請。將在京三十二衛裁併十衛。已為定例。但徵收錢糧甚少。而各員俸薪甚多。請再裁去四衛。止留六衛。守備六員。千總十二員。足以供職。從之。○己酉。

孝端文皇后忌辰。遣官祭。

昭陵○禮部議覆。故定南武壯王孔有德女孔四貞疏言。先臣孔有德航海投誠。舍生報國。哀籲。

皇上仍賜春秋二祭。應不准行。得旨。定南王先奉。

世祖章皇帝旨。每年春秋致祭。著照舊遵行。○庚戌。停止京衛武生武童部試。歸併順天學政。三年一試。○朝鮮國王李柵遣陪臣洪命夏等齎表謝頒。給誥命恩。并貢方物。宴賚如例。○兵部議覆左侍郎石圖條奏內。驛遞積弊一款。稱各省驛遞馬匹疲瘦。遲誤軍機。作何恭處。齎奏人員乘馬作何定數。查驛遞馬匹。原令該管道府不時稽察。舊例違誤。止議。

處州縣驛丞。今請并將道府議處。至各藩以下齎奏人員。請定各藩填馬五匹。公將軍提督督撫填馬三匹。總兵巡鹽御史填馬二匹。從之。○癸丑。兵部議敘偽忠明伯周全斌。率左右都督以下楊泮等投誠功。得旨。周全斌授為三等伯。楊泮。周珍。曾傳。黃寶。林英。授左都督職銜。張隆。阮星。歐瑞。陳麟。賴工。張岳。授右都督職銜。○乙卯。陞叅領佟國璽為隨征廣東總兵官。○戊午。授一甲進士嚴我斯為內秘書院修撰。李元振為內弘文院編修。秦弘為內國史院編修。○以故一等阿思哈尼哈番又一拖沙喇哈番哈什屯子米斯翰襲職。○刑部題。流徙寧古塔犯人項知中途病故。伊妻傅氏。應否放還原籍。得旨。凡僉妻流徙人犯。夫死。其妻免流。若有子或無子。有僕仍應流徙。其止有一子尚未離乳者。亦免。或妻家冀免。伊女致死其壻。及惡棍欲得其妻。設謀致斃。作何禁止。爾部詳議以聞。○己未。

諭吏部。向來所定部院衙門。滿洲蒙古漢軍官員品級。陞轉與漢官不同。滿洲蒙古官員無向外陞轉之例。故其品級稍優。今漢軍官員既與漢官一體向外陞轉。其品級陞轉。應與漢官畫一。爾部確議以聞。○諭刑部。凡一應告訐事情。該督撫審問不明者甚多。若屢次行駁。愈滋弊端。前已明諭。令將承審督撫叅奏。近來屢有駁回。嗣後爾部不即將該督撫叅奏。定行議處。不貸。○予故二等阿達哈哈番副都統馬篤護。祭葬如例。○辛酉。陞靖南王下右翼鎮副將馬化麒為隨征福建右路總兵官。右路鎮標副將劉進忠為隨征福建中路總兵官。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十一

大清聖祖合天弘運文武睿哲恭儉寬裕孝欽
誠信中和功德大成仁皇帝實錄卷之十二

監修總裁官光祿大夫太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院學士加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

校修

康熙三年甲辰五月壬戌朔偏沅巡撫周召

實錄卷十二

南疏報實永辰榔靖五府州屬開墾田地六

百三十四頃有奇岳長衡辰常靖六府州屬

續墾田地五百一十八頃三十六畝下部知

之○癸亥湖廣巡撫劉兆麒疏報安荊等十

府州屬續墾田一千八百七頃四十五畝有

奇下部知之○甲子戶部議覆四川道御史

馬大士疏言欲杜州縣私派之弊宜嚴上司

容隱之條查州縣官徵收錢糧有以完作欠

并加派私徵弊端百出嗣後司道府廳等官

朦隱不報者督撫題參將司道府廳官革職

若司道府廳等官具報督撫而督撫隱匿徇

情不行題參聽科道官指名題參將督撫降

五級調用從之○丙寅以散騎郎精奇尼哈

番拜山為鑲紅旗蒙古都統○靖南王耿繼

茂等疏報三月初六日臣與總督李率恭提

督王進功海澄公黃梧等領兵先後至八尺

門偽威遠將軍翁求多率兵民六萬餘人納

款十四日夜半渡海進拔銅山焚毀賊巢斬

首三千二百餘級偽永安侯黃廷偽都督余

寬等率偽官兵并家屬人等三萬二千四百

餘名出降所獲船隻盔甲器械無算逆渠鄭

錦僅存數十艘乘風遁走臺灣計閩海地界

凡數十島賊巢布列至是掃滅殆盡得旨嘉

獎下部察敘○丁卯命江寧蘇松常鎮徽寧

池太九府廣德一州分隸江南按察使司仍

駐江寧府安慶廬鳳淮揚五府徐滁和三州

分隸江北按察使司駐鳳陽府之泗州○贈

江南瓜洲陣亡遊擊左雲龍賈質參將加一拖沙喇哈番。守備賈大第加一拖沙喇哈番。○庚午吏部議覆兵部左侍郎石圖疏言閩海投誠偽武職官內有人品單弱熟曉文義者請酌改文職官查無舊例不准行得旨投

誠官內有通曉文義願以文職効用者該地方督撫察明具題酌用○雲南道御史黃敬璣疏言竊見各省催徵不得錢糧於康熙元年奉旨會議咨行各督撫查報迄今二年有

實錄卷二十二

二

餘尚未完結間有題報者部臣緊以俟各省總題到日再議覆之臣思錢糧一日不議則皇仁一日不沛利弊一日不清若必候各省到齊勿論道路之遠近不同抑且地方之情形各異有同一款項而一省當免一省不當免者則是原不必候齊也且該撫奏報之後久不見部中明示必有不肖有司欺小民無知假稱不蠲敲扑肥己者即奉恩豁小民未必得沾實惠請敕部凡先到者先議後到者後

議。如其繁瑣不便或定於季終議奏其不當免者早為催徵以濟軍需使奸猾之民不得觀望延挨以誤國計其當免者早為蠲豁以蘇民困使貪婪之官不得上下欺朦以恣中飽則弊絕而

實錄卷二十二

四

皇仁沛矣下部知之○辛未以故二等精奇尼哈番杜爾瑪巴圖魯占孫齊付襲職○吏部遵旨議覆漢軍官員既與漢官一體陞轉嗣後漢軍郎中應照漢官例為正五品員外郎為從五品補郎中之後同漢郎中一例陞補道府開列科道由郎中授科道無世職者亦照漢官例改為七品其有叅領佐領品級者應停其改授科道再查內院漢軍侍讀通政使司漢軍叅議原照各品級以道缺用其內院漢侍讀及叅議無向外陞道之例今漢軍官員既與漢官畫一將此等停其向外陞道仍照原品級考開載於京官內陞用此更定之後原係四品郎中若補授叅領授為阿達

哈哈番者。不論叅領。阿達哈哈番。仍照先定四品。以副使道用。原係四品員外郎。後授為五品。任郎中者。仍留原四品。照先定以叅議道用。嗣後漢軍五品郎中。若補叅領。應解郎中任。其所定之款。俟命下之日。增入品級考從之。○雲南道御史黃敬璣疏言。請久任提牢之官。以恤監犯。得旨。據奏。刑部提牢司官。或十五日一換。或五日一換。誰肯盡心布置。以後俱著管理一月。○甲戌。遣官祭

關聖帝君。○丙子。諭吏部。選拔庶常。原以作養人才。今科進士。特加簡閱。取中嚴曾渠。吳元龍。注肇衍。諸定遠。楊鍾岳。黃彥博。胡士著。熊一瀟。吳遠。程文彝。勞之辨。陳論。車萬育。李崇衛。既齊等。十五員。俱著改為庶吉士。教習滿書。○丁丑。免湖廣石首縣康熙二年分水災額賦十之三。○己卯。以故三等阿思哈尼哈番古素孫喇希泰襲職。○命廣西總督自梧州移駐省城。○辛巳。給授誠偽王朱璟溱

俸祿及人口牛種莊屯器物如朱至濬例。○禮科給事中李唐裔疏言。國家設立科道官。以為朝廷耳目。凡民生之利害。官方之優劣。以及政事之得失。有壅於上聞者。科道皆得而達之。官小而責重。正宜知無不言。言無不盡。方稱以言事君之職。近見科道官竟有終年無一疏者。果內而部院寺卿。外而督撫藩臬。其於刑名錢穀吏治民生。盡皆弊絕風清。利興害除。而無可指陳乎。抑未必盡善。而不肯指陳乎。則知而不言。與不知而不言。二者必居一於此矣。倘效尤成風。以建白為多事。以緘默為養高。則亦安賴有此科道哉。查都察院舊有傳行建白牌之例。臣衙門陞轉。亦以建白分內外。伏乞

天語申飭。以後科道官。如經年無一疏者。作何處分。庶言職不致久曠。疏入。報聞。○壬午。免廣東康熙元年分逋欠鹽課銀七萬一千一百一十五兩。○予故江南總督太子太保兵

部尚書兼都察院右副都御史致仕馬國柱祭葬如例○吏部都察院議覆河南道御史張冲異疏言向來卓異薦舉皆有定額今考滿官員大省應定一等若干名二等若干名中省小省一等二等若干名仍必實指某人以何政績無媿一等某人以何政績無媿二等如定額之外濫冒一人及優考之人別經發覺將督撫一併議罪即在內各部院亦當以員數之多寡定一二等之多少庶令內外大小臣工爭自濯磨當考滿之際咸知自審材分永息奔競之風應如所請再行部院直隸各省嚴加考核得旨近日內外文武各官考滿一等二等甚多豈無一才力不及不稱職者此後各部院直隸各省文武官員考滿將三年之內某官所辦某事奉旨改正者某事駁行者某事處分者某事察明保奏若考過一等二等官員非係賢能及不稱職事發之日將考核時具保之官一併治罪餘如議

行○刑部遵旨議覆嗣後僉妻流徙人犯夫死有子與僕或無子有僕其妻仍遣僅有乳子者免若犯人妻家冀免女流徙致死女壻以謀殺人論或惡棍欲得犯人妻設謀致斃者照光棍例立斬地方官故徇犯人偽以病故聞者事覺交吏部從重治罪從之○癸未授福建按察使周全斌為承恩伯食三等伯俸○吏科給事中姚延啟疏言國家設立考滿之法分別差等外則責之督撫內則責之各衙門堂官而總歸之吏部都察院詳核而確議之可謂盡善今乃視為虛文不肯實心任事在外者百計彌縫在內者依樣葫蘆皆由條例不嚴人各市恩避怨莫肯秉公為國之所致也請敕部院詳定條例在外考核各官必將職名全列疏內有不當者治以營私徇庇之罪在內覆核各官不得託故規避有不當者治以扶同容隱之罪在外舛誤一人至三人者應作何處分在內失察一次至三次

者應作何議處。至考滿投文之後。恐有子弟親戚到京與衙門書辦交通關節者。令科道嚴行緝訪。指名糾參。如此。則綱紀自肅。人人惟恐犯法。無敢以虛文塞責。而鑽營之路絕矣。下部知之。○姚延啟又疏言。伏見

皇上軫念圜圉疾苦。特命刑部提牢官盡心恤視。而在外囚獄之苦實有不忍言者。近聞江南浙江有等獄卒苛索不遂。創為木籠。上下分數層。納囚其中。不能屈伸。天時炎暑。穢氣薰蒸。轉成疫癘。多致監斃。請敕部議嚴禁。得旨。監犯止宜嚴加柵鎖。防範豈可創設非常刑具。以滋苛虐。著確議以聞。○甲申。雲南巡撫袁懋功疏報。康熙二年分通省開墾田一千二百餘頃。下部知之。○乙酉。以內秘書院學士麻勒吉章雲鷺教習庶吉士。○陞太常寺卿劉鴻儒為通政使司通政使。○萬齊忒多羅貝勒古木故遣官致祭。○敕銅山投誠功。以何政許正。李思忠為左都督。葉志鳳等

為都督敘事。餘授職有差。○己丑。夏至。祭地於

方澤。遣兵部尚書明安達禮行禮。○辛卯。工科給事中徐惺條奏四款。一。請發蘆課易知由單。以禁洲蠹。一。請裁無益河官。以省冗費。一。請修築石隄。以固河防。一。請更番河夫。以節國用。下部議

六月。壬辰朔。○癸巳。山東巡撫周有德疏言。歷城縣廢藩地畝。除照民地徵糧之外。又復增租。與齊河等三縣同稱苦累。今齊河等三縣增租。已奉旨蠲除。歷城增租。應請豁免。下部議。○戶部議覆。山東總督祖澤溥疏言。登青萊三府屬海島居民。已歸內地。其島內地糧。應豁免。從之。○甲午。添設奉天府府丞。治中。通判。推官。設承德。開原。鐵嶺三縣。改遼陽縣為州。並海城。蓋平。屬奉天府。改廣寧為府。添設通判。推官。經歷。設廣寧縣。寧遠州。並錦縣。屬廣寧府。俱令奉天府府尹管轄。○命河

南驛傳道移駐襄城○以內大臣巴泰為內國史院大學士○加直隸總督苗澄兵部尚書○山東總督祖澤溥加一級為正一品○山東巡撫周有德主部右侍郎以查解逃人功也○浙江總督趙廷臣疏言杭嘉湖三府偏處太湖泖湖易於藏奸請造快唬船撥兵巡哨陸路有盜責成陸路官兵水路有盜責成水路舟師庶地方咸有攸賴下部議行○丙申以故一等精奇尼哈番祁塔特車爾貝子鄂納爾襲職○丁酉福建總督李率奏以病求罷得旨覽奏患病是實本當即允所請但閩省投誠兵民官員最為繁眾著親行安插務使得所事竣之日解任回京應作何加級加恩該部一併議奏○戊戌禁民間私市馬匹○己亥內國史院大學士衛周祚假滿命入院辦事○陞江南淮海道佟國楨為江南按察使司按察使廣東嶺南道王廷弼為江西按察使司按察使陝西河西道李榮宗為湖

廣按察使司按察使○移陝西階州平落驛於小川鋪改為小川驛○庚子免江西餘干安仁二縣康熙二年分水災額賦○癸卯京口鎮海將軍劉之源以老乞休允之○丙午以福建投誠偽官楊富為四川川北總兵官○兵部議嗣後強賊入城刦掠同城官革職提問專汛官革職兼轄官降二級俱戴罪緝賊總兵提督仍照前例如失事時當獲強賊一半以上者免處分從之○己酉陞浙江巡撫朱昌祚為福建總督○庚戌授福建投誠偽侯黃廷為慕義伯○辛亥以鑲白旗漢軍都統李顯貴為京口鎮海將軍○壬子以京師亢旱命禮部祈雨是日甘霖大沛○廣西巡撫金光祖疏言左江守巡二道所轄者潯南太三府并思明土府與南寧太平所屬二十八土司自巡道裁撤歸併守道非一官所能兼攝查桂林巡道事務甚簡應改為左江巡道仍駐劄南寧左江守道仍駐潯州將桂

林巡道事併桂平守道兼管。從之。○癸丑。予故一等阿思哈尼哈番張化奇。四川北總兵官楊文啟。各祭葬如例。○添設廣東水師提督一員。左右兩路總兵官二員。○丙辰。以原任山東巡撫蔣國柱為浙江巡撫。○己未。陞叅領趙來為正藍旗漢軍副都統。○庚申。諭戶部等衙門。各項錢糧。關係國計民生。必徵輸起解。歷年清楚。然後國用有裨。軍需不匱。小民無催科之擾。官員免叅罰之累。向因直隸各省。自順治元年。至十七年。拖欠銀共二千七百萬兩。有奇。米七百萬石。有奇。藥材十九萬觔。有奇。紬絹布疋等項。九萬有奇。先曾有旨。應作何催徵。作何蠲免。著議政王貝勒大臣。九卿科道。會議具奏。今據奏。將河南湖廣等省所欠錢糧。內有議蠲免者。有仍催徵者。此累年積欠錢糧。豈盡屬小民之故。與前者假託催徵。貪汙官吏。科派小民。侵吞入己者。甚多。此皆貪汙官吏侵剋。那移撮借。運

糧官侵漁。解糧官役。自用盜賊。劫奪火燒水溺等項。拖欠至此。而追徵之時。有將人繫獄者。亦有實欠在民。雖遇恩詔。未得盡蠲免者。今將此項嚴催小民。無故派徵。見任官空受處分。且以此拖欠錢糧。撥給兵丁兵餉。缺額無益。況不肖官役。嚴加追比。反借端多派小民。朕甚憫之。今將自順治元年以來十五年以前所欠銀米藥材。紬絹布疋等項錢糧。悉予蠲免。其先經議處官員人等。不議外。見在催徵監禁。追比各犯之罪。俱著寬釋。以後貪官奸吏。若將奉旨蠲免款項。復借端苛擾派徵。加等從重治罪。至直隸各省兵丁。征剿守禦効力。備極勞苦。惟需糧餉以資生計。向因新舊兼徵。錢糧不完。以致兵餉亦多壓欠。十五年以前所欠兵餉。理應找給。但民欠錢糧。俱經蠲免。不必復給。自順治十六年以來所欠兵餉。俱著找給。以後務按期支給。俾兵丁無內顧之憂。乃副朕軍民一視同仁至意。如

仍前將應給兵餉。不實給發。及違禁侵剋。那用等弊。從重治罪。爾等通行曉諭。俾咸知朕意。○以蒿齊忒故多羅貝勒古木子圖巴襲爵。

閏六月辛酉朔。以福建興化。泉州。漳州。三郡旱災。命督撫加意賑恤。○壬戌。加致仕候代福建總督李率泰為正一品。○命都督僉事施福。隨水師提督施琅。標下効用。○福建總督李率泰疏報。總兵官李長榮等出洋會剿逆寇張煌。言擊敗賊眾五千餘人。又擒偽總兵張賢等。并獲船隻器械。下部察敘。○福建水師提督施琅。告請終養。慰留之。○癸亥。加新任福建總督朱昌祚。兵部尚書。○頒賜荷蘭國王緞疋銀兩。以二年冬。助兵剿海逆有功也。○加甘肅提督張勇。太子太保。○甲子。以故一等阿思哈尼哈番兼一拖沙喇哈番雅賴之子華塞襲職。○丙寅。禮部題考核官員。除臣部四司。滿漢各官。照例分別具題外。

其所屬太常寺等各衙門。應聽各衙門掌印官用印具保。臣部代為咨送吏部。都察院。得旨。爾部仍遵例考核。○浙江總督趙廷臣題報。偽將軍鄭殷。就撫。下部知之。○丁卯。以故一等公愛星阿之子福善襲爵。○平西王吳三桂疏報。雲南總兵官劉倬。征苗陣亡。得旨。劉倬奮勇破敵。乘勝深入。以致殞身。殊可憫悼。著議卹。○吳三桂又疏報。水西逆苗安坤等梗化。臣親提師至畢節。由大方。烏西。直搗卧這。遣總兵沈應時。副都統高得捷。都統吳國貴。叅領李良棟。總兵劉之復等。由卧這。果勇。隴勝。大方等處。分路進剿。自二月至五月。斬獲無算。又貴州提督李本深。總兵王友進等。攻賊於搭寨箐。又自雪棚。攻破阿哈箐。又總兵李如碧。塔新策等。進攻米歹河。直抵折落河。又滇黔三路總兵王會。趙良棟等。會同廣西各將。合兵攻剿龍廣。補崗等處。又李本深。擊賊於六廣河。又都統吳國貴。總兵王輔

臣等大敗賊衆於矣列。追至天生橋安坤。安如鼎。僅以身免。是役也。仰賴天威。苗人膽落。先後數月間。戰陣擒獲并器械馬匹。節據都統章京鎮將開報在案。臣謹恭疏報捷。以聞。得旨嘉獎。下部議敘。○庚午。以福建投誠偽官郭義為鄖陽總兵官。○陞浙江左路水師總兵官常進功為廣東水師提督。○辛未。命偏沅巡撫自沅州移駐長沙。○甲戌。吏部題一等阿思哈尼哈番朔占之孫達色發色。願分襲祖職。應如所請。各令承襲。二等阿達哈哈番從之。○乙亥。刑部尚書高景。以考滿不稱職解任。○吏部題。漢軍監察御史原定食四品俸者。以從四品叅議道用。五品俸者。以正五品僉事道用。未定六品。七品。監察御史在外補用之例。今漢七品御史外轉者。以從四品叅議道用。漢軍六七品御史。亦應以在外從四品叅議道用。從之。○丙子。陞光祿寺卿周天成為太常寺卿。○丁丑。加江西巡撫

董衛國。工部右侍郎。以督墾議敘也。○戊寅。改廣東廣州水師總兵官張國勛為廣東左路水師總兵官。南澳投誠官杜輝為廣東右路水師總兵官。○己卯。裁江南隨征左右二路總兵官。左路標下原調江西兵丁三千名。撤回江西。右路標下原調陝西兵丁三千名。撤回陝西。總兵官塞白理。劉芳標。回京遇缺補用。○裁浙江隨征總兵官。標下原調山陝兵三千名。撤回山陝。總兵官范達禮。回京遇缺補用。○裁山西兵四千名。督提兩標各裁兵一千名。尚應裁二千名。令督提酌量裁減。○裁直隸兵三千六百名。督提兩標各裁兵一千名。尚應裁一千六百名。令督提酌量裁減。○撤回駐防蘇州。漢軍章京兵丁。○庚辰。兵部題。議政王等會議。陝西總督標兵五千名。准留三千。應裁二千名。除中。左右。三營。照舊。其前後二營。相應裁去。查雲南提督張勇。調回甘肅鎮守。先經奉旨提督張勇到秦之

日添設官兵。甘肅提標下。應設兵四千名。立中。左右前後五營。即將新裁督標兵二千名。添入提標。並提督張勇。雲南帶來兵一千五百名。尚少兵五百名。俟張勇到任之日募補足額。至督標所裁營官。即改為提標前後二營營官。其中軍官。左右二營官。亦應俟張勇會同督臣查補。從之。○壬午。以故一等阿思哈尼哈番沙濟德爾格爾子杜爾拔襲職。○陞蘇州駐防協領朱萬化為浙江左路水師總兵官。○乙酉。以原任太子太保戶部尚書王弘祚為刑部尚書。○陞工部郎中霍叔瑾為光祿寺卿。○禮部等衙門議覆廣東道御史李秀條奏銓政一疏。一議得在部候選推官進士舉人二百六十八人。候選知縣進士舉人及旗下舉人并貢監廕生一千五百三十三人。缺少人多。候選壅積。鄉會試應暫停一科。又一議。銓選原分各項。其各項壅滯。不專在鄉會試。且取士從無用完方取之例。鄉

會大典。不便議停。得旨依後議。○丙戌。先是吏部以補授總督巡撫通政使府君光祿寺卿。此數員缺。奉旨不論漢軍漢人。已經遵行。其內三院大學士。六部尚書以下。鴻臚寺少卿以上。或漢軍缺出。或漢人缺出。亦應不分別漢軍漢人。照品級考。將應陞官員擬出。上以關係官員陞轉定例。命議政王貝勒大臣九卿科道會同酌議。勿令壅滯。至是和碩顯親王福壽等集議具奏。一議。凡陞補在外各官。既不論漢軍漢人。應將在內各官。亦不必分別漢軍漢人。今後補授內院大學士。六部尚書以下。各項員缺。停其分別補授。將漢軍漢人一體陞轉。又一議。查得內院大學士。六部侍郎以下。舊設有漢軍員缺。今已裁去者。漢人之缺。亦有裁去者。若將漢軍漢人通融陞補。恐缺少人多。難免壅滯。今天下大定。事務繁多。似應將漢軍漢人裁過之缺。酌其衙門繁劇。量行議復。以疏壅滯。得旨依前議。堂

官員缺。漢軍官員。每衙門不得過一員。○戊子。吏部議覆。工科給事中吳國龍疏言。蠹役犯贓。本官失察。止報衙役。不將失察官一併題叅。或地方失事。不查該管官職名。及失事月日。一併題報。應將原叅督撫議處。從之。○以雲南投誠偽官趙得勝。為雲南義勇前營總兵官。從平西王吳三桂請也。○己丑。鑲紅旗滿洲都統特晉。以父博爾金侍衛未蒙恩。賜立碑上請。禮部以行查吏部。並無檔案據覆。得旨。博爾金侍衛。

太祖時。原在十員扎爾虎齊之內。後授為都統。在昔勤勞最著。著議加恩。○以新推廣東海豐總兵官陳德。為雲南蒙景楚姚總兵官。因平西王吳三桂坐題也。○以考滿。加雲南提督張國柱。太子少保。廣東饒平總兵官吳六奇。少傅。兼太子太傅。

秋。七月。庚寅朔。享太廟。遣都統覺羅巴哈納行禮。○以廣西右布

政使彭而述。為雲南布政使司右布政使。管左布政使事。陞貴州糧道張彥珩。為貴州按察使司按察使。○辛卯。吏部題。內外滿洲。蒙古。漢軍。都統。將軍。以下。大小武職。皆由臣部題補。查提督。總兵。等官。係兵部職掌。則滿洲。蒙古。漢軍。武職。亦應屬兵部。從之。○免貴州新添衛。康熙二年分水災額賦。○壬辰。以科爾沁故多羅郡王張繼倫子布達禮襲爵。○甲午。管理福建安輯投誠事務。戶部郎中賁岱疏報。自康熙元年。至三年止。合計投誠文武官。三千九百八十五員。食糧兵。四萬九百六十二名。歸農官弁兵民。六萬四千二百三十名口。眷屬人役。六萬三千餘名口。大小船九百餘隻。下部知之。○乙未。吏部題。降級調用之官。原無專定員缺。惟照所降對品之缺。或三項。或四項。與專行應補官。一同掣籤。如一缺不得更掣一缺。以對品而掣數缺之籤。則降官且得缺多。而專行應補之官。反不得

缺以致壅滯。嗣後降補各員。在內自太常寺卿以下。至九品官止。在外自布政使以下。至九品官止。掣籤時。查對品幾缺。俱封籤入筒。科道官於此內掣一缺。將所掣出之缺。令與初授官。候補官。同掣籤。得缺則補。不得缺。則下次仍將前掣定之項籤補。著為例。從之。○戊戌。裁四川上南巡道缺。歸併上南守道兼理。令春夏駐嘉定。秋冬駐邛州。○山東道御史程可進。係由刑科副理官改授。具呈吏部。請仍留原品。部議。副理官原係四品。如補授科道。應照見在品級。改為七品。所請應無庸議。得旨。程可進所告。不准行。除以前改授各官。不必再議外。此後改授之官。著照滿官例。仍以原品補授。○又議。滿洲科道官由員外主事補授。歷四品五品俸者。應陞補郎中。由六品七品官補授者。應陞補員外郎。從之。○廣東總督盧崇峻疏報。平南王藩下叅領孫楷。逆擊李勇等。會同番禺知縣彭襄。進剿。蚤

寇周玉李榮等多所斬獲。効命有功。下部察敘。○己亥。改隨征廣東總兵官佟國璽為廣東海豐總兵官。○予故一等阿思哈尼哈番護軍統領杜爾德。一等阿思哈尼哈番沙濟德爾格爾。各祭葬如例。○加江南瓜洲陣亡守備羅明昇。拖沙喇哈番。予祭葬如例。○戶部議。發遣盛京寧古塔等處叛逆家屬。私行買贖者。係官交該部革職。係旗人交刑部枷號兩月。鞭一百。係民杖一百。流三千里。原人並價交臣部察收。將盛京寧古塔等處專管官及撥什庫。一併從重議處。從之。○禮部議。暹羅國餽平南王禮物。經該藩奏明。應不准收受。並請以後外國。毋得餽遺邊藩。督撫從之。○琉球國中山王尚質遣使臣吳國用。謝順治十一年敕封恩。附貢方物。賞賚如例。○庚子。廣西總督屈盡美疏報。下井猺賊。負固作亂。臣親督官兵進剿。斬獲無算。有功文武官吏。及臨陣傷亡將卒。請分別敘卹。下部察

議○壬寅。吏部覆廣東道御史李秀疏言。五城光棍。已經拏獲。私自放縱者。將該御史降二級。得旨。御史及司坊官。俱著革職。○禮部議。陝西臨鞏學政。向係守道兼攝。今該道事繁。請歸併西安學道。從之。○癸卯。中元節。遣官祭。

永陵。

福陵。

昭陵。

孝陵○以考滿。加四川總督李國英。太子少保。

○甲辰。吏部遵旨議覆。總督巡撫。如因功加級。兼食都御史銜者。加一級。授為從三品。加二級。授為右副都御史。兼副都御史銜者。加一級。授為右侍郎。仍兼右副都御史。舊例。右侍郎。加一級。授為左侍郎。左侍郎。亦係正三品。不為加級。嗣後。右侍郎。加一級。轉為左侍郎。仍加一級。授為從二品。如再加一級。授為尚書。仍兼右副都御史。兼尚書銜者。加一級。

授為從一品。加二級。授為正一品。又舊例。加

級至一品後。遇應加一級。改為紀錄二次。嗣後。不必改加級為紀錄。如有加級紀錄款項。將緣由註冊。仍照定例。抵銷處分。得旨。所議定例。止及總督巡撫。其在外司道以下各官。並在內大小官員。加銜加級之例。俱應確議。又向來各官陞轉時。有不論品級。正從者。降削時。方論正從。亦屬未合。著一併確議。定例以聞。○丙午。諭吏部。補用滿漢廕生。著與候補及降調官一體同論。日期先後。擬推正陪。○陞王府長史。俄托渾。為鑲藍旗護軍統領。○丁未。敕福建提督水師總兵官施琅等曰。海寇雖已蕩平。逆賊鄭錦。尚竄臺灣。茲以爾施琅。素諳海務。矢志立功。特命爾為靖海將軍。以承恩伯周全斌。太子少師左都督楊富為副。以左都督林順。何義等為佐。統領水師。前往征剿。凡事會議酌行。毋謂自知。罔聽眾言。毋謂兵強。輕視寇盜。嚴設偵探。毋致疎虞。

抗拒不順者戮之。大兵一至。即時迎降者免死。有能擒殺賊渠投誠者。核明具奏。行間將領功罪。察記彙奏。務期殄滅逆孽。副朕倚任之意。爾等受茲重任。宜殫竭心力。以奏膚功。欽哉。特諭。○戊申。追賜十扎爾虎齊都統博爾金侍衛謚忠直。○定科場內外簾處分例。○庚戌。轉吏部右侍郎吳達禮為左侍郎。陞內弘文院學士羅敏為吏部右侍郎。○辛亥。工部議古北口差。應添設漢官一員。從之。

丁巳卷十二

三

理藩院議滾布伊爾登貝勒因喀爾喀之變。旗分離散。生業盡失。今來投誠。應賞馬百匹。牛羊各百隻。從之。○廣東總督盧崇峻疏報。新安縣瀝源地方。積賊袁瑞等盤踞劫掠。提標遊擊梁有才等剿滅有功。下部察敘。○丙辰。予故致仕南贛巡撫都察院左副都御史三等阿達哈哈番蘇弘祖。祭葬如例。○丁巳。福建總督李率泰疏報。福州興化泉州漳州四府。因風雨大作。五日不止。大水泛濫。溪海

交漲。浸墮城垣。漂沒房屋。老幼男女淹溺無算。下部議。○戊午。四川總督李國英疏報。官兵恢復大昌。請議敘有功官員。下部察敘。○以喀喇沁故杜楞貝勒圖巴色冷子班達爾沙襲爵。○以散秩大臣答達海為鑾儀衛掌衛事。陞冠軍使哈什瑪為鑾儀使。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十三

監修總裁官光祿大夫大學士兼太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙三年甲辰八月庚申朔○辛酉予故原

實錄卷十三

任太子太保內弘文院大學士呂宮原任湖廣總督太子太保兵部尚書李蔭祖各祭葬如例○吏部遵旨議覆開復等官應否給還紀錄薦舉之處查降革官員凡係因公註誤後經辨明開復者是本官原無降革之罪故將原有紀薦仍應給還至於拖欠錢糧被叅各官於未離任之先續徵完解雖據該撫題明開復但係催徵不力之員任內先有紀薦應不准給還永著為例從之○壬戌秋分夕

月於西郊遣大學士蘇納海行禮○乙丑叙勸

墾荒地功加河南總督劉清泰兵部尚書巡

撫張自德工部尚書○丁卯遣大學士衛周

祚祭

先師孔子○陞福建按察使王原撫為廣西

布政使司右布政使陝西東路道秦斌為江

西按察使司按察使廣西桂平道趙曰冕為

江南按察使司按察使○戊辰

太宗文皇帝忌辰遣官祭

昭陵○索倫頭目布勒等進貢貂皮賞賚如例

○浙江總督趙廷臣疏報隨征總兵官范達

禮招撫偽兵部侍郎蔡昌登等繳偽敕印投

誠請給銜俸以勸來者下部議○庚午

太祖高皇帝忌辰遣官祭

福陵○辛未刑部題將見行條例添入律內通

行直隸各省並寫清字本發江南浙江陝西

滿洲將軍從之○壬申遣官祭

歷代帝王○遣官祭城隍之神○加雲南義

勇總兵官王會太子少保○甲戌浙江總督趙廷臣疏報逆渠張煌言盤踞浙海多年其下偽官節次招降獨張煌言抗不就撫臣與京口將軍劉之源先後發書遣使諭以禍福勸其去逆效順張煌言之死不悔雖將隨從兵弁船隻起發進關猶借名歸隱徜徉海外臣即馳赴定海會商水陸提督哈爾庫張杰分遣將士配坐船隻由寧台溫三路出洋搜剿毀其賊巢殲其餘黨偵知張煌言披緇遠遁密令驍勇將備徐元張公午扮成僧民隨帶健丁火器潛伏普陀山一帶仍撥將弁扼守要路以防奔竄至七月二十日瞭望朱家尖有趕繒船一隻急舉火器前擊獲有活口林生陳滿等知張煌言見在懸山范畝徐元等即駕所獲賊艘尾隨八槳兵船令活口林生等仍扮差回原船使之不疑乘夜進一小港從山後覓路突入帳房遂擒張煌言及其親信餘黨搜出偽視師兵部銀方印一顆偽

關防九顆鎗礮盔甲旗繖等物三省出沒之渠逆一旦生擒凡經過寧紹杭各府百姓聚觀如堵從此奸宄絕跡海宇肅清共仰天威震疊矣得旨嘉獎下部議叙○以蒿齊武故多羅郡王噶爾瑪薩旺子阿拉布坦襲爵○戊寅祭大社大稷遣吏部尚書阿思哈行禮○己卯湖廣總督張長庚疏報靖西將軍都統穆里瑪定西將軍都統圖海等率禁旅與三省綠旗兵合剿西山巨逆郝搖旗劉汝魁等業經授首獨李來亨擁衆茅麓山最為險峻官兵晝夜環攻賊勢窮迫其黨陸續下寨歸降八月初五日李來亨全家自縊舉火焚巢官兵搜剿餘黨楚寇蕩平全師奏凱下部察叙○辛巳孝陵工成○鎮守西安正黃旗副都統額色以年老乞休允之○癸未免直隸霸州博野保定武清四州縣本年分水災額賦有差○丙

戊。停差滿漢官往察直隸秋審。止令督撫會同審錄。

九月。己丑朔。內國史院學士范承謨。以疾乞假。允之。○庚寅。難廕生袁象乾。許其燧。叩閣呈稱。定例漢軍難廕生。俱以知州知縣隨到隨補。漢人難廕生。俱以小京官用。缺少人多。永無補用之期。請照漢軍例。一體外用。得旨。漢軍漢人。陞轉既已一體。以後漢人難廕生。俱著照漢軍之例行。○辛卯。改武會試於九月二十一日。○甲午。喀爾喀台吉崑都崙拖音遣使進九白年貢。宴賚如例。○乙未。免山東章邱。新城。青城。三縣。本年分水災額賦。○己亥。工部左侍郎李呈祥。以疾乞假。允之。○庚子。吏部議准。漢軍廕生王光謨等叩閣。請將漢軍廕監生。照舉人例。以知縣用。從之。○予故原任都統太子太保二等精奇尼哈番鄂羅塞辰。祭葬。謚果敏。○壬寅。免直隸寶坻。新城。新樂。曲陽。四縣。本年分水災額賦。○甲

辰。免浙江衢州府屬積荒田地。康熙三年以前逋糧。仍令有司招民開墾。○丙午。廣東總督盧崇峻疏報。平南王將軍提督等統領官兵。於八月十二日進剿碣石衛賊巢。擒斬賊首蘇利。俘獲餘黨萬餘。賊寨蕩平。得旨嘉獎。下部察叙。○丁未。以大學士衛周祚。吏部尚書魏裔介。為武會試正考官。戶部左侍郎朱之弼。內秘書院學士章雲鷺。為副考官。○戊申。予故一等伯內大臣穆和琳祭葬如例。○

癸丑。遣官查勘八旗被水旱蝗災莊田。賑給米粟。共二百一十三萬六千餘斛。○福建總督李率泰疏報。官兵會剿茶仔畚山寇。生擒賊首余角。餘黨俘斬無算。各峒寨悉平。下部察叙。○甲寅。免直隸樂亭。大城。獻縣。文安。四縣。本年分水災額賦。○乙卯。

孝慈高皇后忌辰。遣官祭福陵。○廣西總督屈盡美疏報。剿平恭城縣猺賊。生擒逆首黃天貴。斬獲餘黨無算。其附近

唐王等猺寨相率歸降。下部察叙○以戶部郎中查克旦為領侍衛內大臣○以扎賴特故固山貝子色梭子畢立克襲爵

冬十月己未朔享

太廟。

上親詣行禮○遣官祭

永陵。

福陵。

昭陵。

孝陵○頒康熙四年時憲曆○命武職三品官用豹補。四品官用虎補○以兵部督捕左理事官多諾為內弘文院學士○吏部題漢軍監察御史缺出。以通政司知事等官補授。其御史陞缺。則為左右通政。大理寺少卿等官。是以六品七品之人補授御史。而所陞之缺品級太優。今後漢軍御史缺出。請以正五品郎中補授。如無五品郎中。以正五品員外郎補授。從之○彗星見軫宿度○庚申。吏部遵

旨議奏滿漢官員畫一相對。今漢軍漢官既一體陞轉。各衙門有漢軍漢官兩員者。應裁去一員。得旨漢軍侍郎學士以上。一衙門不得過一員。其餘各官俱著照舊。倉場事務繁多。漢軍漢人侍郎各一員。仍照舊存留○辛酉。

皇太后聖壽節。遵

懿旨免行禮○福建水師提督施琅疏報。鄭逆商人藍英帶貨物投誠。下部知之○甲子。以福建右布政使張颺為廣東布政使。司左布政使。陞山東東兗道張弘俊為福建按察使。司按察使○乙丑。飛牙喀地方二村。奇勒爾地方四村頭目。各貢貂皮。賞賚如例○刑部議。廣西逆賊雷神全。羅神會。盧道曉。擾害地方。官兵進剿。勢窮就撫。仍應正法。從之○丙寅。先是吏科給事中楊勳奏康熙二年順天鄉試春秋題目。鄉子悞鄉人。將考試官白乃貞。詹養沉。及同考官羅繼謨革職。其寫人

字中式九人。寫子字貼出三人。交禮部覆試。尋命中式九人。不必覆試。將貼出寫子字三人覆試。優者准中舉人。至是。命內弘文院檢討鄭之謙為正考官。李崇為副考官。照鄉試例三場考試。俱不合式。不錄。○靖南王耿繼茂疏報荷蘭國出海王。於八月十六日。帶領番船十隻。番兵千人。抵閩安鎮。約九月二十至圍頭取齊。於十月初旬。往澎湖攻賊巢。候風便進。取臺灣。下部知之。○戊辰。以查哈太為鑲紅旗蒙古副都統。○海逆張煌言伏誅。○己巳。陞西安駐防協領岳鵬巴圖魯為西安副都統。○庚午。命內大臣監試武舉。步箭於左翼門外。○免陝西西寧衛本年分水災額賦。○辛未。諭吏部、兵部、都察院。近見考滿內外各衙門具奏吏部等衙門又行覆題。以致事多繁冗。賢否甚難甄別。內外大小文武各官除今年考滿外。以後每三年彙考一次。其到任未經三月者。不必考。向來自陳等官

仍照舊例自行陳奏。候旨定奪。至於司屬漢官。定例陞授時。如無考滿之人。論俸深者陞授。又於一年一次考核無益。著停止。應行事宜。爾部院酌議具奏。○巡視兩淮鹽政御史趙玉堂疏報通州所屬八月初一起。至初三日。風潮衝倒隄岸。水深丈餘。引鹽廬舍地土人民淹沒無算。章下所司。○癸酉。傳臚。賜殿試武舉吳三畏等一百人。武進士及第出身有差。○吏科給事中傅感丁疏言。陞任官員一經奉旨。督撫即應查明本官任內錢糧督緝各案。果無違悞。憑到之日。速赴新任。如有侵糧未楚。積案未清。前此捏報全完。隱匿朦混情弊。直至陞後察出者。立行題參。督撫徇庇。一并議處。章下所司。○甲戌。撥投誠兵二千名。隸海澄公黃梧下。合舊兵三千名。立中左右前後五營。○乙亥。免江南宿州等九州縣衛本年分水災額賦有差。○清察湖廣蘆地員外郎王秉仁報增湖廣省蘆課銀三千

五百兩。下部知之。○戊寅。以刑部郎中李如桂。為浙江按察使司僉事。提調學政。刑部郎中王鑑。為山東按察使司僉事。提調學政。陞雲南分巡屯田水利道吉允迪。為貴州布政使司叅議。提調學政。雲南府同知何起鵬。為雲南按察使司僉事。提調學政。○己卯。工部議覆。浙江總督趙廷臣疏報。海寧縣颶風大作。海水過塘。淹沒內地。令動支額編銀兩。修築塘工。從之。○庚辰。福建總督李率泰疏報。總兵官馬化麒。於古雷山。遇賊船三十一隻。奮勇力戰。陣斬一百七十餘人。擒獲一十三人。得獲器械船隻。因無水手撐駕。即時焚燬。兼報礮傷官馬三匹。得旨。斬殺賊夥。得獲器械。因無撐船之人。焚燬等語。係從何來之賊。其賊首為誰。且近地所得船隻。焚燬是何緣故。既云官馬三匹。被礮倒斃。其戰士何以無一被傷者。其中或邊地官員。欲行邀功。殺投來之人。誑報。亦未可知。著該督嚴行察明具

奏。○乙酉。巡視長蘆鹽政御史賈弘祚疏言。長蘆引課。因近京就便上納。自順治十五年引發運司。積欠日多。至十八年。引歸部納。舊逋始清。今奉部題。仍發運司。因為淮浙鹽法一體起見。但蘆商附近京師。自應令其就近赴部交納。章下所司。○丙戌。陞陝西西寧總兵官柏永馥。為陝西提督。○吏部。兵部。議奏。官員赴任。違限。武職降級。文職降級。調用。但文武一體。武職應照文職例調用。從之。○吏部。兵部。都察院。遵旨。議覆。內外文武官。考滿。例在內官員。於康熙四年正月二十日。考起。在外官員。於四月內。考到。正月二十內。到任。未滿三月者。不考。應自陳者。仍令自陳。在外各官。每人一本。具題。事務繁多。今定考一等。二等。平常。及辦事不及。不稱職者。各一疏。每省會齊具題。其辦過事件功過。亦造冊送部院。部院官。仍照例覆考。從之。○清察江西江南蘆地員外郎阿金太。報增江西省蘆課銀

一千一百一十七兩。江南省蘆課銀五千五百兩。下部知之。○丁亥。陞陝西寧夏總兵官胡茂楨為湖廣提督。○彗星見翼宿度。指西方。

十一月。戊子朔。○庚寅。陞京口駐防協領喻明簡為陝西興安總兵官。以原任江南右路總兵官劉芳標為湖廣彝陵總兵官。陞叅領阿爾泰為湖廣辰常總兵官。以投誠左都督楊來嘉為湖廣襄陽總兵官。投誠左都督三等阿思哈尼哈番蔡祿為河南河北總兵官。陞杭州駐防協領佟浩年為四川建昌總兵官。○壬辰。冬至。祀

天於

圜丘。

上親詣行禮。○遣官祭

永陵。

福陵。

昭陵。

孝陵。○癸巳。

上御殿。王以下。文武各官。上表朝賀。○甲午。內秘書院大學士孫廷銓。以疾乞假。允之。○鎮守福寧總兵官吳萬福疏報。叛鎮蘇利賊黨。密遣賊艘。從外洋潛入閩地。官兵哨探堵截。斬獲賊眾。焚奪賊船片帆不返。下部知之。○靖西將軍都統穆里瑪。定西將軍都統圖海等。蕩平西山賊寇。班師。○免江南泗州等十二州縣衛。本年分水災額賦有差。○丙申。遣官祭和碩簡親王德塞祖母和碩妃。○平南王尚可喜疏報。遣右翼總兵官尚之廉往東海害地方駐劄。相機剿撫。於八月前至客洋渡口。有游奕賊艇。官兵撲剿。賊眾奔潰。擒斬甚眾。沿途剿洗。至葛州嶺。復遇餘黨。隨分遣各弁搜獲殆盡。下部察叙。○丁酉。免陝西河州所屬地方。本年分水災額賦有差。○彗星犯張宿。○戊戌。吏部議覆吏科給事中傅感丁疏言。各部送差。每一司留俸淺者一員在

署辦事。如有剝員方准咨送。倘各司止有一員。不妨以乏人移覆。查先經奉有六部官輪流差遣之旨。今如科臣所請。則與定例有異。應仍照舊例遵行。得旨。六部輪流差遣。雖有定例。但各部司官。如盡出差。以致辦事乏員。亦屬未便。著照科臣所奏行。○庚子。喀爾喀丹津喇嘛遣使進九白年貢。宴賚如例。○彗星犯井宿。○辛丑。江西總督張朝璘疏言。吉安府向食粵鹽。但距粵千餘里。更有十八灘之險。商賈裹足。民多淡食。請以康熙三年為始。改食淮鹽。仍照粵額完課。下部知之。○壬寅。以原任江寧右布政使孫代。為福建布政使。司右布政使。○甲辰。陞貴州提標中軍參將王可臣。為陝西西寧總兵官。叅領桑我。為陝西寧夏總兵官。○乙巳。喀爾喀車臣汗。土謝圖汗。遣使進九白年貢。宴賚如例。○丙午。孝陵隆恩門成。○湖廣提督董學禮疏報。偽國公王光興。全夥薙髮。遣伊親子王世德。同偽

巡撫蔣尚膺。齎繳闔營偽官敕印。并各官職銜兵丁花名冊。已於十月二十三日。抵荊州。下部知之。○彗星犯胃宿。尾指東北方。○丁未。陞吏部尚書魏裔介。為內秘書院大學士。轉戶部尚書。杜立德。為吏部尚書。刑部尚書王弘祚。為戶部尚書。○賜定南武壯王孔有德。女孔四貞。銀三千兩。緞蟒色緞四十疋。○戊申。予故二等阿思哈尼哈番羅施祭葬。如例。○庚戌。免湖廣沔陽等十一州縣本年分水災額賦有差。○壬子。賜故福建提督三等侯馬得功墓地。○癸丑。陞左都御史龔鼎孳。為刑部尚書。○免浙江西安江山常山開化四縣。本年分水災額賦有差。○甲寅。兵部議覆湖廣總督張長庚疏言。房縣保康竹山竹溪。與興山巴歸一帶。皆楚省邊險之地。被郝搖旗李來亨等逆寇盤踞。今寇巢盡皆搗洗。新開州縣宜設兵以資保障。請酌撥荆彝郢襄四鎮額兵。各於緊要地方駐防。應如所請。

從之

十二月戊午朔日食○以工部尚書喇哈達兼鑲黃旗蒙古都統○福建汀州總兵官董大用以老病乞休允之○已未諭吏部向來裁缺患病丁憂等官有緝賊未獲錢糧未完之案止議罰俸令其離任其未完事情責成接任官員管理及前任官補授別缺照常論俸陞轉而接任官反因前人未完之事不得陞轉於理未合今或將前任官補用之日不補別缺仍授原任責令歸結未完事情或作何處分方補別缺至於因別案降調者仍應增入未完案件處分方許離任九卿科道確議具奏○以故阿思哈尼哈番齊墨克圖子常保襲職○庚申四川水師總兵官向化侯譚詣請辭侯爵得旨譚詣獻地抒誠著有勞績著仍以侯爵盡心供職不必固辭○壬戌陞山西河東道陳秉直為河南按察使司按察使陝西關西道李月桂為廣西按察使司

按察使○彗星在奎宿度形漸小○癸亥陞戶部左侍郎葉成額為工部尚書○原任太子太保禮部尚書解任調理王崇簡以老疾乞休命原官致仕○贈故江西建昌總兵官王明德太子少保祭葬如例○丙寅予故阿思哈尼哈番珍初懇祭葬如例○江南總督郎廷佐疏言當塗高淳新墾湖地止可畜魚植蘆萬難耕種請將從前陞科賦額豁免從之○丁卯刑科給事中楊雍建疏言本年十月初旬彗星見及今五十餘日歷一十三宿竊念

上天仁愛人君垂象示警欲其恐懼修省力行德政加惠民生所以有道之世雖有異不為災非不為災也遇災異而勤修省則可以化災致福也今國家永清大定邊陲悉已靜內地悉已寧而星象之異日久未消此正上天仁愛皇上之心至深至厚欲

皇上已治益求其治。已安益求其安。寅畏祇承用臻唐虞三代之化。伏乞

皇上清宮齋戒。力圖修省。發德音。下詔旨。廣求直言。詳詢利病。有可以惠百姓者。立賜舉行。并飭内外文武大小臣工。滌慮洗心。共修職業。將見

昊蒼可格。無難轉災為福。天下幸甚。得旨。楊雍建直言可嘉。星象示異。皆因德薄敷政失宜所致。今惟力圖修省。務期允當。以答

天心。該部知道。○戊辰。以故二等阿思哈尼哈番羅拖子羅思漢襲職。○己巳。以擒賊渠張煌言功。加浙江水師提督張杰。太子少保。○陞副將劉炎。為福建汀州總兵官。以三等阿達哈哈番韓應琦。為陝西延綏總兵官。○山東巡撫周有德疏言。山東為南北孔道。十省通津。當倡議分路之時。止從陸路起見。故河南議分湖廣。廣西陝西。四川。雲南。貴州等六省。山東議分江南。浙江。福建。江西。廣東等五

省。論分省之多寡。似得其平。合水陸繁簡情形計之。則山東所分之五省。其王公將軍督撫提鎮等衙門。較多於他省。加以運河直貫其中。兵差解運船隻。悉由此路往來。沿河居民盡為緯夫。其或不足。則取之他州縣。經費有限。民力幾何。而況楚蜀雲貴廣西等省之船路所必經。是名為五省。而實為十省。其繁苦不幾三倍於河南耶。請將陸路所分之江西廣東二省。敕令取道河南。庶民困可以少甦。而驛站無倒塌之憂矣。下部議。○辛未。予故原任蘇州副都統傅大受。祭葬如例。○壬申。予故議政大臣蒙古都統胡沙。祭葬如例。○甲戌。命江西布政使。祭暹羅國在路病故使臣。敕博瓦綈。置地營葬。立石封識。○金星生白氣長三丈餘。○乙亥。轉工部右侍郎雷虎。為戶部左侍郎。陞通政使杭艾。為工部右侍郎。○丙子。順天府進春。○吏部等衙門遵旨議覆。凡裁缺患病丁憂官員。於原任內錢

糧盜案未清。至補用之日。若仍授原任。恐補授伊等原缺之見。任職官。又有未獲盜賊。未完錢糧。亦不可知。不便將前任官復補原任。其未獲盜賊。未完錢糧事件。每一案罰俸一年。至四案降一級調用。案多照此計算。若因別案事故。降級調用革職者。亦照此事件。扣算處分。前任官未獲盜賊。未完錢糧。不責令接任官督緝督催。恐反以非本官任內之事。益滋懈弛。應仍照舊例行。得旨。裁缺患病離任官員。一案著降一級。二案著降二級。照案降級處分。其丁憂等官。如有緝賊錢糧未完事件。俟案結離任。有未完而冒稱已完者。發覺從重處分。有因別案革職降調者。任內未完案件。亦照每案降一級處分。其未完事情。仍照定例責成接任官完結。○己卯。予故內大臣蘇拜。祭葬如例。○庚辰。以故阿思哈尼哈番杜爾德子希布襲職。○壬午。以故一等伯穆和琳子四格襲爵。○改奉天所屬錦縣。

為錦州府。廣寧府為廣寧縣。屬錦州府。○免福建閩縣等七州縣。衛本年分水災額賦。○免湖南耒陽等五州縣。本年分水災額賦。○兵部督捕左侍郎馬希納等疏言。臣衙門之設。專以緝獲逃人。禁止奸頑。近有奸民結黨。夥告恣行嚇詐。及至提審。多屬子虛。此輩原非實報逃人。止欲藉端嚇詐。故首告狀內。不詳寫被告人居址姓名。滿其欲。則藉為開脫之端。不應其求。則改為駕禍之地。雖將原告治罪。而被告人家產蕩然。有死於路。斃於獄者。乞敕部嗣後首告之人。帶有逃人之主。同赴具告者。准咨該督撫嚴查解部。若並無逃人。取地方官保結咨報。免提案內牽連之人質審。得旨。不將被告干証。提來質審。則逃人獲者稀少。若提來質審。不但牽連多人。且往來提解甚苦。以後有首告逃人在某處某家者。將首告之人。拏送地方官。照發去口供。止將窩隱之人。令出質問。若無逃人。而挾仇控。

告或牽引妄扳。將誣告之人。加等治罪。○癸未。以故三等精奇尼哈番教善子喀爾圖襲職。○甲申。陞僉都御史劉秉權為內國史院學士。以原任大理寺卿曹申吉補原官。○丙戌。歲暮。裕祭。

太廟。

上親詣行禮。○遣官祭

永陵。

福陵。

昭陵。

孝陵。○遣官祭太歲之神。○旌表八旗節婦。滿洲阿爾坦妻吳氏等一十一人。蒙古俄本代妻阿氏一人。烈婦滿洲瓦洪妻能氏等一十一人。蒙古戴達里妻根氏一人。各給銀建坊如例。○是歲。人丁戶口。一千九百三十萬一千六百二十四。田地。山蕩畦地。五百三十五萬八千五百九十三頃二十五畝。徵銀二千五百八十萬七千六百二十九兩有奇。米。豆。

麥。六百一十四萬四千八百五十七石有奇。草。二百二十九萬一千一百三十二束。茶。十五萬八千五百三十三引。行鹽。四百三十萬八千一百二十三引。徵課銀。二百七十四萬三千六百七十五兩有奇。鑄錢。二萬九千五百九十萬九千五百有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙四年乙巳春正月戊子朔

實錄卷十四

上詣

堂子行禮還宮拜神畢詣

太皇太后

皇太后宮行禮御殿王以下文武各官外藩王

及使臣等上表朝賀停止筵宴○朝鮮國王

李綱遣陪臣鄭致和等表賀冬至元旦

萬壽節及進歲貢禮物宴賚如例○壬辰陞吏

部左侍郎管右侍郎事郝惟訥為都察院左

都御史○甲午

世祖章皇帝忌辰遣官祭

孝陵○諭兵部督捕衙門向因滿洲籍家僕資

生若立法不嚴必致盡行逃走不得已嚴定

窩逃之法非欲以逃人之故貽害於民也今

聞各地方奸棍結黨詐害報仇或指逃報部

提審全虛或指稱某家窩逃審虛復扳別家

或逃檔無名復改易名姓或自稱逃人解部

無人識認或棍徒在地方犯罪逃京投旗希

圖免罪或地方官拏獲重犯因誑稱逃人不

敢加刑遷延漏網或解役與逃人結黨沿途

搶掠肆行無忌或地方官唆令逃人指扳富

室巧行嚇詐此等株連蔓引冤及無辜餓死

道途瘐斃監獄實屬可憫何以立法使逃人

可獲奸棍不得肆惡小民不受詐害著議政

王貝勒大臣九卿科道確議具奏○乙未孟

春享

太廟遣輔國公賴護行禮○遣官祭太歲之神

○以故浙江提督二等侯田雄子田象坤襲

爵○陞太常寺卿哈代。為通政使司通政使
○丁酉。賜朝正外藩王貝勒貝子公台吉塔
布囊等銀幣鞍馬有差○山西道御史季振
宜條陳停止考滿三疏。一言自行考滿以來。
臣見部院大臣上疏自陳。不過鋪張履歷功
績。博朝廷表裏羊酒之賜。至各堂官考核司
屬。朝夕同事。孰肯破情面。秉至公。其中鑽營
奔競弊不勝言。況今自尚書以下。悉按品陞
補。與考滿全無關涉。且自正月至四月皆自
陳考滿之日。一人一疏。以數千計。加之六部
覆奏殷繁。諸務叢脞。弊從此生。請停考滿之
法。申飭羣工。循名責實。安心辦事。止照俸序
陞轉。庶息躁進之風。一言外官考滿。改八法
科條。以五等為優劣。數年以來。其弊尤甚。即
如州縣官。由府廳至督撫。經五六衙門考核。
各上司豈盡不受賄賂。不徇情面。一憑公道
品騭優劣者乎。若層層剝覈。州縣力不能堪。
勢必侵欺國帑。刻剝小民。以賄囑上官希圖

越俸陞轉。相習成風。莫可挽回。請嗣後直隸
各省不肖官員。止責督撫不時糾劾。其任內
無叅罰註悞者。吏部照俸陞轉。一言武職考
滿。副將以下。莫不營謀優等。武官無錢糧可
以侵那。勢必扣剋窮兵糧餉。設有意外盜賊。
綠旗窮兵。精力消於饑寒。器械罄於典鬻。貽
悞封疆。不無隱憂。請嗣後凡歷俸滿功次多
者。兵部按籍陞轉。其生事擾民。不修營伍。侵
蝕兵餉者。令督提不時糾叅。得旨考滿之典。
原欲分別賢否。以示勸懲。近因內文武各
衙門。考核各官多係優等。劣等甚少。故有旨
改為三年彙考。據奏各官徇情鑽營等弊。且
章奏繁擾。實於勸懲無裨。著議政王貝勒大
臣九卿科道會議具奏○偏沅巡撫周召南
疏報。長沙衡州等府。康熙三年開墾荒田共
三千一百三十三頃六十六畝。下部知之○
加陣亡福建提督三等侯馬得功為一等侯
予祭葬。謚襄武○己亥。諭吏部。向因選官寄

憑多有事故。恐貽誤地方。故令赴京驗到籤選。近聞直隸各省候補候選官員俱令至京。其年月在前者尚得籤選。年月在後者守候無期。困苦殊為可憫。今除特旨陞補即用者不議外。一切補選官員應酌量一年出缺多少。應截留者留京候選。選期尚遠聽其回籍。俟選期將近。咨取來京。務使選法疏通。不致貽誤地方。選人無守候之苦。著議政王貝勒大臣九卿科道會議具奏。○又諭吏部國家設立科員職司耳目。凡大利大害務盡心建白。方為稱職。近見陳奏事情直言為國者少。行私自便者多。或紛更制度。或將無益瑣事塞責。此豈朝廷責望言官之意。前

世祖章皇帝時。科員曾經裁減。今似應將各科員裁減。每科祇設滿漢給事中各一員。著議政王貝勒大臣九卿科道會議具奏。○諭戶部工部各省設立關稅原期通商以裕國用。向因錢糧不敷。故定例將抽稅溢額者加級

紀錄。以示鼓勵。遂致各差冀邀恩典。因而騷擾地方。困苦商民。殊屬不合。嗣後稅課俱照定額徵收。缺額者處分。溢額者加級紀錄之例。永行停止。其輪流差遣部員亦應停罷。并稅課作何徵收。著議政王貝勒大臣九卿科道會議具奏。○辛丑。封和碩承澤親王碩色之子博翁果諾為多羅惠郡王。多羅貝勒杜蘭子納墨孫為固山貝子。鎮國公傅勒赫子綽克託為輔國公。授固山貝子顧爾瑪渾子瓦山。輔國公塔海子德倫俱為三等輔國將軍。輔國將軍杜爾霸子巴爾霸為三等奉國將軍。○癸卯。裁六科滿給事中各二員。漢給事中各三員。○甲辰。議政王大臣等遵旨議覆山西道御史季振宜停止考滿一疏。應如所請。嗣後各官陞轉照舊例論俸。部院滿漢官有不稱職者。各堂官查叅。直隸各省文武官有不稱職者。該督撫提督不時題叅。其自陳各官均應停止。得旨。內外文武官考滿依

議停止。向有京察之例。以改行考滿停止。今既停考滿。京察之法應否復行。著再議。以聞。○四川總督李國英。丁母憂。命在任守制。○丙午。以故三等阿思哈尼哈番費揚舞子巴爾戶達襲職。○戊申。免浙江慈谿等五縣康熙三年分水災額賦有差。○山東巡撫周有德疏請復孤貧口糧舊額。以恤無告。得旨直隸各省孤貧口糧。前因大兵出征。錢糧不敷。暫裁扣充餉。今後仍著照額支給。地方官務期盡心給發。俾得實惠。違者察出治罪不貸。○己酉。轉工部右侍郎冀如錫為左侍郎。以原任戶部左侍郎杜篤祐為工部右侍郎。○庚戌。以太常寺卿推陞侍郎。過優著停止。○免江西南昌等四十一州縣康熙三年分旱災額賦有差。○福建總督李率泰疏報閩海廈門各島前已蕩平。惟南山鎮海佛潭橋一帶餘孽盤踞。臣會同靖藩飭隨征中路總兵官劉進忠等進剿。該鎮即於三年九月初四

日親統官兵陣斬逆賊七千有奇。招撫男婦一萬三千餘名。在事有功人員應請議叙。下部議。○辛亥。議政王大臣等遵旨議覆復舉京察。以何年為始。請旨酌奪。得旨自康熙四年起。以後每六年將內外官員考察一次。○吏部遵旨議覆。欽天監滿洲監正監副同部寺官一體陞轉。得旨欽天監事務必須久任。乃能習熟。不必照別衙門一體陞轉。如年久積功。加伊應陞職銜。永著為例。○科爾沁諾爾布額駙所尚郡主故遣官致祭。○壬子。引見直隸各省朝覲官員。○以陣亡福建提督一等侯馬得功子馬三奇襲爵。○癸丑。授鎮守西安將軍一等阿思哈尼哈番傅喀禪為三等精奇尼哈番。副都統拜他喇布勒哈番杜敏為二等阿達哈哈番。以叙平郝搖旗功也。○加鳳陽巡撫張尚賢工部右侍郎。○乙卯。以戶部左侍郎朱之弼為吏部左侍郎。管右侍郎事。○丙辰。以故一等阿思哈尼哈番

蘇拜長子一等侍衛昂安襲職○科爾沁多羅永圖郡王額參故遣官致祭○戶科等衙門題舊例六科輪差滿漢官各一員稽察部內事件今裁去左右滿漢給事中等員其稽察事務應歸并各科照舊稽察註銷得旨各部院事情不行速結延遲日久者甚多今由科發出事件仍照舊該科查銷至稽察各部咨申呈狀事件應專并都察院嚴察其應輪差官及掌印著都察院定議具奏

二月戊午朔祭

大社

大稷

上親詣行禮○陞大理寺少卿班敦為太常寺卿○己未加江寧巡撫韓世琦工部右侍郎○庚申予湖廣陣亡拜他喇布勒哈番又一拖沙喇哈番莽塞察葬如例○廣東潮州總兵官許龍疏報舟師直抵碣石逆賊蘇利勢窮逆屬及偽副將陳耀等就撫獲賊艘九十

七隻下部知之○辛酉春分朝

日於東郊遣左都御史覺羅雅布蘭行禮○壬戌轉戶部右侍郎父元徵為左侍郎以原任戶部右侍郎嚴正矩補原官○癸亥遣官祭先農之神○四川總督李國英疏言下東底定藩司應自保寧移駐成都從之○命湖廣投誠土司田養民承襲忠建宣撫司田經承襲高羅安撫司田生瓊承襲木冊長官司○轉廣東右布政使郭鳴鳳為江南布政使司左布政使○乙丑

太皇太后聖壽節遵

懿旨免行禮○吏部題舊例外轉都給事中以副使道用今都給事中左右給事中散給事中名銜俱已裁去相應將給事中外轉者俱以僉事道用得旨前此之都給事中與今之掌印給事中相同仍著以副使道用○丙寅戶部議准陝西巡撫賈漢復疏言韓城縣自順治十三年河流東注淤漲地三百一十八

頃三十六畝零。貧民耕種起科。今河又西向。前報之地。半為衝決。半為沙磧。百姓無可耕。逃亡相繼。應請豁免。從之。○以慕義侯譚弘為四川北總兵官。○戶部議。以後發遣盛京為民者。事隸臣部。應由臣部發遣。其流徙犯人事。隸刑部。應聽刑部發遣。從之。○丁卯。遣大學士魏裔介祭。

先師孔子。○達賴喇嘛厄魯特鄂齊爾汗。遣使進貢。賞賚如例。○予湖廣陣亡拖沙喇哈番額護德祭葬如例。○命京城左右翼張家口。殺虎口。四差。不必輪差。六部官員。止將戶部官輪差。○戶部題。今開稅事務。既已交與地方官。其各倉糧米。以及通州豆草事務。亦應交與地方官。從之。○戊辰。

孝康皇后再期忌辰。遣官祭。

孝陵。○免江南太倉州。崇明縣。上海縣。通州。海門縣。康熙三年分水災額賦有差。○己巳。遣官祭。

歷代帝王。○平西王吳三桂疏報總兵官李世耀等於三年十一月。自烏蒙進征水西安。坤悉眾來拒。我兵大破之。於波羅箐追至法地峯。擒安坤。蠻方大定。下部優叙。○吳三桂又疏報。本年正月。各鎮將剿擒安坤黨羽。安如鼎。及煽惑安逆之偽黔陽王皮熊。下部議叙。○彗星見女宿度。○辛未。予湖廣陣亡佐領拉卜世希祭葬如例。○壬申。平西王吳三桂疏報官兵進克烏撒王酋安重聖。安重乾就擒。○暹羅國王。遣陪臣航海具表進貢。表文曰。暹羅國王臣森列拍臘照古龍拍臘馬。嚀陸坤司由提呀菩埃。誠惶誠恐。稽首頓首。謹奏。

大清皇帝陛下。伏以

新君御世。普照中天。四海沾帡幪之德。萬方被教化之恩。卑國久荷

天朝恩渥。未傾葵藿之心。今特躬誠。照例朝貢。敢效輸款。敬差正貢。使坤司各喇耶邁低禮。

副貢使握坤心勿吞瓦替。三貢使屋坤司敕博瓦綈。大通事揭帝典辦事等臣。梯航渡海。齋捧金葉表文。方物。譯書一道。前至廣省。差官伴送京師進獻。用伸拜舞之誠。恪盡遠臣之職。恭祝

皇圖鞏固。

帝壽遐昌。伏冀俯垂寬宥。不恭。微臣瞻

天仰

聖曷勝屏營之至。謹具表稱奏以聞。

上嘉之。命加恩賞賚。○命新設廣東水師提督。駐廣州府順德縣。左路水師總兵官。駐新安縣。右路水師總兵官。駐廣海衛。○癸酉。諭刑部。向來流徙人犯。定例。有止應將本身流徙者。有應并將妻子流徙者。後因夫妻不應拆離。故凡應流徙人犯。將伊妻子一并發遣。原欲令其夫妻不致拆離。一同完聚。其妻子本係無罪。如本犯已死。仍將妻子發遣未合。以後除反叛重案內應連坐者。仍照前旨定例遵行外。其餘凡犯贓等

罪應流徙人犯。如本犯已死。妻子俱免流徙。爾部即遵諭行。○甲戌。予故鎮國將軍宗室聶克塞。祭葬立碑如例。○乙亥。予故三等遵義侯鄭鳴駿。祭葬如例。○丙子。清明節。遣官祭

永陵。

福陵。

昭陵。

孝陵。○戶部議覆。山西巡撫楊熙疏。報康熙三年太原府屬代。崞等十二州縣。三關鎮西等各衛所。及大同府屬應朔等八州縣。陽高等七衛所。旱災。俱十分全荒。但三年分錢糧。既已徵收。不及蠲免。應准其流免四年分錢糧。仍准發倉賑濟。

上以地方官察報遲延。有失撫恤之道。下旨切責。仍遣戶部賢能官往賑。○科爾沁和碩卓禮克圖親王吳克善故。遣官致祭。○丁丑。喀爾喀巴爾布冰圖台吉來歸。封為多羅貝勒。○諭吏部。兵部。廣東逆賊蘇利反叛。地方官

多星罪戾。今思蘇利以投誠住居內地倉猝叛亂與外來賊寇失於防禦者不同。且當蘇利反叛之際。該省王及將軍總督提督即以本省兵力將逆賊剿滅。地方蕩平。其係蘇利反叛一案。凡地方大小各官之罪。俱著寬免。○戊寅。吏部議覆處分叙州府失守各官一案。得旨。叙州府馬湖府係新開地方盜賊衆多。故將道府各官未經全設止一推官署兩府之事。當逆賊侵犯叙州府時。署府事霍焜署宜賓縣事董顯名率家丁衙役出城緝捕身受重傷。子姪皆被賊殺。又旋將失城恢復。及逆賊分犯屏山慶符三縣。知縣王敬公迎戰東關射死賊鄒學賢。身中五箭。知縣沈彰出戰於教場。手刃賊方茂伊等俱在寇亂地方尚屬効力有功。不應議罪。又署道各官星速請發兵馬。措運糧米。與官兵協力恢復。搗穴擒渠。此等官員俱應議功。今將霍焜等俱議處分。未合。著一并再議具奏。○庚辰。喀爾

喀車臣濟農遣使進九白年貢。宴賚如例。○陝西提督王一正降六級調用。總兵官鮑敬于奮起降四級調用以失追賊首郝搖旗故也。○癸未。陞廣東巡撫盧興祖為廣東總督。○乙酉。彗星在壁宿一度三十分尾長五尺餘。○都察院題浙江山西山東陝西四道添設滿洲監察御史四員從之。○丙戌。諭吏部等各衙門前因星象示異已經有旨力圖修省。仰答

天心。茲者異星復見。經理政務未能合宜。實由德薄所致。

上天垂象屢示警戒。敢不益圖修省。以後凡用人行行政務加敬慎。以求允當。內外大小文武各官皆係量才擢用。各有職掌。所理之事並關國計民生。宜洗心滌慮。更改前非。以副修省之意。至於關係國家利弊。民生休戚。應興應革事宜。內而部院及科道官外而督撫。其各抒所見。明白陳奏。以備採擇。即見行事例。

有未當者。亦據實具奏。勿以為已經奉旨之事。因循瞻顧。不復進言。朕不憚酌量改正。爾部院即遵諭通行。

三月丁亥朔○戊子午刻京師地震有聲○己丑彗星行入奎宿○辛卯以星變地震下詔曰朕纘膺鴻緒撫育羣生夙夜兢兢勤求治理期於陰陽順序海宇乂安乃去歲之冬星變示警迄今復見三月初二日又有地震之異意者所行政事未盡合宜吏治不清民生弗遂以及刑獄繁多人有冤抑致上干天和異徵屢告撫躬循省祇懼靡寧是用肆赦嘉與海內維新於戲冀答

天心爰布寬仁之典期凝庶績聿昭勸勵之圖播告天下咸使聞知○詔內恩赦凡十一條○命禮部遣官一員同河道總督朱之錫往泰山祈雨○一等阿思哈尼哈番希布緣事革職命其弟衣圖襲替○命各部員外郎照該旗分數較俸次補授郎中不必照旗分將

八旗各部官員不論俸咨選有才能者補授○差往山西賑濟飢民郎中孟古爾代等疏奏賑給米石不敷戶部議覆查得山西省贖銀等實在倉庫穀米二萬六千八百六十石零銀五百兩零應動支外仍議將該省見徵在庫不拘何項錢糧發六萬兩令賑濟官同督撫親赴被災地方酌量輕重賑給飢民如再不敷著該督撫及地方官設法拯救至應免錢糧例免十分之三今被災甚重難拘定例請敕督撫查明分別具題以憑再議得旨前山西省以災荒民飢奏請蠲免錢糧將該督撫免議處分特差官往看稱將有三十城之民饑饉至極總督巡撫俱係養民大臣民飢之先即應據實奏請拯救乃至民飢至極方奏請拯救殊負倚任之意該督撫著吏部議處具奏這被災地方民人有自順治十六年以後催徵不得拖欠錢糧槩免催徵其康熙四年錢糧若仍徵收民愈無以為生將四

年應徵錢糧亦著蠲免。若官吏復行侵欺作弊累民。事發從重治罪。決不饒恕。將此蠲免錢糧救饑緣由。旨到之日。即於被災之處。明白張示曉諭。餘依議速行。○金星晝見。○壬辰。諭吏部。都察院。民生之安危。由於吏治之清濁。吏治之清濁。全在督撫之表帥。若督撫清正。實心愛民。則下吏孰敢不潔。已秉公。近見各省督撫。彈章祇將一二衰老微官塞責。豈所屬地方。果無貪酷害民之輩。總由姑息徇庇。莫肯直糾。吏治民生。安所恃賴。爾部院職任澄清。督撫中有不肖昭著者。即行叅處。以後督撫糾劾官員。除情輕者。照例處分外。其列款貪酷者。即行解任究審。倘因循舊習。不肯實心任事。一并治罪。○諭吏部等大小各衙門。部院官員。辦理之事。皆關國政。理應勤恪匪懈。各盡乃職。果係重大事情。款項繁多。涉於疑似。應加覆核者。理應照律從容確核。情理擬結。或二三日可完之事。亦因已有

定限。必待限滿完結。各項事情。豈無貽誤。以後應即行完結事體。務須實心料理。速結。如仍前因循草率。以至壅積者。治罪。○諭戶部。設官原以養民。民足然後國裕。近聞守令貪婪者多。徵收錢糧。加添火耗。或指公費科派。或向行戶強取。借端肥己。獻媚上官。下至戶書里長等役。恣行妄派。小民困苦。無所伸告。以後著科道官。將此等情弊。不時察訪糾叅。至於夏秋徵收錢糧。原有定期。隔年預徵。小民何能完納。以後預徵著停止。照定例徵收。地丁錢糧。有撥兵餉者。應否將何項錢糧撥補。爾部詳議具奏。○諭兵部。設立驛站。原備緊要公務。供應往來。近聞在外督撫提鎮司道。多給吏胥衙役家人私票。經過驛站。乘馬支應。威逼官役。不令銷算。騷擾驛遞。貽累小民。以後除兵部火牌勘合外。其文武各官。給與私票。著槩行停止。至各衙門亦有借端公務。執行私事。給與火牌勘合者。以後自王公

將軍督提以下。何項公務方應用火牌勘合。著詳議定例具奏。○又諭兵部。總督巡撫提督總兵等官赴任時帶去家人。及親戚所送人丁。欲入兵丁數內食糧者。以後俱著停止。又將私自使令之人。充入經制兵丁數內察點。徒有其名虛費錢糧實為積弊。應作何立法嚴禁。爾部議奏。○諭工部。漕運關係國用。河道理宜嚴肅。近聞內外顯要官員多置船隻貿易往來。奸徒惡棍假借名色恣意橫行。以致開座啓閉不時。河水淺涸糧艘為阻。又欵差及赴任各官多帶貨船縱容下役騷擾河路。俱應嚴行禁止。爾部即詳議具奏。○建福陵。

昭陵明樓。○甲午。以原任鄖陽撫治王來任為廣東巡撫。○刑科給事中楊雍建疏言。治化之未登。由於臣職之未盡。比者部臣惟以推諉為卸責。而曾無任事之實心。督撫惟以蒙蔽為養安。而非有澄清之實政。部臣之推諉

者。明明本部應議之事。或請咨別部。或請敕督撫。不肯直辭決斷。以及一案之處分。因一人口供之未到。而更待另議。一事之行止。因一時文卷之小錯。而重復咨查。至於地方利病。民生疾苦。所關憚於釐正。輒云已經。臣部題定在案。無庸再議。曾未肯虛公酌議。揆利害得失之大。而建白施行。如此。則一二吏胥執定例以駁之足矣。臣不知滿漢堂司所司為何事耶。督撫之蒙蔽者。民苦於差徭額外之私徵。所在多有。而未聞建長策以除積困。吏橫於貪暴。有司之培克比比皆然。不過摘小罪以引輕條。向日行考滿之法。則題報者皆稱職。而曾無三等以下之官。平時上忝劾之章。則特糾者止州縣一二有司。不及藩臬道府之吏。臣恐徇情容隱。在所不免。惟以關通黨庇為事。而民生之至計。漠不經心。請嚴敕內外大小臣工。力圖稱職。如有仍前推諉蒙蔽持祿苟容者。立賜罷斥。以儆闔冗卑庸。

之習報聞○工部題

孝陵裝載石料需用車輛。派取北直三省已經三年。雖朝廷給車騾之價。而民間不無賠累。應照

福陵

昭陵運石車輛之例。臣部僱覓永行停派。從之。○乙未。諭平南王尚可喜設兵駐防。原以衛民。非欲其擾害地方也。近聞廣東人民為王下兵丁擾害甚苦。失其生理。此皆所屬將領不體王意。或倚為王親戚。以小民易欺。惟圖利己。恣行不法之故。王特受重寄。鎮撫地方。為國屏翰。豈有明知縱行之理。或申飭未到所致。故降茲密旨。誠諭以後。將所屬官兵嚴加約束。以仰副倚任。遣往安輯地方民生之意。勿仍縱容屬員。以為事發伊自受過。與己無涉。草草從事。如此久之。倘有大事。豈能委於屬員。王宜敬體朕諄諄申諭至意。更改往轍。欽哉。故行密諭。○諭兵部。山東青登萊等

處沿海居民。向賴捕魚為生。因禁海多有失業。前山東巡撫周有德亦曾將民人無以資生具奏。今應照該撫所請。令其捕魚。以資民生。如有借端在海生事者。於定例外。加等治罪。○免福建省順治三年至十七年鹽課積欠銀一十二萬七千九百八十三兩。○丙申。命朝覲之年。止令布政司造送錢糧簡明文冊。其各州縣冊槩行停止。○裁漕儲道缺。○戶部題。凡被災地方。夏災不出六月。秋災不出九月。各撫具題。差官履畝踏勘。將被災分數詳造冊結。題照分數蠲免。但本年錢糧有司畏於考成。必已敲撲全完。則有蠲免之名。而民不得實惠。以後被災州縣。將本年錢糧先暫行停徵十分之三。候題明分數。照例蠲免。庶小民得沾實惠。從之。○丁酉。都察院左都御史郝惟訥疏。請停止督撫巡歷所屬地方。部議。如事關重大。須躬親料理者。令具題前往。其餘巡歷槩行停止。從之。○戊戌。刑科

給事中楊雍建疏言戶部議將康熙四年江浙二省運解三年分白糧正耗盡行改折以充兵餉每石照例折徵銀二兩夫米價隨時高下比年江浙之米每石價值七八錢而止今改折二兩加以火耗勒索之費非本色三石不足以完折色之一石且正米之外又有耗辦等米夫船等銀臣愚以為有本色則有耗辦既已改折矣不應并耗辦而亦折之也有本色則有夫船等銀既已改折矣不應并夫船而又征之也乞敕該撫轉行所屬照時價減徵其溢收者或盡還民間或抵算別項正賦無使吏胥因緣為奸并令該部嗣後勿議改折以累百姓下部確議○廣東總督盧崇峻疏報海賊楊二餘黨黃明標來自交趾踞西海黃占三舊巢煽誘遷民地方官弁水陸夾剿前後斬獲九百餘名見在窮追搜捕務盡根株下部知之○己亥工部尚書傅維麟疏言向來定例荒至十分者止免三分八

九分者免二分六七分者免一分此皆朝廷德惠然而災至十分則全荒矣田既全荒賦何由辦臣請此後災傷幾分即免幾分又部覆報災之疏復下督撫取結取冊動經歲月及奉旨蠲免而完納已久不得不於次年流抵迨至次年照舊催科徒飽官吏之腹臣以為凡遇災傷督撫即委廉能官確勘并冊結一同入奏該部即照分數請蠲庶小民受實惠而官吏無由滋弊下部議○陞原任廣東嶺東道楊天祥為廣東布政使司右布政使○庚子福建總督李率奏以病求罷慰留之○廣東總督盧崇峻疏報水師總兵官張國勛廣海叅將范明道等自八月至十一月水陸夾剿會新二縣土寇於百峯山七村古井等處斬獲無算餘孽悉平下部察叙○鎮海將軍都統王國光以病求罷慰留之○辛丑吏部戶部議覆吏科給事中傅感丁疏言凡官員陞任後如有錢糧未完緝盜未獲等事

題叅本官撤回錢糧勒限一年。緝盜勒限二年。如限內不完。該督撫查叅。照原任降三級調用。如限內錢糧全完。盜賊全獲者。本官仍照原陞之項補用。應如所請。從之。○壬寅。先是江南徽州府新安衛官生楊光先叩關。進所著摘謬論一篇。摘湯若望新法十謬。又選擇議一篇。摘湯若望選擇和碩榮親王安葬日期。悞用洪範五行。下議政王等會同確議。至是。議政王等逐款鞫問。所摘十謬。楊光先湯若望各言己是。曆法深微。難以分別。但歷代舊法。每日十二時。分一百刻。新法改為九十六刻。又康熙三年立春日候氣。先期起管。湯若望謊奏。候至其時。春氣已應。又二十八宿次序。分定已久。湯若望私將參觜二宿。改調前後。又私將四餘中刪去紫炁。又湯若望進二百年曆。夫

天祐

皇上曆祚無疆。而湯若望只進二百年曆。俱大

不合。其選擇榮親王葬期。湯若望等不用正五行。反用洪範五行。山向年月。俱犯忌殺。事犯重大。擬欽天監監正湯若望。刻漏科杜如預。五官挈壺正楊弘量。曆科李祖白。春官正宋可成。秋官正宋發。冬官正朱光顯。中官正劉有泰等。皆凌遲處死。已故劉有慶子劉必遠。賈良琦子賈文郁。宋可成子宋哲。李祖白子李實。湯若望義子潘盡孝。俱斬立決。得旨。湯若望係掌印之官。於選擇事情。不加詳慎。輒爾准行。本當依擬處死。但念專司天文。選擇非其所習。且効力多年。又復衰老。著免死。杜如預。楊弘量。本當依擬處死。但念

永陵。

福陵。

昭陵。

孝陵風水。皆伊等看定。曾經効力。亦著免死。湯若望等。并其干連人等。應得何罪。仍著議政王貝勒大臣九卿科道。再加詳核。分別確議。

具奏○禮部右侍郎黃機疏言。制科取士。稽諸往例。皆係三場。先用經書。使士子闡發聖賢之微旨。以觀其心術。次用策論。使士子通達古今之事變。以察其才猷。今甲辰科止用策論。減去一場。似太簡易。恐將來士子。剽襲浮辭。反開捷徑。且不用經書為文。則人將置聖賢之學於不講。恐非朝廷設科取士之深意。臣請嗣後復行三場舊制。則士子知務實學。而主考鑒別。亦得真儒。以應國家之選。下部知之。○命八旗滿洲蒙古漢軍武臣之廕生監生。二十歲以上。不能學習者。照各品級給與頂帶。隨旗上朝。給俸。○甲辰。

萬壽節。

上詣

太皇太后

皇太后宮行禮。以星變特命停止筵宴。并免行

慶賀禮。○遣官祭

福陵。

昭陵。

孝陵○遣官祭真武東嶽城隍之神。○乙巳。戶部題本年三月初五日奉恩赦。內開直隸各省。順治十六十七十八年催徵不得各項舊欠錢糧。著照蠲免十五年以前錢糧。一體蠲免。前侵盜庫銀不赦。今俱著并免。其鹽課積逋。催徵不得者。著察明亦准酌量蠲免。應請敕各督撫嚴行確查。備造清冊送部。以憑查核。遵奉蠲免。從之。○河南巡撫張自德疏報康熙三年分所屬州縣開墾荒地。共一萬九千三百六十一頃零。該徵糧銀八萬三千一百四十餘兩。下部核議。○丙午。命工部修葺歷代帝王廟。○提督四譯館太常寺少卿錢綬疏言。君德關於治道。聖學尤為急務。請敕諭院部。將滿漢諸臣中。老成耆舊。德性溫良。博通經史者。各慎選數員。令其出入侍從。以備朝夕顧問。先將經史中。古帝王敬天勤民。用賢納諫等善政。採集成書。分班直講。每日

陳說數條行之無間。必能仰裨聖德。下部知之。○己酉。陝西西寧東鄂爾胡土克圖等進貢。特頒恩賞。○辛亥。予故原任經畧武英殿大學士洪承疇祭葬。謚文襄。○壬子。宴衍聖公孔興燮及五經博士孟貞仁等於禮部。○乙卯。免湖廣石首黃梅廣濟三縣康熙三年分蝗災額賦有差。○丙辰。福建總督李率泰以疾再疏求罷。仍慰留之。○河南右布政使李本晟。以雲南按察使任內。錢糧未清。令仍回原任。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十四

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之十五

監修總裁官光祿大夫太保兼太子太傅保和殿大學士兼戶部尚書二等伯加口

級臣馬齊光祿大夫弘道日講官起居注少詹事太子太保保和殿大學士仍兼

官吏部戶部尚書翰林院掌院學士加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣許廷鑑

總裁官光祿大夫文華殿大學士兼吏部尚書臣朱軾等奉

敕修

康熙四年乙巳夏四月丁巳朔享

實錄卷十五

太廟遣都統覺羅巴哈納行禮○山東巡撫周
有德疏請德州駐防兵如陝浙駐防例給糧
將所圈地土五百餘頃歸還百姓下部知之
○戊午命漢郎中照滿洲蒙古例於員外郎
內選才能者補授○增設吏部通滿漢字主
事一員○己未陞戶部郎中金儁為河南布
政使司右布政使○議政王等遵旨再議湯
若望杜如預楊弘量潘盡孝及案內干連人
犯等俱責打流徙餘俱照前議得旨李祖白

宋可成宋發朱光顯劉有泰俱著即處斬湯
若望杜如預楊弘量責打流徙俱著免伊等
既免其湯若望義子潘盡孝及杜如預楊弘
量干連族人責打流徙亦著俱免餘依議○
庚申予故原任大學士甯完我祭葬謚文毅
○命山東總督祖澤溥發常平倉粟給濟南
兗州二府被災貧民并諭地方官捐輸賑濟
○陞左通政覺何託為太僕寺卿○兵部議
覆廣西道御史劉源濬疏言協濟未免稽遲
改解乃能應急應如所請以本處正項錢糧
作本處驛站支用他省協濟銀兩改為正項
解部從之○壬戌都察院左僉都御史朱紱
疏言地方官有將鄉曲殷實平民指稱土豪
擅拏監禁恐嚇索財者應令督撫題參從重
治罪得旨著刑部通行各省督撫遵行○癸
亥工部議覆河道總督朱之錫題運河水涸
糧艘難行請申明漕禁以全輓輸一疏得旨
總河朱之錫前奏稱小泉多枯大泉已弱湖

水盡放。新水無收。糧艘難行等語。及差官往看。泉水仍湧。湖水可放。糧船行走。不致貽誤。朱之錫專管運糧河道大臣。理應督率各屬挑淺疏通。乃虛張具奏。殊負倚任之意。著吏部議處。又所稱十八淺處有石。自有明以來。從未挑濬。如此。則每年費如許。錢糧挑修者何處。此皆沿故明陋習。著該督親率各官。力行疏濬。勿得仍委官塞責。○甲子。吏部議覆山東巡撫周有德疏言。各省州縣官因未完錢糧被參於新任官未到之先。全完者該撫題明。仍留舊任。新任官撤回另補。應如所請。從之。○江南總督郎廷佐疏言。操江事務已經歸總督兼理。請將操標七營分隸江寧狼山二鎮。從之。○廣東總督盧崇峻疏報官兵屢破海寇。賊首李榮往下四府海面奔逃。嚴督在事各官追捕務獲。下部察叙。○原任大學士金之俊。因星變求言之詔。條奏三事。一。決囚當有定候。凡監候斬絞之犯。見皆即時

正法。嗣後請照例秋決。○考成尚須通融。酌免有司之實降實革。以責久任。分別糧里之缺少欠多。以示勸懲。○威福不容下移。凡光棍挾私叩閭。因而凌轢官府。以紊法紀。宜行嚴禁。疏入。報聞。○乙丑。以故二等精奇尼哈番鄂羅塞辰次子鄂特渾襲職。○以郭爾羅斯故鎮國公札爾布子安達西禮襲爵。○刑部議覆本部尚書龔鼎孳疏言。凡承問各官審擬一切事件。如徇私枉法。故出故入。情弊顯然者。法司衙門自應指名參處。至於擬罪稍輕引律未協等項。臣部查明非係徇私作弊。免其究參。即行改正。從之。○丙寅。都察院左都御史郝惟訥疏言。凡被災地方。查勘之後。地糧免若干。丁銀亦應免若干。庶恩澤均沾。貧民有更生之望。下部知之。○戊辰。命補授部院卿貳督撫等官。仍行九卿科道會推例。○貴州巡撫羅繪錦疏言。黔省以新造之地。哀鴻初集。由多荒廢。糧無由辦。請不立年

限。儘民力次第開墾。酌量起科。下戶部議。○江南總督郎廷佐。因星變求罷。慰留之。○已。安徽巡撫張朝珍。因星變求言之詔。條奏三事。一。說事過錢。與受財人同罪。新例未當。一。大功以上之親。容隱叛犯。婦女皆擬流徙。於律義有悖。一。流徙人妻子無罪。與犯人同解。情有未忍。此後願留願去。聽從其便。下部知之。○庚午。以故三等阿思哈尼哈番談布長子喀代襲職。○諭戶部。工部。河道轉運糧艘。通利商賈。關係國計民生。理應肅清積弊。乃便行旅往來。向因河道船隻有豪強之徒。不遵國法。擅設牌扁旗幟等項。曾經治罪禁止。近聞復有棍徒。或冒稱欽差。或指稱輔政大臣名色。設牌樹幟。張大威勢。恣意橫行。嗣後除特奉欽差外。如有前弊。該督撫及沿河各官。不時嚴察拏究。指名題參。從重治罪。倘該管官失於覺察。被旁人首發。一并嚴處。不貸。○壬申。浙江總督趙廷臣疏言。駐防滿洲

各旗家僕。有新經收買。未及逾年者。聲音裝束。與本地居民無異。賣身之時。親朋里甲。不得而知。一旦逃回。原籍之人。留宿留飯。事發牽連。似屬可憫。嗣後駐防旗下。凡收買新人。地方官驗契印照。仍出示曉諭本縣地方。俾知某人賣身旗下。不許容留。倘復逃走。有人窩藏。查係報部有檔。與已買一年以上者。照例究罪。如未經報部有檔。並未及一年者。分別酌議。下部知之。○癸酉。

孝端文皇后忌辰。遣官祭。

昭陵。○乙亥。浙江巡撫蔣國柱疏言。浙省地狹民稠。無尺土不輸將國課。駐防滿兵樵採未免病民。請於額餉外。每月加給柴價銀兩。下部議。○蔣國柱又疏請。凡謀殺。故殺。強盜案。內牽連罪。不應死各犯。在赦前者。槩與寬釋。下部知之。○丙子。廣東總督盧崇峻疏報。香山縣知縣姚啓聖。招撫蜚寇黃起德等。共四千餘人。下部察叙。○丁丑。安徽巡撫張朝珍

疏言凡印官清丈地畝弓正等隨之者甚衆凡供應造冊繪圖等費俱出之里民大縣約費千餘金以臣屬計之其費不下數萬臣屬賦役每年足額素無土地不清之弊即如蘇松未經清丈之前錢糧亦有完無欠是丈量實無關於國課也倘蒙停止清丈即可省天下金錢百萬矣下部議○戊寅福建總督李率泰疏報銅山搶大林等出沒海濱提督王進功施琅標下將弁率師進剿各有斬獲下部察叙○兵部議覆廣東總督盧崇峻疏言粵省邊界地方各應留一出海口子香山縣由水路以順德橫石磯邊界為口子廣海衛由陸路以城岡堡邊界為口子大鵬所由陸路以歸善淡水邊界為口子平海所由陸路以歸善邊界白雲墟為口子海門所由陸路以潮陽邊界南關裏為口子以便官兵運糧行走地方官給與驗票設立口子處撥官兵防守稽察驗票放行如借端在海貿易通賊

妄行地方保甲隱匿不首者照例處絞守口官兵知情者以同謀論處斬不知情者從重治罪從之○己卯四川總督李國英疏言全川已經恢復當因地設防酌議增減督標撫剿五營兵五千名募義侯譚弘下兵三千名龍安城守兵五百名應裁永寧鎮標原設中左右三營兵三千名應裁一千名重慶鎮標原設中左右三營兵三千名應留又左右水師兵二千名應裁石泉原設兵五百名應裁二百名雅黎原設兵一千名應裁二百名戎邊原設兵一千名應裁三百名潼川綿州應設守備一員兵五百名疊溪原設遊擊一員兵五百名應增中軍守備一員兵二百名建武應設遊擊一員中軍守備一員兵七百名大壩應設守備一員兵三百名龍場壩應設守備一員兵二百名叙州馬湖二府應設遊擊一員中軍守備一員兵一千名馬邊應設守備一員兵五百名仁懷縣應設守備一員

兵五百名。黔江、彭水二縣應設遊擊一員。中軍守備一員。兵一千名。巫山應設遊擊一員。中軍守備一員。兵一千名。重慶府應設城守副將一員。左右二營遊擊各一員。中軍守備各一員。兵二千名。合州應設守備一員。兵五百名。達州應設遊擊一員。中軍守備一員。兵一千名。大昌、大寧二縣應設遊擊一員。中軍守備一員。兵一千名。太平縣應設都司僉書一員。兵五百名。通巴應設守備一員。兵五百名。順慶府應設守備一員。兵三百名。廣元縣應於川北鎮標三營內撥發一營官兵駐防。其督標提標成都府城守副將松潘衛副將城守守備漳臘遊擊威茂叅將龍安叅將小河遊擊平番守備建昌鎮標遵義鎮標川北鎮標雲陽水師鎮標官兵俱應照舊通省經制合計兵四萬五千名。以馬二步八戰守各半定額從之。○庚辰兵部議叙廣東省將弁削平百峯古井等處功。得旨據稱將百峯古

井等處賊黨共擒斬四千有餘。多獲船隻器械。有功官員議加一等者著加二等。紀錄一次者著加一等。○辛巳戶部題山東六府旱災請敕巡撫確查分數照例蠲免。并支動臨清倉米麥四萬石。德州倉米麥二萬石。并見存庫銀六萬兩。及常平倉所存穀石賑濟。得旨每府著各推賢能滿官二員前往賑濟。務令親驗給散。勿得推委胥役肆行侵欺。如百姓有以遺漏具告者亦著親身審問給與俾得均沾實惠。毋致死亡離散。其被災地方著該督撫速察具奏。○陞遼東副都統達都為遼東將軍。○壬午雲南巡撫袁懋功疏報康熙三年分開墾荒地二千四百五十九頃。下部察核。五月丙戌朔○己丑以木恰為福陵總管。○辛卯戶部議覆湖廣總督張長庚疏言歸州巴東長陽興山房縣保康竹溪竹山等州縣久為巨逆盤踞。人民逃竄。今賊巢

已平。難民漸歸。願就耕種。苦無農器。請酌給牛種。聽其開墾。三年後起科。應如所請。從之。
○甲午。夏至。祭

地於

方澤。遣大學士蘇納海行禮。○乙未。四川總督李國英疏報。建昌番探跳梁。總兵王明德。遣官兵深入賊巢。剿平一十九寨。下部知之。○丁酉。定直隸各省總督。報災遲延。照巡撫處分例。○發山西布政司庫銀七萬三千餘兩。忻。崞等七州縣倉穀。命郎中孟古爾岱員外郎索泰。會同督撫。賑濟雲鎮三關飢民。○禮部遵旨議覆。一品以上大臣。刀帶撒袋鞍轡等項。酌量准用綠松石。寶石。珊瑚。四品以上官員。止許刀帶撒袋等項。酌量准用。三品以上官員。准其一人前引。六品以上官員。准其用踢胷。其餘槩行禁止。得旨。三品以上官。刀帶撒袋等物。准用綠松石。珊瑚。寶石。四品以上官。准用踢胷。其出兵處官兵用踢胷。各從

其便。餘如議。向來定例。未盡遵行。皆爾部未經嚴飭之故。以後著照此定例。通行嚴加申飭。如有違者。稽察處治。○戊戌。遣官祭

關聖帝君。○己亥。山東總督祖澤溥。以疾求解任。允之。○予故輔國公塔海。祭葬立碑如例。○辛丑。江南總督郎廷佐疏報。淮安鳳陽二府屬各州縣旱災。直隸巡撫王登聯疏報。大名府屬十一州縣旱災。俱命速發常平倉穀賑之。○壬寅。以故遵義侯鄭鳴駿子鄭纘成襲爵。○癸卯。以故三等阿思哈尼哈番珍初懇子瓦爾答襲職。○河南總督劉清泰。以疾求解任。允之。○免江寧左衛等十五衛。沿江坍荒田賦。俟招墾復熟起科。○陞叅領辛泰。為遼東副都統。叅領滿那。為寧古塔副都統。○甲辰。予故刑部侍郎李敬任祭葬如例。○乙巳。兵部議覆。平西王吳三桂疏言。水西烏蒙既平。滇省額兵應行裁汰。各營鎮共裁去兵七千二百名。內將一千八百名。存為廣

羅蒙景二鎮。雲州馬龍二營。添設之用。實裁去兵五千四百名。除總兵以下官另行改補外。實裁去官。副將一員。參將一員。遊擊一員。千總二員。把總四員。其忠勇等五營。悉行裁去。應如所請。從之。○丙午。先是禮部議欽天監。應添設滿洲官員。天文科。靈臺郎二員。漏刻科。挈壺正二員。回回科。博士二員。此三科。各添筆帖式二員。曆科。添五官正一員。俱選用精通滿漢字之人。其觀象臺。觀看天象。每日有天文科漢官一員。天文生五名。其添設滿官。毋庸議。奉旨。觀看天象。關係重大。應令滿官兼看。天文科滿官。應作何添設。著再議具奏。又天文科。見有天文生四十名。著添十名。一班用十人。一更著用二人。至是禮部會同吏部議奏。天文科。應再添滿官五員。共為七員。每日輪派滿漢官各一員。赴觀象臺。觀看天象。內四員。授為靈臺郎。三員。授為博士。從之。○廣東總督盧崇峻疏言。陣亡茅田司

巡檢党重瓚。應請予卹。禮部議。微員無予卹之例。應照康熙元年六月死難生員羅肇楨例。令該督撫給扁旌獎。從之。○丁未。議政王貝勒大臣。九卿科道會議。吏部題請裁并督撫一疏。得旨。湖廣。四川。福建。浙江。四省。仍各留總督一員。貴州總督裁并雲南。廣西總督裁并廣東。江西總督裁并江南。山西總督裁并陝西。直隸。山東。河南。設一總督。總管三省事。其鳳陽巡撫。寧夏巡撫。南贛巡撫。俱裁去。伊等應駐何地。著確議具奏。○戊申。免山東樂陵等十一州縣。康熙三年分旱災額賦。有差。○調鑲藍旗蒙古都統孫塔。為滿洲都統。○庚戌。平西王吳三桂疏言。水西初定。殘黎東作無資。請發軍前銀三萬兩。有奇。買牛種散給。并發軍前米一萬五千石。賑濟貧民。督令乘時耕種。從之。○辛亥。戶部議覆。山東巡撫周有德疏言。濟南。兗州。東昌。青州。四府旱災。麥田顆粒無收。登州。萊州。二府。麥田收十

分之二三秋禾亦間有布種。飢民不至如四府之甚。請將奉旨散賑銀六萬兩米六萬石盡發四府賑濟。其登萊二府止免本年額賦。應如所請。從之。○壬子。吏部議覆平西王吳三桂平定水西。請設流官一疏。水西地有十一則溪。應設三府。將隴勝的都朶你阿架。四則溪設為一府。建府治於比喇。將法戈火著木勝架勒。四則溪設為一府。建府治於大方。將以著則窩雄所。三則溪設為一府。建府治於水西城。原設分巡畢節道。應改為整飭三府分巡貴寧道。兼管永寧赤畢等衛。駐劄比喇。三府應各設知府一員。通判一員。經歷一員。司獄一員。儒學教授一員。內比喇再設推官一員。承理三府刑名大案。其三府應易新名。即令該藩擬定具題。從之。○以雲南廣羅總兵官趙良棟為貴州比喇總兵官。雲南忠勇右營總兵官劉之復為貴州大方總兵官。雲南忠勇前營總兵官李如碧為貴州水西

總兵官。雲南義勇中營總兵官王會為廣羅總兵官。忠勇後營總兵官塔新策為貴州定廣總兵官。貴州思南總兵官王平為安籠總兵官。○癸丑。戶部議覆平西王吳三桂疏言。偽總兵羅大順投誠。其原管地方應編入貴州新添衛。土田照例科糧。應如所請。從之。六月丙辰朔。以陞任福建總督朱昌祚為直隸山東河南三省總督。○丁巳。諭吏部兵部總督巡撫提督總兵等官。係文武官員表率。管理軍民錢穀刑名事務。責任重大。果能公忠體國。潔已愛民。不受賄賂。不聽囑託。嚴飭所屬各官各効公忠。共襄化理。則大小各官自應悔改。前非力圖修治。凡地丁錢糧俱係額徵。該管官妄行私派。及額外苛索。以致小民苦累至極。至於兵丁按月支餉。亦受侵剋之累。近者水旱災異。屢見兵民困苦。總由文武大小各官止圖利其身家。而於書吏衙役之肆行侵漁。并不能嚴禁所致。以後務須奉

公潔已。撫恤兵民。革除舊弊。以副委任之意。若仍不改前非。復蹈故轍。以致兵民不得其所。必從重治罪。○河南宣武衛世襲一等阿達哈哈番鄭勳國疏言。乞錄功臣後裔。敕部試用。兵部議。向無襲職入衛之員。自請叙用之例。不准所請。得旨。鄭勳國自願効力。著照所請行。又此等有世職官員。願効力者。爾部酌量具奏錄用。○陞鑲藍旗蒙古副都統誇岱為蒙古都統。○戊午。戶部議。山東濟南兗州。東昌青州。四府旱災十分。應照例蠲額賦十之三。登州萊州。二府旱災七八分。應照例蠲十之二。得旨。山東濟南等六府所屬地方。既已被災。將康熙四年分應徵錢糧俱著蠲免。張榜通行曉諭衆民。○又議。覆禮科給事中黏本盛條奏山東賑荒事宜。一。臨德二倉附近州縣發米賑給。其離倉遠者用庫銀賑給。一。酌定生監准貢條例。令生員俊秀富民等捐米備賑。一。州縣禁糴。以致衙役土棍借

端詐害。請敕地方官通糴便民。嚴禁蠹棍詐害。俱應如所請。得旨。生員等捐助銀米著停止。餘依議。○己未。改遼東將軍銜為鎮守奉天等處將軍。○庚申。陞河南南汝道劉景榮為江南按察使司按察使。○壬戌。吏部議覆福建總督李率奏疏言。漳汀地方遼濶。請以守漳道仍駐漳州。巡建道仍兼轄延平。守建道自建寧府改駐汀州。兼轄邵武。應如所請。從之。○戶部議覆浙江總督趙廷臣疏言。革職解任各官。本身見在者。應照例催回原籍。其官員已故。子孫或願留任所。及士民遷移他處。丁口田土。已附入他處版圖者。悉聽自便。應如所請。得旨。漢軍著速催回旗。餘依議。○乙丑。免湖廣西山軍前運餉人夫死亡者同居父兄弟。一年丁差。○丁卯。以偽永曆下偽荆國公王光興。自湖廣施州衛率領偽都督等官四百六十五員兵七千餘名家屬一萬餘人。傾心投誠。授左都督。加太子太

保。賞賚有差。○戊辰。免水西宣慰司額徵米二千石。俟設流府後。招墾成熟起科。○以兵部郎中土賴。為鑲藍旗蒙古副都統。○己巳。吏部遵旨議覆廣東廣西總督。應駐劄肇慶府。江南江西總督。應駐劄江寧府。直隸山東河南三省總督。應駐劄大名府。山西陝西總督。應駐劄西安府。其雲南貴州總督。駐劄之處。令平西王確議適中之地。具題到部再議。從之。○平西王吳三桂疏言。雲南省城迤東土酋王耀祖等。窺臣遠征水西。本年三月竊據新興。僭號大慶。謀犯省城。分遣賊黨王義齊正。陷易門。攻昆陽。河西。寧州。土酋祿昌賢陷寧州。攻江川。通海。宜良。窺澂江府。嶠峨縣。土酋祿益。陷嶠峨。偽開國公趙印。選攻彌勒。龍韜等。攻石屏。謀犯廣西。王朝李世藩等。攻臨安府城。滇南震動。總督卞三元。巡撫袁懋功。提督張國柱等。調兵分路剿捕。所至克捷。臣聞警回滇。四月初七日。擒王耀祖於新興。

破其巢大營城。進援易門。復其城。盡俘其黨王義等。分遣左都督何進忠等。敗賊於宜良縣之竹子山。復寧州。祿昌賢已先遁。總兵官王輔臣等。援彌勒。破賊木城九座。於彌勒城下擒趙印。選副都統高拱宸。復嶠峨。救出知縣孫衍慶等。總兵官趙得勝等。解石屏圍。龍韜敗去。總兵官嚴鎮。援臨安。土司李阿側。遣兵助戰。大敗王朝李世藩。臨安圍解。其餘州縣城池。俱獲保全。得旨嘉獎有功人員及土司李阿側。下部一并察叙。○丁丑。戶部議覆廣東總督盧崇峻疏。言異端僧道惑世耗民。請敕地方官。勒令還俗。使其開墾新荒。可以增朝廷粟米之供。昭戶口生聚之盛。況去此盡惑小民之術。則金錢不致耗散。查各省僧道等。既經給與度牒。應姑存留。此後應照前額定之數。府四十人。州三十人。縣二十人。其無度牒僧道。令各該府州縣官嚴查。照前定例治罪。至男女聚會。應通行嚴禁。得旨。無度

牒為僧道及男女聚會者著該地方官嚴行察拏。若仍前怠玩不拏。或科道糾參。或旁人出首。將該地方官一并從重治罪。餘依議。○庚辰諭戶部。前因山西大同太原及山東濟南等府地方旱災民饑。特將康熙四年應徵錢糧盡行蠲免。今思有司或以已徵在官者乘機肥己。使小民不沾實惠。亦未可知。著該督撫即嚴行各地方官。將康熙四年已徵在官錢糧按冊逐名盡行給還。其給還花名銀數明白造冊具奏。不得分釐侵扣。如有侵扣肥己情弊。督撫即行察參。督撫不行嚴察。或科道糾參。或地方民人首告。大小各官定行從重治罪。決不饒恕。其有已經解部者。或即抵來年錢糧。或動何項錢糧補給。爾部議奏。仍著地方官速刊告示通行曉諭。○辛巳戶部遵旨議覆山西山東蠲免錢糧內有已徵在官。或已解部者。若仍給還原戶。恐有奸胥侵扣之弊。應令該督撫詳查州縣糧冊。開明

糧戶姓名銀數具題。仍出示曉諭。准抵康熙五年錢糧。從之。○予故奉國將軍恩格祭葬如例。○兵部議直隸山東河南山西江西總督已經裁并。省城要地。不可無重兵彈壓。此五省提督駐劄地方。應請更定。直隸提督原駐大名府。今改駐河間府。山東提督原駐青州府。今改駐濟南府。河南提督原駐河南府。今改駐開封府。山西提督原駐平陽府。今改駐太原府。江西提督原駐建昌府。今改駐南昌府。其貴州提督應駐之處。行令平西王確議。廣東廣西省城雖無總督。廣州府有平南王兵。桂林府有征剿將軍。線國安兵。無庸更議。從之。○兵部又議。前江南江西廣東廣西雲南貴州設總督時。標兵各三千名。今江南江西總督廣東廣西總督雲南貴州總督應各仍舊標兵三千名。分立三營。陝西總督標兵原設五千名。分立五營。後裁去前後二營兵二千名。止設三營。今陝西總督兼管山西

地方遼濶。其標下應添兵爲四千名。仍立五營。直隸。山東。河南三省總督標下亦應設兵四千名。分立五營。其江西。山西。山東。河南。廣西。貴州。六省督標下副參遊守等員缺。俱應裁去。所裁官弁。令該督遇相當之缺題補。所裁兵丁。亦令該督於緊要地方選用。從之。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十六

監修總裁官光祿大夫太保兼太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙四年乙巳秋七月乙酉朔享

太廟遣都統喇哈達行禮○丙戌以科爾沁故和碩達爾漢巴圖爾親王滿珠習禮子和拖襲爵○丁亥貴州道御史田六善疏言銓部條例太繁有同一事而處分各異者請敕吏部釐定畫一成規以杜吏胥之弊得旨是例繁則事繁例簡則事簡應作何簡明之法吏部確議以聞尋議臣部條例繁多請逐一確定造冊進呈從之○予故延綏總兵官陳奇策祭葬如例○戊子予故多羅貝勒昌阿岱

祭葬。諡懷愍。○調京口左路水師總兵官石國璽。為浙江溫州總兵官。○辛卯。聘

皇后何舍里氏。行納米禮。○鑲黃旗漢軍都統劉之源。以年老乞休。得旨。劉之源自

太宗時。委任勤勞年久。著以原銜加太子太保致仕。○壬辰。貴州巡撫羅繪錦疏報。康熙三年。分貴州各府衛開墾田一萬二千九百餘畝。照例起科。下部知之。○癸巳。禮部題。欽天監衙門曆法通書十三本。丹書三本。易見通

書六本。并楊光先易見通書六本。內有洪範顛倒五行之書。應行查毀。從之。○甲午。以崇文門稅務歸順天府治中兼理。天津鈔關稅務歸天津道兼理。通州稅務歸通薊道兼理。居庸關稅務歸昌平道兼理。○乙未。貴州總督楊茂勲疏言。貴州一省。在萬山之中。苗蠻穴處。言語不通。不知理義。以睚眦為喜怒。以讐殺為尋常。治之道。不得不與中土異。凡有嘯聚刦殺侵犯地方者。自當發兵剿除。其

餘苗蠻在山箐之中。自相讐殺。未嘗侵犯地方。止須照舊例。令該管頭目。講明曲直。或願抵命。或願賠償牛羊人口。處置輸服。申報存案。蓋苗蠻重視貨物。輕視性命。只此分斷。已足創懲而漸摩日久。曲直分明。苗蠻亦必悔悟自新。不復爭殺。此兵不勞而坐安邊境之道也。下部議。○丙申。予故刑部尚書都統太子太保二等阿思哈尼哈番藍拜祭葬。如例。○丁酉。禁止民人私採人參。○湖廣巡撫劉

兆麒疏報。康熙元年。分湖廣各府開墾田地四千七百三十九頃。照例起科。下部知之。○

正黃旗精奇尼哈番鄭世襲疏言。微臣悔罪歸誠。乞賜母子完聚。得旨。鄭芝龍罪大正法。因將伊妻收養。鄭世襲知伊父之罪。既經投誠。其母顏氏。著給伊完聚。○己亥。中元節。遣

官祭

永陵。

福陵。

昭陵。

孝陵○平南王尚可喜疏言。廣東饒平總兵官吳六奇。老疾不能供職。

上念吳六奇有投誠防汛功。命其子吳啟豐。以

副將管廣東饒平總兵官事○庚子。諭兵部。

近來地方失事。盜賊遁逸。不能即獲。皆各地

方防汛官兵。不急追捕之故。以後盜賊事情。

地方官兵。一面速行追捕。一面馳報。於盜賊

所到地方。該地方官兵。亦即行追捕。接續前

報。務窮追盜賊踪跡。期於必獲。如以非其汛

地。不行追捕。或稽悞不行接續前報。及失事

地方官。遲延隱匿不報者。俱應分別處分。作

何定例。爾部嚴議具奏○辛丑。以原任廣東

肇慶總兵官侯襲爵。為江南京口左路水師

總兵官○壬寅。廣西總督屈盡美疏報官兵

剿平富恭。修荔。四縣強賊。下部知之○以潮

州。瓊州。廣州。海安等處水師。歸廣東提督統

轄○吏部議覆。貴州道御史田六善疏言。銓

法因缺少人多。守候甚苦。應令截留人員回

籍。俟有缺出。照數選補。應如所請。得旨。初授

各官。將年分在前者。減半截留。以次挨選。候

補官員。赴部投文改補者。亦如之。如單月缺

出。無候補之官。即補大選官員。餘員俱令回

籍。如出缺多。所留之人不足。即預行奏明。將

應選年分在前者。行文赴部候選。或所取人

員未到。懸缺無人可補。應將何項官員補授。

著明白定議具奏。其丁憂事故。患病亡故者。

令先期取結報部。仍將應選各官年分名字。

明白刊示。預行曉諭。若告示內有將在前者

遺漏。將在後之人選授。許其控告。此內或有

未妥。及壅滯之處。爾部仍明白具奏○癸卯。

予故三等阿思哈尼哈番席喇布。祭葬如例。

○甲辰。兵部議覆。三省總督朱昌祚疏言。直

隸督提二標。經制額兵各二千名。督標兵舊

駐河間府。提標兵舊駐大名府。今三省總督

駐北大名。提督改駐河間。若令標兵彼此更

調移駐恐攜帶家口擾累民間請免調兩標兵丁止換統轄之員應如所請從之○免江南徐州等十州縣本年分旱災額賦有差○丙午諭吏部順治十八年三月內定例凡各官經徵帶徵一應錢糧全完者該部准其開復咨吏兵二部照常陞轉其新年錢糧未經銷算者於本任內扣定若干月日錢糧分數令在本任全完方許赴新任若本任錢糧不完即赴新任許該撫按題參照例革職如撫按將所轄各官本任應徵分數不令全完即准赴新任者將該撫按治以朦蔽徇情之罪降二級調用此例雖經題定近見陞任官員有錢糧未完即赴新任者爾部並未將巡撫等官照此例處分殊屬不合本應將爾部議處念係已往之事姑從寬免其原定例內並未議及總督及巡鹽茶馬御史處分之例應作何處分著定議具奏○戊申兵部覆廣東總督盧興祖疏言粵東水師舊額戰兵一分

守兵二分當此海疆未靖之秋戰兵不得獨少應令戰守各半從之○己酉吏部題康熙三年分山西省額徵錢糧一年內全完請議叙巡撫等官得旨先以山西太原等處地方人民饑饉不預行奏請賑濟將督撫各官從重治罪時值頒赦從寬留任豈可仍以饑饉地方錢糧全完為功巡撫布政使俱不准加級太原等處饑饉地方官員亦不准紀錄其未曾饑饉地方官員仍照例紀錄○那思地方二十九索倫佐領溫察太朱朱虎等入貢貂皮給賞緞布等物有差○兵部覆四川總督李國英疏言慕義侯譚弘授川北總兵官查川北原有經制兵三千其譚弘原領食糧兵三千若盡帶至川北人衆路遙恐滋煩擾內將願往川北者聽補鎮標缺額其餘於就近營汛撥補從之○庚戌戶部議覆廣西道御史戈英疏言州縣每年設有輪值甲長凡催徵錢糧及衙門需用各項之費皆令甲長

承辦。獨江西省更有提甲之弊。既將現年甲長。追比各項銀兩。復提次甲為現年甲長。責成備辦禮物。廣信等府積弊尤甚。至有連提數甲不止者。累民已極。請敕該撫嚴禁。應如所請。從之。○壬子。戶部議覆長蘆巡鹽御史李粹然疏言。康熙四年東省旱災。現年錢糧。盡行蠲免。竈地同為被災之地。竈民同為應恤之民。請將本年竈課銀一萬四千八百餘兩。照例全免。應如所請。從之。○平西王吳三桂疏報。逆首祿昌賢。據大西山。隴菁馬耳山一帶地方。左都督何進忠等。分兵進剿。賊黨大潰。於四月二十日。直搗普蚌山。生擒祿昌賢之黨楊道生等。下部知之。

八月。甲寅朔。戶部議覆廣西巡撫金光祖疏言。粵西鹽引。舊額一萬三千四百九十有奇。但丁少民貧。無力行銷。請減存四千四百九十一引。以康熙三年分。見在丁口。均派定額。俟戶口繁盛。再議加增。應如所請。從之。○免

直隸開州等十一州縣。本年分旱災額賦有差。○平西王吳三桂疏報。本年四月。土酋那烈等。率賊數千。三攻元江府。知府潘士秀。遊擊武榮元等。督兵守禦。保全邊城。又五月內。總兵官馬維興等。進剿邛北。大挫克鋒。得旨嘉獎。下部察叙。○乙卯。遣官祭歷代帝王。○遣官祭城隍之神。○叙剿平湖廣茅麓山功。鑲黃旗都統一等阿達哈哈番。又一拖沙喇哈番穆里瑪。加一拜。他喇布勒哈番。又一拖沙喇哈番。授為一等阿思哈尼哈番。餘員加等授職有差。○予故拜他喇布勒哈番副都統杜忠。祭葬如例。○丁巳。遣大學士李蔚。祭

先師孔子。○戊午。祭大社。

大稷。遣大學士圖海行禮。○陞鑲黃旗漢軍副都統劉光。為都統。○陞山西冀寧道繆正心。為湖廣布政使。司右布政使。○予故一等精

奇尼哈番吳拜祭葬如例○兵部遵諭議覆失盜處分條例凡失主以被刦情由報附近地方官並駐防官兵有推諉不行接受或接受之官不速行接續前報及隱匿不報並以非其汛地不行追捕或追及盜賊仍致脫逃者均應革職至盜賊經過汛地該管官止趕出本汛界外不行窮追捕獲者降一級不親領官兵差委未弁追趕者降二級俱照舊管事該督提不將某官曾否馳報親身追趕及盜賊經過汛地有無窮追捕獲情由逐一分晰開明具題者後被查出應一并議處從之○偏沅巡撫周召南疏報康熙三年分湖南共墾荒田七千二百一十九頃照例起科下部知之○庚申江西總督張朝璘疏報吉安府龍泉縣安插閩廣流民男婦共一千四十一名口下部知之○廣東陽江縣地震有聲○刑部議覆寧古塔將軍巴海咨請寧古塔流徙民人內有嫁女旗下者應從其便惟本

身之妻子家屬不許賣與旗人得旨流徙人本身之妻子不許賣其家僕聽從主賣○壬戌

太宗文皇帝忌辰遣官祭

昭陵○甲子

太祖高皇帝忌辰遣官祭

福陵○丁卯以故三等精奇尼哈番喀爾圖凡

薩爾圖襲職○平南王尚可喜疏報蠶逆夥

黨竄據東涌海島遊擊佟養謨等調兵奮剿

生擒賊魁譚琳高殺賊一百五十三人招撫

男婦八十五名口又疏報蠶戶黃明初等駕

船聯黨在馬流門一帶接濟蠶逆糧米遣拖

沙喇哈番舒雲護等領兵搜剿擒斬賊黨四

百三十餘名俱下所司○戊辰秋分夕

月於西郊遣都統勒貝行禮○己巳諭禮部前

於順治五年九月內有旨纂修明史因缺少

天啟甲子丁卯兩年實錄及戊辰年以後事

蹟令內外衙門速查開送至今未行查送爾

部即再行內外各衙門將彼時所行事蹟及奏疏諭旨舊案俱著查送在內。部院委滿漢官員詳查在外。委該地方能幹官員詳查。如委之書吏下役。仍前因循了事。不行詳查。被旁人出首定行治罪。其官民之家。如有開載明爭時事之書。亦著送來。雖有忌諱之語。亦不治罪。爾部即作速傳諭行。○庚午。左都御史郝維訥疏言。犯贓人員。雖遇恩赦。止可援例免罪。不當復職另補。下部議行。○辛未。吏部以國子監滿祭酒員缺。請旨開列。命擇兼通滿漢字人員補授。○兵部議叙康熙二年進取金門廈門。康熙三年攻克銅山等處捷功。命加靖南王耿繼茂俸銀一千兩。賞海澄公黃梧大蟒貂裘鞍轡等物。加黃順等二十人為左都督。施琅等六人為右都督。陳斌等十一人為都督同知。黃英等十一人為都督僉事。總兵楊富以進援中傷落水復出授拜他喇布勒哈番。准襲二次。各將士加等授職。

有差。○兵部題精奇尼哈番蘇明呈請外補。請旨定奪。得旨。蘇明先以投誠之功。給與精奇尼哈番。又授為散秩大臣。寵眷已極。且凡內用之人。以外用者。皆係特頒諭旨。簡用。未有自行奏請之例。今求外用。向部中遞呈。殊為不合。著議處具奏。○壬申。兵部議。刑部咨送叅將員顯名等誣拏良民。於齋戒之期。用繩扭拷。應分別降罰。得旨。員顯名等將殺人罪犯。不行察拏。乃拏無辜之高二等三人。擅用非刑。令高二等招認。倘殺死劉壽之王大。事情未發。豈不將高二等無辜。坐以抵償之罪。況不許用非刑。奉旨甚明。員顯名等仍於齋戒之日。將高二等刑拷。令其招認。殊為可惡。爾部但議銷去加級紀錄。各照原任降二級調用。不合。著再議具奏。○甲戌。令直隸各省清查僧道尼姑。有無度牒。及寺廟住持人數。○吏部遵旨議覆。截留官員。照例挨次取選。但初選之官。傳其點卯。恐有詐冒規避。應

令初授各官。於單月初一日。親身赴部。投遞互結。以便稽查。至候補裁缺。改補。丁憂服滿。降調并革職。還職。降級。還級。各官。投文到部。俱隔一選。籤補。以杜規避。因該地方官已有印結。免其互結。臨補選時。照文到先後。挨次籤補。投文時。務令親身到部。其各項官員在京遇有丁憂亡故等項。取京官印結。預行投部扣選。至臨期以患病具結者。槩不准行。在外丁憂患病亡故者。該府州縣官速行查明報部。以便扣選。若不行預報。該督撫即指名題叅。如該督撫不行查出。亦治以疎忽之罪。從之。○雲南巡撫袁懋功疏言。滇省地勢高下。絕少平曠。量丈地畝。雖一州一邑。經年累月。難以報竣。請停止京官踏勘之差。從之。○乙亥。以原任副都統范達禮。為鑲黃旗漢軍副都統。精奇尼哈番孫承祖。為鑲白旗漢軍副都統。○丙子。以故一等精奇尼哈番吳拜子護軍叅領。即談襲職。○戶部議覆。江寧巡

撫韓世琦疏言。京口在城民房。除圈給駐防八旗官兵外。所存無幾。今投誠人員。安插京口。請以籍沒入官之房。令其居住。依士民公議。將房價輸官。軍民兩便。應如所請。得旨。投誠人員。既有入官房屋。安插居住。復於百姓收價。未合。著不必收價。○己卯。設奉天府學。照順天例。為京府學。考取生員七名。所屬錦縣。為大學。考取生員七名。遼陽。寧遠。海城。為中學。考取生員五名。蓋平。鐵嶺。廣寧。為小學。考取生員二名。錦州府為府學。考取生員四名。○庚辰。封和碩禮親王代善女為郡主。授其婿諾穆圖。為和碩額駙。○加陣亡二等阿思哈尼哈番副都統和布索。一等阿思哈尼哈番又一拖沙喇哈番。予祭葬如例。○辛巳。陞廣東駐防協領祖植椿。為廣東副都統。○添設盛京工部郎中一員。○壬午。以原任吏部左侍郎石申。為刑部左侍郎。管右侍郎事。○癸未。加湖廣陣亡一等阿達哈哈番桑圖。

拖沙喇哈番。郎中薩賽拖沙喇哈番。各予祭葬如例。○予故一等阿達哈哈番又一拖沙喇哈番鎮守奉天等處將軍吳庫立祭葬如例。

九月甲申朔。免陝西肅州衛所屬地方本年分旱災額賦。○湖廣巡撫劉兆麒疏言。均州南漳等州縣。向因賊踞。今地方新闢。俟人民復業。遂漸開墾。照例三年後起科。從之。○慕仁伯陳輝故。命其子陳一鵠。以阿思哈尼哈番品級食俸。○山西太原府地震。○己丑。福建總督李率奏疏報。水師右路總兵官杜永和。連破海寇。擒斬偽將烏角車等。下部知之。

○庚寅。以

大婚遣官祭告

天地。

太廟。

社稷。○是日。行大徵禮。○辛卯。

上大婚。陞太和殿。閱冊寶畢。授冊封使臣。捧冊

寶至

皇后第宣讀。冊文曰。朕惟乾坤德合。式隆化育之功。內外治成。聿懋雍和之用。典禮於斯而備。教化所由以興。咨爾何舍里氏。乃內大臣噶布喇之女也。世德鍾祥。崇勲啟秀。柔嘉成性。宜昭女教於六宮。貞靜持躬。應正母儀於萬國。茲仰承

太皇太后懿命。以冊寶立爾為皇后。其尚弘資孝養。克贊恭勤。茂本支奕葉之休。佐

宗廟維馨之祀。欽哉。

皇后謝恩訖。鑾儀衛陳儀仗車輅。鼓樂前導。

皇后由大清中門行御道。入中宮。

上具禮服。詣

太皇太后宮。

皇太后宮。行禮。還宮。行合卺禮畢。陞

太和殿。賜

皇后親屬及諸王百官筵宴。

皇太后詣

太皇太后宮筵宴。諸王以下。免行禮。公主王妃以下。免會宴。○壬辰。諭禮部。朕惟大化起於宮闈。至治先於敦睦。慶諧嘉禮。典備尊親。所以盡孝忱而修人紀也。朕祇承鴻緒。朝夕兢兢。恒惟

聖祖母昭聖慈壽恭簡安懿章慶敦惠太皇太后。暨

聖母仁憲皇太后。教育恩深。顯揚罔既。茲者遴選賢淑。作配朕躬。睦內治之既已得人。仰慈恩而罔抒報稱。宜宣昭聖德。丕著鴻章。應行典禮。擬議以聞。○是日。

皇后詣

太皇太后。

皇太后宮行朝見禮。○癸巳。

上御太和殿。王以下。文武各官。上表朝賀。○以大婚禮成。頒詔天下。詔曰。帝王承天立極。作民父母。使四海同倫。萬方向化。匪獨外治。蓋亦內德茂焉。故政教弘敷。肇先宮壺。所以共承

宗廟。助隆孝養。綿本支。睦九族。甚鉅典也。朕祇續鴻基。篤念倫紀。茲者

聖祖母昭聖慈壽恭簡安懿章慶敦惠太皇太后。深惟婚禮為天秩之原。王化之始。遴選賢淑。俾佐朕躬。正位中宮。以母儀天下。欽遵

慈命。虔告

天地

宗廟。於康熙四年九月初八日。冊立內大臣噶布喇之女何舍里氏為皇后。朕躬暨后。允修厥德。夙夜敬勤。期克紹於徽音。庶俾薄海內外。丕協倫常。洽被仁恩。聿臻上理。布告天下。咸使聞知。○加偏沅巡撫周召南。工部右侍郎。以勸墾荒地議叙也。○琉球國中山王尚質。遣使臣英長春等。進慶賀

登極禮物。并

世祖章皇帝品香一炷。宴賚如例。○丙申。

上詣

太皇太后

皇太后宮問安○免江南潁州太和等六州縣衛本年分旱災額賦有差○免陝西莊浪所屬黑城子地方本年分電災額賦○已亥免陝西臨洮衛地方本年分電災額賦○予湖廣陣亡阿達哈哈番孟額圖護軍叅領胡尼雅各祭葬如例○旌表靖南王藩下烈婦徐國英妻高氏年甫弱齡夫故之日慷慨捐軀節烈可風給銀建坊如例○庚子分廣東省廣州新會新安廣海香山等各營作五路統轄三水龍門從化增城順德等營屬廣州城守都司統轄新寧營屬新會遊擊統轄東莞大鵬二營屬新安遊擊統轄那扶營屬廣海叅將兼轄香山營因無附汛自立為一營從總督盧興祖請也○慕化伯陳豹故命其子陳士弘以阿思哈尼哈番品級食俸○辛丑上詣

太皇太后

皇太后宮問安○壬寅免陝西河州梨子里地

方本年分水災額賦○予湖廣陣亡拖沙喇哈番塞音圖祭葬如例○甲辰免直隸滄州等六州縣本年分旱災額賦有差○乙巳禮部題請頒各省慶賀

太皇太后

皇太后加上徽號及

太皇太后

皇太后聖壽節

皇上萬壽節元旦節表文式從之○丁未以上

太皇太后

皇太后徽號遣官祭告

天地

太廟

社稷○

上詣

太皇太后宮恭上

太皇太后奏言恭惟

聖祖母昭聖慈壽恭簡安懿章慶敦惠太皇太

后德備安貞。道符厚載。臣續膺丕緒。祇佩貽謀。深惟訓育之恩。莫罄顯揚之悃。乃承懿命。式叶好述。嘉禮既成。鴻章聿舉。爰考彝典。敬進徽稱。伏祈

垂慈俞鑒。俾展微忱。衍胤祚於無疆。合臣民而並戴。○詣

皇太后宮恭上

皇太后奏言恭惟

聖母仁憲皇太后。性秉慈仁。德含淵靜。臣仰承懿訓。式叶好述。嘉禮既成。鴻章聿舉。爰考彝典。敬進典。敬進

徽稱。伏祈

垂慈俯允。俾展微忱。衍胤祚於無疆。合臣民而並戴。○戊申。

上率諸王文武羣臣恭奉冊寶。上

太皇太后尊號。冊文曰。恭惟

聖祖母太皇太后。肇修內政。基風化之大源。隆上

徽稱。著貽謀之有本。歡騰朝野。慶溢遐邇。欽惟聖祖母昭聖慈壽恭簡安懿章慶敦惠太皇太后。純德安貞。至仁厚載。恭勤佐治。贊

皇祖以式。關丕基。聖善垂庥。啟

皇考以恢弘大業。顧眇躬之續承統緒。賴懿訓而期致太平。爰及嘉禮之成。宜進尊崇之典。謹告

天地。

宗廟。

社稷。率諸王貝勒文武羣臣恭奉冊寶。加上徽號曰。

昭聖慈壽恭簡安懿章慶敦惠溫莊太皇太后。伏願慈恩益溥。介祉彌增。合四海之懽心。長欣怙戴。庇萬年之胤祚。茂衍昌隆。臣不勝惓惓之至。寶文曰。

昭聖慈壽恭簡安懿章慶敦惠溫莊太皇太后之寶。○恭奉冊寶。上

皇太后尊號。冊文曰。恭惟

聖母皇太后。本支昌盛。邇厚德於坤儀。海宇雍和。發休聲於內則。宮闈胥慶。朝野翔懼。欽惟

聖母仁憲皇太后。性篤溫恭。化彰儉約。襄

皇考以治內。儆戒不遑。訓眇躬以寧民。思勤備至。茲行嘉慶之禮。宜宏聖善之稱。謹告

天地。

宗廟。

社稷。率諸王貝勒。文武羣臣。恭奉冊寶。加上

徽號曰。

仁憲恪順皇太后。伏願長凝介祉。永錫壽祺。德音似續於千秋。陰教欽崇於四海。臣不勝惓惓之至。寶文曰。

仁憲恪順皇太后之寶。○已酉。以加上

太皇太后。

皇太后徽號。禮成。頒詔天下。詔曰。朕惟帝王撫有四海。必首隆孝治。以端教化之源。是以子孫相承。而衍慶於奕葉也。欽惟我

聖祖母昭聖慈壽恭簡安懿章慶敦惠太皇太

后。佐

皇祖太宗文皇帝。肇興大業。啟

皇考世祖章皇帝。式廓弘圖。

聖母仁憲皇太后。克嗣徽音。母儀茂著。朕續膺

丕緒。夙夜兢兢。仰荷慈闈。並弘訓育。茲者遴

選賢淑。作配朕躬。屬當嘉禮之成。宜進尊稱之典。謹告

天地。

宗廟。

社稷。於康熙四年九月二十五日。率諸王貝勒。文武羣臣。恭奉冊寶。加上

聖祖母昭聖慈壽恭簡安懿章慶敦惠太皇太后徽號曰。

昭聖慈壽恭簡安懿章慶敦惠溫莊太皇太后。聖母仁憲皇太后徽號曰。

仁憲恪順皇太后。崇兩宮之顯號。洽萬國之歡心。於戲。祉貽孫子。宏昭式穀之源。禮備尊親。

大錫覃恩之典。布告中外。咸使聞知。○詔內

恩欸五條○諭戶部工部各省鈔關之設原期通商利民以資國用非欲其額外多徵擾害地方近聞各處收稅官員希圖肥己任用積蠹地棍通同作弊巧立名色另設戥秤於定額之外恣意多索或指稱漏稅妄掣過往商民挾詐或將民間日用瑣細之物及衣服等類原不抽稅者亦違例收稅或商賈已經報稅不令過關故意遲延措勒遂其貪心乃已此等弊端甚多難以枚舉違背國法擾害商民殊為可惡嗣後凡地方收稅官員俱著洗心滌慮恪遵法紀務期商賈通便地方相安如有前項情弊在內著科道官在外著該督撫嚴察叅奏從重治罪如該督撫不行叅奏別經首發即治該督撫以徇縱之罪爾部即遵諭通行嚴飭特諭○庚戌

孝慈高皇后忌辰遣官祭

福陵○辛亥

上詣

太皇太后宮問安○壬子免陝西蘭州本年分旱災額賦有差

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十七

監修總裁官光祿大夫太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙四年乙巳冬十月癸丑朔享

實錄卷十七

太廟

上親詣行禮○遣官祭

永陵

福陵

昭陵

孝陵○頒康熙五年時憲曆○以喀爾喀台吉

都西希雅布阿爾納噶爾瑪兄弟三人率衆

二千餘人投誠封都西希雅布爲固山貝子

授阿爾納噶爾瑪俱爲一等台吉○乙卯

皇太后聖壽節遵

懿旨免行禮○丁巳裁廣東廣州衛廣海衛香

山所新寧所大鵬所守備千總等缺○庚申

以戶部郎中梁儒爲江南按察使司僉事提

調學政○壬戌免河南安陽湯陰林縣淇縣

本年分水災額賦有差○喀爾喀車臣汗遣

使進九白年貢宴賚如例○癸亥

上詣

太皇太后

實錄卷十七

皇太后宮問安○是日

上幸南苑行圍○免陝西狄道縣本年分水災

額賦有差○丙寅以故三等阿思哈尼哈番

席喇布子格鈕孫襲職○己巳予故原任工

部侍郎李呈祥都督同知溫州總兵官張承

恩各祭葬如例○山東道御史顧如華疏言

伏讀

上諭禮部廣搜前明天啟以後事蹟以備纂修

明史誠盛典也查明史舊有刊本尚非欽定

之書。且天啟以後。文籍殘燬。苟非廣搜稗史。何以考訂無遺。如三朝要典。同時尚論錄。樵史。兩朝崇信錄。頌天臚筆。及世族大家之紀錄。高年逸叟之傳聞。俱宜採訪。以備考訂。至於開設史局。尤宜擇詞臣博雅者。兼廣徵海內弘通之士。同事纂輯。然後上之滿漢總裁。以決去取。纂成全書。進呈。

御覽。以成一代信史。章下所司。○顧如華又疏言。近見楚省屢報水災。以地稱澤國。向恃長

實錄卷十七

三

隄。以資捍禦。今荆襄一帶。隄防潰決。雖朝廷沛蠲恤之仁。而生靈終遭沉溺之害。請嚴飭督撫。責成有司。查邊近江漢舊隄。及時修築。并入考成例。定其官箴。怠緩草率者。依律治罪。亦備荒之急務也。得旨。修築隄防。上官不親身驗看。率委微員。任其怠忽。以致潰決。下部確議。○壬申。命廣東協鎮將軍沈永忠。自肇慶府移駐省城。○甲戌。上自南苑回宮。詣

太皇太后

皇太后宮問安。○禮部題。今後每年元旦直隸各省官員。照例應進

皇后箋文。至

皇后千秋所進箋文。

世祖章皇帝時。未經齋進。無式可查。恭候上裁。得旨。元旦箋文。依議行。千秋進箋。

世祖章皇帝時。既未舉行。著停止。○准吳蘇路

烏喇居住滿朱納等進貢貂皮。照格依克勒

實錄卷十七

四

姓庫里哈等例。在寧古塔交納。○贈故少傅兼太子太傅左都督廣東饒平總兵官吳六奇。少師兼太子太師。予祭葬。諡順恪。○丙子。裁古北口抽分差。歸并密雲縣管理。○丁丑。封故多羅貝勒昌阿岱子星尼。為固山貝子。○戊時。湖廣常德府地震有聲。○戊寅。靖南王耿繼茂。疏辭新恩加俸。得旨。覽王奏。以國用浩繁。堅辭加俸。具見體國之誠。但係酬王征剿海寇功績。不必控辭。○己卯。福建道御

史李宗孔疏言我

皇上改八法之條。以五等為殿最。嗣因奉行不善。停止考滿。一槩序俸。臣謂考滿可停。而勸懲大典。不可不行。查見行事例。惟重緝逃人。完舊欠兩事。天下之大。有逃欠者。十不及一。彼無逃無欠地方官。雖有操守才幹。不為表揚。為民牧者。孰肯潔已自振乎。至叅奏止將衰老微員塞責。

上諭已極嚴明。諸臣未見仰體。請敕各省督撫。

實錄卷一七

王

據實舉劾。清勤實著者。亟為薦舉。以示風勵。貪惡敗類者。即為糾叅。以警無良。庶考滿雖停。而朝廷賞罰仍嚴。於吏治民生。大有裨益。下部議。○庚辰。浙江總督趙廷臣疏報鄭逆下偽左都督朱英。自澎湖率眾投誠。下部議叙。○辛巳。

上詣

太皇太后宮。問安。○刑部遵旨議覆。嗣後除在京朝審人犯。照舊例遵行外。直隸各省秋決。

人犯。該督撫亦照例於霜降以前。審明具題。至霜降以後。冬至以前。續到者。該督撫於文到日。即陸續審明具題。內有可疑者。臣部核議。請旨減釋。其情實應決人犯。具題在冬至以前。照例行刑。如已過冬至。該督撫題明。仍行監候。俟次年秋審。從之。○壬午。免江南江都縣。本年分水災額賦十之三。十一月。癸未朔。

上詣

實錄卷一七

六

太皇太后

皇太后宮。問安。○丁亥。陝西義民楊德。王班等。置立義塚。收瘞明末流賊傷殘暴骸。事聞。命給匾旌獎。○授四川投誠副將陳建。為總兵官。以逆賊高承恩下同時投誠之郝承裔。復叛。陳建誓死不從。隨大兵擒賊有功也。○戊子。免直隸永年等七縣。本年分水災額賦。仍命發常平倉粟賑濟災黎。○己丑。廣東高雷總兵官高進庫。以老病乞休。允之。○吏部等。

衙門議覆貴州道御史田六善條奏留任事
多難行請嚴處分之法一疏查外吏陞轉俱
歷俸數年無錢糧盜賊等案始准陞補至陞
補之後報有未完錢糧盜賊等案者多係擇
缺規避蓋陞補之缺本官雖在遠方不出兩
月必從邸報得知請嗣後官員於陞補後報
錢糧盜賊等案者必開明月日如將兩月前
事隱匿不報陞後方報者即以規避例革職
其邸報未到時所起之案或邸報到後忽起

官錢八十二

之案該員仍留原任勒限一年完結將項補
伊缺新官撤回所陞之缺另補若完仍令解
任候前所得之缺出方行補用限內不能完
照例以原任降三級調用丁憂官員有未完
錢糧盜賊等案限三月完結以原官准其丁
憂踰限不完照原任降三級調用准其丁憂
未完事件責令新官督結其告老告病官員
有未完錢糧盜賊等案亦勒令三月完結如
踰限不能完結降項帶三級係錢糧照分數

追銀其事件責令新官督結其從前陞任官
員因錢糧盜賊等案留原任今已經題報全
完者應令赴部改補至於陞授之官吏部照
例詳查伊任內無虧欠錢糧督緝盜案者始
行陞轉自不至有僥倖陞遷之弊應通行直
隸各省督撫遵行可也得旨官員陞補後報
有錢糧盜案不必以兩月得知邸報立限陞
補之前所起錢糧盜賊等案兩月以內者仍
留任限一年督結兩月以外者即照規避例
處分至於陞補後所起之案未經交代新官
自應本官督結不必另行定例丁憂官員未
完錢糧盜賊等案著即在任守制完結如服
未滿事件完結該督撫題明補缺後仍令回
籍丁憂老病官員未完等案不必勒限及照
分數追銀著即革職其未完事件責令新官
完結餘如議行○庚寅

上詣

太皇太后宮問安○免浙江安吉等八州縣及

湖州一所。本年分水災額賦有差。○壬辰。免江南山陽霍邱二縣。本年分水災額賦有差。○癸巳。免陝西河州衛。本年分水災額賦有差。○甲午。喀爾喀土謝圖汗。遣使進九白年貢。宴賚如例。○丁酉。冬至。祀

天於

園丘。

上親詣行禮。○遣官祭

永陵。

福陵。

昭陵。

孝陵。○戊戌。

上御太和殿。王以下文武各官。上表朝賀。○免河南武安縣。本年分水災額賦。○吏部議。原任鳳陽巡撫張尚賢。失察。原任揚州府推官王士正。任內未完贖銀兩。應降二級調用。從之。○授四川逆賊賀珍下投誠偽總兵賀福全等八員。為副將。偽署總兵王繼祖等二

十四員。為參將。偽參將李進忠等十五員。為遊擊。偽遊擊崔一祿等八員。為都司。僉書。偽都司向正吉等二十二員。為守備。偽守備蒲加隆等三員。為守禦所千總。並給全俸。賞賚有差。○己亥。

上詣

太皇太后

皇太后宮問安。○庚子。以原任襄陽總兵官于大海。為廣東高雷總兵官。○喀爾喀戴青台

吉。遣使進九白年貢。宴賚如例。○壬寅。授鄭逆下投誠偽左都督朱英。為左都督。偽都督僉事翁賁。金興。黃榮。劉進。偽總兵陳綺。朱忠。張朝紘。並都督僉事。偽副將吳宏。劉雄。偽參將朱顯龍。偽遊擊劉揚等。如其原銜。並給全俸。賞賚有差。○乙巳。吏部議覆。福建道御史李宗孔條奏。既停外官考滿之法。宜嚴督撫舉劾之典。一疏。查薦舉已經停止。若復舉行。則事體繁雜。臺臣所請。每歲督撫薦舉之處。

應無庸議。至地方官有大貪大惡者。許令不時糾參。得旨依議。近日督撫止將衰老微員糾參塞責。未見有大貪極惡奏聞者。豈所屬果無其人。皆由上官徇庇故也。嗣後有大貪大惡害民之官。責令督撫指名糾參。有仍前徇庇者。一併從重治罪。○丙午。

上詣

太皇太后宮。問安。○丁未。刑部遵旨議覆。凡解部流徙入官人犯。已有定限。應照例遵行。以後在外省流遣人犯。以臣部移咨該省督撫文到之日。計限一月。即行起解發遣。若三千里。限二月。二千五百里。限五十日。二千里。限四十日。俱限內至發遣處。所其軍犯亦限一日行五十里。如流徙充軍人犯。所追贓甚多。限內不能追完。起解該督撫先行題明。其該地方官違限遲延不起解。并押解犯人衙役限內不能解到所定處所。中途遲延者。該督撫將遲延不起解該官員。并路途違限遲延。

押解之衙役。指名題參。從重治罪。從之。○又議覆河南道御史蕭震條奏。請禁遠年之控。辦以清煩瀆一疏。嗣後凡官民將順治十七年以前已結之案。稱係冤枉。在部院督撫處控辦者。一槩不與准理。若叩閭者所告之事。不准仍照例治罪。其劣衿奸民。妄言國家大政事。藉公濟私。希圖錄用者。論如律。見在部院控告行查者。俟到日。查係順治十七年以前已結之案。亦應不行准理。從之。○戊申。吏部議覆江南江西總督郎廷佐疏。言鳳陽巡撫缺。已經奉旨裁去。其所屬廬鳳二府。滁州和州。請分隸安徽巡撫管理。淮揚二府。及徐州。請分隸江寧巡撫管理。應如所請。從之。○庚戌。免江西南昌等四十二州縣本年分旱災額賦。有差。

十二月壬子朔。諭吏部等衙門。總督巡撫。皆係倚任重臣。必秉公清正。為下官表率。使民生得所。方副倚任之意。乃督撫反以餽送禮。

物為常例。稱某州縣上等。某州縣下等。按定數目。公然收受。州縣官員。俱自民間派取。以致百姓困窮。嗣後各督撫。如再不改此等弊端。仍然踵行。著科道官採訪。指名糾參。定行從重治罪。若司道府廳各官。仍取之州縣。州縣各官。仍私派百姓者。著督撫不時嚴察。奏。若徇情不行。奏。經科道官糾參。或旁人出首。將不糾參之督撫。一併從重治罪。爾部院通行直隸各省。曉諭。○轉山西右布政使金鉉。為江南布政使司左布政使。陞江南蘇松常道安世鼎。為福建按察使司按察使。廣東嶺西道佟養鉅。為廣東按察使司按察使。○癸丑。予故原任都察院左副都御史劉漢儒。祭葬如例。○甲寅。降封富達禮為奉恩將軍。以其父鎮國將軍羅託得罪故也。○丙辰。予故一等精奇尼哈番祖澤洪。祭葬如例。○丁巳。予故都統一等阿思哈尼哈番又一拖沙喇哈番孫塔祭葬。諡忠襄。○己未。諭禮部

本朝定鼎以來。故明朱氏宗族歸順。有官品者。給與房地。奴僕俸祿恩養。無官品者。俱照民人歸農。令其得所。其故明各帝陵墓。

世祖章皇帝有旨。設人看守。以時祭祀不絕。此皆昭示恩養寬仁之意。近有朱氏無知之徒。改易姓名。隱藏逃避。致生事端。被人訐告。既累本身。又負國家恩養。爾部行文直隸各省督撫。刊示曉諭。如朱氏宗族改易姓名。隱藏逃避者。俱令回籍。各安生理。勿仍前疑懼。有負朕浩蕩之恩。爾部即通行傳諭。○庚申。兵部議授海逆張煌言下投誠偽左都督阮美周家政。以副將職銜。得旨。阮美周家政率眾倡先效順。著以總兵官用。○以固山貝子溫齊為鑲藍旗滿洲都統。○辛酉。禮部議覆奉天府府尹佟弘器疏。言盛京文武官員。每月逢五日期。應各穿朝服齊集大政殿坐班。遇

萬壽元旦等節。奉天錦州二府屬州縣俱應照

直隸各省州縣例。各設龍亭儀仗官員穿朝服行禮。從之。○癸亥。免湖南益陽等二十五州縣衛本年分旱災額賦有差。○丙寅。

上詣

太皇太后

皇太后宮問安。○予故原任通政使司通政使晉淑軾祭葬如例。○免廣西臨桂等五州縣本年分旱災額賦有差。○免陝西鎮原等三州縣本年分電災額賦有差。○丁卯。諭兵部。

近見各省奏報。凡有賊寇。用兵撲剿。皆係千把總等官領兵前往提督。總兵。副將。叅將。遊擊等官率兵前往者甚少。我朝向來用兵。皆由主帥躬親戰陣指授。故能戰勝攻取。所向無不克捷。今直隸各省提鎮等官。凡遇寇警。不親身領兵前往。差委未弁。此係相沿故明陋習。貽誤地方。自圖安逸。以後凡有寇警。該省駐防將軍提督總兵等官。務須相酌機宜。親往剿滅。如仍前規避偷安。差委未弁充數。

致誤軍機。必從重治罪。爾部即通行嚴飭。○戊辰。

皇后千秋節。停止行禮。○庚午。江南江西總督郎廷佐疏報。溧陽縣民顧起龍等。獲玉璽篆文人心。惟危。道心惟微。惟精惟一。允執厥中。十六字遺官齋進。命收貯內庫。賞顧起龍等銀各五十兩。齋璽筆帖式三員。各馬一匹。○癸酉。

上詣

太皇太后宮問安。○甲戌。以故三等阿思哈尼哈番朱孔額子尹圖襲職。○乙亥。轉工部右侍郎杜篤祐為左侍郎。以原任禮部右侍郎楊運昌為工部右侍郎。○廣東將軍公沈永忠。以年老乞休。允之。○丁丑。以故一等阿思哈尼哈番又一拖沙喇哈番孫塔子馬錫泰襲職。○己卯。免直隸霸州等三十七州縣衛本年分水災額賦有差。○兵部議覆廣東鎮海將軍王國光奏報。鄭逆賊夥向泊銅山炫。

鐘等處後駕船七十餘隻。衝入甲子所港口。挽泊一疏。得旨設立水師提督總兵官等原為防禦海寇。今福建銅山。炫鐘等處。賊船挽泊。提鎮官等並未帶領官兵撲剿。至賊船飄往廣東。並未跟踪追殺。又不預檄廣東各官。在前截殺。後賊船直衝入甲子所港口。挽泊。廣東水師各官亦未迎截。如此。則設立水師提督何用。以後賊船再至。提鎮官如不親領官兵撲滅。賊遁不跟踪追剿。及不預檄附近省分截殺。仍沿舊習。若罔聞知。定行治罪。

庚辰歲暮。裕祭。

太廟。

上親詣行禮。○遣官祭。

永陵。

福陵。

昭陵。

孝陵。○遣官祭太歲之神。○辛巳。

上詣。

太皇太后

皇太后宮。問安。○順天府進春。○旌表八旗節婦。滿洲滿代妻三氏等十五人。漢軍劉光漢妻李氏等二人。烈婦滿洲貴連妻溫氏等五人。蒙古錫拉代妻那氏一人。各給銀建坊如例。○是歲。人丁戶口。一千九百三十一萬二千一百一十八。田地。山。蕩。畦地。五百三十八萬一千四百三十七頃五十四畝。徵銀二千五百八十一萬六千九百八十五兩有奇。米。粟。麥。六百一十五萬六千七百六十五石有奇。草。二百二十九萬四千五百六十三束。茶。十五萬八千三百四十七引。行鹽四百三十二萬六千二百五十二引。徵課銀二百七十五萬一千二百四十三兩有奇。鑄錢二萬九千八百六十五萬二千四百有奇。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之十七

實錄卷十七

二十九

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之十八

監修總裁官光祿大夫太僕寺卿太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙五年丙午春正月壬午朔

實錄卷十八

二

上詣

堂子行禮還宮拜神畢率諸王貝勒貝子公內
大臣大學士都統尚書精奇尼哈番侍衛等
詣

太皇太后

皇太后宮行禮御殿王以下文武各官外藩王
及使臣等上表朝賀停止筵宴○朝鮮國王
李捌遣陪臣金佐明等表賀冬至元旦
萬壽節及進歲貢禮物宴賚如例○丙戌

上詣

太皇太后

皇太后宮問安○戊子。

世祖章皇帝忌辰。遣官祭

孝陵○賜朝正外藩王貝勒貝子公台吉等銀

幣鞍馬有差○庚寅。以廣東旱災。命動交通

省。見在積穀六萬八千二百餘石。散賑○平

西王吳三桂疏言雲南省諸土酋祿昌賢等

作亂。臣同總督卞三元提督張國柱等分兵

實錄卷十八

二

進剿。平賊寨數十處。遠近蠻獠聞風潛伏。滇

南大定得旨嘉獎。下部議叙○辛卯。孟春。享

太廟。遣都統覺羅巴哈納行禮○遣官祭太歲

之神○壬辰。

上詣

太皇太后

皇太后宮問安○癸巳。免江南長洲等十一州

縣康熙四年分水災額賦有差○予故原任

河南總督兵部尚書兼都察院右副都御史

拜他喇布勒哈番劉清泰祭葬如例○河道

總督朱之錫奏銷康熙三年歲修錢糧得旨

運河關係國家漕糧。水淺則疏濬。水大則預

為堵築。始稱盡職。今據奏修理河工。所用錢

糧。以數萬計。乃於去年旱時。以水淺船不能

行具奏。後又以水溢隄決。船不能行具奏。則

前此修理者何處。原以朱之錫才堪任用。畀

此重任。今並未躬親嚴察。但草率委之屬官。

殊負簡任之意。如果親到工所。率領屬員。力

實錄卷十八

一

加堅修。豈至於淺阻衝決。本應從重議處。念

係已往之事。姑從寬免○甲午。授和碩承澤

親王碩色庶出子恩克布和碩簡親王濟度

庶出子墨美輔國公噶播拉之子泰布俱為

三等輔國將軍○丙申。

上詣

太皇太后宮問安○先是八旗地土各照左右

翼次序分給。時因睿親王多爾袞欲住永平

府。故將鑲黃旗應得之地。給與正白旗。而給

鑲黃旗地於右翼之末。保定府河間府涿州等處三十餘年旗民已各安其業。至是輔臣鰲拜與蘇克薩哈雖連姻婭。每以論事相爭而成隙。且鰲拜鑲黃旗人。蘇克薩哈正白旗人。而鑲黃旗應得之地。為正白旗所占。鰲拜故立意更換。索尼亦素惡蘇克薩哈。遇必隆不能自異。因共附和之。鰲拜遂使八旗以地土不堪呈請更換。移送戶部。戶部尚書蘇納海等奏。地土分撥已久。且康熙三年奉有民間地土不許再圖之旨。不便更換。請將八旗移文駁回。疏入。輔臣等欲構成其罪。稱旨著議政王貝勒大臣九卿科道會議以聞。○戊戌。予故廣西總督兵部右侍郎兼都察院右副都御史于時躍祭葬如例。○以原任江西右布政使王庭為山西布政使。司右布政使。○庚子。兵部議協鎮廣東將軍沈永忠以老病解任。所轄兵一千名應撤回京。從之。○辛丑。諭戶部。近聞內外奸棍違禁妄稱顯要名

色招搖肆行於各處貿易馬匹緞匹及各項貨物河路霸佔船隻關津恃強妄為此皆該管官瞻徇容留疎忽怠玩所致。以後如有此等奸棍仍前指稱王貝勒輔政大臣及內外大臣名色招搖肆行者。地方官必嚴察拏獲送部從重治罪。如地方各官仍踵故轍瞻徇怠玩不行緝捕或別經發覺或旁人出首將其貿易經過地方不行緝捕官從重治罪。兩部即通行嚴飭。○壬寅。和碩康親王傑書等議覆沙壓水淹地十五萬四千晌有奇。該佐領未經踏勘難以懸議。應差部臣前往踏勘明白造冊再議。疏入。輔臣等稱旨踏勘地畝事情重大。著八旗滿洲蒙古漢軍都統戶部滿漢尚書及滿侍郎一員都察院左都御史及滿左副都御史一員六科給事中或滿或漢每科各一員往勘具奏。○癸卯。

上詣

太皇太后

皇太后宮問安○丙午。免直隸無極縣戶。熙四年分水災額賦十之三○丁未。福建總督李率泰遺疏言。閩海餘氛遠竄。臺灣奉旨撤兵。與民休息。洵為至計。惟是將衆兵繁。若撤之太驟。不無驚惶。太遲。又恐貽患。目下當安反側之心。日久務防難制之勢。紅毛夾板船。雖已回國。然而往來頻仍。異時恐生釁端。閩省兵馬錢糧。專望協餉。倘若外解不周。即有意外之虞。至數年以來。海禁甚嚴。遷移之民。盡失故業。宜畧寬界限。俾獲耕漁。稍甦殘喘。得旨。李率泰原以才能蒙

世祖章皇帝特簡浙閩總督。自任總督以來。克副簡任之意。殫力報効。剿撫賊寇。多建功績。且忠清素著。正資調度料理。今以久任嚴疆。積勞病殞。深可憫惻。應得卹典。著察例具奏。餘著該部議奏○戊申。

上詣

太皇太后

皇太后宮問安○平西王吳三桂疏言。雲南逆東逆首。悉已擒戮。惟王朔黨王伯。王龍等。李成林黨李六九。李伯牛等。或竄匿深箐。或逃奔交趾。臣遣右都統吳國貴。總兵官馬寧等。分路搜剿。今俱就誅擒。各路官兵。並撤回汛。下部察叙○己酉。以原任江西總督張朝璘為福建總督

二月壬子朔。吏部都察院議覆湖廣道御史李之芳疏言。今考滿已經停止。其各部院官有才力不及。不稱職者。請敕各堂官嚴察題參。如徇情故縱。一并治罪。應如所請。從之○正藍旗都統輔國公穆瑛。以疾乞解任。允之○以上司安坤故地。比喇為平遠府。大方為大定府。水西為黔西府。改比喇鎮為平遠鎮。調雲南曲尋武霑總兵官劉文進為平遠總兵官○癸丑。免河南虞城等三縣。湖廣沔陽潛江等六州縣。及沔陽一衛。康熙四年分水災額賦有差○增設雲南開化鎮總兵官裁

忠勇中營總兵官缺。所屬官兵歸并開化鎮統轄。以原任忠勇左營總兵官高啟隆為開化總兵官。調忠勇中營總兵官馬寶為曲尋武甯總兵官。○甲寅。

上詣

太皇太后

皇太后宮問安。○吏部議覆。平西王吳三桂疏言貴州總督舊駐安順。雲南總督舊駐曲靖。今并為雲貴總督。宜駐貴陽。應如所請。從之。

○丙辰。禮科給事中粘本盛疏言舊例。急選行於單月。而推陞大選。行於雙月。其所出之缺。大選得八。推陞得二。蓋以大選之人。加倍於推陞。故得缺多。而急選之人。有開復還職。丁憂起復。降補等項。故獨占單月。均不致壅滯。乃今見行例。單月所出之缺。歸之推陞一項。雙月所出之缺。歸之急選大選兩項。則是人數少者。偏得缺多。而人數多者。偏得缺少。此急選大選壅滯之由也。臣愚以為推陞急

選大選。似宜截日均分。如推陞在單月者。應止分二十日。急選大選在雙月者。應各分二十日。如值急選人少。餘缺仍歸大選。參酌新舊例之中。定一經久可行之法。務期彼此均停。免選官守候之苦。庶銓政公平。即選法亦稍為之疏通也。伏乞敕部詳加酌議。以垂永久。得旨。凡補授官員。必使人缺相當。無致壅滯。或缺少人多。終身無見用之日。殊非良法。以後一切員缺。務酌人缺多少。俾獲均平。以副朕用人至意。九卿科道其確議以聞。尋九卿等議。大選推陞急選。如各分二十日。不但事例繁多。且為期太近。易生弊端。不便准行。至所稱見行例。急選大選壅滯之處。應改照舊例。雙月大選推陞。二八分缺。單月急選。其京堂等官。應照見行例。按缺補授。從之。○丁巳。遣大學士成克鞏祭。

先師孔子。○欽天監監正楊光先疏言。今候氣之法。久失其傳。十二月中氣不應。乞准臣

延訪博學有心計之人與之制器測候并敕禮部採取宜陽金門山竹管上黨羊頭山柰黍河內葭莩備用從之○戊午祭

大社

大稷

上親詣行禮○遣官祭

先農之神○己未

太皇太后聖壽節遵

懿旨免行禮○辛酉免湖南零陵等四縣康熙

四年分旱災額賦有差○陞叅領劉光為鑲

紅旗漢軍副都統○壬戌

孝康皇后三週忌辰遣官祭

孝陵○甲子

上詣

太皇太后宮問安○乙丑吏部議覆廣西巡撫

金光祖疏言慶遠知府李學禮父母就養任

所相繼病故自請扶櫬歸旗照漢官例守制

二十七月查定例漢軍文官外任者父母在

京物故准回旗守制六月其卒於任所者守制一月即起視事李學禮所請應不允行得旨漢軍官員父母至任所物故者如不允離任守制則返櫬無期難以寄厝外省李學禮著離任守制以後漢軍俱照此例行且孝道至重三年之喪內外臣民共之獨將滿洲漢軍官限以月日者特因任內職事不宜遲悞故定此制原未禁其在家守制三年也舊典具在爾部何不明晰言之○丙寅春分朝日於東郊

上親詣行禮○己巳戶部題署通倉監督傳魁

署京倉左右監督莽佳等咸稱受代日淺前

任監督及倉役見在羈部候訊米數尚未交

明應將俸餉米石暫停支領俟原管各官事

畢之日核明再支得旨官俸兵米定限二月

內支給若俟原管各官事畢為日遲久迨至

雨水難以運致今著及時支給仍令倉場侍

郎一同親閱○庚午

上詣

太皇太后

皇太后宮問安○癸酉命阿庫里尼滿等處居住阿思虎利等六姓進貢貂皮如滿朱納例就近在寧古塔收納○丙子改授海上投誠左都督鄭世襲為精奇尼哈番遊擊傅昂為阿達哈哈番並給全俸○丁丑予故三等精奇尼哈番曹熙麟祭葬如例○戊寅

上詣

太皇太后宮問安○己卯禮部題今歲安南國黎維禧例當進貢所受偽永曆敕印屢諭繳送遲久未至始稱無繳送之例今復欲委官臨關當面銷燬殊非尊奉天朝之禮請敕廣西督撫移文再行曉諭速將偽敕印送京准其入貢否則絕其來使從之○禮部又題故廣東廉州總兵官李永盛在任時有降級戴罪圖功之處其祭葬錫諡應行請旨得旨著給予全葬餘俱停止○直隸提督劉良佐以

年老乞休允之○庚辰以平廣東碣石衛逆

賊蘇利功增給平南王尚可喜俸銀一千兩

○陞正藍旗副都統濟世為滿洲都統○刑

部尚書龔鼎孳請假葬親允之○予故少保

兼太子太保福建總督兵部尚書李率泰祭

葬諡忠襄○理藩院題請差往科爾沁烏朱

穆素等四十七旗會盟大臣得旨著尚書喀

蘭圖侍郎緯克託前往

三月辛巳朔清明節遣官祭

永陵

福陵

昭陵

孝陵遣官祭

歷代帝王○壬午

上詣

太皇太后

皇太后宮問安○丁亥贈四川江安縣知縣劉澤厚四川按察使司僉事廕一子入監讀書

以土賊吳天民突犯縣城時劉澤厚奮身捍禦一家殉難也○戊子予故一等阿思哈尼哈番席特庫祭葬如例○辛卯予故原任戶部尚書太子太保覺羅郎達祭葬如例○壬辰以原任福建副都統胡拜為直隸提督○予故輔國公均色祭葬立碑如例○甲午上詣

太皇太后

皇太后宮問安○丙申以原任廣東總督盧崇峻為河道總督○丁酉禮部議覆安徽巡撫張朝珍疏言績溪縣曹明登妻胡嘉芝未婚從死應請特加旌表以勵風化得旨胡氏合祔未成一聞夫死幾欲自盡徑往夫家成服立嗣不食數日而死與已娶死節婦人不同著地方官建坊旌表○戊戌

萬壽節

上詣

太皇太后

皇太后宮行禮畢御殿王以下文武各官上表慶賀照例筵宴○遣官祭

福陵

昭陵

孝陵○遣官祭真武東嶽城隍之神○己亥予故原任江南江西總督兼兵部尚書馬鳴珮祭葬如例○辛丑都統固山貝子溫齊等查勘各旗沙壓水淹不堪耕種之地內鑲黃旗地尤不堪其餘各旗有一半可耕者亦間有過半不堪與全不堪者分別具疏覆奏輔臣等稱旨

太祖

太宗時原將八旗分左右翼莊田房屋俱從頭挨次分給後因睿親王到京欲住永平府留剌週圍地土未闢且欲令伊本旗切近故將鑲黃旗應住地方與正白旗而給鑲黃旗於右翼之末今各旗以地土不堪具控據都統等踏勘回奏鑲黃旗不堪尤甚如換給地畝

別旗分已立界。截圈不便更易。惟永平府週圍地畝。未經圈出。應令鑲黃旗移住。且

世祖章皇帝旨亦云。凡事俱遵

太祖

太宗例行。今思莊田房屋。應照翼給與。將鑲黃旗移於左翼。仍從頭挨次撥給。至各旗不堪地畝。作何分別。圈占之地。作何補還。鑲黃旗移出舊地。作何料理。著戶部一併酌議。○癸卯

上詣

太皇太后宮問安。○丙午。喀爾喀台吉滾布什希等率領四部落。共五百九十人來歸。命隸察哈爾和碩親王額駙阿布柰旗下。○己酉。命河南守道自汝州移駐河南府城。○河南道御史施維翰疏言。錢糧考成。責在州縣。近聞各省多委府佐協徵。或駐郡城。或臨外邑。差票拘提。與州縣一同行事。所莅地方。鋪設公署。備辦供給。不免擾民。更有不肖者。生事

需索。重加火耗。又或指稱公費。計里坐派。縱

容胥役橫肆誅求。其弊難以枚舉。請嗣後各省錢糧。專責州縣。如有逋欠。即照例叅處。不許委官協催。庶職掌可專。擾害可杜。而民力少寬矣。下部議行。○庚戌。山東道御史張登選疏言。朝廷設立驛站。即有經制錢糧。并協濟銀兩。豈容更有私派。乃私派之禁日嚴。而各州縣貪風日盛。以道府受其陋規。不行揭報。故也。臣請嗣後如有前弊。處分州縣。即當處分道府。如道府已報。而督撫不叅。或別經告發。或科道糾叅。并督撫從重治罪。庶有司知警。小民不致重困矣。下部知之。

夏四月。辛亥朔。享

太廟。

上親詣行禮。○壬子。

上詣

太皇太后

皇太后宮問安。○癸丑。予故河道總督朱之錫

祭葬如例○丙辰命雲南舉行武鄉試照文
闈額數取中二十七名○己未朝鮮國王李
柎遣陪臣沈益顯等表賀

大婚禮成尊上

太皇太后

皇太后徽號并貢方物宴賚如例○戶部議覆
八旗圈換地土一事以兩議請旨一議鑲黃
旗近圍順義密雲懷柔平谷四縣之地毋庸
撥換外其在右翼之涿州雄縣大城新安河
間任邱肅寧容城等處地應照舊例從頭挨
次撥換將正白旗通州三河迤東大路北邊
至豐潤縣地永平府週圍留剩地撥給鑲黃
旗如不敷將遵化至永平路北夾空民地圈
給其正白旗所撤通州迤東之地亦應於永
平週圍地內撥補不敷將路北夾空民地灤
州樂亭縣民地圈給至二旗包衣佐領下壯
丁應否遷移伏候

上裁再六旗地畝內除一半可耕一半不堪者

不准撥換外其過半不堪與全不堪者應將
各旗圈內空地或退回地畝酌量撥換俱俟
秋成後差員丈量分撥一議鑲黃旗既有順
義等四縣地應將所移涿州壯丁即於順義
等處民地圈給其河間等七縣所移壯丁應
將正白旗薊州遵化州地撥給不敷將夾空
民地圈給其通州三河玉田豐潤等處地仍
留正白旗餘照前議奏入輔臣等稱旨鑲黃
旗涿州壯丁移於順義等縣依後議其前議
將正白旗通州迤東大路北邊給與鑲黃旗
南邊留與正白旗之處俟秋收後差員將正
白旗滿洲地投充人地皇莊地丈量明白取
具實數酌議分撥餘俱俟鑲黃旗遷移事竣
具題請旨○庚申

上詣

太皇太后宮問安○以故一等精奇尼哈番祖
澤洪子鑲黃旗副都統祖良棟襲職○吏部
左侍郎吳達禮以病乞休允之○戶部議覆

直隸巡撫王登聯疏言。直隸各省徵收關稅條例甚屬繁多。請刊刻木榜。豎立關口。並商賈往來之孔道。通行曉諭。或例內有加增之數。亦明白註出。以杜吏役濫徵之弊。應如所請。嗣後直隸各省設立關稅之處。應多刊木榜。昭示商民。照額徵收。如有不肖官吏。於定額之外。私行濫收者。令該督撫不時查察。據實題參。依律治罪。從之。○命嗣後無官職人。恩賞朝衣。永行停止。○癸亥。裁雲南新化州。歸并新平縣。○以禮科給事中黏本盛為雲南鄉試正考官。中書科中書沈一澄為副考官。戶部主事王師夔為貴州鄉試正考官。戶部主事張萃為副考官。○丙寅。

上詣

太皇太后

皇太后宮問安。○丁卯。

孝端文皇后忌辰。遣官祭。

昭陵。○漕運總督林起龍疏言。國家每年輓運

七省漕糧四百萬石。以實天庾。近見糧艘北行。阻閘阻淺處處見告。竊以為欲申速漕之令。宜先清濟漕之源。查濟寧至臨清四百餘里。地勢雖係建瓴。而東平濟汶之間。有安山馬踏南旺蜀山馬場等湖。皆自故明萬曆年間。築隄挿柳蓄水濟運。又各湖高下相承之地。築有東湖子隄。名為水櫃。以資蓄洩。又東平汶上平陰肥城寧陽泰安萊蕪新泰滋陽鄒縣曲阜泗水濟寧魚臺滕縣嶧縣等處。有二百五十餘泉。為之接濟。具載河防一覽。年來近湖泉之地。多被土豪兼并。或阻水渠而不使之入。或決河岸而陰使之出。以致湖泉之水。不能濟漕而灌田。水櫃日減。泉源日塞。止憑一線河流。安得不致淺阻。請敕河道總督躬親踏勘。查照河防一覽。所載舊蹟諸湖。曾否收水。水櫃果否成田。櫃閘有無堵塞。子隄曾否修築。斗門是否填閉。隄岸有無廢缺。諸泉果否開濬。務期濬泉清湖。深通河道。不

惟可濟目前之運更可以裕千百年之利矣
下部議行○戊辰轉吏部右侍郎羅敏為左
侍郎。陞內弘文院學士常額為吏部右侍郎
○己巳裁雲南省教職二十一缺。改廣西府
學訓導為教授。羅乎建水。雲龍。南安。四州學
訓導為學正。祿豐。羅次等十二縣學教諭為
訓導。通省共設府衛學教授十八員。州學學
正二十三員。縣學教諭九員。訓導十五員○
庚午免浙江仁和等八縣。康熙四年分旱災
額賦有差○予故副都統拜他喇布勒哈番
垂通。祭葬如例○乙亥。

上詣

太皇太后

皇太后宮問安○免湖廣蘄州等八州縣衛。康
熙四年分水災額賦有差○工部題。

文廟器物皆刊刻前明年號。應請改造。得旨
壇廟舊用琴爐等件。俱不必換造。俟其損壞
補造時。寫本朝年號○丙子。陞侍讀學士明

珠為內弘文院學士○免湖南岳州寧遠常
德三衛。康熙四年分水災額賦有差○扎魯
特多羅貝勒桑噶爾故。遣官致祭

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之十八

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之十九

監修總裁官光祿大夫太子太保兼太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙五年丙午五月辛巳朔

上詣

太皇太后

皇太后宮問安○壬午命貴州省舉行武鄉試
照文闈額數取中二十名○甲申授輔國公
珣色之子訥殷為三等鎮國將軍○乙酉兵
部議外任官員自京城帶家屬赴任計程五
千里以外者給與糧單如不及五千里者不
准給發其家口馬匹恐帶去繁多應酌定數
目總督家屬一百名口馬一百匹提督家屬

九十名口馬九十匹總兵官家屬七十名口

馬七十匹巡撫家屬九十名口不管軍務准

馬三十匹俱照題定數目給發糧單其歇喂

馬匹如五千里以外者喂養四十日六千里

以外者喂養五十日在外陞轉者仍照舊例

不准給糧單從之○戊子吏部議覆江南道

御史張所志疏言直隸各省州縣缺員督撫

應委見任屬員署篆近見廣東三水縣缺員

委白身人王杰署理豈所屬佐貳無一可委

實錄卷十九

之人耶應請敕直隸各省督撫以後外官缺

出止於所屬佐貳中選擇委署不得徇情濫

委應如所請其王杰已行文斥逐毋庸議得

旨據奏稱署理三水縣之王杰乃係白身人

如果係白身署事豈伊自行私署者必有委

署之人爾部不將委署原由察明議處但云

既行文斥逐無庸議殊屬不合著再察明議

奏○己丑陞雲南叅政道何毓秀為山東按

察使司按察使○癸巳遣官祭

開聖帝君○免陝西懷遠堡康熙四年分電災額賦有差○河南巡撫張自德疏報康熙四年分豫省各屬兵墾荒地六千六百八十餘頃照例起科下部知之○兵部議叙四川官兵剿平西山賊寇功總兵官程廷俊等加銜授職有差其在行間之筆帖式顧爾德胡世塔以無議叙例未議得旨筆帖式顧爾德胡世塔對敵敗賊又衝敵報信與尋常在行間者不同仍將伊等議叙具奏○吏部議覆科臣碩穆科疏言吏員一途雖係微末亦關係國家名器乃竟有冒名頂替之人嗣後各衙門起送年滿吏員應給與印信執照開明年貌籍貫并充役咨部日期付本人收執於畫憑領憑之日送部科查驗以杜頂冒之弊應如所請從之○乙未

上詣

太皇太后

皇太后宮問安○敕諭安南國黎維禧自爾父

抒誠進貢以來朕遣使錫賚恩禮有加茲海寇楊二楊三黃明標等交通天誅在爾亦應同讐近兩廣督臣盧興祖奏至云此數賊并洗彪妻子等俱藏匿爾所屬海牙州官潘輔國處一切船隻器用皆其資給曾差官往索乃閉柵開砲若敵國然朕覽之殊為駭異念係邊吏所為或爾未與知今特此敕諭爾其祇遵即察出楊二楊三黃明標并其家口及洗彪妻子等解送兩廣督臣處交收且察處潘輔國助逆抗拒情罪如不將賊犯拏解不處分爾之屬官恐生兵端爾其籌之特諭○以戶部主事董朱袞為四川鄉試正考官中書科中書梁遂為副考官戶部主事呂正音為廣東鄉試正考官戶部主事王隲為副考官戶部主事曹首望為廣西鄉試正考官中書科中書張為仁為副考官編修吳國對為福建鄉試正考官戶部主事王汝楨為副考官○江西巡撫董衛國疏報康熙四年分江

西各屬共墾荒地二千八百三十五項照例起科下部知之○丙申定居庸關稅額銀三千兩○己亥夏至祭

地於

方澤

上親詣行禮○庚子厄魯特僧厄台吉遣使進貢賞賚如例○兵部議奴僕行盜處分家主應照旗下人犯盜議處撥什庫之例從之○

壬寅陞內秘書院學士章雲鷺為兵部督捕

右侍郎○免陝西綏德州康熙四年分霜災

額賦十之一○廣東廣西總督盧興祖疏報

安南國黎維禧繳送偽永曆敕命一道金印

一顆

上嘉之命封黎維禧為安南國王遣內國史院

侍讀學士程芳朝為冊封正使禮部郎中張

易賓為副使○岷州衛法藏等六寺喇嘛桑

節落旦等貢馬賞賚如例○改福建同安總

兵官為副將調同安總兵官黃翼為福建水

師右路總兵官○癸卯免陝西威武清平二

衛康熙四年分水災額賦有差○甲辰湖廣

巡撫劉兆麒疏報康熙四年分湖北各屬共

墾荒地四千六百餘項照例起科下部知之

○直隸巡撫王登聯疏報河間任邱獻縣災

侵之後又值青黃不接之時民食艱難已將

存貯倉糧給發賑濟下部知之○陞鑲紅旗

叅領瓦爾喀為西安副都統○以四川偽威

寧侯高承恩下投誠授左都督陳建為四川

永寧總兵官○乙巳

上詣

太皇太后

皇太后宮問安○吏部議本年四月內奉旨凡

部院清字主事漢字主事缺出俱論旗補授

查內院宗人府各部院清字主事共二十五

員漢字主事共二十三員蒙古主事三員漢

軍主事共十四員其清字主事二十五員每

旗應設為三員所餘一缺論首旗應歸鑲黃

旗內其漢字主事二十三員每旗應設三員因鑲黃旗多設清字主事一員止設二員其漢軍主事十四員正藍旗鑲藍旗各設一員餘六旗各設二員內三院蒙古主事三員論旗補授恐該旗一時無應補之人必致懸缺以後蒙古主事員缺內三院不論旗分將應陞補之人坐名補授其各部院主事仍照定例聽該部院坐名補授如本衙門無應補之人將本旗內應補部院人員坐名送部題補清字主事缺出將清字筆帖式應陞之人移送漢字主事缺出將漢字筆帖式應陞之人移送從之○丙午予故太保兼太子太傅原任內國史院大學士黨崇雅祭葬如例○命定南王孔有德塔孫延齡為廣西將軍○丁未命直隸各省督撫查禁離任官員不得逗遛原任地方從科臣周明新請也○以郎中海喇遜為內務府總管

六月庚戌朔日食○辛亥

上詣

太皇太后

皇太后宮問安○癸丑諭吏部補授學道於各部咨送文行素優郎中內再行揀選一缺開列二人不必照俸○禮部議故明宗室朱鼎瀆不便准其入旗令回籍自安生理得旨朱鼎瀆真心請歸旗下可憫不必令回原籍准入旗照拖沙喇哈番品級給俸○免江寧上元等衛節年未完黃快丁銀○甲寅陞內弘文院侍讀學士劉芳躅為內秘書院學士○鑲白旗都統覺羅巴哈納引年乞休慰留之○乙卯吏部題拜他喇布勒哈番又一拖沙喇哈番巴錫賴病故無親子孫伯叔兄弟查此職係巴錫賴之祖瓦塞所得應與瓦塞親弟圖霸之子阿納達承襲但阿納達原襲一等阿思哈尼哈番又一拖沙喇哈番今合加為一等精奇尼哈番從之○丙辰調山東沂州總兵官佟輔聖為直隸天津總兵官天津

總兵官克德為沂州總兵官○丁巳

上詣

太皇太后宮問安○己未添設六科滿漢給事中各一員○予故四川永寧總兵官高宗祭葬如例○庚申吏部議每年推陞六次應將不論俸滿即行陞轉者照常推陞五次十二月內將俸深應陞之官專陞一次得旨不論俸滿即行陞轉者著推四次俸深應陞之官著推二次○辛酉二等精奇尼哈番劉良佐因病解退以其子劉澤涵襲替○壬戌陞內秘書院侍讀學士田逢吉為內國史院學士○癸亥江南江西總督郎廷佐以病乞休慰留之○甲子工部尚書傅維麟以病乞假命回籍調理○乙丑

上詣

太皇太后

皇太后宮問安○丙寅以編修張玉書為浙江鄉試正考官禮部郎中劉廣國為副考官戶

部郎中鍾琬為江西鄉試正考官刑部郎中祝昌為副考官戶部郎中謝觀為湖廣鄉試正考官刑部郎中曹鼎望為副考官○丁卯定

陵寢掌關防官為正四品○辛未停崇文門監督出京貨物稅○陞廣西副都統王永年為廣西都統○壬申予故原任兵部督捕右侍郎楊時薦祭葬如例○癸酉以都察院左都御史郝惟訥為工部尚書○甲戌

上詣

太皇太后宮問安○平南王尚可喜疏辭加俸得旨加俸原以酌功不必懇辭○和碩額駙諾穆圖所尚郡主故遣官致祭○以四川省應試武生數不滿百停止本科武鄉試○乙亥以檢討鄭之謨為陝西鄉試正考官吏部員外郎閻毓偉為副考官禮部郎中徐旭齡為江南鄉試正考官刑部郎中鄭秀為副考官○丁丑贈湖廣荊州府通判張占鰲為湖

廣按察使司僉事廕一子入監讀書贈安陸府經歷蔚之煥為鍾祥縣知縣鍾祥縣縣丞鮑瑞魁為安陸衛經歷沔陽州州同趙一柱為沔陽州知州長沙府照磨王賜元為長沙府知事以會剿西山賊寇運糧七連坪地方遇賊殉難也○以故三等精奇尼哈番曹熙麟子曹秉桓襲職

秋七月庚辰朔享

太廟遣都統公賴護行禮○陞吏部左侍郎朱之弼為都察院左都御史○辛巳

上詣

太皇太后

皇太后宮問安○琉球國中山王尚質遣陪臣英常春等朝貢并以前次貢船漂失補進金銀器皿等物得旨尚質恭順可嘉所補進貢物俱令齎回至該國既稱瑪瑙烏木等十件原非土產此後免貢○壬午兵部議覆廣東巡撫王來任條奏粵東盜賊竊伏兵臨其地

輒稱盡行剿洗容有捕獲或稱負傷難行或報已經斬首從未有解審者且善惡難處未必盡皆附盜請嚴敕官兵俘獲賊犯務必解審以便根究餘孽亦須分別善惡毋得妄害良民應如所奏嗣後如有官兵借名剿賊妄殺良民該督提查取該管各官職名題參不得徇庇從之○甲申兵部議覆廣東巡撫王來任條奏粵東州縣因官兵防剿往來濫派民夫折徵銀兩又有棍徒假冒營旗串同蠹役私出牌票勒索銀兩恣行逼辱深為民害請永行禁革應如所奏嚴飭督撫指名題參如督撫徇隱一并議處從之○乙酉叙助剿土酋祿尚賢功授雲南阿迷州土目李阿側為阿迷州土知州准其世襲○兵部議覆廣東巡撫王來任條奏粵東武職各官借名軍需發銀州縣採買穀米稻草牛皮牛角弓箭箭竹木炭等項所發之價十僅四五州縣不敢動其分文照數繳還穀米等項俱派里排

備完。仍用民夫民船裝運。交納所差員役。勒索供應。稍遲鞭責小民。日見朘削。請通飭永禁。應如所請。得旨著該撫指名奏。○丙戌上詣

太皇太后宮問安。○戊子。命鎮守廣西將軍孫延齡。自衡州移駐桂林府。○刑部議覆廣東巡撫王來任條奏。誣盜為粵民大害。應如所請。以後有司獲盜。即時審究。不許遲延。營汛獲盜。取具口供。即送有司。不許私行訊拷。所供夥盜。不許任寫諱名。以滋影射。如有朦混。諸弊督撫指名題參。從之。○己丑。陞山東兗東叅政道李登第為湖南按察使。司按察使。○辛卯。裁廣東韶州高州二府同知。市舶提舉司。廣州府遞運所大使。布政司廣豐庫副使。化州州同。海豐饒平吳川靈山澄邁文昌臨高七縣縣丞。廣州肇慶二府照磨等缺。○陞佐領戴良臣為廣西副都統。○壬辰。浙江總督趙廷臣疏報海逆鄭錦下偽都督李順

自澎湖來至浙洋。率偽官兵船進關投誠。命授以都督同知銜。○甲午。中元節。遣官祭

永陵。

福陵。

昭陵。

孝陵。○乙未。

上詣

太皇太后

皇太后宮問安。○以戶部郎中熊焯為河南鄉

試正考官。兵部員外郎黃宣泰為副考官。○

戊戌。吏部左侍郎馮溥病痊。命以左侍郎管

右侍郎事。○辛丑。改廣西安隆長官司為西

隆州。上林長官司為西林縣。隸思恩府。○壬

寅。以兵科給事中吳國龍為山東鄉試正考

官。兵部主事翁祖望為副考官。刑部郎中盧

易為山西鄉試正考官。行人司行人朱之翰

為副考官。○甲辰。諭戶部防守地方。撲滅盜

賊。皆需乎兵。兵惟錢糧是賴。支給解送錢糧

何可遲悞。今見各省因協餉不至。以數月未給兵餉。具奏者甚多。或係爾部不撥。實在錢糧將雜項抵撥。以致請報往返。徒費時日。或係地方官借稱協解未齊。以致遲延。俱未可知。嗣後撥餉時務。撥實在款項。嚴定期解。送。或因別故。將別項錢糧協解。該督撫速行題報。其違限及借端推諉者。作何處分。爾部詳確議奏。○乙巳。

上詣

太皇太后宮問安。○丙午。予故原任河道總督太子太保楊方興祭葬如例。○丁未。調刑部尚書尼滿為都察院左都御史。陞刑部左侍郎對喀納為刑部尚書。○平西王吳三桂疏報都統吳應期總兵官馬寧等進剿烏撒女酋隴氏陣斬助逆之郎岱土酋隴安藩及水西土目阿豆等。下部察叙。

上詣

八月己酉朔。

太皇太后宮問安。○戶部遵旨議定地方官遲悞兵餉處分。督撫降二級留任。布政使降三級調用。以下經管官員革職從之。○命奉天等處各學武生照文生員例附順天武鄉試取中三名。○刑科給事中張維赤疏言。伏念世祖章皇帝於順治八年親政。年登一十四歲。今

皇上即位六年。齒正相符。乞擇吉親政。疏入報聞。○壬子。

上詣

太皇太后

皇太后宮問安。○厄魯特顧實汗幼弟之子伊斯丹津為其兄弟所迫。棄妻子來歸。封為多羅郡王。○山東巡撫周有德疏報康熙四年分開墾荒地三千二百三十餘頃。下部知之。○甲寅。以內秘書院學士塞色黑為滿洲鄉試正考官。內國史院侍讀學士多爾濟為副考官。○以內秘書院侍讀張允欽為順天鄉

試正考官。禮部郎中沈令式為副考官。○乙卯。叙剿平廣東叛鎮蘇利功。給總督盧崇峻。拖沙喇哈番。○予故都察院左都御史覺羅雅布蘭祭葬如例。○贈福建陣亡副將柯慶為都督同知。遊擊洪亮為恭將。守備張龍許。文。李忠林。廷。謝郁。林有。方文興。翁飛等。俱為都司僉書。又功加署守備胡登奎。馬天祿。孫友名。杜韜。羅象乾。馬夢麟。吳應昌。余志遠。朱大受。主之道等。為署都司僉書。各予祭葬如例。○丁巳。

太宗文皇帝忌辰遣官祭

昭陵。○轉刑部右侍郎勒德洪為左侍郎。陞內秘書院學士麻勒吉為刑部右侍郎。○禮部議給定南王孔有德女孔四貞執事。得旨定南王為國捐軀。又復絕嗣奉

世祖章皇帝旨。將伊女照郡主品級給俸。今又令往廣西駐防。其執事依議准給。後不為例。○己未。

太祖高皇帝忌辰遣官祭

福陵。○庚申。歸化城土默特都統古魯格故。以其子席拉布襲都統。○辛酉。以刑部郎中李可汧為湖廣按察使。司僉事提調學政。○壬戌。

上詣

太皇太后宮問安。○陞刑部郎中禪布為內秘書院學士。○甲子。予故漢軍副都統吳天壽祭葬如例。○丁卯。遣大學士魏裔介祭

先師孔子。○戊辰祭

大社。

大稷。

上親詣行禮。○己巳。

上詣

太皇太后

皇太后宮問安。○以雲南安普叅議道張純熙為貴州按察使。司副使提調學政。○庚午。平西王吳三桂疏言滇東諸酋削平。臣議改設

流官建置開化一府永定一州所有開化府請設知府同知經歷教授各一員永定州請設知州州判吏目學正各一員下部議行○壬申。

上詣

太皇太后宮問安○戶部議覆偏沅巡撫周召南疏言湖南清出田地六百二十一頃二十畝零新增四千八十七丁於康熙四年起科下部知之○癸酉秋分夕

月於西郊遣都統特晉行禮○甲戌禮部尚書沙澄丁母憂命回籍守制

平定六十九

八

平定六十九

三

一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十

臣修總載官光祿大夫太子太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅太華殿大學士仍兼理戶部尚書事務加五級又加二級臣蔣廷錫

總載官光祿大夫太華殿大學士兼吏部尚書臣秦斌等奉

敕修

康熙五年丙午九月戊寅朔

實錄卷二十

上詣

太皇太后

皇太后宮問安○遣官祭

歷代帝王○遣官祭城隍之神○吏部遵旨

議覆在外各官有因錢糧盜案既留舊官將

新官改補者若令回部往返奔走未免疲困

嗣後應改補之官或令回籍或留新任地方

俟該撫繳憑之日隔一選即補從之○已卯

轉刑部右侍郎石申為左侍郎陞內秘書院

學士蔡毓榮為刑部右侍郎○庚辰兵部遵

旨議覆廣東既有平南王其將軍王國光及

所屬官兵應令撤回京師又協鎮將軍沈永

忠因病解任所屬官兵應令伊弟續順公沈

永興管轄駐劄潮州其應行事件令二副都

統協同料理如遇領兵征剿亦令副都統等

率領酌行從之○壬午

上詣

太皇太后宮問安○丁亥以原任內國史院學

實錄卷二十

士范承謨為內秘書院學士○轉兵部尚書

梁清標為禮部尚書○戊子戶部議覆湖廣

巡撫劉兆麒疏言楚省停運多年缺船缺丁

請將存剩米石暫行折價解部俟船丁足時

仍運本色應如所請從之○喀喇沁鎮國公

齊塔忒故遣官致祭○己丑

上詣

太皇太后

皇太后宮問安○免河南安陽湯陰林縣淇縣

本年分水災額賦有差○庚寅予故太傅兼太子太師內秘書院大學士一等精奇尼哈番范文程祭葬諡文肅○辛卯貴州巡撫羅繪錦疏言黔省開闢今方九載漢少苗多人民生聚未久請暫免其丈量俟百姓復業荒地開墾再行清丈下部議行○改烏撒土府為威寧府隸貴州省統轄○壬辰

上詣

太皇太后宮問安○以科爾沁故冰圖郡王額

參子額濟音襲爵○癸巳

上幸南苑行圍○兵部議覆廣東鎮海將軍王國光疏報海賊駕船七十餘隻突犯甲子所港口總兵官許龍敗之其水師提督常進功等因修造船隻未及追擊分別降罰得旨甲子所港口係極內之地七十餘賊船直入提督常進功等假托修船不親領官兵剿滅爾部見議浙江提督總兵官見海內賊船四隻不親領兵追趕俱降二級今以七十餘隻之

賊船直入內地不行剿滅止議提督罰俸一年總兵降職一級爾部所議輕重任意顛倒徇情殊為不合其常進功等議罪尚輕著另議○丙申轉刑部尚書龔鼎孳為兵部尚書○辛丑諭吏部庶吉士申涵盼等教習已久今加考試分別授職申涵盼田喜霽陳論李平胡士著衛既齊俱授內三院編修檢討嚴曾渠徐誥武熊一瀟李崇以科道用邵吳遠吳元龍勞之聘汪肇衍陳景仁諸定遠以部屬用○壬寅吏部議覆禮科給事中劉如漢疏請禁止直隸各省督撫縱放衙役家人在外詐害官民索取財物發覺日督撫并大小各官均照失察例革職應如所請得旨處分議罪亦有重者亦有輕者豈可不論輕重一概革職此等事情發覺著照事之輕重酌議○戶部議定雲貴川廣四省土司拖欠錢糧土官考成則例得旨土司皆係邊方世職與在內有司官不同不必照流官考成按分數

處分○癸卯

上還自南苑詣

太皇太后

皇太后宮問安○甲辰

孝慈高皇后忌辰遣官祭

福陵○丙午轉工部尚書郝惟訥為刑部尚書

冬十月戊申朔享

太廟遣都統穆里瑪行禮○遣官祭

永陵

福陵

昭陵

孝陵○頒康熙六年時憲曆○己酉

上詣

太皇太后

皇太后宮問安○庚戌

皇太后聖壽節遵

懿旨免行禮○吏部議陝西定羌廟地方土賊

抗拒官兵傷斃甚多總督白如梅隱諱不報

應革職得旨白如梅著留太子少保革去總

督○以扎魯特故多羅貝勒桑噶爾子巴達

里襲爵○壬子以左都御史朱之弼為工部

尚書○吏部議覆御史顧如華疏言陞補主

事將行人司司副內院典籍辦事中書兵馬

司指揮光祿寺署正鑾儀衛經歷國子監博

士助教八項官與知縣為一班大理寺評事

太常寺博士中書科中書行人司行人內院

撰文中書順天府推官通政使司經歷

上林苑監丞國子監監丞九項為一班分推

補用從之○丙辰

上詣

太皇太后

皇太后宮問安○廣東廣西總督盧興祖疏言

粵西土司俗無禮義尚格鬪爭替爭襲連年

不解夫更化善俗莫先於學校請令各土司

子弟願習經書者許在附近府縣考試文義

通達每縣額取二名俾感於忠孝禮義則爭

闕之風自息。下部議行。○喀爾喀車臣汗遣使進九白年貢。宴賚如例。○庚申。兵部議覆湖廣總督張長庚疏言。殉難總兵官徐勇子襲阿思哈尼哈番職。徐自貴具呈情願効力。相應推用。得旨。徐自貴著取來京。以後有願効力之襲職官員。爾部取來看。可否委用。分別具奏。○喀爾喀車臣濟農戴青台吉遣使進九白年貢。宴賚如例。○辛酉。予故西安副都統二等阿達哈哈番杜敏祭葬如例。○壬戌。

上詣

太皇太后

皇太后宮問安。○癸亥。叙勸墾荒地功。加湖廣巡撫劉兆麒工部右侍郎銜。○乙丑。予故山東沂州總兵官臧延齡祭葬如例。○丙寅。喀爾喀土謝圖汗遣使進九白年貢。宴賚如例。○丁卯。予湖廣陣亡通判贈按察使司僉事張占鰲州同贈沔陽州知州趙一柱祭葬如

例。經歷蔚之煥。照磨王賜元。縣丞鮑瑞魁。令該督給匾旌獎。○兵部遵旨。再議廣東海賊駕船直入甲子所港口。水師提督常進功等假托修船。不親領官兵追剿。應將提督常進功左路總兵官張國勳俱降二級留任。得旨。常進功著降二級。照舊管事。張國勳著再降二級。調用。○戊辰。戶部議覆漕運總督林起龍疏言。江南蘇松常三府浙江嘉湖二府白糧折徵每石二兩。今民間穀價止七八錢。民力不堪。請改徵本色。應不准行。得旨。白糧改折。既稱苦民。俱著徵本色。○己巳。兵部議撰給敕書。惟提督總兵官仍照督撫例。坐名撰給。副叅等官應照布按各道例。不必坐名。俱用傳敕。從之。○庚午。

上詣

太皇太后宮問安。免江南泗州虹縣臨淮縣本年分水災額賦有差。○辛未。兵部題雲貴二省武職員缺。臣部推陞之後。本官未經到

任隨經平西王吳三桂另題有人以致部推之官中途往返似屬苦累請照吏部例將此二省武職員缺悉聽該藩題補如無可補之人該藩題明臣部再行推陞從之 癸酉理藩院議厄魯特多羅郡王伊斯丹津蒙恩授爵具呈願留京効力請旨應歸何旗得旨著歸并鑲白旗下并賜與田產奴僕

十一月丁丑朔

上詣

太皇太后

皇太后宮問安 陞禮部左侍郎兼禮部尚書銜王熙為都察院左都御史 福建巡撫許世昌以病乞休命以原官致仕 己卯以原任直隸總督苗澄為四川總督 辛巳以原任陝西興安總兵官于奮起為浙江水師左路總兵官海逆鄭錦下投誠左都督楊富為浙江水師右路總兵官 癸未以原任寧夏巡撫劉秉政為福建巡撫 贈福建陣亡遊

擊潘廷縉劉應田為署叅將守備沈杰李瑯等為都司僉書各予祭葬如例 甲申

上詣

太皇太后宮問安 乙酉以科爾沁故卓禮克圖親王吳克善子畢爾塔噶爾襲爵 丙戌免浙江寧海等五縣湖廣江夏等十二縣衛本年分水災額賦有差 丁亥以湖廣黎平府改隸貴州省 戊子陞江南巡驛道羅森為浙江按察使司按察使 辛卯轉禮部右侍郎黃機為左侍郎陞左副都御史董安國為禮部右侍郎 調河道總督盧崇峻為山西陝西總督 癸巳

上詣

太皇太后

皇太后宮問安 丙申直隸山東河南總督朱昌祚疏言鑲黃正白兩旗撥換地土一事奉差大學士管戶部尚書事蘇納海侍郎雷虎會同臣與巡撫王登聯酌議圈換臣等履畝

圈丈將及一月而兩旗官丁較量肥瘠相持不決且舊撥房地垂二十年今換給新地未必盡勝於舊口雖不言實不無安土重遷之意至被圈夾空民地百姓環遯失業尤有不忍見聞者若果出自

廟謨臣何敢越職陳奏但目覩旗民交困之狀不敢不據實上聞仰祈斷自

宸衷即諭停止直隸巡撫王登聯疏言旗民皆不願圈換自聞命後旗地待換民地待圈皆

拋棄不耕荒涼極目亟請停止疏入輔臣等

稱旨總督巡撫俱各有專任職掌這地土事

但應照所委料理將已定之事越行干預紛

更具奏事屬重大著吏兵二部會同議處具

奏○輔臣等稱旨諭吏部兵部鑲黃旗戶部

官員旗下官員差去換地俱已回來戶部尚

書蘇納海等帶如許官員一月有餘尚未給

地官員擅自回來何不奏明爾二部速差人

去將鑲黃旗換地去的副都統三員禁守尚

書蘇納海拏來禁守總督朱昌祚巡撫王登聯拏來爾二部議奏圈換地土事情著侍郎已格前去○丁酉

上詣

太皇太后宮問安○己亥陞宗人府府丞宋徵輿為都察院左副都御史○以原任貴州總督楊茂勲為河道總督○壬寅冬至祀

天於

園丘

上親詣行禮○遣官祭

永陵

福陵

昭陵

孝陵○癸卯

上御殿諸王貝勒貝子公文武各官上表朝賀

○廣西巡撫金光祖疏言三司首領州縣佐

貳雜職等官凡有劣蹟不必具題督撫但據

揭查審無虛即咨吏刑二部開缺問罪下部

議行○免江西寧州武寧等三十五州縣本年分旱災額賦有差○旌表烈女山西蔚州民蘭州廝聘妻宋氏聞夫死自經給銀建坊如例

十二月丁未朔

上詣

太皇太后

皇太后宮問安○庚戌以原任宗人府府丞高

珩補原官○甲寅以湖廣西山逆賊已平命

南汝總兵官馬呈祥自鄧州移駐南陽○乙

卯予故議政大臣蒙古都統一等精奇尼哈

番拜山祭葬如例○丙辰

上詣

太皇太后宮問安○吏部遵旨議覆欽天監滿

洲監正係正五品應陞通政使司左右通政

大理寺少卿督捕左右理事官太常寺少卿

鴻臚寺卿太僕寺少卿等員缺滿洲監副係

正六品陞本衙門監正及通政使司左右叅

議光祿寺少卿鴻臚寺少卿等員缺其漢監

正應陞督捕左右理事官太常寺少卿太僕

寺少卿通政使司左右叅議大理寺寺丞等

員缺漢監副陞本衙門監正及鴻臚寺少卿

員缺以上俱與應陞官員一體較俸陞轉從

之○旌表直隸節婦郭氏胡氏鄒氏焦氏吳

氏孝子呂新給銀建坊如例○丁巳江西巡

撫董衛國疏報南昌等府屬三十三州縣衛

共墾過田地二千八百三十五頃四十五畝

下部知之○己未以故一等精奇尼哈番范

文程子范承斌襲職○庚申吏部兵部議覆

大學士管戶部尚書事蘇納海條專差圈換

地土之大臣乃不分遣章京等速行辦理故

稱屯地難於丈量鑲黃旗章京不肯受地正

白旗包衣佐領下人不肯指出地界俱不即

指名題奏又因督撫等題疏請停圈換觀望

遲悞不盡心於奉旨責成之事應革職交刑

部議總督朱昌祚巡撫王登聯將奉旨已定

之事不欽遵辦理妄行紛更具題亦應革職交刑部議郎中鄂莫惠等俱降四級調用副都統巴喀喇哈祖良棟係領地大臣見蘇納海給地遲悞不催令速給俱降三級留任阿思哈尼哈番達賴等擅自回京俱罰俸一年不許丈量屯地之筆帖式撥什庫等交刑部議處輔臣等稱旨蘇納海朱昌祚王登聯俱著革職交與刑部議巴喀喇哈祖良棟俱革職鄂莫惠等俱降一級留任旗下各章京俱免罰餘依議○贈陝西陣亡遊擊馬希驛丁可貞俱為叅將予祭葬如例○辛酉

上詣

太皇太后

皇太后宮問安○左都御史王熙疏言藩臬兩司總理一省錢穀刑名守巡各道分莅各府州縣任亦綦重必廉能敏練始克勝任其貪穢暴酷者固大為民害即闕冗衰庸病廢者亦足以貽悞地方乃近年督撫糾劾所屬官

員不過府佐縣令雜職末員而已此皆因藩臬二官地近情親而監司郡守彌縫便巧故督撫瞻顧情面耳查康熙四年十一月內奉有直隸各省督撫叅奏止將衰老微員塞責之嚴旨至今已經一載而叅劾大吏者仍復寥寥皆因未定處分之例故督撫因循姑息自若也祈敕部定議嗣後督撫將所屬藩臬道府等官如有貪酷衰病者不時叅奏倘仍前故習將督撫作何處分嚴議定例庶不敢自蹈徇庇之愆矣下部議○壬戌免江南邳州睢寧等五州縣本年分水災額賦有差○癸亥

皇后千秋節停止行禮○設四川會川衛學教授一員桐梓綏陽仁懷三縣學訓導各一員○甲子陞督捕左侍郎馬希納為戶部尚書○乙丑

上詣

太皇太后宮問安○以刑部郎中金鏡為浙江

按察使司僉事提調學政兵部郎中吳偉為江西按察使司僉事提調學政戶部郎中呂和鐘為陝西按察使司僉事提調學政戶部郎中周龍甲為山東按察使司僉事提調學政禮部郎中沈令式為福建按察使司僉事提調學政予故三等精奇尼哈番宜納穆祭葬如例○丙寅以故三等阿思哈尼哈番根敦之兄格門德襲職以伯馬思文為鑲黃旗漢軍副都統○刑部議蘇納海撥地遲悞朱昌祚王登聯紛更妄奏事屬重大查律無正條蘇納海朱昌祚王登聯俱不准折贖鞭一百除伊妾外家產籍沒照兵丁留給財產其不許丈量屯地之筆帖式撥什庫等俱鞭一百疏入

上知鰲拜以蘇納海始終不阿其意朱昌祚王登聯疏奏旗民不願圈換地畝堅守不移阻撓其意必欲置之於死特召輔臣等賜坐詢問鰲拜索尼遏必隆堅奏蘇納海等應置重

典獨蘇克薩哈不對

上終未允所奏鰲拜等出稱旨蘇納海若有意見即應陳奏既奉差撥地種種奸巧不願遷移遲延藐旨朱昌祚王登聯身為總督巡撫各有專任職掌撥地事不照所委料理妄行具奏又將奏疏與蘇納海看且疏內不止言民間困苦將旗下不願遷移之處一并具題情罪俱屬重大蘇納海朱昌祚王登聯俱著即處絞其家產免籍沒餘依議○丁卯兵部議覆四川巡撫劉格疏言夔州為楚蜀通衢往來差使絡繹不絕請於雲陽奉節巫山三縣定遠烈面二處各設水站應如所請從之○戊辰輔臣鰲拜等以原任戶部尚書英武爾代係蘇納海族人追論其罪稱旨諭吏部戶部

太宗文皇帝因英武爾代辦事勤敏擢為大臣配以王女授為多羅額駙迨太宗文皇帝上賓之時諸臣議因

皇考幼冲令鄭王睿王輔政及遷都京城睿王竟不令鄭王預事任意妄行英武爾代將庫內銀自行專主蓋造宮殿草率完工為伊王蓋造房屋反將庫銀費用不貲與之相好者即令陞官富足其不相好者即行處分降謫伊身無大功授為一等公爵將給與鑲黃旗之地乃取給正白旗又將鑲黃旗置於右翼種種欺上罪過甚多議處睿王之時止將英武爾代革去公爵仍留精奇尼哈番此係叛附睿王之譚泰石漢為之也今將鑲黃旗之地仍令歸鑲黃旗正白旗地畝所應得之處委令撥給蘇納海藐旨不行撥地是正白旗又出一英武爾代此皆由於英武爾代獨專朝政縱意而行之故英武爾代若在應行正法因其已故將官職盡行革去從前所給蒙古投充漢人俱著取出蒙古交與該衙門分撥投充漢人令其為民投充漢人地畝著察地畝不足之旗分撥給○己己

上詣

太皇太后宮問安○戶部議覆奉差撥地侍郎巴格等疏言鑲黃旗遷移壯丁共四萬六百名該地二十萬三千晌將薊州遵化遷安三處正白旗壯丁分內地民地開墾地多出地投充漢人地派給不敷將延慶州民地撥補其正白旗遷移壯丁二萬二千三百六十一名該地十一萬一千八百五晌將玉田豐潤二處民地多出地開墾地投充漢人地并永平等處投充漢人地派給不敷將永平灤州樂亭開平民地酌量取撥從之○辛未以故一等精奇尼哈番拜山子瓦爾達襲職○子故原任禮部侍郎呂崇烈祭葬如例○甲戌歲暮祫祭

太廟

上親詣行禮○遣官祭

永陵

福陵

昭陵

孝陵○遣官祭太歲之神○旌表八旗節婦滿洲胡世閨妻諾氏等十五人漢軍王悅遠妻馬氏一人烈婦滿洲恩格妻南氏等七人蒙古索吉妻招氏一人各給銀建坊如例是歲人丁戶口一千九百三十五萬三千一百三十四田地山蕩畦地五百三十九萬五千二百六十二頃三十六畝徵銀二千五百八十三萬八百四十二兩有奇米豆麥六百一十六萬一千三百二十七石二斗有奇草二百三十萬二千七百六十束茶十六萬五千六百八十五引行鹽四百三十二萬九千三百四十七引徵課銀二百七十五萬八百八十六兩有奇鑄錢二萬九千五百八十七萬九千八百有奇

實錄卷二

三十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十

實錄卷二

三十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十一

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙六年丁未春正月丙子朔

實錄卷二十一

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御殿王以下文武各官外藩王

及便臣等上表朝賀停止筵宴○朝鮮國王

李捌遣陪臣鄭知和等表賀冬至元旦

萬壽節及進歲貢禮物宴賚如例○己卯陞左

副都御史額赫里為兵部督捕侍郎○以原

任山西總督白秉真為直隸山東河南總督

○以一等侍衛覺羅塔達為鑲黃旗滿洲副

都統○予故四川總督李國英祭葬謚勤襄

○陞郎中泰璧圖為鑲黃旗蒙古副都統○

庚辰諭吏部八旗世職官因病請將職替與

子弟者令吏兵二部傳驗患病真偽具奏○

以伯碩穆保為鑲紅旗蒙古都統○壬午

世祖章皇帝忌辰遣官祭

實錄卷二十一

孝陵○以內大臣巴哈子訥爾杜尚和碩公主

授為和碩額駙○癸未賜朝正外藩王貝勒

貝子公台吉等銀幣鞍馬有差○以喀喇沁

故鎮國公奇塔忒子烏忒巴喇襲爵○乙酉

孟春享

太廟

上親詣行禮○遣官祭太歲之神○

上詣

太皇太后

皇太后宮問安○戶部議覆山東道御史錢延宅疏言被災地方蠲免錢糧恐州縣官有陽奉陰違朦上剥下之弊請詳議處分條例并命各督撫於奉蠲處所每圖取見年里長結收存該地方並分繳部科查對應如所請以後被災州縣衛所凡奉蠲錢糧有已徵在官不准抵次年者有未徵在官不與扣除蠲免一槩混比侵吞者或於督撫具題之時先停征十分之三及部覆之後題定蠲免分數不將告示通行曉諭者或止稱蠲起運不蠲存留使小民僅沾其半者或於由單內扣除而所扣不及蠲額者州縣各官俱以違旨侵欺論罪如上司不行稽察道府俱降三級調用督撫布政司俱降一級調用如該管上司察出不行糾叅被科道察糾旁人首告俱照徇庇例議處從之○丙戌以順天府府尹甘文焜為直隸巡撫○以歸化城土默特故三等精奇尼哈番古魯格子吳巴席泰襲職○戊

子順天府進春○免江南五河等四縣衛康熙五年分蝗災額賦有差○己丑封

世祖章皇帝第二子福全為和碩裕親王庚寅命漢太常寺卿照滿洲例開列陞補內院學士○定王貝勒等執事人役衣服俱用綠色○左都御史王熙疏言六部滿洲司官事無巨細郎中員外主事一同辦理漢人則一司之事專委之郎中員外主事不過積俸待遷而已伏乞敕下各部堂官令漢員外主事照滿官例與郎中共辦司事如仍陋習即行糾叅下部議行○辛卯陞大理寺卿常鵠為禮部右侍郎以降調原任吏部左侍郎折庫納為大理寺卿○壬辰

上詣

太皇太后

皇太后宮問安○陞浙江溫處道楊駿為廣西按察使司按察使○癸巳偏沅巡撫周召南疏報湖南各府州縣共墾田三千一百九十

項五十畝零照例三年後起科下部知之○
甲午封多羅貝勒杜爾祜子準達為固山貝
子固山貝子傅喇塔子傳善為鎮國公○授
和碩鄭親王濟爾哈朗庶子吳錫輔國公賴
護子來度俱為三等輔國將軍鎮國公馬爾
圖子鄂飛輔國公英額子葉爾圖俱為三等
奉國將軍○乙未

上詣

太皇太后宮問安○丁酉

上幸南苑行圍○庚子以吏部尚書阿思哈為
鑲白旗滿洲都統○辛丑陞右通政李天浴
為順天府府尹○癸卯以內弘文院修撰蔣
超提督順天學政戶部郎中鄔景從為河南
按察使司僉事提調學政戶部郎中馮標為
廣東按察使司僉事提調學政刑部郎中盧
易為廣西按察使司僉事提調學政工部郎
中孫允恭為四川按察使司僉事提調學政
○乙巳

上自南苑回宮○轉兵部尚書明安達禮為吏
部尚書○陞工部郎中莫洛為都察院左副
都御史○喀爾喀色冷墨爾根台吉率所屬
來歸封為多羅貝勒

二月丙午朔○丁未遣大學士魏裔介祭

先師孔子○湖廣西山投誠副將李有實奉
差招撫逆賊李來亨被拘不屈身死贈都督
同知子祭葬如例○戊申祭

大社

大稷

上親詣行禮○陞叅領趙璉為鑲紅旗漢軍副
都統○己酉免江南桃源贛榆二縣康熙五
年分蝗災額賦○平西王吳三桂疏報左都
統吳應麒總兵官馬寧等進剿烏撒生擒女
酋隴氏及逆黨萬餘蠻疆復定下部知之○
庚戌遣官祭

先農之神○辛亥

上詣

太皇太后

皇太后宮問安○以戶部尚書王弘祚兵部尚書梁清標為會試正考官吏部侍郎馮溥內院學士劉芳躅為副考官○和碩額駙華善以元宵節赴宴時譏誚和碩莊親王革去內大臣仍留和碩額駙隨旗上朝費揚武聞華善譏誚語不舉首亦革去內大臣仍留拜他喇布勒哈番出兵効力○癸丑

太皇太后聖壽節遵

懿旨免行禮○免湖廣巴陵等九縣衛康熙五年分旱災額賦○甲寅以故二等阿思哈尼哈番劉濟子劉中本襲職○乙卯戶部題各旗撥換地土將完餘剩房地應交地方官辦糧此後各旗有具呈請撥換者槩行禁止從之○丙辰

孝康皇后忌辰遣官祭

孝陵○子故二等阿思哈尼哈番副都統劉濟祭葬如例○以故三等精奇尼哈番宜納穆

子班達爾沙襲職○丁巳奉天副都統俄莫克圖以年老乞休允之庚申

上詣

太皇太后宮問安○辛酉免湖廣沔陽黃岡等十二州縣衛所康熙五年分旱災額賦○癸亥諭宗人府與親王滿達海端重親王博羅敬謹親王尼堪因諂媚迎合睿親王革去親王授為貝勒給與之物全行追奪時

世祖章皇帝念宗室王等從來無陣亡者惟敬謹親王尼堪陣亡將其子尼思哈所襲親王仍留止將給與之物追奪其親王仍准承襲或不准承襲未經奉旨後尼思哈身故減其親王其兄蘭布承襲貝勒今思尼堪以宗室親王陣亡殊屬可憫

世祖章皇帝復嘗矜念仍留所襲王爵又無不准承襲之旨因此將貝勒蘭布封為郡王爾衙門即遵諭行○命改福建汀州總兵官管轄汀州邵武漳州泉州等處福寧總兵官管

轄福州興化。延平建寧等處。○乙丑。陞平西藩下叅領線維明為雲南永順總兵官。○丁卯。陞叅領葉爾素為盛京副都統。○以輔國公領侍衛內大臣班布爾善為內秘書院大學士。都統圖海為內弘文院大學士。○宗人府題。多羅貝勒蘭布封為郡王。查實錄定例。凡王薨逝子男承襲王爵。仍稱伊父之號。其父另與謚號和碩敬謹親王薨後其男尼思哈仍與其父之號。今郡王蘭布或仍與原號。或另行與號。伏乞

上裁得旨。著仍與原號。○戊辰。遣官祭歷代帝王。

上詣

太皇太后

皇太后宮問安。○諭吏部兵部都察院國家政務委任庶官。必內外大小臣工咸得其人。乃可共襄治理。京察大計軍政俱應於今歲舉行。將內外大小各衙門滿漢文武官員分別

澄叙。以勵官方。應行事宜。爾部院察例議奏。○以都統阿思哈為兵部尚書。○以正白旗護軍統領穆福為領侍衛內大臣。○免浙江麗水等九縣積荒田賦。令地方官招墾成熟起科。○庚午。予故少師兼太子太師都統覺羅巴哈納祭葬。謚敏壯。○設貴州威寧鎮。以定廣總兵官塔新策為威寧總兵官。其標下三營各設遊擊守備。○吏部都察院遵旨議覆舊例。三年一次大計。六年一次京察。自康熙元年停止大計。京察內外官俱行考滿。至康熙四年。停止考滿。今應照舊例舉行京察大計。從之。○癸酉。春分。朝日於東郊。遣都統覺羅巴爾布行禮。○吏部遵旨議覆各部院官員品級。照順治十四年以前定例。滿洲尚書左都御史為一品。左右侍郎通政使。大理寺卿為二品。太僕寺卿光祿寺卿通政使司左通政大理寺少卿鴻臚寺卿宗人府啓心郎。欽天監監正為三品。國子

監祭酒。太僕寺少卿。光祿寺少卿。通政使司
叅議。鴻臚寺少卿。欽天監監副。為四品。國子
監司業。都察院都事。通政使司知事。大理寺
寺正。評事。太常寺寺丞。光祿寺署正。鴻臚寺
鳴贊。禮部讀祝官。為五品。內院典籍。都察院
經歷。通政使司經歷。太常寺博士。光祿寺署
丞。典簿。各部院司務。禮部司牲官。各部院司
庫。為六品。國子監監丞。助教。為七品。都察院
滿洲監察御史。十二員。內六員為三品。六員
為四品。京畿道巡視五城監察御史。為四品。
內院滿洲漢軍筆帖式等。一半為他赤哈哈
番。一半為筆帖式哈番。漢軍侍讀。學士。為二
品。通政使司右通政。大理寺少卿。侍讀學士。
各部郎中。為三品。光祿寺少卿。宗人府啓心
郎。通政使司叅議。監察御史。京畿道巡視五
城監察御史。各部員外郎。為四品。各部主事。
通政使司知事。大理寺寺正。評事。為五品。內
院典籍。太常寺博士。為六品。從之。

三月乙亥朔。兵部都察院遵旨議覆。考選軍
政事宜。得旨。總督既統轄全省文武。提督應
仍聽總督註考。丙子。以故三等精奇尼哈
番。顧穆德。徹臣子阿喇納。襲職。己卯。旌表
平南王下節婦殷氏等九人。並給銀建坊如
例。庚辰。

上詣

太皇太后

皇太后宮問安。辛巳。京察各部院自陳官員。
吏部尚書明安達禮。禮部尚書祁徹白。俱原
品解任。禮部尚書梁清標。刑部左侍郎石申
俱革職。刑部左侍郎勒德洪。隨旗行走。工部
尚書葉成額。戶部右侍郎巴格。兵部左侍郎
石圖。右侍郎圖爾泰。工部右侍郎杭艾。內弘
文院學士王之科。俱降三級。隨旗行走。都察
院左副都御史覺羅碩博。會降二級。隨旗行
走。大理寺卿折庫納。降四級。隨旗行走。喀
爾喀車臣汗諾爾布。故遣官致祭。甲申。陞

江西湖東道李士楨為河南按察使司按察使。乙酉。以兵部尚書都統阿思哈為吏部尚書。正紅旗副都統覺羅外庫為禮部尚書。正紅旗都統噶褚哈為兵部尚書。正白旗副都統馬通賽為工部尚書。鑲黃旗副都統泰壁圖為吏部右侍郎。吏部左侍郎羅敏為兵部左侍郎。○陞戶部郎中薩爾圖為戶部右侍郎。兵部郎中邁音達為兵部右侍郎。刑部郎中阿哈碩塞為刑部右侍郎。刑部郎中羅多為工部右侍郎。○免陝西蘭州康熙五年分電災額賦十之三。○丁亥。陞禮部左侍郎黃機為禮部尚書。轉刑部右侍郎。蔡毓榮為左侍郎。陞內弘文院學士王清為刑部右侍郎。○戊子。予福建陣亡守備馬獻祥祭葬如例。○己丑。清明節。遣官祭

永陵。

福陵。

昭陵。

孝陵。○轉吏部右侍郎常額為左侍郎。刑部右侍郎麻勒吉為左侍郎。陞刑部郎中納布為都察院左副都御史。工部郎中覺羅阿塔為大理寺卿。禮部郎中阿思虎為太常寺卿。國子監司業白清額為光祿寺卿。吏部郎中哲庫訥為太僕寺卿。○庚寅。

上詣

太皇太后

皇太后宮問安。○以精奇尼哈番祖永烈為正黃旗漢軍都統。○壬辰。

萬壽節

上率諸王貝勒貝子公內大臣大學士都統尚書精奇尼哈番侍衛等詣

太皇太后

皇太后宮行禮。御殿王以下文武各官上表慶賀。照例筵宴。○遣官祭

福陵。

昭陵。

孝陵○遣官祭真武東嶽城隍之神○諭六部都察院等大小各衙門國家庶政皆藉羣工共襄治理項者京察留任及陞補部院各官俱以賢能簡用理應殫竭忠誠報効國家部院堂官於本衙門屬員賢否知之最真如有方正賢能者即行薦舉以備擢用庸劣不肖者即應指叅處分庶賢者知勸不肖者知儆若徇庇挾私有合於己者薦以為賢有憾於己者劾以為不肖殊負朕委任至意至於都察院科道官員職司風紀於國家應行要務即應直陳一切奸弊即據實指叅無所顧畏庶幾無負職掌自後各部院大小官員如仍循舊習不殫忠誠徇情私庇顧避嫌怨或以瑣屑細務苟且塞責必罪不宥○予福建陣亡遊擊李化龍祭葬如例○兵部議覆南贛巡撫林天擎疏叅河南河北總兵官蔡祿自閩赴任攜帶官兵眷屬四千一百餘名經長汀上杭二縣沿途索夫擡送騷擾地方請將

蔡祿處分但在赦前相應免議得旨總兵官赴任家口應用夫役爾部理應限定數目因未定數目致地方官私派擾民及談總兵濫行收用此皆爾部未加明晰之故本當一并議處既在赦前姑從寬免以後此等應用夫役仍著酌量定數具題勿復濫行給發致累小民○甲午策試天下貢士黃初緒等於太和殿前制曰朕惟帝王統一寰區必任用賢才澄清吏治使國有豐亨之象民饒樂利之休而後庶政畢修羣生克遂登上理焉朕以冲齡仰承

天眷嗣續

祖宗鴻業夙夜冰兢期於俊乂充廷廉能著績國計日盈而閭閻不擾數年於茲矣乃圖治彌殷厥效未覩其故何也國家簡任賢良以共襄治化必如何而後用當其才人稱其職歟邇來貪風未息誅求下吏以奉上官遂致不肖有司私派橫征民生益困何法而可革

其夙弊歟。至於國用浩繁。繫惟正之供。是賴。乃催科不善者。每昧於撫字。茲欲使草野免追呼之苦。而度支恒足。其道安在。爾多士詳切敷陳。朕將親覽焉。乙未

上詣

太皇太后宮問安。○諭吏部內三院各設漢軍學士一員。此係定例。今漢軍學士員缺。將漢官一并開列。且漢軍學士品級定為二品。若無三品應陞之員。方以四品官員列名。若將三品四品官員一并開列於例。不合。爾部定議具奏。陞太常寺卿周天成為內弘文院學士。予故內大臣二等阿達哈哈番圖魯赫祭葬如例。丙申。轉禮部右侍郎董安國為左侍郎。陞大理寺卿曹申吉為禮部右侍郎。以原任山東總督祖澤溥為福建總督。丁酉。予故三等阿思哈尼哈番阿錫泰巴圖魯祭葬如例。己亥。傳臚賜殿試貢士繆彤等一百五十五名進士及第出身有差。

己林多羅郡王額駙色布騰故。遣官致祭。壬寅。陞內秘書院侍讀學士綦汝楫為內弘文院學士。癸卯。免陝西岐山縣康熙五年分電災額賦十之三。陞一等侍衛米斯翰為內務府總管。○予故阿思哈尼哈番散秩大臣鄂齊禮內大臣馬爾濟哈各祭葬如例。夏四月。乙巳朔。享

太廟。遣吏部尚書阿思哈行禮。○吏部遵旨議覆嗣後內三院漢軍學士缺出。將漢軍應陞官員開列。請旨陞補。漢大學士學士缺出。停其漢軍漢人兼補。照舊例將應陞漢官會推陞補。至內三院漢軍漢學士缺出。應仍照品級考將侍讀學士等官開列。從之。○丙午。戶部議覆海上投誠鄭世襲疏。請給還伊父鄭芝龍原產。查此係已經入官估價變賣之產。不便准給。得旨。此項田產仍著給與鄭世襲。戊申。諭吏部國家諸務內則責成部院外則責成督撫。前爾部題覆御史甯爾講督撫

章奏日繁一疏曾有諭旨令內外各衙門將一應事務詳明具題速行完結近見仍沿故習凡具題之事累次駁查者甚多督撫所理事務錢穀則有一定分數盜賊刑名則有一定律例若詳明具題何至反覆若此皆由督撫草率朦混希圖完結之故至於部院將督撫具題可結之事不肯即結或明知其朦混不即叅處遷延駁查以致事務繁多嗣後督撫如將諸事不行明晰朦混具題部院即題叅嚴加處分部院將可結之事不肯即結復遷延駁查定行嚴處爾部即通行申飭諭兵部督捕嚴立逃人之法因愚民窩隱旗人逃亡日衆不得已而然非欲苦累小民也近聞有遞解逃人所過城邑村莊嚇詐搶奪及解役亦將逃人縱放借端枉道村莊同謀挾詐害民殊甚此皆由地方各官起解逃人時不嚴禁解役不將逃人嚴加桎梏之故凡城邑則有該管官員村莊則有經管約長如將

挾詐搶奪者嚴拏舉首誰敢擾民以從逃人及解役若於所過地方騷擾者鎖拏送京治以重罪毋有所縱若原起解官不嚴禁解役經過地方官不行察拏事發嚴治其罪必不寬恕爾衙門即通行曉諭直隸各省遵行
己酉建寧古塔木城 庚戌
上詣

太皇太后

皇太后宮問安 壬子子故三等精奇尼哈番顧穆德徹臣祭葬如例 甲寅叙克廈門銅山諸島功追授原任福建總督李率泰為一等阿思哈尼哈番靖南藩下都統王大用等四十六人進秩有差 丙辰以故三等阿思哈尼哈番阿錫泰巴圖魯之子顧穆襲職 丁巳命各部院滿郎中缺俱論旗分補授 考察盛京四部及順天府奉天府所屬官一等二等三等者留任老疾二員罷軟一員浮躁一員才力不及二員俱革職永不叙用

戊午原任鳳陽巡撫張尚賢循例自陳以年老令原品致仕己未

上詣

太皇太后

皇太后宮問安庚申增設六部四十五司滿主事各一員陞奉天府府尹佟弘器為大理寺卿以光祿寺卿霍叔瑾為太常寺卿辛酉

孝端文皇后忌辰遣官祭

昭陵壬戌左都御史尼滿疏言頃者流徙寧古塔尚陽堡犯人許自認修造城樓及部院衙門釋所犯之罪此等犯人家產先已籍沒入官計修工之費不啻數萬金何自而得一經奉旨回籍視稍贍之家挾詐逼勒致良民受害嗣後有認工贖罪者請緊行停止從之甲子原任一等阿思哈尼哈番希布出征贖罪將伊弟伊圖所襲之職改令希布襲替予故副都統克盛額朱孔額各祭葬如例

江南奸民沈天甫呂中夏麟奇等撰逆詩二卷詭稱黃尊素等百七十人作陳濟生編集故明大學士吳姓等六人為之序沈天甫使夏麟奇詣吳姓之子中書吳元萊所詐索財物吳元萊察其書非父手蹟控於巡城御史以聞

上以奸民誑稱謀叛誣陷平人大干法紀下所司嚴鞠沈天甫等皆棄市其被誣者悉置不問乙丑

上詣

太皇太后宮問安丙寅授一甲進士繆彤為內秘書院修撰張玉裁為內國史院編修董訥為內弘文院編修戊辰定八旗滿郎中員數宗人府四吏部八戶部十八禮部六兵部十二刑部十四工部十四督捕一凡七十七缺鑲黃旗正黃旗正白旗正紅旗鑲白旗各十缺鑲紅旗正藍旗鑲藍旗各九缺己吏部議覆御史田六善疏言卓異之員宜

以清廉為首列。若非潔已愛民，不得濫叨大典。應如所請，督撫開報卓異，先論守次論才。凡司道以下推官以上，必開某官不派節禮，不索小送，不借端詐官，不生事擾眾，知府以下知縣以上，必開某官不派雜差不重火耗，不虧損行戶，不强貸富民，而即以清吏之有無定督撫之賢否從之。庚午。

上詣

太皇太后

皇太后宮問安。刑部議覆御史田六善疏言：近見奸民捏成莫大之詞，逞其詐害之術。在南方者，不曰通海，則曰逆書；在北方者，不曰于七賊黨，則曰逃人。謂非此，則不足以聳天聽，下怖小民。臣請敕下督撫，以後如有首告實係謀反、逃人等事，即與審理情實者據事奏聞。情虛者依律反坐，毋得借端生事。株累無辜，如奸民不候督撫審結，徑來叩閭者，依光棍律治罪。查定例，不俟原問官審結，徑行

叩閭者，旗人枷號兩月，鞭一百，係民責四十板，流三千里，相應照此例行。從之。辛未，免陝西鎮原縣康熙五年分電災額賦。癸酉，諭吏部輔政大臣伯索尼在

太祖高皇帝時，授為內秘書院，黽効力在

太宗文皇帝時，任以內外大事，悉能果斷殫厥

忠誠及

太宗文皇帝賓天時，重念

皇祖恩遇，堅持忠貞之心，不惜性命，克勤皇家

在

世祖章皇帝時，亦任以內外大事，竭盡純篤

世祖章皇帝賓天時，以其勲舊大臣，夙秉忠貞

堪受重託。

遺詔，俾令輔政，恪遵顧命，畢殫忠忱，夙夜靖共

厥職，茂焉。今身既染疴，且復年邁，宜加恩寵

以示酬庸之典。著議政王貝勒、大臣、九卿、科

道會同酌議具奏。甲戌，議政王貝勒、大臣

等遵旨會議，輔政大臣伯索尼於所有一等

伯外應授爲一等公得旨索尼歷事累朝畢殫忠忱遵奉

遺詔輔理政務懋著勞績深爲可嘉著於所有一等伯外授爲一等公

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十一

實錄卷三十一

二十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十二

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙六年丁未閏四月乙亥朔輔政大臣伯

實錄卷三十二

一

索尼疏辭一等公爵得旨覽卿奏具見誠悃但錫爵酬庸國家大典卿宣力累朝忠猷茂著膺茲寵秩於理允符著即祇遵成命不必遜辭○丁丑以一等伯釋迦保爲正藍旗漢軍副都統○戊寅吏部議覆左都御史王熙疏言戶部關倉等差工部抽分蘆政造船等差俱歸并地方官請將戶工二部漢主事酌量裁減應如所請裁去戶部主事十員工部主事七員從之○己卯轉兵部右侍郎曹國

柄。為左侍郎。陞通政使劉鴻儒。為兵部右侍郎。左僉都御史王印祚。為奉天府府尹。○陞浙江按察使羅森。為陝西布政使司右布政使。雲南按察使李本晟。為浙江布政使司右布政使。山東濟南道閻廷謨。為湖北按察使司按察使。○以署都督同知陳德。充雲南鶴麗永北總兵官。○庚辰。

上詣

太皇太后

實錄卷二十二

二

皇太后宮問安。○以原任通政使司通政使左敬祖。補原官。○壬午。陞兵部督捕右理事官郭廷祚。為光祿寺卿。○予故原任一等阿思哈尼哈番都統張天福。祭葬如例。○癸未。諭吏部。選拔庶常。原以作養人材。今科進士。特加簡閱。取夏沅。張英。史鶴齡。盧琦。謝兆昌。劉澤溥。唐朝彝。丁蕙。潘翹生。楊仙枝。儲振。王曰溫等十二員。著改為庶吉士。教習滿書。○丁亥。鑲黃旗一等精奇尼哈番胡有陞。以年老

解任。命其子胡啟泰襲替。○山東道御史王伯勉疏言。推陞縣令。舊例用監生。生員。吏員出身之佐貳。按陞。臣思縣令。為民父母。此輩豈能勝任。若謂人材或有可用。請敕各省督撫。廉訪佐貳中。果有才能出眾。堪任民社者。即行保舉。始准陞授。如無保舉者。仍以閒散陞用。倘徇私濫舉。事敗即坐以徇庇之罪。下部議行。○王伯勉又言。有司捏舉。妄希議叙。百姓包荒。不堪賠累。雖鼓勸不可盡發。而優議必有實績。請照完糧例。俟三年起科完解。取具無包賠荒地甘結。報部核明。始將各官議叙。以杜冒功虐民之弊。下部議行。○戊子。

上詣

太皇太后

皇太后宮問安。○湖廣道御史蕭震疏言。屯田之制。為古帝王養兵裕國之本。臣愚以為兵屯縱不可即行。而投誠開荒之策。未有不可立行者。查投誠之眾。所攜家口。數倍正兵。若

予以荒地給以牛種。俾無失所。以為招徠之勸。一便也。再查綠旗兵有防禦之任。投誠兵無汛地之責。是綠旗之屯田難。投誠之屯田易。二便也。近例投誠兵隨標者。月給餉銀。歲費金錢八十餘萬。將來臺灣平後。尚有繼至之人。與其糜費養兵之資。何如使開荒蕪之地。每投誠若干兵。應給荒田若干畝。歲省餉銀若干兩。行之三年。照田起科。是既省餉而又增賦。三便也。查各省荒田。尚有四百餘萬頃。若將此地分給投誠兵丁。使之耕種。則軍儲日實。戶口漸繁。是力田即以阜生。四便也。疏。命戶部。兵部。行令各省督撫。確查墾荒事宜。遵行。○庚寅。以故原任一等阿思哈尼哈番都統張天福子二等侍衛張其烈襲職。○癸巳。命內國史院學士帥顏保。內秘書院學士范承謨。教習庶吉士。○乙未。

上詣

太皇太后宮問安。○輔政大臣一等公索尼原

所有一等伯。命其第五子心裕襲替。○戊戌。福建道御史李棠疏言。臣近見山西陝西總督盧崇峻。疏糾山西左布政使王顯祚婪贓六千有奇。所叅八款。皆康熙四年赦後之事。撫臣楊熙。係親臨之官。又復久任。知之必確。乃徇私隱庇。不行糾叅。請敕部處分。以為縱貪之戒。得旨。著楊熙明白回奏。并提王顯祚到京審擬。尋楊熙回奏。因未據司道府廳揭報。是以未即叅奏。部議王顯祚婪贓。援赦免罪。但係貪官。應革職。永不叙用。從之。○己亥。漕運總督林起龍。失察漕船夾帶貨物。命降三級致仕。○庚子。浙江總督趙廷臣。以病求罷。慰留之。○辛丑。

上詣

太皇太后

皇太后宮問安

五月。甲辰朔。○乙巳。夏至。祭

地於

方澤遣輔國公賴護行禮○丙午。諭吏部等衙門。民為邦本。必使家給人足。安生樂業。方可稱太平之治。近聞直隸各省。民多失所。疾苦顛連。深可憫念。或係官吏貪酷。腹削窮黎。抑或法制未便。致民失業。果何道以遂其生耶。一切民生利病。應行應革。爾內外各衙門大小文武等官。念切民依。其各抒所見。毋隱○免陝西會寧等六縣。本年分電災額賦有差○戊申。

上詣

太皇太后

皇太后宮問安○已酉。兵部遵旨議覆。海澄公黃梧歸順之後。攻剿招撫。著有勞績。所得公爵。應准其襲替。得旨。海澄公黃梧投誠之後。攻取閩安鎮。克復廈門。招撫投誠兵丁。實心効力。屢著勞績。著授為一等公。准襲十二次○庚戌。以原任廣西總督屈盡美。為漕運總督○予故福建水師右路總兵官杜永和祭

葬如例○辛亥。以山西臨晉縣歷年荒疫。特免康熙五年分額賦。并著地方官作速招徠。開墾荒地○癸丑。

上詣

太皇太后

皇太后宮問安○左都御史王熙遵旨條奏。閩廣江西湖廣等省各官。近或自置貨物。售於屬下。或巨舸連檣。裝載他方市易。行同商賈。不顧官箴。甚者指稱藩下挾勢橫行。假借營兵。放債取利。請敕部詳議。嗣後閩廣等省。王公將軍。督撫提鎮。如有恃勢貿易。與人爭利者。作何議處治罪。并嚴指稱假借之禁。庶小民得以安生。官方因之整肅。下部議行○丙辰。遣官祭關聖帝君○丁巳。以吏部郎中田本沛。為福建按察使司僉事。提調學政○戊午。予福建海澄公下陣亡守備葉雨。祭葬如例○己未。諭吏部等衙門。向來叩閣。自稱冤枉。審係虛

誣有治罪之例。其果負屈者。止將叩閣之人。伸理。承問官員。無處分定例。嗣後凡叩閣。察明果係冤枉。除本人事情。即與伸理外。承問官員。作何議處。著定例具奏。又州縣等官。因錢糧未完處分者。於未離任之先。全完。准其開復。今思民間正項錢糧。豈有拖欠。皆由不肖有司。非侵欺。即那移。若仍令在任催完。不過額外加派。百姓愈困。嗣後未離任全完開復之例。永行停止。其所欠錢糧。如旗員交於該都統。漢人交於該督撫。令照數追取。亦著定例具奏。尋吏部議覆。嗣後承問各官。將良民審斷為逃人者。降一級調用。將奴僕錯斷為主。及另戶之主。斷為奴僕者。罰俸一年。凡應革職降級之人。不行議革。議降者。亦罰俸一年。凡家產應承受之人。不與承受。錯斷不應承受之人。承受者。罰俸半年。不應革職降級。而錯議降革者。亦罰俸半年。凡未經革職之官。即擬杖罪折贖。或遇應降革之人。未叙

其功。與不抵紀錄。及控告冤枉。又不與准行者。俱問二次應得之罪。又戶部議覆。那用錢糧各官。仍照舊例處分。如係侵欺者。限一年追取。限內不能全完。將家產變價入官。從之。○廣西道御史嚴曾渠。遵旨條奏外。而督撫內而六部。皆總司法紀之官。六部居中馭外。其事權尤重。而滿漢堂司。不皆公忠體國。凡題覆章奏。定議處分。輕重寬嚴。未盡允當。曾經奉旨駁正者。不可勝舉。至刑部為民命攸關。奏讞之章。每奉有所擬太重。所擬尚輕之旨。即此類推。凡六部議處各案。其事同罰異。引例不當者。不知凡幾。至地方生民利病。下部題覆者。動稱無庸再議。如此。何以肅清吏治。加惠庶民哉。大抵滿漢堂司。官多而意見不一。人雜而賢否不齊。或滿司定一稿。而漢司爭之。或漢堂創一論。而滿堂不合。始也議論參差。繼也因循推諉。及限期既迫。反草率具奏。此皆不肯實心任事之故。請嚴飭部臣

嗣後務須大改積習。勵精整肅。嚴察司屬賢否。不時舉劾。倘仍前弊。聽都察院堂官及科道據事摘叅。分別議處。得旨。著通行申飭。○庚申。

上詣

太皇太后宮問安。○荷蘭國噶嘰吧王油煩嗎綏極差陪臣進貢方物。宴賚如例。○辛酉。平西王吳三桂。以目疾求解雲貴兩省事務。得旨。王久鎮巖疆。總理兩省。勲勞茂著。倚毗方殷。覽奏。知兩目昏瞶。精力日銷。皆因事繁過瘁。深軫朕懷。雲貴兩省事務。應作何管理。著該部議奏。○壬戌。免陝西吳堡縣本年分電災額賦十之三。○丁卯。

上詣

太皇太后

皇太后宮問安。○喀爾喀崑都崙拖音台吉遣使進九白年貢。宴賚如例。○己巳。吏部議覆福建道御史李棠條奏。例監考補中書。三年

後即陞部屬。進士舉人。乃遲至十年之久。始得官職。嗣後例監考授中書之例。請停止。將進士舉人。及在外推知教職。選擇補用。查內院中書。有撰文辦事責任。機密重地。例監補授。似屬太優。應行停止。將各科進士。照年分前後。一缺五人。咨取考試。得旨。各科進士。不必拘年分前後人數。有願考者。預行選取。堪用者。遇缺即補。○癸酉。吏部遵旨議覆平西王吳三桂。以目疾辭雲貴兩省事務。已奉俞旨。應將該藩所管各項事務。照各省例。責令該督撫管理。其大小文官。亦照各省例。臣部題授。從之。

六月。甲戌朔。內弘文院侍讀熊賜履遵旨條奏。竊臣備員侍從。遇

皇上虛已求言。不敢捭拾浮詞。以混

宸聽。謹因

聖諭所及。而推本言之。伏讀詔書曰。今聞直隸各省人民。疾苦困窮。深可憫念。或因官吏腹

削。或因法制未便。此真二帝三王之用心也。但國家日言生聚。而凋敝愈甚。日言軫恤。而瘡痍不起。日言招集。言蠲免。而流離殫尾之狀。不可勝言。邇厥由來。誠有如此。

聖諭所云者。蓋小民終歲勤勞。僅給俯仰之資。而夏稅秋糧。朝催暮督。私派倍於官征。雜項浮於正額。設一旦水旱頻仍。饑饉見告。蠲賦則吏收其實。而民受其名。賑濟則官增其肥。而民重其瘠。此不獨守令之過也。上之有監司。又上之有督撫。有司之職業在地方。上官之激勵在舉劾。伏乞

皇上將見任督撫。大加甄別。賢能者加銜久任。貪污不肖者。立賜罷斥。無令久居民上。嗣後督撫缺出。不拘內外臣子。果有端方清正。望重才優者。敕部院大臣。從公保舉。授以茲任。其考課也。以民生之苦樂。為守令之賢否。以守令之貪廉。為督撫之優劣。則廉者以勸。貪者以懲。有利必興。有害必除。而民之不得所

者寡矣。此

聖諭所已及。而臣詳切言之者也。雖然。內臣者外臣之表也。京師者四方之倡也。本原之地亦在乎朝廷而已。臣請擇其重且大者言之。一曰。政事紛更。而法制未定。我國家章程法度。其間有積重難返者。不聞畧加整頓。而急功喜事之人。又從而意為更變。但知趨目前尺寸之利。以便其私。而不知無窮之弊。已潛倚暗伏於其中。朝舉夕罷。以致盈庭聚訟。甲令游移。此時事之最急者也。伏乞

皇上敕下議政王貝勒大臣九卿科道。將國家制度。詳慎會議。凡沿革損益。參以古制。酌以時宜。勒成會典。頒示天下。則上有道揆。下有法守。垂裕無疆之業在此矣。一曰。職業隳廢。而士氣日靡。國家之設官也。滿漢相制。堂屬相維。正欲其同寅協恭。俾責無他卸。近見各衙門大小臣子。大率緘默依阿。絕少實心任事之人。甚至托老成慎重之名。以濟尸位素

餐之計。樹議者謂之疎狂。任事者目為躁競。廉靜者斥為矯情。端方者笑為迂腐。間有修身體道。讀書窮理之士。則羣指為道學。而非笑之。百計詆排。必禁錮其終身而後已。伏乞皇上立振頽風。作養士氣。申飭滿漢諸臣。虛衷酌理。實意任事。是則曰是。非則曰非。漢官勿以阿附滿官為子。堂官勿以偏任司官為計。宰執盡心論思。而不必以唯諾為休容。臺諫極力糾繩。而不必以鉗結為將順。則職業修舉。官箴整肅矣。一曰。學校廢弛。而文教日衰。學校為賢才之藪。教化之基。而學術事功之根柢也。今者庠序之教。缺焉不講。師道不立。經訓不明。士子惟揣摩舉業。以為弋科名之具。絕不知讀書講學。以求聖賢理道之歸。其高明者。又或泛濫百家。沉淪二氏。惑世誣民。莫斯為甚。伏乞皇上隆重師儒。興起學校。畿輔則責成學院。各省則責成學道。使之統率士子。講明正學。非

六經語孟之書不讀。非漁洛關閩之學不講。敦崇實行。扶持正教。命府州縣擇士子中志趨端卓。英俊可造者。各舉一二。令貢之國雍。寬其館舍。厚其廩餼。又於廷臣中。擇道高德幼之人。俾司成均。日進諸生。而陶淑之。其道必本於人倫。達乎天德。其教自洒掃應對。以至於義精仁熟。漸摩誘掖。循循有序。三載之後。學成材就。司成次其優劣。彙送吏部。量其材之大小。學之淺深。而授之秩。其公卿大夫之子弟。亦如之。至於山林隱逸之士。有經明行修。德業完備者。仍請敕下地方官。悉心諮訪。據實奏聞。朝廷優禮延聘。加意褒崇。以為士習人心之勸。則道術以正。學術以明。教化大行。人材日盛。其有補於國家也。寧淺鮮哉。一曰。風俗僭侈。而禮制日廢。禮者。聖王所以節性防淫。而維繫人心者也。臣觀今日風俗奢侈凌越。不可殫述。一裘而費中人之產。一宴而糜終歲之需。與隸披貴介之衣。倡優擬

命婦之飾。此饑之本。寒之源。而盜賊獄訟所由起也。然禮教之行。自責近始。伏乞

皇上躬行節儉。為天下先。自王公以及士庶。凡宮室車馬衣服僕從。一切器用之屬。俱立定經制。限以成數。頒示天下。俾恪為遵守。不許少有踰越。久之儉德日彰。貪風日息。民俗醇厚。而人心厚。幾於淳龐之治。不難矣。雖然。

皇躬者。又萬幾所受裁。而萬化所從出也。我皇上神明天縱。睿哲性成。今春秋方富。薰陶德

性。端在此時。伏乞慎選耆儒碩德。置之左右。優以保衡之任。使之從容閒譙。講論道理。啟沃

宸衷。涵養

聖德。又妙選天下英俊。陪侍法從。以備顧問。毋徒事講幄虛文。若夫大學衍義一書。叙千聖之心傳。備百王之治統。伏願

皇上朝夕講貫。証諸六經之義。通諸歷代之史。以為敷政出治之本。至於左右近習。必端厥

選。內而深宮燕閒。外而大廷廣衆。微而起居言動。凡所以維持此身者。無所不備。防閑此心者。無所不周。則君志清明。君身強固。坐收體乾行健之成功。是

皇上直接二帝三王相傳之心法。自有以措斯世。斯民於唐虞三代之盛。又何吏治不清。民生不遂之足慮哉。此又

聖諭所未及。而臣推本言之者也。疏入。報聞。○理藩院題。查打虎兒有一千一百餘口。未編佐領。應照例酌量編為十一佐領。設頭目管轄。從之。○戊寅。諭吏部。兵部。前因民間之疾苦。諭大小各官。各陳所見。據各官奏。稱民間之疾苦。皆由督撫之貪酷。今督撫之任。不論滿洲。漢軍。漢人。應否揀選賢能。及提督總兵官。亦應否將滿洲一并錄用。著議政王。貝勒。大臣。九卿。科道。會議具奏。○以刑部郎中壽以仁為雲南按察使司僉事。提調學政。○已卯。

上詣

太皇太后

皇太后宮問安○予故原任禮部侍郎兼內國史院學士李真棠祭葬如例○順天府府尹李天浴疏言徵收錢糧民不苦於正額之有定而苦於雜派之無窮查賦役全書夏有稅秋有糧請夏稅定於五六兩月徵收秋糧定於九十兩月徵收戶部議恐於軍餉有誤應不准行得旨此徵收錢糧著照李天浴所奏夏稅定於五月六月秋糧定於九月十月○辛巳議政王等遵諭議覆各省督撫不論滿洲漢軍漢人應揀選賢能推用至於提督總兵官係防守地方亦應不論滿洲漢軍漢人揀選賢能推用得旨布政使按察使管通省錢穀刑名今用滿洲督撫之省亦應用滿洲藩臬著再議以聞○吏部尚書阿思哈疏言各省所解逃人其有主認識實係逃人者即照例處分給與本主若無主認識非係逃人

者免其入官即釋放為民拏獲逃人之地方官不准議叙兵部以不便更改定例議覆得旨各省所解逃人據供自認但不知旗分佐領者照例入官發給旗下如不行招認又無主認識者免入官著為民至地方官將良民捏稱逃人拏解者將原解官照定例議處○甲申戶科給事中查培繼疏言浙省海鹽縣鷹戶勾通營兵及投充惡黨指官捕鷹百十成羣分投鄉鎮遍擾民家是以沿海百姓每遇捕鷹之時農業荒廢請敕嚴禁以除民害得旨採捕鷹鷂之人借名生事騷擾地方該管官並不嚴禁殊屬可惡嗣後如仍前弊將該將軍督撫總兵官副都統協領等從重治罪○乙酉

上詣

太皇太后宮問安○以原任廣東左布政使于際清為山西布政使司左布政使原任山東右布政使于朋舉為湖廣布政使司右布政

使○庚寅。免山西繁峙等三縣衛。本年分電災額賦有差○壬辰。議政王等遵諭再議。布政使。按察使。管通省錢糧刑名。用滿洲督撫之省。亦應用滿洲藩臬。從之○癸巳。免陝西淳化縣。本年分霜災額賦有差○乙未。陞叅領安珠護。為正紅旗副都統。叅領胡巴克圖。巴圖魯。為正藍旗副都統○丙申。予故輔政大臣一等公索尼祭葬。謚文忠。加賜鞍馬二匹。銀二千兩。仍加祭四次○丁酉。廣東巡撫王來任。請免粵東無徵雜稅四千有奇。以甦民困。部議不准。

實錄卷二十三

二

上特允之○戊戌。免陝西涇州。本年分電災額賦有差○己亥。予故原任禮部侍郎兼內弘文院學士薛所蘊祭葬如例○戶科給事中姚文然疏言。四川。湖廣。江西。浙江。江南五省。採辦楠木。每有不肖官役。借事嚇詐。封鎖民房。砍伐墳樹。百姓受殃。必用賄求免。況採木原有丈尺定式。乃不問大小。砍山陸運。假公

行私致累小民。請敕嚴禁。得旨採辦楠木。以備大工之用。不肖官役。及姦商土棍。借名生事。苦累小民。著督撫嚴禁。

實錄卷二十三

二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十三

監修總裁官光祿大夫太保兼太子太傅保和殿大學士兼戶部尚書三等伯加四

級臣內閣光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙六年丁未秋七月癸卯朔享

實錄卷二十三

太廟遣都統穆里瑪行禮○

上詣

太皇太后

皇太后宮問安○戶部題嗣後各關監督應仍差滿漢賢能官員庶使惡棍無漏稅之弊而額課亦不致缺少得旨前各關抽稅因差部員筆帖式等擾民故爾停止今布政司道官未嘗盡裁且各省有知府同知通判等官豈不可令其管理何又請差滿漢官員各關稅

仍交地方官徵收○甲辰戶部等衙門議覆

左都御史王熙請禁官員貿易之害一疏嗣

後王公以下文武大小各官家人強占關津

要地不容商民貿易者在原犯之地枷號三

個月係民責四十板旗人鞭一百其縱容家

人之藩王罰銀一萬兩公罰銀一千兩俱將

管理家務官革職將軍督撫以下文武各官

俱革職若兵民商人假稱王公文武各官之

名照光棍例治罪貨物入官得旨有橫行欺

壓者為首之人照光棍例治罪餘依議○乙

巳先是三月內輔政公索尼等奏請

皇上親政

上留中未發至是下旨曰朕年尚幼冲天下事

務殷繁未能料理欲再俟數年輔政臣履行

陳奏朕再三未允輔政臣等奏云

世祖章皇帝亦於十四歲親政今主上年德相

符天下事務總攬裕如懇切奏請朕乃率輔

政臣往奏

太皇太后

太皇太后諭以帝尚幼冲。如爾等俱謝政。天下事何能獨理。緩一二年再奏。輔政臣等復奏。主上躬親萬幾。臣等仍行佐理。

太皇太后俞允。擇吉親政。其吉期。禮部選擇以聞。○丁未。工科給事中李宗孔疏言。各官選補。俱按年分輪授。獨招民百家。送盛京者。選授知縣。超於各項之前。臣思此輩驟得七品正印職銜。光榮已極。豈在急於受任。請以後

招民應授之官。照各項年分。循次錄用。

上是之。隨諭吏部。罷招民授官之例。○戊申。

上詣

太皇太后

皇太后宮。問安。○予進剿西山陣亡副將郝爾德。叅將李有實。遊擊李吾貴。都司僉書王進忠。署都司僉書楊九成。守備孟淑孔等。祭葬如例。○己酉。

上躬親大政。御太和殿。王以下文武官員。上表

行慶賀禮。宣詔天下。詔曰。朕以冲齡嗣登大寶。輔政臣索尼。蘇克薩哈。遏必隆。耆拜。謹遵皇考世祖章皇帝遺詔。輔理政務。殫心効力。七年於茲。今屢次奏請。朕承

天地

太皇太后之命。躬理萬幾。惟

祖宗付託至重。海內臣庶。望治方殷。朕以涼德。夙夜祇懼。天下至大。政務至繁。非朕躬所能獨理。宣力分猷。仍惟輔政臣。諸王。貝勒。內外文武大小各官。是賴。務各殫忠盡職。潔已愛民。任怨任勞。不得辭避。天下利弊。必以上聞。朝廷德意。期於下究。庶政舉民安。早臻平治。凡我軍民。宜仰體朕心。務本興行。樂業安生。以迓休寧之慶。於戲。政在養民。敢虛

天地生成之德。時當親政。恒念

祖宗愛育之心。布告天下。咸使聞知。○詔內恩赦。凡一十七條。○分遣內秘書院學士劉芳。躅等。告祭嶽鎮海瀆諸神。○是日。

上御乾清門聽政。嗣後日以為常。

上詣

太皇太后

皇太后宮問安。○壬子。冊封故鎮國公追封和

碩惠順親王祐塞妻博爾濟金氏為和碩妃

○癸丑。諭吏部。輔政臣蘇克薩哈。遏必隆。鰲拜。於

皇考世祖章皇帝時。任以大事。純篤報効。及

皇考不豫。以其勲舊大臣。夙稟忠貞。堪受重托。

遺詔。俾令輔政。恪遵

顧命。殫竭忠忱。靖共厥職。前因索尼。年邁染病。

已加官爵。今朕躬理萬幾。蘇克薩哈。遏必隆。

鰲拜。亦應加恩。以示酬庸之典。議政王。貝勒。

大臣。九卿。科道。會同酌議以聞。○添設理藩

院四司主事。各一員。○甲寅。命武官照文官

例。一體引見。○吏部題。議政王。貝勒。大臣。九

卿。科道。等會議裁官一疏。應將河南等十一

省。俱留布政使各一員。傳其左右布政使之

名。至江南。陝西。湖廣三省。俱有布政使各二

員。駐劄各處分理。亦應傳其左右布政使之

名。照駐劄地名。稱布政使。其各省守巡道一

百八員。推官一百四十二員。俱照議一并裁

去。得旨。允行。○吏科給事中。簡捷達疏言。

皇上躬親大政。

天心之眷顧方殷。

祖宗之付託至重。自非講求經史。研窮義理。深

知前代興衰治亂之原。以及人情物理。稼穡

艱難之事。則凡揆幾審務。用入行政。何由盡

歸於至當。以法天下而垂後世。臣請敕下禮

部。詳議講讀之規。取內府所藏

世祖章皇帝譯定諸書。擇其深切治理。如五經

四書。皆修身治國平天下之道。惟通經而後

明理。史書通鑑。備載歷代治亂得失之事。必

鑒古乃能知今。

皇上於聽政之暇。講貫紬繹。寒暑無間。仍請慎

選老成清正之臣。以充講讀之任。使之朝夕

侍從盡心啟沃。於以增益高深。濬發神智。聖德愈進於高明。而聖治日躋於光大矣。報聞。○乙卯。太子太保內大臣蘇克薩哈疏言。臣才庸識淺。蒙

先皇帝眷遇。拔授內大臣。夙夜悚懼。恐負大恩。值

先皇帝上賓之時。惟願身殉。以盡愚悃。不意恭奉

遺詔。臣名列於輔臣之中。臣分不獲死。以蒙昧

餘告勉竭心力。異圖報稱。不幸一二年來。身嬰重疾。不能始終効力於

皇上之前。此臣不可逭之罪也。茲遇

皇上躬親大政。伏祈

睿鑒。令臣往守

先皇帝陵寢。如綫餘息。得以生全。則臣仰報

皇上養育之微忱。亦可以稍盡矣。輔臣等稱旨

爾等係受

皇考遺詔。輔朕七載。朕正欲酬爾等勤勞。茲蘇

克薩哈奏請守

陵。如綫餘息。得以生全。不識有何逼迫之處。在此何以不得生守。

陵何以得生。朕所不解。著議政王貝勒大臣會議具奏。○丁巳。中元節。遣官祭

永陵。

福陵。

昭陵。

孝陵。○議政王等奏。將蘇克薩哈及伊子孫並

本旗下弟兄俱拏問。輔臣等稱旨依議。俱著

拏問。○己未。和碩康親王傑書等會議得蘇

克薩哈疏稱往守

陵寢。如綫餘息。得以生全等語。蘇克薩哈係輔

政大臣。並無危急之處。在此何以不存伊命。

令往

陵寢。伊命得生。方歸政於

皇上。伊即欲往守

陵寢。豈非不願歸政之意。罪一。贅拜。遏必隆舉

首蘇克薩哈前因

皇上以弓軟加硬。我等同蘇克薩哈三人看時。蘇克薩哈云。我們此人寡嘴瑣碎。自作知識。有賴塔庫。塞本得。及弓匠等証。審問蘇克薩哈。據供我並不曾說。但賴塔庫。塞本得等。既說是實。我有何辨處。據此。恣意欺

主藐誹罪二。蘇克薩哈將欺

主藐誹緣由。既供賴塔庫。塞本得等供稱是實。有何辨處。後又改供。塞本得係鰲拜之姪。塞

本得說是實。眾人自然供說是實等語。伊將

實情遮飾。欲圖免罪。巧供罪三。賴塔庫供出

蘇克薩哈。曾將

皇上所用值日之弓。令人持至中和殿。置放。將弓拋擲。伊今雖巧供。日遠忘記。但據賴塔庫供稱。蘇克薩哈將所執之弓拋擲等語。欺藐皇上是實。罪四。鰲拜。遏必隆等。以

皇上親政之日。將近。商議啟奏。應行事宜。蘇克薩哈云。未定誰是主持。啟奏之人。如何議得。

將公議啟奏之事。以為不知。豈非伊意不願罪五。

皇上親政慶典。頒布詔赦。蘇克薩哈云。必欲頒行。應令議政王貝勒大臣九卿科道會議等語。但詔赦乃

皇上密擬。臨期頒行。臣下豈可擅議。此皆因不合其意。不悅之言。罪六。

皇上因蘇克薩哈奏請守

陵之疏。不解所謂。遣米斯翰等往問。伊稱

世祖皇帝卜地時。蒙諭朕萬歲後。爾等大臣之

墓亦葬

陵寢近地為善。我即叩謝。若得如此。幸甚。今問

又稱卜閱

陵地。非我一人侍從。曾有索尼。遏必隆。我等三人。一齊叩謝等語。豈非伊目無同列大臣。將諸臣共奉之旨。捏稱一己奉命。罪七。蘇克薩哈供稱。

世祖皇帝賓天時。我曾許殉死。蒙

世祖皇帝諭云。爾不知死事易。守主事重等語。伊既不能殉死。又不念

先帝遺詔。終其所守。背負

遺詔。奏請欲往

陵寢。罪八。蘇克薩哈供稱。議立

皇上時。諸臣在東間內。我在

主前。恭送

御諱。止我獨送。其不令宮人殉死。亦獨諭我一人。其圖海授為都統。亦獨諭索尼一人等語。

今據鰲拜。遏必隆。供稱所奉各旨。皆我等共奉者。惟送

御諱。止令伊送等語。蘇克薩哈將四臣共奉之旨。以為伊身獨寵。巧供自奉。罪九。恭送

世祖皇帝梓宮歸

陵。鰲拜步行哭送四五里。蘇克薩哈既後趕到。

理應步行哭送。乃乘馬倚傍

梓宮哀哭。不久即回。豈非背負

先帝之恩。罪十。蘇克薩哈雖供曾屢次奏過

太皇太后。夕歸政於

皇上。朝即具疏懇往

陵寢居住等語。但四臣盟誓。凡欲奏事。公同啟

奏。蘇克薩哈背誓言。自行啟奏。罪十一。蘇克

薩哈供。去坐湯時打炕。曾將無用之磚。用了

是實。非係

陵上所用等語。據原任郎中席特庫供。

陵上所用之磚。拏去茶房廚房。并伊炕上用了

是實。輔臣拏去。馬能禁阻等語。蘇克薩哈以

身為輔臣。將

陵上所用之磚。恣意取用。罪十二。蘇克薩哈供。

往盛京時。因動土之期忙促。不曾恭謁

陵寢。是實等語。伊因深念

先帝。方欲往守

陵寢。今如何不謁。豈非忘懷

先帝之處。罪十三。鰲拜。遏必隆。曾向蘇克薩哈

言。恐

御前有奸惡之輩。暗害忠良。我等應將

太祖

太宗所行事例敷陳。且

世祖遺詔。亦令遵照

太祖

太宗例行。數次差人向伊商議。因所奏之事。係

塞奸惡。顯忠良。為

主為國之奏。不合其意。不肯列名。罪十四。詰問

蘇克薩哈不肯列名之故。據供。我說教導

主子之處。誰有意見。各行陳奏。何必會同列名

等語。及問往來商議之伊子查克旦。又稱並

無此言。明係巧捏供稱。罪十五。鰲拜遇必隆

差席哈納等。向蘇克薩哈商議。

皇上親政後。所奏事件。在何處批理。伊不以

皇上親政為喜。乃云政務既歸於

皇上。宣召商議。不必去。二三次後。只說與同事

之人商議等語。豈非欺藐

皇上之言。罪十六。鰲拜遇必隆。差席哈納。卓靈

阿。往問蘇克薩哈。奉

太皇太后

皇上諭旨。雖親政。爾等仍同輔理。今言宣召不

必去。是何主意。蘇克薩哈始認此處甚差。並

未想到。有席哈納。卓靈阿等証。蘇克薩哈後

又改供。

皇上御旨來召。又豈可不去。我為何出此言。但

席哈納。係遇必隆三佐領下人。卓靈阿。係遇

必隆親家。所以如此供說等語。蘇克薩哈知

所言重大。欲圖免罪。巧供。罪十七。蘇克薩哈

供稱。將卓靈阿之弟。選取侍衛時。輔政大臣

索尼說。此係紊亂朝政。已經正法犯人之子。

不宜選取侍衛。曾與鰲拜相爭。今年又將卓

靈阿之兄白成額陞授等語。但卓靈阿之父。

因問罪太過。已蒙

世祖皇帝。將伊等發出包衣。卓靈阿除授內院。

且蘇克薩哈。亦將卓靈阿。從內院取至批本

處所。其白成額。堪以効用。所以陞授。如果陞

授不當。蘇克薩哈彼時。不曾卸政。為何不言。

而今乃追論

世祖皇帝時已結舊案。罪十八。鰲拜過必隆供稱。我們入奏時奉

上諭。你們忘記

太皇太后祖母召你們輔理之旨麼。我們回奏何敢忘記。

皇上若召在何處。遵旨就在何處。出來時差批本處岳石。傳達禮。將此旨說知蘇克薩哈。伊又捏稱岳石。傳達禮。曾說下午進去。清晨不必進去等語。據岳石。傳達禮供。鰲拜過必隆並不曾說晚進早進之處。我們亦不曾向蘇克薩哈說此言等語。將無影之詞。巧捏供稱。罪十九。蘇克薩哈將毆打郎中代度已經革職之尼龕。竟行復用。又將別旗那拉氏。以同姓聯收。蘇克薩哈奉

遺詔輔政。而不篤行為政。任意亂行。罪二十。蘇克薩哈奏稱。始終不能盡報等語。初七日進表歸政。

皇上特下諭旨。酬勞加恩。已經議奏。又云何處未盡。豈非不能稱伊異心之處。罪二十一。蘇克薩哈奏稱。欲往

陵寢。特以索尼染病給職。伊染病不曾給職。因而要請。罪二十二。蘇克薩哈將內院收貯故明洪武實錄。擅取回私家觀看。伊欲效洪武所行何事。罪二十三。蘇克薩哈向班布爾善等稱說。周公輔佐成王。成王時年十四。至二十餘歲。方歸政務等語。豈非不願

皇上親政。伊仍執持政務。以符紊亂之心。罪二十四。以上蘇克薩哈所犯二十四罪。俱實。伊係輔政大臣。有負

世祖章皇帝眷育厚恩。不仰體

遺詔。以盡忠誠。懷抱奸詐。存蓄異心。欺藐

主上。種種任意詭飾之罪。甚大本朝並無犯此等之例。應將蘇克薩哈官職俱行革去。即凌遲處死。蘇克薩哈之子內大臣查克旦。不行勸阻。革職。即凌遲處死。一等侍衛穗黑塞黑

畢郎中那賽候補塞克精額蘇克薩哈之姪
圖爾泰俱革職蘇克薩哈之子達器德器孫
倭克扎蘇克薩哈親弟蘇嗎喇之子海蘭無
論已到歲數未到歲數皆斬立決伊等家產
籍沒妻孥一并交內務府蘇克薩哈如有姪
孫並家產一并籍沒為奴白爾黑圖係前鋒
統領自別旗尋歸認為弟兄知蘇克薩哈匪
為不行勸阻反附其惡串為心腹額爾德烏
爾巴係護軍叅領一等侍衛乃蘇克薩哈之
叔之弟亦知蘇克薩哈匪為不行勸阻反附
其惡串為心腹據此白爾黑圖額爾德烏爾
巴俱革職皆斬立決二等侍衛占布柱等三
十七人俱革職為兵丁王府長史尼龕因毆
打郎中代度曾經處分革職蘇克薩哈係伊
一姓復行起用據此尼龕亦革職為兵丁獄
具奏聞

上知鰲拜等怨蘇克薩哈數與爭是非積以成
讐與其黨班布爾善等構成罪款必欲置之

極刑堅執不允所請鰲拜攘臂

上前強奏累日竟坐蘇克薩哈處絞其子查克
旦等俱如議○禮部尚書黃機等奏請纂修
世祖章皇帝實錄得旨

皇考世祖章皇帝勵精圖治敬

天法

祖無事不以國計民生為念鴻功偉業載在史
冊理宜纂修實錄垂示永久以昭大典這本
說得是著詳議具奏○山東道御史周季琬
疏言

皇上紹膺寶曆

南郊大祀歲一舉行奉

太祖高皇帝

太宗文皇帝並配聿崇報本之禮惟是

世祖章皇帝以創業垂統之君文德武功光昭

萬世升遐以來未奉

神主於

郊壇伏乞敕下禮部修明祀典即奉

世祖章皇帝配享

郊壇。斯於孝經嚴父配天之義。深合而曲當矣。

上是其言。下禮部詳議。○福建道御史常錫印

疏言。

慈和皇太后誕育

聖躬。既上尊號。而

神牌猶奉於

陵寢。廟祀大典。未聞議及。請敕禮部。詳稽舊典。

作何崇祀。擇吉舉行。時禮部尚書黃機。同日

上請。命一并議奏。○癸亥。議政王等會議加

恩輔臣。遇必隆於所有一等公外。授為一等

公。鰲拜於所有二等公外。授為一等公。從之。

○甲子。陞通政使左敬祖。為都察院左副都

御史。○乙丑。

上詣

太皇太后

皇太后宮。問安。○戊辰。禮部議覆。山東道御史

周季琬請崇配

天之禮一疏。查順治五年冬至奉

太祖高皇帝配享

圜丘。於祀前一日。遣官各一員。告祭

天地

太廟

社稷。越三日。頒詔布告天下。又查順治十四年

二月初五日。奉

上諭。冬至祈穀祭

天。俱奉

太祖高皇帝

太宗文皇帝配享。夏至祭

地。亦奉

太祖高皇帝

太宗文皇帝配享。著為定制。欽遵在案。臣等恭

惟

世祖章皇帝。續承

太祖高皇帝

太宗文皇帝鴻業。統一寰區。至聖至神。與

天地合德。應同

太祖高皇帝

太宗文皇帝配享

園丘

方澤。俟神位等項。製造將完。擇吉照例配享。前期遣大臣各一員。告祭

天地

太廟

社稷。次日。配享

園丘。再擇吉日。配享

方澤。此配享二壇祭典。俱照冬至夏至祭典例行。

世祖章皇帝。同

太祖高皇帝

太宗文皇帝行配享

園丘

方澤之禮。例宜布告天下。其應行事宜。當酌量舉行。至於祈穀祭祀。已經奉旨停止。配享祈

穀。無可議。得旨。是。依議。○先是。御史戈英疏

奏。江西廣信諸府。巧立提甲名目。私派累民。

奉旨。督撫察奏。尋據巡撫董衛國奏。覆並無

私派。總督郎廷佐奏。覆。提甲之弊。臣風聞如

御史言。御史夏人佺。又糾董衛國。朦混徇庇。

奉旨。該督逐一嚴審具奏。至是。郎廷佐亦依

董衛國前疏。合詞具奏。部議。准令結案。得旨。

江西提甲。私派累民。戈英疏。叅有據。郎廷佐

前疏。亦云訪之甚確。與臺臣指叅無異。今與

巡撫會題。又稱並無私派。如此。則前疏果何

所據。且夏人佺。糾董衛國。朦混徇庇。奉有前

旨甚明。既違例設立提甲。行察之時。又遲延

至一年七月之久。爾部不加嚴察。即徇情議

覆。殊為非是。其仍令該督。嚴行確察。如仍前

朦混。並治以罪。○輔政大臣公鰲。拜遏必隆。

奏。辭加賜一等公。不允。○陞前鋒叅領碩岱。

為前鋒統領。○已巳。禮部遵旨詳議。

世祖章皇帝實錄編纂事宜。查會典開載。凡修

實錄史志等書。內閣官充總裁。翰林院學士等官充副總裁。皆出欽命。其纂修收掌膳錄等官及編纂事宜。應聽內閣請旨題定。又查順治九年纂修

太宗文皇帝實錄。執事官賜宴一次。月給桌飯銀兩。應照此例遵行。從之。○河道總督楊茂勲題報。桃源南岸烟墩口決。趨入洪澤湖。隄衝三百餘丈。命速行修築。○庚午。和碩鄭親王側妃薨。遣官致祭。○陞順天府府尹李天浴為通政使司通政使。○壬申。免甘肅所屬寧州。安化等四州縣。康熙五年分霜災額賦有差

八月。癸酉朔。○丙子。秋分。夕

月於西郊。遣都統覺羅巴爾布行禮。○

上詣

太皇太后宮。問安。○丁丑。遣大學士李蔚祭

先師孔子。○戊寅。祭

大社

大稷。

上親詣行禮。○輔政大臣一等公遏必隆原所有一等公。命其子法喀襲替。輔政大臣一等公鰲拜原所有二等公。命其子那摩佛襲替。○已卯。令河南。山東。山西。江南。浙江。見駐投誠官兵。開墾荒地。自康熙七年始。每名給五十畝。預支本年俸餉。以為牛種。次年停給。三年後照例起科。○庚辰。以原任陝西按察使塗應泰為江西按察使司按察使。○辛巳。

太宗文皇帝忌辰。遣官祭

昭陵。○壬午。以光祿寺卿郭廷祚為順天府府尹。○癸未。

太祖高皇帝忌辰。遣官祭

福陵。○兵科給事中吳國龍疏請加上

太皇太后

皇太后徽號。下部議典禮。○吳國龍又疏請

皇上幸學。得旨臨雍釋奠大典。理宜舉行。前已有旨。修理聖廟國學。俟修完時。著該部擇吉

奏聞○甲申。遣官祭

歷代帝王○遣官祭城隍之神○科爾沁固倫額駙和碩卓禮克圖親王畢爾塔噶爾來京病故。賜銀一千兩。命內務府總管米斯翰辦理喪事。其需用等物。俱交工部備辦。觀回科爾沁時。遣內大臣二員。禮部理藩院大臣各一員。侍衛十五員。往送○乙酉。兵部議奏。凡大兵交戰。持纛之人。在八旗之前首進者。賞銀一百兩。給與官職。次進者賞銀八十兩。三進者賞銀六十兩。若其前將及十人。而持纛之人。續進者。將先進之人。給與官職。持纛之人。賞銀五十兩。并將該弁註冊送部。永為定例。從之○丁亥。

上詣

太皇太后

皇太后宮問安○庚寅。禮部奏請

世祖章皇帝配

天日期。得旨。

太祖高皇帝配

天禮儀。係冬至舉行。今冬至已近。

世祖章皇帝配享

園丘。著即於冬至大祀之日舉行。其配享

方澤。於十一月十六日舉行○予四川陣亡副

將贈都督同知張仲勝。守備贈都司僉書俞

之祿等。各祭葬如例○辛卯。陞內國史院侍

讀學士楊永寧。為光祿寺卿○壬辰。予故正

白旗蒙古副都統顧魯古。祭葬如例○甲午。

予故工部尚書傅維麟。祭葬如例○乙未。山

西陝西總督盧崇峻。丁祖母憂。命在任守制

○丙申。

上詣

太皇太后

皇太后宮問安○喀爾喀土謝圖汗扎薩克圖

汗。遣使進九白年貢。宴賚如例○丁酉。

上幸南苑行圍○予故原任左副都御史宋徵

輿。祭葬如例○喀爾喀額爾克戴青台吉遣

使進貢。賞賚如例。○戊戌。山東道御史徐越疏言。漕河以天妃閘為咽喉。而天妃閘。受黃淮二流。黃水不分。淮水萬不能導。考故明萬曆年間。曾於清河縣黃家嘴地方。挑開支河。以分黃水之勢。由清河縣娘子莊五港口入海。淮水遂得順流入閘。自支河故道廢而不講。運河屢淤。下流屢決。今更有可慮者。清河北岸。陡起沙洲。將黃流之正衝逼住。直射清口。使淮水不得東。而黃流直灌閘門。水勢高。運河丈餘。重運過閘。總督親督人夫千餘。牽挽出口。日不過十數船。且黃水沙濁。全入運河。則河身日淤。兩岸增高。水行地上。城郭廬舍。如在深谷中。建義蘇嘴等五大險工。歲費帑金。其山陽之王家營。安東之毛家口。桃源之龍窩口。見在衝決。此皆黃水不分之害也。黃水阻遏。淮水不能東流入海。以致高家堰將傾。而周家橋。翟家壩。處處告危。橫溢高寶等湖。水勢瀾漫。致失漕船牽挽之路。此黃

水不分。淮水不導。而淮水又為害之甚也。至清江浦。夾於兩水之間。漕糧歲經此地。關稅鹽課。均有賴焉。臣察此地形勢。自奶奶廟至天妃閘。內為運河。外為黃河。相距不足二三丈。其南岸名為遙灣。即文華寺。內為運河。外為淮河。相距亦僅數里。稍有疎虞。黃淮合一。即不能保有淮郡。自康熙二年至今。或守包家園。或疊三城壩。或救楊家廟。或護文華寺。或防高家堰。或議閉周家橋。或議築翟家壩。或議復減水壩。此皆補救之方。而非挈領之道也。請敕河漕諸臣。速將黃家嘴地方舊有形勢之支河。挑濬成渠。使分黃河之勢。以下海。更於桃源宿遷等縣而上。多開支河。以分上流之汕湧。於安東雲梯關而下。宣洩下海水道。以接黃流之湍溜。其清河口沙洲。速行挑去。天妃閘內河底。及時挑濬。使淮水刷沙入江。而天妃壩及遙灣。增築石工。自是一勞永逸。有濟通漕者也。下部詳議。○庚子。停武

職告降補用例○辛丑山西陝西總督盧崇峻疏報甘肅提督張勇等咨稱邊內住牧番衆部落蓋數遷移出○承順德化戢志歸巢下部知之

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十四

監修總裁官光祿大夫太保兼太子太傅併和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙六年丁未九月壬寅朔○癸卯理藩院

實錄卷之四

題崇德八年頒給蒙古律書與順治十四年

定例增減不一應行文外藩王貝勒等將從

前所頒律書撤回增入見在增減條例頒發

從之○甲辰設立山東泰安營守備千總把

總等員抽撥文登中左兩營兵二百名安東

營兵一百名駐防泰安等州縣○乙巳禮部

會同內院恭議

孝康慈和莊懿恭惠崇天育聖皇后神位奉入

奉先殿應於

世祖章皇帝神位之右奉安得旨是○兵部議覆山東武定營汛廣兵單請將登州鎮左營額兵九百名內抽撥四百名添入武定營其登鎮留兵五百名改為水師營從之○丙午纂修

世祖章皇帝實錄命大學士班布爾善為監修總裁官大學士巴泰圖海魏裔介衛周祚李蔚為總裁官學士塞色黑禪布帥顏保岳思泰多諾明珠范承謨劉秉權周天成劉芳躅

聖祖實錄卷二四

田逢吉纂汝楫為副總裁官侍讀學士達哈他馬爾堪納桑阿盧震侍讀喇沙里杜冷額內圖額色噶卜喇田啟光典籍伊爾哈噶佈喇王國安董昌國為滿纂修官侍讀學士單若魯田種玉侍讀宋德宜熊賜履編修田麟王勗李平張玉書朱世熙檢討李天馥陳廷敬吳本植朱之佐申涵盼為漢纂修官諭曰卿等督率各官敬慎纂修速竣大典表彰謨烈以副朕繼述顯揚

先德之意○陞禮部郎中金維藩為浙江按察使司按察使○丁未

上自南苑回宮詣

太皇太后

皇太后宮問安○以大學士魏裔介吏部尚書

杜立德為武會試正考官戶部右侍郎嚴正

槩學士田逢吉為副考官○先是八旗生員

舉人進士停止考試至是復命滿洲蒙古漢

軍與漢人同場一例考試其生童於鄉試前

聖祖實錄卷二四

一年八月內考試從御史徐誥武請也○戊

申湖廣道御史蕭震疏言國用不敷之故皆

由於養兵以歲費言之雜項居其二兵餉居

其八以兵餉言之駐防之禁兵藩兵居其二

綠旗兵又居其八今黔蜀兩省地多人少誠

行屯田之制駐一郡之兵即耕其郡之地駐

一縣之兵即耕其縣之地駐一鄉之兵即耕

其鄉之地如此則國家養兵之費既省而兩

省荒田亦可漸闢矣下部議行○蕭震又言

叛案接緝官吏。定議停陞。臣愚以為叛逆雖在不赦之列。接緝各官。不犯不赦之罪。查各案中。有年月久遠。疊逾限期者。各犯之逃亡既無踪跡。失察之前官。又經去任。而徒責之後人。時日愈久。則捕捉愈難。騷擾愈甚。遂有急於銷案。因而誣良為叛。并借別案之名。以結本案。又况原報之時。其住址姓名人數。未必一一皆真。則斷斷不能緝獲。後任之官。一經掣籤。即掛停陞之案。更復何心任事。而不肖者。保無有隱匿不報。以多報少。為自全功名之計者乎。奸人蠱役。指稱告密。誣讎嚇詐。雖審屬虛誣。而被誣之人。身家已破。且每滿一限。地方官取結一次。督撫題報一次。部臣議覆一次。各衙門多一檔案之煩。即

皇上多一批閱之勞。臣請恩赦以前。凡接緝叛案。免其停陞。仍照案緝拏。恩赦以後。承緝接緝丁憂陞任之官。應分別酌議。其丁憂陞任官留任之例。接緝官停陞之例。概行停止。下

部議行○甲寅

上詣

太皇太后

皇太后宮問安○乙卯。以故三等阿思哈尼哈番色特爾之姪鄂山襲職○免浙江奉化等十六縣台州一衛。本年分旱蝗額賦有差○吏部題查定例。滿洲蒙古漢軍廕生監生武官之子。以部院衙門用。文官之子。照品級隨旗上朝。嗣後不論文武。年至十八歲。文義優者。以部院衙門用。其不能學習情願隨旗上朝者。各照品級。准其隨旗上朝。得旨是。其順治十八年廕生監生。亦著照此行○吏部議覆。山西巡撫楊熙疏言。晉省守巡道俱裁。糧驛事務。無官管理。仍留冀寧守道管理。其鹽法歸運使兼管。應如所請。從之○戶部議覆。河南道御史徐誥武疏言。江南淮海道專管海防。地方事務。俱停其兼管。其淮安關稅等項。亦宜委員管理。應如所請。并行文直隸各

省將各關事務俱委專員管理從之○辛酉皇子承瑞生○壬戌以故一等阿思哈尼哈番金俊之子金聲振襲職○免浙江象山等六縣康熙五年分水災額賦有差○癸亥

上詣

太皇太后宮問安○甲子叙剿西山賊寇功加四川提督一等阿達哈哈番鄭蛟麟一等阿忠哈尼哈番又一拖沙喇哈番○戶部議覆甘肅巡撫劉斗疏言積貯米石恐年久汜爛請變價另糴新穀以備賑濟得旨依議但舊穀變價另糴新穀恐地方官借端擾民令該撫曉諭申飭如有此等情弊即行叅奏○工部議覆直隸山東河南總督白秉真疏言山東督標所裁之兵係抽調改設當日但請馬步戰兵盈甲其守兵並未請造無從查報查所裁俱係舊兵若無盈甲向來防剿作何披戴應行令確查照數貯庫得旨裁去守兵原未有盈甲必欲查取恐致科餉賠造貽累窮

兵著免查貯庫○山西巡撫楊熙疏言強盜真偽惟在地方官虛公細鞠自盜案留任之例行而地方官惟以速結為事蓋恐盜案未結則不得陞轉於是有誣民為盜期於完數者矣又恐上司之覆勘則有不留活口不留疑竇者矣請仍照律緝盜以律之定限為各官之處分免其留任勒緝得旨近見各省題報盜案多稱監斃淹死病故拒捕殺死等項其留任緝盜各官有誣良為盜捏報充數者亦未可知楊熙所奏照律緝盜甚是下部議行○丁卯陞內務府郎中布達禮為內國史院學士吳格塞為內秘書院學士穆舒為內弘文院學士○免福建龍溪等五縣本年分旱災額賦○戊辰

孝慈高皇后忌辰遣官祭

福陵○己巳授固山貝子尚善女為縣君壻阿喇卜坦為固山額駙○追贈故山西河保營遊擊石登岱為叅將予祭葬廕一子入監讀

書先是姜瓖叛石登仕家屬十八口全被殺戮至是因石登仕孫石繼祖叩關乞卹也○刑科給事中胡悉寧疏言○

皇上親政伊始慶典次第舉行請俾今年內外秋決從之○雲南貴州總督卞三元提督張國柱李本深合詞請平西王吳三桂仍總管滇黔事務得旨該藩以精力日為銷減奏請故照所請先行今地方已平若令王復理事務恐其過勞以致精力大損如邊疆地方遇有軍機王自應料理該部知道

冬十月壬申朔享

太廟

上親詣行禮○遣官祭

永陵

福陵

昭陵

孝陵○頒康熙七年時憲曆○湖廣道御史蕭震疏請行耕耤禮命候旨行○癸酉兵部議

覆廣東巡撫王來任疏言靖藩自廣東移鎮

福建需用夫船欠給里民銀兩應動府州縣見貯庫銀照數給發得旨夫役如係見在應用自應給與見銀催覓靖藩移鎮已經數年今將貯庫銀兩給與恐百姓不沾實惠著將爾部見今議給之庫銀給驛傳用以抵應徵民間驛站銀兩這所抵錢糧著曉諭民間○山西巡撫楊熙疏請守寧道事務歸太原府管理寧武道事務歸太原中路同和管理岢嵐道事務歸太原西路同和管理守東道事務歸平陽府管理守南道事務歸汾州府及遼沁二州管理巡南道事務歸潞安府及澤州管理從之○甲戌

皇太后聖壽節○導

懿旨○免行禮○命學士吳格塞布達禮穆舒充纂修

世祖章皇帝實錄副總裁官○丁丑上詣

太皇太后

皇太后宮問安○戊寅命湖北驛傳道移駐湖南管理湖南驛糧事務湖北糧道仍留湖北管理湖北驛糧事務○己卯奉天府承德縣地震有聲○庚辰予故內大臣都統扎木素三等阿思哈尼哈番蘇黑各祭葬如例○辛巳予故內大臣三等阿思哈尼哈番鄂布格德墨勒根保祭葬如例○戶部題請敕下福建廣東江南三省採買香料得旨採買香料恐地方官借端下海貿易且苦累百姓著該督撫不時嚴察○壬午喀爾喀畢錫勒爾圖汗之子根敦代青台吉率衆來歸封為輔國公○癸未吏部議覆浙江道御史李文熙疏言各部郎中陞府道定例每月府道缺並出始令掣籤補授今府道缺照常道缺已裁十分之七必執府道缺並出之月而後令郎中銓掾則俸深郎中何時陞轉嗣後請出有府缺即令陞府有道缺即許陞道查此例遵行已

久無庸議得旨李文熙所奏道缺已裁十分之七郎中照例陞補恐有壅滯爾部仍執未裁道缺以前所行之例不合以後遇推陞之月不必分別道府著照所出之缺內外應陞官均平推陞○乙酉以故一等公索尼子法保襲爵○戶部議覆江寧巡撫韓世琦疏言蘇松常鎮四府屬南糧項下放給行月等米係就地支領不須兌運所有餘耗請折銀充餉應如所請每石折銀一兩二錢得旨耗米非正項錢糧且米價隨時貴賤不同著照時價改折○丙戌傳臚賜武舉秦藩信等一百名武進士及第出身有差○戊子命杭州北新關南新關事務歸杭州府同知管理○己丑

上詣

太皇太后

皇太后宮問安○以原任湖廣右布政使法若真為江南布政使司布政使○貴州道御史

高坪疏言。州縣離任。勢必委官暫署。此定例也。乃有督撫委用者。亦有司道請委者。臣愚以為委署之事。宜專責成知府。而行保舉連坐之法。蓋一郡之官。惟知府熟見其才品。而稔悉其臧否。且錢糧皆關知府考成。則擇賢能而署印務。尤其職掌之所最切。嗣後有應委署者。務令知府於所屬慎擇賢能之吏。詳呈督撫。督撫嚴行察核。果堪稱職。方准委用。既委之後。有敗檢狼藉者。即揭報督撫。立為糾叅。倘有徇庇。將知府並劾。則人知自愛。而署理可清。下部議行。○庚寅。定公侯伯一品官廕生。以部院衙門五品缺用。二品官廕生。以六品缺用。三品官廕生。以七品缺用。四品官廕生。以八品缺用。○壬辰。以故一等精奇尼哈番扎木素之子根都扎布襲職。○乙未。吏部議覆。工科給事中李宗孔疏言。康熙元年。停京察大計。止行考滿。因將督撫薦舉停止。今仍行京察大計。考滿復停。而薦舉未復。

是有罰而無賞。有懲而無勸矣。雖有善治。無所表揚。其不可一也。督撫薦舉。部院科道得以議之。糾之。今漫無薦舉。雖庸常之人。亦得挨次陞轉。其不可二也。吏部原為進退人才而設。若止序俸。則案冊布算。優為之矣。所稱銓衡銓鑒何在哉。其不可三也。今日章奏。即後日史冊。若無薦舉。則見之章奏者。止貪酷不肖之官。並不聞清廉稱職之官。何以昭示來茲。其不可四也。緝獲逃人。不論俸滿即陞。然止近京一二省。其遠省逃人少者。遂不得沾超陞之典。其不可五也。完舊欠二萬兩以上者。超擢。則催科有效矣。乃愛養百姓者。概置不問。何以申明朝廷德意。其不可六也。請敕部酌議。照舊舉行。查薦舉已經停止。應無庸議。得旨。薦賢舉能。糾劾不肖。乃勸懲大典。豈可停止不行。若督撫將賢能不舉。薦及匪人。應作何處分。著詳議。○丙申。山西陝西總督盧崇峻疏言。向因墨爾根等部落總牧內

地。且有逃番蠻敬。口稱各頭目欲於八月進兵。臣即親赴莊浪。以防意外。隨據總兵官孫思克報稱。游牧番人。俱搬出原處住牧。又有上年差往西藏之喇嘛。回稱達賴喇嘛遵旨傳各台吉申飭。不許生事。各台吉俱遵奉朝廷敕諭。真心向化。遣人齎認罪馬牛羊千隻。隨喇嘛來進。據此。西番歸誠已實。滿漢官兵應請撤回。從之。○戊戌。

上詣

太皇太后宮問安。○以原任雲南右布政使崔之璣。為雲南布政使司布政使。○己亥。工科給事中柯蓰。劾河道總督楊茂勲。初報七月二十六日。黃河漫決。桃源縣烟墩等處堤岸。延刷一百五十餘丈。無礙運道。續又稱延刷三百餘丈。糧船暫由李家口出。使既決於前。又決於後。則三百餘丈之決。果在何時。使後此之決。即前此之決。則一百五十丈之報。未免失真。況以臣所聞。黃河兩岸衝開諸口各

百十餘丈不等。至烟墩一口。開有四百餘丈。淹沒田地人民。不能細數。以致烟墩至七里灣李家口。二十餘里。黃河反成陸地。似此情形。該督匿不報聞。復又勒令糧船出李家口。歷數百里湖面。一遇風濤。船易損壞。其險何可勝言。又借防修為名。恣行私派。乞敕下嚴查處分。得旨著楊茂勲明白回奏。○庚子。諭禮部。敦本為王化之原。尊親乃孝治之本。遵典禮而致顯揚。所以伸敬養之至意也。朕續承洪基。躬親政務。惟我

聖祖母昭聖慈壽恭簡安懿章慶敦惠溫莊太皇太后。暨

聖母仁憲恪順皇太后。佑啟多方。恩勤備至。

聖慈深厚。酬報未能。茲欲展厥孝忱。宜進

尊崇之號。謹加上

太皇太后徽號曰。

昭聖慈壽恭簡安懿章慶敦惠溫莊康和太皇太后。加上

皇太后徽號曰。

仁憲恪順誠惠皇太后。昭令德於萬年。廣孝道

於天下。爾部即遵諭行。欽哉。特諭

十一月。辛丑朔。○丙午。以恭奉

世祖章皇帝配

天。遣官告祭

天地。

太廟。

社稷。○丁未。冬至。祀

天於

圜丘。恭奉

世祖章皇帝配享。

上親詣行禮。恭捧

世祖章皇帝神位。奉安於

上帝神位之左。

太祖高皇帝神位之次。○遣官祭

永陵。

福陵。

昭陵。

孝陵。○戊申。

上率王以下。文武大臣。侍衛等。詣

太皇太后

皇太后宮。行冬至慶賀禮。御殿。王以下。文武各

官。上表朝賀。○諭禮部。着守

昭陵員役所居之處。收養牲畜。珠覺。河穡。應將

伊等移遠

陵寢。爾部會同工部。選擇日期。議定。遷移具奏

○以奉天府承德。廣寧二縣電災。命發糧賑

濟饑民。○免直隸開州。元城等十一州縣。本

年分旱災額賦。有差。○壬子。考察天下軍政。

貪酷官五十六員。不謹官四十四員。罷軟官

一百三十六員。年老官七十六員。有疾官七

十四員。才力不及官一百二十七員。浮躁官

四十四員。處分如例。○先是。湖廣。柳州等十

一州縣食鹽。取給廣東。連韶諸處。例不銷引。

後因粵商扳累。分引辦課。楚民苦之。偏沅巡

撫周召南疏請仍如舊例。令粵東商人辦課。戶部以郴州等州縣既食粵東之鹽。自宜分銷鹽引。議不准行。得旨。據該撫奏言。郴民既食粵商興販之鹽。是食鹽之民。已寓稅於買鹽之內。而認稅之商。已浮稅於賣鹽之中。兩得其便。又言十一州縣民困已極。兩部仍議令分銷鹽引。恐窮民愈致苦累。其再詳議。至是。部議仍如舊例。免楚民分銷鹽引。從之。○甲寅。陞叅領崔世榮為廣東瓊州總兵官。○乙卯。以恭奉

世祖章皇帝配享

地祇。遣官告祭

天地。

太廟。

社稷。○丙辰。奉

世祖章皇帝配享

地祇。

上親詣

方澤行禮。恭捧

世祖章皇帝神位。奉安於

地祇神位之東。

太祖高皇帝神位之次。○

上以親理大政。恭加

太皇太后

皇太后徽號。遣官告祭

天地。

太廟。

社稷。○是日。

上詣

太皇太后宮。恭上

太皇太后奏言。恭惟

聖祖母昭聖慈壽恭簡安懿章慶敦惠溫莊太

皇太后陛下。承天厚德。配地弘庥。臣親理萬幾。

仰承

懿訓。宜修尊顯之典禮。用答教育之隆恩。敬進

徽稱。以揚德美。伏祈

聖慈俞鑒。俾展微忱。撫位祿名壽於無疆。合子孫臣民而共戴。又詣

皇太后宮。恭上

皇太后奏言。恭惟

聖母仁憲。恪順皇太后陛下。劬勞式穀。顧復宣

仁。臣親理萬幾。仰承

懿訓。宜修尊顯之典禮。用答教育之隆恩。敬進

徽稱。以彰令德。伏祈

垂慈俞鑒。俾展微誠。用抒孝養之忱。益大邦家

之慶。○丁巳。

上率諸王。文武羣臣。恭奉冊寶。加上

太皇太后徽號。冊文曰。恭惟

聖祖母昭聖慈壽恭簡安懿章慶敦惠溫莊太

皇太后。世德攸垂。贊化惟資。內治壺儀。夙著尊

親。必上隆稱。宮掖懽騰。臣民喜溢。欽惟

聖祖母昭聖慈壽恭簡安懿章慶敦惠溫莊太

皇太后。至仁厚載。純德資生。佐

皇祖以肇基。積慶有本。啟

皇考而續緒。盛業彌光。延及眇躬。撫有寧成之運。溯茲熙洽。實為厚德之貽。今當親政之時。宜晉顯揚之號。謹告

天地

宗廟

社稷。率諸王。貝勒。文武羣臣。恭奉冊寶。加上徽

號。曰

昭聖慈壽恭簡安懿章慶敦惠溫莊康和太皇

太后。伏願鴻禧丕茂。眉壽無疆。綿曆服於萬年。

永介升恒之祉。敦本支於百世。長昭昌熾之

祥。寶文曰

昭聖慈壽恭簡安懿章慶敦惠溫莊康和太皇

太后之寶。恭奉冊寶。加上

皇太后徽號。冊文曰。恭惟

聖母仁憲。恪順皇太后。聖善垂謨。立政宜先。孝

治。徽音克嗣。尊親應上。鴻名欣洽。宮闈頌盈

寰宇。欽惟

聖母仁憲。恪順皇太后。仁慈天植。淑惠性成。雖

肅揚徽相

皇考而表儀天下。燕詒作訓。迪眇躬以寧輯四方。今當親政之時。宜晉尊崇之典。謹告

天地

宗廟

社稷。率諸王。貝勒。文武羣臣。恭奉冊寶。加上徽號曰。

仁憲恪順誠惠皇太后。伏願永綏多福。垂裕後昆。長享壽祺。鞏千秋之大業。永安敬養。合萬國之懽心。寶文曰。

仁憲恪順誠惠皇太后之寶。○戊午。以加上太皇太后

皇太后徽號禮成。頒詔天下。詔曰。朕惟自古帝王。建極綏猷。保民圖治。莫不以懋昭先德。祇盡孝忱為務。朕繼承丕基。躬親庶政。恭惟世祖章皇帝。功德兼隆。當崇配享。暨

聖祖母太皇太后。

聖母皇太后。恩勤備至。宜盡顯揚。是用上稽前

典。下協輿情。謹告

天地

宗廟

社稷。率諸王。貝勒。文武羣臣。於康熙六年十一月朔有七日。冬至。恭祀

上帝。十六日。如夏至儀。恭祀地祇。並奉

世祖章皇帝配享。十七日。恭奉冊寶。加上

聖祖母昭聖慈壽恭簡安懿章慶敦惠溫莊太皇太后徽號曰。

昭聖慈壽恭簡安懿章慶敦惠溫莊康和太皇太后。加上

聖母仁憲恪順皇太后徽號曰。

仁憲恪順誠惠皇太后。慶禮兼行。鴻恩廣逮。於戲。率由舊章。以觀前烈之高厚。永膺純嘏。覃敷怙冒之恩慈。彰孝道於千秋。合懽心於萬國。布告天下。咸使聞知。○詔內恩款。共二十七條。○廣東廣西總督盧興祖。廣東巡撫王

來任。自陳不職。並革任。貴州巡撫羅繪錦。自陳年老。命以原品致仕。○奇勒爾地方。納習。卿額里。姓納布德尼等。進貢貂皮。賞賚如例。○已未。恭奉

孝康皇后神位入

奉先殿。

上親詣行禮。○免直隸靜海縣。本年分水災額賦十之三。○壬戌。免直隸霸州等二十三州縣。江西寧州等三十一州縣。本年分水災額賦有差。○癸亥。命內秘書院大學士班布爾善等校對

太宗文皇帝實錄。○雲南巡撫袁懋功。丁父憂。准回籍守制。○吏部題。布政使。按察使等官。以大計朝覲。例許陳奏地方利弊。今既以道官同知。經歷等代覲。應停其條奏。從之。○甲子。

上詣

太皇太后宮問安。○吏部遵旨議覆。工科給事

中李宗孔請復薦舉疏。查考滿停止。見行大計。既有三年卓異之官。毋庸又行薦舉。應仍照前議。其所舉卓異之員。不論本任內。及陞轉任內。一有不職。應將從前申詳薦舉等官。分別降革。得旨。前卓異薦舉原係並行。後因舉行考滿。將薦舉停止。舉劾關係勸懲大典。今考滿既經停止。薦舉仍著復行。其卓異官原任有事。舉薦官理宜處分。至後任有事。仍將前薦舉官處分。永塞薦舉之路。又所擬處分之例太過。著再定議具奏。尋吏部議。督撫徇情薦舉不實者。發覺之日。將督撫各降二級調用。申詳之司道府等官。各降三級調用。其卓異官於薦舉之後。在本任內有不稱職者。將原舉之督撫。各降一級調用。司道府各降二級調用。其卓異官已經陞轉。於後任內有不稱職者。與原舉之督撫。司道府無涉。應免處分。從之。○四川總督苗澄。自陳不職。命以原品解任。○厄魯特僧厄台吉遣使進

貢。賞賚如例。○乙丑。浙江提督哈爾庫廣東水師提督韋進功。湖廣沅州總兵官李逢茂。江北狼山總兵官柳同春。俱以自陳不職。命解任。○河南道御史朱裴疏言。國家開科取士。文武相等。查順治十五年以後。歷科武舉武進士。未經選用者甚多。因部科効力之人。與督提劄委之人。混淆雜進。躡等先用。而科目之人。反不得與之較遲速。非制科取士之本意也。請將外委効勞等項。與武進士武舉等。較人數多寡。做二八分缺之例。使科目人員量行先選。其外委各弁。須有戰功。及捕盜實績。方可特為擢用。不得止憑督提衙門。一概咨送選補。下部議行。○庚午。廣東高雷總兵官于大海。自陳不職。命革任。十二月。辛未朔。裁四川成都府仁安驛驛丞等四十八缺。保寧府知事等九十二缺。○壬申。諭吏部。都察院。設立言官。原為國家大事。兵民疾苦。內外官員貪酷等項。應許陳奏。理

宜簡約真切直陳。以備採擇。近見言官條奏。於事理之外。牽引比擬。多用浮飾之言。或有將已結之事。剝襲充數者。或有挾私紛更。國家已定良法者。且本章原令不得踰三百字。今踰額浮詞甚多。以後陳奏。此等無益之處。俱著更改。如仍前不改。嚴加治罪。至言官如有所見。既許不時陳奏。其拾遺著永行停止。兩部院即傳諭嚴飭遵行。○議政王等遵旨。會議滿洲官員開列督撫布按二司例。嗣後總督員缺。應將滿洲旗下副都統。蒙古旗下副都統。并侍郎。開列。如不用。將學士。副都御史。開列。巡撫員缺。應將學士。副都御史。通政使。大理寺卿。宗人府滿洲啟心郎。開列。布政使員缺。應將太常寺卿。光祿寺卿。太僕寺卿。左通政。大理寺少卿。督捕理事官。侍讀學士。各部掌印郎中。都察院三品掌印御史。開列。按察使員缺。應將各部未掌印郎中。三品御史。開列。得旨。督撫員缺。著將滿洲漢軍漢人

補授之處。臨期請旨具奏。餘依議。○禮部遵
旨議覆。八旗教習缺出。舉人內有願就教習
者。准國子監一體考取。從之。○癸酉。

上詣

太皇太后

皇太后宮問安。○乙亥。吏部議覆。內秘書院大
學士班布爾善等奏稱。

世祖章皇帝實錄。機務繁重。纂修人數不敷。請
添設人員。以資料理。今應增入文學優通者。

滿洲八員。蒙古十員。漢軍八員。漢人十員。從
之。○予故一等阿思哈尼哈番原任副都統
吳喇禪。祭葬如例。○兵部議覆。靖南王耿繼
茂奏稱。邊海防汛。請以水師官兵。每月更調。
查一月一調。恐有奸民私貨乘機夾帶下海。
應一年一調。便於盤查。得旨依議。其雲霄。詔
安等處防守官兵。著六月一換。○先是。山西
陝西總督盧崇峻。丁繼祖母憂。以應承重請。
時因料理邊防。移駐莊浪。暫令在任守制。至

是。以莊浪事平。疏請終制。從之。○丙子。免直
隸任邱等三縣。本年分水災額賦有差。○禮
部題。本年十一月內。恭遇

太皇太后

皇太后加上徽號。所有外藩王。及各省文武官。
一切進賀表式。請內院撰擬頒發遵行。從之。
○戊寅。

上詣

太皇太后宮問安。○予故三等鎮國將軍訥殷。

建碑致祭如例。○裁容美宣撫司經歷缺。○

庚辰。免直隸武清縣。本年分水災額賦十之

三。○兵部以浙江提督員缺。開列副都統吳

國正等九員。得旨。以後提鎮缺出。著開列一

二員具奏。○癸未。命各省復開鼓鑄。○甲申。

免湖廣通城等七州縣。陝西平涼。蘭州等十

二州縣衛所。本年分旱災額賦有差。○乙酉。

上詣

太皇太后

皇太后宮問安○命修鹽法備考。漕運議單二書○丙戌陞隨征江南左路總兵官塞白理。為廣東水師提督○以原任駐防蘇州副都統劉邦柱。為浙江提督○丁亥。

皇后千秋節。停止行禮○陞山東巡撫周有德。

為廣東廣西總督○以內國史院學士劉秉權。為廣東巡撫○免偏沅安鄉等六縣。本年分水災額賦有差○戊子。增戶部尚書一員。

以工部尚書馬通賽。調補○己丑。陞叅領祖

澤清為廣東高雷總兵官。署副將隨征福建中路總兵官劉進忠。為廣東水師左路總兵

官。調江南蘇松總兵官王燦。為湖廣沅州總兵官。隨征湖廣右路總兵官馬化騏。為四川

重慶總兵官○免山東齊東縣。本年分蝗災

額賦十之二○四川總督苗澄等。請以重慶

夔州等鎮。成都城守等營。督撫提標兵。抽撥

七千名。開墾成都屯田。每歲可得米四萬二

千石。省部撥銀五萬六千兩。從之○辛卯。以

原任四川巡撫佟鳳彩。為貴州巡撫○以故正白旗一等精奇尼哈番根都扎布子緯克。託襲職○壬辰。

上詣

太皇太后宮問安○癸巳。順天府進春○戊戌。

歲暮。裕祭

太廟。

上親詣行禮○遣官祭

永陵。

福陵。

昭陵。

孝陵○遣官祭太歲之神○禮部題請旌表八

旗滿洲蒙古漢軍節婦五十二人。烈婦六人。

得旨。旌表節烈之婦。原以表揚其善。必察驗

真實。方予旌表。著再行嚴查詳議。分別具奏

○是歲。人丁戶口。一千九百三十六萬四千

三百八十一。田地。山蕩。畦地。五百四十一萬

一千四百七十三頃五十四畝。徵銀二千五

百八十四萬九百八十一兩有奇米豆麥六百一十五萬四千八百四十五石有奇草二百三十萬二千束茶十六萬五千七百一十引行鹽四百三十一萬八千二百五十三引徵課銀二百七十五萬四千五百四十五兩鑄錢二萬九千三百九十五萬三千六百有奇

實錄卷之二十四

三二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙七年戊申春正月庚子朔

實錄卷之二十五

上詣

堂子行禮還宮拜神畢率諸王貝勒貝子公內大臣大學士都統尚書精奇尼哈番侍衛等詣

太皇太后

皇太后宮行禮御殿王以下文武各官外藩王及使臣等上表朝賀照例筵宴○朝鮮國王李攔遣陪臣鄭致和等表賀親政表文曰運屆千齡聿覩

聖作。

躬親萬務。益恢皇圖。凡在照臨。實均歡聳。欽惟
皇帝陛下。夙膺景命。丕纘洪基。當漢昭辨詐之
年。適從歸政之請。迨周成即辟之日。舉切望
治之心。猗歟百度之維新。允矣四海之同慶。
伏念臣叨守緒業。偏荷寵靈。迹滯東藩。莫造
虎拜之列。神馳北極。第勤鰲忭之誠。又表賀
冬至元旦。

萬壽節及進歲貢禮物宴賚如例○壬寅。

實錄卷二十五

二

上詣

太皇太后

皇太后宮問安○丙午。

世祖章皇帝忌辰遣官祭

孝陵○丁未孟春享

太廟。

上親詣行禮○遣官祭太歲之神○陞兵部督
捕左侍郎額赫里為工部尚書○陞叅領徐
治都為直隸天津總兵官叅領蔣登雷為江

南狼山總兵官○戊申。陞內秘書院侍讀學
士田種玉為內弘文院學士○陞左副都御
史莫洛為山西陝西總督湖廣巡撫劉兆麒
為四川總督○九卿科道會推雲南巡撫以
原任南贛巡撫林天擎擬正。通政使李天浴
擬陪。得旨林天擎係平西王下人員。見今王
住雲南。林天擎不應推此缺。著李天浴為雲
南巡撫○河道總督楊茂勲疏言。烟墩漫決
大溜南徙。正河淤成平陸。計二十里。臣親赴
河干。相度河形。先挖引河。一面接築進埽。決
口漸狹。逼水由引河而下。向之淤為平陸者
已通舟楫。下部知之○己酉。陞左僉都御史
馬雄鎮為內國史院學士○命河南驛鹽事
務歸并大梁道兼理○庚戌。

實錄卷二十五

三

上詣

太皇太后

皇太后宮問安○建

孝陵神功聖德碑。其文曰。我國家肇基東土。

祖功宗德昭格

皇天恢弘景運於萬年篤生我

皇考皇帝睿聖首出奄有萬邦大孝弘仁武功

文德配兩儀而軼千古既奉冊寶恭上

尊謚惟陵寢宜有功德之碑謹撰述大槩鐫諸

貞珉用傳永久敘曰

皇考世祖體天隆運英睿欽文大德弘功至仁

純孝章皇帝諱福臨

太宗應天興國弘德彰武寬溫仁聖睿孝隆道

—實錄卷二十五

四

顯功文皇帝第九子也

母昭聖慈壽恭簡安懿章慶敦惠溫莊康和太

皇太后

皇考未誕之先

太皇太后嘗有紅光繞身女侍驚以為火近則

不見眾皆大異之又夢異人授一子曰此統

一天下之主也次日

皇考誕生宮內紅光照耀香氣瀰漫經久不散

皇考生而神靈英異非常六齡讀書不假師資

一目數行俱下

太宗甚鍾愛焉甲申嗣登大寶是時流寇肆逆

明祚已終國亡君殉萬姓無歸爰整六師一

戰而破百萬之強寇乃建都燕京齊晉秦豫

傳檄底定靖寇救民王師南下金陵僭號者

其臣下執之以降由是下楚蜀平浙閩兩粵

滇黔數年之內以次掃蕩遂成大一統之業

治本愛民出師則嚴紀律毋敢殺掠百姓知

民苦賦重盡除明季加派又停江浙督催織

—實錄卷二十五

五

造官免陝西皮張裁褐之貢罷各省柑橘鮓

魚石榴等物之進停止邊外城工蠲派徵民

間助工之餉已臨清燒磚之役減朝鮮進貢

之數定賦役全書修大清律令各衙門規制

事例祇奉

太祖

太宗成法治具畢張敬

天尊

祖饗祀親虔孝事

太皇太后晨興問安長跪受教披閱章奏每至夜分勤學好問擇滿漢詞臣充經筵日講官於景運門內建直房令翰林官直宿備顧問經書史策手不釋卷遂知性知天洞悉至道兼綜天文地理禮樂兵刑賦役古今利弊之源旁及諸子百家莫不博涉得其要領素衣菲食不興土木之工親視太學釋奠先師發帑金崇其廟貌雖太平不弛武備立賢無方丁亥己亥再舉會試間廣額數以羅人才科場作弊者從重治

實錄卷二十五

六

罪視滿漢如一體遇文武無重輕破故明人臣朋黨之習尚廉正黜貪邪時時甄別廷臣以示激勸下詔求言虛懷納諫外官入覲面諭以愛民勤職詳慎刑獄大辟覆奏再四駁審命官恤刑各省冤濫者皆得免又停秋決一年閹寺不使外交立鐵牌示禁命儒臣修祖宗聖訓順治大訓通鑑全書孝經衍義等書以教天下臣民詣先農壇躬耕藉田勸農以足民四方水旱災荒頻發內帑多金賑濟雲

貴初平頒發帑金薄賑軍民焦心勞思惟念軍民疾苦至於故明諸陵設護衛禁樵採憫崇禎帝死難頒諭祭誅其臣之殉難者予贈卹其宗室投順者令畜養樂業其厚待如此我

皇考以精明理政務以仁厚結人心法制則細大無遺德音則遐邇咸徧故使山陬海濱莫不覃被恩膏東至使鹿使犬等國西至厄內忒黑吐魯番等國北至喀爾喀俄羅斯等國南至琉球暹羅荷蘭西洋海外等數百國見海不揚波咸曰中國有聖主出焉梯山航海莫不重譯來王我

實錄卷二十五

七

皇考惟是兢業祇慎無一日自暇逸也順治十八年正月不豫於丁巳日上賓嗚呼哀哉聖壽二十有四在位十八年葬

孝陵陵豫定於昌瑞山

皇考遺命山陵不崇飾不藏金玉寶器嗚呼故明政亂久矣

太祖高皇帝

太宗文皇帝誕膺景命。定亂無難。特以尚德。緩兵故也。至我

皇考當流寇殘破明室。生民塗炭。大兵西下。掃平逆寇。統一寰區。非神武不能開基。非至聖不能致治。謨烈於昭。道法具在。雖堯舜之德。湯武之功。何以尚茲。謹拜手稽首而陳頌曰。天祐下民。眷於有德。大清受命。奄有方域。太祖肇基。

太宗弘業。

皇考緒緒。亶生睿質。運協禎符。懋建皇極。大武布昭。剪除寇賊。王師西下。一戰而克。定鼎燕京。綏懷反側。指顧蕩平。一統萬國。怙冒烝生。仁恩洋溢。罷貢停工。以甦民力。立綱陳紀。利興弊革。成憲周詳。有典有則。圖治勵精。憂勞日昃。萬幾畢理。大猷允塞。崇儉去奢。克勤無逸。敷政優優。居心翼翼。丕承遺緒。永言孝思。先意順志。恭事。

慈幃。好學不倦。悟道淵微。博綜經史。百事周知。

戒勵臣工。首在勿欺。賢奸立辨。黜陟咸宜。纂成文籍。洋洋訓詞。金匱是寶。萬世可師。慎刑薄賦。賑救荒災。勸農興學。富之教之。帝王道貫。覆載功齊。聲教四訖。遠邇不遺。殊方重譯。入貢京師。治化溥洽。道法昭垂。休徵駢集。洪烈長貽。巍巍。

孝陵神典。憑依山苞。川拱祥護。靈祇鏤詞。貞石億禩。歌思。○辛亥。賜朝正外藩王貝勒貝子。公台吉等銀幣鞍馬有差。○壬子。陞內國史院學士岳思泰為兵部督捕左侍郎。○癸丑。封固山貝子尚善子門度。固山貝子章泰子白壽。固山貝子溫齊子額爾圖。俱為鎮國公。○授和碩簡親王濟度庶出子喇布。輔國公鞏安子圖薩。俱為三等輔國將軍。鎮國將軍輝塞子魏塞。為三等奉國將軍。○甲寅。山西巡撫楊熙自陳不職。部議降二級調用。命以原品解任。○乙卯。以內秘書院學士劉芳躅。

為山東巡撫○丙辰陞太僕寺卿哲庫訥為都察院左副都御史○丁巳。

上詣

太皇太后

皇太后宮問安○戊午命故衍聖公孔興燮子

孔毓圻襲爵○以

世祖章皇帝配

天覃恩加鰲拜還必隆太師坡爾盆法保彭春

那摩佛戴壽邸黑俱太子少師吳應熊少傅

兼太子太傅耿聚忠尚之隆耿昭忠白文選

俱太子少師○宗人府議覆貝勒杜蘭當元

旦慶賀筵宴之時衆皆豫集伊獨偃息他處

因此已圖魯公鰲拜等令部臣察問伊不以

理說反口出大言又復巧飾叩閣情罪重大

應解宗人府左宗正并議政之任革去多羅

貝勒羈禁撤取所屬人員得旨杜蘭理應依

議治罪姑從寬免其羈禁及撤取所屬人員

著解宗人府左宗正并議政革去貝勒降為

鎮國公嗣後務痛自改悔以圖勤勉如不改前惡決不寬宥○先是廣西道御史楊維喬條奏昔

世祖章皇帝時凡引見官員皆跪奏履歷今見諸臣引見俱不跪於尊卑之分未合請敕部遵舊制行得旨該部議奏至是禮部議覆各官引見原係察驗身材面貌應照前站立

天語垂問方行跪奏又一議站立非人臣對君之體嗣後引見文武各官應跪得旨依後議

○己未陞太常寺卿霍叔瑾為通政使司通

政使○庚申予故直隸提督劉良佐浙江溫

州總兵官尚好仁祭葬如例○辛酉陞護軍

叅領哈爾哈齊為鑲黃旗護軍統領護軍叅

領額巴付為正黃旗護軍統領○陞郎中席

哈納為內國史院學士○壬戌諭兵部外藩

蒙古諸王下官員既無封贈及送子入監讀

書之例伊斯丹津王下官員亦著停止封廕

○以多羅貝勒察尼為宗人府左宗正○陞

內秘書院侍讀學士陳鼐永為內秘書院學士○以原任南贛巡撫林天擎為湖廣巡撫○癸亥以大理寺卿覺羅阿塔為山西巡撫光祿寺卿白清額為陝西巡撫○甲子

上詣

太皇太后宮問安○丁卯陞護軍叅領喇賽為鑲藍旗蒙古副都統○戊辰陞內國史院侍讀學士程芳朝為太常寺卿○陞吏部郎中達爾布為山西布政使司布政使吏部郎中阿席熙為陝西布政使司布政使

二月庚午朔

上詣

太皇太后

皇太后宮問安○甘肅巡撫劉斗疏言平慶臨鞏四府屬去歲夏早秋澇人民饑饉請賜賑濟得旨平涼等四府人民饑饉至極殊為可憫著該督撫擇賢能官員驗賑務令窮黎得沾實惠○辛未廣東提督常進功疏報逆賊

魏韜嘯聚潮陽海面臣會同左翼總兵官于奮起領兵搜剿康熙六年十月初三日大敗賊眾獲偽叅謀吳俊親信陳阿五等賊渠棄舟潛逃下部知之○壬申定各省督撫薦舉屬員額數○陞太常寺卿阿思祜為大理寺卿○甲戌陞刑部郎中色特為山西按察使司按察使刑部郎中穆成額為陝西按察使司按察使○戶部議覆江寧巡撫韓世琦疏言黃河衝決桃源受患尤甚漕糧無蠲免之例請將桃源縣康熙六年分起運漕糧分兩年補徵帶運應如所請從之○乙亥

上詣

太皇太后宮問安○命福建督撫重建柔遠館驛以駐琉球國使○丁丑

太皇太后聖壽節遵

懿旨免行禮○遣大學士圖海祭

先師孔子○戊寅祭

大社

大稷。

上親詣行禮○免直隸景州等十州縣衛康熙六年分水災額賦有差○旌表福建省靖南王耿繼茂下節婦周方蘇妻吳氏給銀建坊如例○己卯春分朝

日於東郊。

上親詣行禮○內國史院大學士已泰以疾請解任命以原官致仕○庚辰

孝康皇后忌辰遣官祭

孝陵○免奉天府承德廣寧二縣康熙六年分水災額賦○壬午以原任江南按察使趙曰冕為湖南按察使司按察使○甲申

上詣

太皇太后

皇太后宮問安○免浙江臨海縣康熙六年分水災額賦十之三○乙酉諭禮部天象關係重大必得精通熟習之人乃可占驗無悞著直隸各省督撫曉諭所屬地方有精通天文

之人即行起送來京考試於欽天監衙門用與各部院衙門官員一體陞轉○陞大理寺少卿賁岱為太常寺卿左通政岳諾惠為光祿寺卿兵部督捕左理事官花善為太僕寺卿○山西提督柯永盛引年乞休慰留之○丙戌遣官祭

先農之神○免陝西寧州華亭等四州縣及慶陽衛康熙六年分水災額賦有差○予故一等精奇尼哈番根都扎布祭葬如例○丁亥以貴州賞功等十八寨地方歸普安州管理安順府統轄○戊子夜子時流星如盞大赤黃色尾有光○辛卯

上幸南苑行圍○吏部議覆四川巡撫劉格疏言臣原姓張名德地歸旗後義父辛達理取名劉格請照例復姓更名應如所請從之○壬辰清明節遣官祭

永陵。

福陵。

昭陵。

孝陵○丙申。以啓心郎覺羅杜爾巴護軍叅領希福。俱為正紅旗蒙古副都統○丁酉。諭吏部等衙門。前諭督撫奏事。必舉其事之原委。明晰入告。部院將應結之事。亦即行完結。勿得遷延駁察。近見督撫奏疏。仍有事情未晰者。部院亦有將應結之事。遷延駁察者。如此草率。不加詳慎。殊負委任之意。今後督撫奏事。若不詳明具奏。著嚴行叅處。各部院若將應結之事。復搜求細故。借端駁查。定行治罪。

○戊戌。

上自南苑回宮○理藩院題請差大臣往四十九旗及邊外喀爾喀會盟。得旨著侍郎綽克託達哈塔去。

三月己亥朔。

上詣

太皇太后

皇太后宮問安○福建總督祖澤溥疏言向例

各府推官赴省承問欽件。今推官奉裁。事歸知府。但知府有地方專責。不便輕離。而同知通判。事務稍簡。以之按季輪班赴省承問。是亦詳慎刑名之意也。下部議行○甲辰。遣官祭

歷代帝王○乙巳。福建道御史李崇奏請亟開經筵。以光典禮。報聞○丙午。旌表節婦。山東長山縣李氏。廣東樂昌縣蕭氏。烈婦山東姜氏。烈女山東吳氏。給銀建坊如例○丁未。

以
世祖章皇帝配

天禮成。加上

太皇太后

皇太后徽號。遣都統勒貝祭告

永陵都統伯宜理布祭告

福陵都統鄂內祭告

昭陵都統喇哈達祭告

孝陵○遣侍郎劉鴻儒等八員祭

歷代帝王陵寢及

先師闕里○諭吏部。國家政務。必委任賢能。乃可贊成上理。今在京各部院滿漢官員。俱論資俸陞轉。雖係見行之例。但才能出衆者。常以較量資俸。超擢無期。此後遇有緊要員缺。著不論資俸。將才能之員。選擇補用○免江南邳州。安東等六州縣。及高郵等十八衛所。康熙六年。分水災額賦有差○予故副都統覺羅商燕祭葬如例○庚戌。

上詰

太皇太后

皇太后宮問安○甲寅。免陝西邠州。咸寧等七州縣。康熙六年。分旱災額賦有差○喀爾喀崑都崙拖音台吉。遣使進九白年貢。宴賚如例○丙辰。

萬壽節。

上率諸王。貝勒。貝子。公。內大臣。大學士。都統。尚書。精奇尼哈番。侍衛等詣

太皇太后

皇太后宮行禮。御殿。王以下文武各官。上表慶賀。照例筵宴○遣官祭

福陵。

昭陵。

孝陵○遣官祭真武東嶽城隍之神○己未。命停止巡視茶馬差○戶部議覆甘肅巡撫劉斗。請賑卹西寧等處一疏。得旨。西寧等處。人民饑饉已極。深為可憫。爾部擬出廉能官二員。作速遣去。會同地方官。不拘何項就近錢糧。酌量動支分賑。務令飢民得所○庚申。予故內大臣布代祭葬如例○辛酉。

上詰

太皇太后

皇太后宮問安○諭吏部。戶部。都察院。鹽課關。係緊要。必得廉幹之員。差遣。乃能嚴緝私販。惠恤商民。疏通引法。以裕國課。近見課額未增。商民又鮮裨益之處。以後不必專差監察。

御史應將廉幹之員選擇兼差。兩部院酌量定議以聞。○諭吏部舊例科道乏員。行取在外有司。考選補授。原因有司乃親民之官。諳悉民間利弊。得以據實指陳。有裨政治。且外官內擢。足以鼓勵人才。振興吏治。今後科道缺出。可移文督撫。就有司內舉才能夙著者。咨部。兩部詳核具題。行取來京。朕親選用。每歲宜行取幾人。兩部酌議以聞。○諭吏部近聞在京諸臣違法遣人往各省官員處借名問候多索財物。又干預地方事。挾持請託。顛倒是非。甚為良民之害。有等遊行閭閻。討取官員書札。或雕刻別人圖書。投見地方官員。恣行欺誑。此等情弊。深可痛惡。地方大小各官。果能持已端方。制行清直。於此等違法干請之輩。即不應所求。不給財物。何懼之有。以後地方文武各官遇有此等遊棍。應即嚴拏具奏。將主使之入究出。從重治罪。若畏懼徇私。不行陳奏。被旁人訐告。科道糾叅。將地方

官一并從重治罪。兩部通行曉諭內外王以下文武大小各官。○諭刑部向來東西長安門外豎立石碑。原為民有冤枉。令其伸告。近見奸狡棍徒。並無冤抑。謊捏事端。誣告者多。實情者少。將無辜牽連苦累。又聞無賴之徒。指稱叩關。在於地方恣行挾詐。擾害良民。是負朝廷恤民之心。而開奸徒生事之路也。通政使司登聞鼓衙門既許封進狀詞。伸理冤枉。以後內外官民果有冤抑事情。著照例於通政使司登聞鼓衙門告理。叩關之例永行停止。○以甘肅寧州安化等五州縣及慶陽衛康熙六年分民遭疾疫。將丁銀豁免。并免地畝額賦一年。○壬戌免江南上元江寧石城等衛所康熙六年分旱災額賦有差。○癸亥加山西提督柯永盛太子少保。以効力年久故也。○甲子。

上詣

太皇太后宮問安。○乙丑免江南海州清河等

七州縣康熙六年分水災額賦有差○丁卯兵部題前奉

上諭凡外國之人除進貢方物外將貨物在邊界處所貿易有無定例命臣等會同禮部詳察具奏查外國非係貢期竟來貿易者會典並未開載惟康熙二年准荷蘭國貿易一次康熙三年准暹羅國貿易一次隨於康熙五年永行停止請嗣後非係貢期藥不准其貿易從之

夏四月己巳朔享

太廟

上親詣行禮○庚午

上詣

太皇太后

皇太后宮問安○吏部等衙門遵旨議覆嗣後巡視鹽政不必專差御史應於六部滿漢司官內揀選賢能之員一并差遣所差司官俱授御史職銜差滿考核仍回原任從之○癸

酉左副都御史左敬祖以疾乞休允之○丁丑以故三等阿思哈尼哈番白冲之子色冷札什襲職○戊寅

上詣

太皇太后宮問安○庚辰裁義王孫徵淳俸銀二千兩仍歲給三千兩藩下官役酌撥地土停其支給銀米○予故戶部侍郎致仕鏗特祭葬如例○先是浙江嘉善縣民郁之章有罪流徙尚陽堡會有認工贖罪之例其子候選知縣郁褒請修刑部衙署贖父還里至是限期將滿尚未訖工郁之章例當復徙郁褒叩閤願棄官代父之徙所郁褒弟生員郁廣亦叩閤言己當代徙留其兄郁褒侍父疾部議子代父徙非舊例仍治以衝突儀仗罪上矜其孝友特並宥之○壬午吏部議覆山西巡撫楊熙疏言都司經歷武弘祖具呈請回旗終養查與例不符應不准行得旨漢官有終養之例旗下出仕外省者向無終養之例

終養關係孝道。不宜以漢官旗下官分別。著再畫一具奏。尋部議武弘祖准如漢官例終養。並著為令。從之。○癸未。

上詣

太皇太后

皇太后宮問安。○陞左僉都御史金世德為左副都御史。○吏部遵旨議覆。行取知縣既咨行各省。令將才能夙著者選送。若預定員數。或人不及額。而庸流得以濫充。或人浮於額。而賢者無由盡舉。嗣後應停其定數。凡知縣內有卓異薦舉。無錢糧盜案者。列名咨送。如無卓異薦舉之員。將歷俸三年無錢糧盜案。才能夙著者。令該督撫詳確選擇。列名咨送。臣部復行詳核具題。行取來京。候皇上考選。以科道用者。註冊候缺出。以次題補。用完之日。再行具題行取。若無才能官員。不必充數。濫送督撫有咨送匪人。及錢糧盜案未結之員者。治以徇情之罪。從之。○甲申。停

巡倉御史差。○三等阿達哈哈番賀樂齊巴圖魯。創發身故。照陣亡例予祭葬。○吏部題銓政關係重大。臣部滿洲員外郎缺出。停其較俸陞補。將候補員外郎及部院衙門應陞官員內。選擇除授。得旨。如議行。戶禮兵工四部員外郎。亦著選擇補授。○乙酉。

孝端文皇后忌辰。遣官祭

昭陵。○丙戌。喀爾喀多羅冰圖貝勒巴爾布故遣官致祭。○丁亥。賜直隸各省卓異僉事道張九徵等十二人。蟒衣各一襲。○戊子。

上詣

太皇太后宮問安。○己丑。裁直隸各省大小衙門吏攢承差等役三千八百四十九名。共存留二萬六千五百八十六名。○庚寅。初。安南都統使莫元清為安南國王黎維禧所逼。奔入雲南。上疏陳訴。上命安置莫元清於南寧。安南國王黎維禧亦上疏言興兵復讐始末。

上遣內秘書院侍讀李仙根等齎敕宣諭黎維禧。敕曰。

皇帝敕諭安南國王黎維禧據爾奏稱。因莫元清之祖莫登庸有逼陷爾先國母先嗣王。行弑奪國之讐。今興兵致討等語。又稱報復爾國前讐。剿除莫氏。止有莫敬恭莫敬寬竄居高平。爾又往討。已經設誓和好等語。據此。則爾讐已復和好完結。各居異地矣。莫氏作亂之人。既皆喪亡。又係故明嘉靖時已完之事。蓋已世遠年久。莫元清先經納貢歸誠。朕授為都統使之職。爾後又納貢歸誠。隨封為王。爾今生事興兵。稱為復讐。理應於未興兵之前。將情節陳奏。聽候敕旨。乃竟未請旨。遽爾興兵。殘破高平地方。殺戮兵民。殊為不合。今既稱遵旨罷兵。著將高平地方人民俱復還。莫元清各守土安生。以副朕綏乂生民之心。盡爾奉藩之義。庶永承寵眷之祉矣。其慎思恪遵而行。毋違特諭。○定鑾儀使品級。視尚

書○酌減直隸各省存留錢糧額數○辛卯。以故三等阿思哈尼哈番李可植子李廷弼襲職○海澄公黃梧疏言海疆底定。非昔日強寇出沒可比。福建全省之兵。並歸經制。獨同安城守一營官兵。尚屬臣標。請將城守營副將一員。兵一千名。悉歸經制。聽總督提督管轄。從之○雲南道御史徐旭齡疏言。國家生財之道。墾荒為要。乃行之二十餘年而無效者。其患有三。一則科差太急。而富民以有田為累。一則招徠無資。而貧民以受田為苦。一則考成太寬。而有司不以墾田為職。此三患者。今日墾荒之通病也。朝廷誠講富國之效。則向議一例。三年起科者非也。田有高下不等。必新荒者三年起科。積荒者五年起科。極荒者永不起科。則民力寬而佃墾者衆矣。向議聽民自佃者非也。民有貧富不等。必流移者給以官莊。匱乏者貸以官牛。陂塘溝洫。修以官帑。則民財裕而力墾者多矣。向議停

止五年墾限者非也。官有勤惰不等。必限以幾年招復戶口。幾年修舉水利。幾年墾完地土。有田功者陞。無田功者黜。則懲勸實而督墾者勤矣。下部確議具奏。○壬辰。

上詣

太皇太后

皇太后宮問安。○癸巳。申刻。金星見午位。色微暗。○乙未。以噶達渾穆成額為鑾儀衛鑾儀使。○予故蒙古都統議政大臣三等伯車爾布祭葬如例。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十六

監修總裁官光祿大夫太僕兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙七年戊申五月戊戌朔

實錄卷二十六

上詣

太皇太后

皇太后宮問安○兵部題投誠官兵理應凜遵

法紀近見福建督撫疏奏投誠各官騷擾地

方勒索百姓種種不法福建如此他省可知

皆由該管將領鈐束不嚴并該督撫申飭不

力所致請敕各省督撫提鎮嚴行禁止若仍

前弊或被害人等首告或科道糾參將該管

將領從重治罪從之○辛丑以盛京工部侍

郎努山監修

永陵大殿廊柱不固命解任○壬寅命福建巡

海道自福州府移駐漳州府○廣東道御史

陳可畏疏言甘肅巡撫劉斗題報平涼慶陽

臨洮鞏昌四府康熙六年夏旱秋澇已奉旨

將慶陽府屬額賦全蠲而平涼等三府未得

一例邀恩請將三府見年錢糧盡行蠲免已

徵者流抵下年正額部議不准得旨陳可畏

奏稱平涼等三府未得與慶陽府屬一例邀

實錄卷二十六

恩爾部乃云秋禾收與不收難以預知毋庸

議如此則饑饉之民何以輸納著再確議具

奏○癸卯

上詣

太皇太后宮問安○乙巳戶部議准陝西巡撫

賈漢復疏請將西安等四府積穀變價生息

得旨出陳易新原以為民若將利息報部恐

反累百姓著停止生息○丁未陞陝西隴右

道張文德為貴州按察使司按察使○庚戌

夏至祭

地於

方澤。

上親詣行禮○遣官祭

關聖帝君○辛亥。

上詣

太皇太后

皇太后宮問安○壬子。諭吏部等大小各衙門。

朕親政以來。孜孜圖治。期於民生乂安。聿臻

平數九二六

上理。乃今年自春徂夏。雨澤愆期。茲復太白

晝見。

天象屢示儆戒。朕甚懼焉。今力圖修省。彌加敬

慎。勵精勤政。以答

天心。其在內各部院官。理應各盡乃職。公廉自

効。副朕信任之意。今惟瞻徇情面。圖潤私家。

不念國計。但求便己。有負倚任。在外督撫提

鎮以下各官。原欲令其綏理地方。撫恤軍民。

咸令得所。近見大吏朘削卑官。卑官虐害軍

民。濫行科派。脂膏竭盡。甚至逃亡。此皆內外
大小各官不務公廉。有違

天意。以致災異頻見。嗣後務須洗心滌慮。痛改

前非。如仍因循舊習。不行更改。事經察出。從

重治罪○癸丑。子時。京師地震○命新設浙

江寧台溫巡海道。駐劄台州○欽天監監正

馬祐疏言。本月初七。初九。十三日未時末。金

星見於午方。星體微暗。無占。得旨。欽天監職

司占候。凡有變異。即應明白奏聞。今稱微暗

無占。日久方行具奏。殊屬不合。著嚴飭行○

安南國王黎維禧遣陪臣阮潤等表謝賜卹

冊封恩。并進歲貢禮物。宴賚如例○甲寅。

上詣

太皇太后

皇太后宮問安○乙卯。諭吏部等衙門。近見天

氣亢暘。禱雨未應。風霾日作。禾苗枯槁。倘仍

不雨。秋成無望。民生何賴。皆由內院六部都

察院大臣。不能公忠體國。政事舛錯。及一切

事務應完結者。駁察耽延。則例繁多。任意輕重。以致屬員胥吏乘機作弊者甚多。著即指名叅奏。從重治罪。其才庸不能辦事者。亦著叅奏黜革。勿得徇情姑留。如經朕知。或被傍人糾叅。將該管官治罪不貸。刑部督捕等衙門。獄訟牽連自久不結。令無辜沉寃獄底。而擬罪引律。偏用重條。嚴刑酷罰。以苛察為明。深求為能。積怨既深。上干

天和。垂示災異。宜加修省。以為消弭之計。至科道職司言責。糾叅建白。必有益國計民生。方應陳奏。勿得苟且塞責。各部院大小臣工。尚其同心協力。修舉政事。共挽

天心。體朕惓惓求治之意。○貴州道御史田六善疏言。帝王緝熙典學。不必專待經筵。請

皇上於聽政之暇。日取漢唐宋元四代史冊。親閱數條。凡一切用人行政。黜陟賞罰。理亂興衰之故。反復討論。庶盛德日新。大智益廣。疏入。報聞。○雲南道御史黃敬璣疏言。刑獄一

節上開

天心。今自春徂夏。雨澤愆期。則清理刑獄。誠第一要務也。請敕內外問刑衙門。凡一應刑名。早為審結。除獄中重囚。照舊監錮外。其餘一切情輕罪薄。及牽連等犯。即行保釋。務令獄無寃滯。則和氣可以致祥。又查

世祖章皇帝時。曾有熱審之例。原慮暑天獄囚。易致疫斃。故減等速結。今當此亢暘。尤宜舉行。以答

天心。得旨。所奏甚是。在內罪犯。熱審已有旨。著直隸各省速遵行。○丙辰。予故安徽巡撫致仕宜永貴祭葬如例。○以天旱。命內大臣公鰲拜。大學士圖海。李蔚等。會同刑部。審理重囚。矜疑者減等發落。○丁巳。

上詣

太皇太后宮問安。○免山東海豐縣康熙六年分水災額賦十之二。○庚申。

上詣

太皇太后

皇太后宮問安○命山東巡海道自青州府移駐萊州府○免直隸東光縣康熙六年分水災額賦十之二○癸亥河道總督楊茂勲疏言黃河水沙相平常苦淤決欲圖長策舍築隄束水之外別無良法今除歲修外凡黃河南北兩岸舊隄壩築皆繕治至清口為淮黃交會之所頃黃水盛漲薦越淮河二三十里若不急治為患非小必於天妃閘外築壩逼黃引淮出口淮黃相抵歸海自順下部議行○甲子

上詣

太皇太后宮問安○安南國王黎維禧疏請六年兩貢並進禮部議仍照會典定例三年朝貢得旨覽王奏稱該國僻居禹服之外道路悠遠山川阻深貢役勞苦三年六年先後雖異禮意恭敬則一等語該國遵奉教化抒誠可嘉此進貢著照該王所奏行○乙丑命浙

江北新開事務歸并鹽運使管理○丙寅吏部議覆左副都御史哲庫訥金世德等疏言督撫原有撫綏百姓之責近例處分止有貪墨欠賦并違限錯擬等罪而百姓失所地方未治並無處分之例請敕部議定如有百姓困苦流離拋棄田地地方毫無治理者將該督撫革職從重治罪應如所請從之○丁卯陞左通政敖色為盛京工部侍郎

六月戊辰朔

上詣

太皇太后

皇太后宮問安○辛未以故一等阿思哈尼哈番佟光先子佟諮詢襲職○癸酉金星晝見○丙子降三等輔國將軍巴爾堪為二等奉國將軍以誣告簡親王下掌管家務官博博爾代故也○丁丑諭刑部嚴禁賭博向有定例近聞官民有以此為事者廢棄本業傾敗家產深屬可惡此皆該管官員稽察不嚴或

徇情護庇。不行發覺所致。嗣後滿漢官員軍民人等有賭博者。該管官不行察出事發審實作何嚴處。旁人首告者。作何賞給。至樗蒲等物。乃敗壞人性。導引為非之具。將此貨賣亦屬可惡。作何嚴行禁止之處。一并詳議。○予故一等阿思哈尼哈番陳紹宗祭葬如例。○戊寅。

上詣

太皇太后宮問安。○己卯。以原任貴州布政使徐烜補授廣東布政使。司布政使。○庚辰。加河道總督楊茂勲太子少保。以修黃河烟墩工竣也。○甘肅巡撫劉斗疏請免莊浪等五縣旱災額賦。得旨莊浪等五縣百姓饑饉已遣官賑救。該撫既稱飢民難辦額賦。今年錢糧著即蠲免。○辛巳。戶部遵更定事例。查報災定例。夏災不出六月。秋災不出九月。但踏勘於收穫未畢之先。始可分別輕重。請嗣後報災限期。夏災不過五月初一。秋災不過八

月初一。踰期仍如例治罪。得旨凡被災州縣有司必先勘察申報。該撫然後具題。地方遠近不一。若限期太迫。被災之民恐致苦累。其仍如舊例行。○癸未。陞禮部左侍郎布顏為禮部尚書。○以一等侍衛索額圖為吏部右侍郎。○叙剿滅西山賊功。授原任四川總督李國英二等阿思哈尼哈番。○兵部議覆戶科給事中吳國龍疏言驛遞苦累最甚。除出征大兵及駐防官兵家口。自北往南者。皆係緊急軍機。應照例給夫外。其自南往北者。宜停止給夫。庶不致差繁費重。查出征大兵。關係軍機。應照舊例。其駐防官兵家口。無論往南往北。陸路量給夫車。下水不給緯夫。上水緯夫。比舊例減半給發。自京起程者。臣部定限。自外起程者。該督撫定限報部。不許沿途逗留。違者該管官叅劾治罪。從之。○甲申。

上詣

太皇太后

皇太后宮問安○免直隸固安等三縣本年分水災額賦有差○吏部遵旨更定事例一鹽運使帶徵舊欠限內徵完其紀錄加級不論俸滿陞轉之處仍照見行例行傳其內陞一世襲職官如係一人所立之職應停其分襲仍與一人承襲一為父母丁憂官員其有無過繼為祖父母承重丁憂官員其有無伯父是否長孫咨內結內有一處聲明者即准守制一在京漢官告病回籍調理不必勒限年分俟其病痊該地方官詳報督撫具題赴部補用從之○乙酉諭兵部嗣後緝捕叛犯本省仍照例立限承緝其通行各省者蔡許崇緝不必依限取結以滋民累著為令○旌表福建靖南王耿繼茂下節婦黃世英妻佟氏陳復顯妻呂氏金貴妻何氏崔天泰妻趙氏並給銀建坊如例○兵部遵旨更定事例各衛世職官若果歷有軍功著有勞績該督題請到日臣部確核具題推用如無軍功勞績

槩不推用得旨各省入衛世職自願効用者如不詳察一槩錄用恐悞地方事務若以無軍功不准錄用亦屬不便此等入衛各官如有願効用者爾部試其善步騎射年力精壯者仍准錄用○兵部又議武職各官應陞之時有捐助紀錄四次者准與軍功紀錄一次者一體陞轉如不及四次者停其銜缺兼陞或銜或缺准陞一項將所有紀錄仍准帶於新任其捐助紀錄至四次以上者亦照此計算從之○丁亥以正藍旗滿洲都統濟世為工部尚書○戊子

上詣

太皇太后宮問安○諭戶部向因地方官員濫徵私派苦累小民屢經嚴飭而積習未改每於正項錢糧外加增火耗或將易知由單不行曉示設立名色恣意科斂或入私囊或賄上官致小民脂膏竭盡困苦已極朕甚憫之督撫原為察吏安民而設布政使職司錢糧

釐剔奸弊。乃其專責。道府各官於州縣尤為親切。州縣如有私派濫徵。枉法婪贓情弊。督撫各官斷無不知之理。乃頻年以來糾疏甚少。此皆受賄徇情。故為隱庇。即間有糾參。非已經革職。即物故之員。其見任貪惡害民者。反不行糾參。甚至已經發覺之事。又為朦混完結。此等情弊。深可痛恨。嗣後如有前弊。督撫司道等官不行嚴察揭參。或經體訪察出。或被科道糾參。或被百姓告發。將督撫一并嚴處不貸。至兩部收納直隸各省解到錢糧。亦須隨到隨收。速給批迴。毋得縱容司官筆帖式書辦等勒索作弊。苦累解官。倘有違法。即行參奏。如不行嚴禁。察出將堂司各官一并從重治罪。又言官於作弊害民者。理應察訪指名糾參。乃近日章奏大率撫拾細故。苟且塞責。嗣後當據實陳奏。毋得挾私讐害。兩部即遵諭速行直隸各省大小官員。刊示曉諭百姓。○平南王尚可喜疏請遣子尚之信

入侍。允之。○癸巳。

上詣

太皇太后

皇太后宮問安。○甲午。工部議覆左都御史王熙疏言。部院見行事務。請酌復舊章。查臣部見行事例。因時酌定。不便更易。惟修築黃河運河決口。工程浩大。節省錢糧。完工迅速者。改照順治十八年以前例。分別加級紀錄。從之。○乙未。轉禮部右侍郎常鼎為左侍郎。以內務府總管米思翰為禮部右侍郎。

秋七月戊戌朔。享

太廟。

上親詣行禮。○

上詣

太皇太后

皇太后宮問安。○吏部題各部院甄別才力。不及滿漢官共二十七員。得旨。才力不及滿洲蒙古漢軍各官。不必於部院衙門調用。俱著

降二級。隨旗行走。漢官不必調外用。俱著以所降二級頂帶致仕。○戶部題陝西莊浪等五縣本年錢糧已恩准全蠲。但恐有已徵在官而地方官重徵等弊。應請飭禁。得旨是。免徵錢糧。速於該地方出示曉諭。有已徵在官者留抵下年正額。如地方官將已徵錢糧不行留抵重徵者。該督撫指名題參。○己亥。命江西驛傳事務歸并按察使兼理。○裁貴州清平縣。歸并麻哈州。○令奉天唐官等屯所圈之地退還民間。○以貴州新設大定平遠黔西威寧四府均屬苗戶。暫免編丁其地畝。照衛田徵糧。○辛丑。命崇文門及左右兩翼收稅揀選各部公廉有才能滿漢官員。永行差遣。不必更替。○壬寅。命鄉會試復以八股文取士。○乙巳。

上詣

太皇太后宮問安。○丁未。諭戶部。小民資生惟賴田畝。一遇災祲。禾稼損傷。誠可憫惻。急宜

蠲賦。以昭恩恤。嗣後凡有水旱蝗蝻等災。有司官星夜申報。督撫督撫各照駐劄附近地方。隨帶人役。務極減少。一切執事。盡行撤去。勿致累民。將被災田畝。作速親勘。定明分數。造冊達部。照例蠲免。務令人沾實惠。兩部速飭直隸各省遵行。○命廣西驛鹽事務歸并布政使兼理。○以渾河水發。衝決蘆溝橋及隄岸。遣工部侍郎羅多等前往修築。○戊申。以故三等伯車爾布子莽喀襲爵。○辛亥。

上詣

太皇太后

皇太后宮問安。○壬子。中元節。遣官祭

永陵。

福陵。

昭陵。

孝陵。○欽天監監副吳明烜疏言。見用古曆。亦無差謬。如五官正戈繼文等所進曆。暨回回科七政曆。三本互有不同。宜令四科知曆之

官詳加較正。以求至精。然推曆以黃道為驗。黃道以渾儀為準。今觀象臺渾儀損壞亟宜修整。又地震方向。各有所占。請造滾球銅盤一座。並設臺上。儀器備則占驗始為有據。得旨。曆法甚為精要。如何而使大備。永遠可行。著禮部確議具奏。○癸丑。命改私鑄定例內。鄰佑知情不首。斬罪為徒罪。○乙卯。

上詣

太皇太后宮問安。○直隸巡撫甘文焜疏請復巡歷舊規。部議不准。得旨。前諭各省遇有水旱等災。督撫務減儀從。將被災地方作速親勘。欲令體訪貪虐官吏。重加懲治。且使兵民疾苦。地方應行之事。得以驗實更改。督撫若不巡歷。屬員反借災荒顛倒重輕。私行科派。俱未可定。甘文焜所請著准行。○丙辰。以山東六月地震。命戶部速行詳議。分別蠲賑。○戊午。授固山月子章泰女為縣君。塔正黃旗太子少師內大臣公戴壽為固山額駙。○革

職漕運總督恭順侯吳維華密疏請徵各州縣鎮市房號銀兩。及江南三十餘洲。令民納價領種。

上惡其害民斂財。交刑部議罪。○庚申。以鑲藍旗蒙古都統誇岱為滿洲都統。○尼麻察姓頭目佛柳等進貢貂皮。賞賚如例。○辛酉。

上詣

太皇太后

皇太后宮問安。○命禁止渾河隄岸處所莊佃私開溝口。仍命工部察看在京內外河渠及時疏濬。○壬戌。兵部議覆四川總督苗澄疏言。酉陽一司兼石耶平茶邑梅三長官司。封畛過侈。不得不為先事之防。考名勝誌。明永樂初。平茶邑梅二司。改隸渝州。渝州即今重慶府也。宜照此例。將平茶邑梅二司。改隸重慶。以消蠻司土廣民衆之勢。應如所請。從之。○癸亥。吳喇忒鎮國公白爾圖故。遣官致祭。○乙丑。陞護軍統領俄托渾為鑲藍旗蒙古

都統

八月丁卯朔

上詣

太皇太后

皇太后宮問安○遣大學士衛周祚祭

先師孔子○戊辰祭

大社

大稷

上親詣行禮○壬申以戶部尚書王弘祚失察

書辦勞于新等假印盜庫銀及孫文煒等控

告不核實命革職○癸酉命都統內大臣大

學士尚書精奇尼哈番以上各照實級用棍

傘行走不必照加級護軍統領前鋒統領副

都統侍郎等亦不必照加級各照職掌品級

用執事行走餘俱照見例行○甲戌

上詣

太皇太后宮問安○乙亥

太宗文皇帝忌辰遣官祭

昭陵○丙子陞鑲藍旗蒙古副都統喇賽為護

軍統領○以巴林故多羅郡王額駙色布騰

子鄂齊爾襲爵○丁丑

太祖高皇帝忌辰遣官祭

福陵○戊寅工部議覆河道總督楊茂勲疏報

河決桃源黃家嘴壞隄工二百餘丈應令該

督速行確勘修築從之○己卯裁雲南歸化

縣歸并呈貢縣鶴慶府順州歸并鶴慶府○

辛巳秋分夕

月於西郊遣吏部尚書阿思哈行禮○

上詣

太皇太后

皇太后宮問安○轉禮部尚書黃機為戶部尚

書○朝鮮國王李柎遣陪臣李楨等齎表慶

賀

世祖章皇帝配享

天地

太皇太后

皇太后加上徽號并謝頒賜恩表文曰禮成配天仍舉

兩宮之緡典恩覃率土特紓十行之寵頒懼忤惟均感戴深切伏念臣叨守遺緒幸際昌辰荷

先帝恤小之仁惟有沒世不忘欽

大朝錫類之教誓勉移孝為忠頃屬裡祀於園丘庸進顯冊於

慈極式彰前烈益見

宗考之隆誕加

徽稱咸仰尊親之至何意異渥之薦降得被同慶之洪庥初捧渙汗之音忭聞

聖諭復修便蕃之賚實分

御珍詎敢承當徒自兢惕茲蓋伏遇

皇帝陛下首出庶物躬蒞萬幾遵侑饗之舊章罔愆繼述闡立愛之新化務盡情文遂推鴻私亦及縹域臣敢不宣揚盛事佩服榮光駿奔執籙縱阻辟公之相鰲抃獻祝願與老稚

而偕○科爾沁多羅貝勒綽爾濟故遣官致祭○壬午陞叅領李時芳為福建右路總兵官○命各部院衙門凡不係具題緊要事情緊不准給驛站○癸未命刑部酌定見行則例詳晰分款陸續進覽○甲申宗人府題多羅郡王蘭布告稱我父尼堪在軍前効力

世祖章皇帝封為和碩敬謹親王復命為定遠大將軍往征湖南陣亡將和碩親王襲與我弟尼思哈後以諂媚睿王與譚泰之事將吳親王端重親王俱降為貝勒因我父陣亡將尼思哈承襲之和碩親王不降順治十八年我弟尼思哈亡後減去親王將我授為多羅貝勒康熙六年念我父陣亡深為可愍陞封郡王竊思

世祖章皇帝將二王降為多羅貝勒仍留尼思哈所襲之和碩親王此特念我父尼堪陣亡之功也今無故減襲乞將此寬抑之處議明轉奏查和碩敬謹親王因奉

世祖章皇帝諭旨。仍留所襲親王。今多羅郡王蘭布。應將伊父和碩親王承襲。得旨。多羅郡王蘭布。著襲封和碩親王。○陝西合水縣休致知縣龔蓀。以欠民糧四分以上。罰追銀八百兩。產絕。至鬻子以償。仍未完納。甘肅巡撫劉斗。以聞。得旨。龔蓀因未完錢糧。罰追銀兩。產絕窮迫。以致鬻子。殊為可憫。令該地方官贖還之。其未完銀兩。悉與豁免。○乙酉。遣官祭

歷代帝王。○遣官祭城隍之神。○以吏部郎中簡上。為江南按察使司僉事。提調學政。兵部督捕郎中史逸裘。為河南按察使司僉事。提調學政。○命土知州有約束番民。徵納糧賦之責。既襲職給劄。應給與新印。○丙戌。上詣

太皇太后宮問安。○戊子。轉刑部尚書郝惟訥。為禮部尚書。○以一等阿思哈尼哈番席布。為鑲藍旗蒙古副都統。○以淮安由開五項

河銀歸并知府管理。○戶部議覆廣西巡撫金光祖疏。言桂林等府康熙六年分雜稅較康熙五年分所收數少。恐有侵隱。駁令嚴核。得旨。地方雜稅。原無定額。豈可因康熙六年所收之數。少於康熙五年。遂稱有侵隱。懸揣駁查。致令累民。其即如該撫所題核銷完結。○乙未。諭戶部。今歲水災。順天等府所屬地方。田禾淹沒。廬舍傾圮。頗多。除被災田畝。俟該督撫親勘輕重分數具題酌免。但被災之民。無以資生。必致流離失所。應作何賑恤。爾部速議以聞。尋戶部議發常平倉糧賑濟。如不足。計數報部。近畿之地。從通倉動給。遠者令附近省分協濟。從之。○山西道御史侯于唐疏言。今各部郎中等官。陞補差遣。皆遴拔才能。原屬鼓勵廉幹之法。但奉行未善。致負皇上作人之意。如崇文門左右翼三差。戶部禮部各送一人。吏兵刑工竟無一人。同一才能。也何開列崇文門兩翼三缺。止得二人。開列

學道兩缺。共得十一人。豈於學道則忽而多才。於崇文門兩翼忽而乏才乎。臣愚以為才能非可驟見。能循分盡職。即是才能。況不開事績。已非責實之令典。通行論俸。於情為甚平。於理為可久也。應請仍行序俸之法。得旨。前令將有才能者。補授緊要員缺。原恐才能淹抑。今據奏崇文門等三差。各部止送二人。學道兩缺。各部送十一人。其中有無揀擇規避情弊者。都察院嚴察議奏。至有才能之人。論如何不致壅滯。著令保舉。如無保舉之人。論俸陞轉之處。都察院會同吏部。確議具奏。○丙申。禮部等衙門。議覆五官正戈繼文等所算七政曆。金水二星。差錯太甚。主簿陳聿新七政曆。未經測驗。亦有差錯。監副吳明烜之七政曆。與天象相近。理應頒行。但陳聿新推算已酉年民曆。已經頒行。各省不便更換。止於本年暫用。其七政經緯躔度。月五星凌犯等曆。及日月交食。既據吳明烜自認務求合

天應自康熙九年以後。俱交吳明烜推算。仍令欽天監堂官。同四科官員。每日上臺。晝測晷影。以定節氣。夜測日月五星。以定行度。四年之內。修正務期合天。著成曆書。得旨。著吳明烜將康熙八年曆目。七政曆目。推算進覽。餘依議。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十七

監修總裁官光祿大夫太子保兼太子太傅保和殿大學士兼戶部尚書二等伯四

級馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙七年戊申九月丁酉朔

實錄卷二十七

上詣

太皇太后

皇太后宮問安○轉工部尚書朱之弼為刑部

尚書○免湖廣黃岡等十三縣本年分旱災

額賦有差○兵部議覆左都御史王熙疏言

康熙三年定例逃人誑稱伊有財物稟部行

提虛者鞭責但玩法之人仍將無辜誑告亦

未可定應查原檔內有財物帶往者准行提

原檔內無者不准行提又窩逃之人未曾流

徙之先身故者其妻子免其流徙應如所請

從之○直隸山東河南總督白秉真請修坍

塌城垣部議行令地方官設法修理得旨今

年雨水甚大各處城垣多有傾圮與尋常修

理不同若責令地方官設法恐不能完工反

致累民該部察明確議具奏○庚子金星晝

見○陞內務府郎中卓靈阿為內秘書院學

士○以盛京戶部侍郎吳瑪護為奉天將軍

江寧副都統額楚為江寧將軍西安副都統

實錄卷二十七

瓦爾喀為西安將軍○以故一等阿思哈尼

哈番陳紹宗子陳王道襲職○辛丑河南巡

撫張自德疏奏折解布花價值數目得旨改

折布花價值太過恐致累民應否減折核議

具奏尋戶部議布花價值照每年時價折解

庶不累民如有冒徵侵蝕之弊該撫指名題

參從之○壬寅予故議政大臣二等伯都統

卓羅祭葬謚忠襄加祭一次○癸卯

上詣

太皇太后宮問安○以刑部尚書對喀納為內國史院大學士○甲辰以左都御史王熙為工部尚書○轉兵部右侍郎邁音達為左侍郎○陞內秘書院學士塞色黑為兵部右侍郎○乙巳陞四川按察使李紳霄為江西布政使司布政使陝西按察使潘超先為貴州布政使司布政使○丙午以正白旗蒙古都統伯宜理布為滿洲都統○予故一等阿思哈尼哈番和爾渾祭葬如例○丁未裁四川崇寧縣歸并耶縣彭縣歸并新繁縣岳池縣歸并廣安州新寧縣歸并梁山縣大寧縣歸并奉節縣武隆縣歸并涪州○戊申陞內弘文院學士明珠為刑部尚書○庚戌命大學士對喀納充

世祖章皇帝實錄總裁官○辛亥

上詣

太皇太后

皇太后宮問安○陞吏部左侍郎馮溥為都察

院左都御史○以戶部尚書馬遜賽兼正白旗蒙古都統○壬子內秘書院侍讀學士熊賜履疏言

皇上一身

宗廟

社稷所倚賴中外臣民所瞻仰近聞

車駕將幸邊外伏乞俯採芻言收回成命如以農隙講武則請遴選儒臣簪筆左右一言一動書之簡冊以垂永久得旨是朕允所奏停止邊外之行所稱應設起居注官知道了○吏科給事中趙之符疏言今天氣已寒乞仰體

太皇太后慈衷顧慮暫停遠行且今歲地震水溢似宜休息兵民得旨是○癸丑諭吏部兵部朕頃以秋冬農隙講武之時欲一往邊外閱視不久即還今覽諸臣前後各疏稱今歲災變甚多不宜出邊以致兵民困苦朕思諸臣抒陳忠悃直言進諫深為可嘉已允所請

停止邊外之行。以後國家緊要重大事情。如有未當。務將所見直陳。朕不憚更改。爾二部即傳諭遵行。○內秘書院侍讀學士熊賜履疏言。朝政積習未祛。國計隱憂可慮。恭陳管見。仰佐睿謨。臣聞古帝王制治。貴力行。不貴多言。人主格天。在實政感孚。不在鋪張儀具。我

皇上聰明天亶。朝綱獨握。天下之人。靡不翹踵拭目。以觀德化之成。而蒞政以來。設施措置。猶未足以大厭服斯人之望。豈積習之難除歟。抑力行之未至也。如祀郊壇。秉琮璧。敬天矣。而時幾敕命。果無聞於旦明否也。修實錄。率舊章。法祖矣。而覲揚光烈。果無敦於顯承否也。早臨午御。勤政矣。而章程之叢脞。猶煩也。蠲荒賑乏。恤民矣。而井閭之疾苦。猶劇也。詔修太學矣。而辟雍之鐘鼓。不聞。疏請經筵矣。而文華之几案。未設。清銓叙而吏道益雜。肅官箴而廢弛滋甚。

皇上日孜孜焉。唯又安致治之是務。而曾無一如

聖志之所期。此臣之所為太息也。年來災異頻仍。饑荒疊見。此正宵旰憂勤。撤懸減膳之日。伏乞

皇上思

祖

宗付託之重。念朝野望治之殷。恪謹天戒。顧畏民君。以誠為奉。若之本。以敬為綏。猷之要。乘乾行健。自强不息。所為君志定而天下之治成矣。然非曰。一人垂拱於上。百職事承奉於下。而初無藉於啓沃開導也。宋儒程頤曰。天下治亂繫宰相。君德成就責經筵。是講學勤政二者不可偏廢。而在今日。尤為最切要者也。臣請蒞政之暇。間御便殿。接見儒臣。諮諏講論。如天人理欲之分。危微操舍之界。道術是非之辨。政事得失之由。一一明晰而討究之。凡措諸事為。徵諸政教。無一不本之以誠。

持之以敬。而無或有纖微之間怠。則稔沴潛消。庶徵協應矣。得旨。本內稱朝政積習未除。國計隱憂可慮。設施措置未大。厭服斯人之望等語。著據實逐一明白具奏。○甲寅。陞左通政納桑阿。為盛京戶部侍郎。○乙卯。

上詣

太皇太后宮問安。○丙辰。內秘書院侍讀學士熊賜履遵旨回奏。前疏請舉經筵蒙

皇上有抒陳忠悃。直言進諫之褒。隨復奉有嚴綸。令臣明白指陳。臣學道無聞。願忠有素。祇因年來災變流行。上天譴告。或亦人事因循所致。故有積習未祛。隱憂可慮之奏。又願皇上治如堯舜。俗若成康。故有未大厭服斯人之望等語。正使今日已治已安。盡善盡美。而臣子入告。亦必有憂勤惕勵之言。以感動至尊。庶幾制治未亂。保邦未危之意。惟

皇上俯鑒焉。得旨。既不能實在指陳。則是妄行冒奏。以沽虛名也。下部議處。尋部議降二級。

調用。

上從寬免之。○丁巳。陞協領張所養為京口副都統。○免浙江寧海等七縣本年分旱災額賦有差。○己未。調工部左侍郎杜篤祐為吏部左侍郎。○陞護軍叅領馬哈丹為正白旗滿洲副都統。○庚申。

上詣

太皇太后

皇太后宮問安。○辛酉。停總兵官軍政自陳。聽總督提督考核。其無總督地方。聽提督巡撫考核。○以喀爾喀故多羅冰圖貝勒巴爾布子索諾穆襲爵。○壬戌。命江南蘇州府開爐一百座鼓鑄。○癸亥。

孝慈高皇后忌辰。遣官祭

福陵。○乙丑。調內秘書院學士車靈阿為內弘文院學士。陞二等侍衛鄂善為內秘書院學士。

冬十月丙寅朔。享

太廟。

上親詣行禮○遣官祭

永陵。

福陵。

昭陵。

孝陵○頒康熙八年時憲曆○丁卯。

上詣

太皇太后

皇太后宮問安○命查故明廢藩田房悉行變

價。照民地徵糧。其廢藩名色永行除革○調

廣東左路總兵官劉進忠為廣西左江總兵

官○命內外八旗滿洲蒙古漢軍武官為其

父母。祖父母。及過繼父母。祖父母。居喪三月。

私居仍持服三年。奉差出外者。以回家之日

為始○戊辰。

皇太后聖壽節。遵

懿旨免行禮○庚午。

上幸南苑行圍○甲戌添設

孝陵讀祝官贊禮郎各一員○戊寅。叅領拜他

喇布勒哈番泥堪。創發身故。照陣亡例。予祭

葬○予故內大臣博羅色冷。祭葬如例○定

武殿試一甲一名進士。以叅將用。二名進士。

以遊擊用。三名進士。以署遊擊管營都司僉

書用○兵部題。康熙四年定緝盜處分例。內

開附近地方官不行追捕與本汛駐防官。一

體革職。似太過。應改降一級調用。從之○己

卯。

上自南苑回宮。詣

太皇太后

皇太后宮問安○乙酉。轉工部右侍郎楊運昌

為左侍郎。以原任刑部左侍郎吳正治為工

部左侍郎。管右侍郎事○以原任廣東按察

使席式為福建按察使。司按察使。原任山西

按察使宋可發為四川按察使。司按察使。原

任陝西按察使陳子達仍補原官○以科爾

沁故卓禮克圖親王畢爾塔噶爾子鄂輯爾

襲爵○喀爾喀土謝圖汗等遣使進九白年貢宴賚如例○丁亥。

上詣

太皇太后宮問安○戊子。免江南泗州等八州縣本年分水災額賦有差○戶部議覆直隸巡撫甘文焜疏報順天保定等府屬五十州縣衛水災請照例蠲免錢糧應如所請得旨甘文焜稱水災已甚請將今年錢糧全蠲兩部照例具奏固是但今年水災比往年不同

於例外另行作何蠲免著再議○禮部以江

南取到元郭守敬儀器請旨定奪得旨楊光先疏稱所用律管葭莩秬黍已經取到照尺

寸方位候過二年未見效驗按候氣之法自

北齊信都方取有效驗之後經千二百餘年

俱失其傳兩部議交與楊光先令訪求博學

有心計之人應將一千二百餘年失傳之處

能行修正之人可得與否及楊光先能修正

與否俱詳問再議具奏○庚寅裁湖廣總督

缺○戶部議覆吏科給事中王承祖疏言各省鹽餉應令商人自行銷運今陝西州縣官勒令百姓銷引轉向商人買引按畝攤派每引費銀一兩甚為民困應敕撫臣并巡鹽御史嚴行禁革從之○刑部議覆副都御史董篤行疏言朝審之時全憑獄冊驗看今每衙門止送一冊各員目不及見朦朧畫題甚非慎獄之意請敕刑部增造獄冊每人送一冊查閱應如所請從之○辛卯。

上詣

太皇太后

皇太后宮問安○工科給事中李宗孔疏言淮

揚二府連年累遭水災以淮水南流入湖決

隄之所致也查淮水舊由鳳陽泗州老子山

北直出清口與黃水會流入海此歷年北流

之故道也自老子山南周橋閘翟家壩一帶

注射高郵寶應邵伯諸湖而下流阻於漕隄

曾無入海之路又泗州盱眙地方多私開決

口。自古溝鎮至夏家橋等處。新開溝路。共有八條。淮水大半注湖。清口水分力薄。無以刷黃河之濁泥。下流壅則上流易潰。乃至衝決隄岸。淮揚受害矣。自康熙七年五月間。曾議築塞。而盱眙泗州奸民聚眾驅逐夫役。不容修築。遂爾中止。今應於翟家壩之北。將古溝鎮等處塞其決口。不必築隄加高。但復從前舊址。使全淮盡由清口。會黃入海。不致橫決入湖。可永杜高寶等邑之災。即有時淮水暴漲。仍從壩上滾水南下。亦不為泗州等處之害。誠兼利無患之至計也。請敕河臣將新舊衝開決口。速令高寶等處之民。乘此三冬農隙。照舊址速行修補。嚴立責成。並飭令泗州盱眙州縣官嚴加防視。庶淮水北流。得以會黃刷濁。通行漕運。而高寶等處不致頻被水災。疏入。得旨。據奏事情重大。著尚書馬廼賽等會同該總督總河。一并嚴察。速議具奏。十一月丙申朔。

上詣

太皇太后

皇太后宮問安○山東巡撫劉芳燭疏報山東省於康熙六年開墾荒地一萬二千二百六十餘畝。照例起科。下部知之○令修理八旗官學房○丁酉。暹羅國王森烈拍臘照古龍拍臘馬嘑陸坤司由提呀菩埃遣陪臣握坤司各喇耶邁低禮等表貢方物。宴賚如例○己亥。以吳喇忒故鎮國公白爾圖弟阿玉錫襲爵○禮部題暹羅國進貢方物與會典不符。應責其後次補貢。得旨。暹羅小國。貢物有產自他國者。與會典難以相符。所少貢物。免其補進。以後但以伊國所有者進貢○庚子。遣官祭濟寧州敕建河神廟○辛丑。

上詣

太皇太后宮問安○壬寅。盛京禮部侍郎胡密達。以病乞休。允之○戶部遵旨議覆保定等府屬水災。照例再加一分蠲免。得旨。朕聞保

定府真定府。霸易道所屬州縣地方被災特甚。殊為可憫。今若照兩部所議於定例外止增一分。蠲免四分。恐百姓不能輸納錢糧。以致困苦。其被災十分九分者。著將今年應徵錢糧全免。其被災八分七分者。著再增一分免四分。此內錢糧有已經徵收者。著留抵來年應徵錢糧。兩部於此蠲免錢糧地方刊示曉諭。令小民均沾實惠。○江寧巡撫韓世琦疏報淮揚所屬高郵興化等十四州縣。本年分水災。部議照定例加一分蠲免。

上以淮揚州縣被災較甚。著照保定等府一體蠲免。○丁未。

上詰

太皇太后

皇太后宮問安。○戊申。免直隸邢臺等十四縣河南磁州安陽等四州縣本年分水災額賦有差。其直隸沙河等四縣水沖地。照十分災例免。河南安陽臨漳水沖沙壓地。免正賦三

年。○兵部議覆廣東廣西總督周有德疏言。廣省沿海遷民。久失生業。今海口設兵防守。應速行安插。復其故業。得旨。著都統特晉等與該藩總督巡撫提督會同一面設兵防守。一面安插遷民。毋悞農時。致民生失所。○己酉。江南江西總督郎廷佐以病乞休。允之。○免直隸通州等十八州縣衛所本年分水災額賦有差。○庚戌。免湖廣潛江等七州縣衛本年分水災額賦有差。○癸丑。冬至。祀

天於

圜丘。

上親詣行禮。○遣官祭

永陵。

福陵。

昭陵。

孝陵。○甲寅。

上率諸王以下。文武大臣侍衛等詣

太皇太后

皇太后宮行冬至慶賀禮。御殿王以下文武各官上表朝賀。○丙辰諭吏部各部院衙門事務殷繁必得賢能之人。乃克辦理。近見倉場侍郎王度年齒衰邁。副都御史董篤行才力不及。伊等俱當處分。但念其効力有年。著以原品致仕。都察院科道等官職司建白糾彈。內外大小各官有衰庸及貪酷溺職者。理應據實指叅。近見言官章奏或條陳無可採取之瑣事。或止將微員塞責。不過以職任言官。曾言某事徒沽虛名而已。如內部院堂司各官果有囑託行賄者。即行糾叅。外而督撫以下有為害地方苛虐小民。大貪大惡者。即據實不徇情面叅發。則惡人知儆。地方又安。豈有不臻太平之理。爾等身為言官。並不據忠入告。殊為未盡厥職。理應俱加處分。姑寬免一次。以後務破情面。據實叅奏。以副朕用人圖治之意。爾部即嚴飭遵行。○免江南亳州等十二州縣衛所。湖廣漢陽等五州縣衛本

年分水災額賦有差。○禮部遵旨議覆候氣之事。據欽天監監正楊光先奏稱律管尺寸雖載在司馬遷史記。而用法失傳。今博訪能候氣之人。尚在未得。臣身染風疾。不能管理。查楊光先職司監正。候氣之事。不當推諉。應仍令延訪博學有心計之人。以求候氣之法。從之。○先是兵部以浙江蕭山等縣拏解逃人。監禁沉滯。請照例革職。奉旨地方官誤將良民稱為逃人拏解者。因其不行詳審定有處分之例。今欲詳核。故將逃人存留。乃復以監禁沉滯處分。則地方官將遵何例而行。著再行確議。至是議監禁沉滯革職之例。不便停止。其誣拏良民降級之例。應令暫停。得旨據奏欲留監禁沉滯處分之例。傳其誤將良民拏解處分之例。如此則不肖官員將良民拏解邀功。亦未可定。兩例著俱存留。其拏獲逃人。不行起解。遲滯幾日。作何處分。著再定議具奏。○戊午。

上詣

太皇太后宮問安○戶部議覆原任四川總督劉兆麒疏言蜀中流民寄居鄰省者現在查令回籍。而山川險阻。行李艱難。地方各官有捐資招撫。使歸故土者。請敕議叙。查招民授職之例。已經停止。但蜀省寇氛之後。民少地荒。與他省不同。其見任文武各官。招撫流民。准量其多寡。加級紀錄。有差。從之○己未。陞杭州副都統圖喇。為杭州將軍○庚申。免湖南瀏陽縣本年分旱災額賦十之三○壬戌。免直隸保安州。保安衛。礮山堡。康熙六年分雹災額賦十之三○免浙江山陰等五縣衛本年分水災額賦有差。其臨海。天台。二縣衛沒田地。全免額賦○癸亥。陞督捕右理事官馬紹曾。為都察院左副都御史

上詣

太皇太后

皇太后宮問安○兵科給事中賀和達疏請總督京通倉應差滿洲侍郎一員。從之○丙寅。喀爾喀戴青台吉。遣使進九白年貢。宴賚如例○雲南貴州總督卞三元。以母老疏請終養。從之○壬申。封喀喇沁多羅杜楞貝勒班達爾沙。為多羅杜楞郡王。以伊祖蘇布迪於太宗文皇帝時。歸順効力。著有勞績也○科爾凱總頭目額義都等。進貢貂皮。江獺皮。賞賚如例○癸酉。以刑部左侍郎麻勒吉。為江南江西總督○以故二等伯卓羅之孫赫特赫襲爵○甲戌。

上詣

太皇太后宮問安○乙亥。廣東廣西總督周有德。丁父憂。命在任守制。從平南王尚可喜請也○丙子。以故一等阿思哈尼哈番和爾渾之姪穆赫林襲職○丁丑。陞通政使喀代。為總督倉場侍郎○戊寅。加直隸巡撫甘文焜。山東巡撫劉芳燭。並工部右侍郎銜。以賑荒。

議叙也○以故三等阿思哈尼哈番色冷扎什弟色爾古冷襲職○免山東省地震地方照水旱災例本年分額賦有差○裁廣東左路總兵官缺○兵部議覆左都御史王熙疏言軍政卓異應加一等陞用以示獎勵從之○己卯陞直隸巡撫甘文焄為雲南貴州總督○庚辰。

上詣

太皇太后

皇太后宮問安○以內秘書院學士范承謨為浙江巡撫○辛巳。

皇后千秋節照例行禮筵宴○轉刑部右侍郎阿哈碩塞為左侍郎陞都察院左副都御史納布為刑部右侍郎○壬午陞叅領鄧光明為廣東副都統○癸未以吏部郎中張含輝為四川按察使司僉事提調學政○裁直隸大寧都司缺歸并保定左衛萬全都司缺歸并宣府前衛○禮科給事中吳愈聖疏劾吏

部侍郎梁清寬衰邁兵部侍郎曹國柄通政使司叅議裴希度才力不及得旨俱著以原品休致○丁亥以故一等阿思哈尼哈番閔臣之子閔成爵襲職○戊子。

上詣

太皇太后宮問安○工部尚書馬遜賽刑部尚書明珠等遵旨會閱淮揚出水之處回奏臣等會同漕運總督河道總督江寧巡撫親至興化縣白駒場地方閱看舊有閘口四座所出之水由牛灣河入海後因禁海填塞以致水無所出淹沒田畝若將四閘開通積水可以盡放况白駒場離海甚遠並非沿邊地方不應堵塞請星速挑挖仍令置板攔攔一遇水發即行開放則地方不致淹沒居民不必遷移矣從之○馬遜賽等又遵旨覆奏清口為淮黃交會之所漕運要路黃河水發勢必越過淮河淮水力弱則沙土反得滾入以致運道壅塞河道總督楊茂勲題請添築攔黃

磯嘴長壩所需錢糧太多。請將黃河北岸挑挖引河。分引黃河之水。黃勢力減。則沙逐水流。運道便無阻滯。又董口沙淤難行。每歲修濬。空費錢糧。董口之右。有駱馬湖可行。但須添築隄岸。以為緯道。其需用價值。令河道總督覈算具題。從之。○馬廛賽等。又遵旨審覆工科給事中李宗孔疏。奏泗州知州袁象乾盱眙縣知縣李時茂。發示攔阻修築周橋閘。翟家壩一案。查淮水由盱眙之周橋閘。翟家壩決口。以致高郵等處地方俱被淹沒。隨調高郵人夫。往彼修築。緣將不應修築之處。一舉修築。州縣官呈詳督撫。以候會勘。出示暫停。並非州縣擅行攔阻。至修築翟家壩夫役。被盱眙泗州民人驅逐。州縣官不能禁約。應交部議處。又周橋閘開閉。俱詳報河道總督漕運總督。並非州縣擅開。其八溝決口。亦並無船隻偷行漏稅分肥等弊。應交附近駐劄之漕運總督。每遇開閘。親身查看。再令三閘

收稅官不時巡查。倘有貨船偷行漕運總督及收稅官。一并議處。從之。○己丑。陞大理寺卿阿思祜為都察院左副都御史。○庚寅。轉刑部左侍郎蔡毓榮為吏部左侍郎。管右侍郎事。○以左副都御史金世德為直隸巡撫。○厄魯特阿巴賚台吉等遣使進貢。賞賚如例。○治理曆法南懷仁劾奏欽天監監副吳明烜所造康熙八年七政民曆內。康熙八年閏十二月。應是康熙九年正月。又有一年兩春分。兩秋分。種種差悞。得旨。曆法關係重大。著議政王。貝勒。大臣。九卿。科道會同確議具奏。○壬辰。

上詣
太皇太后
皇太后宮問安。○癸巳。歲暮。裕祭太廟。

上親詣行禮。○遣官祭
永陵。

福陵

昭陵

孝陵○遣官祭太歲之神○陞太常寺卿賁代為通政使司通政使○和碩康親王傑書等遵旨覆奏南懷仁所稱吳明烜推算曆日種差錯曆法精微遽難定議應差大臣同伊等測驗得旨著圖海李蔚多諾吳格塞布顏明珠黃機郝惟訥王熙索額圖科爾科代董安國曹申吉王清葉穆濟吳國龍李宗孔王

平定卷二十七

三十一

曰高田六善徐越同往測驗○旌表八旗節婦滿洲索飛妻南氏等三十人蒙古多爾濟妻蘇氏等十二人漢軍趙應選妻甯氏等六人烈婦滿洲孫塔妻飛氏等五人給銀建坊如例○是歲人丁戶口一千九百三十六萬六千二百二十七田地山蕩畦地五百四十一萬三百五十頃八十七畝徵銀二千五百八十三萬八千九百六十二兩有奇米豆麥六百一十五萬三千一百六十七石有奇草

二百三十萬六千五百三十二束茶十六萬七千二百七十引行鹽四百三十三萬三千六百六十七引徵課銀二百七十六萬五千一百六十七兩鑄錢二萬八千七百一十三萬三千四百有奇

平定卷二十七

三十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十八

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙八年己酉春正月乙未朔

實錄卷二十八

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御殿王以下文武各官外藩王

及使臣等上表朝賀筵宴如例○朝鮮國王

李裪遣陪臣李慶億等表賀冬至元旦

萬壽節及進歲貢禮物宴賚如例○戊戌順天

府進春○己亥

上詣

太皇太后

皇太后宮問安○辛丑

世祖章皇帝忌辰遣官祭

孝陵○癸卯孟春享

太廟

上親詣行禮○遣官祭太歲之神○甲辰以陝

西鄜縣山水暴發民屯田地被淹者免本年

實錄卷二十八

分額賦十之三其被衝堆壓砂石不能耕種

者永為豁除○乙巳戶科給事中姚文然疏

言蠲免被災錢糧一事有各州縣簡明總冊

並各見年里長甘結報部其地畝花名細冊

不過紙上虛文有無冒免情弊無可察核徒

費筆墨書算夫挑車載之費請舉行停止從

之○丙午賜朝正外藩王貝勒貝子公台吉

塔布囊等銀幣鞍馬有差○丁未

上詣

太皇太后宮問安○先是大學士金之俊予告在籍獲有詆毀伊之匿名帖呈送江南江西總督郎廷佐後又獲施君禮所投首詞稱前項謗帖乃施商雨等所作亦行呈送郎廷佐即行提人犯究審外隨以謗帖首詞始末入告得旨匿名帖乃奸惡之徒造寫陷害平人如見其投擲拏獲理應照律從重治罪今施君禮稱為施商雨所作乃不自行持首將帖擲於金之俊門首事屬可疑若因此匿名帖察拏究問則必致株連無辜且律載收審匿名帖者將審問之人治罪施商雨等俱不必察拏究問金之俊係大臣將匿名帖送總督究審郎廷佐係總督將匿名帖收受察拏生事不合著議處至是吏部以金之俊郎廷佐並應罰俸議上得旨金之俊著革去宮保銜郎廷佐於病痊起用日降四級調用○陞督捕理事官噶什圖為太常寺卿戊申諭工部奉

太皇太后旨皇帝現居清寧宮即保和殿也以殿為宮於心不安可將乾清宮交泰殿修理皇帝移居彼處朕謹遵

仰副

太皇太后慈愛朕躬至意○免直隸昌平懷柔等四州縣康熙七年分水災額賦有差○已酉陞內弘文院侍讀學士盧震為內秘書院學士○癸丑陞光祿寺卿岳諾惠為大理寺卿○甲寅

上詣

太皇太后宮問安○陞都察院左僉都御史王光裕為左副都御史○兵部議賞卹征剿叛賊蘇利陣亡受傷官兵內五名因無妻子親屬無從賞給得旨此等甲兵雖無親屬但効力疆場傷亡可憫應酌量卹祭以後此等傷亡兵丁著照此例行○乙卯以故三等精奇尼哈番全節之子全成忠襲職○丙辰以本

月二十六日修理

太和殿興工。

上於是日從清寧宮移居武英殿○予故原任貴州安順總兵官張鵬程祭葬如例○戶部議覆戶科給事中蘇拜疏言開稅一差歸於外府佐貳官管理但各官俱有專掌又無理開稅事務煩多且身為地方官畏懼上司希圖足額必致增派商民請仍差部員應如所奏將滿漢司官無差收稅得旨開稅多者將各部院賢能滿漢官員差遣開稅少者仍交地方官徵收其應差部院官與應交地方官之處分別議奏○丁巳予故京口副都統周繼親祭葬如例○戊午授鎮國公託克托慧子黨阿賴輔國公穆琛子勒塞禮鎮國將軍輝塞子倭內俱為三等奉國將軍固山貝子尚善庶出子顧祿固特爾祜庶出子馬爾哈圖俱為奉恩將軍○加雲南貴州總督甘文焜兵部尚書銜以督解逃人議敘也○陞協

領胡圖為江寧副都統○調廣西左江總兵官劉進忠為廣東潮州總兵官廣東右路總兵官趙宗科為廣西左江總兵官○己未

上詣

太皇太后

皇太后宮問安○庚申議政王等會議得南懷仁奏吳明烜推算曆日差錯之處奉旨差大學士圖海等同欽天監監正馬祐測驗立春雨水太陰火星木星與南懷仁所指逐款皆符吳明烜所稱逐款不合應將康熙九年一應曆日交與南懷仁推算得旨楊光先前告湯若望時議政王大臣會議以楊光先何處為是據議准行湯若望何處為非輒議停止及當日議停今日議復之故不向馬祐楊光先吳明烜南懷仁問明詳奏乃草率議覆不合著再行確議○辛酉轉兵部右侍郎劉鴻儒為左侍郎以原任倉場侍郎李崇馥為兵部右侍郎○陞協領佛尼勒為西安副都統

○陞泰領柯鐸為河南南汝總兵官○癸亥轉刑部右侍郎王清為左侍郎以原任刑部右侍郎張爾素補原官

二月甲子朔○丙寅

上詣

太皇太后

皇太后宮問安○丁卯遣大學士魏裔介祭

先師孔子○戊辰祭

大社

大稷

上親詣行禮○陞刑部郎中達都為光祿寺卿

○己巳戶部遵旨再議戶科給事中蘇拜條

陳關稅一疏查崇文門稅差已奉旨設官收

稅其通州坐糧廳京城左右二翼倉寶泉局

大通橋通州西倉中南倉張家口殺虎口此

九差原係臣部官員差遣應仍舊例外許墅

關額稅銀一十四萬兩零蕪湖關額稅銀一

十二萬兩零北新關額稅銀九萬兩零九江

關額稅銀九萬兩零淮安關額稅銀五萬兩零太平橋額稅並鹽利銀共四萬兩零揚州

關額稅銀三萬兩零賴關橋額稅銀三萬兩

零天津關額稅銀三萬兩零西新關額稅銀

二萬兩零淮安倉徵收稅銀二萬兩零臨清

關額稅銀二萬兩零鳳陽倉徵收稅銀二萬

兩零臨清倉無徵收稅銀止有米折銀本色

米麥又在臨清關一處應并為一差江寧倉

原歸并西新關今應仍舊此一十三差稅額

既多應擇各部院賢能滿漢官員差遣其它

運廳額稅銀六千兩零居庸關額稅銀三千

兩零徐州倉徵收稅銀三千兩零德州倉徵

收稅銀七百兩零此四差稅額俱少應交與

地方官徵收從之○庚午議政王等遵旨會

議前命大臣二十員赴觀象臺測驗南懷仁

所言遂款皆符吳明烜所言遂款皆錯傳問

監正馬祐監副宜塔喇胡振鉞李光顯亦言

南懷仁曆皆合天象竊思百刻曆日雖歷代

行之已久。但南懷仁推算九十六刻之法。既合天象。自康熙九年始。應將九十六刻曆日推行。又南懷仁言羅喉計都月孛星。係推算曆日所用。故開載。其紫炁星。無象推算。曆日並無用處。故不開載。應自康熙九年始。將紫炁星不必造入七政曆日內。又言候氣。係自古以來之例。推算曆法。亦無用處。嗣後亦應停止。楊光先職司監正。曆日差錯。不能修理。左袒吳明烜。妄以九十六刻推算。乃西洋之法。必不可用。應革職。交刑部從重議罪。得旨。楊光先著革職。從寬免交刑部。餘依議。○陞叅領祖弘勲。為浙江溫州總兵官。○辛未。太皇太后聖壽節。上率王以下。文武大臣。侍衛等。詣太皇太后宮行禮。遵懿旨。停止筵宴。○工部題。京師護城河。淤泥填塞。以致城內水不通流。臣等酌議挑濬。計河廣十五度。深二三四尺不等。長一萬五千九

百二十六度。並重修滾水壩六座。從之。○壬申。

上詣

太皇太后宮問安。○山西陝西總督莫洛。甘肅巡撫劉斗。疏請免平涼。臨洮。鞏昌。三府屬各州縣衛。積欠銀七萬八千三百餘兩。糧一十六萬三千餘石。部議以拖欠錢糧。他省多有。若行蠲免。兵餉有缺。不准行。得旨。平涼。臨洮。鞏昌。三府所屬地方。屢被災荒。較他省不同。著照該督撫所請。將舊欠錢糧。俱免追徵。不為例。○癸酉。工部左侍郎管右侍郎事吳正治。丁父憂。命回籍守制。○甲戌。

孝康皇后忌辰。遣官祭

孝陵。○琉球國中。山王尚質。遣陪臣英常春進

貢。宴賚如例。○丁丑。遣官祭

先農之神。○癸未。

上詣

太皇太后宮問安。○予故太子少師內大臣二

等公戴壽祭葬如例○甲申春分朝

日於東郊遣都統喇哈達行禮○乙酉以原任河南按察使陳秉直為陝西按察使司按察使○庚寅遣官祭

歷代帝王○諭吏部兵部文官有撫循百姓綏理地方之責武官有訓練士卒防守地方之責必得其人乃克勝任朕巡行近畿見通州知州歐陽世逢州同李正傑庸劣無才副將唐文耀不嫻武事俱著革職直隸各省總督提督巡撫所屬文武官員內有庸劣無才不能勝任者應不時察叅以副朕倚任之意乃直隸督撫竟不將歐陽世逢等官早行叅奏理當議處姑寬宥一次著嚴飭行○喀爾喀丹津喇嘛遣使進九白年貢宴賚如例○辛卯

上詣

太皇太后

皇太后宮問安○禮部請封外藩蒙古諸王妃

得旨察哈爾阿布柰親王之妻著停封餘如議○阿布柰係出征所獲之人乃尚以固倫大長公主命為親王恩遇優渥較之在內諸王及在外蒙古諸王止有太過並無不及乃在外諸王貝勒等每年俱來問安年節來朝○阿布柰竟忘恩養八年以來不一朝請且每年遣人存問公主所生之子頒給恩賜○阿布柰猶不親身一問

太皇太后及朕躬安○公主所生幼子○阿布柰理應撫養乃交與已分家之長子更屬何心此等情節著理藩院嚴察議奏○予故致仕太子太保吏部尚書明安達禮祭葬謚敏果○以致仕侍郎查布海効力年久給與半俸三月甲午朔

世祖章皇帝實錄纂修草藁告成量留纂修等官詳加校對其餘纂修官筆帖式哈番及書辦人等先行議叙有差○調兵部督捕右侍郎高辛印為工部右侍郎○乙未以原任貴

州平遠總兵官趙良棟為山西大同總兵官

○丙申。

上詣

太皇太后

皇太后宮問安○丁酉清明節遣官祭

永陵。

福陵。

昭陵。

孝陵○陞四川布政使郎廷相為河南巡撫○

戊戌刑科給事中張登選疏言提鎮統轄將領捍衛地方其權甚重不可不公用選擇請

照

世祖章皇帝時定例提督總兵官仍著九卿會推開列恭候簡用至武官功績令兵部逐一詳開九卿公同查核則無功者不致倖進矣得旨提督及總兵官統轄邊疆地方關係重大以後缺出將應補授官員兵部冊內所載功績逐一開列著九卿科道會推具奏○已

亥廣西道御史戈英疏言近者銓部復行寄憑之法其弊匪一有緣事已故而仍選者有懸缺一二年者有人南缺北寄憑赴任往返萬餘里者有在籍物故地方官失於詳報致叅罰受累者有業經報部憑已先發咨回另選者種種遲誤難以枚舉且在籍候選其人之衰老病廢部臣何由得知及曠職誤事始行叅黜貽害已多與其叅黜於後何如慎簡於先況在京候選者見奉有投供點卯之日該部詳閱果有老病者著引見之旨掄才器使莫善於此臣以為在外候選各官亦宜倣行此法請查復舊章停止寄憑概令赴部投供點卯仍飭部臣詳閱斥汰衰邁庶銓選得人而事理可垂久無弊矣得旨是以後大選各官應令人文到部簽補其補授時或酌量人缺截取候選或投供點卯選授務令地方無久懸之缺選人無守候之苦吏部確議以聞○予故一等精奇尼哈番蒙古都統戶部

尚書馬通賽祭葬。謚忠敏。○辛丑。諭戶部。前以爾部題請直隸等省廢藩田產。差部員會同各該督撫。將荒熟田地酌量變價。今思既以地易價。復徵額賦。重為民累。著免其變價。撤回所差部員。將見在未變價田地。交與該督撫。給與原種之人。令其耕種。照常徵糧。以副朕愛養民生之意。至於無人承種餘田。應作何料理。著議奏。尋部議。請將無人承種餘田。招民開墾。從之。○甲辰。

上詣

太皇太后宮問安。○乙巳。予故一等阿思哈尼哈番又一拖沙喇哈番諾門達賴祭葬如例。○庚戌。諭吏部。原任戶部尚書王弘祚。係皇考簡用之人。効力年久。可照原職補用。○授西洋人南懷仁為欽天監監副。先是欽天監官按古法推算康熙八年曆。以十二月置閏。至是南懷仁言。雨水為正月中氣。是月二十九日值雨水。即為康熙九年之正月。不當置

閏。置閏當在明年二月。

上命禮部詳詢欽天監官。多直南懷仁。乃罷康熙八年十二月閏。移置康熙九年二月。其節氣占候。悉從南懷仁之言。○辛亥。

萬壽節。

上率諸王。貝勒。貝子。公。內大臣。大學士。都統。尚書。精奇尼哈番。侍衛等詣

太皇太后

皇太后宮行禮。御殿。王以下。文武各官。上表慶賀。照例筵宴。○遣官祭

福陵。

昭陵。

孝陵。○遣官祭真武。東嶽。城隍之神。○壬子。

上詣

太皇太后

皇太后宮問安。○乙卯。四川巡撫張德地疏報採取楠木八十株。得旨。修造宮殿。所用楠木不敷。酌量以松木湊用。著停止採取。○丙辰。

以原任四川總督劉兆麒。為浙江福建總督
○陞三等阿達哈哈番朱喇禪。為鑲紅旗蒙
古副都統○丁巳。陞正白旗蒙古副都統光
泰。為滿洲都統○壬戌。吏部遵旨議覆。御史
戈英條奏選官寄憑之弊。嗣後凡初授官員
約計一年內缺出多寡。將奉旨即用。並年分
在前者截取。令人文到部候選。其候補官員
原無截取之例。亦令其人文到部。始行補用。
從之

夏四月。癸亥朔。享

太廟。遣輔國公賴護行禮○未時。日食○甲子。
上詣

太皇太后宮問安○丙寅。少師兼太子太師內
國史院大學士衛周祚。以疾請假。命乘驛回
籍調理。仍准支俸。病痊起用○予進剿水西
陣亡雲南義勇前營總兵官加贈右都督劉
傅。祭葬。謚直勇○予故雲南義勇後營總兵
官楊威。祭葬如例○科爾沁和碩達爾漢親

王和拖故。遣官致祭○己巳。阿霸垓多羅卓
禮克圖郡王色爾哲爾故。遣官致祭○辛未。
以驍騎叅領楊孫補授

昭陵總管○壬申。

上詣

太皇太后

皇太后宮問安○癸酉。以太子太保吏部尚書
杜立德。為內國史院大學士○予故太子少
保原任浙江總督趙廷臣。祭葬。謚清獻。廕一
子。入監讀書○甲戌。命內國史院編修鄭開
極。為雲南鄉試正考官。吏部員外郎宋文運
為副考官。吏部郎中李崇稷。為貴州鄉試正
考官。戶部員外郎顧耿臣。為副考官○乙亥。
以原任河南右布政使金備。為四川布政使
司布政使○丙子。予故二等阿思哈尼哈番
胡洪先。祭葬如例○丁丑。

上幸太學。前期一日。於宮中致齋。是日。

上具禮服。乘輦。王。貝勒。貝子。公。隨行。陪祀文武

各官先詣

文廟丹墀下序立。

上至太學櫺星門外。降輦。由大成中門。步進

先師位前。行二跪六叩頭禮。親釋奠畢。

駕幸彛倫堂。賜講官坐。滿漢祭酒以次講易經。

司業講書經。四品以下翰林官。及五經博士

各執事官學官監生。序立聽講畢。宣制曰。聖

人之道。如日中天。講究服膺。用資治理。爾師

生其勉之。宣畢。

上還宮○戊寅。衍聖公孔毓圻率祭酒。司業學

官。五經博士。五氏子孫各監生。恭進謝表。賜

衍聖公祭酒以下等官宴於禮部。并賜袍服。

助教監生等。賜銀兩有差。廣本監鄉試中額

八名。陪祀聖賢後裔。內國史院中書顏光毓

等。照例優敘。生員孔興詢等十五人。令入監

讀書。頒敕諭刊掛彛倫堂。敕曰。

皇帝敕諭國子監祭酒司業等官。朕惟聖人之

道。高明廣大。昭垂萬世。所以興道致治。敦倫

善俗。莫能外也。朕纘承丕業。文治誕敷。景仰

先聖至德。今行辟雍釋奠之典。將以鼓舞人

才。宣布教化。爾等當嚴督諸生。潛心肄業。諸

生亦宜身體力行。朝夕勤勵。若學業成立。可

裨任用。則教育有功。其或董率不嚴。荒乃職

業。爾等係師生。難辭厥咎。尚其勉之。毋忽○

己卯。

孝端文皇后忌辰。遣官祭

昭陵○調山東登州總兵官張公諒為福建海

澄總兵官○庚辰。命內國史院大學士杜立

德充纂修

世祖章皇帝實錄總裁官○轉戶部尚書黃機

為吏部尚書○辛巳。

上詣

太皇太后宮問安○兵科給事中劉如漢疏言

帝王首務。莫大於視學。莫急於經筵。伏考

世祖章皇帝親政之初。躬幸太學。肇舉經筵。煌

煌盛典。載在史冊。我

皇上審知聰明。善繼善述。無事不以

世祖章皇帝為法。經筵日講。已屢奉諭旨。仰見我

皇上尊經重道之至意。請敕禮部。詳考舊章。先行日講。次舉經筵。選擇儒臣。分班進講。

上嘉其言。下部議行。○癸未。河道總督楊茂勲。以病乞休。慰留之。○先是真定饑。

上命多方賑濟。至是期滿。巡撫金世德。以各屬尚有饑民。請再發賑。得旨。覽奏真定府屬饑

民甚多。深為可憫。可如撫臣所請。動銀二萬兩。速行賑濟。○乙酉。陞廣東水師副將苗之秀。為廣東碭石總兵官。○戊子。

上詣

太皇太后

皇太后宮問安。○己丑。轉禮部尚書郝惟訥。為戶部尚書。○辛卯。諭直隸巡撫。獲鹿。栢鄉。二縣。去年水災。雖經賑濟。饑民尚多。著動支公帑。再賑一月。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十九

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙八年己酉五月癸巳朔○乙未轉兵部

實錄卷二十九

尚書龔鼎華為禮部尚書○丙申刑部戶部

遵旨會奏凡遇

聖駕出郊之處有叩閣者照刑部議銜哭儀仗之律杖一百發邊遠充軍其戶部議責四十六板之例相應停止得旨凡行幸之處跪告交與部者若不審明事之虛實遽照銜哭儀仗律則此內或有冤枉亦未可定以後著審明所告之事虛者責四十六板免其充軍○丁酉上詣

太皇太后

皇太后宮問安○戊戌以故太子少師內大臣

三等公戴壽無子命其兄費勵古襲爵○己

亥內秘書院學士禪布奏伊祖達海巴克式

蒙賜謚文成請立石碑以光永久得旨達海

巴克式通滿漢文字於滿書加添圈點俾得

分明又照漢字增造字樣於今賴之念其効

力年久著有勞績著追立石碑○予故致仕

西安將軍傅喀禪祭葬如例○陞恭領柳愈

實錄卷二十九

林為浙江寧紹台總兵官劉秉均為山東登

州總兵官○庚子戶部議覆山西陝西總督

莫洛疏言西安鳳翔漢中延安四府興安一

州有新荒民屯廢藩地畝及從前捏報民丁

所徵銀三萬七千三百九十餘兩糧一千二

百八十餘石俱係見在人民包賠苦累請賜

豁免應如所請從之○壬寅以原任戶部尚

書王弘祚為兵部尚書○撤廣東沿海貼防

官兵從督臣周有德請也○甲辰

上詣

太皇太后宮問安○廣東廣西總督周有德以柳州叛犯韋嗣寬田產籍沒變價估計不實將地方官題叅部議應敕該撫再行增估得旨房地變價已經該督估計今復駁令再增恐致累小民著照所估完結○乙巳遣官祭關聖帝君○厄魯特楚虎爾吳巴錫台吉遣使進貢賞賚如例○丙午吏部奏稱衍聖公孔毓圻朝賀失儀請議罰

聖祖實錄

三

上以孔毓圻年幼且初次行禮特免之○以戶部郎中崔爾仰為四川鄉試正考官吏部員外郎白意為副考官禮部郎中陳景仁為廣東鄉試正考官戶部主事劉源澄為副考官兵部郎中王廷伊為廣西鄉試正考官禮部主事呂祚德為副考官刑部郎中王震生為福建鄉試正考官兵部主事鍾國義為副考官○戊申命議政王等拏問輔臣公鰲拜等諭曰前工部尚書員缺鰲拜以朕素不知之

濟世妄稱才能推補通同結黨以欺朕躬又奏稱戶部尚書缺

太宗文皇帝時設有二員今亦應補授二員將馬通賽狗情補用又鰲拜於朕前辦事不求當理稍有拂意之處即將部臣叱喝又引見時鰲拜在朕前理宜聲氣和平乃施威震眾高聲喝問又科道官員條奏鰲拜屢請禁止恐身干物議閉塞言路又凡用人行行政鰲拜欺朕專權恣意妄為文武各官盡出伊門下內外用伊奸黨大失天下之望穆里瑪塞本得訥莫佛倫蘇爾馬班布爾善阿思哈噶褚哈濟世馬通賽泰壁圖邁音達吳格塞布達禮等結成同黨凡事在家定議然後施行且將部院衙門各官於啟奏後常帶往商議眾所共知鰲拜等倚仗兇惡棄毀國典與伊等相好者薦拔之不相好者陷害之朕念鰲拜舊臣

遺詔有名寵眷過深望其改惡悔罪今乃貪聚

賄賂。奸黨日甚。上違

君父重托。下則殘害生民。種種惡跡。難以枚舉。遇必隆。知而緘口。將伊等過惡。未嘗露奏一言。是何意見。阿南達。負朕恩寵。每進奏時。稱贊。鰲拜為聖人。著一并嚴拏。勘審。○兵部議覆。湖廣提督胡拜疏言。鄖陽營裁汰標兵。應令楚撫。分派附近地方墾荒安插。從之。○辛亥。

上詣

太皇太后宮。問安。○戶部議覆。御史黃敬璣疏言。各省開差缺出。於部曹中選用賢能。止可為一時破格之舉。行之既久。恐有營求之弊。請如舊例。挨資俸掣籤。應如所請。凡開差缺出。將六部官員。論俸咨送掣籤。其差過之員。不准重差。從之。○乙卯。夏至。祭

地於

方澤。

上親詣行禮。○戊午。諭吏部。近究審鰲拜等罪。

案。知莫洛。白清額。阿塔。皆其黨羽。本當逮問。

治以重罪。念其既經用為督撫。昇以地方重任。受事以來。剔除加派火耗等弊。姑從寬免罪。仍留原任。以後著益殫心勉力。潔已率屬。綏輯地方。愛養生民。以副朕宥過留用之意。○令各省衛所錢糧。并入民糧。一體考成。巡撫。從御史張所志請也。○己未。以原任內國史院大學士巴泰。為內秘書院大學士。○陞鑲黃旗漢軍副都統范達禮。為漢軍都統。○調鑲黃旗蒙古都統喇哈達。為滿洲都統。○理藩院遵諭議覆。阿布柰。無藩臣禮。大不敬。應論死。革去王爵。不准承襲。得旨。阿布柰。理應依議處死。但向經恩遇。姑從寬免死。著革去親王。嚴禁盛京。○庚申。

上詣

太皇太后宮。問安。○和碩康親王傑書等。遵旨。勘問鰲拜罪款。鰲拜係國家大臣。背負先帝重託。任意橫行。欺

君擅權。文武各官盡出門下。罪一。引用內外奸黨。致失天下人望。罪二。與穆里瑪塞本得訥。莫佛倫。蘇爾馬。班布爾善。阿思哈。噶褚哈。濟世。馬通賽。泰壁圖。邁音達。吳格塞。布達禮等。結成奸黨。一切政事。先於私家議定。然後施行。又將部院啟奏官員。帶往私門商酌。罪三。倚恃黨惡。紊亂國政。所喜者薦舉。所惡者陷害。罪四。上違

皇上眷念舊臣。曲為優容。不思改惡。聚貨養奸。

罪四。上違

遺詔。下虐生民。凡結黨敗壞之處。奉旨審問。巧飾供辭。罪五。明知馬通賽。光泰。噶達渾。三族係

太宗文皇帝

世祖章皇帝時。不用為侍衛之人。復擅行起用。罪六。於歸政之後。即將蘇克薩哈滅族。又將白爾黑圖。烏爾把等。無罪枉殺。罪七。原任尚書蘇納海。總督朱昌祚。巡撫王登聯。以八旗

更換地畝事。不順其意。擅加殺害。罪八。偏護本旗。將別旗已定之地。輒行更換。罪九。

皇上親政。尊崇

聖母孝康皇后。查取從前詔款。鰲拜不將配享太廟

奉先殿典禮。奏請施行。此係欺

君輕慢

聖母之處。罪十。貪攬事權。延挨不請辭政。罪十

一。因內大臣噶布喇之女。冊立

皇后。心懷妬忌。敢行奏阻。罪十二。謬稱濟世賢能。授為尚書。罪十三。妄奏戶部舊設尚書二員。以同黨馬通賽。補居要地。罪十四。禁止科道陳言。恐摘發情弊。阻塞言路。罪十五。鰲拜履條奏之事。鰲拜以為劾已。意圖傾害。罪十六。馬通賽部議賜謚。奉有何顯功。不准行之旨。鰲拜不遵。仍給與謚。罪十七。於皇上前。凡事不依理進奏。多以舊時疏稿呈覽。逼勒依允。罪十八。

御前呵叱部院大臣。攔截章奏。罪十九。私買外藩人為僕。罪二十。擅授敗陣革職達素等原職。罪二十一。議蘇克薩哈罪狀時。止同班布爾善等定議。恐大學士巴泰逆意不合。不使與聞。罪二十二。因伊馬匹被偷。將

御馬羣頭目并偷馬人。自批盡行處決。籍其家產入已。罪二十三。以俄訥喇哈達宜理布等在議政處。不肯附和。即裁止蒙古都統。不使會議。罪二十四。

先帝遺詔內。鰲拜名列遏必隆之後。乃不行遵奉。凡起坐班行。皆居遏必隆之右。同黨噶褚哈。於列名啟奏時。亦將鰲拜名前列。罪二十五。聞遏必隆因

皇上傳喚養鷹之人。激發怒言。有成何

朝廷之說。不行舉首。罪二十六。費耀色奉旨放鷹。因其自行啟奏。不先開白。輒加嗔怒。罪二十七。

皇上行幸海子。令鰲拜奏明

太皇太后。乃不遵旨。反云

皇上自奏。罪二十八。勢勒克什克之父妾配伊家人。罪二十九。以克什克父之墳墓。有礙伊家風水。逼令遷移。罪三十。逆惡種種。所犯重大。應將鰲拜革職立斬。其親子兄弟。亦應斬妻并孫為奴。家產籍沒。其族人。有官職。及在護軍者。均應革退。各鞭一百。披甲當差。遏必隆。同為輔臣。於白爾黑圖被鰲拜殺害之事。不行勸阻。惟自認軟弱。巧飾供詞。罪一。遏必隆貪攬事權。遲延不奏辭政。罪二。內大臣噶布喇之女。冊立

皇后。遏必隆心懷妬忌。與鰲拜同入奏阻。罪三。鰲拜於奏事時。多以舊時疏稿。朦混進呈。遏必隆不行勸阻。罪四。鰲拜更換地畝。遏必隆雖欲停止。不與爭執。致蘇納海等被殺。罪五。吳爾喀係遏必隆屬下之人。未經部議。擅授官職。罪六。遏必隆奉

遺詔輔政。知鰲拜惡跡。不行奏明。深負付託之

旨。罪七。遏必隆等議蘇克薩哈罪案。恐大學士巴泰異議。不使與聞。罪八。鰲拜以馬匹被偷。將馬羣頭領人等擅殺一案。遏必隆既知其情。不行舉首。罪九。遏必隆因

皇上傳喚養鷹之人。激發怒言。有成何

朝廷之說。藐視

皇上。罪十。

皇上行幸海子。諭遏必隆等。奏明

太皇太后。遏必隆推諉不奏。罪十一。三等待衛

費耀色。奉旨放鷹。遏必隆因其自行啟奏。不

先關白。輒加忿怒。罪十二。遏必隆欺

君誤國諸款。審問時。不以實供。種種遮飾。情罪

重大。應將遏必隆革職。立絞。未分家之子并

妻為奴。其子所襲之公爵。原係圖爾格所立。

不便仍留與遏必隆之子。另選族人承襲。其

族人。有官職。及在護軍者。均應革退。披甲當

差。班布爾善。係宗室輔國公。授為大學士。附

和鰲拜。藐視

皇上。結黨行私。悖負國恩。罪一。班布爾善奏教習庶吉士。二年期滿。請考試散館。奉有再讀書一年之旨。班布爾善因不順己意。忿怒而出。罪二。戶部書役勞於新。冒支錢糧案內。牽連官員。部議援赦。免罪具奏。班布爾善擬票駁回。後部議照票簽擬罪。班布爾善復改援赦。一事處分前後互異。罪三。御史俞鐸。以條奏不實。奉旨嚴飭。班布爾善擅寫擬罪票簽。部議降二級調用。班布爾善又改簽免罪。後奉有革職之旨。仍執拘奏。請終免其罪。罪四。遏必隆鰲拜。奉旨封公。具本辭爵。班布爾善以辭爵本章。止有滿書。令兼寫漢字。聲揚輔臣之美。諂事輔臣。罪五。恩賜諸王緞疋。多寡數目。舊有定例。班布爾善擅行增改。罪六。喀爾喀畢什克圖汗之子。逃竄來歸。奉旨封公。班布爾善以為過分。不查定例。囑令理藩院以後蒙古不必照此例優封。罪七。班布爾善諂事鰲拜。無故將鰲拜誥命。欲行更改。罪八。

鰲拜等議蘇克薩哈之事。班布爾善恐巴泰阻謀。不與同去。罪九。班布爾善於衙門一切公事。自行專主。不與同寮大學士簽票。止問吳格塞料理。罪十。班布爾善與馬通賽等結黨。朝會之所。避衆私語。罪十一。班布爾善將伊姨母之子蓋達。擅授為內閣典籍。罪十二。班布爾善擅用家僕裴天成。充內院筆帖式。罪十三。班布爾善令馬通賽之弟伊思哈。在票簽處行走。與馬通賽等傳遞信息。罪十四。大學士等因鼓廳官員。將不應奏之事代題公議處分。班布爾善以為不便。參處。忌行爭執。罪十五。班布爾善嫉戶部尚書王弘祚。練達部務。若留在部內。恐伊黨馬通賽。凡事不得自專。將王弘祚票擬革職。罪十六。科臣汪之洙。以隱匿應緝鹽商之事。部議責革。流徙奉旨依議。班布爾善不遵旨行。乃於次日改票。豁免。罪十七。班布爾善引用奸黨。致失人望。罪十八。班布爾善附從鰲拜。與穆里瑪等

結黨。凡事豫先在家議定。然後施行。罪十九。班布爾善所喜之人。即為薦舉。所惡之人。即為陷害。欽取財物。罪二十。班布爾善結黨妄行之情。奉旨審問。不從實供。詭詞巧飾。罪二十一。種種情罪。所犯重大。應將班布爾善革職立斬。係宗室。改立絞。將伊親生未分家子孫革去宗室。妻子為奴。伊子化色。塞圖。姪薩木布。博爾都。俱革去輔國將軍。為閒散宗室。鰲拜之姪塞本。得內廷行走。背負國恩。依附鰲拜。引用黨惡。罪一。鰲拜更改制度。塞本得多為贊助。罪二。塞本得與穆里瑪等結黨。凡事至鰲拜家議定。然後啟奏。為鰲拜羽翼。聲揚威名。罪三。塞本得倚恃鰲拜之勢。與附和者。即為薦引。不與附和者。即加陷害。罪四。塞本得違旨。剝民之事。審問時。巧辯具供。罪五。據三等侍衛費耀色。首稱塞本得以奉旨交付內庫之整金絲飄翎响鈴。塞本得不遵旨意。令折毀收納。藐視

主上罪六。塞本得凡事首惡。情罪重大。應將塞本得革職。即行凌遲處死。其親生未分家之子并妻為奴。吏部尚書阿思哈。戶部尚書馬通賽。兵部尚書噶褚哈。吏部侍郎泰璧圖。鰲拜弟都統穆里瑪等。助惡結黨。背負國恩。情罪重大。均應革職。立斬。其親生未分家之子并妻為奴。馬通賽已故。應拋屍。鰲拜之子那摩佛。姪訥莫。佛倫。并鰲拜之黨希福。阿林。劉之源。劉光。揀器。阿南達。布達禮。濟世。邁音達。吳格塞。額爾德黑。郭爾渾等。均應立斬。鰲拜兄趙布太。塔賴虎等。應立絞。以上各犯。有親生未分家之子并妻為奴。家產籍沒。其碩代等。諂事鰲拜。均應革職。鞭責。披甲當差。家產籍沒。有襲職者。亦另選族人承襲。和碩敬謹親王蘭布。娶鰲拜孫女為妻。倚勢得封。問以鰲拜惡跡。狡稱不知。應革去親王。為鎮國公。其鰲拜等族人坡爾噴等。素不和睦。未經來往。均應釋放。達素等。係鰲拜擅授之官。應革

去鞭一百。披甲當差。其蘇爾馬等。提到再議。得旨鰲拜。理應依議處死。但念効力年久。雖結黨作惡。朕不忍加誅。著革職。籍沒拘禁。趙布太。那摩佛。亦應依議處死。著革職。籍沒。免死。俱行拘禁。遏必隆。既無結黨之處。著免罪。革去太師。及公爵。其原有一等公爵。仍留與伊子。其族人。有為內大臣。侍衛。護軍。叅領者。俱著革去。其有世職者。著隨旗上朝。其在驍騎營。及部院衙門者。仍留原任。阿南達。理應依議處死。著免死。寬其籍沒。賴虎。揀器。佛倫。布達禮。劉光。阿林。希福等。從寬免死。各鞭一百。揀器。布達禮。佛倫。著免籍沒。劉之源。額爾德黑。郭爾渾等。亦從寬免死。碩代。桑俄。那木塔爾。舒爾虎。納克羅多等。俱係微末之人。一時苟圖進用。俱從寬免罪。照舊留任。班布爾善著革職。即行處絞。塞本得。著革職。理應依議凌遲處死。著改即行處斬。阿思哈。噶褚哈。穆里瑪。泰璧圖。訥莫。俱著革職。即行處斬。馬

通賽既經身死。不必拋屍。濟世邁音達吳格塞等。俟到日再行究審具奏。蘭布著革去親王。授為鎮國公。穆舒席哈納卓靈阿那木代等。著免籍沒。餘俱依議。○諭吏部兵部。鰲拜等以勲舊大臣。受國恩奉

皇考遺詔。輔佐政務。理宜精白。乃心盡忠。圖報不意。鰲拜結黨專權。紊亂國政。紛更成憲。罔上行私。凡用人行政。鰲拜欺藐朕躬。恣意妄為。文武官員。欲令盡出其門。內外要路。俱用

伊之奸黨。班布爾善穆里瑪馬通賽塞本得阿思哈噶褚哈濟世訥莫泰璧圖等。結為黨羽。凡事先於私家商定。乃行。與伊交好者。多方引用。不合者。即行排陷。種種奸惡。難以枚舉。朕久已悉知。但以鰲拜身係大臣。受累朝寵眷甚厚。猶望其改行從善。克保功名。以全始終。乃近觀其罪惡日多。上負

皇考付託之重。暴虐肆行。致失天下之望。遇必隆明知其惡。緘默不言。意在容身。亦負委任。

朕以罪狀昭著。將其事欵命諸王大臣。公同究審。俱已得實。以其情罪重大。皆擬正法奏聞。朕復召鰲拜等面加鞫問。情罪俱實。本當依議處分。但念鰲拜累朝効力年久。且

皇考曾經倚任。朕不忍加誅。姑從寬免死。革職籍沒。仍行拘禁。遇必隆無結黨之事。免其重罪。削去太師。及後加公爵。其原有一等公爵。仍准留與伊子。其班布爾善穆里瑪阿思哈噶褚哈泰璧圖塞本得訥莫。或係部院大臣。或係左右侍衛。乃皆倚附權勢。結黨行私。表裏為奸。擅作威福。罪在不赦。皆已正法。其餘皆係微末之人。一時苟圖微倖。朕不忍盡加誅戮。寬宥免死。從輕治罪。至於內外文武官員。或有畏其權勢而倚附者。或有身圖倖進而倚附者。本當察處。姑從寬免。自後務須洗心滌慮。痛改前非。遵守法度。恪共職業。以副朕整飭紀綱。愛養百姓至意。爾二部即傳諭內外遵行。○以一等侍衛噶祿為內務府總

管

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十

監修總裁官光祿大夫太保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保無太子太保保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍無理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙八年己酉六月壬戌朔

實錄卷三十

上詣

太皇太后

皇太后宮問安○轉戶部尚書馬希納為吏部

尚書○癸亥索倫噶爾圖等進貢

上以伊等自速方慕化來歸命於常例外加賞

鞍馬等物○陞工部左侍郎科爾科代為兵

部尚書○以鑲白旗蒙古都統郭爾親為滿

洲都統陞鑲黃旗滿洲副都統覺羅塔達為

蒙古都統陞正紅旗蒙古副都統噶爾漢為

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之二十九

蒙古都統。陞護軍統領賴塔。為正白旗蒙古都統。陞護軍叅領哈什馬。為鑲黃旗蒙古副都統。○乙丑。予故三等精奇尼哈番阿喇納。祭葬如例。○丙寅。以原任禮部尚書恩額。得為工部尚書。○和碩康親王傑書等奏。鰲拜案內。內大臣巴哈。係鰲拜胞弟。前拏問鰲拜時。巴哈差往審理。察哈爾阿布柰之事。今提到勘問。巴哈不據實吐供。隱庇巧飾。是實。應將巴哈革職。立斬。家產籍沒。其妻及未分家之子。為奴。得旨。巴哈効力年久。免死。寬其籍沒。著革職為民。○丁卯。諭吏部。朕夙夜圖治。念切民生艱難。加意撫綏。俾各安居樂業。乃成久安長治之道。邇年水旱頻仍。盜賊未靖。兼以貪官污吏。肆行朘削。以致百姓財盡力窮。日不聊生。朕甚憫焉。爾等部院大臣。科道各官。或任要職。或有言責。著即將拯救生民疾苦。切實裨益之處。各據所見。明白陳奏。以備採用。勿得妄行藉端。以無益之事。塞責指

陳。負朕加惠黎元。圖治求言之意。爾部即傳諭遵行。○諭戶部。凡奉差及直隸各省地方。見任各官。俱有董理公務。并撫綏百姓之責。宜各盡乃職。以副朕差遣簡用之意。近聞奉差官員。及督撫提鎮等大小文武各官。不思盡職。惟圖利己。及買良民為奴。甚至多買餽送親友。此等違法妄行。殊屬可惡。以後著通行嚴禁。若仍前恣買良民者。從重治罪。決不姑恕。爾部即遵諭通行。○予故原任奉天將軍達都。祭葬如例。○戊辰。諭吏部。兵部。刑部。近審鰲拜家人罪案。據洪善。尼滿。供出總督白秉貞。原任巡撫張自德。尚書龔鼎孳。庶吉士王彥。阿達哈哈番金鼎。驍騎校高翥子。正紅旗姓高之官。伊等俱曾囑託行賄。本當嚴究。從重治罪。但思此等囑託行賄者尚多。非止伊等。朕已有諭旨。將內外各官。苟圖倖進作樂者。俱從寬免。今供出各官。亦俱從寬免罪。以後務須洗心改過。恪守法紀。副朕寬宥

之意。如不改過惡。仍前作弊。定行加等從重治罪。決不輕恕。爾部即行曉諭。○轉兵部督捕左侍郎岳思泰。為吏部左侍郎。陞內國史院學士帥顏保。為吏部右侍郎。○令改造觀象臺儀器。從欽天監監副南懷仁請也。○已。

上詣

太皇太后

皇太后宮問安。○陞叅領王光宗為鑲黃旗漢軍副都統。○辛未。轉兵部右侍郎塞色黑。為左侍郎。以原任兵部左侍郎羅敏為兵部右侍郎。○以一等侍衛覺羅舒恕為督捕左侍郎。○轉工部右侍郎羅多。為左侍郎。以一等侍衛覺羅查哈喇。為工部右侍郎。○吏部奏請停止保舉。仍按俸次陞轉。以杜鑽營賄賂之風。從之。○壬申。諭吏部。兵部。蘇克薩哈。奉皇考遺詔輔政。蘇克薩哈雖係有罪。罪止本身。不至誅滅子孫後嗣。此皆鰲拜等與蘇克薩

哈不和。挾仇滅其子孫後嗣。深為可憫。其白爾黑圖等。並無罪犯。因係族人。連坐誅戮。殊屬冤枉。其蘇克薩哈原官。及白爾黑圖等官職。俱應給還。爾二部將此案所革官員。俱行查明議奏。○陞禮部右侍郎米思翰。為戶部尚書。○都察院疏請。禁藩王及大臣家下商人。各省貿易。從之。○陞鑲白旗蒙古副都統科岳爾圖。為滿洲都統。正白旗滿洲副都統阿密達。為護軍統領。以精奇尼哈番博通俄。為鑲白旗滿洲副都統。○和碩康親王傑書等奏。鰲拜案內。侍衛蘇爾馬。係鰲拜親姪。前拏問鰲拜時。蘇爾馬奉差往科爾沁。今提到勘問。蘇爾馬倚恃鰲拜。背負皇恩。是實。應將蘇爾馬革職。立斬。家產籍沒。其妻及未分家之子。為奴。得旨。蘇爾馬免死。寬其籍沒。著革職。鞭一百。○癸酉。上以直省罪囚。舊遭恤刑官審錄。今恤刑罷遣。遇熟審時。有非實犯死罪者。宜具題減等。如

在京法司例。命刑部通行直隸各省。永著為令。○以鎮國公託克托慧補宗人府左宗人。○甲戌。

上詣

太皇太后宮問安。○以內秘書院大學士巴泰充監修。

世祖章皇帝實錄總裁官。○兵部議宣諭安南使臣李仙根等事竣。齋回安南國王黎維禧覆疏。內稱謹遵諭旨。將高平府石林。廣源。上琅。下琅。土地人民。退還莫元清。乞令莫元清歸屬本國等語。應如所請。從之。○乙亥。兵部題。各省提鎮所關甚重。以後提督缺出。應將八旗副都統。見任總兵官內。論俸推選。總兵官缺出。應將八旗叅領。見任副將內。論俸推選。以上等官。內外分缺選用。其阿思哈尼哈番。阿達哈哈番。既令陞補副都統叅領。遇提鎮缺出。應停止推選。從之。○和碩康親王傑書等奏。鰲拜案內。理藩院左侍郎綽克託。係

鰲拜姻黨。前拏問鰲拜時。綽克託差往蘇尼特。編定扎薩克事務。其子侍衛布顏圖。係鰲拜之壻。拘禁候審。今提到綽克託。一併勘問。綽克託與鰲拜結黨。諂媚往來是實。應將綽克託革職。立斬。家產籍沒。其子布顏圖亦應革職。家產籍沒。得旨。綽克託免死。寬其籍沒。布顏圖亦免籍沒。俱著革職。鞭一百。○丙子。改直隸通薊道為守道。總管錢糧。霸易道為巡道。總管刑名。駐劄保定府。其霸易道舊轄順天府屬州縣。歸昌密道統理。改為霸昌道。通薊道舊轄州縣衛所。歸永平道統理。改為通永道。○戶部議覆。直隸巡撫金世德疏報。文安縣水災。請賜蠲免。應敕撫臣親往踏看。以憑再議。得旨。依議。此水淹地畝。著該撫速行親往詳勘具奏。其被災之人。恐地方官妄行催徵錢糧。以致苦累。爾部嚴加曉諭。遵行。○以禮科給事中吳愈。聖為浙江鄉試正考官。中書科中書舍人段昌祚。為副考官。以戶

部郎中鄭端為江西鄉試正考官。行人司司副長孚秀為副考官。以刑部郎中陳必成為湖廣鄉試正考官。戶部員外郎袁鴻謨為副考官。○戊寅諭戶部朕繼承

祖宗丕基。乂安天下。撫育羣生。滿漢軍民。原無異視。務俾各得其所。乃愜朕心。比年以來。復將民間房地。圈給旗下。以致民生失業。衣食無資。流離困苦。深為可憫。自後圈占民間房地。永行停止。其今年所已圈者。悉令給還。民間間。爾部速行曉諭。昭朕嘉惠生民至意。至於旗人。無地亦難資生。應否以古北等口邊外空地。撥給耕種。其令議政王貝勒大臣確議以聞。○以故三等精奇尼哈番傅喀禪子穆成額襲職。○己卯。

上詣

太皇太后宮問安。○陞前鋒叅領傑殷為正紅旗滿洲副都統。護軍叅領覺羅紀哈里為鑲黃旗滿洲副都統。○庚辰命裁戶部添設滿

尚書缺。○陞護軍叅領紀圖堪為正白旗滿洲副都統。○吏部遵諭查奏。蘇克薩哈案內文職官員革職者。請復原官。已故者。准留廕生監生。從之。○兵部遵諭查奏。蘇克薩哈案內武職官員革職者。請復原官。已故者。准留廕生監生。其原管佐領。令本人子及族人承襲。從之。○癸未。先是廣東都司劉世虎等。駕舟巡海。遇風飄泊至廣南國境內。廣南國王差趙文炳等。送劉世虎等歸粵。并帶來貨物船隻。奉有確查議奏之旨。至是。禮部議。劉世虎等帶去之兵。尚有十九名未回。應降二級。其趙文炳等。雖奉廣南國印文差遣。而實係中國之人。或留或遣。請旨定奪。見在禁海。其帶來之物。不便貿易。應交送戶部。得旨。廣南國差趙文炳等。送劉世虎等歸粵。殊為可嘉。著該督給以照驗遣歸。廣南船貨。不必入官。仍給來使。為修理船隻之用。其劉世虎等風飄是實。著免罪。○甲申。以故三等精奇尼哈

番阿喇納子阿玉璽襲職○以護軍統領顧
巴西為禮部右侍郎○刑部題旗下有民人
投充及賣身之人入旗之後多以從前舊事
赴部院衙門告理并倚恃旗下代親屬告訐
者提解人犯牽累平民請嚴加禁止凡此等
告控者不得准理從之○乙酉

上詣

太皇太后宮問安○轉理藩院右侍郎達哈塔
為左侍郎以一等侍衛阿穆瑚瑯為理藩院
右侍郎○丙戌以內國史院修撰徐元文為
陝西鄉試正考官兵部主事遲烜為副考官
以光祿寺少卿蘇銓為江南鄉試正考官工
部主事祁文友為副考官○陞前鋒叅領安
泰為鑲白旗蒙古副都統○戊子諭宗人府
自古帝王建國親親賢賢義在並重我

太祖

太宗

世祖以來篤念本支敦睦九族咸加愛恤欲其

成立以共膺福祿也朕思罪有大小法有重
輕宗室犯罪遽行革除宗室朕心不忍除

世祖章皇帝時定案外自順治十八年以後凡
宗室有犯罪革除宗室者著將情節一并查
明具奏○諭刑部近聞官民家人以自縊投
水身死報部者甚多此皆因本主不加愛養
或逼責過甚難以存活故致身死非有迫切
之情豈肯自盡以後官民務須各將家人撫
恤訓養勿得仍行逼責致死人命至重爾部
即行曉諭申飭○己丑諭吏部庶吉士史鶴
齡等教習已久今加考試應分別授職除嚴
我斯李元振周弘張玉裁已授修撰編修外
史鶴齡儲振盧琦楊仙枝夏沅劉澤溥及見
在纂修官庶吉士王封滌管愷俱著授內三
院編修檢討潘翹生王曰溫謝兆昌俱著以
科道用丁蕙楊鍾岳俱著以部屬用爾部即
遵諭行○庚寅諭刑部設立通政使司及登
聞鼓衙門原係通達民隱陳告冤抑果有冤

枉事情。應赴該部院衙門告理。近見奸惡棍徒。或以瑣細小事。捏成重大。或以私仇。藉端陷害善良。或受人僱託。代為控告。或擅入禁地。及行幸之所。衝突儀仗。趨近喊告。及將此等狀詞。交與部院審理。並無大事及冤枉之處。反因被告干証。將良民株連受累者甚多。故前此已行禁止。今仍多有違禁妄告者。以後著嚴加禁止。如有惡徒仍前瀆告者。除所告之事不准外。著照律治罪。爾部即嚴加曉諭遵行。○定四川武鄉試中額。照文場例。取中四十二名。

秋。七月。壬辰朔。享

太廟。

上親詣行禮。○吏部遵旨會同議政王貝勒大臣議。原任禮部尚書祁徹白。工部尚書葉成額。兵部左侍郎石圖。右侍郎圖爾特。刑部左侍郎覺羅勒德洪。工部右侍郎抗愛。都察院左都御史覺羅碩博會。太僕寺卿覺和託。太

常寺卿覺羅班敦等呈稱。職等為鰲拜所嫉。於康熙六年考察內。無故解任降級。不許於部院衙門用。實為冤枉。查伊等俱係自陳解任降級。應無庸議。得旨。議政王貝勒大臣會同將有無冤枉之處。分別詳議具奏。尋議政王等再議。康熙六年考察時。無故將伊等解任降級。冤枉是實。查覺羅碩博會。既經年老告退。應准復降級。停其補用。祁徹白。以目疾。原品解任。俟病痊補用。石圖。以足疾降級。應准復降級。病痊補用。葉成額。理應復所降三級。但所告狀內。不開明授工部尚書處。不合。應仍降一級。准復二級。照品補用。圖爾特。覺羅勒德洪。抗愛。覺和託。覺羅班敦。俱應復還原降級。遇缺即補。從之。○裁直隸。山東。河南總督缺。○癸巳。

上詣

太皇太后

皇太后宮問安。○以故一等阿思哈尼哈番又

一拖沙喇哈番諾門達賴孫阿圖海襲職○
乙未諭吏部刑部事務殷繁關係人命甚屬
緊要必得才猷練達者方克勝任內國史院
大學士對喀納諳練刑部事務著加太子太
保以內國史院大學士管刑部尚書事尚書
明珠著以原品候補○丙申以吏部右侍郎
帥顏保為漕運總督○丁酉復故輔政大臣
蘇克薩哈原有二等精奇尼哈番世職命其
子蘇常淑承襲并給還所沒家產○復故前
鋒統領白爾黑圖原有一等阿思哈尼哈番
世職命其子白爾肯承襲○戊戌

上詣

太皇太后宮問安○議政王等議鎮國將軍劉
格告伊弟鎮國公哈爾薩一案查劉格哈爾
薩俱係謙郡王瓦克達子順治十年間瓦克
達故議政王等議瓦克達曾得重罪郡王爵
應不准承襲

世祖章皇帝憐其子劉格哈爾薩命俱食奉國

將軍品級俸至康熙六年四月劉格哈爾薩
以伊父瓦克達効力情由呈告時輔臣鰲拜
尚書馬廼賽為哈爾薩姻戚遂將哈爾薩封
鎮國公授劉格為鎮國將軍今劉格又以弟
哈爾薩封公爵而已為兄止得將軍爵呈告
伊等俱係輔臣時貴緣所得之爵應將哈爾
薩鎮國公并原有之奉國將軍品級俱革退
劉格亦革去鎮國將軍仍食奉國將軍品級
俸得旨

世祖章皇帝恩給哈爾薩奉國將軍品級俸著
仍給餘依議○裁內三院滿洲學士缺各一
員○陞侍讀學士折爾肯為內國史院學士
太僕寺卿花善為內弘文院學士○兵部議
覆都察院左副都御史王光裕疏言直隸各
省分防州縣兵丁食用馬匹草料取辦民間
稍不如意即行鞭扑肆虐實甚請敕部行文
各省通行嚴禁如有此等情弊被害人民首
告督撫以下治以縱兵害民之罪應如所請

從之。○己亥。以京師亢旱。命禮部順天府虔誠祈雨。○又以亢旱。命大學士圖海。內大臣伯費揚古。都統喇哈達。大學士魏裔介。一等侍衛索額圖。內秘書院學士盧震。會同刑部將監內擬定重犯。確審酌量減等。○四川巡撫張德地。奏進成都府茂州七岐瑞麥。命賞賚該撫。及地方官田主。○庚子。雨。○壬寅。諭吏部。朕閱處分原任戶部尚書蘇納海等原案。並無大罪。鰲拜等但以為撥地遲延。遽行拏問。多端文致。誣陷。不按律文。任意將無辜處死。原任總督朱昌祚。巡撫王登聯。於撥換地畝時。見民間旗下困苦。因有地方之責。具疏奏聞。輒以為非其職掌。越行干預。亦不按律文。冤枉處死。伊等皆國家大臣。並無大罪。冤死深為可憫。理應昭雪。以示仁恩。作何恩卹。予謚。及廕子入監讀書。商部議奏。○癸卯。

上詣

太皇太后

皇太后宮。問安。○甲辰。河南道御史余縉疏言。民生安危視吏治。吏治貪廉視督撫。數年來。從未有總督叅一巡撫。巡撫糾一總督。互庇如此。欲澄清吏道。拯救生民。勢必不能。請嚴立條例。通行飭諭。部覆無庸議。得旨。督撫瞻徇情面。互相容隱。雖明知弊端。不肯舉發。殊負委任之意。以後務破情面。凡有確見。互相糾舉。如有徇隱。事發從重治罪。不貸。爾部院即通行嚴飭。○和碩安親王岳樂等遵旨會議。鑲藍旗奉國將軍巴爾堪。告稱康熙七年六月。被掌管簡親王家務之博博爾代。倚恃親家鰲拜權勢。誣陷捏控。以致降職。隨訊兩造。並傳都統誇岱等。歷問前事。洵屬冤抑。應給還原職。得旨。巴爾堪給還三等輔國將軍。博博爾代。情罪可惡。本當從重治罪。姑從寬免。著革去議政大臣。并掌管簡親王家務。罰俸一年。○乙巳。中元節。遣官祭

永陵。

福陵。

昭陵。

孝陵○命內秘書院侍讀杜臻為河南鄉試正考官。吏科給事中王承祖為副考官○賜故內大臣一等精奇尼哈番吳拜謚果壯。故內大臣一等阿思哈尼哈番蘇拜謚勤僖○丙午。陞護軍叅領倭內巴圖魯為正黃旗滿洲副都統○丁未。以原任大理寺卿折庫納為內國史院學士○已酉。陞平西王藩下叅領王屏藩為雲南援剿左鎮總兵官○以向化侯原任四川雲陽水師總兵官譚詣為貴州安籠總兵官○庚戌。

上詣

太皇太后宮問安○陞護軍叅領薄濟為鑲白旗滿洲副都統○辛亥。授鎮國將軍宗室羅託子富達禮為一等輔國將軍○以原任刑部左侍郎覺羅勒德洪為吏部右侍郎○兵部右侍郎李棠馥題巡鹽原差御史。康熙七

年。始兼差六部滿漢司官。臣查巡鹽不獨難政利弊。兼有舉劾地方官員并察拏惡棍之責。應將六部司官停差。專差御史。以便責成。又查漢監察御史。俱係選授。嗣後滿御史缺出。亦應以部院官員內。選擇補授。下部議行○壬子。諭禮部。祈穀之禮。大典攸關。康熙元年停止。今應遵舊制。於明年舉行○以內秘書院修撰嚴我斯為山東鄉試正考官。兵部主事虞二球為副考官。內國史院編修周弘為山西鄉試正考官。行人司行人吳守宸為副考官○癸丑。改大寧都司學為保定府左衛學。萬全都司學為宣府前衛學○甲寅。吏部議覆。原任吏部左侍郎折庫納。告稱向因不附鰲拜。致成仇恨。於康熙三年七月。無故降二級調用。康熙六年正月。補大理寺卿。三月京察。又無故降四級。永不許以部院衙門用。查折庫納。兩次降級。實為冤枉。但折庫納已經特授內國史院學士。所告之處。應無庸

議報聞○吳喇忒鎮國公海色故遣官致祭
○乙卯定滿洲蒙古漢軍鄉會試額數順天
鄉試滿洲蒙古編滿字號共取中十名漢軍
編合字號共取中十名會試滿字號取中四
名合字號取中四名○加贈故廣西左江總
兵官左都督全節太子少保孚祭葬如例○
刑部遵旨議覆吳明烜前因妄奏水星出見
擬絞遇赦獲免今經復用又於

皇上前謊稱能推算南懷仁新法及命製星儀
違限遲延星辰等項缺少舛錯應照奏事不
實例杖一百僉妻流徙寧古塔得旨吳明烜
姑從寬免流徙著責四十板○丙辰以原任
太常寺卿班敦為太僕寺卿○吏部議覆河
南道御史余縉條奏請復銓司舊制一定例
銓曹漢人非進士出身者不舉今舉人貢生
皆得入選一定例四司每省用一人以周知
通籍賢否今一概引用不分省分或重或缺
一定例每歲甄別內陞外轉各一人今停止

甄別不復以名節自勵一定例銓部惟試差
遣員外郎餘無馳傳外省今則鹽差關差雜
然並遣一定例吏部不轉別部尊天官為六
卿之長則曹署亦與別部不同今四司員外
郎與別部員外郎較俸並轉以上五款均宜
更定應如所請從之○工部議覆河道總督
楊茂勲估計封邱歲修錢糧一疏相應如議
得旨河工每年修築重勞民力糜費錢糧此
皆河臣不親身料理委諸下屬吏胥包攬冒
破草率塞責以致民生困苦殊屬不合嗣後
凡修築處務須堅固以圖永久若仍前弊該
管大小官員定行重處不貸○丁巳

上詣

太皇太后

皇太后宮問安○戊午以正白旗二等精奇尼
哈番碩塔為鰲拜所嫉於撥地業內無辜革
退命復還原職○免直隸行唐縣本年分電
災額賦十之三○己未免直隸東鹿縣本年

分水災額賦十之三○以輔國將軍額奇為
正白旗領侍衛內大臣

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之三十

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之三十一

監修總裁官光祿大夫太保兼太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙八年己酉八月辛酉朔○壬戌諭宗人

府吏部兵部凡令議政王貝勒大臣會議之
事俱係國家重大機密事務會議之時理應
極其慎密今聞會議之事尚未具題在外之
人即得聞知此皆會議處不加慎密不嚴行
約束間雜隨從之人以致聽聞傳說將國家
大事預先洩漏殊為不合至於人眾愈覺繁
雜其諸王貝勒之長史間散議政大臣俱著
停其議政以後凡會議時諸王貝勒大臣務
須慎密勿致洩漏爾衙門該部即通行曉諭

嚴飭○宗人府和碩安親王岳樂等奏臣等遵旨查緣事革退宗室之人內班布爾善係與鰲拜結黨情罪重大其子郭禮博禮七十五觀音保及一女革去宗室之處應無庸再議得旨班布爾善之子本應依議念係宗室朕心不忍郭禮博禮七十五觀音保及女俱著為閒散宗室○甲子以內秘書院學士盧震為偏沅巡撫○乙丑

上詣

太皇太后

實錄卷三十一

二

皇太后宮問安○諭兵部刑部京師重地理應肅清近聞竊盜搶奪詐騙者甚多此皆步兵及五城司坊各官並巡捕營官兵稽察不嚴巡緝不力或番役等與盜交通受賄縱容以致奸惡之徒肆行無忌殊違法紀嗣後所司文武官嚴加巡察督率番役兵丁力行緝捕務期奸宄斂跡良民無擾如仍前弊所司各官藥治以重罪罔宥○以蒙古都統覺羅塔

達為鑲黃旗領侍衛內大臣○丙寅以內弘文院編修李元振為順天鄉試正考官戶部郎中岳貞為副考官○陞欽天監監正馬祐為江寧巡撫○丁卯遣大學士李蔚祭

先師孔子○諭兵部近聞邊外蒙古進貢馬匹有接至邊界不由賣主強逼勒買者甚至搶奪偷盜又或沿途跟隨強買或已經入館將進貢馬匹強買此等妄行殊違法紀以後進貢馬匹必俟察收之後方許官員兵丁購買餘馬如有仍前妄行著嚴加處分○戊辰

祭

大社

大稷

上親詣行禮○己巳

太宗文皇帝忌辰遣官祭

昭陵○陞鑲黃旗蒙古副都統覺羅朱滿為蒙古都統○以原任廣東副都統段應舉為鑲藍旗漢軍副都統○辛未

實錄卷三十一

一

太祖高皇帝忌辰遣官祭

福陵○諭吏部前京察處分滿尚書侍郎等因無事故被革俱給還原官令其候補今思滿漢諸臣被革相同朕原無異視應一體昭恩京察內有漢尚書侍郎被革者察明議奏○和碩康親王傑書等議覆南懷仁李光宏等呈告楊光先依附鰲拜捏詞陷人將歷代所用之洪範五行稱為滅蠻經致李祖白等各官正法且推曆候氣茫然不知解送儀器虛糜錢糧輕改神名將吉凶顛倒妄生事端殃及無辜援引吳明烜謊奏授官捏造無影之事誣告湯若望謀叛情罪重大應擬斬妻子流徙寧古塔至供奉天主係沿伊國舊習並無為惡實跡湯若望復通微教師之名照伊原品賜卹還給建堂基地許纘曾等復職伊等聚會散給天學傳單及銅像等物仍行禁止西洋人栗安黨等該督撫驛送來京李祖白等照原官恩卹流徙子弟取回有職者復

職李光宏黃昌司爾珪潘盡孝原降革之職仍行給還得旨楊光先理應論死念其年老姑從寬免妻子亦免流徙栗安黨等二十五人不必取來京城其天主教除南懷仁等照常自行外恐直隸各省復立堂入教仍著嚴行曉諭禁止餘依議○壬申。

上詣

太皇太后宮問安○諭吏部國家政務惟藉羣工贊理在京各衙門大小官員必各稱其職乃可以襄郅隆之化部院等衙門滿漢各官應行澄叙以示勸懲大學士尚書及三品以上堂官俱著自陳三品司官及四品以下各官爾部會同都察院詳加甄別具奏在外總督巡撫係封疆大臣職任緊要著該部院查明任內功過稱職與否詳加甄別具奏爾部即遵諭行○諭吏部兵部內大臣侍衛文武大小各官各有職掌理宜精白乃心恪遵法紀循分盡職以副朕任用之至意近見有不

安厥分。交通在內。近侍使令人員妄行干求。或潛為援引。或畏威趨奉。揆之臣誼。殊為不合。朕施行政務。懲創奸佞。察其忠賢才能者。用之。以後如有匪類妄行。陷人以圖僥倖。自以為賢希覬陞遷。及仍前干求趨奉者。定行從重治罪。不宥。爾二部即通行內外。及包衣佐領。嚴加申飭。遵行。○乙亥。陞左僉都御史董國輿為內秘書院學士。○丁丑。給進剿福建海寇鄭成功陣亡前鋒侍衛阿斯哈。拖沙喇哈番。予祭葬如例。○戊寅。

上詣

太皇太后宮問安。○內秘書院大學士巴泰。以病乞休。慰留之。○辛巳。吏部遵諭查覆原任禮部尚書梁清標刑部左侍郎石申。均係京察無故被革。應復還原職。從之。○甲申。先是。吏部侍郎索額圖請解侍郎任。願為侍衛効力。

上允之。授一等侍衛。至是。命索額圖為內國史

院大學士。○以原任鑲黃旗副都統巴喀。同蘇納海撥地遲延枉革。命復其官。為鑲黃旗蒙古副都統。○追賜故原任太子少保戶部尚書蘇納海謚襄愍。故原任兵部尚書直隸總督朱昌祚。謚勤愍。故原任工部尚書直隸巡撫王登聯。謚愍愍。各祭葬如例。廕蘇納海子瓦爾達。朱昌祚子朱綏。王登聯子王盛唐。入監讀書。以通政使司左右通政大理寺少卿。督捕左右理事官等缺用。○乙酉。免江南鹽城所屯田。康熙七年分水災額賦。○以原任夏官正李祖白。春官正宋可成。中官正劉有泰。秋官正宋發冬官正朱光顯等死。非其罪。各照原品級。給祭銀。○丙戌。

上詣

太皇太后

皇太后宮問安。○追賜原任掌欽天監事通政使司通政使湯若望祭葬如例。○丁亥。秋分。

夕

月於西郊。遣都統覺羅巴爾布行禮○己丑。改雲南尋甸府為州。歸曲靖府統轄。裁知府通判等缺

九月。辛卯朔○壬辰。予故原任浙江巡撫蔣國柱祭葬如例○甲午。寅時。京師地震有聲○乙未。遣官祭

歷代帝王○遣官祭城隍之神○甄別各部院堂官。禮部尚書布顏左都御史尼滿俱以原品隨旗行走。兵部右侍郎李崇馥年老休

致。倉場總督工部尚書白色純。戶部右侍郎薩爾圖。刑部右侍郎納布。左副都御史哲庫訥。阿思祜。各降級隨旗行走。內弘文院學士周天成。革職○丙申。

上詣

太皇太后

皇太后宮問安○吏部等衙門覆核各督撫功過分別具題。得旨。山西陝西總督莫洛。革職。河道總督楊茂勲。原任福建總督祖澤溥。原

任直隸山東河南總督白秉貞。原任延綏巡撫張中第。俱原品休致。原任湖廣總督張長庚。著以原品隨旗行走。原任山西陝西總督盧崇峻。削尚書銜。留阿思哈尼哈番。隨旗行走。陝西巡撫白清額。降四級隨旗行走。湖廣巡撫林天擎。留任。直隸巡撫金世德。降二級留任○予故一等阿思哈尼哈番副都統金維垣祭葬如例○丁酉。甄別在京滿漢官革職降級。休致。共八十三員○庚子。

上詣

太皇太后

皇太后宮問安○命大學士索額圖為纂修世祖章皇帝實錄總裁官○和碩康親王傑書等奏。工部尚書都統濟世。兵部侍郎邁音達。內秘書院學士吳格塞。均係鰲拜同黨。前摺問鰲拜時。濟世等奉差福建巡海。又劉之源。子劉邦柱。外任提督。今一并提到。勘問。濟世等依附鰲拜。結黨行私。是實。均應革職立斬。

家產籍沒。得旨濟世。吳格塞著革職。即行處絞。邁音達免其處死。著革職。籍沒家產。鞭一

百。劉邦桂免死。寬其籍沒。著革職。鞭一百。

辛丑。以兵部郎中魏學渠為湖廣按察使司

僉事。提調學政。○壬寅。山東邱縣孝子王祚

昌。刲肝療父。父病立起。特旨給旌。後不為例。

○癸卯。兵部議直隸山東河南總督既裁。所

設標下五營兵四千名。原調山東河南兵各

一千名。應撤回本省。其餘官兵二千名。將一

千貼防大名府。仍餘兵一千。應行直撫會商。

於鎮防兵力。單少處分撥。從之。○甲辰。以原

任刑部左侍郎石申。為總督倉場戶部侍郎。

原任工部左侍郎冀如錫。為兵部左侍郎。管

右侍郎事。○大學士都統圖海奏。臣以一身

而膺二任。才愧兼長。且非國家文武分途之

制。乞解機務。專力戎行。得旨。卿才猷敏練。簡

任機密重地。著仍兼任大學士都統之職。不

必控辭。○丁未。以正藍旗蒙古都統勒貝為

滿洲都統。○以三等阿思哈尼哈番李鱗龍

為正黃旗漢軍副都統。○庚戌。

上詣太皇太后宮問安。○以原任廣東水師提督塞

白理。為浙江提督。○壬子。予故二等精奇尼

哈番沙里代祭葬如例。○癸丑。山西巡撫覺

羅阿塔。以品行不正。降四級。隨旗行走。○甲

寅。轉工部尚書恩額德。為禮部尚書。以原任

刑部尚書明珠。為都察院左都御史。原任吏

部右侍郎吳達禮。為刑部右侍郎。○以內秘

書院學士鄂善。為都察院左副都御史。內弘

文院學士多諾。為山西陝西總督。陞侍讀學

士張鳳儀。為內弘文院學士。○乙卯。以故阿

霸琰卓禮克圖多羅郡王色爾折爾子德穆

白爾襲爵。○和碩康親王傑書等。遵旨議覆

文武既分職掌。巡撫例不管兵。但有未設總

督之省。如遇軍需急務。提督總兵官仍應會

同巡撫料理。至副將以下武職官員。若有貪

酷殃民侵餉等事亦應巡撫察實題奏從之

○丙辰正紅旗都統王國光以病乞休命以原官致仕○掌鑾儀衛事鑾儀使王鵬冲以年老乞休命以原官致仕○丁巳

孝慈高皇后忌辰遣官祭

福陵○陞叅領諾邁為江南狼山總兵官○戊午

上詣

太皇太后宮問安○己未諭理藩院昔我

太宗皇帝遣發王師獲額哲等以歸念其為察哈爾林丹汗之子乃元朝苗裔不忍廢絕特沛殊恩加封和碩親王迨額哲既歿以其弟阿布柰襲王爵阿布柰宜思世受恩眷竭誠圖報乃上負國家養養之仁累失外藩朝賀之禮情罪重大理宜削封但念

皇祖太宗

皇考世祖優容撫恤之意不忍奪其封爵其以阿布柰子布爾尼仍襲封和碩親王○陞正

藍旗蒙古副都統畢理克圖為蒙古都統冬十月辛酉朔享

太廟

上親詣行禮○遣官祭

永陵

福陵

昭陵

孝陵○頒康熙九年時憲曆○厄魯特鄂齊爾

汗故遣官致祭○壬戌鄂羅斯察漢汗遣使

進貢宴賚如例○癸亥

皇太后聖壽節

上率王以下文武大臣侍衛等詣

皇太后宮行禮遵

懿旨停止筵宴○諭吏部朕思部院事務殷繁

諸司官職掌必得賢能方克勝任今爾部但就部院見任官員調補其隨旗上朝者豈無賢能可備擢用乎可諭滿洲漢軍都統副都統等於阿達哈哈番以下拖沙喇哈番以上

有明習滿文或通曉漢文。夙具才幹。堪任部院者。從公詳擇一旗數員。咨送爾部。俟各旗缺出。與應陞者並題補用。○原任戶部尚書馬通賽。因鰲拜案內獲罪。其所襲伊父譚拜之二等阿思哈尼哈番。令譚拜姪孫佛保承襲。○甲子。

上幸南苑行圍。○諭戶部。朕巡歷所至。凡御用器物。皆係所司由京城供辦。毫無取於地方。除內廐之馬。不用飼秣。即部撥馬匹。所需芻豆。亦屬無多。向聞地方官。指稱御用。私派民間預為儲侍。既不銷算。又不還民。貪污官吏。侵肥入己。苦累小民。重違法紀。自後務加嚴禁。倘有仍前借端科派者。所司官嚴察叅奏重懲。如匿不上聞。事發一并治罪。爾部即通行嚴飭。刊示曉諭。○乙丑。以工部左侍郎羅多為河道總督。○以內國史院學士馬雄鎮為山西巡撫。陞山西布政使達爾布。為陝西巡撫。○丙寅。陞監察御史莫洛渾。為通政使。

司通政使。○丁卯。陞兵部督捕右理事官哈占。為內秘書院學士。刑部郎中塞赫。為內弘文院學士。○己巳。以重修蘆溝橋告成。

御製碑文。其詞曰。朕惟國家定鼎於燕。河山拱衛。秦乾之水。發源於大同府之天池。伏流馬邑。自西山建瓴而下。環繞畿南。流通於海。此萬國朝宗要津也。自金明昌年間。蘆溝建橋伊始。歷元與明。屢潰屢修。朕御極之七年歲在戊申。秋霖泛溢。橋之東北。水嚙而圯者十有二丈。所司奏聞。乃命工部侍郎羅多等。鳩工督造挑濬。以疏水勢。復架木以通行人。然後庀石為梁。整頓如舊。自此萬國梯航。及民間之往來者。咸不病涉。實藉河伯之靈。丕慰通濟之懷。蓋萬世永賴焉。爰勒豐碑。用垂不朽。○壬申。陞刑部右侍郎吳達禮。為工部尚書。○喀爾喀車臣汗遣使進九白年貢。宴賚如例。○授固山貝子溫齊女為縣君。壻阿祿科爾沁多羅郡王朱爾扎哈子巴忒馬為固。

山額駙○癸酉。

上自南苑回宮。詣

太皇太后

皇太后宮問安○丁亥。山西陝西總督莫洛疏言。提督張勇病廢宜罷。得旨。張勇久任邊疆。著有勞績。著仍留原任○戊子。一等精奇尼哈番。兼一拖沙喇哈番。濟世。因釐拜案內正法。其世職。以其弟卓保子卓林承襲。

十一月。庚寅朔。免江南江寧等四衛。本年分水災額賦有差○免湖廣黃梅縣。本年分旱災額賦十之三○喀爾喀戴青台吉遣使進九白年貢。宴賚如例○辛卯。陞陝西按察使穆成額為山西布政使司布政使○奉天將軍吳瑪護。以年老乞休。慰留之○癸巳。免直隸無極等六縣。山西汾西壽陽二縣。本年分電災額賦有差○戶部題准。宗人府咨開差往祭

陵多羅貝勒董額鎮國公蘭布等。所帶人役共

八百有餘。馬駝二千有零。盛京地方錢糧短少。沿途驛站不能應付。定例。宗室公等出差。許帶人役十名。馬三十匹。惟貝勒貝子。從無定議。今議貝勒跟隨人二十五名。馬五十匹。貝子跟隨人二十名。馬四十匹。口糧馬草沿途照數支給。從之○甲午。

上詣

太皇太后

皇太后宮問安○陞右通政靳輔為內國史院學士○兵部題海上投誠鄭纘昌于大海並授左都督。今已歸入正白旗。應照例改為精奇尼哈番。從之○兵部又議。福建水師提督施琅。自海上投誠。授為右都督。今已歸入鑲黃旗。應照例改為精奇尼哈番。但施琅投誠後勞績甚多。請加伯銜。從之○丙申。復設廣西左江巡道驛鹽巡道二缺○予故原任兵部左侍郎管右侍郎事熊文舉祭葬如例○丁酉。授固山貝子傅喇塔女為縣君。壻義王

孫徵淳為固山額駙○追賜故都統三等精奇尼哈番朱馬喇祭葬。謚襄敏○戊戌。以原任刑部右侍郎納布。為戶部右侍郎○陞正紅旗漢軍副都統王國詔。為漢軍都統。護軍叅領哈克。為正藍旗蒙古副都統○以吳喇忒故鎮國公海色子插穆察襲爵○己亥。陞刑部郎中吳努春。為陝西按察使司按察使○甘肅巡撫劉斗。提督張勇。陝西提督栢永馥會疏保留革職總督莫洛。又西安百姓趙璉等。叩闕奏稱總督莫洛。巡撫白清額。居官清正。萬民愛戴。乞留原任。以慰輿情。得旨。原任山西陝西總督莫洛。陝西巡撫白清額。已經甄別處分。本當不復任用。近據甘肅巡撫劉斗等。合詞奏稱莫洛有益地方。兵民數千。哀求代題留任。又據百姓趙璉等。奏稱莫洛白清額實心實政。老稚感悅。保奏留任。朕思簡用督撫。原欲綏輯地方。愛養百姓。今莫洛等。既為地方愛戴。特順輿情。免其處分。莫

洛白清額。俱著復還原官留任。以後著殫心供職。以副朕寬宥任用之意。達爾布著改為山西巡撫。馬雄鎮著候缺另用○改新授山西陝西總督多諾。為刑部右侍郎○庚子。免河南睢州。陳留等十三州縣。本年分水災額賦有差○除陝西南鄭縣。被水衝沒地方田糧○壬寅。

上詣

太皇太后宮問安○癸卯。予故二等精奇尼哈番碩色納。祭葬如例○免江南高郵興化等四州縣。本年分水災額賦有差○喀爾喀達爾漢親王奔塔爾楚虎爾故。遣官致祭○甲辰。陞山西冀寧道繆正心。為湖廣布政使司布政使○庚戌。

上詣

太皇太后宮問安○授和碩簡純親王濟度女為郡主。塔和善為和碩額駙○辛亥。陞光祿寺卿達都。為內秘書院學士○予故三等輔

國將軍伊尚阿祭葬如例○壬子以修造

太和殿

乾清宮告成遣官祇告

天地

太廟

社稷○癸丑

上御太和殿王以下文武各官行慶賀禮○是日

上由武英殿移居乾清宮○甲寅以

太和殿

乾清宮告成頒詔天下詔曰自古帝王統一

寰區營建宮室匪特崇壯麗之觀實以隆出

治之體甚鉅典也朕御極以來以保和殿為

清寧宮居住今春奉

太皇太后旨不宜以殿為宮宜於乾清宮居住

朕恪遵

慈命爰敕所司重加修理又因太和殿建造年

久頗有損漏遂命一并鳩工重修今俱告成

祇告

天地

宗廟

社稷於康熙八年十一月二十四日進御宮殿

懋圖治理念締造之維新宜臣民之協慶於

戲紹丕基而勤宵旰思益弘垂裕之規撫黎

庶而沛恩膏期永洽盈寧之樂布告中外咸

使聞知○詔內恩款凡十五條○以一等精

奇尼哈番王之鼎為正紅旗漢軍副都統○

乙卯改雲南新附十八寨錢糧歸安籠所通

判管轄○戊午冬至祀

天於

圜丘

上親詣行禮○遣官祭

永陵

福陵

昭陵

孝陵○己未

上率王以下文武大臣侍衛等詣

太皇太后

皇太后宮行冬至慶賀禮。御殿。王以下文武各官上表朝賀。

十二月庚申朔。雲南貴州總督甘文焜疏報。赧牛等四十九寨野苗慕義來歸。得旨野苗慕化歸順可嘉。著加意撫綏。勿致失所。○甘文焜又報。逆賊阿戎梗化。已非一日。遣兵撲剿。殺賊百餘人。復聚踞阿魯山。副將治秉忠陣斬阿戎。擒殺七百餘衆。逆黨悉平。下部議叙。○厄魯特僧厄台吉遣使進貢。賞賚如例。○壬戌。

上詣

太皇太后宮問安。○免湖南平江等七縣本年分旱災額賦十之三。○癸亥。免江南蕭縣鹽城所。本年分水災額賦有差。○甲子。予故原任南汝總兵官張應祥祭葬如例。○乙丑。陞大理寺少卿廖昇。為光祿寺卿。○調天津總

兵官徐治都。為湖廣蕪陵總兵官。○丁卯。金星晝見。○戊辰。陞吏部郎中馬斯良。為湖廣按察使司按察使。○復設廣東惠潮道。高雷廉道。瓊州道。三缺。改巡海道。為廣肇道。管理鹽法。○己巳。以原任山東右布政使徐國相。為江南安徽布政使司布政使。○庚午。

上詣

太皇太后宮問安。○令甘肅藩臬二司。由鞏昌移駐蘭州。臨洮道。由蘭州移駐臨洮。隴右道。由秦州移駐鞏昌。○裁江西九江等衛所守備五員。千總八員。以屯糧歸州縣徵收議裁也。○辛未。皇子承祐生。○予故南汝總兵官馬呈正祭葬如例。○壬申。以故二等精奇尼哈番碩塞納子蒙古襲職。○甲戌。戶部題。江南泗州虹縣等五州縣。從前捏報開墾地畝。及見被水沈地畝。共五千二百九十六頃。此二項錢糧。請永行豁免。從之。○以故阿思哈尼哈番金維垣子金世鐸襲職。○乙亥。喀爾

喀土謝圖汗遣使進貢。賞賚如例。○丙子。

皇后千秋節。免行禮。○裁京倉滿漢監督二員。

○復舉人揀選知縣例。○復設廣州左衛。廣

州後衛。廣海衛。雷州衛。守備四員。新會所。香

山所。新寧所。東莞所。大鵬所。平海所。靖海所。

海康樂民所。海安錦囊所。雙魚海浪所。千總

十員。○戊寅。

上詣

太皇太后宮。問安。○投順飛牙喀地方哈蘭莊

三家頭目郭噶等貢貂皮。賞賚如例。○己卯。

和碩顯親王福壽薨。賜祭。造墳立碑。謚曰懿

○杜爾伯特固山貝子塞冷故。遣官致祭。○

三等阿思哈尼哈番趙鍾岱。緣事革退。命其

姪趙清欉承襲。○庚辰。轉工部右侍郎。覺羅

查哈喇。為左侍郎。陞內秘書院學士。禪布。為

工部右侍郎。○陞宗人府啟心郎覺羅阿範。

為都察院左副都御史。○免江南五河縣。本

年分水災額賦有差。○丁亥。歲暮。裕祭。

太廟。遣鎮國將軍陶色行禮。○遣官祭

永陵。

福陵。

昭陵。

孝陵。○遣官祭太歲之神。○旌表八旗節婦滿

洲。遮爾懇妻朱氏等十五人。蒙古谷梅妻額

氏一人。漢軍盧永祚妻戴氏一人。烈婦滿洲

毛才妻李氏等五人。各給銀建坊如例。○是

歲。人丁戶口。一千九百三十八萬八千七百

六十九。田地山蕩畦地。五百四十三萬二千

四百六十三頃五十七畝。徵銀二千五百八

十七萬五千八百七十一兩有奇。米。豆。麥。六

百二十萬三千六百二十石三斗有奇。草。二

百三十萬五千六百五十五束。茶。十五萬七

千五百三十引。行鹽。四百四十一萬五千二

百八十四引。徵課銀二百七十七萬八千六

百三十三兩有奇。鑄錢。二萬八千七百六十

五萬六千五百六十有奇。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之三十一

實錄卷三十一

二十六

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之三十二

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書世宗憲等奉

敕修

康熙九年庚戌春正月己丑朔

實錄卷三十二

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御殿王以下文武各官外藩王

及便臣等上表朝賀停止筵宴○朝鮮國王

李棚遣陪臣閔鼎重等表賀冬至元旦

萬壽節及進歲貢禮物宴賚如例○癸巳喀爾

喀扎薩克圖汗遣使進九白年貢。宴賚如例。
(甲午。

上詣

太皇太后宮問安。(乙未。

世祖章皇帝忌辰。遣官祭

孝陵。(丙申。河南巡撫郎廷相疏言。宋儒程顥。

程頤。後裔明時有五經博士二員。緣流寇亂。

後廕襲久絕。今查有程顥嫡裔程宗昌。程頤

嫡裔程延祀。應請襲職。從之。(丁酉。孟春。享

太廟。

上親詣行禮。遣官祭太歲之神。(辛丑。祈穀
於

上帝。奉

太祖高皇帝

太宗文皇帝

世祖章皇帝配享。

上親詣行禮。(壬寅。順天府進春。(癸卯。賜朝

正外藩王貝勒貝子公台吉塔布囊等銀幣。

鞍馬有差。(乙巳。復設河南分守河北道分

巡南汝道。二缺。(廣東廣西總督周有德復

具疏請回旗守制。允之。(丁未。諭兵部前以

輔政大臣過必隆。明知鰲拜等樹黨亂政。不

豫行糾劾。故坐之罪。今思伊係

皇考顧命大臣。且勲臣子。其咎止於因循瞻顧。

未嘗躬負重愆。特為寬宥。仍以公爵宿衛內

廷。(戊申。

上詣

太皇太后

皇太后宮問安。(封鎮國公杜蘭子弼禮克為

輔國公。授輔國公鞏安子巴哈穆。輔國公化

善子佛格。俱為三等輔國將軍。多羅宣和郡

王多尼庶出子鄂明。鎮國將軍輝塞子齊塞

輔國將軍伊尚阿子錫布。俱為三等奉國將

軍。(復設湖廣分守武昌道。分巡上荆南道。

分守鄖陽道。三缺。(己酉。初。直隸各省廢藩

田產奉旨免其易價。改入民戶。名為更名地。

內有廢藩自置之地給民佃種者輸糧之外。又納租銀。重徵為累。戶部議以久載全書不當蠲免。得旨更名地內自置土田。百姓既納正賦。又徵租銀。實為重累。著與民田一例輸糧。免其納租。至易價銀兩。有徵收在庫者許抵次年正賦。○壬子。

上幸南苑行圍。○乙卯。以刑部郎中王震生為江西按察使司僉事。提調學政。工部郎中董朱袞為山西按察使司僉事。提調學政。刑部郎中楊毓蘭為山東按察使司僉事。提調學政。戶部郎中王震起為廣西按察使司僉事。提調學政。刑部郎中鍾朗為陝西按察使司僉事。提調學政。○戊午。予故原任刑部尚書李化熙祭葬如例。

二月。己未朔。○壬戌。

上自南苑回宮。詣

太皇太后

皇太后宮問安。○癸亥。諭戶部淮安府屬海州。

安東等九州縣。揚州府屬高郵。興化等四州縣。水患頻仍。康熙八年夏秋。又罹霖雨。爾部檄行督撫。即發倉粟賑濟飢民。○甲子。命內秘書院大學士魏裔介。禮部尚書龔鼎孳。為會試正考官。刑部左侍郎王清。內國史院學士田逢吉。為副考官。○諭兵部武職官員有訓練兵丁。剪除盜賊。使地方寧靖。兵民相安之責。必謀畧兼備。弓馬嫻熟者。斯稱厥職。其不諳弓馬。才力不及者。許不時糾察。已屢有諭旨。朕出獵巡視地方。見涿州營守備劉逾光。涿鹿衛守備任先聲。保定左衛千總周誠。弓馬不嫻。才力甚為不及。著察議具奏。此中有効力行間。得軍功者。仍寬宥留任。閱此等將弁。係該督提鎮於原補授時。不行揀選及補授後。不行糾叅之故。嗣後武職務須遴選才能之人補授。將無才能者。不時查叅。爾部嚴行直隸各省督提鎮遵行。○丙寅。

太皇太后聖壽節。

上率王以下文武大臣侍衛等詣

太皇太后宮行禮。照例筵宴。○命內國史院侍讀胡簡敬提督順天學政。○復設浙江分巡寧紹道。分巡溫台道。分守杭嘉湖道。分守金衢嚴道。西缺。○予故護軍統領科爾昆祭葬如例。○丁卯。

上詣

太皇太后

皇太后宮問安。○遣大學士杜立德祭

先師孔子。○陞光祿寺卿楊永寧為太常寺

卿。○以原任福建提學道沈令式為廣東按

察使司僉事。提調學政。刑部郎中陳必成為

雲南按察使司僉事。提調學政。戶部郎中崔

爾仰為浙江按察使司僉事。提調學政。○戊

辰祭

大社

大稷。

上親詣行禮。○己巳。

孝康皇后忌辰。遣官祭

孝陵。○陞護軍叅領蘇虎濟為正藍旗蒙古副都統。○雲南貴州總督甘文焜疏報定番州所屬崗渡等一百四十五寨苗蠻傾心歸化。請納賦起科。下部知之。○庚午。戶部議覆山西巡撫達爾布疏言里馬雖已奉裁。相隔一年。始行解京。中間支放草豆等項銀二萬二千餘兩。請准奏銷。查里馬裁於康熙七年四月。則夏秋草青可以放牧。應如直隸各省營馬例減半支銷。得旨錢糧既經散給民間。飼養馬匹難以復追。爾部議令如半支例扣算。果當與否其再議之。於是戶部更議如撫臣請。從之。○辛未。

上詣

太皇太后宮問安。○壬申。諭刑部盜案內論死者甚多。其為誣引株連亦或有之。宜加詳勘。至於夾棍乃慘痛之刑。必不得已而後用。其慎之毋忽。○調四川夔州總兵官馬化麒為

福建海澄總兵官○癸酉。陞廣西巡撫金光祖為廣東廣西總督○甲戌。予故蒙古都統三等精奇尼哈番隆莪祭葬如例○乙亥。以內國史院學士馬雄鎮為廣西巡撫○丁丑。先是內國史院大學士衛周祚引疾乞歸。上念其勤勞有年。給俸如故。俟病痊起用。至是衛周祚以在籍支俸三年。受恩過當。具疏辭俸。得旨。卿在任著有勞績。回籍調理。特給祿以資順養。可仍遵前命。祇受勿辭○江寧巡撫馬祐疏言。桃源縣等處連年水災。請免帶徵漕米。得旨。漕糧例不蠲免。但該撫既稱桃源等處屢被水災。民生困苦。與他處不同。著確議具奏。尋議康熙六七兩年分未完漕米一萬六千六百四十石。應准其蠲免。後不為例。從之○戊寅。

上詣

太皇太后宮問安○己卯。陞兵部郎中紀振疆為光祿寺卿○庚辰。復設山東提督。以原任

山東提督楊捷補授○癸未。諭刑部。向來定例。流徙尚陽堡寧古塔罪人。於六月十二月停遣。餘月皆令發往。今思自十月至正月俱嚴寒之候。所徙罪人。貧者殊多。衣絮單薄。無以禦寒。罪不至死。而凍斃於路。甚為可憫。繼自今。流徙尚陽堡寧古塔罪人。自十月至正月。及六月。俱勿遣○戶部遵旨議覆。古北等口外空間之地。分撥八旗。查喜峯口獨石口外既無閒地。正紅旗又無赴邊外領地之人。不必撥給。今以古北口外地。撥與鑲黃旗正黃旗。羅文峪外地。撥與正白旗。冷口外地。撥與鑲白旗。正藍旗。張家口外地。撥與鑲紅旗。鑲藍旗。從之○甲申。叙克取銅山金門功。授福建隨征總兵官一等精奇尼哈番王之鼎。為三等伯○乙酉。諭吏部兵部。向來包衣佐領下官員子弟。不准為廕生監生。其筆帖式無有品級。今思內外官員効力相同。加恩豈宜有別。嗣後包衣佐領官員子弟。准為廕監。

及筆帖式給與品級之處。爾部定議具奏。尋吏部議康熙六年恩詔。包衣下一品官子弟。許其承廕。二品至四品各廕一子入監讀書。其筆帖式應授品級。照各部院例從之。○戶部議覆漕運總督帥顏保疏言。江南高郵等六州縣被災。康熙六七八年分未完漕米二萬八千七百六十九石有奇。改折帶徵。應如所請。得旨。高郵等處災傷。與他處不同。此未完漕米。仍令帶徵。恐小民不能完納。以致困苦。著再議。○丙戌。

上詣

太皇太后

皇太后宮問安。○丁亥。春分。朝

日於東郊。

上親詣行禮。○議政王等議定服制。民公以下。有頂帶官員以上。禁止穿五爪三爪蟒緞。滿翠緞圓補服。黑狐皮黃色秋香色衣。軍民人等禁止穿蟒緞。粧緞。金花緞。貂皮。猞猁。獬白。

豹皮。衲子等服。從之。○鑲黃旗副都統魯西巴圖魯。以老乞休。

上念其行間効力年久。慰留之。○增設通惠北河南旺夏鎮中河南河管理河務滿分司六員。○戶科給事中姚文然疏言。各省辦買豆米草料等項。俱當官發價。其藥材銅鐵絹布絲綿白麻魚膠顏料等項。俱係民間辦買。交官在豆米等項。價係官發。則部駁核減銀兩。自應追還貯庫。若顏料等項。價銀出自民間。駁減之後。仍追銀貯庫。實為重困。請嗣後將減價銀兩。概行給還。庶民困得蘇矣。下部議行。

閏二月。戊子朔。

上詣

太皇太后

皇太后宮問安。○皇子承慶生。○庚寅。諭工部。朕經行城外。見道旁枯骸。惻然可憫。或因爾部修治道途。以致暴露。亦未可定。其令有司

掩埋○免福建龍溪等五縣康熙七年分水災額賦有差○辛卯。以戶部郎中鄭端為貴州按察使司僉事。提調學政○予故原任刑部侍郎黃熙印。原任廣東將軍沈永忠各祭葬如例○壬辰。予故內大臣諾爾遜祭葬。謚襄敏○癸巳。予故原任太子太保廣東鎮海將軍都統一等阿思哈尼哈番王國光祭葬。謚襄壯○甲午。

上詣

太皇太后宮問安○乙未。遣官祭

先農之神○復設湖廣分守岳常道分巡辰沅靖道分守衡永郴道三缺○丁酉。予故滿洲都統議政大臣一等阿思哈尼哈番郭爾親祭葬。謚襄敏○予故都督僉事原任貴州平遠總兵官劉文進祭葬如例○戊戌。予故致仕內國史院大學士金之俊祭葬。謚文通○己亥。太子太保兵部尚書王弘祚以老乞休。命以原官致仕。乘驛歸里。仍給俸○辛丑。

遣官祭

歷代帝王○予故右都督福建海澄總兵官張公諒祭葬如例○壬寅。清明節。遣官祭

永陵。

福陵。

昭陵。

孝陵○己酉。戶部遵旨再議。漕糧例不因災蠲

免。但江南高郵等六州縣疊被災傷。應將康熙六七八年未完漕糧盡行蠲免。從之○陞

叅領拜音達禮為直隸宣府總兵官○庚戌。

諭禮部。

慈和皇太后誕育朕躬。未遂孝養。思慕之忱。每切於懷。雖已上

尊謚。但今升祔

太廟。配食

皇考。典禮關係重大。其應進

謚號。著議政王貝勒大臣九卿科道會同詳議具奏○壬子。免山東沂州魚臺等四十州縣

衛及信陽等三場起存項下銀二十二萬七千三百有奇。以康熙七年地震被災故也。○予故正黃旗內大臣二等阿達哈哈番囊努克祭葬如例。○癸丑。

上詣

太皇太后

皇太后宮問安。○甲寅。調刑部尚書朱之弼為兵部尚書。○乙卯。盛京刑部侍郎祁通額。以病乞休。允之。○丁巳。諭禮部。

皇考升遐。條經十載。罔極之思。時恫於懷。

山陵在望。未一展祭。尤切悽愴。朕擬於今歲八月恭行謁。

陵禮。又奉

太皇太后旨。思念情慙。亦欲詣

陵。朕敬遵

慈命。躬侍前往。應行典禮及需用各項。爾部詳議具奏。○議政王等遵諭會議。

太祖高皇帝

皇后稱高皇后。

太宗文皇帝

皇后稱文皇后。今

慈和皇太后配祀

世祖章皇帝前上

孝康慈和莊懿恭惠崇天育聖尊謚。亦宜加上尊謚為章皇后。得旨是。○蘇尼特多羅杜楞郡

王褚魯木故。遣官致祭

三月戊午朔。

上詣

太皇太后

皇太后宮問安。○策試天下貢士於

太和殿前。制曰。朕惟帝王誕膺天命。撫御四方。莫不以安民興賢為首務。朕繼承

祖宗鴻緒。孜孜圖治。民生休戚。日厯於懷。而治未臻於郅隆。其故何歟。今欲家給人足。以成

豐亨樂利之休。何道而可。興賢育才。原以為民。今既崇經學以正人心。重制科以端始進。

乃士風尚未近古。以致吏治不清。民生未遂。果陶淑之未善歟。抑風俗人心。習於浮偽。徒徇名而失實歟。必如何而能返棧樸。作人之盛。以幾時雍之化也。我國家揆文奮武。禮樂之彥。韜鈴之臣。兼收並重。何以簡用得人。使才稱其職。廟堂著亮采之功。封疆有干城之效歟。在外地方大吏。惟督撫是賴。牧民之官。守令最親。必表正而後景直。欲使大法小廉。遵功令而修職業。以爭自濯磨。將何術之從歟。漕糧數百萬。取給東南。轉輸於黃運兩河。何以修濬得宜。而天庾藉以充裕。俾國收其利。民不受其害。其必有道以處此。爾多士志學已久。當有確見於中。其各攄夙抱。詳切敷陳。朕將親覽焉。○庚申。命和碩安親王岳樂為監修。

玉牒總裁官。左宗正多羅貝勒察尼內秘書院大學士圖海內國史院大學士杜立德。學士折庫納禮部左侍郎常鼐。董安國為副總裁。

官。宗人府理事官覺羅沙賴。經歷布爾哈達。侍讀學士郭四海。侍讀格爾古德。編修周之麟。翟延初。禮部員外郎齊藍布。主事席特庫。為纂修官。○辛酉。傳臚。賜殿試貢士蔡啟傳等二百九十二人進士及第出身有差。○轉都察院左都御史馮溥為刑部尚書。○壬戌。上詣

太皇太后宮問安。○癸亥。以原任工部侍郎杭愛為盛京刑部侍郎。○甲子。正紅旗滿洲副都統兼尚書銜覺羅外庫。以疾乞休。命原品解任。○乙丑。命洮泯魯班等七寺番僧止進貢馬匹青木香。餘物停止。○丙寅。諭吏部滿漢大小官員職掌相同。品級有異。應行畫一。著議政王貝勒大臣會同定議具奏。○予故署都督同知貴州安籠總兵官王平祭葬如例。○丁卯。京口右路水師總兵官麻印揚以老乞休。允之。○己巳。

上詣

太皇太后

皇太后宮問安○庚午。復設四川湖廣總督一員。福建總督一員○辛未。諭戶部。十庫所有舊物。與其虛置於此。何如分賜旗下貧丁。爾部即偕工部。察有當給予者。集議以聞。尋戶部工部議覆。

上命發庫內木棉絲布茶鹹衣服弓矢等物。令都統等酌給各佐領下。護軍撥什庫及甲兵之貧者○諭兵部設立驛傳原為往來差遣。緊要事務。速於接應。近聞州縣各驛馬匹缺少。應付遲悞。驛遞原有額設錢糧。以備芻牧。驛傳道專行管理。乃不殫心嚴察。以致侵減錢糧馬匹缺乏。應作何稽察嚴禁。爾部其詳議具奏○諭兵部都察院督捕衙門。京師重地。理宜肅清。近聞京城內外惡棍肆行無忌。或借端挾詐。勒騙錢財。或公然剽奪。侵擾市肆。或糾夥橫行。兇毆良民。又夜間盜劫。時聞拏獲甚少。此皆步軍校該巡城御史司坊各

官督捕司官捕營將弁稽察不嚴。緝捕無術。以致奸盜不息。善良懼害。作何嚴行申飭。緝拏。如該管官仍前怠玩者。作何處分。爾部院衙門會同定議具奏○授一甲進士蔡啟傅為內秘書院修撰。孫在豐為內國史院編修。徐乾學為內弘文院編修○刑部題查律載抄扎入官人口。隱瞞不報者。計口以隱漏丁口論。今若照律處分。則罪輕而隱瞞者必多。臣等酌議嗣後凡隱瞞反叛抄扎入官人口者。不分男婦大小五口以上。照依隱匿財物至五百兩例杖一百。流徙寧古塔。四口以下杖徒如旗下有犯此等之罪例。應枷號發落。遵為定例。從之○壬申。

上詣

太皇太后

皇太后宮問安○吏部議覆左副都御史鄂善等疏。言查罰俸之法。有陞任之官原任有事。應行罰俸。不照原任。即照陞任罰俸者。或被

降之官原任有事應行罰俸。不照所降之級。仍照原任追銀者。一陞一降。即為互異。請畫一法制。便於遵守。嗣後原任有事應罰俸者。陞任官員於新任罰俸。降調官員。如已補任者。照所降之級罰俸。其未補任之員。并裁缺給假。丁憂等官。免交該部追銀。於補官日罰俸。從之。○癸酉。陞吏部左侍郎杜篤祐為都察院左都御史。○甲戌。諭戶部。江南壽州衛自順治六年大水。衛軍死徙。田地荒蕪。減存月糧銀兩。無從徵收。著豁免。仍令漕臣設法招墾。○議政王等遵旨議覆滿洲大學士尚書左都御史俱係一品。侍郎學士副都御史。通政使。大理寺卿。俱係二品。漢大學士原係正五品。今為二品。尚書左都御史。俱係二品。侍郎學士副都御史。通政使。大理寺卿。俱係三品。滿洲郎中。係三品。員外郎。係四品。漢郎中。係正五品。員外郎。係從五品。今若將漢人官員品級與滿洲畫一。則在外陞調品級不

符。查順治十五年。曾將滿洲官員品級與漢人畫一。後康熙六年。將滿洲官員品級改為照舊。今應行畫一。將滿洲官員品級照順治十五年之例。其見在品級。仍准存留。以後補授之時。照此定例補授。從之。○乙亥。

萬壽節。

上率諸王貝勒貝子公內大臣大學士都統尚書精奇尼哈番侍衛等詣

太皇太后

皇太后宮行禮。御殿。王以下文武各官上表朝賀。照例筵宴。○遣官祭

福陵。

昭陵。

孝陵。○遣官祭真武東嶽城隍之神。○以故一等阿思哈尼哈番王國光子王永譽襲職。○丁丑。

上詣

太皇太后宮問安。○諭戶部兵部滿洲甲兵係

國家根本。雖天下平定。不可不加意愛養。近聞八旗甲兵牧養馬匹。整辦器械費用繁多。除月餉外。別無生理。不足養贍妻子家口。朕甚憫焉。月餉銀米應作何增給。永著為例。爾二部會同詳議以聞。尋部議甲兵每人月增銀一兩。歲增米二斛。從之。○己卯。諭吏部等衙門。時已入夏。雨澤愆期。皆由部院大小臣工。因循舊習。不能精白乃心。公廩盡職。以致政務失當。有干

天和。爾等堂官。宜力圖修省。靖共職業。嚴督所屬司官。凡事秉公勤勵。革除積弊。毋得瞻徇情面。仍稽察胥吏作奸。事有宜結者。速為完結。勿借端屢駁。圖遂己私。其問刑等衙門。一切訟獄。務期平允。得情。速審速結。勿得株累無辜。久淹羈禁。爾等大小各官。當實心修省。毋視為具文。怠玩如故。有負朕委任責成之意。○諭禮部。自閏二月以來。天氣亢陽。雨澤稀少。農務方殷。殊切朕懷。著遣爾部堂官。同

順天府各官。竭誠祈禱。其應禁屠宰。俱照例行。○庚辰。陝西巡撫白清額。以病乞休。慰留之。○癸未。

上詣

太皇太后

皇太后宮問安。○甲申。轉吏部右侍郎蔡毓榮為左侍郎。戶部左侍郎艾元徵為吏部右侍郎。○宴衍聖公孔毓圻等於禮部。○丙戌。轉戶部右侍郎嚴正矩為左侍郎。陞內國史院

學士田逢吉為戶部右侍郎。○以故三等精奇尼哈番隆我子阿喇納襲職。○陞王府長史德業立為正紅旗滿洲副都統。○理藩院遵旨議覆。凡奉旨特遣及本院差往蒙古各旗。徧傳事務。或巡察斥埃。送詔等事。自內地馳驛外。仍給信牌。許乘邊外驛馬。其餘惟遣往扎賴特。杜爾伯特。郭爾羅斯。席北。索倫。打虎兒。寧古塔。卦爾察等處者。給本院印文。照內地所乘驛馬數。乘邊外驛馬。遣往科爾沁。

烏朱穆秦蒿齊忒吳喇忒鄂爾多斯等處者
冬春給院文。乘邊外驛馬。夏秋乘本身馬。遣
往喀喇沁。土默特。教漢柰曼。翁牛特。巴林。扎
魯特。克西克騰。蘇尼特。阿祿科爾沁。喀爾喀
阿霸垓。阿霸哈納。四子部落。毛明安。歸化城
盛京。西勒圖。庫倫等處者。槩令乘本身馬。其
達賴喇嘛。鄂齊爾汗之使。給驛至西寧。遣往
喀爾喀。厄魯特之使。自歸化城。給與馬駝。從
之

實錄卷三十三

三十四

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之三十二

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之三十三

監修總裁官光祿大夫太保領太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙九年庚戌夏四月丁亥朔享

實錄卷三十三

太廟

上親詣行禮○復設江南分守蘇松常道分巡
鳳廬道分巡徽寧道三缺改淮海道為淮揚
道○復設福建分守興泉道分巡延建邵道
二缺其福州府福寧州海防事歸驛鹽道無
管興泉二府海防事歸興泉道兼管○陞叅
領朱萬年為貴州威寧總兵官○戶部議覆
四川巡撫張德地疏言四川州縣無存留錢
糧若銀錢兼徵則起解脚費累民請停止鼓

鑄應如所請。從之。○戊子。

上詣

太皇太后

皇太后宮問安。○己丑。命吏部左侍郎管右侍

郎事蔡毓榮。為四川湖廣總督。駐劄荊州府。

○兵部遵旨議覆。嗣後各州縣驛遞額設馬

匹。俱印烙各州縣字樣。該道不時巡歷查點。

如有馬匹缺少。或以瘦弱老病充數應付。及

違悞緊要事務。侵欺錢糧情弊。據實揭報。該

實錄卷三十三

三

撫題叅。從重議處。如驛道有扣剋情弊。該州

縣徑報臣部。并督撫查叅。如仍前積弊相沿。

該督撫不行題叅。臣部查出。將督撫一并題

叅。分別從重議處。得旨驛站情弊。如該督撫

不行詳察。或被科道官指叅。或旁人告發。將

該管地方官。一并從重議處。○辛卯。以故績

順公沈永興兄子沈瑞襲爵。○湖廣道御史

李之芳疏言。

皇上因雨澤愆期。特諭大小臣工。力圖修省。臣

查吏部考功事例。有不可不除者。外官叅罰

處分降級革職條例甚多。即罰俸一項。常有

莅官一二載。罰俸至五六年。有至十餘年者。

雖廉能之官。一遇小節細故。即不能久安其

位。亦屬可惜。況則例紛紜。胥吏欲輕則有輕

條。欲重則有重款。事同法異。總緣多立名色。

便於高下其手。乞敕部院大臣。將該部見行

事例。徹底釐定。務使永遠可行。疏入。下吏部

議。尋吏部覆請。委滿漢司官。將見行事例釐

實錄卷三十三

三

定畫。進呈

御覽。欽定遵行。從之。○壬辰。

上詣

太皇太后宮問安。○山東巡撫劉芳燭。丁母憂。

命回籍守制。○兵部題。近見總督提鎮。每遇

標員缺出。不分地方緩急。不論銜缺相當。輒

將標員坐名題補。其中恐有情弊。且使歷俸

年久。及在部候補之人。益多壅滯。請敕下該

督提鎮。嗣後副將以下。守備以上。如遇缺出。

實係近海沿邊巖疆果屬人地相宜酌量題補外其餘員缺不得槩行題補從之○乙未陞內秘書院侍讀學士熊賜履為內國史院學士○吏部題順天府所屬州縣原係府尹管理今直隸錢穀刑名分隸守巡二道應將順天府所屬州縣錢穀歸守道管理刑名歸巡道管理從之○吏部議覆浙江巡撫范承謨疏言仁和縣知縣丁世淳以繼母劉氏年老呈請終養查定例載父母年七十以上者終養並無終養繼母之例應無庸議得旨既有終養之例豈可分別生母繼母丁世淳准終養○理藩院題請差往科爾沁烏朱穆秦等四十九旗會盟大臣得旨著尚書喀蘭圖侍郎阿穆瑚瑯前往○丁酉

上詣

太皇太后

皇太后宮問安○兵部都察院遵旨議覆京城內外豪惡糾黨盜劫時聞城內責令步軍總

尉步軍副尉步軍校城外責令五城御史司坊官巡捕營弁每日巡緝城外各巷口照城內設立柵欄定更後官員軍民等不許行走犯者照例懲治并著為令從之○己亥

上幸南苑行圍○癸卯

孝端文皇后忌辰遣官祭

昭陵○甲辰轉吏部右侍郎艾元徵為左侍郎

刑部左侍郎王清為吏部左侍郎管右侍郎

事○吏部議覆湖廣道御史徐旭齡疏言凡

降調官員百姓每每保留其中不無情弊請

行禁止應如所請嗣後凡民保留降調官員

者俱不准行仍交刑部治罪如被降之官果

係清廉良吏許該督撫題請若係不肖或科

道糾叅將題請留任之督撫照以劣為優例

處分從之○先是原任兵部侍郎介山於順

治十八年八月內差往廣東沿海立界移民

康熙二年四月輔臣等傳旨下部議處部議

以介山立界冊內止寫從海至村里數未有

從村至界里數。將介山侍郎并加級及拖沙喇哈番革去。至是介山疏奏處分冤枉。部覆毋庸議。得旨介山前議處太過。著再議。於是吏部議將介山復還拖沙喇哈番。仍削去加級。以原侍郎降一級用。從之。○乙巳。以都察院左副都御史鄂善為陝西巡撫。○陞甘肅巡撫劉斗為福建總督。○丙午。

上自南苑回宮。詣

太皇太后

皇太后宮問安。○丁未。命禮部同順天府祈雨。○戊申。雨。○和碩簡親王德塞薨。賜祭葬。立碑。謚曰慧。○以靖南王藩下故一等阿思哈尼哈番徐成功子徐鴻弼襲職。○辛亥。命工部通行直隸各省各官。凡齒豁悉為收瘞。○以土默特故都統席拉布子古睦德襲都統。○予故二等阿思哈尼哈番阿育璽祭葬如例。○添設江南清河宿遷及歸仁堤三處。同知各一員。主簿各一員。○壬子。

上詣

太皇太后宮問安。○戶部議覆貴州巡撫佟鳳彩疏言黔省府州縣衛所全書由單所載與百姓實徵數目不符。又田地名色甚多。所徵錢糧輕重不一。請詳細清查逐一更正。應如該撫所請。責令司府各官詳查改正。從之。○乙卯。以

孝康章皇后升祔

太廟。遣官告祭

天地。

太廟。

社稷。○諭吏部選拔庶常。原以作養人才。今科進士特加簡閱。取中李光地耿願魯陳璠李錄予王寬王掞黃斐孟亮揆陳夢雷趙文鰲高璜王維珍許孫荃祖文謨李阜朱典李振裕吳本立劉恒祥張鵬翮孔興紆德赫勒牛紐李玠博濟李夢庚沈獨立等。二十七員俱著改為庶吉士。教習滿書。○以原任雲南巡

撫表懋功。為山東巡撫。○戶部議覆貴州道御史萬泰疏言。淮揚等處。因歸仁堤決。田地被淹。災民流離。應敕該督撫。設法賑濟。若賑米不敷。確查鄰近州縣常平倉所積米穀酌量運赴淮揚。專委廉幹官員。實行賑濟。應如所請。從之。○陞蒙古叅領色楞為土默特副都統。

五月丙辰朔。

孝康章皇后升祔

太廟。

上具禮服。恭捧

孝康章皇后神牌。奉安於

世祖章皇帝神位之右。致祭。行禮畢。頒詔天下。

詔曰。朕維自古帝王。以孝治天下。莫不顯揚

母德。追宗配享。以為紹先啟後之本。朕纘承

丕緒。九載於茲。恭惟我

皇妣孝康慈和莊懿恭惠崇天育聖皇后。光贊

皇考成締造之豐功。誕育眇躬。啟昌隆之景運。

徽音遠播。厚德弘施。

廟祀未崇。朕懷罔極。是用上稽前典。下協輿情。祇告

天地。

宗廟。

社稷。於康熙九年五月初一日。率諸王。貝勒。文武羣臣。恭奉冊寶。加上

皇妣尊諡曰。

孝康慈和莊懿恭惠崇天育聖章皇后。升祔

太廟。鴻儀既舉。思赦宜弘。於戲。孝思維則。隆脩

饗於千秋。純嘏永膺。合歡心於萬國。布告中外。咸使聞知。○詔內恩款二十條。○丁巳。

上詣

太皇太后

皇太后宮。問安。○庚申。夏至。祭

地於

方澤。遣內大臣噶布喇行禮。○癸亥。以內弘文院學士。花善。為甘肅巡撫。○陞福建興泉道

慕天顏。為江蘇布政使司布政使。○諭禮部。博爾濟金氏。乃科爾沁水圖郡王額濟音之親叔額德台吉之子三等台吉阿郁錫之女。選進宮中待年。方欲冊封。今遽爾長逝。朕心深切軫悼。宜追封為妃。其封號及應行禮儀。爾部即察例議奏。尋允禮部議。追封為慧妃。○甲子。

上詣

太皇太后宮問安。○丙寅。陞大理寺卿岳諾惠。

為都察院左副都御史。○戊辰。遣官祭

關聖帝君。○轉刑部右侍郎張爾素為左侍

郎。陞都察院左副都御史馬紹曾為刑部右

侍郎。○以鑲白旗蒙古都統科岳爾圖為滿

洲都統。○己巳。

上詣

太皇太后

皇太后宮問安。○陞宗人府府丞高珩為都察院左副都御史。○癸酉。都察院遵旨察議。御

史季振宜題。叅吏部尚書黃機。以降級侍郎。

開列尚書一款。查黃機回奏疏內。並未申明。

乃稱自陳疏內。開載明白。故不重述。洵屬巧

飾。又叅黃機條奏降補官員疏內。止就所降

品級補授。並未區別官職大小。則知府降一

級。翻可補叅議。降二級。翻可補僉事一款。查

黃機原疏內。並無知府降調。不令其補叅議

僉事字樣。洵屬朦混。應將黃機解尚書任。仍

以降級侍郎致仕。又叅黃機辦事似啞似聾。

言語半吞半吐。其同事之尚書馬希納。侍郎

岳思泰等。並未申明。亦屬不合。將馬希納等。

各降一級。得旨黃機係大臣。回奏時。理應將

始末明白陳出。乃巧飾朦混具奏。殊為不合。

馬希納。岳思泰。勒德洪。蔡毓榮。杜篤祐。徇情

庇護。亦負委用之意。姑從寬恕。此一次。以後

著洗心滌慮。改易前非。竭誠勉勵。以盡職業。

該部知道。○甲戌。

上詣

太皇太后宮問安○乙亥。以原任廣東左路水

師總兵官張國勛。為京口右路水師總兵官

○丙子。禮部議覆。江南道御史張所志疏言。

會典一書。一代制度攸關。理應編輯。昭示中外。應如所請。令各部院衙門。將

太祖高皇帝

太宗文皇帝

世祖章皇帝時定例。及見行事宜。查明送內院纂修。頒行天下。永遠遵行。從之○己卯。皇子

承瑞薨○命內國史院學士折庫納。內秘書

院學士董國興。教習庶吉士○以故一等阿

思哈尼哈番郭爾親之子郭爾輝襲職○吏

部題推官已裁。庚戌科二甲三甲進士。俱應

以知縣用。從之○兵部題廣西將軍孫延齡

所屬綠旗兵馬。嗣後不必令督提查點。考選

軍政。亦不必會同註考語。該將軍自行照例

造冊題報。從之○湖廣道御史李之芳疏言

今年考選庶常。

皇上委內院閱卷。京師閑傳謂取中上卷二十

四名。係魏裔介使家人報信。聞者無從辨其真偽。幸我

皇上親加遴選。取中庶吉士二十七員。與所傳名數姓氏不同。於是人心悅服。獨是魏裔介

以密勿大臣。敢於漏消息而竊威福。此其心為何心。又魏裔介向因伊兄魏裔魯為山東

運使。遂將敕書漢文內私自增改。令知府屬其統轄。其後頒給兩淮運使敕書。即照此藁

謄寫。被巡鹽御史馬大士。以敕書清漢互異。

具疏發覺。然後查出底藁。係魏裔介親筆添

註。翻使同官代為受過。典籍含冤降級。又順

治十八年。魏裔介係候補之官。

皇上登極。恩詔三品以上京官。廕一子入監讀

書。其候補者。槩未准與官廕監生。及魏裔介

身為吏部尚書。獨將其子魏嘉入十八年詔

款。欺朦題廕。又伊弟魏裔訥。任江南淮安府

桃源縣知縣。因其邑荒殘。又兼河患。從無陞

任之官。乃指稱伊族叔魏梶祥。任江寧府同知。將伊弟借端迴避改補。又纂修

世祖章皇帝實錄。取各官編纂時。魏裔介與班布爾善。朋比相倚。各用私人。徑將素無才學。刑部主事杜鎮選取。伏乞

皇上即賜乾斷。嚴加處分。以為擅權害政之戒。

得旨。這所參事情。著魏裔介明白回奏。○庚辰。廣東提督楊遇明。引年乞休。允之。○壬午。湖廣巡撫林天擎疏報。竹山縣火災。得旨。竹

山縣新闢殘邑。復罹火災。兵民棲止無所。深

軫朕懷。其速行賑濟。務令均沾實惠。○癸未。

調陝西按察使陳秉直。為江南按察使。司按

察使。○甲申。陞太常寺卿楊永寧。為宗人府

府丞。○乙酉。加四川巡撫張德地。工部尚書

銜。以招民議叙也。

六月。丙戌朔。

上詣

太皇太后

皇太后宮問安。○陞護軍統領席卜臣。為鑲白

旗蒙古都統。○戊子。內秘書院大學士魏裔

介。遵旨回奏。臺臣李之芳。謂今年考選庶常。

係臣使人報信。臣與諸人。非親非故。所報何

人。李之芳。如有確據。即宜糾參。何得懸揣。謂

臣洩漏市恩耶。李之芳。又謂山東運使魏裔

魯。係臣之兄。敕書內。私自增改。同官代為受

過。典籍含冤降級。吏部察議此一案時。臣適

告假歸里。有何交結情面。而諸臣肯代臣受

過。李之芳。又謂臣順治十八年。係候補之官。

不應廕子。及身為吏部尚書。欺朦題廕。臣因

糾參劉正宗。摘發奸黨。審實復職。在順治十

七年冬月。十八年正月。

世祖章皇帝賓天。臣晝夜齋宿。與在籍候補者

不同。隨例送廕。吏部題疏。奉有俞旨。且臣送

廕。在順治十八年五月內。康熙二年五月內。

臣陞尚書。相隔甚遠。安得以滿漢堂司公議

具題奉旨。俞允之事。謂臣自行欺朦乎。李之

芳又謂臣弟魏裔訥任桃源知縣。因地方凋敝。指稱族叔魏樾祥任江寧府同知。借端迴避。臣祖魏純粹。係明季甲辰科進士。官至御史。臣祖母程氏生臣父兄弟七人。魏樾祥行居第七。迴避時。取有甘結。部覆在案。至迴避事例。俱從官職卑者迴避。部覆自有成例。與臣何涉。李之芳又謂選取纂修實錄官時。將素無才學杜鎮取用。查杜鎮任刑部主事。堂官令其纂修律例。部院考察。曾列一等。何謂無文名取用。且取入纂修各官。乃臣衙門會同吏部公議。公疏具題。豈有阿私耶。李之芳又謂臣與班布爾善。朋比相倚。臣在內院。凡班布爾善有商議。言無不盡。亦時有相爭之事。以鰲拜之勢。臣足跡不登其門。況班布爾善與臣同官。豈肯蹈朋比之事乎。臣遭逢世祖章皇帝知遇。拔置憲長。曾叅劉正宗。劉祚遠等。將伊從重處分。伊等黨類。切齒於臣久矣。李之芳係劉正宗同鄉。據其所叅。巧為構

誣。皆屬無據。臣恐報復之謀。得售。凡臣子非其黨類者。皆可借端傾害矣。至於臣識見庸下。負乘貽譏。既被人言。豈可覲顏復居綸扉之側。伏懇

乾斷。即賜處分。以為不職之戒。得旨。本內情節。著質對察議具奏。○己丑。陞雲南騰越副將田進學為直隸天津總兵官。○庚寅。

上詣

太皇太后宮問安。○辛卯。陞直隸紫荊關副將許占魁為陝西延綏總兵官。○壬辰。陞左通政馬朗武為內弘文院學士。○丙申。諭刑部。近覽章奏。罪犯監禁。踰限不行速審。以致斃獄者甚多。夫各犯自有應得之罪。未死於法。先死於獄。殊非慎刑之意。朕心深為不忍。爾部將逾限不結監斃幾人以上者。作何嚴加處分。詳議定例具奏。○丁酉。命和碩顯親王福壽之子丹臻襲封和碩顯親王。○陞大理寺少卿上官鉉為太常寺卿。○戊戌。陞鴻臚

寺卿額星格為大理寺卿○予故温州總兵官石國璽宣府總兵官劉永亨各祭葬如例○己亥以鑲白旗蒙古副都統額司泰為護軍統領○廣東巡撫劉秉權疏報康熙八年分墾復民田一萬七百一十五頃七十四畝安插男婦共九萬六千七百九十八名口內隨糧派丁計三萬六千三百四十二名口又墾復屯田三十一頃九十二畝安插男婦共五千三百六十一名口其應徵銀米俟三年後起科下部核議○庚子

上詣

太皇太后

皇太后宮問安○鄂爾多斯鎮國公扎穆素故遣官致祭○兵部題甘肅巡撫花善奉有著令管兵之旨應將甘肅寧夏西寧等處官兵令巡撫花善統轄又康熙八年九月內議政王等會議無總督省分若有軍需急務提督總兵官仍會同巡撫行至副將以下武職官

員若有貪酷殃民侵餉之款亦令巡撫題參今應將副將以下武職聽該撫節制仍會同總督提督行從之○壬寅以原任湖廣右布政使劉棟為江西布政使司布政使原任福建按察使安世鼎為江西按察使司按察使○乙巳陞工部郎中成格為陝西按察使司按察使○己酉諭刑部今年雖經頒詔將重犯赦免但時值暑熱天氣亢旱牢獄重犯內有可矜疑者亦未可知著圖海杜立德明珠折爾肯達都董國興熊賜履王光玉等前赴刑部會同將監內重犯確審酌議具奏○陞正黃旗副都統阿穆爾圖為奉天將軍○戶部題淮揚二府屬地方丈缺地畝先經江南江西總督麻勒吉題請蠲免臣部行令該督踏勘今據該督疏稱親身踏勘揚屬三州縣丈缺田地俱係坍沒淮屬三州縣丈缺地畝見被水淹俟水勢稍退尚可耕種應如所請將坍沒者永行蠲免水淹者本年停徵從之

○庚戌。

上詣

太皇太后宮問安○甲寅。陞護軍叅領覺羅夸代為鑲白旗蒙古副都統○西洋國王阿豐肅遣使瑪訥撒爾達聶等進貢。得旨。西洋國地居極遠。初次進貢。著從優賞賚○旌表節婦湖廣江夏縣劉國柱妻楊氏。苦節六十餘年。靖南王藩下曾養德妻張氏。文運亨妻吳氏。遲彥登妻張氏。廖廷鑑妻周氏。宋允昌妻余氏。苦志守節。烈婦凌自美妻鄭氏。夫亡自盡。俱給銀建坊如例

秋。七月。乙卯朔。享

太廟。

上親詣行禮○丙辰。

上詣

太皇太后

皇太后宮問安○陞叅領託岱為正黃旗滿洲副都統○丁巳。陞雲南援剿總兵官王輔臣。

為陝西提督○江南江西總督麻勒吉疏言。淮揚二府於五月終旬。淮黃暴漲。湖水泛溢。百姓田畝廬舍被淹。應亟行賑濟。但各屬積穀已為上年賑給之用。請暫郡正項錢糧。俟勸輸捐納補還正項。戶部議覆。以正項不便動支。應將鳳陽倉存貯及捐輸扣存各項銀米。交賢能官員散賑。如有不足。勸諭通省各官設法捐輸。得旨。淮揚百姓連被水災。深可憫念。著差部院庶能大臣一員作速前往踏勘。果係被災已甚。無以為生。即會同督撫。一面將正項錢糧動用賑濟。若係次災。即照部議將各項糧米賑濟。務使民沾實惠。以副朕軫災恤民至意○己未。刑部議覆。兵科給事中王曰溫疏言。各衛軍犯。遇赦後始到配所者。即察明釋放。嗣後應將軍犯。於程限內在途遇赦應免者。即行題請。毋得稽遲。違者將督撫及該管地方官。交部嚴加議處。從之○

庚申。

上詣

太皇太后宮問安○宗人府等衙門題前代舊制諸王薨逝將謚號載於封號之下。本朝見行例諸王薨逝給與謚號勒碑。不將封號刊勒。恐後世之人難曉。今臣等酌議薨逝諸王。未與謚號者應於封號下加謚號一字。已與謚號者仍加寫封號從之○予故少傅兼太子太傅工部尚書劉昌祭葬。謚勤僖○辛酉。復設江西驛鹽道分巡贛南道分巡饒九南道三缺○壬戌。復設太僕寺漢正卿一員。滿少卿一員。以兵部所掌大庫塲種馬塲歸本寺管理○丙寅。以

孝康章皇后升祔

奉先殿遣官告祭○戶科給事中姚文然條奏。一。各部互議之事。應各捐成見。以盡虛公。一。開復戴罪停陞諸項該撫報明完案。該部覆本。應即題明注銷。一。錢糧駁查既清。無事屢題屢覆。一。部內可結之案。即應一部徑結。疏

內可以通結之案。即應一疏通結。

上是其言。下部議行○予故鎮國將軍胡世布。祭葬立碑如例○丁卯。

孝康章皇后升祔

奉先殿。

上具禮服。恭捧

孝康章皇后神位奉安於

世祖章皇帝神位之右。致祭。行禮如常儀○己巳。中元節。遣官祭

永陵。

福陵。

昭陵。

孝陵○庚午。

上詣

太皇太后

皇太后宮問安○壬申。免江南丹徒。金壇。三縣。康熙七年分水災額賦有差○癸酉。予故兵部侍郎石圖祭葬如例○乙亥。戶部議覆浙

江福建總督劉兆麒疏言請展報災限期。查康熙七年會議夏災不過五月。秋災不過八月。地方官每慮愆期。匿災不報。應如所請。仍照順治十七年定例。夏災不出六月終旬。秋災不出九月終旬。從之。○予故陝西巡撫白清額祭葬。謚清獻。○丙子。故太子太保刑部尚書李化熙之母宋氏壽臻百歲。給銀建坊。○丁丑。以原任江西提督嚴自明。為廣東提督。○戊寅。

上詣

太皇太后宮。問安。○己卯。以杜爾伯特故固山貝子塞冷子諾爾布襲爵。○庚辰。以故二等精奇尼哈番沙里代從姪達爾查襲職。○壬午。湖廣巡撫林天擎。以病乞休。命以原官致仕。○甲申。免直隸博野等二十九州縣本年分水災額賦有差。○旌表節婦山東泰安州楊光廷妻房氏。濱州張宿龍妻龐氏。城武縣潘九鉉妻張氏。壽光縣李應明妻王氏。烈女。

海豐縣李格聘妻王氏。俱給銀建坊如例。八月乙酉朔。

上詣

太皇太后

皇太后宮。問安。○奉安

孝康章皇后神位於

孝陵。遣內大臣輔國將軍額奇致祭。以故二等阿思哈尼哈番阿育璽子達都襲職。○丁亥。遣大學士圖海祭

先師孔子。○免河南磁州安陽等九州縣本年分旱災額賦有差。○戊子。祭

大社。

大稷。

上親詣行禮。○諭都察院。國家朝儀。大體所在。貴於整齊嚴肅。不止係堂陛之觀瞻。亦以見臣心之敬肆。諸王大臣有踰越班行。交相接語。或輕佻嬉笑。禮不踰階而相與言。又況其甚乎。爾衙門監察御史侍班切近。見而不糾。

豈真目未之睹。皆緣畏事徇情。所以如此。都察院職任重大。朕躬有失。尚爾指陳。王及諸臣。乃不參奏。揆之事理。實所未協。今後有失儀者。毋得容隱。○陞右通政梁鏞為太僕寺卿。○免直隸贊皇元氏二縣本年分旱災額賦有差。○辛卯。以喀爾喀故和碩達爾漢親王奔塔爾楚虎爾子諾內襲爵。○壬辰。免江南泰州本年分水災額賦。○以正藍旗副都統一等伯釋迦保為漢軍都統。○癸巳。

太宗文皇帝忌辰。遣官祭。

昭陵。○免江南泗州臨淮等五州縣并鳳陽等三衛本年分水災額賦有差。○吏部。兵部。遵旨議覆官員殉難陣亡俱係歿於王事。優卹之例。文武應行畫一。從前已結之事。無庸議。此後文武官員或係殉難或係陣亡。俱應照例錄用子弟一人。給與加贈祭葬銀兩。從之。○甲午。秋分。夕月於西郊。

上親詣行禮。○予故歸化城都統托波克祭葬。謚果壯。○乙未。

太祖高皇帝忌辰。遣官祭。

福陵。○以內秘書院學士董國興為湖廣巡撫。○命改內三院為內閣。其大學士學士官銜及設立翰林院衙門等官。俱著察順治十五年例議奏。○禮部議覆戶科給事中張愛疏言。八旗佐領下穿孝有並非親族而服孝。並非特賜佐領及功臣之佐領。而令屬下人員服孝。與禮不符。且與別旗別佐領居住遠族弟兄服孝。不但執事之人有悞公務。且屬煩擾。應如所請。嚴行禁止。從之。○丙申。以恭謁孝陵。上詣太廟。行告祭禮。○丁酉。午刻。上奉太皇太后。皇太后啟行。

皇后隨行。是日駐蹕通州○戊戌。

上駐蹕烟郊○己亥。

上駐蹕夏店○庚子。

上駐蹕邦均○辛丑。

上駐蹕薊州○壬寅。

上駐蹕淋河○甲辰。

上駐蹕新城○免湖廣漢陽等六縣并沔陽衛。

本年分旱災額賦有差○乙巳。

駕至昌瑞山。

太皇太后。

皇太后。

皇后先行。

上率王以下侍衛叅領等官隨後行。進紅門。入

隆恩門。

上親扶

太皇太后輦。至明樓臺階前降輦。

皇太后。

皇后俱隨行。至祭臺前。舉哀。行禮畢。還行宮○

遣官祭

歷代帝王○遣官祭城隍之神○丙午。

上詣

隆恩殿大祭。祝文曰。孝子嗣皇帝玄燁敢昭告於

世祖體天隆運英睿欽文大德弘功至仁純孝章皇帝。

孝康慈和莊懿恭惠崇天育聖章皇后。

孝獻莊和至德宣仁溫惠端敬皇后尊靈曰。仰

惟

皇考功兼創守。德並乾坤。肇一統之弘模。開萬年之景運。升遐以來。忽已十載。

山陵在望。未獲展祭。臣懷罔極。悽愴彌深。今遵

慈命。躬侍

太皇太后。

皇太后。率諸王貝勒文武羣臣敬謁

隆恩殿。虔將祀事。用展孝思。伏祈

聖靈歆鑒。俯納微忱。尚

饗禮畢。還行宮○丁未。

上詣

寶城致祭。祝文曰。孝子嗣皇帝玄燁。敢昭告於世祖體天隆運英睿欽文大德弘功至仁純孝章皇帝。

孝康慈和莊懿恭惠崇天育聖章皇后。

孝獻莊和至德宣仁溫惠端敬皇后尊靈曰。惟皇考龍馭升遐。忽已十載。瞻望

山陵未獲躬親展祭。悽愴之懷。時切於中。恭奉

太皇太后。

皇太后率諸王貝勒文武羣臣於八月二十二

日敬詣

隆恩殿致祭。今復恭祀於

寶城。恪將牲帛。用展孝思。伏祈

聖靈俯垂歆鑒。尚

饗。禮畢。還行宮○賞賚守

陵官員兵役有差○是日駐蹕淋河○戊申。

上駐蹕薊州○己酉。

上駐蹕邦均○庚戌。

上駐蹕夏店○吏部議覆廣東巡撫劉秉權疏言廣東驛傳請歸并鹽法。改為鹽驛道。即以驛傳道改為廣肇道。轄廣肇南韶四府。從之。○予故鎮國公高色祭葬立碑如例。謚慈厚。○兵部議覆貴州巡撫佟鳳彩疏言貴州有紅黑二苗傍居險要。時出剽掠。乃亘古不服王化之逆種也。仰賴

皇上恩威遠播。今那磨等共三十六寨苗人。傾

心嚮化。呈送戶口糧冊。應行該督撫加意撫

綏務令得所從之○辛亥。

上駐蹕通州○以故一等精奇尼哈番祖良棟

弟祖良璧襲職○喀爾喀戴青台吉遣使進

九白年貢。宴賚如例○免直隸元城清豐南

樂三縣丁丁缺額徭銀○壬子。

駕還京師。

太皇太后。

皇太后。

皇后俱回宮○

上詣

太廟告祭畢回宮詣

太皇太后

皇太后宮問安○甲寅以謁

陵禮成

上御太和殿王以下文武各官上表行慶賀禮

○免江南睢寧縣本年分水災額賦有差

聖祖實錄卷三十三

三十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十四

監修總裁官光祿大夫太保兼太子太傅保和殿大學士兼戶部尚書二等伯加四

級馬齊光祿大夫經筵日講官起居注少保兼太子太保保和殿大學士仍兼

御史都戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙九年庚戌九月乙卯朔

聖祖實錄卷三十四

一

上詣

太皇太后

皇太后宮問安○戶部議覆吏科給事中莽佳

疏言遇災蠲免田賦惟田主沾恩而租種之

民納租如故殊為可憫請嗣後徵租者照蠲

免分數亦免田戶之租則率土沾恩矣應如

所請從之○丙辰諭禮部

太祖高皇帝創建鴻圖肇興景運

太宗文皇帝丕基式廓大業克弘迨

世祖章皇帝誕昭功德。統一寰區。即欲躬詣

太祖

太宗山陵。以天下一統致告。用展孝思。因盜賊

未靖。師旅繁興。暫停往謁。朕以眇躬。繼承鴻

緒。上託

祖宗隆庥。天下底定。盜賊戢寧。兵戈偃息。每念

皇考未竟之志。朝夕寢食不遑寧處。本欲先詣

太祖

太宗山陵。再詣

實錄卷三十四

世祖山陵。因奉

太皇太后慈命。以

世祖升遐十年。未得一詣

陵寢。於本年八月前。往。朕是以恭侍

太皇太后。先詣

孝陵展謁。禮成言旋。今欲仰體

皇考前志。躬詣

太祖

太宗山陵。以告成功。展朕孝思。著議政王。貝勒。

大臣。內院九卿。科道掌印。不掌印。各官會議

具奏。○喀爾喀車臣汗遣使進九白年貢。宴

賚如例。○以蘇尼特故多羅杜楞郡王褚魯

木子公額襲爵。○工部議覆河道總督羅多

疏。言修河工程。額用協夫三萬四千八百餘

名。請於江南山東兩省僉派協濟。查僉派夫

役。恐道遠民艱。又官吏借端滋擾。不便准行。

其協濟夫役。應行召募。查舊發工役銀每日

四分。今加給二分。則工程不致違誤。得旨。河

實錄卷三十七

工關係重大。時近冬寒。勢不容緩。倘臨期應

募無人。復行僉派。必致遲誤。著該督先行竭

力召募。儘所得人。夫供役。如萬不能得。就近

量行僉派。協濟。仍一面作速題明。該管官員。

務須加意撫恤。不得借端科擾。困累小民。餘

依議。○丁巳。陞貴州鎮遠副將石玉貴為浙

江寧海總兵官。○戊午。諭禮部。天文關係重

大。必選擇得人。令其專心學習。方能通曉精

微。可選取官學生。令其與漢天文生。一同學

習有精通者俟欽天監員缺考試補用。尋禮部議於官學內每旗選取十名交欽天監分科學習。有精通者俟滿漢博士缺出補用。從之。○己未。先是吏部疏言。臣部處分官員條例間有事跡相同輕重不一者。請將順治十八年後題准之例彙集。恭酌務令畫一簡明。以昭法守。奉有俞允之旨。至是遵旨更定例。欵頒行天下。○庚申。

上詣

太皇太后宮問安。○議政王大臣等遵旨議奏。

皇上仰體

世祖章皇帝前志。欲躬謁

太祖

太宗山陵。以告成功。用展孝思。允合孝道。但今歲北地苦旱。南方患水。魚之黃運。二河大興工役。今

皇上已於八月內躬詣

孝陵。今復往謁

二陵。路途遙遠。凡一切應用之物預備難及。請暫停今歲恭謁。得旨。謁

陵典禮關係重大。今年暫行停止。其舉行日期著候旨行。○和碩簡慧親王德塞無嗣。以其弟喇布襲封和碩簡親王。○甲子。免直隸行唐縣本年分電災額賦十之一。保定縣本年分水災額賦十之三。○丁卯。以三等伯佟國瑤為正藍旗漢軍副都統。○戊辰。

上詣

太皇太后

皇太后宮問安。○授故鎮國將軍祐世布子滿達為三等奉國將軍。○以故二等阿思哈尼哈番費揚武子色黑襲職。○命東閣學士陳鼐永為武會試正考官。侍講學士李仙根為副考官。○陞雲南按察使張彥珩為湖廣布政使司布政使。○庚午。太子太保內國史院大學士杜立德。刑部尚書馮溥俱以老疾乞休。溫旨慰留之。○戶部議覆浙江巡撫范承

謨等疏言嘉湖二府水災本年漕糧二十二萬四千餘石請每石折銀一兩徵解糧既停運則耗潤米八萬九千六百餘石幫貼銀十萬五千餘兩俱可免徵應如所請從之○辛未內大臣內秘書院大學士巴泰以老乞休溫旨慰留之○壬申設雲南永昌守道缺○予故奉天將軍吳瑪護祭葬如例○甲戌

上詣

太皇太后宮問安○喀爾喀土謝圖汗遣使進

九白年貢宴賚如例○乙亥諭吏部兵部朕惟致治雍熙在於大小臣工悉尚廉潔使民生得遂內外滿漢文武官員各有職守必律已潔清屏絕餽受乃能恪恭職業副朕任使近聞在外文武官尚有因循陋習借名令節生辰剝削兵民餽送督撫提鎮司道等官督撫提鎮司道等官復苛索屬員餽送在京部院大臣科道等官在京官員亦交相餽遺前屢經嚴禁未見悛改殊違潔已奉公之義兵

民日漸困乏職此之由以後著痛加省改斷絕餽受以盡厥職如仍蹈前轍事發之日授受之人一併從重治罪必不姑貸○丁丑除陝西雒南縣水衝地二百餘頃額賦○戊寅

上詣

太皇太后

皇太后宮問安○辛巳

孝慈高皇后忌辰遣官祭

福陵○壬午命內國史院學士張鳳儀教習庶

吉士○癸未免山東濰縣本年分電災額賦

○喀爾喀丹津喇嘛遣使進九白年貢宴賚

如例○旌表節婦廣西臨桂縣唐之忍妻陽

氏烈婦山東膠州韓士楷妻張氏各給銀建

坊如例

冬十月乙酉朔享

太廟

上親詣行禮○遣官祭

永陵

福陵。

昭陵。

孝陵○頒康熙十年時憲曆○賜喀爾喀索諾穆貝勒下窮苦人丁馬牛羊有差○丙戌。

上詣

太皇太后宮問安○免山東陽信等八縣本年分旱災額賦有差○先是。

上遣和碩額駙吳應熊往雲南省視伊父吳三桂。至是吳三桂奏報八月二十六日仍遣吳

應熊自滇赴京下部知之○丁亥。

皇太后聖壽節。

上率王以下文武大臣侍衛等詣

皇太后宮行禮遵

懿旨停止筵宴○浙江福建總督劉兆麒疏報。

偽寧遠將軍林伯馨偽都督施驤率偽官一百四十四員兵一千六百九十名船三十隻。

自臺灣赴浙投誠下部議叙○戊子。免山東齊東等七州縣本年分旱災額賦有差○已

丑。策試天下武舉於

太和殿前○庚寅。以原任左宗正宗室杜蘭為宗人府右宗正○予故少保魚太子太保內國史院大學士蔣赫德祭葬謚文端○辛卯。

上御太和殿傳臚賜殿試武舉張英奇等二百人。武進士及第出身有差○免山東濟陽等十四州縣本年分旱災額賦有差○壬辰。

上詣

太皇太后宮問安○吏部題舊例雙月補授各項官員俱按二八分分缺一月出五缺用大選之人四員推陞之人一員不及五缺俱歸大選以致推陞之官日漸壅滯嗣後請將上下月缺彙算大選之人補授四員之後即將推陞之人補授一員不必拘定一月內算缺則推陞官壅滯可疏通矣從之○吏部又題見行事例凡官員陞轉論考滿功次不論俸滿嗣後即陞官員俱照考滿功次年月先後

補授。若同日奉旨。仍就內較俸深者補授。從之。○大西洋國正貢使瑪訥撒爾達聶道經山陽縣病故。命江南布政使致祭。○旌表節婦。湖廣黃陂縣劉氏。平南王藩下施承恩妻。周氏。劉可陞妻呂氏。孟從見妻錢氏。鄧志先妻華氏。張士金妻賴氏。俱給銀建坊如例。○癸巳。諭禮部。朕維至治之世。不以法令為亟。而以教化為先。其時人心醇良。風俗樸厚。刑措不用。比屋可封。長治久安。茂登上理。蓋法令禁於一時。而教化維於可久。若徒恃法令。而教化不先是。舍本而務末也。近見風俗日敝。人心不古。囂凌成習。僭濫多端。狙詐之術。日工。獄訟之興。靡已。或豪富凌轢孤寒。或劣紳武斷鄉曲。或惡衿出入衙署。或蠹棍詐害善良。荏苒之劫掠時聞。讐忿之殺傷疊見。陷罹法網。刑所必加。誅之則無知可憫。宥之則憲典難寬。念茲刑辟之日繁。良由化導之未善。朕今欲法古帝王尚德緩刑。化民成俗。舉

凡敦孝弟以重人倫。篤宗族以昭雍睦。和鄉黨以息爭訟。重農桑以足衣食。尚節儉以惜財用。隆學校以端士習。黜異端以崇正學。講法律以儆愚頑。明禮讓以厚風俗。務本業以定民志。訓子弟以禁非為。息誣告以全良善。誠窩逃以免株連。完錢糧以省催科。聯保甲以弭盜賊。解讐忿以重身命。以上諸條。作何訓迪勸導。及作何責成。內外文武該管各官。督率舉行。爾部詳察典制。定議以聞。○以原任河南按察使許纘曾為雲南按察使。司按察使。○甲午。諭戶部。淮揚所屬地方。歲比不登。屢屢朕懷。今年又遭水災。黃淮交漲。隄岸衝決。百姓室廬多被淹沒。夏麥未獲。登場。秋禾播種。水潦難施。民生失所。特差部臣速行踏勘。准動正項錢糧存積銀米。將饑民賑濟。但被災之民。既無耕獲。何以輸糧。如再加催科。愈不堪命。今年淮揚所屬被災地方。應徵錢糧。共該若干。爾部速行酌議蠲免。以副朕

恤災愛民至意○改內三院大學士學士銜。以圖海。巴泰為中和殿大學士。兼吏部尚書。索額圖。李蔚為保和殿大學士。兼戶部尚書。杜立德為保和殿大學士。兼禮部尚書。對喀納為文華殿大學士。管刑部尚書事。折爾肯哈占為中和殿學士。塞黑達都為保和殿學士。馬朗古。張鳳儀為文華殿學士。靳輔為武英殿學士。田種玉為文淵閣學士。陳鼐永為東閣學士。折庫納。熊賜履為翰林院掌院學士。俱兼禮部侍郎○乙未。

上詣

太皇太后

皇太后宮問安○丁酉。諭禮部帝王圖治。必稽古典學。以資啟沃之益。經筵日講。允屬大典。宜即舉行。爾部詳察典例。擇吉具儀奏聞○戊戌。陞叅領王永清為貴州黔西總兵官○以故一等精奇尼哈番綽克託族孫錫喇布襲職○雲南永北總兵官陳德。以病乞休。允

之○辛丑。

上幸南苑行圍○甲辰。戶部議覆山東巡撫袁懋功疏言。曹縣牛市屯決口。衝沒金鄉魚臺。單縣城武。曹縣臨清衛。村莊房屋田土。非尋常水旱災荒可比。請破格蠲恤。查定例。被災九分十分者。全蠲本年額賦。被災七分八分者。於應蠲外。加免二分。并令該撫發常平倉穀賑濟。從之○己酉。

上自南苑回宮○癸丑。寧古塔副都統胡巴克泰。巴圖魯。以老乞休。命以原品致仕十一月。甲寅朔。

上詣

太皇太后

皇太后宮問安○丙辰。禮部遵旨議覆。經筵應照順治十四年例。每年春秋二次舉行。擇於明年二月十七日午時開講。前期

皇上親祭奉先殿。及

先師孔子。講官聽內閣酌定員數題用。經書講章。應令講官撰送。內閣酌量改定。預期恭進。

御覽禮儀筵宴俱照舊例。其日講日期擇於本年十一月二十一日巳時開講。日講官亦俟內閣酌定題用。得旨。經筵日講舉行日期。知道。已。經設立翰林院。其日講官及應行事宜著翰林院酌定具奏。○丁巳。陞雲南左鎮中軍副將王景為雲南援剿右鎮總兵官。○

喀爾喀鎮國公根敦代青故遣官致祭。○吏部議覆左都御史杜篤祐疏言。降級革職人員於吏部具呈辨復者。不一而足。是以內外離任各員。不論有冤無冤。紛紛控訴。殊非重名器清銓法之意。應如所請。凡降革人員。在臣部具呈辨復者。一概停止。如果有冤抑。許仍赴通政使司。登聞鼓衙門。控告。核明具題。從之。○戊午。戶部議覆江寧巡撫馬祐疏報太倉等十二州縣水災。應令該撫委員嚴查。

據實另造分數冊題報。以憑再議。得旨。今年江南水災甚大。比往年不同。該撫身在地方。既稱松蘇等屬低窪地方。見今淹沒。爾部復議行查。恐致遲延。災民受困。著將馬祐所奏。再行詳議。以聞。○己未。戶部題嗣後總督巡撫。自一品二品官推授者。仍照原品支俸。自三品以下官推授者。俱支三品俸。永著為例。從之。○庚申。

上詣

太皇太后宮問安。○授臺灣投誠偽官林伯馨。施轉為左都督。陳雄黃麟蔡龍為都督同知。林居王國忠陳秋陳培王祖郭俊為都督僉事。餘授職賞賚有差。○工部題康熙二年奉。上諭。一品二品官曾經賜謚者。除造墳外。仍與立碑。其三品官加級至二品者。禮部原未定有立碑之例。今陝西巡撫白清額既奉旨賜謚。應照二品官立碑。嗣後官員凡經賜謚者。即照此例行。從之。○癸亥。冬至。祀。

天於

圜丘。

上親詣行禮○遣官祭

永陵。

福陵。

昭陵。

孝陵○甲子。

上率王以下文武大臣侍衛等詣

太皇太后

皇太后宮行冬至慶賀禮。御殿王以下文武各

官上表朝賀○丙寅。禮部議覆順天府府丞

高爾位疏言鄉飲酒禮一節。臣府每歲舉行

兩次。照例將漢人中年高有德者選擇敦請。

臣思八旗下滿洲蒙古漢軍其中豈無年高

有德堪為賓介者。似宜滿漢一體舉行。以昭

獎勸。應如所請。從之○丁卯。

上詣

太皇太后宮問安○工部議覆刑科給事中張

惟赤疏言河工協濟人夫皆經該地方津貼而來。江南各府方被水旱之災。正項尚且議蠲。額外豈堪重累。前部臣主募夫之議。原定每名給工食銀六分。今河臣雖改用派夫。豈有募則給工食而派遂不給工食之理。所宜一體議給。應將原派地方按月津貼之銀。行令停止。查兩河工程所給夫役工食。先經總河題明。日給四分。今協濟之夫。予役遠方。應照前會題募夫工食之例。每日給銀六分。至於津貼之費。責令地方官曉諭停止。從之○庚午。免湖南瀏陽等十一州縣衛常二衛本年分旱災額賦有差○辛未。刑部等衙門遵旨議定。限內禁斃處分例。凡承問案件各官將正犯俱審取口供。後限內監斃者。免其議處。雖在限內。並不審理。取供遲延一案之內。監斃一二人者。罰俸六個月。三四人者。罰俸一年。五六人者。降一級留任。七八人者。降二級調用。九人以上者。革職。將牽連及無干之

人。監斃一二人者。罰俸一年。三人者。降一級留任。四人者。降二級調用。五人者。革職。若上司不據實題奏者。降二級調用。至於逾限。雖取錄口供。不行審結。將正犯監斃者。照限內不取口供致死者例處分。將牽連及無干之人。監斃一人者。降一級調用。二人者。降二級調用。三人以上者。革職。上司不據實題奏者。降二級調用。若限內不能完結。再行展限。仍照限內監斃例處分。如在展限外死者。亦仍照逾限例處分。從之。○壬申。

上詔

太皇太后

皇太后宮問安。○予故原任廣東左翼總兵官左都督許爾顯。原任廣東右翼總兵官右都督吳進功。各祭葬如例。○癸酉。陞吏部左侍郎艾元徵。為都察院左都御史。○免直隸開州。元城等二十五州縣。山東商河等五縣及青州左衛。河南胙城。汲縣。本年分旱災額賦。

有差。○吏部都察院。遵旨會勘御史李之芳。叅劾大學士魏裔介一疏。一。魏裔介兄魏裔魯。任山東運使。敕書內增寫府字。雖係大學士李蔚衛周祚看稿。魏裔介並未舉正其誤。欲令伊兄將知府統轄。顯有隱蔽之迹。一。魏裔介於順治十八年四月。再補左都御史。本年正月恩廕。需次各員。例不獲與。至康熙三年。魏裔介身為吏部尚書。將伊子魏嘉援前詔准廕。故違令典。一。魏裔介叔魏樾祥。任江寧府同知。弟魏裔訥。任淮安府桃源縣知縣。本非屬員。錢穀刑名畧無關涉。特以桃邑荒殘。巧圖迴避。當該撫具題之日。魏裔介方為吏部。不行駁正。私覬伊弟獲改美任。三事皆實。理應議處。緣在康熙九年五月初六日。赦前。勿論。第魏裔介奉旨回奏。不據實引咎。乃稱已曾劾過大學士劉正宗。李之芳與劉正宗同鄉。挾仇誣搆。又伊子請廕。在魏裔介為吏部尚書時。始行具題。乃隱諱不言。而以都

御史任內送廕為解。殊非大臣之體。應削去所加之級。罰俸一年。魏裔魯敕書送部銷毀。改給。魏嘉削去廕生。魏裔訥不許迴避。仍候桃源缺出補用。至考選廕吉士及舉刑部主事杜鎮纂修實錄二事。魏裔介並無市恩徇情之處。李之芳所言涉虛。亦應處分。但疏內三事既實。例得免議。得旨。魏裔介免其削級罰俸。嗣後益宜勤慎供職。以副朕寬宥之意。餘如議行。○甲戌。以淮揚數被水災。特命高郵寶應等十五州縣。應徵康熙九年并帶徵七八年漕糧漕項。概行蠲免。○乙亥。定理藩院郎中。與六部滿郎中一體陞轉。○添設光祿寺滿署丞三員。筆帖式四員。○刑部題直隸各省審理人犯。援赦具題。內有擬罪舛錯者。臣部將犯人之罪改正。仍援赦豁免。而承問各官舛錯在赦後者。仍交該部議處。似屬太過。此等不過一時錯誤。並非有心擅為重輕。嗣後凡正犯已經援赦免罪者。其承問舛

錯各官應免其交部議處從之。○丙子。裁江南西新關戶部差歸并龍江關工部管理。蕪湖關工部差歸并本關戶部管理。○安徽巡撫張朝珍。以病乞休。慰留之。○丁丑。免山東濟寧州本年分水災額賦十之三。○己卯。禮部題。

皇上弘敷教化特頒

聖諭十六條。以示尚德緩刑。化民成俗。至意應通行曉諭八旗。并直隸各省府州縣鄉村人等。切實遵行。從之。○庚辰。陞叅領薊齊為寧古塔副都統。○辛巳。

上詣

太皇太后宮問安。○轉吏部右侍郎王清為左侍郎。禮部右侍郎曹申吉為吏部右侍郎。○禮部題。據國子監呈稱。

世祖章皇帝時。八旗官學生。不論文武官員子弟。每佐領下。選擇二名。移送國子監教習。後順治十八年。奉有文官子弟。不許送官學生。

之旨。但官學生俱係部院衙門錄用關係緊要。且今奉

上諭文武廕監仍以部院衙門錄用。以後相應仍遵

世祖章皇帝時例。不論文武官員子弟。令本佐領將可學之人。移送本監教習。應如所請。從之。○壬午。改內秘書院大學士魏裔介為保和殿大學士兼禮部尚書。○吏部尚書馬希納。以病乞休。得旨准其解任調理病痊起用。

○癸未。免江南太倉婁縣。無錫等十二州縣。本年分水災額賦有差。

十二月甲申朔。

上詣

太皇太后

皇太后宮問安。○浙江巡撫范承謨疏言。前奉恩詔。以寧波府前明翰林院編修葛世振。舉山林隱逸。奉有赴京錄用之旨。今本官呈稱。抱病不能起程。請俟葛世振病痊之日赴京。得

旨該撫既稱葛世振品行端重才學優贍。仍著力疾前來。以副朕求賢任用之意。○乙酉。

命文華殿大學士管刑部尚書事對喀納管吏部尚書事。○戊子。設翰林院滿漢侍讀學士各三員。侍講學士各三員。侍讀各三員。侍講各三員。典簿孔目各一員。待詔各二員。習滿字筆帖式十六員。習漢字筆帖式十六員。○江西巡撫董衛國。以病乞休。慰留之。○陞叅領翁愛為西安副都統。○己丑。陞文淵閣學士田種玉為禮部右侍郎。○庚寅。

上詣

太皇太后宮問安。○丙申。封故鎮國公高色子

牛鈕為輔國公。○戊戌。免江南高郵寶應等

十二州縣。本年分水災額賦有差。○以科

爾沁故多羅貝勒綽爾濟子鄂緝爾襲爵。○

己亥。

上詣

太皇太后

皇太后宮問安○庚子。

皇后千秋節。照例行禮。停止筵宴○辛丑。戶部議覆。甘肅巡撫花善疏言。寧州地處邊鄙。土田瘠薄。而科賦獨重。近因歲歉。民逃地荒。請將本州錢糧。照真寧縣一例徵收。其逃荒地。丁悉與豁免。應如所請。從之○癸卯。陞山西陝西總督莫洛為刑部尚書○丁未。順天府進春○免浙江烏程等五縣本年分水災額賦有差○以鄂爾多斯故鎮國公札穆素子索諾穆襲爵○旌表節婦。浙江仁和縣卓人月妻丁氏。錢塘縣汪知元妻王氏。孫學敏妻楊氏。楊士毅妻王氏。王之輔妻邵氏。富陽縣章希義妻楊氏。長興縣徐聖妻莫氏。山陰縣駱元裕妻俞氏。俞一和妻馮氏。蕭山縣周萬紀妻童氏。何之楠妻黃氏。臨海縣馮元鼎妻陳氏。馮繼祖妻戴氏。各給銀建坊如例○戊申。

上詣

太皇太后

皇太后宮問安○諭大學士等。朕近日披覽章疏。於科道官條奏。有合於事理。裨益政治者。虛懷聽納。不憚見之施行。其所言無益。不可行者。非剿襲陳言。則浮泛塞責。爾諸臣寧有不知。今後有言關政理。切實可行者。照常票擬。朕親加裁奪。其或不可行者。若悉下部議。既屬無益。徒令章奏繁多。反致應行事務稽遲。爾等可詳酌事理。以不准行擬。旨朕仍審擇而執其中。古之聖帝賢王。雖邇言是察。亦無稽勿聽。用言致治之道。蓋當如此○庚戌。以二等精奇尼哈番許弘德為平南王藩下右翼總兵官○予故三等阿思哈尼哈番額克錫納祭葬如例○辛亥。歲暮。祫祭

太廟。

上親詣行禮○遣官祭

永陵。

福陵。

昭陵。

孝陵○遣官祭太歲之神○旌表八旗節婦滿洲敦多輝妻布氏等二十四人。漢軍祖文弼妻劉氏等三人。烈婦滿洲法古妻胡氏等四人。各給銀建坊如例○是歲人丁戶口一千九百三十九萬六千四百五十三。田地山蕩畦地五百四十五萬五千五十六頃八十一畝有奇。徵銀二千五百八十九萬七千九十二兩有奇。米豆麥六百二十一萬一千三百四十石五斗有奇。草二百三十萬五千六百五十五束。茶十六萬八千五十引。行鹽四百四十二萬五千三百六十一引。徵課銀二百七十八萬三千四百八兩有奇。鑄錢二萬九千五十四萬三千二百五十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十四

實錄卷三十四

四六九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔚廷錫

總裁官光祿大夫文華殿大學士兼吏部尚書臣朱軾等奉

敕修

康熙十年辛亥春正月癸丑朔

實錄卷三十五

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御殿王以下文武各官外藩王

及使臣等上表朝賀照例筵宴○朝鮮國王

李欄遣陪臣李柟等表賀冬至元旦

萬壽節及進歲貢禮物宴賚如例○乙卯

上詣

太皇太后

皇太后宮問安○戊午孟春享

太廟

上親詣行禮○遣官祭太歲之神○朝鮮國王

李欄遣陪臣李柟等表賀

孝康章皇后升祔

太廟表文曰加隆顯稱咸仰

尊親之典

實錄卷三十五

升祔明祀聿彰配

禰之儀情文罔愆遠邇胥悅欽惟

皇帝陛下仁深錫類誠切奉先

慈恩莫追違

孝養於天下縉禮斯舉形孝理於寰中宜見慶

福之畢臻亦令渙渥而普被伏念臣猥荷

皇眷忝守藩邦助祭周庭縱阻駿奔之列馳神

魏闕第申鰲忭之忱○己未

世祖章皇帝忌辰遣官祭

孝陵○辛酉。祈穀於

上帝。

上親詣行禮○賜朝正外藩王貝勒貝子公台

吉塔布囊等銀幣鞍馬有差○甲子。諭禮部。

朕仰體

世祖章皇帝遺志。欲躬詣

太祖

太宗山陵展祭以告成功。前命議政王貝勒大

臣等會議議政王等以去年各處多有水旱

災荒且為時甚迫。應用之物預備不及。具題

暫行停止。今思

太祖

太宗創業垂統。功德隆盛。

山陵在望。刻不能忘。去年恭謁

孝陵禮成。今已數月。若再久延。孝思莫殫。朕懷

靡寧。茲當海內無事。欲乘此躬謁

福陵。

昭陵。以告成功。用展孝思。事關大典。著議政王。

貝勒大臣內閣九卿科道各官會議具奏。爾
部即遵諭行○乙丑。

上詣

太皇太后宮問安○丙寅。貴州巡撫佟鳳彩疏

請回旗終養。允之○丁卯。以蘇尼特及四子

部落地方青草不生。又兼雪太。牛羊倒斃。殆

盡。差戶部理藩院官各一員。動支宣府歸化

城倉粟賑濟○喀爾喀札薩克圖汗遣使進

九白年貢。宴賚如例○戊辰。靖南王耿繼茂

疏言。臣父子祖孫受國厚恩。忝列王爵。捐軀

報効。乃臣職當然。奈臣自去歲八月至今。舊

疾日劇。閩省濱海重地。寇盜蠢動。不測。病軀

豈能料理。臣長子耿精忠。侍從多年。在臣軍

前。閱歷又經四載。儘堪報効。伏祈恩賜管理

軍務。俾祇奉簡書。以任國事。得旨。覽王奏。積

勞成疾。情詞懇切。准伊子耿精忠暫管軍務。

王仍加調理。痊愈。以副朕倚任至意○辛未。

授多羅貝勒察尼子察達為奉恩將軍。輔國

公噶布喇子發度為三等輔國將軍○禮部尚書恩額得以病乞休命以原品致仕○壬申。

上詣

太皇太后

皇太后宮問安○命提督四譯館太常寺少卿關防內添鑄翰林院字樣○癸酉冊封

世祖章皇帝第五子常寧為和碩恭親王○甲

戌大計天下各官貪酷官十員貪官一百十

九員酷官四員罷軟官八十五員不謹官一

百二十一員年老官二百三十五員有疾官

一百三十八員才力不及官一百四十員浮

躁官五十六員處分如例○予故三等阿思

哈尼哈番額對巴圖魯祭葬如例○乙亥以

河道總督羅多為山西陝西總督○丁丑諭

兵部各部院及各省將軍衙門通事原因滿

官不曉漢語欲令傳達而設今各滿洲官員

既諳漢語嗣後內而部院外而各省將軍衙

門通事悉罷之○戊寅以原任禮部尚書祁徹白補原官○己卯。

上詣

太皇太后

皇太后宮問安○庚辰以

王牒告成賜總裁纂修諸臣及執事員役等銀

幣有差○大學士魏裔介以病乞假命回籍

調理○以吏部右侍郎曹申吉為貴州巡撫

○辛巳大學士等奏品級考告成命刊刻遵

行○壬午奉天副都統辛泰以病乞休允之

○以故三等阿思哈尼哈番額克錫納嗣子

薩爾札襲職

二月癸未朔○甲申雲南貴州總督甘文焜

疏報番目俄四阿蜡卒等率眾投誠下部議

叙○刑部議覆兵科給事中王曰溫疏言京

師五方輳會奸宄叢生無賴刁民多嚇詐告

許及告後潛逃種種惡習應加重懲嗣後有

原告逃遁者應行文本籍嚴拏解京除原狀

不議外。照所告之罪反坐。若曾經使人說合詐索者。照光棍為首例治罪。其說合起滅詞訟之人。照光棍為從例治罪。從之。○科爾沁和碩土謝圖親王巴達禮子巴雅斯呼朗所尚郡君故遣官致祭。○丙戌。

上詣

太皇太后

皇太后宮問安。○命吏部尚書黃機。刑部尚書馮溥。工部尚書王熙。都察院左都御史明珠。

禮部左侍郎常彝。戶部右侍郎田逢吉。刑部

右侍郎多諾。中和殿學士折爾肯。保和殿學

士達都。翰林院掌院學士折庫納。熊賜履。侍

讀學士傅達禮。史大成。侍講學士胡密色。李

仙根。國子監祭酒徐元文。充經筵講官。○丁

亥。遣大學士杜立德祭

先師孔子。○免直隸行唐靈壽平山三縣水

衝沙壓荒地民欠銀三萬四千七百餘兩。永

除額賦。○戊子。祭

大社

大稷。

上親詣行禮。○免浙江石門等十五縣荒地二

十八萬一千一百餘畝額賦。○免江西新喻

新淦二縣荒地三千四百餘頃額賦。○己丑。

引見各省大計朝覲官員。○陞左副都御史

王光裕為河道總督。○以故三等阿思哈尼

哈番吳三汲孫吳世瑛襲職。○庚寅。

太皇太后聖壽節。

上率王以下文武大臣侍衛等詣

太皇太后宮行禮。遵

懿旨。停止筵宴。○陞恭領王懷忠為陝西興安

總兵官。○辛卯。免浙江加增屯餉銀九千六

百三十七兩有奇。○壬辰。春分朝

日於東郊。遣輔國公常舒行禮。○刑部左侍郎

張爾素。以病乞休。允之。○予故致仕散秩大

臣唐通祭葬如例。○癸巳。

孝康章皇后忌辰。遣官祭

孝陵○乙未。命吏部侍郎覺羅勒德洪。中和殿學士折爾肯。前往京口。會同總督麻勒吉。巡撫馬祐。察審兵丁。訐告將軍李顯貴。鎮江知府劉元輔。串通扣餉事。○丙申。

上詣

太皇太后宮問安○蘇松水師總兵官張大治。以病乞休。允之。○丁酉。以刑部尚書馮溥。為文華殿大學士。○戊戌。以舉行經筵禮。遣大學士杜立德告祭。

先師孔子○以原任禮部尚書梁清標補刑部尚書○鑲紅旗蒙古副都統查哈大。年老乞休。

上以其行間効力年久。慰留之。○己亥。

上御經筵。講畢。賜大學士九卿詹事及講官等宴○陞叅領鄂泰。為奉天副都統。○庚子。遣官祭

先農之神。○辛丑。

上詣

太皇太后宮問安○兵部題。嗣後滿洲副都統缺出。應將蒙古副都統轉補。蒙古副都統缺出。將驍騎叅領等應陞之員陞授。從之。○壬寅。陞大理寺卿佟弘器。為都察院左副都御史。○甲辰。陞東閣學士陳鼐。永為吏部右侍郎。○乎故滿洲都統議政大臣科岳爾圖。祭葬如例。○乎故承恩伯周全斌。祭葬。加祭二次。謚恪順。○京口將軍李顯貴。以疾乞休。部議李顯貴應解將軍任。俟京口差審事結之後。令其回京。從之。○乙巳。諭宗人府。凡覺羅中。行輩最長。年七十以上者。具以名聞。尋宗人府開列覺羅趙班等四人。奏入。皆召見乾清門。各賜銀兩。緞疋。及朝衣一襲。○丙午。遣官祭

歷代帝王○轉刑部右侍郎馬紹曾為左侍郎。陞左副都御史高珩。為刑部右侍郎。○戶部議覆。廣東巡撫劉秉權疏言。粵東屯田。有荒地三千五百餘頃。查屯地科米。每畝三斗。

較之民田。殆多數倍。民畏糧重。不敢承認開墾。請照民田一例起科。則屯畝早闢。屯賦不致虛懸。應如所請。從之。○山西巡撫達爾布疏言。晉省官兵。於長子等縣開墾荒地。應照例三年起科。但兵之墾荒。居址田器。未能猝辦。非土著人民可比。請再寬一年起科。下部議行。○丁未。清明節。遣官祭

永陵。

福陵。

昭陵。

孝陵。○戊申。

上詣

太皇太后宮問安。○命纂修孝經衍義。以翰林院掌院學士熊賜履為總裁官。○己酉。鑲藍旗滿洲副都統西納海。以病乞休。命原品解任。○命八旗都統。副都統。護軍統領。前鋒統領。外省將軍。副都統。城守尉等。俱自陳。并考察各屬官員。○庚戌。以散秩大臣尼雅翰為

鑲白旗滿洲都統。○辛亥。以原任廣東右路水師總兵官杜輝。為雲南永北總兵官。

三月。壬子朔。諭年幼諸王曰。聞爾等恃威行事。豈果有所利耶。夫無益之威。逞之何用。爾等皆朕懿親。人自敬畏。至於所屬在外官員。原為國家治事理民。爾等若勒索其財物。彼何所取而應奉耶。宜以時嫺習騎射。暇則讀書。毋徒溺於嬉戲也。又諭和碩安親王岳樂曰。爾在諸王中。以齒則高。以行則長。若年幼諸王。率意妄為。爾其訓飭之。○陞奉天府府尹王印祚。為大理寺卿。○漕運總督帥顏保。丁母憂。命在任守制。○癸丑。以翰林院掌院學士折庫納。熊賜履。侍讀學士傅達禮。宋德宜。史大成。侍講學士李仙根。侍讀張貞生。嚴我斯。修撰蔡啟傅。編修孫在豐。俱充日講官。○陞宗人府府丞楊永寧。為都察院左副都御史。太常寺卿上官鉉。為宗人府府丞。左僉都御史陳一炳。為奉天府府尹。○陞鑲白旗

漢軍副都統朱延禧為漢軍都統○乙卯。

上詣

太皇太后

皇太后宮問安○科爾沁和碩土謝圖親王已

達禮故遣官致祭○丙辰。以日講官翰林院

侍讀學士宋德宜充經筵講官○調鑲白旗

蒙古副都統四格為滿洲副都統○吏部題。

一等侍衛羅鐸。恭領塞黑等叩闕。稱伊父前

鋒統領白爾黑圖。進剿偽永曆。白文選。李定

國。皆有功績。鰲拜輔政時。無辜獲罪。未經議

叙。今罪已昭雪。將所得功牌呈奏。查白爾黑

圖。原係一等阿思哈尼哈番。今應議叙。授為

三等精奇尼哈番。從之○贈平南王藩下故

右翼總兵官尚之廉。太子少保。予祭葬。謚勤

恪○予故陝西延綏總兵官韓應琦祭葬。如

例○戊午。都察院左都御史艾元徵疏言。查

品級考。曾經奉旨。將漢軍漢人應陞官員。俱

照滿洲官員例。先行開列。候旨會推。惟推陞

督撫提鎮。仍擬正陪。似未畫一。嗣後督撫提

鎮缺出。請敕該部俱照例先行開列。應否會

推恭請睿裁。

上是其言。下部議行○己未。以鑲紅旗漢軍都

統柯永養為京口將軍○庚申。

上詣

太皇太后

皇太后宮問安○甲子。調江西南贛總兵官姚

自強為江南蘇松等處水師總兵官○丁卯。

上詣

太皇太后宮問安○戊辰。正白旗漢軍副都統

徐治通。自陳不職。命以原品解任○己巳。

萬壽節。

上率諸王。貝勒。貝子。公。內大臣。大學士。都統。尚

書。精奇尼哈番。侍衛等詣

太皇太后

皇太后宮。行禮。御殿。王以下。文武各官。上表慶

賀。停止筵宴○遣官祭

福陵。

昭陵。

孝陵○遣官祭真武東嶽城隍之神○賜衍聖公孔毓圻等宴於禮部○庚午諭禮部今歲三春無雨風霾日作耕種愆期民生何賴皆由朕躬涼德政治未協大小臣工不能殫忠為國恪修職業瞻顧因循惟圖自便偏私怠忽致干

天和朕用是夙夜靡寧深切儆惕今實圖修省

勵精勤政體

上天仁愛之意感召休和為民請命內閣六部都察院等衙門大小官各有職掌皆宜體朕倚任之意共効贊襄持庶秉公克盡厥職洗心滌慮痛改前非以迓

天庥爾部即遵諭通行申飭○辛未陞護軍叅領甘度海為鑲藍旗蒙古副都統護軍叅領阿晉泰為鑲白旗蒙古副都統○達賴喇嘛遣使表貢方物賞賚如例○癸酉福建總督

劉斗丁繼母憂命在任守制○乙亥以太僕寺卿梁鏞為太常寺卿○以原任副都統孫承祖為正白旗漢軍副都統原任廣東副都統祖植椿叅領馬一豹俱為鑲白旗漢軍副都統○丁丑兵部議覆雲南貴州總督甘文焜疏言雲南貴州瘴癘文武職官多有物故嗣後凡卒於任者俱應給與勘合俾扶柩歸里應如所請從之○以科爾沁故和碩達爾漢親王和拖子班第襲爵○江寧巡撫馬祐疏言江南蘇松常三府浙江杭嘉湖三府之水俱由劉河口吳淞江宣洩入海今年久淤塞以致去歲湖水泛濫請敕工部檄督撫速行建閘開濬下部議行○戊寅

上詣

太皇太后宮問安○大學士圖海以病求解任慰留之○己卯諭戶部頃因差往江南郎中禪塔海奏事來京朕面詢民生休戚據奏淮揚等處地方水患未消人民饑饉流移前雖

行賑濟。今無以餬口。困窮至極。聞此情形。深切憫惻。民為邦本。如斯困苦。豈可不速行拯救。今應即行差官前往賑濟。或就近截留漕米。或動支何項銀兩。糴米給散饑民。爾部作速議奏。

夏四月。壬午朔。享

太廟。

上親詣行禮。○吏部題鑲黃旗拖沙喇哈番阿喇密故無子弟承襲。世職應銷。其母年老無依。請給與半俸。嗣後均照此例。若係繼母。不准給予。得旨。繼母亦母也。其與生母一體給俸。著為令。○兵部議覆雲南貴州總督甘文焜疏言。安南國人阮福祿因獲罪伊國。來投內地。查安南為本朝屬國。阮福祿既係有罪逃來。不便收留。應交還安南處置。從之。○癸未。

上詣

太皇太后

皇太后宮問安。○復設山西雁平巡道。河東守道缺。○戶部遵旨議覆。淮揚饑民。應發銀六萬兩。速行賑濟。得旨。饑民待食甚迫。與銀無益。著截留漕糧六萬石。并各倉米四萬石。遣侍郎田逢吉。并賢能司官二員。會同該督撫賑濟散給。務使饑民得沾實惠。以副朕軫恤民生之意。○山東道御史徐越疏言。淮揚饑民。現議賑恤。臣謂及今賑濟之法。宜於各府州縣。分設米廠。廠不一處。使饑民無奔赴守候擁擠之患。然後計人給米。每日人各一升。每三日一放。則一石米。可以養活一人於百日矣。萬石米。即可以養活萬人於百日矣。即多至十萬災黎。亦止需十萬石米耳。伏乞敕部差賢能司官。每府各一員。協同地方官。親身遍歷。如法賑濟。至麥收後。停止疏入。上是其言。命差往賑濟。侍郎田逢吉等。速如議行。○乙酉。諭內閣翰林院。致治之道。無過法祖。鑒於成憲。乃罔有愆。欽惟

太祖高皇帝開天垂統。

太宗文皇帝式廓鴻圖。規模弘遠。啟佑無疆。朕

御極以來。景仰

先猷。時切儀型之念。

世祖章皇帝時。曾命儒臣纂修

太祖

太宗聖訓。雖具稿進呈。未經裁定頒布。茲特命

圖海。李蔚為總裁官。折爾肯。折庫納。熊賜履。

為副總裁官。達哈塔。楊正中等十員為纂修

官。滿漢謄錄官各四員。滿漢收掌官四員。悉

依前式。分別義類。重加考訂。勒成全書。朕得

以朝夕觀覽。是訓是行。亦俾子孫率由無斁。

卿等膺茲委任。須恪恭勤勵。務期早竣。以副

朕觀光揚烈至意。○命宗室中除大罪革職

人員外。閒散宗室子弟。年十八歲以上。及無

父之子。俱照披甲例。給以銀米養贍。○以左

通政周卜世為太僕寺卿。○丙戌。諭刑部等

衙門。邇來天氣亢旱不雨。或因刑部淹禁中

有冤枉。亦未可知。爾等將現禁人犯。詳加清

理。如有可矜疑者。照例減等發落。其現審人

犯。亦速為審理。有應減等者。即與減等。應釋

放者。即行釋放。務期獄無冤滯。以迓

天和。尋刑部等衙門議。以斬絞人犯王三元等

十一人。請減等免死。從之。○予故三等阿思

哈尼哈番。亥色。原任西安副都統三等阿思

哈尼哈番。額色。各祭葬如例。○丁亥。予故前

鋒統領三等精奇尼哈番。白爾黑圖。祭葬。謚

忠勇。○戊子。諭禮部。今己入夏。亢暘不雨。農

事堪憂。朕念切生民。躬自刻責。特頒諭旨。戒

飭各官。修省過愆。祈求雨澤。乃精誠未達。霖

雨尚稽。朕心晝夜焦勞。不遑啟處。茲虔誠齋

戒。躬詣

天壇祭告。懇祈甘霖速降。以濟生民。爾部即擇

吉日。速備儀物。俟朕親詣行禮。○以科爾沁

和碩達爾漢親王班第。尚和碩公主。授為和

碩額駙。○旌表安徽節婦桐城縣何氏。當塗

縣唐氏。焦氏。亳州楊氏。潁州劉氏。蒙城縣王氏。丁氏。虹縣吳氏。滁州周氏。烈女五河縣方氏。給銀建坊如例。○己丑。

上詣

太皇太后宮問安。○杜爾伯特固山貝子諾爾布故。遣官致祭。○戶部題。江南。江西。湖廣。蘆課錢糧。每年差部員監督管理。查蘆課一項。原係地方官按畝徵收。轉解監督衙門。與各關差監督親收商稅者有別。請嗣後停止差遣部員。將蘆課錢糧。歸并地方官管理。從之。○庚寅。以初次舉行日講。遣大學士杜立德告祭。

先師孔子。○辛卯。命日講官進講。○壬辰。

上親詣

天壇禱雨。○甲午。雨。○乙未。旌表河南節婦陳留縣李氏。蘭陽縣傅氏。偃師縣史氏。烈婦夏邑縣楊定遠妻何氏。朱惠妻何氏。烈女舞陽縣于氏。給銀建坊如例。○丙申。戶部議覆。江

南江西總督麻勒吉等疏言。吳淞江。劉河口。係蘇。松。常。杭。嘉。湖。六府洩水要道。應建閘開濬。請以各府漕折銀十四萬兩。留充河工經費。即均派六府所屬之地。分年按畝徵輸還項。應如所請。得旨。被災州縣復令多派還項。恐苦累小民。著免其派徵。○山東道御史徐越疏言。各省巡撫應敕令兼管軍務。以便戢盜安民。得旨。各省巡撫不必兼令管兵。其不設總督提督省分。副將以下武官。令巡撫兼轄。○丁酉。

上詣

太皇太后宮問安。○戊戌。

孝端文皇后忌辰。遣官祭

昭陵。○己亥。皇子承慶薨。○庚子。

上以正白旗故都統伯石廷柱。効力行間年久。著有勞績。追賜立碑。○壬寅。諭吏部。朕觀侍郎嚴正矩。章雲鷺。通政使霍叔瑾。才具庸常。不能盡職。俱著以原官致仕。○吏部題。廣西

南寧。太平。慶遠。思恩。四府。及土府州佐貳等官。俱照邊俸例陞轉。從之。○考察八旗官員。年老有疾。及不稱職者。共六十員。處分如例。○癸卯。免直隸文安縣。水衝地額賦。○丙午。上詣

太皇太后

皇太后宮問安。○丁未。陞叅領郎化麟。為鑲紅旗漢軍副都統。○戊申。命京口審事吏部侍郎。覺羅勒德洪等。將京口將軍李顯貴。鎮江府知府劉元輔。并江南江西總督麻勒吉。及許告兵丁侯進孝等。同帶來京聽勘。○吏部題。八旗滿洲監生。識滿漢字者。考試翻譯。止識滿字者。考試繕寫。優者。授為正八品。以部院筆帖式補用。其漢軍監生。識滿漢字者。照滿洲監生例。考試取用。止識漢字者。照漢監生考職例。考取。以州同等官用。從之。○兵部。右侍郎羅敏。以年老乞休。命以原官解任。○己酉。轉戶部右侍郎田逢吉。為左侍郎。調兵

部左侍郎劉鴻儒。為戶部左侍郎。管右侍郎事。○雲南巡撫李天浴。疏請終養。允之。○陞正白旗護軍統領阿密達。為領侍衛內大臣。○陞太常寺卿梁鎰。為通政使司通政使。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十六

監修總裁官光祿大夫太保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十年辛亥五月辛亥朔。

上詣

太皇太后

皇太后宮問安○甲寅陞一等侍衛班迪為兵部右侍郎○兵部尚書科爾科代自陳求罷命以原品隨旗上朝○以原任工部左侍郎吳正治為兵部督捕左侍郎○予故靖南王耿繼茂祭葬謚忠敏○三等阿思哈尼哈番亥色故無應襲之人以其兄之孫一等阿達哈哈番兼一拖沙喇哈番和善承襲并為一

等精奇尼哈番兼一拖沙喇哈番○丙辰陞山東文登副將劉進寶為江西南贛總兵官○予故原任工部尚書額赫里祭葬如例○戊午。

上詣

太皇太后宮問安○山東巡撫袁懋功疏言濟南等府屬章邱等五十六州縣衛於康熙七八兩年報有開墾荒地但七年報墾三年而遇兩災八年報墾三年而遇一災况小民開

實錄卷三十六

二

墾資本皆其自辦請照投誠官兵墾荒遇災之例再寬限一年起科部議不准得旨新墾之田被災若仍照定例催徵致民苦累著寬限一年起科○己未陞一等侍衛桑扈為正白旗護軍統領○吏部左侍郎岳思泰自陳求罷命以原品解任○辛酉諭兵部武官有防守地方緝捕盜賊之責必弓馬熟嫻方克勝任其不稱職者雖總督提督有不時糾叅之例但與其糾叅於後貽誤地方不如於選

授之時。詳加選擇。以後除現任推陞各員外。凡係應到部掣籤之官。爾部即考驗其弓馬。然後令其掣籤。如有不堪者。具題照例給以原品頂帶。停其補授。○內大臣理藩院尚書喀蘭圖。年老乞休。得旨。喀蘭圖効力年久。勞績素著。准解尚書任。以內大臣上朝。仍加授太子太保。○以故三等阿思哈尼哈番額對巴圖魯子三等侍衛朱馬喇襲職。○陞江西按察使安世鼎。為湖廣布政使司布政使。○壬戌。轉兵部右侍郎冀如錫。為左侍郎。陞左副都御史楊永寧。為兵部右侍郎。○陞左通政王天成。為太常寺卿。○安徽巡撫張朝珍。丁母憂。命回旗守制。○添設陝西潼商守道。漢興巡道二缺。○癸亥。遣官祭關聖帝君。○甲子。

上詣
太皇太后宮問安。○乙丑。夏至。祭地於

方澤。上親詣行禮。○戊辰。陞湖廣永州總兵官劉應志。為鑾儀衛鑾儀使。○己巳。三等阿思哈尼哈番塞殷察渾故。無子。以其伯之孫得爾格爾襲職。○喀爾喀阿海戴青台吉等遣使進九白年貢。宴賚如例。○庚午。都察院左都御史艾元徵疏言。

世祖章皇帝時。於出位妄言。及風聞失實者。皆立加懲處。以風聞言事。伐異黨同。挾詐報復。故也。嗣後果有確見關係政治。及大奸隱弊。仍無論有無言責。悉聽其指實陳奏外。餘並不許以風聞浮詞。擅行入告。下部議行。○辛未。轉吏部右侍郎覺羅勒德洪。為左侍郎。兵部督捕左侍郎覺羅舒恕。為吏部左侍郎。管右侍郎事。○以原任江寧巡撫朱國治。為雲南巡撫。○議政王大臣等遵旨議覆直隸河南副將以下武官。令巡撫兼轄。其調遣官兵。一應軍務。該撫與總兵官會商。至總兵官應

行事宜。仍照例遵行。從之。○內陞仍管戶科給事中姚文然疏言。江南百姓羣集鼓廳。保留總督麻勒吉。且云麻勒吉自被鎖拏。顏黑面削。腰項拳曲。臣聞之惻然。竊思官列大僚。素叨養。免冠帶鎖。愧辱難堪。伏乞

皇上特降恩綸。寬其鎖繫。至於所犯事情。審有實據。自有應得之罪。則朝廷一定之法。與

皇上格外之恩。並行而不悖矣。得旨。這本說得是。以後官員犯罪。鎖禁鎖拏者。永行停止。○

壬申。

上詣

太皇太后宮問安。○以內陞仍管戶科給事中姚文然。為都察院左副都御史。○烏朱穆秦多羅貝勒色冷額爾德尼故。遣官致祭。○癸酉。

上幸南苑行圍。○乙亥。予廣東陣亡新會守備贈署都司僉書李應登祭葬如例。○丙子。諭宗人府吏部。兵部。嗣後王以下。及文武各官

處分罰銀及問以應得之罪。應否酌量其情罪。改為罰俸。著確議以聞。○戊寅。陞理藩院右侍郎阿穆瑚瑯。為理藩院尚書。○調刑部右侍郎多諾。為兵部督捕左侍郎。○喀爾喀諾門達禮台吉等。遣使進貢。宴賚如例。

六月。庚辰朔。○辛巳。

上還自南苑。詣

太皇太后宮問安。○壬午。諭理藩院。聞蘇尼特等八旗。人民被災。牲畜俱死。難以存活。朕心深為惻然。爾部會同禮部。太僕寺。將馬場之馬與禮部所管之牛羊。酌量派出賞給被災之人。○癸未。以中和殿學士折爾肯。為刑部右侍郎。○丁亥。以武英殿學士靳輔。為安徽巡撫。○宗人府等衙門。遵旨議覆。嗣後王以下。及文武官有應得之罪。處分者。各量其罪之輕重。改罰銀為罰俸。自一月遞增至一年。從之。○戊子。

上詣

太皇太后

皇太后宮問安○己丑。以故三等阿思哈尼哈番額色子克什克圖襲職○癸巳。以一等侍衛博羅特為理藩院右侍郎○甲午。陞恭領李芝蘭為湖廣永州總兵官○追謚和碩禮親王代善曰烈。和碩饒餘親王阿巴泰曰敏。和碩承澤親王碩色曰裕。和碩襄親王博穆博果爾曰昭。和碩穎親王薩哈廉曰毅。和碩簡親王濟度曰純。多羅豫郡王多鐸曰通。多羅謙郡王瓦克達曰襄。多羅衍禧郡王羅洛渾曰介。多羅敏郡王勒度曰簡。多羅郡王精濟曰懷愍。多羅順承郡王勒克德渾曰恭惠○金星晝見○乙未。四川湖廣總督蔡毓榮疏言。蜀省有可耕之田。而無耕田之民。招民開墾。洵屬急務。但招民限以七百名之例。所費不貲。能招徠者甚少。臣謂非廣其招徠之途。減其開墾之數。寬其起科之限。必不能有濟。請敕部准開招民之例。如候選州同州判縣丞等。及舉貢監生生員人等。有力招民者。

授以署職之銜。使之招民。不限年數。不拘蜀民流落在外。及各省願墾荒地之人。統以三百戶為率。俟三百戶民盡皆開墾。取有地方甘結。方准給俸。實授本縣知縣。其本省現任文武各官。有能如數招民開墾者。准不論俸滿即陞。又蜀省隨征投誠各官。俟立有軍功。咨部補用者。能如數招民開墾。照立功之例。即准咨部補用。其開墾地畝。准令五年起科。如此。則人易為力。而從事者多。殘疆庶可望生聚矣。下吏戶兵三部會同議行○丁酉。兵部題。廣東南海等縣。自康熙九年五月至十一月。失盜計三十八案。應將休致提督楊遇明。削去太子太保銜。從之○己亥。

上詣

太皇太后

皇太后宮問安○壬寅。以戶部郎中洪啟槐為貴州按察使司僉事。提調學政○丙午。

上詣

太皇太后

皇太后宮問安○丁未。以故靖南王耿繼茂子

和碩額駙耿精忠襲爵○戊申。戶部議覆。浙

江總督劉兆麒疏言。授誠官兵柯鴻等於康

熙七年以後。所撥溫衢處三府屬開墾荒田。

例應於康熙十年起科。但委係老荒收薄。贍

口不敷。請照山東山西二省墾荒兵丁之例。

再展限一年起科。應如所請。從之○己酉。陞

甘肅布政使羅森為四川巡撫○戶部議覆。

山東巡撫袁懋功疏言。都司一官原為管轄

衛所錢糧而設。各省皆責令督催考成。獨東

省係各府催徵。請照各省之例。改歸都司統

轄。應如所請。從之

秋。七月。庚戌朔。享

太廟。

上親詣行禮○壬子。

上詣

太皇太后

皇太后宮問安○甲寅。翰林院掌院學士熊賜

履告假省親。得旨。熊賜履著速去。速來。此員

缺不必銓補○乙卯。予故都統誇岱祭葬。如

例○丙辰。予故致仕大學士車克祭葬。謚文

端○丁巳。兵部議覆。四川湖廣總督蔡毓榮

疏言。川省衝要各營將弁缺出。照沿邊題補

之例。令總督提督題補。應如所請。從之○刑

部等衙門。會審京口將軍李顯貴。鎮江府知

府劉元輔。及總督麻勒吉等一案。查將軍李

顯貴。通同知府劉元輔。違例折給兵丁草料。

浮算帑銀。李顯貴。劉元輔。應照例擬斬監候。

劉元輔。因父劉澤溥。殉難山西。應免死。枷號

鞭責。總督麻勒吉。巡撫馬祐。不早行題參。應

降三級調用。副都統張元勳。張所養。各降一

級。革去世職。得旨。李顯貴身為將軍。職任封

疆重寄。乃侵剋兵餉。大負委任。劉元輔雖伊

父有死難之功。婪贓壞法。情罪重大。俱依擬

應斬。著監候。秋後處決。麻勒吉。馬祐。各削去

加一級。仍降二級。免其調用。張元勳。張所養。各削去加一級。并革去恩詔所得一拜。他喇布勒哈番。仍留原任。○戊午。

上詣

太皇太后宮問安。○以工部郎中劉元琬為浙江按察使。司僉事。提調學政。○己未。免山東館陶縣。本年分蠲災額賦十之三。○陞陝西洮岷道副使高翼辰為湖廣按察使。司按察使。四川永寧道副使黃龍為江西按察使。司按察使。○癸亥。浙江巡撫范承謨。以病請解任。命乘驛回京調理。病痊起用。○甲子。中元節。遣官祭

永陵。

福陵。

昭陵。

孝陵。○免直隸霸州。安肅等二十五州縣。本年分旱災額賦有差。○吏部議覆。吏科給事中趙之符疏言。直隸各省官員。如果該管上司。

有勒索受賄等弊。許於未効奏揭報之先。控告。若叅揭之後。控告者將所告之事。不准。仍照所告之罪。反坐。應如所請。從之。○諭刑部。近聞流徙盛京等處人犯。押解官兵。將犯人妻子。恣行凌辱。或將犯人潛害致死。以後爾部嚴飭押解官兵。如有此等事犯。從重治罪。仍轉傳戶兵二部。○丙寅。

上詣

太皇太后

皇太后宮問安。○予故內大臣二等精奇尼哈番達運祭葬如例。○丁卯。免山東沂水縣。本年分旱災額賦十之二。○己巳。陞山西按察使色特為陝西布政使。司布政使。○庚午。赦漢多羅郡王墨爾根。已圖爾。故遣官致祭。○雲南貴州總督甘文焜。以病乞休。慰留之。○甲戌。

上詣

太皇太后

皇太后宮問安○乙亥。免山東即墨縣本年分
電災額賦十之二○丙子。調山東巡撫袁懋
功。為浙江巡撫○戊寅。國子監祭酒查祿疏
言。太學為教化本原之地。查順治八年。十一
年。曾令各省學臣。選取生員文行兼優者。起
送赴監。今宜遵倣此例。於郡邑各庠。或間一
歲。或間三五歲。舉文行兼優。年齒少壯者一
人。入太學。更請遵照

世祖章皇帝時舊制。每科直隸各省鄉試。各取
副榜若干名。送監肄業。如此。則辟雍多經明
行修之士矣。下部議行○陞叅領石調聲。為
杭州副都統

八月。己卯朔。日食○

上詣

太皇太后

皇太后宮問安○福建總督劉斗疏報海寇自
撤水師之後。帆船出沒。侵犯靡常。甚至在各
島嶼蓋造房舍。臣等密商機宜。配發水陸官

兵陸續搜剿。今已搜剿六十餘島。斬溺賊衆
五千三百八十餘人。生擒賊三十八名。燒賊
木城七座。房宇二千九百二十餘間。下部知
之○庚辰。贈故黔西總兵官李如碧太子太
保。予祭葬如例○四川建昌總兵官佟浩年。
以老乞休。允之○甲申。調鑲藍旗蒙古都統
俄托渾。為滿洲都統○丙戌。

上詣

太皇太后宮問安○丁亥。

太宗文皇帝忌辰。遣官祭

昭陵○吏部議覆刑部尚書莫洛疏言。刑部漢
軍郎中員外郎缺出。應照滿官例。聽刑部堂
官揀選。咨送題補。應如所請。從之○戊子。祭

大社

大稷。

上親詣行禮○都察院左都御史明珠疏請停
止鹽差御史巡歷地方。從之○己丑。

太祖高皇帝忌辰。遣官祭

福陵○以文華殿學士張鳳儀為山東巡撫○
癸巳。

上詣

太皇太后

皇太后宮問安○添設內閣滿洲學士四員。漢
軍學士二員。漢人學士二員。滿字侍讀學士
二員。滿漢字侍讀學士二員。蒙古侍讀學士
二員。漢軍侍讀學士二員。滿字侍讀四員。滿
漢字侍讀四員。蒙古侍讀二員。漢軍侍讀二

員○陞兵科給事中賽音達禮為山西按察
使司按察使○甲午。設立起居注。命日講官
魚攝。添設漢日講官二員。滿漢字主事二員。
滿字主事一員。漢軍主事一員○乙未。陞鑲
藍旗滿洲副都統覺羅畫特為蒙古都統○
丁酉。遣大學士圖海祭

先師孔子○工部右侍郎高辛印。以病乞休。
命回籍調理○喀爾喀墨爾根台吉等。遣使
進九白年貢。宴賚如例○戊戌。免直隸豐潤

縣本年分旱災額賦有差○己亥。秋分。夕
月於西郊。遣都統尼雅翰行禮○調鑲藍旗蒙
古副都統甘度海為滿洲副都統○甲辰。

上詣

太皇太后

皇太后宮問安○以侍講學士莽色喇沙里充
日講起居注官○乙巳。遣官祭
歷代帝王○遣官祭城隍之神○丁未。

上御經筵。講畢。賜大學士九卿詹事及講官等
宴○諭吏部。前因浙江巡撫范承謨患病。准
其回京調理。將山東巡撫袁懋功調補。今據
兩省督提奏稱。百姓愛戴。號泣請留情詞懇
切。特順民情。俱著各留原任。新授山東巡撫
張鳳儀著候另缺推補○以烏朱穆秦故多
羅貝勒色冷額爾德尼孫莫利海襲爵○戊
申。以副都統伯王之鼎為江南提督○琉球
國世子尚貞。遣陪臣富茂昌等進貢。宴賚如
例

九月己酉朔。陞護軍叅領羅和為鑲藍旗滿洲副都統。○雲南貴州總督甘文焜丁母憂。命在任守制。○以杜爾伯特故固山貝子諾爾布子沙金襲爵。○喀爾喀車臣汗遣使進九白年貢。宴賚如例。○庚戌。

上以寰宇一統躬詣

太祖

太宗山陵展祭。行告成禮。告祭

太廟。

上親詣行禮。○辛亥。

上詣

太皇太后

皇太后宮問安畢啟行。是日駐蹕三河縣。○以故二等精奇尼哈番達運子鄂七爾故三等阿思哈尼哈番額赫里子英素各襲職。○壬子。

上駐蹕別山。○癸丑。

上駐蹕沙裏河地方。科爾沁鎮國公都思哈爾。

來朝。○甲寅。

上駐蹕榛子鎮。○乙卯。

上駐蹕范家店。○丙辰。

上駐蹕榆關。○丁巳。

駕出山海關。駐蹕姜女祠地方。○戊午。

上駐蹕溝爾河地方。○己未。

上駐蹕烟臺河地方。喀喇沁多羅杜楞郡王班達爾沙鎮國公烏忒巴喇等來朝。○庚申。

上駐蹕連山。土默特貝子古睦台吉塔布囊等。

來朝。○辛酉。

上駐蹕小凌河地方。土默特台吉沙克都爾來朝。○壬戌。

朝。

上駐蹕榆林堡。敖漢和碩額駙齊倫巴圖爾台吉等來朝。○癸亥。

上駐蹕盤山堡。柰曼台吉鄂齊爾等來朝。○甲子。

上駐蹕小河山。科爾沁多羅永圖郡王額濟音及台吉塔布囊等來朝。○乙丑。

上駐蹕雙臺。教漢多羅郡王布達。土默特多羅達爾漢貝勒卓禮克圖及台吉塔布囊等來朝。○丙寅。

上駐蹕遼河地方。科爾沁和碩卓禮克圖親王鄂輯爾和碩達爾漢親王額駙班第多羅郡王布達禮多羅貝勒鄂緝爾輔國公圖納黑多羅額駙厄爾德尼和碩額駙沙津及台吉等來朝。○盛京將軍阿穆爾圖等及文武各官迎。

駕○丁卯。

上謁

福陵。率諸王貝勒文武大臣等行禮。

上三獻爵。舉哀。衆皆舉哀畢。隨謁

昭陵。如

福陵禮。是日。駐蹕盛京城外。○戊辰。

上詣

福陵。陳牲帛於

隆恩殿。讀祝。行告成禮。○己巳。復詣

福陵致祭。如前儀。○

上周視盛京內外城池。城內外老幼跪列道旁。凡年老及鰥寡孤獨。皆賜銀兩。又諭盛京將軍阿穆爾圖等。查披甲被傷老病退甲閒散之人。以聞。○科爾沁台吉鄂齊爾等來朝。○庚午。

上詣

昭陵。行告成禮。○辛未。復詣

昭陵致祭。皆如

福陵禮。○遣王貝子內大臣等詣

永陵致祭。○阿祿科爾沁多羅郡王朱爾札哈。

札魯特鎮國公毛奇塔特及台吉等來朝。○

是日。

上入盛京城。御清寧宮。大清門設儀仗奏樂。召

盛京將軍。副都統。侍郎。年老致仕都統。副都

統。侍郎。及

永陵。

福陵。

昭陵總管以下現任解任文武大小官員宴賚有差宴畢。

上又召將軍都統副都統侍郎總管等官至

御前親以金甌賜酒其餘官員命內大臣等徧賜之又召八十以上耆民至

御前賜飲顧謂侍臣等曰朕展謁

山陵惓惓在念今得至發祥重地拜謁

陵寢用展孝思祭禮已成朕懷大慰侍臣等奏曰

皇上親詣

祖陵告成致祭精誠至孝古帝王所未有也又

召披甲被傷老病退甲閒散四百餘人至

御前各賜銀兩諭將軍阿穆爾圖等曰此等閒

散老病之人如有一二遺漏未沾恩澤者爾

等查出陸續奏聞俾得均沾恩惠以示朕軫

恤之意又賜披甲執役人等銀兩又召將軍

阿穆爾圖副都統葉爾素鄂泰侍郎納桑阿

哈爾松阿杭愛敖色等諭曰此方人民淳朴

獄訟事簡無甚難理爾等膺荷委任惟撫戢軍民愛養招徠滿漢人民悉賴農業須多方勸諭開墾耕種俾各遂生計以副朕惓念發祥重地之意又諭守

陵總管副總管等曰爾等職思祀典凡一應祭品爾等必親加虔視務盡誠敬副朕孝思又命發銀二萬兩賞寧古塔兵丁又諭戶刑等部侍郎曰奉天係

祖宗發祥重地奉天府寧古塔等處除十惡死罪不赦外凡已結未結死罪俱著減等其軍流徒杖等俱著寬釋自山海關至奉天府所屬地方康熙十年十一年分正項錢糧俱著豁免以示朕加恩之意○遣官祭諸王暨功臣墓○福建總督劉斗以病乞休慰留之○浙江總督劉兆麒以所屬地方疊遭水旱引咎求罷不允○免江南定遠臨淮二縣本年分水災額賦有差○封固山貝子尚善女為縣君塔富壽為固山額駙○壬申。

上以告成禮畢。欲周覽盛京畿內地方形勝。是日啟行。駐蹕懿路。○賜來朝外藩王貝子公。台吉等。裘帽等物。○札魯特多羅達爾漢貝勒。巴達里多羅貝勒。札穆。及台吉塔布囊等。來朝。○癸酉。

上駐蹕鐵嶺縣。○甲戌。

上駐蹕開元縣。○乙亥。

孝慈高皇后忌辰。遣官祭

福陵。是日。駐蹕葉赫正北堡。○丙子。

上駐蹕雅克薩。○遣侍衛往寧古塔。賜將軍巴

海。裘帽等物。○丁丑。

上駐蹕古城。○戊寅。

上駐蹕穆當阿烟臺

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十七

監修總裁官光祿大夫太保無太子太傅保和殿大學士領侍衛內軍戶部尚書二等伯加四

級臣馬齊光祿大夫經筵日講官起居注少保無太子太保保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍無理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十年辛亥冬十月乙卯朔享

實錄卷三十七

太廟遣都統覺羅巴爾布行禮○遣官祭

永陵○

福陵○

昭陵○

孝陵○頒康熙十一年時憲曆○是日

上駐蹕納爾渾地方○庚辰

上駐蹕達溪達爾巴地方○辛巳

皇太后聖壽節○遵

懿旨○免行禮○

上駐蹕愛新地方○召寧古塔將軍巴海問寧

古塔及瓦爾喀胡爾哈人民風俗○諭曰瓦爾

喀胡爾哈人皆暴戾奸謔爾其善布教化以

副朕綏遠至意○壬午

駕旋駐蹕尼牙滿渚地方○以故三等阿思哈

尼哈番胡萬明子胡光前襲職○免湖廣蘄

州江夏等十七州縣又偏沅平江等十三縣

衛本年分旱災額賦有差○免陝西甘州左

右二衛及山丹衛本年分水災額賦有差○

實錄卷三十七

免山東文登縣水衝沙壓地畝○本年分額賦

十之二○刑部題定例旗下官員犯罪重太

其親父祖伯叔兄弟陣亡及本身曾出征負

重傷者俱免死一次其軍民人等並未議及

嗣後應將旗下軍民人等犯重罪者亦照此

例遵行從之○癸未

上駐蹕納爾渾地方○甲申

上駐蹕勒甫布屯地方○乙酉

上駐蹕開原縣○丙戌

上駐蹕三台堡○丁亥。

上駐蹕范河○戊子。

上駐蹕姚堡○己丑。

上駐蹕盛京北教場○賜盛京畿內地方年老

男婦銀兩○辛卯。

上以回鑾率諸王貝勒大臣等詣

福陵。

昭陵行禮。御盛京大清門。命扈從官及盛京將

軍以下文武官較射○壬辰。諭寧古塔將軍

御奉天二

三

巴海朕向聞爾賢能。今侍朕左右。朕益知爾

矣。飛牙喀黑折雖服。然其性暴戾。當善為防

之。尤須廣布教化。多方訓迪。以副朕懷遠至

意。羅刹雖云投誠。尤當加意防禦。操練士馬。

整備器械。毋墮狡計。至於地方應行大事。即

行陳奏。毋得疑畏。爾膺邊方重任。尚其黽勉。

以報朕知遇之恩○諭盛京將軍阿穆爾圖

曰朕駕將還。觀爾非無能之人。爾其鎮守地

方。勉副朕意○命來朝外藩王貝勒貝子公

台吉等較射畢。

駕發盛京。各官跪送。召原任都統道喇等近前。

面諭曰朕仰體

皇考未竟之志。至發祥重地。謁

太祖

太宗山陵。祭告禮成。又見爾等年老大臣。朕懷

甚慰。爾等當亦愉快。道喇等奏曰。臣等年老

解任。自分終身疎遠。不期今日得親

天顏。重加賞賚。一時隆遇。曠代殊恩。今

御奉天二

四

車駕回鑾。臣等不勝依戀○是日駐蹕老邊。翁

牛特多羅達爾漢貝勒搜色。及台吉等來朝

○癸巳。

駕過遼河橋。諭盛京工部官曰。此橋甚有便於

人。著存留勿毀○是日駐蹕五道河。扎魯特

台吉多爾濟等來朝○甲午。

上駐蹕白旗堡○乙未。

上駐蹕頭道井地方○以八旗屯地旱荒。給被

災旗人米一百六十四萬七百石○予故二

等精奇尼哈番覺羅額爾德奈葬如例○福建提督王進功年老乞休。溫旨慰留之○靖南王耿精忠疏報臺灣偽總兵柯喬棟率偽官五百四十九員。船十一隻。投誠。下部議叙。○丙申。

上駐蹕廣寧縣○丁酉。

上駐蹕榆林堡。翁牛特喀拉齊里克鎮國公奇他忒及台吉等來朝○戊戌。

上駐蹕小凌河○免山東寧海州水災。聊城等

三縣旱災。本年分額賦有差○己亥。

上駐蹕連山。教漢多羅郡王布達及台吉等來朝○庚子。

上駐蹕寧遠州溫泉○辛丑。

上駐蹕東關站○壬寅。

上駐蹕溝爾河。喀喇沁塔布囊等來朝○以一等阿達哈哈番甯天祚為平南藩下副都統○浙江巡撫范承謨以病再疏乞休。慰留之

○癸卯。

上駐蹕老君屯○甲辰。

駕進山海關。駐蹕石河○乙巳。

上駐蹕撫寧縣○河道總督王光裕疏報河決桃源縣。壞民隄二百五十丈。下部速議○戶部議覆浙江巡撫范承謨疏言臨海太平。平陽石門。烏程五縣。溫州一衛。未完康熙元年二年三年行月等項銀兩。積逋年久。疊罹凶荒。請援赦蠲免。查康熙八年恩詔蠲免民欠地丁。並未載有蠲免漕項錢糧。未便援赦。得旨。漕項雖無豁免之例。但據該撫奏稱積逋年久。疊罹凶荒。追比難完。爾部仍議追徵。是否相合。著再議。尋部議豁免。從之○丙午。

上駐蹕永平府○丁未。

上駐蹕榛子鎮

十一月。戊申朔。

上駐蹕梁家店○以故二等精奇尼哈番覺羅額爾德之子喇祐塔襲職○贈故江南提督梁化鳳少保兼太子太保。予祭葬。謚敏壯○

己酉。

上駐蹕薊州○山西巡撫達爾布丁父憂。命在

任守制○庚戌。

上回京。詣

太廟。行告至禮畢。詣

太皇太后

皇太后宮問安○免湖廣衡州衛。本年分旱災

額賦十之三○壬子。以候缺另補巡撫張鳳

儀為山東巡撫○予故三等輔國將軍伯奇

祭葬立碑如例○免山東堂邑冠縣二縣。本

年分旱災額賦十之三○癸丑。予故致仕工

部尚書葉成額祭葬如例○甲寅。以原任內

國史院學士張士甄翰林院侍讀學士宋德

宜順天府府尹郭廷祚宗人府漢啟心郎蔣

廷桂俱為內閣學士兼禮部侍郎○乙卯。追

叙海賊犯福州全城功。加己故福建巡撫宜

永貴拜他喇布勒哈番并前所有一等阿達

哈哈番。合為三等阿思哈尼哈番。命其孫宜

廷輔襲職○丙辰。

上以謁

陵禮成。御太和殿。王以下文武各官。行慶賀禮。

頒詔天下。詔曰。朕惟帝王誕膺天命。撫育萬

方。皆由祖功宗德。締造維艱。俾後人克享成

業。所以天下一統之後。必展告成之禮。甚鉅

典也。我

太祖高皇帝創建鴻圖。肇興景運。

太宗文皇帝布昭功德。式廓丕基。至

世祖章皇帝統一寰區。大勲既集。即欲躬詣

山陵。展祭告成。未遑修舉。朕繼承隆緒。上託

祖宗洪庥。天下底定。仰體

皇考未竟之志。躬詣

福陵。

昭陵虔修祀事。以告成功。禮竣旋京。湛恩宜沛。

於戲。繼述無疆。永著顯承之盛。昇平胥慶。益

彰樂利之休。布告天下。咸使聞知○詔內恩

款。凡八條○丁巳。轉刑部右侍郎高珩為左

侍郎。陞左副都御史姚文然。為刑部右侍郎。左副都御史佟弘器。為工部右侍郎。○戊午。

上詣

太皇太后

皇太后宮問安。○庚申。命發偏沅積穀八萬七千餘石。米三萬二千餘石。存庫銀三千七百兩。賑濟本省各屬飢民。○辛酉。陞光祿寺卿紀振驥。為順天府府尹。○壬戌。

上御太和殿視朝。文武陞轉各官謝恩。○平南王尚可喜。以疾疏請其子尚之信回粵。暫管軍務。從之。○以翰林院侍講學士楊正中。杜臻。充日講起居注官。○甲子。陞宗人府府丞上官鉉。為都察院左副都御史。○陞叅領臧延鳳。為正紅旗漢軍副都統。○戊辰。冬至。祀天於

園立。

上親詣行禮。○遣官祭

永陵。

福陵。

昭陵。

孝陵。○己巳。

上率王以下。文武大臣侍衛等詣

太皇太后

皇太后宮。行冬至慶賀禮。御殿。王以下。文武各官。上表朝賀。○庚午。復設貴州平大黔威守道一員。駐劄大定府。○辛未。陞都察院左僉都御史黃道行。為左副都御史。○陞叅領佟國卿。為廣東瓊州總兵官。○貴州安籠總兵官向化侯譚詣。以病乞休。溫旨慰留之。○雲南道御史何元英疏言。禮部司屬各員。有磨勘天下試卷之責。應照

世祖章皇帝時。以進士出身者補授。又各省鄉試正副主考。宜專用進士出身之人。開列候點。其分房各官。或進士官乏員。方將舉人出身者開送。從之。○河道總督王光裕疏言。淮

揚裏河為漕運咽喉。年來沙停水淺。幾為平陸。臣已疏請大挑。但舊例派調人夫。今淮揚廬鳳民生困苦。若再派調。民何以堪。查有河庫節省銀十萬兩。可為僱募人夫之用。時日已迫。臣一面給發銀兩。募夫興工。一面具疏奏聞。從之。○壬申。以護軍統領哈爾哈齊為禮部尚書。調左都御史明珠為兵部尚書。○以原任宗人府府丞王天眷補原官。○免河南安陽陝州等十二州縣本年分旱災額賦。有差。○甲戌。

上詣

太皇太后

皇太后宮問安。○戶部議覆江寧巡撫馬祐疏言。淮揚二府屬被水。蒙恩賑濟。所欠康熙元年。至六年額賦。請予蠲免。應如所請。從之。○予故山東巡撫袁懋功祭葬。加祭一次。謚清獻。○乙亥。以故三等阿思哈尼哈番傅天福子傅奇棟襲職。○丙子。免直隸霸州文安等

二十二州縣衛所本年分水災額賦有差。○免江南鳳陽等府屬三十九州縣本年分旱災額賦有差。

十二月。戊寅朔。陞兵部督捕左侍郎多諾為都察院左都御史。○吏部議覆貴州巡撫曹申吉疏言。龍里清平平越普定都勻五衛應俱改為縣。各設知縣典史一員。以安莊衛歸併鎮寧州。黃平所歸併黃平州。新城所歸併普安縣。其守備等官俱裁。應如所請。從之。○

己卯。以內大臣伯噶都為鑲黃旗護軍統領。○免江南六安合肥等九州縣廬州等三衛本年分旱蝗額賦有差。○辛巳。免浙江杭州等九府屬州縣衛所本年分旱災額賦有差。○壬午。

上詣

太皇太后

皇太后宮問安。○諭兵部及督捕衙門。直隸重地理宜肅清。邇來盜賊繁多。大為民害。地方

官怠玩。不能力行禁戢。以致劫掠時聞。盜賊捕獲者少。良民株連甚多。皆因防汎官員。止於降罰。帶罪緝拏。至於有失事最多。不能盡職者。仍令留任。愈致貽誤地方。今盜賊應作何禁戢嚴拏。及以盜案降罰幾次者。作何處分。爾部再行定議具奏。至京城內外盜賊棍徒。肆行無忌。作何責成官役。嚴行緝拏。亦著一併議奏。○癸未。諭兵部侍郎色塞赫曰。每見爾部題授江南浙江西安諸處章京。俱係有資力者。於盛京寧古塔諸處員缺。則屬貧弱之人。護軍校即陞佐領。亦屬越次。宜詳察之。○予故致仕兵部左侍郎黃徽印。祭葬如例。○甲申。陞翰林院掌院學士折庫納為兵部督捕左侍郎。○雲南貴州總督甘文焜疏。請解任葬親。命遵前旨。在任守制。○兵部議覆。兵科給事中劉如漢疏言。推陞武職官員。被叅失事。而未經部覆之前。仍行陞轉。與文職例不畫一。應照文職失事官員。一經題叅

即停其陞轉。應如所請。從之。○丙戌。免江南上元等一十七縣。本年分蝗災額賦有差。○丁亥。兵部等衙門題。內外滿漢文武問刑衙門。除用夾棍拶指外。有另用非刑者。吏兵刑三部處分則例。輕重不一。查吏部例。不論已經致死未死。革職提問。兵刑二部例。未經致死者。降級調用。今應畫一定例。凡滿漢文武官員。另用非刑者。俱革職。免其提問。其武官將婦人用夾棍者。應照吏部例。革職。該管兼轄上司。不據實察報者。降二級調用。該將軍提鎮。不行題叅者。降一級留任。將孕婦用拶指者。降一級調用。該管兼轄上司。不據實察報者。罰俸一年。將軍提鎮。罰俸六個月。其德州等城駐防滿洲武官。拏獲盜賊會同該地方官審理。竟行送部。應將該管上司免議。從之。○己丑。召廣東韶州副將林本植。四川松潘副將何德成射。諭曰。為將者。多馬固在所重。尤須輯和兵民。俾之相安。始稱盡職。○免

江南清河等三縣大河一衝。本年分水災額賦有差。○廣西道御史孫錫齡疏言。交河縣盜犯尹昌吉等。行劫王守正家。殺死事主。自行投首。部議免死。此風一倡。焉知無挾讐報怨。晝夜殺人劫財。即自投首。希圖免罪者。嗣後強賊投首。如止劫財。不曾傷人。許令自新。若傷人者。應仍治以殺人之罪。下部議行。○庚寅。免江南海州贛榆等三十四州縣衛所本年分旱蝗額賦有差。○壬辰。戶部題。河南儀封考城二縣。隄壓挖傷地畝。其額賦應請開豁。其祥符陽武蘭陽虞城四縣。挖傷地畝。雖有荒地撥補。但收穫無期。相應免賦三年。從之。○癸巳。以故一等阿思哈尼哈番明額禮子吳爾三襲職。○陞翰林院侍讀學士傅達禮。為翰林院掌院學士兼禮部侍郎。○甲午。

皇后千秋節。照例行禮。停止筵宴。○乙未。

上詣

太皇太后

皇太后宮問安。○召翰林院掌院學士傅達禮至懋勤殿。諭曰。翰林院起居注。職任重。太關係機密。朕以爾才品優卓。實可信任。故行簡用。爾其黽勉。以副朕意。○罷民間養馬。及用馬駕車之禁。○免湖廣荊門武昌等三十三州縣衛所。本年分旱災額賦有差。○丙申。除湖南長岳衡永四府。巴陵平江等一十六州縣。捏墾包賠地丁額賦。○除江南徐州板荒額賦。○丁酉。免湖南茶陵瀏陽長沙等一十七州縣衛。本年分旱災額賦有差。○太子太保保和殿大學士兼禮部尚書杜立德。以老乞休。慰留之。○喀喇沁多羅杜楞郡王班達爾沙故。遣官致祭。○己亥。諭兵部。步軍校一官。無甚關係。應選年老者補授。今見年老告退者甚多。此等雖年老。若可以効用。還應留任。至不便步履者。方許告退。以後補授步軍校。著補年老之人。以示憐恤之意。○庚子。以

翰林院侍讀學士胡容色。充日講起居注官。
○都察院題。巡鹽御史。滿漢各一員。並無分
辦事務。相應祇差一員。如差滿御史。仍帶筆
帖式前往。得旨依議。若差漢御史。亦著筆帖
式前去。○陞四川松潘副將何德成。為四川
建昌總兵官。○壬寅。

上詣

太皇太后宮問安。○皇子賽音察渾生。○癸卯。
兵部題。凡投誠各官。除近海沿邊省分缺出。

聖祖實錄卷三八

十七

准督提保題補用外。其餘各省投誠官。著有
功績。才技優長者。該督提保題。仍令赴臣部
照例考驗。果與保題之處相符。准照投誠年
分推用。如或不符合。應將保題之督提。照狗庇
例處分。從之。○免江南高郵寶應等十州縣。
鹽城一所。康熙九年分水災額賦。○甲辰。

上詣

太皇太后

皇太后宮問安。○丙午。歲暮。祫祭。

太廟。

上親詣行禮。○遣官祭

永陵。

福陵。

昭陵。

孝陵。○遣官祭太歲之神。○丁未。

上詣

太皇太后

皇太后宮問安。○賜朝正翁牛特。察哈爾奈曼。

聖祖實錄卷三八

十八

四子部落。阿霸垓。喀爾喀。蘇尼特。高齊忒。手
貝勒。貝子。公。及內大臣。大學士。上三旗都統。
副都統。尚書。侍郎。學士。侍衛等宴。○旌表八
旗節婦。滿洲峨爾博妻法氏等二十六人。蒙
古宋俄圖妻杜氏等三人。漢軍唐圻妻柯氏
等五人。烈婦。滿洲牙哈里妻隨氏等六人。蒙
古恩伊參妻奔氏一人。各給銀建坊如例。○
是歲。人丁戶口一千九百四十萬七千五百
八十七。田地山蕩畦地五百四十五萬九千

一百七十頃十八畝有奇。徵銀三千五百九十萬八千七百九十二兩三錢有奇。米豆麥六百二十一萬四千九百一十石二斗有奇。草二百三十萬九千三百八十七束。茶十六萬八千三百四引。行鹽四百四十四萬一千二百七十四引。徵課銀二百七十九萬二千七百五兩有奇。鑄錢二萬九千四十七萬五千八百三十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十八

監修總裁官光祿大夫太保兼太子太傅保和殿大學士兼戶部尚書二番伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十一年壬子春正月戊申朔

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御殿王以下文武各官外藩王

及使臣等上表朝賀照例筵宴○朝鮮國王

李柵遣陪臣鄭致和等表賀冬至元旦

萬壽節及進歲貢禮物宴賚如例○癸丑

上詣

太皇太后

皇太后宮問安○順天府進春○甲寅。

世祖章皇帝忌辰遣官祭

孝陵○乙卯孟春享

太廟。

上親詣行禮○遣官祭太歲之神○丙辰。

上詣

太皇太后

實錄卷三十八

二

皇太后宮問安○庚申。

上詣

太皇太后

皇太后宮問安○辛酉。祈穀於

上帝。

上親詣行禮○以上元節。賜翁牛特察哈爾奈

曼。四子部落鄂爾多斯阿霸垓喀爾喀蘇尼

特高齊忒。貝勒貝子。公台吉等及內大臣

大學士。上三旗都統副都統尚書侍郎學士

侍衛等宴○以喀爾喀故輔國公根敦代青

子垂扎布襲爵○命翰林院掌院學士傅達

禮。熊賜履教習庶吉士○

上以

太皇太后將幸赤城湯泉。諭工部侍郎覺羅查

哈喇。佟弘器。動支帑銀。前往修理道路。毋得

擾民○壬戌。

上御太和殿視朝。文武陞轉各官謝恩○上元

節。賜外藩王貝勒貝子。公台吉等及內大臣

大學士。上三旗都統。副都統。尚書侍郎。學士

侍衛等宴○癸亥。

上詣

太皇太后宮。設燈節筵宴。并賜隨駕大臣宴於

宮門外○乙丑。諭太常寺。祀典關係重大。理

宜敬慎嫺習。近見爾衙門。典禮俱未諳練。又

所奏音樂。多未合節。殊非慎重。禮祀之義。以

後著詳加練習。勿仍前怠忽。褻越祀典○丙

寅。免江南上海青浦二縣。湖廣茶陵衛康熙

十年分旱災額賦有差○丁卯。

上詣

太皇太后

皇太后宮問安○山西巡撫達爾布奔父喪回京事畢。陞辭。諭曰。巡撫職任重大。爾必清白自持。表率屬員。撫綏地方。人民得所。務令兵民相安。方為稱職。爾其慎之○廣東總兵官佟國卿。四川總兵官何德成。陞辭。諭曰。特授爾等總兵之職。務期清白自守。表率屬員。統轄兵丁。使軍民相安。毋侵剋兵餉。俾各得所。如有盜寇。作速剿滅。勿令滋蔓○授和碩安親王岳樂。庶出子塞冷額。和碩簡純親王濟度。庶出子雅布。鎮國公郭蓋子薩克新。俱為三等輔國將軍。鎮國將軍輝塞子齊爾弼。輔國將軍喇克達子巴克達。俱為三等奉國將軍。封固山貝子尚善子根都。固山貝子張泰子吞珠。俱為鎮國公。授故輔國將軍伯奇子阿爾霸。為三等奉國將軍○賜朝正外藩王。

貝勒貝子。台吉塔布囊等。銀幣鞍馬有差○戊辰。

上詣

太皇太后宮問安○東部虎兒凱托科洛姓巴爾達褚。進元狐皮等物。賞賚如例○予故續順公沈永興。祭葬如例○已巳。湖廣巡撫董國興。以病乞休。允之○禮部尚書龔鼎業。以病乞休。慰留之○刑部。都察院。大理寺。遵旨題覆。臣等看閱律文。將前後不符。及參差遺漏之處。詳酌校正。已經刊刻清漢文完畢。進呈御覽。除頒發京城部院衙門。及外省駐防滿洲將軍外。其各省總督巡撫。按察使。俱有刑職掌。相應一并頒發。轉發各地方官。一體遵行。從之○刑部會同督捕衙門。議覆都察院左都御史多諾疏言。逃人逃出。或為竊盜。或為搶奪。事發被獲。先到刑部者。枷責後。又送督捕衙門鞭刺。先到督捕衙門者。鞭刺後。又

送刑部枷責。罪不至死。或致殞命。應從律內所開。二罪俱發。以重者論。罪各等者。從一科斷。嗣後凡逃人逃出。或搶奪。或竊盜。罪至鞭一百者。刑部枷號。臂膊刺字。鞭一百。送督捕衙門。免其鞭責。止面上刺字。不至鞭一百者。刑部止臂膊刺字。送督捕衙門。照例面上刺字。鞭一百。其各處逃人。解到督捕衙門。審明盜逃情實。先送刑部議結。為盜之罪。後移回督捕衙門。議逃走之罪。從之。○庚午。

上詣

太皇太后宮問安。

太皇太后曰。我因身抱微疾。故欲往赤城湯泉。汝若同往。恐誤國事。可不必去。

上奏曰。

太皇太后駕幸湯泉。臣若不隨往侍奉。於心何安。至國家政事。已諭內閣。著間一日。馳奏一次。不致有誤。○諭吏部。各省藩臬以下。丁憂官員。督撫每奏稱才能。請在任守制。恐貪戀

職任者。多方營求。彼此效尤。有乖孝道。其中明定例。嗣後丁憂官員。督撫無得題留。悉令離任守制。○工部侍郎楊運昌。刑部侍郎高珩。請假葬親。從之。○禮部題。順天鄉試。及會試。請照舊例。仍用滿漢監察御史。料理場務。從之。○理藩院議。覆厄魯特噶爾丹台吉疏言。伊兄僧厄台吉在時。曾遣使進貢。今請亦准照常遣使進貢。應如所請。從之。○辛未。

上奉

太皇太后往赤城湯泉。是日啓行。

上隨輦步行。至神武門乘馬。出德勝門。駐蹕輦華城。○壬申。

上駐蹕南口。○遣內大臣阿密達。華善等。察明代諸陵。○以翰林院侍講王澤弘提督順天學政。○癸酉。過八達嶺。

上自山麓下馬。扶

太皇太后輦。

太皇太后念

上步行勞苦。諭乘馬。

上奏曰。此處道險。必扶御輦。於心始安。至坦道

始乘馬。駐蹕岔道○甲戌。

上恐懷來城東浮橋不固。親馳視驗。方請

太皇太后輦行。駐蹕懷來衛○乙亥。免山東臨

清州。康熙十年分蟲災額賦十之二○丙子。

上駐蹕新井堡

二月。丁丑朔。過長安嶺。

上自山麓下馬。扶

太皇太后輦步行。至坦道始乘馬。駐蹕東山廟。

初。東山廟有井。易涸。水不足用。是日山泉忽

湧成河。人馬皆足飲○遣大學士馮溥祭

先師孔子○吏部尚書黃機。請假遷葬。允之

○戊寅。祭

大社

大稷。遣都統尼雅翰行禮○

上駐蹕興仁堡。先馳詣湯泉。視

太皇太后行宮。及湯池而還○己卯。

太皇太后至湯泉宮。

上詣

太皇太后行宮。問安。駐蹕頭堡○庚辰。

上詣

太皇太后行宮。問安○辛巳。

上詣

太皇太后行宮。問安○皇子承祜薨。

上悼之。詣

太皇太后行宮。問安。笑語如常。出。諭內大臣覺

羅塔達曰。恐

太皇太后聞之。傷悼。倘諸王等聞信。前來慰朕

俱令散去○陞宗人府府丞王天眷。為工部

左侍郎。通政使梁鏐。為工部右侍郎。轉刑部

右侍郎。姚文然。為左侍郎。陞左副都御史黃

道行。為刑部右侍郎○癸未。

上詣

太皇太后行宮。問安○

上自聞皇子信鬱悶不已。宗室公。內大臣等奏

曰。

皇上聞皇子之信。往往鬱悶。臣等願皇上移蹕。借境舒懷。

上曰。朕每日詣

太皇太后行宮問安。頗可自慰。既隨

太皇太后至湯泉。如

太皇太后聖躬全安。朕不勝懼忭。穉子事朕。無甚介意。○甲申。

太皇太后聖壽節。遵

懿旨。免行禮。○

上詣

太皇太后行宮問安。○乙酉。諭諸王。貝勒。大臣。兩日內。諸王。貝勒。大臣。奏朕隨意遊覽。可以消遣悶懷。俱已有旨報聞。朕思爾等再三啓奏。無非愛朕之心。所言甚是。朕欲於此行宮相近處。相一平濶之所。暫駐數日。諸王。貝勒。大臣。奏曰。臣等奏請之意。誠欲

皇上保護

聖躬。今蒙睿鑒。諭以溫綸。實天下臣民之大幸也。隨移蹕盤石臺。詣

太皇太后行宮問安。○丙戌。

上詣

太皇太后行宮問安。○丁亥。

孝康章皇后忌辰。遣官祭

孝陵。○

上詣

太皇太后行宮問安。○轉戶部尚書郝惟訥。為

吏部尚書。○禮部題。朝鮮國王貢物。與上年

品色不符。殊失恭敬之誼。應敕該王將怠忽

情由。自行回奏。得旨。該王既將伊國困苦。預

先咨明。從寬免令回奏。○戊子。遣官祭

先農之神。○己丑。

上詣

太皇太后行宮問安。○庚寅。

上移蹕赤城。詣

太皇太后行宮問安。○皇子允禔生。○江寧巡

撫馬祐疏言。科臣柯贊。條奏蘇松常各郡水利。部議令臣查覆。今查各郡支河。見在督民次第疏濬。其歲修責令里民。隨時興工。至老鶴嘴。坍沒於海。舊址無存。難以修築。惟洶河一法。責成府佐。專董水利者。督察於每歲水發時。聚集人夫。用力決排。庶可疏通淤滯。部覆如所請。從之。○辛卯。

上詣

太皇太后行宮問安。以本月二十日。行耕藉禮。

奏辭

太皇太后回鑾。是日。駐蹕新井堡。○壬辰。

上駐蹕岔道。○癸巳。

上回京。詣

皇太后宮問安。○兵部題。直隸各省總督提鎮駐劄之處。與汛守各弁。有相隔千里。或數百里者。如將本身調考。必致汛守空虛。嗣後將汛守官員。離汛調考。相應停止。其庸劣不職之員。該管官竟行揭報。總督提鎮題。叅從之。

○蒿齊忒多羅郡王阿拉布坦故。遣官致祭。○丙申。

上詣

先農壇致祭。

上親行耕藉禮。三推畢。登觀耕臺。命康親王傑書裕親王福全。簡親王喇布。吏部左侍郎王清。戶部尚書米思翰。禮部尚書哈爾哈齊。兵部尚書明珠。刑部尚書莫洛。工部尚書王熙。都察院左都御史多諾。通政使司左通政任克溥。大理寺卿王允祚等。以次耕畢。回宮。因值朝。

日齋戒日期。停止慶賀筵宴作樂。○丁酉。春分。朝。

日於東郊。

上親詣行禮。○撤山東夏鎮關。令中河分司。移駐宿遷收稅。○轉刑部尚書梁清標。為戶部尚書。○戊戌。

上因

太皇太后在湯泉。是日啓行。復往赤城。駐蹕狼山堡。○特陞食正四品俸。仍掌河南道御史李之芳。為都察院左副都御史。○己亥。

上至湯泉。詣

太皇太后行宮問安。駐蹕赤城。○庚子。

上詣

太皇太后行宮問安。○諭兵部尚書明珠。朕奉

太皇太后幸湯泉。朝夕問安外。別無遊幸。今來換班護軍著各減一名。每佐領只著二名來。

馬匹亦勿多備。爾部即傳知。○辛丑。

上詣

太皇太后行宮問安。○巴林。阿霸垓。鄂爾多斯。

蘇尼特。克西克騰。阿霸哈納。王貝勒。貝子。台

吉等。及歸化城等處都統等。來朝。○壬寅。

上詣

太皇太后行宮問安。○諭兵部尚書明珠。聞隨駕官兵。多有疾病。著傳來。令太醫院官醫治。

其病重不能來者。太醫院官前去醫治。又召

太醫院官入諭。亦如前。○癸卯。諭內務府總管噶祿。聞此處食物甚少。隨駕軍士勤勞。若將口外羊賞給。瘦不堪食。可將御用羊酌量少存其餘。散給軍士。爾速傳知。○甲辰。

上詣

太皇太后行宮問安。○乙巳。

上詣

太皇太后行宮問安。○翁牛特。杜楞。郡王畢禮袞達賴。來朝。○予故工部侍郎佟弘器。祭葬如例。○丙午。

上詣

太皇太后行宮問安。○諭兵部尚書明珠。京城來換班兵。皆係窮苦之人。身負行李米糧而來。甚為可矜。爾部可給與官車裝載。并酌量給與鍋帳。到此之日。即按日給與口糧。又召赤城同知胡之睿。問地方百姓生理。胡之睿奏曰。此地人民淳樸。雖不富饒。然各務耕種。秋成所得。除供賦外。尚可餬口。

上曰

太皇太后幸湯泉。去冬修路及收買草料木炭等物。皆用民夫。想甚勞苦。朕心大為不忍。爾在地方。若有所見。可據實陳奏。勿有所隱。○以太常寺卿王天成為宗人府府丞。
三月丁未朔。

上詣

太皇太后行宮問安。○鄂爾多斯鎮國公索諾穆故遣官致祭。○戊申。廣東巡撫劉秉權疏言。暹羅國貢使所進方物。仍與會典不符。較前更少其一。

上以先有諭旨。命禮部免其察議。其攜來貨物。或願運至京師貿易。聽其自運。或願在廣東貿易。令督撫委官監視之。○己酉。

上詣

太皇太后行宮問安。○以都察院左都御史艾元徵為刑部尚書。○命直隸各省提督總兵官。俱照康熙六年例。於十月內自陳。在內武

職各官一體遵行。○庚戌。遣官祭

歷代帝王。○壬子。

上詣

太皇太后行宮問安。○諭戶部侍郎班迪換去步甲。皆窮苦兵丁。還家時。恐路費艱難。爾部酌量給與銀兩。○癸丑。清明節。遣官祭

永陵。

福陵。

昭陵。

孝陵。○福建興化總兵官李時芳。以病乞休。允之。○喀爾喀土謝圖汗遣使進貢。賞賚如例。○乙卯。

上詣

太皇太后行宮問安。○命選滿洲蒙古漢軍新舊生員內。文行兼優者。與漢生員一體入監肄業。○丙辰。

上詣

太皇太后行宮問安。○以江西九江廣信南康

三府旱災將康熙九年存留銀二萬八千兩有奇令該撫速委官賑濟○丁巳。

上詣

太皇太后行宮問安○戶部侍郎班迪等題備秣御馬草餘剩五萬七千束應交地方官照原價發賣得旨不必發賣八旗護軍校前鋒護軍皆係窮苦之人著均散給○戊午。

上詣

太皇太后行宮問安○己未。陞四川按察使宋可發為廣東布政使司布政使○封靖南王耿精忠所尚和碩郡主為靖南王妃○庚申。以原任都察院左都御史杜篤祐補原官○陞河南布政使徐化成為湖廣巡撫○辛酉。

上詣

太皇太后行宮問安○壬戌。江西南瑞總兵官趙光穆以標下効用官為盜降三級調用○甲子。萬壽節。

上詣

太皇太后行宮行禮以駐蹕赤城傳止慶賀筵宴○遣官祭福陵。

昭陵。

孝陵○遣官祭真武東嶽城隍之神○賜衍聖公孔毓圻等宴於禮部○乙丑。

上詣

太皇太后行宮問安○丙寅。以故一等阿思哈尼哈番奇塔烏子阿喇納襲職○丁卯。

上詣

太皇太后行宮問安○戊辰。

上奉

太皇太后回鑾。

太皇太后登輦。

上扶輦行數步。方乘馬行。駐蹕興仁堡○諭宣府總兵官拜音達禮曰。總鎮之職關係甚重。朕觀宣府一帶雖安靜。而昌平。密雲。石匣等處尚多盜案。地方有盜。民生何安。爾當與該

撫會議。必期盜息民安。至於兵丁。全賴軍餉資生。爾必正己率屬。切勿扣剋。否則國法難容。爾其慎之。○予故二等阿思哈尼哈番議政大臣都統特晉祭葬。謚襄壯。○己巳。

上駐蹕東山廟。○辛未。過長安嶺。大雨。

上下馬步行扶輦。

太皇太后曰。此地險峻。天雨路滑。汝步行勞苦。可乘馬緩行。

上奏曰。道路泥濘。臣扶輦而行。於心始安。仍步行至嶺上。

太皇太后欲少憩。

上即趨行。命取涼棚。親視安置。及下嶺時。仍步行扶輦。至平地方。乘馬傍輦而行。駐蹕新井堡。○予故蒙古副都統羅和祭葬如例。○壬申。

上駐蹕懷來衛。○山西陝西總督羅多。以前任河道總督時。隄工冒破錢糧。降二級調用。○癸酉。

上駐蹕岔道。○甲戌。過八達嶺。上步行扶輦。

太皇太后再四諭乘馬。

上奏曰。嶺路崎嶇。不似平地。臣緩步扶輦。無甚勞苦。至平地始乘馬行。駐蹕鞏華城。○以江南興化縣。康熙九年水災。額賦雖經全蠲。而積水未涸。百姓尚難耕種。復諭戶部。將康熙十年分額賦。一併豁免。○兵部督捕左侍郎折庫納題。窩隱逃人有定例處分。至流徙處有窩隱逃人者。未定處分之例。今尚陽堡寧古塔等處流徙人等。如窩隱逃人。不便復擬流徙。應初號三箇月。責四十板。從之。○乙亥。上回京。至神武門下馬。扶

太皇太后輦入

慈寧宮。是日。

上詣

皇太后宮。問安

夏四月。丙子朔。享

太廟遣都統喇哈達行禮○

上詣

太皇太后

皇太后宮問安○己卯。

上詣

太皇太后宮問安○諭戶部江南連年水旱相仍災傷甚重若將舊欠錢糧一并追徵民生愈致困苦朕心不忍其以前未完錢糧實係拖欠在民者著暫行停徵俟民力稍蘓之時再行請旨○陞光祿寺卿王秉仁為都察院

左副都御史○以原任浙江右路水師總兵

官楊富為江西南瑞總兵官○庚辰。

上御太和殿視朝文武陞轉各官謝恩次喀爾喀進貢使臣等行禮○

上詣

太皇太后宮問安○陞左通政任克溥為通政使司通政使○戶部議覆山東巡撫張鳳儀疏言東平所運丁例於該所每丁名下納銀

二錢五分後經改入民籍復於該州每丁納

銀一錢二分而運丁舊額未除苦於重徵請

賜豁免應如所請從之○辛巳雲南貴州總

督甘文焜以貴州鎮遠府火災引罪求罷不

允○吳喇忒鎮國公阿玉錫故遣官致祭○

以戶部尚書梁清標充經筵講官○諭吏部

等衙門江南事務繁劇與他省不同向來立

有定限各官不能如期完結致罹恭罰者甚

多前原任山西陝西總督莫洛曾請寬限積

案始得清楚今應照此例凡江南一切陳積

事件於定限外再寬限一年令地方官料理

完結○壬午以禮部郎中黃虞再為江西按

察使司僉事提調學政○癸未以原任江南

左布政使金鋹為河南布政使司布政使○

甲申。

上詣

太皇太后

皇太后宮問安○

上御弘德殿講官進講畢。諭翰林院掌院學士熊賜履曰。朕前往赤城。見路旁碑上貼一紙。寫害天下之民者。給事中柯聶是也。數字。又無姓名。朕思其言果真。如何不寫姓名。熊賜履奏曰。從來匿名飛語。多是光棍害人之計。縱使寫出姓名。焉知不是懷挾私讐。乘機誣陷。願

皇上加察。

上曰。果有姓名。即可對質。若挾私誣陷。則所欲陷人者。徒自陷耳。○以原任浙江按察使宋琬。為四川按察使。司按察使。○裁江南海門縣缺。歸并通州管轄。○封和碩安親王女。為郡主。授其壻明尚。為和碩額駙。○乙酉。陞內閣侍讀學士王守才。為光祿寺卿。○陞護軍統領覺羅伊爾門。為鑲紅旗滿洲都統。○丁亥。

上詣

太皇太后宮問安。○戊子。以太僕寺卿周卜世

為太常寺卿。○己丑。免江南清河等三縣挑河挖傷田地額賦有差。○庚寅。

上御太和殿視朝。文武陞轉各官謝恩。○

上詣

太皇太后宮問安。○免江南淮安大河二衛康熙十年分水淹田地額賦。○壬辰。

孝端文皇后忌辰。遣官祭。

昭陵。○陞陝西巡撫鄂善。為山西陝西總督。○癸巳。諭吏部。兵部。陝西幅員遼闊。邊疆重地。

防禦宜周。省城有將軍滿兵駐防。總督衙門。應移駐近邊扼要地方。專管陝西。以便控制。其山西省附近京師。應照山東河南例。令該撫料理。爾二部會同詳議具奏。○增設工部滿郎中二員。漢員外二員。分巡京城內外。及玉泉山等處河道。○甲午。

上詣

太皇太后

皇太后宮問安。○乙未。

上詣

太皇太后宮問安○以散秩大臣侯桑閣掌鑾儀衛事務○丁酉。先是。承恩伯周全斌病故。吏部題奏。奉旨。周全斌敕內。雖無襲次。但自海外帶領戰船率眾投誠。功大。作何承襲。著再議。至是。議覆。應准予承襲一次。從之。○陞兵部督捕右理事官周之桂。為太僕寺卿。○陞鑲紅旗副都統赫業。為護軍統領。○戊戌。陞護軍叅領額赫納。為鑲藍旗滿洲副都統。○以靖南王藩下副都統江元勳。為右翼總兵官。叅領劉可禮。為副都統。○庚子。上御太和殿視朝。文武陞轉各官謝恩。○江南道御史施維翰疏。叅福建總督劉手。違例題補興化總兵官。又代靖南王耿繼茂。題請建祠。徇私妄奏。應嚴加處分。下部察議。○增設兵部筆帖式。二十員。○壬寅。

上詣

太皇太后宮問安○諭吏部。原任大學士衛周

祚。品行端方。清慎素著。曩以引疾請告。回籍調理。今閣務殷繁。贊理需人。著即召取。馳驛來京。入閣辦事。○調鑲紅旗蒙古副都統查哈太。為滿洲副都統。○癸卯。陞陝西布政使阿席熙。為陝西巡撫。○乙巳。陞太常寺卿周卜世。為大理寺卿。○命侍衛吳丹。學士郭廷祚。閱視河工。繪圖進呈。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之三十九

監修總裁官光祿大夫太保保太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十一年壬子五月丙午朔

實錄卷三十九

上詣

太皇太后

皇太后宮問安○以江南安慶等七府滁州等

三州連歲被水淹埆埔等災兼淮安揚州饑

民流離載道命該督撫將現存捐納米石并

寧國太平等府存貯米穀檄令各府州縣照

民數多寡速行賑濟○丁未戶部議覆安徽

巡撫靳輔疏言臨淮靈璧二縣從前虛報開

墾并拋荒水衝沙壓田地共四千六百一十

六頃有奇實係小民賠糧請將康熙十年以前額賦盡行豁免應如所請從之○旌表陝

西靖遠衛烈婦馬海妻楊氏給銀建坊如例

○戊申以山東沂水縣康熙八年地震之後

兼被水災命將康熙八年起至十一年止逃

亡四千四百餘丁荒地八百七十六頃有奇

一應額賦悉行蠲免○以靖南王耿精忠藩

下故三等精奇尼哈番呂應學之子呂雲翔

襲職○己酉

實錄卷三十九

上詣

太皇太后宮問安○

上幸瀛臺○辛亥免山東曹單二縣本年分挑

河挖傷田畝額賦○癸丑

上自瀛臺回宮○陞王府長史車倫為鑲紅旗

蒙古副都統○甲寅陞太僕寺卿周之桂為

太常寺卿○陞陝西隴右道李興元為雲南

按察使司按察使○丙辰諭兵部從來國家

承平軍事不宜廢弛

太祖

太宗時。兵器整齊堅銳。今器械雖鮮明。恐用時未必堅利。此係爾部職掌。嗣後可詳加點閱。以副朕不忘武備之意。○戊午。

上詣

太皇太后

皇太后宮問安○遣官祭

關聖帝君○以翰林院編修董訥為雲南鄉試正考官。兵部主事邵佳印為副考官。工部

平定縣志卷二十九

員外郎吳元龍為貴州鄉試正考官。戶部主事楊西猗為副考官。○雲南貴州總督甘文焜疏報。臻剖凱里二司所屬苗蠻。狡悍非常。素稱難治。近逆苗阿福倡亂。臣發兵剿禦。逆首就擒。又大敗逆苗餘黨於地五等寨。及白崖地方。擒斬一千三百餘人。其餘悉就安插。得旨嘉獎。下部議叙。○己未。陞陝西按察使吳努春為陝西布政使司布政使。○辛酉。戶部議覆山東巡撫張鳳儀疏言。前任巡撫袁

懋功遺疏稱新城鄒平青城三縣百姓賠荒苦累。奉有俟新任巡撫查明具題之旨。今臣親詣新城等縣逐一確查。與前撫臣所題無異。應將三縣地丁錢糧自康熙十年起照數豁免。仍令該撫設法招徠開墾。從之。○贈靖南王耿精忠藩下故右翼總兵官三等精奇尼哈番呂應學太子少保。予祭葬如例。○壬戌。以山東兗州府屬金鄉等六處田地二萬八千七百六十八頃有奇。被黃河衝決淹沒。將康熙十年分錢糧悉行豁免。○陞大理寺少卿錢綬為太僕寺卿。○癸亥。減戶部工部關差員數。照鹽差例。不論滿洲漢軍漢人序俸掣籤。每關差司官一員。筆帖式一員。○甲子。

上詣

太皇太后宮問安○乙丑。以

世祖章皇帝實錄告成。禮部具儀注。監修總裁大學士等奏請呈送

大內尊藏。

上御太和殿。設鹵簿。奏樂。監修總裁。副總裁。纂修等官。奉表恭進。

實錄。行禮畢。諸王。貝勒。貝子。公。及文武各官等。奏言恭惟。

世祖章皇帝。神功聖德。遠邁唐虞。纂述成書。光華萬世。臣等不勝懼忭。禮當慶賀。

上傳制曰。

世祖章皇帝。功德配天。纂修已成。朕心懽慶。與卿等同。於是諸王以下。文武各官。行慶賀禮。

○丙寅。

上幸德勝門外。觀麥。○免江南泰州。江都。山陽。三州縣。康熙九年分未完存留錢糧七千五百有奇。○命山東濟東道。自德州移駐省城。兼管通省驛傳事務。○予故致仕漢軍副都統祖澤培。祭葬如例。○丁卯。

上詣

太皇太后

皇太后宮。問安。○辛未。夏至。祭

地於

方澤。

上親詣行禮。○壬申。以江南淮揚所屬高郵。寶應等七州縣。屢被災傷。命地方官。速支庫銀。賑濟。○癸酉。

上詣

太皇太后宮。問安。○甲戌。以平西王吳三桂。藩下。恭領張足法。為雲南援剿右鎮總兵官。

六月。乙亥朔。江寧巡撫馬祐疏言。高郵。興化。等州縣。歷年水災。蒙

皇上屢次蠲賑。保全災黎。今歲新涸田地。勸民播種。二麥將成。不意又遭清水潭隄岸衝決。田廬仍被淹沒。前部覆督臣麻勒吉。所請捐賑之事。令於本年四月終停止。今各州縣田地。復遭衝淹。涸出無期。民生困苦。視昔愈甚。懇請照常賑濟。俟水涸可耕。停止。下部議行。○丙子。予故致仕都察院叅政佟國印。祭葬。

如例○丁丑。予故三等阿思哈尼哈番雅喇祭葬如例○戊寅。

上詣

太皇太后

皇太后宮問安○己卯。雲南貴州總督甘文焜。請假回旗葬母。部議邊疆要地。且道遠稽遲。不准離任。得旨。甘文焜。准假葬母。事竣。著速往赴任。其總督事務。令該撫暫行署理○庚辰。陞監察御史巴錫。為陝西按察使。司按察使○辛巳。禁止官兵經過地方。不得多索車馬夫役。并地方官吏。借端私派。以累里民○壬午。

上詣

太皇太后宮問安○甲申。

上詣

太皇太后

皇太后宮問安○乙酉。

上幸南苑行圍○以科爾沁故和碩土謝圖親

王巴達禮子額駙巴雅斯呼朗襲爵○戊子。戶部題。浙江所徵婦女小口鈔銀。改為食鹽課銀。直隸流寓人丁。及山西久流近流人丁。均改為實在人丁。幼丁改為新編人丁。應將賦役全書更正遵行。從之○裁山西太原副將員缺。改設總兵官一員○己丑。以戶部郎中王士正為四川鄉試正考官。工部員外郎鄭日奎為副考官。戶部郎中郭昌為廣東鄉試正考官。吏部主事彭襄為副考官。刑部郎中陸燾為廣西鄉試正考官。吏部主事毛達為副考官。刑部郎中張好奇為福建鄉試正考官。禮部主事趙崙為副考官○庚寅。

上還自南苑詣

太皇太后

皇太后宮問安○辛卯。免山東堂邑等三縣本年分雹災額賦有差○壬辰。

上詣

太皇太后宮問安○乙未。以原任雲南義勇營

總兵官馬惟舉為福建興化總兵官○丙申。

上詣

太皇太后

皇太后宮問安○丁酉。南城御史高永印題。浙

江民孫吉士控告兩浙巡鹽御史杭啓常錫

印。私派詐贓。得旨著都察院左副都御史李

之芳。吏部郎中宜昌阿。刑部郎中葛思泰等

前往察審○戊戌。增設江南山陽縣管河主

簿一員。分防高家堰隄工○免陝西寶雞縣

本年分旱災額賦十之三○己亥。

上御太和殿視朝。文武陞轉各官謝恩○諭刑

部。刑獄重地。人命攸關。天時炎暑。急宜清理。

雖熟審見有定例。但已結大案中監禁諸犯。

或有無知而罹法網。小過而陷重辟者。株連

無辜。久淹羈禁。朕心每念及此。深為惻然。茲

特遣大學士圖海等會同三法司。詳加審鞫。

凡有罪可矜疑者。即與察明事由。開列具奏。

務使情法允協。有枉必伸。以副朕欽恤刑獄

至意○戶部議覆浙江巡撫范承謨疏言。石

門縣康熙三年分未完輕齎銀兩。平陽縣康

熙元年二年三年分未完月糧。均係地荒。小

民包賠。請賜蠲免。應如所請。從之○復湖廣

起運漕糧。每石給運軍贈貼米二斗○陞韶

州副將林本植為山西太原總兵官。管轄太

原平陽汾州潞安四府。澤。沁三州○辛丑。

諭工部。河道屢年衝決。地方被災。民生困苦。

深軫朕懷。據差往視決口侍衛吳丹。學士郭

廷祚。回京繪圖進呈。朕觀黃河自宿遷以至

清河。皆為緊要。雖有遙隄一層。恐未足捍蔽

水勢。應否於遙隄之外。再築遙隄。爾部即行

河道總督漕運總督會同相視。商酌築隄。果

否有益。併所需錢糧。逐一詳確議奏○先是

兵部尚書王弘祚。以老乞休。

上念其舊勞。命乘傳歸。仍諭滇省藩司給俸。至

是。王弘祚疏辭。

上諭曰。卿在官著有功績。引年乞休。特給俸祿。

以資頤養。其仍遵旨祇受。不必控辭。○陞吏部郎中杭愛。為山西布政使司布政使。甘肅按察使成額。為甘肅布政使司布政使。刑部郎中伊圖。為甘肅按察使司按察使。○壬寅上詣

太皇太后宮問安。○以原任內國史院大學士衛周祚。為保和殿大學士兼戶部尚書。○癸卯。工部議覆。欽天監相度官蔡九旌等呈報。德勝門外。窰座三十三所。又舊窰座十所。正當都城來脉。風水所關。請行禁止。應限一月內。拆毀填平。從之。○除貴州省二十七山場小稅。

秋。七月。甲辰朔。享

太廟。

上親詣行禮。○丙午。

上詣

太皇太后宮問安。○丁未。以

世祖章皇帝實錄告成。賜監修總裁官銀幣鞍

馬。纂修官等銀幣有差。○戊申。雲南右鎮總兵官張足法。陛辭。

上諭曰。茲特簡授爾邊疆總戎之職。爾其練習兵卒。修整器械。俾兵民相安。副朕一體愛養至意。○己酉。叙征緬甸獲偽永曆朱由榔。及進雲南貴州征水西功。授都統何進忠。一等精奇尼哈番。護軍統領夏國相。副都統吳應正。俱一等阿思哈尼哈番。都統吳國貴。副都統高得捷。高拱宸。叅領傅奇棟。俱二等阿思哈尼哈番。副都統楊坤故。授其子楊延先。一等阿思哈尼哈番。護軍統領巴克勇。年老休致。副都統李可植。傅文元故。授伊等之子巴養元。李廷璧。傅天桂。俱二等阿思哈尼哈番。餘護軍叅領楊奉元等一百二十七員。各給世職有差。○庚戌。

上詣

太皇太后

皇太后宮問安。○旌表湖廣黃安縣節婦匡氏。

給銀建坊如例○壬子。陞都察院左副都御史王秉仁為總督倉場戶部右侍郎○以故承恩伯周全斌子周公仁襲爵○免江南高郵州康熙十年分旱災湖地租銀○癸丑。

上詣

太皇太后宮問安○免順天府霸州本年分水災額賦十之三○丙辰。

上出德勝門觀禾還詣

太皇太后宮問安○戊午。中元節遣官祭

永陵。

福陵。

昭陵。

孝陵○

上御太和殿視朝。文武陞轉各官謝恩。次厄魯特進貢使臣等行禮○翰林院掌院學士傅達禮等進呈翻譯大學衍義并請即付剞劂廣行頒布得旨書留覽餘依議○己未。禮部尚書龔鼎孳以病乞休。命給假調理。病痊供

職不必解任○庚申。諭吏部。殫心効職者。臣子之當然。晉爵酬庸者。朝廷之大典。茲

皇考實錄告成。克昭一代之典章。永垂萬世之謨範。其監修總裁等官著有功勞宜加寵錫。監修總裁官內大臣吏部尚書中和殿大學士巴泰。總裁官都統吏部尚書中和殿大學士圖海。戶部尚書保和殿大學士索額圖。太子太保戶部尚書保和殿大學士李蔚。太子太保禮部尚書保和殿大學士杜立德俱著加太子太傅。原任太子太保禮部尚書保和殿大學士魏裔介亦著加太子太傅。副總裁其纂修以下各官生監著分別議叙○陞通政使任克溥為都察院左副都御史○以翰林院侍講沈荃為浙江鄉試正考官。大理寺右評事姚祖頊為副考官。光祿寺少卿于嗣登為江西鄉試正考官。中書科中書童欽承為副考官。禮科給事中朱裴為湖廣鄉試正考官。行人司司正劉梅為副考官○辛酉。

上詣

太皇太后宮問安○召陝西按察使巴錫諭曰
臬司職典刑名關係最重茲特簡授爾此職
凡事須精詳公慎勿枉無辜以副朕任
用之意○丙寅

上詣

太皇太后

皇太后宮問安○丁卯賜福建興化總兵官馬
惟興鍍金盔甲全副表裏各二疋遣一等侍
衛吳丹傳諭曰茲授爾福建濱海重地特加
恩賚異於別鎮爾須加意鎮守以盡厥職○
戊辰

上御太和殿視朝文武陞轉各官謝恩次喀爾
喀進貢使臣等行禮○陞太常寺卿周之桂
為通政使司通政使○己巳以翰林院編修
汪肇衍為陝西鄉試正考官戶部主事葉映
榴為副考官刑部員外郎詹惟聖為江南鄉
試正考官內閣中書沈印范為副考官○免

湖南衡州衛康熙六年分未完屯餉○庚午

上詣

太皇太后

皇太后宮問安○辛未河南巡撫郎廷相丁母
憂命回旗守制○予故正黃旗散秩大臣顧
應原任河南開歸總兵官高第祭葬如例
閏七月甲戌朔陞正紅旗副都統傑殷為護
軍統領○乙亥

上詣

太皇太后宮問安○諭宗人府貝子尚善性行
端良凡事小心敬慎勤勞為國著仍復多羅
貝勒○丙子予故蒙古副都統哈什馬祭葬
如例○戶部議覆吏科給事中趙之符滇省
賦稅一疏查順治十六年出征雲南時平西
王并經畧巡撫等會議因糧米不敷以四斛
作一石徵收今地方已定此加徵兩斛米麥
應於康熙十二年為始除免從之○丁丑以
候補副都統喇哈為鑲黃旗蒙古副都統○

達賴喇嘛遣使進貢。賞賚如例。○以吳喇忒故鎮國公阿玉錫子諾門襲爵。○戊寅。

上詣

太皇太后

皇太后宮問安。○陞太僕寺卿錢繼為太常寺卿。○己卯。予故致仕太子太保禮部尚書烏赫祭葬如例。○免浙江太平、松陽、景寧三縣康熙六年分民欠地丁銀兩。○庚辰。

上詣

太皇太后宮問安。○免湖南常寧縣康熙三、四、五年分民欠地丁銀兩。○調正紅旗蒙古副都統覺羅杜爾巴為滿洲副都統。○辛巳。戶部議覆浙江巡撫范承謨浙省白糧一疏。查全書內嘉興府每正米一石加耗米八斗。湖州府每正米一石加耗米五斗五升。俱征糙米。令運丁春辦。今據該撫疏稱運丁春辦稽遲。請將兩府正白米一石外。緊給白耗米四斗五升。誠為軍民兩便。應列入全書遵行。從

之。○予故護軍統領費雅思哈祭葬。謚僖恪。

○壬午。吏部尚書對喀納等疏言。九卿會議凡書辦犯贓。係在京部院者。司官雖不知情。擬罰俸六個月。其在外省者。或官吏通同婪贓。官則脫卸。吏承其罪。亦未可知。仍照失察例草職。若官果不知情。免草職罰俸一年。

上責之曰。衙役作弊。小民受害無窮。所司官理應從重處分。以清積蠹。今爾等俱已富貴。不念小民困苦。惟恐重處屬員。致有干涉。故將在外在京。分別定議。明係瞻徇。朕擢爾吏部尚書。自應殫心為國。矢公報効。乃粉飾阿徇。毫無主見。殊負朕委任之意。○甲申。免順天府固安縣本年分水災額賦。直隸內黃、魏縣本年分旱災額賦有差。○乙酉。

上詣

太皇太后宮問安。○陞左通政白尚登為太僕寺卿。○丙戌。喀爾喀車臣濟農台吉遣使進九白年貢。宴賚如例。○以原任貴州巡撫佟

鳳彩為河南巡撫○丁亥召陝西布政使杭愛諭曰朕以爾才能向欲內用今因外省事重特授此職督撫之下藩司職掌重大不但所司錢穀凡屬員臧否皆關係焉爾須持身清正表率下僚若有貪惡官吏勿得徇縱申詳督撫即行叅奏地方百姓爾必加意撫綏克盡忠誠以副朕簡用之意如果賢聲克著朕當優擢○諭刑部設立刑法原以戢奸禁暴必事情重大方可用刑嚴訊近見內外問刑衙門嘗有濫用夾棍致斃人命者朕心殊為不忍以後審問事情爾等務加詳慎勿得輕聽問官不分輕重動輒夾訊希圖草率結案仍將審事官員嚴加申飭不時稽察其有任情濫刑者即行指實題叅務使重刑不得濫及無辜以副朕矜恤民命至意若有不應夾訊之人擅用夾棍及罪不至死徑行夾死者應作何處分爾部會吏兵二部定議具奏尋議若內外問刑官將案內應夾罪不至死

之人夾訊致死者罰俸一年將不應夾訊之人擅行夾訊者降一級留任或被夾之人即時身死者降三級調用或疊行夾訊致死者革職若有別項情由按罪定擬其司官有將不應夾訊之人回堂堂官不行詳慎輕聽夾訊者罰俸六個月從之○以多羅順承郡王勒爾錦掌宗人府事○以故三等阿思哈尼哈番雅喇親弟之子楊壽襲職○戊子上御太和殿視朝文武陞轉各官謝恩次朝鮮國使臣李樉等行禮○以翰林院編修郭棻為河南鄉試正考官戶部主事鄧秉恒為副考官○己丑上詣太皇太后皇太后宮問安○諭講官等方今秋來正宜講書爾等即於二十五日進講○喀爾喀厄爾德尼伊爾登台吉遣使進九白年貢宴賚如例○癸巳

上詣

太皇太后宮問安○文華殿大學士馮溥以老乞休慰留之○予故義王孫徵淳祭二次造墳立碑○陞前鋒叅領紀爾他布為正紅旗蒙古副都統○甲午以江南沭陽縣水災將本年分正耗漕米俱令折徵并免漕贈銀米○免山東魚臺縣本年分蟲災額賦十之三○內閣翰林院題翰林職掌專事纂修與部院衙門不同若非優通文義難以辦理嗣後滿洲侍讀學士以下各員缺應聽該衙門照品級考開載應陞官員內擇文義優通者擬正陪咨送吏部題補從之○乙未免河南汲縣新鄉胙城三縣本年分旱災額賦有差○丙申以翰林院檢討楊仙枝為山東鄉試正考官內閣中書張鵬為副考官行人司行人余國椿為山西鄉試正考官內閣中書張衡為副考官○丁酉諭吏部庶吉士李錄子等學習已久今加考試應分別授職除蔡啓傳

孫在豐徐乾學已授修撰編修外李錄子張英牛紐李光地朱鼎陳夢雷耿願魯趙文暉王掾朱阜王維珍孟亮揆王寬祖文謨俱著授翰林院編修檢討車萬育唐朝尋黃斐孔興鈺俱著以科道用德赫勒博濟沈獨立程文尋李玠李夢庚張鵬翮高璜許孫荃劉恒祥吳本立俱著以部員用○予故正黃旗散秩大臣馬哈祭葬如例○戊戌

上御太和殿視朝文武陞轉各官謝恩○己亥

上詣

太皇太后宮問安○索倫副都統品級扎木素等進貢貂皮賞賚如例○辛丑

上詣

太皇太后

皇太后宮問安○吏部議覆河南道御史嚴曾渠疏言凡異途出身之人不得以正印官用如果有才能稱職之員該督撫特疏保舉吏部方以正印推陞此定例也伏見卓異之員

皆令該督撫疏內開列本官所行事實。保舉異途人員。反不開列事實。恐庸才得以冒濫。請嗣後督撫保舉異途出身等官。亦於疏內開列事實。應如所請。從之。○命陝西富平。蒲城。二縣糧米。永行改折。○免陝西西安。鳳翔。漢中三府屬。康熙四五年分未完存留銀米。○壬寅。免江南儀真衛。康熙元年三年分軍欠地丁錢糧。

八月。癸卯朔。免山西潞城縣本年分雹災額。

賦十之三。○以鄂爾多斯故鎮國公索諾穆。

子杜稜襲爵。○甲辰。秋分。夕。

月於西郊。遣都統覺羅畫特行禮。○命發淮安庫銀賑濟邳州宿遷桃源清河四州縣水災。飢民。○丙午。

上詣

太皇太后

皇太后宮問安。○免山東濰縣本年分蝗災額。

賦。○丁未。遣大學士李蔚祭。

先師孔子。○議政王大臣等議覆御史孟熊飛疏言。孫可望係流寇張獻忠餘黨。擾亂邊陲。後為夥賊李定國所敗。眾散勢孤。窮蹙乞降。前有重大之罪。後無纖微之勞。我國家格外殊恩。授以義王顯爵。及伊身死。已襲替二次。今孫徵淳故。若仍令再襲原爵。則後此世世冒濫無已。况本朝定制。從無投誠官員。世襲罔替之例。請將孫可望王爵。停其襲替。或減等降封。查孫可望投誠來歸。越封義王。兩次准襲。實已過分。應如所請。降授義公。又疏稱。伊斯丹津。單身來歸。錫之王爵。無非柔遠至意。但上朝時。與宗室諸王。比肩同列。似亦非宜。或隨本旗行走。或應另坐何處。乞教部定議。查伊斯丹津。投順封王。已經與宗室諸王。同列。年各應無庸議。得旨。義王降為公。其公銜止加一義字。於例不合。又伊斯丹津。單身逃歸。並無大功。遽授王爵。太優。著一併再議具奏。○戊申。祭。

大社

大稷。

上親詣行禮○以翰林院修撰蔡啓傳為順天

鄉試正考官。編修徐乾學為副考官○辛亥。

太宗文皇帝忌辰。遣官祭

昭陵○壬子。

上幸南苑行圍○免江南高郵寶應等五州縣。

本年分水災額賦有差○禮部等衙門題。治

理曆法南懷仁疏。叅奸民楊燦南捏造真曆

言一書。譏刺欽天監曆。審據楊燦南稱欽天

監曆。開載今年立春立秋閏月俱錯。得旨著

大學士圖海李蔚杜立德學士哈占達都郭

廷祚宋德宜傳達禮。熊賜履及九卿科道等

官會同測驗○癸丑。

太祖高皇帝忌辰。遣官祭

福陵○諭禮部。帝王致治。首在維持風化。辨別

等威。崇尚節儉。禁止奢侈。故能使人。心淳樸。

治化休隆。近見內外官員軍民人等。服用奢

靡。僭越無度。富者趨尚華麗。貧者互相效尤。

以致窘乏。為非盜竊詐偽。由此而起。人心嚮

凌。風俗頹壞。其於治化所關匪細。今應作何

分別。務行禁止。著九卿科道會同嚴加確議

定例具奏○甲寅。

上詣

太皇太后宮問安○諭兵部尚書明珠。左都御

史多諾。曆法乃國家要務。關係匪輕。已有旨

命爾等。會議南懷仁楊燦南互相叅告之事。

朕於內外。總無異視。爾等務體朕心。勿執偏

見。孰是孰非。虛公看驗。務期永行無弊。至飛

灰候氣。法久不傳。難以憑信。爾等其知之○

乙卯。陞靖南王藩下左翼總兵官馬九玉。為

藩下都統○大學士圖海等。以楊燦南不諳

飛灰候氣之法。無從測驗。覆奏。命將楊燦南

交刑部議罪○議政王大臣等遵旨再議。義

王降為公爵。應稱為慕義公。伊斯丹津。係厄

魯特額實汗幼弟之子。怨其兄弟拋棄妻子。

部屬誠心歸命。封為多羅郡王。實為太優。但已經年各相應止。將伊斯丹津本身。仍留王爵。隨旗上朝。從之。○丙辰。

上詣

太皇太后

皇太后宮。問安。○以蒿齊忒故多羅郡王阿拉布坦之子車布登襲爵。○旌表江南潛山縣烈婦龔自成妻蘇氏。給銀建坊如例。○丁巳。上御太和殿視朝。文武陞轉各官謝恩。次喀爾

喀尼魯特進貢使臣等行禮。○予故太子少保浙江水師提督張杰祭葬如例。○以戶部郎中遲煊為廣東按察使司僉事。提調學政。○已未。

上詣

太皇太后

皇太后宮。問安。○都察院左副都御史任克溥疏言。定例。在外王公將軍。既不管理民事。其逃人事情。亦不必令其察審。嗣後直隸各省

王公將軍所屬逃人。請交與就近各該督撫審理。奉天將軍所屬逃人。交與盛京刑部審理。惟寧古塔地方。仍聽該將軍審理。從之。○以蘇尼特故多羅貝勒丹津之子沙利喀喇沁故多羅杜楞郡王班達爾沙之兄札什。各襲爵。○庚申。

上御經筵。講畢。賜大學士九卿詹事及講官等宴。○以靖南王藩下副都統曾養性為藩下左翼總兵官。○辛酉。

上詣

太皇太后

皇太后宮。問安。○壬戌。

上以

太皇太后聖躬違和。奉

太皇太后。幸遵化縣湯泉。扶輦步行數武。然後

上馬隨行。至進膳駐蹕處。

上皆扶掖升降。是日駐蹕通州。○癸亥。

上駐蹕三河縣城南。○甲子。

上駐蹕薊州城西○閱薊州官兵射。諭城守都司僉書蔣元泰等曰。爾等訓練甚善。但兵以食為天。須全給軍餉。俾沾實惠。勿得侵剋。地方如有盜賊。須嚴行追緝。勿致踈縱。○乙丑。上駐蹕稻地里村。○丙寅。上駐蹕明月山前。○丁卯。車駕將近湯泉。上先馳往。詳閱。太皇太后行宮。復馳回。隨太皇太后行。至牌坊外下馬。步行扶輦。至行宮候。太皇太后降輦入宮。上素服。率王。貝勒。大臣。詣孝陵行禮。舉哀。○是日。上駐蹕鮎魚池城內行宮。○遣官祭歷代帝王。○遣官祭城隍之神。○工部左侍郎覺羅查哈喇。右侍郎禪布。俱革去侍郎。仍留世職。隨旗行走。以。

太皇太后幸湯泉時。伊等修橋草率。故也。○戊辰。上詣太皇太后行宮。問安。○己巳。上詣太皇太后行宮。問安。○庚午。上詣太皇太后行宮。問安。○辛未。上詣太皇太后行宮。問安。○免山東武城等三縣。本年分蝗災額賦。有差。○予靖南王藩下故都統夏有功。祭葬如例。○壬申。上詣太皇太后行宮。問安。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之三十九

實錄卷三十九

三十一

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十

監修總裁官光祿大夫太僕保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十一年壬子九月癸酉朔

實錄卷四十

一

上詣

太皇太后行宮問安○甲戌

上詣

太皇太后行宮問安○乙亥

上詣

太皇太后行宮問安○陞靖南王藩下叅領易

明為藩下副都統○免江南沐陽縣本年分

水災額賦有差○喀爾喀色冷阿海台吉遣

使進九白年貢宴賚如例○丙子

上詣

太皇太后行宮問安○諭翰林院掌院學士傅

達禮侍讀學士胡容色曰朕奉

太皇太后幸湯泉昨蒙

慈諭令朕遊覽近地訪問民生其以翌日往三

屯營幸景忠山○陞中和殿學士哈占為工

部左侍郎以原任兵部右侍郎圖爾泰為工

部右侍郎○丁丑

上詣

實錄卷四十

三

太皇太后行宮問安○

上幸景忠山過遵化縣閱兵於西門外駐蹕三

屯營南○戊寅

上駐蹕灤河○免湖南各屬康熙七八九年分

捏報墾荒錢糧○免山東博平等五州縣本

年分蝗災額賦有差○己卯

上回鮎魚池城過三屯營閱兵於東門外至湯

泉詣

太皇太后行宮問安○科爾沁和碩卓禮克圖

上詣

親王鄂輯爾輔國公圖納黑等來朝○庚辰

太皇太后行宮問安○辛巳

上詣

太皇太后行宮問安○

上諭大學士等曰江西廬陵吉水上高寧州四

州縣暨南昌九江衛頻年荒旱災疫流行荒

蕪田地五千四百餘頃命戶部蠲其逋賦仍

敕巡撫速行招墾○壬午

實錄卷四十一

三

上詣

太皇太后行宮問安○翁牛特鎮國公奇塔武

來朝○癸未

上詣

太皇太后行宮問安○甲申

上詣

太皇太后行宮問安○乙酉

上詣

太皇太后行宮問安○丙戌

上詣

太皇太后行宮問安○

上幸黃家營。駐蹕稻溝峪○烏朱穆秦車臣親

王蘇達尼來朝○丁亥。

上回鮎魚池城詣

太皇太后行宮問安○戊子。

上詣

太皇太后行宮問安○柰曼台吉鄂齊爾來朝

○己丑。

上詣

太皇太后行宮問安○庚寅。

上詣

太皇太后行宮問安○辛卯。

上詣

太皇太后行宮問安○壬辰。

上詣

太皇太后行宮問安○禮部議覆四川湖廣總督蔡毓榮疏言川湖二省移駐弁兵既經安

插即同土著伊等子弟有讀書者似應准其入籍考試應如所請從之○喀爾喀車臣汗扎薩克圖汗遣使進九白年貢宴賚如例○癸巳。

上詣

太皇太后行宮問安○甲午。

上詣

太皇太后行宮問安○乙未。

上詣

太皇太后行宮問安○福建總督劉斗以留用赴餉廢弁葉祿降五級調用○山西道御史馬大士疏叅廣西將軍孫延齡原無奇勲異績。

皇上垂憐定南王之嗣令其掌管王旗異數殊恩蔑以加矣為孫延齡者自宜凜遵國憲以盡臣子之誼乃有可異者如題補營弁薛起鳳一事部議以廣西非係題補省分覆奏不行屢經奉旨孫延齡屢行陳奏必欲違國家

之成例。用本旗之私人。是誠何心。伏乞嚴敕。以為恣肆不臣者之戒。下部察議。○丙申。

上詣

太皇太后行宮問安。○丁酉。

上詣

太皇太后行宮問安。○命福建總督自漳州移駐省城。○戊戌。

上詣

太皇太后行宮問安。○巴林固山貝子滿朱習

里故。遣官致祭。○己亥。

孝慈高皇后忌辰。遣官祭

福陵。○

上詣

太皇太后行宮問安。○庚子。

上詣

太皇太后行宮問安。○辛丑。

上詣

太皇太后行宮問安。○科爾沁和碩土謝圖親

王額駙巴雅斯呼朗故。遣官致祭

冬。十月。壬寅朔。享

太廟。遣都統覺羅巴爾布行禮。○遣官祭

永陵。

福陵。

昭陵。

孝陵。○頒康熙十二年時憲曆。○癸卯。

上詣

太皇太后行宮問安。○甲辰。

上奉

太皇太后回鑾。駐蹕明月山前。○

皇太后聖壽節。在京諸王大臣侍衛等照例行

禮。遵

懿旨。停止筵宴。○乙巳。

上駐蹕顏家工。是日聞

皇后違和。

上召學士傳達禮諭曰。前日自京城來奏。皇后有恙。朕召太醫院官武超衆。問以方藥。因諭

云朕以

太皇太后聖躬違和奉駕來幸湯泉。若得

太皇太后霍然全愈。朕懷庶慰。爾勿得妄行奏聞。恐致

太皇太后憂慮。而武超衆不解朕意。遂爾奏聞。蒙

太皇太后慈諭云。我已痊愈。中宮有恙。可速往視之。朕奏云。臣特奉

太皇太后來此。豈敢頃刻違離。遂爾不行。適又自京城來奏。皇后病劇。

太皇太后慈諭云。爾欲奉我同行固是。但中宮病劇。可速往視。若病勢痊愈。不妨再來相迎。況爾奉我同行。固為孝思。遵命前往亦孝道也。朕不敢違

太皇太后慈旨。即刻起行。一省皇后。仍即來迎。遂於申時起行。○丙午。

上回宮詣

皇太后宮問安。○丁未。

上以

皇后病痊。遂往迎

太皇太后。至平家潭。命衆緩行。

上減從前行。至邦均。迎見

太皇太后問安。并奏

皇后病痊。遂奉

太皇太后。至三河縣駐蹕。○以故三等阿思哈

尼哈番費雅雅思哈子蘇旦襲職。○戊申。

上駐蹕平家潭。○己酉。

上入神武門。隨

太皇太后輦。至

慈寧宮親扶

太皇太后降輦。入宮後。

上詣

皇太后宮問安畢。回宮。○以故義王孫徵淳之弟孫徵灝。降襲慕義公。○庚戌。

上詣

太皇太后宮問安。○壬子。陞浙江巡撫范承謨

為福建總督○轉吏部右侍郎陳數永為左侍郎。陞左副都御史李之芳為吏部右侍郎○旌表福建漳浦縣節婦蔡邦興妻李氏。給銀建坊如例○癸丑。禮部右侍郎田種玉。以先一日拆看考官紅本。降三級調用○以翰林院侍講學士陳廷敬。充日講起居注官○停長蘆兩淮兩浙河東巡鹽御史差。鹽法事務。歸并巡撫管理○厄魯特達賴汗遣使進貢。賞賚如例○甲寅。

上詣

太皇太后宮問安○以翰林院編修孫在豐為順天武鄉試正考官。檢討李天馥為副考官○乙卯。陞內閣侍讀學士郭四海為內閣學士兼禮部侍郎○予故一等精奇尼哈番色楞車臣祭葬如例○丙辰。上御太和殿視朝。文武陞轉各官謝恩。次厄魯特。喀爾喀進貢使臣等行禮○戊午。

上詣

太皇太后宮問安○予故致仕杭州副都統吳汝玠祭葬如例○庚申。諭兵部。都統。副都統。職司軍務。關係重大。必得其人。乃克勝任。以後漢軍都統缺出。著將該旗副都統。應陞官員。見任提督。一并開列具奏。副都統缺出。著將該旗參領。應陞官員。見任總兵官。一并開列具奏。爾部即遵諭行○辛酉。陞內閣學士張士甄為禮部右侍郎○癸亥。

上詣

太皇太后宮問安○甲子。

上詣

太皇太后

皇太后宮問安○陞叅領李應魁為浙江平陽總兵官○以教漢故多羅郡王墨爾根巴圖爾子扎穆蘇襲爵○乙丑。陞江南蘇松水師左協副將李廷棟為京口右路水師總兵官○丙寅。

上御太和殿視朝。文武陞轉各官謝恩○陞奉

天府府尹陳一炳。為都察院左副都御史。

戶部右侍郎雷虎。以疾乞休。允之。○丁卯。以

戶部左侍郎田逢吉。為浙江巡撫。○己巳。

上詣

太皇太后宮問安

十一月。壬申朔。○甲戌。冬至。祀

天於

園丘。

上親詣行禮。○遣官祭

永陵。

福陵。

昭陵。

孝陵。○陞翰林院侍讀學士史大成。為內閣學

士兼禮部侍郎。○乙亥。

上率諸王貝勒貝子。公及內大臣。大學士。都統。

尚書。精奇尼哈番。侍衛等詣

太皇太后

皇太后宮。行冬至慶賀禮。御殿。王以下。文武各

官。上表朝賀。次厄魯特。喀爾喀。使臣等行禮

○丙子。免直隸清苑縣等十九州縣本年分

旱蝗災額賦有差。○丁丑。轉戶部右侍郎劉

鴻儒。為左侍郎。以原任刑部左侍郎馬紹曾

為戶部右侍郎。○免湖廣嘉魚等十四縣本

年分水災額賦有差。○戊寅。授多羅貝勒尚

善三女俱為郡君。壻王麟。阿拉布坦。富壽。俱

為多羅額駙。○己卯。以兵部左侍郎吳正治

充經筵講官。○轉戶部右侍郎班迪。為左侍

郎。陞保和殿學士達都。為戶部右侍郎。都察

院左僉都御史陳洪明。為奉天府府尹。○以

江南桃源縣興化所。鹽城所。屢被水災。將本

年起存錢糧漕米漕項。及帶徵康熙十年分

漕米漕項。盡行蠲免。○工部議覆。江寧巡撫

馬祐疏言。吳江縣長橋一帶。乃太湖洩水入

海要道。因年久未經疏濬。以致吳家港起。至

新橋止。兩旁俱漲沙灘。相應准其通縣協力

開濬。不得濫派擾民。從之。○庚辰。

上詣

太皇太后

皇太后宮問安○免山西岢嵐州本年分霜災額賦十之三○壬午。戶部議覆。江南江西總督麻勒吉疏言。江寧等十六衛屯田錢糧。向係守備千總等催徵完納不前。請改歸各州縣徵收。應將此十六衛屯糧。自康熙十二年為始。改歸就近州縣徵收。從之○癸未。免河南安陽等六縣本年分水災額賦有差○丙戌。

上詣

太皇太后宮問安○陞內閣侍讀學士穆誠額為內閣學士兼禮部侍郎○丁亥。免江南亳州。懷遠等十二州縣本年分水災額賦有差○以原任廣東饒平總兵官吳啟豐為貴州安籠總兵官○免湖廣監利縣本年分水災額賦有差○庚寅。

上詣

癸巳。

太皇太后宮問安○以翰林院編修史鶴齡充日講起居注官○以浙江杭嘉湖。紹。四府連年被災。命發帑銀賑濟○壬辰。浙江巡撫田逢吉陛辭。諭之曰。因爾諳練事務。故簡任浙江巡撫。浙省年來水旱頻仍。百姓困苦。爾膺茲重任。須正己率屬。撫綏百姓。以副朕任用之意。察吏安民。不在小節。惟在剪除大惡。剔釐大弊耳。為善為惡。俱在於爾。爾其勗之。諭畢。於常賜鞍馬外。加賜馬一匹。表裏十端○

上詣

太皇太后宮問安○乙未。鑾儀衛鑾儀使劉應志。以年老乞休。允之○湖廣提督胡拜。天津總兵官田進學。湖廣沅州總兵官王燦。四川重慶總兵官陳建。廣西左江總兵官趙宗科。俱以軍政削職○丙申。免河南武安縣本年分雹災額賦有差○丁酉。

上詣

太皇太后宮問安○己亥。兵部遵旨議覆告病

副將內果有効力行間功績素著智勇可用者病痊之日該督提鎮驗明特疏保舉仍准起用至衛所官員以不識文義具呈者准改以營弁用若既掣籤之後已知缺之美惡以不識文義具呈顯係規避應勒令休致從之○議政王大臣等遵旨議覆滿洲犯罪除謀反謀叛之罪照律連坐籍沒其餘罪犯詳在律內者俱照律擬議至心存陷害借言情罪重太妄議株連籍沒者即照故入人死罪律治罪從之○庚子。

上詣

太皇太后

皇太后宮問安○以故茅岡土司安撫使覃洪治子覃印祚襲職○辛丑。

上詣南苑視

太皇太后行宮○予故吏部侍郎王清祭葬如

例

十二月。壬寅朔○甲辰。

上詣

太皇太后宮問安○戶部題各省解交本色顏料等項錢糧每有遲延日期及惡棍包攬交納之弊嗣後請令各該巡撫將批迴限定到京交部日期臣部亦照批文所註日期於五日內收受完結如解官逾限題叅治罪惡棍包攬交納崇文門人役捐勒等弊查出從重治罪從之○乙巳。和碩裕親王福全疏辭議政允之○調山西大同總兵官趙良棟為直隸天津總兵官直隸真定總兵官崔世祿為湖廣沅州總兵官○陞雲南前鎮總兵官馬寧為湖廣提督○以功加左都督郭義為廣西左江總兵官○丙午。

上御太和殿視朝文武陞轉各官謝恩○免湖廣江夏等八縣衛本年分水災額賦有差○丁未。

上奉

太皇太后幸南苑○免江南長洲等七縣本年分蝗災額賦有差○大學士衛周祚以老病乞休慰留之○庚戌

上奉

太皇太后自南苑還宮○辛亥以江南興化等五縣并大河衛連年災荒又本年水災十分將應徵本年分地丁銀及漕糧漕項并帶徵康熙十年分漕糧漕項一并蠲免其邳州沐陽等五州縣連年災荒較興化等縣衛稍減將本年分被災十分九分者於蠲免定例外加免二分作五分蠲免八分七分者於蠲免定例外加免二分作四分蠲免○壬子和碩莊親王博果鐸多羅惠郡王博翁果諾多羅溫郡王孟義疏辭議政允之○癸丑

上詣

太皇太后宮問安○廣西道御史孫錫齡疏言定例官員緣事革職所廕之子已仕者不令離仕其父母領過誥命者追奪是為父母者

反不得與其子邀一視之仁請嗣後緣事革職父母領過誥命不必追奪從之○甲寅吏部等衙門議覆都察院左都御史杜篤祐疏言八法處分應詳明開註不得混稱不孚衆論等語又京察時六科官員原無堂官可註考語應移送吏部都察院堂官考察俱應如所請從之○旌表浙江錢塘縣貞女王氏四姑桐鄉縣烈女顧季繁給銀建坊如例○乙卯以一等侍衛張華善為直隸真定總兵官○正紅旗叅領李應魁為山西大同總兵官○丙辰

上詣

太皇太后

皇太后宮問安○丁巳諭學士傳達禮朕昨詣太皇太后宮問安

太皇太后諭云予雖在宮壺

太宗行政亦畧知之彼時開創甚重騎射方今天下太平四方寧謐然安不忘危閒暇時仍

宜訓練武備。至於在朝諸臣奏事。宜無忠誠入告者。然不肖之類。假公行私。附己者即為引進。忤己者即加罔害。亦或有之。為人君者。務虛公裁斷。一準於理。則事無差失矣。朕繹慈訓。人君之道。誠莫要於虛公裁斷之一言也。○遣一等侍衛鄂爾多等視大學士衛周祚疾。○雲南貴州總督甘文焜來京葬母。遣一等侍衛對泰等至其家慰問之。○以故一等精奇尼哈番色楞車臣子阿玉錫襲職。○免江南華亭。婁縣。青浦。三縣本年分水災額賦有差。○戊午。

皇后千秋節。照例行禮。停止筵宴。○順天府進春。○召講官等至懋勤殿。諭曰。漢官中有請令言官以風聞言事者。朕思忠愛之言。切中事理。患其不多。若不肖之徒。借端生事。假公濟私。人主不察。必至傾害善良。擾亂國政。為害甚鉅。又諭曰。從來與民休息。道在不擾。與其多一事。不如省一事。朕觀前代君臣。每多

好大喜功。勞民傷財。紊亂舊章。虛耗元氣。上下訾謫。民生日蹙。深可為鑒。熊賜履奏曰。

皇上此諭。誠千古為治之要道也。○己未。免浙江杭嘉湖紹四府所屬十六縣本年分蝗災額賦有差。○和碩康親王傑書。和碩安親王岳樂。掌宗人府多羅順承郡王勒爾錦。宗人府左宗正多羅貝勒察尼。多羅貝勒董額多。羅貝勒尚善。疏辭議政。不允。○厄魯特噶爾丹台吉遣使進貢。賞賚如例。○庚申。

上詣

太皇太后

皇太后宮問安。○壬戌。

上幸南苑行圍。○以四川提督鄭蛟麟為鑾儀衛鑾儀使。○陞靖南王藩下護軍叅領徐文耀為護軍統領。○乙丑。以故二等精奇尼哈番蘇長叔兄蘇永祖襲職。○丙寅。

上還自南苑。詣

太皇太后

皇太后宮問安○丁卯。大學士衛周祚以老病再疏求罷。命以原官致仕。乘驛回籍。仍准支俸○予故浙江平陽總兵官石玉貴祭葬如例○戊辰。

上詣

太皇太后宮問安○庚午。歲暮。裕祭

太廟。

上親詣行禮○遣官祭

永陵。

福陵。

昭陵。

孝陵○遣官祭太歲之神○

上詣

太皇太后宮問安○辛未。

上詣

太皇太后宮問安○賜朝正外藩王貝勒貝子。

公。及內大臣。大學士。上三旗都統。副都統。尚

書侍郎。學士。侍衛等宴○旌表八旗節婦。滿

洲阿克舜妻覺羅氏等二十一人。蒙古多爾木妻翁氏等三人。漢軍宋之龍妻郭氏一人。烈婦滿洲忒胡妻關氏等三人。漢軍徐履升妻蔡氏一人。各給銀建坊如例○是歲。人丁戶口。一千九百四十三萬一千五百六十七。田地。山。蕩。畦地。五百四十九萬一千三百五十六頃三十八畝。徵銀。二千六百五萬二千三百四十三兩有奇。米。粟。六百二十九萬一千一百二十一石有奇。草。二百二十九萬八千一百四十二束。茶。十五萬九千一百五十二引。行鹽。四百三十二萬六千二百五十二引。徵課銀。二百七十五萬三千三百四十五兩有奇。鑄錢。二萬九千八百六十五萬二千四百有奇。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十

實錄卷之四十

二十四

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十一

監修總裁官光祿大夫太保保和殿大學士兼戶部尚書二等伯加四

級戶部尚書光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣翁同龢

總裁官光祿大夫文華殿大學士兼吏部尚書臣朱軾等奉

敕修

康熙十二年癸丑春正月壬申朔

實錄卷之四十一

二

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御殿王以下文武各官外藩王

及使臣等上表朝賀照例筵宴○朝鮮國王

李棚遣陪臣李佖等表賀冬至元旦

萬壽節及進歲貢禮物宴賚如例○癸酉

上詣

太皇太后

皇太后宮問安○丁丑孟春享

太廟。

上親詣行禮○遣官祭太歲之神○戊寅。

世祖章皇帝忌辰遣官祭

孝陵○己卯。

上詣

太皇太后

實錄卷四十一

五

皇太后宮問安○辛巳祈穀於

上帝。

上親詣行禮○甲申。予故致仕太保兼太子太

師內秘書院大學士兼禮部尚書馮銓祭葬

謚文敏○乙酉。以上元節。賜科爾沁翁牛特

阿霸琿。高齊忒。敦漢。喀喇沁。扎魯特。蘇尼特。

土默特。喀爾喀。郭爾多斯。阿霸哈納。吳喇忒。

克西克騰。烏朱穆秦。阿祿科爾沁。奈曼。四子

部落。郭爾羅斯。諸王。貝勒。貝子。公。台吉等。及

內大臣。大學士。上三旗都統。副都統。尚書。侍

郎。學士。侍衛等宴○予故多羅貝勒多爾博

祭一次。造墳立碑○丙戌。

上御太和殿視朝。文武陞轉各官謝恩○上元

節。賜外藩王。貝勒。貝子。公。台吉等。及內大臣。

大學士。上三旗都統。副都統。尚書。侍郎。學士。

侍衛等宴○丁亥。

上詣

太皇太后宮。設燈節筵宴。賜隨駕大臣侍衛等。

實錄卷四十一

三

宴於宮門外○遣一等待衛吳丹。視內大臣

塞爾格克病○賜朝正外藩王。貝勒。貝子。公。

台吉等。銀幣鞍馬有差○己丑。

上詣

太皇太后

皇太后宮問安○庚寅。

上幸南苑行圍○諭兵部尚書明珠曰。朕欲幸

部院大臣。暫時遊覽。祇因政務殷繁。恐致廢

弛。今因大閱。令各尚書俱帶弓矢。隨朕遊覽。

已刻。

上率碩裕親王福舍巴林多羅郡王鄂齊爾
教漢多羅郡王布達喀爾喀多羅貝勒滾布
伊爾登及戶部尚書米斯翰兵部尚書明珠
刑部尚書莫洛工部尚書吳達禮都察院左
都御史多諾等行獵至東紅門下馬樹侯
上親射畢命巴林多羅郡王鄂齊爾等尚書米
斯翰等及侍衛等射○以戶部郎中張萃為
四川按察使司僉事提調學政鄭崑璧為湖
廣按察使司僉事提調學政虞二球為江南
按察使司僉事提調學政程汝璞為貴州按
察使司僉事提調學政張文韜為福建按察
使司僉事提調學政蘇汝霖為廣西按察使
司僉事提調學政郭昌為雲南按察使司僉
事提調學政禮部郎中洪琮為陝西按察使
司僉事提調學政刑部郎中陸舜為浙江按
察使司僉事提調學政張好奇為河南按察
使司僉事提調學政貴州平越府知府蔣印

修為山東按察使司副使提調學政山西冀
寧道謝觀為山西按察使司副使提調學政
○辛卯大閱八旗王以下四品武官以上及
前鋒護軍俱擐甲於晾鷹臺兩旁按隊排列
滿漢大學士尚書以下三品官以上及各衙
門堂官翰林科道等官於晾鷹臺上東排立
科爾沁諸王貝勒貝子公台吉等於晾鷹臺
上分兩翼排立烏鎗手在晾鷹臺西排列
上擐甲登晾鷹臺御黃幄命上三旗內大臣都
統護軍統領前鋒統領各領隊伍自西行至
東排列諸王貝勒等亦各領本旗官員護衛
按隊伍行至東排列烏鎗齊發鳴號發喊自
臺東結陣馳至西照兩翼排列
上諭兵部尚書明珠曰今日陳列甚善可著為
令又命樹侯臺下親發五卷皆中的又命內
大臣舅舅佟國維內大臣阿密達護軍統領
桑通新陞真定總兵官張華善一等侍衛費
耀色對奏吳丹護軍恭領法喇納等射

上復騎射。一發即中。外藩王以下見

上騎射超神。軍容嚴整。無不相視駭異。

上乃卸甲。御黃幄。命諸王。貝勒。貝子。公。內大臣。

侍衛。內閣。都察院諸臣。及外藩王。貝勒等。俱

於臺上分兩翼坐。八旗都統。副都統。尚書。侍

郎。及文武各官。俱於臺下分兩翼坐。賜宴。回

宮○甲午。

上詣

太皇太后宮問安○陞夔州總兵官馬化麒為

四川提督○丙申。

上御太和殿視朝。文武陞轉各官謝恩。次厄魯

特進貢。使臣等行禮○予故議政大臣蒙古

都統一等伯舜保祭葬如例○丁酉。

上詣

太皇太后宮問安○以三等阿思哈尼哈番平

西王藩下長史衛樸。為雲南援剿後鎮總兵

官○予故靖南王藩下護軍統領王應貴。祭

葬如例○庚子。

上詣

太皇太后宮問安○遣郎中蘇爾泰。往閱河工。

諭曰。清水潭。七里溝。決口。關係漕運。今春若

不完工。夏間或遇霖雨。將若之何。其傳諭總

河王光裕知悉

二月。辛丑朔。

上詣

太皇太后

皇太后宮問安○授輔國公常舒子德寧。為三

等鎮國將軍○壬寅。陞護軍統領赫業。為鑲

紅旗蒙古都統○太子少保都察院左都御

史杜篤祐。年老乞休。命以原官致仕○癸卯。

春分。朝

日於東郊。遣兵部尚書明珠行禮○

上詣

太皇太后宮問安○甲辰。遣一等待衛吳丹。二

等待衛塞扈立齋

御用貂帽。團龍貂裘。青蟒狐腋袍。各一襲。束帶

一團。往雲南賜平西王吳三桂。一等待衛古德。二等待衛米哈納齋。

御用貂帽。團龍天馬裘。藍蟒狐腋袍。各一襲。束帶一圍。往廣東賜平南王尚可喜。○禮部議覆。工科給事中成性疏言。舊例三品以上官員。父母亡故。給與祭葬。於順治十八年停止。請仍復舊例。查大臣父母。生受誥命。歿不得邀祭葬。似與朝廷教孝教忠之典。尚有未備。應賜祭一次。以昭恩卹。從之。○削解任湖廣總督張長庚太子少保銜。以任偏沅巡撫時。捏報墾荒故也。○乙巳。暹羅國王森烈拍臘。照古龍拍臘馬噶陸坤司由提呀菩埃遣陪臣。握坤司。各喇耶邁。低禮等。進貢方物。並請給銀印。以光屬國。得旨。覽王奏。航海遠來。進貢具見誠悃。可嘉。餘著議奏。○丙午。

上詣

太皇太后

皇太后宮問安。○命大學士杜立德。禮部尚書

龔鼎孳。為會試正考官。刑部左侍郎姚文然。翰林院掌院學士熊賜履。為副考官。○丁未。遣大學士圖海。祭

先師孔子。○諭學士傳達禮等。人主臨御天下。建極綏猷。未有不以講學明理為先務。朕聽政之暇。即於宮中披閱典籍。殊覺義理無窮。樂此不疲。向來隔日進講。朕心猶然未愜。嗣後爾等須日侍講讀。闡發書旨。為學之功。庶可無間。○戊申。祭

大社

大稷。

上親詣行禮。○

太皇太后聖壽節。

上率王以下。文武大臣。侍衛等詣

太皇太后宮行禮。遵

懿旨。停止筵宴。○己酉。禮部議覆浙江巡撫范

承謨疏言。錢塘縣民霍萬言家。遭回祿。身不能出。伊子霍錄科。救父情迫。奔陷火中。霍錄

科子霍大舉。奔救父祖。同時焚死。又杭州府學生員王一麟。父故廬墓。事母至孝。請並給銀建坊旌表。應如所請。從之。○庚戌。遣官祭先農之神。○辛亥。

孝康章皇后忌辰。遣官祭

孝陵。○陞兵部督捕侍郎吳正治。為都察院左都御史。○戶部議覆貴州巡撫曹申言疏言。設官分職。上下相維。天下之通義。獨黔省知府。知縣。各有親轄地方。分徵錢糧。並無經徵督徵之異。非所以定經制而專責成也。請將貴陽。安順。平越。都勻。鎮遠。思南。銅仁。七府知府。經管之地方錢糧。各歸附郭之新貴。普定。平越。都勻。鎮遠。安仁。銅仁。七縣知縣管理。其知府止司督徵之責。庶規制畫一。永遠可行。應如所請。從之。○壬子。

上詣

太皇太后宮。問安。○

上御經筵。講畢。賜大學士。九卿。詹事。及講官等

宴。○轉刑部右侍郎折爾肯。為左侍郎。陞左副都御史阿範。為刑部右侍郎。○癸丑。郎中蘇爾泰。閱視河工還。繪圖進呈。

上留覽。○丙辰。

上詣

太皇太后

皇太后宮。問安。○遣官祭

歷代帝王。○戊午。清明節。遣官祭

永陵。

福陵。

昭陵。

孝陵。○

上詣

太皇太后

皇太后宮。問安。○調刑部左侍郎姚文然。為兵

部左侍郎。管督捕右侍郎事。○己未。

上諭學士傅達禮曰。爾衙門所進翻譯大學衍義一書。朕恭呈

太皇太后御覽奉

慈諭云。人主居四海臣民之上。所關甚鉅。然代天理物。端在躬行。致治興化。必先修己。此書法戒畢陳。誠為切要。爾特加意是編。命儒臣翻譯刊刻。更令頒賜諸臣。予心欣悅。特發內帑白金千兩。可即賚予在事諸臣。朕仰遵慈旨。頒賜爾等。其欽承之。○陞鑲紅旗滿洲副都統查哈太。為護軍統領。○辛酉。諭致仕者舊大臣等曰。國有耆舊大臣。規模甚覺可觀。其大臣等有疾。若必俟奏請醫。倘或不及。嗣後有疾者。於藥房諸醫中。惟其所欲。延往調治。不必奏聞。朕亦即傳諭諸醫知之。○壬戌。上詣

太皇太后宮問安。○禮部議。暹羅國王進貢禮物。闕額蟲蝕。令於下次補進。得旨。貢物雖與原數不符。但念航海遠來。抒誠進貢。其闕額蟲蝕等物。免其補進。○河南巡撫佟鳳彩疏言。河南地方。自有河患。需用柳梢。其協濟江

南河工柳梢。應請免解。從之。○癸亥。調刑部左侍郎折爾肯。為禮部左侍郎。管右侍郎事。○陞太常寺卿錢鏐。為宗人府府丞。○陞歸化城土默特叅領拉布忠。為副都統。○甲子。上詣

太皇太后宮問安。○轉刑部右侍郎黃道行。為左侍郎。陞左副都御史任克溥。為刑部右侍郎。○乙丑。

上御太和殿視朝。文武陞轉各官謝恩。次暹羅國進貢使臣行禮。○以久旱得雨。遣一等侍衛對秦等。出郊視土膏深淺。○丁卯。陞大理寺卿額星格。為都察院左副都御史。○戊辰。上詣

太皇太后

皇太后宮問安。○封故多羅貝勒多爾博子蘇爾發。為固山貝子。○庚午。頒賜諸王以下。文武各官。及八旗官學。大學衍義各一部。

三月。辛未朔。改通州左衛為通州所。裁守備。

一員。千總三員。經歷一員。其地丁錢糧。巡緝逃盜等事務。歸通州。三河。武清。香河。四州縣分理。○癸酉。

上御弘德殿。講官進講畢。諭講官等曰。從來民生不遂。由於吏治不清。長吏賢。則百姓自安矣。天下善事。俱是分所當為。近見有寸長片善。便自矜誇。是好名也。又諭曰。有治人。無治法。但真能任事者。亦難得。朕觀人必先心術。次才學。心術不善。縱有才學何用。熊賜履奏

曰。

聖諭及此。誠知人之要道也。○戶部議覆。偏沅巡撫盧震疏言。衡州府屬之臨武。藍山。桂陽。及郴州。桂東。宜章。諸汛。僻處山陬。不通舟楫。官兵支放月糧。仰給鄰縣。道路險遠。運米艱難。請每米一石。折銀四錢。給發。誠為便利。應如所請。從之。○調鑲紅旗蒙古副都統朱喇禪。為滿洲副都統。○甲戌。諭學士傳達禮曰。朕以修葺宮殿。明日移駐瀛臺。暫留數日。夫

進講所以致知。蓄德期於日新。未容少間。講官其日至瀛臺。如常進講。又諭曰。學問之道。在於實心研索。使視為故事。講畢即置之度外。是務虛名。於身心何益。朕於諸臣進講後。每再三紬繹。即心有所得。尤必考正於人。務求道理明徹。乃止。至聽政之暇。無間寒暑。惟有讀書作字而已。因

御書一行賜觀。曰。人君之學。不在此。朕非專工書法。但暇時游情翰墨耳。○乙亥。

上御太和殿視朝。文武陞轉各官謝恩。次喀爾喀使臣等行禮。○

上幸瀛臺。○丙子。予故禮部侍郎顧巴西。祭葬如例。○予故三等精奇尼哈番班揚思希布。祭葬如例。○陞正白旗叅領蔡朝佐為浙江平陽總兵官。○丁丑。

上因時雨未足。駕幸郊外。閱視麥苗。○戊寅。諭兵部尚書明珠曰。朕初因修葺宮殿。暫駐瀛臺。今天時方旱。甚軫朕懷。雖修葺未竣。即日

還宮修省○辛巳。諭禮部。民資粒食以生。今當播種之時。亢暘不雨。農事堪憂。皆由朕躬涼德。政治有所未協。未能仰格

天心。用是夙夜靡寧。實圖修省。以感召休和。為民請命。爾部即虔誠祈禱雨澤。以副朕勤恤民隱至意○吏部議覆。河道總督王光裕。漕運總督帥顏保。會疏言。康熙七年。命直隸各省復行薦舉。例而河臣漕臣之屬員。並未議及。請一體舉行。應如所請。從之○諭刑部。直

隸各省監候秋決人犯。於冬至以後。部文咨到者。留於次年秋審。彙疏題報。永著為例○工部議覆。河南巡撫佟鳳彩疏言。河工派夫。貽累地方。請動支錢糧。催夫供役。即於河南八府一州之地。每畝派加釐毫。即可補項。應如所請。得旨。按畝加派。甚屬累民。著以河庫錢糧。催覓夫役。如錢糧不敷。具疏題請○壬午。吏部。兵部。會議土官處分條例。土官本不食俸。其有罰俸降俸者。相應免議。凡應降級

調用者。准降級留任。惟貪酷故殺不法等罪。仍行革職。其諱盜因公註誤。例應革職者。俱免革職。降四級留任。從之○平南王尚可喜疏言。臣年七十。精力已衰。願歸老遼東。有舊賜地畝房舍。乞仍賜給。臣量帶兩佐領甲兵。并藩下閒丁孤寡老弱。共四千三百九十四家。計男婦二萬四千三百七十五名口。其歸途夫役口糧。請敕部撥給。得旨。王自航海歸誠。効力累朝。鎮守粵東。宣勞歲久。覽奏年已七十。欲歸遼東。情詞懇切。具見恭謹。能知大體。朕心深為嘉悅。今廣東已經底定。王下官兵家口。作何遷移安插。議政王大臣等會同戶兵二部。確議具奏○癸未。

上御弘德殿。講官進講畢。諭講官等曰。從來君臣一心圖治。天下不患不治。此等光景。未易多得。朕與諸臣。何可不交勉之。熊賜履奏曰。為政端在得人。故用舍黜陟。人主出治之大權。最當審量者也。

上曰。知人難。用人不易。致治之道。全關於此。朕即欲不盡心。不可得也。○予故輔國公穆琛祭葬。謚愍厚。○甲申。總督倉場戶部右侍郎王秉仁。刑部左侍郎黃道行。工部左侍郎王天眷。內閣學士蔣廷柱。文華殿學士馬朗古。通政使司通政使莫洛。俱以京察才力不及。降二級調用。○丙戌。

上詣

太皇太后宮問安。○予故鎮國公託克托慧祭葬。謚純和。○戊子。

萬壽節。

上率諸王。貝勒。貝子。公。內大臣。大學士。都統。尚書。精奇尼哈番。侍衛等詣

太皇太后

皇太后宮。行禮。御殿。王以下。文武各官。上表朝賀。次暹羅國。安南國。使臣等行禮。停止筵宴。

○遣官祭

福陵。

昭陵。

孝陵。○遣官祭真武。東嶽。城隍之神。○庚寅。

上詣

太皇太后

皇太后宮。問安。○策試天下貢士韓莢等於太和殿前。制曰。朕惟自古帝王。以仁心行仁政。無不以萬物得所為己任。其時豐亨克泰。教化覃敷。人無狙詐之心。戶洽敦龐之盛。馴至遐荒向化。頑梗率俾。訟獄息而兵革銷。風雨時而休徵應。何風之隆也。朕纘承

祖宗鴻緒。撫御萬方。夙興夜寐。冀登上理。乃天時未盡調協。治道未臻純備。尚德緩刑之令。時頒。而仁讓未興。發帑蠲租之詔屢下。而休養未遂。意者審幾度務。設誠制行之源。尚有未究者歟。夫治獄之吏。以刻為明。古人之所戒也。近見引律煩多。駁察誣良。時見叅奏出入輕重之間。率多未協於中。何以使民氣無冤。而讞法克當歟。積貯乃天下之大命。乃常

平之設多屬虛文。一遇荒歉。即需賑濟。而奉行不實。致使朝廷之德意。不能遍及閭閻。其何以使利興弊革歟。古者耕九餘三。即有災祲。民無饑色。其道有可講求者歟。夫有治人。始有治法。行實政。必有實心。今欲疎禁網。以昭惇大。緩催科。以裕蓋藏。務使物阜民安。政成化洽。以庶幾於古帝王協和風動之治。抑何道之從也。爾多士蓄積有素。其各據所見。詳切敷陳。毋泛母隱。朕將親覽焉。○以故一

等伯又一拖沙喇哈番舜保子奇通額襲爵。○辛卯。吏部議覆。平南王尚可喜疏言。臣年老且病。請以王爵。令臣子尚之信承襲。查藩王見存。子無移襲之例。應無庸議。從之。○壬辰。

上詣

太皇太后宮。問安。○以故一等阿思哈尼哈番拜賽子霸州襲職。○癸巳。

上御太和殿。傳臚。賜殿試貢士韓莢等一百六

十六人。進士及第出身有差。○乙未。

上詣

太皇太后宮。問安。○賜衍聖公孔毓圻等宴於禮部。○予故鑲藍旗滿洲副都統三等阿達哈哈番席納海。祭葬如例。○陞護軍叅領洪世祿。為鑲紅旗蒙古副都統。○丙申。予故致仕太子太保內大臣理藩院尚書喀蘭圖祭葬。又加祭一次。謚敏壯。○丁酉。議政王大臣等議。平南王尚可喜奏請復歸遼東。應如所請。但該王之子尚之信。仍帶領官兵。住居粵東。則是父子分離。而藩下官兵。父子兄弟宗族。亦至分離。今粵省已經底定。既議遷移。似應將該藩家屬兵丁。均行議遷。惟廣東左右兩營綠旗官兵。仍留該省。作何歸并之處。交兵部另議。從之。○己亥。

上以數日霖雨大沛。遣一等侍衛對泰等出郊看視田苗。○太子太傅內大臣吏部尚書中和殿大學士巴泰。以老病再疏乞休。命原官

致仕

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十二

監修總裁官光祿大夫太子太傅保和殿大學士兼戶部尚書二等伯加四

級日馬齊先祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級日張廷玉先祿大夫經筵講

官太子太傅文華殿大學士仍兼理戶部尚書事務加五級又加二級日蔣廷錫

總裁官光祿大夫文華殿大學士兼吏部尚書日朱軾等奉

敕修

康熙十二年癸丑夏四月庚子朔享

實錄卷四十二

太廟

上親詣行禮○考察在京滿漢各官不謹三員

罷軟一員浮躁四員才力不及五十一員老

病三十一員俱處分如例○予故刑部侍郎

阿哈碩塞祭葬如例○辛丑

上幸郊外觀禾○壬寅

上詣

太皇太后

皇太后宮問安○癸卯南城地方火災

上諭巡城御史曰。每遇失火。朕常遣侍衛往救。聞爾巡城官員。即於失火時。執家主。恐其家財物。無人照看。必至匪類乘機竊盜。深屬無辜。此後可俟火息時。再行查議。○甲辰。

上御太和殿視朝。文武陞轉各官謝恩。次安南國進貢使臣行禮。○兵部題。平南王藩下。向有綠旗左右翼總兵官二員。遊擊守備千總各八員。把總十六員。兵六千名。俱駐劄廣州府。今平南王尚可喜父子。已令遷移。此綠旗

實錄卷四二

三

官。應仍留廣州府。令廣東提督管轄。其官員陞轉。亦照各省綠旗官員例。從之。○丙午。授殿試一甲進士韓菼。為翰林院修撰。王度心。徐秉義。為翰林院編修。○丁未。陞光祿寺卿廖旦。為大理寺卿。○辛亥。

上詣

太皇太后

皇太后宮。問安。○諭學士傳達禮曰。滿漢文義。照字翻譯。可通用者甚多。後生子弟。漸致差

謬。爾任翰林掌院。可將滿語照漢文字彙發。明。某字應如何用。某字當某處用。集成一書。使有益於後學。此書不必太急。宜詳慎為之。務期永遠可傳。方為善也。○諭戶部。江南蘇松常鎮淮揚六府。連年災荒。民生困苦。與他處不同。朕心時切軫念。除今年錢糧。已經派撥兵餉外。其蘇松等六府。康熙十三年分地丁正項錢糧。特行蠲免一半。以昭朕存恤災黎至意。○議政王大臣等議覆。安南國都統使莫元清疏言。臣從前被黎維禕所逼。投奔本朝。蒙恩遣使敕諭黎維禕。退回高平等四州地方。臣得復回故土。尚有保樂七源二州。崑崙金馬等十二總社未還。請再敕諭黎維禕。全歸使地。查從前莫元清曾經疏請。敕諭黎維禕。退回保樂等地方。因莫元清來投時。止言黎維禕攻取高平。並未稱有保樂七源二州。事屬外國。結案已久。屢行奏。殊為多事。應無庸議。從之。○吏部題。三等阿思哈尼

哈番梁化鳳故。其子梁鼎應襲。梁鼎原有拖沙喇哈番合併為二等阿思哈尼哈番。從之。

○癸丑。

上詣

太皇太后宮問安。○轉刑部右侍郎阿範為左侍郎。以一等侍衛鄂爾多為刑部右侍郎。○陞順天府府尹紀振疆。護軍叅領岳甘。俱為內閣學士。無禮部侍郎。○以禮部郎中張易為貴州按察使。司僉事。提調學政。○甲寅。

上詣

太皇太后

皇太后宮問安。○

上御太和殿視朝。京察留任各官謝恩。次喀爾喀使臣等行禮。○陞宗人府府丞錢綬為都察院左副都御史。○乙卯。

上幸南苑。諭學士傳達禮曰。南苑乃人君練武之地。邇來朕體不快。暫來此地靜攝。扈從講官史鶴齡張著俱係詞臣。著作詩賦進呈。○

以鎮國公蘇努為宗人府左宗人。○以降調兵部侍郎介山為太僕寺卿。○丙辰。

孝端文皇后忌辰。遣官祭。

昭陵。○丁巳。封暹羅國森烈拍臘照古龍拍臘馬嘑陸坤司由提呀菩埃為暹羅國王。賜之誥命銀印。令進貢陪臣齋回。誥曰。來王來享。要荒昭事大之誠。悉土悉臣。國家著柔遠之義。朕纘承鴻緒。期德教暨於遐邇。誕撫多方。使屏翰躋於康乂。彝章具在。渙號宜頒。爾暹羅國森烈拍臘照古龍拍臘馬嘑陸坤司由提呀菩埃秉志忠誠。服躬禮義。既傾心以向化。乃航海而請封。礪山帶河。克荷維藩之寄。制節謹度。無忘執玉之心。念爾悃忱。朕甚嘉焉。今封爾為暹羅國王。賜之誥命。爾其益矢忠貞。廣宣聲教。膺茲榮寵。輯乃封圻。於戲。保民社而王。纂休聲於舊服。守共球之職。懋嘉績於侯封。爾其欽哉。無替朕命。○庚申。上還自南苑。詣。

太皇太后

皇太后宮問安○壬戌。

上詣

太皇太后宮問安○甘肅巡撫花善疏言鞏昌所屬西和禮縣去歲疫癘盛行牛驢倒斃甚衆。若待請旨始行散賑恐播種愆期。已於康熙十一年徵解銀內發買耕牛積貯屯糧內散給籽種。部議以民間倒斃牛驢無動正項錢糧買補之例。至動支錢糧賑濟必先行題請。今該撫任意違例不合。應將撫藩道府交吏部議處。其擅動銀穀應令賠補。得旨銀穀既經給發小民該撫司道府等官免其賠補議處○癸亥。陞大理寺卿周卜世為總督倉場戶部右侍郎。轉刑部右侍郎任克溥為左侍郎。陞左副都御史陳一炳為刑部右侍郎○丙寅。監修總裁副總裁等請旨。於是日同纂修等官遵奉典禮自

實錄館恭送

世祖章皇帝實錄。至

皇史宬尊藏

五月庚午朔。

上詣

太皇太后宮問安○轉工部右侍郎梁鏐為左侍郎。陞內閣學士郭廷祚為工部右侍郎。內閣侍讀學士郭里為光祿寺卿。右通政孫光祀為太常寺卿○辛未。允翰林院編修王度心改名王鴻緒○陞直隸通州副將黃建中為四川重慶總兵官○壬申。

上詣

太皇太后

皇太后宮問安○翰林院掌院學士傳達禮等。以夏至報講上請。

上諭曰。學問之道。必無間斷。方有裨益。以後寒暑不必輟講。待至六月溽暑。再來請旨○以招民開墾議叙。加四川巡撫羅森。工部右侍郎銜○以築塞桃源七里溝決口議叙。加河

道總督王光裕。兵部左侍郎銜。○陞督捕右理事官郭丕。為通政使司通政使。光祿寺卿王守才。為順天府府尹。○甲戌。

上詣

太皇太后宮問安。○乙亥。

上詣

太皇太后宮問安。出。諭學士傳達禮曰。朕因

太皇太后聖體少有違和。不時省問。昨躬奉湯藥。幸已大愈。朕心方慰。頃又進滋補之劑矣。

○丙子。夏至。祭

地於

方澤。

上親詣行禮。○先是。

上以

太皇太后聖體違和。召乾清門侍衛武格。諭曰。

太皇太后甚念巴林淑慧公主。爾可將朕所乘

轎。馳驛往迎公主。至是。公主至京。

太皇太后喜甚。

聖體遂強健如常。○己卯。

上詣

太皇太后宮問安。○諭翰林院。選拔庶常。原以作養人材。今科進士。特加簡閱。取顧沂。黃士塏。陸祚藩。蔣仲達。宮夢仁。蔣伊。丁廷棟。顏光猷。謝于道。張祖榮。周昌。馬鳴鑾。徐倬。韓竹羅。秉倫。繆景宣。沈印城。王允琳。李基和。徐潮。汪鶴孫。董閏。徐元夢。韓士修。由成玉。王鼎冕。王尹方。曾寅。李葉龔章。張志棟。唐四表等三十。二員。俱著改為庶吉士。并修撰韓莢。編修王鴻緒。徐秉義。分別滿漢書教習。○諭吏部。國家大小事務。在內責成部院。在外責成督撫。其事情重大繁難者。固應照限完結。如平常易結之事。理應速結。以清沉滯。近見內外各衙門題覆本章。有將易結之事。遲延不結。必俟限滿具題。其不行具題完結遲延者。必多牽連守候。以致苦累。自後著速行完結。毋得遲延。務俾案件清楚。副朕委任至意。○辛巳。

上詣

太皇太后宮問安○諭禮部。

天壇。

地壇肅敬之所。爾衙門巡查疎忽。以致看守官

役怠玩。在內縱放牲口。將此縱放牲口官役。

爾衙門察議○陞奉天府府丞于可託。為太

僕寺卿○壬午。遣官祭

關聖帝君○陞都察院左僉都御史徐繼燁。

為左副都御史○陞福建興泉道李光塵。為

江西按察使司按察使○癸未。吐魯番國王

瑪墨忒賽伊忒汗。遣陪臣兀魯和際等。進表

貢方物。又奏。臣國向以方物進貢中國已久。

及聞

天朝統一寰區。不勝忻喜。順治十三年。進貢方

物。蒙頒

上諭。五年一貢。西馬四匹。蒙古馬十匹。後值臣

國變亂。不能如期進貢。今地方稍平。特遣兀

魯和際等。謹獻微物。嗣後進貢。或仍照前制。

或作何定奪。伏乞

上裁。得旨。覽奏。該國遠來進貢方物。具見悃誠。

可嘉。其作何進貢之例。著該部議奏○甲申。

上御太和殿視朝。文武陞轉各官謝恩○乙酉。

以翰林院編修葉方藹。充日講起居注官○

調雲南鶴麗總兵官趙得勝。為福建海澄總

兵官○丁亥。

上詣

太皇太后

皇太后宮問安○以遊牧地方居住察哈爾故

三等精奇尼哈番班惕思希布子多爾濟襲

職○戊子。陞順天府府尹王守才。為內閣學

士兼禮部侍郎○庚寅。

上詣

太皇太后宮問安○考察直隸各省督撫。浙江

總督劉兆麒。江南江西總督麻勒吉。湖廣巡

撫徐化成。原任山東巡撫丁憂劉芳燭。俱降

二級調外用○辛卯。轉工部尚書王熙。為兵

部尚書。陞內閣侍讀學士馬汝驤。為光祿寺卿。○壬辰。命翰林院掌院學士傳達禮。熊賜履。教習庶吉士。○甲午。

上御太和殿視朝。文武陞轉各官謝恩。○丙申。旌表河南節婦。杞縣馬之驢妻潘氏。烈婦。鹿邑縣張郇聘妻侯氏。俱給銀建坊如例。○丁酉。

上詣

太皇太后宮。問安。○以左都御史吳正治。為工部尚書。○予故一等阿思哈尼哈番原任副都統俄莫克圖。巴圖魯祭葬。謚襄壯。○戊戌。諭兵部。勤勞匪懈。臣子盡職之心。爵秩攸加。國家酬庸之典。庫祿克達爾漢阿賚等自

太宗文皇帝以來。或効力行間。或恪恭左右。或招撫外國。均奉職有年。克著勞績。宜加寵錫。以示眷懷。庫祿克達爾漢阿賚希爾根。坤巴圖魯。俱著加太子太保。畢力克圖。性納。胡禮布。伊爾度齊。俱著加太子少師。布葉錫禮。道

喇。穆福。席卜臣。孫達禮。巴圖魯。俱著加太子少傅。伊爾門。塞爾格克。賚圖庫。尼雅翰。查哈太。俱著加太子少保。

六月。己亥朔。○庚子。

上詣

太皇太后

皇太后宮。問安。○陞太常寺卿孫光祀。為通政使司通政使。○調河南南汝總兵官柯鐸。為雲南鶴麗總兵官。○辛丑。禮部議覆吐魯番國王瑪墨忒賽伊忒汗疏言。進貢方物。或仍照舊制。或作何定奪。查順治十三年。吐魯番貢馬三百二十四匹。奉旨減去。止令貢西馬四匹。蒙古馬十匹。嗣後進貢馬匹。應照此例。其別項貢物。仍令遵照會典。得旨。吐魯番國遙遠。進貢殊難。以後止著進貢馬匹玉石。其餘各物免進。以示朕軫念遠人之意。○壬寅。

上詣

太皇太后宮。問安。○陞光祿寺卿馬汝驤。為順

天府府尹○以原任安徽巡撫張朝珍為湖廣巡撫○四川天全六番正招討使高躋泰年老以其子高一柱襲替○癸卯。

上御太和殿視朝文武陞轉各官謝恩次吐魯番進貢使臣等行禮○以吏部右侍郎李之芳為浙江總督○陞左通政于嗣登為宗人府府丞○厄魯特鄂齊爾圖車臣汗遣使進貢賞賚如例○乙巳江南道御史施維翰疏言請改六科十四道輪日值鼓廳例止用滿漢科道各一員半年一換差遣下部議行○陞兵部左侍郎冀如錫為都察院左都御史○丙午。

上詣

太皇太后

皇太后宮問安○丁未。

上幸瀛臺御迎薰亭賜諸王貝勒等及內閣滿漢大學士學士翰林院學士六部都察院各司寺及國子監堂官翰林科道等官宴命大

學士索額圖兵部尚書明珠傳諭曰諸臣日理政務畧無休暇今值荷花盛開夏景堪賞朕特召諸王貝勒等及爾諸臣同宴以示君臣偕樂其各盡歡以副朕優渥至意大學士圖海等奏曰臣等躬逢盛世媿無寸長仰酬萬一今荷

皇上隆恩賜宴。

天語慇懃雖家人父子無以踰此於是

上率諸王貝勒等於南河登舟各官次第於北河登舟往來賞宴畢諸王貝勒及各官謝恩上回宮○宗人府題輔國公登色呈稱係固山貝子特爾祜之子應襲鎮國公不應授輔國公應請改襲得旨登色著授為鎮國公○陞右通政李贊元為大理寺卿○己酉。

上詣

太皇太后宮問安○陞內閣侍讀學士梁拱宸為光祿寺卿○庚戌予故二等阿思哈尼哈番巴山祭葬如例○辛亥。

上詣

太皇太后宮問安○壬子。調刑部右侍郎陳一炳為吏部右侍郎○宗人府題。固山貝子納墨孫。打死伊屬人。應革去固山貝子。降為閒散宗室。伊父宗人府右宗正鎮國公杜蘭。不行約束。應降為輔國公。得旨。杜蘭革去右宗正。從寬免降輔國公。餘依議○授故輔國公穆琛子德色禮。鎮國公託克托慧子卓隋。俱為三等奉國將軍○癸丑。戶部左侍郎管右侍郎事馬紹曾。以病乞休。允之○甲寅。陞陝西巡撫阿席熙。為江南江西總督○一等阿思哈尼哈番陳王道故。無應襲之人。以親伯之子陳王前承襲○陞恭領周邦寧。為河南南汝總兵官○乙卯。

上詣

太皇太后

皇太后宮問安○予故盛京禮部侍郎胡密達。祭葬如例○命禁止八旗包衣佐領下。奴僕

隨主殉葬○丁巳。轉兵部右侍郎楊永寧。為左侍郎。陞通政使孫光祀。為兵部右侍郎○戊午。

上詣

太皇太后宮問安○諭內閣。文華殿。武英殿。原設有中書。以備繕寫。今仍應補設。著吏部議奏○予故蒙古副都統車倫。祭葬如例○庚申。金星晝見○辛酉。

上詣

太皇太后宮問安○以多羅貝勒尚善。為宗人府右宗正○以故三等阿思哈尼哈番金玉成子金銀。襲職○癸亥。

上詣

太皇太后宮問安○陞宗人府府丞于嗣登。為刑部右侍郎○乙丑。諭兵部尚書明珠曰。下降和碩額駙耿聚忠。和碩永嘉公。手曾經世祖章皇帝撫養宮中。又蒙

太皇太后鞠育。今聞公主病甚。朕將親往視之。

遂幸柔嘉公主第。視疾。○吏部議覆刑科給

事中紀思哈疏言。近見督撫解任。有候代經

年。照常理事者。但一經解任。恐於地方之事。

漠不關心。應如所奏。嗣後解任督撫。於部文

到日。即令謝事。巡撫解任。將敕印交與總督。

總督解任。將敕印交與巡撫。若無總督省分。

交與布政使護理。從之。○刑部議覆刑科給

事中彭之鳳疏言。各省具題人命強盜本章。

有止叙臬司招由。即入督撫看語者。亦有全

招列入疏內者。繁簡不同。自宜畫一。查人命

等案。既另有全招清冊。投送部院寺各衙門。

其奏章內。無庸全叙。以省煩瑣。

上曰。人命強盜。關係重大。其直省全招。俱著畫

一開列疏內。

秋。七月。戊辰朔。享

太廟。

上親詣行禮。○陞內閣學士宋德宜。為戶部右

侍郎。仍兼翰林院學士。○己巳。

上詣

太皇太后

皇太后宮問安。○庚午。陞保和殿學士塞赫為

盛京戶部侍郎。○平西王吳三桂疏言。臣駐

鎮滇省。臣下官兵家口。於康熙元年遷移。至

康熙三年遷完。雖家口到滇九載。而臣身在

巖疆。已十六年。念臣世受

天恩。捐糜難報。惟期盡瘁。藩籬安敢遽請息肩。

今聞平南王尚可喜。有陳情之疏。已蒙恩鑒。

准撤全藩。仰恃鴻慈。冒干

天聽。請撤安插。得旨。王自歸誠以來。克殫忠藎。

戮力行間。功績懋著。鎮守巖疆。宣勞歲久。覽

奏。請撤安插。恭謹可嘉。今雲南已經底定。王

下官兵家口。作何搬移安插。著議政王大臣

等。會同戶兵二部。確議具奏。○辛未。

上詣

太皇太后宮問安。○陞山西布政使杭愛。為陝

西巡撫。○壬申。

上御太和殿視朝。文武陞轉各官謝恩。次厄魯特進貢使臣等行禮。○癸酉。免山東青州左衛。本年分旱災額賦有差。○甲戌。

上詣

太皇太后宮問安。○陞通政使司左通政楊鼎為通政使。○陞翰林院侍讀學士李仙根為內閣學士兼禮部侍郎。○轉工部右侍郎郭廷祚為左侍郎。陞左副都御史徐繼燁為工部右侍郎。○廣東道御史鞠珣疏言。孫延齡

原係定南王藩下標員。年齒素輕。位權未重。祇因配定南王女。所以命之掌管王旗。但孫延齡終屬外姓。論名分。則無承襲勳爵之理。論軍心。多有未肯帖服之情。近見廣東廣西總督金光祖疏稱。都統王永年等移文稱城門晝閉。鄉民不敢入城。又稱孫延齡委兄孫延基。總管旗標官兵。此孫延齡不能彈壓官兵之明驗也。且孫延齡駐扎廣西以來。或鎖辱職官。或擅題標弁。以致屢掛彈章。顯被訐

告。况粵西苗徭雜處。邊隅巖險。乞敕部確議。將王女與孫延齡撤回京師。其定藩舊標官兵。或歸并黃旗。或分隸八旗。仍令駐防該省。另差將軍統轄。則朝廷名爵無濫。而兵馬事務得理矣。下部確議。尋議將軍孫延齡與都統王永年互訐。見差侍郎勒德洪審理。俟審結再議。從之。○丙子。

上詣

太皇太后宮問安。○

上幸南苑行圍。○以故二等阿思哈尼哈番巴山子抒恕襲職。○吏部題。二等阿達哈哈番喀蘭圖故。伊子察渾應襲。將察渾所有拜他喇布勒哈番兼一拖沙喇哈番。合併為三等阿思哈尼哈番。從之。○陞陝西漢中城守副將何傳為山西大同總兵官。○以平西王藩下一等阿達哈哈番護軍叅領陶繼智為雲南援剿前鎮總兵官。○靖南王耿精忠疏言。臣襲爵二載。心戀

帝闕。祇以海氛叵測。未敢遽議罷兵。近見平南王尚可喜乞歸一疏。已奉俞旨。伏念臣部下官兵。南征二十餘年。仰懇

皇仁。撤回安插。得旨。王祖父以來。世殫忠盡。戮力行間。功績懋著。及王襲封鎮守。勞著巖疆。覽奏。請撤安插。恭謹可嘉。今福建已經底定。王下官兵家口。作何搬移安插。著議政王大臣等。會同戶兵二部。確議具奏。○戊寅。諭講官傳達禮曰。朕或出郊外。或幸南苑。嘗不輟

講。以此翰林官員。每次隨從。但翰林各官。俱遠離家鄉。京城毫無資產。扈從不免艱苦。殊為可念。嗣後扈從講官所用帳房及一切應用物件。酌定數目。由內府給與。○陞內閣侍讀學士額庫禮為內閣學士兼禮部侍郎。○喀爾喀墨爾根台吉。遣使進九白年貢。宴賚如例。○己卯。下嫁和碩額駙耿聚忠和碩永嘉公主薨。遣官致祭。○庚辰。陞福建按察使席式為四川布政使。司布政使陝西漢興道

郭之培為浙江按察使。司按察使。○辛巳。上還自南苑。詣

太皇太后宮問安。○禮部議覆都察院左都御史多諾疏言。凡告祭壇廟。滿漢臣子一體齋戒。祭祀文廟。止漢官齋戒。而滿官不齋戒。非我

皇上合滿漢為一體崇儒重道之至意。嗣後祭祀文廟。滿文官三品以上。亦應前期齋戒。二日陪祀。從之。○壬午。中元節。遣官祭

永陵。

福陵。

昭陵。

孝陵。○吏部議覆山西道御史馬大士疏言。康熙元年。吏部題准。各省大計年分。令道員代藩臬入覲。但藩臬總理一省錢糧刑名熟悉地方利弊。嗣後請仍令藩臬親身朝覲。應如所請。從之。○以重修

太宗文皇帝實錄。命大學士圖海為監修總裁

官。大學士索額圖。李蔚。杜立德。馮溥。為總裁官。學士郭四海。穆成額。岳甘。額庫禮。紀振疆。王守才。史大成。李仙根。傳達禮。熊賜履。為副總裁官。內閣侍讀學士。禪塔海。覺羅沙賴。喇巴克。畢力克圖。王敷政。翰林院侍讀學士。胡密色。楊正中。侍講學士。何託。勒備。崔蔚林。王颺昌。內閣侍讀。杜冷額。索拜。丹布。伊喇喀。察庫。斑迪。孟色。立。陳嘉猷。席密圖。占樵。翰林院侍讀。格爾古德。書恕。項景襄。沈荃。侍講。傅臘塔。吳本植。編修。蘇宣化。董訥。李錄。予檢討。蔣弘道。典籍。齊格。中書納哈出。賴。賽音察克等。為纂修官。諭曰。卿等督率各官。敬慎纂修。速竣大典。表彰謨烈。以副朕繼述顯揚先德之意。○丁亥。予故副都統。扈扎祿。祭葬。如例。○己丑。設宗人府左司。右司。○辛卯。

上詣

太皇太后

皇太后宮問安。○壬辰。

上御太和殿視朝。文武陞轉各官謝恩。○甲午。

戶部等衙門遵旨會議清理錢糧。應嚴新舊官交代。交代嚴則侵欺透冒。那移墊解等弊。可杜。嗣後司道府州縣。新舊官交代之時。如前官任內。有侵欺透冒。那移墊解。并拖欠未清等弊。署官新官。即行通報上司題參。將前官照例處分。如署官新官。徇隱不報。交代後始行查報者。不必議前任之官。竟坐接任官名下。侵欺透冒者。照侵欺例擬罪。已徵那用。詐稱民欠者。照例革職拏問。那移墊解者。照那移例議處。如後官不受交代。通詳督撫司道。而上司不行詳報題參。徇庇舊官。逼勒新官交代者。許新官即行據實指名報部。將逼勒之上司。以徇庇議處。本官既報參上司。本省難以為官。應於別省員缺調補。再州縣官有侵欺透冒。那移墊解等弊。司道官亦照知府例。於次一年內查出者。免議。如遲至三四年始行查出者。仍以失察例議處。其餘各款。

仍照舊定例遵行。從之。○九卿等會議直隸巡撫金世德疏言。直屬事務殷繁。長蘆鹽政。巡撫勢難兼顧。請仍差御史專理。應如所請。其兩淮。兩浙。河東。三處鹽政。亦仍照舊例。差御史巡視。從之。○乙未。

上詣

太皇太后

皇太后宮問安。○陞左僉都御史嚴沆。為宗人府府丞。○予故山西大同總兵官李應魁。祭葬如例。○議政王大臣等會議。福建今已底定。地方有防守官兵。靖南王既請自福建遷移。應將王本身。并標下十五佐領官兵家口。均行遷移。從之。○丙申。陞戶部郎中屠克善。為山西布政使司布政使。○丁酉。陞大理寺卿李贊元。為都察院左副都御史。○以翰林院編修張英。充日講起居注官。○予故三等阿思哈尼哈番齊爾格申。祭葬如例。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十三

監修總裁官光祿大夫太保兼太子太傅保和殿大學士兼戶部尚書二等伯加四

級臣內閣光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十二年癸丑八月戊戌朔祭

實錄卷四十三

大社

大稷

上親詣行禮○已亥調正藍旗蒙古副都統哈

克山為滿洲副都統○庚子

上詣

太皇太后宮問安○諭都察院左都御史多諾

等曰爾衙門職係言官凡事宜各抒已見豈

可以公同具奏充數已乎爾衙門所奏之事

雖皆曾經列名但副都御史岳諾惠等畏懦

瞻顧竟無建白嗣後應公奏者公奏若事應

獨奏其各出已見以聞○辛丑陞護軍叅領

擴爾坤為鑲紅旗蒙古副都統○壬寅

上御太和殿視朝文武陞轉各官謝恩○蘇尼

特多羅杜楞郡王公額故遣官致祭○癸卯

上詣

太皇太后

皇太后宮問安○予故副都統王國雄祭葬如

例○裁宗人府覺羅啟心郎一員漢軍啟心

實錄卷四十三

郎二員○議政王大臣等會議平西王吳三

桂具題請撤安插應將王本身並所屬官兵

家口均行遷移在山海關外酌量安插雲南

地方有土司苗蠻雜處不得稍疎防禦今既

將王遷移應暫遣滿洲官兵戍守俟戍守官

兵到日該藩起程滿洲官兵如何派撥及四

營綠旗官兵作何歸併該藩沿途須用錢糧

人夫等項俱聽該部詳議又一議吳三桂鎮

守雲南以來地方平定總無亂萌今若將王

遷移不得不遣兵鎮守。兵丁往返與王之遷移沿途地方民驛苦累。且戍守之兵係暫居住。騷擾地方亦未可定。應仍令吳三桂鎮守雲南。得旨吳三桂請撤安插所奏情詞懇切。著王率領所屬官兵家口俱行搬移前來。其滿洲官兵不必遣發。如有用滿兵之處該藩於起行時另行奏請。然後遣發。俟官兵到後王來亦不至遲悞。餘依議。○甲辰。

上詣

太皇太后

皇太后宮問安。○乙巳。陞宗人府府丞嚴沆為都察院左副都御史。○丙午。

太宗文皇帝忌辰。遣官祭

昭陵。○諭兵部。茲因地方底定。平西王吳三桂。平南王尚可喜。靖南王耿精忠。各具疏請撤安插。已允所請。令其搬移前來。地方應行事務。及兵馬機宜。必籌畫周詳。乃為善後之策。應各遣大臣一員前往會同該藩及總督巡

撫提督商確。作何布置官兵防守地方。並照管該藩等起行。應差官員職名開列具奏。○丁未。遣大學士杜立德祭

先師孔子。○試漢軍漢人科道官於

保和殿。○陞左通政趙祥星為大理寺卿。○

戊申。

太祖高皇帝忌辰。遣官祭

福陵。○己酉。諭吏部。國家設立言官專司耳目。

凡政治得失。民生利弊。必須詳切條陳直言。

無隱。斯為稱職。若但敷衍虛文。浮冗剽襲。或

以不急之務。草率塞責。非朕廣開言路之意。

今將科道官親加考試。其留用各員著益加

勉勵。殫心盡職。以副委任。內石文郁。范時起。

何名揚。才庸無文。不稱言職。著革職。爾部即

遵諭行。○庚戌。秋分。夕

月於西郊。

上親詣行禮。○山西巡撫達爾布以病求罷。慰

留之。○旌表浙江節婦仁和縣吳氏。嘉興縣

鍾氏嘉善縣蔡氏。石門縣楊氏。陸氏歸安縣王氏。德清縣陳氏。趙氏。慈谿縣劉氏。孫氏。山陰縣商氏。蕭山縣蔡氏。義烏縣倪氏。駱氏。永康縣朱氏。浦江縣陳氏。常山縣魯氏。各給銀建坊如例。○辛亥。予故副都統安泰祭葬如例。○壬子。

上御太和殿視朝。文武陞轉各官謝恩。○差禮部左侍郎管右侍郎事折爾肯翰林院學士兼禮部侍郎傅達禮往雲南。戶部尚書梁清標往廣東。吏部右侍郎陳一炳往福建。經理各藩撤兵起行事宜。○癸丑。

上詣

太皇太后宮問安。○陞太僕寺卿于可託為宗人府府丞。○乙卯。命侍衛傳諭福建總督范承謨曰。爾向有賢聲。與他人不同。且福建邊疆重地。海氛未靖。爾其益加勉勵。副朕委任。於常例賞賜外。加賜衣帽。及內廐鞍馬一匹。○諭吏部。兵部。雲南地屬遠疆。今該藩官兵

既撤控制。需人。應專設雲南總督一員。添設提督一員。責成專管料理。爾部速議具奏。○諭戶部。平西王吳三桂。平南王尚可喜。靖南王耿精忠等。請撤安插。已允。撤移。該藩及各官兵家口。安插地方。所需房屋田地等項。應豫為料理。務令到日。即有寧居。以副朕體恤。遷移至意。○陞護軍叅領吳丹為鑲白旗蒙古副都統。○丙辰。

上詣

太皇太后

皇太后宮問安。○

上御觀德殿。選擇八旗善射者。閱射畢。命記名。蒙古都統覺羅朱滿內大臣舅舅佟國維等一百八人。○丁巳。諭禮部。壇廟祭祀。國家大典。必儀文詳備。允符禮制。乃可肅將誠敬。昭格神明。其致祭時辰。齋戒處所。稽諸往代。各有定制。爾部詳察典例。酌議妥確。以聞。○陞護軍叅領龔圖為正藍旗蒙古副都統。○河

南道御史黃敬璣疏言。旗下僕婢自盡者甚多。請敕官民量加體恤。或設法勸戒。部議久奉。

上諭。應再行申飭。

上曰。人命關係重大。旗下奴僕若撫恤得所。豈肯輕生自盡。嗣後令各加意愛養。勿得逼責致死。爾部通行嚴飭。○戊午。以故三等阿思

哈尼哈番齊爾格申孫石清襲職。○己未。

上御經筵講畢。賜大學士九卿詹事及講官等

宴。○遣官祭

歷代帝王。○遣官祭城隍之神。○庚申。

上詣

太皇太后宮問安。○宗人府等衙門遵旨議覆。旗下服制。凡王以下。至奉恩將軍。及滿洲蒙古漢軍。文官以上。遇有父母喪事。不計閏。准守制二十七月。又承重孫為祖父母。亦守制二十七月。若長房無子。次房之長子。亦應承重守制二十七月。俱准其百日剃頭。照舊進

署辦事。仍在家居喪二十七月滿日除服。未除服之前。凡穿朝服等處。停其朝會。凡有喜慶事處。不許行走。不許作樂。違者照定律議處。得旨。著會同兵部將旗下武官持服之處。一并再議具奏。尋兵部議。旗下在京武官。亦照文官例守制。從之。○免直隸青縣鹽山慶雲三縣本年分旱災。任縣隆平二縣本年分水災。額賦有差。○辛酉。

上御弘德殿講官進講畢。諭講官等曰。文章以發揮義理。關係世道為貴。騷人詞客。不過技藝之末。非朕之所貴也。

上手詔諭平西王吳三桂曰。自古帝王。平定天下。式賴師武臣力。及海宇寧謐。必振旅班師。休息士卒。俾封疆重臣。優游頤養。賞延奕世。寵固河山。甚盛典也。王夙篤忠貞。克據猷畧。宣勞戮力。鎮守巖疆。釋朕南顧之憂。厥功懋焉。但念五年齒已高。師徒暴露。久駐遐荒。眷懷良切。近以地方底定。故允王所請。搬移安

挿。茲特遣禮部侍郎折爾肯翰林院學士傳達禮。前往宣諭朕意。王其率所屬官兵。趣裝北來。慰朕眷注。庶幾旦夕覲止。君臣偕樂。永保無疆之休。至一應安挿事宜。已敕所司飭庇周詳。王到日。即有寧宇。無以為念。○遣侍衛傳諭折爾肯傳達禮曰。因爾等遠往雲南料理遷移事務。特賜朕所佩刀各一口。良馬各二匹。○命戶部侍郎達都。前往會同盛京戶部侍郎奉天府府尹。將安挿三藩地方察看。諭曰。爾等前往查看。凡貧民勞苦開荒田地。及其房屋。俱不必看。除駐守官兵分內房屋田地外。有開墾田地。皇莊馬廠。及王與大臣侍衛等莊田房屋。並空閒之地。務盡行查看。此內如有不足。爾等就近酌量查看。至山海關九門邊牆外。亦不必看。此外若復不足。爾等應於他處邊牆外。酌量查看來奏。○壬戌。諭刑部侍郎鄂爾多等曰。嗣後會議朝審緩決。可矜可疑諸案。仍如常啟奏外。情實重

犯。別用黃冊彙列罪狀。及司名並犯人旗分佐領年貌姓名。開載於前。其情罪仍如常分晰。開載於後。○議政王大臣等會議投誠官兵。募化來歸。若移駐別省。則離故鄉親戚。未免苦累。以後將投誠官兵。停其移駐。從之。○喀爾喀厄爾德尼伊爾登台吉。遣使進九白年貢宴賚如例。○癸亥。

上詣

太皇太后

皇太后宮問安○

上御弘德殿。講官進講畢。諭講官等曰。致治之道。不宜太驟。只合日積月累。久之自有成效。朕平日讀書窮理。總是要講求治道。見諸實行。不徒空談耳。○陞歸化城叅領根都思赫為副都統。○甲子。

上幸郊外觀穫。○河道總督王光裕。丁父憂。命在任守制。○丙寅。

上詣

太皇太后宮問安○陞大理寺少卿袁懋德為太僕寺卿

九月丁卯朔調陝西提督桑峨為雲南提督○戊辰禮部尚書龔鼎孳以病乞休允之○庚午

上詣

太皇太后

皇太后宮問安○辛未

上御太和殿視朝文武陞轉各官謝恩○諭吏

部向來定例外官告病不准起用原以防其規避但其中才品優長政績素著者迫於一時至情引例告歸終身棄置深為可惜宜令地方督撫確行諮訪果有才品堪用者據實保奏以憑擢用○調陝西總督鄂善為雲南總督○甲戌諭差往貴州料理搬移吳三桂夫船芻糗事務戶部郎中席蘭泰兵部郎中黨務禮戶部員外郎薩穆哈兵部主事辛珠曰向來驛地困苦今則困苦更甚矣爾等慎

勿騷擾若該藩搬移已至水次爾等即宜應付船隻不可遲悞○乙亥京師地震○諭起居注官胡密色曰朕適詣

太皇太后宮問安

太皇太后問朕曰頃者地動爾知之否朕奏曰此乃

天心垂異以示警也

太皇太后諭曰人君遇有災異固當益加修省然亦在平時用人行政敬承

天意耳朕仰繹

慈訓誠為克謹天戒之要也爾其書諸冊○調工部尚書吳正治為禮部尚書○己卯山西道御史馬大士疏言今者地震京城天心示警請敕下大小臣工洗心滌慮恪供職業至於邊疆重地有當思患豫防者尤宜綢繆未雨以為久安長治之謀庶人事盡於下天心格於上矣得旨是變不虛生地動示警皆由政治未協朕躬深為怵惕力圖修省務期允

當大小臣工。亦著洗心滌慮。省改前愆。恪共職業。共回天變。○庚辰。以大學士馮溥為武會試正考官。侍講學士陳廷敬為副考官。○辛巳。以左都御史冀如錫為工部尚書。○壬午。予故禮部尚書恩額得一等阿思哈尼哈番宋希文各祭葬如例。○甲申。諭吏部等衙門。國家致治。首在崇尚寬大。愛惜人才。俾事例簡明。易於遵守。處分允當。不致煩苛。乃符明作惇大之治。向來各部衙門。俱定有處分條例。已經頒行。但其中款項太多。過於繁密。以致奉行者。或以膠執為守法。或以苛索為詳明。或例所未載。援引比附。輕重失宜。徒據成規。罔原情理。大小各官。稍有過悞。動觸文網。雖具才能。弗獲展布。深為可惜。著部院各衙門。將見行處分條例。重加訂正。斟酌情法。刪繁從簡。應去應留。逐一分別詳議。具奏。○

布政使山西冀寧道魏執中。為福建按察使。司按察使。○乙酉。以工部左侍郎哈占為陝西總督。○陞叅領張思恭為京口副都統。○予故護軍統領叅特黑太子少保貴州安籠總兵官向化侯譚詣各祭葬如例。○丙戌。諭戶部。據山東撫臣奏。寧海州荒蕪地二千七百餘頃。逃亡戶三千餘丁。累年逋賦。小民力難賠補。自康熙九年以後。錢糧如數悉為豁免。仍敕該撫設法招徠勸墾。○丁亥。戶部題八旗水淹地畝。請每晌給糧二斛。得旨依議。著將一半折銀給與。○庚寅。陞戶部右侍郎劉鴻儒為都察院左都御史。○辛卯。兵部督捕議奏。逃人定例。得旨。逃人在外娶妻所生之女。若已經聘嫁。不許拆散。亦不必向伊夫追銀四十兩。給與逃人之主。著為例。○壬辰。刑部等衙門議覆都察院左副都御史李之芳等疏言。臣等往審浙江民孫吉士。所告巡鹽御史杭啟常錫印。私派婪贓各款。俱實。應

將抗啟常錫印。擬絞監候秋後處決。從之。○
癸巳。

孝慈高皇后忌辰。遣官祭。

福陵。○雲南臨沅。澂江總兵官閔鎮。以病乞休。

允之。○予故奉國將軍能額里祭葬如例。○

予故都察院左副都御史左敬祖祭葬如例。

○甲午。轉工部右侍郎圖爾泰為左侍郎。陞

大理寺卿廖旦為工部右侍郎。○乙未。

上詣

太皇太后

皇太后宮問安。○丙申。歸化城副都統恩克依

以病乞休。允之。○禮部等衙門遵旨議覆。查

歷代祭祀壇廟時辰。俱無畫一詳定之處。

太宗文皇帝時。凡祭

壇

廟。用黎明。夕

月壇。用酉時。再查歷代致齋。俱於別殿。今凡遇

祭祀。

皇上應於別殿齋戒。從之。

冬十月。丁酉朔。享

太廟。

上親詣行禮。○遣官祭

永陵。

福陵。

昭陵。

孝陵。○頒康熙十三年時憲曆。○

上詣

太皇太后宮問安。○轉戶部右侍郎宋德宜為

左侍郎。調禮部左侍郎董安國為戶部左侍

郎。管右侍郎事。○戊戌。

上詣

太皇太后宮問安。○

上御弘德殿。講官進講畢。諭講官等曰。人心至

靈。出入無鄉。一刻不親書冊。此心未免旁騖。

朕在宮中。手不釋卷。正為此也。○己亥。

皇太后聖壽節。

上率王以下文武大臣侍衛等詣

皇太后宮行禮遵

懿旨停止筵宴○辛丑策試天下武舉於

太和殿前○陞內閣侍讀學士覺羅沙賴伊

桑阿俱為內閣學士兼禮部侍郎○陞太僕

寺卿介山為大理寺卿○喀爾喀額爾德尼

魏正台吉澤卜尊丹巴胡土克圖等遣使進

貢賞賚如例○壬寅以巴林故固山貝子滿

朱習里子烏爾占襲爵○陞正藍旗滿洲副

都統哈克山為護軍統領○以江南提督伯

王之鼎為京口將軍○癸卯

上詣

太皇太后宮問安○

上御瀛臺閱試中式武舉為復光等騎射技勇

○吏部議覆工科給事中那鼎疏言嗣後各

省總督員缺將副都統停其開列從之○戶

部議覆江寧巡撫馬祐疏言淮揚地方清水

潭石隄復決黃淮水勢瀾漫高寶等一十八

州縣衛所被災請行賑濟應如所請敕總漕

巡撫速動庫銀四萬兩買米委官各處賑濟

俟來年三月終止從之○甲辰

上御太和殿傳臚賜殿試武舉郎天祚等一百

人○武進士及第出身有差○乙巳

上御弘德殿講官進講畢諭講官等曰人主勢

位崇高何求不得但須有一段敬畏之意自

然不至差錯自能省改若任意率行畧不加

謹鮮有不失之縱佚者朕每念及此未嘗一

刻敢暇逸也熊賜履奏曰

聖諭及此即堯舜兢業之心也○轉禮部右侍

郎張士甄為左侍郎○陞內閣學士史大成為

禮部右侍郎○丙午

上詣

太皇太后

皇太后宮問安○喀爾喀車臣汗遣使進九白

年貢宴賚如例○丁未調山東提督楊捷為

江南提督○戊申

上詣

太皇太后

皇太后宮問安○陞翰林院侍讀學士達哈他為太僕寺卿○己酉

上幸南苑行圍○

上因科臣納爾疏言京城內外時棄嬰兒命戶部議凡民間貧不能養棄所生子或乳主人子而棄其子者皆善全之俾得長育其棄而不養者嚴禁通飭八旗並包衣佐領及五城

一體遵行○庚戌調正藍旗蒙古副都統蘇

胡濟為滿洲副都統○癸丑調湖廣提督馬

寧為山東提督○乙卯陞叅領董振國為江

南京口水師總兵官○戊午

上還自南苑詣

太皇太后

皇太后宮問安○辛酉

上御太和殿視朝文武陞轉各官謝恩次喀爾喀厄魯特進貢使臣等行禮○工部議覆河

道總督王光裕疏言清口應築壩以遏濁流但恐裏河水涸今議於重運過完則閉霜降水落則開洶為河漕兩利又七里墩水勢平緩應行建閘其自七里墩閘之內原有新河一道年久湮廢今宜挑濬深通加幫隄岸使湖水自七里墩閘進口即由新河文華寺入運則黃流可遏運道無虞矣應如所請從之○壬戌

上詣

太皇太后宮問安

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十三

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十二年癸丑十一月丙寅朔諭刑部自

實錄卷四十四

古帝王欽恤民命務期獄無枉縱讞決明允
以成刑措之治朕每於秋決重犯特為詳慎
惟恐一夫有冤以傷和氣向來朝審之例先
期進呈招冊然後九卿科道會審覆奏完結
乃各省秋審奏本內止有節畧觀覽未能明
晰又有秋審後續到者不及入覆奏案內以
致留俟來年殊為不合以後各省秋審應令
照在京朝審例豫期造冊進呈亦著九卿科
道會同覆核奏請定奪其造進呈招冊及奉

旨結案行咨俱應限定日期爾部一並詳議定例具奏○丁卯故明宗族朱議漵子身流落以蓄髮拏獲刑部論絞得旨朱議漵係愚民無知著免死歸鑲白旗漢軍旗下給與妻室地畝房屋安插○戊辰

上詣

太皇太后

皇太后宮問安○以大理寺卿趙祥星為山東巡撫○陞陝西西寧總兵官王可臣為湖廣

實錄卷四四

三

提督○己巳平西王吳三桂疏言臣部下官兵家口三十年來蒙恩養養生齒日衆懇將賜撥安插地方較

世祖章皇帝時所撥關外至錦州一帶區處更加增廓庶臣部下官兵均霑浩蕩之恩矣得旨王所屬官兵家口遷移遠來自應安插得所俾有寧居以副朕懷此所請增賞地方著連議具奏○庚午遣侍衛阿爾賽同太醫院官孫之鼎往盛京視將軍阿穆爾圖疾○諭

戶部自古國家久安長治之謨莫不以足民為首務必使田野開闢蓋藏有餘而又取之不盡其力然後民氣和樂事成豐亨豫大之休見行墾荒定例俱限六年起科朕思小民拮据開荒物力艱難恐催科期迫反致失業朕心深為軫念嗣後各省開墾荒地俱再加寬限通計十年方行起科其所司官員原有議叙定例如新任官自圖紀叙掩襲前功紛更擾民者各督撫嚴行稽察題叅治罪○壬

實錄卷四四

二

申諭侍讀學士喇沙里曰朕在宮中博觀典籍見宋儒周敦頤太極圖義理精奧實前賢所未發朕嘗極意探索究其指歸可命學士熊賜履編修葉方藹張英修撰韓荃等各撰太極圖論一篇朕親覽焉○陞王府長史雅木布為正藍旗蒙古副都統○甲戌發湖廣鄖陽等府縣倉穀賑江陵等十三州縣饑民○己卯冬至祀

天於

園丘。

上親詣行禮○遣官祭

永陵。

福陵。

昭陵。

孝陵○庚辰。

上率王以下。文武大臣侍衛等詣

太皇太后

皇太后宮行禮。御殿王以下。文武各官上表朝賀。

○辛巳。復設浙江驛傳道缺○壬午。

上詣

太皇太后

皇太后宮問安○裁江南徽寧道缺○甲申。以翰林院侍讀沈荃充日講起居注官○乙酉。免直隸霸州寶坻等十二州縣河間一衛本年分水

災額賦有差○丙戌。以故三等阿思哈尼哈番

韓文子韓佐周襲職○喀爾喀扎薩克圖汗遣

使進九白年貢。宴賚如例○丁亥。

清 實 錄 康熙十二年十一月至十二月

上詣

太皇太后宮問安○陞翰林院侍讀學士楊正

中為內閣學士兼禮部侍郎○以輔國公緯

克託為宗人府右宗人○旌表直隸烈婦鄧

國柱妻于氏。給銀建坊如例○戊子。

上詣

太皇太后宮問安○陞奉天府府尹陳洪明為

大理寺卿○己丑。免江南六安虹縣靈璧三

州縣本年分水災額賦有差○庚寅。

上御太和殿視朝。文武陞轉各官謝恩○辛卯

裁工部都水司漢主事四員○壬辰。

上詣

太皇太后

皇太后宮問安○免江南贛榆縣本年分水災

額賦有差○癸巳。陞湖廣武昌道徐懌為河

南按察使司按察使。河南管河道崔維雅為

江南按察使司按察使○甲午。免浙江仙居

縣本年分旱災額賦有差○飛牙喀地方頭

目伊得圖魯等進貢貂皮賞賚如例○以翰林院侍講學士勒備格爾古德俱充日講起居注官○乙未。陞左僉都御史耿効忠為奉天府府尹

十二月丙申朔。

上詣

太皇太后宮問安○丁酉。以翰林院侍講學士崔蔚林修撰韓葵充日講起居注官○免湖廣瀏陽等三縣本年分旱災額賦十之三○

戊戌。

上詣

太皇太后

皇太后宮問安○予故奉國將軍吳立渾祭一次○己亥。諭內閣朕奉

太皇太后慈旨。

世祖章皇帝博爾濟金氏三妃及董鄂氏妃。久在宮闈。敬謹夙著。宜加封號。以表令儀。朕恪遵

慈諭。今尊

皇考妃博爾濟金氏曰。

皇考恭靖妃。

皇考妃博爾濟金氏曰。

皇考淑惠妃。

皇考妃博爾濟金氏曰。

皇考端順妃。

皇考妃董鄂氏曰。

皇考寧謚妃。著會同禮部詳議典禮以聞○庚

子。諭禮部太常寺。

壇

廟裡祀。理宜虔肅。今觀祭祀執事之人過多。殊為煩雜。應酌量裁減。務令肅清○辛丑。

上詣

太皇太后宮問安○諭吏部兵部國家用人宜先沉靜之才。人臣服官首重廉耻之節。邇來文武官員或因不得陞遷或因不與差遣。輒稱冤抑。紛紛控告。不過圖便己私。原非從公

起見。縱屬應陞應差。而自為辨白。希求榮利。廉耻之道已虧。豈能修舉職業。克副任使。理宜嚴禁。以肅官常。召八旗都統副都統及六部滿尚書等諭曰。滿洲乃國家根本。宜加軫恤。近見滿洲貧而負債者甚多。賭博雖禁。猶然未止。皆由都統副都統佐領等不勤加教育之所致也。且滿洲習於嬉戲。凡嫁娶喪祭。過於糜費。不可勝言。蒙古感於喇嘛。罄其家貲。不知顧惜。此皆愚人偏信禍福之說。而不知其終無益也。我

太祖。

太宗時。亦此滿洲也。是時都統副都統佐領諸臣。以今較之。相去何如。彼時行兵出獵。諸役亦未嘗少於今時也。然而不致負債食用。饒裕者。人能節儉故也。爾等若能各修厥職。不負委任。禁嬉戲無益之事。勸善懲惡。則自然感化矣。近見以佐領爭訟者甚多。但知希圖榮貴。而愛養所屬之道全然不知。又或佐領

下另戶之主。不令披甲。聽徇情面。令家人披甲者甚多。俱宜嚴行禁止。或二三佐領。或四五佐領。酌量歸併。將閑散滿洲。令其披甲。則滿洲壯丁。各得食糧。庶可稍資生理。從來有治人無治法。爾等其詳議以聞。尋都統圖海尚書明珠等議奏。兵丁習於嬉遊。凡喪祭婚嫁服用等事。實為過費。此皆臣等不能統率教訓所致。今敬遵諭旨。此後各當嚴加訓誡。滿洲蒙古都統下。每一佐領。除留一百三十人以上。一百四十人以下外。其餘丁另合為佐領。以後新買喀爾喀蒙古之人。停其充入滿洲數內。從之。○免江南高郵衛本年分水災額賦十之三。○壬寅。大學士圖海以病請解閣務。慰留之。○癸卯。刑部遵諭議覆直隸各省秋審冊籍。自康熙十三年起。定限七月十五日以前到部。如逾限。即將該督撫議處。其定擬奉旨後。行咨直隸各省。亦應分別道路遠近。著為定限。沿途倘有遲悞。該管督撫

即行題叅從之○甲辰。

上詣

太皇太后宮問安○乙巳。

上詣

太皇太后

皇太后宮問安○禁直隸各省官吏毋得私稅市貨○丙午。

上詣

太皇太后宮問安○陞四川夔州副將陳福為

陝西寧夏總兵官陝西甘肅永固城副將王進寶為陝西西寧總兵官○己酉。

上詣

太皇太后宮問安○予故禮部尚書龔鼎孳祭葬謚端毅○庚戌。

上御太和殿視朝文武陞轉各官謝恩○內閣學士穆誠額以疾乞休允之○辛亥命調恤浙江仁和錢塘二縣被火災民二千一百餘家○壬子。

皇后千秋節照例行禮停止筵宴○陞兵部督捕右侍郎姚文然為都察院左都御史○癸丑諭吏部禮部致治之道首重人才儲養之源由於學校必衡鑒得人釐剔有法乃能革除積弊選拔真材以彰文治之盛近聞直隸各省學差沿襲陋規隳廢職業營私作弊考試不公以致真才淪棄文治不光今應作何整飭差遣何官及磨勘考核之法何以盡善務期允革弊端著九卿科道會同詳確議奏○以故三等阿思哈尼哈番張映斗子張弘先襲職○甲寅。

上詣

太皇太后

皇太后宮問安○吏部議覆山西道御史馬大士疏言各部堂官奏事時應令滿漢司官一體隨班入奏從之○禮部太常寺議覆凡祭壇

廟執事之人及樂舞生今已遵旨酌量裁減再

查會典。祭祀時祇有監察御史侍立之例。其禮部漢堂官應各按班次行禮。停其

壇上侍立。得旨是。○乙卯。吏部議廣東瓊州道

向兼攝學政。今瓊州道范養民。非由科目出

身。其瓊州學政應歸廣東學道管理。從之。

以故二等阿思哈尼哈番戴青子恩克爾襲

職。○丙辰。差往貴州備辦吳三桂夫船芻糗

事務兵部郎中黨務禮戶部員外郎薩穆哈

馳驛到京。奏稱雲南貴州總督甘文焜向臣

等言。吳三桂於十一月二十一日殺雲南巡

撫朱國治。以所部兵反。前差往搬移吳三桂

家口侍郎折爾肯等被留。臣等星夜馳驛來

京。

上召議政王大臣等面諭曰。今吳三桂已反。荆

州乃咽喉要地。關係最重。著前鋒統領碩岱

帶每佐領前鋒一名。兼程前往。保守荊州。以

固軍民之心。並進據常德。以遏賊勢。前往官

兵。若沿途住歇秣馬。必至遲悞。著派戶部賢

能司官於每日宿處齊備草豆應付。其陸續

遣發大兵征剿之處。著議政王大臣等速議

具奏。○議政王大臣等議派八旗滿洲蒙古

每佐領前鋒各一名。護軍各七名。驍騎各十

名。漢軍每佐領驍騎各五名。官員酌量兵數

派出。從之。○丁巳。四川湖廣總督蔡毓榮疏

報。吳三桂反。偽稱天下都招討兵馬大元帥。

以明年甲寅為周王元年。貴州提督李本深

叛應之。前同黨務禮等差往貴州兵部主事

辛珠與筆帖式薩爾徒不及行。俱不屈死。雲

南貴州總督甘文焜聞變。倉卒出貴陽府。將

十餘騎自隨。日夕行數驛。十二月初八日。至

鎮遠府。鎮遠橋守將已應賊。率兵圍之。甘文

焜度不免。手刃其子。遂自刎。筆帖式亞圖華

珊亦自殺。貴州巡撫曹申吉降賊。賊兵遂逼

鎮遠。漸入楚境。疏入。報聞。○蔡毓榮又疏言

先經雲南貴州總督甘文焜手書與臣。密報

吳三桂反狀。臣隨調沅州總兵官崔世祿等

疾赴貴州守禦。令彝陵總兵官徐治都、永州總兵官李芝蘭各率兵繼進。復慮楚省兵單，檄南汝總兵官周邦寧赴楚應援。下兵部知之。禮部議覆兵科給事中齊什疏言：請將盛京滿洲、蒙古漢軍旗下子弟與民童一體應試。從之。○停撤平南靖南二藩。召梁清標、陳一炳還。○諭兵部：雲南提督桑峨調為湖廣提督，總統協鎮兵馬。鄂善暫留湖廣與蔡毓榮商酌機宜，力圖剿禦以固地方。○以廣西境鄰貴州，授孫延齡為撫蠻將軍，以線國安為都統，令統兵固守。○命西安將軍瓦爾喀進四川。諭曰：四川與滇省接壤，今吳三桂已反，爾可率副都統一員悉領騎士，選撥將領星馳赴蜀。凡自滇入川險隘之地俱行堅守。大兵不日進剿雲南，俟我師臨境，賊勢漸分，倘有可乘之機，爾即與提督相機進討。至西安等處，朕當刻期遣發禁旅前來駐防。○吏部等衙門遵旨會議磨勘學差試卷之法。

直隸各省學臣所解之卷，不能無改謄潤色，且因解卷以致請託亦未可知。相應停其解卷磨勘。俟三年期滿督撫以稱職薦舉者，照例以叅議道用，以公明尤著保舉者，照例內陞京堂。若有徇情溺職等弊，應聽督撫指名題叅。若督撫徇情不叅，被科道糾叅，或有別官首出，將督撫一併議處。從之。○奸民楊起隆詐稱朱三太子，糾黨謀叛，約於京城內外放火舉事。鑲黃旗監生郎廷樞家人黃裁縫、正黃旗周全斌子周公直家人陳益等與焉。是日，郎廷樞察知其事，隨拏其家人黃裁縫等四人首告。周公直亦呈首，有素不識面兇惡之徒三十餘人，在於伊家。正黃旗都統圖海祖、永烈等親領官兵圍周公直家，鑲黃旗副都統紀哈里等亦親領官兵往捕。賊陳益等放火拒捕，鑲黃旗拜他喇布勒哈番鄂克孫首先入內，官兵繼進，拏獲陳益等，復廣為搜捕，共獲賊數百人。楊起隆逃去，所獲賊黨

俱下三法司勘問。戊午。諭吏部、兵部、吳三桂背恩反叛。其原係伊藩下文武官員人等。在直隸各省出仕及閑住者。恐因吳三桂反叛。心懷疑畏。致罹法網。有負朕撫育好生之意。伊等原係朕之官民。叛逆之事。與伊等並無干涉。雖有父子兄弟。見在雲南。亦槩不株連治罪。自今以後。各宜安心守職。無懷疑慮。爾部通行曉諭。○諭戶部。前出征兵丁。各給銀十兩。今出兵甚速。不比往時。恐有窮困兵丁。稱貸辦裝。除給銀十兩外。再各增給十兩。委署章京之護軍校、驍騎校以下。護軍撥什庫、申兵、弓匠以上。各給銀二十兩。鐵匠等亦各增給銀十兩。○除江南邳州、濱河水淹地畝額賦。○己未。命多羅順承郡王勒爾錦為寧南靖寇大將軍。總統諸將。多羅貝勒察尼都統、覺羅朱滿鄂內伯宜理布、覺羅巴爾布護軍統領、伊爾度齊額司泰前鋒統領、碩岱叅贊軍務。並都統范達禮、王國詔、副都統魯

西巴圖魯。託岱、穆舒渾、希福、阿晉、泰肯、齊赫蘇虎濟根特、祖澤純、宜思孝、柯彝、趙賴同往。○賜大將軍王貝勒、大臣等袍服、貂裘、白金馬匹。申胄有差。○議政王、大臣等議奏。欽奉上諭。以吳三桂屬下散處直隸各省官員。不知逆情。槩從寬宥。今除此等不議外。至吳三桂子吳應熊。見在京城。其隨從官員。知情亦未可知。此等與在外官員不同。不便從寬。應請拏問。得旨。朕意本欲寬宥。爾等既以為不便。從寬著暫行拘禁。事平。分別請旨定奪。○以蘇尼特故杜楞郡王公額子牢張襲爵。○庚申。諭議政王、大臣等大兵進征楚蜀。若須援兵。自京發遣。難以驟至。且致士馬疲勞。兗州地近江南、江西、湖廣、太原地近陝西、四川。均屬東西孔道。可發兵駐防。秣馬以待。所在有警。便即時調遣。可令副都統馬哈達、領兵駐兗州。擴爾坤、領兵駐太原。○辛酉。命直隸各省巡撫。仍管兵務。各設撫標左右二營。○壬

戌。

上詣

太皇太后宮問安○詔削吳三桂爵。宣諭雲貴文武官員軍民人等曰。逆賊吳三桂窮蹙來歸。我

世祖章皇帝念其輸款投誠。授之軍旅。錫封王爵。盟勒山河。其所屬將弁崇階世職。恩賚有加。開闢滇南。傾心倚任。迨及朕躬。特隆異數。晉爵親王。重寄干城。實托心膂。殊恩優禮。振古所無。詎意吳三桂性類窮奇。中懷狙詐。寵極生驕。陰圖不軌。於本年七月內。自請搬移。朕以吳三桂出於誠心。且念其年齒衰邁。師徒遠戍已久。遂允奏請。令其休息。仍敕所司安插周至。務使得所。又特遣大臣前往宣諭朕懷。朕之待吳三桂。可謂禮隆情至。蔑以加矣。近覽川湖總督蔡毓榮等疏稱。吳三桂徑行反叛。背累朝養之恩。逞一旦鴟張之勢。橫行兇逆。塗炭生靈。理法難容。神人共憤。今

削其爵。特遣寧南靖寇大將軍統領禁旅前往撲滅。兵威所至。刻期蕩平。但念地方官民人等身在賊境。或心存忠義。不能自拔。或被賊驅迫。懷疑畏罪。大兵一到。玉石莫分。朕心甚為不忍。爰頒敕旨。通行曉諭。爾等各宜安分自保。無聽誘脅。即或誤從賊黨。但能悔罪歸誠。悉赦已往。不復究治。至爾等父兄弟子親族人等。見在直隸各省。出仕居住者。已有諭旨。俱令各安職業。並不株連。爾等毋懷疑慮。其有能擒斬吳三桂頭。獻軍前者。即以其爵爵之。有能誅縛其下渠魁。及以兵馬城池歸命自効者。論功從優叙錄。朕不食言。爾等皆朕之赤子。忠孝天性。人孰無之。從逆從順。吉凶判然。各宜審度。勿貽後悔。地方官即廣為宣布遵行。諭陝西總督哈占提督張勇王輔臣等。逆賊吳三桂。倘有偽劄偽書。潛行煽惑。當曉諭官兵百姓。令其舉首上聞。爾等皆朕擢任股肱之臣。扞禦邊境。綏輯軍民。惟

爾等是賴其悉知朕意○命都統赫業為安西將軍率兵同將軍瓦爾喀等由漢中入蜀護軍統領胡禮布為副將軍偕署前鋒統領穆占副都統顏布同往○癸亥順天府進春前鋒統領碩岱領前鋒兵啓行赴荊州○前同黨務禮等差往貴州戶部郎中席蘭泰因驛馬不敷隨後啓行於是日抵京○諭兵部遣發大兵原為掃靖叛逆以安百姓凡兵丁廝役於所在地方恐有恃強掠民財物拆人廬舍壞人器具汚人婦女擾害生民及損壞運河開板椿木統兵主帥各宜體朕為民除叛用兵之意申明紀律嚴加鈐束倘有違禁妄行從重治罪著即速行曉示○禁民間養馬○甲子歲暮裕祭

太廟

上親詣行禮○遣官祭

永陵

福陵

昭陵

孝陵○遣官祭太歲之神○察哈爾和碩親王布爾呢巴林多羅郡王鄂齊爾科爾沁多羅水圖郡王額濟音敖漢多羅郡王扎穆蘇扎魯特多羅貝勒扎穆等朝正聞吳三桂反爭請獻所攜馬匹助軍復有願率所部兵隨大兵進討者

上諭之曰吳三桂本為流寇所迫勢窮來歸之人朕推置心腹委以重任累進親王子為額駙恩養至此尚行反叛負國已極今已遣大兵進剿吳三桂雖反亦將安往朕與爾等亦同一體如有需用爾等之處可俟春回草青時再聽調遣○乙丑賜朝正外藩察哈爾巴林科爾沁敖漢扎魯特王貝勒貝子公台吉等及內大臣大學士上三旗都統副都統尚書侍郎學士侍衛等宴○陞正黃旗副都統倭內巴圖魯為奉天將軍○旌表八旗節婦滿洲布顏圖妻奚氏等九人蒙古墨兌妻孫

氏等二人。漢軍馬四妻程氏等四人。烈婦滿洲俄樂諾妻佛氏等八人。各給銀建坊如例。○是歲人丁戶口一千九百三十九萬三千五百八十七。田地山蕩畦地五百四十一萬五千六百二十七頃八十三畝。徵銀二千五百六萬四千二百一十五兩六錢有奇。米豆麥六百二十四萬三千三百八石七斗有奇。草二百二十九萬一千三百六十五束。茶十六萬八千三百四引。行鹽四百四十四萬一千二百七十四引。徵課銀二百七十九萬二千七百五兩三錢有奇。鑄錢二萬九千三百四十七萬六千六百八十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十五

並修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十三年甲寅春正月丙寅朔

實錄卷四十五

上詣

堂子行禮還宮拜神畢率諸王貝勒貝子公內大臣大學士都統尚書精奇尼哈番侍衛等詣

太皇太后

皇太后宮行禮御殿王以下文武各官外藩王

及使臣等上表朝賀照例筵宴○朝鮮國王

李綱遣陪臣金壽恒等表賀冬至元旦

萬壽節及進歲貢禮物宴賚如例○丁卯

上詣

太皇太后

皇太后宮問安○戊辰遣都統覺羅巴爾布護軍統領伊爾度齊額司泰率護軍驍騎先赴荊州諭之曰頃侍衛阿爾賽自荊州馳還奏其地居民震恐爾等兼程速赴能早至荊州則兵民自安倘楚省告警可簡肥馬速進時前鋒統領碩岱領兵已起行傳諭亦如之○先是

實錄卷四十五

上遣副都統擴爾坤駐防太原尚未行至是以西安官兵既調往四川因命擴爾坤移駐西安隨諭陝西總督哈占今副都統擴爾坤領兵將往西安俟將軍赫業等至漢中與將軍瓦爾喀同進四川如漢中必須守衛爾可同擴爾坤與西安副都統酌議以行又諭將軍瓦爾喀朕思賊兵必犯巴蜀爾所部官兵無多應戰應守宜熟籌以行爾須兼程前進當即令將軍赫業胡禮布等率領大兵隨後為

爾應援。又諭將軍赫業胡禮布、瓦爾喀等京城所發官兵、聽赫業胡禮布統轄。西安官兵聽瓦爾喀統轄。兩軍會合時、毋得各分彼此。致有不睦。須同心協力。以副朕委任之意。○已巳。加山東提督馬寧、太子太保。○辛未。祈穀於

上帝。

上親詣行禮。○陞左副都御史李贊元為兵部督捕右侍郎。○戶部議覆山西道御史馬大士疏言罰俸銀兩、非贓私可比。官既革職、無俸可扣。亦照貪官贓銀追比。事屬可憫。應如所請。凡內外各官在任時所罰俸銀革職後免其追取。從之。○壬申。

世祖章皇帝忌辰。遣官祭

孝陵。○癸酉。孟春。享

太廟。

上親詣行禮。○遣官祭太歲之神。○湖廣總督蔡毓榮疏報賊兵已抵清浪衛逼近沅州。亟

請大兵馳救。

上諭湖廣總督蔡毓榮、雲南總督鄂善、湖廣提督桑峨等。聞賊兵逼近沅州。爾等前曾屢奏已調總兵官徐治都、李芝蘭等率兵應援。何至今未報到沅。可速遣往。督提俱在荊州。沅州要地。豈可獨委總兵官崔世祿一人。應令桑峨領兵疾馳赴沅。協同固守。蔡毓榮等亦須酌量以行。大兵不久即至。○諭兵部近聞京城小民驚恐欲於城外西山處所遷移逃避。殊非朕撫安百姓之意。前令緝獲假稱朱三之楊起隆與良民毫無干預。並無驅逐居民。移居城外之事。即昨暫閉城門。因有人舉首揚起隆潛藏大城之內。故行嚴緝。非有他故。爾百姓勿妄聽訛言。致生疑畏。宜各安生業。如平時。爾部即轉行五城御史順天府宛大。二縣作速刊示通行曉諭。○江南江西總督阿席熙疏言請調集所屬官兵以備楚省告警。即遣發應援。得旨大兵不日抵楚。兩省

官兵不必遣發。江南沿海瀕江甚屬緊要。俱應有備。江西水陸皆與楚閩接壤。尤宜固守。阿席熙其飭令鎮將整頓兵馬。於封疆扼要之處。加意偵探嚴防。○乙亥。

上詣

太皇太后宮問安。

上御太和殿。遣寧南靖寇大將軍多羅順承郡王勒爾錦。帥師之湖廣。安西將軍都統赫業帥師之四川。賜之敕印。諭之曰。行軍之道。惟

得民心為要。所過宜厚加撫恤。嚴禁侵掠。誠能無犯秋毫。則百姓安矣。至官兵暴露良苦。亦宜拊循。其進止處所。謹設斥堠。善自周防。勿懈也。南方卑濕。念吾軍士遠役。或不習水土。猝有疾病。可致良醫以藥餌調治之。其有勞績者。即向所司支給賞賚。勿致踰時。諭畢。

上詣

堂子行禮祭旗。肅還。出西長安門送之行。命王以下副都統以上。俱乘馬馳而過。復遣內大

臣禮部兵部大臣餞於郊外。○添設兵部翻譯主事一員。○丙子。改江西巡撫董衛國湖廣巡撫張朝珍。工部尚書銜為兵部尚書。浙江巡撫田逢吉。四川巡撫羅春。工部侍郎銜為兵部侍郎。○丁丑。陞內閣侍讀學士薩海為內閣學士兼禮部侍郎。○以雲南總督鄂善為雲南貴州總督。○己卯。

上詣

太皇太后宮問安。○以上元節。賜外藩察哈爾科爾沁。敖漢。巴林。扎魯特。喀爾喀。扎賴特。鄂爾多斯。翁牛特。土默特。郭爾羅斯。杜爾伯特。喀喇沁。萬齊武。吳喇武等王。貝勒。貝子。公。台吉等。及內大臣。大學士。上三旗都統。副都統。尚書侍郎學士。侍郎等宴。○陞宗人府府丞于可託為都察院左副都御史。○先是副都統馬哈達往駐兗州。至是添發察哈爾前鋒護軍驍騎兵往與馬哈達兵協同防守。○庚辰。

上詣

太皇太后宮問安○

上御保和殿。各省朝覲布政使徐國相。按察使陳秉直等朝見。命大學士李蔚。學士伊桑阿。傳諭曰。爾等朝覲官員。各有職掌。俱宜實心任事。潔已愛民。安輯地方。消弭盜賊。錢糧不得加派。刑名務期明允。賑濟蠲免。必使民沾實惠。以副朕察吏安民之意。如不遵行國法。具在欽哉。復召至

御前面諭各陳地方利弊○上元節。賜外藩王貝勒貝子。公。台吉等。及內大臣。大學士。上三旗都統。副都統。尚書。侍郎。學士。侍衛等宴○湖廣總督蔡毓榮。疏報賊於十二月二十九日。陷沅州。總兵官崔世祿。被執。澧辰路梗。楚地請援。

上命大將軍順承郡王勒爾錦。於所領兵內。每佐領先出驍騎二名。以都統一員領之。繼都統巴爾布之兵。速往荊州。並令都統巴爾布

護軍統領伊爾度齊。額司泰。等於所領護軍內。簡選肥馬。以護軍統領一員領之。繼前鋒統領碩岱之兵。並馳赴荊州○辛巳。

上詣

太皇太后宮問安。設燈節筵宴○賜朝正外藩王。貝勒。貝子。公。台吉。塔布囊等。銀幣。鞍馬有差○諭戶部。過者京師需用駝馬。凡蒙古駝馬。進張家口。殺虎口。貿易者。自今至九月免其稅課○兵部題。湖廣四川二省武職官員。原無督臣題補之例。今值雲貴多事。正在用人之際。應令該督。於就近遴選。坐名題補。從之○癸未。

上詣

太皇太后宮問安○諭兵部。近因吳三桂背恩叛逆。已遣大兵前往征剿。聞彼處百姓有預先驚避者。輕離家室。恐致失所。朕心深為憫念。向來大兵紀律嚴明。所過並無騷擾。今寧南靖寇。大將軍啟行。朕復面加誠諭。務令秋

毫無犯安輯地方。逆寇煽惑。不過一隅。大兵到日。立見蕩平。該地方軍民人等。俱係朕之赤子。遣發大兵。原以衛民。何必妄生驚恐。著該地方官。廣行宣諭。俾其各安生理。勿致流離。以副朕定亂安民之意。爾部即速行湖廣督撫。提鎮等官。通行曉諭。遵行。刑部等衙門題會審黃裁縫等。黨附楊起隆。謀逆情實。俱應凌遲處死。其祖父。子孫。兄弟。及同居之人。不分異姓。及伯叔。兄弟之子。男年十六歲以上者。俱應斬。男年十五歲以下。及本犯母女。妻妾。姊妹。若子之妻妾。財產。俱入官。得旨。黃裁縫等十二人。俱凌遲處死。餘犯俱改為。即行處斬。各犯親屬。本應依律正法。但牽連甚多。朕心不忍。著從寬免罪。人口家產。並免入官。即廷樞從優議叙。甲申。命德州。滄州。及順義等十處駐防滿兵。會於德州。以都統尼雅翰。為鎮南將軍。將之。尼雅翰奏請增兵。竟往武昌。俟大將軍師克定湖廣。臣願率兵

從廣西進取。議政王大臣會議。令尼雅翰與副都統席布。仍領德州等處駐防官兵。往充州。會同駐防副都統馬哈達。分兵為三。擇馬肥者。尼雅翰。席布。領之。先往安慶。馬瘠者。連令餵養。馬哈達領之。繼往安慶。其察哈爾兵亦同往。餘兵。以副都統根特巴圖魯領之。防守兗州。奏入。報可。尼雅翰臨行。授之敕印。令馬哈達。席布。同預叅贊軍務。乙酉。免江南淮安衛。康熙十二年分水災額賦有差。丙戌。陞順天府府尹馬汝驥。為宗人府府丞。陞駐防杭州協領阿什圖。為杭州副都統。山西總兵官林本直。疏言。臣有不同居之伯林天肇。曾隸逆賊吳三桂轄下。臣恐不免嫌疑。乞賜罷斥。得旨。著暫解任來京。事平之日。另議補用。安南國王嗣黎維禔。疏言。臣兄安南國王黎維禧。病故。屬臣權管國事。謹此奏聞。並遣陪臣胡士揚等。進康熙八年。十一年。歲貢。下部知之。黎維禔又疏言。臣先國

王世守安南。國內皆臣疆土。後被逆臣莫登庸篡弒。賴輔國政鄭檇之祖。剿除恢復。莫逆遺孽。篡據國內高平地方。臣乍叛。傳至莫元清。懼臣國拏解。乃潛入內地。以先投誠為名。特為避罪之計。康熙八年。欽差使臣李仙根。宣到

聖旨。令還莫元清高平府。臣兄黎維禧不勝懽結。欽奉

君命。敢不祇遵。但莫元清為臣不共之讐。高平為臣世守之土。叛逆竊據。為後嗣者。實難甘心。叩懇

天恩。仍令高平屬歸本國。又莫元清向有誓詞。及祭伊父莫敬耀文內。有圖逆

天朝之語。今謹進呈。並進乞恩方物。得旨。該部議奏。所進方物。著發還。○丁亥。侍衛考塞。自荊州馳還。奏偏沅巡撫盧震棄長沙奔岳州。上命都統覺羅朱滿。領兵速赴武昌。諭之曰。聞巡撫盧震已棄長沙奔岳州。朕念武昌重地。

不可不豫為防守。爾可率兵即往。如有賊至。務期保固地方。賊勢倘衆。勿輕與戰。或武昌無警。即於岳州以北。水路要地駐防。○諭兵部。安慶為江南上游要地。令江寧將軍額楚鎮海將軍王之鼎。各遣副都統一員。領兵千名。由水陸分路。先往安慶防守。並敕將軍尼雅翰。將所領之兵。及馬哈達之兵。共選六百名。速抵安慶。總統諸師。○諭寧南靖寇大將軍多羅順承郡王勒爾錦。比聞長沙巡撫盧震棄城奔岳州。朕念武昌為省會要地。已令都統朱滿。率兵急往防禦。王可將所部護軍。每佐領撥一名。速赴朱滿軍前。王師抵楚後。如武昌無事。可與貝勒會同。將朱滿之兵。酌行調用。○諭副都統馬哈達。俟將軍尼雅翰至兗州。選兵去後。爾將所餘官兵。分領其半。隨往江寧。與將軍額楚同守。其餘官兵。留與叅領噶篤渾。沙納哈。仍駐防兗州。○戊子。

上詣

太皇太后宮問安○先是諭副將軍胡禮布署前鋒統領穆占爾等率領前鋒護軍兼程疾赴西安或軍中馬有疲乏者即取西安綠旗官兵馬匹馳行倘更不足取滿洲官兵馬匹即以爾等所留馬補給之可追及將軍瓦爾喀繼進四川與瓦爾喀合兵之後何處設防何處駐劄爾等相機區畫如有可進雲南之機必俟將軍赫業定議以行至是四川巡撫羅森疏言蜀省軍心頗懷攜貳

上命副將軍胡禮布署前鋒統領穆占輕騎連進四川並諭將軍赫業瓦爾喀副都統佛尼勒等大兵進川之後一切宜加意慎密勿得玩忽其軍中行止當謹嚴斥候勿墮詭計又諭總督哈占秦中綠旗官兵當拊循得宜更加鼓勵保障地方○以福建海澄總兵官馬化麒為四川提督尋因道梗不得進命暫留荊州軍前○諭兵部刑部近因逆犯楊起隆詐稱朱三煽惑愚民潛謀不軌其黨相繼緝

獲俱經審明重者正法其牽累者業行審釋除逆首楊起隆張子房金玉環鄭得勝仍嚴緝外其餘黨羽業從寬免緝以後著改行從善恪遵法紀勿得自干憲典軍民人等俱宜各安生業不得聽信訛言自生疑懼旁人亦不許妄行首告借端嚇詐擾害善良爾二部即出示通行曉諭○己丑諭兵部湖南鄖陽地介三省中多曠土山谷阨塞姦民易於嘯聚恐有竊伏其間與賊應和者且逆賊或乘

間侵犯其令副都統佟國瑤為提督總兵官駐防彈壓○四川巡撫羅森提督鄭蛟麟總兵官譚弘吳之茂等以四川叛降賊聲言將分路寇漢中下夔州

上命調彝陵總兵官徐治都自常德仍回彝陵防守○陞叅領郭拱宸為山西太原總兵官

○庚寅封

世祖章皇帝子隆禧為和碩純親王○命都統席卜臣為鎮西將軍與副都統巴喀德業亨

同往保守西安。接應進川大兵。○添設江西河南提督各一員。命原任浙江總督趙國祚為江西提督。阿思哈尼哈番王永譽為河南提督。○辛卯。

上遣近侍納爾泰往荊州。傳諭湖廣總督蔡毓榮雲南貴州總督鄂善湖廣提督桑峨等。近所屬地方雖有淪陷。爾等不必懷憂。朕聞爾等戮力共保荊州。甚為可嘉。俟王師之至。恢復疆宇。是即爾等之功。前鋒統領護軍統領續當即至。或馬匹疲瘦。可以馬助之。芻茭之屬。豫儲勿悞。○諭兵部各處投誠官兵有堪効力者。著入督撫標下。量材錄用。○兵部題口外蒙古逃人。在外娶妻。若照舊例。將其妻仍給還民。與夫拆散。似屬可憫。嗣後應免其離異。仍令給與為妻。從之。○壬辰。命駐防西安副都統擴爾坤。帥師赴漢中。漢軍副都統吳國楨領兵繼之。○諭西安將軍瓦爾喀副都統佛尼勒爾等。久歷戎行。素稱諳練。朕可

無西顧之憂。但大兵至蜀。或綠旗已叛官兵。或吳逆偽屬官兵。有來降附者。隨宜撫納。仍應密為防閑。其嚴設巡哨。整飭營壘。爾等自能周知。無庸再諭。兵部郎中託必泰前奉使往蜀。今鄭蛟麟既叛。度必羈留不還。爾等或令人持書往諭。大畧言爾雖反叛。朝廷猶念爾係從前効力之臣。一時出於迫脅。固不可知。爾在京子孫家產並未按法收繫。可將託必泰速行遣還。否則大師壓境。克復城池。雖悔莫及矣。至綠旗已叛官兵。爾等相機招撫。便宜行之。○癸巳。免江南清河縣康熙十二年分水災額賦有差。○甲午。

上詣

大皇太后宮問安。○免河南輝縣康熙十二年分水災額賦有差。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十五

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十三年甲寅二月乙未朔諭講官喇沙

實錄卷四十六

里曰前

太皇太后聞朕賞賜出征官兵銀兩蒙

慈諭云出征官兵從來有賞賜之例遂出宮中

搏節銀兩分賞今朕又念駐防官兵雖無賞

賜之例但軍行期迫恐措辦艱難特加恩賞

又蒙

太皇太后慈諭此番兵丁亦著將我宮中綴疋

銀兩賞給此

太皇太后德意爾等職司記注故爾諭知○諭

吏部。兵部。逆賊吳三桂。虛聲恫喝。以致巡撫盧震棄地潛逃。已行拏究。湖南文武各官。仍能保入百姓。固守地方。允稱盡職。事平之日。從優加恩。可傳諭長沙諸處文武各官知之。○以原任江寧巡撫韓世琦為偏沅巡撫。○丙申。陞左僉都御史魏象樞為順天府府尹。○丁酉。遣大學士索額圖祭先師孔子。○欽天監題。欽造儀象告成。進呈新製靈臺儀象誌。

實錄卷四十六

三

上留覽。加南懷仁太常寺卿銜。仍治理曆法。○

戊戌。祭

大社

大稷。

上親詣行禮。○

上詣

太皇太后

皇太后宮問安。○戶部遵旨議覆。江南丹徒縣坍入大江田四十餘頃。額賦應永行開除。餘

田令地方官修隄防護。三年後起科。金壇縣荒田七百二十餘頃。勸民開墾。其二縣坍荒田。康熙十一年分通賦。應俱停徵。從之。○發山東濟南倉積穀賑給濟南府地方饑民。○諭兵部。陝西提督王輔臣。久歷戎行。勞績素著。近舉首反賊吳三桂所送逆札。遣子奏聞。堅守臣節。益見忠貞。朕心深為嘉悅。前已有旨。事平之日。從優議叙。今應即行加恩。以彰激勸。隨授王輔臣三等精奇尼哈番。子王繼貞。大理寺少卿。○庚子。陞叅領佟世德為正藍旗漢軍副都統。○陞江南安徽按察使佟國楨為江西布政使。司布政使。○湖廣總督蔡毓榮疏報。正月二十四日。前鋒統領碩岱兵抵荊州。○辛丑。加湖廣總督蔡毓榮兵部尚書銜。以招民議叙也。○戶部議覆。江寧布政使慕天顏疏言。淮揚被淹地方。人民困苦。即田涸可耕。收穫無幾。力難辦賦。請將清河高郵等八州縣自康熙十三年起。如有耕種

新涸田地者俱俟三年後起科。應如所請。從之。○壬寅。

太皇太后聖壽節。

上率諸王、文武大臣、侍衛等詣。

太皇太后宮行禮。遵。

懿旨停止筵宴。○癸卯。命四川省另設總督。巡。

撫各一員。缺。○甲辰。陞四川布政使金儁為。

太常寺卿。○鎮西將軍席卜臣帥師之西安。

○工部議覆河道總督王先裕疏言。請裁江。

南河工額夫。停止僉派。以甦民困。其歲修應。

用夫役。動帑雇募。應如所請。從之。○乙巳。

孝康章皇后忌辰。遣官祭。

孝陵。○湖廣總督蔡毓榮疏報。本月初一日。護。

軍統領伊爾度齊兵抵荊州。初二日。護軍統。

領額司泰兵抵荊州。○諭都統覺羅巴爾布。

及護軍統領伊爾度齊額司泰。前鋒統領碩。

岱等。常德為水陸衝要之區。不可不預加防。

守。大將軍兵未至之先。宜令護軍統領一員。

率每佐領護軍一名。同碩岱率前鋒兵盡移。

赴常德。謹守地方。巴爾布並所留護軍統領。

率兵暫駐荊州。俟大將軍兵到後。即進守常。

德。如巴爾布至常德。其先往常德之護軍統。

領。可即移鎮長沙。與都統朱滿合兵。俱聽王。

指揮。朕遙度兵勢。似宜如此。爾等身在地方。

倘勢有難行。仍當相機調度。不必固執。慮違。

朕命。又諭都統覺羅朱滿及副都統阿晉泰。

肯齊赫等。前諭爾等統兵鎮守武昌。岳州。茲。

念長沙乃武昌咽喉之地。又為武昌寶慶州。

郡水陸要途。且壤連粵西。爾等若進駐長沙。

既兼防水陸之衝。更可壯粵西之勢。俟大將。

軍兵抵荊州。當即遣護軍統領一員往助爾。

等。協同防禦。爾等啟行之日。可即聞之。巴爾。

布等。並移檄廣西將軍提撫諸臣。言我兵已。

抵長沙。保固湖南。爾等當各守疆土。朕遙度。

兵勢。似宜如此。至軍中情形。或有難行。仍當。

相機調度。不必固執。慮違朕命。○丙午。吏部。

尚書對客納以病乞休。慰留之。○以故一等阿思哈尼哈番宗布文姪宗國璉襲職。○丁未。以原任廣東廣西總督周有德為四川總督。原任四川巡撫張德地為四川巡撫。○湖廣總督蔡毓榮疏報。兵三桂遣偽總兵楊寶應犯常德。其父原任廣東提督楊遇明家於常德。遂為內應。知府翁應兆從逆。常德潰。上諭。前往安慶將軍尼雅翰於所領兵內簡選壯騎。並前調江寧京口副都統二員。兵二千名。俱赴武昌。長沙等處。與都統朱滿會商而行。兵馬各自統轄。尼雅翰仍帶將軍印。餘兵令副都統席布領之。仍駐安慶。以待護軍到日。牧養馬匹。其京口副都統所領船隻。令尼雅翰酌量帶往武昌。席布所領護軍驍騎亦量留與船隻。○兵部議覆。安南國王嗣黎維禔。請臣屬莫元清疏。查康熙七年。諭黎維禔退還莫元清高平。取有復相和好印結。今黎維禔雖言收得誓書實蹟。并祭文。但此文年

久而誓詞係莫敬耀之名。此文或得自莫敬耀存時。或收自莫元清今日。疏內未經聲明。難以懸擬。應仍敕安南國王嗣黎維禔查明具題再議。從之。○戊申春分朝

日於東郊。

上親詣行禮。○以原任福建布政使崔岱補湖廣布政使。司布政使。○己酉。湖廣總督蔡毓榮疏報。本月初六日。都統覺羅巴爾布兵抵荊州。○庚戌。

上詣

太皇太后宮問安。○吏部題。四川省知府以下員缺。應聽該督酌量題補。從之。○壬子。湖廣總督蔡毓榮疏報。本月初八日。兵三桂兵至澧州。城守官兵以城叛。應賊提督桑峨總兵官周邦寧自常德還至澧州城外。孤軍不能迎敵。不得不退回荊州。乞大兵星馳剿禦。○癸丑。

上御經筵講畢。賜大學士。九卿。詹事。及講官等

宴○以多羅額駙胡拜為雲南提督。副都統趙賴為貴州提督○甲寅。

上詣

太皇太后

皇太后宮問安○湖廣總督蔡毓榮疏報。長沙副將黃正卿。恭將陳武衛。以城叛降賊。

上諭。寧南靖寇大將軍多羅順承郡王勒爾錦。都統覺羅巴爾布。護軍統領伊爾度齊。額司泰等。兵抵荊州。是時常德。澧州。尚未有變。理

應稍休馬力。速赴常德。以戰兵民。乃遲久不前。以致常德相繼皆陷。今長沙亦有變。可俟都統鄂內等兵至荊州。令其鎮守荊彝諸處。即令都統巴爾布等。進兵攻取常德。又襄陽為我師來往之衝。蜀寇必窺之地。王軍前漢軍都統。副都統。可酌率官兵。留鎮襄陽。又諭勒爾錦。近聞常德已叛。四川夔州。所在賊氛甚熾。都統巴爾布。兵力雖盛。倘須兩路堵剿。更宜增兵。王可於所率驍騎內。揀擇肥馬。每

佐領撥二三名。每翼以副都統一員領之。速

赴荊州。巴爾布軍前。若不得肥馬。難於前進。

聽王酌量以行○乙卯。予故江西提督劉光

弼。祭葬如例○諭廣西將軍孫延齡。都統線

國安。巡撫馬雄鎮。提督馬雄等。保固粵西。實

爾等是賴。今大兵已抵武昌。倘賊犯武岡。寶

慶諸處。爾等率所部官兵。進剿其後。大兵迎

擊於前。量此逆醜。自可剋期撲滅。爾等宜同

心協力。謀定後舉。以副朕倚任至意○添設

雲南貴州四川隨征總兵官缺。尋陞叅領金

世需。為隨征雲南右路總兵官。叅領楊茂烈。

為隨征雲南中路總兵官。叅領劉文錡。為隨

征雲南左路總兵官。叅領高登科。為隨征貴

州右路總兵官。叅領馬雲程。為隨征貴州左

路總兵官。叅領陳奇謨。為隨征四川左路總

兵官。陝西涼莊道朱衣客。為隨征四川右路

總兵官○丙辰。遣官祭

先農之神○丁巳。以翰林院侍讀庫勒納克

日講起居注官○戊午。甘肅提督張勇。以病乞休。慰留之。○己未。遣官祭

歷代帝王。○寧南靖寇大將軍多羅順承郡王勒爾錦疏言。常德已陷。賊兵自蜀道直抵巴東。臣恐襄陽危急。隨令都統鄂內。並每翼兩副都統。率領官兵。馳赴防守。及接

上諭。即令都統鄂內。速至襄陽。偵探鄖陽一路情形。如鄖陽無警。即令兩副都統。率每佐領驍騎二名。逕往荊州都統巴爾布軍前。得旨

襄陽總兵官楊來嘉。向自海上投誠。其才甚庸。所屬官兵。率皆藐玩。將來恐有他故。可將漢軍官兵。留鎮襄陽。即以此意密諭之。但不必防閑過甚。恐致洩漏。以達其變。○湖廣總督蔡毓榮疏報。本月十五日。都統覺羅朱滿兵抵武昌。○庚申。予故副都統曹恭誠。祭葬如例。○琉球國中山王世子尚貞。遣陪臣吳美德進貢。宴賚如例。○陞叅領關保。為正藍旗漢軍副都統。○諭兵部。前大將軍王。貝勒

將軍。大臣等。出師之時。曾經面諭。凡大兵所到地方。毋得苦累百姓。肆行搶掠。侵及婦女。各令嚴加禁飭。諄諄告誡。近恐無知之徒。不遵紀律。擾害良民。其速行順承郡王。貝勒。及各路將軍。大臣等。凡經過處所。兵丁廝役。不許私離營伍。致犯民間秋毫。有違禁者。統兵主帥。即行從重治罪。并移檄各督撫。凡出兵之地。或有此等擾民者。聽指名奏。若兵主以及將領。不加嚴束。以致妄行騷擾。該督撫知而不叅。事發得實。將兵主將領。即行議處。並治該督撫以瞻徇之罪。應各令督撫刊示。廣行傳諭。○諭都統覺羅朱滿。一等侍衛畢桑阿來奏。爾稱馬匹稍肥。即往岳州防守。甚善。岳州乃水陸衝要之地。宜亟固守。今將軍尼雅翰等。率領沙船。水陸兼行。以備應援。爾等前往岳州。并趣尼雅翰等速行。○諭都統覺羅巴爾布。畢桑阿來奏。爾等曾言岳州叅將。難於信任。且兵力單弱。請遣提督桑峨。總

兵官周邦寧往岳州防守。今度桑峨。周邦寧前去已遲。可將偏沅巡撫韓世琦軍前遊擊哈什庫。即充岳州叅將。選綠旗兵。速往岳州。○辛酉。予故一等公遏必隆祭葬。謚恪僖。○諭吏部。兵部。陝西邊陲要地。西控番回。南通巴蜀。幅員遼濶。素號巖疆。茲逆賊吳三桂煽亂滇黔。四川從逆。秦省地處鄰封。恐有奸徒搖惑。以致人心不寧。雖有督撫提鎮等官。各盡乃職。但軍務繁重。必須專遣大臣。假以便宜。相機行事。方可綏靖中外。保固邊疆。刑部尚書莫洛。前任秦督。深得軍民之心。諳曉地方情形。茲特授為經畧。率領滿兵。駐劄西安府。會同將軍總督而行。巡撫提鎮以下。悉聽節制。兵馬糧餉。悉聽調發。一切應行事宜。不從中制。文武各官。聽便選用。吏兵二部。不得掣肘。鄰省用兵。當應援者。酌量策應。如有軍機。將軍總督。領兵而行。俟湖廣四川地方底定。即命還朝。應兼職銜。及應給敕印。爾二部

會同速議具奏。尋允部議。加莫洛武英殿大學士。仍以刑部尚書管兵部尚書事。兼都察院右副都御史。賜之敕印。經畧陝西。○諭戶部。兵部。逆賊吳三桂。心若虺蛇。行同梟獍。負恩謀叛。倡亂害民。當明季闖寇入京。吳三桂勢窮來歸。我

世祖章皇帝念其投順。優待有加。寵以王爵。託以腹心。嗣大兵克復滇巖疆。初定。令其移駐防禦。畀以事權。及朕即位以來。推誠益至。兩省官職。聽其選擇。題授。給養家口。兵丁歲費不貲。且欲其感恩知報。特加親王。人臣之分已極。委任之專無比。乃去年伊自具疏。求歸故土。朕憫其久在邊遠。勞於戎事。年已衰殘。欲令其父子祖孫得以完聚。准與遷移。遂其所請。復為之區畫房地。資給行糧。眷念體恤。委曲周至。詎意包藏禍心。久蓄不軌。陽報起程日期。遽乃擁眾倡叛。蹂躪百姓。竊踞城池。散布偽謔。妄為聲勢。以致鄰近州縣無知

之徒。被其煽惑。又復假造訛言。潛行傳布。以冀搖動愚民。種種狡謀。悖天蔑理。即屢次發兵。朕皆嚴諭將帥。令體朕軫念斯民至意。務期秋毫無犯。無非欲救濟百姓。安輯地方。今寧南靖寇大將軍王等。率領大兵。各路進剿。不日殲滅。以正天誅。吳三桂反覆亂常。不忠不孝。不義不仁。為一時之叛首。實萬世之罪魁。行即懸首藁街。以洩神人之憤。猶恐小民未悉其由。輒相驚疑。不察虛實。妄行聽信。立意一差。如蹈陷阱。邪正之介。即禍福之關。身家性命。所繫不小。朕不忍赤子悞罹法網。有傷天和。爾部即行文直隸各省督撫。刊刻告示。通行所屬各州縣。遍諭百姓。俾各安生業。勿聽訛傳。以副朕保全元元之意。○廣東廣西總督金光祖疏報廣西將軍孫延齡反。殺都統王永年。副都統孟一茂等。執廣西巡撫馬雄鎮。○諭戶部蜀地人民稀少。大兵所至。艱於供億。陝西與四川接壤。餽運為便。令陝

西總督巡撫與四川總督協理供應。○壬戌。

上詣

太皇太后宮問安。○癸亥。清明節。遣官祭

永陵。

福陵。

昭陵。

孝陵。○諭兵部。江西一省。東接福建。南界廣東。

西通湖廣。為三省要地。令前往兗州副都統

根特巴圖魯。前往安慶副都統席布。率兵速

赴江西省城。原駐江寧副都統馬哈達。將自

京所帶甲兵。移駐安慶。其察哈爾左右兩翼

官兵。於兗州秣馬之後。左翼官兵赴江寧。聽

江寧將軍統轄。右翼官兵赴安慶。聽馬哈達

統轄。○諭兵部。駐守武昌滿兵。既往岳州。長

沙。其防守南汝之真定總兵官張華善。即領

官兵赴武昌協守。念軍士自真定調赴河南。

今又遣往武昌。實為勞苦。其各以白金優資

之。

三月乙丑朔。命諸路設筆帖式。馳遞軍情。○丙寅。先是康熙八年。議政王大臣等會議廣東額兵七萬六千八百二十名。應裁一萬二千八百二十名。除汰過外。尚有未裁兵六千餘。至是。諭兵部。粵東海疆。幅員遼濶。未裁之兵。仍留之以資守禦。○丁卯。命都察院左都御史多諾。兵部侍郎納布。內閣學士李仙根。往荊州督理大兵糧餉。○多羅貝勒尚善。以病解右宗正任。以固山貝子溫齊。為右宗正。○戊辰。

上詣

太皇太后

皇太后宮問安。○己巳。

上御太和殿視朝。文武陞轉各官謝恩。次喀爾喀進貢使臣等行禮。○庚午。命和碩額駙華善。為安南將軍。帥師鎮守京口。副都統馬思文。楊鳳翔。內閣學士薩海同往。

上諭之曰。茲以京口地當要害。特遣爾等率兵

往鎮。倘附近有警。亦宜應援。師行往來。與駐防之地。約束軍士。勿得擾民。聞前者兵行所過地方。率多擾害。爾等當以為戒。否則罪有所歸。○甘肅提督張勇。舉首逆黨吳之茂逆書。并執來使。

上嘉之。命從優議叙。○辛未。以故二等阿思哈尼哈番。緙奔孫占霸襲職。○壬申。諭寧南靖寇大將軍多羅順承郡王勒爾錦等。朕覽都統覺羅巴爾布。護軍統領伊爾度齊。額司泰。前鋒統領碩岱等奏。皆云。以八月進兵恢復疆土。朕思雲貴尚未可輕進。必俟四川全定。方圖進取。但湖南地界。南連粵西。東抵江右。安慶近長沙。副將已降賊。兵船盡為賊有。今惟當相機速取常德。以斷長沙後路。使賊彼此不及應援。更以將軍尼雅翰。都統朱滿等。統兵進逼長沙。則長沙之賊。非來降即棄城遁矣。如此。則賊膽自落。百姓早得歸耕。於我進取雲貴之師。大有裨益。若不急取。使賊勢

漸增妨民稼穡。我兵深入。芻糧轉運。區處倍難。朕據理揆度如此。兵在千里之外。豈能遙為一一指示。但民心業已搖動。廣西音信又隔。倘江西更有賊警。勢必遣發禁旅。不惟饋餉浩繁。且恐兵民之心。又生叵測。爾等前出師時。皆言進取雲貴之期。不過八月。今賊猶未至而已。叛之長。澧常德諸處。乃亦欲待至八月。設各處再有變者。王將分兵以討否乎。分之則兵單。以次剿取。則馬疲。今惟先取常德。長沙。以寒賊膽。方為制勝。王宜集衆議以行。又諭。比聞逆賊吳三桂。身至常德。王所統兵馬。稍加休息。進取常澧之時。狡寇知不能敵。或出全力。冒死以犯岳州。武昌。亦未可料。王若進兵。當密示將軍尼雅翰。都統朱滿。各於所嚮之地。酌其近遠。約期共舉。庶幾萬全。其荊州。武昌。兩地軍機。互相關白。務宜回顧。武昌。王等仍相機以行。○予故太子少傅內大臣布業錫禮祭葬。謚果壯。○予故原任禮

部尚書祁徹白祭葬如例。○癸酉。

上詣

太皇太后宮問安。○己卯。

上御太和殿視朝。文武陞轉各官謝恩。○庚辰。杭州將軍圖喇疏報。耿精忠據福建反。總督范承謨。罵賊不屈。賊幽之。巡撫劉秉政降賊。○辛巳。厄魯特噶爾丹台吉遣使進貢。賞賚如例。○壬午。

萬壽節。

上率諸王貝勒貝子。公及內大臣。大學士。都統。尚書。精奇尼哈番。侍衛等詣

太皇太后

皇太后宮行禮。御殿。王以下。文武各官。上表慶賀。停止筵宴。○遣官祭

福陵。

昭陵。

孝陵。○遣官祭真武東嶽城隍之神。○甲申。

上詣

太皇太后宮問安○諭吏部大兵進剿逆賊。指日蕩平。地方恢復之後。即應設官撫綏民生。料理事務。項以需人甚急。已將漢軍內堪用人員。照該督撫所請。發往軍前候用。其漢人中。素有清操。及才能堪任煩劇者。不拘資格。著漢官大學士以下。三品堂官以上。據實保舉。發往軍前。與漢軍官員一體并用。務期虛公推薦。有裨地方。以副朕廣攬人才之意。爾部即遵諭行○江西巡撫董衛國疏言。長沙張夏二賊。欲犯江西。袁州吉安地方緊要。請撥兵防禦。得旨。著副都統根特巴圖魯率見駐南昌官兵前往。相機剿禦。提督趙國祚率官兵駐防南昌○免浙江臨海等四縣。歷年民欠銀三萬五千餘兩。錢二千七百餘緡。米六千餘石○乙酉。陞陝西潼商道崔澄為江南按察使司按察使○寧南靖寇大將軍多羅順承郡王勒爾錦疏報。偽將軍劉之復。陶繼智等。率賊萬餘。駕船七百。逼犯彝陵。於江

兩岸各創五營。臣遣護軍統領額司泰等。統領滿漢官兵。前往剿禦。三月初四日。我軍分水陸奮擊。賊衆大敗。遁回宜都。下部議叙○丙戌。賜衍聖公孔毓圻等宴於禮部○予故都統俄托渾。祭葬如例○丁亥。予故盛京將軍阿穆爾圖。祭葬。加祭一次。謚襄壯○戊子。

上詣

太皇太后

皇太后宮問安○旌表江南節婦桐城縣姚氏。歙縣徐氏。南陵縣趙氏。臨淮縣戈氏。烈婦歙縣吳氏。天長縣蔡氏。臨淮縣楊氏等。各給銀建坊如例○己丑。

上御太和殿視朝。文武陞轉各官謝恩。次喀爾喀進貢使臣等行禮○壬辰。湖廣總督蔡毓榮疏報。襄陽總兵官楊來嘉據穀城叛○命內大臣希爾根。為定南將軍。禮部尚書哈爾哈齊副之。帥師赴江西。護軍統領桑達。吏部

侍郎覺羅舒恕副都統根特巴圖魯席布同
叅贊軍務又以武昌有警命都統覺羅巴爾
布護軍統領伊爾度齊率師速赴武昌○兵
部議奏綠旗官兵賞格凡綠旗官兵除攻城
克敵等功已有定例議叙外如陣亡殉難官
員自千總至兵丁例給卹銀而提督以至衛
千總向未議及其大小各官俱准廕子弟而
千把總以微弁不與嗣後照品級高下俱應
給卹銀與廕又如大兵所至之處或敵人堅
壁相拒或大列陣相迎有能挺身先登以及
越衆衝鋒者應各依立功等第授以守備千
把總等官至如先躍敵船立功者應各依船
大小等第授以都司僉書守備千把總等官
並各給賞銀有差以示鼓勵從之○甲午

上詣

太皇太后宮問安○命副都統李林隆率漢軍
官兵赴襄陽同都統范達禮協守令范達禮
總統如鄖陽等處有警范達禮即酌量應援

○西安將軍瓦爾喀疏報吳逆下葉總兵竊
踞陽平關本月十八日臣同署前鋒統領穆
占等率官兵進剿自野狐嶺直抵陽平擒斬
賊衆三千有餘復取陽平關得旨嘉獎下部
議叙

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十七

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十三年甲寅夏四月乙未朔享

實錄卷四十七

太廟

上親詣行禮○丙申

上詣

太皇太后宮問安○戶部題河南彰德府因大

兵經行秣馬需用芻豆業令採辦運送甫至

中途而大兵已過應發還民間得旨芻豆已

經運送復還民間恐致苦累其見在未給草

豆准令存貯以備續發供應軍需○鎮南將

軍尼雅翰疏言奉使雲南禮部侍郎折爾肯

翰林院學士傳達禮還至武昌擒有吳三桂奏章

上諭寧南靖寇大將軍多羅順承郡王勒爾錦

等朕思吳三桂素多狡詐此中疑有詭計如

吳三桂服罪請降王及將軍等仍議招致之

益加警備毋墮奸謀即吳三桂束身歸命王

等但以禮受降其官屬當益加嚴防不可分

散兵力急於前進務相機以行○丁酉鄖陽

提督佟國璠疏報三月十九日鄖陽副將洪

福以所部兵千餘名反攻臣衙門臣率領標

下官兵三百餘名奮勇衝殺賊退復來自本

日至二十日共十餘陣斬賊二百餘級賊遁

去倉庫衙署皆得保全得旨嘉獎下部議叙

○土默特多羅達爾漢貝勒卓禮克圖及固

山貝子古睦故各遣官致祭○戊戌

上詣

太皇太后宮問安○己亥

上御太和殿視朝文武陞轉各官謝恩次厄魯

特喀爾喀進貢使臣等行禮○吏部兵部題湖廣總督蔡毓榮聞吳三桂反叛不能安民心固疆圉又不令提督桑額往守常德致常遭長岳相繼陷賊應革職雲南貴州總督鄂善既奉命與蔡毓榮公議軍機地方失守罪亦難逭應降五級調用得旨蔡毓榮革職鄂善降五級俱留任戴罪圖功○諭議政王大臣等頃安塘筆帖式向侍衛觀寶言河北總兵官蔡祿潛通叛鎮楊來嘉令兵丁借稱捕魚披甲行走有叛狀民心驚疑著內大臣阿密達帶每佐領護軍一名每旗護軍叅領一員速赴懷慶察問蔡祿捕魚之由○辛丑陞大理寺卿陳洪明為戶部右侍郎○予故原任吏部尚書馬希納祭葬如例○癸卯諭經畧莫洛將軍席卜臣陝西總督哈占等於西安閒丁內選數百人令其披甲給以馬匹器械並席卜臣等所領兵內每佐領出驍騎一名令副都統德業喜領赴襄陽同都統范達

禮鎮守內大臣阿密達事竣所領護軍亦令德業立率往以資守禦其襄陽副都統託岱於德業立至時即領其所部官兵赴順承郡王勒爾錦軍前○命隨征貴州左路總兵官馬雲程右路總兵官高登科往襄陽防守○甲辰

上詣

太皇太后

皇太后宮問安○諭議政王大臣等兗州駐防官兵既調往江西今授都統喇哈達為鎮東將軍同副都統伯穆赫林甘度海率滿洲蒙古每佐領驍騎一名及所調喀喇沁土默特兵二千駐防兗州穆赫林甘度海叅贊軍務○先是平南王尚可喜疏言孫延齡偽檄有三藩之語聞省又倏告變臣與耿精忠本係姻婭不能不踰階於中竊臣叨王爵年已七十有餘雖至愚極陋豈肯向逆賊求功名富貴乎惟知捐軀矢志竭力保固嶺南以表臣

始終之誠得旨。王累朝勲舊。性篤忠貞。朕心久已洞悉。近復屢據猷畧。保固嚴疆。厥功甚茂。覽奏。披瀝悃忱。深為可嘉。著益殫心料理。相機剿禦。以副朕倚任之意。至是。復諭兵部。平南王尚可喜奏請。調遣官兵。保固疆圉。忠誠顯著。深為可嘉。兩廣一應軍機。調遣。及固守地方事宜。著尚可喜。與總督金光祖。同心合力。務酌萬全而行。○先是。偏沅巡撫盧震。棄長沙奔回。

上遣部員往逮之。至是。至京。法司讞奏。盧震為封疆大臣。乃於長沙未變之先。委地潛逃。應論絞。得旨。盧震著監候。秋後處決。○乙巳。平南王尚可喜疏言。臣衆子中。惟次子都統尚之孝。律已端慎。馭下寬厚。可繼臣職。至於軍機事宜。臣雖衰老。尚能指揮調度。斷不致有悞封疆。得旨。尚之孝。襲平南王。○丙午。

上詣

太皇太后宮問安。○丁未。諭兵部。刑部。逆賊吳

三桂。值明季闖賊之變。委身從賊。尋以父死賊手。窮竄來歸。

世祖章皇帝念其投誠。優封王爵。授之軍旅。委以事權。異數殊恩。振古未有。爰及朕躬。特進親王。倚任等於腹心。恩禮加於勲舊。方期其感恩圖報。殫竭忠忱。詎意吳三桂。以梟獍之資。懷狙詐之計。陰圖不軌。自啟蒙端。藉請撤。後。執行叛逆。煽惑奸宄。荼毒生靈。極惡窮兇。神人共憤。已經遣發大兵進剿。刻期蕩平。諸王大臣會議。及逆子孫。理應誅戮。以彰國法。再三奏請。朕尚冀其悔禍自新。束身待罪。未忍加誅。近覽吳三桂奏章。詞語乖戾。妄行乞請。諸王大臣。咸以吳三桂怙惡不悛。其子孫即宜棄市。義難寬緩。朕思亂臣賊子。孽由自作。刑章具在。衆論僉同。朕亦不得而曲貸之也。本當照廷議。將吳應熊。吳世霖。并其餘子。俱行凌遲處死。但以吳應熊。久在近侍。朕心不忍。故將吳應熊。及其子吳世霖。處絞。其餘

幼子俱免死入官。應坐人犯。分別正法。所有干連人等。情罪稍可矜原者。教所司察行省釋。以昭法外之仁。爾二部。即通行曉諭。內外軍民人等。俾咸悉朕意。○先是。諭江寧將軍額楚。總督阿席熙。閩中告變。兩浙需兵。如杭州將軍。調爾滿兵時。可令副都統一員。馬兵千名。水陸往援。爾等當預備以俟。爾兵若行。可調安慶察哈爾兵。鎮守江寧。又諭杭州將軍圖喇。總督李之芳。提督塞白理等。取精忠反叛。爾等率滿漢官兵。作何防禦固守。當相機而行。朕已敕駐防江寧滿兵預備。若需用滿兵。可於江寧調取。至是。福建告急。

上命副都統胡圖。率江寧滿兵。副都統馬哈達。率所部官兵。及江寧左翼察哈爾官兵。速赴杭州。同將軍圖喇等。商酌行事。安南將軍華善。於所部漢軍內。擇馬肥者五百名。令夸蘭大二員領之。亦速赴杭州。聽圖喇等調遣。移安慶右翼察哈爾官兵。守江寧。華善仍令速

赴京口。○諭兵部。逆賊孫延齡。原係定南王下末弁之子。本無才能功績。祇緣定南王孔有德。航海歸誠。出師盡節。

世祖章皇帝憫其忠貞茂著。官兵人等。不忍分離。收合散亡。俾為一旅。仍以所屬官員統之。養贍加恩。槩從優厚。迨朕御極。念孫延齡既配王女。理應量加寵榮。故授為將軍。使之管理定南王所遺官兵。鎮守粵西。在孫延齡叨冒崇階。自應恪恭職掌。殫忠報効。乃歷任以來。屢有過犯。及累經王永年等。訐奏贓罪。部議從重處分。朕猶以定南王之功。曲加貸宥。仍令管兵如故。近復賜以撫蠻將軍印。委任有加。恩寵罔替。不意孫延齡。包藏禍心。背恩忘義。結連逆賊吳三桂。輒行反叛。煽亂地方。國法難容。宜加顯戮。今削其將軍職銜。大兵指日進剿。立正典刑。但念其所管官兵。係定南王舊人。受恩累朝。忠義素著。必不甘心從逆。陳棄前勳。其所管人員。及地方官兵。有能

擒斬孫延齡。授獻軍前者。優加爵賞。或以兵馬城池納款者。論功叙錄。或力有不逮。能自拔來歸者。亦免罪收用。至於伊等父兄弟。見在京城直隸各省者。緊不株連。毋得心懷疑畏。自罹法網。負朕好生之意。爾部即速行遍諭。○以固山貝子溫齊。為鑲藍旗滿洲都統。○陞光祿寺卿梁拱宸。為奉天府府尹。○平南王尚可喜疏言。逆賊吳三桂。遣人與臣逆書。臣擒執來。今并書奏聞。得旨嘉獎。下部俟事平日優叙。○己酉。

上御太和殿視朝。文武陞轉各官謝恩。次厄魯特達賴汗。喀爾喀墨爾根台吉。進貢使臣等行禮。○諭議政王大臣等。江寧滿兵。既撥千人援浙。恐江寧兵單。可撥包衣佐領兵千名。八旗每佐領驍騎二名。往守江寧。以駐守懷慶內大臣阿密達為總統。在京副都統喇哈紀爾他布。為兩翼領之。尋授阿密達為揚威將軍。○庚戌。諭議政王大臣等。取精忠背恩。

反叛。朕昭忠。取聚忠。雖與吳應熊不同。但係彼親弟。國法亦難寬縱。著並禁於一室。其屬下官員。俱著閒住。議政王大臣等。又請并禁其諸兄弟。從之。○皇子生。即於是日薨。未命名。○科爾沁諾穆齊額駙所尚之郡君故遣官致祭。○辛亥。

孝端文皇后忌辰。遣官祭

昭陵。○

上詣

太皇太后

皇太后宮。問安。○諭議政王大臣等。副都統馬哈達。胡圖。部下兵。及將軍華善所分遣兵。以都統賴塔為平南將軍統之。赴杭州剿禦。馬哈達。胡圖。並同叅贊。其杭州駐防官兵。仍聽將軍圖喇統轄。一切剿守事宜。賴塔。圖喇。商酌以行。○定南將軍希爾根等。帥師之江西。是日啟行。

上命副將軍哈爾哈齊。前鋒統領覺羅舒恕。領

兵一半。暫赴江寧駐防。俟內大臣阿密達等兵至。仍赴江西。○敕漢多羅郡王布達故遣官致祭。○壬子。賜大計卓異官安徽布政使徐國相等三十七員。蟒袍有差。○癸丑。

上詣

太皇太后宮問安。○陞叅領佟徽年。為河南河北總兵官。○寧南靖寇大將軍多羅順承郡王勒爾錦疏報。四月初八日。逆賊偽將軍陶繼智等。自宜都縣。以三百艘來犯彝陵。都統鄂內等。率兵進擊。斬賊甚多。獲船六十餘隻。下部議叙。○甲寅。諭兵部。逆賊吳三桂反叛。所在鎮守地方。文武各官。因兵單力微。不能拒敵。欲棄城來奔。又懼國法難逭。迫於不得已而附從者有之。或為奸計。說言搖惑。無知而附從者有之。今大兵齊集。刻期剿滅。務盡根株。朕念附從之徒。皆朕赤子。一時迷惑。情非得已。恐大兵進剿。驟行誅戮。朕心實為不忍。有能自悔前罪。或獻城池。或率兵卒。或斬

逆賊頭目。獻其首級者。俱行免罪。給以原官。仍論功議叙。若愚頑武弁。執迷不悟。助惡不悛。其部下之古。有心懷忠義。或擒斬逆渠。或約獻城池。或率領黨類來投。俱從優議叙。授官給賞。爾部通行曉諭。○陞順天府府尹魏象樞。為大理寺卿。○丁巳。陞督捕左理事官朱紱。為光祿寺卿。○戊午。

上詣

太皇太后宮問安。○諭戶部。各省用兵。錢糧繁費。其令出征王貝勒將軍。經畧都統。經理錢糧大臣。及所在總督巡撫等。凡各處軍需務期節省。兵馬錢糧。據實丈散。悉除浮冒。○內大臣阿密達領兵至懷慶。擒蔡祿以聞。上手教諭之曰。爾行未踰旬。克濟厥事。以遏亂萌。朕心深為嘉悅。但人命關係最重。須研審得實。方可正法。毋得株連無辜。至所俘人口。散給士卒。宜重賞被傷者。以示鼓勵。尋阿密達訊鞫。得其謀叛實跡奏聞。

上命將蔡祿父子並同謀者俱行正法。又諭兵部刑部蔡祿係海上投誠之人。念其來歸。給之世爵。復優擢河南河北總兵官。正宜殫竭忠忱。力圖報効。乃潛蓄逆謀。欲應吳逆。治甲練兵。約期煽亂。經坐塘筆帖式密報。遣內大臣阿密達前往察勘。並不出迎。及入城至伊署。輒敢施放火礮拒敵。因其叛形顯著。俱已收執。奏請正法。朕恐有冤誣。復令詳加審鞫。據其兵丁家人口供。俱稱蔡祿造烏鎗。購騾馬。與楊來嘉往來同謀。約應吳逆。謀反情實。即將蔡祿父子並其姪蔡鼎席及同謀人等俱行正法。其餘投誠墾荒弁兵。事無干涉者。槩不株連。叛逆法所必誅。良善務加綏輯。國有成憲。軍民無得驚疑。爾二部即通行曉諭。俾咸悉朕意。○諭兵部耿精忠叛。海澄公黃梧提督王進功。隔越漳泉。與浙江聲問不通。著平南王兩廣總督廣東江西巡撫浙江將軍總督等。設法遣人。確探消息。若黃梧王進

功等。能各守地方。令其固守。倘力單不能自守。廣東江西何處可通。著來會合。○平南王尚可喜疏言。吳三桂遣賊兵二萬屯黃沙河。若與孫延齡合兵一處。勢益猖獗。請就近撥兵。同臣兵剿滅孫逆。

上諭副都統根特巴圖魯席布等。候將軍希爾根哈爾哈齊等兵至江西。即率所部官兵。急赴廣東。一切機宜。同平南王尚可喜參酌以行。尋授根特巴圖魯為平寇將軍。○陝西興安總兵官王懷忠。遣子王建鼎入侍。○己未。上御太和殿視朝。文武陞轉各官謝恩。○浙江提督塞白理疏言。耿逆交通吳逆。結連鄭寇。沿海一帶。皆可揚帆直入內地。至江南崇明一邑。孤懸海外。尤屬可虞。

上諭浙江及江寧京口諸處。俱已遣發大兵。崇明一邑。雖云孤懸海外。亦有重兵駐防。但時方戒嚴。著江南總督提督。飭令崇明鎮將。嚴加警備。倘有賊警。該總督提督。即會將軍額

楚華善王之鼎等。公同謀議。守禦接應。○辛酉。

上詣

太皇太后

皇太后宮。問安。○諭兵部。逆賊耿精忠。庸懦無能。癡愚寡識。祇緣伊祖耿仲明。航海來歸。太宗文皇帝念其投誠之功。特封王爵。寵眷優隆。

世祖章皇帝定鼎燕京。復加委任。令其統兵鎮粵。中道殞身。其子耿繼茂。叨恩承襲。兩鎮嚴疆。恪共職守。朕惓懷勲裔。恩禮有加。及其病亡。尤深軫卹。特遣部臣。頒賜敕諭。俾耿精忠襲封王爵。自伊祖以及伊身。受恩三世。四十餘年。在耿精忠賴祖父之餘勲。冒朝廷之崇秩。自宜感恩圖報。殫竭忠忱。不意其包藏禍心。潛謀不軌。乘吳逆之變。輒行反叛。煽亂地方。罪惡昭彰。國法難宥。今削其王爵。遣發大兵進剿。指日蕩平。但念其所屬官兵。及地方

官員軍民人等。或被逆賊迫脅。雖懷忠義。莫能自明。恐大兵一到。玉石難分。有能擒斬耿精忠。投獻軍前者。優加爵賞。或以兵馬城池。納款者。論功叙錄。或力有不逮。自拔來歸者。亦免罪收用。其原係所屬之人。見為直隸各省文武官員者。驟從寬宥。雖有父子兄弟。見在福建者。亦不株連。勿得心懷疑畏。自罹法網。負朕好生之意。爾部即速通行曉諭。○癸亥。平南王尚可喜疏言。請調發官兵。征剿逆賊。及長江宜設舟師備禦。

上命兵部。以分遣禁旅。諸路調度情形。移會尚可喜。曰。今寧南靖寇。大將軍多羅順承郡王。及貝勒等。師領大兵。由常澧進平雲貴。鎮南將軍尼雅翰。都統朱滿。巴爾布等。師師由武昌水陸進取岳州。長沙。直入廣西。都統宜理布等。師師駐鎮彝陵。都統范達禮。副都統德業立等。師師駐鎮鄖襄。安西將軍赫業。副將軍胡禮布。西安將軍瓦爾喀等。師師由漢中

進取四川。副都統擴爾坤、吳國禎等帥師駐防漢中。鎮西將軍席卜臣等帥師駐防西安。復遣尚書莫洛、經畧陝西等處帥大兵居中調度。鎮東將軍喇哈達等帥師於山東、河南、江南要地駐防。安南將軍華善等帥滿洲漢軍官兵同鎮海將軍王之鼎等。於京口水陸駐防。揚威將軍阿密達等帥師同江寧將軍額楚等防守江寧、安慶沿江險要。平南將軍賴塔帥師由浙江平定福建。浙江將軍圖喇帥師駐鎮杭州。兼防海疆。定南將軍希爾根、副將軍哈爾哈齊等亦帥師由江西建昌廣信、平定福建。平寇將軍根特巴圖魯、席布等帥師赴廣東。會同該藩進剿。一切機宜恭酌以行。

五月甲子朔。諭兵部、大兵進剿閩逆。凡奏報軍機。止由水路。恐致稽遲。自杭至衢。著設馬站七處。置筆帖式。撥什庫。以便馳遞。○乙丑。陞左僉都御史田六善為順天府府尹。○丙

寅。

上詣

太皇太后宮問安。○皇子允初生。○申時。

皇后崩於坤寧宮。

上輟朝五日。諸王以下、文武官員及公主、王妃以下、八旗二品命婦以上。俱齊集舉哀。持服二十七日。以軍興。免直隸各省文武官齊集舉哀制服。及遣官進香。○丁卯。叙舉首林興珠逆書功。加壘荒都督蔡璋太子少保。事平之日。以總兵官用。加南贛總兵官劉進寶左都督。事平之日。以提督用。○江西巡撫董衛國。丁父憂。命在任守制。○戊辰。奉移大行皇后梓宮。至西華門外享殿。上親臨送。諸王以下、文武官員及公主、王妃以下、八旗二品命婦以上。俱齊集舉哀。○遣喀喇沁塔布囊何濟吉爾。土默特塔布囊山大學等往駐兗州。諭之曰。昔

太祖

太宗取天下。爾等祖父。常同心効力。朕仰體祖宗撫恤爾等祖父之意。恩典頻加。念爾等生長朔方。粵西一帶炎蒸之地。故不遣往。特命鎮守兗州。至彼須節慎飲食。凡有調遣。當聞命星馳。遣爾出師。所以為百姓也。亦當加意撫恤。沿途無致擾害。至於設巡哨。謹備禦。軍旅事宜。敬慎毋忽。○諭寧南靖寇大將軍多羅順承郡王勒爾錦。岳州水陸諸路兵力單弱。王可於荊州兵內。每佐領酌撥二三名。於彝陵領兵大臣內。曾歷戰陣者。令一人統之。由水路速援岳州。如尼雅翰。朱滿。巴爾布等。尚未破敵。須俟援兵到。始可進攻。非謂尼雅翰等。不能擊賊。正欲我軍兵多力厚。大敗賊衆。挫其兇鋒耳。范達禮等之兵。足守襄陽。令副都統德業立等兵。自襄陽往荊州暫駐。王貝勒大臣。身在行間。自悉機宜。聽爾等裁酌。如已得四川。當分兵三路。進取雲貴。賊中兵將來歸者。赦其前罪。厚加恩養。其以此播告。

大江以南。廣為宣諭。至賊兵各路入犯。分我兵勢。又聲言渡江。狡情難測。恐我兵日久偵探疎懈。雖賊所不到之處。亦宜嚴加防禦。○庚午。諭兵部。逆賊吳三桂。雖竊伏常澧。不日授首。但恐狡寇計窮。潛布奸細。惑我愚民。及土著奸宄。假借吳三桂煽動人心。擾害地方。俱未可知。爾部行文各省督撫。提鎮。密察嚴捕。但不可妄及無辜。○辛未。諭禮部。皇后何舍里氏。作配朕躬。已經十載。上事

太皇太后

皇太后克盡誠孝。佐朕內治。尤極敬勤。節儉居身。寬仁逮下。宮闈式化。淑德彰聞。茲於康熙十三年五月初三日崩逝。悵懷懿範。痛悼彌深。宜有稱謚。以垂永久。著內閣翰林院會同擬奏。應行典禮。爾部詳察以聞。○平南王尚可喜疏報。孫延齡叛。自稱安遠大將軍。移牒平樂梧州諸府。伏候廟謨指授。協力蕩剿。上命尚可喜與總督金光祖。提督馬雄等會同

商酌。逆賊孫延齡有可剿之勢。即議進剿。若未可速進。則俟大兵協力剪滅。又命部臣傳諭馬雄。固守所屬。相機滅賊。倘賊盛難禦。即率官兵赴廣東。與平南王總督等協守。以俟大兵之至。○丙子。常祭。

大行皇后。

上親臨舉哀。○遣官祭。

關聖帝君。○鎮海將軍王之鼎。疏言。取精忠賊踪往來無定。應將分防江陰瓜洲戰艦。調

集天寧洲。令右路總兵官。率兵訓練。以備戰守。

上允之。并令將軍阿密達。華善等。以所統滿洲漢軍官兵。並習水戰。○丁丑。叙舉首孫延齡逆書功。加廣西左江總兵官郭義。拜他喇布勒哈番。并原有之三等阿思哈尼哈番。合為一等阿思哈尼哈番。○戊寅。陞叅領劉成龍。為湖廣襄陽總兵官。○安西將軍都統赫業等。疏報。臣等率領大兵。自漢中府起程。四月

二十八日。抵七盤關。叅贊軍務署前鋒統領穆占等。大破賊衆於關口。又敗之於種子舖山下。五月初五日。進抵朝天關。護軍叅領杭

奇。領燾先登。大兵繼進。力攻三日。敗偽總兵石存禮等。於劄閣舖山下。陣斬吳逆親軍守

備一員。賊兵七千餘。生擒逆守備王道成。追殺十餘里。遂克朝天關。得旨嘉獎。下部議

叙。○諭經畧莫洛。朕聞鄭蛟麟來降。又聞克復朝天關。喜慰殊甚。此皆諸將軍謀畧。頃者

賊衆擁聚岳州。霖雨連綿。大兵不宜直前。俟雨霽風順。即水陸並進。吳三桂果在澧州。乘

虛徑襲其後。乃今日至要之機。如克復四川。可疾由交水。以取貴州。或徑取雲南。其可否

機宜。爾與諸將酌議密奏。○辛巳。夏至。祭

地於

方澤。遣輔國公葉伯舒行禮。○浙江總督李之芳。疏報。開化縣知縣崔華。率領鄉勇。殺敗賊衆。恢復縣城。得旨嘉獎。下部議叙。○壬午。杭

州將軍圖喇疏報。平陽兵變。總兵官蔡朝佐被執。又浙江總督李之芳等疏報。逆賊曹養性至平陽。與叛將司定猷等。會兵圍瑞安。衢州一路賊兵。屯聚清湖。海上賊踪出沒。內地山寇復起。見在標兵。四應不給。乞調近省禁旅彈壓。

上諭。將軍賴塔既抵杭州。可與將軍圖喇總督李之芳。提督塞白理等。會商平陽衢州等處緩急機宜。猶恐勢分力薄。其以駐劄江寧將軍阿密達。所轄包衣佐領官兵。令副都統喇哈。領赴浙江。聽賴塔調度。又以駐劄兗州將軍喇哈達。所轄喀喇沁土默特兵千名。令副都統穆赫林。領赴江寧。聽阿密達管轄。○甲申。初祭。

大行皇后。

上親臨舉哀。是日。

上除服。○乙酉。釋祭。

大行皇后。

上親臨舉哀。○平南王尚可喜疏報。潮州總兵官劉進忠。暗通耿逆。於四月二十日。擁兵叛。與續順公沈瑞兵巷戰。二十三日。遂引閩寇入城。○丙戌。陞江南驛鹽道王功成。為江南按察使。司按察使。○戊子。予故駐防孝陵總管巴格祭葬。如侍郎例。○己丑。

上詣

太皇太后宮。問安。○諭兵部。平南王尚可喜。累勦勦舊。久鎮巖疆。勞績茂著。自吳逆叛後。尤能篤守忠貞。殫心籌畫。屢抒謀畧。保固疆圉。事平之日。從優議叙。已經有旨。其藩下官兵。及該省文武官兵。俱能協力同心。克効忠順。防禦逆賊。勞瘁行間。朕心時切軫念。事平之日。俱著一并從優叙賚。兩部即速行傳諭。俾咸悉朕意。○庚寅。奉移。

大行皇后梓宮。權厝於都城北鞏華城。

上親臨送。諸王以下。文武官員。俱齊集西安門外。舉哀跪送。其隨送王大臣官員等。至鞏華

城奉安

梓宮畢舉哀行禮。

上回宮○辛卯。

上詣

太皇太后宮問安○壬辰。

上至鞏華城大祭

大行皇后諸王以下文武官員俱齊集舉哀除

服○轉禮部右侍郎史大成為左侍郎陞內

閣學士楊正中為禮部右侍郎○諭平南王

尚可喜總督金光祖提督馬雄等逆賊孫延

齡奏稱督提二臣誘其都統王永年謀為不

軌故不得已翦除王永年此係潛通吳逆故

飾辭誣奏耳然孫延齡雖叛其所部兵曾隨

定南王効力國家養有年恐大兵到日驟

行誅戮朕心有所不忍前有旨如孫延齡改

過來降亦從寬宥爾等不可因此遂緩進剿

機宜必孫延齡果悔罪歸誠爾等仍受降具

奏其所屬弁兵感念國恩或殺孫延齡或率

眾迎降從優議叙即隻身自歸者亦收留恩

養其出示曉諭○癸巳繹祭

大行皇后

上回宮

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之四十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十八

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十三年甲寅六月甲午朔

上詣

太皇太后宮問安○諭兵部曩者耿精忠之祖

耿仲明於

太宗文皇帝時航海歸誠優錫王爵効力行間

勞績茂著及其身故睿親王不令承襲

世祖章皇帝追念舊勲特允其子耿繼茂仍襲

王爵令兩鎮巖疆為國藩屏爰及朕躬惓懷

勲裔恩寵有加後覽其病終遺疏有地方兵

民凋敝賊寇未滅死不瞑目等語忠義肫篤

深切軫念且因耿繼茂之子耿精忠自幼曾為近侍予襲王爵仍鎮閩省朕以耿精忠必能紹祖父遺訓殫竭忠猷無忝先烈乃不意近為逆賊吳三桂誘惑煽亂地方棄累世之忠貞構一旦之狂舉既干國法復墜家聲朕猶念其祖父前功諒耿精忠必係一時無知墮人狡計與吳三桂不同故將吳三桂子孫正法耿精忠在京諸弟照舊寬宥所屬官兵並未加罪今湖廣遣寧南靖寇大將軍多羅順承郡王勒爾錦由湖南進剿雲貴吳逆指日授首鎮南將軍尼雅翰統領大兵由廣西進剿雲貴四川遣安西將軍赫業及西安將軍瓦爾喀等統領大兵已攻克七盤朝天等關直抵保寧剋期底定全川並剿雲貴定南將軍希爾根統領大兵由江西進剿福建平南將軍賴塔由浙江進兵平寇將軍根特巴圖魯由廣東進剿福建又遣揚威將軍阿密達鎮西將軍席卜臣安南將軍華善鎮東將

軍喇哈達等。各統領大兵。駐扎江南京口等處。調度征剿。耿精忠殲滅。在於旦夕。但念其祖父宣力累朝。洎精忠之身。遽至覆亡。宗祀斬絕。朕心深為不忍。且吳三桂乃本身投誠之人。背恩反叛。自取誅戮。耿精忠自祖父以來。受恩三世。四十餘年。非素蓄逆謀。首倡叛亂者比。爾部即傳諭耿精忠。果能追念累朝恩德。及伊父忠蓋遺言。革心悔禍。投誠自歸。將侵犯內地海賊。速剿圖功。即赦免前罪。視之如初。朕以至誠待天下。必不食言。俾其善自審度。勿負朕保全勲舊之意。爾部即遵諭速行。於是兵部奏遣工部郎中周襄緒。及耿精忠下一等護衛陳嘉猷。齎敕赴福建。尋又諭平南將軍賴塔。浙江將軍圖喇。總督李之芳。巡撫田逢吉。提督塞白理等。耿精忠作逆。蹂躪地方。大干國法。已遣發大兵。於浙江江西廣東三路進剿。但念其祖父。曾宣力累朝。洎取精忠之身。遽至覆亡。宗祀斬絕。朕心殊

為不忍。因遣周襄緒。陳嘉猷。齎敕往諭。如耿精忠悔禍乞降。赦免前罪。仍恩遇如初。爾等不可因此。遂悞進剿機宜。必耿精忠果請罪輸誠。爾等即受降來奏。若仍執迷。肆逆不悛。其藩下官兵。有心存忠義者。或擒斬耿精忠。或率眾來降。俱優加恩賞。即隻身自歸者。亦收留撫恤。○乙未。滿月。致祭。

大行皇后○丁酉。

上詣

太皇太后宮問安○己亥。贈湖廣陣亡遊擊甘應龍為叅將。予祭葬。廕子弟一人。以守備錄用。○陞歸化城土默特叅領席第。為副都統。○庚子。命戶部右侍郎達都。赴浙江督理大兵糧餉。○諭兵部。吳逆作叛以來。湖南綠旗官兵降賊者眾。惟彝陵總兵標下官兵。克厲忠貞。堅守地方。近復兩戰彝陵。奮勇擊賊。勞績顯著。若俟事平議叙。則効力之士。不得早沾國恩。可即行叙賞。以示鼓勵。○辛丑。

上詣

太皇太后宮問安○壬寅以兵部郎中錢江為

山東按察使司僉事提調學政○癸卯

上詣

太皇太后宮問安○江西巡撫董衛國疏報叛

弁柯昇勾連閩逆竊踞廣信諸處麻蓬地方

賊兵繼起

上諭定南將軍希爾根等爾等至江西時根特

巴圖魯等可先定廣信護軍統領查哈太原

令進兵荊州今改赴江西為希爾根叅謀到

日希爾根於所領兵內每佐領撥驍騎三名

付前鋒統領舒恕率領與根特巴圖魯合為

之叅謀由袁州進取長沙夾剿逆賊根特巴

圖魯等進取長沙日期須預啟順承郡王知

悉將軍喇哈達所統每佐領兵一名亦令副

都統甘度海率往江西與希爾根兵合叅其

軍務○甲辰諭總理糧餉左都御史多諾等

前遣爾等督理湖廣通省糧餉今聞岳州兵

馬草豆匱乏爾等可分一人前往武昌備辦

曩當太平之時湖北湖南巡撫二人分治今

軍興之際不得仍以地方分屬為議爾等會

同湖北巡撫張朝珍即選才能官員備辦軍

需無致缺乏岳州馬匹倘有不足可將順承

郡王軍前馬量為撥給又王師渡江或取宜

都等處所需船隻當於荊州預造百艘其作

何造辦及所需工費詳議以聞○乙巳陞國

子監祭酒徐元文為內閣學士兼禮部侍郎

○旌表江南泗州烈婦倪景妻王氏給銀建

坊如例○丙午諭兵部大兵進取岳州自岳

州至武昌中途應設滿兵防守前自懷慶赴

襄陽每佐領護軍一名即令護軍叅領噶爾

弼為副都統帥往與湖廣巡撫會議并量帶

綠旗兵赴蒲圻縣駐守○諭議政王大臣等

今逆賊吳三桂於澧岳諸處抗拒我師且用

奸謀搖惑軍民之心分我兵勢宜增兵速行

剿滅令八旗每佐領撥驍騎二名并派察哈

爾護軍驍騎一半。又蒙古四十九旗內與京師稍近者。如科爾沁十旗。款漢一旗。奈曼一旗。克西克騰一旗。歸化城十旗。共出兵萬人。以旗下兵之半。及蒙古兵六千。令固山貝子準達率往。荊州。散秩大臣多莫克圖。為署都統。叅贊準達軍務。又以旗下兵之半。及蒙古兵四千。以多羅貝勒尚善。為安遠靖寇大將軍。同固山貝子章泰。鎮國公蘭布。率往岳州。所調蒙古兵。俱限八月初一日以前至京。擇蒙古貝勒以下領之。尋理藩院以蒙古貝勒貝子。公。台吉等。列名奏請。

上命科爾沁輔國公圖納黑。杜爾伯特台吉溫布。赴荊州。巴林貝子溫春。台吉格勒爾圖。赴岳州。○丁未。

上詣

太皇太后宮。問安。○副都統德業立等疏報。五月二十九日。叛將洪福等。侵犯均州。營於武當山下。臣率領官兵迎擊。大敗賊衆。下部議。

叙○旌表河南夏邑縣烈婦閻怡妻張氏。王元恕妻冉氏。俱夫亡自縊。各給銀建坊如例。○庚戌。

上詣

太皇太后

皇太后宮。問安。○浙江提督塞白理疏報。總兵官祖弘勳。以溫州叛。

上諭。駐江寧副都統紀爾他布。率右翼察哈爾全軍。及每佐領甲兵一名。赴浙江。會同提督塞白理守禦。鎮東將軍喇哈達所轄蒙古兵。悉令署副都統巴爾堪。率赴江寧。聽將軍阿密達統轄。松江乃海口要衝。且與浙江連接。阿密達。額楚等。可密咨提督楊捷。若以松江可虞。即酌遣滿洲蒙古官兵。以副都統一員。領赴松江。與提督協守。在京滿洲蒙古每佐領撥驍騎一名。漢軍每佐領二名。以精奇尼哈番碩塔。一等侍衛穆森。為署副都統。偕漢軍都統釋迦保領之。前赴兗州。與將軍喇哈

達。會議行事。○江西巡撫董衛國疏報。耿逆遣賊李連、李太等出犯建昌府杉關。官兵奮勇衝殺。斬獲甚多。下部議叙。○辛亥。遣侍衛二格齎諭。往諭鎮南將軍尼雅翰等。爾等咨兵部。稱馬多羸斃。積雨弓軟。朕慮此時進兵未便。恐爾等以頓師日久懼罪。夫以千里之外。軍勢曲折。豈可逆料。朕不欲速。惟圖萬全。爾等俱係大臣。聽爾等謀畫以行。其軍中情形。及俘獲賊兵言賊進止之狀。並爾等所見。俱密行陳奏。尋尼雅翰等疏言。六月十七日。授誠偽守備薛麟兆等言。兵三桂遣偽護衛至岳州。令賊將堅守。且趣進兵。賊將稱待長沙。造烏機船到時。水陸入犯。又言賊營缺餉。全賴長沙水路運送。長沙守兵不多。臣等議俟秋涼。相機進取。○命陝西道府以下官員。聽經畧莫洛題補。○浙江總督李之芳疏報。江西廣信玉山。永豐等處。叛兵土寇勾合。閩賊偽總兵李雲龍率賊衆五千。來犯常山。開

化。金華副將牟大寅等奮擊之。陣斬偽叅將張雄。殺賊五百餘級。獲偽劄器械無算。下部議叙。○壬子。杭州將軍圖喇以病還京。命喇哈達移鎮杭州。掌將軍印務。統領駐防兵馬。及自京所遣漢軍官兵。其鎮東將軍敕印。留付護軍統領查哈太。即令管理兗州官兵。其往江西兵。令署副都統倭赫。穆承格領赴將軍希爾根軍前。諭喇哈達曰。鎮守杭州將軍圖喇因病罷任。今浙江當多事之秋。杭州諸處。殊為要地。以爾素有才能。遣往暫理杭州將軍事務。爾抵杭州。可與副都統馬哈達。雅塔理侍郎達都等會同商酌。務期固守封疆。愛養將士。收拾軍民之心。以副朕委任之意。復諭喇哈達及賴塔曰。爾等皆國家股肱大臣。委任封疆重務。凡事須商榷者。移會關通。協心謀畫。以副朕委任之意。勿各執己見。致有貽誤。務念國事為重。用茂厥績。○諭經畧莫洛。朝天關諸處。關係要害。可於滿洲漢軍。

或綠旗官兵內酌撥防守。為犄角之勢。糧艘至彼。遞相護送。不為無助。至漢中雖有滿兵。猶恐力單。且朝天關之外。尚有別路可通漢中。倘我兵深入後。奸宄竊發。據守雞頭關諸險。亦屬可虞。一切機宜。爾當酌量以行。又念保寧未能即復。則我師益致勞頓。輓運糧餉實為要務。其源源接濟。毋令匱乏。○先是。命經畧莫洛。遣副都統擴爾坤進四川。馬一寶赴漢中。將軍席卜臣提督王輔臣俱赴荊州。至是。莫洛疏言。擴爾坤官兵已遣赴廣元。周有德軍前。馬一寶官兵已遣赴漢中。副都統吳國正軍前。席卜臣則令率每佐領護軍一名。往漢中。總統馬一寶吳國正等之兵。以副都統巴喀率每佐領驍騎一名。同提督王輔臣往荊州。

上諭。貝勒貝子等既率八旗及蒙古兵赴楚。王輔臣兵不必發荊州。或令王輔臣從將軍赫業等進取保寧。或仍駐平涼。聽莫洛酌遣。已

喀即率兵赴順承郡王軍前。尋莫洛又疏言。逆賊固守保寧。且廣元所屬百丈關諸處賊眾盤踞。恐擴爾坤兵力單薄。隨令副都統吳國正。俟馬一寶兵至。即率官兵前赴廣元。○癸丑。廣西提督馬雄疏言。孫延齡逆眾不下萬五千人。臣雖堅守柳州。眾寡不敵。祈敕大兵速進應援。

上諭。兵部。柳州乃廣西要地。馬雄既堅守。請援速行。平南王尚可喜。總督金光祖酌發廣東兵前往接應。如有機會可乘。聽平南王與提督會商進剿。○甲寅。

上詣

太皇太后宮。問安。○乙卯。以戶部右侍郎陳洪明為廣西巡撫。○命廣西副將以下聽提督題補。從廣西提督馬雄請也。○戊午。

上詣

太皇太后宮。問安。○杭州將軍圖刺疏言。杭州兵單。請增兵協守。

上命撥京口將軍標下綠旗官兵三千。江南提標官兵二千。調山東署提督事副都統段應舉。帥赴杭州。仍聽將軍喇哈達節制。段應舉既赴浙江。將軍賴塔可率所轄滿兵及綠旗兵五千。進平福建。○諭兵部。浙江四川兩路宜遣王貝勒貝子公等前往剿賊。所以遣王等者。非謂諸將才能不足。念諸王貝勒皆朕懿親。指揮調遣。無可牽掣。守禦征剿。足增威重。其授和碩康親王傑書。為奉命大將軍。同固山貝子傅喇塔。率前鋒一百七十六名。每二佐領。合出護軍一名。赴浙江。又前調赴荆岳蒙古兵。令各分一千名。隨王至江寧時。將此兵留駐。更調駐守江寧喀喇沁土默特各并赴浙江。授多羅貝勒董額。為定西大將軍。同固山貝子都統溫齊。輔國公綽克託。率貝子準達所領驍騎之半。赴四川。其遣往王貝勒貝子公下包衣佐領多者。甲士酌量帶往。包衣佐領少者。以閒丁酌量披甲帶往。至王

貝勒所駐地方。將軍在王軍前。則將軍印不用。如別將兵。各用其將軍印。○諭兵部。貝勒尚善等至岳州。將軍尼雅翰。都統朱滿。巴爾布。護軍統領額司泰。仍叅贊軍務。康親王傑書等至浙江。將軍賴塔。副都統喇哈。紀爾他布。仍叅贊軍務。貝勒董額等至四川。將軍赫業。瓦爾喀。護軍統領胡禮布。署前鋒統領穆占。副都統佛尼勒。仍叅贊軍務。其餘俱罷叅贊。○已未。以冊謚

大行皇后。遣都統公佟國綱。告祭

太廟。○戶部題。發兵剿賊。原為平定地方。安輯百姓。今軍需絡繹。往往累及小民。請申飭各該督撫。嚴查地方官員。凡一應供應糧餉。及沿途喂馬。俱准動用正賦。不許借端私派百姓。至辦買米糧草豆。務照時價支給。勿致累民。從之。○庚申。

上素服。御太和門。遣和碩康親王傑書。和碩莊親王博果鐸。齎冊寶。詣鞏華城。冊謚

大行皇后。冊文曰。朕惟王化肇於閨門。洵藉內庭之助。陰教成於宮壺。尤資后德之賢。故皇英嬪而帝道興。任姒歸而王圖永。緬稽淑行。載藉攸存。惟暈服之有光。斯彤管其紀盛。聿彰令聞。爰著徽稱。皇后何舍里氏。毓自名門。躬全懿範。作朕元配。正位中宮。慈惠本乎性成。柔嘉維則。溫恭篤於天賦。禮度攸嫻。主雅化於閨闈。表芳型於海宇。勤

兩宮之孝養。婉以承顏。遇九御以寬和。思能遠下。蘋蘩時飭。克佐精誠。澣濯常衣。允昭節儉。歲規之益。贊宵旰而彌勤。貞順之風。御家邦而式化。方期永綏福履。詎意頓隔音容。月掩椒塗。鑑亡蘭殿。朕心傷悼。率土悲哀。懷哲思賢。惓微音於靡盡。揚休宣譽。垂鴻號於無疆。彝典式遵。崇褒用錫。特以冊寶。謚曰仁孝皇后。於戲。聖善弘宣。奕世頌禕。愉之盛。母儀備美。千秋耀琬琰之輝。靈其有知。膺茲光寵。辛酉。以冊謚。

仁孝皇后。頒詔天下。詔曰。國家化理。肇起宮闈。陰教敷宣。實資壺德。自古賢后。咸有徽稱。昭垂奕世。誠歷代之鉅典也。皇后何舍里氏。溫惠性成。柔嘉天亶。發祥世冑。正位中宮。佐朕奉事。

太皇太后

皇太后。克誠克孝。統理內治。維敬維勤。節儉居身。寬仁逮下。徽音茂著。懿範彰聞。茲於康熙十三年五月初三日崩逝。惓淑儀之備美。宜顯號以褒揚。爰敕所司。詳稽典禮。祇告

太廟。本年六月二十七日。冊謚為仁孝皇后。禮成。於戲。翟褱在御。難忘十載之芳型。琬琰增輝。永播千秋之令譽。頒示天下。咸使聞知。○浙江提督塞白理疏報。溫州屬羅清等營。相繼降賊。黃巖總兵官所屬太平營。亦叛賊兵。離黃巖止七十八里。請速發大兵。保守沿海邊地。

上諭。羅清等營既相繼降賊。則台州寧波可慮。

副都統喇哈所率包衣佐領兵且勿赴將軍
賴塔軍前。留駐杭州。副都統紀爾他布及喇
哈之兵俱聽將軍喇哈達侍郎達都同議調
遣。保守台寧等處。俟段應舉兵到。令其固守
地方。喇哈兵及副都統馬哈達兵。仍會賴塔
相機以行。康親王固山貝子至時。賴塔喇哈
達皆聽王等指揮調度。○河道總督王光裕
疏報。山陽縣高家堰石工板工成。下部知之。
○壬戌。

上詣

太皇太后宮問安

秋。七月。癸亥朔。享

太廟。遣輔國公常舒行禮。○甲子。陞大理寺卿

魏象樞為戶部右侍郎。○廣東廣西總督金

光祖丁父憂。命在任守制。○乙丑。

上至鞏華城。月祭

仁孝皇后。○丁卯。

上詣

太皇太后宮問安。○諭甘肅提督張勇。秦省邊

陞重地。恐奸宄竊發。爾乃封疆大臣。朕所簡

任。可率所部總兵等官。固守地方。有為亂者。

嚴行緝治。以副朕倚任股肱之意。○轉工部

右侍郎廖昇為左侍郎。以原任盛京刑部侍

郎祁通額為工部右侍郎。○添設杭州每旗

防禦各一員。從將軍圖喇請也。○戊辰。議政

王大臣等議覆廣東巡撫劉秉權疏言。平南

王次子都統尚之孝。辭襲王爵。今當諸逆鴟

張。大兵進剿之時。平南王尚可喜壽盡周詳。

精神強健。應令尚可喜照舊管事。俟事平。令

尚之孝承襲。從之。○喀爾喀澤卜尊丹巴胡

土克圖遣使進貢。賞賚如例。○辛未。

上詣

太皇太后

皇太后宮問安。○以原任江南江西總督郎廷

佐為福建總督。○以署山東提督鑲藍旗副

都統段應舉為隨征福建提督。陞叅領劉顯

芳為隨征福建左鎮總兵官。督捕員外郎劉德懋。為隨征福建前鎮總兵官。○壬申。差往達賴喇嘛處。員外郎拉篤祜喇嘛丹巴德穆齊。還奏云。臣等奉命。行至西寧。厄魯特墨爾根台吉攔阻云。前達賴喇嘛往京時。我班禪差人問達賴喇嘛安。中國以為額外遣使。不令行走。故我今亦攔阻。臣等答云。達賴喇嘛有此語乎。明日決意前行。次日起行前往墨爾根台吉亦無從攔阻。至青海地方所住達賴綽爾濟。遂遣鄉導送往。至達賴喇嘛處。達賴喇嘛俯伏接旨。向臣等云。我聞吳三桂反叛。心甚憂悶。今接教書。得聞

聖躬萬安。不勝忻慰。我本喇嘛。惟當誦經。祝祐聖躬康豫。威靈遠播。國祚綿長。吳三桂指日殄滅。其揚打木。結打木。二城原係我三噶爾麻之地。今為吳三桂所奪。我即遣兵攻據。若吳三桂勢窮而來。我當執而送之。若聞彼不出邊境。東西逃竄。即時進兵擒拏。臣等云。喇嘛

既欲相助。當勿吝大舉。喇嘛云。聞大國兵馬。皆給糧草。我兵前進。糧草不繼。人飢馬瘦。何能深入。臣等云。當此吳三桂反叛之時。若將國家山陝良民搶奪。非為相助。反生釁也。達賴喇嘛云。我亦當誠諭我兵。不令妄行。天使回奏。

皇上作何調遣。即諭來使。令其速歸。我即遵旨奉行。奏畢。

上曰。拉篤祜等所行。殊為可嘉。著吏部議叙。丹巴德穆齊著賜名加賞。○癸酉。

上詣

太皇太后宮。問安。○命鎮海將軍王之鼎。撥崇明沙船。率綠旗兵。習水戰於黃浦。以防海寇。○經畧莫洛疏言。大兵在保寧。與賊相持。恐運餽日久。秦民必致疲苦。臣今親赴漢中。酌量分路進發。貝勒董額等。若率眾盡行。慮致遲滯。請敕貝勒董額。以所將驍騎。并入康親王軍內。自率所部輕騎。赴西安。旋進四川。

上諭董額部下無多。所將驍騎既入康親王軍內。輕騎入川。兵力單薄。可令貝子公等。亦各率所部輕騎。并力前進。○平南王尚可喜疏報。逆鎮劉進忠。遣逆黨陳真。率衆分據程鄉縣水陸要口。抗拒我師。提督嚴自明等。分遣官兵擊之。斬獲甚衆。程鄉縣偽守備張奉襄。遣人通款。縛獻偽守備楊滄。開門迎降。得旨嘉獎。下部議叙。○平南將軍都統賴塔疏報。逆賊犯金華府。副都統馬哈達。雅塔理等。親督官兵擊敗賊衆。下部議叙。○江西巡撫董衛國疏報。南瑞總兵官楊富。隱匿在官甲冑。私置竹礮器械。暗招閩兵千餘。練習滾牌。與賊潛通。謀為內應。臣與定南將軍希爾根等。密計擒之。即時正法。下部議叙。○甲戌。多羅溫郡王孟我費。

上輟朝二日。予祭二次。造墳立碑。謚曰良。○陞太常寺卿金僞。為大理寺卿。○乙亥。先是。江西巡撫董衛國疏報。閩賊出犯杉關。新城失

守。至是。又疏報賊攻破石城。聲犯寧都。

上諭贛州乃入粵孔道。將軍希爾根。巡撫董衛國等。務會同商酌固守之策。並趣副都統甘度海。署副都統公倭赫等。速赴江西。○諭兵部。袁州與湖廣接界。亦屬要區。可令將軍希爾根。哈爾哈齊。根特巴圖魯等。協心商酌守禦之策。務期保固。○陞袁州副將趙應奎。為表臨總兵官。駐防袁州。○丙子。浙江總督李之芳疏報。賊兵合力來犯衢州。臣標兵單可虞。請敕副都統喇哈統兵亟進。以壯聲援。上諭喇哈統兵。不必留駐杭州。速赴衢州。與將軍賴塔。并力剿禦。將軍喇哈達。侍郎達都。副都統馬哈達。雅塔理等。仍駐杭州防守。副都統紀爾他布之兵。視何處緊急。即往應援。○丁丑。中元節。遣官祭

永陵。

福陵。

昭陵。

孝陵。

仁孝皇后○戊寅。廣東廣西總督金光祖疏言。交趾知孫延齡叛逆。乘機蠢動。陳兵邊界。其情叵測。請加防禦。

上敕平南王。及總督提督等。嚴飭邊將。不時偵察。仍增官兵。防守險隘○己卯。陞叅領王國棟。為陝西固原總兵官○庚辰。

上詣

太皇太后宮問安○命另設江西總督員缺。陞

江西巡撫董衛國為之○辛巳。調宣府總兵官拜音達禮。為隨征福建後鎮總兵官。陞駐防山海關叅領品級李棲芳。為隨征福建右鎮總兵官○浙江巡撫田逢吉疏報。嘉興湖州二府。土賊猖獗。臣發標下官兵。委驛傳道李之粹統領。會同二府文武各官往剿。大敗賊於湖州白鶴嶺。生擒賊首朱二鬚子。羊子加等一百餘名。俱各斬首。餘賊陸續擒撫。地方安寧。下部議叙○壬午。先是。

上命副都統蘇朗。署副都統額思赫。率蒙古兵二千之江寧。即留付將軍阿密達。令之駐防。其原駐江寧喀喇沁土默特兵。令蘇朗等率赴浙江。至是。浙江賊寇蜂起。衢州告警。將軍喇哈達奏聞。

上以衢州正在危急。令副都統伯穆赫林。率喀喇沁土默特兵。自江寧速赴浙江。與將軍喇哈達等。會同剿禦。副都統蘇朗等。仍率蒙古兵。鎮守江寧。將軍喇哈達。賴塔。侍郎達都。總督李之芳。既同任剿撫之事。一應軍務。須公同商酌。毋分彼此。如浙江何處有警。即相機應援○廣東廣西總督金光祖疏報。梧州失陷。我兵據守梧江。

上諭。將軍根特巴圖魯等兵。由袁州取長沙。進廣西。以襲賊後。則取道廣東。必致遲久。可令平南王尚可喜。總督金光祖。提督馬雄。會同酌議。添發官兵。規取梧州。否則固守梧江。諸處相機剿禦○西安將軍瓦爾喀等疏報。進

征四川總兵官王懷忠標兵。因餉匱逃散。今欲剿賊。兵力單薄。運餽不至。乞發兵救援。

上諭。康親王傑書。及貝子準達。所部驍騎。俱令貝勒董額。率之以行。其大兵。或仍據壕。整圍守保寧。或因糧運艱難。暫還廣元。令經畧莫洛。將軍瓦爾喀等。公同商酌。王懷忠標下逃兵。姑寬其罪。應如何撫納。亦令莫洛。商酌速行。○癸未。以原任山西巡撫楊熙。為福建巡撫。原任總督倉場工部尚書白色純。為江西

巡撫。駐劄贛州。○理藩院會同吏部。導諭議覆。奉使達賴喇嘛。朱拉齊格隆。中途病故。應追贈班第達爾漢卓禮克圖名號。賞銀二百兩。丹巴德穆齊。應賜扎薩克喇嘛品級。住持歸化城廟宇。員外郎拉篤祐。應以通政使司左通政。大理寺少卿陞用。筆帖式鼓魯。應以理藩院主事陞用。從之。○杭州將軍都統喇哈達。疏報。偽總兵閆標。率賊萬餘。自溫州。處州。來犯金華。副都統鄂申。巴圖魯。親率滿漢

官兵連戰大敗之。殺賊七千有餘。陣斬偽官以百計。擒偽總兵閆標等一百七十二員。斬之下部議叙。○甲申。鑲白旗副都統博通。俄以病乞休。命以原品解任。○四川總督周有德。疏報。偽總兵彭時亨等。領水陸賊兵三千。犯廣元。三面攻城甚急。副將張登科等。分率官兵力戰。大敗賊衆。下部議叙。○乙酉。

上詣

太皇太后

皇太后宮問安。○免山東青城等十一縣。本年分旱災額賦有差。○寧南靖寇大將軍多羅順承郡王勒爾錦。疏報。宜都縣偽將軍劉之復。穆升。率賊船百餘。陳兵江岸。燒白楊村。副都統蘇虎濟。署護軍統領圖爾度。渾等。率八旗官兵擊敗之。下部議叙。○平南王尚可喜。疏報。官兵恢復程鄉後鎮。平遠。二縣。文武各官。俱赴軍前。投繳偽印。偽劄。恢復二縣。下部議叙。○丙戌。陞太僕寺卿來懋德。為太常

寺卿○江西總督董衛國疏報。閩賊侵犯寧都。南贛總兵官劉進寶。調發遊擊周球等。擊敗賊衆。斬獲無算。保全寧都。下部議叙○丁亥。陞叅領閔可權。為宣府總兵官○寧南靖寇大將軍多羅順承郡王勒爾錦疏報。貝勒察尼。將軍尼雅翰等。分部滿漢官兵。水陸齊發。進攻岳州。賊將吳應麒等。率兵七萬餘。陸路相拒。我兵奮擊。大敗之。斬首萬級。舟師抵七里山。以礮攻賊。沉其船十餘艘。下部議叙

○己丑。奉命大將軍和碩康親王傑書。帥師之浙江。定西大將軍多羅貝勒董額。帥師之四川。

上御太和殿。各賜敕印。命和碩裕親王福全。和碩莊親王博果鐸。及內大臣。尚書。侍郎等。分送出郊○廣東巡撫劉秉權疏報。賊首李唐宗。藏匿偽隆武敕印。盤踞永安縣南嶺山巢。值雲貴告變。即乘機煽黨。蓄謀通逆。隨發兵搜捕。李唐宗勢迫投見。即於軍前正法。遣兵

分路搜斬賊夥殆盡。下部議叙○辛卯。免直隸霸州。本年分水災額賦十之三○諭兵部。耿精忠身雖背恩反叛。念其祖父投誠効力。累世舊勲。朕豈肯以耿精忠之罪。及其先人。大兵平定閩省之日。其祖父骸骨。仍許收葬。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十九

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級人加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十三年甲寅八月壬辰朔江西總督董

實錄卷四十九

一

衛國疏報。閩逆盤踞石城。南贛總兵官劉進

寶遣遊擊周球等擊敗賊衆。恢復石城。得旨

嘉獎。下部議叙。○癸巳。

上詣

太皇太后宮問安。○諭科爾沁公圖納墨。我

太祖

太宗以來。爾祖父同心効力。佐定天下。爾國賦

稅聽爾自取。若爾國窮苦。朕加意撫養。今聞

調至爾所屬兵卒。有掠取民物者。在京尚如

此。况離此遠去。豈不益肆搶奪。爾久歷行間。

務宜嚴禁兵卒。毋得恣行強橫。如有亂法者。

即會同貝勒。議行懲治。且中夏炎熱。爾衆早

晚飲食。各宜自慎。以副朕軫恤軍士之意。○

諭兵部。諸路大將軍。止各給一印。倘分兵赴

剿。別無印信。則招撫賊寇。宣諭百姓。及調遣

防守地方。兩軍移會機宜。何以為憑。其再給

大將軍順承郡王勒爾錦印二。至大將軍康

親王傑書處。有將軍賴塔印一。再給印一。大

實錄卷四十九

二

將軍貝勒尚善處。有將軍尼雅翰印一。再給

印一。大將軍貝勒董額處。既有將軍赫業瓦

爾喀印二。不必另頒。若分兵他往。即以所頒

印信。付統兵者。復合一處。則收回所頒。止用

大將軍印。○江西總督董衛國疏報。饒州營

兵變。餘千賊勢猖獗。

上諭將軍希爾根。速調副都統公倭赫兵赴江

西。同副將軍哈爾哈齊。總督董衛國提督趙

國祚。商議剿滅賊寇。平定地方。仍檄江南總

督阿席熙。安徽巡撫靳輔。於饒州接壤所存。增設官兵。嚴加防守。○浙江總督李之芳。疏報耿逆兵在衢州杜澤大洲等處。都司姚世熙守備晉大忠等。兩路進剿。大敗之。又耿逆兵勾連土賊。從處州進逼金華。副都統鄂申。已圖魯副將陳世凱。率領滿漢官兵。擊殺逆賊七千有餘。生擒一百七十餘人。追奔二十餘里。獲器械旗幟無算。下部議叙。○甲午。安遠靖寇大將軍多羅貝勒尚善等。帥師之岳州。貝子準達等。帥師之荊州。

上御太和殿。賜之敕印。命和碩安親王岳樂。內大臣輔國公常舒。及內大臣尚書侍郎侍衛等。送之出郊。○

上至鞏華城。月祭。

仁孝皇后。○乙未。諭兵部。王師進剿湖南。須用綠旗官兵。總督蔡毓榮。管轄通省。可率所部兵。隨王師協力平定地方。又荊州地關緊要。進兵時。大將軍順承郡王勒爾錦。宜酌撥官

兵防守。○陞大理寺少卿金鼐為太僕寺卿。○丙申。湖廣總督蔡毓榮。丁父憂。命在任守制。○平南王尚可喜疏報。潮州叛鎮劉進忠之黨劉斌。據普寧。都統尚之孝等。遣發官兵進剿。被陷知縣段藻。潛遣人通款。誘賊出城迎戰。因閉門拒之。我兵剿殺甚衆。恢復普寧縣城。得旨嘉獎。下部議叙。○丁酉。遣大學士

圖海。祭

先師孔子。○

上詣

太皇太后

皇太后宮。問安。○福建總督郎廷佐疏言。耿逆背叛。勾連海寇。虛張聲勢。但海寇止習水戰。陸地非其所長。宜剿撫兼施。乘機底定。

上諭。郎廷佐入閩之日。海寇宜用撫。耿逆忠宜用剿。或用間。相機便宜以行。○平南將軍都統賴塔等疏報。逆賊侵犯金華。副都統喇哈等。率領官兵。自七月十三日至十八日止。九

次合戰。擒斬賊衆甚多。恢復諸暨義烏三縣。得旨嘉獎。下部議叙。○戊戌。祭

大社

大稷。遣內大臣坤巴圖魯行禮。○以刑部郎中張為仁為廣東按察使司僉事。提調學政。○兩河堤工告竣。加河道總督王光裕兵部尚書銜。○免山東泰安濟陽等十二州縣本年分旱災額賦有差。○庚子。

太宗文皇帝忌辰。遣官祭

昭陵。○以教漢故多羅郡王布達子薩穆珀爾襲爵。○浙江總督李之芳疏報。臣標下隨征福建遊擊王世望等。率領官兵。搜剿龍游逆賊。擒斬甚多。又嚴州副將鮑虎。率領官兵奮勇殺賊。連奪險隘四處。一日六戰六捷。焚燬賊巢。恢復壽昌。得旨嘉獎。下部議叙。○李之芳又疏報。逆賊犯紹興之新昌縣。知縣陳大典乘間出奇。殺賊全城。賊犯郡城。知府許弘勳率鄉兵堵禦。敗賊於郡城外。嗣援剿守備

吳良駿等率兵分道截殺。斬偽總兵等。賊遂遁走。犯台州之仙居縣。都司汪國祥等擊敗之。黃巖土賊竊發。守備王有功等斬獲無算。下部議叙。○壬寅。

太祖高皇帝忌辰。遣官祭

福陵。○

上詣

太皇太后宮問安。○以科爾沁故和碩土謝圖親王巴雅斯呼朗子阿拉善襲爵。○平寇將軍根特巴圖魯卒於軍。命副將軍哈爾哈齊為平寇將軍。○諭兵部。大軍進剿。急須火器。著治理曆法南懷仁鑄造火礮。輕利以便登涉。○海澄公黃梧子黃芳度遣官黃藍間道齎疏進京。疏言。臣父於本年三月二十六日病故。臣不得已。權以父命。送敕命印於賊處。仍密行招募。合舊兵共得六十餘名。六月初四日。斬偽城守都督劉豹等三人。保守漳州。惟望大兵入閩救應。臣偵知來路。隨往迎接。

上諭海澄公黃梧自海上歸誠殫竭忠藎鎮守
巖疆勞績茂著據奏於三月二十六日病故
朕心深為軫惻應得恤典從優議奏黃芳度
設計全城招集兵卒斬偽都督劉豹等三人
固守地方以俟大兵具見黃芳度能繼父志
克篤忠貞殊為可嘉黃芳度應令襲公爵今
大兵由浙江江西廣東三路進閩黃芳度偵
何處兵先到即來迎會尋黃芳度兄一等待
衛黃芳世自陳生長閩地深知道里情形乞
隨大兵進剿救援伊弟黃芳度。

上因授黃芳世為隨征福建總兵官令同平南
王尚可喜兵進剿福建○調鑲白旗蒙古副
都統阿進泰為滿洲副都統○叅贊軍務護
軍統領桑邁副都統席布疏報耿逆遣賊兵
自建昌前來大兵進剿至撫州擊敗賊衆斬
殺甚多下部議叙○癸卯
上至鞏華城駐蹕○甲辰行
仁孝皇后百日祭禮。

上親臨舉哀畢回宮○先是經畧莫洛以秦省
兵單請添設綠旗兵萬餘以資戰守。

上諭增兵必須增餉國家錢糧止有此數茲大
兵進剿浙江江西湖廣需餉浩繁爾經畧所
知前因餽運不給致王懷忠等兵逃散秦民
供億入川兵餉已極勞苦若增兵萬餘貝勒
經畧又統諸軍深入萬一糗糧難繼恐禁旅
有匱乏之虞而綠旗兵復蹈前轍矣經畧身
在地方洞悉情形或不煩增兵即親行入川
或必須議增方可進發或以秦省重要不必
親行遙措兵餉其逐一詳議以聞至是莫洛
疏言陝西舊兵內王懷忠所率四千悉已逃
散今王輔臣又率二千以行除此六千照額
招補外所增無多蓋增則戰守調遣均有裨
益陝西得以保固故臣以為增之便若四川
速定則錢糧有資而秦民又得息肩臣仍宜
親統官兵協力進剿平定四川從之○湖廣
總督蔡毓榮疏報逆賊盤踞南漳縣天門寨

等處。襄陽總兵官劉成龍分守下荆南道。叅政石琳率領官兵攻剿。斬殺賊衆。獲馬騾器械。安撫各寨洞。下部議叙。○乙巳。廣東廣西總督金光祖疏報。水陸官兵四路往取梧州。逆賊遁去。追斬甚多。獲船礮器械等。恢復梧州。得旨嘉獎。下部議叙。○丙午。

上詣

太皇太后宮問安。○

上幸南苑行圍。○丁未。添設江南驛鹽道一員。缺。管理安徽等處驛鹽事務。駐劄安慶。其管理通省驛道。改為江蘇等處驛鹽道。仍駐江寧。○以戶部郎中解幾貞為江南按察使司僉事。提調學政。○予故原任太子少師工部尚書性納祭葬。諡敏襄。○厄魯特鄂齊爾圖車臣汗等遣使進貢。賞賚如例。○巳酉。復設江南徽寧巡道員缺。駐劄徽州府。○吏部議覆。河南道御史朱尚義疏言。王師前向刻期蕩平。今粵閩督撫既設。將來守令將弁勢必

須才補用。請敕三品以上滿漢堂官及八旗都統。凡有真正才能。不拘文武。照例保舉。候吏兵二部甄錄。咨送軍前。以資保障。應如所請。令各官虛公保舉。臣等甄錄發往軍前補用。倘保舉匪人。將保舉之官照例議處。從之。○浙江總督李之芳疏報。臣同平南將軍賴塔。遣援剿總兵官李榮領官兵至金華進剿。陣殺一千餘人。生擒一百五十餘人。焚其木城。副將鮑虎砍賊五營。乘勝恢復淳安縣。得旨嘉獎。下部議叙。○浙江提督塞白理疏言。黃巖圍困。請援甚急。又寧海象山。新昌。餘姚。四縣賊衆蜂起。恐賊踞寧海。斷我糧道。請速救台州。保守寧波。得旨黃巖圍急。杭州將軍喇哈達。已發兵赴援。今大將軍康親王。已領兵赴浙。無庸別遣。其寧海等處賊衆。作何剿滅。并救台保寧之策。康親王未到之先。聽將軍賴塔。喇哈達等商酌以行。○庚戌。上還自南苑。詣

太皇太后

皇太后宮問安○諭公圖納黑等近聞蒙古兵違法搶掠其嚴加禁飭嗣後有不遵紀律者自驍騎校以下即審明正法○辛亥

上手敕諭護軍統領桑扈曰江右為粵東咽喉江浙唇齒所關綦重今兵民之心尚持兩端若不先滅地方小醜大兵難以前進至袁州吉安贛州尤屬要地若有失陷則廣東聲息必至梗阻廣東梗阻則勢益危急今滿兵駐袁州相機進取長沙否則固守地方庶三府可保無虞將軍當親統重兵以行毋使兵力單弱致有疎失○復設浙江杭嚴巡道員缺駐劄嚴州府○甲寅

上詣

太皇太后宮問安○免直隸南皮等十縣山東禹城等二十九縣本年分旱災額賦有差陝西莊浪衛本年分電災額賦十之三○陞叅領劉顯忠為鑲藍旗漢軍副都統○乙卯秋

分夕

月於西郊遣戶部尚書米斯翰行禮○丙辰上御太和殿視朝文武陞轉各官謝恩次喀爾喀土謝圖汗使臣等行禮○江西總督董衛國疏報南贛總兵官劉進寶遣遊擊田振會同屯墾都督陳平統領官兵恢復萬年縣得旨嘉獎下部議叙○丁巳予故蒙古副都統泰錫喀祭葬如例○浙江總督李之芳疏報副將鮑虎領兵恢復遂安縣叅將洪起元等領兵恢復嵯縣得旨嘉獎下部議叙○戊午予故原任湖南總兵官太子少保左都督南一魁祭葬如例○已未

上御經筵講畢賜大學士九卿詹事及講官等宴○諭議政王大臣等聞岳州三面臨湖賊於陸路一面浚壕築壘據守頗堅難以進取應令將軍尼雅翰率兵沿流赴江西與副都統甘度海兵合并率來臨總兵趙應奎由袁進復長沙夾攻岳州相度便宜以行○遣官

祭

歷代帝王○遣官祭城隍之神○陞太常寺卿袁懋德為通政使司通政使○庚申復設陝西關南守道員缺駐劄興安○辛酉。

上詣

太皇太后宮問安○浙江總督李之芳疏報副都統胡圖臣標中軍副將王廷梅統領官兵至石梁大溝源三路擊敗賊衆又總兵官李榮進剿敗賊恢復東陽縣得旨嘉獎下部議

叙

九月壬戌朔諭翰林院掌院學士傳達禮等曰日講關係甚大今停講已久若再遲恐致荒疎日月易邁雖當此多事之時不妨乘間進講於事無誤工夫不間裨益身心非淺爾衙門議奏尋翰林院諸臣以幾務殷繁請間日一進講。

上曰軍機事情有間數日一至者亦有數日連至者非可限以日期其仍每日進講以慰朕

惓惓嚮學之意○江南總督阿席熙疏報饒州賊犯徽州婺源縣。

上諭徽州江浙接壤要地將軍額楚署副都統宗室巴爾堪等於揚威將軍所統驍騎并江寧將軍所轄兵內酌量率赴徽州堵剿逆賊署副都統碩塔穆森以鎮守兗州滿洲蒙古驍騎移駐江寧更發京師滿洲蒙古每佐領驍騎一名以王府長史雅賴一等侍衛阿喀尼為署副都統率之往駐兗州○江西總督董衛國疏報吳逆偽將軍二人率保黨數千來犯長沙糾集羣盜聲襲袁臨窺伺江西已入袁州境內。

上諭袁州距吉安不遠吉安贛州又通粵要路今賊入袁境將軍希爾根等停剿撫建諸賊分所部兵與將軍哈爾哈齊率赴袁州與總兵趙應奎并力剿禦其希爾根所餘兵馬或進剿撫建或固守南昌相機以行尋董衛國又奏賊陷都昌。

上復諭將軍希爾根。總督董衛國。提督趙國祚等。速行剿滅。江南總督阿席熙。安徽巡撫靳輔。嚴飭接壤將弁。加意防禦。○癸亥。以土默特故固山貝子古睦子滾濟斯扎布襲爵。○甲子。

上至鞏華城。月祭。

仁孝皇后○湖廣總督蔡毓榮疏報。叛賊楊來嘉等。出犯南漳。官兵奮勇力戰。大敗賊衆。陣斬偽弁兵目。獲偽劄器械等物。下部議叙。○

乙丑。

上詣

太皇太后

皇太后宮問安。○先是。命碩塔穆森率師赴江寧。至是。因江南總督阿席熙疏報賊逼祁門。上乃命碩塔穆森。徑趣安慶駐防。尋又調河南提督王永譽。為安徽提督。率所部兵以往。○湖廣巡撫張朝珍疏報。麻城劉青藜等。結黨倡亂。業經就撫。乃賊首鄒君升復與大冶縣

逃賊黃金龍作亂。武昌知府于成龍等。督率官兵堵截。擒殺賊首。脅從餘黨。俱已安插。下部議敘。○以土默特故多羅達爾漢貝勒卓禮克圖子趙圖襲爵。○丙寅。

上御太和殿視朝。文武陞轉各官謝恩。○添設陝西通省驛傳道員缺。駐劄西安。○添設廣西右江道員缺。統轄柳慶思三府。駐劄柳州。○戊辰。

上遣侍衛吳丹塞扈立。傳諭寧南靖寇大將軍多羅順承郡王勒爾錦曰。朕手諭與王者再。所言似合機宜。又兩遣侍衛往。未見王回奏。滿漢兵宜加撫恤。餽餉亦不易。若何進戰。一在於王。今所在蠢動。豈不可虞。大將軍出征。進止調度。必待中旨。於古未聞。因王等與賊相持。朕不自暇逸。屢有敕諭。異或有一當耳。非朕欲從中制也。王等始出兵時。兵亦不為不足。今四路進討。王亦知之。四川兵取朝天關。陽平關。在保寧與賊相距。與岳州同。王等

勿以四川兵將抵貴州。湖南兵可緩進。保寧較岳州城更堅也。康親王進剿閩賊。雖屢奏捷。朕不為喜。吳三桂乃賊渠。惟破岳州。澧州。方可喜耳。王等初至軍。言馬未肥。又言天熱多雨難行。今當可行之時。王等規取岳州。或渡江取澧州。或令將軍尼雅翰。往江西取長沙。此三事。王與貝勒諸將帥熟議以聞。勿惟朕諭與議。政大臣之議是從。勉建良策。欣聞捷音。○己巳。平南王尚可喜疏報。副都統尚之節等統率官兵。自程鄉縣間道進閩。沿途相機剿撫。不煩兵戈。逆賊望風逃遁。偽官弁繳劄投誠。恢復大埔縣。直抵三河壩。得旨嘉獎。下部議叙。○副都統擴爾坤等疏報。偽將軍吳之茂。自保寧府至昭化縣。會同偽總兵彭士亨。率賊五千有餘。從江上乘船來犯廣元。八旗官兵偕四川總督周有德等標弁夾擊。自朝至夜酣戰。大敗之。斬偽遊擊徐應昌。賊夜遁去。下部議叙。○經畧莫洛疏言。臣於

本月十一日。由秦州進川。貝勒等到西安時。養馬繼發。請命四川總督周有德。巡撫張德地。副都統擴爾坤等。固守朝天廣元諸處。轉運大兵糧糈。並敕將軍等。拒守保寧。以待大兵之至。

上諭。經畧莫洛身在地方。軍機緩急。自有確見。可與將軍席卜臣。前往廣元。進取昭化。疏通糧運。平定四川。總督周有德。巡撫張德地。副都統擴爾坤等。於經畧未到之先。將廣元所有糧米。運送軍前。又廣元兵少。甚屬可虞。或令席卜臣兵先赴廣元。秣馬以待。或候經畧同發。俱令莫洛酌行。又諭曰。鄒嶺大二郎小二郎諸處。俱係險要。周有德張德地。擴爾坤等。酌撥官兵固守。勿俾賊兵斷我後路。若廣元兵單。未便分撥。即移會莫洛。席卜臣酌量調度。○辛未。

上幸南苑行圍。○添設四川督糧道員缺。兼管鹽茶驛傳事務。駐劄省城。○平南王尚可喜

疏報逆賊劉進忠抗不受撫。當官兵在途。則據險抗拒。迨官兵甫抵潮城。則窺劄營甫定。輒鼓衆出犯。幸官兵嚴整以待。在新亨地方。剿殺偽副將陳璉等。及賊兵六百六十餘人。生擒二十七人。又在城外接戰。斬賊二百二十五人。又於七月十五日。賊衆五千。乘風雨衝突。官兵奮擊。斬賊八百二十二人。生擒八十六人。前後所獲盔甲器械。不可勝數。下部議叙。○壬申。陞光祿寺卿朱紱為太常寺卿。

○添設湖北驛傳道員缺。兼管鹽法事務。駐劄省城。○癸酉。江南總督阿席熙疏報。徽州府及歙。祁門等縣陷賊。江寧將軍額楚率兵赴徽州進剿。

上諭。江寧所駐大兵。將軍額楚既率赴徽州。江省係水陸要地。即令署副都統雅賴。阿喀尼等。停往兗州。率兵徑赴江寧。其駐劄兗州漢軍都統釋迦保。俟京師新發禁旅到日。亦率兵速赴江寧。在京滿洲蒙古每佐領驍騎一

名。每翼委署副都統一員。漢軍每佐領發兵二名。共派副都統一員。每翼委叅領一員。率赴兗州駐劄。尋以一等侍衛諾敏。長史岳爾多。為署副都統。并遣漢軍副都統孫承祖。率兵以往。○陞護軍叅領奇雅塔。為鑲白旗蒙古副都統。○乙亥。江西總督董衛國疏報。龍泉萬安等處逆賊盤踞。偽將軍陳昇。賊首郭應鼎。偽官王世彪等。率賊萬餘。欲取贛州。副都統甘度海率領大兵。大敗賊衆於龍泉縣西北。陣斬偽總兵郭龍。李良。殺賊無算。下部議叙。○董衛國又疏報。定南將軍內大臣希爾根。平寇將軍哈爾哈齊等。圍困撫州。賊寇偽易都督。領兵過河來援。即遣兵迎擊。大敗之。城內賊兵突出。官兵奮擊。斬殺甚多。下部議叙。○陞叅領傅魁。為河南河北總兵官。○丁丑。喀爾喀車臣汗遣使進九白年貢。宴賚如例。○戊寅。浙江提督塞白理疏報。黃巖失陷。總兵官阿爾泰從賊。

上諭康親王傑書先剿滅浙省溫州黃巖諸處賊寇。平定地方。然後進剿福建。○定南將軍希爾根疏言。吳逆遣賊來犯袁州。耿逆竊踞廣信等府。今若分兵應剿。恐兵單不利。

上諭署副都統碩塔穆森。不必駐皖。速赴南昌。到日。令署副都統穆承格。率南昌兵。速赴袁州。與總兵官趙應奎并力固守。署副都統公倭赫。救進賢兵回日。亦赴袁州。若大兵未到之先。賊勢猖獗。趙應奎相機退保險隘。以待

大兵之至。將軍尼雅翰。將所率江寧兵。及碩塔穆森兵。酌量率赴袁州。統領副都統甘度海。倭赫。穆承格等兵。平定袁州。進取長沙。如吉安無警。其甘度海兵。聽尼雅翰調度。酌遣又安慶係要地。漢軍都統釋迦保。署副都統雅賴。阿喀尼。俱率兵速赴安慶。並趣提督王永譽。刻期抵任。如安慶等處有警。令將軍阿密達。華善等。相機救應。○己卯。諭議政王大臣等。江南天下要地。兵力單薄。其授和碩簡

親王喇布。為揚威大將軍。派兩佐領合出護軍一名。上三旗包衣佐領兵。每旗百名。復令簡親王除伊包衣佐領全軍外。將所部人眾。酌選披甲。率往江寧。統轄將軍阿密達兵。及江南滿洲蒙古漢軍。相機調度。保固全省。將軍阿密達。額楚。華善王之鼎。總督阿席熙。並同叅贊。又河南地廣兵少。恐奸宄乘間竊發。令每佐領出驍騎二名。授坤巴圖魯侍衛。為振武將軍。率赴汝寧駐防。左翼遣副都統覺羅夸代。右翼以長史阿爾瑚為署副都統。偕行。○又諭簡親王到江寧時。令副都統蘇朗。率蒙古兵一千。往鎮安慶。其安慶都統釋迦保。率所部漢軍。速赴南昌鎮守。到日。南昌署副都統碩塔穆森兵。前往袁州。會合將軍尼雅翰等兵。與總兵官趙應奎。合力剿禦。若蘇朗兵到安慶時。署副都統雅賴。阿喀尼。率所部兵。亦速赴南昌鎮守。○廣東提督嚴自明。舉首吳三桂偽劄。下部議叙。○庚辰。浙江巡

撫田逢吉疏報賊寇屯劄僊居縣朱溪地方都司汪國祥遣發官兵會同僊居縣知縣鄭錄勲分路進剿陣斬偽都司王宗興殺逆賊三百餘人又叛賊曾養性祖弘勲密遣人投送逆書都司汪國祥即時舉首下部議叙○辛巳江西總督董衛國疏報南贛總兵官劉進寶遣發官兵恢復崇義縣城得旨嘉獎下部議叙○癸未上還自南苑詣

太皇太后

皇太后宮問安○甲申江南總督阿席熙疏報逆賊自績溪縣西北分道來犯我師江寧將軍額楚分佈滿漢官兵奮勇迎擊擒斬賊衆不可勝數恢復績溪縣得旨嘉獎下部議叙○定南將軍希爾根疏報逆賊於本月初七日夜來犯大營官兵分路迎擊敗之十一日恢復撫州尋希爾根又奏閩賊東踞建昌滇賊西犯袁州勢難分應若臣舍建昌而援袁

州恐撫州已復旋棄江右何日可定仍宜合力以剿建昌之賊

上諭撫州雖不可棄袁州亦屬要地希爾根兵可破建昌則進若難以徑進且鎮守撫州令將軍哈爾哈齊仍率兵援袁州至於所復地方更令總督提督發新募兵速赴將軍軍前以資守禦○諭兵部令將軍希爾根等擊敗賊衆恢復撫州不久即定建昌廣信諸處亟須安撫百姓其令巡撫白色純星赴贛州爾部速行移會○浙江總督李之芳疏報逆賊偽都督陳重帶領閩賊招集土寇偽總兵朱老四等結巢金華之鄭店剽掠山口副將陳世凱等會同副都統馬哈達石調聲統率官兵直抵山口擊敗賊衆連夜窮追至鄭店地方渡河齊進三路夾剿共斬賊五千餘人生擒一百六十人焚燬賊巢篷廠二百餘處下部議叙○四川總督周有德疏報逆賊偽將軍何德成率兵二千自昭化赴二郎關欲截

糧餉。滿漢官兵奮勇擊敗賊衆。生擒偽都司賀騰龍。保護糧餉。送至軍前。下部議敘。○乙酉。平南王尚可喜疏言。續順公沈瑞身陷賊中。不甘從逆。屢遣人通言。請兵拯救。臣因遣官兵赴閩接應。今已迎回粵東。得旨。續順公沈瑞。不甘從逆。摯家回粵。情屬可憫。令復還原爵。仍管伊標官兵。駐劄廣東。○廣東廣西總督金光祖疏報。廣西提督馬雄。左江總兵官郭義降賊。廣西全省變動。

上命和碩安親王岳樂。為定遠平寇大將軍。率每佐領護軍一名。坤巴圖魯侍衛所帶每佐領驍騎二名。並王所屬包衣佐領護軍驍騎。速赴廣東。令都統覺羅晝特。伯郎肅。副都統吉圖喀。朱喇禪。偕往。以郎肅為署護軍統領。兵至江西。或由袁州進取長沙。平定廣西。或徑抵廣西。剿滅叛逆。聽大將軍王與都統等商酌以行。又每佐領出驍騎一名。付坤巴圖魯侍衛。隨後率往汝寧。尋又命輔國將軍

瓦山。隨大將軍安親王進討。○予故盛京副都統三等阿達哈哈番俄莫克塗祭葬謚壯勤。○丙戌。

上御太和殿視朝。文武陞轉各官謝恩。次厄魯特喀爾喀使臣等行禮。○先是。

上策將軍額楚。不日必取徽州。恐取徽州後。額楚等按兵不進。諭令克城之日。徑赴江西。速取饒州。至是。額楚疏報。敗賊績溪。克復縣城。乘勝進至徽州。賊望風潰遁。郡城遂復。

上命額楚等量留兵駐徽州。速行進取饒州。會合江西大兵。○丁亥。陞太僕寺卿金鼎為奉天府府尹。○戊子。

孝慈高皇后忌辰。遣官祭

福陵。○

上詣

太皇太后宮問安。○陞左通政徐世茂為光祿寺卿。○朝鮮國王李裪。遣陪臣閔熙。上

仁孝皇后香。○己丑。以溫良郡王孟我子佛永

輝襲封多羅溫郡王○陞河北總兵官佟徽年為河南提督調固原總兵官王國棟為潮州總兵官○庚寅江西總督董衛國疏報逆賊侵犯興國總兵官劉進寶調屯壘都督許貞等率兵救援大破賊眾又逆賊曾若干復犯石城署中軍事管天祥等同署縣事李德明等率領兵民奮勇會擊大敗賊眾下部議敘

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之四十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敘修

康熙十三年甲寅冬十月辛卯朔享

實錄卷五十

太廟遣輔國公葉伯舒行禮○遣官祭

永陵。

福陵。

昭陵。

孝陵。

仁孝皇后○頒康熙十四年時憲曆○以吏部

右侍郎陳一炳為山西援勦提督戶部右侍

郎周卜世為山東援勦提督原任浙江總督

劉兆麒為直隸援勦提督參領周卜年為山

西援剿總兵官。叅領阿思哈尼哈番鮑敬。為河南援剿總兵官。原任廣東海豐總兵官佟國璽。為山東援剿總兵官。叅領伯石文炳。為直隸援剿總兵官。○壬辰。

上御太和殿。遣揚威大將軍和碩簡親王喇布。帥師之江寧。賜之敕印。

上詣

堂子行禮。祭旗纛。還。出西長安門。送之行。○癸巳。

賈錄卷五十一

皇太后聖壽節。

上率諸王。文武大臣。侍衛等。詣

皇太后宮行禮。遵

懿旨。停止筵宴。○諭新授福建總兵官黃芳世

曰。爾在朕左右十有餘年。凡事諳練。嫻習弓

馬。可以任用。故特授此職。爾蒞任時。領平南

王所給官兵。宜勉力圖功。以副朕擢用之意

○安徽巡撫靳輔疏言。都統釋迦保。及署副都統雅賴。阿喀尼等兵。先後前來。請以先至

者駐池州。後至者駐安慶。互為聲援。

上諭。釋迦保。雅賴。阿喀尼等兵。仍赴江西。安慶既有提督王永譽駐守。其副都統蘇朗兵。或駐池州。或恢復建德之日。即駐建德。聽靳輔蘇朗商酌以行。○奉命大將軍和碩康親王傑書疏報。福建逆賊。率兵一萬四五千。入犯遂安。復有遂安土賊王應茂等。率兵四千。沿河傍山。遙為犄角。嚴州副將鮑處。統率官兵擊之。斬偽叅將王師古等四員。殺賊一千一百七十餘級。乘勝追殺二十餘里。下部議叙。○添設盛京每旗防禦各一員。從將軍俄內巴圖魯請也。○甲午。

上至輦華城。月祭

仁孝皇后。○乙未。定南將軍希爾根疏報。偽將軍陳昇。及土賊郭應定等。率眾犯贛州。副都統甘度海等。統滿漢官兵迎擊。大敗之。陣斬偽總兵柯隆。李梁。又追敗賊兵於龍泉縣石灰澳隘口。破其三營。叅將塞勒等。分路追北。

二十里。直抵曹林賊巢。攻取十餘寨。下部議叙。○贈南漳陣亡署守備劉廷社。為署遊擊。予祭葬。廕子弟一人。以衛千總錄用。○丙申。

上詣

太皇太后宮問安。○

上御太和殿。遣定遠平寇大將軍和碩安親王岳樂。帥師之廣東。賜之敕印。

上詣

堂子行禮。祭旗纛。還出西長安門。送之行。○陞

候補叅政道王繼文。為雲南布政使司布政使。○廣東廣西總督金光祖疏言。廣西全省變動。賊勢愈熾。入粵大兵。應取道南雄。星馳赴援。

上諭。大將軍安親王。已帥師由廣東進定粵西。其防守事宜。兵未到時。聽總督與平南王商酌以行。○丁酉。

上詣

太皇太后宮問安。○戊戌。安徽巡撫靳輔疏報。

建德縣被饒逆竊踞。副都統碩塔穆森等統率滿漢官兵進剿。恢復縣城。得旨嘉獎。下部議叙。○己亥。

上手敕諭經畧莫洛曰。據坐塘筆帖式報。有賊三路來犯。寧羗被圍。念爾總統川陝。必有成算。始行進兵。朕可無憂。但寧羗地屬陝西。且為大兵後路。當此糧匱兵疲。又不得不厘朕懷。爾宜速行救援。使大兵如渴遇飲。庶幾有濟。○以原任湖廣布政使郎永清為河南布政使司布政使。○喀爾喀阿海戴青台吉。遣使進九白年貢。宴賚如例。○庚子。

上詣

太皇太后宮問安。○調戶部左侍郎宋德宜。為吏部左侍郎。管右侍郎事。○陞左通政焦毓瑞。為太僕寺卿。○辛丑。江西總督董衛國疏報。賊犯湖口。

上諭。湖口縣係江南江西要衝。將軍希爾根。總督董衛國。宜會商機宜。速行剿滅。又署副都

統碩塔穆森見統兵赴江西。可便道先剿湖口逆寇。再赴南昌。湖口切近安慶。其先抵安慶。官兵巡撫靳輔亦即發往湖口協剿。尋靳輔疏報。湖口彭澤相繼被陷。浮梁都陽諸賊嘯聚日衆。

上復命署副都統雅賴阿喀尼到安慶。即統兵馳赴彭澤湖口剿賊。碩塔穆森已至九江。令與雅賴阿喀尼等合兵。平定湖口諸處。協取饒州。即赴南昌。○壬寅。

上奉

太皇太后幸南苑駐蹕。○戶部議覆江南總督阿席熙疏言。鳳陽倉額收本折錢糧。歸併鳳陽府知府管理。正陽關稅。歸併通判管理。臨淮關稅。發大使征收。停差部員。應如所請。從之。○癸卯。

上詣

太皇太后行宮問安。○乙巳。以刑部郎中祖澤潛為浙江按察使司僉事提調學政。○陞韶

州副將張星耀為韶州總兵官。○平南王尚可喜疏言。省會兵單。根本虛弱。如李三官七乘機竊發。雖旋即掃蕩。而尚有黨羽。潛伏於山陬海澨之間。急宜芟除。是以臣調總兵官班際盛自梧州回省。

上諭。梧州兩粵接壤要地。今粵西有事之際。李三官七賊寇滅後。尚可喜即增兵。令班際盛速赴梧州剿禦。○丙午。添設山東驛傳道員缺。駐劄省城。管理通省驛傳事務。濟東道自省城移駐德州。管轄濟南府屬并東昌府屬之聊城等九州縣衛。東兗道駐劄沂州。管轄兗州府屬并東昌府屬之堂邑等九州縣。○丁未。諭兵部。工部。武昌漢陽一帶沿江之地。俱屬重要。防禦之策。不可不豫。宜於沿江要害。多築墩臺。環列火礮。令諸軍更番汛守。以固省會。又武昌臨江所在湖汊甚多。宜急設江汛戰船。多製火礮。并召募烏鎗兵一千名。為戰守之用。○陞廣東督糧道徐養仁為廣

東布政使司布政使○陝西總督哈占疏報。四川賊衆先立營於寧羗州文廟山。叅將陳應奎等鼓勵士卒。夜襲賊營。賊衆大亂。遁回南山。

上諭。經畧莫洛等。遣副將雷繼宗兵。及提督王輔臣標兵。固守寧羗諸處。又大將軍貝勒董額等進川之時。若寧羗有賊。即便道剪滅。再入四川。○諭兵部。九江三省水陸要衝。大將軍順承郡王勒爾錦。就近於雲貴兩提督內。量調一員。率領甲兵。及標下官兵。速赴九江防守。將軍阿密達。總督阿席熙等。速造戰船百艘。發往九江。○予故固山貝子敦達祭葬。謚恪恭。○辛亥。

上奉

太皇太后回宮。○壬子。以舉首逆劄。授廣東提督嚴自明。三等阿達哈哈番。其子武進士嚴梅署守備。○旌表江南烈婦胡香妻袁氏。拒姦自縊。給銀建坊如例。○癸丑。陞左副都御

史嚴沆。為總督倉場戶部右侍郎。○以舉首逆劄。加嚴州副將鮑虎。都督同知銜。以總兵官缺先用。○以袁臨總兵趙應奎。歷有戰功。又舉首逆劄。給拜他喇布勒哈番。又一拖沙喇哈番。○丁巳。奉命大將軍和碩康親王傑書疏報。偽都督周列。偽總兵桑明等。率賊兵二萬。由常山謀犯衢州。平南將軍賴塔。總督李之芳。令副都統喇哈。胡圖等。統滿漢官兵。於九月十七日。擊敗賊衆於焦園等地方。斬賊萬餘。下部議叙。○己未。諭兵部。溫州黃巖平陽三鎮。雖未恢復。應豫補總兵官。以便召募操練。其以杭州副將陳世凱。為溫州總兵官。嚴州副將鮑虎。為黃巖總兵官。浙江督標副將王廷梅。為平陽總兵官。○諭議政王大臣等。自吳三桂叛逆以來。平南王尚可喜。為國抒忠。厥功茂著。當茲粵東軍興之際。督撫提鎮以下。俱聽王節制。嗣後補授文武官員。聽王選補奏聞。其一切調遣兵馬。及招撫事。

宜亦聽王酌行○安徽巡撫靳輔疏報。饒州逆賊竊踞湖彭二縣。徽州營副將姚弘信守備李剛等兵從間道往剿。大敗賊衆於建德縣之鄭坑鋪。擒斬甚衆。獲器械無算。下部議叙○平南王尚可喜疏報。逆賊劉進忠盤踞潮州。敢於負固者。恃海賊為應援也。今海賊直薄城東。而劉逆屢出城中賊兵來犯我師。總兵官王國棟等統率官兵三戰三捷。斬獲甚多。下部議叙。

十一月庚申朔。

上詣

太皇太后宮問安○先是。

上命將軍尼雅翰及都統釋迦保等進取南康赴南昌。署副都統碩塔穆森雅賴阿喀尼等進取湖口彭澤都昌撫定其地。再取饒州。赴南昌。至是定南將軍希爾根等疏言賊犯撫州等處。臣隨令副都統席布率每佐領驍騎一人前往應援。又調鎮守九江城守尉鄂黑

等前往會城。得旨將軍尼雅翰等兵各遵指授。速定地方。星赴南昌。至九江扼要重地。如城守尉鄂黑等前往省城。將軍希爾根總督董衛國等即酌發官兵鎮守。大將軍安親王速赴江西酌量調度○經畧莫洛疏言廣元大兵缺餉兩月。畧陽糧艘為賊所刦。賊又屯踞七盤朝天諸關。我師餉道梗塞。

上命莫洛率兵速赴七盤朝天等處會同將軍席卜臣剿滅賊寇。疏通餉道。進取昭化。與大兵協力克復保寧。尋總督哈占疏言蜀中水陸賊阻糧運難繼。且逆賊窺伺陽平諸處。上復諭大兵徂征。惟餉是賴。今既糧運難繼。我師未便久駐。令大將軍貝勒董額經畧莫洛四川總督周有德巡撫張德地等撤保寧兵回廣元。經畧等親身殿後。調廣元兵回漢中。固守陽平等處。殲除寧羗諸賊。整頓士馬。再圖恢復○議政王大臣等疏言經畧莫洛若進四川。西安空虛。應發大兵駐防。

上諭河南府乃四達之地。距潼關鄆襄皆近。駐師其地。則所在有警。俱可策應。其遣副都統塞格。并令一等侍衛鄂克濟哈署副都統。率每佐領驍騎三名。往駐河南府。○辛酉。陞內閣侍讀學士王啟元為內閣學士兼禮部侍郎。○壬戌。

上至鞏華城。月祭。

仁孝皇后○喀爾喀扎薩克圖汗遣使進九白年貢。宴賚如例。○癸亥。安遠靖寇大將軍多

羅貝勒尚善等請遣荊州綠旗兵赴岳州。

上命總督蔡毓榮率標下綠旗官兵酌帶荊州舟艦。前往岳州。其沿江一帶令大將軍順承郡王撥兵固守。○喀爾喀土謝圖汗遣使進九白年貢。宴賚如例。○甲子。

上御太和殿視朝。文武陞轉各官謝恩。次喀爾喀土謝圖汗扎薩克圖汗使臣等行禮。○

上詣

太皇太后宮問安。○轉戶部右侍郎魏象樞為

左侍郎。陞左副都御史于可託為戶部右侍郎。○平南王尚可喜疏報廣州民陳士奇密首奸民江鵬翥等在佛山鎮地方結黨煽亂。隨征官金光偕陳士奇設計擒之。審實正法。得旨金光給以鴻臚寺卿銜。陳士奇以知縣先用。○丙寅。免江西南昌等十二州縣本年分水災額賦有差。○丁卯。申刻。太白星見。○戊辰。鎮南將軍尼雅翰疏報耿逆偽都督李大元等率賊萬餘屯南康崖口。臣偕副都統綽客托等於十月二十二日率官兵擊敗之。恢復南康府。得旨嘉獎。下部議敘。○定南將軍希爾根疏報副都統穆承格總兵官趙應奎等率領官兵恢復萬載縣。得旨嘉獎。下部議敘。○安遠靖寇大將軍多羅貝勒尚善等疏言請撥京口沙唬船五十艘并水手發往岳州以資進剿。議政王大臣等議覆前已將荊州船二百發往岳州。至京口沙唬船亦已遣發百艘。今再增發必須配兵。恐京口舟師

單薄。且值西北風時作。沂流而上。不能速至。應不准行。

上諭。宜如所請。撥京口沙唬船速往。聽貝勒等乘機進取。勿俾借口待船。致誤軍機。其京口缺額之船。令簡親王與該將軍督撫等速行補造。〇已已。

上步隨

皇太后輦詣

太宗懿靖大貴妃宮問疾。〇諭安遠靖寇大將軍多羅貝勒尚善等。覽吳丹所齎爾等奏疏。朕心深為嘉悅。兩貝勒皆朕懿親。運籌決策。破賊立功。在指顧間。朕遙度機宜。於爾等疆場之事。或有裨益。特頒手詔示爾。爾等請調荊州綠旗甲兵備用。細思順承郡王渡江攻戰。未有定期。王若不渡江。則滿洲蒙古甲兵鎮守荊州。彝陵原無不足。今檄蔡毓榮標兵往岳州。又據吳丹口奏。賊浚重壕。相拒甚堅。今令綠旗兵以車運土囊填壕赴戰。隨遣滿

洲蒙古精兵。繼進攻取。必獲全勝。綠旗官兵宜深加撫恤。至臨陣時。明諭賊人有解甲來歸者。即與保全。恩養安插。朕未親履行間。但披覽輿圖。據臆懸斷。所期爾諸將等。恩威公溥。無間親疎。嚴飭哨探。申明法紀。速成破賊之功。永表旂常之績。爾等所有籌畫。即行密奏。兩貝勒及大臣等兵士無恙。并疏以聞。〇湖廣總督蔡毓榮疏報。竹谿本無縣城。文武官民。據守桐溪中峯二寨。逆賊楊來嘉等。合謀侵犯。致中峯寨失陷。今桐溪寨告急。亟請附近兵應援。

上諭。竹谿去陝西白土關甚近。經畧莫洛總督哈占。巡撫杭愛提督王輔臣等。速令汛防官兵。就近應援。鄭陽提督佟國瑤。遣協剿官兵馳救。都統范達禮。副都統德業立等。亦嚴加固守。相機堵剿。毋致蔓延。〇陞前鋒叅領穆理渾。為正黃旗蒙古副都統。〇庚午。浙江巡撫田逢吉。以病解任。命總理浙江兵馬糧餉

事務戶部右侍郎達都為浙江巡撫○辛未諭兵部凡陷賊地方皆我赤子。今者詰爾戎兵。四征不庭。原以除暴安民。念愚氓被脅截髮。特一時貪生畏死之恒情。若大兵所至。槩行誅戮。非朕救民水火之意。百姓無由自新。狡賊反得藉以煽誘。嗣後大兵進剿。有鄉民持械拒敵。及竊踞城池山寨。不即迎降者。仍行誅戮。其餘槩從寬免。至剿殺賊徒。自應俘其子女。但賊營婦女。多係擄掠脅從。破賊之後。凡所擄難民子女。許民間認領。不得一槩妄收。爾部其傳諭滿漢官兵。咸體朕意。毋忽。○癸酉。陞大理寺卿金僞為都察院左副都御史。○甲戌。

上詣

太皇太后宮問安○免山東棲霞等六州縣本年分水災額賦有差○署前鋒統領穆占等疏言漢中乃川陝要地。邇者綠旗官兵。難以深信。滿兵雖少。仰賴

皇上威靈。似可固守。

上諭漢中係陝西咽喉。為大兵後路。糧運要道。令輔國公綽克託率所部人員。并統轄副都統馬一豹兵駐守漢中。再撥西安滿兵百名。速往漢中。令巡撫杭愛統轄同綽克託協守。○江西總督董衛國疏報。臣標右營遊擊佟國棟等率兵恢復新昌縣。得旨嘉獎。下部議叙。○乙亥。免河南信陽等六州縣本年分旱災額賦有差。○丙子。

上詣

太皇太后宮問安○已卯。

太宗懿靖大貴妃薨。

上步隨

皇太后輦進太妃宮舉哀。命輟朝五日○庚辰。平南王尚可喜疏言。續順公沈瑞。副都統鄧廣明。及官兵家口共二千餘人。為叛鎮劉進忠。驅入福建。拘留漳浦。恐大兵進剿。玉石難分。得旨續順公沈瑞家口。被賊拘留。殊為可

憫。此係有功之人。理應保全。令大將軍王等進剿恢復之。日。留意察訪。保護得所。○奉命大將軍和碩康親王傑書等疏報。耿逆下偽都督徐尚朝等。率馬步賊五萬。至金華府城外。列二十餘營。副都統馬哈達。台吉察渾。都統巴雅爾。總兵官李榮等。率領官兵。奮勇夾擊。陣斬賊將吳榮先等三十餘人。賊兵二萬餘人。下部議叙。○平南王尚可喜疏報。副都統尚之孝等。進兵潮州府。攻剿逆賊劉進忠。克東津筆架山。洗馬橋等處地方。巡撫劉秉權。署總兵官王國棟等。攻破潮州城南鳳凰洲木城二座。斬偽都督金漢臣等。殺賊五千餘級。又副將何九衢等。率兵恢復潮州澄海縣。得旨嘉獎。下部議叙。○

上諭兵部。據平南王尚可喜奏稱。伊孫女嫁為耿精忠子婦。年未二旬。忽遭事變。王係勲舊大臣。為國勤勞。忠蓋茂著。其孫女宜與保全。我兵剿平閩省之日。大將軍王等。務留心察

救。給王團聚。○甲申。冬至。祀

天於

園丘。

上親詣行禮。○遣官祭

永陵。

福陵。

昭陵。

孝陵。

仁孝皇后。○乙酉。

上率諸王。貝勒。貝子。公。內大臣。大學士。都統。尚書。精奇尼哈番。侍衛等詣

太皇太后

皇太后宮行禮。御殿。王以下。文武各官。上表朝

賀。○鎮南將軍尼雅翰疏報。吳逆偽朱將軍。

與偽總兵黃乃忠。合兵數萬。自萍鄉來犯袁州。副都統甘度海。署副都統公倭赫。穆承格。總兵官趙應奎。率滿漢官兵。於本月初四日。敗賊於西村。斬首萬餘級。又登山擊敗賊衆。

斬首五千餘級。下部議叙。○丙戌。

上詣

太皇太后

皇太后宮問安。○陞大理寺卿介山。為戶部右侍郎。○丁亥。諭兵部。往者令總督蔡毓榮。率兵會同都統范達禮等。協剿楊洪二逆。今蔡毓榮既赴岳州。二逆可暫停進剿。除副都統宜思孝。柯彝。率兵駐防鄖陽均州外。令襄陽總兵官劉成龍。率兵鎮守南漳。雲南提督胡拜。率綠旗官兵。及駐劄襄陽漢軍。鎮守穀城。都統范達禮。副都統德業立。仍守襄陽。若更有險要之地。令范達禮等酌量調守。賊出犯時。即相機剿禦。俟大兵平定湖南。范達禮。蔡毓榮等。仍進剿楊洪二逆。○戊子。諭奉命大將軍和碩康親王傑書。浙江賊寇。在在竊發。騷擾地方。皆由耿逆未滅之故。若剿除耿逆。則小醜自滅。今或固守金華諸處。由仙霞嶺分水關入閩。或固守杭衢。從金華進克溫處。

平定浙省。剿滅閩賊。聽大將軍王。酌量速行。

○陞太常寺卿朱紱。為大理寺卿。○輔國公緯克託等疏言。副都統馬一豹所統之兵。經畧莫洛。已撥守西鄉紫陽白土關。此俱緊要隘口。未可輕撤。臣所屬官兵。及見發西安官兵。數少力薄。請增發西安滿洲兵四百名。同守漢中。

上命增遣西安滿兵二百名。速抵漢中。緯克託於所屬內酌量添甲。與巡撫杭愛。協同守禦。

實錄卷五十二

三十二

西安省會要地。署副都統鄂克濟哈等。率兵至河南府時。速遣才能叅領。率每佐領驍騎一名。赴西安。○贈廣西殉難富川縣知縣劉欽鄰。太僕寺少卿。予祭葬。廕一子。入監讀書。○己丑。鎮守寧古塔將軍巴海。率松阿里。吳喇。諾羅河。吳蘇路。烏喇。木倫。居住之墨爾折勒氏。新滿洲佐領四十員。并佐領下人等。入覲行禮。

上命射。賜茶酒。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十

實錄卷五十

三三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十一

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十三年甲寅十二月庚寅朔

實錄卷五十一

一

上詣

太皇太后宮問安○奉命大將軍和碩康親王傑書等疏報寧海將軍固山貝子傅喇塔等遣發滿漢官兵至台州地方探知逆賊耿精忠下偽都督僉事曾璽偽總兵陳理領兵屯黃瑞山追擊之殺賊兵一千七百餘人斬偽副將陳鵬等七人生擒偽守備以下百餘人盡燬賊營下部議叙○署朝鮮國事李煒遣陪臣沈益顯等告其父王李柵喪並貢方物

得旨朝鮮國王恪守藩封。忠慎夙著。覽奏遽爾薨逝。朕心深為軫惻。應得恩卹。著察例議奏。伊所進禮物俱著使臣帶回。以示朕軫念之意。○旌表河南祥符縣烈女于天祥聘妻王氏。聞夫病故。投繯盡節。給銀建坊如例。○辛卯。陞翰林院侍讀學士杜臻為內閣學士。兼禮部侍郎。○以故一等阿思哈尼哈番劉澤龍姪劉震襲職。○湖廣巡撫張朝珍疏報吳逆下偽遊擊何士榮。由長沙走黃岡縣。糾黨為亂。黃州知府于成龍率官兵鄉勇剿之。生擒何士榮。梟首示眾。下部議叙。○壬辰。上至鞏華城。月祭。

實錄卷五十一

二

仁孝皇后○諭兵部興安要地。應遣滿兵鎮守。著於署副都統鄂克濟哈等部內選驍騎二百名。遣才能章京赴興安。與署總兵官党塞等協力固守。○癸巳。

上詣

太皇太后宮問安○以鎮守彝陵總兵官都督

僉事徐治都捍賊有功。加左都督銜。標下將弁各增秩有差。○先是鎮守江寧將軍額楚疏言。婺源為賊所據。如不取婺源。即赴饒州。恐賊探知大兵已去。又犯徽州。請俟恢復婺源後。休息士馬。相機進取饒州。

上諭。額楚等若復婺源。即進取饒州。毋得因養馬遲緩。令賊固守。難於攻取。致失事機。至是額楚疏報。十一月十七日克復婺源縣。於一二日間安撫殘民。即進取饒州。得旨。比聞恢

實錄卷五十二

一

復婺源。良可嘉悅。爾等兵單。進克饒州。尤宜加意。善後諸事。相機以行。○甲午。叅贊軍務署副都統雅賴阿喀尼等疏報。官兵敗賊於小姑山水關。逆賊固守彭澤縣。我師奮勇登城。克之。得旨嘉獎。下部議叙。○乙未。

上詣

太皇太后宮問安○封固山貝子敦達子普貴為鎮國公○以內閣學士伊桑阿克經筵講官翰林院侍讀學士項景襄充日講起居注

官○陞順天府府尹田六善為都察院左副都御史○丙申諭定西大將軍貝勒董額等覽將軍赫業等奏保寧大兵糧餉阻絕困乏已極經畧莫洛於十一月二十八日帥兵啟行貝勒等行期在十二月初三日莫洛所統之兵俱係綠旗巴蜀山路險惡滿洲大兵若不相繼進發恐賊輕視漢兵首尾互擊難以策應今保寧大軍惟貝勒等是賴敕諭一到貝勒等即兼程而進會同經畧莫洛速定貽化接濟大兵勿得遲緩貽誤大計又諭曰大兵糧餉關係甚重令陝西總督哈占巡撫杭愛多發官兵水陸防護以次相繼勿誤軍需運至廣元將軍席卜臣副都統擴爾坤四川總督周有德巡撫張德地等轉運軍前毋得怠忽誤事○陞太常寺卿胡密塞為大理寺卿○吏部議覆廣東巡撫劉秉權疏言分巡廣肇南韶道改為分巡南韶道駐劄韶州府管轄南韶二屬分守高雷廉羅道改為分守

廣肇道駐劄肇慶府管轄廣肇二屬新設分守高羅道駐劄高州府管轄高羅二屬新設分巡雷廉道駐劄廉州府管轄雷廉二屬應如所請從之○兵部題臣部定例武職官員陣亡皆照依職任卹贈至於隨標効用有部劄各官雖有職銜皆係無職任閒散之官定例內未經議及相應將有部劄効用閒散各官陣亡者不論銜級大小皆准廕子弟一人以衛千總用遊擊銜以上閒散官員俱准加贈一級皆照經制守備例給與祭葬銀兩都督及副將銜閒散官各給卹銀三百兩叅將遊擊銜閒散官各給卹銀二百兩都司僉書守備銜閒散官各給卹銀一百五十兩守禦所千總衛千總千總把總銜閒散官各給卹銀一百兩經制千把總銜大者亦照閒散官例至於休致及裁缺改補官仍照原官職任議卹降級官照應降職任議卹著為令從之○浙江總督李之芳疏報逆賊逼犯金華台

吉察渾副都統石調聲等破賊於竹園村。都司陳夢暘等又破賊於季宅馬澗等處。殺偽遊擊等六名。賊兵二千餘名。生擒偽遊擊等三名。賊衆六十九名。下部議叙。○丁酉。諭吏部。自古帝王統御天下。必資后德之賢。贊助政理。昭宮闈之令範。端王化之本源。粵稽往代。冊立中宮。即如恩所生。榮錫封爵。所以重內治。隆恩禮。甚盛典也。緬維仁孝皇后。作配朕躬。歷經十載。上事

太皇太后

皇太后。克誠克孝。佐朕治理。惟敬惟勤。節儉居身。寬仁逮下。儀型允備。淑德著聞。詎意忽焉崩逝。深悼朕懷。榮哀之禮已行。推恩之典未舉。內大臣噶布喇。乃仁孝皇后之父也。勲舊世裔。素著忠貞。翊衛攄夙夜之勞。謀猷重股肱之寄。茲奉

太皇太后慈諭。仁孝皇后。毓質名門。夙昭內則。芳儀永謝。時切悲思。維后德之攸彰。實鍾祥

之有自。宜加榮秩。以合舊章。朕恪遵

慈命。特錫殊恩。噶布喇著授為一等公。給與誥命。世襲罔替。爾部即遵諭行。○先是賊圍安福縣。鎮南將軍尼雅翰等遣副都統甘度海前往援剿。至是。江西總督董衛國疏報。安福陷。得旨。將軍尼雅翰總督董衛國速檄甘度海剿滅賊寇。至遣發將軍等原令保固江西全省。非止鎮守所駐城池。嗣後所轄地方告警。即酌行調遣應援。○奉命大將軍和碩康親王傑書疏報。逆賊耿精忠下偽總兵桑明等。領賊五萬餘犯衢州。將軍賴塔遣滿漢官兵。於十一月二十四日。連擊敗之。殺賊萬餘人。下部議敘。○庚子。定西大將軍多羅貝勒董額疏報。是月初四日。提督王輔臣兵叛於寧羌州。刼經畧營。經畧標下官兵或敗走。或從逆。經畧莫洛不知下落。今臣等以兵阻不能前進。即於本日退保漢中。

上諭大學士等曰。今王輔臣兵叛。人心震動。醜

類乘機竊發。亦未可定。前者各將軍大臣。不遵指授。互相觀望。遷延不進。以致逆賊得據大江之南。賊渠未滅。故又有此變。朕欲親至荊州。相機調遣。速滅賊渠。吳三桂。若吳三桂既滅。則所在賊黨。不攻自息。生民得安。爾等與議政內大臣密議以聞。尋議覆。

聖駕親征。滅賊誠易。但

皇上身關天下之重。若

鑒與前往。恐奸宄妄布流言。事生意外。況京師

根本。所係非輕。

皇上不宜輕出。止可居中運籌。指授內外臣工。

相機調發。

上曰。卿等所言亦是。朕且暫止親征。王輔臣兵叛。不可不速發大兵。前赴西安。保固秦省。先令署副都統鄂克濟哈等所率之兵。分遣西安。興安。今且停往興安。若遣往西安兵。尚未起程。即於全部兵內。擇馬壯者。每佐領二名。鄂克濟哈。星夜率赴西安。餘每佐領兵一名。

令副都統塞格率駐河南府。鄂克濟哈兵力尚單。將軍坤巴圖魯侍衛率所屬兵盡赴西安。與鄂克濟哈副都統翁愛總督哈占保守地方。剿禦賊寇。襄陽見有都統范達禮副都統李林隆之兵。其副都統德業立。應率每佐領驍騎一名。星赴西安。與坤巴圖魯侍衛等合兵。併移文順承郡王。度襄陽可虞。即撥王所統兵每佐領一名。遣往駐守。否則不必遣往。王與叅贊各大臣。公同商議酌行。哈占翁愛等於大兵未到之先。併力固守地方。仍偵探情形。不時馳報。○諭安遠靖寇大將軍多羅貝勒尚善等。王輔臣標兵反叛。貝勒董額等。已退守漢中。今當人心惶惑之時。若克復岳州。則人心自定。稍有遲緩。則所在搖動。倍多可虞。貝勒等何日決戰。宜酌定必得之機。其速定議以聞。○諭兵部。據報王輔臣兵變。其反與否。尚未得實。即王輔臣果反。或出一時迫脅。亦未可定。其妻孥俱善存撫。勿遽加

害。傳諭總督哈占知之。○又諭兵部。京師禁旅。遣發頗多。其調盛京官兵一千。令副都統鄂泰。師之至京。烏喇兵七百。令副都統安珠護。遣章京師赴盛京。其寧古塔兵。令將軍巴海。調發鎮守烏喇。○辛丑。諭兵部。秦省重要。令理藩院員外郎拉篤祜。圖爾哈圖。兼滿代。往調鄂爾多斯蒙古兵三千五百。歸化城土默特兵七百。視西安路近。即率赴西安。若去省城紆遠。即率赴蘭州。其蒙古兵入何關口。令總督哈占。巡撫花善。遣人接應芻糧。如秦省可虞。速催調兵前往。若叛兵已散。秦省無虞。即移文停止。其以鄂爾多斯貝勒索諾慕。歸化城土默特都統古魯。率兵前往。○諭拉篤祜等曰。爾等率領蒙古甲兵。若進至邊內。督撫檄令停止。爾等勿得輒回。即星夜直抵西安。若在邊外。移文停止。即令撤回。於邊內路途遇有變故。即開路而進。若途間人報他處有警。不必應援。巡撫花善。移文請兵。爾等

酌量分路率兵前往。蒙古兵至西安。聽將軍調遣。將近邊界。聲言蒙古兵由各關口分道齊入。以張聲勢。○諭兵部。秦中告警。應預派滿洲蒙古每位領驍騎四名。有事即行遣發。其領兵章京。爾部量選應用。○壬寅。

上詣

太皇太后宮問安。○諭禮部。古帝王撫御天下。莫不以禮制為先務。然釐定章程。必文質適中。方可昭垂永久。前見風俗近奢。恐漸流於僭濫。故令更定條例。一切服飾。力崇儉樸。冀返淳龐。詎意有司奉行過當。專事苛細。借端紛擾。以致商賈壅滯。物力匱乏。小民深為未便。以後著仍照康熙九年定例遵行。見今一應禁約。俱行停止。爾部即遵諭行。○以吏部侍郎陳鼐。充經筵講官。○免江南鳳陽府滁州所屬十五州縣本年分旱災額賦有差。○調平寇將軍哈爾哈齊赴江寧。恭贊大將軍簡親王軍務。鎮守江南。○奉命大將軍和

碩康親王傑書疏報。恭將滿進貴。紹興知府許弘勲等。敗賊於嵎縣之長嶺。桂門山嶺等處。殺賊兵一千七百餘人。生擒偽軍師邱爾章。偽將軍馬王等十四人。賊兵三百六十六名。招撫偽總兵馬瑞之等。下部議敘。○傑書又疏報。耿逆下偽總兵王飛石等。統賊兵七千餘人。逼犯淳安縣。嚴州副將鮑虎率領官兵。逆擊之於圍屏鎮。殺賊二千二百有奇。生擒王飛石。及偽副將江明等四人。又招撫偽副將江誠等。安插被難人民。悉歸原籍。下部議敘。○甲辰。

上御太和殿視朝。文武陞轉各官謝恩。次朝鮮國使臣等行禮。○予故原任太子太保兵部尚書王弘祚祭葬。謚端簡。○乙巳。諭陝西總督哈占。適據貝勒董額等報。經畧莫洛提督王輔臣。標下官兵叛變。隨遣科臣蘇拜。特諭招撫。爾即遵旨。通行曉諭。以身肩任。加意安輯。念倡亂官兵。皆因蜀道險遠。糧餉不繼。以

致畏死情迫。頓生變亂。誰肯甘心從逆。自造繫殃。其不得已之情。朝廷具已洞悉。今特遣官前來安撫。諭旨甚明。有如皎日。伊等各有一父母妻子恒產。如能遵旨來歸。官職如故。願為兵者。仍許入伍。願歸農者。令回原籍安插。哈占等。係信任特用之臣。務體朕至意。速行撫諭。早定地方。○諭蘇拜。爾偕哈占。選擇能員。齎敕招諭王輔臣。并作速安撫亂兵。爾與哈占商酌。如應親往。即親往。若不可往。即遣能員前去。務殫心籌畫。以期有濟。○總理浙江兵馬糧餉事務戶部侍郎新陞浙江巡撫達都。以年邁。且不識漢字。具疏辭巡撫任。舉浙江布政使陳秉直自代。得旨。陳秉直陞補浙江巡撫。達都仍以原銜。照舊料理浙江糧餉事務。○丙午。諭議政王大臣等。王輔臣標兵背叛。廣元保寧大兵。關係甚重。應遣兵接應。若調將軍坤巴圖魯侍衛等兵。及西安兵發往。恐王輔臣回據平涼。西安兵力單弱。應

以京城所發兵每佐領三名。速催起程。其羸瘠馬匹。暫留太原秣養。選壯健者星夜馳赴西安。於各大兵內酌量留守西安。餘兵速遣赴大將軍貝勒軍前。接應廣元保寧大兵。回至漢中。○平南王尚可喜疏言。逆賊於衡湘造船千餘。欲分發岳州荊州。併進取江西。將來春水泛漲。長江上下。宜預為設備。

上命大將軍順承郡王勒爾錦等修造戰艦。於沿江要地嚴加防守。逆賊侵犯。即行撲剿。仍移知岳州大將軍貝勒尚善等。○江寧將軍額楚疏言。臣接部文。令臣等俟安親王到江西。即率所部兵回江寧。今安親王將到。臣等酌量養馬。仍回江寧。得旨。大將軍簡親王喇布。將軍華善。率兵駐守江南。額楚兵既抵江西。即於南昌駐牧。不必仍回江寧。俟安親王前抵南昌。額楚兵或赴撫州。與將軍希爾根合兵。進取建昌廣信。或會同王師進剿。或駐守南昌。聽大將軍王指授。○丁未。

上詣

太皇太后宮問安。○奉命大將軍和碩康親王傑書等疏報。恭將陳夢暘敗賊於蘭谿之東野山。斬偽總兵宋書聘。生擒偽副將吳維景等。下部議叙。○傑書又報。紫瑯山餘寇盤踞十八汀磯等處。夸蘭大拜色。副將牟大寅等率領官兵進剿。屢敗逆兵。所殺甚衆。生擒偽總兵楊茂林等斬之。下部議叙。○平南王尚可喜疏報。楚逆李漢英糾集餘衆。復犯連州。遊擊李有才。知州李蕡等率領官兵擊敗之。擒斬甚衆。下部議叙。○尚可喜又疏報。劉逆遣逆黨踞守揭陽縣碣石總兵官苗之秀等率兵往剿。恢復揭陽潮陽二縣。得旨嘉獎。下部議叙。○戊申。先是。

上諭。秦省重要。令見駐江寧揚威將軍阿密達。即率護軍四十名。速赴河南府。并統副都統塞格之兵。暫駐鎮守。俟每佐領四名兵到日。即率赴西安。至是。諭將軍阿密達等即率副

都統塞格兵。速赴西安。京師所派每佐領兵四名。以一名令夸蘭大等。率赴河南府。聽副都統塞格管轄。其三名。以達禮善巴圖魯署副都統率之。由山西赴西安。○諭議政王大臣等。陝西興安州。西近漢中。北接潼關。東南直逼鄖襄。最為要地。今秦中有警。特遣大兵鎮守。其副都統穆舒渾。帶至襄陽之兵。及蒙古甲兵。增足一千。令雲貴總督鄂善。副都統希福。率赴興安。保固漢中諸處。穆舒渾仍回荊州。至於興安襄陽。地係接壤。應令張犄角之勢。有警。即互相應援。都統范達禮。副都統李林隆。提督胡拜等。鎮守襄陽穀城。如兵力單薄。大將軍順承郡王等。酌量遣兵協守。尋諭若俟鄂善希福到日。方行遣發。恐致遲緩。即令穆舒渾於諭到之日。率所部兵。馳赴興安。鄂善希福。亦於諭到之日。率蒙古兵。馳赴興安。與穆舒渾同守漢中諸處。○諭兵部。秦省告警。三晉接壤之地。應設提督。以資彈壓。

著以山東援剿提督周卜世。為山西提督。統轄全省。率標下官兵。駐平陽府。○江寧將軍額楚等疏報。臣等十一月二十日。自婺源進取江西饒州。行至樂平縣段家村。有叛賊陳泰將。率眾拒敵。臣令副都統巴爾堪。統率各官兵迎擊。斬獲甚眾。乘勝恢復樂平縣。賊復糾集餘眾。邀我師於鄱陽雲吉峯下。又大破之。遂至饒州。賊眾棄城。遁入湖中。隨遣前隊巴特瑪等。追擊三十餘里。盡殲餘黨。恢復郡城。得旨嘉獎。下部議敘。○平南王尚可喜疏言。臣年老衰病。請速發滿洲大兵。彈壓全粵。上命將軍尼雅翰。率所部兵。同副都統綽客托。速赴平南王軍前。協守粵東。○己酉。定遠平寇大將軍和碩安親王岳樂疏報。吳逆下僞總兵張泰。帶領賊兵。距守安福縣。副都統穆承格。泰將塞勒等。統領官兵進剿。殺賊五千餘人。恢復安福縣。得旨嘉獎。下部議敘。○庚戌。河南巡撫佟鳳彩。以疾乞休。允之。○贈四

川陣亡鑲紅旗遊擊張登科為副將。予祭葬如例。○奉命大將軍和碩康親王傑書等疏報。逆賊侵犯天台。寧海將軍固山貝子傅喇塔等。遣夸蘭大席密納等。率領滿漢官兵。連破賊於紫雲山。九里寺山等處。殺賊千餘人。下部議叙。○傑書又疏報。十二月初一日。逆賊耿精忠下偽都督徐尚朝等。率馬步賊三萬。土寇二萬。犯金華。都統巴雅爾。副都統馬哈達。總兵官陳世凱等。率兵於積道山連戰敗之。攻破木城。殺賊二萬餘人。招撫偽官兵七百餘人。所獲偽敕印軍器無算。下部議叙。○廣東廣西總督金光祖疏報。逆賊孫延齡。屢遣賊兵犯懷集縣。官兵六戰皆捷。斬獲甚多。又犯欽州。遊擊王嘉賢等。率兵擊之。殺賊一千三百餘人。下部議叙。○辛亥。定南將軍希爾根等疏報。逆賊屯踞江西東鄉縣界。前鋒統領侍郎覺羅舒恕率兵擊之。斬賊一千人。餘衆悉潰。下部議叙。○陝西總督哈占疏

言。經畧莫洛標下中軍官吳石珊。自棧道逃回。云經畧駐兵寧羌州南教場。本月初四日。王輔臣標兵猝叛。攻營。經畧親隨滿兵併力射却之。既而王輔臣身自督戰。衆遂復攻。礮矢齊發。經畧莫洛。中鳥鎗死。章京筆帖式等。或逃出。或為賊所殺。初七日。王輔臣率叛兵至沔縣。欲與貝勒戰。值標下兵五百。及經畧標兵。并各處運糧兵。共二千餘。一時星散。王輔臣勢孤。遂回畧陽。下部知之。○壬子。

上詣

太皇太后

皇太后宮問安。○敕諭王輔臣曰。近據總督哈占奏。稱進剿四川。軍中譟變。爾所屬部伍潰亂。朕聞之。殊為駭異。朕思爾自大同隸於英王。後歸入正白旗。

世祖章皇帝知爾賦性忠義。才勇兼優。拔於傭伍之中。置之侍衛之列。繼命爾隨經畧洪承疇。進取滇黔。爾果能殫心抒忠。茂建功績。遂

進秩總戎。寵任優渥。迨及朕躬。以爾勲舊重臣。嚴疆攸賴。特擢秦省提督。來京陛見。面加訊問。益悉爾之忠貞天稟。猷畧出羣。朕心深為嘉悅。特賜密諭。言猶在耳。想爾猶能記憶也。去冬吳逆叛變。所在人心懷疑。觀望實繁。有徒爾獨首倡忠義。舉發逆札。擒捕逆差。遣子王繼貞馳奏。朕召見爾子。面詢情形。愈知爾之忠誠純篤。果不負朕。知疾風勁草。於今見之。後爾奏請入覲。面陳方畧。朕以爾忠悃夙著。深所倚信。且邊疆要地。正資彈壓。是以未令來京。經畧莫洛奏請。率爾入蜀。朕以爾與莫洛和衷共濟。毫無嫌疑。故令爾同往建功。茲兵變之後。面詢爾子。始知莫洛於爾心懷私隙。頗有猜嫌。致有今日之事。則朕之知人未明。俾爾變遭意外。忠蓋莫伸。咎在朕躬。於爾何罪。朕之於爾。誼則君臣。情同父子。任寄心膂。恩重河山。以朕之惓惓於爾。知爾之必不負朕也。至爾所屬官兵。被調進川。征戍

困苦。行役艱辛。朕亦悉知。今變起倉卒。情非得已。朕惟加矜恤。並勿致譴。頃已降諭令陝西督撫招徠安插。并遣爾子往宣朕意。恐爾尚懷猶豫。茲特再頒專敕。爾果不忘累朝恩眷。不負平日忠忱。翻然悔悟。斂戢所屬官兵。各歸隊伍。即令率領。仍還平涼原任。已往之事。槩從寬宥。或經畧莫洛別有變故。亦係兵卒一時憤激所致。並不追論。朕推心置腹。決不食言。勿心存疑畏。有負朕篤念舊勲之意。

○海澄公黃芳度疏言。臣感念國恩。誓不與賊俱生。練勁卒滿萬。堅守漳城。及龍溪五縣。耿逆潛師援漳浦。臣分兵邀擊。賊衆大潰。鄭逆復遣偽侍衛及叛鎮趙得勝來攻漳浦。乞發大兵。不拘何路進閩。與臣會合。併力掃除。得旨。黃芳度堅守孤城。練兵殺賊。屢次間道陳奏。忠貞可嘉。平南王尚可喜進兵克復潮州。即發兵應援黃芳度。平定閩省。大將軍康親王傑書將軍希爾根。亦由浙江江西作速

進剿福建。大兵一到。先移知黃芳度速赴會
舍○癸丑。以翰林院侍講學士富鴻業。充日
講起居注官○免江南沐陽縣。本年分旱災
額賦十之一○陝西總督哈占疏言。陝西百
姓。供應芻糧。疲於奔命。請令山西。就近輸運。
得旨。山西運糧水路。則有黃河汾渭之險。陸
路輸輓。道遠勞費。民不能堪。著支戶部庫銀
十五萬兩。擇能員解至西安採辦。秦民正值
困苦之際。大兵需用芻糧。若價值稍增。民爭
什一之利。自樂於輸送。庶不至有誤軍需。倘
有不肖官員。苛派侵剋。使民不得均沾實惠。
督撫指名劾奏。從重治罪○丙辰。定遠平寇
大將軍和碩安親王岳樂疏報。副都統雅賴
阿喀尼等。率領水陸官兵。恢復都昌縣。疏通
河道。招撫康山餘黨。得旨嘉獎。下部議叙○
丁巳。

上詣

太皇太后宮問安○戊午。歲暮。祫祭

太廟。

上親詣行禮○遣官祭

永陵。

福陵。

昭陵。

孝陵。

仁孝皇后○遣官祭太歲之神○旌表八旗節
婦。滿洲嫩妻蘇氏等二十三人。蒙古孔庫
里妻葛氏等二人。漢軍何進成妻黃氏等七

人。烈婦滿洲艾哈奈妻韓氏等二人。各給銀
建坊如例○是歲。人丁戶口。一千七百二十
四萬六千四百七十二。田地。山。蕩。畦地。五百
三十萬八千七百五十六頃六十二畝。徵銀。
二千四百二十一萬六百五十三兩三錢有
奇。米。豆。麥。五百五十三萬二千五百三十二
石八斗有奇。草。二百二十九萬一千三百六
十五束。茶。十六萬二千七百四十引。行鹽。四
百六萬九千三百八十五引。徵課銀。二百四

十八萬七千五百七十二兩三錢有奇。鑄錢二萬九千三百四十七萬七千五百三十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十二

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十四年乙卯春正月庚申朔

上詣

堂子行禮還宮拜神畢率諸王貝勒貝子公及

內大臣大學士都統尚書精奇尼哈番侍衛

等詣

太皇太后

皇太后宮行禮停止朝賀筵宴○朝鮮國王嗣

子李焞遣陪臣李正等表賀冬至元旦

萬壽節及進歲貢禮物宴賚如例○辛酉

上詣

太皇太后宮問安○諭兵部。自逆賊吳三桂。耿精忠。背恩反叛。浙江。及江西袁州。贛州等處。綠旗官兵奮勇剿賊。固守地方。深為可嘉。應即議叙。以旌其勞。爾部速議具奏○諭兵部。逆賊吳三桂。據守岳澧諸處。恃有長沙衡州之粟。今安親王率師往江西。可令一到南昌。即簡江西軍中馬匹。由袁州取長沙。斷賊糧道。夾攻岳州○又諭。今日事勢。先滅吳逆為要。安親王宜留兵守江西。親統大兵。或由袁州。或由吉安。乘便進剿湖廣。攻取長沙。倘未易下。即令此兵。擾賊耕種。截其輓運。取資於敵。不但我兵無轉輸之勞。而岳州糧盡。賊可坐困。吳賊自不能久踞常澧矣。其移文安親王速行○浙江總督李之芳疏報。逆賊來犯嚴屬。遂安縣。圖絕金衢餉道。總兵官鮑虎身先士卒。敗賊於花石嶺地方。陣斬一千六百七十餘名。生擒偽副總兵都司各一名。守備千總共五名。賊兵九十三名。又賊據分水縣。

都司趙得壽等。殺賊三百餘名。陣斬偽遊擊千把總八名。恢復分水縣城。得旨嘉獎。下部議叙○平南王尚可喜疏報。賊首黎化中。陳九鼎等。糾合楚逆李漢英。聚眾萬餘。直犯連州。經我兵擊敗逃遁。仍復嘯聚大田頭。撫塘清水等處。以為巢穴。遊擊李有才等。率領官兵進剿。焚搗巢穴。擒斬甚多。賊已遁入楚界。下部議叙○壬戌月祭仁孝皇后○諭議政王大臣等。王輔臣兵變。雖下赦詔招撫。猶恐未即歸誠。擾害百姓。今將軍席卜臣等兵已抵漢中。送詣軍前馬匹。留漢中者亦甚多。貝勒董額等其固守要害。簡諸軍中願自効者。付賢能大臣。躡王輔臣後。如王輔臣歸順。即令此兵仍回漢中。倘或抗拒。則相機剿定○陞原任江西布政使劉捷。為太常寺卿○贈江南陣亡守備臧世龍。遊擊。予祭葬。廕一子以衛千總用○癸亥。賜寧古塔將軍巴海。元狐裘貂朝衣各一襲。墨爾折勒氏佐領扎奴喀。

布克託等衣帽鞍馬有差○乙丑孟春享

太廟。

上親詣行禮○遣官祭太歲之神○諭禮部朝鮮國王李欄襲封以來殫竭忠忱克盡藩屏之職今聞溘逝朕心深為憫惻可從優給與卹典於常例外加祭一次○陞太僕寺卿達哈塔為太常寺卿○江西巡撫白色純疏報閩逆王九萬敗遁之後又復來犯會昌界內遊擊李天柱周球等敗之於湖城陣斬賊兵千餘生擒偽副將一名下部議叙○丙寅

世祖章皇帝忌辰遣官祭

孝陵○

上詣

太皇太后宮問安○陞光祿寺卿徐世茂為順天府府尹○調福建布政使李士正為浙江布政使司布政使○陞江南淮揚道張登選為浙江按察使司按察使直隸守道丁思孔為江南按察使司按察使○予故告病回籍

內秘書院大學士孫廷銓祭葬謚文定○丁卯。

上詣

太皇太后宮問安○戊辰順天府進春○諭吏部禮部兵部平南王尚可喜航海歸誠勲猷懋著

太宗文皇帝嘉其勞績特賜王封及定鼎燕京復能殫竭忠忱贊襄大業

世祖章皇帝知其夙篤忠貞畀以巖疆重任鎮守粵東海氛寧靖百姓乂安近因吳三桂耿精忠等叛逆該藩益勵忠純克抒偉畧悉心籌畫數建膚功朕甚嘉焉事平優叙屢有俞旨前奏年老任重請以其子尚之孝承襲王爵已允所請今思該藩累朝勲舊功著封疆宜錫殊榮以酬懋績平南王尚可喜著進封平南親王即令其子尚之孝襲封尚可喜以親王品級頂帶支俸示朕優眷之意廣東文武事務著尚可喜照舊料理其親王之寶亦

暫行掌管。尚之孝統兵在潮。著給與大將軍印。應行封典。爾部即遵諭行。○庚午。

上詣

太皇太后

皇太后宮。問安。○辛未。祈穀於

上帝。

上親詣行禮。○癸酉。

上詣

太皇太后宮。問安。○賜朝正外藩王。貝勒。貝子。

公。台吉。塔布囊。及鄂羅斯使臣等。銀幣鞍馬

有差。○陞廣東布政使佟養鉅為廣東巡撫

○先是。王輔臣變叛。

上遣其子王繼貞往宣諭。又頒專敕。曉以大義。

發其悔悟之心。至是。王輔臣留其子王繼貞。

遣原任郎中祝表正。具疏自理。委罪經畧莫

洛。

上復命祝表正。齎敕往撫。敕曰。前據陝西督撫。

奏稱入川兵丁。忽爾生變。念爾素性忠直。朕

所深知。國家待爾寵渥非常。必無負恩悖逆之事。故特面諭爾子王繼貞。前往宣布朕意。恐爾尚懷疑懼。又降專敕於爾。詳加開諭。今覽爾奏。變起情形。皆由莫洛控馭失宜。軍心不服所致。爾斂戢潰軍。具疏請罪。爾之心跡無他。朕已洞悉。往事一槩不究。前諭甚明。爾所屬官兵。俱行寬宥。照舊歸伍効用。爾即率領。仍回平涼汛地。照舊鎮守。以固封疆。莫洛標下原帶官員。已各免罪。作何委用。爾與總督酌量題補。其餘兵丁。願歸農者。令地方官加意安插。願在爾標充伍者。與總督商酌補入。務令得所。以副朕撫恤之意。爾前功甚茂。朕之待爾。終始不渝。其盡釋疑衷。以圖後效。果建殊勲。貯膺懋賞。○諭陝西總督哈占。巡撫杭愛。據爾等奏稱。王輔臣兵變。致經畧標下綠旗兵丁。驚潰等語。朕思秦省兵士。舊在行伍者。戍守著勞。新行召募者。驟經調遣。今俱隨征遠出。深軫朕懷。事出意外。必非無因。

念其變起倉卒。情非得已。未忍加罪。爾等即宣諭朕意。速行招撫。願歸營者。隨便入伍。願歸農者。加意安插。前罪一槩不究。其官兵人等。父母妻子。見在原籍者。俱行宥釋。並不株連。念伊等皆朕赤子。特布寬典。予以自新。勿得執迷不悟。自貽伊戚。爾等即廣行曉諭。以副朕撫綏招徠之意。○諭兵部。先因王輔臣兵變。令岳州官兵速進。今王輔臣既具疏悔罪。雖未即降。而大兵雲集。秦地已可無虞。宜行文貝勒尚善。若岳州可取。即速進兵。如勢有未便。不宜輕動。前已敕安親王。由秦州取長沙。度其將到。相機前進。尋尚善等奏。臣等正治攻具。取岳州。賊更浚濠三重。其間復設陷坑。木椿竹簽。周密環布。臣等欲移營前進。又恐時當霖雨。江水泛漲。營壘前後。悉皆被水。且我船與賊船甚近。而荊河口又居我後。賊據上流。殊為可虞。誠如

聖諭。不宜輕動。臣當暫停進兵。以俟機會。疏入。

報聞。○江西巡撫白色純疏報。吉郡萬安縣。乃贛南水陸咽喉之地。賊寇出沒靡常。遊擊田振等。敗之於西塘。又敗之於韶口。羅塘灣地方。斬獲甚衆。下部議叙。○甲戌。

上御太和殿視朝。文武陞轉各官謝恩。次朝鮮國使臣。鄂羅斯。喀爾喀。尼魯特。進貢使臣。行禮。○以戶部郎中邵吳遠。為江西按察使司僉事。提調學政。○乙亥。

上詣

太皇太后

皇太后宮問安。○遣內大臣壽西特。侍衛桑尼。恩克。諭祭朝鮮國王李柵。謚曰莊恪。仍封王嗣子李煒。為朝鮮國王。妻金氏。為國王妃。制曰。鴻圖無外。敷聲教於海邦。寵命維新。溥懷柔於東土。奕世篤忠貞之美。職貢勤修。累朝嘉恭順之誠。彝章游錫。當纘服之伊始。宜綸綍之重中。爾朝鮮國王嗣子李煒。器識淵深。躬行純茂。夙擅岐嶷之譽。克紹家聲。式遵禮

義之風。丕承前烈。念此象賢之冑。爰隆賜爵之文。茲特封爾為朝鮮國王。屏翰東藩。虔共正朔。綏安爾宇。永夾輔於皇家。精白乃心。用對揚於天室。欽哉。勿替朕命。○定西大將軍多羅貝勒董額疏言。將軍席卜臣。都統赫業。總督周有德等。進取保寧。扎營於蟠龍山。分兵駐槐樹驛。郿嶺接應糧運。為賊所刦。糧運阻絕。十三年十一月。撤回大營兵。行至娘娘廟。張飛廟。槐樹驛。屢遇賊兵邀路。我兵俱擊敗之。署前鋒統領穆占率兵通道。自漢中運糧至。大兵始得食。又擊敗賊於郿嶺龍潭驛等處。抵廣元。聞王輔臣叛。復率兵自廣元回漢中。其由東河小路撤回之二百餘兵。為賊所阻。臣等酌留官兵守漢中。親統大兵出棧道。途經鳳縣。留兵防守。至鳳翔。復量留護軍驍騎。付赫業駐鎮。隨率餘兵至西安。但席卜臣。赫業等兵勞苦已極。馬匹鎧仗。不能自辦。請量行撥給。得旨。馬匹鎧仗。行軍要需。今席

卜臣等兵。既極勞苦。見駐西安諸將帥。酌量每人給馬二三四匹。其鎧仗。著動正項錢糧修辦。○署前鋒統領穆占疏言。將軍席卜臣。副都統擴爾坤。吳國正。馬一豹等。領兵二千。留守漢中。

上諭。漢中要地。宜置重兵。貝勒董額等。於西安兵內。每佐領下。撥甲士一名。俾將軍坤巴圖魯侍衛。副都統翁愛德業。立率赴漢中。協力固守。其糧餉。令巡撫杭愛駐漢中。設法支給。總督哈占。陸續運送。毋致缺乏。○諭定西大將軍多羅貝勒董額。陝西總督哈占。曰。王輔臣。雖具疏悔罪。正恐借此以緩我師。乘間為固守計。若王輔臣果聽命待罪。我兵但守疆界。脫或揚言投誠。而仍肆擾害。勢將蔓延。爾等即相機剿禦。○廣東廣西總督金光祖疏報。欽州遊擊王嘉賢。進剿廣西逆賊周將軍黃都督等餘孽。於王光山。斬偽百總一名。賊兵二百八十六名。下部議叙。○平南王尚

可喜疏報。歸善縣淡水場土賊蔡宗明等竊發。知縣連國柱都司陸觀象擊敗之。下部議叙。○丙子。平南王藩下左翼總兵官班際盛。坐玩悞軍機。革去總兵官。留所襲世職戴罪圖功。○丁丑。先是。

上諭議政王大臣等。蘭州近邊要地。應速遣兵駐守。令保寧大兵已回西安。達禮善巴圖魯兵亦將至西安。其將西安見在兵每佐領下撥四五十名以上。令將軍阿密達副都統鄂克濟哈。率赴蘭州。剿禦逆賊。并防階州文縣諸處。令鄂克濟哈。率赴秦州。恭贊阿密達軍務。尋大將軍貝勒董額奏。蘭州固宜遣兵防守。但保寧還卒。鎧甲未備。達禮善巴圖魯兵兼程而來。恐難驟遣。西安所恃以禦賊者。賴有調來汝寧河南兵。今將此兵發往。倘王輔臣由陳倉諸路。斷我棧道。自秦州平涼一時來逼。深為可虞。

上復諭曰。今據報。逆賊已逼蘭州。若不遣兵速

援賊將猖獗。臨鞏被陷。三邊一搖。勢難猝定。蘭州距秦州不遠。我兵若往蘭州。則秦州便可襲取。而平涼諸賊亦可首尾夾攻。阿密達等。以文到之日。即速赴蘭州。保固三邊。倘逆賊中道阻截。即攻取平涼。或奪路前赴蘭州。其相機以行。貝勒等速備馬匹器械。給保寧回兵。其達禮善巴圖魯之兵。亦給與馬匹。以備剿禦。○戊寅。江寧將軍額楚疏報。逆賊侵犯饒州。分布官兵擊敗賊衆。斬殺甚多。所獲船隻無算。下部議叙。○己卯。遣滿漢大學士各一員。恭點

仁孝皇后神主。是日恭奉

神牌升祔

奉先殿。○授固山貝子顧爾瑪渾子扎山。為三等輔國將軍。輔國公葉伯舒子成德。為三等鎮國將軍。輔國將軍法復禮子塞特。為三等奉國將軍。○陞翰林院侍讀學士莽色。為太僕寺卿。○浙江總督李之芳疏報。逆賊屯踞

龍游蘭谿壽昌。交界深山之內。三縣駐防官兵。連敗之於白馬。黃塘源等處。又蘭谿知縣楊天機等。敗賊於下盛村。陣斬偽總兵一名。又守備李和等。敗賊於大堰頭。仙洞源等處。下部議叙。○庚辰。

上詣

太皇太后宮。問安。○先是。理藩院侍郎博羅特疏言。王輔臣叛變。遣理藩院員外郎拉篤祐等。往調蒙古兵。歸化城。土默特二部。四子部落。毛明安。吳喇忒。三部兵。已啓行前進。鄂爾多斯兵。亦嚴裝待發。至是。博羅特疏言。天寒大雪。鄂爾多斯馬瘦。不能前進。得旨。土默特等七旗甲兵。赴調前來。深為可嘉。至鄂爾多斯之兵。與拉篤祐等。馳驅往來。天寒大雪。士馬疲困。殊堪憫念。著暫停進邊。仍各整理器械。以俟調遣。其七旗官兵。令博羅特傳諭前進。○辛巳。陞右通政趙璟。為光祿寺卿。○壬午。以平南王藩下二等阿達哈哈番孫楷宗。

為左翼總兵官。○湖廣總督蔡毓榮疏報。南漳縣點子龍虎等峒寨。偽都司夏之琪等。率兵民三千三百餘名投誠。下部知之。○揚威大將軍和碩簡親王喇布疏言。江南財賦重地。界接諸省。宜增守兵。今副都統蘇朗。帥蒙古兵一十守池州。署副都統額思赫。帥滿州蒙古兵守蘇州。臣復以蒙古兵二百。協守徽州。將軍華善之兵。以五百赴浙江。三百取饒州。其見駐江寧者。僅蒙古兵四百。臣所統者。兵不滿千。請令將軍額楚等兵。回駐江寧。

上諭兵部。額楚既抵江西。不必引還。令駐防兗州署副都統諾敏。岳爾多斯。率滿兵速赴安慶。以備九江湖口窺伺之賊。江南有警。即順流應援。令簡親王統之。京師滿洲蒙古每佐領。撥驍騎一名。令署副都統伊巴克圖。馬爾齊哈率領。漢軍每佐領撥二名。令副都統郎化麟率領。俱赴兗州。著將軍查哈太統之。署副都統等為叅贊。兵到。副都統孫承祖。帥兗州

所駐漢軍與諾敏等會於安慶。至盛京已調烏喇兵七百名駐守。其更調盛京兵六百名赴京師。○陝西總督哈占疏報。興安總兵官王懷忠敗賊於娘娘廟槐樹驛陣。斬偽總兵王加玉等。又至郿嶺。攻破木城二座。沿途連捷。下部議叙。○甲申。

上詣

太皇太后

皇太后宮問安。○以原任直隸援剿提督劉兆

麒為江南崇明提督。○乙酉。定西大將軍多羅貝勒董額等疏言。興安兵變。殺總兵官王懷忠。臣等出示安撫。仍移會前往興安副都統穆舒。渾兵中途暫止。

上命頒發敕諭。付貝勒董額。總督哈占。宣諭官兵。尋隨征總兵官黨塞。上京告變。

上又諭曰。據黨塞面奏。王懷忠平日待下貪苛。行事乖戾。衆心不服。以致激變。朕以爾等曾隨征四川。剿殺寇賊。戮力勞苦。今倉卒之變。

出於萬不得已。非夙圖悖亂者比。是以未忍加罪。特頒寬典。嘉與維新。已降敕大將軍貝勒總督宣諭。今又令總兵官黨塞。齎敕明布朕意。將爾等從前罪愆。槩行赦宥。其各歸營伍。剿賊樹功。以圖後效。勿懷疑懼。以負朕寬宥恩撫至意。倘仍觀望稽遲。或聽奸宄煽誘之言。妄行作亂。則國有明法。勿遺噬臍之悔。未幾。哈占奏。敕諭抵興安。文武各官集兵民宣讀。莫不歡呼叩謝。

皇恩感激。思奮衆心。遂定。○丙戌。

上詣

太皇太后宮問安。○諭定西大將軍多羅貝勒董額等。陝西重地。棧道關係尤急。沔縣秦州。乃通漢中要路。前此川陝用兵。頗失機宜。今棧道若何據守。沔縣秦州。若何保固。俾逆賊不得侵犯。以保障全陝。貝勒叅贊大臣。與總督會議。務期萬全。○奉命大將軍和碩康親王傑書疏報。隨征知縣姚啓聖。守備何清等。

敗賊於諸暨縣。楓橋錢塘等村。進破賊寨。又破賊方懋功等於冷水地方。前後殺賊數千人。陣斬賊首朱得福。招撫偽總兵等官四十員。賊兵七千餘名。下部議叙。○奉命大將軍和碩康親王傑書疏報。副都統馬哈達。總兵官李榮。陳世凱等。大敗逆賊偽總兵徐尚朝。殺賊千餘。恢復永康。縉雲二縣。得旨嘉獎。下部議叙。○戊子。先是。定遠平寇大將軍和碩安親王岳樂疏言。兵部移文令臣速取長沙。但今江西所在賊擾。人心未定。臣若帥師前往。則江西兵單可慮。今或進取長沙。或先滅江西諸賊。請旨遵行。

上諭。岳州卒難攻取。若不速取長沙。恐賊復增守備。先令分兵留守要害。速取長沙。至是。岳樂又奏。江西形勢。為廣東咽喉。江南湖廣要衝。見今三十餘城。為賊盤踞。且醴陵逆賊。造設木城。增偽總兵十餘人。兵七萬。猱猱三千。堅守長沙。萍鄉諸處。臣若撤撫。饒都昌防兵。

往長沙。則諸處復為賊有。不撤。則兵勢單弱。不能長驅。且廣東諸路。恐亦多阻。臣欲先平江西賊寇。無却顧之憂。然後分防險要。帥師前往。

上諭之曰。逆賊吳三桂。久據湖南。奸宄乘勢竊發。滇黔川閩。遂爾淪陷。廣西陝西。逆孽猖獗。湖南一隅。誠賊根蒂。四方羣寇所觀望。必速滅吳三桂。底定湖南。則各地小醜。聞風自散。今荊州兵未能渡江。而岳州兵又難驟進。王抵江西。宜由袁州直取長沙。一以斷賊餉道。一以分賊兵勢。一以扼廣西咽喉。一以固江西門戶。烏合之衆。自當瓦解。荆岳大兵。即可乘機直進。况寧羗告變。川賊必通楊洪二賊。窺我郢襄。擾我南鄧。侵我荊州後路。揆其大勢。進兵湖南。斷不容緩。且南方卑濕。延至夏月。霖雨連綿。大兵坐守日久。不但戰馬多斃。糧餉亦恐不繼。是進取湖南。不再計決矣。王宜將江西要地。速行整理。稍有就緒。即進取

湖南勿得坐視。致悞機會。○諭兵部。前因大將軍貝勒尚善等。欲攻岳州。故令總督蔡毓榮率標兵前往。今貝勒等。以逆賊固守岳州。暫停進取。其令蔡毓榮以所部官兵。仍回荊州。○諭議政王大臣等。今大兵全駐荊岳。恐逆賊以荊河口空虛。乘隙來犯。其令順承郡王。於荊河口對岸。撥滿兵防守。

實錄卷五十二

二十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十三

監修總裁官光祿大夫太保無太子太傅保和殿大學士兼戶部尚書二等伯加四級臣馬齊光祿大夫經筵日講官起居注少保無太子太保保和殿大學士仍無管吏部戶部尚書翰林院掌院事加二級又加一級臣張廷玉光祿大夫經筵講官太子太傅文華殿大學士仍兼理戶部尚書事務加五級又加二級臣蔣廷錫總裁官光祿大夫文華殿大學士無吏部尚書臣朱軾等奉

敕修

康熙十四年乙卯二月己丑朔。予故致仕禮

實錄卷五十三

一

部侍郎查布海祭葬如例。○庚寅。

上詣

太皇太后宮問安。○辛卯。

上至鞏華城。月祭

仁孝皇后。是日。駐蹕鞏華城。○予故散秩大臣

瓦爾喀諾和鐸爾各祭葬如例。○江西總督

董衛國疏報逆賊陳益後。鳩合閩寇吳明光。

踞山肆劫。石城縣文武官弁領兵剿殺。陣斬

賊首陳益後。殺獲衆多。下部議叙。○癸巳。

上回宮○甲午。

上詣

太皇太后宮問安○諭戶部兵部從保寧歸來軍士勞苦已極深為可憫。赫業胡禮布瓦爾喀擴爾坤等所領兵著每人賞銀十兩。其前後所支錢糧俱免扣除。仍按月給餉○振武將軍坤巴圖魯侍衛疏言鳳縣賊拆毀偏橋設兵守險。所運之糧不得令守鳳縣夸蘭大嵩祝等以糧竭突圍而出。又同知張亢古來自秦州稱王輔臣部下王好文等率兵截斷棧道。

上諭前貝勒董額等至西安不即隨經畧取道秦州乃由棧道進。託言馬瘠竟駐漢中致寧羌告變。王輔臣回秦州時又不追躡剿殺急回漢中及保寧兵旋僅留將軍席卜臣等守漢中親統大兵輒回西安知棧道險要不多設兵防守致狡寇阻截俾廣元朝天等處復為賊據皆董額等退縮遲延所致。理應解職。

但正值臨敵仍令董額統兵往定平涼秦州諸處勿仍前逗留。有誤軍機。此行令貝子溫齊公綽克託將軍阿密達署前鋒統領穆占輔之。如應分兵阿密達穆占給與將軍印。為將軍坤巴圖魯侍衛。帥兵開棧道以進漢中。鄂善哈占量留官兵守西安。就近有警即行剿滅。尋董額奏將軍阿密達署副都統鄂克濟哈副都統覺羅夸代等將各處所調官兵與京城西安兵共撥每佐領五名。二月十四日率往平涼。臣與固山貝子溫齊輔國公綽克託署前鋒統領穆占署副都統達禮善巴圖魯副都統希福蒙古都統赫業護軍統領胡禮布等將回自保寧之兵及達禮善巴圖魯所領兵亦湊每佐領五名之數。本月十九日率往秦州。又撥滿兵防守潼關。所餘兵合每佐領三名及鄂善所帶蒙古兵四百餘名付哈占鄂善副都統穆舒渾等守西安○乙未。

上詣

太皇太后宮問安○以平南王藩下護軍統領尚奇成為藩下中鎮總兵官○丙申。

太皇太后聖壽節時值

社稷壇齋戒未行禮○諭兵部陝西沿邊有路通山西汾州恐逆賊乘隙來犯授副都統鄂泰為建威將軍統領自盛京調來兵一千名往駐太原防守汾州諸處以一等侍衛吳丹為署副都統叅贊軍事調烏喇諸處兵一千名來京○丁酉遣大學士李蔚祭

先師孔子○定遠平寇大將軍和碩安親王岳樂疏報護軍統領桑遏領兵克復上高新昌二縣陣斬偽總兵朱一典謝以泰等前後殺賊一萬五千餘級生擒偽副將守備等官得旨嘉獎下部議敘○岳樂又疏報招撫江西偽官二十餘員兵三千六百餘名下部議敘○奉命大將軍和碩康親王傑書疏報夸蘭大張所志往省搬運礮位至上虞縣遇賊

方懋功沿江邀截奮勇進剿生擒四十五名追殺三百餘名下部議敘○傑書又疏報偽總兵馮公輔從義烏縣逃遁盤踞武義縣附近諸山署前鋒統領希福等率領官兵敗之於苦竹地方生擒偽都司何處儒等三十二名又遊擊田萬侯敗之於郭東地方殺賊五百餘又原任知縣李經邦招撫民人六千餘名並下部議敘○戊戌祭

大社。

大稷。

上親詣行禮○己亥。

孝康章皇后忌辰遣官祭

孝陵○庚子。

上率諸王文武大臣侍衛等詣

太皇太后宮補行慶賀

聖壽節禮○贈四川陣亡守備熊天福署都司

僉書予祭葬如例○辛丑。

上詣

太皇太后宮問安○予故戶部尚書一等阿思哈尼哈番又一拖沙喇哈番米斯翰祭葬。謚敏果○給江西陣亡把總吳勝卹賞如例。廕子弟一人。以衛千總用○奉命大將軍和碩康親王傑書疏報。桃花嶺與縉雲逼近。乃恢復處州要路。逆賊耿精忠遣偽總兵沙有祥屯守處州。踞嶺險要。因遣副都統馬哈達。總兵官李榮等率兵往攻。自己至酉。奮勇剿殺。毀柵而入。當陣招降偽遊擊張漢臯。殺賊五百餘。遂逾桃花嶺。乘勝克復處州。得旨嘉獎。下部議敘○壬寅。諭秦中兵民。爾等皆朕赤子。年來保固地方。轉輸糧餉。急公好義。勞苦倍常。朕心時切軫念。近因入川兵燹。人情惶擾。一時無知。割辦去纓。以圖倖免。事起倉卒。情可矜原。今特布寬典。予以自新。其臨鞏平慶等處文武官員軍民人等。凡有割辦去纓者。一槩赦免。不究。官俱照舊供職。兵丁各歸原伍。百姓各安生理。特諭○給湖廣陣亡把

總吳芝蘭卹賞如例○癸卯。

上御太和殿視朝。文武陞轉各官謝恩○平南王尚可喜疏報。逆賊偽唐軍門侵犯樂昌。總兵官張星耀等陣斬偽副將等十員。生擒賊兵六十餘名。斬首一千餘級。下部議敘○甲辰。吏部題。八旗舉人。應以光祿寺典簿署丞。國子監監丞員缺。序次錄用。從之○乙巳。經筵講官擬定講章。學士傳達禮進呈。

上諭曰。講章內書寫稱頌之言。雖係定例。但凡事俱宜以實。如乘至誠而御物。體元善以宜民。固已媲美三王。躋隆二帝等語。似屬太過。著改奏○奉命大將軍和碩康親王傑書疏報。賊從處州敗回仙居。隨遣副都統伯穆赫林等率領滿漢官兵三路分進。於正月二十五日。至白水洋地方。耿逆下偽鎮海都督林冲。扎立十三營盤。與我軍對壘。分兵二隊。自未至申。兵交未克。取勝。穆赫林等親身率戰。攻入第一座營盤。諸軍繼進。悉破賊營。遂至

仙居城下。適賊曾養性遣兵一千。同賊堅守城池。屢招不降。遂令署護軍叅領額庫納等。率兵於城西潛伏。令署叅領齊林布等。後陣助戰。令署叅領禪拜等各架雲梯。三面攻城。賊不能支。開西門遁逃。伏兵阻截。盡行剿殺。生擒偽都督僉事朱富等。獲大小礮位二百五十八座。及關防軍器無算。仙居既復。遂擬分兵進取黃巖。得旨嘉獎。下部議敘。○傑書又疏報叅將王國祥等。破賊曾養性下偽總兵胡雙奇於天峯寺地方。殺賊六百餘。下部議敘。○傑書又疏報。遊擊田萬侯。破賊林惟仁於武義縣夏陽地方。焚燬木城。追至宣平縣大王嶺。復有逆賊數千。以大木為城。列陣對敵。隨令官兵三路夾攻。得破賊寨。陣斬賊將林惟魁等。殺一千餘級。生擒三十五名。下部議敘。○陝西總督哈占疏言。二月初五日。賊犯蘭州。撫標官兵通賊倡亂。城陷。巡撫花善等奔涼州。

上諭大將軍貝勒董額將軍阿密達等。統領大兵。分路速進。恢復秦州平涼。掃除逆賊。以定三邊。總督哈占周有德。鄂善。巡撫杭愛。張德地等。協守西安等處。速移會將軍席卜臣等。堅守漢中。相機進剿。並密檄提督張勇。總兵官孫思克。陳福。王進寶等。整兵固守汛地。前來夾攻。○丁未。遣官祭

先農之神。○浙江總督李之芳疏報。逆賊屯踞衢州近郊。偽總兵葉念帶領賊兵五千。於南山一帶扎營。為賊運糧。平南將軍賴塔。密令總兵官王廷梅等。分路衝殺。奮勇齊進。連勝三陣。陣斬偽都司二名。殺賊二千餘。焚燬賊巢。餘衆奔潰。下部議敘。○戊申。

上詣

太皇太后

皇太后宮。問安。○庚戌。

上御經筵。講畢。賜大學士九卿詹事。及講官等宴。○陞西安副都統佛尼勒為西安將軍。○

奉命大將軍和碩康親王傑書疏報總理糧餉侍郎達都等招撫偽徽江伯王國賓偽總兵丁鎮等五百三十餘員兵一萬四千八百餘名下部議敘○壬子免湖廣武昌等七府康熙十三年分旱災額賦有差并命動支節年存貯穀米銀錢賑濟○癸丑春分朝日於東郊遣理藩院尚書阿穆瑚琿行禮○丙辰遣官祭

歷代帝王○湖廣總督蔡毓榮疏報賊船往來長江狡謀叵測命候補副將華禪為岳州水師副將設兵一千五百名尚之澧為荊州水師副將設兵一千名各為左右二營以資防禦○戊午先是諭兵部陝西情形邇來如何鎮守潼關滿兵係誰統領兵數幾何保寧失散前鋒護軍曾否抵漢中爾部速檄哈占一一具奏至是哈占遵旨覆奏保寧回來失散前鋒護軍絕無踪跡將軍阿密達等於本月十四日進兵平涼聞賊將犯涇州約計平

涼賊衆四千餘能戰止千人餘皆平民被賊脅制者今貝勒董額等於本月十九日進兵秦州又聞吳三桂以銀二十萬兩付叛臣巴三網散給王輔臣及經畧標兵以誘引之○李蘭大拜音查莽奕祿以兵五百守潼關署副都統阿爾瑚以兵五百守寶雞副都統顏布帥兵五百前往鳳縣因棧道已為賊據與將軍坤巴圖魯侍衛亦暫駐寶雞至三水淳化白水蒲城韓城諸縣土寇蜂起掠剽鄉村雖亦分我兵勢然渠魁既殄小醜自當瓦解無足慮者至臣請令蒙古兵由寧夏進駐固原雖指稱進攻平涼蘭州實疑寧夏延綏官兵也今下馬關靖遠營官兵心懷叵測俟偵探確實再奏疏入報聞○江西巡撫白色純疏報南贛總兵官劉進寶遣兵敗賊於黃土關又敗之於橫嶺進復龍泉縣得旨嘉獎下部議敘

三月己未朔湖廣總督蔡毓榮疏報叛逆楊

來嘉。犯南漳縣襄陽總兵官劉成龍擊敗之。斬偽都司陳國俊。焚賊屯糧。逆衆盡遁。下部議叙。○陝西總督哈占疏報。遊擊田有禾。敗賊於邵陽之華村。又報。遊擊邵一仁。擊敗川賊於興安鎮屬紫陽路。下部議叙。○庚申。

上詣

太皇太后宮問安。○先是岳州戰船。遇風漂失。諭兵部曰。戰船經由長江。大將軍貝勒尚善等。應嚴飭所司。加意防護。乃怠忽漂失。反為賊資。嗣後戰船往返。須以纜引。遇風則泊。倍加小心。爾部其速檄諭知。至是尚善等奏。風壞沙唬船五十餘隻。沉沒戰船四隻。請救撫。臣速發修船物料。

上復諭。沙唬戰船行兵。急需關係重。太侍郎納布。巡撫張朝珍等。速將修船物料。委賢能官員。送至岳州。亟行修理。岳州船兩次被風。如果停泊得所。風豈能壞其嚴飭大將軍貝勒等。務擇地停泊。善為防護。○先是貝勒察尼。

請分岳州每佐領兵二名。發安親王軍前。協定江西。規取長沙湘潭。會荊州岳州將軍。二路並進。

上命順承郡王勒爾錦等。公同速議。并令安親王岳樂。忝酌具奏。至是安親王岳樂等奏。岳州兵來。則臣進剿力厚。即守江西。亦屬有益。上諭。自岳州發兵至江西。正值溽暑雷雨。於王進剿之期。又恐無及。其停止遣發。順承郡王勒爾錦等。奏臣商之貝勒尚善。據云。江西兵已經停遣。欲遣岳州兵每佐領三名。令貝勒察尼都統巴爾布。率赴荊州。臣俟此兵到日。即從彝陵以下。石首以上。相機渡江。

上諭。主及忝贊大臣。身在地方。具陳機宜。固當如議。但入川大兵。見以糧餉不繼。退駐西安。今我兵渡江之後。萬一川賊乘桴東下。侵犯荊州。彝陵茅麓山賊。又出襄陽諸處。則我軍必至却顧。難以長驅。王貝勒等。皆朕懿親。忝贊大臣。皆朕股肱。今與賊相持。可行則進。倘

有可虞。寧俟秋冬。相機進取。○揚威將軍阿密達疏報。二月二十七日。副都統鄂克濟哈等率領官兵。敗賊於涇州城南。擒斬偽總兵衛民譽等。遂復涇州。得旨嘉獎。下部議叙。○辛酉。月祭。

仁孝皇后。○癸亥。

上詣

太皇太后宮問安。○陞叅領木成額。為西安副都統。○以原任河南援剿總兵官鮑敬署理直隸真定總兵官事務。○以隨征總兵官朱永客。為陝西固原總兵官。○甲子。諭奉命大將軍和碩康親王傑書曰。王前奏克取處州之後。酌量前進。又稱貝子治浮橋戰艦。將次告竣。旦晚由各路征剿逆賊。分兵進取黃巖。今台州浮橋成否。已渡江否。及王進兵之事。與軍中情形若何。浙江事勢若何。王其一一奏聞。尋傑書奏。浙江大勢。必俟舟師既至。台寇已平。再酌機宜。共圖進取。○命西安將軍

佛尼勒。為振武將軍。援漢中。副都統德業立等守寶雞縣。以疏餉道。○江西巡撫白色純疏報。贛州賊寇固守老巢。遊擊李天柱等。分兵夾剿於黃潭地方。陣斬逆渠陳魁等二十二人。殺賊二千有餘。下部議叙。○乙丑。大學士兼管戶部事務圖海等疏言。近來供應大兵。恐有派累民間。雖屢奉

上諭禁止。有司未能實心奉行。應敕督撫嚴禁。一應軍需。不得私派夫役。不得先期拘禁徵收錢糧正項外。不得絲毫科斂。民間詞訟。除重情速審速結外。其餘戶婚細事。不得濫准牽累無辜。並禁衙蠹作奸。指公需索。土豪惡棍。魚肉善良。庶幾安居樂業。民不知兵。得旨。是。命速行通飭。○丙寅。

上詣

太皇太后宮問安。○丁卯。命杭州都統喇哈達。赴奉命大將軍和碩康親王軍前贊畫。其杭州將軍印務。令副都統雅塔理署理。并令寧

海將軍貝子以下及各將軍兵聽康親王便
宜調遣○戊辰清明節遣官祭

永陵。

福陵。

昭陵。

孝陵。

仁孝皇后○安徽巡撫靳輔疏言饒寇侵犯祁
門。逆弁趙宗昂內變。有良木司巡檢張行健。
在危城中。被賊逼降。不屈慷慨捐軀。勁節堪
嘉。得旨著從優賜卹○己巳。

上詣

太皇太后宮問安○定遠平寇大將軍和碩安
親王岳樂疏報。二月十四日。定南將軍希爾
根。敗賊於撫州四十里塘堡地方。三月初二
日。賊自浙江衢州來犯撫州。前鋒統領侍郎
覺羅舒恕復敗之於七里崗。下部議叙○庚
午。定西大將軍多羅貝勒董額疏報。臣等於
二月二十八日。統兵至鳳翔府之隴州。離隴

州四十餘里地方。有逆賊偽總兵高昂等。聚
衆四千。在關山河岸。立營拒守。遂同署前鋒
統領穆占。西安將軍佛尼勒。副都統達禮善
巴圖魯。分布八旗官兵。令驍騎兵丁俱各步
行。以為前隊。前鋒兵丁及護軍兵丁俱為後
隊。又預撥都統赫業就近應援。遂整陣前進。
自己至午接戰。賊尚未退。都統赫業援兵助
戰。合力衝擊。賊遂敗遁。當陣斬殺甚多。因復
乘勝追北。已將關山關恢復。下部議叙○辛
未。調太原兵援陝西涇州。以阿密達平涼失
利也○命都統畢力克圖為平逆將軍。帥師
赴大同。調察哈爾兵入駐宣府大同○癸酉。
上御太和殿視朝。文武陞轉各官謝恩○乙亥。
諭定遠平寇大將軍和碩安親王岳樂曰。王
輔臣作亂。陝西震動。逆賊耿精忠出仙霞嶺。
將逼衢州。王抵江西日。冬。應速滅賊。進取長
沙。今或俟平定建昌廣信後。進兵或固守諸
汛地。即行前進。其速議密奏。尋岳樂奏擬於

本月二十六日。進剿建昌廣信兩處。稍得就理。即進取長沙湘潭諸處。○丙子。

萬壽節。停止行禮筵宴。○遣官祭

福陵。

昭陵。

孝陵。○遣官祭真武東嶽城隍之神。○

上詣

太皇太后

皇太后宮問安。○丁丑。

上諭兵部。三邊經調缺額官兵。及標員宜更置者。聽提督張勇募補。河西兵餉。著總督哈占。巡撫杭愛侯道路少通。速行撥解。其奏報。由邊外鄂爾多斯地方。設站傳遞。今大將軍貝勒董額等。已圍秦州。將軍阿密達。已進取平涼。其令提督張勇。巡撫花善。總兵官王進寶等。速取蘭州。會貝勒等。協力夾剿。以定臨鞏等處。○授甘肅提督張勇為靖逆將軍。○命加甘肅總兵官孫思克左都督。西寧總兵官

王進寶都督同知。事平之日。俱以提督先用。○逆賊王輔臣。遣賊陷定邊城。

上諭兵部。定邊係三邊咽喉要地。其令總督哈占。總兵官許占魁。速發官兵赴寧夏。同總兵官陳福。并力進取。○諭兵部。寧夏總兵官陳福。効力巖疆。勞績素著。屢次舉首逆劄克篤忠貞。且其妻子家屬。見在川中。逆賊挾誘。全無顧戀。矢志不移。深為可嘉。著以見兼職銜。陞補陝西提督。仍暫駐寧夏管總兵官事。俟平涼地方平定之後。即赴該管地方。料理提督事務。陳福之弟守備陳奇。妻子家口。亦陷賊中。深為可憫。著從優以叅將陞用。爾部即遵諭行。○己卯。加江西効用左都督許貞太子少保。以保守寧都。恢復石城功也。○壬午。

上詣

太皇太后

皇太后宮問安。○宴衍聖公孔毓圻等於禮部。○癸未。

上御太和殿視朝。文武陞轉各官謝恩。○以花馬池靖邊衛相繼失守。命總督鄂善等各帥所部兵赴榆林。協力剿禦。再調四子部落等兵由寧夏榆林兩路前進。速定地方。○甲申。以翰林院編修李錄予充日講起居注官。○予故廣東巡撫劉秉權祭葬。加卹一次。謚端勤。○戶部議覆浙江總督李之芳疏言。浙省金衢台嚴紹等處賊寇屢經官兵征剿。附從之徒漸已解散。投誠甚多。已飭行各地方官

安集。但不亟籌拯恤。恐其別生事端。應如所請。將浙省捐助銀米內酌量動支賑濟。從之。○乙酉。廣東廣西總督金光祖疏報逆賊侵犯懷集縣。守備李如貴等督兵殺賊。危城獲全。下部議叙。○湖廣總督蔡毓榮疏報。三月初九日。襄陽總兵官劉成龍進剿叛逆楊來嘉逆黨偽總兵陳宗啓等於馬良坪殺賊燬巢。下部議叙。○丙戌。

上詣

太皇太后宮問安。○甘肅提督張勇疏報。西寧總兵官王進寶於二月二十三日。用革袋結筏渡河。大破賊衆於新城地方。逆賊王輔臣下偽遊擊李廷玉等就擒。乞敕陝督迅發大兵。以為恢復平鞏之計。下部議行。○陝西總督哈占疏報。慶陽賊攻邠州。梁家堡固原總兵官朱永客擊却之。斬偽叅將吳進忠等。下部議叙。○予故承恩公白文選祭葬如例。○丁亥。

上詣

太皇太后宮問安。○初。察哈爾布爾尼乘吳逆作亂。欲謀劫其父阿布奈興。兵造反。日與其黨繕治甲兵。從嫁公主長史辛柱陰使其弟阿濟根告其謀。

上以事尚未露。不便遽加以兵。欲遣人召布爾尼兄弟。以覘虛實。又恐其生疑。乃奏

太皇太后遣侍衛塞稜等。遍召巴林王鄂齊爾兄弟。翁牛特王杜楞兄弟。及布爾尼。羅不藏。

俱入京師。已而諸王皆至。惟布爾尼兄弟不來。遂於三月十七日。執侍衛塞稜。約二十五日舉事。長史辛桂。親率伊弟巴勒米特。赴京奏聞。從嫁公主諸人。俱挈妻子。奔回錦州。奉天將軍倭內巴圖魯。亦以其事疏報。

上命多羅信郡王鄂札。為撫遠大將軍。大學士都統圖海。為副將軍。護軍統領哈克山。副都統吳丹。洪世祿。並為叅贊。帥師討布爾尼。并諭奉天將軍倭內巴圖魯。寧古塔將軍巴海等。固守盛京。○奉命大將軍和碩康親王傑書疏報。平南將軍賴塔等。遣副都統喇哈胡圖。總兵官王廷梅等。擊敗耿逆下偽將軍馬九玉等賊衆於衡州。斬級千餘。擒偽都司。下部議叙。○傑書又疏報。官兵屢次剿賊逆渠。馮公輔敗奔於宣平縣龍坑地方。嘯聚餘黨。復行狂逞。因遣撫標遊擊田萬侯等領兵進剿。三月初三日。至宣平前塢地方。賊據險以拒。我兵由山前山後。兩路夾攻。擒斬一百三

十餘名。遂抵宣平縣城外。復由宣平馬口一路。進抵大旗口地方。賊渠馮公輔率賊衆伏於叢莽。見我兵至。殊死鬪。我兵分作三路接戰。用闢山礮。鳥鎗。翼以弓矢。自辰至午。賊始敗北上山。我兵追殺十餘里。沿山攀援而上。至賊大寨。賊向於山上。修造石城一座。木城二座。據守見追兵至。滾木擂石。礮火齊下。我兵奮勇衝鋒。奪隘而入。前後殺賊二千三百六十餘名。擒偽都司徐之英等。焚燬賊巢。下部議叙。○予故副都統覺羅杜爾巴。祭葬如例。○戊子。命原任大學士巴泰。仍以原銜入閣辦事。○以翰林院掌院學士熊賜履。為武英殿大學士。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十四年乙卯夏四月己丑朔享

太廟

上親詣行禮○諭兵部自有賊警即遣真定官兵赴楚防守已經年餘備極勞苦今武昌見有滿洲蒙古及撫標城守水師兵真定總兵官張和善令率所部兵仍回原汛○陞吏部左侍郎勒德洪為戶部尚書兵部左侍郎塞色黑為刑部尚書○定遠平寇大將軍和碩安親王岳樂疏報招撫江西奉新都昌冷口南湖西湖等處偽官九十一員賊兵一萬九

千八百餘名。下部議叙○岳樂又疏報署護軍統領伯郎肅副都統朱喇禪署副都統雅賴阿喀尼等統領官兵水陸進剿湖寇於五桂寨徐汝等處殺賊二萬有餘獲船九百餘隻恢復餘干縣城得旨嘉獎下部議叙○奉命大將軍和碩康親王傑書疏報耿逆下偽騎都尉連登雲由松溪龍泉偽總兵徐尚朝由溫州兩路入犯處州副都統馬哈達三等台吉察渾及總兵官李榮陳世凱等擊敗之

實錄卷三十四

三

擒斬偽參將陳亮等三十四員下部議叙○庚寅寧夏總兵官陳福疏報叛賊盤踞定邊花馬二城出犯興武營遊擊熊虎等擊敗之斬偽遊擊雷普等下部議叙○甘肅巡撫花善疏報西寧總兵官王進寶兵抵蘭州逆賊出犯王進寶擊敗之下部議叙○辛卯月祭仁孝皇后○布爾尼既反遣人求助於土默特貝子滾濟斯札布滾濟斯札布遣其三等護衛舍布來告

上命厚賚之仍令理藩院作書諭滾濟斯札布曰初長史辛柱首布爾尼負恩背叛

朝廷正欲察其情實適貝子遣舍布來奏布爾尼於三月二十五日使護衛巴米說貝子同叛貝子即遣使奏聞復調兵為擒討計

朝廷深為嘉悅今布爾尼逆狀既實貝子等可選良馬速率所部討擒逆渠厥功匪細倘馬瘦不堪馳騁亦宜各守地方大兵定於四月初六日自京啓行故預令知之時察哈爾鄰近部落王貝勒等知布爾尼反先後遣人來報

實錄卷三十四

三

上命理藩院郎中馬喇員外郎塞冷赴諸部落調兵又諭理藩院作書如與滾濟斯札布書指發科爾沁和碩卓禮克圖親王鄂輯爾管領五旗和碩額駙沙津阿祿科爾沁多羅郡王朱爾札哈翁牛特多羅杜楞郡王畢禮袞達賴多羅達爾漢貝勒搜色巴林多羅郡王鄂齊爾固山貝子烏爾占教漢多羅杜楞郡

王札穆蘇喀喇沁多羅杜楞郡王札什鎮國公烏忒巴喇土默特多羅達爾漢貝勒趙圖札魯特多羅達爾漢貝勒巴達里多羅貝勒札穆等其諸部落使人悉著與馬喇等偕行○癸巳。

上詣

太皇太后

皇太后宮問安○調正紅旗蒙古副都統希福為滿洲副都統○江西巡撫白色純疏報屯墾都督許貞等帶領官兵招撫贛南寶石寨偽弁三十二員賊衆一萬七千九百餘名下部議叙○撫遠大將軍多羅信郡王鄂札等帥師啓行。

上諭之曰大兵出山海關當宣布累朝待布爾尼厚恩及朕不忍加誅之意彼若悔罪來歸則已否則以敕書付縱還蒙古持往諭之即布爾尼等臨陣來降亦當保全恩養今值蒙古馬瘦爾等速往毋違○諭察哈爾布爾尼

敕曰長史辛柱奏爾舉動乖戾勢欲為亂朕初未信既爾鄰近各旗王貝勒等相繼遣人告變朕猶疑之朕維察哈爾遭亂覆亡之後爾伯父額哲等受

太宗文皇帝殊恩封為親王國家於察哈爾不薄矣誠望爾子孫報効於世世不應及爾身而負恩叛國也朕雖不遽以為實但告變者接踵而至念爾必惑於奸宄之言抑或別有不得已之故耳故發大兵來問如有別情爾可明白奏聞朕必赦爾罪愆仍敦夙好爾受累朝恩養又為公主所生以至戚不忍遽滅故屢行曉諭若仍執迷恐貽後悔諭布爾尼弟羅不藏敕曰爾當開諭爾兄布爾尼令其悔罪歸誠爾等以及子孫庶不失榮貴若布爾尼不悟恐以爾兄之故并累及爾爾果能率屬來者仍待以親親之道即以王爵封之必不食言爾為公主子於國為至戚故行曉諭其於大兵未至時向爾兄開陳利害速令

請罪。以副朕不忍遽滅之意。諭察哈爾部衆
敕曰。爾等當向布爾尼。申明利害。彼若悔罪
歸誠。爾等亦獲福多矣。朕以爾等為

太宗文皇帝

世祖章皇帝懷柔之國。不忍以布爾尼一人故。
遽加剿滅。因此反覆申諭。若布爾尼拒諫不
悛。或擒獻逆渠。或自行投降。朕錫以官爵。俱
加恩養。斷不食言。往時察哈爾大臣來歸者。
受恩隆重。爾等共知。勿於太平安樂時。自取
禍敗。時布爾尼下佐領班第。喀爾喀公垂札
布下護衛索訥木。俱以他事在京。會布爾尼
垂札布反。悉就拘禁。

上特釋之。令齎敕與大兵同往。○奈曼王札木
山。附布爾尼。遣護衛巴地。約喀喇沁多羅杜
楞郡王札什同叛。誑嚇之云。科爾沁十旗。及
札魯特。阿祿科爾沁。烏朱穆秦。高齊忒。阿霸
垓。諸部落。悉起兵相應。札什歸其使。以無能
謝之。即具疏陳明心跡。遣其護衛達喇世入

告。迨理藩院員外郎圖爾哈圖奉命至其地。
札什出迎。具述前情。且云。身蒙

主恩。爵為郡王。何敢同叛。若止二旗為亂。我力
可支。但恐應彼者果衆耳。使臣不可久留。宜
速回奏。若出師。宜從古北口行。圖爾哈圖詰
其故。札什曰。無事多言。但以是奏。

皇上自能鑒察。圖爾哈圖復欲詣教漢部落。札
什止之。遂不果。歸復囑曰。途中凡有詢問者。
但答云。我等奉旨來召札什。因其馬瘦。不能
赴京。我等今仍回去。圖爾哈圖還。具陳如札
什指。

上曰。大兵衆多。若由古北口。則崎嶇難行。且多
帶紅衣礮具。耽延時日。自應出山海關。札什
既不忘國恩。凡得逆渠動靜。即令遣騎具奏。
進邊後。馳驛速來。於是賜之敕書。令達喇世
齎往。敕曰。員外郎圖爾哈圖致王言。具見惻
誠。王可率本旗兵。固守地方。王又言。大兵宜
出古北口。夫古北口。石徑崎嶇。大兵多。且攜

有火器。恐致稽延。今仍出山海關。王宜不時密探。凡有動靜。即具疏遣騎速奏。○甲午。轉吏部右侍郎舒恕為左侍郎。調禮部左侍郎折爾肯為吏部左侍郎。管右侍郎事。轉兵部右侍郎納布為左侍郎。陞內閣學士郭四海為兵部右侍郎。○陞京口駐防協領高國印為杭州副都統。○乙未。逆賊王輔臣遣人持吳三桂偽劄印。授靖逆將軍張勇。張勇斬其使以聞。又西寧總兵官王進寶出首王輔臣逆書。

上嘉之。封張勇靖逆侯。授王進寶一等阿思哈尼哈番。○命調

永陵鳳凰城蓋州。牛莊東京兵守盛京。○丙申。先是。命西安將軍佛尼勒率兵開棧道進漢中。至是。陝西總督哈占疏報。仙逸關有賊三千餘。夸蘭大嵩祝等兵不滿四百。難以防禦。又平隴之間。亦有賊三千餘。竊踞華亭。

上諭。仙逸關係通大兵要路。將軍佛尼勒親統

官兵。剿滅諸賊。或令副都統德業立。顏布。領兵赴剿。其酌量速行。○定遠平寇大將軍和碩安親王岳樂疏報。招撫江西銅鼓營。強山。東鄉。餘干。奉新等處偽官九十七員。賊兵三萬三千三百餘名。下部議叙。○寧海將軍傅喇塔疏報。三月初六日。原任廣東提督常進功。總兵官朱萬化。率領水師。自定海關出洋。於沈家門等處。剿賊大捷。下部議叙。○丁酉。以內閣學士徐元文為翰林院掌院學士。○戊戌。

上詣

太皇太后宮問安。○以隨征左都督許貞為江西撫建廣總兵官。○己亥。陞護軍叅領莫達為正紅旗蒙古副都統。○廣東廣西總督金光祖疏報。二月二十四日。官兵恢復藤縣。得吉嘉獎。下部議叙。○予故一等阿達哈哈番乳公邁坎祭一次。謚勤僖。○庚子。

上詣

太皇太后宮問安○辛丑。陞左副都御史岳諾惠為禮部右侍郎○理藩院郎中馬喇疏報。喀喇沁多羅杜楞郡王札什云近奈曼王札木山。遷於察漢郭爾河布爾尼移營就之。二人已合。二旗外。別無叛者。

上因賜札什御用盃甲以旌之○壬寅。陞侍讀學士禪塔海為內閣學士兼禮部侍郎○癸卯。

上御太和殿視朝。文武陞轉各官謝恩。次喀爾喀進貢使臣等行禮○甲辰。

上詣

太皇太后宮問安○以隨征副將黨塞管陝西興安總兵官事○予故一等精奇尼哈番散秩大臣馬德理。祭葬如例○奈曼札木山。已附布爾尼。使人招台吉鄂齊爾等。鄂齊爾等遂率九佐領兵與其妻子。奔教漢。尋復至喀喇沁。札什遣護衛黨西喇來奏。

上諭理藩院曰。奈曼台吉鄂齊爾等。不與札木

山同謀。率屬來歸。忠貞可嘉。俟事平日。札木山王爵。可與諸台吉內承襲。諸台吉或暫居教漢與喀喇沁地方。聽自便。其奏事黨西喇。從優授為三等達爾漢。世襲勿替。未幾。奈曼二等台吉吳勒木濟。同其母。率所屬二佐領。岳避暑土默特。亦遣人來奏。

上亦優旨答之○乙巳。

孝端文皇后忌辰。遣官祭

昭陵○以內閣學士杜臻。充經筵講官。翰林院掌院學士徐元文。充日講起居注官○陞翰林院侍讀學士富鴻業。為內閣學士兼禮部侍郎○以故一等阿思哈尼哈番又一拖沙喇哈番米斯翰子李榮寶襲職○丙午。江西總督董衛國疏報。袁州土賊。侵犯分宜。萬載二縣。遊擊楊正元等擊敗之。又袁臨總兵官趙應奎。遣遊擊潘希聖等。敗賊於油木棟地方。下部議叙○丁未。賜奈曼台吉格勒爾。噶爾麻。副都統吳倫木蘇。佐領濟爾哈朗等。袍

帽鞞帶○

上諭兵部。據理藩院郎中馬喇齋來報文。鄂爾多斯多羅郡王古魯多羅貝勒索諾慕。固山貝子達爾札。鎮國公杜稜。以提督陳福等移會徵兵。俱量行遣發。駐邊外候調。又達爾札親統所部。即欲進邊等語。前以隆冬雪盛。暫止進兵。今既發兵前來。即令赴內地。會同提督總督等。兩路進剿。郎中額業圖。員外郎拉萬祜。即叅贊軍務。至鄂爾多斯兵進邊之後。糧餉毋得缺乏。額業圖等。照戶部所定糧餉額數。從所屬有司支取散給。○己酉。

上詣

太皇太后宮問安○旌表山東郟城縣節婦楊氏。掖縣烈婦李氏。給銀建坊如例○庚戌。以大學士巴泰。熊賜履充纂修

太宗文皇帝實錄總裁官○陞通政使郭丕為都察院左副都御史○定遠平寇大將軍和碩安親王岳樂疏報。四月初二日。統兵剿賊

於東鄉縣。用雲梯四面攻圍。仍移檄曉諭偽副將林振。及偽官五十六員。領十一營一萬一千餘衆。繳偽印偽劄投誠。恢復東鄉縣。得旨嘉獎。下部議叙○岳樂又疏報。將軍額楚等於四月初四日率兵至饒州府萬年縣之石頭街。擊敗耿逆下偽都督四萬餘衆。五十營斬賊五千餘級。生擒三百有餘。下部議叙○辛亥。

上詣

太皇太后宮問安○諭起居注官學士傳達禮侍讀學士喇沙里曰。朕向詣

兩宮問安。爾等起居注官常隨行記注。朕思昏定展省。問安視膳。趨侍庭闈。以盡孝道。為子孫者之恒禮。嗣後朕詣

兩宮問安時。侍值官不必隨行。又諭曰。日講原期有益身心。增長學問。今止講官進講。朕不覆講。但循舊例。日久將成故事。不惟於學問之道無益。亦非所以為法於後世也。嗣後進

講時。講官講畢。朕仍覆講。如此互相討論。庶幾有裨實學。○壬子。

上詣

太皇太后宮問安。○予故致仕護軍統領太子少傅孫達禮巴圖魯祭葬。謚果壯。○癸丑。甘肅巡撫花善疏報。三月二十三日。西寧總兵官王進寶。帥師克臨洮府。甘肅總兵官孫思克。收復靖遠衛。得旨嘉獎。下部議叙。○陝西提督張勇疏報。西寧總兵官王進寶。恢復金縣。安定縣。得旨嘉獎。下部議叙。○甲寅。

上詣

太皇太后宮問安。○定西大將軍多羅貝勒董額等疏奏。逆賊萬餘自四川來援秦州。屯於南山。臣等剿禦內外賊寇。兵力單薄。已令副都統顏布。率兵六百守隴州。副都統德業。立率兵六百守仙逸關。將軍佛尼勒。率每佐領下兵一名。速來軍前。請再將西安官兵酌量調發。

上諭兵部。貝勒董額等。圍困秦州。所關最重。倘

秦州可慮。西安亦且難保。今佛尼勒雖已調至。而兵力尚單。除荊州調往每佐領下兵一名外。或西安兵。或附近汛兵。令總督哈占。鄂善等。速撥五百名赴秦州。并令總督周有德。亦率所部兵。星馳前來。同貝勒等會剿賊寇。俟擊敗川賊後。貝勒等即酌分官兵赴援漢中。尋又諭。漢中地屬緊要。不必俟下秦州。即應發兵赴援。今令將軍鄂秦。率駐防太原盛京兵。前往西安。至日。總督哈占等。以西安兵內馬肥者。并酌分隴州寶雞兵。俱付副都統德業。立率往漢中。其鄂秦建威將軍印。留與署副都統吳丹代署。如吳丹與平逆將軍畢力克圖軍令。則用畢力克圖印。吳丹為叅贊。更自京師發每佐領下驍騎一名。令署副都統一合率赴太原。○江西總督董衛國疏報。叅將劉體君等。敗賊於寧都縣。又叅將色勒等。敗賊於羊石坳地方。斬獲甚衆。下部議敘。

○乙卯。以翰林院編修王鴻緒充日講起居注官。○甘肅巡撫花善等疏報。邊外蒙古前犯洪崖堡。今又乘我兵進剿河東。乃拆毀關隘。襲執官吏。與官兵會戰。永固城副將陳達戰沒。

上命甘肅總兵官孫思克。加意防邊。如蒙古仍行肆虐。即率兵剿禦。仍遣使往諭達賴台吉。約束部落。毋為邊患。會達賴喇嘛使至。並予敕。使轉諭達賴台吉。敕曰。

皇帝敕諭達賴喇嘛。吳三桂初叛。朕諭喇嘛大兵分路進討。若吳三桂勢蹙投降。喇嘛其即執送。續覽喇嘛奏云。吳三桂背主負國。人皆惡之。不來則已。來則縛之以獻。吳三桂曾取結打木。揚打木二城。今已發兵攻取。防守沿邊。若欲徵兵深入。惟候詔旨。又言。達賴台吉故居土伯特。今遣居青海。令其有事則相援。無事則鈐轄其部屬。朕思自

太宗文皇帝

世祖章皇帝至今。遣使往來。恩禮無間。喇嘛崇尚信義。必如所奏而行。故遂以達賴台吉等進兵滇蜀之故。曉諭兩省。及達賴台吉辭以松潘路險。未進四川。喇嘛又奏言。蒙古兵力雖強。難以進邊。縱得城池。恐其貪據。且西南地熱。風土不宜。若吳三桂力窮。乞免其死罪。萬一鴟張。莫若裂土罷兵。吳三桂乃明時徵弁。父死流賊。搖尾乞降。

世祖章皇帝優擢封王。其子尚公主。朕又寵加親王。所受恩典。不但越絕。朝臣蓋自古所罕有。吳三桂負此殊恩。構釁殘民。天人共憤。朕乃天下人民之主。豈容裂土罷兵。但果悔罪來歸。亦當待以不死。今將軍張勇等奏達賴台吉諸部落。入邊侵掠。彼以王輔臣倡亂。內地亦皆騷動。故也。今西陲晏然。內地無事。已下敕禁諭。達賴喇嘛宜恪守前言。令其統轄部屬。毋得生事擾民。○丁巳。

上詣

太皇太后宮問安○撫遠大將軍多羅信郡王鄂扎疏報。臣等帥師往征察哈爾。於是月二十一日。次岐爾哈泰。偵知賊屯達祿。臣等以輕騎前進。二十二日抵達祿。布爾尼設伏山谷間。悉衆列陣以待。臣與副將軍圖海等。分布滿洲蒙古官兵進擊。歷山澗。賊伏發。擾亂土默特兵。我軍擊之盡殲焉。布爾尼親領大隊。擺列火器相拒。我兵奮擊。賊不能支。遂大敗。察哈爾下都統晉津率其族於陣前降。布爾尼復收潰卒。接戰兩次。我軍乘勝衝殺。連敗之。斬級甚多。獲馬匹器械無算。布爾尼兄弟僅以三十騎遁。垂札布等亦皆散走。二十三日。臣等聞郡主留居瓦子府東三十里。遣官兵迎歸。布爾尼部下佐領五人。兵三百餘名。隨侍衛塞校來歸。得旨嘉獎。下部議叙。○叅領舒什蘭疏報。奉調宣府左翼四旗察哈爾鎮大同衆譁。毀邊牆私遁。上命散秩大臣綽爾濟。杜爾麻等率八旗章京

侍衛齋救撫之。曰。昔察哈爾潰散時。爾等祖父來歸。

太宗文皇帝論次。賜與世職。分隸八旗。眷顧撫養。以迄於茲。吳三桂造亂。調爾駐守地方。今叅領舒什蘭。奏爾等不請所司。遽行遁歸。理應治罪。但先將爾八旗察哈爾。調發同官兵進征。今又盡徵餘兵。爾等或慮妻子牲畜。無人養育。馬又羸瘦。難以從征。以此亡歸。其情可恕。今特行寬宥。其各返故伍如常。毋生疑畏。昔額哲。阿布奈被俘。不沒入旗下為奴。封額哲為親王。所部人員亦加撫養。亡國苗裔無功而施大恩。若此。古所希有。阿布奈曾有大罪。又全其命。以其子布爾尼襲封親王。布爾尼不思報効。背恩叛逆。故命大將軍信郡王率兵進討。於是月二十二日。大破之於達祿。盡殲其衆。科爾沁等諸部。王貝勒。貝子。公。台吉等。俱以布爾尼罪大惡極。起兵會剿。恐爾等不知此情。妄惑流言。陷於罪罟。故特賜

曉諭○戊午。散秩大臣綽爾濟等疏言臣等至張家口。詢關吏據云。是月二十七日。察哈爾兵至鄂西奚地方。將御馬厰并諸大臣牧馬人役。附近旗下蒙古婦女牲口。盡行掠去。及臣等至齊勝地方。遣一等侍衛阿南達等前進。遇察哈爾被脅四人。遂擒以歸。其言亦如之。臣等欲竟將敕諭送往。恐此輩無知不體。

聖意故將詔旨大畧錄寫。即令擒來二人齎送。精奇尼哈番阿玉席等。復遣二人傳諭被掠人衆。

上諭兵部察哈爾兵狂悖如此。應發兵防禦。其授內大臣舅舅佟國綱為安北將軍。率兵往鎮宣府。令護軍統領傑殷。副都統恰塔偕往。以散秩大臣綽爾濟杜爾麻為署都統。并預叅贊○陞太常寺卿達哈他為通政使司通政使○總理浙江大兵糧餉戶部右侍郎達都疏報黃巖總兵官鮑虎擊敗逆賊馬九王

下偽總兵吳林等於汪家橋地方。下部議叙○達都又疏報。紹興府知府許弘勲等。招撫偽總兵弓廷弼。偽侯吳興賢等。及兵丁五萬七千八百餘名。下部議叙○土默特多羅達爾漢貝勒趙圖故。遣官致祭

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十四年乙卯五月己未朔○庚申

上至鞏華城駐蹕○辛酉

仁孝皇后忌辰行期年致祭禮○

上回宮詣

太皇太后宮問安○撫遠大將軍多羅信郡王

鄂扎等疏報

上命科爾沁和碩額駙沙津率所屬五旗兵會

剿布爾尼達祿之戰沙津失期未預因至扎

魯特境壁於賁勒蘇特會布爾尼兄弟逃奔

山後知沙津兵至使科爾沁隨嫁二人送羅

不藏妻併告以戰敗欲逃之故蓋羅不藏妻

沙津妹也沙津於是留其妹率兵至山後圍

之布爾尼預遁羅不藏云布爾尼去矣余來

乞命沙津曰爾欲乞命當招爾兄來遂遣三

十騎同往羅不藏亦遁走更遣其副都統布

達里潛聞於其兄沙津兵內有孟克者追及

之為布達里刺死沙津怒身率兵追射羅不

藏與布達里皆死益窮追布爾尼明日及之

布爾尼十二騎併力拒戰沙津盡射殺之得

旨沙津感累朝厚恩親統所屬馳追布爾尼

兄弟斬之克繼祖父忠貞深為可嘉大兵凱

旋日著議叙具奏○諭撫遠大將軍多羅信

郡王鄂扎等聞向日所調左翼察哈爾駐扎

宣府者今毀邊牆私遁恣為寇抄直趨獨石

口此輩或止知察哈爾變亂不知我兵戰勝

察哈爾及額駙沙津射殺布爾尼兄弟之事

欲往助彼未可知也其巴林翁牛特教漢喀

喇沁土默特諸路兵皆調征布爾尼其妻子

在家。倘叛卒經過剽掠。深為可虞。今察哈爾事平。大將軍等。可諭令諸王貝勒台吉等。率兵速回。各守境內。叛卒一到。即為剿除。我兵定於五月初六日。速往追剿。爾等其傳諭諸部知之。○壬戌。

上詣

太皇太后宮。問安。○諭兵部。本月初四日。太監劉忠傳奉

太皇太后諭旨。慈寧宮內庶妃。有母九十餘歲。同其兄薩麻地。尚在察哈爾處。聞之深為憫惻。軍前可弗加擄掠。朕欽承

諭旨。仰見

太皇太后仁慈已極。敢不敬副

聖懷。爾部即速行文彼處。如伊等陣亡則已。或存一二。或全未傷殘。即行收管。其家產亦勿致散失。交與內務府所管莊頭。解送來京。○定遠平寇大將軍和碩安親王岳樂等疏報。臣等進取建昌。四月二十五日。抵長興。賊將

邵連登等。率賊八萬餘。水陸迎敵。臣與將軍希爾根等。分布官兵擊敗之。斬獲甚眾。遂復建昌城。得旨嘉獎。下部議叙。○揚威將軍內大臣阿密達等疏報。副都統鄂克濟哈等。率官兵於寧州近城東山。擊敗賊眾。陣斬偽副將張三。偽叅將王廷譽。擒殺八百餘人。恢復寧州。得旨嘉獎。下部議叙。○予故致仕太子少保山西提督三等阿達哈哈番柯永盛祭葬如例。○癸亥。議政王大臣奏。布爾尼反。既伏誅。其父阿布柰。見禁盛京。應立斬。妻郡主歸伊父安親王。其子於軍前正法。女入官。得旨。阿布柰改為立絞。餘依議。○甲子。

上詣

太皇太后宮。問安。○諭議政王大臣等。昔察哈爾遭亂覆亡。

太宗文皇帝收集秦養。編為整旗。歷有年所。今布爾尼背恩作亂。實僧額渾津噶爾馬色冷輩。匪類教之。其餘官民毫無干涉。此皆

太宗文皇帝撫育之人。朕甚憫焉。凡投歸軍前。或投入鄰旗及潰散者。其令大將軍鄂扎。副將軍圖海等速行收集。作何瞻養。另疏請旨。○議政王大臣等議。從嫁公主諸人。經布爾尼之亂。產業蕩盡。請量留數戶。守公主祠。其餘悉令還京。內原隸八旗者。仍歸本旗佐領。原隸內務府者。仍歸內務府。得旨。義州為邊陲要地。從嫁諸人。停止還京。俱著披甲。著長史辛桂管轄鎮守。○浙江總督李之芳疏報。逆賊屯踞衢郡。隔河各路窺犯。遊擊高祿等。敗賊於大埂余村。守備李和龍等直抵上路源賊巢。生擒偽總兵繆國英等。外委都司張文福等。敗賊於峽口等處。金協副將牟大寅等。敗賊於湯溪。及周察地方。湯溪守備劉君明等。敗賊於黃塘。下部議叙。○雲南貴州總督鄂善疏報。遊擊李師膺擅殺韓城縣令。聚衆為亂。侵犯邵陽。署夸蘭大鄂爾博什等率兵擊敗之。下部議叙。○陝西總督哈占疏報。

慶陽逆寇攻入三水縣。知縣林達泰并印信俱被刦。防守把總趙英。同四川督標隨征都司張虎臣率領民兵擊敗賊寇。救回縣令印信。保全倉庫人民。下部議叙。○乙丑。撫遠大將軍多羅信郡王鄂扎等疏言。教布爾尼造亂者。阿雅里喇嘛。僧額渾津。噶爾馬色冷。布達里。破翁。巴達里。巴呢。陳特塔爾。噶爾昭。噶爾馬。薄托和也。布達里。破翁。巴達里。巴呢。塔爾。此五人與布爾尼兄弟同死。陳特為亂兵所殺。噶爾昭。噶爾馬。薄托和等。或死或逃。尚無的耗。其子女皆在卓禮克圖親王處。阿雅里喇嘛。僧額渾津。噶爾馬色冷。亦為卓禮克圖親王解送軍前。候旨處分。得旨。阿雅里喇嘛等。悉於軍前正法。其叛人妻孥賞給有功官兵。未幾。信郡王鄂扎等疏言。阿雅里喇嘛諸叛逆之子。及近族兄弟。俱在科爾沁。其僧額渾津之弟尼塔爾。當布爾尼未敗。即投科爾沁。卓禮克圖親王處。俟卓禮克圖親王解。

到日俱行正法。家產妻孥入官。得旨尼塔爾既於未破布爾尼之先。投入科爾沁。著免死。勿分其產。○丙寅。命翰林院掌院學士徐元文教習庶吉士。○予廣東陣亡副將贈都督僉事黃相祭葬如例。○予故西安將軍一等阿達哈哈番瓦爾喀祭葬。謚襄敏。○丁卯。予故杭州將軍圖喇祭葬如例。○已巳。

上詣

太皇太后宮問安。○陞陝西西安布政使吳努春為太常寺卿。○議政王大臣等疏言察哈爾布爾尼兄弟背叛。授首。理應懸示。額駙沙津。為國効力。應行優叙。及邊外率兵協助之諸王貝勒貝子公台吉等。俟大將軍信郡王旋師之日。一併議叙。獻布爾尼首級之昂阿爾佳爾。應授為三等達爾漢。世襲罔替。賞給蟒服銀幣鞍馬。及同來土謝圖親王之頭等護衛綽石希等。亦分別賞給。得旨布爾尼首級。本當懸示。但念係公主所生之子。朕心不

忍。布爾尼並羅不藏。俱令收葬於公主墳傍。餘如議。○奈曼達爾漢郡王扎木山附布爾尼作叛。勢窮自縛請罪。議政王大臣等議。扎木山法無可赦。妻孥應沒入官。得旨扎木山末身請罪。著從寬免死。革去王爵。仍留家口牲畜令其自給。○庚午。一等侍衛奇塔特等疏報。招撫察哈爾左翼四旗。輸誠歸順。下部議叙。○辛未。遣官祭

關聖帝君。○壬申。

上詣

太皇太后宮問安。○癸酉。

上御太和殿視朝。文武陞轉各官謝恩。○甲戌。命山西河東守道移駐平陽。雁平巡道改為守道。兼管大同府屬糧餉事務。○都統海爾圖疏言。臣抵西安。聞自荊州來之兵及貝勒催辦弓矢之護衛。俱為賊阻。暫駐隴州仙逸關等處。若不滅此賊。恐紅衣礮不能前進。乞添發滿兵二千。剿滅闖賊。疏通道路。

上諭秦州需礮甚急。若俟發禁兵恐稽時日。今都統海爾圖總督周有德奏領達爾泰等兵合計已足二千。其即合軍以平關賊。速運紅衣礮前往秦州。嗣海爾圖等至仙逸關與賊相持。

上復諭兵部。欲平陝西諸寇。必先取秦州。欲取秦州。必須大礮。今海爾圖等率兵護送紅衣礮與賊相持於仙逸關。恐諸將各自將兵互相推諉。致誤軍機。其令周有德海爾圖為統領。前赴貝勒軍。先是議政王大臣等奏。據貝子傅喇塔報稱。俟提督常進功。舟師自寧波到日。令其護守浮橋。即自率兵渡江。取黃巖。時下風信未順。舟師不能遽至。恐須時日。以致師老。且大兵俱集貝子所。故康親王兵單。未得進閩。今安親王恢復建昌廣信諸郡。若乘機進取建寧。則仙霞賊勢必分。貝子應量留兵防守。餘兵悉令康親王統轄。規取仙霞。若賊并力拒守。則安親王乘虛而入建寧。

必破。如此兩路夾攻。得一路克捷。便可剪滅閩賊。

上命康親王安親王詳議以聞。至是康親王傑書疏言。寧波舟師不能至台州。已回定關。近攻小梁山。又不能克。台州兵止三千餘。不宜輕調。處州見有賊警。金華兵力單弱。似難驟進閩疆。若安親王進取建寧。果能分仙霞賊勢。臣豈敢坐失機會。按兵不前。安親王岳樂疏言。長興賊已剿滅。建昌賊亦解散。見調將軍額楚副都統席布兵。撲滅廣信之賊。如今臣下廣信。由分水關取建寧。則當分兵留守建昌。親統官兵前進。如今臣由杉關取福建。即當分兵留守廣信。由杉關前進。

上諭。時方炎暑。安親王酌留官兵固守建昌等處。率大軍暫回南昌養馬。俟秋涼或取湖南。或攻福建。候旨以行。額楚席布等應速平廣信賊。臨分水關。陽為前進。斷仙霞後路。斯時康親王即令將軍賴塔等兵攻取仙霞。或康

親王兵與額楚等兵兩路並進夾攻江山縣賊寇。二王宜遙為聲勢。以赴機會。○陝西總督哈占疏報慶陽賊衆。突圍長武縣城。欲剗運送涇州糧米。遊擊許靖國等督率兵民保全城池。適固原總兵官朱衣客副都統覺羅夸代統兵救援。滿漢大兵前後截殺。逆賊大敗。生擒偽副將南文炳。下部議叙。○乙亥。諭刑部。適者天氣炎亢。農事堪憂。雖虔誠祈禱。尚稽雨澤。朕念切民瘼。夙夜焦勞。或因刑獄淹禁中有冤枉。致干天和。亦未可知。特遣索額圖等會同三法司將已結重案。詳加審鞫。如有罪可矜疑者。即與察明事由。開列奏聞。務期情法允協。有枉必伸。以副朕欽恤刑獄至意。○予浙江陣亡副將贈都督僉事陳升祭葬如例。○丙子。

上詣

太皇太后宮問安。○丁丑。議政王大臣等奏。歸附及擄來之察哈爾人等。應解京隸八旗滿

洲蒙古佐領下披甲。其老弱人丁。賞給被傷官兵。從之。○浙江提督塞白理疏報。逆賊侵犯天台。副將秦弘猷等大敗之於紫雲山。又叅將馬化龍等敗賊於慈谿等處。擒斬賊渠楊四和尚等。焚燬賊巢。下部議叙。○戊寅。寧南靖寇大將軍多羅順承郡王勒爾錦疏報。據都統范達禮報稱。逆賊五六千。絡繹來犯南漳。楊來嘉洪福三逆。兩路齊出。臣隨畀都統宜理布討逆。將軍印。并遣副都統根特統兵前往。旋報穀城失守。又畀貝勒察尼靖寇將軍印率兵赴援。

上諭。既以貝勒察尼為將軍。率兵赴援。即令統轄襄陽諸處官兵。速滅南漳穀城賊寇。平定地方。又襄陽要地。宜設重兵。其令汝州副都統塞格率所部兵星赴襄陽。安慶署副都統諾敏副都統孫承祖各率所部兵赴汝州駐守。○己卯。

上御弘德殿。講官刺沙里孫在豐張著進講。孟

子道性善節。

上曰。人性之善。無分賢愚。只在勉強行之。董仲舒有言。事在強勉而已矣。強勉學問。則聞見博而知益明。強勉行道。則德日起而大有功。此誠為學之要也。○庚辰。諭兵部。今左翼四旗察哈爾。既已歸順。應調山西兵援陝西。以將軍舅舅佟國綱所領前鋒兵。及每佐領護軍一名。駐大同盛京全軍綠旗馬兵三百名。右翼察哈爾兵三百名。副將軍畢力克圖。率赴榆林。同總兵官許占魁。協力平定延安諸處。以護軍統領傑殷。并協領覺和託。為署副都統。同叅贊軍務。令副都統恰塔率每佐領兵一名。赴大同。兼統見駐大同鎮守之兵。其餘每佐領兵一名。調赴太原。併太原汛守。及保定調往兵。令署副都統吳丹。總統。用建威將軍印。在太原鎮守。舅舅佟國綱。散秩大臣綽爾濟杜爾麻等。俱著回京。尋延安綏德等處陷賊。榆林危急。許占魁請援。又遣其子許

登隆至京師言狀。

上復命畢力克圖分兵付覺和託。速赴榆林。畢力克圖速率兵繼進。○副將軍圖海疏言。臣按察哈爾十二佐領人丁家口。其來投軍前者。丁凡一千一百六十六。口凡六千八百八十七。奉調出征人妻子家口。凡二千八百三十八。俱隨大兵相繼入京。其投入外藩蒙古各旗者。丁凡五百十四。口凡三千六百三十八。布爾尼所屬喇嘛。班第丁凡一百十六。家人男女凡三百八十三。先經奉旨察取。但外藩各旗。自去歲荒歉。以迄今夏。人馬皆饑。往來迎送。實為艱難。請俟蒙古馬肥。再為移取。人數無多。取之自易。得旨。著暫停察取。仍令各旗王貝勒等。加意贍養。○辛巳。陞戶部郎中孟古爾代。為陝西布政使司布政使。○壬午。

上詣

太皇太后宮問安。○癸未。四川總督周有德疏

言。恭領達爾泰兵見阻關山。請將遣往棧道滿漢官兵全調前來。協力滅賊。以便運礮至秦州。

上諭。大將軍貝勒等兵在秦州路梗日久。應先滅開山盤踞之賊。以開道路。其令遣往棧道副都統德業。率所部兵速往關山。會同顏布達爾泰。海爾圖兵并力滅賊。開道運礮軍前。○定遠平寇大將軍和碩安親王岳樂等疏報。將軍額楚等。四月初九日。恢復萬年縣。十三日。副都統巴爾堪等。恢復安仁縣。又署副都統公倭赫。總兵官趙應奎等。屢敗賊衆於鷲石嶺。白水山口等處。破賊巢穴。擒斬無算。得旨嘉獎。下部議叙。○奉命大將軍和碩康親王傑書疏報。招撫偽參謀葉存忠。偽總兵韓六合等。一百六十餘員。兵一萬九千餘名。下部議叙。○甲申。靖逆將軍甘肅提督侯張勇等疏報。逆賊偽總兵潘瑤。偽副將曾文耀。竊據洮河二州。番人乘隙肆掠。臣等兵至

河州。曾文耀先遁。又遣土官楊朝樑攻洮州。潘瑤敗走。恢復洮州河州二城。番人誓服歸巢。得旨嘉獎。下部議叙。○丙戌。夏至。祭

地於方澤。

上親詣行禮。○以翰林院編修趙文熹為廣東鄉試正考官。吏部員外郎衛運揚為副考官。○丁亥。陝西總督哈占疏報。固原鎮標遊擊趙元輔等。率兵赴寧州。屢敗逆賊於東河灘。焦家坑等處。參將楊宗道率兵敗賊於甘泉。又鳳縣逆孽勾引川賊。侵犯寶雞縣之盤棋宮。天王村。滿漢官兵疾趨撲剿。逆賊大敗。斬偽都司李玉國等。擒偽總兵劉偶三。下部議叙。

閏五月。戊子朔。

上詣

太皇太后宮問安。○諭兵部。秦省巖疆重地。軍務方殷。靖逆將軍侯張勇忠勤懋著。謀畧優

長。久鎮西陲。奠安疆宇。近復躬履行間。殫心籌畫。屢敗賊衆。恢復城池。志期殲滅賊渠。底定秦隴。朕甚嘉之。凡用兵籌餉。一切機宜。必須專其責任。而後可以整飭軍紀。齊一衆心。以收蕩平之績。所屬地方總兵官。有故違節制。不聽調遣者。許即指叅。副將以下。有臨陣退縮。殺良冒功者。聽以軍法從事。其文官自道員以下。倘有遲悞緊急軍需者。會同巡撫據實題叅。務令克專壯猷。早奏膚功。以副朕委任重意。○以原任廣東水師總兵官張國勳為潮州水師總兵官。○庚寅。陝西提督陳福疏報。逆賊朱龍大肆猖獗。臣於三月二十日。自寧夏統兵駐劄靈武。遣官兵恢復惠安。韋州安定三堡。至興武營會合蒙古索諾慕貝勒下各台吉兵馬圍困花馬池。遣兵前赴定邊擒斬偽叅將等。殺敗賊衆。下部議叙。○辛卯。甘肅巡撫花善等疏報。我兵圍攻蘭州。賊領馬步兵千餘出東門。西寧總兵王進寶

按察使伊圖等奮勇鏖戰。自辰至午。進東門甕城。陣斬偽叅將。大敗賊兵。下部議叙。○壬辰。

上御太和殿視朝。文武陞轉各官謝恩。次厄魯特進貢使臣等行禮。○

上詣

太皇太后宮問安。○寧南靖寇大將軍多羅順承郡王勒爾錦等疏言。逆賊兩路出犯南漳均州。與我兵對壘。邇來虎渡口諸處賊船日增。聞逆賊吳三桂身在松滋。聲言渡江與我兵戰。且欲決隄水灌荊州。使我岳州大兵不得援荊。今吳三桂既犯荊州。餘賊或犯他處。亦未可料。賊勢甚熾。我兵力單。請添發滿漢官兵速行赴援。

上責之曰。初聞吳三桂叛。即發大兵遣前鋒統領碩岱都統巴爾布護軍統領伊爾度齊率前鋒護軍。自給芻秣。令其疾馳。巴爾布等至荊州時。賊尚未至常德澧州也。所率前鋒護

軍每佐領下五名。兵力不為弱矣。乃不急渡江。耽延遲悞。而常德澧州遂叛。王親率大兵至荊州。又不即渡江進取。致令吳三桂一至。而常德等處遂為所據。都統朱滿率兵至武昌時。岳州長沙猶未叛也。又不急趨鎮守。迨遙武昌。六百里之程。行逮一月。而岳州長沙又陷。巴爾布等畏懦不前。坐失險要。使逆賊從容得據守湖南。致我兵難以攻取。且糜費糧餉。倍於他處。究之寸步不能前進。因賊渠與我精兵相持荊岳間。而廣西孫延齡。福建耿精忠。遂相繼變叛。賊寇蜂起。又前諭王。荊河口以內。何處宜設兵防守。王疏稱賊船上下江中。俱取道荊岳。易以偵知。俟有事之時。就近調遣。可以立至。今復稱吳三桂來犯荊州。餘賊或從他路出。賊衆我寡。特請增兵。何前後舛錯。一切軍機。忽畧至此。今禁旅遣發已多。縱發亦難驟至。時方盛夏。賊或冒死渡江。亦未可知。應調附近官兵星馳赴援。今

安親王復建昌。大兵已回南昌。江南徽州。又有滿洲蒙古兵鎮守。其令駐池州署副都統蘇朗。率蒙古兵一千。至武昌。換兵五百。速赴荊州。安親王或由寧州入湖南。或由袁州進長沙。其便宜以行。既而揚威大將軍和碩簡親王喇布奏。江西賊寇窺伺池州諸處。

上乃命蘇朗。止以蒙古兵六百行。至日。合武昌滿洲蒙古兵。仍足一千。速赴荊州。○吏部題。靖逆將軍甘肅提督侯張勇。出首逆賊吳三桂偽劄。今又恢復河州洮州。為國効力。克盡忠誠。應將伊子一品官廕生張雲翼。從優以大四品京堂用。從之。○予故休致蒙古副都統一等阿達哈哈番褚庫巴圖魯祭葬。謚襄壯。○癸巳。

上幸玉泉山觀木。○甲午。

上詣

太皇太后宮問安。○諭戶部。兵部。將軍張勇。總兵官王進寶。孫思克。提督陳福。標下官兵。及

進寧夏蒙古兵。効力邊疆。勞績可嘉。應發銀遣官由邊外運至軍前賞賚。示朕優恤之意。其兵餉。俟路通速給。○予故鎮國公杜蘭。祭一次。○寧南靖寇大將軍多羅順承郡王勒爾錦疏報。逆賊侵犯均州。將軍宜理布等。率領官兵。兩次擊敗之。陣斬偽副將叅將等。及賊兵千餘。下部議叙。○理藩院題。達爾札貝子。遣兵把西台吉。率兵於巴牙木虎邊。殺敗逆賊。又統領二十六員台吉。會同榆林官兵。恢復隴州。進靖二堡。下部議叙。○乙未。寧南靖寇大將軍多羅順承郡王勒爾錦疏報。松滋縣北山。兵三桂復添四營。沿江一帶。賊船日增。恐水陸齊犯。荊州彝陵。亦未可定。上諭。荊州彝陵等處。關係緊要。著將軍貝勒察尼。酌量留兵。令都統宜理布。范達禮。防守襄陽。均州。南漳等處。察尼親統餘軍。速赴荊州。再令駐防河南汝州署副都統諾敏等。率所部滿洲漢軍。星赴襄陽。○刑部左侍郎覺羅

阿範。以病乞休。允之。○丙申。予故禮部侍郎岳諾惠。祭葬如例。○以軍興。命停陝西乙卯科鄉試。○予陝西陣亡西寧鎮標右營守備贈署都司僉書王相。祭葬如例。○浙江總督李之芳疏言。賊犯武義。防守把總張奇章。從逆內應。署縣事蘭谿縣縣丞徐詰。眾寡不敵。被擄。賊逼之降。徐詰絕食自縊。捐生殉難。應請優卹。得旨。著從優議卹。尋部議。贈徐詰浙江按察使司僉事。廕一子入監讀書。從之。○

江南總督阿席熙疏報。土賊勾引浮梁逆寇。侵犯婺源。遊擊張元品等。率領官兵。三路攻剿。擊敗賊衆。下部議叙。○丁酉。浙江總督李之芳疏報。逆賊屯札前嶺。各路賊巢。互相應援。臣與平南將軍都統賴塔達。正白旗叅領巴雅思呼朗。叅將趙得壽等。於五月二十四日。前至南塘萬青前嶺等處。分路銜殺。擒斬偽都司千總等。下部議叙。○戊戌。上詣

太皇太后宮問安○陞左副都御史額星格。為禮部右侍郎○己亥。江西總督董衛國疏報。樂平諸處逆賊。乘間來犯。復陷饒州。

上命安親王岳樂。速回南昌。固守疆界。居中調度。分兵收復饒州○庚子。以故阿思哈尼哈。番塞爾古德子僧額特襲職○陞平南藩下。叅領張啟先。為副都統○壬寅。

上詣

太皇太后宮問安○陞甘肅按察使伊圖。為甘肅布政使司布政使○癸卯。撫遠大將軍多羅信郡王鄂扎。副將軍都統大學士圖海等。征滅察哈爾。班師凱旋。

上率在京王。貝勒大臣。侍衛。八旗都統。精奇尼哈番。副都統。阿思哈尼哈。番。及大學士。尚書。侍郎。學士。諸大臣。迎勞於南苑之大紅門。

上御黃幄。鄂扎等行禮畢。諭曰。王。將軍。諸大臣。遠行征討。滅察哈爾國。建立大功。深可嘉悅。俱著進前。行抱見禮。復諭凱旋大臣章京及

冒刃効力軍士以上。俱進前坐。賜茶。復命副將軍圖海。至御幄侍坐。問以戰陣之事。

上曰。軍士此役。奮勇効命。遂滅叛國。立奏凱旋。朕心深悅。八旗冒刃効力軍士以上。朕欲面問。遂令次第引至御幄前。一一徧問畢。

上自南苑回。率在京王。貝勒大臣。及凱旋王大臣等。詣

堂子行禮。回宮○甲辰。奉命大將軍和碩康親王傑書疏報。逆賊三路侵犯處州。都統喇哈達等。遣發官兵於十八都。石塘。石佛嶺等處。三次擊敗賊衆。恢復松陽縣。得旨嘉獎。下部議叙○乙巳。左翼四旗察哈爾兵皆感

皇恩。願立功自効。

上因命察哈爾兵赴河南府駐防。恐其難以鈐束。復令每旗出驍騎五十人。副都統龔圖統領前往○先是。歸併察哈爾之喀爾喀公垂札布。附布爾尼反。台吉託伊等率四佐領兵奔科爾沁。及布爾尼敗。垂札布無所歸。投誠

軍前。議政王大臣等集議。昔垂札布之父根敦。貧不聊生。無以自立於喀爾喀。納款來歸。皇上優禮之。擢為上公。俾瞻養於察哈爾。為附庸。是以得延至今。布爾尼反。垂札布不即以狀聞。反附逆。助戰。逮敗遁。無歸。始率屬乞降。請革垂札布爵。所屬人口。分給八台吉。台吉託尹等。既豫投科爾沁。卓禮克圖王。請留其職銜。人口應歸何旗。伏候教旨。

上命併託尹等佐領於土默特。滾濟斯扎布。餘依議。○丙午。

上詣

太皇太后宮問安。○陝西提督陳福疏報。臣統官兵。會同索諾慕貝勒。下各台吉兵馬。圍困花馬池。逆賊朱龍等。前來救援。城內賊衆。從北門出犯。我兵兩路擊剿。擒斬偽都司王一龍等。下部議叙。○戊申。隨征察哈爾後軍滿洲漢軍都統祖永烈等。及八旗夸蘭大等。還京。遣禮部兵部官員齎茶往迎。効力軍士。各

賜茶。○諭議政王大臣等。布爾尼反亂之時。理藩院郎中馬喇。將邊外蒙古藩下兵丁。調發前進。可嘉。著交吏部從優議叙。○轉刑部右侍郎鄂爾多。為左侍郎。陞左副都御史郭丕。為刑部右侍郎。○以故一等精奇尼哈番馬德理子黑雅圖襲職。○已酉。陞陝西按察使巴錫。為陝西布政使。司布政使。○授長史辛柱。二等阿達哈哈番。其弟阿濟根。拖沙喇哈番。巴勒米特。拖沙喇哈番品級。叙首告察哈爾布爾尼謀叛功也。○庚戌。

上詣

太皇太后

皇太后宮問安。○添設湖廣荊州府江防同知缺。○先是寧南靖寇大將軍多羅順承郡王勒爾錦疏報。五月初五日。逆賊突犯穀城縣城失守。提督李胡拜陷賊。副將馬郎阿。總兵官金世需。劉文奇。楊茂烈。俱退走。

上諭穀城失守。提督李胡拜陷賊。副將馬郎阿。

總兵官金世需等並皆退奔。國家軍令素嚴。未嘗有此。馬郎阿等。何以不顧提督遽自退歸。范達禮駐襄陽去穀城甚近。何以事前不為預備。臨事不相應援。今當大兵四出。軍令豈容寬縱。貝勒察尼速勘密奏。至是察尼訊鞫上聞。

上命斬馬郎阿以徇。革金世需劉文奇楊茂烈職。令擊賊自効。○定遠平寇大將軍和碩安親王岳樂等疏報。副都統朱喇禪等率領官兵。於武寧縣擊敗賊衆。斬首二千餘。墮河淹死者無數。生擒偽守備等。又都統覺羅晝特等。自建昌領兵攻克新城縣。生擒偽遊擊許定國。得旨嘉獎。下部議叙。○辛亥。免江南高郵州水淹田地額賦。○陞廣東驛鹽道王令。為廣東按察使。司按察使。○壬子。定遠平寇大將軍和碩安親王岳樂疏報。將軍額楚等進取廣信。沿途敗賊。恢復萬年等縣。前至弋陽賊將蔣德弘率兵五萬。以木石斷西崗橋。

於城北樹木柵為九壘。偽總兵柯昇。以五千人自廣信來援。別立六營。額楚同土默特都統巴雅爾等。分布滿洲蒙古官兵擊敗之。斬賊二萬餘。隨進兵抵廣信。賊已遁去。遂復其城。得旨嘉獎。下部議叙。○陝西提督陳福疏報。臣率六旗官兵。會同索諾慕貝勒下蒙古兵。自寧夏進圍花馬池。屢敗賊援兵。逆賊來他勢急。遂降。花馬池平。下部議叙。○平南王尚可喜疏報。近因饒平失守。逆賊朱繼率黨來屯湖寮。廖雲率黨來屯白旗。劫擄村寨。平南大將軍尚之孝。同提督嚴自明。遣發官兵。於大埔縣地方擊敗逆賊。陣斬偽叅將。生擒偽遊擊等。又連陽遊擊吳標。連州知州李贊。於連州。大鑊。古樓山。小水坪。石馬坪等處。兩次擊敗逆賊。李化龍。沈九珠等。又廣州府屬之龍門。增城。從化。與惠州府屬之博羅。河源。長寧等縣內。公莊。路溪。鐵崗。馬鞍。陳禾。尚諸處。向為土賊淵藪。悉行剽劫。今突犯龍門。臣

遣發副將盧光明等帶領官兵。於龍門等處地方擒斬賊衆八百餘。招撫千餘。救回被賊擄去良民。下部議叙。○陝西提督陳福疏報。逆賊陳彭。現知臣統官兵。恢復花馬池。定邊。遣偽賊官突犯靈州漢伯等堡。臣檄遊擊熊飛等。發兵於大沙井灘奮勇殺賊。陣斬偽叅將馬騰蛟等一十一名。下部議叙。○平南王尚可喜疏報。虎門副將李印香等。領兵於碣石白沙湖等處擊敗賊衆。燒燬賊船百餘隻。

下部議叙。○靖逆將軍甘肅提督侯張勇等疏報。逆賊死據蘭城。自知勢危。狂突西寧總兵王進寶等。率兵分路堵戰。賊遂大敗入城。俘斬甚衆。遊擊丁顯俊。千總錢中村奮不顧身。致被礮箭傷亡。得旨。在事有功人員。事平議叙。遊擊丁顯俊等。作何恩卹。著議奏。尋部議。丁顯俊贈遊擊。給卹銀。廕子弟一人以守備用。錢中村給卹銀。廕子弟一人以衛千總用。俱照例予祭葬。從之。○先是。廣東廣西總

督金光祖疏言。梧州懷集知縣李雲龍積勞殞命。孀母孤兒可憫。請賜恩卹。部議以知縣病故。例無恩卹。其有軍功者。俟事平議叙。得旨。總督言。知縣李雲龍著有功次。積勞殞命。如俟事平議叙。則孀母孤兒。久待可憫。其更議之。於是部議。李雲龍係旗人。其旅櫬及家口。應護送歸旗。請救督臣。給以水陸夫船。再給正項銀一百兩。以資孤寡。後不為例。從之。○癸丑。奉命大將軍和碩康親王傑書疏報。

叅將裴天祿。原任武義縣知縣李經邦等。於宣平。武義。二縣大王嶺。東隴隘口。上套寨。下五塘等地方。屢次擊敗賊衆。招撫偽官一百三十餘員。賊兵一萬有餘。下部議叙。○甲寅。上詣

太皇太后宮問安。○乙卯。陞通政使達哈他。為都察院左副都御史。○丙辰。廣西巡撫陳洪明疏報。偽總兵李梅友盤踞蒼梧。臣遣遊擊陳汝德。統水陸官兵前往。斬賊一千五百餘。

名。招偽弁三十三員。焚燬賊寨二十餘所。下部議敘。○以軍興。命停湖廣乙卯科鄉試。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十六

監修總裁官光祿大夫太保兼太子太傅保和殿大學士兼戶部尚書二等伯四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十四年乙卯六月戊午朔○己未科爾

沁多羅郡王厄爾德尼故遣官致祭○辛酉

上詣

太皇太后

皇太后宮問安○吏部遵旨議覆兵部郎中黨

務禮刑部郎中薩穆哈自貴州疾馳到京告

吳三桂反狀應從優議叙以光祿寺卿太僕

寺卿陞用從之○壬戌

上御太和殿視朝文武陞轉各官謝恩○癸亥

諭禮部帝王紹基垂統長治久安必建立元

儲懋隆國本。以綿宗社之祥。慰臣民之望。朕荷

天眷。誕生嫡子。已及二齡。茲者欽承

太皇太后

皇太后慈命。建儲大典。宜即舉行。今以嫡子允初。為皇太子。爾部詳察應行典禮。選擇吉期具奏。○陞太僕寺卿莽色。為都察院左副都御史。○雲南貴州總督鄂善疏報。夸蘭大鄂爾博什。邁圖等。率領官兵。敗賊於鳳凰山。獲

實錄卷五十六

二

有偽劄旗礮等項。下部議叙。○甲子。山西提督周卜世。丁母憂。命在任守制。○定遠平寇大將軍和碩安親王岳樂疏報。將軍希爾根。進取饒州。閏五月二十六日。敗賊於餘干。二十九日。遂至饒州。賊先一夕遁去。饒州平。下部議叙。○戊辰。

上詣

太皇太后宮。問安。○以翰林院編修徐秉義。為浙江鄉試正考官。戶科給事中王垓。為副考

官。○楊威大將軍和碩簡親王喇布疏報。流犯宋標。逃回江西。於浮梁樂平等處。嘯聚賊眾。劫掠州縣。安徽提督王永譽。親統兵征剿。叅將傅爾學等。敗賊於捨寺地方。生擒賊首宋標。陣斬賊眾。并獲偽劄器械。下部議叙。○已巳。先是。諭貝子傅喇塔。曰。據爾報賊糧匱。欲降。前以地遠。不能詳悉賊情。故令爾將情形具奏。爾宜將水陸賊壘。地方形勢。賊將姓名。及我兵所駐形勢。可否進戰。一一詳報。將此等畧而不言。但云賊糧匱欲降。殊未明悉。著再詳報以聞。至是。傅喇塔疏言。陸營賊將偽都督曾養性。偽將軍祖弘勳。其下有偽總兵八人。馬兵六千。南自長石嶺。北至三江。延袤數十里。連屯二十五營。領水師者。賊將朱飛熊。偽都督張恭萬。許英。其下有偽總兵四人。水師萬餘。舟三百餘。泊城東十里許。小梁山。下。我兵擊賊。殺朱飛熊於茂頭。至台州。寧波。紹興。杭州等處。俱逼海濱。不設水師。似難

實錄卷五十六

三

取勝。初得仙居。即議進攻黃巖。因賊據茂平嶺黃巖路斷。我兵未能前進。近聞土木嶺可以間行。自台州至黃巖三百里內。不能行馬者四十里。賊恃險故弗守。今已密啓康親王濟師。俟其兵至。再行進取。報聞。○庚午。以翰林院侍講葉方鵠。充日講起居注官。○陞理藩院郎中馬喇。為通政使司通政使。○辛未。定西大將軍多羅貝勒董額疏報。臣於三月初四日。抵秦州。圍其城。四月二十日。賊萬餘。自四川平涼來援。又賊八千餘。自城內突出。我兵分道迎擊。大敗之。嗣屢戰屢捷。總兵官孫思克。又奉調自鞏昌率兵來會。賊驚懼。偽總兵陳萬策。率兵民出降。賊將巴三剛等遁走。閏五月三十日。復秦州。其四川平涼來援賊兵潰遁。臣等即遣振武將軍佛尼勒內大臣坤巴圖魯。總兵官孫思克。追剿於禮縣西和等處。屢戰大敗之。并復禮縣清水。伏羌。西和等縣。得旨嘉獎。下部議叙。○壬申。陞兵部

郎中黨務禮。為太僕寺卿。○浙江巡撫陳秉直疏報。大嵐山界連寧紹二府。賊眾盤踞勢甚披猖。紹協都司王得福。副將劉天印等。率兵剿之。餘賊潰散。斬偽總兵魯朝全等十餘員。并招降偽總督褚楚白等。下部議叙。○癸酉。

上詣

太皇太后宮。問安。○甲戌。平逆將軍都統畢力克圖疏報。臣引兵自大同赴榆林。是月初三

日。至謝村。分兵三隊。令護軍統領傑殷等。率之先行。傑殷等乘夜進發。黎明軍河上。賊三千餘。拒守楊家店渡口。我兵鳴角盡渡。賊披靡遁去。翌日克吳堡縣城。遂趨綏德。初八日。遇賊於虎兩崖口。復擊敗之。於是朱龍遁走定邊。餘賊出降。綏德平。得旨嘉獎。下部議叙。○乙亥。

上詣

太皇太后

皇太后宮問安○寧南靖寇大將軍多羅順承郡王勒爾錦疏報逆賊逼近彝陵兵衆舟多。又於虎渡口諸處轉運糧餉火器宜急斷其運道。但斷水路必須戰艦。今荊州祇存沙唬船四十艘。不足備用。

上命大將軍貝勒尚善發岳州戰船四十艘速赴荊州○丙子。予故鑲黃旗內大臣拜他喇布勒哈番郭邁祭葬如例○靖逆將軍甘肅提督侯張勇等疏報。自逆賊叛變以來。土官楊朝標及子楊威。矢忠報國。率本部土兵併各族土官趙弘元。咎承福等戮力助戰。於階州。鞏昌。臨洮。岷州。屢敗賊寇。功績最著。下部議叙○丁丑。

上詣

太皇太后宮問安○先是平南王尚可喜等疏言。海澄公標下遊擊黃藍來請援兵。臣即與將軍尼雅翰議。發滿漢官兵赴援。尋原任總兵官黃芳泰來言。海寇圍漳州。臣思潮城未

克。閩賊方張。目下在在需兵。更有意外之虞。勢必至於束手。請就近速調兵來援廣東。

上命安親王於每佐領下發滿兵一名。令副都統一。率赴廣東。至是將軍尼雅翰疏言。粵東四面受敵。廣州兵少。平南王又漸衰邁。臣才識短淺。設鄰近有警。恐難支守。乞令見在江西護軍統領桑遏率兵前來。總統兵馬。粵東可保無虞。

上諭。桑遏仍留江西。所發每佐領兵一名。令前鋒統領覺羅舒恕率赴廣東。同將軍尼雅翰商酌以行○戊寅。皇子長生生○己卯。四川總督周有德疏報。本月十八日。關山賊遁。上諭。漢中要地。應速發援兵。今秦州關山既復。著大將軍貝勒董額酌撥每佐領下兵一名。或二名。令大臣一人率往。應援席卜臣等兵。其貝勒等兵。或約將軍阿密達兵夾攻平涼。或先剿川賊。速議以聞。尋董額奏。撥兵一千五百名。付將軍佛尼勒同副都統德業烏拉

布忠等開棧道以援漢中。令副都統翁愛率西安兵同綠旗兵守隴州。仙逸關諸處都統海爾圖等運紅衣礮至平涼。○庚辰。

上幸南苑行圍。○陞吏部郎中舒淑布為甘肅按察使。司按察使刑部郎中庫爾喀為陝西按察使。司按察使。○辛巳。以素曼多羅達爾漢郡王扎木山兄子一等台吉鄂齊爾。二等台吉格勒爾。及鄂齊爾之子厄爾德尼。族弟三等台吉烏爾圖納蘇圖。四等台吉噶爾麻。

副都統吳倫木蘇等見扎木山同布爾尼作叛。並不黨附。先率其九佐領人等來投。可嘉。鄂齊爾襲封多羅達爾漢郡王。格勒爾授為輔國公。烏爾圖納蘇圖為一等台吉。噶爾麻為二等台吉。厄爾德尼為三等台吉。副都統吳倫木蘇給拜他喇布勒哈番。又以扎木山弟二等台吉吳勒木濟見其兄扎木山與布爾尼同謀叛逆。感念國恩。率其二佐領人等來歸。授為貝子。○壬午。靖逆將軍甘肅提督

侯張勇等疏報。臣等圍困鞏昌。逆賊王輔臣遣偽副將任國治等領兵三千由鞏昌東門潛入城內。偽總兵陳科。鄭元經等率賊四千四門分出。直衝我營。臣等即率副將劉宣聖等奮勇剿殺。斷絕歸路。斬賊甚多。生擒四百七十餘人。遊擊張大選追賊逼城。礮傷殞命。下部議叙。○陝西提督陳福疏報。臣會同古魯台吉等率領官兵恢復磚井安邊地方。得旨嘉獎。下部議叙。○癸未。

上自南苑回宮。詣

太皇太后宮問安。○以戶部郎中孫昌期為江南鄉試正考官。禮部郎中勞之辨為副考官。秋七月丁亥朔。享

太廟。

上親詣行禮。○

上詣

太皇太后

皇太后宮問安。○揚威將軍阿密達疏言。逆賊

王輔臣親領精銳。及秦州逃寇。畢集平涼。而慶陽羣盜依山結壘。臣以孤軍前進恐未易奏功。乞敕大將軍貝勒董額等酌量留兵駐守秦州。餘兵盡會平涼。并命提督陳福及鄂爾多斯兵急取定邊固原。以遏賊慶陽之援。臣率在涇兵。出白水。由平涼東面進取庶易為力。得旨兵貴神速。機不可失。平涼逆賊聞大兵克取秦州。正在驚擾。我兵宜乘勝長驅。攻取平涼。將軍阿密達逗留不前。殊屬非宜。前已添兵。近總督周有德又運送紅衣礮。爾等當即進取平涼。如勢有未便。可速移會大將軍貝勒等會商作何夾剿。并著提督陳福速取定邊固原。將軍畢力克圖等急定延安。移師平涼會剿。○戊子。

上詣

太皇太后宮問安。○庚寅。諭吏部兵部。逆賊耿精忠負恩附逆。煽亂閩疆。荼毒生靈。罪惡重大。伊兄弟族人律應不赦。但念其祖耿仲明。

於

太宗文皇帝時航海歸誠。効力行間。著有勞績。伊父耿繼茂在。

世祖章皇帝時亦効力行間。鎮守邊陲。耿精忠雖行同禽獸。辜負國恩。伊弟耿昭忠耿聚忠及族人等道途遠隔。實未同謀。竟爾株連。朕心不忍。其槩從寬釋。所有官職悉令如故。以昭朕矜全之意。○敕諭王輔臣吳三桂為逆。人心驚擾。懷疑瞻顧者多。惟爾知守臣節。出首逆書遣子王繼貞入奏。朕甚嘉之。是用錫爾世職。官爾子卿貳。以勵忠悃。後經畧莫洛率師進蜀。調遣失宜。變生倉卒。爾被逼脅。陷於叛亂。朕聞之未忍加誅。即遣爾子往諭。蓋謂爾封疆舊臣。屢受國恩。自當悔禍來歸。不意爾反生疑畏。竊踞如故。殊負朕至誠惻怛之懷。近大將軍率諸將已破秦州。蜀寇相率敗遁。平逆將軍又取延安。蘭州鞏昌以次底定。大兵雲集。平涼滅在旦夕。但平涼兵民皆

朕赤子。克城之日。必多殺戮。以爾之故。而驅民於鋒鏑。朕甚不忍。今復赦爾自新。若果輸誠而來。豈惟洗滌前非。兼可免圖後效。爾標下官兵。及地方文武吏民。諸當坐者。槩行寬宥。并赦拘留祝表正之罪。朕為百姓主。務期保全。以靖民生。慎勿愾。自干天討。負此殊恩。雖悔曷及。爾其欽哉。○陝西總督哈占疏報。將軍畢力克圖。統兵進剿延安。南川逆賊逃遁。恢復延安府城。得旨嘉獎。下部議叙。○辛卯。

上詣

太皇太后宮問安。○甲午。予故致仕杭州將軍圖爾白紳巴圖魯祭葬。謚敏果。○乙未。以兵部郎中楊西仲為陝西按察使司僉事。提調學政。○丙申。理藩院尚書阿穆瑚奉命調科爾沁等蒙古兵三千名。期以八月先後入京。

上諭授都統噶爾漢為鎮安將軍。率每佐領護

軍一名蒙古兵一千七百名。駐守河南。令副都統龔圖等率見在河南滿洲蒙古兵赴荊州。到日。或遣往彝陵。或分荊州兵遣往。聽大將軍順承郡王等酌行。復令散秩大臣博落特率蒙古兵六百名赴兗州。交副都統額赫納管領。其後至蒙古兵七百名尚書科爾科代率往兗州防駐。○寧南靖寇大將軍多羅順承郡王勒爾錦疏報。偽將軍張以誠。王會等勾連逆賊吳三桂將楊來嘉等侵犯南漳。臣遣都統宜理布會同總督蔡毓榮分率滿漢官兵奮勇鏖戰。陣斬三千餘級。下部議叙。○丁酉。

上詣

太皇太后宮問安。○戊戌。諭吏部庶吉士董閭等教習已久。今加考試。應分別授職。除韓莢。王鴻緒。徐秉義。已授修撰編修外。滿書庶吉士董閭。李樂。顧祖榮。韓竹。韓士修。繆錦宣。龔章。由成玉。丁廷捷。王尹方。王鼎冕。顧沂。徐潮。

漢書庶吉士徐倬。黃士塤。馬鳴鑾。沈印城。顏光猷。俱授翰林院編修檢討。蔣伊。宮夢仁。張志棟。羅東倫。曹寬。陸印蕃。俱著以科道用。徐元夢。謝于道。李基和。俞陳琛。周昌。俱著以部屬用。爾部即遵諭行。○庚子。

上詣

太皇太后宮問安。○辛丑。中元節。遣官祭

永陵。

福陵。

昭陵。

孝陵。

仁孝皇后。○

上御太和殿視朝。文武陞轉各官謝恩。○壬寅。以兵部主事紀愈。為河南鄉試正考官。內閣中書師若琪。為副考官。○癸卯。西寧總兵官王進寶疏報。逆賊踞蘭州以來。官兵環營攻之。屢經敗北。糧運路絕。造木筏百餘。將渡河以遁。臣沿河設兵邀擊。知賊計窮力竭。隨遣

官宣諭招撫。偽總兵趙士昇。及原任布政使成額。於六月二十七日。率偽官百餘員。兵丁五千餘名。以城降。安插本城居民萬餘。恢復蘭州。得旨嘉獎。下部議叙。○甲辰。諭定西大將軍多羅貝勒董額等。國家仰荷

天眷。秦州。鞏昌。蘭州等處。漸次恢復。朕甚嘉悅。此係保寧還旆之兵。間關跋涉。戮力効命所致。須不時存念。恤其勞苦。非緊要。必節其勞。無大過。則寬其罰。且爾等將兵在外。事情經練頗多。必能同寅協恭。折衷而行。斷不徇一己之利。但相隔遼遠。意慮所及。不得不為告誡。秦地實為形勝要區。今張勇等將軍提督總兵。及投誠兵衆。雲屯一處。將軍張勇勞績甚多。恐貝勒等藐忽視之。生彼憤懣。時厯朕懷。貝勒等既効勤勞。底定秦省。務期克奏全功。以慰朕望。○安西將軍穆占疏報。臣奉定西大將軍貝勒董額令。赴援鞏昌。即同總兵官孫思克。於六月二十五日。抵鞏昌。遣投誠

官陳萬策、謝輝等入城曉諭。偽總兵陳科等率衆出降。繳送偽劄冊籍。計馬步兵四千九百餘名。民兵五千六百餘人。安插居民十三萬五千有奇。恢復郡城。得旨嘉獎。下部議叙。○乙巳。

上詣

太皇太后宮問安。○授固山貝子溫齊女為縣君。婿扎克散為固山額駙。○免江南邳州本年分水災額賦。○平逆將軍都統畢力克圖疏報。臣自綏德州啓行。進取延安。令護軍統領傑殷等分隊前進。逆賊李士英等聞風潰遁。復遣叅贊軍務副都統覺和託率兵追襲於宜川等處。大敗之。殺獲無算。於六月二十九日入延安城。出示招撫。恢復延安府屬膚施、保安、安塞、宜川、延長、安定等縣。得旨嘉獎。下部議叙。○陝西提督陳福疏報。臣同貝子達爾扎及各台吉郎中額業圖率領官兵自花馬池起程。於閏五月二十九日至定邊城下。分道防禦。四路掘濠。列兵圍困。適逆賊朱

龍率兵自綏德來援。我兵於沙家澗掩殺。擒獲朱龍父子。定邊偽副將倪光德等聞風膽落。賊徒王衷怡等鼓譟開門。脅令倪光德等出降。當即訊明。將朱龍父子倪光德等梟示軍前。并招撫官員兵民等。恢復定邊城池。得旨嘉獎。下部議叙。○丙午。予故江南蘇松水師總兵官姚自強祭葬如例。○定遠平寇大將軍和碩安親王岳樂疏報。臣以建昌既克。欲平附近餘孽。令都統覺羅晝特等於六月二十五日率兵攻取石峽。因天氣暑熱。人馬疲渴。賊伏兵四起。我軍陣亂奔却。署副都統雅賴等戰沒。覺羅晝特等收軍退保新城。下部察議。○

上以叛逆王輔臣再疏陳奏。有

皇上念及兵民。舉從赦宥。但如何安撫。天語未及。在事兵將未免瞻顧等語。特諭諸將曰。前頒敕諭。炳若日星。且秦州等處投誠官兵已安插得所。逆賊王輔臣豈不知之。若果歸順。

當遣伊子王繼貞或標員齎奏。乃槩不遣發。而本內詞語。又復驕倨。明係借端推諉。希冀緩兵。著將軍侯張勇。速赴秦州。會同大將軍貝勒董額等。酌量留兵。防守秦鞏等處。速行進取平涼。提督陳福。速取固原。夾攻平涼。將軍畢力克圖。統領官兵。速往會將軍阿密達。軍前。都統海爾圖等。速運紅衣礮赴平涼。仍固守隴州。斷賊後路。○丁未。

上詣

太皇太后宮問安。○戊申。以翰林院編修王掾。為山東鄉試正考官。刑部員外郎桑開運。為副考官。編修王維珍。為山西鄉試正考官。工部員外郎劉士龍。為副考官。○己酉。陝西總督哈占疏言。興安遊擊王可成等復叛。總兵官党塞。及道臣興永朝。奔赴西安。請移潼關綠旗兵守商州。遣臣標綠旗兵守舊縣關。及子午。太乙二谷。分撥省城滿洲兵守潼關。總督鄂善。巡撫張德地。停赴延安。留守省城。得

旨。先因將軍畢力克圖。自延安往會將軍阿密達軍前。延安等新復之地。安撫殘黎。保固疆土。事極緊要。故遣鄂善速往。今省城見有副都統德業立等兵。鄂善等至今未行。殊屬不合。諭到。仍著鄂善等。速赴延安。興安兵既叛。潼關要地。應檄駐守太原將軍吳丹。分兵赴潼關。同夸蘭。大鄂爾博什等固守。餘悉如議。○庚戌。

上詣

太皇太后宮問安。○定遠平寇大將軍和碩安親王岳樂疏報。定南將軍內大臣希爾根。護軍統領桑遏。副都統碩塔。穆春。穆承格。總督董衛國等。招撫江西泰和。龍泉。永新。廬陵等縣。并湖廣茶陵州。永寧等縣。偽官二百七十餘員。賊兵及家口六萬五千六百餘名。又報。遣發定南將軍希爾根。率領官兵於碣碑浦。景德鎮等地方。屢次擊敗賊眾。擒斬偽副將。叅將以下十餘員。陣斬賊兵八千餘級。生擒

四百餘衆。恢復浮梁。樂平二縣。又報遣發前鋒統領侍郎舒恕。總兵官許貞等。率領官兵。敗賊於宜黃。恢復宜黃。崇仁。樂安三縣。得旨嘉獎。下部議叙。○辛亥。先是。寧南靖寇大將軍多羅順承郡王勒爾錦疏言。荊州兵少。今雖調副都統龔圖兵援荊州。未能即至。乞令龔圖移駐南漳。更調南漳襄陽滿洲蒙古兵就近來援。

上從之。至是。勒爾錦又言。彝陵賊進據江渚。火器甚多。我兵須用烏鎗居前。步騎續進。乃可長驅制勝。乞調發綠旗烏鎗手三千人。并就近撥滿洲兵。速赴軍前。

上諭兵部。逆賊吳三桂。見在松滋。據大將軍貝勒尚善疏言。廖祖二賊。復率衆七千餘前往松滋。則荊州彝陵。兵力似屬單弱。撥岳州兵內每佐領一名。速赴荊州。著見駐兗州護軍統領查哈太。盡率滿洲漢軍兵。河南提督佟徽年。選標下烏鎗手三千人。並赴荊州。聽大

將軍順承郡王勒爾錦調度。○壬子。

上詣

太皇太后宮問安。○廣東廣西總督金光祖疏報。總兵官祖澤清。以高州叛。得旨鎮南將軍尼雅翰。見統兵駐廣東。前鋒統領舒恕。亦率兵前往。著平南親王尚可喜。將軍尼雅翰。總督金光祖等。會商剿禦。毋使賊勢滋蔓。仍嚴飭沿邊將弁。固守地方。○金光祖又報。臣親統官兵。於六月二十三日。抵梧州。見賊兵二萬餘衆。水陸充塞。即會同撫臣陳洪明。副都統尚之瑜。令順德鎮總兵官張偉等。分率馬步水軍。擊敗賊衆。斬首三千餘。生擒偽都司以下二百餘名。水淹者無算。下部議叙。○癸丑。靖逆將軍侯張勇疏言。彝情叵測。久蓄侵犯內地之心。今聞大草灘。惟幕滿野。麇逐不去。實因臣奉命東征。乘虛窺伺。乞許臣回駐莊浪。以便兼轄。得旨。秦州鞏昌蘭州諸處。雖次第恢復。而底定全陝。惟在速取平涼。逆賊

王輔臣。一日不滅。則秦省百姓。一日不安。將軍侯張勇。應同大將軍貝勒董額等。會商速定平涼。不宜回駐莊浪。如彝人果顯然作惡。擾害邊民。即令總兵官孫思克。回甘州防禦。

○乙卯。

上詣

太皇太后

皇太后宮問安

實錄卷五十六

二十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十七

監修總裁官光祿大夫太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十四年乙卯八月丙辰朔

實錄卷五十七

一

上詣

太皇太后宮問安○丁巳遣大學士熊賜履祭

先師孔子○諭鎮守山東副都統額赫納今

當收穫未完之時爾等宜嚴禁官兵勿令踐

踏田禾騷擾百姓○授陝西提督三等阿達

哈哈番陳福為三等阿思哈尼哈番以出省

逆賊王屏藩逆書故也○戊午祭

大社

大稷

上親詣行禮○

上詣

太皇太后宮問安○陝西總督哈占疏言。前聞將軍席卜臣等兵出漢中。屯洋縣。隨遣人偵探。今據報。席卜臣果離漢中。但不知歸自何路。臣已知會大將軍多羅貝勒等。一面檄將軍佛尼勒。停止進兵。

上諭。佛尼勒分兵六百。與駐守寶雞副都統阿爾瑚兵。共為一軍。令阿爾瑚統轄。嚴防棧道。

平定縣志

二

諸險要。餘著佛尼勒。鄂泰等。領至西安。如得席卜臣等歸路確信。即以兵往迎。大將軍貝勒董額等。見統大兵駐秦省。作何接應。席卜臣等。與總督哈占等。籌度以行○已未。陝西總督哈占疏言。興安叛兵。已與蜀寇合。攻陷舊縣關。將逼西安。南山羣盜。又分出各口。乞敕大將軍多羅貝勒董額。將軍畢力克圖等。速發兵應援。見駐河南副都統龔圖。亦乞遣至。

上切責之曰。始王輔臣叛。朕以蘭州要地。關係三邊。令哈占發兵鎮守。哈占稱西安要地。不便分兵。致蘭州諸處淪陷。三邊搖動。繼哈占復以西安要地。屢疏請兵。因將荊州大兵陸續調赴西安。遂致荊州彝陵兵力單弱。又延安為諸路要衝。曾命鄂善。周有德等駐守。哈占又誣奏鄂善等兵少。留之西安。致延安陷沒。哈占封疆大臣。每當議事。不一體籌度。但於己身所在。常欲重兵自衛。不求速定地方。貽誤非小。今天稱叛兵與蜀寇合。欲分諸將軍兵。悉赴西安。是哈占但知有西安。置他處於度外矣。且蜀寇何能便與興安叛兵合。即至西安。不過因諸將齊赴平涼。故為聲揚。欲亂我軍心。分我兵勢耳。諸將當益急攻平涼。勿得稍緩。王輔臣未滅。西安潼關亦宜增兵剿禦。近理藩院郎中胡什巴。調蒙古兵赴太原。將軍吳丹。可率所部兵速赴潼關。與根特鄂爾博什等協守。又蒙古鄂爾多斯。土默特

兵見駐榆林。著理藩院員外郎拉篤祜率此
二部兵速赴西安。若鄂爾多斯兵必不可行。
即留與總兵官許占魁等駐防榆林。○庚申。
上詣

太皇太后宮問安。○秋分夕。

月於西郊。遣都統朱延禧行禮。○辛酉。戶部禮
部遵旨議覆耿聚忠既留額駙職銜。相應支
俸。嗣後凡公主郡主等薨逝後。將額駙原俸。
仍准支給。從之。○以翰林院修撰韓菼為順
天鄉試正考官。編修王鴻緒為副考官。○癸
亥。

上詣

太皇太后

皇太后宮問安。○

上幸南苑行圍。○甲子。

太宗文皇帝忌辰。遣官祭

昭陵。○丙寅。

太祖高皇帝忌辰。遣官祭

福陵。○丁卯。喀爾喀土謝圖汗遣使進九白年
貢。宴賚如例。○戊辰。

上出南苑西紅門。過多羅行禧郡王墓。遣內大
臣賴塔庫侍衛巴山致奠。還宮。詣

太皇太后

皇太后宮問安。○振武將軍佛尼勒疏報官兵
於滴水崖地方斬擊賊衆。獲器械等物無算。
下部議叙。○定西大將軍多羅貝勒董額疏
報。招撫歸川十二堡偽參將普國祥等及賊
兵一千餘名。下部議叙。○振武將軍佛尼勒
疏報。招撫黃牛堡等四寨。從賊居民五百七
十名。安坡山等九寨。並十四小村。從賊居民
二千四百餘名。俱歸降。下部議叙。○佛尼勒
又報。官兵於尖插屏嶺地方擊敗賊衆。獲馬
匹器械無算。下部議叙。○己巳。

上詣

太皇太后宮問安。○諭鎮安將軍都統噶爾漢
爾所率蒙古兵丁馬匹雖不甚肥健。今野多

青草。師行必不致誤。聞前往蒙古兵卒沿途頗行擾掠。此行爾其加意嚴禁。毋得侵奪民物。凡行軍駐營。俱令與滿洲兵相近。勿得遠離。○朝鮮國王李煊遣陪臣李必等謝賜伊父祭謚及封王恩。并進貢禮物。命將禮物著交來使帶回。仍宴賚如例。○庚午。

上御太和殿視朝。文武陞轉各官謝恩。次朝鮮國使臣等行禮。○予故原任副都統艾松武祭葬如例。○辛未。陝西提督陳福疏報。臣同副將太必圖統領官兵前赴平遠地方。擊敗賊衆。擒斬偽官二十二員。賊兵二千有餘。獲器械等物無算。下部議叙。○壬申。

上奉

太皇太后幸湯泉。

太皇太后登輦。

上隨輦步行。出東華門。乘馬至進膳處。

上親扶

太皇太后降輦。入行宮。及起行。

上扶輦行數步。始乘馬隨行。至湯泉。

上親扶

太皇太后下輦。入行宮。

上始回行宮。○癸酉。

上詣

太皇太后行宮問安。○遣內大臣公坡爾奔內大臣宗室額奇往明諸陵致奠。○陝西提督陳福疏報。副將太必圖等擊敗賊衆。斬偽叅將陳起元等。恢復平遠所城。得旨嘉獎。下部議叙。○甲戌。

上詣

太皇太后行宮問安畢。回宮。○乙亥。陝西提督陳福乞解提督重任。專管寧夏總兵事務。慰留之。○予鞏昌陣亡遊擊張大選祭葬如例。○戊寅。予故鑲黃旗內大臣博爾濟祭葬如例。○己卯。遣官祭

歷代帝王。○遣官祭城隍之神。○予故致仕少師太子太師保和殿大學士兼戶部尚書

衛周祚祭葬。謚文清。○敕諭耿精忠。爾祖父宣力累朝。勲猷茂著。俾世襲王爵。格外加恩。逮爾父病歿。令爾襲封。仍鎮閩疆。方謂爾克紹前猷。殫忠報國。不意爾反為吳逆狡謀所惑。蹂躪土地。戕害生民。朕猶念爾祖父前功。終不忍絕。將爾在京諸昆弟。及所屬人員。槩行寬宥。給還官職。恩禮如常。今大軍雲集。時勢昭然。爾自知之。朕復念爾變亂。必有所由。或為逼迫所致。故復下敕書。遣爾弟耿聚忠齎至軍前。明諭朕意。爾若即悔罪率眾歸誠。當復爾王爵。仍舊鎮守。所屬人員。職任俱各如故。兵民人等。照前安插。倘能剿除海寇。共奏膚功。仍優叙加以爵賞。前使臣周襄緒等。不遣之歸。或別有故。朕不介意。朕以誠心待天下。斷不食言。爾勿聽信煽惑之言。終懷疑懼。負朕始終保全至意。○諭兵部。今遣耿聚忠齎敕赴大將軍康親王傑書軍前。招撫耿精忠。其招撫事宜。王與耿聚忠。悉心謀議。相

機速行。俾閩省生民。早離水火。爾部即移文知會。○陝西總督哈占疏報。招撫逆賊朱龍脅從偽文武官六十餘員。民人二萬三千有零。下部議叙。○庚辰。

上御太和殿視朝。文武陞轉各官謝恩。次喀爾喀進貢使臣等行禮。○辛巳。奉命大將軍和碩康親王傑書疏報。將軍貝子傅喇塔遣副都統紀爾他布等。自土木嶺進兵於半山嶺。大敗賊眾。乘勝進指黃巖。賊將曾養性等棄營據黃巖拒守。傅喇塔等進兵圍其城。曾養性乘夜哭圍。走溫州。餘賊開門降。遂復黃巖。得旨嘉獎。下部議叙。○壬午。以故三等阿思哈尼哈番鄭國子鄭尚和襲職。○盛京副都統葉爾素。以病乞休。命原品解任。○癸未。

上幸湯泉。詣

太皇太后行宮。問安畢。回宮。○甲申。

上御經筵。○乙酉。

上詣

皇太后宮問安

九月丙戌朔。靖逆將軍甘肅提督侯張勇疏報甘肅總兵孫思克率領官兵進剿平涼。於紅寺兒地方大敗賊衆。生擒偽守備等。獲偽劄器械馬匹等項。恢復靜寧州。得旨嘉獎。下部議叙。○丁亥。寧南靖寇大將軍多羅順承郡王勒爾錦疏言。湖廣逆賊堅立營壘。掘壕塹。設鹿角。挨牌。我軍騎兵不能衝突。必設綠旗精兵七千名。造輕箭簾車二百輛。礮車一百輛。熟鐵礮一百具。量配兵丁。推向賊營填其壕。擲火藥以燒鹿角。挨牌。用礮攻擊。相賊形勢滿兵繼進。則逆賊可滅。地方可復。如允臣所奏。乞將此七千兵。分為援剿二營。設二副將統之。

上諭兵部。大兵與逆賊相持日久。不速剿滅。則軍糧日糜。民生日困。今大將軍順承郡王勒爾錦等既請設綠旗兵。造箭簾車等項。應如所請。其副將等官。聽會同該督酌選才能補

用。著工部精簡交槍二千五百桿。遣賢能官員二人。馳驛速送荊州軍前。尋令二營援剿兵。俱聽總督蔡毓榮專轄。○鎮西將軍席卜臣疏言。本年二月兵糧匱竭。臣等取食賊麥。以至七月。食已罄盡。計欲保全大兵。乃於七月十七日。自漢中出。沿路擊賊。以八月初六日至西安。見在官兵俱無馬匹器械。難以前進。

上諭。席卜臣等兵自漢中出。沿途擊賊。馬匹器械俱盡。著陝西督撫動正項錢糧買馬人給一匹。并整頓器械。令其鎮守西安。○戊子。上幸湯泉。詣

太皇太后行宮問安。是日駐蹕昌平州西南。○定西大將軍多羅貝勒董額疏言。王輔臣啟臣云。前疏未奉

聖旨。乞頒赦午門。仍遣威望大臣受降。竊謂皇上既屢降敕諭。招撫王輔臣。乞更頒諭。開示本末。

上諭。前屢降諭旨。王輔臣果悔罪來降。當宥其前罪。頃秦州諸處官兵來降。悉赦其罪。王輔臣安有不知。且先遣祝表。正尚未歸。豈宜復遣大臣。彼乞降。詐也。特緩我師。為苟延日月計耳。爾等急宜攻取平涼。若王輔臣投誠。免其誅戮。再行請旨。慎毋因其詐言。以誤攻取之機。若不投誠。爾等以朕恩赦王輔臣。而彼不悔禍。歸順之意。布告官吏軍民。使知舉兵誅亂之故。○已丑。

上幸有明諸陵。至長陵。

上率諸大臣侍衛等致奠。分遣內大臣伯心裕等。致奠諸陵。○庚寅。

上幸湯泉。詣

太皇太后行宮。問安畢。回宮。○辛卯。

上詣

皇太后宮。問安。○以土默特故多羅貝勒趙圖子厄爾德木圖襲爵。○理藩院題。蘇尼特多羅杜楞郡王牢張故。無嗣。應令其親叔阿毓

錫襲爵。從之。○壬辰。封故鎮國公杜蘭子納墨孫。為輔國公。○以管轄科爾沁右翼五旗和碩額駙沙津。追殺布爾尼獻首功。封為多羅貝勒。○喀爾喀車臣汗等。遣使進九白年貢。宴賚如例。○癸巳。

上幸湯泉。迎

太皇太后。詣行宮。問安。是日。駐蹕懷柔縣南。○甲午。

上觀北山邊地。駐蹕牛欄山南。○定遠平寇大將軍和碩安親王岳樂疏報。江西總督董衛國標下効用遊擊周志新。率官兵抵靖安縣。賊首偽總兵桂芳等。率兵迎敵。我兵分為兩路由東門南門衝入。直搗賊巢。賊潰遁入山林。恢復靖安縣城。得旨嘉獎。下部議叙。○定西大將軍多羅貝勒董額疏報。臣等大兵及平逆將軍畢力克圖。與揚威將軍阿密達之兵。俱於八月十五日。抵平涼地方。逆賊出城迎敵。我軍奮擊。屢敗之。陣斬偽總兵郝天祥。

其餘擒斬者。不可勝算。下部議叙。○乙未。

上駐蹕湯山北。○丙申。

上奉

太皇太后。自湯泉行宮啟行。至進膳處。

上親扶

太皇太后降輦。入行宮。

太皇太后登輦。

上扶輦行數步。始乘馬隨行。送至

慈寧宮。扶掖降輦。入宮後。

上回宮。○諭大學士索額圖曰。頃見修治道路。

太平莊路傍民間墳墓。有修平者。殊為不合。

著交該部察議具奏。○丁酉。

上詣

太皇太后

皇太后宮問安。○理藩院郎中胡什巴等疏言。

簡蒙古吳喇忒。毛明安。四子部落兵一千。進

殺虎口。於八月三十日至太原。

上即命胡什巴。同蒙古領兵都統管轄鎮守太

原。○庚子。

上御太和殿視朝。文武陞轉各官謝恩。○

上諭禮部。往代帝王陵寢。所在地方。理宜守護

以妥神靈。朕近行幸湯泉。道經昌平。見明朝

諸陵。殿宇雖存。戶牖損壞。附近樹木。亦被摧

殘。朕心深為憫惻。爾部即嚴加申飭。守陵人

戶。令其敬謹防護。仍責令該地方官。不時稽

察。勿致仍前怠玩。以副朕優禮前代之意。○

先是。防守彙陵貝子準達。因彙陵兵單。請兵

於大將軍多羅順承郡王勒爾錦。遂發滿洲

蒙古綠旗兵一千八百。給貝勒察尼靖寇將

軍印。率赴彙陵。月餘並無音問。

上諭兵部。貝勒察尼。往彙陵月餘。曾否與賊戰。

即戰勝負若何。賊情若何。爾部其移文順承

郡王。令其速奏。至是多羅順承郡王勒爾錦

奏曰。貝勒察尼。於八月十九日至彙陵。與臣

書云。彙陵城外。東北有鎮。荆山賊立營掘壕

堅壁。以守難於進攻。近偵知我兵日增。隄備

益嚴。但思寇糧取給湖南。必由長江轉運。若斷此糧道。別無轉運之所。賊必饑困。今惟俟兵卒與船耳。臣隨將荊州所有划子船一百四十隻。於本月二十五日。發往提督佟徽年兵。亦於十月初一日遣行。○定遠平寇大將軍和碩安親王岳樂疏言。俟內大臣希爾根軍自饒州至。創擊石硤逆賊。殲貴溪諸寇。撥兵守要地。得便即進取長沙。

上諭之曰。賊渠吳三桂也。今不早滅。雖江西福建之賊盡除。於事奚益。安親王岳樂其量撥官兵固守江西。乘冬月速取長沙。大兵進長沙後。諸賊乘間竊發。恐江西危殆。其令簡親王喇布率江南兵二千赴江西。以內大臣希爾根為副將軍。與簡親王協同鎮守。副都統額赫納率兗州盛京烏喇兵一千速赴江寧。至即以兵付將軍哈爾哈齊令駐守江寧。伊從簡親王往江西。恭贊軍務。布顏赴兗州用鎮東將軍印管轄蒙古兵。尼滿為署副都

統赴江寧。恭贊哈爾哈齊軍務。署副都統額思赫赴池州。○以原任廣東水師提督常進功為浙江水師提督。○辛丑刑科給事中彭之鳳疏請照順治十七年例。正月停刑。刑部議例無正月停刑之條。應不准行。得旨。正月停刑著照順治十七年例行。○壬寅定西大將軍多羅貝勒董額疏言。王輔臣報書言。彼所遣官王起鳳赴省已逾兩月。尚未遣還。故士卒皆懷疑畏。乞

皇上再赦王輔臣。併所屬官兵之罪。仍令駐守平涼。遣王起鳳還。則彼無不傾心來歸。今大兵僅足圍平涼。不能堅密。倘賊勢窮突圍難保。王輔臣不脫去也。疏入。

上責之曰。逆賊王輔臣誘我緩兵。其計顯然。貝勒董額不速率兵剿滅。反請寬宥其罪。若免王輔臣罪。仍令駐守平涼。假使川賊侵秦州。興安賊逼西安。我兵勢必分路進剿。當此之時。貝勒董額能保其不乘隙復叛耶。今大兵

雲集。已困孤城。乃云賊勢窮突圍難保。其不脫去。蓋恐王輔臣他日潰遁。故設此詞。預為之地耳。若王輔臣果難圍困。剿滅。何以貝勒董額。不與貝子。公。叅贊諸臣。合詞以請。觀此。獨貝勒董額。一意專主招降也。貝子。公。叅贊諸臣。皆朕所倚任。若灼見城不可圍。寇不可滅。何以不將情事陳奏。諸凡惟貝勒董額。退縮之意是從。至今不攻取城池。尚復何待。行軍重事。豈徒付之貝勒一人耶。貝勒。貝子。公。叅贊諸臣等。速行圍城。務期剿滅逆賊。王起鳳著遣還平涼。○癸卯。靖逆將軍甘肅提督侯張勇疏報。逆賊王輔臣叛亂。隨征官脅從者。多負固抗拒我兵。惟副將高鼎。於我兵圍鞏昌時。先遣人通信。今復率眾奪門來投軍前。得旨嘉獎。下部議叙。○乙巳。予故太子太保文華殿大學士。管吏部尚書事。對喀納祭葬。謚文端。○袁臨總兵官趙應奎。遣子趙衍祥。呈首逆書。下部議叙。○丁未。

上詣

太皇太后

皇太后宮問安。○戊申。先是。因察哈爾布爾尼叛。命撫遠大將軍多羅信郡王鄂扎。及副將軍都統圖海等。討滅之。其餘黨散附各部落者頗多。至是。特遣理藩院侍郎博羅特等。於義州錦州等處安插。諭曰。今時屆嚴冬。其逃散人丁戶口。加意移來安插。務令得所。以副朕柔遠至意。○授多羅貝勒尚善女為郡君。瑯白奇為多羅額駙。○己酉。賞賚諸外藩。追剿布爾尼効力受傷之王。公。台吉。官兵。綴足鞍馬有差。○辛亥。

上詣

太皇太后宮問安。○壬子。

孝慈高皇后忌辰。遣官祭

福陵。○癸丑。奉命大將軍和碩康親王傑書疏報。八月十一日。耿逆偽將軍馬九王下。副將李廷魁等率賊兵數千。屯扎衢州府北元口。

山上斷我糧道。平南將軍都統賴塔等分布滿漢官兵。攻賊木城內四營。圍其三面。乘夜攻擊。至天明。衝入。賊不能當。敗走。官兵追剿。斬獲甚衆。木城營盤俱經焚燬。又有逆賊盤踞夏州河西一帶。於八月十四日。舉火突犯駐防官兵營。八旗兵奮勇擊賊。自朵口追剿二里許而還。又逆賊來犯江家山之營。平陽總兵官王廷美率兵固守。放礮攻擊。大敗賊衆。乘夜遁去。下部議叙。

冬十月乙卯朔。享

太廟。

上親詣行禮。遣官祭

永陵。

福陵。

昭陵。

孝陵。

仁孝皇后。○頒康熙十五年時憲曆。

上詣

太皇太后宮。問安。○轉兵部尚書明珠為吏部尚書。○丙辰。授和碩顯親王福壽之姊為郡主。婿華色為和碩額駙。○以屯墾都督蔡璋為南昌水師總兵官。兼太子少保左都督職銜。○陝西總督哈占疏報寶雞地方有李冉二姓偽總兵等。由棧道出口。於九龍山上。扎立三營。恭贊軍務。副都統鄂泰署副都統阿爾瑚等。隨即調遣八旗官兵。星夜奮擊。大殲賊兵。下部議叙。○丁巳。

皇太后聖壽節。

上率王以下文武大臣。侍衛等詣

皇太后宮行禮。遵

懿旨。停止筵宴。○

上詣

太皇太后宮問安。○戊午。喀爾喀色冷阿海台吉等遣使進九白年貢。宴賚如例。○庚申。吏部議覆陝西總督哈占疏言。原任潼商道崔澄。西安府通判郝斌。因委辦軍需被逆賊王

輔臣收繫。始終不屈。堅拒偽劄。今皆脫離回陝。相應照伊等原職補授。從之。○寧南靖寇大將軍多羅順承郡王勒爾錦疏報賊將揚來嘉等分道入寇。命將軍噶爾漢自河南帥師赴襄陽。仍留兵八百名防守河南。○陝西總督哈占疏報賊黨王屏藩等犯秦州。敕陝西諸將固守要地。○辛酉。

上詣

太皇太后宮問安。○壬戌。皇子萬黼生。○轉刑部尚書塞色黑。為兵部尚書。○癸亥。奉命大將軍和碩康親王傑書疏言。寧海將軍固山貝子傅喇塔。率署前鋒統領吳木篤等領兵自黃巖起行。進取溫州。擊敗逆賊於上塘嶺。復誘至小河渡。大敗之。生擒偽官三十五名。賊兵五百餘人。恢復太平。樂清青田三縣。及大荆磐石三衛。得旨嘉獎。下部議叙。○陝西總督哈占疏報。與安叛賊渡江。將出大峪口。上諭。大峪口去西安最近。若調兵遠地。慮稽時

日。爾等將還自漢中之兵。簡精銳者遣守大峪口。西安要地。宜增兵防禦。未幾將軍吳丹等又奏。賊犯商州舊縣關。命調將軍噶爾漢所留河南府兵馳赴潼關。復發京師禁軍。令叅領胡什霸額勒布統之。往駐河南府。○甲子。

上詣

太皇太后

皇太后宮問安。○安遠靖逆大將軍多羅貝勒尚善疏言。長沙岳州。如唇齒相依。若偏攻一隅。未能倖拔。今和碩安親王進兵長沙。岳州亦宜協力攻取。但兵力尚少。乞濟以河南山東諸兵。

上諭。尚善前奏岳州逆賊。浚壕樹椿。竊據甚固。不能攻取。故將岳州兵分遣荊州諸處。並非輟岳州之攻也。頃尚善等報岳州賊黨吳三桂已撤往彝陵。今計我兵之在岳州者。雖減於舊。而賊勢亦分。誠能進取岳州。兵力亦未

為不足。尚善又請添兵。不合。作何攻取。尚善酌量以行。○乙丑。陞鑲黃旗前鋒叅領穆泰為奉天副都統。○丙寅。

上詣

太皇太后宮問安。○

上謁

孝陵。是日啟行。駐蹕三河縣。○遣內大臣覺羅塔達。宗室額奇。於和碩襄親王墓致奠。遣一等侍衛飛耀色。於內大臣舅舅佟國綱之父。

太子太保都統三等精奇尼哈番佟圖賴墓致奠。○給陝西定邊營殉難守備劉士英。拜他喇布勒哈番。予祭葬。妻郭氏。偕夫盡節。給與誥命。○丁卯。

上駐蹕薊州。○叙平察哈爾功。賜大將軍多羅信郡王鄂扎。黃金一百兩。白金五千兩。給副將軍都統大學士圖海。一等阿思哈尼哈番。護軍統領哈克山。副都統吳丹。洪世祿。署前鋒統領達克薩哈。夸蘭大扎木素等。俱量給。

世職。○戊辰。

上詣

孝陵。率隨駕各官至明樓前奠酒。舉哀。是日。駐蹕紅門東。○己巳。

上詣

隆恩殿致祭。是日。駐蹕湯泉。○庚午。

上駐蹕

孝陵紅門東。○以翰林院侍讀周之麟。為順天武鄉試正考官。編修葉方藹。為副考官。○兵部題。順天武鄉試舊額。京衛武生取中一百名。八府及宣府一鎮。共取中一百名。奉天府取中三名。今科京衛武生。步箭合式者。止七十七名。奉天無一人合式。相應於京衛武生內。選文理明通者減額取中五十名。奉天既無合式。應無庸議。八府及宣府一鎮。照舊取中。從之。○辛未。

上詣

孝陵致祭。舉哀。是日。回鑾。駐蹕黃花山。○免江。

南徐州邳州。本年分水災額賦有差。○壬申。上駐蹕薊州。○陝西提督陳福疏報。九月二十三日。平涼賊奄至固原。固原賊亦自城內突出。齊犯我軍。遣副將太必圖率兵擊之。方與賊戰。中衛副將賈從哲忽退。遊擊張元經亦率兵走。於是衆軍驚擾。太必圖遂沒於陣。臣與副將來塔等於二十八日。回至靈州。

上命即於軍中斬賈從哲。張元經以徇。又諭曰。固原賊衆城守甚堅。今川賊又入平涼。應速遣兵剿禦。鄂爾多斯兵已遣回。不便復調。調駐大同兵。及神木歸化城兵。令副都統恰塔員外郎拉薦祐領之。或由延安。或由定邊。速赴固原。此兵既到。陳福即率本標兵。或先定固原。或會大將軍貝勒。先取平涼。與恰塔拉薦祐酌行。大同兵既往固原。令郎中胡什巴分太原蒙古兵五百名。赴大同駐守。○癸酉。上駐蹕三河縣。○甲戌。

上駐蹕通州。○添設工部節慎庫郎中一員。其

舊有司庫四員。裁去二員。筆帖式六員。裁去一員。○諭兵部。頃大將軍貝勒董額等報。興安賊衆。犯商州大峪口。川賊譚弘救平涼。皆因王輔臣未滅。我兵俱集平涼。故諸賊乘隙侵犯。欲分我兵力。以援王輔臣。今董額等官兵至平涼日久。自宜作速攻取。設使平涼未破。而四川與興安之賊俱至。大兵往來路阻。後雖恢復平涼。亦復何益。若平涼破。王輔臣滅。則賊應援之念絕。而窺伺商州之計亦沮。陝西可無虞矣。由平涼南山俯視城中。甚悉。若據南山。放紅衣礮。城中賊衆。自不能支。董額等速奪南山。以取平涼可也。尋陝西總督哈占疏報。慶陽賊已就撫。逆賊王輔臣遣黨周養民率兵圍困慶陽。復陷。

上復諭議政王大臣等曰。貝勒董額等到平涼日久。兵力不少。惟有高坐。不即攻取。以致逆賊王輔臣。分兵救固原。今又遣兵援慶陽。董額及叅贊諸臣。不邀擊賊衆。賊任意四出。若

聞聞知。平涼賊勢既分。又不乘虛攻取。伊等擁大兵於平涼。所司何事。及今不取。更待何日也。若仍頻師不進。必致我兵漸疲。糧儲空耗。賊益窺伺間隙。蹂躪地方。甚屬未便。董額等其公同籌畫。速取平涼。剿除逆賊。○乙亥。上回宮。詣

太皇太后

皇太后宮問安。○陞平南王藩下三等阿達哈哈番李建秀為廣東中鎮總兵官。○阿霸垓

達爾漢貝子綽博會喀爾喀固山貝子布木巴西希故。各遣官致祭。○丁丑。轉工部尚書吳達禮為刑部尚書。○免江南高郵江都寶應三州縣本年分水災額賦有差。○陞廣東副將鄧汝功為援剿惠潮總兵官。副將王虎為援剿梧肇總兵官。○陝西總督哈占疏報。慶陽一郡官兵士民。先雖被脅從逆。今原任知府王文紳守備路調鼎等。經臣招撫。即率眾獻城歸順。并擒偽總兵南一元等。安插士

民三萬餘人。下部議叙。○辛巳。遣署副都統穆承格。叅贊鎮南將軍舒恕軍事。○壬午。

上詣

太皇太后宮問安。○陞禮部左侍郎常鼎。為工部尚書。○遣近御侍衛關保等。選內廐馬百匹。往賜出征荊州科爾沁公圖納黑。台吉鄂穆布。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十八

監修總裁官光祿大夫太保兼太子太傅保和殿大學士兼戶部尚書二奇伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十四年乙卯十一月乙酉朔。

實錄卷五十八

上御弘德殿講官傳達禮孫在堂張英進講畢。

傳達禮請旨舊例冬至以後輟講。

上諭天氣猶未甚寒仍令進講○先是

上諭靖逆將軍甘肅提督侯張勇曰陝西重地

凡平定地方掃除賊寇惟爾是賴今大將軍

貝勒董額雖攻圍平涼而逆賊王輔臣嬰城

死守恐稽時日又川賊已過昌寧驛來援平

涼我兵若不速滅王輔臣則陝西不能即定

爾量留官兵守鞏昌親自率兵赴董額軍前

協力進取平涼若鞏昌必不可離多發標兵往平涼以助攻戰并宜設策截川賊來援之路至是張勇疏言逆賊吳之茂率眾進屯單家河等處臣若赴平涼恐賊乘虛直犯臣斷不可遠離鞏昌且官軍皆已分遣諸處臣兵單實無可發

上令議政王大臣等集議尋王大臣等議應如張勇所奏著固守鞏昌秦州等處相機剿禦從之○以原任河南巡撫郎廷相為江西巡撫○改陝西固原道為整飭平慶道駐劄平涼府管理驛鹽事務○陝西總督哈占疏報十月二十三日副都統鄂泰等於益門鎮地方擊敗賊眾招撫偽總兵任德旺等下部議叙○丙戌

上詣

太皇太后宮問安○丁亥都統海爾圖以運礮屯夫俱逃請發鎗手步軍四百名綿甲人八百名防護又以礮手熟練者少請於八旗滿

洲漢軍內擇素習者遣發赴軍。大將軍多羅貝勒董額以聞。

上切責之曰。貝勒董額等帥兵抵平涼。為日已久。不速滅賊。平定地方。及命其用礮攻平涼。海爾圖又託故具啓。遷延時日。董額等並不議可行與否。但據啓以奏。殊為不合。前送紅衣礮撥漢軍每佐領二名。海爾圖謂不足。又添撥一名。及海爾圖去時。藉口沿途養馬。不即速行至關山。又請兵二千。欲靖賊寇。復如所請添發。而究不能開通關山。今令用紅衣礮急取平涼。海爾圖復請自京師發鎗手綿甲人。耽延時日。有悞軍機。殊負任使。著解叅贊之任。董額等仍遵前旨。速定平涼。○戊子。鎮西將軍席卜臣疏報。副都統德業立等於十月二十七日。在大峪口地方擊敗賊衆。下部議叙。○己丑。冬至。祀

天於
圜丘。

上親詣行禮。○遣官祭

永陵。

福陵。

昭陵。

孝陵。

仁孝皇后。○停止次日朝賀。○庚寅。諭吏部禮部。凡世職官員以下。有頂帶官員以上陣亡。無承襲子嗣。銷去所給官職者。照伊陣亡所得之官。併其原官品級。給與祭葬。著為令。○

壬辰。

上詣

太皇太后宮問安。○添設湖廣省仙桃鎮同知一員。○癸巳。

上諭。和碩恭親王常寧著在正藍旗。和碩純親王隆禧著在鑲白旗。於和碩恭親王將鑲黃旗滿洲旗分津布佐領。噶布喇佐領。正黃旗噶布拉佐領。霍爾銑佐領。正白旗覺羅奎代佐領。覺羅布魯佐領。蒙古旗分墨赫德佐領。

恩克佐領。鑲黃旗蒙古旗分額卜根佐領。正白旗漢軍李廷霖佐領。李毓正佐領。佟文玉佐領。包衣正白旗滿洲。阿那代佐領。正黃旗漢軍姚質義佐領。正黃旗噶布臘所屬撥給於和碩純親王。將正黃旗滿洲旗分鄂莫克圖佐領。阿世圖佐領。蘇爾泰佐領。正白旗穆舒渾佐領。託進佐領。鑲黃旗鍾內佐領。鑲黃旗蒙古旗分哈喇爾代佐領。白貝佐領。阿畢達佐領。正白旗漢軍旗分蕭養元佐領。霍世榮佐領。李世靜佐領。包衣鑲黃旗滿洲薩畢漢佐領。漢軍劉格佐領。正黃旗得希圖所屬撥給。轉禮部右侍郎額星格為左侍郎。陞內閣學士伊桑阿為禮部右侍郎。陞杭州副都統石調聲為浙江提督。○甲午。

上詣

太皇太后

皇太后宮問安。○寧南靖寇大將軍多羅順承郡王勒爾錦等疏報將軍貝勒察尼等於十

月二十日。在興山縣地方擊敗賊衆。恢復興山縣城。得旨嘉獎。下部議叙。○乙未。達賴喇嘛遣使表貢方物。賞賚如例。○喀爾喀阿海戴青台吉遣使進九白年貢。宴賚如例。○丙申。

上詣

太皇太后

皇太后宮問安。○免湖廣沔陽黃梅等四州縣本年分水災額賦十之三。○丁酉。揚威大將軍和碩簡親王喇布疏言。和碩安親王岳樂業已分每佐領甲兵十名。進征湖南。江西止留每佐領十名。分駐建昌等處。省城止餘每佐領二名。今欲剿滅諸路賊寇。而兵難調集。欲分守而兵又不足。乞將在江寧烏喇。及盛京兵發來江西。

上諭。江南重地。烏喇。盛京兵不宜調往。江西現有每佐領甲兵十名。又南昌。饒州。建昌。廣信。吉安等處。皆添設綠旗官兵。已足調遣。大將

軍酌量緩急度可緩之處。調官兵以資戰守。
○復設詹事府衙門。設滿漢詹事各一員兼翰林院侍讀學士。少詹事各二員兼翰林院侍講學士。左右春坊庶子各二員兼翰林院侍讀侍講諭德各二員。司經局洗馬各一員。俱兼翰林院修撰。左右中允各四員兼翰林院編修。左右贊善各四員兼翰林院檢討。主簿各一員。錄事各二員。正字各二員。○定遠平寇大將軍和碩安親王岳樂等疏言。江西巡撫白色純病故。江西布政使佟國楨甚得民心。請將佟國楨陞補巡撫。得旨。佟國楨陞授江西巡撫。郎廷相令其候補。○戊戌。戶部議覆本部左侍郎魏象樞疏言。兵餉浩繁。正當節省錢糧。各省辦買米豆草束。每省費銀數萬。或數十餘萬兩。若據督撫開報。概行准銷。恐不肖官員。侵蝕浮冒。易滋弊端。嗣後直隸各省。造報辦買米豆草束價值。臣部詳查有與時價浮多者。駁回核減。得旨。軍餉浩繁。

錢糧正宜節省之時。督撫俱當潔己率屬。據實開銷。如有浮冒事發。定行從重處分。爾部通行嚴飭。○調貴州右路總兵官高登科為江西饒州總兵官。○己亥。

上御太和殿視朝。文武陞轉各官謝恩。次喀爾喀厄魯特進貢使臣等行禮。○免江南山陽宿遷睢寧三縣本年分水災額賦有差。○福建巡撫楊熙疏報。九月二十九日。臣同少傅公尚之信等率領官兵。進入閩境。攻克鮮水關。招撫偽參將葛習猷等。十月初六日。臣等於永定縣地方。擊敗賊衆。恢復縣城。得旨。嘉獎。下部議叙。○庚子。

上詣

太皇太后宮問安。○定遠平寇大將軍和碩安親王岳樂疏言。逆賊吳三桂聞臣進取長沙。必固守要害。非綠旗兵無以搜其險阻。非紅衣礮不能破其營壘。提督趙國祚久在行間。熟練火器。兼統綠旗兵三千。屯壘都督陳平。

有兵二千。乞俱令隨臣進討。其廣東送來紅衣礮甚重。路險難致。西洋礮輕利。便於運動。乞發二十具為攻剿之用。

上諭剿滅逆賊。平定湖南。俱賴安親王。練習宿將。及精兵火器。俱不可闕。提督趙國祚。都督陳平。并所屬官兵。悉依安親王所請。南懷仁所造火礮。著官兵照數送至江西。轉運安親王軍前。王不必待礮到始行。亟由吉安。或袁州進發。

上以陝西提督陳福。勤勞邊疆。忠貞甚著。其弟刑部主事陳壽。從優以光祿寺少卿。鴻臚寺少卿用。○免江南泗州。盱眙等四州縣。本年分水災額賦有差。○辛丑。諭刑部尚書艾元徵等曰。罪人久繫。朕心不忍。今時值嚴冬。應速行審結。○靖逆將軍甘肅提督侯張勇等。疏報西寧鎮臣王進寶。出首吳逆偽文偽書。得旨。逆賊吳三桂。差人投遞偽文偽書。鎮臣王進寶。即行舉首。忠貞可嘉。下部議叙。○壬

寅。廣東廣西總督金光祖疏言。叛鎮馬雄。同滇賊王弘勳等。至高州。高雷廉叛兵。合計約有十萬。臣率兵深入高州。恐逆賊孫延齡乘隙犯梧。平南親王尚可喜。又無兵可調。乞添發大兵前來應援。

上諭逆賊率眾來犯廣東。不可不速遣大兵。大將軍簡親王。於留守江西兵內。即選擇精銳。每佐領二名。命才能夸蘭大率之。速赴廣東。聽平南親王尚可喜。將軍舒恕。總督金光祖。商酌調遣。此兵仍著舒恕統轄。江西兵既發往廣東。山東兗州蒙古兵六百名。令署副都統科爾科代統之。即赴江寧。科爾科代既到江寧。江寧所有烏喇盛京兵一千。令署副都統尼滿。雅秦。揚古代統之。即赴江西。更發禁旅。每佐領兵二名。一半赴江寧。同蒙古兵六百名。俱聽將軍哈爾哈齊統轄。以其半赴山東。同原駐蒙古兵。聽將軍布顏統轄。○陞太常寺卿吳努。春為內閣學士兼禮部侍郎。○

調四川左路總兵官陳奇謨為鳳翔援剿總兵官○甲辰定遠平寇大將軍和碩安親王岳樂等疏報將軍希爾根額楚等剿殺江西省浮梁貴溪等縣賊衆恢復城池又招撫偽贊化張輔聖等二百七十餘員兵三千三百七十名得旨嘉獎下部議叙○廣東廣西總督金光祖疏報九月二十七日羅定副將吳陞等於黃坡嶺地方殺敗逆賊下部議叙○丙午陞翰林院侍讀學士喇沙里為翰林院掌院學士兼禮部侍郎○戶部議覆湖廣道御史郝浴條奏一。交納錢糧每多雜費額外多費一分即額內少納一分以致正額拖欠有誤軍需嗣後凡赤曆由單逃人盜案驛遞河道一切造冊銷算上下使費陋規應通行直隸各省嚴禁一。招買軍需名為市易實係里攤比及發價或貪官層扣或蠹役互侵未必盡得實價嗣後軍需糧料如小民情願抵納正賦者即行給與印票倘有里攤情弊該

督撫據實指名題參嚴行處分一。銀米豆草解到軍前須委廉幹官員隨到隨收嗣後如有不肖官役指索收費任意遲延者該督撫即據實題參從重議處應如所請從之○免江南高郵興化鹽城三衛所本年分水災額賦有差○調分防吳橋縣安陵汛東光縣大龍灣汛千總一員把總一員馬兵四十名步兵一百一十三名於嚴鎮羊兒莊等處防緝私鹽從直隸巡撫金世德請也○戊申

上詣

太皇太后

皇太后宮問安○奉命大將軍和碩康親王傑書等疏報十月初七日貝子傅喇塔等進攻溫州於南江地方殺敗賊衆十月初九日副都統馬哈達遣三等台吉察渾等於石塘地方擊敗賊衆又偽副將朱起龍自溫州投誠下部議叙○己酉陞江西督糧道姚啟盛為江西布政使司布政使○庚戌

上詣

太皇太后宮問安○陞太常寺少卿屯泰為太常寺卿○辛亥諭禮部朕惟建儲以重國本晉號以篤尊親慶典告成隆儀式舉所以彰懿德而展孝忱也朕纘承丕緒夙夜兢兢仰惟

聖祖母昭聖慈壽恭簡安懿章慶敦惠溫莊康和太皇太后暨

聖母仁憲恪順誠惠皇太后教育恩深顯揚罔

既茲者恪遵

懿旨冊立東宮念主器之得人皆

慈恩之垂裕宜宣

盛德用著鴻章謹加上

太皇太后徽號曰

昭聖慈壽恭簡安懿章慶敦惠溫莊康和仁宣

太皇太后加上

皇太后徽號曰

仁憲恪順誠惠純淑皇太后昭徽音於奕世廣

孝治於多方爾部即選擇吉日開具儀注以

聞○壬子吏部議覆刑科給事中劉沛先疏言直隸各省行取知縣督撫薦牘有卓異有薦舉有才能列為三項而京官考選獨無差等請於各衙門咨送時論俸之中分別等第密咨開送應如所奏嗣後科道員缺行取在內五部主事中行評博俱令該衙門堂官於俸滿官員內開送賢能之官如濫送者照督撫濫舉之例處分從之○癸丑免湖廣通城潛江二縣本年分旱災額賦有差

十二月甲寅朔

上詣

太皇太后

皇太后宮問安○浙江總督李之芳疏報招撫

溫台等處賊寇偽總兵等二百餘員兵四千餘名救出難民一十一萬餘口下部議叙○

乙卯

上詣

太皇太后宮問安○免河南陝州靈寶閿鄉三州縣本年分旱災額賦有差○以故一等阿思哈尼哈番鄂木布弟滾布倫辰襲職○定遠平寇大將軍和碩安親王岳樂等疏報江西文武官弁招撫偽官六十七員兵丁家口共四千四百餘名下部議叙○陞京口協領胡啓元為杭州副都統○戊午

上御太和殿視朝文武陞轉各官謝恩次喀爾喀達賴喇嘛厄魯特進貢使臣等行禮○定

西大將軍多羅貝勒董額疏言官兵攻平涼克取第一關廂去城三里許對南山屯營欲前進薄城因溝深地險難以下壘城未能速下。

上諭逆賊久踞平涼皆因有糧可恃若斷其餉道則賊自窮困平涼西北通固原要路大將軍貝勒等宜速斷截以困斃之○庚申

上奉

太皇太后幸南苑。

太皇太后登輦

上隨輦行至行宮門。

上親扶下輦入宮。是日駐蹕南苑○諭大學士圖海等前遣多諾納布總理湖廣大兵糧餉節省浮冒招集殘黎責任綦重伊等宜仰副朕責成之意實心料理竣事而還乃未著有成效希圖規避奏請回京順承郡王勒爾錦等屢奏多諾等任極重大不宜發回前欲遣納布往荊州貝勒尚善亦屢奏糧餉事重不宜發往今乃忽稱無事伊等竟自回京是何意見阿範恭贊簡親王軍務不思効力託言有疾來京俱屬越例著議政王大臣等察議尋議多諾應革去左都御史佐領本身所得世職并解所襲伊父拜他喇布勒哈番又一拖沙喇哈番令應襲人承襲納布應革去侍郎佐領勒爾錦尚善等前後奏請糾錯事平議罪阿範係候補侍郎二等阿達哈哈番俱應革去發江西軍前充伍議上命留多諾佐

領及伊父世職。留納布佐領。餘依議。○以翰林院掌院學士喇沙里克經筵講官。○陞護軍叅領杭奇為正白旗蒙古副都統。○壬戌諭在荆岳大將軍等。今大將軍安親王由江西進取長沙。爾等應發兵夾剿。前者荆州添設綠旗兵。及烏鎗兵甚多。貝勒察尼。又率兵赴彝陵。已數月矣。尚未奏捷。順承郡王勒爾錦等。或分現在荆州兵。或調可緩地方之兵。速發長沙。倘彝陵賊未能即破。察尼等應量留官兵於彝陵。遣餘兵與荆州兵合。或由雲溪驛。或由別路。酌量議定。并量度安親王將抵長沙之期。彼此開會協力齊進。斷賊糧道。夾攻長沙。貝勒尚善亦分遣官兵與荆州彝陵兵同往。尚善等仍作攻取岳州之勢。移兵逼之。如機有可取。即取岳州。爾等率大兵駐荆岳將及二載。糧費師老。並未得尺寸之地。坐失事機。罪不勝數。今安親王進攻長沙。若又不發兵夾剿。俾賊偵知。荆岳按兵不動。死

守長沙要路。則爾等貽誤之罪更大矣。其遣發之兵。誰可統率。著公議遣往。無分彼此。同心協濟。務期有裨國事。○定遠平寇大將軍和碩安親王岳樂疏言。偽總兵張存遣使來言。閩逆軍餉匱乏。恣意剝削。軍士逃亡。百姓怨讟。張存有兵八千人。屯於順昌。不聽耿逆調遣。又偽總兵羅元生等。統兵固守其地。邵武總兵彭世勳。雖降逆而按兵不動。此皆耿逆之內患也。若大兵自江西進閩。伊等即為內應。但臣現赴長沙。剋期進發。伏乞

睿鑒詳度。無失事機。疏聞。

上諭。招徠逆賊。克取福建。令大將軍簡親王。副將軍希爾根。將軍額楚。總督董衛國等。相機以行。至於進攻長沙。剿滅吳逆。惟王是賴。但恐逆賊。覘知我兵進取長沙。固守袁吉。阻我兵行。王或揚言取道別路。出其不意。或合兵前進。或兵分數道。在王必有定見。其悉心籌畫。萬全務速行之。○予故一等阿思哈尼哈

番鄂木布。祭葬如例。○癸亥。

上自南苑奉

太皇太后回宮。○甲子。以故三等阿思哈尼哈

番得爾格爾子關寶襲職。○乙丑。

上詣

太皇太后

皇太后宮問安。○以冊立皇太子。遣官告祭

天地。

太廟。

社稷。○以翰林院侍讀學士察庫。充日講起居

注官。○丙寅。

上以冊立皇太子。御太和殿。遣輔國公葉伯舒

都統大學士圖海為正使。戶部尚書覺羅勒

德洪。兵部尚書王熙為副使。是日。立皇子允

初為皇太子。

上率諸王。貝勒。貝子。公。及內大臣。大學士。都統

尚書。精奇尼哈番。侍衛等詣

太皇太后。

皇太后宮行禮。○戶部議覆湖廣道御史郝浴

疏言。京通各倉共計新舊積貯。不下七百萬

石。當茲米多銀少之時。可將山東。河南。額徵

正耗米。停其買運。每石折銀八錢。並節省行

月潤耗等銀。可得銀六十萬兩。以濟軍需。應

如所請。於康熙十五年分折徵克餉。從之。○

丁卯。

上御太和殿視朝。王。貝勒。貝子。公。及文武各官

表賀建儲行禮。是日。頒詔天下。詔曰。自古帝

王繼

天立極。撫御寰區。必建立元儲。懋隆國本。以綿

宗社無疆之休。朕纘膺鴻緒。夙夜兢兢。仰惟

祖宗謨烈。昭垂付託至重。承祧衍慶。端在元良。

嫡子允初。日表英奇。天資粹美。茲恪遵

太皇太后

皇太后慈命。載稽典禮。俯順輿情。謹告

天地。

宗廟。

社稷。於康熙十四年十二月十三日授允初以冊寶。立為皇太子。正位東宮。以重萬年之統。以繫四海之心。大典告成。洪恩宜霈。所有合行事宜。開列於後。於戲。主器得人。益篤靈長之祜。綸音式渙。用昭浩蕩之仁。布告中外。咸使聞知。○詔內恩款共三十條。○陞內閣侍讀學士孔郭岱翰林院侍讀學士陳廷敬並為詹事府詹事。○戊辰。轉兵部右侍郎郭四海為左侍郎。陞內閣學士吳努春為兵部右侍郎。○辛未。予故江南水師總兵官張大治祭葬如例。○陝西總督哈占疏報候補遊擊梁勇等敗賊於漢中。下部議叙。○江西總督董衛國疏報左營遊擊周球等擊賊衆於贛縣。大敗之。千總張能把總郭虎俱戰歿。下部議叙。○壬申。陞戶部右侍郎介山為都察院左都御史。調兵部左侍郎郭四海為督捕左侍郎。○浙江定海總兵官朱萬化以病乞休。允之。○癸酉。平南親王尚可喜疏言逆賊劉

進忠勾引鄭錦入潮州。祖澤清勾引馬雄至高州。粵東十郡竟失其四。今將軍舒恕總督金光祖復退回肇慶。事勢危急。聞和碩安親王由袁州進攻長沙。恐時當春水汎溢。且吳逆全力集於常澧。其守禦必堅。請以公倭赫之兵。仍駐袁州。令和碩安親王赴廣東撲剿賊寇。

上諭。吳三桂未滅。故諸賊得以猖狂。今安親王進取湖南。則粵東之勢自緩。若由粵東進兵。則道路迂迴。稽延時日。前以粵東危急。已命大將軍簡親王發每佐領甲兵二名馳赴應援。此兵到日。平南親王與將軍舒恕等公同議固守疆圉。剪除逆賊。又諭簡親王喇布曰。前以粵東告急。命爾發每佐領甲兵二名速赴應援。至今尚未遣發。殊悞事機。今再撥每佐領護軍一名。并前所發兵。或副都統額赫納。或署副都統宗室巴爾堪。令一人為將軍。統之。速赴廣東。毋得仍前遲滯。以悞軍機。

喀爾喀扎薩克圖汗遣使進九白年貢宴賚如例○陞浙江金華副將牟大寅為福建右鎮總兵官○甲戌。

上詣

太皇太后宮問安○順天府進春○乙亥寧南靖寇大將軍多羅順承郡王勒爾錦疏言臣等身在地方自擊逆賊情形今若不速行渡江前進必致餉匱師老馬匹疲乏細籌之若得滿兵每佐領十名則戰守自足今調集各

路兵合在荆之兵每佐領得四名半乞再發禁旅每佐領五名便可渡江剿賊

上責之曰方吳三桂之初叛也即命大將軍順承郡王勒爾錦等率精兵往討賊來甚速其力必疲勒爾錦等不乘此時擊之但頓兵荆州故賊得以其暇據有湖南厥後大兵齊集又不剋期渡江賊於是得固守要害犯我彝陵撥廠所由實因勒爾錦及叅贊巴爾布伊爾度齊碩岱等耽延時日不急討賊故逆賊

滋蔓耿精忠孫延齡相繼叛亂前因欲渡江擊賊請發官兵已添發滿洲蒙古兵數千綠旗兵一萬而究未得湖南尺寸地今復請兵豈果欲速滅賊寇亦不過冀免逗留之罪耳巴爾布伊爾度齊碩岱等著俱解叅贊留任効力贖罪○丙子

上詣

太皇太后宮問安○陞翰林院侍讀學士察庫為內閣學士兼禮部侍郎○丁丑先是

上諭議政王大臣等曰秦省要區叛賊王輔臣亟宜剿滅著提督陳福整頓標兵或併力克取固原或會同大將軍貝勒董額等進攻平涼令同副都統恰塔商酌以行至是陳福奏固原有賊萬餘若舍此竟趨平涼恐固原賊出斷我糧道應俟賊勢少衰進逼固原量留官兵圍困其城臣乃率兵赴平涼方無後慮上諭陳福身在地方熟悉賊形著如所請速取固原以遏賊勢○調禮部右侍郎伊桑阿為

戶部右侍郎。轉兵部右侍郎。吳努春為左侍郎。調刑部右侍郎。郭丕為兵部右侍郎。○予故隨征福建右鎮總兵官李奇芳祭葬如例。

○戊寅。

上御太和殿視朝。文武陞轉各官謝恩。○

上詣

太皇太后宮問安。○己卯。諭四子部落多羅達爾漢卓禮克圖郡王沙克都爾曰。鎮守宣府察哈爾兵反叛。爾即欲領兵征剿。遣使來奏。可嘉。故以朕所服貂裘。天馬皮掛皂鞢等物。賜汝。○壬午。歲暮。祫祭。

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后。○遣官祭太歲之神。○癸未。

上詣

太皇太后宮問安。○陝西臨鞏總兵官王進寶。振武將軍佛尼勒。靖逆將軍侯張勇等疏報。會勦逆寇於西河縣。三戰三敗之。斬獲甚衆。下部議敘。○旌表八旗滿洲蒙古漢軍節婦二十九人。直隸各省節婦七人。烈婦一人。給銀建坊如例。○是歲。人丁戶口一千六百七萬五千五百五十二。田地。山蕩畦地。五百七萬三千四百五十八頃六十三畝。徵銀二千六十三萬五百二十七兩六錢有奇。米豆麥。五百二十八萬三千四百五十二石七斗有奇。草。二百二十五萬三千八十七束。茶。十五萬三千七百三十五引。行鹽。三百七十五萬六千八百三十七引。徵課銀。二百二十九萬三千五百八十三兩有奇。鑄錢。二萬九千三百四十七萬六千六百有奇。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之五十八

實錄卷五十八

二十七

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之五十九

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十五年丙辰春正月甲申朔

實錄卷五十九

一

上詣

堂子行禮還宮拜神畢率諸王貝勒貝子公內
大臣大學士都統尚書精奇尼哈番侍衛等

詣

太皇太后

皇太后宮行禮停止朝賀筵宴○朝鮮國王李

燾遣陪臣權大運等表賀冬至元日

萬壽節及進歲貢禮物宴賚如例○丁亥

上詣

太皇太后宮問安○諭兵部土默特都統古魯副都統席第夸蘭大噶爾馬席希鄂爾徹等率所部兵如期赴調可嘉事平日議叙○江西總督董衛國疏言江西提督趙國祚等率標兵三千名隨和碩安親王進取長沙以致綠旗官兵缺額頗多江西伏莽未靖防守之兵似不宜少請酌量加增以備守禦

上命見駐九江貴州提督趙賴就近募兵三千暫令統之即以此兵分屬將弁李廷獻等八

實錄卷五十九

二

人時加訓練○理藩院員外拉篤祜疏報康熙十四年十二月二十二日寧夏提標兵變提督陳福遇害

上諭寧夏三邊要地所關綦重可令將軍侯張勇巡撫花善即速會議如鞏昌無虞分一人赴寧夏慰諭官軍其副都統恰塔所領兵及員外郎拉篤祜所領土默特兵應駐防靈州定邊等處陳福被害之由著總督哈占巡撫杭愛察實具奏○諭兵部提督陳福已為亂

兵所害秦省提督職任重大宜得賢能以資彈壓西寧總兵官王進寶忠誠克殫勞績素著著授為陝西提督暫駐秦州仍兼理西寧總兵官事其寧夏總兵官員缺聽將軍侯張勇巡撫花善遴補○戊子

上詣

太皇太后宮問安○揚威大將軍和碩簡親王喇布疏報副都統阿喀尼率領官兵於十二月十八日敗賊葉廷珪等於南安洲擒斬甚

實錄卷五十九

一

衆獲偽印劄器械無算下部議叙○己丑孟春享

太廟

上親詣行禮○遣官祭太歲之神○庚寅世祖章皇帝忌辰遣官祭

孝陵○

上詣

太皇太后

皇太后宮問安○辛卯祈穀於

上帝。

上親詣行禮。○陝西總督哈占等疏言。寧夏係兩河重地。兵變之後。人心皇皇。亟宜補授提督。統理諸軍。得旨。王進寶已授陝西提督。其寧夏總兵官。已命張勇等遴選。至秦省不能即定。皆由平涼未下。王輔臣未滅之故。目前攻取平涼。最為緊要。陳福既被害。大將軍貝勒董額與將軍侯張勇。總督哈占等。宜相機公議。速定平涼。斷賊餉道。綏靖地方。○江西總督董衛國疏報。副將吳友明等大破賊寇。恢復新昌上高二縣。得旨嘉獎。下部議叙。○

癸巳。以建儲。加上

太皇太后

皇太后徽號。遣官告祭

天地。

太廟。

社稷。

上詣

太皇太后宮行禮。恭上奏言。

聖祖母昭聖慈壽恭簡安懿章慶敦惠溫莊康和太皇太后陛下。厚載承天。安貞配地。臣祇遵懿命。懋建元儲。仰惟垂裕之仁。莫罄顯揚之願。敬稽彝典。晉奉

徽稱。用答啓佑之深恩。永介升恒之景福。伏祈聖慈。俞鑒。俾展微忱。綿祿位名壽於無疆。合子孫臣民而共戴。臣不勝惓惓之至。謹奏。又詣皇太后宮行禮。恭上奏言。

聖母仁憲恪順誠惠皇太后陛下。懿德光昭。徽音懋著。臣祇遵慈命。建立元儲。溯積慶之有源。念尊親之罔極。爰修彝典。恭進

徽稱。伏祈

聖慈。俞允。俾展微忱。用綿昌熾之祿。益大邦家之慶。臣不勝惓惓之至。謹奏。○甲午。

上率諸王。貝勒。貝子。公。內大臣。大學士。都統。副都統。尚書。侍郎等。恭奉冊寶。詣

太皇太后宮行禮。冊文曰。徽音錫祚。啓萬年昌後之祥。顯號揚休。合四海尊親之戴。慶流寰宇。喜溢宮闈。欽惟

聖祖母昭聖慈壽恭簡安懿章慶敦惠溫莊康和太皇太后德協坤元。社隆天佑。贊襄

祖烈。垂奕葉而不顯丕承。燕翼孫謀。繼重熙而卜年卜世。茲者祇遵

慈命。建立元儲。仰惟垂裕之深思。肅舉顯揚之鉅典。謹告

天地。

宗廟。

社稷。率諸王。貝勒。文武羣臣。恭奉冊寶。加上

徽號曰。

昭聖慈壽恭簡安懿章慶敦惠溫莊康和仁宣太皇太后。伏願弘庥。濟至景福。彌隆長介壽祺。茂升恒於有永。備膺純嘏。綿曆服於無疆。寶文曰。

昭聖慈壽恭簡安懿章慶敦惠溫莊康和仁宣

太皇太后之寶。恭奉冊寶。詣

皇太后宮行禮。冊文曰。慈徽啓後。衍景祚於洪圖。懿範垂庥。晉隆名於鉅典。惟盈朝野。慶洽宮闈。欽惟

聖母仁憲恪順誠惠皇太后德茂安貞。仁符厚載。勤宣內治。佐

皇考以詒謀。懋著

母儀。訓眇躬而敷政。茲元儲之懋建。宜顯號之崇加。謹告

天地。

宗廟。

社稷。率諸王。貝勒。文武羣臣。恭奉冊寶。加上

徽號曰。

仁憲恪順誠惠純淑皇太后。伏願茂增福嘏。益介壽祺。彤管揚輝。令聞丕光於四海。璇宮迪吉。彝章永播於萬年。寶文曰。

仁憲恪順誠惠純淑皇太后之寶。○湖廣總督蔡毓榮疏報。副將四什六等破賊。楊來嘉於

黃寶山殺獲無算下部議叙○乙未

上御太和殿王以下文武各官上表行慶賀禮
頒詔天下詔曰朕惟帝王綏理萬方首崇孝
治尊親之典因事加隆至建立元儲懋敷國
本尤必推原懿德上晉徽稱此歷代不易之
盛軌也欽惟我

聖祖母昭聖慈壽恭簡安懿章慶敦惠溫莊康
和太皇太后佐

皇祖太宗文皇帝肇造丕基啓

皇考世祖章皇帝恢弘大業

聖母仁憲恪順誠惠皇太后母儀茂著克嗣徽
音朕奉事慈闈並承訓育紹基圖治宵旰靡
寧茲者祇遵懿命冊立皇太子禮成仰惟垂
裕之仁式舉顯揚之典謹告

天地

宗廟

社稷於康熙十五年正月十一日率諸王貝勒
文武羣臣恭奉冊寶加上

聖祖母昭聖慈壽恭簡安懿章慶敦惠溫莊康
和太皇太后徽號曰

昭聖慈壽恭簡安懿章慶敦惠溫莊康和仁宣
太皇太后

聖母仁憲恪順誠惠皇太后徽號曰

仁憲恪順誠惠純淑皇太后慶禮告成恩綸宜
沛於戲崇儀顯號昭令範於千秋錫類推恩
洽歡心於四海布告中外咸使聞知○詔內
恩數共九條○

上詣

太皇太后

皇太后宮問安○

上御景山前殿命親王以下宗室十五歲以上
齊集校射賜宴○丙申諭禮部工部

仁孝皇后陵寢已卜定於

孝陵附近之山理應備依典制營建但目今軍
需浩繁民力維艱著將地宮先行修造其餘
一應工程候國用充足之日次第舉行著即

選擇吉期並應行事宜詳議以聞○揚威大將軍和碩簡親王喇布疏報逆賊圍困東鄉縣隨遣夸蘭大索倫遊擊牛鳳翔等於十二月二十八日殺敗賊衆陣斬逆賊朱三其城內總兵官蔡璋亦出城合剿追殺數里東鄉圍解下部議叙○先是寧南靖寇大將軍多羅順承郡王勒爾錦奏請益兵詔旨詰責至是疏請處分

上復切責之曰勒爾錦統領大兵進剿逆賊二載有餘未獲尺土以致師老餉匱坐失機宜今不直陳其罪又巧飾具奏殊為不合應即處分但見在進兵俟旋師之日嚴治其罪○揚威大將軍和碩簡親王喇布疏言署副都統尼滿雅秦率兵來自江寧臣即遣往更替建昌之兵又令夸蘭大紀圖堪色赫率廣信兵每佐領一名於正月初三日自南昌先赴廣東其建昌兵到時令副都統額赫納率往得旨粵省需兵甚急故前撥江省大兵每佐

領二名尋撥每佐領一名復屢催速赴廣東乃至今尚未全發殊悞軍機自後一切調度事宜務遵旨速行○靖逆將軍甘肅提督侯張勇疏言天津總兵官趙良棟向隨臣征剿著有功績精明歷練才畧過人臣所深悉請調補寧夏總兵官敕由邊路兼程速赴得旨寧夏要地職任宜重其總兵員缺著改為提督即以趙良棟陞補令其兼程速赴提督陳福為國捐軀忠誠顯著陳福弟涿州叅將陳奇即著超補天津總兵官○丁酉諭兵部督捕衙門逃入事情關係重大前因立法太嚴恐致百姓株連困苦故將條例屢行更改減定期於兵民兩益近見各該地方官奉行疎玩緝獲日少深有未便應遣部院大臣會同爾衙門將新舊條例逐一詳定務俾永遠遵行○陞通政使馬喇為禮部右侍郎內閣學士禪塔海為刑部右侍郎○以翰林院侍讀牛紐充日講起居注官○隨征福建中路總

兵官黃芳世疏報海逆鄭錦攻圍漳州。臣弟海澄公黃芳度率眾堅守。於康熙十四年十一月二十日。總兵官吳淑等潛通逆賊。引兵入城。臣弟奮力巷戰。勢不能支。遂赴開元寺投井身死。賊復撈屍寸磔。全家男婦盡被殺戮。故叔海澄公黃梧亦遭虜棺拋棄。標下將弁蔡隆、朱武等悉遭慘殺。臣見在少傅公尚之信軍前。聞信慘切。具疏報聞。得旨。海澄公黃芳度保守孤城。力拒逆賊。矢志忠貞。勞績素著。今據奏叛弁通賊。以致城陷。黃芳度全家殉難。深可憫惻。作何恩卹。著從優議叙。○戊戌。

上御太和殿視朝。文武陞轉各官謝恩。次喀爾喀進貢使臣等行禮。○浙江巡撫陳秉直疏報。招撫遂安縣等處耿逆下偽官汪飛龍等一百五十餘員。兵五千名。下部議叙。○辛丑。

上詣

太皇太后

皇太后宮問安。是日幸南苑行圍。○陞平南王下副都統尚之瑛為都統。○癸卯。陞潼關副將費雅達為陝西漢中總兵官。○予故太子太保議政大臣滿洲都統覺羅伊爾門祭葬如例。○揚威大將軍和碩簡親王喇布疏報。副都統額赫納席布等大破麻姑山賊王永召及從姑山賊李懋珠等。擒斬甚眾。又遊擊陳啓善等破賊余流。保於萬年縣。下部議叙。○江西總督董衛國疏報逆賊楊玉太占踞界山。窺伺建昌。撫建廣總兵官許貞率兵攻却之。又破賊於教家渡。蕭家壩等處。賊眾奔潰。斬獲甚多。下部議叙。○甲辰。

上幸西安祖行圍。○乙巳。授多羅貝勒察尼庶出子德福多羅貝勒昌阿岱庶出子席倫席圖俱為奉恩將軍。輔國公化善子善代為輔國將軍。○予故經筵講官兵部督捕左侍郎食一品俸折庫納祭葬如例。○丙午。

上自南苑回宮。詣

太皇太后

皇太后宮問安○戊申。

上御太和殿視朝。文武陞轉各官謝恩○諭大將軍多羅貝勒董額等。今將軍侯張勇請赴寧夏。秦州諸處。兵力甚單。大將軍貝勒董額。將軍席卜臣。總督哈占等。視地方緩急。將西安近地之兵應撤者。速行撤回。發往秦隴。聽將軍佛尼勒提督王進寶等酌量調遣。以裨戰守○乙酉。

上詣

太皇太后宮問安○遣宗人府府丞馬汝驥等。

祭嶽鎮海濱。

歷代帝王陵寢。

先師闕里○命索額圖熊賜履梁清標介山折爾肯達哈塔田六善詳定逃人律例頒行天下○達賴喇嘛班禪胡土克圖遣使進貢賞賚如例○庚戌。

上召開列經筵講官塞色黑等至御前親試命

各講書○陞太僕寺卿党務禮為內閣學士兼禮部侍郎詹事孔郭岱為通政使司通政使○陞鑲紅旗滿洲副都統肯車黑為都統○以覃恩加一等公內大臣法保一等公彭春三等公倭赫和碩額駙尚之隆耿聚忠和碩額駙品級耿昭忠等太子太保加一等公噶布喇坡爾盆三等公內大臣費颺古衍聖公孔毓圻慕義公孫徵灝和碩額駙訥爾杜等太子少師○予故太子太保內大臣穆福祭葬謚襄壯○揚威大將軍和碩簡親王喇布疏言總督董衛國前請親統官兵進剿餘干諸處逆賊留撫臣佟國楨於南昌整理地方事宜臣思省城兵力單弱督臣不便他出贛州為江西門戶投誠將士雜處彈壓需人請留總督董衛國於省會令巡撫佟國楨速赴贛州經理從之○壬子。

上詣

太皇太后宮問安○以兵部督捕左侍郎郭四

海翰林院侍講學士庫勒納充經筵講官○
贈福建陣亡守備李吉為遊擊予祭葬廕一
子以衛千總用

二月癸丑朔平南王尚可喜疏言臣病日劇
寇在門庭臣子尚之孝又統兵在潮臣軀恐
有不測則粵省漸至危急請遣威望大臣星
馳抵粵以資彈壓疏入得旨王累世勲舊奇
猷重望久鎮巖疆勞績懋著自逆賊變亂以
來王篤守忠誠殫抒籌畧訓練士卒保障地
方剿禦賊寇朕所倚毗今覽王奏稱年老漸
衰身嬰痾疾請遣大臣經理廣東事務具見
王實心為國計慮周詳朕與王情同父子誼
猶手足覽疏未竟朕心惻然但王屬官兵駐
鎮日久地方寧謐措置咸宜軍民依賴若別
遣大臣前往恐該省之事一時未能周知所
關匪細王可於諸子中擇才畧素優者遣赴
潮州整理軍務大將軍平南王尚之孝回省
城侍王左右扞衛封守王其加意調護期於

平復以慰朕憂慮眷念至意○乙卯陞刑部
郎中薩穆哈為太僕寺卿○丁巳

上詣

太皇太后宮問安○

上諭兵部湖南百姓遭亂以來困苦萬狀賊糧
匱勢窮恣行剽掠百姓罹其荼毒如在湯火
今大兵剋期進發正解民倒懸之日其令大
將軍等遣賢能官同地方官宣布撫民教諭
凡恢復城池後勿妄殺掠以輯人心以綏地
方○陞兵部督捕左理事官邵甘為詹事府
詹事○戊午春分朝

日於東郊

上親詣行禮○命大學士李蔚禮部尚書吳正
治為會試正考官吏部右侍郎宋德宜左副
都御史田六善為副考官○平南王尚可喜
疏言逆賊馬雄董重民等乘高雷變叛益肆
猖獗滿漢大兵退駐肇慶潮逆劉進忠引海
寇入犯提督及平南大將軍等皆退至惠州

請大兵兼程前赴應援。

上諭兵部。項據簡親王報。以每佐領護軍一名。驍騎一名。交副都統額赫納。於正月初十日。前赴廣東。今粵省告急。可令額赫納等倍道速進。○調鑲紅旗蒙古副都統洪世祿。為滿洲副都統。○平南王尚可喜疏報。副都統穆承格等。率領官兵。恢復始興縣。得旨嘉獎。下部議叙。○己未。經筵講官喇沙里。徐元文。奏經筵講章。

上諭曰。嗣後經筵講章。稱頌之處。不得過為溢辭。但取切要有裨實學。其諭各講官知之。○賜新授寧夏提督趙良棟。鞍馬弓矢甲冑及貂衣一襲。白金五百兩。并撤

御饌一筵。賜之。○加鑾儀衛鑾儀使許天寵。太子太保。充廣東援剿提督兼管水師營事。

庚申。

太皇太后聖壽節。

上率諸王以下文武大臣侍衛等詣

太皇太后宮行禮。遵

懿旨。停止筵宴。○諭兵部。粵東用兵二載。各將弁勞苦。自總兵官以下。把總以上。俱各加一級。仍領本職如故。○先是寧夏提督陳福遇害。

上令副都統恰塔等駐守靈州。定邊諸處。至是恰塔等疏言。臣等移駐靈州。定邊中有黃河之隔。寧夏有事。猝難即至。臣請率所部兵屯於黃河對岸。以扼兩路要害。

上因命恰塔等協守寧夏。以安撫軍民。又諭兵部。提督趙良棟。今兼程速赴寧夏。軍機緊要。趙良棟抵寧夏之日。一切軍務機宜。恰塔。拉篤祜等。俱與趙良棟會商行事。○辛酉。旌表烈婦陝西會寧縣典史汪玉虹妻陳氏。以罵賊不辱。投井身歿。給銀建坊。并令立碑於墓。○江西總督董衛國疏報。偽都督蕭鎮國等率領賊眾。窺伺新昌縣城。遊擊林科。知縣盧煌等。分路衝殺。攻破黃茆嶺等處營寨。陣斬

偽副總兵陳敬等。二十七員。賊兵一千四百餘級。獲偽印劄器械無算。下部議叙。○壬戌恭建

仁孝皇后地宮興工。○諭兵部。大將軍貝勒董額等屯兵平涼日久。賊寇尚未剿滅。城池尚未恢復。夫秦省不能即定。川賊尚在窺伺者。皆由王輔臣未剿滅。平涼未克取故也。其以都統大學士圖海為撫遠大將軍。率每佐領護軍二名。並赴陝西。總轄全省滿漢大兵。斷賊餉道。剿滅平固逆孽。速靖地方。大將軍抵平涼時。盡收各將軍敕印。遇有分遣酌量給付。其貝勒董額以下悉聽大將軍節制。○癸亥。

孝康章皇后忌辰。遣官祭

孝陵。○

上詣

太皇太后

皇太后宮問安。○甲子。以翰林院侍讀吳國對

提督順天學政。○甘肅巡撫花善疏報逆賊吳之茂。自四川出犯。踰風水嶺。漸逼鞏昌。

上命將軍侯張勇。速自寧夏還鞏昌剿禦。○旌表直隸節婦冀州李氏。元氏縣張氏。黃縣李氏。霸州李氏。大城縣胡氏。保定縣趙氏。涿州張氏。三河縣劉氏。鉅鹿縣楊氏。新城縣任氏。宣府前衛田氏等。各給銀建坊如例。○乙丑。諭議政王大臣等。見駐寧夏滿洲蒙古大兵無人統轄。其仍授都統畢力克圖。平逆將軍印。止以所部前鋒赴寧夏。統轄滿洲蒙古兵鎮守地方。俟草青時。酌調鄂爾多斯兵協力進取平固。○予故內大臣夸巴特馬祭葬如例。○丙寅。

上詣

太皇太后宮問安。○免江西南昌寧州等十七州縣衛。康熙十四年分旱災額賦有差。○浙江總督李之芳疏報衢州逆賊負固河西。又賊黨王國忠。帶領賊兵屯聚河南地方。轉運

糧草。臣與平南將軍賴塔會商。令叅將趙得勝率兵前進。連破三關。陣斬偽遊擊都司等員。焚燬賊巢。殺獲無算。下部議叙。○丁卯。遣大學士杜立德。祭

先師孔子。○戊辰。祭

大社。

大稷。

上親詣行禮。○定西大將軍多羅貝勒董額疏言。駐札平涼官兵。已分遣副都統希福率之

調守隴州諸處。平涼兵力單薄。請旨酌增。

上命增派每佐領驍騎一名。付大將軍圖海率往。抵河南日。大將軍另調河南兵赴平涼。即留此所帶之兵。駐守河南。尋又令大將軍圖海。選河南撫鎮標下烏鎗手二百人。并查西安出征物故人等廝役。令披甲。領赴平涼。○陝西總督哈占疏言。寧夏與鄂爾多斯接壤。今乘內地有事。蒙古入邊。侵掠寧花寨。平羌等堡。

上命理藩院郎中額業圖為署副都統。馳驛赴鄂爾多斯。以剗掠情狀。曉諭其王貝勒等。令其嚴禁。毋入內地。擾害。仍令鄂爾多斯兵。整理甲冑器械。以俟調遣。○己巳。平南王尚可喜疏報。賊犯惠州。肇慶諸處。省會危急。

上諭。粵省要地。倘有疎失。為害不小。項雖調遣江西兵。仍恐單薄。今以兗州每佐領驍騎兵一名。蒙古兵七百名。調赴江寧。其見駐江寧每佐領驍騎兵一名。蒙古兵六百名。及駐防徽州。池州。滿洲蒙古兵七百名。令將軍哈爾哈齊統領。馳赴粵東。如有稽遲。坐以失誤軍機之罪。其哈爾哈齊所用平冠將軍印。留付副都統科爾科代。鎮守江南。其徽州。池州。餘兵七百名。恐難捍禦地方。或令見駐安慶提督。移鎮池州。或撥蘇州駐防五百甲兵。往駐徽州。將軍總督等。公同酌量調遣。至山東兗州戍防。不可無兵。大將軍圖海所統兵內。分每佐領一名。往山東駐守。俟盛京兵到時。遣

發圖海軍前○庚午。

上詣

太皇太后

皇太后宮問安○以原任總兵官班際盛為廣東高雷總兵官○加湖廣提督桑峨右都督銜以岳州敗賊功議叙也○辛未遣官祭先農之神○諭兵部前命康親王傑書為大將軍平定閩省王奏先滅浙寇再進福建即允其請後授貝子傅喇塔為將軍進取黃巖乃借稱修橋備船展轉遷延為日甚久屢下詔嚴催始取黃巖前赴溫州其時曾言紅衣礮至即取溫州今據王報稱礮已齊集而溫州之得與未得並未聲明師行猶豫若此何時始得入閩王貝子率領大兵駐浙曠日持久以致師老餉匱今溫州如剋期可取即當速行進取倘不能即克宜酌量分兵留守王親統大兵即克取福建如仙霞嶺路險難進或由分水關入或別從何道而進當相機作

速進兵福建一定則江西之兵可以全力剿賊而吳三桂亦可指日滅矣王貝子係朕懿親大小將弁皆素所信任當各効心膂奮力前驅如仍瞻顧不前則師益老餉益匱貽誤大事莫此為甚王等其勉副委任乘此事機作何進止速議以聞○以平南藩下護軍統領時應運為中鎮總兵官三等阿達哈哈番李挺秀為護軍統領○以湖廣提督王可臣為鑾儀衛鑾儀使○壬申遣官祭

歷代帝王○子故江西巡撫白色純祭葬謚勤僖○癸酉

上至鞏華城道中諭扈從諸大臣及侍衛等曰朕周視沿途田間春麥正當盛長著傳諭扈從官員人等悉循路而行勿得蹂踐春田其嚴禁之○諭大學士索額圖等近發內帑銀十萬兩與提督趙良棟賞給軍民今在平涼大兵及綠旗兵俱勤勞報効大將軍圖海前往亦可酌議發帑給賞川中撤回之兵前攻

取朝天七盤等處後又圖取秦州効力甚多。凡失事皆在主將非關軍士可寫諭旨二道與大將軍圖海令申飭諸將其總督巡撫亦有失事之責宜嚴行曉諭議政王貝勒大臣會議行之○厄魯特噶爾丹台吉遣使進貢賞賚如例○甲戌清明節遣官祭

永陵。

福陵。

昭陵。

孝陵。

仁孝皇后○陞王府長史阿爾瑚為鑲紅旗蒙古副都統○諭兵部貝勒尚善等統率大兵往駐岳州將及二載並未移師前進作攻城破賊之勢因循坐守徒令師老財匱今因大將軍安親王由袁州進取長沙湖南逆賊遂欲分我大兵之勢來犯江廣前據報岳州賊眾分遣往援彝陵等處則岳州賊勢已分貝勒尚善貝子章泰公蘭布皆朕懿親委以重

任都統朱滿護軍統領額司泰副都統路什阿晉泰前鋒統領噶爾弼等皆以勝任擢用巡撫韓世琦提督桑峨亦以才幹著稱擢付封疆重任今岳州滿洲蒙古之兵為數不少又提督桑峨標下士卒頗多湖南賊勢既分即應整理甲兵為進取岳州之勢可取則取不可取須覘賊虛實或發兵聲言過岳州取長沙賊出即擊殺之使逆賊之勢潰亂不能分援他處則江西廣東可以少息而大將軍安親王亦從容克取萍鄉進圖長沙矣尚善等並不思剿滅賊眾恢復地方副朕委任之意又不逼近偵探逆賊情形度有機會奮力前進賊兵分遣各處安坐罔聞止知自守汛地各保身軀不能少進尺寸如謂逆賊深其濠塹多用火器以傷我軍如值大雨之時其火器尚可用耶總之不實心任事致賊得以任意應援貽誤軍機莫此為甚若仍前不改逆賊何日得滅地方何日得平尚善等以文

到日即宜作攻取岳州發兵長沙之勢以分賊力倘有機可乘速行進取如有未便將情由奏聞○先是廣東告急遣將軍哈爾哈齊統江寧兵赴援至是賊將高大傑等乘大將軍安親王岳樂進取袁州萍鄉之隙擁衆數萬圍吉安大將軍簡親王喇布以聞

上諭吉安為進通廣東要路今既被圍應速發兵救援駐江寧將軍哈爾哈齊於率赴廣東兵內選其半馳往南昌與大將軍簡親王副將軍希爾根等會商即於所帶兵及南昌兵內酌量派出領赴吉安破賊解圍通入廣之路此路既通哈爾哈齊仍率兵赴粵其所留江寧之兵交賢能夸蘭大侯宛州兵到即令過往吉安情形並移文大將軍安親王知之以便隨機策應○乙亥

上詣

太皇太后宮問安○諭理藩院鄂爾多斯台吉等率兵入邊勤勞効力殊為可嘉其見在軍

前台吉等各加一級○諭陝西諸將士我國

家自創業以來克敵攻城必主帥奮勇先登軍士効死戮力方能速建膚功今聞爾等凡與敵遇率皆乘間伺隙觀望不前但令士卒前驅衝突其督撫亦多坐失事機故致勞師匱餉因命都統大學士圖海為撫遠大將軍前往平涼總統諸軍爾等痛改前愆殫心圖効若仍蹈往轍一經大將軍指名劾奏必置重典至兵士行間勞苦朕已悉聞爾等衆兵宜體朕恭養之恩益奮勇効力果建功勲不吝爵賞爾等勉之○諭平涼滿漢軍士爾等年來各處征剿為國効力之處朕悉聞知今圍攻平涼屢次衝鋒陷陣奮勇殺賊嚴冬掘壕遠道樵採備歷艱苦朕心深為憫惻茲命撫遠大將軍太子太傅都統大學士圖海統率禁旅往討逆賊雖目前國用殷繁念爾等戮力行間勤勞已久特發帑金五萬齎至軍前普加恩賜以昭朕優恤之意爾等同心協

力益勵忠義速剪賊寇朕不吝復加優賞爾等勉之○江西總督董衛國疏報吉安被陷得旨吉安關係最重大將軍簡親王喇布副將軍希爾根總督董衛國等速議恢復以通粵路將軍哈爾哈齊率師星赴江西亦與簡親王等商議協力攻剿尋簡親王喇布奏覆欲暫棄廣信撤回將軍額楚等兵併調樂平兵剿滅吉安賊侯吉安恢復後再取廣信地方得旨廣信兵既撤回饒州似屬可虞簡親王等可確議固守饒州勿致有失○丁丑上御太和殿視朝文武陞轉各官謝恩次厄魯特喀爾喀進貢使臣等行禮○

上詣

太皇太后宮問安○賜撫遠大將軍都統大學士圖海以

御用衣帽及團龍補服黃帶等物又賜御乘名馬二匹散馬二百匹賜新陞廣東水路提督許天寵弓矢甲冑及內廐鞍馬一匹○禮部

議覆欽天監題本年五月朔日食據監副安泰云依古法推算應食五分六十秒又據治理曆法南懷仁云依新法推算應食二十微請遣官臨期登臺測驗從之○戊寅

上御太和殿鹵簿全設命大學士索額圖學士沙賴捧敕印授進剿陝西平涼等處撫遠大將軍都統大學士圖海圖海率隨征官弁等行禮又命禮部侍郎額星格兵部侍郎吳努春等送至郊外賜茶畢圖海率師起行○江西總督董衛國疏報大將軍和碩安親王岳樂統領大兵進剿逆賊將抵萍鄉相視地方形勢派滿漢官兵為四隊分道進擊大敗賊衆破其十二寨斬首萬餘級偽將軍夏國相棄印敗走遂復萍鄉縣得旨嘉獎下部議叙○諭兵部今安親王將賊固守之地攻破賊已喪膽宜即乘機直取湖南但我兵進取湖南時逆賊吳三桂或撤諸處賊兵往長沙抗拒亦未可知著行文荆岳大將軍王貝勒等

飭勒兵馬時加偵探乘機進剿○辛巳。

上御經筵○贈陝西殉難波羅營副將張國彦太子太保給拜他喇布勒哈番世職予祭葬其妻許氏同日殉難贈一品夫人○定西大將軍多羅貝勒董額疏報聞逆賊聲言將斷關山道臣擬遣兵往守但見在之兵甚少難以分發至於鞏昌雖有副都統翁愛率兵前赴而賊益逼近勢甚可虞

上諭關山險要之地將軍席卜臣總督哈占宜相地方緩急調各隘官兵守關山將軍侯張勇兼程速回同將軍佛尼勒等堵剿出犯秦鞏之賊自後一切軍機大將軍董額等一面奏聞一面具報大將軍圖海知之○壬午陝西提督王進寶等疏言賊薄秦州屯踞北山阻斷臨鞏之路秦州之兵無從覓餉且兵力單弱戰守皆難

上諭大將軍貝勒董額及將軍席卜臣佛尼勒都統赫業總督哈占巡撫杭愛花善提督王

進寶等逆賊來犯秦鞏如何堵剿大兵糧餉如何輓運不絕著公同商酌以行至席卜臣既遣夸蘭大聶勒庫率兵三百赴隴州隴州所有副都統希福亦宜酌量分兵應援秦州○旌表冀州孝子韓茂禧給銀建坊如例

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之五十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十五年丙辰三月癸未朔

實錄卷六十

上詣

太皇太后宮問安○諭兵部海澄公黃芳度自逆賊變亂以來矢志忠貞保守孤城剿殺逆賊屢建大功及叛將吳淑勾引逆賊潛獻城池海澄公遂督兵血戰率領闔家殉難以報國恩以盡臣節忠勇可嘉其優贈王爵賜謚忠勇照多羅郡王例遣大臣致祭令黃芳世仍襲海澄公爵黃芳泰給以拜他喇布勒哈番其同時殉難副將蔡隆贈右都督遊擊朱

武贈都督僉事各致祭一次廕子弟一人以守備用外委官張瓊陳謙戴隣等俱贈都司僉書廕子弟一人以千總用○甲申

上諭護軍統領傑殷於抵陝西時可同將軍佛尼勒提督王進寶都統赫業等會商戰守機宜以通鞏昌要路平涼兵勢既分則圖海未到之先貝勒董額宜加意警備至關山係秦州門戶希福等當固守其地若逆賊斷我餉道亟剿禦之○乙酉

實錄卷六十

上詣

太皇太后宮問安○丙戌陝西提督王進寶疏報臣於二月二十五日會同振武將軍佛尼勒等進兵剿北山逆賊賊渠吳之茂率眾迎敵大敗之生擒偽總兵徐大仁陣斬偽總兵四員偽參遊等二百餘員殺獲無算下部從優議叙○丁亥揚威大將軍和碩簡親王喇布疏報署副都統阿喀尼總兵官高登科等於二月十九日擊敗賊眾於萬年縣又偽總

兵王用等據鄱陽縣之沙蘭。東嶺等處聚集糧草。隨遣兵分擊之。焚賊巢餉。斬獲無算。下部議叙。○己丑。

上詣

太皇太后宮問安。○振武將軍佛尼勒疏報臣等遣發官兵。斷賊糧道。至羅家堡鹽關等處。地方遇賊。運送糧草。擊敗之。陣斬偽官兵弁甚衆。兼獲賊餉馬匹器械等物。下部議叙。○庚寅。奉命大將軍和碩康親王傑書疏言。臣

屢檄貝子傅喇塔。速取溫州。傅喇塔稱舟師不至。不能攻取。且檄催副都統穆赫林。紀爾他布。倭申巴圖魯。提督段應舉等。皆彼此瞻顧不前。臣察處州。台州。杭州。衢州。駐兵皆不便輕發。請調江寧廣信兩處兵。并調崇明。京口。戰船水師。以資進剿。

上諭。貝子傅喇塔。姑以待發紅衣礮為辭。今又云。必須戰船。且覽屢次移文。前後言語互異。並無定見。殊負委任。我朝用兵。紀律嚴肅。從

未有官兵抗違主帥。不遵軍令者。今副都統穆赫林等。違將令不前。蔑視國法。俟事平日

嚴加治罪。至江寧廣信兵。已調赴吉安。別無可調之兵。崇明。京口。係濱海重地。舟師不可分遣。王奏溫州大捷。斬獲二萬餘級。則餘賊無多。何難剪滅。速復溫州。且命王為大將軍。專委任。王以速定閩疆。並非欲王但居閒地。分遣諸將而已。今王駐劄金華。將及二載。不親統官兵進剿。徒以空文往來為事。則逆賊

何日可滅。王其速檄貝子傅喇塔。剋期取溫。如或不能。即撤回。傅喇塔暫駐金華。王即親往督率官兵。攻克溫州。合兵進取福建。毋得仍前遲延。瞻顧。貽誤軍機。負朕委任之意。○諭安遠靖寇大將軍多羅貝勒尚善爾等。統率大兵。閒坐日久。未嘗進寸步。朕指授軍機。惟以雨雪為辭。仍退縮不前。各執全軀保身之意。今安親王已復萍鄉。醴陵。二縣。進取長沙。湖南逆賊。豈盡棄他處而獨固守岳州耶。

揆此。則不實心用力之處。顯然矣。爾等宜痛

改前非。奮發効力。乘湖南逆賊騷動之時。仍

遵前旨。速行進兵。毋得坐失機會。○奉命大

將軍和碩康親王傑書疏報將軍固山貝子

傅喇塔等統兵圍困溫州。二月十七日夜。逆

賊耿精忠下偽都督曾養性。偽將軍祖弘勳

等。會合水陸四萬餘賊。來犯我軍。副都統紀

爾他布等。分路迎擊。悉敗之。陣斬偽都督孫

可得。偽總兵李節等三百餘員。殺賊二萬有

餘。仍撥官兵立營江岸。以遏賊衆青田去路。

賊勢大挫。下部議叙。○傑書又疏報。副都統

穆赫林等。敗賊於八帶橋。副都統馬哈達等

敗賊於張村。下部一并議叙。○辛卯。

上詣

太皇太后

皇太后宮問安。○以軍興。暫停康熙十六年大

計。○癸巳。安遠靖寇大將軍多羅貝勒尚善

等疏報逆賊吳三桂。遣偽將軍馬寶等。分路

應援長沙。

上諭曰。大將軍安親王兵。已經深入。今赴援之

賊甚多。恐相持遲延時日。貝勒尚善等。宜乘

機速行。攻取岳州。倘未可取。則分兵徑過岳

州。絕賊餉道。若慮岳州兵力單薄。可調武昌

兵以資防守。其彝陵諸處賊勢。既分。順承郡

王勒爾錦。貝勒察尼等。或攻破彝陵。上流賊

衆。或整理舟師。以張渡江之勢。俾賊潰亂。不

能救援長沙一帶。倘有機會可進。即渡江酌

量速進。至南漳逆賊。既經退回。即調南漳諸

處大兵赴荊州。并力破賊。大將軍王等。仍量

留官兵。同總兵官劉成龍防守南漳。○甲午。

寧南靖寇大將軍多羅順承郡王勒爾錦疏

報鎮安將軍都統噶爾漢等。調發襄陽滿漢

官兵。擊敗逆賊於南漳縣之靈機寨。焚其大

營。賊渠王會等遠遁。下部議叙。○乙未。

上詣

太皇太后宮問安。○丁酉。免直隸永清霸州等

五州縣衛所康熙十四年分水災額賦有差
○戊戌復設嶺南兵巡道一員嶺東兵備道
一員羅定州兵備道一員改廣肇道為嶺西
兵巡道惠潮道為嶺東兵巡道高羅道為嶺
西兵備道從平南王尚可喜請也○己亥

上詣

太皇太后宮問安○庚子

萬壽節

上率諸王貝勒貝子公內大臣大學士都統尚

書精奇尼哈番侍衛等詣

太皇太后

皇太后宮行禮停止朝賀筵宴○遣官祭

福陵

昭陵

孝陵○遣官祭真武東嶽城隍之神○辛丑諭

議政王大臣等大將軍安親王軍已深入湖

南亟宜添發大兵應援今大將軍圖海兵尚

在懷慶應以戍守河南兵每佐領驍騎一名

選才能者署為李蘭太率赴岳州其叅領胡
什霸額勒布暫駐懷慶再發京師每佐領驍
騎一名與盛京兵一千五百名合為一營令
叅領達漢泰沙禮統之抵河南日以盛京兵
五百名留與胡什霸等防戍河南餘令達漢
泰等率赴岳州前大將軍貝勒尚善等奏請
添發每佐領兵四名便可分遣由雲溪驛赴
長沙今所發禁旅并河南盛京兵已足每佐
領四名之數此兵未到時若長岳二郡尚未
恢復大將軍貝勒等酌撥官兵速援長沙與
大將軍安親王合兵攻取平定湖南其盛京
兵千名速添發大將軍圖海軍前○壬寅策
試天下貢士彭定求等於
太和殿前制曰朕惟自古帝王承乾立極綏
理萬邦莫不以厚風俗正人心為久安長治
之本其時化理敦龐民生樸茂海內羣黎咸
享豐亨豫大之休洵府事修和之成效也朕
荷

天眷佑嗣。續弘基。夙夜孜孜。期登上理。十有五年於茲矣。乃風俗未盡丕變。人心未盡還淳。閭閻之蓋藏未裕。軍興之輸輓猶繁。豈振興愛養之未得其道歟。何邛隆之難復也。夫俗尚澆漓。人多狙詐。君子長者之行。不少槩見。而告訐時聞。未能率迪於仁讓。其故何歟。且忠孝者。人生之大節也。知之明。則不惑於邪正。守之固。則不昧於順逆。乃人心不古。奸宄潛滋。所關世道。良非細故。豈親親長長之誼。素未講究歟。抑司教者之訓飭未備也。經國之道。不諱言財。況今戡定方殷。軍需孔亟。議生議節。亦既籌畫多方矣。而度支未見充盈。施行尚鮮實效。何道而使上有裨於經費。下無妨於休養歟。爾多士讀書懷古。留心經濟久矣。其各行所見。詳切敷陳。朕將親覽焉。○贈殉難陝西提督陳福公爵。給三等精奇尼哈番世職。予祭二次。謚忠愍。○江西總督董衛國疏報二月二十五日。撫建廣總兵官許

貞等敗賊於楊華山等處。斬偽總兵揭重信。建昌附近西南二面之賊。焚巢遁去。下部議叙。○揚威大將軍和碩簡親王喇布疏報署副都統阿喀尼等敗賊於奉新縣。下部議叙。○江西總督董衛國疏報千總趙廷棟以十五騎敗賊於吉水縣。斬偽副將謝玉元。下部議叙。○甲辰。

上詣

太皇太后宮問安。○副都統恰塔疏報平涼賊偽總兵陳甲等以步騎一萬五千餘人犯靈州。臣統官兵擊却之。下部議叙。○乙巳。上御太和殿傳臚。賜殿試貢士彭定求等二百九人進士及第出身有差。○

上幸南苑行圍。○浙江總督李之芳疏報三月初八日官兵恢復開化縣。招撫偽官六十餘員。賊兵五千餘名。救出難民一萬餘口。得旨嘉獎。下部議叙。○丁未。宴衍聖公孔毓圻等於禮部。○予故一等精奇尼哈番副都統博

通俄祭葬如例○己酉安遠靖寇大將軍多羅貝勒尚善疏報護軍統領額司泰副都統魯西巴圖魯等統領岳州水師於三月初九日進剿屢敗賊衆克取君山下部議叙○庚戌。

上自南苑回宮○振武將軍佛尼勒等疏報平涼偽總兵李國良率賊八千餘由靖寧來援秦州。

上命佛尼勒同靖逆侯張勇巡撫花善等商酌調度剿滅秦州援賊恢復靖寧○寧南靖寇大將軍多羅順承郡王勒爾錦疏報臣統大兵於三月十八日自荊州渡江前鋒恭領瓜爾察敗賊於南岸之文村又敗之於石首縣蕩寇將軍貝勒察尼又敗賊於太平街焚燬賊營下部議叙○辛亥鎮西將軍都統席卜臣疏報副都統鄂泰等敗賊於寶雞縣之紅崖堡下部議叙○壬子陞寧古塔協領席山為寧古塔副都統○以見駐九江貴州提督

趙賴為江西吉撫等處提督見駐湖口貴州左路總兵官馬雲程為九江總兵官○諭揚威大將軍和碩簡親王喇布吉安係通廣東要路宜速恢復乃以調綠旗兵為辭因循日月殊悞軍事今不必俟提督趙賴官兵即遣哈爾哈齊額楚等恢復吉安以通粵道夏四月癸丑朔享

太廟。

上親詣行禮○

上詣

太皇太后宮問安○甲寅諭兵部逆賊吳三桂死守湖南我師不能驟進相持日久頃大將軍安親王克取萍鄉直逼長沙湖南諸賊震動順承郡王既已渡江貝勒尚善等復遣舟師敗賊於洞庭又據報彝陵之賊相繼沿江而下大將軍切臨賊境深知逆賊情形宜乘此逆賊可破之機不時偵探以聞安塘筆帖式未能探曉兵事僅據所聞來報恐不詳確

朕每懷遠慮。且調遣官兵尤難遙度。大將軍等其各將措置機宜。及所聞見。并吳三桂見在何處。賊勢何似。悉具奏聞。○賑濟河南鄭州水災饑民。○乙卯。

上諭。漳鄉為安親王進兵後路所關最重。簡親王及副將軍希爾根。總督董衛國等速調官兵嚴加防禦。○丙辰。寧海將軍固山貝子傅喇塔疏言。臣屢奉和碩康親王檄。催心思惶惑。以致前後語言違謬。今謂臣大負信任之意。夫復何辯。但王將行。催回文。湊合上奏。以為臣悞王進閩之計。似覺冤抑。臣前駐台州時。王以俟破台州進閩為言。故臣一得黃巖。即遣副都統倭申巴圖魯領兵赴王軍前。乃又云。候取溫州。以是責臣。臣亦何辭相抵乎。今蒙

皇上寬恩。不即治罪。惟勒期速下溫州。臣敢不力戰自効。但環溫皆河。我兵不能猝進耳。疏入。

上命康親王酌量留兵圍困溫州。親統大兵赴衢。剿滅江山逆賊。以取福建。仍頒諭曰。王貝子。皆朕懿親。受任討賊。師克在和。近覽王貝子。屢次章奏。似不相輯睦。嗣後務同心一志。合謀并力。以奏膚功。毋各執己見。貽悞封疆。負朕委任至意。○丁巳。

上御太和殿視朝。文武陞轉各官謝恩。次喀爾喀厄魯特進貢使臣等行禮。○揚威大將軍和碩簡親王喇布疏報。副都統尼滿等敗賊於常興明山等處地方。下部議叙。○己未。

上詣

太皇太后

皇太后宮問安。○庚申。授殿試一甲進士彭定求為翰林院修撰。胡會恩。翁叔元。為編修。○辛酉。江西總督董衛國疏報。賊犯廣東。總兵官苗之秀。副將吳啓鎮等相繼叛。尚之信陰與賊通。受吳三桂招討。大將軍偽號。於二月二十一日。守其父尚可喜第。倡兵作亂。鎮南

將軍舒恕等引兵歸。副都統莽依圖自肇慶突圍出。總督金光祖巡撫佟養鉅陳洪明俱降賊。

上諭廣東變亂。江南江西殊屬可虞。若閩粵諸賊會犯京口等處。則江南兵單。難以防禦。且江西告急。自江南往援甚便。官兵不可不增。其調大將軍圖海所領盛京兵一千名。及駐防兗州。每佐領驍騎一名。遣赴江南。發京城每佐領兵一名駐兗州。其江南滿洲蒙古兵。令將軍華善用平寇將軍印統轄。以學士薩海署副都統。科爾科代為叅贊。副都統楊鳳翔以安南將軍印駐防京口。其遣赴江南之兵到日。將軍華善王之鼎及叅贊大臣督撫等會同整飭軍馬。以待調遣。尋簡親王喇布果請兵援江西。

上即命此兵抵江南養馬。後速行酌遣。江西應援。又諭曰。粵東事如此。則長沙宜急攻取。今貝勒察尼總督蔡毓榮既回荊州。則自河南

發往荊州之兵可速遣赴岳州。貝勒尚善亦分兵自陸路超長沙與安親王協力進取。簡親王等應即令將軍哈爾哈齊額楚等速取吉安。與將軍舒恕等合兵禦閩粵諸寇。以繼安親王大兵之後。○壬戌調隨征福建右鎮總兵官牟大寅為浙江定海總兵官。以効用副將黃大來充隨征福建右鎮總兵官。○癸亥靖逆將軍甘肅提督侯張勇疏報臣會同護軍統領傑殷遣發官兵敗賊於寧遠縣之馬烏鎮。下部議叙。○甲子揚威大將軍和碩簡親王喇布疏報署副都統楊古代等進兵饒州。三月二十五日敗賊於倫吉橋。二十六日恢復餘干縣。得旨嘉獎。下部議叙。○戊辰加靖逆侯張勇少保。仍兼太子太保。以叙恢復洮河二州功也。○振武將軍佛尼勒疏報官兵敗賊於清水縣陽平里等處地方。屢次戰捷。下部議叙。○寧南靖寇大將軍多羅順承郡王勒爾錦以三月二十七日擊賊於太

平街失利。退兵荊州。具疏請罪。

上諭勒爾錦身為大將軍。統領精兵征討逆賊。乃抵荊以來。地方多陷。且躑躅不前。以致孫延齡耿精忠等相繼叛亂。徒勞我師。虛糜國餉。坐守三年。未獲寸功。察尼身為叅贊。不能助大將軍剿除兇逆。拓地收疆。均應解任。嚴加治罪。念其身行間。臨敵對壘。姑留原任。立功自効。以贖前愆。○己巳。

孝端文皇后忌辰遣官祭

昭陵○庚午。

上詣

太皇太后宮問安○辛未。趣安遠靖寇大將軍多羅貝勒尚善等。分兵赴長沙。諭之曰。當安親王未取萍鄉時。貝勒尚善等曾言。得每佐領兵四名。即可分剿逆賊。斷其餉道。今安親王已克萍鄉。深入長沙。故如貝勒等所請。增發官兵赴岳州。因命分岳州兵赴長沙。乃又稱沿途水漲賊阻。難以驟至。請將官兵發往

江西。若發往江西。轉令赴援。則稽滯日月。如謂水漲賊阻。安親王攻破萍鄉。直抵長沙。豈沿途遂無賊無水相阻。坦途前進耶。如此輾轉遷延。地方何時得寧。貝勒尚善等。其以文到之日。即多發官兵。由三眼橋。或通城等路。速赴長沙。勿得仍前遲緩。以悞軍機。尋尚善等覆奏。已令副都統阿進泰。率八旗驍騎兵八百名。蒙古綠旗兵各五百名。於四月二十六日。由通城赴長沙○癸酉。

上詣

太皇太后宮問安○諭翰林院。選拔庶常原以作養人材。今科進士。特加簡閱。取魏希徵。沈三曾。沈涵。顧藻。彭會。洪熊。賜瓚。沈旭。初。李應鷹。楊瑄。高聯。高裔。馮雲。驕。許承宣。潘沐。李濤。張榕。端。陳錫。掇。王化。鶴。史珥。費之達。楊作楨。王瑞。鄭際泰。閻世繩。下永寧。徐必。遴。沈一。揆。楊爾淑。高瑄。李雲龍。方韓。王吉。相等三十二員。俱著改為庶吉士○理藩院題請差往科

爾沁烏朱穆泰等四十九旗會盟大臣得旨

著內大臣奇塔特侍郎博羅特去○丁丑

上御太和殿視朝文武陞轉各官謝恩次喀爾

喀進貢使臣等行禮○戊寅

上詣

太皇太后宮問安○陝西總督哈占疏言逆賊

盤踞龍駒砦及資峪鋪阻塞商州商南之路

商南縣知縣盧英遇害

上諭將軍吳丹席卜臣及總督哈占等會商剿

賊毋致蔓延商南與河南接壤河南巡撫總

兵官等亦酌調官兵分守邊隘以備不虞○

庚辰湖廣總督蔡毓榮疏報川逆譚弘直逼

鄭江北岸楚逆洪劉等賊出掠鄭江以南提

督佟國璠等遣發鄭陽滿漢官兵分佈剿禦

三月二十一日敗賊於坪溝二十八日敗賊

於黃畝四月初四日敗賊於九里岡等處初

九日敗賊於南岸初十日十一日連敗賊衆

擒斬無算焚其戰艦獲器械甚多下部議叙

○辛巳

上詣

太皇太后

皇太后宮問安○江西總督董衛國疏報袁臨

總兵官趙應奎等敗賊於鐵山界仙居橋地

方又署副都統楊古代等敗賊於餘干縣之

潤溪等處斬首二千餘級又遊擊林科等敗

賊於瑞州之舒林橋地方斬首千餘級俱下

部議叙○靖逆將軍甘肅提督侯張勇疏報

四月十六日賊衆萬餘直犯通渭縣城守官

以兵單逃避山寨臣等聞警即與護軍統領

傑殷自伏羌進發與撫標遊擊岳鎮邦等合

兵援剿行至十八盤坡遇賊全隊我兵分作

兩翼衝鋒直前擊敗之我兵乘勝奪門復通

渭縣城賊四散奔逸追斬賊首七百餘級獲

駱駝馬匹器械無算見在會將軍佛尼勒提

督王進寶商酌迅發秦兵撲剿務盡得旨嘉

獎下部議叙

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之六十

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之六十一

監修總裁官光祿大夫太僕寺卿太子太傅孫和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保孫和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十五年丙辰五月壬午朔日食○癸未

實錄卷六十一

諭兵部。自逆賊煽亂以來。各省綠旗官員兵
丁。剿禦賊寇。恢復地方。戮力行間。著有勞績。
朕心時切軫念。凡以前奉旨事平議叙者。爾
部逐一察明功次。即行議叙。以昭朕酬庸鼓
勵之意。○定遠平寇大將軍和碩安親王岳
樂等疏言。見在圍困長沙。一應地方事務。需
官料理。

上命偏沅巡撫韓世琦。即率其標下官兵。赴長
沙軍前。其岳州軍需。付湖南布政使安世鼎

調度○

上至鞏華城駐蹕○甲申。

仁孝皇后忌辰。行再期致祭禮○

上回宮○贈江西殉難屯墾都督僉事洪徵左都督銜。給祭葬。廕子弟一人。以守備用。其妻蔡氏。罵賊殉節。照例旌表○揚威大將軍和碩簡親王喇布疏報。江西南康。吉安。饒州等府。先後招撫逆賊。共計偽官四百五十餘員。賊兵一萬五千餘名。救出難民一萬四百餘名。下部議叙○江西總督董衛國疏報。袁臨總兵官趙應奎等。遣發官兵。於四月十八日。殺敗賊衆。恢復萬載縣。得旨嘉獎。下部議叙○乙酉。

上詣

太皇太后宮問安○議政王大臣等議。逆賊楊來嘉等。盤踞鄖陽。不時竊發。請復設鄖陽撫治。以資控制。命以原任河道總督楊茂勳。為鄖陽撫治。設標營。如巡撫例○江西總督董

衛國疏報。提督趙賴等。遣發官兵。於都昌縣土塘山。大敗賊衆。下部議叙○丙戌。都察院左都御史介山疏言。京師乃五方雜處之地。奸宄潛伏。御史巡城莅任。止六月差滿。正在訪詢民隱。竄察奸宄之際。即以差滿更換。委任不專。嗣後滿漢御史巡城。應限一年更換。庶民隱可訪。奸宄易察矣。從之○奉命大將軍和碩康親王傑書疏報。賊首馮公輔等。攻陷宣平縣。夸蘭大黨喀里等。率滿漢官兵。於

四月初八日。敗賊於陶村。又敗之於夏灣。乘勝追至宣平。賊列礮迎敵。我兵分三路擊敗之。恢復宣平縣。生擒偽遊擊都司千總。把總等八員。斬首九百餘級。又鎮標遊擊王世旺等。敗賊於崖坑。督標遊擊高世英。敗賊於上陶。夸蘭大沙爾圖。敗賊於神塘。追殺二十餘里。拔賊木柵六層。焚木城五座。斬偽遊擊等及賊兵七百餘級。得旨嘉獎。下部議叙○鄂羅斯察漢汗。遣其臣尼果賴罕。伯理爾鄂維

策。入貢方物。奏稱鄂羅斯僻處遠方。從古未通中國。不識中國文義。不諳奏疏儀式。今特向化輸誠。願通貢使。得旨。鄂羅斯國所處甚遠。誠心向化。特遣其臣貢獻方物。甚屬可嘉。所奏之處。議政王大臣等議奏。○丁亥。

上詣

太皇太后宮問安。○寧夏提督趙良棟疏言。自提臣陳福遭變之後。逆賊直犯寧夏。河東諸堡俱被脅從。今二十餘堡。一聞招撫。相繼投誠。

誠。

上諭。河東各堡。因地狹民稀。不能敵賊。一時被脅。誠非得已。其槩從寬宥。該提督仍加意撫綏。以副朕惠愛元元至意。○欽天監治理曆法。南懷仁疏言。本年五月朔日食。依古法推算。應食五分六十秒。依新法推算。應食二十分。臣等登臺測驗。本日酉正一刻。日食未及一分。戊初初刻。十分復圓。其古法所推分數。既失之甚遠。而新法亦不盡符合者。乃清濛

之氣使然也。按交食歷指等書。言清濛氣者。地中游氣。時時上騰。其質輕微。畧似澄清之水。能映小為大。升卑為高。如日月出入時。與地平相近。游氣掩映。比中天時望之。其光較大。此明驗也。今五月朔日食。原不過二十微。因濛氣之故。自平地視之。則見為不及一分也。至濛氣於四時之中。隨時隨地。各有不同。如濛氣加厚。則日食之分數愈多。不可膠柱預定。下部知之。○壬辰。夏至。祭

地於

方澤。

上親詣行禮。○命翰林院掌院學士喇沙里。徐元文。教習庶吉士。○命故一等精奇尼哈番博通俄子柯三襲職。○癸巳。

上詣

太皇太后宮問安。○揚威大將軍和碩簡親王喇布疏報。粵省韶州。南雄。俱已變叛。將軍舒恕。額赫納等兵。退守南贛。福建巡撫楊熙。總

兵官拜音達禮等。亦各率所部官兵。隨滿兵引還。

上諭。舒恕。額赫納等。嚴守南安。贛州。梅嶺。以保固江西。其署副都統莽依圖。總督金光祖。信息。及平南親王。尚可喜。存亡。並確探以聞。尋總督董衛國奏。南安兵餉缺乏。官兵遂不能守。今閩粵諸寇。又侵犯贛屬地方。孤城危急。上諭。贛州既危。應速取吉安。合兵剿賊。簡親王等。並檄將軍哈爾哈齊。額楚提督趙賴等。剋取吉安。會合將軍舒恕。額赫納兵。撲滅閩粵諸寇。并檄舒恕等酌量。倘可由贛攻吉。即分兵夾攻之。○甲午。遣官祭

關聖帝君。○丙申。

上御太和殿視朝。文武陞轉各官謝恩。次鄂羅斯察漢汗進貢使臣等行禮。○丁酉。

上詣

太皇太后

皇太后宮問安。○多羅惠郡王妃薨。遣官致祭。

○戊戌。

上詣

太皇太后

皇太后宮問安。○免陝西延綏所屬被寇鄜州等十二州縣。本年分額賦十之三。中部等三州縣。額賦十之二。其葭州。神木。甘泉。三州縣。已完錢糧。准流抵康熙十五年分正賦。○己亥。贈福建陣亡守備楊士祥。為署都司僉書。予祭葬。廕子弟一人。以千總用。○庚子。兵部題。寧夏提督陳福殉難。給以三等精奇尼哈番。准令承襲。但其家見居蜀省。應將伊親弟陳壽之子陳世怡。暫行襲職。俟西蜀恢復之日。仍以陳福之子襲替。從之。○辛丑。

上詣

太皇太后

皇太后宮問安。○甲辰。

上詣

太皇太后

皇太后宮問安○乙巳。兵部遵旨議覆海澄公下遊擊黃藍。三次齎奏來京。值海澄失守。全家被陷。應從優授為叅將。事平日即補用。從之○撫遠大將軍都統大學士圖海疏報。本月十七日。臣至平涼。越一日。率領官兵至城北護山墩。相視形勢。賊衆萬餘。突來迎戰。步前馬後。布列火器挨牌。我兵分路進擊。自己訖午。大敗賊衆。斬偽總兵二人。餘賊被傷及墜崖死者甚衆。獲馬匹器械。不可勝計。下部議叙○丙午。贈湖廣殉難守備王光前為遊擊。予祭葬。廕子弟一人。以千總用○辛亥。

上詣

太皇太后

皇太后宮問安

六月。壬子朔。江西總督董衛國疏報。浮梁縣先已恢復。因僻處山城。兵馬難以駐守。遂回景德鎮扎營。五月十二日。賊渠陳茂生等。率老巢賊衆五萬有餘。屯扎鳳凰山等處。復犯

浮梁。饒南總兵官高登科。與叅領諾木齊等三路進剿。賊衆大敗。生擒賊渠陳茂生。及偽遊擊都司。守備王國柱等六十餘人。追殺十餘里。逆賊奔竄四散。下部議叙○撫遠大將軍都統大學士圖海疏報。臣統兵抵平涼。大敗賊於平涼城下。即遣劄授叅議道周昌。入城招王輔臣。王輔臣隨遣其副將謝天恩乞降。

上命頒赦詔撫慰之○甲寅。命內大臣哈岱。一等侍衛阿喇尼。往兩喀喇沁。兩土默特。兩翁牛特。教漢。奈曼。四子部落。蘇尼特等十旗。察閱兵馬。量調每佐領兵丁聽遣○揚威大將軍和碩簡親王喇布疏言。南安變亂。將軍舒恕等兵棄城退數十里。而省城存兵無幾。有事無可調發。

上命以駐防池州滿兵。每佐領一名。將軍善。遣才能夸蘭大一人領之。江寧蒙古兵七百名。令署副都統額思赫領之。俱赴江西○喇

布又奏。攻取吉安。非紅衣礮不可。請敕江南總督。選攻城大礮十具。速行運至軍前。并請先發江南附近兵。以援江西危急。得旨。調江南兵援江西。已有前旨。今復調每佐領兵一名前往。此二隊兵到日。聽大將軍等公同商議。視地方緩急。便宜調遣。其攻城大礮。移文總督阿席熙等。速行解發。○予故致仕太子太保都察院左都御史管吏部左侍郎事孫承澤。祭葬如例。○丙辰。

上御太和殿視朝。文武陞轉各官謝恩。次厄魯特進貢使臣等行禮。○江西總督董衛國疏報。水路自潒口至唐山口。賊船不時出犯。復有孫延齡賊船七十餘隻。自衡州來泊蒼頭舖。且遣賊三千。侵犯攸縣。

上諭。逆賊知安親王進取長沙。欲斷大軍後路。窺伺袁州。亦未可定。江西既發有江南大兵。省城又有總督駐守。簡親王喇布。副將軍希爾根。其以文到之日。即撤無事地方官兵。赴

袁州駐鎮。剿禦賊寇。○丁巳。靖逆將軍甘肅提督侯張勇。同鑲紅旗蒙古都統赫業疏報。五月二十四日。進兵樂門。臣等徧察地形。賊勢。賊扎營十一座。相為聯絡。其南北山梁二營。占踞險阻。欲以圍困我師。臣等公議。安營於山梁中間。以分賊勢。并分滿兵為二。一攻賊南營。一堵截援兵。提標兵亦分為二。一攻賊北營。一堵截援兵。令每兵各覓草一束。以填賊營壕塹。正安營間。有二營逆賊齊出。都

統赫業。率滿兵與南營逆賊對敵。臣率標兵與北營逆賊對敵。各奮力撲剿。逆賊敗奔入營。已刻。偽汪總兵從北路。偽李將軍從南路。率兵救援。滿漢兵各分路堵截之。銜戰數陣。鎗礮齊發。賊遂敗北。不能進援。而山上南北二營逆賊。見有援兵。死守營牆。我兵鏖戰六陣。用所帶草束填壕。滿漢官兵當先用命。撲進南北二營。賊兵大潰。陣斬偽總兵等。并賊衆千餘級。獲帳房器械無算。得旨嘉獎。下部

議叙○江西總督董衛國疏報廣信營中軍守備楊名進兵上黨施家地方殺入賊巢活擒賊渠黃尚志及偽官孔世榮等七人斬獲甚衆下部議叙○靖逆將軍甘肅提督侯張勇疏報逆賊侵犯寧遠遊擊劉廷棟等奮勇堵禦擊敗賊衆下部議叙○己未湖廣總督蔡毓榮疏報南漳總兵官劉成龍呈首逆賊楊來嘉所給偽書得旨鎮臣劉成龍出首逆書忠貞可嘉著該部議叙○庚申予故原任副都統莽吉圖祭葬如例○辛酉

上詣

太皇太后

皇太后宮問安○癸亥安遠靖寇大將軍多羅貝勒尚善疏言江西解送軍前得勝船不宜於岳州請易為鳥船

上諭尚善受大將軍之任不務速破逆賊每生事端虛糜歲月宜不允所請嚴行處治但今與賊對壘可令安徽巡撫靳輔速造鳥船十

隻解赴岳州○乙丑

上御乾清門召鄖陽撫治楊茂勲至前問以招兵事宜并諭曰鄖陽地方緊要爾善安撫軍民如有方畧即具疏陳奏○奉命大將軍和碩康親王傑書等疏報寧海將軍固山貝子傅喇塔統領大兵過三角嶺循江邊大路前進有偽都督曾養性等率賊船百餘隻泊江中又有賊千餘在得勝山下古溪地方當路立營對江亦立營設礮因令副都統紀爾他布總兵官陳世凱等分為兩隊攻取賊營以開大路又令漢軍兵上得勝山用礮打江中賊船并對江賊營又令漢兵埋伏山之兩傍林內於五月十二日大兵齊進攻拔其營殺賊三百餘級餘賊敗走遇伏兵殺傷甚多江中賊船被礮打沉大路已開又於五月二十四日副都統紀爾他布等行至溫溪渡口有賊偽都督馬成龍偽總兵陳貴等領五千餘賊前來衝犯隨令前鋒護軍驍騎兵居中綠

旗兵分為兩翼。齊擊敗之。追殺十餘里。計殺賊一千餘級。生擒賊百餘名。降偽都司鄭雄。偽遊擊馬國銘等。得旨嘉獎。下部議叙。○靖逆將軍甘肅提督侯張勇疏報。逆賊王輔臣勢窮。希引川逆為援。逞犯通渭縣。提督王進寶率領官兵親行指揮。分路進剿。擊敗賊眾。招降偽官。恢復靜寧州城。得旨嘉獎。下部議叙。○丁卯。漕運總督帥顏保疏報。入夏以來。淫雨連綿。自揚至淮。兩岸石土隄工。潰決甚多。而高家堰一隄。於五月二十一二等日。狂風巨浪衝決之處。或數丈。數十丈不等。得旨。據奏淮揚水患。隄工關係運道。即著該管官員。速行料理。○戊辰。

上詣

太皇太后宮。問安。○諭兵部。近覽大將軍簡親王喇布。總督董衛國等奏。尚之信背恩反叛。逆賊孫延齡。馬雄等。分路來寇。江西袁州諸處。閩賊亦乘機侵犯。江西。逆賊吳三桂部下。

高大傑。死守吉安。大兵尚未克復等語。見在江西。兵力單弱。分佈剿禦。防守地方。又欲接應大將軍安親王兵。實難支應。前貝勒尚善。請分岳州兵。遣發江西。大有裨益。今阿晉泰。韓世琦。雖往長沙。其自京師發出。每佐領兵四名。見到岳州。可將兵合計。量留防守。其餘官兵。即令起程。并嚴飭將弁。兼程速往。尋尚善奏。自河南來。每佐領兵一名。更增以盛京兵。及外藩蒙古兵。共一千名。令署副都統尼雅翰。領赴江西。於六月二十七日。由武昌起程。○己巳。以科爾沁故多羅郡王厄爾德尼子畢力克圖襲爵。○庚午。

上詣

太皇太后宮。問安。○和碩額駙尚之隆。以尚之信叛。率子弟詣部請罪。

上以尚可喜矢志勤勞。悉宥尚之隆等罪。屬下人員。亦從寬免。○添設直隸各省儒學教職各一員。○壬申。內大臣哈岱等。發四子部落。

蘇尼特兵五百餘名。將至張家口。

上命蒙古兵赴大同。調太原員外郎胡思哈前來領之。叅領胡什巴領大同兵五百名。往太原。同太原兵五百名。先往河南。發京城每佐領驍騎二名。烏喇。寧古塔兵一千名。悉改為護軍。率赴河南。并胡什巴兵。偕往江西。以副都統席山總統之。多諾為署副都統。同赴軍前。効力圖功。其兗州每佐領兵一名。亦調往江西。將軍布顏。仍留駐兗州。尋又諭兵部。副都統席山。署副都統多諾等。所領甲兵。皆係精銳。以此破賊。定有成功。爾部即移文大將軍王。副將軍等知悉。務令全軍制敵。勿分其勢。萬不得已。必須分遣。則酌量以行。○乙亥。

上詣

太皇太后宮問安。○丙子。以故一等阿思哈尼哈番又一拖沙喇哈番塞白理之子李駿。襲職。○戊寅。

上詣

太皇太后宮問安。○撫遠大將軍都統大學士圖海奏言。臣接奉赦詔。於本月初六日。復令周昌。齎詔入城。次日。王輔臣遣偽布政使龔榮遇等。率士民詣軍門。獻軍民冊。又遣其子王繼楨。及偽總兵蔡元等。繳所受吳逆偽敕二紙。偽平遠大將軍印。陝西東路總管將軍印。各一顆。及諸偽劄。臣見王輔臣尚懷疑懼。於十三日。復遣周昌。并臣姪前鋒侍衛保定前往。溫言開諭。王輔臣於十五日。即至臣營叩頭謝恩。遂入城。薙髮。率眾來降。固原偽巡撫陳彭。慶陽偽總兵周揚名。下峪關偽總兵王好問。關山偽副將孔印雄。及雲南土司總兵陸道清等。各率所屬官兵。相繼來降。

上諭。大將軍圖海。恭承簡命。秉鉞臨邊。即宣布恩威。剿撫並用。平涼一帶。旬月綏平。具見籌畫周詳。布置神速。克副委用。立奏膚功。朕心深為嘉悅。著從優議叙。有功人員。一并議叙具奏。王輔臣既感戴國恩。悔罪投誠。著復其

原官。加太子太保。擢靖寇將軍。立功贖罪。部下官弁。照銜給劄。兵民酌量安插。○圖海又奏。差去招撫王輔臣之周昌。乃七品錄用職官。隨振武將軍吳丹。來在潼關。臣知其人才。能帶至平涼軍前。臣與叅贊軍務諸臣會商。欲遣周昌前往招撫。而周昌欣然應命。並無難色。遂給以叅議道銜。臨行之時。周昌訴伊父亡時。母孫氏。刺目破面。觸棺盡節而死。未蒙旌表。今情願為國捐軀。表揚母氏。語畢。遂冒矢石。挺身入城。將

皇上浩蕩之恩。與招撫之意。盡行宣布。往來數次。實獲成功。伏乞

皇上俯念周昌為母捨身之孝。為國忘軀之忠。敕諭該部。旌表周昌之母。優加恩卹。以酬周昌之功。則人知鼓勵。遠近咸服矣。得旨。周昌之母孫氏。著遣官致祭。給銀建坊旌表。○圖海又奏。臣等遵旨到秦。見流民滿野。不但陷賊地方。不得耕種。即未被兵之百姓。因轉運

大兵糧草。亦困苦至極。乞特加軫恤。凡民間拖欠之錢糧。并解運漢中被刦糧石脚價。一并免追。其陷賊不得耕種之錢糧。祈敕部酌議。暫行蠲免。以息殘喘。俟少有起色。再行催徵。庶人興樂生之心。再沾昇平之福。得旨。議政王大臣會同議奏。尋議政王大臣等議。行文該督撫。查明被兵各州縣錢糧額數。及舊欠追徵數目。一并蠲免。從之。○已卯。撫遠大將軍都統大學士圖海奏。平涼投誠猓苗官

兵求回原籍。

上諭。猓苗官兵。若留內地。恐伊等父母妻子。或被逆賊殘害。其官員各加一級。兵丁酌量賞賚。俱發回原籍。并曉諭令招撫從賊人民。倘立有功績。准與優叙。○命優陞投誠雲南土司總兵陸道清。為左都督兼太子少保。投誠叅將黃九疇。劄委叅議道周昌等。俱為布政使。往湖南招撫。○揚威大將軍和碩簡親王喇布疏報。本月初六日。偽將軍耿繼善。焚燬

營盤并建昌。新城諸賊踰關遁走。

上諭大將軍康親王傑書等。耿精忠撤建昌諸賊。其為海寇所逼無疑。我兵宜乘機前進。其令大將軍傑書。將軍貝子傅喇塔。賴塔。總督李之芳等。速剿閩寇。酌量招撫。勿坐失事機。

實錄卷六十一

二十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十二

監修總裁官光祿大夫太保康太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十五年丙辰秋七月辛巳朔享

實錄卷六十二

一

太廟。

上親詣行禮○鎮南將軍哈爾哈齊等率水陸

官兵進剿吉安逆賊五月二十六日擊敗賊

衆克其外城遣署前鋒叅領郭濟奏捷

上命郭濟傳諭簡親王等曰江西雖距京四千

里朕知之甚悉王以宗室懿親不乃心國家

料理軍務恢復地方惟坐守省會日事騎射

以圖安逸殊負委任之意今逆賊高大傑竊

踞吉安朕旨到日即宜刻期攻取副將軍希

爾根。不思報國。日駐省城。安逸自便。性尤偏執。軍中每分兩翼。獨庇其右翼。嗣後宜痛改前非。力圖報効。哈爾哈齊。額楚。亦宜遵朕命。速取吉安。勿得退諉。坐失機宜。且將軍覺羅舒妃。莽依圖。穆承格。見駐贛州。南安。王等宜協力攻取吉安。進兵兩粵。凡行兵之道。愛民為先。若百姓富足。糧餉充裕。則徵調師徒。庶不致有困乏。自今大兵所至。務禁戢擾掠。以稱朕撫輯兆民至意。○定遠平寇大將軍和

實錄卷六十二

二

碩安親王岳樂疏言。逆賊船集長沙城下。我兵無戰船。難以破賊。請發江西得勝船十隻。及安慶九江沙船五六十隻。赴長沙。又長沙附近林木頗多。並乞敕巡撫韓世琦。伐木造船。

上諭。得勝船用之湖中。非長江所宜。其以岳州沙船轉送長沙。如安親王所請。著江西總督董衛國。巡撫佟國楨等。採辦物料。僱募工匠。運赴長沙。軍前修造戰艦。如不敷用。江南總

督阿席熙。安徽巡撫靳輔等。速行採辦。僱募轉送江西。一并運致。仍預行安親王遣兵迎取。付韓世琦督造。○浙江提督石調聲疏報。官兵敗賊於缸窰等處。恢復象山縣。得旨嘉獎。下部議叙。○議政王大臣等。遵諭議覆。鄂羅斯察漢汗。向化入貢。應行賞賚。其使臣尼果賴。不嫺典禮。不便給與敕書。應令理藩院諭來。使云爾。主欲通和好。應將本朝逋逃根忒木爾遣還。另簡使臣。遵中國禮行。方許照常貿易。從之。○賜鄂羅斯察漢汗使臣等。鞍馬袍服等物。○靖逆將軍甘肅提督侯張勇疏報。川逆盤踞樂門。臣因兵單。約提督王進寶統兵會剿。王進寶於六月十九日。率師至樂門。安營未定。賊潛來刼營。官兵環繞衝擊。逆賊大潰。死者不計其數。生擒偽總兵。遊擊。都司。守備等官。即於軍中斬之。下部議叙。○加南漳總兵官劉成龍。都督同知。以舉首逆書議叙故也。○乙酉。撫遠大將軍都統大學

實錄卷六十二

三

士圖海疏言。將軍畢力克圖報。所謂鄂爾多斯兵僅千名。馬又羸瘦。令進內地。未必有益。臣因移會畢力克圖。令鄂爾多斯兵暫駐邊外。養馬以待。又以平慶諸路。雖已底定。而川逆尚未殄滅。令彼即率副都統恰塔兵。員外郎拉篤祜所部土默特兵。及副將來塔綠旗兵。速赴臣軍。

上諭。鄂爾多斯兵暫駐邊外秣馬。署副都統額業圖會同鄂爾多斯王等。選擇甲兵補給馬匹軍械。聽候調遣。○丙戌。以原任戶部左侍郎管右侍郎事董安國為刑部右侍郎。○陞江南安徽按察使丁思孔為湖北布政使司布政使。○丁亥。

上詣

太皇太后宮問安。○諭戶部尚書覺羅勒德洪曰。爾等請旨遣官往歸化城買馬。此皆為大軍備用。關係非輕。今宜嚴飭所遣官務選擇精壯馬匹。如以不堪者塞責。察出治罪。決不

姑恕。○以翰林院侍講張玉書。克日講起居注官。○己丑。

上詣

太皇太后

皇太后宮問安。○庚寅。

上詣

太皇太后宮問安。○壬辰。寧夏提督趙良棟疏言。臣按問謀害原任提督陳福者。叅將熊虎等四人。實為首惡。見在撥兵拘禁。伏候敕旨。上諭。吳逆叛背以來。潛布偽書。煽惑人心。原任提督陳福。妻子雖在四川。毫無瞻顧。篤志忠貞。剿禦賊寇。恢復城池。功績茂著。及率兵進剿固原。中途遇害。前因變出倉猝。不能救護之。兵弁俱釋不問。其倡謀為亂。手刃主將者。國法難寬。今既察明熊虎等四人。實係首惡。即行正法。以懲奸宄。其餘兵弁。各守汛地。毋得牽連。嗣後如再有首告者。即以其罪罪之。其徧諭寧夏提標官兵知悉。○靖逆將軍甘

肅提督侯張勇疏報逆賊偽將軍李良柱侵犯岷州。臣遣發兵弁於梨川地方擊敗之下。部議叙○癸巳。

上詣

太皇太后宮問安○甲午。吏部議覆大學士巴泰等疏。參大學士熊賜履將陝西總督哈占題報獲盜犯開復疎防等官之疏。悞票三法司核議具奏。奉旨查問。熊賜履欲掩飾已過。私取草簽嚼毀。以大學士杜立德所票另疏草簽。扯去紙邊。改寫小字。希委咎於杜立德。殊玷大臣之職。應將熊賜履革職。得旨。熊賜履著革職。○揚威大將軍和碩簡親王喇布疏報逆賊侵犯新淦。署副都統楊古代等遣發官兵迎敵於博嶺山。大敗賊衆。陣斬七百餘級。下部議叙○乙未。中元節。遣官祭

永陵。

福陵。

昭陵。

孝陵。

仁孝皇后○丙申。翁牛特喀喇沁等八旗兵共一千五百餘名。奉調進古北諸口。

上命翁牛特等四旗兵往駐河南府。喀喇沁等四旗兵往駐兗州府○己亥。

上詣

太皇太后宮問安○庚子。

上幸南苑行圍○癸卯。陞江蘇布政使慕天顏為江寧巡撫○乙巳。予故鑲黃旗二等精奇

尼哈番散秩大臣齊錫祭葬如例○贈殉難

江西南豐縣知縣王應魁按察使司僉事。予

祭葬。廕一子。入監讀書○揚威大將軍和碩

簡親王喇布疏報。滿漢官兵於七月十一日

進取金谿。賊首楊益茂盤踞縣城。倚山立營

共二十餘座。大兵奮力進攻。破其木寨。直抵

山下。陣斬三千餘級。賊敗走。恢復縣城。得旨

嘉獎。下部議叙○丙午。

上自南苑回宮。詣

太皇太后

皇太后宮問安○福建提督段應舉疏報緝雲地方通金華處州兩府為糧運要途逆黨蕭君球率賊侵犯隨征總兵官劉顯芳遣發官兵進剿於黃鳥嶺攻破木城屢敗賊兵斬獲甚衆下部議叙○丁未以都察院左都御史姚文然為刑部尚書○河南土寇張成武侵擾永寧縣境駐劄河南府叅領胡什霸等移會巡撫進兵報至

上切責胡什霸等曰大兵駐防河南府本為撲滅盜賊今永寧有警胡什霸額勒布等距賊百八十里不率兵星赴乃稱移會巡撫遷延時日殊為不合著胡什霸等即率官兵進剿該撫鎮亦即遣兵會剿無使滋蔓仍禁戢軍士勿擾地方○戊申以原任河南巡撫郎廷相為福建總督○喀爾喀車臣汗遣使進九白年貢宴賚如例○撫遠大將軍都統大學士圖海疏報秦州樂門等處逆賊橫行振武

將軍佛尼勒提督張勇王進寶等統滿漢官兵會剿賊不能支偽將軍吳之茂於六月二十六日率衆宵遁我兵追剿之敗賊於牡丹園復敗賊於西和縣北山斬獲無算吳之茂僅以十餘騎越山而遁下部議叙○己酉諭兵部吉安一郡逆賊盤踞日久小民被脅蓄髮者多此實畏死之恒情也且勞師討賊原以為民若大兵所至將蓄髮者槩行誅戮殊非朕撫恤殘黎至意倘有據守城池山寨執持兵械抗拒不降者仍誅剿之其餘俱著免死俾得自新爾部通行曉諭各將軍一體遵行○陞直隸天津道薛柱斗為江南按察使司按察使

上詣

太皇太后宮問安○撫遠大將軍都統大學士

圖海疏報將軍穆占等。於六月二十七日。進兵樂門。賊遁去。追剿賊於紅崖等處。恢復禮縣。又慶陽偽總兵周養民。王好問。偽副將孔蔭熊等。共率所屬文武偽官九百餘員。兵丁四萬八千二百名有奇。陸續投誠。得旨嘉獎。下部議叙。○乙卯。靖逆將軍甘肅提督侯張勇疏言。番人滾布。窺我兵調征河東。乘隙入內地。收掠番族人畜。

上諭番人潛入內地。著將軍侯張勇嚴飭甘涼沿邊將弁。加意防守。○以故三等阿思哈尼哈番辛泰子席濟渾襲職。○調山西大同總兵官何傳為直隸真定總兵官。○丙辰。陞吏部左侍郎陳鼐永為都察院左都御史。○丁巳。

上詣

太皇太后

皇太后宮問安。○遣大學士李蔚祭

先師孔子。○戊午。祭

大社

大稷。

上親詣行禮。○揚威大將軍和碩簡親王喇布疏言。署副都統莽依圖等。於六月初九日。抵舒恕軍前。其士卒鎧仗耗敝。馬匹缺乏。

上諭鎧仗馬匹。皆大兵急需。著江南江西總督多備弓矢。江西巡撫動支額銀製造甲冑。俱存貯南昌。令大將軍簡親王。副將軍希爾根率兵速取吉安。通贛州路。將所貯甲冑弓矢運至舒恕軍前。又諭議政王大臣等曰。大將軍簡親王。副將軍希爾根等。俱有保全江西剿滅賊寇重任。豈得各分疆界。互相推諉。今將軍舒恕等。兵至南康。贛州為日已久。馬匹資仗乏絕。如聽其因地取給。必致擾害生民。吉安雖未恢復。豈無間道可通贛州。王及將軍總督等。宜多撥官兵。由間道解送資糧器械。接濟士卒。吉安既係南康。贛州孔道。大將軍王等。率兵速取之。仍酌留官兵。同總督董

衛國鎮守南昌○已未。

太宗文皇帝忌辰遣官祭

昭陵○諭定遠平寇大將軍安親王岳樂等朕

聞王恢復萍鄉大創逆賊直抵長沙甚為嘉

悅今日之事利在神速若稍遲緩俾賊得以

固守則攻取不易今秦省全定蜀中來逆賊

十餘萬盡已殲滅大兵即不下四川賊亦不

敢復出若分發見在陝西之兵前赴湖廣庶

或有濟王其善撫百姓倘民困已極即得地

方亦復何益至叛變之人皆係脅從情非得

已且原皆朕之臣子王其時加招徠即吳三

桂果有悔罪輸誠之心亦何不可容受王膺

此重任自有成算特以朕意示知○江西總

督董衛國疏報逆賊李蓬頭等犯餘干縣廣

信營叅將曹得成等擊敗之斬首八千餘級

擒三百餘人又遊擊馮元常張射光等敗賊

於金谿新昌等處下部議叙○庚申諭欽天

監爾衙門專司天文曆法任是職者必當習

學精熟向者新法舊法是非爭論今既深知

新法為是爾衙門習學天文曆法滿洲官員

務令加意精勤此後習熟之人方准陞用其

未經學習者不准陞用○辛酉

太祖高皇帝忌辰遣官祭

福陵○

上詣

太皇太后

皇太子宫問安○壬戌

上奉

太皇太后行幸湯泉。

太皇太后登輦。

上隨行出神武門然後乘馬至進膳處。

上扶

太皇太后下輦入行宮。

上進膳畢復詣行宮前候

太皇太后登輦。

上扶輦行數武乘馬路遇泥濘即下馬閱視至

湯泉。

上步行。隨

太皇太后入行宮畢。駐蹕湯泉。○吏部議覆陝西總督哈占疏言。平涼固原等處地方。已經恢復。州縣佐貳驛丞大使。需員甚多。請將考定吏員等。發往補用。應如所請。從之。○癸亥。上詣

太皇太后行宮。問安畢。回宮。○甲子。以原任河南援剿總兵官鮑敬為大同總兵官。○乙丑。

秋分。夕

月於西郊。

上親詣行禮。○先是。諭吏部。戶部。兵部。適年以來。大兵諸路征剿。軍需浩繁。一切供應。皆取給於民。凡領兵將軍將弁。及督撫文武大小各官。俱當以國計民生為念。潔己奉公。加意撙節。表率屬員。恪遵法紀。以副朕勸亂救民之意。乃有不以剿寇安民。平定地方為念。惟圖營私射利。糜費錢糧。軍前所用米豆草束。

諸項。自將軍以下。有自行販賣。囑託地方官多取價值。地方官有徇其情面。浮冒開銷者。亦有地方官販買支放。多行開銷者。有已備本色。不行收納。折價入己者。有民間運到米豆草束。地方官故意遲延措勒。及至軍前。又多刁難解官。恣意需索。方肯收納者。至於購買馬匹。不開實價。以少為多。濫行銷算。種種情弊。難以枚舉。皆由大小各員。互相徇庇。止知圖便。已私。殊為不合。應嚴加禁飭。以清積弊。若仍不悛改。事覺。照貪官例治罪。有能舉首者。從優議叙。議政王貝勒大臣等。其會同詳加定議。以聞。至是。議政王大臣等遵旨。會議。大小文武官。備辦軍前草束米豆等項。有營私射利。浮冒開銷者。照貪官例問罪。其該管官知而不舉。亦以其罪罪之。若能從旁舉首者。職官准應陞先用。旗民准授為七品官。得旨。依議。著刊刻通行曉諭。○丙寅。諭戶部。今正當軍需浩繁。在外總督巡撫及經管

錢糧各官俱宜潔已奉公殫心料理。一應收支銷算。詳明造冊。據實開報。聽部核議。近見部覆各處奏銷本內。或因款項不符。或因數目舛錯。或因造報遺漏。或因冊結不到。多致駁察。道路往返。動經歲月。明係地方各官不加意清釐。故留疑竇。希圖延挨時日。以滋弊端。錢糧朦混不清。民力苦累益甚。以後如何盡除積習。錢糧不致駁察。爾部定議具奏。○丁卯。

上詣湯泉

太皇太后行宮問安畢。回宮。詣

皇太后宮問安。○已巳。

上御經筵。○撫遠大將軍都統大學士圖海疏言。陝西提督原駐平涼。固原與平涼密邇。且為秦省形勝之區。應令王進寶移駐固原。即兼管固鎮事務。其西寧為邊陲重地。距固原甚遠。難於遙制。固原總兵官朱衣客。向在西寧。熟諳形勢。調駐西寧。殊有裨於地方。又慶

陽一郡。幅輳遼濶。素為賊藪。當此反側初安。亟需彈壓。宜令隨征總兵官陳奇謨暫鎮慶陽。安輯人心。從之。○轉禮部右侍郎楊正中。為左侍郎。陞內閣學士杜臻。為禮部右侍郎。○吏部題。一等阿思哈尼哈番阿喇納故。無承襲之人。應將原立職之介桑和碩齊親弟孫舒束襲職。從之。○庚午。贈殉難陝西神木道楊三知。為光祿寺卿。予祭葬。廕一子。入監讀書。○裁廬州府常積庫大使缺。歸知府管理。裁寧國府軍儲倉大使缺。歸照磨兼理。○予故一等精奇尼哈番錫喇布祭葬如例。○壬申。江西總督董衛國疏報。八月初五日。官兵敗賊於廣昌。恢復縣城。得旨嘉獎。下部議叙。○甲戌。

上詣湯泉

太皇太后行宮問安畢。回宮。詣

皇太后宮問安。○遣官祭

歷代帝王。○遣官祭城隍之神。○調湖北布

政使丁思孔。為江南江蘇布政使司布政使
○乙亥。

上御太和殿視朝。文武陞轉各官謝恩。喀爾喀
車臣汗進貢使臣等行禮。○浙江總督李之
芳疏報。閩逆偽將軍馬九玉等。領賊眾數萬
人。據守衢州河西。賊將林福等。扎營大溪灘。
輓運糧餉。大將軍康親王傑書。因詔促進兵。
抵衢州。集都統賴塔等議。先斷賊餉道。以奪
其勢。於是月十五日。賴塔等率滿漢兵。宵抵
大溪灘。奮擊。大敗之。乘勝進取江山縣。馬九
玉大懼。棄營遁。得旨嘉獎。下部議叙。○丙子。
諭吏部。兵部。撫遠大將軍都統大學士圖海。
器識老成。才猷練達。贊襄機務。宣力累朝。以
文武之長才。兼忠愛之至性。勞績茂著。倚毗
良殷。前察哈爾布爾尼。背恩反叛。命圖海為
副將軍。帥兵征剿。運籌決勝。克振軍威。未及
一月。捷功立奏。逆賊殲滅。疆圉教寧。近以平
涼阻兵日久。屢命剿撫。罔有成效。特簡圖海

為大將軍。統率大軍。節制各路。果爾謀畧淵
深。調度得宜。軍鋒所至。一戰克捷。更能體朕
好生之心。宣布恩威。開誠招撫。遂使平涼。慶
陽。固原等處。文武官員兵民。傾心向化。悔罪
歸誠。生靈免於塗炭。邊境賴以保安。數日之
間。開隴悉定。皆由籌畫周詳。布置神速。剿撫
並用。克建膚功。圖海以心膂大臣。膺秉鉞重
寄。實心為國。克副倚任。朕心深為嘉悅。於軍
功議叙外。應從優加恩。封三等公。以示朕眷
注忠勤。酬答勲庸至意。○諭兵部。自逆賊煽
亂以來。奸徒附和。侵擾地方。開隴以西。疆域
遼濶。大兵一時未集。人心不無動搖。靖逆將
軍侯張勇。提督王進寶。總兵官孫思克。一聞
蘭州之變。即率兵星馳渡河。剿禦收復城邑。
條奏機宜。舉發偽劄。緝獲奸謀。綏定邊陲。厥
功甚大。及大兵攻取平涼。專任靖逆侯張勇
等。鎮守秦鞏。復殫心籌畫。調度合宜。剿禦川
賊。屢奏捷音。紓朕西顧之憂。功尤茂著。伊等

皆宿將重臣。矢志報國。同心協力。展布謀猷。兼以訓練士卒。忠義素孚。故能身先行陣。所向克捷。其所屬將卒。亦皆効力。共建功績。朕甚嘉之。於軍功議叙之外。應從優加恩。以示朕獎勵忠貞。酬答勲勞至意。張勇著加為一等侯。襲十次。王進寶加一等阿思哈尼哈番。襲八次。授為奮威將軍。仍兼管平涼等處提督事務。孫思克陞為一等阿達哈哈番。涼州提督。○轉吏部右侍郎宋德宜為左侍郎。以原任山西提督撤回候補陳一炳為吏部右侍郎。○戊寅。先是。杭州將軍圖喇以病乞休。上令圖喇來京。以副都統馬哈達署理。至是。命馬哈達為杭州將軍。○河南總兵官傅魁疏報永寧縣砦賊倡亂。臣於八月初二日發兵赴剿。斬獲甚衆。逆渠張開等投誠。下部議叙。○己卯。

上詣

皇太后宮問安。○加江西贛州總兵官哲爾肯

署都督同知。叙舉首偽將軍高得捷等逆書功也。○喀爾喀土謝圖汗墨爾根台吉等遣使進九白年貢。宴賚如例。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十三

監修總裁官光祿大夫太保兼太子太傅保和殿大學士兼戶部尚書二等伯加四

級臣內齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十五年丙辰九月庚辰朔停止陝西康

實錄卷六十三

熙十五年薦舉以地方新復官屬賢否未經詳察從督撫等奏請也○浙江總督李之芳疏報閩逆偽將軍馬九玉敗走大將軍和碩康親王傑書遣副都統胡圖等率兵追擊破之復常山縣又遣將軍賴塔副都統馬哈達等於八月二十日進至仙霞關分路夾攻次日擒參將金應虎等獻關迎降官軍長驅而進二十三日攻拔浦城縣得旨嘉獎下部議叙○諭兵部移會康親王傑書等於仙霞關

投誠偽官內擇深知閩事者一人并曾經攻克仙霞關章京一員馳驛來京○辛巳上詣湯泉

太皇太后行宮問安是日駐蹕鞏華城○先是撫遠大將軍都統大學士公圖海疏言原任廣西提督馬雄陷身從逆其母及族人俱在固原今馬雄之母欲令其孫馬承先馬承霄持書赴廣西招雄歸降

上令馬承先等馳驛來京至是抵京師給以遊

實錄卷六十三

擊銜劄遣赴粵西招撫馬雄并令錄馬雄披陳原疏持以為信○壬午

上回宮○湖廣總督蔡毓榮疏報逆賊洪福等出犯均州駱駝嶺地方副將四十六等率滿漢官兵追至芝河大殪賊衆奪回難民并得器械甚多下部議叙○癸未揚威大將軍和碩簡親王喇布疏報醴陵陷賊臣已檄署副都統楊古代等固守袁州一帶聞署副都統多諾兵駐廬州并檄催馳赴江西

上諭袁州鎮標近已增設多兵。又署副都統楊古代率兵駐防。兵力不少。醴陵為大將軍安親王大兵後路。今既陷賊。不可不速規取。著大將軍簡親王等速檄楊古代及總兵官趙應奎等率領官兵並取醴陵。并間道移會安親王發兵夾攻。再檄署副都統多諾副都統席山等星夜馳赴江西聽簡親王等調度。○揚威大將軍和碩簡親王喇布疏報署副都統尼滿席布總兵許貞等進取南豐偽總兵揭思進等十七員并賊兵二千餘名投誠。下部議叙。○甲申陞詹事府詹事陳廷敬為內閣學士兼禮部侍郎。○授固山貝子章泰古為縣君。塔福善為固山額駙。○靖逆將軍甘肅提督侯張勇疏報大兵於八月初三日進取階州。偽總兵陳友功等獻城降。得旨嘉獎。下部議叙。○丙戌。

上詣湯泉

太皇太后行宮問安。是日行圍。駐蹕牆子路。○

丁亥。

上駐蹕固山川。○戊子。

上駐蹕西喇塔拉。○己丑。

上駐蹕固山川之西。○庚寅。

上駐蹕陳家莊。○辛卯。

上駐蹕密雲縣。○壬辰。

上駐蹕懷柔縣。○癸巳。

上詣

太皇太后行宮問安。駐蹕湯泉。○予故阿思哈

尼哈番辛太祭葬如例。○總理大兵糧餉兼

理浙江地方兵馬事務戶部侍郎達都疏報。

浦城縣石塘地方係由浙入閩之要隘。耿逆

令偽都尉連登雲等重兵盤踞以阻我師。八

月二十二日。固山貝子傅喇塔令副都統倭

申巴圖魯總兵官陳世凱溫處道姚啓聖等

帶領滿漢官兵分路進剿。自寅至亥連破九

營。殺賊甚衆。直抵石塘賊寨。焚燬木城。獲偽

關防馬匹銃礮無算。又於本月二十四日。乘

勝發兵。進取雲和縣。得旨嘉獎。下部議叙。○陝西總督哈占疏報。商州叅將拜思哈。恢復山陽縣。得旨嘉獎。下部議叙。○以翰林院掌院學士徐元文。為武會試正考官。詹事府少詹事項景襄。為副考官。○甲午。

上詣

太皇太后行宮問安畢。回宮。○予故刑部侍郎張爾素。祭葬如例。○乙未。先是福建總督范承謨陷賊。耿精忠多方逼誘之。誓死不屈。至是遇害。○陞河南按察使徐惺。為湖北布政使。司布政使。○丁酉。諭奉命大將軍和碩康親王傑書。主率領大兵。大敗賊衆。已入閩境。耿精忠雖背恩反叛。念小民遭罹賊亂。困苦已極。朕心深為惻然。其以時事曉諭耿精忠速降。以副朕安輯生民至意。○陞詹事府少詹事王颺昌。為詹事府詹事。○戶部遵旨議覆錢糧項欸繁多。督撫以下。及經管衙門。各宜殫心料理。查定例。數目舛錯。造報遺漏者。

各府州縣衛所各官。罰俸三月。督撫司道都司。罰俸一月等語。今議府州縣衛所官員。所造冊內。有數目舛錯遺漏。督撫不行查出。經該部查出者。將府州縣衛所官員。罰俸一年。督撫及轉報司道都司。各罰俸六月。如督撫司道都司。所造冊內。有數目舛錯遺漏者。亦應各罰俸六月。又奏銷錢糧。祇憑冊結磨對。今議司道都司府州縣衛所官員。將冊結遲延不送。經該督撫題參。違限一月者。罰俸六月。違限二月者。罰俸九月。違限三月者。罰俸一年。違限四五月者。降一級留任。違限六月以上者。降二級調用。違限一年以上者。革職。如司道都司府州縣等官。將冊結申送督撫。而督撫遲延。不隨各案一并送部者。經該部查出題參之日。將督撫違限五月以下者。亦照司道府縣等官例處分。如違限六月以上者。降二級留任。違限一年以上者。降三級調用。從之。○鄖陽撫治楊茂勲疏言。賊渠譚弘。

由水陸來犯。欲斷我師餉道。得旨糧餉係大兵急需。楊茂勲等宜協力攻剿。速通水路。仍著湖廣督撫設法陸運。至鄖陽接濟。毋致匱乏。○戊戌。調正白旗蒙古副都統博濟為滿洲副都統。○山西提督周卜世疏奏。巡撫達爾布。徇庇屬員。侵漁百姓。得旨達爾布并本內官員俱著解任。本內事情著兵部侍郎郭四海帶領司官二員前往察審。○予故一等阿思哈尼哈番張仲第祭葬如例。○浙江總督李之芳疏言。賊帥馬九玉雖已敗走。餘賊四竄潛匿尚多。馬鵬等擁眾屯踞新建諸處。地連徽饒廣信。不可任其蔓延。

上諭曰。大將軍康親王已統領大兵大創逆賊。深入閩境。應乘機掃除餘賊。平定地方。著大將軍簡親王。副將軍希爾根。江西總督董衛國。將軍華善。江南總督阿席熙等。迅檄駐守建昌署副都統尼滿。駐守徽州署副都統岳爾多等。各率兵并力夾剿徽饒廣信諸郡逆

賊。務期撲滅。以壯浙閩大兵聲勢。○己亥。

上詣

皇太后宮問安。○庚子。准江南宿遷縣康熙十五年漕糧改徵粟米。以宿邑地不產稻。鄰境復有蝗災。採買為難。從漕臣奏請也。○揚威大將軍和碩簡親王喇布疏報。於八月十一日。副都統額赫納等進兵芝草地方。擊敗賊眾。燒燬逆賊營盤共二十餘座。斬獲甚眾。下部議叙。○以阿霸垓故達爾漢貝子綽博會子車林敦羅布襲爵。○辛丑。

上詣湯泉

太皇太后行宮問安畢。回宮。○停止浙江康熙十五年薦舉。以連年用兵。新任之員未能即定賢否。從督撫等請也。○甲辰。

上御太和殿視朝。文武陞轉各官謝恩。○乙巳。上詣湯泉

太皇太后行宮問安畢。回宮。○丙午。孝慈高皇后忌辰。遣官祭。

福陵○予故刑部尚書艾元徵祭葬如例○先是撫遠大將軍都統大學士公圖海請暫停進取漢中之役。分兵防守諸隘。復遣一軍進剿湖廣。

上諭圖海多選精銳。率赴湖廣。剿滅逆賊。至是圖海奏。平涼慶陽雖經底定。而投誠兵心。尚未寧帖。漢中興安。尚未恢復。若帶領精兵赴楚。恐不逞之徒。心懷叵測。得旨。大將軍圖海著停其前赴湖廣。署前鋒統領穆占。勤勞懋著。著實授都統。佩征南將軍印。統率陝西河南滿漢諸軍。前赴湖廣。見在陝西諸將。俱聽穆占會同圖海揀擇。或從荆南渡江。或由彝陵進剿。或赴岳州水陸夾攻。相機行事○江西總督董衛國疏報。恢復金谿縣城之後。逆賊楊益茂等。盤踞瀘溪。復犯金谿。臣標後營遊擊張射光。率兵追剿。斬賊千餘級。守備宋國楨。斬偽太子太保朱天從。獲偽劄軍械無算。總兵官許貞等。帶領滿漢官兵。分路衝擊。

追入瀘溪地方。斬賊數千級。生擒二百餘名。恢復瀘溪縣城。得旨嘉獎。下部議叙○董衛國又報。瑞州營遊擊林科。進剿同安等處逆賊。攻破老寨。追殺二十餘里。陣斬偽總統都督等官十二員。殺賊二千有餘。獲馬匹軍器無算。下部議叙○丁未。奉命大將軍和碩康親王傑書疏報。逆賊乜扎建陽。副都統賴塔紀爾他布等。於九月初三日。領兵進剿。擊敗賊衆。克建陽縣城。復追至建寧府。賊俱逃遁。恢復府城。獲偽劄軍械無算。得旨嘉獎。下部議叙○戊申。以內閣學士兼禮部侍郎陳廷敬。充經筵講官○山西巡撫達爾布疏奏。山西提督周卜世。挾讐起釁。請遣官質審。得旨。這本內事情。著郭四海一并察審○陞湖廣鄖陽道叅政石琳。為河南按察使司按察使○己酉。吏部題。故一等精奇尼哈番席喇布。無子。應以其親叔子喇麻揷布。襲職。從之○鄖陽撫治楊茂勲疏報。川賊譚弘。遣賊衆潛

伏。郎。江。兩。岸。泊。船。琵琶灘。阻絕運道。九月十九日。臣會同駐防。郎陽副都統。李林隆。提督佟國瑤等。統領滿漢官兵奮勇進擊。大敗賊衆。運道即得疏通。糧艘並無阻滯。得旨嘉獎。下部議叙。

冬。十月。庚戌朔。享

太廟。

上親詣行禮。遣官祭

永陵。

福陵。

昭陵。

孝陵。

仁孝皇后。頒康熙十六年時憲曆。辛亥。

上詣

皇太后宮。問安。壬子。

皇太后聖壽節。

上率王以下。文武大臣。侍衛等。詣

皇太后宮行禮。遵

懿旨。停止筵宴。癸丑。

上詣湯泉

太皇太后行宮。問安。駐蹕湯泉。甲寅。

上回宮。詣

皇太后宮。問安。乙卯。策試中式武舉。於

太和殿前。喀爾喀扎薩克圖汗。遣使進九

白年貢。宴賚如例。浙江提督石調聲疏報。

遊擊柳星等。於太清畧地方。擊敗賊衆。擒偽

官楊家益等。收獲器械無算。下部議叙。丙

辰。

上幸瀛臺。設御幄。閱中式武舉騎射技勇。陞

護軍叅領伊巴漢。為正白旗蒙古副都統。

以故二等精奇尼哈番齊錫子德爾格爾襲

職。丁巳。

上幸瀛臺。設御幄。閱中式武舉騎射技勇。以

翰林院侍講學士李天馥。充日講起居注官

○江西總督董衛國疏報。副將色勒等。於九

月二十五日。率領官兵。擊敗吉安逆賊。斬獲

甚多。下部議叙○戊午。

上詣湯泉

太皇太后行宮問安畢。幸昌平。過前明十二陵。上一躬親酌酒。是日。駐蹕澗頭○己未。

上駐蹕九里山○遣內大臣等。於前明十二陵。各讀文致祭○庚申。

上詣湯泉

太皇太后行宮問安。駐蹕湯泉○以喀爾喀故。固山貝子布木巴西希子巴忒瑪襲爵○辛

酉。

上奉

太皇太后。自湯泉回宮。候

太皇太后登輦。

上隨行。至進膳處。扶

太皇太后降輦。入行宮。

上進膳畢。復詣

太皇太后行宮。候

太皇太后登輦。

上扶輦行數武。然後乘馬。進神武門。上步隨至

太皇太后宮。扶

太皇太后降輦。入宮畢。

上始回宮○諭兵部。自逆賊變亂以來。總兵官孫思克。標下官兵。矢志効力。身先行陣。勤勞可嘉。該部即行分別議叙賞賚。以示鼓勵○湖廣提督伯佟國瑤疏報。川逆譚弘。駕三十餘船。順流而下。圍鄖陽。臣同將軍噶爾漢。鄖陽撫治楊茂勲等。統領官兵。敗賊於沿江。及陡嶺地方。九月十九日。復以水陸兵合擊之。擒斬甚多。下部議叙○壬戌。

上詣

皇太后宮。問安○諭吏部。今年淮揚等處隄岸潰決。淹沒田地。關係運道民生。甚為重大。其令工部尚書冀如錫。戶部侍郎伊桑阿。前往省視○癸亥。寧南靖寇大將軍多羅順承郡王勒爾錦等疏報。九月三十日。副都統塞格。

率領官兵追剿賊衆於鄖西地方恢復鄖西縣城得旨嘉獎下部議叙○詹事府詹事王颺昌乞假省親允之○甲子。

上御太和殿傳臚賜殿試武舉荀國樑等一百四十九人武進士及第出身有差○

上詣

太皇太后

皇太后宮問安○乙丑陞山西布政使圖克善為山西巡撫○浙江提督石調聲疏報偽總

兵張鴻翼呂聯英等三十餘員就撫投誠救出難民六千三百八十餘丁口下部議叙○丙寅。

上詣

太皇太后宮問安○陞刑部郎中穆臣為山西按察使司按察使○戊辰江西總督董衛國疏報滿漢官兵於蓮塘治坪地方擊敗賊衆陣斬賊渠十五名連破賊營二十餘座獲偽印礮器等項又逆賊侵犯信豐縣地方遊擊

賈重臣等率領官兵擊走之俱下部議叙○己巳議政王大臣等議覆禮部疏言朝廷定鼎以來雖文武並用然八旗子弟尤以武備為急恐專心習文以致武備懈弛今值用武之際若令八旗子弟仍與漢人一體考試必偏尚讀書有悞訓練見今已將每佐領下子弟一名准在監肄業亦自足用除見在生員舉人進士錄用外嗣後請將旗下子弟考試生員舉人進士暫令停止應如所請從之○庚午鎮南將軍哈爾哈齊疏報將軍舒恕等剿滅贛州附近賊衆又發兵攻取萬安縣十月初四日擊敗逆賊恢復縣城得旨嘉獎下部議叙○奉命大將軍和碩康親王傑書帥師抵延平偽將軍耿繼美等以城降耿精忠聞之大懼隨遣精奇尼哈番劉蘊祥等赴延平獻偽總統將軍印續遣子耿顯祚來迎康親王師抵福州府令侍讀學士尹泰齋免死敕諭前往耿精忠於十月初四日率偽文武

官員出城迎降。獻所屬官兵冊籍。尋耿精忠請隨大兵立功贖罪。康親王以聞。

上命耿精忠仍留靖南王爵。率伊所屬官兵。隨大兵征剿海逆。圖功贖罪。原任巡撫劉秉政等。俱著來京。其藩下官員及兩鎮標下武弁。仍留原任。兵丁照額設外。其餘願効力者。分隸提鎮各標。願歸農者。原籍安插。○浙江總督李之芳疏報。總兵陳世凱等。招撫偽叅將都司等員。恢復景寧。遂昌。慶元。政和。松溪等

縣。又温州閭郡偽官兵民人等投誠。温州。處州。二府屬州縣盡皆恢復。又官兵進剿江西玉山縣。恢復縣城。得旨嘉獎。下部議叙。○辛未。

上諭遣閱河工。工部尚書冀如錫。戶部侍郎伊桑阿曰。河工經費浩繁。迄無成效。沿河百姓皆受其困。今特命爾等前往。須實心相視。將河上利害情形。體勘詳明。各處隄岸。應如何修築。務為一勞永逸之計。勿得苟且塞責。如

勘視不審。後復有事。爾等亦難辭咎。又諭近聞奉差至外省者。地方官吏所在迎送。甚為勞擾。此皆有累民生之事。爾等前往。宜一槩禁止。○壬申。征南將軍穆占疏言。陝西各隘撥兵防守。所餘滿漢兵。請令大將軍圖海及臣率赴湖廣。再將荊州。岳州。彝陵。兵內酌量揀選。分路並進。則吳逆可滅。若欲進取漢中。興安。應停發陝西滿漢兵。令圖海及臣率之。四路進取四川。雲南。吳三桂勢必退保巢穴。

湖南地方亦易恢復。

上諭陝西兵隨征各處。勤勞備至。運糧民多苦累。若復進取四川。恐征剿轉輸。兵民重困。故暫停漢興之役。平涼雖已底定。軍中缺乏馬匹。新附兵丁。猶未大定。大將軍圖海及新附兵。不便調往湖廣。且荊州諸處。有大將軍順承郡王勒爾錦。貝勒尚善。都統鄂內。宜理布等。統兵駐守。又大將軍安親王岳樂。統帥大兵。圍困長沙。今令將軍穆占率兵抵湖廣。自

將荊州諸處兵。每佐領配足十名。又添撥蒙古兵。及陝西湖廣綠旗兵隨往。兵力不為單薄。著穆占仍遵前旨行。迨克復地方。其應設鎮守官兵。調遣機宜。與各將軍總督提督等議行。大將軍安親王。順承郡王。貝勒等。探知穆占何路進兵。即相機應援。又諭穆占。大兵剿賊。惟馬是賴。爾擇可暫駐之處。酌量牧養。○諭兵部。將軍穆占著馳驛來京。其有應奏事宜。具題請旨。前穆占所舉護軍叅領塔爾代。及自請効力之護軍校石圖等。亦令隨穆占馳驛前來。○諭兵部。前自保寧回駐河南府。及潼關兵丁。久歷行間。勞苦已極。俱令來京。其兗州駐防兵。令將軍布顏率往河南府鎮守。大將軍圖海。另撥兵守潼關。福建浙江俱已底定。兗州不必駐防。○教諭保寧退回官兵。逆賊吳三桂。負恩反叛。發大兵征討。爾等為國効力。攻取七盤。朝天。諸關。大敗賊衆。直抵保寧。屯駐日久。餉道梗塞。遂爾旋師。未

獲成功。罪在將帥。與爾等無涉。沿途遇賊。復血戰敗之。厥後久圍秦州。又擊敗平涼諸賊。招撫王輔臣。爾等被堅執銳。二載有餘。平定地方。備嘗勞苦。朕心深為憫惻。今耿精忠投誠。福建浙江及陝西。以次削平。江西將定。廣東賊又敗遁。俟往代爾等兵到日。俱速來京。即行議敘。○揚威大將軍和碩簡親王喇布疏報。九月二十二日。夸蘭大胡理。鄧庫。及總兵官高登科等。率領官兵。於鷺鷥舖地方。擊敗賊衆。斬獲無算。恢復德興縣。得旨嘉獎。下部議敘。○癸酉。上諭講官喇沙里等曰。經書屢經講讀。朕心業已熟曉。通鑑一書。事關前代得失。甚有裨於治道。作何揀擇。撰擬講章。進講。爾等議奏。○甲戌。上御太和殿視朝。文武陞轉各官謝恩。次喀爾喀進貢使臣行禮。○乙亥。學士喇沙里等覆奏。資治通鑑一書。統貫諸史。最為詳備。而通

鑑綱目。又從資治通鑑中。提綱分目。尤得要領。擬從綱目中。擇切要事實進講。講章體裁。首列綱次列目。每條之後。總括大義。撰爲講說。其先儒論斷可採者。亦酌量附入。從之。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十四

監修總裁官光祿大夫太子太保保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十五年丙辰十一月己卯朔

上詣

實錄卷六十四

太皇太后宮問安○禮部等衙門議覆朝鮮國王李焞奏言頃陪臣使還購買前明十六朝紀一書中載本國癸亥年廢光海君李瑬立莊穆王李倬事誣以篡逆今聞新命纂修明史特遣陪臣福善君李柟等陳奏始末伏乞刪改以昭信史查本朝纂修明史是非本乎至公該國癸亥年廢立始末及莊穆王李倬實跡自有定論並無旁採野史諸書以入正

史應無庸議。至外國使臣來京禁買史書。今違禁購買。應遣官往朝鮮國會同該王嚴加詳審議處。伊所進禮物交來使帶回。得旨。這本內事情免遣大臣往審。著國王將私買史書人犯。逐一嚴拏詳審。確議具奏。餘依議。○辛巳。江寧提督楊捷疏報。十月二十二日。賊犯江浙交界乍浦地方。金山營恭將白可愛等馳剿。大敗賊衆。獲賊船隻。俘斬無算。下部議叙。○江西總督董衛國疏報。建昌縣受安地方。賊勢猖獗。臣檄南康府知府倫品。率兵剿撫。擒偽官七員。陸續招撫偽官一百二十員。兵五千餘人。下部議叙。○癸未。授固山貝子溫齊女為縣君。塔發喀為固山額駙。○給陝西陣亡固城副將陳達。拖沙喇哈番世職。予祭葬如例。○甲申。

上詣

太皇太后宮問安。○丙戌。奉命大將軍和碩康親王傑書疏報。海賊鄭錦遣偽總統許耀。率

兵三萬餘。直逼福州。至烏龍江之南小門山。真鳳山等處結寨連營。臣遣叅贊軍務都統喇哈達等率滿漢官兵。分為三隊。於十月十五日。渡江奮擊。前後夾攻。大敗賊衆。克取賊營。追奔四十餘里。斬殺甚多。生擒偽總兵副將以下三十餘員。下部議叙。○諭兵部大將軍康親王。統兵平閩。進剿海寇。分守福州諸路。恐兵力未敷。其以駐守江寧盛京兵內。發七百名。駐守京口。漢軍兵內。發五百名。令將軍楊鳳翔署副都統。岳爾多。孟安等領赴大將軍軍前。聽其調遣。又聞進閩大兵缺馬。即發內廐及兵部驛營馬。共二千。選八旗官各一員。送軍前散給。其送馬官員沿途或有騷擾。許地方官指名奏。○丁亥。

上詣

太皇太后宮問安。○諭湖廣大將軍王貝勒。叅贊大臣及官兵等。我朝勦業以來。戰勝攻取。勦合兵機。將帥皆身先士卒。無不立奏膚功。

逆賊吳三桂背恩反叛。朕念爾等宗室大臣。簡閱官兵。委以南征。削平僭亂。拯救生民。今出師三年。未獲尺寸。坐失機會。使疆圉日逼。賊勢鴟張。糜餉困民。悞國孰甚。罪在王貝勒將軍。大臣。於衆官兵。無與。今陝西福建江西浙江。雖漸次底定。然賊渠吳三桂不誅。於事何濟。日者。穆占在川陝時。勞績茂著。茲特簡為征南將軍。命以討賊。爾等亦當同心戮力。殲寇拓疆。以副朕靖亂安民之意。慎勿妄分疆界。各顧部伍。互相推諉。仍蹈前失也。衆官兵自遣發後。為國効力。暑雨蒸濕。浚壕築壘。晝夜枕戈。披堅冒刃。分防偵探。備極勞苦。朕悉知之。每念及此。深用惻然。爾衆官兵。其念朕卹養之恩。益加用命。倘樹立功勛。朕不吝優加爵賞。其各勉之。○諭理藩院。覽大將軍順承郡王奏。蒙古兵丁抵荆日久。馬匹倒斃甚多。其以見在外藩王。貝勒等進獻馬匹。撥足一千九百。速行解送。以資征剿。○陞刑部

郎中穆爾賽為山西布政使司布政使。○辛卯。

上詣

太皇太后

皇太后宮問安。○江西總督董衛國疏言。臣偵知醴陵陷賊。隨啓大將軍和碩簡親王。遣副都統席山。領兵赴素州。項賊復聲言犯萍鄉。諸處臣思。瀏陽醴陵一帶。皆前通長沙江楚門戶。今為賊據。誠恐和碩安親王孤軍深入。又無援師。深為可慮。得旨。醴陵萍鄉為安親王大軍後路。所關非細。副都統席山雖已赴素州。仍恐兵力單弱。今閩省已定。建昌諸處似可稍紓。大將軍簡親王及副將軍希爾根總督董衛國等。量調建昌撫州樂平饒州南昌等處滿漢官兵。速赴素州萍鄉。諸處同副都統席山楊古代總兵官趙應奎等協力剿賊。疏通道路。仍問道移會安親王。若可發長沙岳量行速發夾剿。○浙江總督李之芳疏

報偽總兵馮公輔擁衆數千屯聚處州山谷臣奉諭招撫馮公輔傾心向化率所部偽副將以下官二百二十餘員兵三千四百餘名繳劄投誠下部議叙○李之芳又報臣標叅將蔣懋勛等敗賊於開化玉山交界陳村地方斬獲甚衆又守備段斌等招撫偽總兵王文生等全旅來歸下部議叙○壬辰

上詣

太皇太后宮問安○乙未冬至祀

天於

圜丘

上親詣行禮○遣官祭

永陵

福陵

昭陵

孝陵

仁孝皇后○停止次日行禮○丙申

上詣

太皇太后

皇太后宮問安○先是定遠平寇大將軍和碩安親王岳樂赴長沙

上以我軍深入逆賊吳三桂必往來救援屢敕荆岳大將軍順承郡王勒爾錦貝勒尚善等揚聲進兵以牽其勢不時偵探若賊有可乘之機則渡江進取至是總督董衛國巡撫韓世琦總兵官趙應奎等相繼疏言吳三桂知長沙被圍即遣馬寶高啓隆等由岳州星馳救應又遣偽將軍胡國柱等入長沙固守吳三桂亦自松滋擁衆來援屯兵嶽麓山

上諭荆岳大將軍等爾等故違指授遲延時日以致逆賊得間四出應援今荆岳之兵安處日久馬皆肥壯著將軍移占遠赴湖廣簡選荆岳驍陵士馬由岳州趨長沙接應安親王兵若長沙軍無虞或出驍陵或取岳州或由荊州渡江便宜進發○特陞浙江溫處道姚啓聖為福建布政使司布政使江南無錫縣

知縣吳興祚為福建按察使司按察使○兵部督捕侍郎郭四海等疏言臣奉命察審山西提督周卜世恭巡撫達爾布徇庇屬員侵漁百姓各款并巡撫達爾布覆奏周卜世挾仇起釁一案歷經審訊除事在赦前者不議外達爾布係封疆大臣不能釐剔利弊反煩擾百姓違禁建立生祠并誣陷良民張維祥捏款濫責必欲置之死地應革職杖流周卜世以風聞之言借端訐奏報復私仇亦應革職至按察司賽音達禮陽曲知縣邢振岳受上司指使誣拏良民遇赦之事不行援赦賽音達禮應降四級調用邢振岳應革職疏入命吏兵刑三部會同確議具奏尋部議周卜世邢振岳俱免革職餘照原議得旨達爾布著革職周卜世免革職按察司係通省刑名之官賽音達禮將良民張維祥誣拏濫責兩遇恩赦不行宥免必欲置之死地情罪可惡賽音達禮亦著革職餘依議○以故翰林院

編修史鶴齡久侍講幄素著勤勞特賜祭一次○江西總督董衛國疏報副都統莽依圖率領滿漢官兵敗賊於信豐縣又撫標遊擊楊以松敗賊於定南縣恢復縣城南贛副將許盛敗賊於破塘口恢復泰和縣城南贛總兵官哲爾肯敗賊於九渡水等處擒斬偽總兵偽副將等員得旨嘉獎下部議叙○丁酉

上詣

太皇太后宮問安○以順天府遵化縣昌瑞山

建

世祖章皇帝孝陵升縣為州改設知州州判吏目學正訓導各一員○江西總督董衛國疏報南贛總兵官哲爾肯恭將宣成功率領官兵敗賊於南康縣之復潭舖斬首千餘級下部知之○戊戌

上詣

太皇太后宮問安○己亥揚威大將軍和碩簡親王喇布疏報逆賊楊彪萬勝竊據萬年縣

肆行劫掠居民受困已極。臣於十月初五日遣夸蘭大吳達禪遊擊陳其善等分率滿漢官兵相機堵剿。自初六日至十二日屢敗賊衆於五都馮家山等處。陣斬無算。賊首齊瓜郎窮蹙奔遁義陽大山。生擒偽都司等官招撫偽官一百三十餘員兵丁九千五百餘名。救出難民二萬餘口。下部議叙。○庚子。

上詣

太皇太后宮問安。○辛丑。

上幸南苑行圍。○以時值嚴冬。命刑部將獄中罪犯速行審結。○予故江寧巡撫馬祐祭葬。加祭二次。謚清恪。○壬寅。免江南山陽等七州縣本年分河決水災額賦十之三。○以出征四川守備高明諒創發病故。照陣亡例。贈遊擊。予祭葬。○先是。

上諭將軍哈爾哈齊額楚等已抵吉安數月。不能剿除逆賊。攻克城池。故逆賊乘間陷醴陵。窺萍鄉。恣意肆行。覲斷安親王大兵後路。及

提督趙賴等領兵赴援。又不并力剿賊。徒擁重兵。愒時玩日。且屢檄簡親王喇布副將軍希爾根令其親統大兵速赴吉安。乃藉口南昌重地。逗留不前。遲久始發。又不多備火藥等物。即此觀之。貽誤軍機匪小。喇布等可速取吉安。應援醴陵等處。至是簡親王喇布等疏言。江西省城及撫州樂平諸要地。汎兵單弱。總督董衛國又疏言。上高奉新諸縣賊氛蜂起。請速遣援師。并調鄰省兵前來防守。

上諭各路調集江西兵為數不少。簡親王喇布等不速取吉安。徒爾勞師糜餉。吉安一郡尚不能取。湖南逆賊何日得平。前理藩院郎中胡什巴所領蒙古兵已遣發江西。董衛國又身在省城。鄰省之兵無庸調遣。至恢復長沙平定湖南。全賴吉安大兵接應。簡親王等若仍前遷延觀望。安親王大兵脫有疎虞。喇布等當以失機例從重治罪。不貸。○甲辰。予浙江陣亡遊擊贈叅將成國樞胡鑣署守備贈

署都司僉書晉大忠署叅將贈署副將門可貴趙燾守備贈署都司僉書梁安虎邦俊高永朱有才効力叅將贈副將褚百五等祭葬如例○戊申。

上自南苑回宮

十二月己酉朔○庚戌命江南淮揚所屬沿河地方栽植柳樹以備河工需用○壬子。

上詣

太皇太后宮問安○奉命大將軍和碩康親王傑書疏言臣帥大兵平定閩疆諸凡諮謀軍務及分兵留守事宜不得不請增叅贊之臣伏乞

皇上遣在京大臣二三人前來叅贊又靖南王耿精忠見隨大兵征剿其福州府屬下官兵家口統轄乏人額駙耿昭忠耿聚忠乞遣一人同大兵鎮守。

上命都察院左都御史介山兵部左侍郎吳努春叅贊康親王軍務以耿昭忠為鎮平將軍

駐守福州○癸丑鎮東將軍布顏疏言臣所

統八百名兵俱係蒙古難於應機調遣請發滿洲兵令臣兼轄以資戰守得旨將軍布顏所統兵丁俱係蒙古遇有緊急軍務恐致稽遲見在陝西兵數頗衆大將軍公圖海於滿洲漢軍兵內酌發四百名赴河南府令布顏統轄其河南府所有蒙古兵分發四百名令理藩院員外郎頗羅塞率赴圖海軍前○江西巡撫佟國楨疏報廣東從逆提督嚴自明總兵張星耀郭義等統領賊衆逼南康臣與將軍舒恕總兵官哲爾肯發兵進剿斬賊萬餘級破賊營十七所獲偽印劄軍器火藥不可勝計賊敗遁南安下部議叙○乙卯。

上詣

太皇太后

皇太后宮問安○授福建巡撫楊熙為拜他喇布勒哈番又一拖沙喇哈番總兵官拜音達禮為一等阿達哈哈番以進征粵省時值尚

之信叛。楊熙等各率所部兵奪門而出。議叙故也。○揚威大將軍和碩簡親王喇布疏言。將軍額赫納率兵赴援粵東。至清遠縣。適值尚逆遣人齎書招清遠縣知縣白啓明。白啓明堅拒不從。執其來使并偽書三函解送將軍額赫納軍前。棄其妻子。隨大軍回至贛州。應請議叙以示鼓勵。得旨。知縣白啓明將逆書及來使一并出首。棄其妻子。隨大兵而回。忠貞深為可嘉。著從優議叙。於是吏部議覆白啓明應授為知府。令留江西遇有缺出。該督撫即行題補。從之。○丙辰。吏部題。滿洲蒙古漢軍旗下生員既經停其考試。應將伊等以無品筆帖式注冊錄用。從之。○陞詹事府少詹事項景襄為詹事府詹事。○揚威大將軍和碩簡親王喇布疏報偽將軍耿繼善等率賊數萬圍困南豐。又海寇侵犯廣昌。得旨。前大將軍康親王傑書疏報耿精忠及閩省叛兵俱已歸降。廣信諸處亦皆嚮化。偽將軍

等盡已調回。今江西南豐諸處耿繼善等何故仍行騷擾。著康親王傑書耿精忠察實奏聞。大兵抵福州日久。若不速剿海寇。則江西之賊勢難遽靖。王等即進兵平定興泉漳諸郡。或應從汀州分兵夾攻。俱著相機進發。○丁巳。以詹事府少詹事沈荃充日講起居注官。○尚之信遣人齎密疏。至揚威大將軍和碩簡親王喇布軍前乞降。簡親王喇布以聞。上敕諭尚之信曰。昔

太祖高皇帝肇造鴻業。爾父航海歸誠。功猷茂著。後命駐防粵省。平定海疆。自吳逆叛亂以來。益矢忠誠。屢建功勲。故特封爾父為親王。授爾為討寇將軍。正期克奮勇畧掃除逆賊。不圖粵省變亂。道路梗阻。今覽爾密奏。稱父子世受國恩。斷不敢懷異念。願立功贖罪。來迎大師。知爾父子不忘報國。念篤忠貞。因事出倉卒。致成變異。朕心深為惻憫。今特降旨。將爾已往之罪並爾屬下官兵。悉行赦免。倘

能相機剿賊。立功自効。仍加恩優叙。爾當益竭悃誠。勉圖後效。以副朕始終曲全至意。戊午。

上詣

太皇太后

皇太后宮問安。免江西東鄉縣本年分旱災額賦有差。○撫遠大將軍都統大學士公圖海疏言。平涼慶陽雖已底定。漢中興安尚為賊據。臣等議於來春進討。應先調綠旗官兵。檄提督孫思克量留兵守涼州。親統官軍來秦州。將軍侯張勇遣兵二千。亦赴秦州。提督趙良棟量留兵守寧夏。親統官軍來鳳翔。將軍王進寶遣兵二千。亦赴鳳翔。俱於明年正月二十日內齊集所約之地。得旨。調兵征剿。事關重大。令副都統吳丹員外郎馬爾漢等速赴張勇王進寶孫思克趙良棟等軍前。調遣綠旗官兵。或如大將軍公圖海所請。或作何調遣。將軍提督等誰宜親往。作何前進。至

恢復漢中。興安時。或駐守其地。或徑取四川。逐一公同確議。遣同往章京馳驛奏聞。○已未。鎮南將軍吏部侍郎覺羅舒恕疏言。黃芳世。自粵東至信豐。言逆賊孫延齡已被吳三桂擒戮。籍其家產。以所屬兵付綠國安統轄。得旨。馬雄屢請援師。因不即至。勢迫從賊。綠國安為孫延齡逼叛。伊等皆受國厚恩。大將軍簡親王喇布等。公同確議。遣人招撫。○庚申。

上詣

太皇太后

皇太后宮問安。○諭兵部。海澄公黃芳世。矢報國恩。不肯從逆。間關冒險。全節來歸。忠貞茂著。著加太子太保鎮守漳州。黃藍屢次齎奏。忠勤可嘉。著優擢為都督僉事。充海澄總兵官。並令馳驛赴大將軍康親王軍前。俟漳泉恢復。收集海澄公標下散失官兵。鎮守汛地。○撫遠大將軍都統大學士公圖海疏報。建

威將軍吳丹等遣發官兵剿撫華州商州等處賊衆屢立戰功。下部議叙。○圖海又報鎮守商州副都統穆舒渾等擊敗峻嶺川逆賊恢復山陽縣城得旨嘉獎。下部議叙。○鎮南將軍吏部侍郎覺羅舒恕疏報十一月十八日鑲紅旗章京葉克副將周球等擊敗偽將軍黃士標偽總兵王割耳等於信豐之西水西壩斬獲甚衆。下部議叙。○辛酉頒賜出征諸處綠旗將士及外藩蒙古公台吉以下至披甲人等銀兩有差。○壬戌免江南徐州宿遷桃源等三州縣本年分水災額賦有差。○甲子予故三等阿思哈尼哈番許得功祭葬如例。○乙丑奉命大將軍和碩康親王傑書等疏報偽將軍黃朝用帶領偽官桑明等一百一員兵一千五百餘名投誠並獻廣信府城偽將軍黃高帶領偽官丁良等七十七員兵一千餘名投誠偽親軍侯都尉白顯忠帶領偽總兵楊全等八員兵一千餘名投誠又總

兵官劉德茂等招撫偽將軍徐子旺提督段應舉等招撫偽將軍馬升等偽員俱下部議叙。○揚威大將軍和碩簡親王喇布疏報十一月二十日逆賊耿繼善委偽將軍李懋珠等統領賊兵三萬攻逼南豐縣署副都統雅泰總兵官許貞率滿漢官兵進剿大破之燬賊營十餘所斬偽總兵王大耀等及賊兵四千餘級生擒二百餘名獲火礮軍器不可勝計。下部議叙。○喇布又報逆賊吳三桂下偽都督郭應福等領兵二萬屯泰和之蘆源洞署副都統多諾等率滿漢官兵擊之追奔十五里擒斬甚多焚其營壘。下部議叙。○丙寅鄂爾多斯固山貝子塞冷故遣官致祭。○江西總督董衛國疏報總兵官許貞等奉委招撫陸續招到逆賊朱統錫下偽官共五十四員偽兵一萬三千餘人。下部議叙。○丁卯

上詣

太皇太后宮問安。○戊辰江西總督董衛國疏

報遊擊許鳳等敗賊於蓮堂。又南瑞道李世昌等敗賊於白茅衝。斬獲甚衆。焚燬賊營五座。下部議叙。○董衛國又報。逆賊朱統錫受耿精忠敕。速將軍偽印。盤踞貴溪。自稱宜春藩名色。前擒伊弟朱四。朱統錫遁走。臣差官招撫。怙終不悛。隨調遊擊佟國棟等率兵進剿。斬殺甚衆。奪獲三關。朱統錫逃入江潯山。見在搜捕。務盡根株。下部議叙。○已已。免陝西涇州本年分電災額賦有差。○揚威大將軍和碩簡親王喇布等疏言。賊衆數萬來援吉安。距城二十里許。江西總督董衛國亦奏。逆賊自涿口抵攸縣界。聲言犯萍鄉。又言往援吉安。聞賊帥馬寶等率賊三四萬。已至永新。安福並欲為吉安救援。得旨。逆賊吳三桂知我荆岳大將軍等斷不能進兵。故身往常德。調集賊衆。并力於長沙。吉安將軍穆占速選荆州士馬相機前進。以分長沙吉安賊勢。平定湖南。大將軍簡親王喇布等嚴飭所部。

保固疆圉。○辛未。奉命大將軍和碩康親王傑書疏言。耿精忠下。除編作佐領兵丁外。又有左右兩鎮兵。今福建經制兵及撫標兵俱照原額全設。耿精忠見率伊佐領下兵隨大兵征剿海寇。未為不足。當節省餉銀之際。其兩鎮官兵應請裁革。又藩下總兵官曾養性。及原任温州總兵官祖弘勳俱自温州率兵至福州。祖弘勳應照劉秉政例。赴京候補。得旨。康親王身在地方。稔悉情形。所請裁兩鎮官兵俱如所奏。其裁退兵丁設法安插務必得所。祖弘勳著令來京。○浙江總督李之芳疏報。偽總兵馬鵬於諸寇中最稱梟惡。屢招不從。聚衆陳村。又勾引德興縣賊衆復至白沙關外扎營。臣密飭副將武榮泰將蔣懋勛等提兵進剿。先後破賊十九寨。生擒馬鵬斬之。下部議叙。○癸酉。吏部議覆左都御史陳鼐永疏言。自吳逆倡亂以來。陷賊之員偷生者多。盡節者少。因而展轉煽惑。所在脅從。近

者三秦八閩。先後底定。

皇上軫念一時遭受迫脅之人。特沛鴻恩。許以投誠免罪。此誠如天之仁。古來未有之異數也。伏思投誠者。既加寬宥。以開自新之途。則死節者。亟宜表揚。以勵忠義之氣。以臣所聞被亂地方職官。亦有矢死不從。捐軀殉難。甚或全家盡節。慘烈異常。如福建巡海道陳啓泰。浙江溫處道陳丹赤。尤為彰著。今各地方或已經全平。或次第恢復。而忠臣烈士。尚未表揚懇祈

皇上敕該督撫。即行察訪被亂地方。凡有盡忠死難。文武大小官員。如陳啓泰等者。將姓名事蹟速行題報。仰請從優褒卹。俾死事者。雖身遭慘變。而名垂不朽。錄及後人。凡屬臣子。知死榮於生。感奮效法。皆願抗賊以全忠。必不偷生以負國。則逆勢既孤。蕩平立奏。應如所請。敕下浙江。福建。陝西。江西。各省督撫。提鎮。將盡忠殉難文武官員姓名事蹟逐一查

明。具題議卹。從之。○丙子。歲暮。祫祭

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后。○遣官祭太歲之神。○奉命大將軍

和碩康親王傑書疏報。臣前遣人招撫耿繼

善。尚未至彼地。耿繼善聞大兵將至。即棄邵

武府。遁往江西。海逆下偽將軍吳淑。乘勢取

邵武城。復犯延平。伊弟偽總兵吳潛。率兵渡

河。屯浦塘迎敵。副都統伯穆赫林等率滿漢

官兵。屢次擊敗之。陣斬偽總兵楊大任等。殺

賊兵萬餘。生擒偽總兵阮信等。三百四十餘

人。所獲軍器無算。偽武定將軍彭世勲。以邵

武府降。得旨嘉獎。下部議叙。○丁丑。

上詣

太皇太后

皇太后宮問安○旌表八旗節婦滿洲侯有才妻甯氏等十人。漢軍張友良妻趙氏等四人。烈婦滿洲牛革子妻毛氏一人。各給銀建坊如例○是歲。人丁戶口一千六百三萬七千二百六十八。田地。山。蕩。陸地。四百八十六萬四千二百三十三頃九十二畝。徵銀二千二十一萬二千八百三十八兩五錢有奇。米。豆。麥。五百三萬六千三百八石九斗有奇。草。二百二十五萬三千八十七束。茶。十五萬三千七百三十五引。行鹽三百五十六萬五千四百二十三引。徵課銀二百二十五萬九百七十二兩三錢有奇。鑄錢二萬三千一百三十六萬五千三百六十有奇。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十六年丁巳春正月戊寅朔

實錄卷六十五

上詣

堂子行禮還宮拜神畢率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮停止朝賀筵宴○朝鮮國王李

焞遣陪臣吳挺緯等表賀冬至元旦

萬壽節及進歲貢禮物宴賚如例○己卯順天

府進春○庚辰

上詣

太皇太后

皇太后宮問安○辛巳

上謁

孝陵是日啓行駐蹕薊州○壬午

上至

孝陵素服率內大臣大學士尚書三品以上官

員行禮舉哀○

上駐蹕湯泉○甲申

實錄卷六十五

世祖章皇帝忌辰

上率內大臣大學士尚書三品以上官員詣

孝陵致祭○乙酉孟春享

太廟遣內大臣都統舅舅佟國綱行禮○遣官

祭太歲之神○

上以回京詣

孝陵舉哀啓行駐蹕孫家莊○丙戌

上駐蹕薊州○丁亥

上回宮詣

太皇太后

皇太后宮問安○戊子。揚威大將軍和碩簡親王喇布疏報十二月初四日。副都統席布遣發官兵。屢敗逆賊。嚴君寵於浮梁縣地方。招撫偽總兵郭秀等四百餘員。賊兵二萬九千餘名。恢復縣城。得旨嘉獎。下部議叙○江西總督董衛國疏報。粵逆圍犯信豐縣。於通贛要路。豎立木柵。斷絕我兵歸路。副將周球等親統官兵。奮勇衝殺。斬賊兵千餘。其溺水死。

平定卷六十一

三

被生擒者甚衆。下部議叙○江西巡撫佟國楨疏報。楚粵諸逆。前逼南康縣。滿洲大兵與撫鎮兩標將士。會同進剿。諸賊悉潰。餘逆嚴自明等。退踞南安。十二月十一日。副將許盛統兵進剿。殺賊二千有餘。恢復南安之上猶縣。又贛縣田村地方。招降偽總兵劉永祺等五員。又萬安縣黃塘地方。招降偽總兵張輝等十員。兵丁六千七百餘名。得旨嘉獎。下部議叙○己丑。寧南靖寇大將軍多羅順承郡

王勒爾錦疏言。將軍穆占。抵荊州。增撥在荊都統伯宜理布。前鋒統領碩岱。副都統託岱。龔圖漢軍副都統祖澤純。宜思孝。及滿洲漢軍。邊外蒙古綠旗官兵。共六千餘。率赴岳州。長沙。如賊覘知荊州大兵。勢分乘虛侵犯。我兵守汛。尚恐力單。他處有警。實難應援。乞調鄰近滿洲綠旗官兵。移駐荊州。以資防禦。上諭。駐河南府滿洲漢軍。蒙古兵。令員外郎頗羅塞統領。其自陝西遣發滿洲漢軍兵。令原轄將弁統領。俱赴荊州。又命鎮東將軍布顏暫駐懷慶○庚寅。撫遠大將軍都統大學士公圖海疏言。臣等前調綠旗官兵。本擬於二。月內。進取漢中。興安。今將軍侯張勇等。咨稱。宜視夏秋。收穫豐歉。再圖進取。但漢中。興安。山峻路險。延至彼時。適遇靈濤賊守益堅。臣等仍欲調兵。及時進取。得旨。大兵即克復漢中。興安。須設重兵。重兵一設。則運餉維艱。若俟夏秋進取。又煩兵曠日。虛糜糧糈。今將軍

平定卷六十一

四

穆占方剿吳逆。機不可失。大將軍公圖海等暫停漢興之役。留滿洲蒙古兵一萬。同綠旗兵防守秦州諸隘。分兵五千。遣大臣一人。統赴荊州。到日。順承郡王等量留官兵防守荊州。彝陵諸處。乘穆占由岳州長沙。進取湖南之時。相機渡江破賊。○諭兵部陝西分兵赴荊州。欲令順承郡王等乘機渡江。平定湖南。恐中途延緩。爾部其檄趣進兵。毋得逗留。貽誤軍機。○辛卯。祈穀於

上帝。

上親詣行禮。○壬辰。

上詣

太皇太后

皇太后宮問安。○癸巳。以內閣學士陳廷敬為翰林院掌院學士。○丙申。揚威大將軍和碩簡親王喇布疏言。賊援吉安。將軍額楚等率兵迎戰。三次失利。臣等議調南昌建昌諸處滿漢官兵。俟到日。協力攻剿。疏入。下議政王

大臣等議。尋議我國家開創以來。賞罰嚴明。攻城野戰。無不克捷。今額楚等官兵屢敗。皆由將懦兵玩。大將軍簡親王喇布等應嚴加處分。但見在剿賊。俟事平日再議。其臨陣先退者。即行拘禁。嗣後犯者。勿論官員兵丁。即於軍前正法。將弁等有觀望不前者。削職。仍隨大將軍効力。喇布既稱調取建昌諸處官兵。到日。即宜整頓兵馬。剿絕賊援。攻拔吉安。將軍穆占。已於本月十一日抵岳。亦應速令相度機宜。或攻取岳州。或進剿長沙。以分賊勢。奏入。報可。仍令戶部侍郎班迪等赴吉安嚴察罪狀。以聞。○丁酉。免江南睢寧縣湖廣襄陽宜城穀城三縣康熙十五年分水災額賦有差。○己亥。

上詣

太皇太后宮問安。

上諭刑部。律內設方術誘取良人。與畧賣良人子女者。罪止論戍。為妻妾子孫者。罪止論徒。

皆不至於死。是以犯者頗多。且其惡甚於牙
販。而法輕不足蔽辜。著詳議以聞。尋議嗣後
凡犯誘取典賣。或為妻妾等事。不分所誘良
賤。已賣未賣。為首者立絞。為從者係旗人。枷
責。係民人。杖流。如止一人。即以為首論。被誘
之人。和同者俱如為從之罪。非和同者。不坐。
不知情而典買者。免罪。追價給還。其以藥物
等項。誘取者。俱如畧誘人例治罪。從之。○封
和碩安親王岳樂子馬爾渾。為世子。○庚子。

上詣

太皇太后

皇太后宮問安。○以翰林院掌院學士陳廷敬。
充日講起居注官。○揚威大將軍和碩簡親
王喇布疏報來援吉安賊衆。於本月初九日
夜遁。得旨。我兵屢戰不利。賊何故遁。或因將
軍穆占進兵長沙。聞風掣回。或謀潛襲袁州。
俱不可料。今吉安已調建昌諸處官兵。簡親
王喇布等宜乘機速行攻取吉安。至於袁州。

所繫甚大。宜分兵固守。勿致疎虞。總督董衛
國。其檄令總兵官趙應奎協力防禦。○征南
將軍穆占疏言。臣等率兵於正月二十二日。
由岳州赴長沙。深入賊境。岳州百里界內。宜
發兵千名防守。庶無斷後之虞。
上以穆占進剿湖南。既精選荆岳之兵。率之前
發。餘兵單薄。難以分駐。不允所請。尋安遠靖
寇大將軍貝勒尚善等亦疏言。兵單不便分
發。

上命尚善等。作水陸攻戰之勢。乘隙進取。仍時

探穆占兵消息以聞。○壬寅。

上御太和殿視朝。文武陞轉各官謝恩。

上詣

太皇太后宮問安。○陞內閣學士覺羅沙賴為
盛京工部侍郎。○征南將軍穆占疏言。臣抵
岳州。相度形勢。江湖之間。非船不濟。今安徽
巡撫遣送沙船四十艘。於本月十五日到岳。
應再發江南荆州諸處沙船百餘艘。齊赴岳。

州軍前。倘長沙未能即克。至三四月間。臣等遣兵取船。由洞庭前進。或攻或圍。均有攸賴。若長沙既得。則安親王及臣等之兵。即乘此船。水陸夾攻岳州。庶乎有濟。

上命京口將軍王之鼎。發沙唬船六十艘。隨帶礮械水手人役。量配官兵。護送至岳州。并靳輔所送船足百艘之數。以備安親王岳樂將軍穆占取用。○甲辰。

上詣

太皇太后宮問安。○以禮部左侍郎楊正中。充經筵講官。○奉命大將軍和碩康親王傑書疏報。副都統伯穆赫林等率領官兵。追剿海賊。恢復泰寧。建寧。寧化。長汀。清流。歸化。連城七縣。及汀州府城。招降偽官七十三員。兵丁二千五百餘名。得旨嘉獎。下部議叙。○丙午。命翰林院掌院學士陳廷敬。教習庶吉士。○丁未。

上詣

太皇太后

皇太后宮問安。○陞詹事府詹事項景襄為內閣學士兼禮部侍郎。

二月。戊申朔。祭

大社。

大稷。

上親詣行禮。○陞叅領布舒庫為正黃旗蒙古副都統。○江西總督董衛國疏報偽總兵王霖。踞守新城。正月十九日。總兵官許貞等統兵進剿。恢復縣城。招降偽副將劉相等二十
五名。得旨嘉獎。下部議叙。○辛亥。

上詣

太皇太后宮問安。○陞太僕寺卿薩穆哈為內閣學士兼禮部侍郎。○陞正紅旗副都統希福為前鋒統領。以原任副都統覺羅夸代為正藍旗蒙古副都統。○給浙江陣亡革職留任守備張秉乾。千總潘上吉。吳泗。侯推。千總范漢臣等卹銀如例。各廕一子。以衛千總用。

○壬子。予故致仕盛京副都統葉爾素祭葬如例。○癸丑。吏部議覆雲南道御史陸祚蕃疏言。河道關係重大。必得才能熟練之員。始能勝任厥職。嗣後凡河工道員缺出。內而部屬外而知府同知。果有曾任河職。盡心河務者。令總河保題。其未任河職。才品優長。該督所深悉者。亦許題請。至見任河員。果能盡心河務。俸深陞授他職者。許以陞銜題留原任。陞轉時。仍照所陞之職陞用。應如所請。從之。

○江西巡撫佟國楨疏報。正月初十日。副將周球等率官兵大破海逆於五里排地方。恢復會昌縣。招降偽總兵楊夢月等。得旨嘉獎。下部議叙。○甲寅。

上詣

太皇太后宮。問安。○乙卯。

太皇太后聖壽節。

上率王以下。文武大臣侍衛等。詣

太皇太后宮。行禮。照例筵宴。○定遠平寇大將

軍和碩安親王岳樂疏報。副都統阿晉泰等率領滿漢官兵。於瀏陽縣地方擊敗偽總兵解先聲。斬首一千餘級。生擒偽遊擊守備等九名。下部議叙。○丙辰。九卿議覆差往驗勘河工。工部尚書冀如錫等疏言。河臣王光裕曾題高郵三淺西隄一處。逼近清水潭。俟水涸。另議興修。其餘各工。已經相機搶築。今看各口尚未興工。詢其何故。則以錢糧不足為辭。又題翟家壩修築之處。亦未築成。以致隄

岸屢決。地方淹沒。又題高郵城南決口三十處。堵塞完固。今查新隄高寬不及舊隄之半。王光裕全無治河之才。以致河工潰壞。請另簡賢能。庶於河道有益。應將河道總督王光裕革職。得旨。王光裕著解總河任。遣吏部侍郎折爾肯。副都御史金儒前往會同新任總河察審。○又議冀如錫等疏言。河道水性靡常。全賴隄工捍禦。今須亟行修築。黃河南岸。自白洋河至雲梯關。北岸自清河縣至雲梯

關及高家堰周家橋翟家壩古溝諸決口。其餘潰壞單薄之隄。俱宜修築堅固。其清口一帶沙淤。及運河見受黃流淤澱之處。亦應疏濬。又自淮至揚。兩岸土石隄工。清水潭等處決口。並宜即時堵築。至歸仁隄石工。原有估計錢糧。至今尚未修完。仍嚴令該管河官速行堵塞。其未經估計土隄之口。亦應一并興修。查黃運兩河關係運道民生。自應修治。但所費浩繁。一時難以並舉。應令新任河臣酌量要緊處。先行修築。其歸仁隄未完工程。亦速令催完。從之。○陞太常寺卿劉捷為大理寺卿。○丁巳。遣大學士杜立德祭

先師孔子。○戊午。

孝康章皇后忌辰。遣官祭

孝陵。○陞戶部郎中溫代為太僕寺卿。○己未。

上詣

太皇太后宮問安。

上幸南苑行圍。○調正紅旗蒙古副都統莫達

為滿洲副都統。○辛酉。諭戶部。閩地經海孽擾害。又遭逆賊暴征橫斂。民困已極。今年錢糧盡與蠲免。其遭亂竄避人民。俱招徠還籍。俾各安本業。○予故內閣學士兼禮部侍郎穆誠額祭葬如例。○添設岳州水師營總兵官。以平魯路叅將萬正色充之。其標下添設遊擊守備各二員。千總四員。把總八員。撥撫提標兵各五百名。及岳州城守原額兵七百名。增募兵三百名。合二千名。為經制。○壬戌。奉命大將軍和碩康親王傑書疏報。副都統伯穆赫林等。遣滿漢大兵。恢復福建上杭武平。永定。及江西瑞金等縣。招降偽總兵尹雲龍。曾顯洪。張威。及偽副將知縣等官二百十九名。贛州一路俱平。得旨嘉獎。下部議叙。○先是戶部侍郎班迪等赴吉安。道經安慶。上令傳諭巡撫靳輔。今安慶無事。吉安用兵之際。提標官兵應否就近調遣。巡撫提督集議以聞。至是靳輔等議覆請於防守池州建德。

及在安慶提標兵內。選調一千五百名。令提標遊擊周士隆等。率赴吉安。其池州。建德。別於撫提標兵內。通融調防。從之。○賞卹花馬池定邊等處。陣亡及被傷鄂爾多斯兵丁。銀兩有差。○癸亥。浙江總督李之芳疏報。周公源口。通衢州。處州。兩府屬縣地。聯江西。福建。為三省交界之處。閩逆林惟仁。統眾盤踞。叅將王英等奮力踰險直搗賊巢。林惟仁率眾歸順。下部議叙。○旌表山東烈婦郟城縣章氏。嶧縣任氏。矢志從夫。克盡貞烈。各給銀建坊如例。○旌表山東臨淄縣孝子于通。母及妻國初為盜所掠。遂棄妻救母。母歿典身營葬。克勵孝行。給銀建坊如例。○甲子。春分。朝日於東郊。遣都統趙璉行禮。○是日大閱於南苑。命鑲黃旗。正白旗。內府佐領下官員護軍。驍騎。揀甲。列晾鷹臺東。烏鎗兵。亦以次列臺東。北向。

上揀甲。命內大臣侍衛大學士。學士。起居注諸

臣。俱揀甲。徧閱軍容。

上御晾鷹臺。命內大臣侍衛及兩旗官兵。俱乘驍分列隊伍。鳴號角。前隊進。次隊繼之。殿兵復繼之。東西往來數次。吶喊馳驟鎗礮齊發。復歸隊伍。

上閱畢。命於臺下樹侯。

上率內大臣侍衛馬步射各四次。命大學士學士。起居注官。及各官兵。以次射畢。

上復登臺。御黃幄。命內大臣侍衛大學士學士。起居注官。以次列坐。官兵俱於臺下。分旗列坐。賜宴。○乙丑。命正黃旗內府佐領下官員。護軍。驍騎等。揀甲驍射。

上御晾鷹臺。徧閱軍容。賜宴畢。回宮。○丙寅。先是安遠靖寇大將軍多羅貝勒尚善等疏言。今備船百艘。遣赴長沙。乞添發近地甲兵。每佐領四名。以壯兵力。先破賊船。後遣我船進發。得旨。將軍穆占兵。於本月初三日。已抵長沙。賊勢必分。順承郡王勒爾錦等宜乘此機。

會陝西兵一到。即行渡江。倘渡江未便。則如貝勒尚善所請。分兵赴岳州。其或分兵發往。或渡江前進。速議以聞。至尚善等前稱造挨牌車輛。攻取岳州。繼稱水陸齊進。乃觀望不前。其為誑奏明甚。今據報岳州賊較前大減。添發官兵。便可進取。若荊州發兵到日。即宜速攻。倘仍遷延時日。并前罪嚴行議處。尋勒爾錦又請發河南江南綠旗官兵。

上不許。令遵前旨速議具奏。至是勒爾錦等兩議以聞。一議。俟陝兵到荊。更得綠旗官兵。仍行渡江。一議。俟陝西遣發及所請綠旗兵到。正值水發之時。過江不能無阻。今宜於每佐領四名外。再量行添發酌撥船艘。遣赴岳州。其間若有機會可乘。亦即酌量而行。

上諭。今正剿滅吳逆時。不可緩宜。自岳州水陸夾攻。勒爾錦等可於每佐領下。簡精兵五名。量配船艘。令都統鄂內佩討逆將軍印。率赴岳州。速行夾剿。○浙江總督李之芳疏報。江

西饒廣二府所屬鉛山興安弋陽貴溪等處。盡為賊踞。以致道路不通。遣遊擊郭守金等隨剿。隨撫恢復鉛山縣城興安弋陽貴溪三縣百姓踴躍歸命。得旨嘉獎。下部議叙。○丁卯。

上詣

太皇太后宮問安。○皇子允祉生。○奉命大將軍和碩康親王傑書疏報寧海將軍喇哈達平南將軍賴塔等率領大兵進剿興化。正月

二十六日。連破二十六營陣斬偽總督趙得勝。偽總兵副將等六十二員。恢復興化府城。防守仙遊縣。偽總兵郭維藩率眾投誠。得旨嘉獎。下部議叙。○遣刑部郎中色度等至岳州。勞問將軍大臣滿漢官兵。並宣諭云。岳州長沙勢如兩足。此蹶則彼不能獨立。我國家禁旅徂征。戰勝攻克。未有如此之相持曠日者也。若都統用命於貝勒。貝子。將弁用命於都統。兵卒用命於將弁。以次爭先。指臂相効。

何功不成。陝西官兵戮力成功。今並獲休息。諸將士倘能奮勇奏效。亦與彼同獎賚官秩。朕所不靳。其戰守機宜。令貝勒貝子會同定議奏聞。未幾。安遠靖寇大將軍多羅貝勒尚善等疏言。郎中色度到岳州。傳奉諭旨集議。水陸攻取岳州。可否情形。臣等議。今者賊有可破機會。正宜水陸夾攻。但陸路賊備甚嚴。應令舟師先發。陸兵繼進。茲分撥已定。俟戰船所用器械整頓完備。臣即親統進剿。從之。

○己巳。諭兵部。進蜀官兵。並未平定地方。大創賊寇。且屢奉溫綸。理宜戮力疆場。乃至西安。布匿名札惑眾。既抵隴州。又妄行控告。不赴平涼。我國家創業以來。從未有此行事。統兵將領。不能約束兵丁。肆行不法。及至京師。敕令首舉倡告之人。官兵又互相隱匿不舉。殊干法紀。此行軍功。俱不准叙。尋議政王大臣等議。秦據都統赫業等。取到供狀。及將軍穆占咨文。西安將軍佛尼勒供詞。則官軍棄

營敗遁。是實。宜將左翼四旗。並陣亡署護軍統領喀錫泰。部下官兵。俱行拏問。得旨。保寧蟠龍山軍營被衝。官兵敗遁之處。取供含糊。其地方又未質對真實。且官兵行役勞苦。免其究問。至署護軍統領喀錫泰陣亡。所部官兵棄將領而逃。其未受傷官兵。俱著拏問。○庚午。陞詹事府少詹事沈荃為詹事。○吏部侍郎覺羅舒恕等疏報。吳逆下偽總兵關世榮。副將周德先等。率偽官五十一員。兵丁家口一萬餘名。來至贛州。軍前投誠。下部知之。○江西巡撫佟國楨疏報。海逆偽總兵賴鼎球等。率偽官七十三員。兵丁一萬餘名。投誠。下部知之。○辛未。

上詣

太皇太后

皇太后宮問安。○遣官祭

先農之神。○陞安徽巡撫靳輔為河道總督。

○予故福建總督郎廷佐祭葬如例。○壬申。

陞原任布政使李本晟為太常寺卿○癸酉諭議政王大臣等鄂爾多斯固山貝子達爾扎聞定邊花馬池諸處變叛不待命遣即親率官兵招撫城堡擒獲賊渠深為可嘉其進封為多羅貝勒○贈鞏昌殉難岷州撫民同知王扎為按察使司副使予祭廕一子入監讀書○甲戌遣官祭

歷代帝王○諭議政王大臣等鄂爾多斯多羅貝勒索諾慕為國効力齎奏人員應付驛馬不致有悞且提督陳福請兵不待命遣即令伊子弟馳赴深為可嘉其進封為多羅郡王○諭議政王大臣等多羅貝勒董額等統率大兵出征秦中並未能克復疆土撫安百姓貽悞軍機殊負委託可削去董額多羅貝勒罷議政為閒散宗室降固山貝子溫齊為輔國公革去都統及宗人府右宗人輔國公綽克託罷宗人府右宗人仍罰俸二年○乙亥

上御經筵○丙子

上詣

太皇太后宮問安○掌鑾儀衛事務內大臣侯桑格坐事革退隨旗行走降鑾儀使噶達渾穆成格為雲麾使○以內大臣伯辛愈掌鑾儀衛事務陞冠軍使托賴○西爾圖為鑾儀使

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十六年丁巳三月丁丑朔免湖廣江夏

實錄卷六十六

等十州縣衛康熙十五年分水災額賦有差

○戊寅傳弘烈遺吏部侍郎覺羅舒恕書曰

孔王女孔四貞曾向弘烈言無刻不以

太皇太后為念若降恩綸赦孫廷齡罪封孔四

貞為郡主則可以成事舒恕以聞

上諭兵部抄錄舒恕奏疏并傳弘烈移文發督

捕理事官麻勒吉俾招撫孔四貞○己卯清

明節遣官祭

永陵

福陵

昭陵

孝陵

仁孝皇后○奉命大將軍和碩康親王傑書疏

報二月初九日寧海將軍喇哈達等統領大

兵攻克泉州府海賊潰遁陣斬偽虎衛將軍

許耀偽總兵六員偽副將三十一員安撫所

屬各縣難民俱令復業得旨嘉獎下部議叙

○揚威大將軍和碩簡親王喇布疏報索臨

實錄卷六十六

總兵官趙應奎及署夸蘭大張世薦特爾赫

等自索州分路進剿敗賊於石塘等處地方

下部議叙○庚辰

上詣

太皇太后

皇太后宮問安○奉命大將軍和碩康親王傑

書疏報海賊鄭錦大敗於興化泉州遂爾喪

膽棄漳州海澄而遁海澄偽副將孫紹芳漳

州偽知府程夢簡等相繼於軍前納款寧海

將軍喇哈達等統率大兵於二月二十日抵漳州遂復府城及海澄等十縣閩地悉平得旨王統官兵自衢州入仙霞關直抵福州剿撫並用所向克捷擊逐海賊收復全閩安輯百姓克奏膚功深為可嘉有功人員著議叙具奏○辛巳

上御太和殿視朝文武陞轉各官謝恩次喀爾喀進貢使臣等行禮○以翰林院修撰蔡啓傳充日講起居注官○癸未予故三等阿思

哈尼哈番滿韜祭葬如例○甲申

上詣

太皇太后宮問安○諭議政王大臣等今閩地悉定大將軍安親王圍困長沙已久將軍穆占復帥師進剿將軍鄂內統兵水陸赴岳殲滅吳逆蕩平諸寇在此一舉康親王宜及兵威大振之時分遣官兵同耿精忠兵進取潮州其進剿留守機宜速議以聞又大兵分路進擊逆賊不暇窺贛其授署副都統莽依圖

為鎮南將軍精簡士馬夾攻廣東以副都統額赫納署副都統穆承格恭贊軍務令侍郎舒恕量留甲兵同巡撫佟國楨總兵官哲爾肯鎮守贛州諸處至江西建昌諸路大兵俱已撤赴吉安簡親王軍士卒甚眾酌撥每佐領兵三名合在贛大兵令莽依圖共選每佐領兵六七名俟康親王所議俞旨到贛即率之前進尋尚之信傳弘烈密疏納款劉進忠苗之秀各報投誠

上以尚之信等原疏抄發康親王傑書等令速進廣東未幾奉命大將軍和碩康親王傑書疏言福建既平即欲親統大兵入粵但省會重地未可輕離且自福至漳相距甚遠兵馬到彼必須休息恐遲至炎暑難以進師今漳汀駐守大兵密邇粵境宜選將士有馬者令將軍喇哈達都統賴塔等率之同耿精忠先赴潮州後當遣兵接應

上報可復諭議政王大臣等曰康親王大兵平

閩人馬勞頓。難以深入粵地。令酌分官兵。前赴潮州。若劉進忠等迎降。暫駐彼地。即移檄尚之。信知之。仍趣莽依圖兵。速進廣東。諭兵部。前原任將軍赫業。瓦爾喀等。於蟠龍山。為賊衝營一案。並未審明口供。確驗地方。造具清冊。冀圖蒙混。今大將軍簡親王喇布等。又將吉安軍情。不行嚴審取供。殊屬不合。我國家軍法嚴明。從無苟且怠玩之弊。嗣後各將軍。應察明官軍功罪。確驗地方。取供造冊。

上詣

太皇太后宮問安。○戊子。陞安徽布政使徐國相。為安徽巡撫。○以輔國公富爾泰。為宗人府右宗人。○己丑。

上詣

太皇太后宮問安。○諭鑲白旗副都統吳丹。及

兵部尚書塞色黑顯親王下長史馬緝。辦理府務。佐領達席賢。溫郡王下長史鄂樂。辦理府務。一等護衛郭布博積等。邇年以來。鑲白旗盜賊光棍。匪人甚多。凡此妄行之人。皆因該管官。不預行曉諭。嚴禁聽其陷於法網。無知愚人。自投死地。且某旗好尚何事。則一旗之人。皆尤而效之。某族中好尚何事。則一族之人。皆尤而效之。種種陋習。罔不漸染。爾等係此旗官員。各有管轄教訓之職。嗣後須曉諭嚴切。務令盜賊光棍。永行禁止。至於所屬之人。因伊主幼小。遂爾藐視。恣行非辟。此皆爾大臣衆官。不行嚴禁之故。嗣後爾等宜各敬其主。竭力料理公事。至於用人。勿得較論分屬之人。惟當選擇賢能任事。○諭禮部。帝王克謹天戒。凡有垂象。皆關治理。故設立專官。職司占候。所係甚重。一切祥異。理應詳加推測。不時具奏。今欽天監於尋常節氣。尚有觀驗。至今歲三月霜霧。及以前星辰凌犯等。

項應行占奏者並未奏聞。皆由該監官員蒙昧疎忽。有負職掌。爾部即行察議具奏。尋禮部議。治理曆法。南懷仁等疎忽溺職。應交吏部議處。

上從寬免之。○庚寅。

上諭翰林院掌院學士喇沙里等。治道首崇儒雅。前有旨令翰林官將所作詩賦詞章。及真行草書。不時進呈。後因吳逆反叛。軍事倥傯。遂未進呈。今四方漸定。正宜振興文教。翰林官有長於詞賦。及書法佳者。令繕寫陸續進呈。○議政王大臣等會推正紅旗蒙古副都統員缺。得旨。大兵進剿四川保寧。逆賊來犯營盤。佐領穆舒誓死決戰。將甲上記號付與將軍。遂率領官兵進戰。擊敗逆賊。深為可嘉。著從優陞補副都統。○辛卯。

上御太和殿視朝。文武陞轉各官謝恩。次喀爾喀進貢使臣等行禮。○癸巳。

上詣

太皇太后

皇太后宮問安。○甲午。

萬壽節。

上率諸王貝勒貝子公。及內大臣大學士。都統尚書精奇尼哈番侍衛等詣

太皇太后

皇太后宮行禮。停止朝賀筵宴。○遣官祭

福陵。

昭陵。

孝陵。

仁孝皇后。遣官祭真武東嶽城隍之神。○諭大學士等曰。凡遇慶賀朕率諸王大臣詣

太皇太后

皇太后宮行禮時。齊集王大臣行禮。不可無監察之人。應設監察御史侍儀。尋大學士等議

嗣後

皇上率諸王大臣詣

太皇太后宮行禮時。應令監察御史在

慈寧門外及

永康左門外兩處侍儀詣

皇太后宮行禮時應令監察御史在大門外并
後班兩處侍儀若有行禮不齊者即指名題
叅從之○乙未翰林院掌院學士喇沙里進
呈翰林官詩文

上召至懋勤殿親自披閱命喇沙里書漢字呈
覽以

御臨蘇軾楷書手卷一軸賜之○尚之信傳弘

烈各遣人密疏請兵

上諭大將軍安親王圍困長沙已久將軍穆占
復進定湖南將軍鄂內又赴岳州水陸夾攻
逆賊吳三桂無暇窺粵且大將軍康親王令
將軍喇哈達統兵下潮州將軍莽依圖等亦
率兵入粵尚之信傳弘烈其各率所部速迎
王師協剿兇逆○原任潮州總兵官劉進忠
碣石總兵官苗之秀遣人投誠奉命大將軍
和碩康親王傑書以聞

上命宥劉進忠苗之秀及標下官兵罪仍以劉
進忠為潮州總兵官苗之秀為碣石總兵官
隨大兵進剿尋授劉進忠征逆將軍○陞鑲
藍旗滿洲副都統根特為本旗都統○厄魯
特厄爾德尼奔穆台吉等遣使進貢賞賚如
例○己亥江西總督董衛國疏言逆賊楊王
泰等竊踞宜黃樂安崇仁山谷中荼毒生民
若不早為翦除勢必滋蔓請親統標兵前往
撲滅

上從之未幾董衛國疏報臣偕副都統尼滿提
督趙賴總兵官許貞等率兵分剿敗賊於大
嶺遂復樂安楊王泰窮蹙率眾來降得旨嘉
獎下部議叙○庚子宴衍聖公孔毓圻等於
禮部○調鑲藍旗蒙古副都統席布為滿洲
副都統○辛丑

上詣

太皇太后

皇太后宮問安○以鎮國公蘇努為鑲紅旗蒙

古都統○揚威大將軍和碩簡親王喇布疏報署副都統尼滿等招撫南豐廣昌等處。偽將軍劉如桂等並繳偽印劉付關防。下部議叙○壬寅。皇子長生薨○戶部侍郎班迪等還自吉安。以所察軍情奏聞。得旨大將軍簡親王喇布自至江西。初無勞績。圍困吉安。日久未下。賊遁又不能邀擊。其令戴罪圖功。叅贊哈爾哈齊巴爾堪等營壘失守。情罪重大。俱革職披甲。自効副將軍希爾根年老衰憊。著撤回南昌暫駐。將軍額楚臨陣指揮不舉。發首遁之人。明係身先敗北。欲掩己罪。著削去將軍叅贊。姑留世職。仍統江寧官兵。戴罪圖功。見在吉安。叅贊大臣均不勝任。其以都統勒貝護軍統領哈克山。副都統布舒庫前往為叅贊大臣。更選八旗護軍叅領及各王府長史。共八員。一同遣往為夸蘭大。彼處所餘夸蘭太盡行汰去。又吉安礮手俱未諳練。每翼精選礮手二名。發往軍前。班迪等所訊

軍狀姑俟事平再議○癸卯。諭吏部戶部兵部自逆賊吳三桂煽亂以來。各用兵。地方文武官員或矢志固守。勢窮莫支。盡節封疆。或身陷賊中。堅貞不屈。橫被慘害。或從容就義。全家殉難。視死如歸。此皆為國捐軀。克全忠節。深為可憫。其有骸骨未能歸葬。妻子尚寄遠方。孤苦無依。更堪軫惻。宜加恩卹。以慰忠魂。著各該督撫察明。凡殉難文武大小官員骸骨妻子。俱准動正項錢糧資送歸里。以昭朕優卹忠節至意○調刑部尚書吳達禮為禮部尚書○甲辰。含譽星見。又卿雲見○奉命大將軍和碩康親王傑書將福建不肯從逆之編修李光地。與泉道何可化。將樂縣教官李重光。及先被脅從。後復來歸之汀州府知府孟熊臣等。題請議叙。得旨李光地不肯從逆。差人密奏地方機宜。忠貞茂著。深為可嘉。著從優議叙。何可化李重光孟熊臣亦著議叙。尋授李光地額外侍講學士○給陝西

陣亡副將太必圖。拖沙喇哈番祭葬如例。乙巳。定遠平寇大將軍和碩安親王岳樂疏言。臣軍中礮小。且復無多。乞將吉安。荊州。或西安大礮。運至長沙。以便攻城。疏入。下議政王大臣等議。尋議。今時勢攻取長沙。剿滅湖南逆賊。最為要務。宜撥新鑄大紅衣礮二十具。令兵工二部官員驛送南昌。自南昌至袁州。令江西總督董衛國。撥兵護送。由袁州至長沙。令董衛國動支正項銀兩。多僱夫役。以備轉運。俟溫代至袁州。即管領此礮。與安親王所遣馱礮馬匹官兵一路同行。上諭。解送馬礮。關係重大。將軍穆占親統官兵赴索迎接。倘未便親往。選同去大臣一員前來接應。直達長沙。勿致疎虞。先是。上諭據荊州坐塘筆帖式報賊犯遠安。旋復退回。逆賊或因我兵進取長沙。岳州。虛聲牽制。亦未可知。大將軍順承郡王勒爾錦等應作進兵之勢。揚言渡江。以疑賊兵。至是。定遠平

寇大將軍和碩安親王岳樂等奏逆賊吳三桂糾聚賊衆。死守長沙。

上復令勒爾錦速勒兵臨江。更令圖海整飭陝西滿漢官兵。進扼漢中要路。移檄聲言進兵。以分賊勢。倘機有可乘。即行進剿。丙午。先是安遠靖寇大將軍多羅貝勒尚善等疏報。二月二十六日。遣兵一千餘人。由岳州送馬三千餘匹。赴長沙。

上諭。大兵需馬甚殷。非尋常比。貝勒尚善等去賊甚近。必審知萬無一失。方行遣送。今長沙岳州之間。路未甚通。若逆賊阻截。護兵力單。難保無虞。宜預約安親王。遣兵相迎。度兵且來。然後發往。且將軍鄂內率兵赴岳。尚善所知。或俟此兵到後。多添兵力。俾無他慮。然後遣行。今但以千兵護送。如許馬匹。殊為輕忽。倘事出意外。於我不利。且為賊資。則是尚善明悞征剿大事。尚善其速偵送馬消息以聞。至是。尚善等報。官兵解馬。於本月初八日。抵

七星臺遇賊伏兵為所邀奪。

上切責之曰。尚善等統兵赴岳。已歷三載。糜餉老師。未獲寸土。今又將送往安親王軍前。馬匹冒險遺發。且以少兵護行。致中途被奪。反為賊利。貽誤大兵。急需情罪匪輕。宜即從重處分。念其見在征剿。姑俟事平。察議未幾。定遠平寇大將軍和碩安親王岳樂。以遣兵迎馬遲緩。致中途被刦。具疏引罪。

上亦切責之曰。剿滅逆賊。惟馬是賴。貝勒尚善

等。預約三月初二日。馬到長洛河。而岳樂故失期約。不遣兵往迎。目覩戰馬數千。盡為賊有大喪軍資情罪甚大。事平之日。從重議罪。○江西總督董衛國疏報。大兵圍困吉安已久。賊糧匱勢蹙。於本月二十一日夜出南門。趨舟東竄。我兵遂入城下。部知之。○諭揚威大將軍和碩簡親王等。將王府佐領下兵。及大兵內。選有馬者。每佐領三名。速發贛州。此兵到日。將軍莽依圖等。即選足每佐領七名。

速赴韶州。仍與尚之信相聞。令立圖內應。素州乃安親王大兵後路。其以滿洲兵。每佐領四名以上。及自安慶發往綠旗兵一千。並付額楚。俾赴素州屯駐。為安親王後繼。前所送馬及礮。抵素州。付與來迎官兵。額楚仍添兵護至長沙。其吉安新復。簡親王可偕多諾。統每佐領兵三名。及自安慶發往綠旗兵五百名。并城守官兵。駐鎮吉安。更撥每佐領兵一名。添發贛州。令侍郎舒恕。統領防守。其餘缺少馬械之兵。并綠旗官兵。付副將軍希爾根提督趙賴令。回南昌整繕。候調。簡親王同理事官麻勒吉。酌遣幹員。齎諭招撫。原任貴州提督李本深。巡撫曹申吉。廣西提督馬雄。將軍孫延齡等。并孫延齡死否。著偵探的信奏聞。

夏四月丁未朔。享

太廟。

上親詣行禮。○己酉。撫遠大將軍都統大學士

公圖海疏報招撫韓城等縣北山地方偽總兵喬斌等一百餘員下部議叙○庚戌先是江寧副都統綽可託出征廣東託言有病向平南王尚可喜具呈遂還江寧至是

上諭議政王大臣等我朝用兵以來凡出征大臣俱各奮力行間始終其事從未有軍務未竣半途而返之理今廣東多事之秋綽可託稱病還江寧顯屬規避著革職披甲發往將軍莽依圖軍前○轉都察院左都御史介山為刑部尚書○辛亥

上詣

太皇太后

皇太后宮問安○諭兵部吉安諸處兵為數甚眾既遣恭贊大臣宜更擇賢能為前鋒統領步軍總尉薩克察巴圖魯善哨探習戰陣可署前鋒統領赴吉安恭贊軍務左翼遣前鋒護衛噶爾麻右翼遣前鋒恭領馬錫泰同往○壬子吏部議

天壇文華殿所用藍黃磚瓦因原任監督及密戶等支領錢糧燒造年久尚未完工俱應按律問罪之人乃工部題請仍令伊等催造及奉旨著伊等回奏又不將錯處引咎應將尚書常鼎冀如錫降四級調用侍郎徐繼煒既已公同具題又奏稱本欲兩議明係巧飾殊玷大臣之體應革職從之○癸丑轉戶部右侍郎伊桑阿為左侍郎陞內閣學士察庫為戶部右侍郎○甲寅

上詣

太皇太后

皇太后宮問安○以故一等阿思哈尼哈番張中第之子張應慧襲職○予故原任工部侍郎楊運昌祭葬如例○丁巳陞總督倉場戶部侍郎喀代為都察院左都御史○戊午

上詣

太皇太后宮問安○科爾沁和碩卓禮克圖親王鄂輯爾來朝諭曰爾部人民宜勤加撫恤

爾能馭之以恩。則屬下自竭忠盡力。若但以威制。則人皆解體。不樂効用。爾其誌之。○鎮南將軍莽依圖疏言。入粵士卒。無馬者衆。

上命簡親王喇布。及總督董衛國。撥江西滿漢官兵馬二千匹。送莽依圖軍前。自京師發往。長沙馬四千餘匹。抵南昌日。太僕寺卿溫代。撥二千匹。以補江西馬額。已而揚威大將軍和碩簡親王喇布疏言。將軍莽依圖等。於本月二十四日。已統兵赴粵。天暑道遠。送馬恐難驟至。

上命喇布等。仍選江西官兵馬一千。速送贛州。付侍郎舒恕等轉送莽依圖軍前。并切責喇布曰。喇布明知進粵大兵。所關甚要。不即遵旨遣送馬匹。竟使兵丁徒步前進。殊忝大將之職。應即議處。以見在用兵。俟事平旋師之日。嚴加治罪。○撫遠大將軍都統大學士公圖海疏言。臣令駐防秦州寶雞官兵進逼禮縣驛門諸處。隨移檄聲言。大兵分路進剿。今

欲親統重兵。深入四川。但恐時多霖雨。輸輓艱難。當俟機會。酌量前進。得旨。今將軍穆占協剿長沙。貝勒尚善與將軍鄂內。水陸攻岳。故逆賊吳三桂親赴長沙。集諸路賊兵死守。湖南我兵若乘此機。各路進剿。則吳逆指日可滅。計在陝官兵。為數甚多。當此逆賊勢分之時。若不進逼四川。則坐糜糧餉。殄賊無期。大將軍公圖海。其仍遵前旨。速行進發。○嚴自明遺書江西總督董衛國。乞降董衛國。以聞。得旨。今將軍喇哈達莽依圖等兵。兩路進粵。嚴自明若悔罪反正。來迎王師。當赦其罪。仍前錄用。簡親王喇布。其即檄令知悉。○已未。轉都察院左都御史陳鼓永。為工部尚書。○奉命大將軍和碩康親王傑書疏言。處州府慶元縣民吳臣任等。不肯從賊。招集民兵。立寨自守。伊等身係細民。乃能抗賊守義。在內應援。斬殺逆賊。實為可嘉。已將吳臣任等交與浙江督撫。願効力者。酌量錄用。願歸農

者酌量獎賞其陣亡劄委守備吳受南等亦應交與督撫酌量恩卹下部議行○福建總督郎廷相疏報三月二十日夜泉州府城內奸民猝發滿漢官兵協力剿平之下部議叙○辛酉。

上詣

太皇太后

皇太后宮問安○

上幸霸州行圍是日啓行駐蹕霸州城南○陞

護軍叅領馬爾翰為鑲藍旗蒙古副都統○

授平涼提督孫思克三等阿思哈尼哈番世

職叙平涼護山墩殺賊功也○壬戌。

上駐蹕趙北口○癸亥。

孝端文皇后忌辰遣官祭

昭陵○甲子。

上回鑾駐蹕霸州城南○乙丑。

上駐蹕南哥驛○丙寅。

上駐蹕南苑○陞吏部左侍郎宋德宜為都察

院左都御史戶部左侍郎伊桑阿為工部尚書都察院左副都御史田六善為工部右侍郎通政使司通政使孔郭岱為內閣學士兼禮部侍郎○刑部議覆江南道御史和鹽鼎疏言今秦省底定浙閩繼歸版圖但三省投誠之民甫出湯火正宜撫恤安全恐地方不法之徒借從逆之名妄加陷害應敕陝西浙江福建督撫除奸民潛匿地方形跡叵測者仍行察訪其餘被陷來歸之民該地方官及地棍衙蠹不得借端擾害違者從重治罪應如所請從之○丁卯予故致仕杭州副都統三等阿思哈尼哈番夏景梅祭葬如例○江西總督董衛國疏報提督趙賴遣綠旗官兵敗賊於泰和縣擒偽叅將蕭元等殺賊六千有奇又招撫偽總兵崔復等一百一十二員兵丁五千餘名下部議叙○戊辰贈浙江殉難溫處道僉事陳丹赤為通政使司通政使永嘉縣知縣馬瑒為布政使司叅政各廕一

子入監讀書。温州副將楊春芳為太子少保左都督。遊擊魏萬侯為副將。各廕一子以守備用。効用守備熊天琳為遊擊。廕一子以衛千總用。各祭葬如例。○己巳。

上回宮詣

太皇太后

皇太后宮問安。○庚午。調兵部督捕左侍郎郭四海為總督倉場戶部侍郎。○贈陝西殉難固原鎮遊擊李進忠為副將。廕一子以守備用。都司僉書管守備事完文元為署遊擊。廕一子以衛千總用。各祭葬如例。○安遠靖寇大將軍多羅貝勒尚善等疏報逆賊吳三桂率眾往衡州。得旨。我兵攻圍長沙賊以窮蹙。欲往衡州。侵犯贛州吉安諸處。以分我兵勢。亦未可料。其令簡親王喇布侍郎舒恕總督董衛國總兵官哲爾肯等分布防禦偵賊情形。不時奏聞。○旌表陝西潼關衛節婦畢懋篤妻周氏。給銀建坊如例。○辛未。

上親撰

太皇太后大德景福頌。書錦屏恭進。詞曰。恭惟聖祖母太皇太后。躬備聖德。天錫純禧。作配我太宗文皇帝。內廷翼贊。肇造邦家。誕育我世祖章皇帝。瑞應昌期。撫綏函夏。爰及小子。續承基緒。十有六載。

思勤鞠育。莫罄名言。訓迪弘深。難於殫述。蓋

皇天眷佑我國家。篤生

聖哲。母儀後昆。以為積慶凝祥之本。猗歟盛哉。

啓百代之鴻圖。樹千秋之懿則。備累朝之孝

養。極四海之尊親。德福兼隆。康寧壽考。曠古

以來未有若我

太皇太后之盛者也。臣日侍

慈闈。欽瞻

懿範。戴天地而莫能窮其高厚。仰日月而莫能繪其光華。顧念罔極深恩。敢辭固陋。敬賦萬一。冀展微忱。爰拜手稽首而獻頌曰。

天開景祚。運際龐鴻。

太祖啓宇。嗣以

太宗文武神聖。帝業光融。惟

聖祖母大德。煥隆純仁。至孝克儉。允恭茂修。內

治。佐厥成功。迨我

皇考。誕膺天祿。冲睿乘乾。海宇賓服。允賴

聖慈。劬勞顧復。式訓寬仁。垂型雍肅。德洽萬邦。

恩流九族。以天下養。奄受多福。越予小子。大

業祇承。忭懽啓佑。仰戴

慈寧。仁如天覆。靜比坤貞。弘綱大政。懿訓是程。

勉以懷保。惕以勵精。孫謀宏遠。壺教光亨。溥

愛宣慈。秉禮度義。端莊誠一。萬善咸備。穆處

深宮。含弘庶類。德化殷流。惠風遐暨。顯號鴻

名。昭垂後嗣。寶冊騰輝。瑤編紀瑞。

聖人之配。誕生

聖人。古惟太姒。今茲比倫。壽祺正茂。休祉駢臻。

本支百世。子姓繩振。慶延家國。光被臣民。億

萬斯年。景祐常新。先是揚威大將軍和碩

簡親王喇布。遣學士王啓元等。奏復吉安情

形

上諭喇布等統領重兵圍吉安一城。日久不下。

虛糜國帑。徒勞士馬。被困之賊。不能撲滅。故

使逸出。逸賊率皆步行。復不能追擊。聽賊渠

脫逃。情罪重大。宜即處分。念見在進兵候事。

平旋師之日。嚴加治罪。又王啓元奏稱吉安

雖復而賊皆逃出。與土寇合勢。江西未為全

定。前因總督董衛國疏稱吉安已復。逸出之

賊。見在圍剿。故令酌量分遣大兵赴袁州南

昌。今江西既未全定。可令叅贊大臣到日。相

視地方輕重緩急。如不能如前旨分遣。則聽

其便宜調度。至螺子山拒賊一案。與縱賊逸

出官兵其嚴察罪狀。以聞。至是遣王啓元還

吉安。復令傳諭喇布及諸將軍等曰。諸路大

兵俱各殫力殺賊。惟江西一路屢屢朕憂。爾

等圍困吉安。既已逾年。乃縱賊盡令逸出。又

不恤人民肆行侵掠。夫國賦出於民。有一民

斯有一民之賦。若不撫輯招徠。地方何由底

定。又奏稱江西兵士戰馬羸瘦多斃。爾等頓兵江西。不出四五百里外。戰馬何由羸斃。况康親王兵由浙江定福建。入廣東。彼馬何獨能進。豈非爾等憚入楚粵。預為託故乎。嗣今宜竭力辦賊。平定疆土。勉建功績。用贖前愆。○奉命大將軍和碩康親王傑書疏報寧海將軍喇哈達等。自泉抵漳。沿途招撫偽建威將軍一員。大監督二員。總兵七員。副總兵十三員。副將四十三員。參將以下。把總以上。共三百五十六員。兵丁四千一百七十名。獲火礮器械無算。下部議叙。○壬申。陞江寧駐防協領莽依圖為江寧副都統。○甲戌。

上詣

太皇太后

皇太后宮問安。○陞大理寺卿劉健為都察院左副都御史。○乙亥。諭議政王大臣等曰。西安將軍佛尼勒。出征四川保寧。虧損官兵貽誤大事。可罷其將軍。革去世職。留所襲伊父

拜他喇布勒哈番。令署西安將軍事。○轉吏部右侍郎陳一炳為左侍郎。禮部右侍郎杜臻為吏部右侍郎。○陞詹事邵甘為通政使司通政使。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十七

監修總裁官光祿大夫太保康太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十六年丁巳五月丙子朔陞都察院左

實錄卷六十七

副都御史達哈他為兵部督捕左侍郎○江

西總督董衛國疏報招撫偽總兵蔡仕伯及

兵五千餘名恢復崇仁縣城得旨嘉獎下部

議叙○丁丑

上至鞏華城駐蹕○戊寅

仁孝皇后忌辰行三期致祭禮

上回宮○己卯諭大學士等曰帝王之學以明

理為先格物致知必資講論向來日講惟講

官敷陳講章於經史精義未能研究印證朕

心終有未慊前曾諭內閣諸臣或朕自講朱

註或解說講章內閣諸臣奏稱朕宜隨便發

明書旨不必預定規程今思講學必互相闡

發方能融會義理有裨身心以後日講或應

朕躬自講朱註或解說講章仍令講官照常

進講爾等會同翰林院掌院學士議奏尋大

學士等議覆講官進講時

皇上隨意或先將四書朱註講解或先將通鑑

等書講解俾得仰瞻

實錄卷六十七

聖學講畢講官仍照常進講則理義愈加闡發

而裨益弘多矣從之○庚辰喀爾喀澤卜尊

丹巴胡土克圖遣使進貢賞賚如例○壬午

浙江總督李之芳疏報偽揚烈將軍程鳳擁

眾數萬占據德興程鳳身故伊妻王玉貞復

偽稱掌揚烈將軍印務臣遣人開誠曉示王

玉貞率偽總兵楊彪等三百四十八員家口

四百七十三名偽兵三萬一千二百四十三

名赴軍前投誠下部議敘○癸未以故三等

阿思哈尼哈番夏景梅親弟之子夏增襲職

○甲申。

上詣

太皇太后

皇太后宮問安○乙酉。予故二等伯赫特赫祭

葬如例○傳弘烈遺右理事官麻勒吉書稱

目下廣東震動。若得大兵速進。南安傳弘烈

從中接應。前赴韶州。以扼廣東咽喉。則兩廣

可計日而定。廣東路通。則廣西全省。傳弘烈

便可一面當之。但須加一虛銜。方可行事。并

標下官員。各照原銜。換給印劄。庶可鼓勵人

心。麻勒吉以聞。得旨。傳弘烈圖報國恩。忠誠

懋著。可優陞為廣西巡撫。今將軍莽依圖等

大兵已進廣東。俟傳弘烈迎見軍前。即與敕

印。其標下官員。亦令大將軍簡親王。給以印

劄○丁亥。揚威大將軍和碩簡親王喇布疏

報。四月二十九日。將軍莽依圖率領官兵抵

南安城。嚴自明以城降。逆賊郭義等遁走。我

兵進發。屢敗賊衆。克取南雄。直抵韶州。傳弘

烈迎降。得旨嘉獎。下部議敘○戊子。遣官祭

關聖帝君○陞通政使司通政使邵甘為都

察院左副都御史○吏部議覆吏科給事中

張鵬疏言。地方官丁憂。定例離任守制。近見

督撫。不論地方有無用兵。輒請留任。嗣後應

概行停止。查各省用兵地方官員。許督撫題

請留任守制。今逆寇漸平。若緊要地方官員

果係才能。該督撫保舉留任守制。有不稱職

者。將保舉之督撫議處。若非用兵要地。違例

題請。照定例處分。從之○己丑。

上詣

太皇太后宮問安○免江西寧州。南昌等三十

三州縣衛。康熙十五年分水災。額賦有差○

庚寅。

上御太和殿視朝。文武陞轉各官謝恩○陞太

常寺卿李本晟為大理寺卿○辛卯。

上詣

太皇太后宮問安○以原任禮部左侍郎張士甄補原官管右侍郎事○予故輔國公弼禮克祭葬如例加賜銀一千兩○壬辰賜福建水師提督海澄公黃芳世蟒緞朝服鞍馬弓矢令照在外藩王例一體遣人請安諭曰卿父子功烈素著復全家殉難每念及此朕心深為傷悼况卿由粵東進剿忽遭廣省兵變孤身涉險而出可見忠貞不貳顛沛不改其守今仍襲海澄公鎮守福建水師提督總兵官卿愈加訓練鼓舞將士以靖海氛使地方秋毫無犯百姓安堵方為不負封疆重寄○科爾沁多羅貝勒額駙沙津所尚郡主卒遣官致祭○癸巳講官喇沙里陳廷敬等進講孟子一暴十寒章

上曰君子進則小人退小人進則君子退君子小人勢不並立孟子所謂一暴十寒於進君子退小人親賢遠佞之道最為明快人君誠不可不知也○甲午

上詣
太皇太后宮問安○諭大學士索額圖尚書明珠阿穆瑚瑯內大臣奇塔特曰厄魯特鄂齊爾圖車臣汗與噶爾丹台吉向俱進貢今噶爾丹台吉與鄂齊爾圖車臣汗內自相殘噶爾丹台吉攻鄂齊爾圖車臣汗以陣獲弓矢等物來獻若徑收納朕心不忍可止收其常貢之物以此旨傳諭來使○丙申

上詣
太皇太后

皇太后宮問安○丁酉夏至祭

地於
方澤

上親詣行禮○戊戌命兵部尚書塞色黑戶部右侍郎察庫並以原銜充經筵講官○陞詹事府少詹事喀爾圖為詹事○辛丑諭兵部莽依圖既授為鎮南將軍平定廣東一切機宜若由江西大將軍王及侍郎舒恕等轉達

似屬非宜。且耽延時日。嗣後凡軍機賊情。地方形勢。莽依圖其徑行奏報。○陞兵部郎中麻爾圖為陝西按察使。司按察使。○壬寅。予故三等精奇尼哈番瑪爾漢祭葬如例。○江西巡撫佟國楨疏報。招撫逆賊張元仁等。兵一萬六千二百餘名。下部議敘。○癸卯。諭講官等曰。爾等進講經書。皆內聖外王。修齊治平之道。朕亦孜孜詳詢。每講之時。必專意以聽。但學問無窮。不在徒言。要惟當躬行實踐。方有益於所學。爾等仍直言毋隱。以助朕好學進修之意。○陞光祿寺卿郭理為通政使司通政使。○甲辰。

上詣

太皇太后宮問安。○陞河南布政使金鉉為太常寺卿。○乙巳。先是。

上諭兵部。前安親王岳樂等疏請紅衣礮。隨已發往。今聞袁州到長沙。道路險阻。運礮夫役既多。為費實繁。若礮一到。即得長沙。則解送

固宜。倘難猝拔。則送亦何益。念安親王兵久入湖南。馬多致斃。已自京撥馬陸續發往。今將軍穆占率精兵會剿。猶未克取長沙。與賊對壘如故。我兵甚衆。芻秣無多。即馬到長沙。勢必坐致疲瘦。不堪驅策。可令馬匹暫停袁州。紅衣礮暫留南昌。溫代先赴安親王岳樂將軍穆占等軍前。詳議以聞。安親王所統軍士。雖曾給賞。為時已久。應撥正項錢糧。再行頒賜。總督董衛國。無論何項錢糧。撥二十萬兩。解赴袁州。俟溫代自長沙回日。酌量轉解。至是。溫代奏曰。臣詢安親王岳樂將軍穆占等。皆云紅衣礮即到。亦未必能遂破長沙。芻秣誠少。而軍士缺馬甚多。應否解送。請旨裁奪。

上乃命留紅衣礮於南昌。仍令溫代解銀馬赴安親王岳樂將軍穆占軍前。六月丙午朔。

上詣

太皇太后

皇太后宮問安○丁未。諭刑部。邇來農事方殷。天氣亢旱。朕念切民依。夙夜憂惕。或刑獄淹禁。中有冤抑。致干

天和。亦未可知。茲特遣巴泰、明珠、孔郭岱、項景襄。會同三法司。將已結重案。逐一詳加審理。凡有罪可矜疑者。即與察明事由。開列具奏。務使情法允協。有枉必伸。以副朕省刑恤民至意。○戊申。

上詣

太皇太后宮問安○尚之信疏言。臣聞將軍莽依圖。兵抵韶州。即於五月初四日。率省城文武官。及兵民歸正。復遣署都統尚之瑛等。代臣赴韶。迎接王師。得旨。尚之信著襲其父。尚可喜。平南親王爵。○原任廣東廣西總督金光祖疏言。臣標舊兵。依臣密約。斬首叛副將雷孚。言擒偽總督董重民等。決意歸正。得旨。尚之信、金光祖等。將偽總督董重民及所執

偽官品大者。委官兵護解來京。○揚威大將軍和碩簡親王喇布疏報。署副都統尼滿。會同總督董衛國。提督趙賴。總兵官許貞。進取樂安。行至沙岡地方。分兵七隊。俱於花山會齊。殺入大嶺隘。口擊敗賊衆。陣斬偽總兵。參遊等官一百餘名。殺賊五千餘人。恢復樂安縣。得旨嘉獎。下部議敘。○己酉。授固山貝子傅喇塔。女為縣君。塔阿思哈。尼哈番桑高。為固山額駙。○庚戌。

上

御太和殿視朝。文武陞轉各官謝恩。次厄魯特進貢。使臣等行禮。○壬子。

上詣

太皇太后宮問安○諭兵部。據尚之信奏。劉進忠以康親王招撫文檄。潛送吳逆。召兵自救。足知劉進忠心懷詭譎。非實意歸誠。可檄康親王。密為之備。○先是。安遠靖寇。大將軍多羅貝勒尚善等疏言。得烏船四十艘。即可破賊。

上命江寧巡撫慕天顏如數速造以資大兵之用。尋慕天顏疏言所造烏船甚多必須時日臣躬自督工期以六閱月告竣得旨岳州需船甚急若六閱月始竣則秋冬已過有悞破賊之期慕天顏其晝夜并力務於八月內竣工遣往岳州○癸丑禮部題前經九卿議准御史程文彛疏請本年添行鄉試今查直隸江南浙江三省貢監數多應各遣官考試河南山西山東陝西貢監數少應會在河南省遣官一同考試湖廣江西歸并江南省福建歸并浙江省考試以入場應試人數計算於十五名中取中舉人一名不必另取副榜於本年九月內考試從之○乙卯

上詣

太皇太后

皇太后宮問安○揚威大將軍和碩簡親王喇布疏報署副都統尼滿提督趙賴總兵官許貞等招撫偽將軍楊玉太及所部偽總兵徐

虎等四十九名下部議敘○浙江提督常進功疏報海賊踞舟山造船臣率官兵自黃巖赴定海駕船出關於螺頭門旋齒洋擊沉賊船一十三隻獲船八隻生擒偽副將一名復令官兵搜剿連破木城木寨殺賊二千一百六十餘名燒燬所造船隻無算得旨嘉獎下部議敘○丙辰諭議政王大臣等曰侍郎覺羅舒恕既駐贛州統轄滿漢兵防守地方不可無印副都統楊鳳翔所留安南將軍印見在平寇將軍華善所其令華善遣員齎印速赴江西付總督董衛國轉給舒恕○尚之信疏言臣父平南王尚可喜於去年二月兵變之後投繯自盡被左右救甦後憂鬱疾篤於康熙十五年十月二十九日薨逝得旨平南親王尚可喜久鎮巖疆勞績素著自聞兵變憂鬱成疾始終未改臣節遂至殞逝可憫應得恩卹著察例議奏○初尚之信疏言偽巡撫馮甦不忘國恩協謀歸正遂授馮甦為廣

東巡撫已而傳弘烈疏言馮甦為逆賊吳三桂顧待甚厚且其家屬俱在雲南今茲投誠乃出於窮迫請安插內地以絕其暗通聲息上授馮甦為刑部侍郎令其來京候補○丁巳上詣

太皇太后

皇太后宮問安○尚之信疏報原任高雷總兵官祖澤清率所屬官兵投誠高雷廉三郡悉定下部知之○江西總督董衛國疏言據在省官員報湖廣平江及銅鼓營逆賊聲言出犯甚急臣已留提督趙賴兵守樂安而身還省城遣兵赴剿適簡親王喇布復調臣標兵前往樂安臣即啟覆簡親王簡親王遂責臣以輕王慢旨既奉嚴諭何敢有誤隨撤進剿銅鼓營兵發往樂安但省城乃楚粵後路最屬緊要留省滿兵止餘二百又無綠旗官兵萬一有警恐難禦遏致負皇上任使乞賜罷斥另簡賢能以副總督重寄

上乃切責喇布曰前屢詔喇布進剿吉安屢以省會重地不便輕離為辭今身赴吉安省會何遂不緊要耶省城官兵盡調遠地輕率已甚且以輕王慢旨之語恐嚇調兵尤屬不合喇布等其速撤可緩地方官兵鎮守省城務使無虞嗣後調度綠旗官兵皆與總督董衛國會商行之董衛國亦照舊供職○己未諭平南王尚之信齎奏參將羅思漢曰爾王素懷忠藎思報効國家朕已知之舉廣東全省歸誠民免湯火之患深為可嘉據今時勢剿滅吳三桂甚為緊要大兵進取務貴神速吳逆近在湘潭其意蓋以大兵必從衡永廣東進攻故據此為備今廣西若能反正爾王即宜率兵三路進剿滿洲大兵亦令各路遙發前此吳三桂率領偽將軍十八人賊兵十萬屯聚長沙挑濠立樁僅可支持旦夕若大兵數路並進吳逆斷無如許偽將賊兵隨處備設濠樁以與大兵相抗其滅亡可翹足而待

矣。爾到彼即傳朕諭○命翰林院侍講學士顧八代赴莽依圖軍前傳諭莽依圖曰。用兵利在神速。毋稽遲貽誤。或不得已。擇便而行者有之。凡此機宜。爾自熟悉。近以逗留誤事。如長沙荊州諸處。其明驗也○尚之信疏言提督嚴自明係吳逆舊屬。不知軍旅。今粵東初復。兵心甫定。若以控馭無術。形跡可疑之人。復令統轄。恐兵心不安。

上諭兵部曰。據尚之信來奏。宜撤嚴自明還京師。但撤還嚴自明。恐將來投誠者皆懷疑不前。其優加嚴自明為將軍。調赴廣州閒住。已而嚴自明疏言。臣既掛彈章。宜避嫌疑。乞賜撤還。或安置畿輔。或隨侍

輦轍。

上乃命嚴自明俟新提督到日。即還京師○庚申。轉戶部右侍郎察庫為左侍郎。陞內閣學士薩穆哈為戶部右侍郎○陞平南王下齊奏二等護衛張永祥為總兵官。仍令歸平南

王下候補○辛酉。

上詣

太皇太后

皇太后宮問安○諭各省王。貝勒。大將軍將軍總督巡撫提督等曰。逆賊吳三桂背恩倡亂。散布偽劄。誘惑兵民。迫脅官吏。以致生民塗炭。所在騷然。今各路大兵剿撫並行。平涼福建廣東等處相繼平定。文武大小官員兵民人等俱被恩賞安插得所。惟湖南四川雲南貴州官員兵民人等。仍陷賊中。未得歸正。念此等俱受國恩。必非甘心從賊。蓋有懷忠義之心。而無脫身之路者。又有身被迫脅。懼罪疑畏者。今大兵雲集。不日蕩平賊寇。玉石難分。朕心深為不忍。今特頒敕諭。檄示招徠。凡在賊中文武官員兵民人等。悔罪歸正。前事悉赦不問。仍照常加恩。或有擒殺賊首投獻軍前。及以城池兵馬來歸者。仍論功優敘。爾等即宣布曉諭。以副朕寬仁矜全之意○以

故二等伯赫特赫之弟舒敏襲爵○免陝西
西鳳二府屬用兵州縣歷年額賦及解運漢
中被刦糧石脚價銀兩○癸亥

上詣

太皇太后宮問安○戊辰朝鮮國王李焞以閩
粵蕩平遣陪臣福善君李楠等上表慶賀表
文曰寶祚彌永恒斷四海之底平皇威遠揚
聿聞二方之歸順車書所及蹈舞維均欽惟
皇帝陛下運撫隆熙資挺神聖至化普洽既推
並生之仁王師濯征毋軫去殺之戒故茲抗
命之輩終乃接踵而降版圖載完曾無矢鏃
之費妖氛已掃即看巢窟之空斯為曠古之
鴻休豈非不世之駿烈伏念臣僅延先緒逃
守外藩跡阻嵩呼縱違虎拜之列誠馳凱奏
第切鼇抃之忱○己巳

上詣

太皇太后

皇太后宮問安○追贈海澄公太子太保黃梧

太保謚忠恪加祭一次○庚午諭奉命大將
軍和碩康親王傑書據筆帖式塔穆哈圖報
潮州劉進忠已於本月初六日投誠今劉進
忠復遺書吳三桂為平南王尚之信舉發是
劉進忠投誠本非真心不過勢窮就撫耳又
總兵官劉炎所遺吳三桂書亦皆搜獲其心
迹與劉進忠畧同此等皆心懷反側久留潮
州必致生變若果已投誠康親王等即託言
欲與相見以計撤回留駐福州設或遲疑不
至速行奏聞劉進忠等既撤則令將軍喇哈
達以兵之半守漳泉都統賴塔率其半守潮
州仍令尚之信還原任潮州總兵官王國棟
盡率其標兵詣賴塔處協守○辛未陞太僕
寺卿溫代為內閣學士兼禮部侍郎○予故
平南王尚可喜祭葬立碑謚曰敬○壬申

上詣

太皇太后宮問安○免陝西平慶二府用兵各
州縣衛歷年額賦有差○癸酉二等阿思哈

尼哈番固德以罪革退。以其弟三等侍衛綽爾們襲替。○安南將軍覺羅舒恕等疏言。將軍莽依圖遺臣書云。我等駐韶州。候旨調遣。因尚之信屢遣人來言。劉進忠等尚未投誠。遂留副都統穆承格駐守韶州。而身偕將軍額赫納。於本月十一日率領官兵前赴廣州。得旨前議。令簡親王大岳侯粵東既定。即進取衡州。將軍莽依圖兵俟馬到。即進取湖南。平南王尚之信等進取廣西。今劉進忠等已投誠。潮惠無虞。莽依圖其速回韶州預備。同各路大兵分道進剿。○甲戌。以鑾儀衛鑾儀使王可臣為廣東提督。○乙亥。

上詣

太皇太后

皇太后宮問安。○先是。戶部左侍郎班迪差審揚威大將軍和碩簡親王喇布等吉安失利一案。以徇庇命降二級調用。至是吏部推補詹事府少詹事。得旨班迪著以世職隨旗上

朝。○陞少詹事佛倫為光祿寺卿。戶部郎中席蘭太為太僕寺卿。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十八

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十六年丁巳秋七月丙子朔享

實錄卷六十八

太廟。

上親詣行禮○丁丑原任廣東廣西總督金光祖疏言。臣前窺察衆情。多有猜疑。隨將臣總督兩廣關防。暫行秘藏。託言失去。今雖用原藏關防爲信。綏輯人心。然受兩粵重寄。不能預籌保固。一旦被陷。貽誤封疆。臣罪難逭。得旨。金光祖身膺兩粵總督重任。不能保守封疆。致地方陷賊。前奏關防已卷。今又稱收藏。如果收藏。前具題失印之時。何不以此情密

奏。觀此明屬巧飾。本應革職從重治罪。念其

與平南王尚之信密謀反。正復定粵東。著革

職。仍留原任。戴罪圖功。○以故二等阿思哈

尼哈番碩格色之子舒泰襲職。○戊寅。

上詣

太皇太后宮。問安。○己卯。以隨征福建副將黃

大來。爲福寧總兵官。隨征都督僉事劉德懋

爲興化總兵官。○兵部議覆。差往河工吏部

侍郎折爾肯等疏言。江南海州雲臺山。自從

實錄卷六十八

禁海。遷移居民。地方廢棄。今請改復爲內地。

向有徐濱鹽場。及村莊膏腴田畝。應加意招

徠。竈戶人民。復其舊業。均應如所請。其東海

營原設守備把總等員。亦應復設。從之。○庚

辰。

上御太和殿視朝。文武陞轉各官謝恩。次朝鮮

國使臣等行禮。○壬午。

上詣

太皇太后宮。問安。○甲申。予故盛京工部侍郎

教色。祭葬如例。○江寧巡撫慕天顏疏言。定例。凡侵盜錢糧人犯。限一年追納。不完者。本犯本身妻及未分家之子。流徙財產入官。今請於冊報之後。發解之前。有能全完者。免其罪。部議不准。得旨。侵盜錢糧人犯。於冊報之後。發解之前。全完者。免罪。著為令。○乙酉。揚威大將軍和碩簡親王喇布疏報。江西各屬招撫偽官一千九百餘員。兵丁家口三萬七千四百餘名。下部知之。○奉命大將軍和碩康親王傑書疏報。偽將軍樂燦呈繳偽印劄。率衆投誠。下部知之。○江西總督董衛國疏報。偽總兵謝鎮國等。率偽官三百餘員。兵丁一萬三千餘名。投誠。下部知之。○丁亥。轉禮部左侍郎管右侍郎事張士甄為吏部右侍郎。○揚威大將軍和碩簡親王喇布疏言。聞吉安逸賊韓大任等。屯寧都樂安諸處。臣隨調滿漢官兵三路進剿。仍行文招撫。今韓大任等。意欲歸誠。啟請轉奏。得旨。前王輔臣等

投誠。俱已免罪復用。近又特詔傳諭。被脅從賊官吏。自拔來歸。赦罪議敘。簡親王即以此意。曉諭韓大任等。○戊子。

上詣

太皇太后宮。問安。○己丑。予浙江陣亡劄委遊擊張國棟。卹銀一百兩。廕一子。以衛千總用。劄委把總王徵。徐忠等。卹銀七十兩。○庚寅。中元節。遣官祭

永陵。

福陵。

昭陵。

孝陵。

仁孝皇后。○辛卯。揚威大將軍和碩簡親王喇布等疏報。偵得吳三桂所屬偽將軍七人。率賊三萬。至宜章。欲犯樂昌。又欲分兵犯南安。得旨。逆賊至宜章。屯駐。復欲分兵犯南安。勢必窺伺南韶。簡親王宜預為守禦之策。以固疆圉。又潮州劉進忠。劉炎等。俱已歸誠。粵省

官兵。無東顧之憂。平南王尚之信將軍莽依圖。即親統滿漢官兵。速赴韶州。協剿湖南逆賊。將軍舒恕領兵守南安。南雄諸處為韶州聲援。或舒恕未便身離贛州。亦當量遣官兵馳赴。尋安南將軍覺羅舒恕疏言。據副都統穆承格報。逆賊於本月初五日。攻韶州甚急。臣即與巡撫佟國楨。總兵哲爾肯等會商。遣署副都統赫勒布。率滿漢官兵赴援。得旨。韶州。江粵咽喉必爭之地。尚之信莽依圖等。以文到日。即率兵赴韶州。舒恕亦相機應援。簡親王仍分兵赴贛。以資防禦。○壬辰。四川道監察御史魏雙鳳疏言。先是直隸各省重案。如在京秋審例。俱預期繕冊送京。命九卿科道會同覆核。分別情實。緩決矜疑三等。嗣以三逆變亂。部議暫罷。今請復舊制。刑部覆候滇黔平定。然後舉行。得旨。秋審事關人命。直隸各省重案。定限送京覆核。如舊制行。○翰林院檢討王尹方。為浙江鄉試正考官。工

科給事中丁泰。為副考官。○癸巳。上詣

太皇太后宮問安。○甲午。加浙江總督李之若兵部尚書銜。以恢復地方。調度有功也。○河道總督靳輔疏言。河道敝壞已極。修治刻不容緩。謹條列八疏以奏。一。挑清江浦以下。歷雲梯關至海口一帶河身之土。以築兩岸之隄。一。挑洪澤湖下流高家堰以西至清口引水河一道。一。加高幫濶七里墩。武家墩。高家堰。高良潤。至周橋閘。殘缺單薄。隄工。一。築古溝。翟家壩。一帶隄工。并堵塞黃淮各處決口。一。開通濟閘壩深挑運河。堵塞清水潭等處決口。以通漕艘。一。錢糧浩繁。須預為籌畫。以濟工需。一。請裁并河工冗員。以調賢員。赴工襄事。一。請設巡河官兵。疏入。命議政王。大臣九卿。詹事。科道。掌印。不掌印各官。會同詳確議奏。尋議黃河關係運道民生。固應急為修理。但目今需餉維殷。且挑濬役夫。每日需十

二萬有餘。若召募山東河南等處不惟貧民遠役。途食無資。抑恐不肖官後借端擾民。應先將緊要之處酌量修築。俟事平之日。再照該督所題。大為修治。得旨。河道關係重大。應否緩修。并會議各本內事情。著總河靳輔。再行確議具奏。○丙申。

上詣

太皇太后宮問安。○改降級留任雲南貴州總督鄂善為甘肅巡撫。○丁酉。原任高雷總兵

官祖澤清疏言。罪臣束兵無術。臨難偷生。蓄恨兩年。始得乘機斬賊。率屬歸正。靜聽處分。上諭。祖澤清先雖被脅從逆。仍感恩歸正。其加都督同知。仍管總兵官事。○定遠平寇大將軍和碩安親王岳樂等疏言。臣等兩軍同駐日久。糧芻甚艱。宜分兵令穆占率往岳州。水路夾攻。得旨。大將軍貝勒尚善等前奏。須得鳥船。始可破賊。已命江寧巡撫慕天顏督造。今將軍穆占。即統兵到岳州。亦必俟鳥船告

竣。然後進攻。度鳥船到彼。正當隆冬。水涸。難以前進。若俟來年水長。進兵勢必坐守岳州。虛糜日月。穆占宜勿赴岳州。以兵會簡親王。規取衡永諸處。遏賊後路。如此。則粵東得以寬緩。而粵西欲降者。亦可乘間來歸。穆占等其即率岳州官兵。速赴茶陵攸縣。與簡親王兵會。協力進取。衡永諸處。○廣西巡撫傅弘烈疏言。臣前請大兵接應。力任進取。兩廣。今廣東全省已定。廣西乃臣專責。無可他議。臣與將軍莽依圖等。議欲進兵廣西。緣敕印未至。無以為信。且臣兵寡弱。必得尚之信。官兵同臣進取。庶克有濟。又收復廣西雲貴。須招集土司。土司官員。專取憑於印信。若以廣西雲南各土司印信頒發。招撫一處。即給一新印。以杜反覆。則逆賊可不煩大兵而滅矣。臣標官兵。經年缺餉。兼少馬匹。請量撥給。以資進剿。得旨。覽奏。詞意忠懇。傳弘烈可仍以廣西巡撫。為撫蠻滅寇將軍。給以敕印。尚之信

速遣所屬官兵與傅弘烈同定廣西。土司印信。禮部鑄給。其官兵錢糧。令總督金光祖給銀十萬兩。俟秋涼再發馬匹。尋又命戶部撥銀十萬兩。解赴傅弘烈軍前。○廣西道御史郝浴疏言。冊立

皇后大禮將行。請停今歲秋決。以廣聖慈。下部知之。○戊戌。加鄖陽提督佟國瑤太子少保。以安撫難民有功也。○己亥。

上詣

大皇太后宮問安。○予故大學士覺羅伊圖祭葬。謚文僖。○刑部等衙門議覆。差往河工吏部侍郎折爾肯等疏言。原任河道總督王光裕莅任以來。不將隄岸修築堅固。以致新舊隄岸。屢屢衝決。淹沒民田房產。至屬員侵蝕冒銷。又不題叅。王光裕應革職杖一百。原任淮揚道今陞浙江按察使張登選。原任管河同知管盡忠。俱擬斬監候。從之。○庚子。上御太和殿視朝。文武陞轉各官謝恩。○諭吏

部禮部。自古帝王統御寰區。首在敦崇孝治。既已追尊

母后。揚扈慈徽。尤必推恩外戚。優加封爵。展孝

思於靡盡。昭發祥之有源。甚盛典也。緬惟

慈和皇太后。奉事

太皇太后。克盡誠孝。佐助

皇考。夙著敬勤。誕育朕躬。纘成鴻業。每懷顧復深慈。不勝本源永慕。恩推所自。允符彝章。原任都統精奇尼哈番。佟圖賴。

慈和皇太后之父也。勲舊世裔。宣力累朝。厚德

鍾祥。篤生

聖母。念劬勞之罔報。宜恩禮之隆施。特晉崇階。以昭典則。佟圖賴著加封為一等公。妻覺羅氏。封為公夫人。給與誥命。世襲罔替。爾部即遵諭行。○諭禮部。

世祖章皇帝乳母朴氏。保育

先皇。克昭敬慎。朕躬幼時。殫心調護。夙夜慇懃。撫視周旋。身不離於左右。提攜備至。時罔怠

於寒暄。襁褓曲體乎性情。勤劬彌切於啼笑。恭謹抒匪懈之忱。淑惠盡慈愛之養。每懷疇昔時。厯於表。封典宜加。用彰隆眷。今封為奉聖夫人。頂帽服色。照公夫人品級。爾部即遵諭行。○平南王尚之信疏報。原任鎮守瓊州總兵官佟國卿舉城歸正。下部議敘。○尚之信又疏報。海賊劉國軒占踞惠州。負固不服。先從陸路窺新安。已被官兵殺敗。又從水路抵東莞縣石龍地方。希圖順流直薄省城。臣統水陸官兵。分路夾剿。逆首劉國軒棄城奔竄。偽總兵陳璉等。以惠州歸正。得旨嘉獎。下部議敘。○辛丑。

上詣

太皇太后宮問安。○揚威大將軍和碩簡親王喇布疏言。吉安。贛州。南安。皆係重地。臣等兵力甚單。議撤駐袁州兵。每佐領三名。并撤統領江寧兵額楚。署副都統揚古代等。還吉安。以備調遣。其袁州。萍鄉。諸處。乞令安親王分兵防守。得旨。安親王及將軍穆占之兵。不便

分給。袁州。萍鄉。係安親王大兵後路。簡親王仍量調通省官兵。嚴加防守。○陞內閣學士富鴻基。為禮部右侍郎。○以翰林院檢討沈上墉。為江南鄉試正考官。吏部員外郎趙士麟。為副考官。○贈福建殉難歸化縣知縣黃易。為按察使司僉事。予祭葬。廕一子。入監讀書。○壬寅。以內閣學士項景襄充經筵講官。○癸卯。

上詣

太皇太后宮問安。○甲辰。

上御便殿。召大學士等。入賜坐。論經史大義。因及前代朋黨之弊。諭曰。人臣服官。惟當靖共匪懈。一意奉公。如或分立門戶。私植黨與。始而蠹國害政。終必禍及身家。歷觀前代。莫不皆然。在結納植黨者。形跡詭密。人亦難於指摘。然背公營私。人必知之。凡論人議事。間必以異同為是非。愛憎為毀譽。公論難容。國法莫追。百爾臣子。理宜痛戒。若夫汲引善類。不

矜己長。同寅協恭。共襄國事。是又不可以朋黨論也。○大學士巴泰。引年乞休。得旨。卿以年邁請休。情辭懇切。准原官致仕。以遂爾志。念爾効力有年。清端勤慎。將朕所御衣冠帶鞶。特賜與卿。用旌老臣。以昭朕始終眷戀至意。○授固山貝子敦達玄為縣君。壻阿爾素為固山額駙。○以吏部尚書明珠。戶部尚書覺羅勒德洪。為內閣大學士。○以原任湖廣巡撫董國興。為河南巡撫。

八月乙巳朔。賜大學士明珠。文獻通考等書。○予故鎮國將軍席忒庫。祭一次。○加封原任都統三等精奇尼哈番佟圖賴。為一等公。以其子佟國綱承襲。○丁未。遣大學士李蔚祭。

先師孔子○

上詣

太皇太后宮。問安。○諭議政王大臣等曰。外藩蒙古等。進獻馬甚多。江西鄰近湖廣。廣東。乃

適中之地。可撥五千匹。發往南昌。令總督董衛國。遴委賢能官員。督視秣養。并簡選兵部喂養馬。及營驛馬二千匹。發往湖廣武昌。飼秣備用。○定遠平寇大將軍和碩安親王岳樂等疏言。猱猱總兵官陸道清。請還雲南。相機鼓勵土司。

上命遣陸道清回雲南。宣布寬大德意。曉諭土司。倘未便舉事。亦聽其還鄉。使彼父母妻子。得以完聚。其布政使周昌。黃九疇。仍留安親王所。俟有機會。題明遣往招撫。○江西總督董衛國疏言。逆賊朱統錫。復犯江右。已破貴溪。瀘溪諸縣。臣請親率所部官兵。前往撲剿。上命董衛國。便宜進剿。○戊申。祭。

大社

大稷。

上親詣行禮○

上詣

太皇太后

皇太后宮問安○已酉。

上奉

太皇太后幸南苑。

上親扶輦行數武。然後乘馬隨行。至南苑。扶

太皇太后下輦。入行宮。

上駐蹕南苑○庚戌。

上詣

太皇太后行宮問安○壬子。

上詣

太皇太后行宮問安○以故三等阿思哈尼哈

番滿韜子那木僧格弟襲職○癸丑。

太宗文皇帝忌辰。遣官祭

昭陵○乙卯。

太祖高皇帝忌辰。遣官祭

福陵○丙辰。

上奉

太皇太后。自南苑回宮。詣

皇太后宮問安○先是。

上命江南總督阿席熙招募烏船所需舵工水

手。至是。阿席熙疏言。舵工水手。若於八月內

招足。隨船解送。似難必得。得旨。烏船需用舵

工水手。最為緊要。宜用精熟諳練之人。河南

山東。湖廣。江南。江西。浙江。山西。俱有福建投

誠開墾官兵。多習水性。其行令各該巡撫。遴

選便於舟楫者。報部。其舵工水手。仍聽總督

阿席熙多方招募。如不能足數。即以各省所

報官兵。酌量發往○丁巳。廣東廣西總督金

光祖疏言。撫臣傅弘烈。已統兵西行。又楚逆

方逼韶城。與我兵對壘。乞多遣滿兵。以資剿

禦。

上諭。逆賊吳三桂。分遣賊兵。侵犯廣東韶州。廣

西桂林諸處。皆由大將軍安親王岳樂。將軍

穆占等。擁兵坐守。長沙。不即破賊。平定湖南

所致。岳樂等。其以文到。目。即分兵。令穆占率

赴樂昌諸處。以斷來犯。韶州賊兵。後路。夾而

攻之。度未可行。穆占。即會同大將軍簡親王

喇布進取衡永諸處。以斷侵犯。兩粵賊兵後路。其撫蠻滅寇將軍巡撫傅弘烈。既統兵赴援廣西。聽其相機堵剿。平定地方。○戊午。轉禮部尚書吳達禮。為吏部尚書。○陞詹事府少詹事李天馥。為內閣學士兼禮部侍郎。○陞延綏總兵官許占魁。為鑾儀衛鑾儀使。○加靖逆將軍侯張勇。少傅兼太子太師。以敘梨川殺賊功也。○己未。

上御太和殿視朝。文武陞轉各官謝恩。次厄魯特喀爾喀進貢使臣等行禮。○

上御經筵。○庚申。以故三等精奇尼哈番瑪爾漢子福爾蘇襲職。○以戶部郎中張友傑。為河南鄉試正考官。內閣中書張鴻猷。為副考官。○辛酉。授故輔國公弼禮克子弼爾特納。為三等鎮國將軍。○壬戌。

上詣

太皇太后宮。問安。○以大學士覺羅勒德洪明珠充纂修。

太宗文皇帝實錄總裁官。○癸亥。先是。鎮南將軍莽依圖疏言。臣自省城抵韶州。見城北陸路。逆賊掘壕數重。與官軍對壘。請發大兵星馳赴援。至是。平南王尚之信。又疏言。粵地土寇尚多。潮惠人心未定。且高州四府屢報賊警。臣屬官兵。不得留鎮省會。得旨。令將軍喇哈達。賴塔等大兵至潮州。劉進忠等俱已歸順。海寇敗遁。粵境悉平。而尚之信。又以土寇為辭。不離省城。則逆賊各路來犯。粵東又復可虞。不但廣西難復。楚賊難滅。而廣東勢亦難保。尚之信。其以文到之日。即親統官兵。速赴韶州。與將軍莽依圖等。并力剿賊。○廣西巡撫傅弘烈疏報。臣率官兵。進取廣西。偽將軍趙天元等。擁眾萬餘。據守梧州。出城迎戰。我兵水陸奮擊。敗之。遂復梧州。趙天元等僅以身遁。得旨嘉獎。下部議敘。○乙丑。以冊立

皇后。遣官祭告。

天地。

太廟○

上詣

太皇太后

皇太后宮問安○丙寅。

上御太和殿。遣大學士索額圖為正使。大學士李蔚為副使。持節授妃鈕祜盧氏冊寶。立為皇后。冊文曰。朕惟道法乾坤。內治乃人倫之本。教型家國。壺儀實王化之基。資淑德以承庥。宜正名而惇典。咨爾妃鈕祜盧氏。乃公遏必隆之女也。鍾祥世族。毓秀名門。性秉溫莊。度嫺禮法。柔嘉表範。夙昭令譽於宮庭。雍肅持身。允協母儀於中外。茲仰承

太皇太后慈命。以冊寶立爾為皇后。爾其誠孝以奉

重闈。恭儉以先嬪御。敬襄

宗祀。弘開奕葉之祥。益贊朕躬茂著雍和之治。欽哉。遣大學士覺羅勒德洪持節授佟氏冊

寶。封為貴妃。遣尚書吳正治侍郎額星格楊正中馬喇富鴻基學士項景襄李天馥等持節授冊。封李氏為安嬪。王佳氏為敬嬪。董氏為端嬪。馬佳氏為榮嬪。納喇氏為惠嬪。郭羅洛氏為宜嬪。何舍里氏為僖嬪○

上以冊立

皇后。率諸王貝勒貝子公及內大臣大學士都統尚書精奇尼哈番侍衛等詣

太皇太后

皇太后宮行禮○丁卯。諭吏部等衙門。向來各衙門事件。關係重大者。雖有定限。赴科道稽察。但事易結者。即宜速結。必俟限滿。方行題覆。多致壅滯。更有各項呈狀。不係註銷者。任意耽延。借端拘提人犯。數月不為審結。無辜牽累。殊堪憫惻。自後題覆本章。俱速為料理。不必盡拘定限。至於審理事件。亦速為完結。照註銷欽件。例定限每月造冊。赴都察院科道稽察具奏。爾等各宜力圖振作。體恤民隱。

以副朕孜孜求治之意。於是都察院詳定處分遲延各官條例以聞。

上從之。仍諭曰。各項事件。嚴立限期。原為體恤民隱。內外各衙門。尤當詳慎料理。務求妥確。勿得藉口。限迫草率完結。致有舛錯。仍令通行飭知。○奉命大將軍和碩康親王傑書疏言。潮州府同知仇昌祚。自齎奏還潮。遇賊作亂。即引錐刺項。自稱瘡啞。堅不從賊。請加旌敘。得旨。仇昌祚克篤忠貞。堅守臣節。殊為可嘉。可從優授為僉事道。留粵東遇缺補用。○戊辰。

上御太和殿。諸王。貝勒。貝子。公。文武各官。上表慶賀。頒詔天下。詔曰。帝王仰膺

天眷。撫育羣生。爰溯治理之隆。莫不肇自宮闈。達於海宇。故必慎選賢媛。用資內助。承

宗廟之重。敦風化之源。甚鉅典也。朕祗纂丕基。篤念倫紀。茲者。

聖祖母昭聖慈壽恭簡安懿章慶敦惠溫莊康

和仁宣太皇太后。深惟內治攸關。特遴淑德。作配朕躬。正位中宮。母儀天下。欽遵

慈命。虔告

天地。

宗廟。於康熙十六年八月二十二日。冊立公遏必隆之女。妃鈕祜盧氏為皇后。惟朕躬暨后。共勗敬勤。克迪厥德。庶其上紹徽音。敷宣盛化。以貽子孫。臣民億萬年無疆之祉。布告天下。咸使聞知。○定遠平寇大將軍和碩安親王岳樂疏言。醴陵為江楚接壤要地。乞敕簡親王。遣無事地方兵。每佐領三名駐守。得旨。近覽簡親王奏。江西大兵。調發諸處剿賊。防守要汛。兵力既分。無可復調。將軍穆占自岳州帶往兵。令分每佐領四名。留駐長沙聽安親王酌量遣發。赴醴陵防守。○以一等侯馬三奇為浙江平陽總兵官。○庚午秋分。夕月於西郊。遣左都御史喀代行禮。○辛未。上詣

太皇太后

皇太后宮問安○轉工部尚書伊桑阿為戶部尚書。兵部尚書塞色黑。為禮部尚書○喀爾喀土謝圖汗遣使進九白年貢。宴賚如例○癸酉。遣官祭

歷代帝王○遣官祭城隍之神○甲戌。鎮南將軍莽依圖疏言。投誠總兵黃四標逃奔入山。又投誠總兵薛起龍叛。率賊眾四千。屯駐江口。擄掠民間子女。臣調兵省城。今尚未至。韶州官兵。又不可動。乞調附近之兵。以資撲剿。得旨。駐守南安。署副都統赫勒布。就近領兵前往。會同南雄總兵官宋四箴等。協力速滅叛賊黃四標。薛起龍等。以靖地方。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十九

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十六年丁巳九月乙亥朔。

實錄卷六十九

上詣

太皇太后宮問安○丙子先是。

上諭兵部今廣東底定正當破賊之時亟宜添發大兵平定湖南剿滅逆賊吳三桂項大將軍公圖海報我兵已經撤回陝西見有大將軍將軍提督等剿賊防汛自無不足且滿洲大兵又復不少宜分滿兵每佐領三名酌選將軍提督所部綠旗兵同京師兵每佐領三名遣赴湖廣其令圖海會同各將軍提督

確議以聞至是撫遠大將軍都統大學士公

圖海等疏言臣等本宜撥滿兵每佐領三名

發往湖廣但陝西幅員遼闊所在防汛今議

分滿兵每佐領二名酌選三將軍二提督標

下綠旗兵三千名同滿洲大兵付大臣一人

率赴荊州餘兵分守各隘得旨前覽大將軍

順承郡王勒爾錦奏欲自荊州渡江請發將

軍鄂內所攜舟師并將軍穆占所部精兵每

佐領五名及前鋒兵綠旗兵以資進剿又大

實錄卷六十九

將軍貝勒尚善等奏請留將軍鄂內每佐領

兵五名仍駐岳州仍如前請添發烏船四十

艘精兵每佐領四名庶賊船可破今當秋寒

正進兵破賊之時且吳逆見駐湘潭分遣荆

岳賊兵侵犯兩粵宜乘逆賊勢分增荊州諸

處兵令順承郡王統率渡江鼓行滅賊即勢

有未便仍當臨江揚兵以牽制逆賊俟烏船

告竣即將所添官兵發遣貝勒尚善軍前令

擊破賊船水陸夾攻岳州大將軍公圖海等

速分滿兵每佐領二名。委大臣一人率赴荊州。其綠旗官兵可減一千。止撥二千。令原統轄官率往。又山西提督周卜世亦令率所轄官兵同赴湖廣。所謂山陝綠旗兵其酌予賞賚。官各加一級。更撥京師兵每佐領護軍二名。驍騎一名。添發湖廣令公溫齊統之。副都統杭奇穆舒為兩翼。溫齊杭奇恭贊軍務。先是。

上諭內大臣覺羅武默納侍衛費耀色等曰。長白山乃

祖宗發祥之地。今無確知之人。爾等前赴鎮守烏喇將軍處。選熟識路徑者導往。詳視明白。以便酌行祀禮。爾等可於大暑前馳驛速去。至是武默納等自長白山還京復命。

上曰。長白山發祥重地。奇蹟甚多。山靈宜加封號。永著祀典。以昭國家茂膺神貺之意。著禮部會同內閣詳議以聞。○予故副都御史覺羅碩博會祭葬如例。○奉命大將軍和碩康

親王傑書等疏言潮州要地。必得才能將領。以資彈壓。一等侯馬三奇人甚驍壯。著有戰功。且潮州官兵大半係伊父馬得功舊部。若以馬三奇為潮州總兵官。則衆心俱服。

上命調浙江平陽總兵官馬三奇為潮州總兵官。其前授總兵官王國棟著以粵東要地總兵缺補用。○傑書等又疏言漳泉諸處平定。臣等隨授都統賴塔平南將軍印。選前鋒護軍二千餘名。暫守潮州。其內府佐領兵及喀喇沁土默特兵。令將軍喇哈達率赴會城。靖南王下官兵亦留守潮州。令耿精忠但攜其護衛親軍與喇哈達偕來。

上命耿精忠仍駐潮州。復敕諭傑書及尚書介山侍郎吳努春等曰。今當剿滅吳逆。招攜撫順之時。不宜遽調耿精忠還會城。以疑衆心。王及大臣等不將茲事預行請旨。即撤耿精忠。殊為失計。嗣今凡此等大有關係之事務。熟籌請旨。毋得徑行。○戊寅。福建總督卽廷

相疏報。鄭逆偽監軍侍郎陳俞侯攜帶家口人丁自海上前來投誠。下部知之。○己卯。

上御太和殿視朝。文武陞轉各官謝恩。○以內閣學士兼禮部侍郎溫代充經筵講官。○以右春坊右中允兼翰林院編修董訥充日講起居注官。○福建總督郎廷相疏報長泰縣天柱山最為險要。山海賊寇多聚於此。臣調兵搜剿。同原海澄公標總兵魏茂等殺賊三百餘名。生擒偽提督中軍副將孫公等。其偽總督林鳳等俱帶重傷逃遁。天柱山已經蕩平。又進剿東埭塔潭等處。擊殺偽將軍吳田賊衆遠遁。下部議敘。○撫遠大將軍都統大學士公圖海疏報。臣自平涼親閱秦州。清水隴州。寶雞。一帶隘口。酌撥滿漢官兵防守。今據諸路報稱。副將紀魁元等敗賊於五盤山。生擒偽參將等。夸蘭大姜都納等敗賊於喬家山。恢復塔什堡。巡撫鄂善率領官兵敗賊於塘坊廟。副都統鄂克濟哈率領官兵敗賊

於芭蕉園。並擒斬甚多。獲器械不可勝計。下部議敘。○庚辰。

上御懋勤殿。諭講官喇沙里陳廷敬。張英曰。爾等每日進講。啟導朕心。甚有裨益。嗣後天氣漸寒。特賜爾等貂皮各五十張。表裏緞各二疋。○福建總督郎廷相疏報。總兵黃藍擊敗海賊於小盈地方。又提督段應舉等生擒偽將軍李復貴。偽軍師林日向等。下部議敘。○以翰林院修撰彭定求為順天鄉試正考官。編修胡會恩為副考官。○辛巳。

上御製詩二首及衣服等物。賜撫遠大將軍都統大學士公圖海。○壬午。

上詣

太皇太后

皇太后宮問安。○癸未。揚威大將軍和碩簡親王喇布等疏言。臣等或進取衡永。或救援韶州。必厚增兵力。始克有濟。乞多撥就近官兵星馳前至。

上諭。和碩額駙華善學士薩海。率江寧所有盛京兵三百。自京撥往漢軍兵三百。徽州駐防滿兵五十。蒙古兵六百。速赴江西。抵南昌。日合多諾等兵多。選有馬者。率赴簡親王軍前。以聽調遣。華善所佩平寇將軍印。留付署副都統科爾科代。管理江寧事務。至安慶。見有撫標兵。提督王永譽。可量率所部兵。往守徽州。○甲申。

上詣

太皇太后宮問安○

上往閱

仁孝皇后山陵。是日啟行。駐蹕三河縣南○乙酉。

上駐蹕薊州東○免江南泰州本年分水災額賦十之三○丙戌。

上詣

孝陵。率內大臣侍衛大學士三品以上官行禮。舉哀。是日駐蹕湯泉○丁亥。

上詣

孝陵展祭。如四時大饗儀○戊子。

上巡視沿邊內外。駐蹕三屯營四十堡○己丑。

上駐蹕商堅台。喀喇沁固山額駙額林臣偕縣君來朝○庚寅。

上駐蹕博洛和屯東○辛卯。

上駐蹕達希喀布秦昂阿地方。科爾沁多羅貝勒額駙沙津來朝○壬辰。

上駐蹕察罕和屯。喀喇沁多羅杜楞郡王扎付

鎮國公烏忒巴喇等來朝。科爾沁和碩達爾漢親王祖母郡主遣使貢駝馬○戶部議覆

安徽巡撫徐國相疏言定遠天長滁州來安

四州縣實荒地五百六十頃四十六畝零

逃絕人丁一千二百七十二丁應徵銀米俱

宜蠲免。應如所請。從之○旌表江西新建縣

節婦顏鳳麒妻喻氏。給銀建坊如例○癸巳

上駐蹕西爾哈畢喇地方○甲午。

上駐蹕喜扎忒畢喇地方○免江南宿遷縣本

年分水災額賦十之三○予福建陣亡劄委副將高士英卹銀一百五十兩。廕一子。以衛千總用○乙未。

上駐蹕和爾和克畢喇地方。科爾沁多羅冰圖郡王額濟音等來朝○征南將軍穆占疏言臣等於本月初二日赴袁州。察訪進兵道路。即赴樂昌。如有未便。則會合簡親王。進取衡永。又前議留臣兵每佐領四名於安親王所。適兵部咨以文到日。即分兵赴樂昌。用是悉師以往。未獲分留長沙。得旨穆占不進取樂昌。又不赴茶陵攸縣。徑回袁州。以會同簡親王為辭。又自違本議。將荆岳所帶官兵盡攜赴袁州。不分留長沙。殊屬不合。穆占其速如前議。分每佐領兵四名。留安親王軍前。其或進取樂昌。或由茶陵攸縣進取衡永。作速定議。一面前進。一面奏聞○丙申。賜多羅杜楞郡王扎什玲瓏撒袋弓矢全副。鎮國公烏忒巴喇弓矢○

駕還至喀喇和屯南駐蹕。是日教漢多羅郡王扎穆蘇等來朝。及多羅郡王扎穆蘇母郡主。齊倫巴圖爾妻郡主。多羅郡王薩穆珀爾母。多羅杜楞郡王扎什母等遣使請安。貢駝馬○丁酉。

上駐蹕胡西漢圖昂阿地方○戊戌。

上駐蹕俄倫蒿齊忒地方。翁牛特多羅杜楞郡王畢禮袞達賴母郡主。巴林淑慧固倫長公主。科爾沁端貞固倫長公主等遣使請安。貢駝馬。翁牛特多羅杜楞郡王畢禮袞達賴等來貢駝馬○先是。

上諭議政王大臣等曰。逆賊吳三桂。憑江湖之險。抗拒大兵。為日已久。若不速行剿滅。湖南民困。無有已時。聞逆賊多備鳥船戰艦。死拒我師。我師亦宜倍製鳥船沙船。更令鹽船多載糧米。由岳江入洞庭。盡占江湖。斷賊糧道。夾攻岳州。如事屬可行。應遣賢能大臣官員會同督撫。剋期造船。多設水師營兵。同大兵

齊進期於一舉滅賊。但增船破賊。事關緊要。大將軍順承郡王勒爾錦。貝勒尚善等。身在地方。與賊逼近。應否舉行。著速議以聞。至是。寧南靖寇大將軍多羅順承郡王勒爾錦等議。若令舟師入洞庭。盡占江湖。斷賊糧道。即合新舊船艦。亦不敷用。久泊風濤。我船不利。若泊於南潯港一帶。非並設陸路重兵。則我船不得傍岸。勢不能久占江湖。阻賊餉路也。但逆賊造船未已。長江關係最重。當賊舟漸增之時。我舟又非可驟得。若預行添造。甚屬有裨。烏船沙船。可載數月之米。其鹽船似應停止。

上命添造烏船六十艘。沙船二百艘。戶部尚書伊桑阿。赴江南。同該撫速行督造。俟船將告竣。更添發綠旗官兵。鹽船著停止。○己亥。

上駐蹕雅圖畢喇地方。柰曼輔國公格勒爾來朝。○庚子。

上駐蹕達希喀布秦昂阿地方。○初巡閱邊外。

時調喀喇沁多羅杜楞郡王扎什鎮國公烏忒巴喇。一等塔布囊西達等。三十二塔布囊精奇尼哈番副都統等。率兵丁一千五百名來為嚮導。是日。

上出御幔城門。各賜衣帽帶鞞。白金緞布有差。

○辛丑。

孝慈高皇后忌辰。遣官祭

福陵。○

上駐蹕鄂拖和地方。○壬寅。

駕過達蘭蘇墨地方。見一人卧道旁。遣侍衛塞勒等往視之。回奏言。民王四海從邊外傭工還家。因食盡饑餒。卧不能起。

上曰。誰非朕赤子。此人饑餒僵卧。深為可憫。爾等往。噉以粥。救之。甦。可攜以來。既至。命大學士索額圖。詳問其由。令喜峯口駐防遊擊杜昇等善養之。送回原籍。是日。

上駐蹕灤陽城南。○以鄂爾多斯故固山貝子塞冷子古木布拉錫襲爵。○江西巡撫佟國

楨疏報招撫偽副將羅復彪等一百一十七員。所部兵萬餘。俱各還田里。下部議敘。○癸卯。

上駐蹕閭家屯東

冬。十月。甲辰朔。享

太廟。遣吏部尚書吳達禮行禮。○遣官祭

永陵。

福陵。

昭陵。

孝陵。

仁孝皇后○

上駐蹕湯泉。○頒康熙十七年時憲曆。○先是

康熙十四年。遣使存問達賴喇嘛。賜以璽書。

至是達賴喇嘛遣使請安謝恩。疏曰。欽惟

皇帝陛下。作天人之主宰。為億兆所依歸。不棄

釋迦後進法派。寵加遣使。欣逢各種隆重布

施。親手接受。敬獻紅素柔屬諸物。望明鑒而

恤之。謹鞠躬合掌。潔心上奏。得旨。貢獻禮物。

著察收。○乙巳。免江西新建等十三州縣本年分旱災額賦有差。○福建總督郎廷相疏報。逆賊朱宸。突犯安溪縣城。署縣事李鈺。同千總張文福率兵奮擊。斬偽提督林蕙。徐化等。并賊兵千餘。餘賊潰遁。保全城池。下部議敘。○郎廷相又報。按察使吳興祚。招撫光澤山寇偽都督陳龍。施廷宇等二百十四員。兵丁一萬九千五百餘名。下部議敘。○撫蠻滅寇將軍廣西巡撫傅弘烈疏言。臣闔門被難。自幼子幼女。暨家屬一百四十餘口。盡為逆賊李迎春執送。吳三桂分散殺戮。鎮臣楊國泰全家被害。及各將士眷屬慘戮情形。不得不造冊報部。以請優卹。用慰忠魂。得旨。卿為國忘家。志圖滅寇。不意逆賊李迎春將卿全家。并鎮臣楊國泰闔門解送誅戮。朕心深為憫惻。作何優卹。著議政王大臣會同議奏。尋議。俟該將軍查明優卹。從之。○鎮南將軍莽依圖疏言。廣西巡撫傅弘烈遺臣書言。傅弘

烈僅以兵五千。獨當西路。恐力不能支。請滿洲將軍一人。率騎兵千餘。來至粵西。以壯聲勢。得旨傳弘烈進定粵西。獨當一路。宜以重兵自隨。可照廣西經制兵額。便宜召募。汛守新復地方。兼剿寇賊。又將軍穆占見領兵赴廣東。夾剿韶逆。俟穆占抵粵破賊之後。與將軍莽依圖等會議。作何分兵。赴梧接應。傳弘烈聽酌量以行。○撫蠻滅寇將軍廣西巡撫傅弘烈題報。揚武營總兵官曾大職進剿逆賊於五屯所地方。殺獲甚多。恢復南平縣城。得旨嘉獎。下部議敘。○丙午。

皇太后聖壽節。遵

懿旨停止行禮筵宴。○土默特多羅達爾漢貝勒厄爾德木圖。奈曼多羅達爾漢郡王鄂齊爾等。遣使進馬。○征南將軍穆占疏言。臣在袁州。養馬二十五日。即赴樂昌。因此不留兵長沙。悉以大兵隨行。得旨將軍穆占仍遵前旨。速分兵。每佐領四名。赴安親王軍前。和碩

額駙華善兵。已全往江西。簡親王可於見駐南昌吉安兵。或穆占所經地方兵內。撥每佐領三名。益穆占軍。韶州方有賊警。穆占不得久駐袁州。令養馬二十日。即馳至樂昌。簡親王仍駐江西。調度兵馬。剿滅韓大任諸賊。○丁未。福建巡撫楊熙疏報。逆賊朱統錫以前明宗室名號。糾集黨羽。盤踞山谷。流毒三省。臣已招撫偽總兵陳龍等。隨遣按察使吳興祚。星赴光澤。率兵剿撫。吳興祚設計遣投誠總兵蔡淑。佯回賊營。以作內應。蔡淑隨差人密報。投誠總兵陳龍復首先率眾。斬關奪路。官兵分道砍寨。剿殺偽弁兵丁四千五百餘名。獲朱統錫子朱義潛。姪朱義質。偽總兵馮珩等。勢窮計迫。執獻朱統錫。并銀印一顆。兵丁三千餘名。又逆賊許志遠。恃朱統錫犄角之勢。屢抗我師。今朱統錫被擒。聞風膽落。率眾投誠。計偽官一百有八員。兵九千一百餘名。下部議敘。○撫蠻滅寇將軍廣西巡撫傅

弘烈疏報平樂府昭平縣離省不遠為賊犯
梧出沒之地。臣遣標下後營叅將周光裕率
兵進取。擊敗賊衆。斬殺無算。恢復縣城。得旨
嘉獎。下部議敘。○靖南王耿精忠遣子耿顯
祚入侍。○以原任總兵官楊國泰為廣西潯
梧總兵官。○己酉。

上詣

孝陵行禮。舉哀。是日。駐蹕淋河西。○庚戌。

上駐蹕邦均南。○辛亥。

上駐蹕夏店南。○陞原任廣西左江道胡一璽
為廣西布政使司布政使。○扎賴特固山貝
子畢立克故。遣官致祭。○壬子。

上駐蹕通州河東。○癸丑。

上回宮。詣

太皇太后

皇太后宮問安。○奉命大將軍和碩康親王傑
書疏報漳州龍溪縣班山泉州南安縣五都
同安縣三保谿等處地方逆賊立營結寨。盤

踞山谷。騷擾百姓。為害已久。臣遣前鋒叅領
都克納侯馬三奇副將馮兆京副都統紀爾
他布等分率滿漢官兵。於班山等處地方進
剿賊衆。屢次擊敗。并招撫偽副將黃邦漢等。
下部議敘。○平南王尚之信疏報招撫偽將
軍楊鎮邦。下部議敘。○撫蠻滅寇將軍廣西
巡撫傅弘烈疏報。臣遣標下叅將李士文等
率領官兵。於賀縣地方擊敗賊衆。恢復縣城。
但逆賊馬雄尚在。臣以孤軍無援。且桂林圍
困日久。臣欲親統全營往應。又恐梧城有事。
滿兵不至。難以接應。桂林一省關係。孫延齡
倘有不測。慮寒投誠之心。請敕鎮南將軍莽
依圖。或寧海將軍喇哈達等分兵接應。庶可
早奏蕩平。得旨嘉獎。下部議敘。○甲寅。

上詣

遼元總兵張弘泰將侯鎮國等恢復鬱林等
一州四縣。得旨嘉獎。下部議敘。○甲寅。

太皇太后

皇太后宮問安○諭議政王大臣等曰○今韶州路通○宜速發官兵接應粵西○可移檄將軍莽依圖等○分滿兵每佐領三名○付統領江寧兵額楚○率赴梧州○與廣西巡撫傅弘烈并力剿禦○至兩廣兵餉及馬○關係緊要○宜速給發○以慰軍心○前所撥餉銀○已至贛州○今遣戶部員外郎莫羅○馳驛赴贛○隨都統勒貝兵○以餉銀送往南雄○到日○令駐韶州將軍等遣兵迎取○分發兩廣○其遣撥馬匹○令江西督撫選官押送總督金光祖軍前○靖逆將軍甘肅提督侯張勇○四川陝西總督哈占○涼州提督孫思克等會疏言○厄魯特濟農等為噶爾丹所敗○逃至沿邊○違禁闖入塞內○奪番目馬匹○及居民牲畜○守汛官兵驅之使出○濟農等言○我等皆鄂齊爾圖汗之子姪○窮無所歸○故至此○聞噶爾丹復逞兵○未已○或來追我○或趨喀爾喀○俱未可知○臣等竊思噶爾丹乃北厄魯特之

酋長○兵馬衆多○如果興兵○即內地亦宜嚴飭守汛官兵防護○並驅逐濟農等出境○又理藩院疏言○據張家口報稱○厄魯特來使博瑞額葉圖等○不敢歸○言來時鄂齊爾圖汗○喀爾喀土謝圖汗○曾夾攻我台吉○近又聞歸化城來貿易人言○喀爾喀色楞達什台吉率三百餘人將邀劫我等於汛界○我等得在邊塞之內○即如金城之固○請暫居此○俟本地使來同歸○上諭大學士等曰○聞厄魯特喀爾喀交惡興戎○雖虛實未確○朕統御寰區○一切生民皆朕赤子○中外並無異視○厄魯特喀爾喀倘因細故交惡○至於散亡○朕心大為不忍○伊等向相和好○貢獻本朝○往來不絕○若交惡果實當遣使評其曲直○以免生民於塗炭○如仰副朕一視同仁之意○仍前和好○相與優游太平○朕大嘉悅焉○但天寒路遠○若遣使往回○無飼馬馳驛之所○或致有誤○今厄魯特喀爾喀使至○其令理藩院明白備檄交發來使傳諭之○先是

回子諾顏和卓巴顏白克等以進貢來至邊
口自相屠害作亂。

上數遣官往察。命檄行噶爾丹台吉。此後入貢
遣使。務令有材識。厄魯特為首。不得仍遣回
子。如係厄魯特。方許放入邊口。至是有回子
佟噶爾代等八人。冒稱貢使。與噶爾丹所遣
之西白里達爾漢和碩齊等偕來。理藩院奏
請。檄行噶爾丹台吉究處。

上曰。厄魯特貢使往來。若無符驗。仍復假冒。亦
未可定。令檄行噶爾丹。將佟噶爾代等。用彼
例照常治罪。嗣後進貢遣使。務給符驗。方准
放入。○以故一等阿思哈尼哈番又一拖沙
喇哈番胡倫木西子多爾濟襲職。○征南將
軍穆占疏言。臣遵部檄。分每佐領兵四名。付
副都統龔圖於本月初十日。赴安親王軍前。
因部檄不言留綠旗兵。與紅衣礮。故臣盡率
綠旗兵。攜紅衣礮至袁州。得旨穆占如期養
馬畢。即速行剿賊。其所率綠旗官兵。皆係楚

秦勞瘁將士。官員各加一級。兵丁支正項賞
賚。○廣東廣西總督金光祖疏言。臣已遣標
下兵二千赴韶州。俟大兵擊敗韶賊後。臣即
撤回官兵。率赴高州。同總兵官祖澤清直取
南寧等府。得旨韶賊已為我兵擊敗。宜乘此
時。速平廣西。金光祖可撤回赴韶官兵。同祖
澤清進取南寧柳州諸處。○鎮南將軍莽依
圖疏報。偽將軍胡國桂馬寶等。於九月二十
四日。率賊萬餘。犯韶州。渡河至蓮花山。薄江
寧大兵營。統領江寧兵額楚等奮勇拒戰。臣
復自城中遣兵夾擊。破其四營。斬獲甚眾。賊
敗走帽峯山。下部議敘。○奉命大將軍和碩
康親王傑書疏言。續順公沈瑞為海寇執往
臺灣。其官兵家口散處無依。應令彙集一處。
上命彙駐潮州。以副都統張夢吉。宋文科等統
之。同將軍賴塔等協守地方。其官兵俸餉。令
侍郎達都。如舊撥給。○丙辰。予故漢軍副都
統馬如龍祭葬如例。○安南將軍覺羅舒恕

疏言撫臣傅弘烈遺書於臣。請滿洲大兵駐守梧州。即可親統官兵進定廣西。今韶逆為我兵擊敗。機誠難得。且南安有滿兵駐守。平南王官兵復守南雄。宜及此機會。令都統勒貝率所部赴韶州。協剿逆賊。如此。則傅弘烈請兵。亦可便宜策應。得旨。頃已令統領江寧兵額楚率滿洲大兵往援傅弘烈。勒貝兵不必發往廣西。但韶州所關甚要。倘韶逆未平。令勒貝星馳往赴。同將軍莽依圖等協力剿滅。○丁巳。敕諭安南國王黎維禔逆賊吳三桂。值明季闖賊之變。委身從賊。以父死賊手。窮竄來歸。

世祖章皇帝念其投誠從優。漸進王爵。授之軍旅。委以事權。異數殊恩。振古未有。爰及朕躬。特進親王。倚任等於腹心。恩禮加於勲舊。方期其感恩圖報。殫竭忠誠。詎意吳三桂以梟獍之資。懷狙詐之計。陰謀不軌。自啟釁端。藉請搬移。輒行叛逆。煽惑奸宄。荼毒生靈。極惡

窮兇。神人共憤。連年遣發大兵。各路征剿。秦隴底定。閩粵蕩平。惟吳三桂竊踞一隅。苟延旦夕。目今大兵雲集。指日授首。恐其窮迫。逃竄滇南。倚恃險阻。致稽天討。茲以王累世以來。抒誠進貢。恭順有年。誼屬屏藩。忠蓋夙著。亂臣賊子。諒切同仇。今已遣撫蠻滅寇將軍廣西巡撫傅弘烈。會同滿漢大兵。平定粵西。進取滇黔。爾國壤地相接。素知形勢。王宜遴選將士。協心戮力。攻其險要。搗其巢穴。早靖逋誅之寇。用彰忠義之猷。懋賞崇褒。朝有令典。王其恪遵朕命。剋期舉事。以奏膚功。○福建總督郎廷相疏報。逆賊朱宸勾連海寇。橫肆鴟張。臣遣海澄鎮總兵官黃藍等。會同滿洲官兵。三路進剿。至灌口楊坑地方。大敗賊衆。連奪賊營七所。陣斬一千餘名。生擒偽左營將謝良。楊德等六十餘員。餘孽逃遁。下部議敘。○平南王尚之信疏。請以弟尚之孝赴京効力。允之。○戊午。

上御太和殿視朝。文武陞轉各官謝恩。○庚申。上詣

太皇太后宮問安。○定遠平寇大將軍和碩安親王岳樂疏報馬棚逆賊。於瀏陽縣地方。騷擾焚掠。臣遣副都統阿晉泰。率滿漢官兵。四路剿殺。大敗賊衆。擒斬無算。下部議敘。○辛酉。

上詣

太皇太后

皇太后宮問安。○以原任宣府總兵官拜音達禮。為浙江平陽總兵官。○癸亥。諭大學士等曰。朕不時觀書寫字。近侍內並無博學善書者。以致講論不能應對。今欲於翰林內選擇二員。常侍左右。講究文義。但伊等各供厥職。且住外城。不時宣召。難以即至。著於城內撥給閒房。俾其陞轉在內侍。從數年之後。酌量優用。再如高士奇等。能書者。亦著選擇一二。人同伊等入直。爾衙門滿漢大臣會議具奏。

○諭兵部。據山西提督周卜世疏稱。所部兵千餘人。至河南府鼓譟。僅能撫定。爾部速檄公溫齊。令其進發之時。由河南府挾周卜世之兵。同赴荊州。密為之防。○甲子。

上詣

太皇太后

皇太后宮問安。○以原任山西援剿總兵官周卜年。為山東沂州總兵官。○乙丑。鎮南將軍莽依圖疏言。韶州無警。撫臣傅弘烈。兵力單薄。已遣副都統額赫納。赴梧州協剿。得旨。寇犯韶州。將軍莽依圖。同額楚夾剿。既大敗賊衆。復行追擊。仁化諸縣。指顧悉平。可謂智勇兼擅。凡為將者。統兵滅賊。底定疆圉。不必一一俱俟中旨。惟應機適變。盡乃心力。即克副委任。至意。莽依圖當逆賊甫遁。即遣副都統額赫納等。往援傅弘烈。深可嘉尚。頃已令統領江寧兵額楚。赴梧州。今既遣額赫納行。即令額赫納。毋稽留肇慶。疾赴梧州。與傅弘烈

同定廣西。額楚赫勒布等仍留莽依圖軍前。○諭議政王大臣等曰。將軍莽依圖等所遣大兵尚屬單弱。今粵東已定。韶潮等處亦復無警。可令平南王尚之信多選部下官兵。付都統尚之瑛。或總兵官王國棟。帥赴梧州。隨滿洲大兵接應。巡撫傅弘烈同定廣西。○丙寅。鎮南將軍莽依圖疏報。韶州逆賊胡國柱等。為我兵擊敗。震懼喪氣。於九月二十八日。棄帽峯山潛遁。臣等即分兵數道躡擊。過樂昌。遂復仁化縣。得旨嘉獎。下部議敘。○以原補江西提學副使未任撤回。蔣永修為湖廣按察使司副使。提調學政。○丁卯。

上詣

太皇太后宮問安。○贈浙江殉難樂清營把總左朝樞為守備。廕一子。以衛千總用。副將蘇木代。給拖沙喇哈番。各祭葬如例。○江西總督董衛國疏報。招撫廣信府偽總兵吳萬勝等一百一十七員。兵丁一萬五千餘名。下部議

敘。○戊辰。

上御太和殿視朝。文武陞轉各官謝恩。次喀爾喀。厄魯特。進貢使臣等行禮。○鎮南將軍莽依圖疏言。臣欲親提大兵。進取廣西。廣西定後。乘勝即取衡湘。但此行務期窮賊根株。不得不厚集兵力。以往。請於近地撥給兵馬。以益臣軍。得旨。見在韶州莽依圖部下兵。每佐領七名外。又增統領江寧兵額楚。署副都統赫勒布。兵每佐領三名。近都統勒貝。又率每佐領兵二名。前往。兵數已增於前。莽依圖可留勒貝。額楚守韶州。親統大兵。速赴梧州。同巡撫傅弘烈。平定廣西。廣西定後。或進取湖南。衡湘諸處。或徑取貴州。斷賊後路。聽便宜從事。○己巳。

上詣

太皇太后宮問安。○庚午。以都察院左都御史喀代。為兵部尚書。陞禮部右侍郎馬喇。為工部尚書。○撫蠻滅寇將軍廣西巡撫傅弘烈。

疏報逆賊侵犯梧州。臣遣總兵官楊國泰。分佈官兵水陸並剿。前後夾擊。大敗賊衆於昭平等處地方。陣斬偽總兵張元。衆勝逐北。本月初三日。恢復潯州府。獲賊船器械無算。得旨嘉獎。下部議敘。○辛未。

上詣

太皇太后宮問安。○轉工部右侍郎祁通額為左侍郎。陞內閣學士溫代為工部右侍郎。○以翰林院侍讀學士蔣弘道充日講起居注官。○壬申。諭兵部。康親王既定閩疆。應遣官賞賚。其隨征官兵。亦均有勤勞軍功。即與議敘。○癸酉。

上詣

太皇太后

皇太后宮問安

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之六十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張建玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十六年丁巳十一月甲戌朔○乙亥諭

實錄卷七十

工部尚書馬喇侍郎溫代曰爾等係持簡之人近見工部事務弊端甚多各宜勉盡乃職釐剔積弊以副朕委任之意○戶部議覆平南王尚之信疏言粵省之廣肇南韶惠潮等府陷賊時遭逆賊加派兵餉橫征害民今地方已經恢復請禁革橫征私派以蘇民困應如所請從之○丙子

上詣

太皇太后宮問安○調兵部左侍郎吳努春為

禮部左侍郎管右侍郎事○奉命大將軍和碩康親王傑書等疏報夸蘭大杜巴等率領官兵敗賊朱寅等於泉州關口又總兵官侯馬三奇等敗賊於和平橋草蒲港地方又副都統伯穆赫林副都統倭申巴圖魯總兵官侯馬三奇三路進兵敗賊於石井清寺等處恢復石井清寺地方得旨嘉獎下部議叙○丁丑陞詹事府詹事噶爾圖為內閣學士兼禮部侍郎○福建總督郎廷相疏報署遊擊韓六合敗賊吳萬勝於崇安縣界擒偽總兵副將等二百餘員殺賊二千九百餘級下部議叙○戊寅

上詣

太皇太后宮問安○己卯改廣東掌印都司金瑛為廣西按察使司按察使○逆賊韓大任擁眾踞萬安縣梁口坐塘筆帖式以其事聞得旨逆賊韓大任自寧都敗遁竊踞萬安必且與楚賊合勢護軍統領哈克山副都統席

三。雖已統兵前往。恐兵力尚少。簡親王其速調滿漢官兵與哈克山等并力進剿。務期剪滅。毋仍前踈縱。俾賊得逸入湖南。○贈廣東殉難遊擊侯進學。文天壽。為副將。各予祭葬。廕一子以守備用。○庚辰。

上詣

太皇太后宮問安。○辛巳。免江南徐州山陽等十一州縣衛本年分水災額賦有差。○旌表安慶烈婦馮氏。拒奸投河自盡。給銀建坊如例。○壬午。先是。揚威大將軍和碩簡親王喇布疏言。據報韓大任等欲渡河潛遁。楚賊來迎。應乘其未合。預行剿滅。但護軍統領哈克山等部兵甚少。若剿逸賊。則無兵以遏楚逆。若禦楚逆。則追剿逸賊。又復無兵。今吉安無可調之卒。臣等議分將軍穆占兵之半。暫守永新安福。令其半赴泰和萬安諸處。遏禦賊寇。得旨。簡親王喇布自到江西。並未建尺寸之功。宴坐會城。虛糜糧餉。迨赴吉安。以重兵

圍城。逆賊韓大任奔逸。不能擊滅。致韓大任竊踞寧都。雖遣副都統布舒庫等率兵前往。究未大創賊衆。今韓大任等自寧都竄突。延及萬安泰和諸處。不能撲剿。又以兵少具奏。計喇布所轄滿漢官兵為數不少。一韓大任未能剿除。任其出入。宜即嚴加處分。念見在與賊相持。姑俟事平日議罪。其令將軍穆占率兵急赴梁口。務速剪滅。勿使蔓延。至是。穆占疏言。聞吳三桂遣偽帥三人。由永新犯吉安。臣身在地方。洞悉情形。偽帥來犯。非迎擊不可。臣是以率兵前進。於本月初三日。已抵永新。俟後軍一至。即剿除永新百里外所屯賊寇。進取茶陵。其逆賊韓大任。應令大將軍簡親王喇布。或和碩額駙華善率兵堵禦。上復諭簡親王。速調副都統布舒庫提督趙賴等所轄之兵。亟滅韓逆。將軍穆占身臨賊境。必悉情形。或先赴梁口。協剿逸寇。或已進取茶陵。遏禦楚賊。即乘機平定湖南。其詳悉籌

度無失事機○轉兵部右侍郎郭丕為左侍郎。陞內閣學士黨務禮為兵部右侍郎○鑾儀衛鑾儀使許占魁以疾乞休。命回籍調理。仍支原俸。病痊日起用○甲申。

上詣

太皇太后

皇太后宮問安○平南王尚之信疏言粵東平定。臣請量留標兵守廣東省城。盡率餘兵赴廣西圖賊。從之○撫遠大將軍都統大學士公圖海疏報署副都統覺羅和托等督率滿漢兵敗賊於沙窩。斬獲甚衆。下部議叙○丙戌。陞太常寺卿屯泰為內閣學士兼禮部侍郎○以原任海豐總兵官佟國璽為廉州總兵官○丁亥。

上詣

太皇太后宮問安○戊子。

上御太和殿視朝。文武陞轉各官謝恩。次厄魯特進貢使臣等行禮○己丑。予故河南巡撫

佟鳳彩祭葬。謚勤僖○辛卯。大學士等遵旨選擇翰林內廷侍直。列名請旨。命侍講學士張英加食正四品俸。供奉內廷。其書寫之事一人已足。止令高士奇在內供奉。加內閣中書銜。食正六品俸。伊等居住房屋。交內務府撥給。又令大學士傳諭張英高士奇。選伊等在內供奉。當謹慎勤勞。後必優用。勿得干預外事。其恪遵朕諭○甲午。陞贊禮郎席爾達為太常寺卿○乙未。

上詣

太皇太后

皇太后宮問安○免江西浮梁安仁萬年三縣本年分旱災額賦有差○戊戌。

上詣

太皇太后宮問安○定遠平寇大將軍和碩安親王岳樂疏言。臣前所請紅衣礮及綠旗火器官兵。若以付臣。即可攻取長沙。如無綠旗官兵。請調簡親王率兵來長沙。臣親統所部

赴岳州。仗

皇上威靈。得下岳州。即同岳州兵由水路進逼長沙。逆賊必不能支。長沙可易破也。若不令進取岳州。臣當即取茶陵。攸縣。平定。衡永。斷來犯廣東逆賊之路。直搗湘潭。以殲吳逆。得旨。簡親王兵。屢經分撥。發往韶州。兼剿逆賊。韓大任。綠旗官兵。無可調者。簡親王鎮守吉甯。亦不便輕離。今將軍穆占奏取茶陵攸縣。將軍莽依圖。又同巡撫傅弘烈。平定廣西。大將軍安親王。其乘此逆賊震動之時。速分官兵。摧破楚逆。取湘潭諸處。○庚子。冬至。祀

天於

園丘。

上親詣行禮。○遣官祭

永陵。

福陵。

昭陵。

孝陵。

仁孝皇后。○停止次日朝賀。○

上幸南苑行園。○廣東廣西總督金光祖疏言。右江道布政使司叅議陳上年故請賜卹典。部覆叅議乃從四品官。不及卹例。得旨。陳上年不受偽職病故。可憫。其給卹銀一百兩。○禮部等衙門遵旨議覆長白山。係本朝發祥之地。祀典宜崇。但民舍遼遠。不便建廟。請封為長白山之神。初次往封。遣大臣詣山擇地。設帳幄立牌致祭。其每年春秋二祭。道遠路遠。或雨水阻隔。應交寧古塔官員在烏喇地方望祭。凡遇恩詔。差京官往祭者。亦如之。得旨。是。○壬寅。贈江西殉難上饒縣縣丞陳貞為按察使司僉事。廣東殉難合浦縣知縣金世爵為布政使司叅議。各予祭葬。廕一子入監讀書。

十二月。癸卯朔。陞廣東總兵官嚴自明為鑾儀衛鑾儀使。○刑部議覆。江寧巡撫慕天顏疏言。嗣後刑部及直隸各省。凡命盜案内。有

監候質審人犯。已滿三年。因逸犯未獲。無從審結者。於秋審時。一併審錄。具題完結。應如所請。從之。○乙巳。奉命大將軍和碩康親王傑書疏報海賊五千餘人。圍泉州府屬小營地方。副都統楊鳳翔提督段應舉。領兵往援。擊敗賊衆。生擒偽副總兵黃忠等百餘人。水陸共殺賊三千餘人。下部議叙。○丙午。征南將軍穆占疏報。十一月十四日。臣等領兵至茶陵州。知賊衆已遁。即令都統宜理布等。領兵追剿。賊衆奔入攸縣據河岸迎敵。我兵奮勇前進。奪取城門。陣斬賊兵四千餘人。生擒一百餘人。餘賊遁去。茶陵攸縣俱已恢復。得旨嘉獎。下部議叙。○穆占又疏言茶陵攸縣新經恢復。乞調副都統龔圖率往長沙之兵。及袁州總兵官趙應奎兵來此戍守。臣即赴梁口剿賊。

上諭。會剿大兵為數已多。簡親王等其併力殺賊。務在殄滅。穆占當以恢復茶陵攸縣事。啓

聞安親王。而親統大兵。底定湖南。已而穆占又疏言逆賊吳三桂。堅守衡州。衡州茶陵。相距甚近。水陸兼通。臣部兵戰守未足。乞調安慶提督王永譽率標下官兵前來併力。得旨。前以徽州要地。遣王永譽率兵駐守。不便隔省調遣。安親王軍前益以副都統龔圖之兵。為數頗衆。今將軍穆占已復茶陵攸縣。將進兵湖南。安親王其速遣提督趙國祚。盡率所部兵。復量加滿兵。往守茶陵攸縣。俾無誤。穆占進剿。安親王穆占更宜互為聲援。同心協謀。以期破賊。○四子部落多羅達爾漢郡王沙克都爾阿霸坡多羅車禮克圖郡王德穆珀爾故。各遣官致祭。○免直隸任縣本年分水災額賦十之三。○丁未。

上自南苑回宮。賜隨駕內大臣侍衛等緞疋有差。○戊申。

上詣

太皇太后宮問安。○豁免江西廬陵等三十二

縣并贛州衛吉安等九所。兵荒田地。本年分額賦。○庚戌。

上親製日講四書解義序曰。朕惟天生聖賢。作君作師。萬世道統之傳。即萬世治統之所繫也。自堯舜禹湯文武之後。而有孔子。曾子。子思。孟子。自易書詩禮春秋而外。而有論語大學中庸孟子之書。如日月之光昭於天。岳瀆之流峙於地。猗歟盛哉。蓋有四子而後二帝三王之道傳。有四子之書而後五經之道備。有四子之書得五經之精意而為言者也。孔子以生民未有之聖與列國君大夫及門弟子論政與學。天德王道之全。修己治人之要。俱在論語一書。學庸皆孔子之傳。而曾子子思獨得其宗。明新止至善家國天下之所以齊治平也。性教中和天地萬物之所以位育。九經達道之所以行也。至於孟子繼往聖而開來學。闢邪說以正人心。性善仁義之旨著明於天下。此聖賢訓辭詔後。皆為萬世生民而

作也。道統在是。治統亦在是矣。歷代賢哲之君。創業守成。莫不尊崇表章。講明斯道。朕紹祖宗丕基。孳孳求治。留心問學。命儒臣撰為講義。務使闡發義理。裨益政治。同諸經史進講。經歷寒暑。罔敢間輟。茲已告竣。思與海內臣民共臻至治。特命校刊。用垂永久。爰製序言。弁之簡首。每念厚風俗。必先正人心。正人心。必先知學術。誠因此編之大義。究先聖之微言。則以此為化民成俗之方。用期夫一道同風之治。庶幾近於唐虞三代文明之盛也。夫

○辛亥。廣東廣西總督金光祖疏報海逆楊彥迪糾集夥黨。突犯欽州。遊擊劉士貴率兵追殺賊衆。又遊擊高應臣會同叅將薛保擊敗逆黨。斬殺甚多。下部議叙。○壬子。

上詣

太皇太后

皇太后宮問安。○以玚三等阿思哈尼哈番許得功孫許國桐襲職。○癸丑。廣東廣西總督

金光祖疏言請就近調發滿兵星馳赴粵東以為後援。

上責之曰進征廣西合計將軍莽依圖平南王尚之信巡撫傅弘烈并金光祖所轄之兵為數已多。金光祖正宜乘此機會効力先驅以贖前罪。况傳弘烈當時未任封疆尚能募兵擊賊直入粵西恢復梧潯諸府鼓勵將弁為國宣力。金光祖本膺總督重寄曾疏請同總兵官祖澤清取南寧柳州。至今無意前進遷延引日反請濟師以為後援殊屬不合。其遵前旨速取南寧柳州。○揚威大將軍和碩簡親王喇布疏言護軍統領哈克山等啓云欲與逆賊韓大任戰而山路險狹騎兵難騁請調遣綠旗官兵相機剿殺否即分兵守隘斷其餉道賊即可破。臣隨令總督董衛國酌調戍兵可緩者協力往剿。

上諭護軍統領哈克山副都統布舒庫席山雅秦提督趙賴等所統官兵頗多且將軍穆占

擊敗楚賊收復茶陵攸縣逆賊韓大任已無外援宜乘此時即行蕩掃乃稱山路險狹騎兵難用欲調兵守隘延引時日使賊復得間固守殊誤機宜簡親王量調附近官兵并嚴檄哈克山等乘賊勢蹙亟行剿滅未幾韓大任遁入興國寶石砦安南將軍覺羅舒恕以聞得旨簡親王前擁重兵圍韓大任於吉安未能殲滅致令遁出迨韓大任竊踞梁口而護軍統領哈克山副都統布舒庫提督趙賴等又不能撲剿復使奔竄簡親王其嚴檄哈克山等并力窮追務在剪除若縱賊入楚從重治罪總督董衛國亦宜統兵協力進剿。○甲寅征南將軍穆占疏言賊帥馬寶率衆赴衡州又賊二千餘屯據宜章。

上諭今賊盡赴衡州宜及此時令粵東官兵就近由樂昌取宜章郴州則逆賊自難持久平南王尚之信不必赴梧即速趨韶州同都統勒貝及統領江寧兵額楚進取宜章郴州永

州○穆占又疏言安仁縣所屬高石地方有偽韶南將軍及監軍道駐扎。又茶陵州所屬石井地方有偽知縣駐扎。即遣官兵前往。生擒逆賊譚文度。偽知縣譚敦錫。獲偽韶南將軍及偽監軍道關防。下部議叙。○乙卯。

上詣

太皇太后宮問安○江西總督董衛國疏報。恢復銅鼓營城。斬殺賊衆三萬有餘。招撫偽總兵袁菊茂等一千三百餘員。兵丁五萬餘。得

旨嘉獎。下部議叙。○福建總督郎廷相疏報。

建寧遊擊韓六合。馬登瀛。會同浙江湖標守備曹象恒等。率兵抵桐木源。大敗賊衆。陣斬偽副將林秀卿。盡平賊巢。下部議叙。○丙辰。免陝西寧夏衛本年分蟲災額賦十之三。○

丁巳。

上御太和殿視朝。文武陞轉各官謝恩。次厄魯特進貢使臣等行禮。○諭兵部。廣東韶州。地屬緊要。一切軍務額楚若啓簡親王轉奏。慮

多遲悞。其令額楚以江寧將軍印。統轄兵馬。都統勒貝。叅贊軍務。凡事許得專奏。○己未。

上詣

太皇太后宮問安○予故輔國公噶播拉。祭葬如例。○辛酉。太白晝見。○壬戌。翰林院掌院學士喇沙里等。以刊刻日講四書解義進呈。得旨。經史有關政治。義蘊弘深。朕朝夕講究。勉求貫通。講幄諸臣。殫心闡發。允禪典學。所進講章留覽。○甲子。

上詣

太皇太后

皇太后宮問安○添設內閣侍讀三員。專管記載。旨意併票簽翻譯。磨對謄真等件。○乙丑。江西總督董衛國疏言。江西省城已有副都統多諾鎮守。請身赴吉安。會同大將軍簡親王喇布。商酌剿禦機宜。得旨。董衛國親率標兵赴吉安。與大將軍簡親王。共圖剿滅逆賊。綠旗官兵聽便宜調遣。滿洲將軍。毋得干預。

○撫蠻滅寇將軍廣西巡撫傅弘烈疏言逆賊吳三桂偽總統馬寶取道宜章來犯前隊已抵富川。祈更發一軍。以為後繼。或令韶州大兵奪取宜章。郴州隘口。臣同將軍莽依圖進取平樂。桂林。則逆賊不能兼顧。湖南可立下矣。得旨。頃命平南王尚之信。將軍額楚都統勒貝等。已統大兵速平宜柳諸處。傅弘烈可同莽依圖急定平樂桂林諸郡。○丙寅。刑部左侍郎董安國。以疾求罷。允之。○給四川陣亡叅領多通濟。三等阿思哈尼哈番。署叅領事安柱護。二等阿達哈哈番。夸蘭大博岳羅。護軍叅領胡什塔。護軍校署護軍叅領事圖畢赫等。三等阿達哈哈番。夸蘭大傑都。墨勒。前鋒校署前鋒叅領事阿寧阿。護軍校署護軍叅領事車都納業臣。阿藍泰。護軍校署叅領事音布等。拜他喇布勒哈番。兼一拖沙喇哈番。署夸蘭大事。恩忒。前鋒叅領滿披。護軍校署護軍叅領事班第什哈。胡什屯。豁濟

吉里積善。前鋒護衛署前鋒叅領事塞倫署叅領事福達禮。沙濟。護軍校胡章。巴朗。綏孫。阿爾泰等。拜他喇布勒哈番。署夸蘭大事。布達使護軍叅領烏納哈。噶什泰。豁托。署叅領事吳蘭岱。沙濟。三敦。鄂佛。和。前鋒校署前鋒叅領事綏夏。護軍校署護軍叅領事白希圖。奇爾布。阿艷布。思塔布。達世。孔奕納。驍騎校署叅領事花山。薩桑。阿夸蘭。大費保。鄂什。教合。索。前鋒校署前鋒護衛事薩音布。祿。前鋒校塞楞。護軍校多爾積雅布。塞巴爾屯。索爾和。諾爾齊。索。勇。班都烏喇岱。坎什。巴塗。署護軍校祿克察布。爾哈等。拖沙喇哈番。各予祭葬如例。○予故陝西巡撫賈漢復祭葬如例。○己巳。

上恭進

太皇太后錦衣。親撰表文。辭曰。

聖慈垂裕。啓萬年光大之圖。景運維新。極四海尊親之戴。溥

鴻恩於庶類。配坤德之無疆。錫

懿訓於孫謀。比春暉之有耀。欣逢令節。敬展微

忱。恭惟

聖祖母昭聖慈壽恭簡安懿章慶敦惠溫莊康

和仁宣太皇太后陛下。純仁積慶。威德凝庥。高

厚難名。至道永符於覆載。禎祥駢集。遐齡常

並乎升恒。值寶曆之方亨。仰璇階之正泰。謹

奉觴而介

壽。爰製錦以伸懷。膝下本支。百世長看戲綵。

宮中堯舜。萬方共覩垂裳。率土同懽。普天咸忭。

臣夙承

教誨。永沐涵濡。瞻繡服之光華。樂

慈顏之康豫。伏願崇禧益茂。眉壽增隆。昭

徽範於子孫。享昌後燕天之盛。廣嘉祉於民物。

彰斂時錫福之仁。臣踴躍懼忭之至。○陞廣

東巡撫馮甦為刑部右侍郎。○陞廣東高雷

總兵官祖澤清為鑾儀衛鑾儀使。○庚午。撤

見駐浙江福建蒙古兵還京。○辛未。歲暮。恰

祭

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后。○遣官祭太歲之神。○靖逆將軍侯

張勇等疏報。甘涼近南山一帶。有西海墨爾

根阿喇奈多爾濟台吉等。廬帳數千餘。肅州

境內游牧番人頭目。有濟農布第巴圖爾。厄

爾德尼和碩齊等。廬帳萬餘。皆為噶爾丹所

敗。自西套來奔。

上諭曰。大將軍圖海身在陝西。其沿邊流番。或

令提督等率兵往逐。或嚴飭邊汛官兵各固

守汛地。選幹練人員。至番人頭目處。開誠曉

諭。令彼退回。著大將軍圖海酌量指授而行。

毋致生釁。○以都察院左副都御史金傷為

廣東巡撫○調江南京口左路總兵官侯襲
爵為廣東高雷總兵官○壬申。征南將軍穆
占疏報署前鋒統領塔爾岱。率兵擊敗偽副
將王科於鄴縣所屬二都村。復擊敗偽總兵
黃士標於鄴縣城下。恢復鄴縣城。得旨嘉獎
下部議叙○旌表八旗節婦滿洲厄黑得妻
鈕氏等十二人。蒙古拜色妻哈氏等二人。漢
軍董得榮妻趙氏等二人。各給銀建坊如例
○是歲人丁戶口。一千六百二十一萬六千
三百五十七。田地。山。蕩。畦地。四百九十八萬
三千四百六十二頃五十三畝。徵銀。二千一
百一十二萬六千四百三十六兩五錢有奇。
米。豆。麥。六百一十八萬八千七百六十四石
二斗有奇。草。一百二十四萬二千六百一十
九束。茶。十五萬五千三百六十五引。行鹽。三
百五十九萬八千七百六十引。徵課銀。二百
二十六萬二千三百六十五兩八錢有奇。鑄
錢。二萬三千一百三十六萬五千三百六十

有奇

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十一

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午春正月癸酉朔

實錄卷七十一

上詣

堂子行禮還宮拜神畢率諸王貝勒貝子公及

內大臣大學士都統尚書精奇尼哈番侍衛

等詣

太皇太后

皇太后宮行禮御殿王以下文武各官外藩王

及使臣等上表朝賀停止筵宴○朝鮮國王

李焞遣陪臣李沆等表賀冬至元旦

萬壽節及進歲貢禮物宴賚如例○丁丑

上詣

太皇太后宮問安○己卯

世祖章皇帝忌辰遣官祭

孝陵○定遠平寇大將軍和碩安親王岳樂疏

報都統覺羅晝特等率領官兵於十二月十

四日大敗賊衆於平江恢復縣城得旨嘉獎

下部議叙○庚辰孟春享

太廟

上親詣行禮○遣官祭太歲之神○鎮南將軍

實錄卷七十一

莽依圖疏言臣前抵梧州聞吳三桂之孫吳

世琮等來桂林誘殺孫延齡據其城吳三桂

率衆於十一月初六日來衡州令馬寶由宜

章入粵西臣以梧州桂林之間平樂最為要

地非亟取不可因留總督金光祖駐梧州任

轉輸防守之寄又遣官兵駐潯州以繫柳州

南寧之寇撫蠻滅寇將軍巡撫傅弘烈於十

二月十八日發自梧州臣於是月二十日率

師由封川趨賀縣會同傅弘烈進取平樂未

幾。廣東廣西總督金光祖疏言。逆賊馬雄死於雒容。柳州賊心惶怖。臣欲仍遵前旨。乘機進取橫州。南寧。以分賊勢。率師於十二月二十日。自梧州起行。得旨。梧州兩粵之界。又為將軍莽依圖等進兵後路。頃將軍巡撫傅弘烈。自梧州率兵會莽依圖等。由賀縣進取平樂。今總督金光祖復進取橫州。南寧。恐梧州兵單力少。莽依圖等身在地方。情形緩急。當所稔知。應戰應守。熟計而行。務期萬全。且平定廣西。掃蕩雲貴。關係緊要。莽依圖等。其同心協意。共相圖度。毋致疎虞。○征南將軍都統穆占疏言。聞逆賊吳三桂。自失茶陵攸縣等處。饋餉不給。軍士胥怨。民多遠避。但茶陵等地方新復。亟須堅守。臣唯俟安親王所遣滿兵。及提臣趙國祚。抵茶陵日。并韶州滿兵。平南王下綠旗兵。何時由樂昌進取宜。郴等處。知會到時。方可相機前發。進取湖南。若逆賊韓大任等。逸入楚境。江西大兵宜追躡至

湖南。庶賊可撲滅。新復地方。亦得無虞。得旨。前命平南王尚之信。率兵赴韶州。會將軍額楚等。由樂昌進宜。章。郴。永。其進兵可否。尚之信等尚未奏知。穆占所領陝西荆岳諸處將士。皆經簡擇。平定湖南。惟此精兵是賴。茲當逆賊窮蹙之時。即宜速定湖南。殄滅凶醜。不可待尚之信等兵坐失機會。至江西大兵。見在征討韓大任。平賊之後。自有措置。豈可懸揣。即行指示。穆占亦不必待江西兵至湖南。即鼓行滅賊。亟靖疆場。安親王亦宜速遣提督趙國祚赴茶陵。其逆賊地方失守。軍怨民遁情形。可移會荆。岳。長沙。大將軍。主。貝勒等知之。○穆占又報。臣遣發官兵。大敗賊衆於鄺縣。新獲偽總兵副將等十餘員。下部議叙。○江西總督董衛國疏言。逆賊韓大任。李懋珠。陳堯元等。敗竄永豐廬陵間。復奔閬川。洞白楊坳。

上諭。頃將軍舒恕疏言。韓大任等敗走興國寶

石砦已嚴敕護軍統領哈克山等速行追躡殲滅為期。今韓大任等復竄閬川洞白楊坳董衛國其疾往追剿務期撲滅○奉命大將軍和碩康親王傑書疏言臣遣知府張仲舉等持諭往招海賊鄭錦還報鄭錦但云錢糧匱乏假託支吾語言無定觀此海賊無降意矣得旨鄭錦雖無降意其附逆人民有革心向化者大將軍康親王仍隨宜招撫○辛巳析穀於

上帝

上親詣行禮○壬午。

上詣

太皇太后宮問安○癸未。諭傳弘烈齋奏官劉曉將軍傳弘烈為國忘家。詎勉効力。所奏諸事俱係當今急務。區畫周詳。朕甚嘉納。爾歸傳諭傳弘烈。此後益當整頓師旅。速滅賊寇。以副朕出民湯火至意○甲申。

上詣

太皇太后宮問安○順天府進春○命內閣傳

諭平南王尚之信齋奏人曰昔爾先王在時貢獻方物靡不竭誠二年以來粵東事變道路阻塞信使不通每念及爾先王素日忠貞不貳為國忘家罔不憫傷今王克承先志恢復粵東使人遠來請安兼進橙子可嘉但用兵之秋非比無事之時况見此物不勝思念爾先王王其安戢地方恢復粵西湖南以繼爾先王未盡之志朕心甚為期望此等細務

勞人費事勿復為念以後著暫止○陞貴州督糧道張仲德為廣東布政使司布政使○陞陝西涼州提標遊擊高孟為陝西延綏總兵官○浙江總督李之芳疏報江西偽總兵林爾瞻等竊據石龍地方臣遣都司王國賢等前往招撫林爾瞻等率偽官一百餘員兵丁二萬三千八百餘名投誠下部議叙○江西巡撫佟國楨疏報偽總兵賴榮盤踞江廣交界九鄉地方恃憑險阻出沒流毒已非一

日。臣與安南將軍舒恕。南贛總兵官哲爾肯。遣官招撫賴榮等。率偽官十七員。兵丁一萬一千二百餘名投誠。下部議叙。○達賴喇嘛。厄魯特達賴汗等。俱遣使進貢。賞賚如例。○乙酉。河道總督靳輔。遵旨覆奏。臣前將河工事宜。分疏條奏。蒙

皇上以河道關係重大。應否緩修。命臣再議。臣謹逐一再議題覆。一。用驢馱土。可以節費。前擬每日用夫十二萬有奇。今改用夫三萬餘名。驢三萬餘頭。前限二百日完工者。今改限四百日完工。再於兩岸遙隄內。築縷隄以束水。築格隄以防決。庶可不致潰決矣。一。洪澤湖下流高家堰西北一帶。即爛泥淺等處。臣前疏因正河淺阻。請於河身兩旁。各挑引河一道。今因正河全淤。臣已興工挑濬通流。今止須挑引河一道。庶伏秋水漲。准行有路。可無他虞。一。運河既議挑深。若不束淮入河。濟運。而仍容黃流內灌。則不久復淤。臣見在於

高家堰臨湖一帶決口。上緊築塞。而隄工單薄之處。惟幫修坦坡一法。為久遠衛隄之計。若不及早幫修。伏秋水漲。勢必衝潰。祈敕部照前估費。即行興工。一。運河以西臨湖一帶。自武家墩至周家閘。大小決口三十四處。自周家閘至翟家壩。其中成河九道之處。若不乘時并行堵塞。則清水潭萬難修治。不特高寶等七州縣。常被水患。即重運經過決口。亦危險非常。急宜堵築。斷難議緩。一。挑濬運河。并堵清水潭等決口。於立春後興工。限一百日完工。請將康熙十七年漕運過淮之期。畧為寬限。俟挑河完工。開壩放船。一。開捐納事例。以助河帑。願捐銀者。照例欵上納。願築隄者。自行認地修築。完工日。咨部註冊。統俟大工完日停止。一。中河分司。向駐宿遷。今缺裁歸併淮徐道。應令該道駐劄宿遷。以統轄漕運咽喉。又山盱同知。已歸併山清同知。應改名山清盱眙同知。以兼職掌。至一切工程。凡

用監理官一員。必用分管佐雜官六員。查江南佐貳雜職閒員甚少。臣請於東豫二省內。擇其職閒才幹者調用。○前疏請設兵丁。駐隄防守。今思不若設立兵丁。協同築隄。每兵一名。管隄四十五丈。保固三年。從優拔補。且令每兵自募幫丁四名。將黃河兩岸。近隄荒地。令幫丁耕種。或有納糧之田。即令業主為幫丁。庶人力益衆。而防護更密。疏入。下議政王。大臣。九卿。詹事。科道。會議。尋議。政王。大臣等議覆。並如所請。得旨。治河大事。當動正項錢糧。捐納事例。候旨行。其所稱沿河地畝。撥給兵丁。又令地主作為幫丁。是否相合。著再議。餘如議。○丙戌。

上詣

太皇太后宮問安。○逆賊吳三桂下偽總督董重民等。自廣東解至京師。

上諭大學士等。逆賊吳三桂。背恩倡亂。其荼毒生民。肆行逆惡。罪在賊渠吳三桂。與脅從之

人無涉。彼所部人員。如能悔罪投誠。槩行寬免。屢經有旨。今偽總督董重民。宜即正典刑。但朕已屢降旨寬宥。爾等會同兵刑二部堂官。將董重民免死釋放。同解罪人。亦俱寬釋。並交與兵部。俾各得所。○己丑。陞太常寺卿金鉉為都察院左副都御史。○江西巡撫佟國楨疏報。逆賊韓大任等。竄走萬安。臣會同安南將軍舒恕。南贛總兵官哲爾肯。遣標下遊擊楊以松等。於鷓鴣寨等處。屢次擊敗賊衆。斬偽副將等十餘員。殺獲賊兵六千餘人。餘孽遁走汀州。下部議叙。○庚寅。

上詣

太皇太后宮問安。○遣內大臣覺羅武默納。一等侍衛對秦齋。敕封長白山之神。祀典如五嶽。○壬辰。封鎮國公高色子雲升。為輔國公。授和碩安親王岳樂庶出子塞布禮。輔國公化善子尚祿。俱為三等輔國將軍。輔國將軍伯爾赫子白爾參。為三等奉國將軍。多羅貝

勒昌阿岱庶出子席昌希常奉國將軍蘇爾特子納蘇圖為奉恩將軍○陞倉場總督戶部右侍郎郭四海為都察院左都御史○甲午。

上詣

太皇太后宮問安○乙未。諭吏部自古一代之興必有博學鴻儒振起文運闡發經史潤色詞章以備顧問著作之選朕萬幾餘暇游心文翰思得博學之士用資典學我朝定鼎以來崇儒重道培養人材四海之廣豈無奇才碩彥學問淵通文藻瑰麗可以追踪前詒者凡有學行兼優文詞卓越之人不論已仕未仕令在京三品以上及科道官員在外督撫布按各舉所知朕將親試錄用其餘內外各官果有真知灼見在內開送吏部在外開報督撫代為題薦務令虛公延訪期得真才以副朕求賢右文之意爾部即通行傳諭於是大學士李蔚等薦原任副使道曹溶等七十

七人。

上命俟各員赴部齊集之日請旨其在外見任者不必開缺○丙申。

上詣

太皇太后

皇太后宮問安○諭廣東巡撫金僑曰廣東地方殘破已極爾至彼處務加意撫綏保靖巖疆惠養百姓軍中糧餉固屬急需而民生疾苦尤宜體恤必令兵民相安方為兩全之道至驛遞關係軍機最屬緊要水陸兩路務須安置得宜毋致騷擾驛站貽累地方爾可悉心料理以副朕委任之意○丁酉。征南將軍都統穆占疏報臣遣發官兵屢敗賊衆於富茂灘地方擒斬無算恢復永寧縣城得旨嘉獎下部議叙○戊戌。諭議政王大臣等逆賊吳三桂等背恩倡叛荼毒生靈擾亂疆宇朕念切除凶志安民社仁育義正恩威並行大將軍等既承簡任當勵忠貞之誼早奏戡定

之勲。以副朕愛民至意。乃自用兵以來。大將軍王。貝勒將軍大臣等。固有盡心王事。已著勞績者。亦有觀望逗遛。不思振旅邁進。竟爾營私適己。希圖便安。或諉兵甲之不全。或託舟楫之未具。借端引日。坐失事機者。甚而干預公事。挾制有司。貪冒貨賄。占踞利藪。東有多方漁色。購女鄰疆。顧戀私家。信使絡繹。尤可異者。新定地方。亟需安輯。乃於所在攘奪焚掠。種種妄行。殊乖法紀。本宜嚴察職名。從重治罪。但時當進剿。姑免處分。策勵後効。各路大將軍王。貝勒將軍大臣等。宜乘時進取。恢復封疆。拯救民命。一切違法之事。嚴加禁止。倘有不遵。許督撫指參。繩以重典。兵丁廝役犯者。其將領家。均行連坐。官員犯者。除本官重治外。將帥分別議處。地方官逢迎饋獻。一併嚴懲。如督撫不糾。或經言官劾奏。或為被害首陳。該督撫以徇庇論。督撫提鎮等官。自違禁條。加倍究治。其以此傳示內外。嚴

加曉諭。俾一體遵行。○己亥。

上詣

太皇太后宮問安。○庚子。以戶部郎中王士正。詩文兼優。改授翰林院侍講。○辛丑。揚威大將軍和碩簡親王喇布疏報。護軍統領哈克山。於本月初二日。率領滿漢官兵。分路進剿。大敗逆渠韓大任。陳堯元。李懋珠等於老虎洞等處。燒燬營寨。陣斬賊兵六千餘級。擒殺偽總兵副將等三百餘名。賊勢窮蹙。詣福建康親王軍前投誠。下部議叙。

二月。壬寅朔。

上以多羅溫郡王佛永輝薨。輟朝二日。○甲辰。諭兵部。廣東兵變時。被掠男婦子女。可令平南王尚之信。總督金光祖等。嚴行察出。令人民識認。悉皆發還。俾其父子夫妻完聚。粵西平定之日。將軍莽依圖。傅弘烈等。亦各察明被奪人口。遣還原籍。○江寧將軍額楚疏報。總督金光祖。自潯州進兵失利。得旨。金光祖

不守梧州。希圖立功。輒進失利。梧州不無可虞。萬一梧州失守。則進取平桂大兵後路亦阻。向調將軍莽依圖等。速赴梧州。因平南王尚之信。不亟發船至韶。致誤軍行。不可謂非王失機也。梧州乃兩廣接壤要地。不可不增遣重兵。駐韶將軍額楚。都統勒貝等。即率兵前往戍防。尚之信亦多遣精兵協守。駐贛將軍覺羅舒恕。率兵往守南雄。兼顧韶州。大將軍簡親王。量遣官兵與巡撫佟國楨。總兵官哲爾肯等。同守贛州。尋撫蠻滅寇將軍巡撫傅弘烈疏言。吳逆悉其驍銳俱向廣西。乞遣附近官兵。星馳應援。得旨。額楚等速赴廣西。與將軍莽依圖。傅弘烈等。共籌攻守之策。兩兵既合。可著莽依圖總統。額楚勒貝等。恭贊尚之信。親率將士。速進廣西。接濟大兵。若尚之信必難離會城。宜多揀精銳。速往應援。額楚等兵。既進廣西。將軍舒恕。不必俟簡親王所遣之兵。即率師迅赴南雄。尋平南王尚之

信疏言。臣奉命進取宜章郴永。行至清遠。以總督金光祖。及高州等處報警。遂還會城。今潮陽諸處。又報海賊突犯。臣所屬官兵有限。不能分應。得旨。潮州。惠州。既有將軍賴塔。靖南王耿精忠。提督王可臣等鎮守。剿禦海寇。不為不足。今將軍莽依圖等。深入廣西。事機所繫甚重。且廣西早定。則湖南之寇。不敢自存。尚之信其以沿海地方。付賴塔等。親往接濟廣西大兵。毋誤軍事。○乙巳。諭將軍穆占。爾所密奏事宜。朕已悉知。前議政王大臣所議。因無接濟之兵。令爾前進。今賊韓大任窮蹙。來歸。諸處俱已剋復。江西全省將士。皆有餘暇。故著簡親王與爾會同酌議。移文想尚未至。爾是以先為陳奏耳。在廷所議。乃合諸路情形。統籌全局。覽爾將軍等所奏。各執己見者甚衆。此皆無濟於事。嗣後須當同心勉力。無負委任。將軍身體如何。彼處諸將士好否。原奏發回。特諭。○丙午。戶部議覆奉天府

府尹金鼎疏言遼東生聚未衆。且旗民錯處。今欲清丈隱地。必同盛京戶部履畝逐一查看。萬一奉行稍有不善。必致民人驚擾。伏乞軫念窮黎。不拘年限。聽民自首。令地方官每年清查。無論多寡。隨查隨報。庶幾國賦日增。人民漸集。應如所請。從之。○丁未。

上詣

太皇太后宮問安。○遣大學士馮溥祭

先師孔子。○予故一等阿思哈尼哈番石璽祭葬如例。○戊申。祭

太杜。

大稷。遣內大臣公舅舅佟國綱行禮。○己酉。

太皇太后聖壽節。

上親撰表文。率王以下。文武大臣侍衛等詣

太皇太后宮上表。行禮。恭獻玉壺金爵等件。表

文曰。慈德同天。五福集箕疇之盛。遐齡配地。

萬方騰嵩祝之聲。岡陵獻瑞於瑤階。永符安

吉。日月呈輝於寶算。常並升恒。遠邇尊親。寰

海忻忭。恭惟

聖祖母昭聖慈壽恭簡安懿章慶敦惠溫莊康和仁宣太皇太后陛下。性成至德。躬備純禧。懿訓弘深。範累朝而作則。恩施高厚。含萬物而化光。啓景運於維熙。正期頤之方茂。南極光連寶婺。隆名永戴重闈。東風慶入韶年。佳氣恒瞻二月。肅綺筵而介壽。捧玉醴以稱觴。藉庭實之微儀。冀

慈顏之一顧。懽生殿陛。喜溢階墀。臣祗奉

誨言。仰承鞠育。合臣民之頌祝。率子姓以賡颺。

伏願福嘏無疆。壽祺增盛。玉冊煥千秋之彩。

徽音偕星漢同昭。瑤池垂五色之雲。景枯與

乾坤咸泰。臣踴躍懽忭之至。遵

懿旨。停止筵宴。○庚戌。諭戶部。積貯係國家大

計。年來各路兵馬需用糧餉浩繁。在外總督

巡撫。及經管錢糧各官。俱宜潔己奉公。殫心

稽察。一應支放開銷。務嚴加覈實節省。方於

軍國有裨。近見各路奏銷。或製備物料。並不

先行題明。藉口軍機緊急。濫請銷算。或不行
察核。重複支給。又不為扣抵。或朦混重領。希
圖利己。致滋糜費。以及侵欺浮冒。種種弊端。
難以枚舉。以後應作何禁飭。爾部會同吏兵
工三部。詳議具奏。○予故多羅溫郡王佛永
輝。祭葬立碑。謚曰哀。○先是定遠平寇大將
軍和碩安親王岳樂疏言。提督趙國祚奉調
茶陵。理宜即遣。但趙國祚所駐。乃邊江要地。
日與逆賊礮火相加。實難遣赴。而他處守兵。
又不可撤。今就近以守醴陵兵。每佐領二人。
付署副都統公倭赫。率赴茶陵駐守。至是。征
南將軍都統穆占疏言。茶陵攸縣安仁。永興。
鄱縣。幅員遼闊。與賊逼近。臣等雖擊敗賊首。
郭應輔等。而餘賊大半。仍匿鄱縣山谷中。且
吳三桂盤踞衡州江之東岸。有偽將軍馬寶
等立營。獨令倭赫控制諸地。兵力殊單。得旨。
穆占著俟簡親王至湖南日。會同定議。如協
力同進。則量留簡親王兵守茶陵攸縣等處。

若分道而行。江西袁州已屬內地。總兵官趙
應奎。可率標兵與倭赫併力。趙國祚仍留長
沙。今江西已平。簡親王進取湖南。其江西綠
旗官兵。聽隨宜調用。○辛亥。陞都察院左副
都御史邵甘。為總督倉場戶部侍郎。○免江
西豐城等九縣。康熙十六年分水災額賦。○
壬子。

孝康章皇后忌辰。遣官祭。

孝陵。○癸丑。戶部議覆。江西總督董衛國疏言。
查江西。南贛吉安三府。原食淮鹽。後改食粵
鹽。康熙五年。兩淮御史黃敬璣題請。將吉安
一府。仍食淮鹽。贛南二府。未經更改。今該督
既稱改食淮鹽。官民俱便。應如所請。從之。○
甲寅。先是安遠靖寇大將軍貝勒尚善疏言。
得鳥船四十艘。可以破賊。因令江南造船。如
數送往。後尚善復奏。目前水小難行。俟三月
後。潮水既漲。添造之船。度亦告成。彼時酌量
水勢。相機進取。

上諭湖中所需之船已如數辦遣尚善復爾遷延觀其所奏雖添造船成又必旁借事端稽緩時日且公溫齊率往之兵本令剿賊非俾駐守荆岳也況添造之船難期三月必成時漸炎暑又逾進討之期大將軍順承郡王勒爾錦貝勒尚善等其公同確議添造戰船可否擊破湖中賊艘具以奏聞至是寧南靖寇大將軍多羅順承郡王勒爾錦疏言臣等因遠隔汎地船成之日能破湖賊與否未可遙度且水漲遲早難定臣等前疏曾謂如有可乘之機則率兵渡江頃者荊州相對沿江一帶賊勢稍減臣請調將軍鄂內舟師并岳州沙虎船五十艘來荊州臣等即帥師渡江進取得旨荊州滿漢兵數甚多攻守未為不足倘調鄂內兵船赴荊仍未能進取則往返稽遲反誤攻岳機會鄂內兵船不必調往俟船成之日即將溫齊所領及陝西調往之兵一併發赴岳州尚善等其詳加籌度務期破賊

○乙卯裁陝西綏德衛歸併綏德州管理○丙辰

上御太和殿視朝文武陞轉各官謝恩次喀爾喀進貢使臣等行禮○諭兵部頃平南王尚之信疏言廣東潮陽諸處海洋賊艘不時出沒因令靖南王耿精忠將軍賴塔提督王可臣等鎮守潮惠濱海之地今既命尚之信或親往或遣兵隨宜應援廣西若遇廣東有警耿精忠賴塔等可即行剿禦并速移文大將軍康親王知悉○丁巳

上詣

太皇太后宮問安○戊午授故輔國公噶播拉子對齊為三等輔國將軍○陞詹事府詹事喀爾圖為都察院左副都御史○都察院左副都御史金鉉疏言向因用兵各省需員甚急故聽督撫生名題補原為一時權宜嗣因外題日多部議停止題補之例惟地方最緊要者聽其保舉題請近見各省每一缺出即

保舉一人。不曰輕車熟路。則曰人地相宜。既有保舉字樣。吏部不得不從。臣恐從此效尤。奔競徇情。弊實百出。請嗣後除湖南粵西見在用兵省分。仍聽督撫保舉外。其不用兵省分。凡保舉題補之例。應行停止。至於保舉武官之例。亦應一體分別酌定。疏入。下吏部議。尋議。凡非用兵之地。督撫無得保舉題補。其用兵之地。保舉之官。如不稱職。仍治督撫濫舉之罪。從之。○己未。

上御經筵。○先是撫遠大將軍都統大學士公圖海疏言。今諸路剿賊之際。亦宜進取漢中興安。但臣欲三路進兵。而在秦之兵。若留守諸處要害。則僅可進發一路。請自京增遣大兵。

上諭。在陝滿兵。為數不少。將軍侯張勇將軍王進寶。王輔臣。提督孫思克。趙良棟。總兵官高孟。部兵尤多。可與張勇等。公同詳議以聞。至是。圖海等疏言。臣等公議。以將軍席卜臣。西

安副都統翁愛。陝西巡撫杭愛。領兵鎮守省城。將軍畢力克圖。副都統恰塔。領兵守隴州。寶鷄。關山。諸路。內大臣坤巴圖魯侍衛。副都統馬一豹。領兵守潼關。甘肅巡撫鄂善。領標兵。同副都統席第郎。中拉篤枯等。領蒙古兵。守秦州。將軍侯張勇。駐莊浪以防邊。四川巡撫張得地。仍留延安鎮守。延綏總兵官高孟。統標兵備棧道諸隘賊寇。臣親率將軍佛尼勒。署副都統吳丹。鄂克濟哈。都統海爾圖。西安副都統木成額。副都統佟世德。將軍王進寶。王輔臣。陝西總督哈占。以滿洲漢軍綠旗兵。一萬三千餘人為一路。將軍阿密達。率護軍統領傑殷。副都統覺和託。覺羅夸代。四川總督周有德。副都統吳國楨。署副都統張所。養涼州提督孫思克。漢中總兵官費雅達。以滿洲漢軍綠旗兵。一萬三千餘人為一路。剋期前進。提督趙良棟。統標兵繼大兵之後。鎮守西和醴縣。得旨。進剿逆賊。固守秦中。皆大

將軍公圖海。將軍侯張勇。將軍王進寶等。是賴。應作何留兵固守秦地。使無他虞。作何進取。漢興諸處規定四川。圖海等協謀熟計。應機而行。○辛酉。遣官祭。

先農之神。○福建總督郎廷相疏報。海賊偽水師總督林英等。犯泉州界。提督段應舉。遣標下叅將朱起龍等。率兵撲剿。大敗之。於日湖等處。生擒偽總兵林耀。偽副將黃弘等。下部議叙。○癸亥。

上詣

太皇太后宮問安。○甲子。以正白旗故一等阿思哈尼哈番石璽子石顯爵襲職。○乙丑。奉命大將軍和碩康親王傑書疏報。逆賊韓大任。陳堯元。李懋珠等。率偽官九百五十四員。兵一萬三千三百一十九名投誠。

上命遣兵驛送韓大任等來京。○丙寅。陞國子監祭酒宜昌阿為詹事府詹事。○丁卯。巳時。皇后崩於坤寧宮。

上輟朝五日。諸王以下。文武官員。及公主。王妃以下。八旗二品命婦以上。俱齊集舉哀。持服二十七日。○以軍興免直隸各省文武官齊集舉哀制服。及遣官進香。○諭大學士等。凡出征王。貝勒。及各官。為國討賊。平定地方。効力行間。今令伊等妻服喪服。朕心不忍。其穿孝服。摘耳環。散髮。俱著免。○己巳。春分。朝日於東郊。遣都統趙連行禮。○奉移。

大行皇后梓宮於武英殿。

上親臨舉哀。諸王以下。文武各官等。每日早晚。兩集殿門外舉哀。○庚午。

上臨

大行皇后梓宮前舉哀。○辛未。

上臨

大行皇后梓宮前舉哀。○鎮南將軍莽依圖疏言。臣等抵平樂圍其城。賊水陸來援。將軍巡撫傅弘烈。都統王國棟。率綠旗官兵與戰不勝。臣等孤軍。難以久留。退至中山鎮。乞速罷。

臣將軍職任。以警衆。傳弘烈亦疏言。損兵失
壘。臣罪實無可寬。但滿漢官兵。各自調度。非
臣所得指揮。倘益臣標兵。專臣平定廣西之
責。而以金光祖堅守潯梧後路。再令滿洲大
兵。或從韶州進湖南。或仍駐肇慶。以壯聲援。
庶可濟事。得旨。河水泛漲。大兵不能相援。賊
衆我寡。以致失利。莽依圖。傳弘烈等。皆著免
罪。傳弘烈既以兵少。請濟師。平南王尚之信。
可發精銳萬人。多備火藥火礮。速赴廣西應
援。將軍賴塔。會同靖南王耿精忠。選藩下兵
千人。并劉進忠標兵五千人。付與都統馬九
玉。亦令疾趨廣西。從莽依圖。傳弘烈等。併力
破賊。莽依圖。傳弘烈。以謀勇兼備。並見倚任。
宜共相和協。同心協衷。謀濟國事。滿漢官兵
務令輯睦。俟尚之信。馬九玉等兵。及前所調
將軍額楚等兵至。或一路進發。或滿洲綠旗
分二路進發。公同詳酌。定議以聞。總督金光
祖。已留官兵守潯身回梧州。或即駐梧州。接

濟糧餉。或莽依圖等。檄赴軍前。並聽酌行。
○阿祿科爾沁多羅郡王朱爾札哈故。遣官致
祭。○陞太僕寺少卿朱裴。為太常寺卿。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十二

監修總裁官光祿大夫太保兼太子太傅保和殿大學士兼戶部尚書二等伯四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午三月壬申朔癸酉諭禮

實錄卷七十二

部皇后鈕祜盧氏端懿夙著作配朕躬奉事

太皇太后

皇太后恪恭婉順殫竭孝忱正位宮闈節儉寬

仁克襄內治芳型伊始淑德彌彰茲於康熙

十七年二月二十六日崩逝追念壹儀良深

痛悼宜有稱謚以垂永久著內閣翰林院會

同擬奏其應行典禮爾部詳察速議具奏尋

大學士等議奏按謚法慈惠愛親曰孝聖聞

昭達曰昭

皇后天性純孝睿德懋昭允足垂範萬世臣等博詢羣議載考彛章謹擬尊謚曰

孝昭皇后得旨依議○福建總督郎廷相疏言

海澄為漳泉門戶今海逆登岸據有玉州等

寨復分路侵犯石碼江東橋諸處臣已同副

都統胡圖海澄公黃芳世酌議發滿漢官兵

前往應援但漳屬地廣兵少防禦難周得旨

海賊分路侵犯不可不亟發援師大將軍康

親王速增遣大兵與郎廷相黃芳世協力固

字長庚

守漳州海澄諸處剿滅海寇○乙亥征南將

軍都統穆占疏言大將軍簡親王所遣護軍

統領哈克山之兵來自長途馬多疲憊臣若

俟之同行將值炎暑今當於署副都統公倭

赫總兵官趙應奎至日委以地方即行前進

但茶陵諸處曠濶兵力未敷請先調江西兵

內馬肥者每佐領二三人遣大臣一員率之

速赴茶陵鎮守度簡親王兵必由茶陵進發

臣等移兵候於耒陽彬州協謀以行得旨各

克山等之兵長途馬憊不能疾馳。穆占若俟彼同行。徒稽進剿之期。且茶陵諸處所係亦屬重要。理宜固守。簡親王可就兵丁內擇馬健堪用者。每佐領選二人。授和碩額駙華善。定南將軍印。與學士薩海領之。速赴茶陵。與倭赫等協同駐鎮。哈克山等至吉安。稍休士馬。即繼簡親王進兵湖南。共圖滅賊。尋定南將軍額駙華善疏言。簡親王付臣每佐領兵二名。但茶陵諸處止有倭赫一人。其於分汛防守實為未足。

上復諭之曰。江西通省所係惟在茶陵。大兵前進。初無接濟之師。將軍穆占。簡親王等。公同商酌。選良將精兵留之茶陵。保固江西。務俾萬無一失。○丙子。

上臨

大行皇后梓宮前舉哀。○湖廣提督伯佟國瑤疏報官兵進剿楊洪諸逆。於房縣地方擊敗賊衆。斬獲甚多。生擒偽副將等五十二名。恢

復房縣。得旨嘉獎。下部議叙。○丁丑。遣官祭歷代帝王。○戊寅。常祭。

大行皇后。

上親臨舉哀。○諭兵部。頃以江西底定。因命大將軍簡親王進取永州。寶慶。遣將軍舒恕防守韶州。南雄。相機而行。又令平南王尚之信發兵赴廣西。調將軍額楚等。自肇慶赴梧州。今諸路並進。滅寇恢疆。正在今日。總督金光祖。又稱賀縣開建乃粵東門戶。最為要地。守此二處。則兵餉可由封川輓運。今閱報文。將軍莽依圖傳弘烈。自平樂回軍。倘莽依圖等還至肇慶。德慶。俾賊得據賀縣。開建為死守計。則復圖進取。良屬不易。梧州諸處將不可保。即恐東粵亦至動搖。莽依圖等宜固守賀縣。開建諸處。遇有機會可乘。即行前進。金光祖督運糧餉。以給大軍。毋致有悞。○辛巳。戶部等衙門遵旨會議。各省動用錢糧。司道等官。須先申詳督撫。預行題明。如不申詳題明。

藉稱軍需竟入奏冊請銷者將司道等官革職。不准開銷。令其賠補。督撫降四級調用。如司道等官申詳。而督撫不行題明。擅令動用者。司道等官免罪。督撫照司道官例處分。惟正在用兵。刻不可緩之時。一面申詳具題。一面動用。若不具題咨報。擅自動用。督撫司道等官。各降五級調用。所用錢糧。不准開銷。令其賠補。若司道等官並未申詳。而督撫徑為請銷者。督撫降二級留任。司道等官降五級調用。其各省供應大兵俸餉米豆。承放官重支。不行扣抵。查出。將承放官降三級調用。不行查報之司道等官。降三級留任。不行查出之督撫。降一級留任。或司道等官已經查出。督撫已經查叅。各免處分。其重領官隱匿不行舉首者。革職。將重領銀米賠還。不行查出之叅領。夸蘭太將軍。俟回兵之日。從重議處。綠旗官員亦照此例。至各省供應大兵米豆草束。價值浮冒開銷等弊。督撫查出題叅。照

貪官例。革職提問。如已銷結。或被科道糾叅。或被旁人舉首。將督撫一併照貪官例治罪。從之。○兵部遵旨議叙。海澄公黃芳世之弟黃芳泰。應授為叅將。俟海澄公標下缺出補用。得旨。黃芳泰冒險請兵。全家殉難。忠貞可嘉。著凡有總兵官缺出。一同開列具奏。○壬午。諭吏部。戶部。兵部。朕統御寰區。孜孜圖治。期於朝野安恬。民生樂業。共享昇平。乃副朕宵旰勵精之意。不意逆賊吳三桂。背恩煽惑。各處用兵。禁旅征剿。供應浩繁。念及百姓困苦。不忍加派科斂。因允諸臣節次條奏。如裁減驛站。官俸工食。及存留各項錢糧。改折漕白二糧。顏料各物。增添鹽課鹽丁。田房稅契。牙行雜稅。宦戶田地錢糧。奏銷浮冒。隱漏地畝。嚴行定例處分。用過軍需。未經報部。不准銷算。以上新定各例。不無過嚴。但為籌畫軍需。早滅逆賊。以安百姓之故。事平之日。自有裁酌。各省督撫提鎮。大小文武等官。俱宜上

體朕意。下念民生。潔已奉公。愛惜物力。務期早奏蕩平。與民休息。以稱朕乂安海宇至意。○癸未。平南王尚之信疏言。前奉旨命臣統兵親進廣西。臣慮賊窺我兵已撤。必肆犯潯梧。且高雷廉三郡初定。人心尚未寧戢。恐復為逆賊煽惑。再四熟籌。不得不駐省會。以圖肆應。得旨。尚之信藩下兵著精選萬人。遣赴廣西。停其親往。仍駐守廣東省城。兼顧潮惠。勿致疎虞。○奉命大將軍和碩康親王傑書疏言。前令臣分發兵守潮州。今海逆侵犯海澄諸處。大兵不便分遣。得旨。平南王尚之信已停赴廣西。見令兼顧潮惠。而靖南王耿精忠。將軍賴塔。仍鎮守潮惠諸處。大將軍康親王。其速遣官兵。剿滅侵犯海澄賊寇。不必應援廣東。○甲申。清明節。遣官祭

永陵。

福陵。

昭陵。

孝陵。

仁孝皇后。

大行皇后○先是。

上諭議政王大臣等。岳州前後船艘多於賊數倍。合此船破敵。何難之有。乃尚善統大兵駐岳。已經數年。未一大創賊寇。今大將軍安親王岳樂。既克平江。江西湖廣道路已通。俟公溫齊等兵與陝西調往之兵抵岳州日。尚善可率所部大臣及每佐領兵五人。赴長沙駐守。令安親王率所部大臣。選每佐領兵五人。取岳州。進攻岳州時。應遣將軍鄂內。率舟師前進。陸地則令滿漢官兵實土蘆園。排列鹿角。進逼賊壘。晝夜火攻。俾賊水陸應援不暇。江之南岸石首縣城。即宜攻取。令水陸兵連營江岸。或另立一營。扼湖之險。更於南潯港地方。水陸立營。斷賊後路。安親王總統官兵。相機剿援。庶為有濟。不必令舟師往泊君山無用之地。若準此而行。斷賊餉道。必能克取。

岳州。至是。安遠靖寇大將軍貝勒尚善疏言。臣等數年與賊對壘。並無寸效。仰慰

聖懷。今臣等仍願統率舟師。務克岳州。以贖前罪。得旨。尚善等願率舟師自効。可。仍留岳州。務痛懲前非。滅賊收疆。勉圖贖罪。○乙酉。先是。

上諭議政王大臣等。韓大任既抵福州。其江西追剿官兵。度已回汛。大將軍簡親王宜乘此機會。統率大兵。亟剿湖南逆賊。一應機宜。可與將軍穆占定議。或并力會剿。或分道進發。相機速行。一面奏報。至是。征南將軍都統穆占疏言。請令簡親王兵。與其所部兵會合一路。自茶陵取郴州。耒陽諸處。即自永州渡江。直向衡州。得旨。簡親王整頓軍馬。速與穆占會合。詳加籌畫。今江西萬無他虞。保固茶陵諸處。及大將軍安親王後路。然後會師一路進發。平定湖南。其護軍統領哈克山。追剿韓逆。直抵福建。軍士馬匹羸乏。可將見在南昌

馬一千。解至簡親王軍前。均給缺馬軍士。○丙戌。初祭。

大行皇后。

上親臨舉哀。是日。

上除服。○諭撫遠大將軍都統大學士公圖海。卿前疏言。秦地遼濶。留守兵單。今當進取漢中。興安之期。度果萬無一失。有易復之機。仍行進取。但秦地所係重大。卿等親率大兵前進。而王進寶。孫思克等。倚任諸臣。俱在戎行。脫行後。更有他虞。殊難過禦。宜暫停漢興之役。固守所在。要害廣布恩威。從事招撫。俟後有可取之機。再行奏聞。其謹秘之。○諭議政王大臣等。今逆賊侵犯潯州諸處。梧州。高州。所關最要。將軍莽依圖。可駐鎮梧州。若遇高州諸處有警。即行應援。將軍巡撫傅弘烈。整頓士卒。俟進兵平樂。桂林。與將軍額楚都統勒貝。署副都統穆承格同行。如兵力未足。許於莽依圖等兵內。量調前進。又諭議政王大

臣等自逆賊吳三桂叛變以來。大兵諸路征剿。方平南王尚之信歸正之時。將軍巡撫傅弘烈。思念國恩。密約反正。所領官兵。從未支領俸餉。輒奮勇入粵西。收復梧州。潯諸處。殲戮渠帥。屢奏捷功。嗣以進取平桂。規定滇黔。奏請迅發大兵。以相助援。因遣將軍莽依圖等。協力恢復平桂。本期莽依圖與傅弘烈。并力平定廣西。克濟大事。不意莽依圖等。兵抵平樂。寸步不前。藉口綠旗營壘失陷。遽奔還中山鎮。仍復畏縮。退至賀縣。又託言糧餉不繼。徑回梧州。德慶。以傳弘烈恢復如許。城池盡棄與賊。今若梧州乏糧。必將退回肇慶。肇慶乏糧。必將退至廣州。苟廣州乏糧。當復棄廣州而還耶。如此怯懦。多端託護。不惟悞西征之事。即粵東恐亦可虞。頃有旨令莽依圖駐鎮梧州。兼顧高州諸處。嗣今宜痛改前轍。鼓舞軍士。勉圖後效。相機剿賊。底定封疆。爾等其嚴行申飭。○撫蠻滅寇將軍廣西巡撫傅

弘烈疏言。粵西地方。僅存梧州一府。滿漢兵馬。芻糧浩繁。力難供應。得旨。大兵糧餉。關係殊急。不可但取給廣西。宜令廣東協濟。平南王尚之信。可支餉銀二十萬兩。解赴廣西。并令廣東督撫。運致糧草。俾無悞軍需。○贈陝西殉難商南縣知縣盧侯為按察使司僉事。予祭葬。廕一子入監讀書。○丁亥。釋祭大行皇后。

上親臨舉哀。○諭撫蠻滅寇將軍廣西巡撫傅弘烈。覽卿所奏安人心。固內地。剿賊之策。一悉備。但所云頒旨及部議。不甚如意。又一時更換撫院藩司。心甚疑畏等語。以後朕自有裁酌。疏內請將河南綠旗兵二千。北邊綠旗馬兵一千。福建藤牌手一千。或江西贛州鎮標挑兵一千。著前營遊擊管天祥帶領。迅赴臣營。臣得此添兵五千。便可獨力前征等語。但調北邊綠旗官兵。路途遙遠。不能無慮。近省綠旗官兵。但有可調。務允所請。爾疏內

云用某人之弟帶領官兵來守梧州等語。此人離粵日久。難以復回。又恐其兄有疑心也。密陳之。疏留中。其廣東布政司一事。高州官兵一事。滿洲大兵一事。已有密旨著部議。卿國爾忘家。勲猷素著。恢復潯梧。斬賊渠魁。屢屢有功。因賊負固踞險。一時不能即效。卿宜愈加勤力。剿撫粵西。掃蕩逆氛。以副朕倚任至意。○戊子。

上詣

太皇太后宮問安。○己丑。

萬壽節。停止行禮筵宴。○遣官祭

福陵。

昭陵。

孝陵。

仁孝皇后。○遣官祭真武。東嶽城隍之神。○辛

卯。以原任兵部尚書朱之弼為工部尚書。○

壬辰。

上詣

太皇太后宮問安。○癸巳。平南王尚之信疏言。偽水師將軍杜輝之子杜國臣。向在廣東。臣於本月初六日。遣人送赴岳州。

上諭。杜輝原係雲南永北總兵官。倘思念國恩。傾心歸正。於事甚有裨益。杜國臣抵岳州日。大將軍貝勒。選賢能人員。密遣至杜輝所。曉以伊子來岳。招令反正。或杜輝實心歸化。潛約何地。乞遣其子。或畏遣子洩漏。答以他言。貝勒應審察情狀。若杜國臣可遣。度萬無可慮。則遣之。務俾有濟大事。如稍有可疑。切勿輕畀。俟有機會。布朕德意。移書招致。爾宜加意慎密。勿致宣洩。○諭兵部。遣詹事宜。昌阿。前赴岳州。與大將軍貝勒。尚善會議。隨宜招降杜輝。並視大兵擊賊情形。○乙未。以奉移梓宮。致祭。大行皇后。上親臨舉哀。○福建水師提督海澄公黃芳世。疏報。海逆自敗遁之後。集其餘夥數萬。資嶠。

石碼城。於三月初六日。偽提督吳淑等。率賊衆二萬有餘上岸。副都統孟安等。同臣標副將楊壯猷等。率領滿漢官兵協力追斬。擊沉賊船。賊衆敗退。下部議叙。○丙申。奉移

大行皇后梓宮往鞏華城。與

仁孝皇后同安於享殿內。

上親臨送。諸王。貝勒。貝子。公。及滿漢文武大小官員。俱齊集西安門外。舉哀跪送。其隨送王大臣官員等。至鞏華城奉安。

梓宮畢。舉哀行禮。是日。

上駐蹕鞏華城。○予故內大臣二等精奇尼哈番綽爾濟。祭葬如例。○丁酉。撫遠大將軍都統大學士公圖海疏言。臣等遣拉篤祐轉傳上諭。令流番各退歸故巢。已遵旨陸續出口。但番情叵測。祈遣重臣一員。駐劄蘭州以西地方。固守三邊。得旨。將軍張勇。駐劄邊地年久。深知地方情形。著自蘭州移駐甘州。固守沿邊地方。○戊戌。大祭。

大行皇后。是日。諸王以下。文武官員。俱齊集舉哀。除服。○己亥。繹祭。

大行皇后。○庚子。滿月致祭。

大行皇后。

上回宮。○安遠靖寇大將軍貝勒尚善疏言。岳州原有烏船。又奉旨添造烏船一百艘。沙船四百三十八艘。官兵自陸路分布外。餘配入烏船。沙船。兵數不敷。須再調綠旗兵五千人。臣等茲役入湖。務期破賊。得旨。公溫齊等。率往所調陝西滿漢兵。以及船數。乃尚善所備知。宜早為通計。如有不足。預當奏請。今各路赴調之兵。俱抵岳州。船艦營造已完。乃奏請增兵。殊屬不合。但尚善等。既稱茲役入湖。務期破賊。其令蔡毓榮。率標兵三千。并荊州隨征綠旗兵二千。馳赴岳州。與尚善協力。擊破湖賊。攻取岳州。如荊州彝陵。防禦兵少。大將軍順承郡王。恭贊大臣。總督蔡毓榮。公同酌調附近綠旗兵。遣發汛守。

閏三月。辛丑朔。揚威大將軍和碩簡親王喇布疏言。理事官麻勒吉等抵吉安。稱孫延齡為吳三桂所殺。馬雄病死。得旨。馬雄。孫延齡雖死。其餘黨尚踞粵西。麻勒吉等。仍同簡親王軍偕行。以朕赦罪論功之意。察行曉示。其被脅從賊之人。有悔罪投誠者。即行招撫。○壬寅。定遠平寇大將軍和碩安親王岳樂疏報。偏沅巡撫韓世琦。招撫偽總兵揭玉慶等。一百二十三員。兵丁一千餘名。都統覺羅畫特率領滿漢官兵。進剿馬棚賊邱義尚。於七家洞等處地方。擒斬無算。又招撫偽總兵朱永升等。下部議叙。○予故三等精奇尼哈番散秩大臣奇塔特。祭葬如例。○癸卯。上巡幸近畿。是日。駐蹕南苑。○陞浙江瑞安營副將武榮。為江南京口左路水師總兵官。○浙江總督李之芳疏報。浙省陸地逆賊。雖經剿撫。而沿海一帶。鄭克塽賊船。風潮來往。不可勝計。象山副將汪國祥。溫州鎮總兵官陳

世凱等。於正月初旬。大敗賊眾於廟嶺等處。斬殺五百餘名。獲器械無算。下部議叙。○江西總督董衛國疏報。逆賊韓大任等。已赴閩投誠。其逆黨郭應輔等。尚據萬安。泰和等地。臣分兵四路進剿。陣斬逆黨四萬有餘。招撫偽總兵邱大成等。三百餘員。兵丁四萬六千餘名。下部議叙。○甲辰。

上駐蹕黃村。○乙巳。

上駐蹕固安縣。○丙午。

上駐蹕霸州。○丁未。

上駐蹕趙北口。○戊申。贈陝西殉難遊擊謝世忠。為都督僉事。廕一子以守備用。守備林時泰。為署都司僉書。廕一子以衛千總用。各予祭葬。把總王正隆。給卹銀一百兩。廕一子以衛千總用。○辛亥。

上駐蹕採蒲臺村東。○癸丑。

上回鑾。駐蹕東里長村北。○廣東肇慶安塘司庫報。三月二十二日。高雷總兵官祖澤清復

叛。二十四日。提督王可臣病故。

上諭平南王尚之信等。祖澤清先經反叛。及投誠之後。隨加寬宥。仍授總兵。旋擢鑾儀衛使。今復背恩反叛。兇惡已極。宜即行誅滅。以懲奸類。平南王尚之信。將軍莽依圖。額楚。巡撫傅弘烈。總督金光祖等。可會同商酌。速行剿滅。至廣東提督職任綦重。王可臣既經病故。其令總兵官侯襲爵暫理事務。與大兵協力討賊。○改廣東本年鄉試於十月。以地方新定故也。○贈故陝西延綏總兵官許占魁。太子少保。予祭葬立碑。謚恪敏。○甲寅。

上駐蹕康仙莊。○乙卯。

上駐蹕南哥驛村。○予故二等阿達哈。哈番乳公滿篤理。祭葬立碑。謚良僖。○予故鑲白旗副都統武旦。祭葬如例。○丙辰。

上駐蹕南苑。○諭議政王大臣等。海寇盤踞廈門諸處。勾連山賊。煽惑地方。皆由閩地瀕海居民為之藉也。應如順治十八年立界之例。

將界外百姓。遷移內地。仍申嚴海禁。絕其交通。但窮苦之民。一旦遷徙。必棄其田舍。難以為生。殊可憫惻。可將本年地丁額賦。差徭雜項。盡行豁免。該督撫揀委能員料理。俾安輯得所。勿致苦累。○丁巳。

上回宮。○征南將軍都統穆占疏言。接大將軍安親王檄稱。湘潭偽將軍林興珠。遣人約降。大兵方渡江。駐湘潭。以圖進取。臣若俟簡親王至日。方行。恐失機會。今議以南昌所屬。付總督董衛國。贛州南安。付將軍舒恕。令之駐守。留每佐領兵二人於吉安。令副都統一人領之。防守泰和萬安諸處。又留滿兵三百人於永新。亦令副都統一人領之。剿禦郭應輔等賊。兼顧茶陵後路。又令袁州副都統席布。率每佐領兵二人。鎮守袁瑞臨江諸處。兼顧安親王後路。廣信尚有餘賊。令總兵官許貞領標兵二千駐守。其總兵官高登科。標兵一千。贛州綠旗兵二千。俱聽簡親王統率前進。

簡親王抵茶陵。留所部才能大臣精銳官兵之半。其餘簡親王率之。仍遵前旨。從臣兵所由之路。進定湖南。至攸縣最為要地。臣已留前鋒統領希福率署副都統公倭赫之兵。與將軍華善協同鎮守攸縣。安仁諸處。兼顧江西。臣於本月十二日。自茶陵啓行。進取耒陽。郴州。桂東。桂陽。得旨。將軍舒恕見鎮南韶諸處。不便更令移駐南贛。其令巡撫佟國楨。總兵官哲爾肯駐守。餘如所請。當此逆賊震動之際。穆占急宜進兵郴州。耒陽。以分賊勢。耒陽諸處克復。即於上游渡江。斷賊歸路。與安親王協力剿寇。如江未可渡。則作渡江之勢。畧定沿江北岸地方。以張安親王大軍聲勢。○鎮南將軍莽依圖疏言。所部滿洲蒙古兵馬多疲。甲冑朽敝。得旨。莽依圖赴廣西。不能奮力破賊。輒自退却。前既藉口糧餉匱乏。今又以兵無甲馬。託詞具奏。殊辜委任。且使賊勢益張。廣東震動。祖逆復叛。本當嚴加治

罪。但時方用兵高州。暫緩處分。俟旋師日。察議。尋莽依圖以失利退兵。致地方失陷。自陳請罪。乞罷將軍任。

上復切責之曰。莽依圖至平樂。不能殲寇拓疆。擅自退還。致潯州諸處陷賊。今乃云未至梧州。傳弘烈。金光祖。早已棄地。明諉過於傳弘烈。而巧飾妄奏。殊屬不合。宜立行處分。但見在行間。其仍留將軍任。圖功贖罪。○征南將軍都統穆占疏報。江西長寧縣。偽昭陽將軍下總兵謝聘等。三十二員。率領兵丁投誠。下部知之。○己未。先是。諭兵部自大草灘至西海道。路甚近。此蒙古中情形。及其地方。朕皆知悉。可令郎中拉篤枯。馳驛來京。面承密旨。尋諭大學士等。令拉篤枯赴涼州。探厄魯特台吉噶爾丹信息。不時以報。至是。拉篤枯來京。請帶將軍侯張勇標員一人。同往涼州。許之。○庚申。諭兵部。據將軍穆占奏。偽將軍林興珠。赴大將軍安親王軍前投誠。逆賊俱無

固志。岳州長沙相距頗近。貝勒尚善必已聞知。前尚善等疏言。俟添造烏船沙船皆至。前破湖賊。今方逆賊震警之時。若有隙可乘。不必俟船齊備。即以見在船隻進取。仍錄穆占所奏。示尚善及順承郡王知之。○兵部理藩院會題。撫遠大將軍圖海疏報。厄魯特噶爾丹將攻西海。厄魯特若來。或入大草灘。亦未可定。又陝西總督哈占。移文臣部云。西套厄魯特台吉等。聞噶爾丹有三月內舉兵之語。應遣人知會達賴台吉備兵待之。得旨。噶爾丹興兵往攻西海。厄魯特如遠從達布素圖瀚海而去。則無庸置議。若來至近邊。欲經大草灘前往。則將軍侯張勇。提督孫思克等。務須令其堅立信誓。不許騷擾人民。仍整飭我軍。嚴加防護。一面放噶爾丹過。一面奏聞。倘或肆橫。強欲入邊。將軍提督等。固守地方。一面堅拒奏報。尋命拉篤枯前赴甘州一帶地方。偵探消息。○撫蠻滅寇將軍廣西巡撫傅

弘烈疏報。潯協副將林大忠。思南副將張文玉等。率兵剿賊於容縣西山等處地方。大敗賊衆。擒斬無算。恢復北流縣城。得旨嘉獎。下部議叙。○辛酉。

上素服御太和門。遣和碩莊親王博果鐸。多羅信郡王鄂扎。齎冊寶詣鞏華城。冊諡

大行皇后。冊文曰。朕惟正兩儀之位。資始允藉。夫資生。端萬化之原。治外必先於治內。故壺政修而家邦永賴。坤貞著而品物咸亨。緬懷懿淑之隆。益念匡襄之德。徽音尚在。盛典宜崇。咸由紀美於休稱。始克流光於奕世。皇后鈕祜盧氏。夙承華閥。聿茂令儀。暨正宮闈。作朕良配。履和思順。端恪本於天懷。體吳居謙。溫莊發乎至性。奉兩宮之定省。愉婉彌殷。襄

九廟之馨香。敬共加篤。衣疏服。澣首弘儉樸之風。夜寐夙興。克佐旰宵之治。惇五常而仁能逮下。循四教而慎以提躬。覽史披圖。既婉徽於彤管。含章蘊美。洵叶吉於黃裳。何圖掖殿

之旋虛。深痛儀型之永逝。載考追崇之典。式稽節惠之文。謚以尊名。表慈惠愛親之實。詞難罄。兼聖聞昭達之休。懿德聿彰。鴻名無忝。特以冊寶。謚曰孝昭皇后。於戲。炳丹青於百代。至行堪師。垂琬琰於千秋。芳規丕著。哀榮斯極。寵命宜承。

上詣

太皇太后

皇太后宮問安○癸亥。

上詣

太皇太后宮問安○諭吏部兵部宣猷効力。臣子之常經。晉秩酬庸。國家之大典。鎮守寧古塔等處將軍巴海等。莅任以來。彈壓巖疆。展布猷畧。實心任事。籌畫周詳。允為稱職。又設法遷移查努喀等。各姓新滿洲戶口。於寧古塔烏喇。編為佐領。安插咸令得所。懷柔遠人。有裨軍國。深為可嘉。應給世職。以示鼓勵。副都統查努喀。副都統品級布克陶等。累世輸

誠進貢。効順有年。今復自其本土。率眾遷於寧古塔烏喇地方。與滿洲官兵一體効力。亦殊可嘉。俱應給以世職。爾二部一併會議具奏○以戶部郎中陳肇昌為廣東按察使司僉事。提調學政○湖廣總督蔡毓榮疏報。逆賊楊洪等。既經剿除。餘孽未靖。臣隨遣襄陽總兵官劉成龍。招撫偽官兵丁。共五千八百餘名。下部議叙○甲子。

上至鞏華城駐蹕○乙丑。月祭

孝昭皇后

上回宮○理藩院題請。差往科爾沁等四十九旗。會盟大臣。得旨著內大臣喀代。尚書馬喇去○丙寅。諭戶部。朕巡視京畿。見八旗亡故軍士。葬地窄狹。墳墓纍纍。亦有竟無塋地者。皆因郭外近地。價值騰貴。故不易得。本朝軍士。奕世効力行間。殞命疆場。或身被重傷。在家老死。皆家業貧窮。至不能營辦葬地。朕每觸目。甚深憫惻。作何撥給地土。俾八旗貧苦

兵丁俱獲葬所。令議政王、貝勒、大臣詳議以聞。○先是，寧南靖寇大將軍多羅順承郡王勒爾錦疏言：前旨令總督蔡毓榮率兵五千赴岳州，但彼標兵自荊州以至彝陵諸路俱設汛防，而大江賊船不時出沒，滋陽逆賊復渡江置壘。若蔡毓榮率兵赴岳，則荊州諸處不無可虞。得旨：攻取岳州事機重大，且大將軍貝勒尚善稱此番進湖必期破賊。蔡毓榮之兵不可不遣。順承郡王仍遵前旨行。荊州兵既未足，可令河南南汝總兵官周邦寧率標兵一千五百人赴襄陽。既至，順承郡王等量調襄陽總兵官劉成龍標兵赴荊防禦。尋勒爾錦復奏：劉成龍標下及援剿兵俱應留守各汛。

上諭：劉成龍標兵既與地方相習，可仍留襄陽。周邦寧率兵徑赴荊州。巡撫張朝珍於武昌諸處兵內調足二千，代援剿兵與蔡毓榮偕往。其援剿兵仍留荊州。○丁卯，鑲紅旗一等

阿思哈尼哈番滾布倫辰緣事革職。以其子監生巴祿替職。○定遠平寇大將軍和碩安親王岳樂疏報：吳三桂偽親軍水師右翼將軍林興珠自湘潭遣偽官楊廷言等詣臣軍前投致降書。隨遣副都統甘度海、阿進泰以兵往迎。又遣叅領沙納哈率兵收取彼處船礮。至林興珠部下官兵潰散。甘度海、阿進泰不守湘潭，將見獲之船盡行焚燬。率領林興珠來至軍前。沙納哈還亦並無船艦收獲。得旨：林興珠不忘國恩，率其所屬人員傾心歸正，深為可嘉。其從優封侯，爵授建義將軍。留安親王軍前，剿撫賊黨。楊廷言等亦與議叙。伊等妻子該督撫安插撫恤，務令得所。副都統甘度海、阿進泰貽誤軍機，情罪可惡，著革職。逮至南昌收繫。○福建總督卽廷相疏報：逆賊蔡寅擁衆數萬屯劄天寶山地方，截我糧道。臣遣發官兵會同海澄公黃芳世進剿。於本月初一初二兩日連敗賊衆，陣斬偽提

督楊寧等三十六員。擒賊弁一百二十餘員。
斬兵二千九百餘人。奪營寨二十四所。下部
議叙。○戊辰。

上詣

太皇太后宮問安。○己巳。定南將軍額駙華善
疏言。茶陵為江西門戶重地。將軍穆占留兵
甚少。恐吳逆乘間。自衡州出犯安仁。攸縣諸
處。請增發大兵。為防禦計。得旨。茶陵攸縣關
係江西全省。將軍穆占因聞安親王渡江。故
率兵深入。乃安親王實未渡江。倘逆賊間道
來侵。江省可慮。簡親王其與將軍華善前鋒
統領希福。學士薩海等。共商鎮守茶陵諸處。
以兵付護軍統領哈克山。由穆占進兵之路。
急行追及。併力破賊。穆占軍前聲息及逆賊
情形。簡親王不時奏報。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十三

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午夏四月庚午朔享

實錄卷七十三

一

太廟遣內大臣公噶布喇行禮○漳州安塘筆帖式報副都統伯穆赫林海澄公黃芳世等師次灣腰樹為賊所衝平和失陷賊逼潮州立營得旨大將軍康親王兵既分援諸路蒙古兵復撤回閩中兵力似單今浙江平靖可於杭台衢三府滿洲蒙古漢軍兵內選六百名令副都統雅塔理率赴福建到日聽康親王調遣并檄將軍喇哈達賴塔靖南王耿精忠等交相計議剿滅漳潮間賊寇○以議叙

候缺總兵官黃芳泰為江南京口左路水師總兵官○甲戌

上詣

太皇太后宮問安○海澄公黃芳世疏言閩省變亂時臣叔黃梧弟黃芳度所部官兵並已離散臣抵漳之後頗復收集請減兵額為三千付臣弟黃芳泰統轄總督郎廷相又疏言海逆勢焰日盛勾連山賊互相應援臣標兵止二千五百所在告警不能分應請增臣標兵二千五百設立五營今韓大任投誠之兵見給糧餉即以此兵補入臣標可不煩別糜糧餉

實錄卷七十三

二

上諭海澄公黃芳世收集之兵往時遭亂堅守孤城効力勞苦今逆氛未靖不當令其分散宜如所請以三千人隸籍支給糧餉黃芳泰已授京口左路總兵官其令黃芳世標員分轄此兵總督郎廷相奏增兵二千五百設五營亦如所請但韓大任之兵新經招撫不宜

聚處一軍。大將軍康親王。及叅贊大臣。將軍耿昭忠。及該督撫提等詳議。將撫提標舊兵。與新附之兵。相叅配合。以足兵額。統轄官員。該督選擇題補。○諭兵部。逆賊祖澤清背叛。已調平南王尚之信。副都統額赫納等。率兵進剿。復遣將軍傅弘烈。都統勒貝等。率兵攻取鬱林諸處。今聞逆賊自高州勾連山海諸寇。來犯電白。尚之信及將軍額楚等。速行剿滅。○丙子。諭撫遠大將軍都統大學士公圖海。卿向在機密重任。深德浴身。志節高潔。奉命西征。早清巨寇。宣布德意。兵過之地。秋毫無犯。舊德老成。可謂社稷之臣。前者拉篤祐來。知卿平安。朕心良足慰也。今因拉篤祐回汛。故示朕意。○陞廣東高雷總兵官侯襲爵為廣東提督。○吏部等衙門遵旨議叙。寧古塔將軍巴海。拖沙喇哈番。加拜他喇布勒哈番。兼一拖沙喇哈番。授為三等阿達哈哈番。副都統安珠護。二等阿達哈哈番。加拖沙喇

哈番。授為一等阿達哈哈番。其新滿洲副都統查努喀。布克陶等。議叙之處。應行文巴海。會議具題。得旨。巴海著優加一等阿達哈哈番。為一等阿達哈哈番。兼一拖沙喇哈番。安珠護著優加拜他喇布勒哈番。為一等阿達哈哈番。兼一拖沙喇哈番。餘如議。○己卯。征南將軍都統穆占疏言。官兵恢復郴州。桂陽。興寧。宜章諸處。其地為通粵要路。幅員遼濶。不可不駐兵防守。欲留臣等之兵。恐進剿力弱。苟不設防。則新復之地。又復可虞。乞別調官兵駐守。得旨。頃因茶陵攸縣地屬要區。已敕大將軍簡親王。不必繼穆占前進。與和碩額駙華善。協同鎮守。仍令護軍統領哈克山等。會同穆占。併力進剿。今穆占既恢復郴宜諸處。當增兵防守。若粵東無虞。鎮守南韶將軍舒恕之兵。可調來駐防。若粵東可慮。則勿調舒恕兵。或應於簡親王兵內。通融分撥。或量留哈克山兵增防。並聽穆占斟酌以行。尋

穆占招撫偽總兵王育民等。收復臨武。藍山。嘉禾。桂陽。桂東五縣。因疏言。臣以兵抵永興。渡河進剿。移文將軍華善遣兵赴永興。以續我兵之後。華善謂茶陵諸處。留兵甚少。不即遣兵。臣因將郴州。永興。桂陽。興寧諸處。令都統伯宜理布。前鋒統領碩岱。護軍統領喇賽。副都統託岱。祖澤淳。宜思孝等。率兵分汛防守。但新復地方。不可不增兵駐鎮。茶陵有滿兵每佐領四人。及總兵官趙應奎與臣等所留湖廣綠旗兵。又留簡親王兵一半。為數不少。請於此兵內。遣往郴州。桂永興諸處。以資防守。得旨。項有旨。將軍舒恕之兵。應否調守郴州諸處。或酌分簡親王兵。或應留護軍統領哈克山兵。聽穆占酌行。穆占身在地方。宜悉緩急。作何調兵防守。仍遵前旨相機從事。○庚辰。

上詣

太皇太后宮問安。○先是。因廣東糧缺。進剿粵

西大兵饋運難繼。

上命撥江西銀十萬兩。安徽銀十五萬兩。由江西採買米穀。運送廣東。至是。江西總督董衛國疏言。江西地方殘敝。購米未可即得。得旨。據董衛國奏。江西購米艱難。前撥安徽帑銀十五萬兩。宜就近付江南督撫採辦。陸續運至江西。轉運廣東。但輸輓軍糧。所關甚重。可令戶部郎中胡什巴。員外郎莫羅。馳驛赴江西廣東。隨宜區畫。毋困民力。毋誤軍需。○下嫁科爾沁畢爾塔噶爾額駙之雍穆長公主薨。遣官致祭。并賜塋誌勒石。○辛巳。

上詣

太皇太后宮問安。○以多羅溫袁郡王佛永輝之弟延壽襲封多羅溫郡王。○奉命大將軍和碩康親王傑書疏報。副都統胡圖海。澄公黃芳世等。率領滿漢官兵。於閏三月初十。十一日。連破漳州海賊。陣斬偽提督總兵等。焚毀賊營。獲偽印。割船隻器械無算。下部議叙。

○壬午。陞前鋒叅領喇住。為鑲白旗蒙古副都統。○癸未。

上詣

太皇太后宮。問安。○甲申。調鑲藍旗蒙古副都

統額赫納。為滿洲副都統。○丙戌。

孝端文皇后忌辰。遣官祭

昭陵。○丁亥。

上詣

太皇太后

皇太后宮。問安。○調江西九江總兵官馬雲程。

為廣東高雷總兵官。○戊子。諭兵部吳三桂

背恩倡亂。所部人員。向沐國恩甚久。其中不

無被脅者。韓大任等。既經投誠。仍令議叙加

恩。其同來護軍甲兵。皆國家素所養之人。

若輩父母妻子。俱陷賊中。可遣發令歸滇中。

俾得完聚。其續至者。爾部逐一問明。或有願

歸者。奏聞并發。○己丑。調鑲白旗蒙古副都

統喇住。為滿洲副都統。○陞刑部郎中王新

命。為江西布政使司布政使。○庚寅。漳州安

塘筆帖式報海逆環圍海澄。我兵失利於灣

腰樹。賊勢益張。聞海澄城中糧已匱乏。賊復

日犯漳州。總督郎廷相復疏言。海賊猖獗。閩

省兵單。請調江南浙江廣東三省滿漢官兵。

赴援漳泉。又請調三省水師戰艦。并於福建

召募水卒。規取廈門。得旨。江南舟師。調發岳

州諸處。京口亦為濱海要地。廣東之兵。進剿

祖逆。鎮守潮州官兵。及劉進忠所部官兵。又

調往廣西梧州。署副都統孟安等。已率兵往

援漳州。副都統雅塔理。亦已率浙江大兵。前

赴福建。此三省之兵。既隨在分遣。不可復行

調發。且目下事機。救援海澄為急。郎廷相乃

奏請調募舟師。規取廈門。不合。俱不准行。大

將軍康親王等。身受全閩重寄。宜將雅塔理

率往之兵。并黃芳世。郎廷相標下增設之兵。

隨宜調遣。務急解海澄之圍。撲滅漳賊。寇

○撫遠大將軍都統大學士公圖海疏報。閩

三月二十四日。振武將軍佛尼勒泰贊軍務。署副都統吳丹等。大敗賊衆於牛頭山。香泉等處。二十六日。四川總督周有德。奏贊軍務。署副都統覺和託等。大敗賊衆於秦嶺等處。恢復潼關堡五寨。下部議叙。○辛卯。

上詣

太皇太后宮問安。○撫蠻滅寇將軍廣西巡撫傅弘烈疏言。故撫臣馬雄鎮。當康熙十三年春。逆賊孫延齡反叛時。誓死抗賊。又密遣其子馬世濟。從間道赴京師請兵。孫逆覺之。囚馬雄鎮於別室。及康熙十六年十月。吳逆偽將軍吳世琮。破桂林。殺孫延齡。令兵士擁馬雄鎮至營逼降。馬雄鎮大罵。遂為吳世琮所害。并殺其幼子三郎。四郎。及家人等。其妻妾女媳。皆投繯自盡。闔門殉節。世所罕有。而馬雄鎮幕友舉人孫成。儒士陳文煥等。周旋患難。冒險來歸。忠君信友。兩全其美。伏乞敕部優卹。馬雄鎮一門忠義。以勵臣節。叙錄孫成。

陳文煥等。以鼓義士之氣。得旨。據奏原任廣西巡撫馬雄鎮。抗詞罵賊。精忠報國。并家口殉難。忠貞慘烈。深可憫惻。作何恩卹。著議政王大臣等。會議具奏。陳文煥等。冒險來歸。可嘉。著一并議奏。尋議原任廣西巡撫馬雄鎮。俟廣西平定後。查明殉難人員。一并議叙。其子馬世濟。從間道赴京請兵。殊為可嘉。應從優議叙。加恩。以通政使司左右通政。大理寺少卿。先用。其幕友舉人孫成。以同知用。儒士陳文煥。以知縣用。從之。○壬辰。諭吏部等衙門。國家設法定例。原期章程盡善。垂之久遠。上裨軍國。下益民生。必期內外臣工。精白乃心。恪恭詳慎。實心奉行。方克永遵。而無弊。近見各處章奏。凡於見行之例。或借端營私。巧為掩飾。或推諉卸過。冀免處分。或徇庇情面。曲為彌縫。凡行一事。每滋弊端。以致良法美意。澤未下究。而累已及民。揆諸立法初意。殊為未符。此等情弊。科道官雖有風聞。因無確

據難以指叅。朕雖洞悉緣由。期其自行改悔。不加深求。遂爾因循。以為僥倖之路。以後在內部院等衙門。在外督撫各官。俱宜滌慮洗心。痛改積習。於有益國家民生事務。盡擔當。不避嫌怨。務期法行無弊。恩被閭閻。以副朕立法定制。愛養斯民至意。如視為故事。仍蹈前轍。事經發覺。定行嚴加處分。著通行申飭遵行。○甲午。先是吳喇忒鎮國公諾門等。疏報閏三月內。賊寇數百人。闖入邊汛。刦殺本旗巴達里察罕。吳爾圖。三台吉。及巴達里台吉之妻。并男婦子女共二十人。又搶掠男婦子女六十餘人。馬駝二千九百餘匹。并帳房盛甲等物。

上差員外郎塞冷。恩額森等。馳驛往勘。至是。理藩院奏。塞冷等覆稱。厄魯特四百餘人。搶掠吳喇忒等。遠遁無踪。查鄂齊爾圖。汙為噶爾丹所敗。其屬下濟農四散奔竄。或係濟農等肆行刦掠。亦未可定。但未獲賊寇實情。不便

懸擬。應存案。俟發覺定議。得旨。濟農輩竄散人等。或又如此刦掠。應檄吳喇忒三旗。鄂爾多斯六旗。扎薩克諾爾布台吉。四子部落扎木揚台吉等。遴選精壯軍士。不時巡防汛地。其巴達里台吉等。見在幼穉。著諾門公收養之。○乙未。

上詣

太皇太后宮。問安。○月祭

孝昭皇后。○諭大學士等。前命爾等清察地畝。以給出征死亡兵丁葬地。必平原高燥之處。方可。若地勢卑濕。不堪為墳塋。雖撥給何所用之。又須令與道路相近。若取道遠。則貧家難以趨赴矣。至於官員秩卑。小民貧乏者。皆資地畝為生。若取伊等之地。撥給兵丁。又致彼失業。可查內務府所管地畝。及諸王大臣地畝。詳加丈量。有溢於正額者。給與兵丁。以副朕優恤至意。尋大學士等議。滿洲蒙古及包衣。每佐領給地十五畝。漢軍另戶兵。每

佐領給地七畝半。清查內務府及王以下大臣等園地溢額者撥給。從之。○靖逆將軍甘肅提督侯張勇疏報逆賊吳三桂僞遺達賴台吉等交相連結欲圖入掠且逆賊已知松潘茂州番中有通西寧大路恐乘間隙侵我茶馬之利得旨甘肅提督舊時原駐甘州後因川賊犯秦州故移駐蘭州今吳逆圖擾邊境不可不加固守令張勇自蘭州移鎮甘州著嚴加提備仍與大將軍公圖海等便宜籌畫○予故奉國將軍蘇爾特祭一次○丙申諭兵部提督九門步軍統領費揚武自任事以來夙夜勤勞殫心料理緝獲賊盜摻捕奸宄使里巷寧謐輦轂肅清向來効力有年今尤克稱厥職應行議叙以示鼓勵著議奏尋議覆應加一級授為正一品支一品官俸得旨費揚武再加一拖沙喇哈番餘如議○以恭領伯石文炳為山東登州總兵官○予故正白旗三等阿思哈尼哈番滿度祭葬如例

○己亥。

上詣

太皇太后宮問安

五月庚子朔。

上詣

太皇太后宮問安○先是諭兵部一等護衛雅

塗侍讀學士格爾古德來自長沙奏言投誠

偽將軍林興珠向安親王言前岳州舟師再

戰林興珠皆在。今我船甚多宜分其半泊君

山。以斷常德之道。餘船泊香爐峽。扁山。布袋

口諸處。沿九貴山陸路立營。以斷長沙衡州

之道。則岳州賊路阻塞。縱有糧米。而薪芻器

用。必致乏絕。賊可不戰而斃矣。王令以此奏

聞。可即移文詹事宜。昌阿知之。至是宜昌阿

疏言。我兵進湖後。於高家廟。君山。扁山。九貴

山。九馬嘴諸處。聯絡泊舟。以斷賊路。九貴山

復設陸營。使水陸相望。我船相去不遠。縱岳

州賊兵出犯。可以併力攻擊。即長沙衡州。常

德諸賊來援亦可合勢剿禦。賊內外阻絕。勢必窮蹙。如得岳州後。宜進取何地。乞預示機宜。得旨。宜昌阿所奏水陸大兵進攻岳州。貝勒尚善等宜熟計萬全。以期速克。既克之日。即乘虛速取常德。澧州諸處。勿令賊得為備。尚善等前以所在逗留。貽誤大事。今宜殫心竭力。勉圖自効。毋得仍蹈前轍。玩日稽時。○諭兵部。進討福建官兵勞苦日久。今撥每佐領護軍一人。甲兵二人。前往代戍。署副都統岳爾多。已自福建率蒙古兵來京。即令統轄前往。○奉命大將軍和碩康親王傑書疏言。海澄危急。臣已檄駐守廣東潮州將軍賴塔率所部兵之半。及綠旗兵來援。餘兵令副都統倭申巴圖魯統領。同靖南王耿精忠駐守潮州。得旨。海澄被圍日久。勢在危急。將軍賴塔可率兵速往救援。潮州亦屬要地。康親王更檄倭申巴圖魯等嚴加固守。但海逆勢甚猖獗。不可不增發官兵。浙江既有將軍總督

巡撫總兵官。足以固圉。應選綠旗精兵三千。令提督石調聲統之。速往應援。如或稽遲。從重治罪。○海澄公黃芳世病篤。上疏言。臣叔黃梧弟黃芳度。全家殉難。不遺一孤。臣止一男甫及九歲。臣弟總兵官黃芳泰。久歷戎行。備嘗險阻。乞令承襲公爵。尋福建總督郎廷相疏報黃芳世故。

上命贈黃芳世少保。以總兵官黃芳泰襲封海澄公。○壬寅夏至。祭

地於

方澤。遣領侍衛內大臣覺羅塔達行禮。○

仁孝皇后忌辰。遣官致祭。○癸卯。諭兵部。各路出征兵士。有奮勇陣亡者。有不習水土病故者。此屬皆累朝効用。盡瘁殞身。殊可憫惻。今其骸骨相繼而還。念彼兵士。悉皆貧苦。應得卹銀。宜行早給。俾克殯葬。爾部察明。隨到即行奏發。以副朕軫恤士卒至意。○軍前病故固山貝子傅喇塔。觀回京師。遣大臣一員侍

衛十五員往奠茶酒○甲辰。

上詣

太皇太后

皇太后宮問安○都察院左副都御史劉捷疏言連年以來因軍興旁午將大計暫停并停兩年舉劾一次今漸次蕩平又屆二年舉劾之期請嚴飭各該督撫將兩年舉劾之例作速舉行更請凡督撫題補與保舉各官其中或有改行易節者該督撫一體嚴察不得徇容縱疏入下部確議尋吏部議應行令直隸各省速行舉劾其曾經保舉各官亦一體嚴察如有徇縱情弊經科道糾參將督撫等照例處分從之○乙巳。

上至鞏華城行

孝昭皇后百日致祭禮○丙午。

上回宮○征南將軍都統穆占疏報桂東桂陽山中賊首偽總兵張得恩等率領文武偽官九十餘名兵丁八千餘人投誠下部知之○

鄖陽撫治楊茂勲疏報偽鎮郝一經同偽監

軍高維藩率偽文武等官四百七十名賊兵

三千七百餘人投誠下部知之○戊申撫蠻

滅寇將軍廣西巡撫傅弘烈疏報臣同都統

勒貝等統領官兵於四月初十三十五等

日自北流陸川博白進剿累敗賊衆偽總統

饒一龍等各棄城遠遁恢復鬱林州及北流

興業陸川博白等四縣得旨嘉獎下部議叙

○陞吏部郎中鄂懌為甘肅布政使司布政

使○以福建巡撫楊熙年老命原品休致○

已酉。

上詣

太皇太后宮問安○先是。

上諭吏部兵部向以閩省海疆要地雖經恢復

海逆未平民生凋敝撫綏防禦惟在文武大

吏相與殫心料理方與兵民有裨今總督郎

廷相提督段應舉自簡任以來為時已久山

谷之伏莽未靖閭閻之困苦未蘇吏治未見

澄清營伍。漫無整頓。寇警頻聞。地方躡擾。更有甚者。海賊侵犯內地。事前不能預防。事後不能剿禦。皆由該總督提督庸懦無才。職業不修所致。殊負簡任之意。豈可仍令在任。貽誤封疆。大將軍康親王。叅贊大臣等。共會同嚴加確議具奏。至是。康親王傑書等奏。郎廷相等。應嚴加處分。

上諭。郎廷相。段應舉。俱著解任。江寧提督楊捷。謀勇兼優。著以原銜加少保。兼太子太保。調補福建全省水陸提督總兵官。一切剿禦賊寇。保固地方。戰守機宜。全資殫心籌畫。展布壯猷。以副朕簡擢倚任至意。○庚戌。

天壇皇穹宇兩廡拜臺修葺興工。遣工部尚書朱之弼告祭。○陞鑲藍旗前鋒叅領馬錫泰為蒙古副都統。○撫蠻滅寇將軍廣西巡撫傅弘烈疏報。偽總兵梁子玉。賴天錫。聞大兵已到鬱林。把守白米嶺峒。恃險負隅。我兵進剿。於四月十六日黎明。占踞逆營。斬偽總兵

梁子玉。生擒其兄弟二人。斬賊兵五百二十餘級。生擒二十一名。賴天錫拔營遁走。下部議叙。○署副都統岳爾多。率出征福建蒙古兵還京。

上諭兵部。理藩院。喀喇沁。土默特。台吉。山太。台吉。察渾。塔布囊。何濟吉爾等。前往浙江。聽康親王調度。各統所屬官兵。征剿逆賊。後深入閩省。同大兵平定地方。行間効力。身先士卒。衝鋒陷陣。奮勇用命。深為可嘉。宜降恩綸。即行議叙。以勵後效。爾部院會同速行議叙具奏。○以翰林院侍讀學士葉方藹。充經筵講官。○辛亥。

上詣

太皇太后宮。問安。○和碩額駙花善所尚郡主卒。遣大臣二員。侍衛十員。往奠茶酒。○壬子。遣官祭

闕聖帝君。○諭刑部。刑獄重地。人命攸關。天氣炎熱。亟宜清理。雖熱審定例。每歲舉行。但

已結大案。見在監禁者。其中各犯。或無知而罹法網。小過而陷重辟。株連無辜。淹禁日久。朕每思及。深為惻然。茲特遣索額圖。勒德洪。杜立德。屯泰等。會同三法司。逐一詳加審理。凡有罪可矜疑者。即與察明。事由開列具奏。務使情法允協。有枉必伸。以副朕欽恤刑獄至意。○陞陝西甘肅提標中軍副將劉選勝。為江南京口左路水師總兵官。○癸丑。擢福建布政使姚啟聖。為福建總督。擢福建按察使吳興祚。為福建巡撫。○以故三等精奇尼哈番奇塔特子費揚午襲職。○甲寅。

上幸西郊觀禾。顧大學士明珠等曰。朕觀古來帝王。如唐虞之都兪吁咈唐太宗之聽言納諫。君臣上下。如家人父子。情誼浹洽。故能陳善閉邪。各盡所懷。登於至治。明朝末世。君臣隔越。以致四方疾苦。生民利弊。無由上聞。我

太祖

太宗

世祖相傳以來。上下一心。滿漢文武。皆為一體。情誼常令周通。隱微無有間隔。一遊一豫。體恤民情。創作艱難。立萬世不易之法。朕雖涼德。上慕前王之盛事。凜遵

祖宗之家法。思與天下賢才。共圖治理。常以家人父子之誼。相待臣僚。罔不兢業。以前代為明鑒也。大學士明珠等奏曰。

皇上所行。事事上追聖帝。仰法

祖宗。宵旰勤政。日御宮門。親理萬幾。與大臣講

論治道。民情隱微。洞悉

聖衷。臣等濫叨隆遇。或掌機密。或侍左右。日見皇上留心政治。遊幸之際。未嘗不以天下為念。臣等雖驚劣不堪。敢不勉思往代良臣。以盡愚盡。仰副

聖明孜孜求治之心。○是日。駐蹕碧雲寺。○乙卯。

上駐蹕石景山。○丁巳。

上駐蹕南苑。○以平南王尚之信下原任副都

統寧天祚為廣東中鎮總兵官。原任左翼總兵官班際盛補左翼總兵官。原任中鎮總兵官時應運為右翼總兵官。○戊午。

上御南苑前殿講官進講。

上以講章內言敬者德之聚。因諭曰。誠敬一理。敬又為誠之本。○議政王大臣等會議。江南省原止提督一員統轄。因江西饒州等處地方變亂。以安慶與江西接壤。特添設提督一員。令江西底定。安慶徽州已屬內地。江南提督楊捷員缺。停其推補。應將安慶提督王永譽調為江南提督。統轄全省。移駐松江。從之。○己未。喀爾喀扎薩克圖汗遣使進九白年貢。宴賚如例。○庚申。免江西萬安等三縣康熙十六年分水災額賦。○辛酉。

上自南苑回宮。詣

太皇太后

皇太后宮問安。○朝鮮國王李焞以

孝昭皇后喪遣使進香。○浙江總督李之芳疏

報。偽都督李日生等盤踞玉山縣屬八仙洞老巢。臣標叅將蔣懋勛等會江西官兵深入夾剿。於四月十六日。連破三關。攻克八仙洞。十七日。連破四關。攻克老鼠洞。共斬賊兵三千餘級。陣斬偽遊擊都司等員。焚燬賊巢。下部議叙。○癸亥。

上詣

太皇太后

皇太后宮問安。○給齋詔廣東殉難內閣侍讀

正白旗孟色。拜他喇布勒哈番。予祭葬。筆帖式鄂裏善。拖沙喇哈番。予卹銀。○甲子。予故原任大同總兵官彭有德祭葬如例。○陞鑲白旗護軍叅領莽奕祿為蒙古副都統。○先是。厄魯特濟農遣人至靖逆將軍甘肅提督侯張勇所言。我祖顧實汗以來。職貢不絕。今為噶爾丹所敗。窮迫來此。欲赴西海往會我叔達賴台吉。兄墨爾根台吉。若由邊外遠去。則行月餘。中途數日乏水。如由內地行。則

限於

主上邊境不敢徑度。祈准由內地過邊。張勇以由水泉出邊。竟日可到墨爾根台吉處。五日可到達賴台吉處。奏請令其由水泉過邊。

上允之。乃濟農逗留月餘。復北向游牧。未由水泉過邊。至是濟農以布隆吉爾地方見有火光。探聞噶爾丹追迫已近。竟由雙井闌入內地。提督孫思克奏請率兵逐之。得旨將軍張勇。見赴甘州。即著親身驗看。驅逐濟農部落。過邊赴伊叔兄處所。加意防護。勿使擾民。尋將軍張勇疏報。驅逐濟農等出邊。○乙丑月

祭

孝昭皇后○以原任工部左侍郎梁鏞為總督倉場戶部左侍郎。管右侍郎事。○遣官祭額駙花善所尚郡主。○予故鑲黃旗三等精奇尼哈番張應庚祭葬如例。○平南王尚之信疏報。臣同副都統額赫納等。親統滿漢大兵。自肇慶啟行。於四月十一日抵電白。逆賊祖

澤清盡選精銳據守。外設五營。臣等分兵攻擊。連破賊營。斬賊首偽總兵江瑱等。并賊黨四千餘級。追殺二十餘里。城中賊黨閉門堅守。臣分兵合圍。一面招撫。十七日夜城內原任雷協都司王得功等率衆投誠。臣料此一戰已足寒祖逆之膽。因星馳一百八十餘里。即抵高州。而祖逆已挈家屬遁去。十九日恢復高州。得旨嘉獎。下部議叙。○丙寅。予故鑲黃旗二等阿思哈尼哈番卓布太祭葬。諡武襄。○山東提督柯永蓐以擾害兵民革職。提督事務命巡撫趙祥星署理。○戊辰。予故江南京口左路水師總兵官左都督武榮祭葬如例。○予吉安陣亡千總侯朝。卹銀一百五十兩。廕一子。以衛千總用。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十三

實錄卷之七十三

三十七

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午六月庚午朔諭議政王大

實錄卷之七十四

一

臣等康親王傑書用兵甚為選悞。自至浙江。
安居無事之地。及屢降嚴旨督趨。始破衢州。
之賊。進定福建。福建既平。不事預防固守。俾
海賊登岸。遂困海澄。我國家軍法嚴明。無敢
輕忽。浙江福建失機。將士傑書未嘗察取供
詞糾劾。有負委任。其會議以聞。尋議政王大
臣等議奏。傑書罷庸怠。忽軍紀。宜并叅贊大
臣。嚴行處分。但見在出征破賊。俟師旋。察議
海澄被困之處。應令盡力救援。從之。○諭議

政王大臣等。福建所有之兵。汛守沿海。訖於潮州。勢分力弱。而解海澄之急。又屬最要。項平南王尚之信。已擊敗高州逆賊。令其速還會城。即率官兵。馳赴潮州鎮守。其在潮州滿兵。及靖南王并其所屬官兵。令赴將軍賴塔喇哈達所。併力剿賊。以援海澄。如尚之信不能親行。則速遣官兵至潮。同總兵官馬三奇防守。○授奉國將軍蘇爾特之子納爾台為奉恩將軍。○陞湖廣湖北按察使高翼辰為福建布政使司布政使。湖廣下江防道于成龍。為福建按察使司按察使。○辛未。福建總督郎廷相疏報。閏三月十六日。山賊蔡寬擁衆萬餘。突犯安溪。知縣李鈺。同駐防千總王國棟等。率兵役丁壯士庶。親身督戰。殺傷賊衆無算。賊遁去。仍在山立木城據守。署泉州城守營叅將甯維國。署提標後營遊擊王昶等。各帶滿漢官兵。及該道府廳調發鄉壯民兵。并在籍侍讀學士李光地募發丁壯。令弟

姪等統領。併力進剿。殺敗賊衆。燒燬賊營。保全縣城。又興化鎮標遊擊劉應祥。亦攻開倉嶺。賊敗逃竄。下部議叙。○壬申。以故三等阿思哈尼哈番滿度子額參襲職。○癸酉。諭戶部。浙江江山。西安等十九縣。溫衢各衛所。逼近閩中。首先被陷。百姓困苦。其康熙十六年錢糧。槩從蠲免。并令該督撫多方招徠。避賊黎庶。各還故土。俾事耕墾。○甲戌。

上御太和殿視朝。文武陞轉各官謝恩。○予故固山貝子傅喇塔祭葬。諡惠獻。○征南將軍都統穆占疏報。副都統托岱漢軍副都統祖澤淳等。率領官兵。自桂陽州起行。於四月二十八日。至藍山縣。大敗偽副將王臣等於梁路堡陣。斬偽副將于成民。并賊兵三百餘級。餘賊敗遁。下部議叙。○穆占又報。萬巖山內賊首偽總兵何興等六員。副將等三百餘員。兵丁二萬餘名。俱各投誠。下部知之。○乙亥。上詣

太皇太后

皇太后宮問安○調直隸真定總兵官何傳。為山東登州總兵官。山東登州總兵官石文炳。為直隸真定總兵官○廣東廣西總督金光祖疏報惠州甲子港賊船出沒。總兵官苗之秀親督官兵於五月二十六日與賊戰三晝夜。沉賊船一百餘隻。陣斬及淹沒者二千餘人。生擒二十餘人。獲偽劄船隻器械甚多。又海賊臭紅肉等。於五月初三夜率領賊艇突犯潮州團山等處。總兵官馬三奇。李蘭大護喇等分路堵剿。斬賊七百餘級。餘賊敗遁。下部議叙○丁丑。撫遠大將軍都統大學士公圖海疏報慶陽地方有賊首袁本秀受吳逆偽劄。糾合兇徒盤踞山林。一月之間聚集千餘人。窺隙作亂。隨發慶陽宜君延安三營官兵。并移咨奮威將軍王進寶派撥標兵協力合剿。四月二十二日追至衛遠溝地方斬偽總兵袁本秀及偽副將參將等并賊二百餘

級。餘賊潰敗。下部議叙○己卯。先是撫蠻滅寇將軍廣西巡撫傅弘烈欲進兵南寧。以向田州泗城。至是將軍莽依圖請竟入南寧非策。宜令將軍額楚取平樂桂林。傅弘烈取南寧兩路齊舉。

上諭將軍莽依圖等。向因規定廣西。調遣滿漢官兵甚多。今進征田州泗城。若俟他路諸軍齊集。必稽時日。若孤軍獨進。恐難有濟。平粵事宜所係甚重。將軍莽依圖額楚傅弘烈及叅贊諸臣與總督金光祖等。俟克復潯州。俱赴梧州面議。何路進兵。先取何地。務期和衷為國。勿各圖自便○予故山東沂州總兵官李克德。祭葬如例○贈湖廣陣亡守備周士英。都司僉書。予祭葬。廕一子。以守備用○辛巳。予故鑲紅旗漢軍副都統柯彝。祭葬如例○給浙江陣亡撫標遊擊門可貴。三等阿達哈哈番。陝西陣亡固原遊擊李成梅。王宮。拖沙喇哈番。各祭葬如例○多羅額駙畢喇錫

所尚郡君故遣大臣二員侍衛十員往奠茶酒○壬午。

上詣

太皇太后

皇太后宮問安○諭禮部朕惟天人感召理有固然人事失於下則天變應於上捷如影響豈曰罔稽今時值盛夏天氣亢暘雨澤維艱炎暑特甚禾苗垂槁農事堪憂朕用是夙夜靡寧力圖修省躬親齋戒虔禱甘霖務期精

誠上達感格天心爾部即察例擇期以聞○

癸未。陞鑲黃旗護軍叅領寶柱為蒙古副都統○甲申。征南將軍都統穆占疏言偽將軍胡國柱致書於柳宜叅將陳武亨不敢發函羈執賊使自首訊知桂東桂陽降將于賢何興所賊亦致書恐彼等為賊所煽惑得旨將軍穆占所守地方遼濶而永興見被賊侵倘桂東桂陽降將于賢輩復為賊所煽惑則疆圉深屬可虞宜章地處最要若駐兵防守其

間西可以固臨武藍山嘉禾而東至桂東桂陽降人不致搖動宜令平南王尚之信速調鎮守韶州綠旗官兵馳赴宜章固守叅將陳武亨出首逆書忠誠可嘉該部議叙以聞○

丁亥。

上躬詣

天壇祈雨自西天門步行至

壇行禮時甘霖大沛禮畢仍步出西天門乘馬

回宮○先是揚威大將軍和碩簡親王喇布

疏言茶陵攸縣安仁諸處實為江西咽喉且

與賊密邇將軍穆占謂前所遣援兵尚少更

須增發臣思茶陵攸縣安仁諸處兵力甚單

若再遣發如逆賊分路出犯則大兵之路被

賊阻塞而江西亦甚可虞且永興介在茶陵

安仁郴州桂陽之間急宜擊却永興之賊不

當撤兵還郴州請敕穆占先剿滅此賊至是

穆占疏言自寇侵永興臣遣駐防郴州諸處

護軍統領哈克山喇賽前鋒統領碩岱等領

滿洲蒙古漢軍綠旗兵陸續往援。並無撤兵還郴之事。如果撤兵。則署副都統雅秦所豈無臣印信文書。此皆妄奏耳。且簡親王疏云。請敕臣先滅永興之賊。是簡親王知臣不為皇上盡心而請耶。抑知臣之盡心。故不樂而為此奏耶。臣所在剿賊。恢復疆土。

皇上洞鑒。但郴州甚要。臣未便輕離。若遣一良將。來守郴州諸處。俾臣率兵討永興之寇。或進取耒陽。必能成功。得旨。將軍穆占既言郴

州甚要。必難輕離。穆占可駐守郴州。酌調官兵撲剿逆賊。穆占既未撤兵還郴。署副都統雅秦。前何所據。竟以撤兵啟報。大將軍簡親王。簡親王何以竟不詳察。即行具奏。其令簡親王明白回奏。又諭兵部。將軍穆占大將軍簡親王。總統師旅。受將帥之任。宜求濟大事。彼此和衷。若爾各懷嫌隙。恐悞疆場。嗣令務相輯睦。爾部即行傳諭。○海澄總兵官黃藍疏報。五月初五日夜半。海賊四路攻海澄。官

兵力戰。衆寡不敵。致城外木柵礮臺俱陷。賊復從高阜瞰城中。火攻不絕。臣以勢迫。請援於將軍總督。恐援兵稍遲。則海澄難保。得旨。總兵官黃藍。死守孤城。忠貞懋著。大將軍康親王。其速檄將軍賴塔喇哈達等。赴援海澄。密遺書副都統伯穆赫林。總兵官黃藍等。如有隙可乘。即率滿漢官兵棄城突出。來會漳州大軍。○征南將軍都統穆占疏言。郴州等九州縣。幅員遼濶。設有賊出犯。無兵可遣。因檄駐守廣東南雄將軍舒恕。分兵馳赴郴州。今逆賊逼永興。宜調江西提督趙賴。往守攸縣。昇和碩額駙華善將軍印。即率署前鋒統領薩克察巴圖魯滿兵。總兵官趙應奎標兵。由安仁進發。斷耒陽賊後路。毀其浮橋。如不可毀。則遣赴永興。與副都統雅秦雅哈喇額思赫等。協同固守。臣盡撤所部還郴州。整兵前取耒陽。則逆賊自潰。得旨。特授穆占為將軍。統率大兵。由秦入楚。自荊州起行以來。凡

兵將或攜或留及調遣守禦事宜無不如奏允行。即今破賊收疆亦皆穆占是賴。此等調度俱如所請行。○安遠靖寇大將軍多羅貝勒尚善疏言。臣等公同會議將烏船沙船分撥。令大軍進湖。隨據討逆將軍鄂內等。湖廣總督蔡毓榮等。報稱六月初三日黎明。逆賊見我兵船泊柳林嘴。君山二處乘風齊來。即令各路兵船分道迎擊。砲沉賊船擒斬偽官兵丁。獲烏船偽割器械等。又水師營總兵官萬正色標下守備陳勞等。在君山看守火藥船。見賊船與我兵對敵。即率看守火藥官兵迎殺。賊復奔岸。隨即追擊。斬偽副將遊擊及賊兵千餘人。生擒偽守備千總暨賊二百餘人。下部議叙。○戊子。

上詣

太皇太后

皇太后宮問安。○陞江南分巡淮揚道佟康年為湖北按察使。司按察使。○己丑。揚威大將

軍和碩簡親王喇布疏言。賊逼永興。茶陵。攸縣諸處防兵已經調援。守禦力弱。請濟師。

上諭議政王大臣等。簡親王喇布自抵江西。未能剿除逆賊。克復疆土。而於失機將士。復不嚴責軍狀。及遣守茶陵。攸縣諸處已收復地方。又不能鎮防。屢以力單。奏請益兵。凡所題奏。率過其實。此皆喇布庸劣。不能効力之故。俟事平旋師之日。嚴加議處。大將軍安親王兵。見駐長沙。無論護軍甲兵。每佐領選一二。人。遣赴簡親王軍前。且大軍既鎮守茶陵。攸縣。安仁諸處。則吉安已為內地。吉安署副都統尼滿等之兵。亦聽簡親王隨宜調用。尋復諭兵部。長沙。茶陵。郴州地勢及逆賊情形。久未知悉。大將軍安親王。將軍穆占。大將軍簡親王。各遣熟識情形。具詣始末。奏事傳旨。不致遺悞者一人。馳驛赴京。安親王仍遣護衛雅塗偕來。○庚寅。以吏部郎中項一經為浙江鄉試正考官。內閣中書李鴻藻為副考官。

禮科給事中姚締虞為江西鄉試正考官。內閣中書朱射斗為副考官。吏部員外郎王雅為湖廣鄉試正考官。內閣中書侯璋為副考官。○江西巡撫佟國禎疏報。與國縣知縣黃惟桂等。招撫浪川洞偽總兵邱興佑等五員。兵七千一百人。經公等寨偽鎮軍夫人楊氏。偽總兵曾靈等六十七員。兵六千三百餘人。寶石寨偽監軍道黃捷先等八員。下部議叙。○辛卯。予故太子太保海澄公贈少保黃芳世祭葬。諡忠襄。○予福建陣亡鑲藍旗佐領覺羅薩克素祭葬如例。○兵部議覆撫蠻滅寇將軍廣西巡撫傅弘烈疏言。臣家子女僮僕共一百四十四口。標下官兵老幼約計一千八百餘口。悉陷桂林。應令大將軍安親王等。恢復湖南桂林之時。將傅弘烈家口并標下官兵家口查明收留給還。從之。○壬辰。上詣太皇太后宮問安。○揚威大將軍和碩簡親王

喇布疏報。吳逆以大隊侵永興。犯我河外營。都統伯宜理布。前鋒統領碩岱。護軍統領哈克山等禦之。失利。宜理布。哈克山。戰歿。賊遂據我河外營。環攻永興。臣移文安親王。令發每佐領兵二三人來援。安親王遣夸蘭大塔爾拜畢力克。率醴陵守兵每佐領一人有半馳援。

上諭兵部覽大將軍簡親王等奏逆賊以大隊犯永興。有必死之形。由我軍每佐領一二人。或數百人。所在遣防。兵勢太分。以致失利。將軍穆占。大將軍簡親王。其速收可緩之地。所有防兵。還之要害。會合羣力。大創永興賊兵。務期翦滅。凡摧寇破賊。必審量已力。可擊則擊之。如賊衆我寡。即宜調集諸路。合為一軍。壯其聲勢。以圖攻剿。倘株守新復城池。以已經駐鎮。憚於旋師。遲留疑畏。於大事殊無所濟。爾部明白。移文速傳。示穆占。簡親王。知之。○平南王尚之信疏報。賊首張荒。偽總兵謝

琅等及海賊杜起龍環攻廉州。署總兵官班紹明、宋思徵分領馬步官兵擊敗之。解廉州圍。下部議叙。○癸巳。贈廣東陣亡署都司僉書朱鴻祚為遊擊。予祭葬。廕一子。以守備用。○甲午。

上詣

太皇太后宮問安。○諭議政王大臣等。賊併力犯永興諸處。江西不無可虞。頃據報副都統雅塔理提督石調聲、總督李之芳等部兵陸續抵福建。見在兵數已不為少。署副都統岳爾多不必赴福建。即率所部兵趨江西吉安。至於陝西滿漢官兵甚衆。將軍阿密達同大將軍公圖海自外藩蒙古外。餘滿洲蒙古漢軍。無論護軍甲古合每佐領調四人。量選大臣官員。阿密達率往南昌。仍佩將軍印。其原從護軍四十人并聽隨往。總漕帥顏保率其標兵亦往南昌。漕運事務令總河靳輔攝理。○楊威大將軍和碩簡親王喇布疏言。前鋒

統領薩克察巴圖魯於本月十三日自安仁率師前赴永興。賊於是夕渡河環據故營。揆賊奸計虛作聲勢。用偏師立營。而以大隊潛赴郴州。又臣等前得米百石。已令運赴永興。以道路阻塞。復行撤退。得旨。逆賊如果併力郴州永興。前鋒統領薩克察巴圖魯護軍統領喇賽等共議酌量留兵守城。統率餘卒間道馳救。簡親王量所得糧米撥遣官兵相續轉運。速達永興。○乙未。月祭。

孝昭皇后。○以故三等阿思哈尼哈番許天寵子許廷臣襲職。○免江南徐州沛縣等四州縣本年分水災額賦有差。○征南將軍穆占疏報前鋒統領碩岱副都統託岱宜思孝等營壘被衝。河之南岸失陷於賊。退至郴州。而碩岱已赴永興。俟嚴取護軍統領喇賽口供。另行奏聞。碩岱等即宜拘禁。但臣軍既已深入。郴州兵力甚單。而碩岱復遠在永興。是以未行連繫。統候裁奪。目今賊之大隊及有名

偽將皆併力郴州。請就近速發滿漢官兵守藍山。嘉禾。桂陽。永寧諸處。得旨。今逆賊既併力郴州。將軍穆占。可盡撤閒地防兵。擊敗犯郴州賊寇。保固廣東。江西。勿致疎虞。并令大將軍安親王。速遣兵赴大將軍簡親王軍。至日。簡親王等。大振軍威。剿除郴州永興之賊。更令廣東韶州總兵官尚之璘。遣副將一員。率樂昌綠旗兵二千。速赴郴州。聽穆占隨宜調遣。授和碩額駙華善將軍印。馳至永興。總統鎮守。以署副都統多諾。恭贊軍務。至於碩岱等失利。即宜速繫。嚴加處分。但因穆占調大臣官兵。所在分防。致兵力單薄。遂爾失機。其誤事之罪。穆占及碩岱。俱不可辭。碩岱等各暫留原任。立功贖罪。復諭穆占曰。爾勿因永興兩次失利。遂不計大事有裨與否。冒昧妄動。亟宜鼓舞人心。振揚軍威。以圖克濟。俾能併力破寇。前罪自當渙釋。○先是。諭兵部海澄官兵所關甚重。非尋常比。急宜奮力救援。

其檄趣大將軍康親王。將軍賴塔。喇哈達等。內外夾攻。務期拔出城內官兵。既而報至。大兵四路攻進。賊以火器拒戰。我師退。賊又用礮。逼攻海澄。

上諭康親王。傑書等。頃聞海澄援師退。朕心甚為被困官兵憂之。此非尋常事宜。奮力急為救出。切勿遲疑畏難。滿漢官軍。聞散。及廝役。有能倡率衝敵。直過潮溝。抵於海澄。救出被困官兵者。准克復上等府城例。從優議叙。給以官職。將軍以下將士。即從前屢有失利。退縮之罪。俱從寬宥。不必顧戀城池。但使被困官兵得出。即為克奏膚功也。大將軍康親王。將軍賴塔。喇哈達。總督姚啟聖。提督石調聲等。槩行曉諭。滿漢官兵。期慰朕懷。○丙申。諭兵部。將軍穆占。大將軍簡親王。克復永興。茶陵等九州縣之地。我兵立營。及賊壘所在。令詳悉繪圖具奏。岳州水陸駐兵形勢。并賊所立營。亦令詹事宜。昌阿。詳悉繪圖具奏。

三等阿思哈尼哈番沙躋年老乞休。以其孫雅涂襲替。○以吏部郎中鄭重為陝西鄉試正考官。刑部主事俞陳琛為副考官。太僕寺卿熊一瀟為江南鄉試正考官。刑科給事中李邇為副考官。○丁酉。

上詣

太皇太后

皇太后宮問安。○諭兵部。朕御極以來。孜孜圖治。欲使天下治安。兵民富庶。共享雍熙。不意

逆賊吳三桂背恩反叛。擾亂地方。數年以來。遣兵征討。尚未授首。以致出征將士。披堅執銳。盛夏祁寒。備極勞苦。且興師日久。滿洲蒙古漢軍。或器械朽壞。或有馬匹倒斃。借貸置辦者。或年幼未經分給田畝。軍資器用。悉稱貸置。辦種種疾苦。朕深為憫惻。但逆賊未滅。不得已而用兵。諸路官軍。其奮勇剿除底定疆土。凱旋之日。一切稱貸。俱令該部代償。諸處調集之兵。遣還汛地。咸令得所。朕詔諭昭

如日月。將示大信於天下。斷不食言。至於從征官兵戰陣被創。尤堪軫恤。勿俟大兵到齊。所有應得銀兩。速察給其家。爾部即傳示內外。俾喻朕恤兵酬勞至意。○以故三等精奇尼哈番張應庚親兄之孫張華圖襲職。○戊戌。揚威大將軍和碩簡親王喇布疏言。署副都統尼滿啟臣言。萬安泰和諸處。逆賊不時出沒。吉安最為要地。而防兵甚少。臣觀吉安泰和諸處。正當廣東贛州水陸之衝。請調可緩地方綠旗官兵赴吉安協守。得旨。項已調將軍阿密達。總漕帥顏保率兵前赴江西。今簡親王既請遣發綠旗官兵。宜令總督董衛國酌量撥遣。馳赴吉安。與署副都統尼滿等協力固守。至於江西綠旗官兵。屢經調赴湖南。見在兵力亦屬單弱。董衛國可募有資力精銳兵五千人。以備調遣。○予故都督僉事金衢援剿總兵官李榮祭葬如例。○贈故廣東提督王可厚為左都督。予祭葬。諡襄敏。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十四

實錄卷之七十四

二

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午秋七月己亥朔享

實錄卷七十五

一

太廟

上親詣行禮○安塘筆帖式報海賊攻陷海澄

長泰二縣署前鋒統領希佛陣亡副都統穆

赫林提督段應舉俱自縊

上諭海澄長泰既陷賊必猖獗閩省大兵無幾

宜就近調發以資剿禦將軍華善所留江南

京口漢軍兵四百令及京口將軍王之鼎所

屬漢軍兵六百令副都統馬思文率各馳

赴福建聽大將軍康親王調遣京口地方亦

關重要。宜發京師漢軍兵一千。令副都統關保率往協守。至日。聽將軍王之鼎統轄。又諭康親王傑書等。官兵失援海澄。恐因之自沮。將軍大臣當時加鼓勵。果能滅賊恢復疆。則前罪自釋。仍與議叙。其通行曉諭。尋奉命大將軍和碩康親王傑書疏言。海澄糧盡。六月初十日。官兵委城突出。海澄遂陷。將軍賴塔喇哈達等。所統官兵甚衆。卒不能解海澄之圍。致虧損將士。宜即從重擬罪。但見在禦賊。俟軍務稍暇。另行察議。臣既身任調遣之責。罪亦難逭。得旨。海澄何以不能救援。其令將軍賴塔等。明白具奏。康親王俟事平。日察議。至於海澄突出官兵。久被圍困。勞瘁已甚。該督撫其支取正項錢糧。辦馬匹鎧仗給之。○揚威大將軍和碩簡親王喇布疏言。逆賊吳三桂。選偽將軍著名者。逼犯永興。而身踞衡州。窺伺間隙。臣所部守兵單弱。不便分遣。提督趙賴。雖令來守攸縣。尚未即至。請速發綠旗

兵二三千。為戰守備。得旨。項以吉安逼近茶陵諸處。已遣發將士往守。大將軍安親王。又分兵遣赴茶陵。簡親王宜固守茶陵。授和碩額駙華善將軍印。馳赴永興。統兵鎮守。俟穆占進兵之日。簡親王宜速發遊擊馬昇兵一千。礮二十五具前往。毋致有誤。○先是。前鋒統領薩克察巴圖魯。請援兵擊退永興之賊。將軍穆占謂永興軍事。已付大將軍簡親王。凡事宜請於王。簡親王喇布以聞。得旨。防守江西全省。及湖南茶陵永興諸處。凡有敕旨。皆署穆占名於前。簡親王名於後。蓋倚穆占實甚。初未分別汛守也。今穆占因永興兩次失利。輒思巧脫。檄稱永興為簡親王之地。於往者屢次詔旨。殊屬違戾。穆占簡親王。自今以往。毋得互分彼此。所有閒地汛兵。悉行撤回。無論郴州永興。遇逆賊來犯。即大振兵力。以期盪滅。○庚子。諭宗人府貝子傅喇塔。係宗室懿親。為國宣力。躬履行間。剿禦賊寇。撫

綏兵民。平定地方。勲猷茂著。積勞薨逝。深為可憫。理應優卹。以示朕酬庸之意。不拘定例。著封其子傳善。仍為固山貝子。次子福存。為鎮國公。○諭奉命大將軍和碩康親王傑書。近聞海澄被陷。大臣提督。俱各自盡。殊為憫惻。前以初至兵力。即當削平山海諸寇。因爾等輕視賊衆。止知休養士卒。有失遠謀。以至於此。今勢不可緩。緩則賊可據守地方。積蓄糧草。固其濠壘。所關非細。或有匪類。乘此蠢動。亦未可定。王其悉心籌度。謀出萬全。速滅賊氛。慰朕懸切。行間諸事。王應統為陳奏。特此密諭。○諭征南將軍都統穆占。爾等近來行兵。致有大臣陣亡。聞之不勝傷悼。兼之兩將軍被此推諉。以非己汛為辭。恐於事機。有誤。深為憂之。爾等爭執。雖屬細事。但爾前此欲將簡親王兵。與爾相繼前進。止留將軍額駙華善。副都統希福鎮守。陳請前來。朕未之允。蓋以江西地方。所關甚鉅。且無接續之兵。

此將軍等所悉知。兩將軍商榷萬舍務。令江西不生事變。屢有諭旨。何至尚厯朕懷。今簡親王留鎮在彼。尚有此事。爾復藉口。非已汛地。倘如所請。遣簡親王繼爾進兵。今此賊衆。又將何兵禦之。滿兵之勢。貴聚。聚則處處攻戰。始克有濟。若無用空城。使滿兵分駐。以寡力而遇賊。輕戰。有志氣者。盡歿行陣。無賴之徒。俱行敗北。如此。則實為可惜。滿兵關係。極為重大。利戰則戰。利守則守。宜合全力。以破賊衆。若徒分守恢復之空城。似乎不可。今福建廣東情形。亦不甚妥。爾等益當同心協意。保固地方。特此密諭。○辛丑。遣官致祭額駙畢喇錫所尚郡君。○撫蠻滅寇將軍廣西巡撫傅弘烈疏言。吳逆調各路賊兵數萬渡河。與我兵對壘。六月初十日。我兵失利。退守鬱林。屢請援師。竟無應者。今惟望臣舊標惠潮兵至。合力齊舉。庶可成功。得旨。鬱林關係最重。將軍莽依圖。額楚。總督金光祖。速遣官兵。

馳往應援。倘賊勢盛。我兵難以拒守。將軍傳弘烈。都統勒貝等。應退至要害之地。會同莽依圖等。協力守禦。都統馬九玉。行已兩月。逗留不進。不合。宜檄令速赴梧州。平南王尚之信。總督金光祖。速備夫船。以濟傳弘烈舊標惠潮官兵。無悞前進。○癸卯。以故二等阿思哈尼哈番趙布泰子增壽襲職。○甲辰。

上詣

太皇太后宮問安。○諭議政王大臣等。據福建所報海賊劉國軒等。攻取同安。水陸犯泉州。前大將軍簡親王奏。永興諸處賊勢稍退。已敕將軍穆占。撤閒地之兵。鎮防險要。而大將軍安親王所遣援師。已抵攸縣。岳州大兵。復水陸齊舉。賊欲深入。能不懼歸。路阻絕耶。向以永興警急。江右可虞。因令署副都統岳爾多率師赴江西。今閩中事迫。岳爾多仍率師赴福建。并移文江浙督撫將軍等。速各撥馬千匹。給岳爾多兵。俾兼程馳往。副都統馬思

文。自京率往漢軍兵四百名。亦與岳爾多同行。移文大將軍康親王。備夫船於浦城。迎取大兵。勿致有悞。將軍王之鼎標兵六百名。不必率往福建。可仍留京口。見今所發漢軍兵一千。令副都統關保率赴江西南昌。俟陝西所遣兵至江西。視何處當用。即協力從事。并移會將軍穆占。大將軍簡親王知悉。○諭兵部。福建海逆猖獗。事勢急迫。因令前赴江西署副都統岳爾多。仍率兵赴福建。江西關係重大。其傳示將軍穆占。大將軍簡親王等。今前進擊賊。尚非至急。惟擊退侵犯永興諸處逆賊。俾不能進。薄江西福建。乃為最要。穆占等其同心詳酌。力禦賊寇。保固江西。使萬無一虞。以副朕懷。○丁未。

上詣

太皇太后宮問安。○戊申。以都察院左都御史宋德宜為刑部尚書。○安遠靖寇大將軍多羅貝勒尚善疏言。我兵既水陸攻岳。請敕順

承郡王。量留鎮兵於彝陵。荆州諸處速撥。每佐領兵各五名。綠旗兵五千名。馳赴岳州軍前。得旨。擊破逆賊。規定湖南。在此一舉。今逆賊大勢。偏注於廣西鬱林。湖廣郴州永興諸處。順承郡王等。其勿以彼此異視。務裨國事。酌量留兵以守荆州彝陵諸處。餘兵悉發岳州。○議政王大臣等議。覆奉命大將軍和碩康親王傑書密奏。討逆將軍劉進忠。總兵官劉炎。見在臣軍。但伊等獲罪殊重。深自疑懼。今值調兵前進。而山海醜類蜂起。恐伊等中懷叵測。殆不可定。請旨定奪。查將軍劉進忠。總兵官劉炎。久歷海疆。於逆賊情偽。地方形勢。在所熟悉。應移文大將軍康親王。令彼等馳驛來京。臣等詳詢明白。再議具題。從之。○庚戌。

上詣

太皇太后

皇太后宮問安。○予福建陣亡一等阿達哈哈

番克席圖。祭葬如例。○辛亥。諭吏部。庶吉士張榕端等。教習已久。今加考試。應分別授職。除彭定求。胡會恩。翁叔元。已授修撰。編修外。清書庶吉士張榕端。李濤。王化鶴。高裔。馮雲。驥。李應鷹。沈涵。沈三曾。楊瑄。王瑞。沈旭。彭會湛。李振裕。楊作楨。鄭際泰。費之遠。漢書庶吉士熊賜瓚。閔世繩。陳錫嘏。俱著授為翰林院編修。檢討。許承宣。以科道用。李雲龍。高瑄。卞永寧。徐必遵。俱著以部員用。爾部即遵諭行。○予故鑒儀衛鑒儀使散秩大臣達達海祭葬如例。○壬子。予湖廣陣亡三等阿達哈哈。番威赫。祭葬如例。○癸丑。中元節。遣官祭

永陵。

福陵。

昭陵。

孝陵。

仁孝皇后。

孝昭皇后。○甲寅。以奉天將軍倭內。於察哈爾

叛時不能辦理軍務者解任。陞寧古塔副都統安珠護為奉天將軍。○贈江西陣亡外委遊擊趙燦為叅將。予祭葬。廕一子。以衛千總用。○乙卯。工部議覆河道總督靳輔疏言。臣前疏高家堰石工。高有七尺。其土隄應加高三尺。今石工再加三尺。與土隄平。然後另加土隄三尺。再高家堰高良澗一帶。因水沒隄根。隄身單薄。必須加築戢隄一道。方為萬全。應如所請。從之。○丙辰。陞正黃旗署副都統一等侍衛吳丹為護軍統領。○以吏部員外郎王九鼎為河南鄉試正考官。戶部主事方元啟為副考官。○工部議覆河道總督靳輔疏言。臣前疏黃河兩岸。將挑河之土。分築遙縷格隄。今勘有舊遙隄貼近河身。擬以舊隄為縷隄。於舊隄之外。另築遙隄。又前疏挑土築隄。須十夫工程者。今因逐層夯杵。非易擬用夫十五六名。又前疏用驢運土。今因各夫不諳喂養。議用車運。又前疏離三十丈之內。

不許取土。今因宿遷桃源等縣。人力弱而工程多。改令二十丈以外。隨便取土。又前疏河之兩旁。各挑引水河一道。今因工費浩繁。除清河北岸等處。必須挑挖者。仍相機挑挖外。其餘俱用鐵掃帚。濬深河底。又前疏造濬河船二百九十六隻。因不敷用。今議添造三百餘隻。俱應如所請。從之。○征南將軍都統穆占疏言。臣屢啟大將軍簡親王。請令和碩額駙華善等援永興。迄今未遣。華善等既未嘗往破浮橋。又不赴永興。宜調來代臣守郴州。俾臣往取耒陽。或擊來犯之賊。其在永興諸臣。於賊來攻城時。竟不拒截。坐令三面受圍。且永興所有滿兵。每佐領八名有餘。綠旗復及三千。未嘗一戰。應請處分。得旨。前授和碩額駙華善為將軍。署副都統。多諾為叅贊。敕令遣往永興。何以至今不遣。其於急要軍務。貽誤非淺。賊寇情形。本令不時報聞。比來並無所報。殊屬不合。簡親王俱明白回奏。華善

可否往郴州。穆占可否來永興。簡親王與穆占詳議。至於永興兵力。不為不足。護軍統領喇賽等不行退賊之故。簡親王嚴察以聞。○諭議政王大臣等。原任副都統甘度海。阿晉泰。原任署副都統碩塔。泰領克什布。滿丕圖。圖班。賴色。原任驍騎校扎親。筆帖式馬爾泰。護軍校表哈。護軍羅丹。俱從寬免死。軍前効力。甘度海。阿晉泰。碩塔。俱委夸蘭大。與碩塔同議處之員。俱委署軍職。扎親。馬爾泰。表哈。羅丹。俱為護軍。並發將軍阿密達軍前効力。甘度海等。俟阿密達至南昌。寬釋委用。扎親等四人。即行寬釋。仍準出征護軍例。給賞啟行。○丁巳。轉吏部右侍郎張士甄。為左侍郎。陞都察院左副都御史劉捷。為吏部右侍郎。○撫蠻滅寇將軍廣西巡撫傅弘烈等。自容縣退駐藤縣。疏言廣西事不可問。梧州亦復可虞。請遣大臣一員。令觀臣營進止。並請馬九玉與臣合營効力。得旨。廣西軍務。已委任

將軍莽依圖。額楚。傅弘烈。都統勒貝。副都統額赫納等。自宜殫心籌畫。和衷協謀。期濟大事。不必更遣大臣。莽依圖等。務相度機宜。可進則進。否則暫守要地。整飭軍馬。待時而動。其馬九玉。原令將軍等隨宜調遣。不必合營。○戊午。以左都督陳平。為江西撫建廣總兵官。○福建總督姚啟聖疏言。設兵捍守。本期有裨實用。鎮將各官。多以食餉兵丁。充伴當書記軍牢等役。至臨陣。十不得七。臣標亦有軍牢等役。俱經全革。另募入伍。以足兵額。上諭兵部。總督姚啟聖。革退伊標軍牢等役。另募入伍。有裨剿禦。可嘉。直隸各省綠旗兵丁。經制額數。專為防守汛地。征剿賊寇而設。該管各官。自宜實足兵數。以資戰守。督撫提鎮等。經制兵內。如有充伴當書記軍牢。以及馬夫水夫等役。悉行裁汰。務足兵額。倘仍不改陋習。因循踵行。該督等糾劾從重治罪。若督撫徇庇不糾。或為科道指參。或被旁人讒毀。

治以徇庇之罪。決不輕貸。其通行曉諭○兵部議覆福建總督姚啟聖疏言。閩省盜賊尚多。兵不給用。應增兵一萬八百人。漳浦同安舊有總兵官。後同安改設副將。漳浦總兵官之兵。改入海澄公標下。是以防禦維艱。應仍設總兵官各一員。查大將軍康親王等。曾請增閩省綠旗兵一萬八百人。未經允行。況見議增督標兵三千餘人。而署副都統岳爾多已率滿兵馳往。如更增兵一萬八百人。總兵官二員。必重糜糧餉。應無庸議。得旨。該督身在地方。深悉情形。是以題奏。宜如所請。增兵一萬八百人。須募有資力精健者充補。同安漳浦俱設總兵官。總督姚啟聖巡撫吳興祚提督楊捷。公同商酌。推謀勇素著者來奏。○奉命大將軍和碩康親王傑書疏言。副都統雅塔理。棄同安退入泉州。賊遂直前圍泉州。副都統紀爾他布。提督石調聲。退至興化。惠安復陷。臣隨檄將軍賴塔。總督姚啟聖。守漳

州。調將軍喇哈達。速率兵來援泉州。得旨。海逆日以猖獗。同安惠安相繼失陷。泉州見被賊圍。速宜調兵救援。可檄趣署副都統岳爾多。疾馳以往。平南王尚之信。所遣副都統尚之璋。廣東提督侯襲爵等。抵潮州日。同總兵官馬三奇。固守潮州。著靖南王耿精忠。侍郎達都等。自潮州率滿漢官兵。馳赴福建。與喇哈達等協力剿除海逆。以解泉州之圍。既而康親王傑書復奏。閩省地方失陷。所在道路梗塞。甚屬堪虞。惟望署副都統岳爾多統兵來至。

上諭兵部。岳爾多自出征以來。初無寸効。今令率兵往援泉州。復不倍道疾馳。稽延時日。殊屬不合。著嚴催速進。○諭議政王大臣等。凡大將軍以印授。恭贊大臣充將軍。分遣他所。其軍機事宜。不必申報。大將軍代題。可直行陳奏。若大將軍所遣二將軍。會於一所。大將軍即令一將軍為首。取一將軍印還。俾為恭

贊一切調度。俱聽大將軍節制。○己未。先是。上諭詹事宜昌阿曰。我水陸大兵並進攻岳州。今或宜戰克。或宜困取。何時何日。可以恢復。其確探明白。速行奏聞。至是。宜昌阿疏言。今水陸圍岳州。而九貴山至今未獲駐兵。故賊得往來此地。以通樵採。如岳州不下。長沙無船可用。而荊州大兵亦不能渡江。宜固守長沙。荊州調餘兵以困岳州。俾內外不通。斷其樵採。賊勢困窮。則十月內外。似可克復。然軍機朝夕有變。今賊勢窮蹙。衆心惶懼。如有機可乘。即旦暮克取。亦不可定。得旨。岳州為湖南咽喉要地。必此地恢復。則長沙荊州之兵始能前進。大將軍順承郡王所部兵數不少。攻取岳州。事關最要。宜如大將軍貝勒尚善前疏所請。速遣滿漢兵馳赴岳州。其陝西往江西之兵。可勿往江西。遣赴岳州。將至岳州時。如永興圍解。即留此兵於岳州。同順承郡王所遣兵併力進攻岳州。倘永興之圍未解。

則令此兵由岳州赴大將軍簡親王軍前。河南安慶俱近岳州。河南巡撫董國興可遣標兵一千五百人。安徽巡撫徐國相遣標兵五百人。令賢能官總領俱赴岳州。將軍阿密達抵南昌。釋甘度海等亦率之赴簡親王軍。原護軍四十人俱令同往岳州。此諸路兵抵岳州。貝勒尚善量增其軍。所有水陸官兵於九貴山設立一營。但有可克之機。即進兵攻取。○征南將軍都統穆占疏言。逆賊三面圍永興。水陸道阻。臣因復酌遣護軍甲兵。綠旗兵及火礮。令副都統布舒庫率之往會署副都統尼雅漢。堅壁河南岸。永興內外一切軍機。令與喇賽薩克察巴圖魯合謀而動。但郴州諸處廣遠遼濶。鎮守乏兵。請遣江西贛州總兵官哲爾肯并其標下官兵速赴臣軍。得旨。平定湖南剿除逆賊。俱委任將軍穆占大將軍簡親王等。穆占宜親赴永興。撲滅賊衆。項者都統王國棟率兵往鎮宜章。宜章與郴州。

相近。總兵官哲爾肯不必赴穆占軍前。○撫
蠻滅寇將軍廣西巡撫傅弘烈疏報。偽總兵
何興。久踞桂東。桂陽。上猶崇義。江楚交界地
方。臣遣隨征知縣王世誥招諭。隨率兵丁一
萬餘投誠。下部議叙。○庚申。以翰林院編修
翁叔元為山東鄉試正考官。戶部員外郎高
龍光為副考官。刑部員外郎許孫奎為山西
鄉試正考官。中書科中書裴充美為副考官
○予故刑部尚書姚文然祭葬。諡端恪。○吏
部題。各省題薦人員。原令具作速起程。今陝
西李顥。王弘撰。江南汪琬。張九徵。周慶曾。彭
桂。潘耒。嵇宗孟。張新標。吳元龍。蔡方炳。直隸
杜越。范必英。浙江應撫謙。山西范鄙鼎。江西
魏禧。並以疾辭。陝西李因篤。以母老辭。相應
咨催赴京。得旨。李因篤等既經諸臣以學問
淵通。文藻瑰麗。薦舉該督撫作速起送來京。
以副朕求賢至意。○先是。平南王尚之。信疏
言。臣弟尚之孝。向蒙授平南大將軍之職。藩

下鎮將。曾經統領。今與臣共居一城。體統難
施。每每引嫌。心不自安。請調尚之孝赴京師
別用。
上允其來京。至日。給一品頂帶。食正一品俸。已
而尚之孝疏言。臣詣闕請罪。分當誅戮。過蒙
寬宥。臣願募兵三千。赴王及將軍軍前。剿賊
報効。得旨。尚之孝既請募兵効力。以報國恩。
可授宣義將軍。暫駐江西南昌。聽募兵三千。
俟兵數募足。軍械完備。赴大將軍簡親王軍
前。征剿逆賊。○安遠靖寇大將軍多羅貝勒
尚善疏報。舟師敗賊於岳陽湖。偽將軍杜輝
等。乘船犯柳林嘴。我師迎敵。君山扁山舟師
亦來合擊。賊敗走。斬獲甚多。沉其賊船。方進
戰時。夸蘭大薩爾海鈎杜輝船。賊擲火薩爾
海之船被燬。署護軍統領查喇克圖。以舟助
戰。救薩爾海及兵百餘人。並奪賊船而還。
上諭。署護軍統領查喇克圖。助戰奪賊船可嘉。
事平議叙。嗣後我舟進與賊戰。有鄰近舟艦。

能助奪賊船者。記名待叙。其移知貝勒尚善。俾通行傳諭。○辛酉。

上詣

太皇太后宮。問安。○平南王尚之信疏言。鬱林滿漢官兵。今已退至容縣。潮州事勢可緩。兼有靖南王耿精忠。及滿洲大兵。足以鎮守。因撤原遣潮州副都統尚之璋。還省城。遇有緊急。可隨宜應援。

上諭兵部。項因海逆猖獗。侵犯漳泉。已調靖南王耿精忠。侍郎達都。率潮州兵往援。今若撤還副都統尚之璋。則潮州止餘總兵官馬三奇駐守。宜令尚之信。速趣提督侯襲爵。前赴潮州。并量發官兵。以補尚之璋之缺。同侯襲爵。馬三奇。協力固守。○福建巡撫吳興祚疏言。延建。邵。汀。四府。皆有賊伏。兵我各路守兵。疊經調發。遣往漳泉。請令浙江督撫。發標兵二三千人。來延平固守要害。

上諭兵部。海逆犯漳泉。事在迫急。浙江總督李

之芳。巡撫陳秉直。量留兵守浙江。而於各營

兵內。酌便抽選二三千人。遣往延平。至浙江

兵丁。屢經調發。福建浙地。兵力單薄。該督可

召募有資力壯健兵丁五千。分隸各營。○

壬戌。

上詣鞏華城駐蹕。○陞戶部左侍郎魏象樞。為都察院左都御史。○陞正紅旗漢軍副都統臧延鳳。為漢軍都統。○甲子。月祭

孝昭皇后。

上回宮。○諭安遠靖寇大將軍多羅貝勒尚善。我船甚多。諸將亦衆。公溫齊。副都統杭奇。德業立等。似宜酌遣一員。於陸路。賊雖各路赴援。諒皆小舟。少有巨艘。況船艘非旦夕可成。我沙船兵。亦宜抽調陸地。調時。毋令賊覺。諸路調來綠旗之兵。酌量令屯九貴山。或貝子章泰。或公溫齊。副都統杭奇。以一人駐守。立營之時。仍宜兼顧三眼橋地方。賊若遁走。即宜進剿。蓋兵貴神速也。貝勒等視賊得毋藐

忽。賊雖非我敵。猶必慎為之防。至岳州一克。即宜分兵。往取湘陰。長沙。前雖有敕旨。命克復岳州之後。即進取常德。澧州。今思深入常澧。賊或襲吾後。饋餉不易。渡馬亦難。總宜臨時相機而動。至於賊船僅四十餘。我船甚多。宜載火器於小舟。乘夜擾之。勿使寧息。近岳州安塘筆帖式報。我兵奪賊一船。復沉其一船。詹事宜昌阿。身在彼地。嗣後一切應報事宜。可悉奏聞。○遣兵部侍郎郭丕。員外郎舒書。赴湖南按問軍中事宜。諭之曰。將軍穆占。屢奏言。大將軍簡親王援師。不應機遣發。致事不克濟。簡親王何故不遣官兵。其穆占前報逆賊全力。偏注郴州。果曾逼犯郴州否。如未嘗來犯。則郴州永興之間。相距甚近。穆占何故不剿滅永興逆賊。以至若是。此等事由。可明白確察。至地方形勢。永興前後兩戰。及逆賊侵犯情形。一并察明。嚴取供詞。以奏。今羣賊肆犯永興。其郴州宜別委大臣。量留官

兵鎮守。穆占身率大兵。前赴永興。爾等至彼。或應調穆占前赴永興。或應仍留郴州。其與穆占。簡親王。詳確定議。一面進發。一面奏聞。復令傳諭穆占曰。穆占不量地方緩急。不遣重兵鎮守。致賊犯永興。及請濟師。又不迅速。精銳官兵。并力而往。我朝諸將遇敵。雖兵力單弱。亦不退縮。必奮勇攻擊。是以都統宜理布。護軍統領哈克山等。陷沒於陣。夫為將者。當以朝廷大事為念。徒為身計。獨留精兵自護。軍機坐失。職此之由。况穆占。陛辭時。曾面諭。凡有分遣。必厚兵力。頃永興兩次失利。朕心深為縈慮。蓋緣穆占不厚兵力。不調發精銳之所致耳。如近者大兵圍困長沙。岳州。豈不可使并力乎。壕拔。肉薄而攻。破毀其城。但朕心憫惻。不忍官兵。慘罹鋒鏑。故令大隊舟師並進。其諭穆占知之。○刑部議覆。山西道御史蔣鳴鳳疏言。凡遇秋審。在部已結之人命盜案。照原審犯証口供。詳加審繹。公定

情實可矜可疑。在外直隸各省。一遇秋審。必重提犯人家屬。與失事牽連之人對質。由縣解府。由府解司。跋涉道路。守候審結。為累不淺。嗣後應免其重提質審。應如所請。從之。

乙丑。

上詣

太皇太后

皇太后宮問安。○丙寅。召翰林院掌院學士陳廷敬。侍讀學士葉方鵠。入直南書房。○予湖

廣陣亡一等阿達哈哈番白顯鎮。祭葬如例。

○丁卯。以故四子部落多羅達爾漢卓禮克圖郡王沙克都爾子丹巴彭蘇襲爵。○旌表

山西萬泉縣孝子賈允。重廬墓三年。給銀建

坊如例。○喀爾喀墨爾根台吉遣使進九白

年貢。宴賚如例。○戊辰。安遠靖寇大將軍多

羅貝勒尚善疏報。吳逆於水陸要路。在處固

守。套河峽。係洞庭湖要口。我兵進剿門戶。賊

設椿木。攔阻兵船。總兵官萬正色。兩次進兵。

所倒椿木。從此舟師直進。逆賊旦夕可平矣。下部議叙。○尚善又疏報。討逆將軍都統鄂內。敗賊杜巴姜等於柳林嘴地方。殺賊一千餘名。下部議叙。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

官吏部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午八月己巳朔

實錄卷七十六

上詣

太皇太后宮問安○陞太常寺卿朱裴為都察院左副都御史○以禮部郎中葉映榴為陝西按察使司僉事提調學政○庚午奉命大將軍和碩康親王傑書等疏言海澄公黃芳泰年少柔懦不勝兵事得旨海澄公黃芳泰功臣之嗣既年少不能軍而仍授以兵倘至失律恐反為彼罪且於地方無益可令黃芳泰及黃芳世之子并其家屬俱赴京師務安

置得所。以副朕始終保全至意。其標下官兵督撫等察其可用者補入各營。罷老不堪者量行安插得所○諭兵部。向因靖南王耿精忠剿賊外出。遣鎮平將軍耿昭忠赴閩。暫理旗務。今耿精忠還省城。耿昭忠可攜其祖父骸骨來京○靖逆將軍甘肅提督侯張勇疏言。臣與提督孫思克及理事官拉篤祐選擇通事。密行遠探噶爾丹情形。據回報云。有鄂齊爾圖汗屬下達爾漢哈什罕。曾為噶爾丹擄去。今往西海。遇而問之。彼言噶爾丹既殺鄂齊爾圖汗。今歲二月內。令其屬下兵丁殷實者各備馬十匹。駝三隻。羊十隻。窘乏者馬五匹。駝一隻。羊五隻。自其地起兵。不知何向。臣向聞甘屬番人素與僧額輸租。僧額歿。屬於噶爾丹。臣召其頭目永柱等訊之。言噶爾丹居西北金山。距嘉峪關兩月程。即古大宛國也。臣聞噶爾丹遣喇嘛萬春來召番人頭目。至河套議事。臣密遣人誘問之。萬春言噶

實錄卷七十六

二

爾丹鄰近諸番有從之者亦有從之而復去者。噶爾丹向有侵西海之意。因人心不一。西海路遠。恐一動而本地有事。不敢輕舉。臣復遣人至墨爾根台吉所審視之。衆皆寂然安居。第番情難以預料。謹疏奏聞。得旨。噶爾丹雖無起兵聲息。應仍檄該將軍等不時偵探。加意防守邊境。○西洋國主阿豐素遣陪臣本多白壘拉進表。貢獅子。表文曰。謹奏請。

大清皇帝萬安。前次所遣使臣瑪訥撒爾達聶。

叨蒙

皇帝德意鴻恩。同去之員。俱沾柔遠之恩。聞之不勝懼忭。時時感激。隆眷仰瞻。巍巍大清國寵光。因諭凡在東洋所屬。永懷尊敬。大清國之心。祝。

萬壽無疆。俾諸國永遠沾恩。等日月之無窮。今特遣本多白壘拉齋獻獅子。天主降生一千六百七十四年三月十七日奏。○辛未。陞鑲紅旗護軍叅領夸扎為護軍統領。○癸酉。

上御太和殿視朝。文武陞轉各官謝恩。次西洋

國使臣行禮。○甲戌。轉戶部右侍郎于可託

為左侍郎。調工部右侍郎田六善為戶部右

侍郎。○以翰林院檢討朱阜為順天鄉試正

考官。編修楊瑄為副考官。○禮部議福建省

海氛未靖。鄉試改於康熙十八年八月舉行。

從之。○先是平南王尚之信疏言。宜章地甚

要。防守不可不固。臣於七月初二日遣都統

王國棟署總兵官。甯天祚等率兵前往請敕

安南將軍覺羅舒恕同赴宜章。統轄官兵協

同防守。得旨。南雄韶州若無虞。將軍舒恕即

赴宜章。否則速以狀聞。至是舒恕奏。南雄諸

處為江西廣東湖南接壤要地。不可輕離。

上命舒恕仍駐南雄。○乙亥。

上詣

太皇太后宮問安。○予故總督倉場戶部侍郎

嚴沆祭葬如例。○丙子。秋分。夕。

月於西郊。遣戶部尚書伊桑阿行禮。○丁丑。

太宗文皇帝忌辰遣官祭

昭陵○

上詣

太皇太后宮問安○戊寅祭

大社。

大稷。

上親詣行禮○

上幸南苑行圍○湖廣總督蔡毓榮疏報逆賊

窺伺糧艘復犯大營滿漢官兵合力會剿屢

敗之斬首一千餘級下部議叙○己卯

太祖高皇帝忌辰遣官祭

福陵○安遠靖寇大將軍多羅貝勒尚善於是

月初四日以疾薨於軍固山貝子章泰以聞

上命多羅貝勒察尼代貝勒尚善為安遠靖寇

大將軍赴岳州統其軍○辛巳陞正紅旗叅

領夏時英為漢軍副都統○壬午

上還自南苑詣

太皇太后宮問安○平南王尚之信疏報高雷

廉三府經臣恢復之後令副都統金榜選等

駐防雷州府有海賊楊二等在沿海地方肆

行搶掠金榜選等率官兵攻奪礮臺三戰三

捷斬賊千餘大獲賊船礮火器械下部議叙

○癸未。

上詣

太皇太后

皇太后宮問安○

上御經筵○予荊州陣亡鑲黃旗前鋒叅領何

爾博庫祭葬如例○三等阿思哈尼哈番張

華山緣事革職以其弟張顯仁襲替○福建

總督姚啟聖疏報平和失陷臣會商海澄公

黃芳泰調遣叅將呂孝德等進剿大敗海寇

恢復平和縣城得旨嘉獎下部議叙○甲申

諭議政王大臣等今日之事岳州最要不可

不速行攻取乘此民心讐賊羣相內嚮之時

朕欲親統六師躬行伐罪若逾此機恐滿兵

不耐水土因而挫銳所遣諸將軍破賊無期

後雖勉圖終成掣肘。國家所賴在於僉謀。此外如有早戡逆亂。救民水火之策。並宜豫籌。爾等其詳議之。尋議政王大臣等奏。吳逆首啟亂階。諸方震擾。

皇上特抒神畧。命將出師。分路進征。剿撫並用。陝西。福建。江西。浙江。廣東。諸省。以次削平。僅吳三桂困守一隅。旦夕可滅。緣臣等才智疎淺。不能仰副。

宸謨。議多謬誤。在外諸將大臣。亦不能仰體。

聖意。迅掃妖氛。逆首逋誅。致煩。

睿慮。伏讀詔諭。深中機宜。臣等敢不遵奉。但。

皇上一身。關天下之重。今。

宸馭所至。雖賊不足平。然京師要地。萬一。

車駕遠行。奸宄因而竊發。此亦事之未可料者。

臣等以為。

皇上不必躬臨戎陣。但宜居中。指麾內外。臣僚相機調度。請敕大將軍貝勒察尼。或見困岳州。水陸兵之外。更增立營於九貴山。則岳州。

可下。雖或增立營壘。戰艦不可久泊湖中。若岳州似難克復。則宜掣調水軍。如前固守。而以餘兵益安親王岳樂軍。進定湖南。或益順承郡王勒爾錦軍。進定常德。澧州。令王貝勒等詳議敷陳。再為籌度。從之。○喀爾喀車臣汗土謝圖汗等遣使進九白年貢。宴賚如例。○乙酉。裁長蘆運判缺。其所管事務歸青州分司兼理。○予荊州陣亡正藍旗一等阿達哈哈番又一拖沙喇哈番索諾睦。正紅旗拖沙喇哈番顏泰。浙江陣亡鑲白旗漢軍拜他喇布勒哈番又一拖沙喇哈番署叅領劉應泰。各祭葬如例。○以叙招撫逆賊功。加江西巡撫佟國楨。兵部右侍郎銜。○丙戌。以御製詩集。賜講官陳廷敬。葉方藹。王士正。張英。高士奇。同觀。諭曰。朕萬幾之暇。偶有吟咏。因爾等在内編纂。屢次請觀。故出以示爾等。中有宜更定者。明言之。毋隱。陳廷敬等恭讀訖。奏曰。臣等恭讀。

御製詩集伏見奎章魏煥。睿藻精深。吟咏之際。時念萬幾。篇什之中。常懷四海。實帝王之傑作。天地之元音。盡善盡美。實無可更易之字句。臣等幸躬逢文明之運會。得覩雲漢之昭回。真千載殊遇也。○平南王尚之信疏言。自漳州海澄告變。惠潮震驚。又鬱林失陷。梧州可慮。高雷廉三府逆賊肆行。兼之海賊楊二侵擾沿海之地。官兵不足分遣。請令都統王國棟勿赴宜榔。得旨。今逆賊犯永興。肆行猖獗。宜章郴州地屬重要。都統王國棟仍速率兵往援。已命將軍莽依圖等暫止勿進。廣西潮州有警。尚之信隨宜策應。○福建提督楊捷疏言。福建水陸進兵勢不能兼顧。得旨。提督楊捷可專轄陸路兵。水師提督別行補授。當此海寇鴟張之會。統轄水師。非才畧優長。諳練軍事之人不可。總督姚啟聖提督楊捷巡撫吳興祚。其遴選保奏。○楊捷又言。臣向在山東深悉山東河南兵熟習交鎗鳥鎗者

甚多。乞各發千人。江南兵有熟習弓箭火礮者。亦發千人。赴閩。得旨。福建土著兵丁未諳行陣。雖經召募。無裨實用。若得久習營伍之士。隨到即可成功。總河靳輔。山東巡撫趙祥星。其各發標下兵。善交鎗鳥鎗者千人。河南巡撫董國興。發河南兵。善鳥鎗者亦千人。前赴福建。所遺兵缺。速行募補。○丁亥遣大學士索額圖祭先師孔子。○上詣太皇太后。皇太后宮問安。○己丑。陞寧古塔鑲紅旗駐防協領薩布素為寧古塔副都統。○辛卯。免江南高郵州康熙十六年分水災湖地額賦。○福建總督姚啟聖疏言。臣前啟奉命大將軍和碩康親王調提督石調聲等兵并省城滿兵同援泉州。臣願親統綠旗兵協力進剿。而漳州綠旗兵止一萬。攻守不足。請發江西贛

州總兵官哲爾肯廣東潮州總兵官馬三奇
惠州提督侯襲爵各標官兵共五千名來援
得旨泉州地要大將軍康親王侯署副都統
岳爾多兵至日酌發滿漢官兵往援頃者已
調駐守潮州靖南王耿精忠侍郎達都等率
兵救泉州提督侯襲爵往潮州而江西綠旗
兵屢經調赴湖南哲爾肯等標兵不便更遣
可速檄耿精忠等統率官兵馳赴漳州會同
將軍喇哈達賴塔總督姚啟聖兩路夾擊務
解泉州之圍○奉命大將軍和碩康親王傑
書疏言請簡旗下老成歷練總兵官調補潮
鎮以代馬三奇其潮州鎮標見在委署各偽
員宜速改調至將軍劉進忠標員宜分布各
標或發廣西將軍軍前効力又如績順公沈
瑞降賊受其侯爵結為姻婭恐其勾連起釁
宜黜其公爵所屬旗兵分隸督撫提鎮各標
家口宜徙山西諸省得旨康親王曾言馬三
奇人甚精強行間懋著勞績因擢潮州總兵

官且潮州將士已發援泉州今無故妄有猜
疑輒行改調使効力者且至心寒績順公沈
瑞及標下官兵素懷忠義緣衆寡不敵為賊
所脅向者副都統張夢吉等言伊等身在行
間請發家口入京朕以道路遼遠不必遷徙
來京令暫駐潮州已有成命所奏請黜沈瑞
公爵分其標兵徙其家口俱不准行○壬辰
以原任刑部左侍郎董安國為工部左侍郎
管右侍郎事○癸巳廣東廣西總督金光祖
疏言祖逆敗竄廣西收集餘黨勢必糾合大
隊肆行侵擾況賊既陷鬱林必乘勢犯高州
所關甚鉅亟宜預籌得旨頃命將軍莽依圖
等整頓軍械以俟機會今既不急進廣西如
賊犯高州平南王尚之信將軍莽依圖額楚
傳弘烈總督金光祖等或增遣滿漢官兵赴
高州協力剿賊或遣兵攻北流鬱林以分賊
勢俾不得侵高州其公同酌議務令高州諸
處勿有疎虞○甲午月祭

孝昭皇后○以出征江西湖廣陣亡及病故官兵骸骨還京遣內大臣侍衛往奠之○予均州陣亡正白旗漢軍佐領拜他喇布勒哈番鄭朝興祭葬如例○先是調定南將軍花善自安仁赴永興與護軍統領喇賽等協力固守剿禦逆賊既而將軍花善疏言臣欲移會永興護軍統領喇賽等因道阻難通復自郴州大路發檄迄今尚未得報且兵力單弱不能前進致行期稽滯

上諭授花善為將軍調赴永興為日已久即宜率兵馳赴乃藉口兵單道阻逗留不前殊屬不合應即治罪但見在行間暫緩處分俟事平旋師再行察議永興關係重要花善務設策相聞約期夾擊速退逆賊如未便夾攻花善可求他道前往永興合力而舉尋征南將軍都統穆占疏言臣啟大將軍和碩簡親王速遣將軍花善星夜馳赴郴州俟其到日委以地方臣遵諭率隨征遊擊馬昇標兵火礮

前赴永興討賊其總兵官趙應奎標兵請速發至臣軍

上諭前以永興地要曾敕穆占親往今既稱親率領兵丁前赴永興宜如所請移文將軍花善不必前往永興率兵馳赴郴州并移文大將軍簡親王遣總兵官趙應奎攜其標兵火礮速赴穆占軍令按察使馬思良催徵郴州諸處糧餉運至永興毋悞軍需揚威大將軍和碩簡親王喇布復疏言若總兵官趙應奎兵為將軍穆占調往則茶陵攸縣安仁諸處兵力單弱請增遣兵防禦

上諭永興緊急趙應奎兵可速行發往俟陝西調至副都統夸代所統每佐領兵二人抵岳州日大將軍貝勒察尼等視馬罷者易以岳州兵丁健馬速遣至簡親王軍聽其隨宜調遣已而喇布遵諭繪圖永興城池我兵營壘及逆賊盤踞形勢進呈

御覽議政王大臣等因奏省閱來圖永興殊為

困迫宜再趣穆占花善等各率兵星赴所指處所。

上諭前屢敕花善速赴永興。竟不如期而往。殊玷將軍之職。今若更有延滯。不即至榔兵部題叅從重治罪。○乙未。揚威大將軍和碩簡親王喇布疏報吳三桂初病中風。噎膈有犬登其案而坐。因病甚。口不能張。且下痢。於本月十七日遂死。賊黨閉衡州城門。潛調偽將軍胡國柱、馬寶等。於永興諸處取吳三桂孫於雲南。越四日。胡國柱等自永興至衡州。始啟城門。通行旅。征南將軍穆占亦疏報據護軍統領喇賽前鋒統領薩克察巴圖魯報賊自本月初二。以至二十日。屢逼永興。滿漢官兵晝夜堅守。屢退賊衆。二十一日夜。賊焚其營遁。

上諭議政王大臣等曰。覽大將軍簡親王等奏逆賊吳三桂已死。渠魁既殞。賊必內變。諸路將軍宜乘時各統大兵。分路進剿。克復疆圉。

永興賊既遁。去簡親王宜由茶陵赴安仁。進逼衡州。其永興官兵勞苦已久。可駐茶陵諸處暫息。自陝西調來副都統奎代所領每佐領兵二人。不必遣赴茶陵。即留岳州軍前。大將軍貝勒察尼等務水陸夾擊。速取岳州。禮部議欽天監治理曆法。南懷仁進康熙永年曆。係接推湯若望所推曆法。應交翰林院仍著該監官生肄習。永遠遵行。從之。○丙申。遣官祭。

歷代帝王。○遣官祭城隍之神。○諭諸路王貝勒、大將軍、將軍、督撫提鎮等。茲據大將軍簡親王等報。吳三桂頃已身斃。吳三桂數年以來。搆兵倡亂。荼毒生靈。罪大惡極。故天命殛之。當日許其遷移。本欲保全。安插。始終眷寵。不意其包藏禍心。輒行反叛。背累朝養之恩。逞一旦鴟張之勢。橫肆兇逆。擾亂疆土。元兇既服。天誅脅從。宜施寬典。凡在賊中文武官員兵民人等。皆朕赤子。素受國家恩養。

必非甘心從逆。或志存忠義。不能自拔。或勢
被迫驅。懷疑畏罪。陷身逆黨。朕甚愍焉。其各
體朕好生之心。翻然悔悟。爭先來歸。朕必優
加恩賚。論功叙錄。爾等即宣布德意。廣示招
徠。務使懷忠抱義之士。順天命。以圖全。審事
機。而建績。撫綏戡定。早奏蕩平。以副朕嘉與
維新至意。○戊戌。

上詣

太皇太后

皇太后宮問安○陞太僕寺卿焦毓瑞為太常
寺卿○陞左通政楊雍建為太僕寺卿

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之七十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十七

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午九月己亥朔諭兵部向以

實錄卷七十七

江西可虞因調總漕帥顏保前往今南昌已為內地其令帥顏保赴吉安鎮守○庚子

上詣

太皇太后

皇太后宮問安○壬寅

上詣

太皇太后

皇太后宮問安○癸卯

上御太和殿視朝文武陞轉各官謝恩次喀爾

喀厄魯特等進貢使臣行禮○

上御弘德殿講官陳廷敬等進講尚書啟乃心

沃朕心四節

上曰朕觀高宗命傳說諄諄以納誨輔德為言

可見自古君臣必一德一心至誠感孚為上

者實心聽納以收明目達聰之益為臣者實

心獻替以盡責難陳善之忠然後主德進於

光大化理躋於隆平後世君臣之間徒尚虛

文鮮實意治不逮古職此故耳陳廷敬等

奏曰

聖諭及此誠社稷萬年之福也○諭議政王大

臣等將軍花善署副都統多諾自六月調遣

永興迄今未至殊負厥職其集議以聞尋議

政王大臣等議奏花善多諾俱宜革職披甲

令赴大將軍和碩簡親王軍前効力得旨我

國家將士凡遇調遣俱即馳赴從未有若此

遲延觀望者使花善等兵未事而至未必無

功今已事畢至將安用花善多諾宜如議處

分但正值討賊之際免其革職披甲俱委署
夸蘭太發與將軍穆占令軍前効力○乙巳

上詣

太皇太后

皇太后宮問安○丁未。

上詣

太皇太后

皇太后宮問安○戊申。

太皇太后聖躬違和。

上奉

太皇太后幸遵化州湯泉。

上扶

太皇太后登輦隨輦步行出神武門始乘馬每

至進膳處。

上必先下馬扶

太皇太后降輦視入行宮。

上御進膳所膳畢候

太皇太后登輦。

上扶輦行數步。

上乃乘馬隨行。是日駐蹕平家潭○贈廣東殉
難遊擊李成功為副將予祭葬。廕一子以守
備用○喀爾喀色冷阿海台吉遣使進九白
年貢宴賚如例○己酉。

上駐蹕三河縣南○先是議政王大臣等會議
令大將軍安親王岳樂順承郡王勒爾錦貝
勒察尼等將作何進兵之處詳議敷陳至是
勒爾錦疏言以守兵餘力並入行軍復多增
鎗手五路渡江齊力大舉庶可滅賊岳樂疏
言臣親赴岳州仍舊布置舟師調諸路大礮
急攻陸營勢必克復察尼疏言舟師入湖三
月餘雖未大挫賊鋒賊亦不敢公然出戰近
聞逆賊糧餉將絕將軍林興珠又獻策謂湖
水涸後宜圍以木柵立木椿列火礮俾小船
巡警可乘之機正在此時然湖水之涸為期
尚遲兩三月間賊中安知無變今乘水勢未
退立一營於南靖港俟水涸酌撥舟師營於

君山高家廟絕其糧道。賊勢窮蹙。不難撲滅。又一議。九貴山雖經立營。而圍猶未匝。若水涸。則君山高家廟諸處俱涸。賊於石首華容澧州常德陸路皆通。君山高家廟不以大隊立營。則圍賊難徧風浪之中。船不可泊。徒致損壞。若於舟師分撥立營。萬無餘力。

上覽三疏。因諭兵部。吳三桂已死。諸逆潰亂之際。宜急取岳州。動支如許錢糧。營治舟艦。入湖三月餘。況將軍林興珠獻策甚明。俟湖水盡涸。我船與賊船俱無所施。彼時多掣舟師無不足用。我之船艦兵卒。頗屬有餘。豈可推諉。使大事中阻。今宜於南靖港君山高家廟諸處俱立營壘。斷賊糧道。務須困取岳州。至於君山高家廟諸處。既需大隊。應令副都統關保所率之兵。無徃江西。改赴岳州。聽貝勒察尼調遣。如舟師必難久頓湖中。速以狀聞。貝勒察尼等既圍取岳州。安親王。順承郡王所奏俱不必行。○庚戌。

上駐蹕薊州城西。○辛亥。

上駐蹕石門南。○揚威大將軍和碩簡親王喇布疏言。茶陵攸縣水陸俱通。衡州諸處宜造戰船。及小沙船百艘備用。議政王大臣等議。如所請。令勸勉紳衿百姓輸助。速行營造。得旨。造船事關緊要。令刑部侍郎禪塔海於江南動支正項錢糧。備藥礮及需用器物。前赴茶陵諸處督理修造。前尚書伊桑阿帶往造船官員。仍令偕往。○壬子。

上奉

太皇太后至湯泉。扶

太皇太后降輦。入行宮。隨率內大臣大學士侍衛。及三品以上官詣

孝陵。行禮舉哀畢。回鮎魚池城內行宮駐蹕。○

癸丑。

上兩詣

太皇太后行宮問安。○甲寅。

上率內大臣大學士侍衛及三品以上官詣

孝陵展祭○予湖廣陣亡戶部員外郎委署叅領李廷龍祭葬如例○調正白旗蒙古副都統杭琦為滿洲副都統○福建總督姚啟聖疏報八月十五日官兵恢復漳平縣城得旨嘉獎下部議叙○乙卯

上詣

太皇太后行宮問安○征南將軍都統穆占疏報官兵敗賊於耒陽縣地方擒偽守備胡起龍等下部議叙○丙辰

上詣

太皇太后行宮問安○以阿霸垓故多羅卓禮克圖郡王德穆白爾之子楚翁襲爵○賜西洋國使臣本多白壘拉等宴賚如例○丁巳

上詣

太皇太后行宮問安○奉命大將軍和碩康親王傑書疏報遣署副都統禪布等統兵進剿海賊兩路夾攻恢復惠安縣解泉州圍又福建巡撫吳興祚疏報官兵敗賊於白鶴嶺復

永春德化等縣賊渠劉國軒等悉遁又追敗之於赤澳諸處沉燒賊船六十餘艘剿殺賊兵六千餘級得旨嘉獎下部議叙○戊午

上詣

太皇太后行宮問安○己未

上詣

太皇太后行宮問安○予出征江西病故鑲藍旗奉國將軍白爾圖祭一次○庚申

上詣

太皇太后行宮問安○辛酉

上詣

太皇太后行宮問安○

上以孟冬享

太廟奏辭

太皇太后回鑾是日駐蹕薊州城內○先是征南將軍都統穆占疏言因花善等至郴州永興賊遁故臣未赴永興遣副都統寶柱總兵官趙應奎署副都統雅秦等各以所部兵從

花善往守。撤臣所部前鋒護軍甲兵及漢軍綠旗兵。盡還郴州。休息軍馬。以候諭旨。已而揚威大將軍和碩簡親王喇布疏言。臣聞上三旗內府佐領兵三百人。未發永興。因檄詢花善等。花善等言。此兵至郴州。皆願軍前効力。穆占遂留之。以臣所遣之兵。花善不報。臣知竟留穆占軍前。穆占亦不以留兵之事。聞之於臣。倘遇警急。有所調發。亦皆如此。恐誤軍事。嗣後花善之兵。或聽穆占調遣。或聽臣調遣。伏候睿裁。

上諭簡親王方剿撫逆寇之際。穆占盡撤其屬兵。茶陵攸縣安仁諸處所存兵。每佐領不足七人。大將軍安親王每佐領兵二人。復遣還長沙。致簡親王兵力單弱。遇有調遣。穆占又相去甚遠。誠難應時。即至。今簡親王赴安仁相機進剿。其所部兵當聽隨宜調遣。簡親王所發官兵。穆占並未商酌。任意留之。不合。其內府佐領兵三百人。仍令發回。至永興地方。

本令穆占簡親王協同鎮守。今若止令簡親王駐守。倘簡親王相機前進。或逆賊來犯。恐兵力單弱。關係匪輕。其令穆占簡親王協議各酌遣官兵共守永興。今逆賊吳三桂已死。正急宜剿撫之會。穆占簡親王其凜遵諭旨。同心合力。以圖濟事。已而喇布復奏。花善多諾俱已降。默永興見缺。統帥因授內大臣。阿密達揚威將軍印。以夸蘭大碩塔阿晉泰等副之。遣往駐鎮。

上諭簡親王既赴安仁。叅贊不可無人。阿密達仍與簡親王偕往永興。去郴州不遠。況穆占前奏郴州。別付一大臣鎮守。以便親赴永興。宜令穆占或選彼處所有大臣一員。往鎮永興。或親往鎮守。酌可而行。壬戌。

上駐蹕邦均北。予出征荊州病故正紅旗都統拜他喇布勒哈番王國詔祭葬如例。癸亥。

上駐蹕烟郊南。甲子月祭。

孝昭皇后○

上回京詣

皇太后宮問安畢回宮○予江西陣亡正藍旗委署副都統王府長史佐領雅賴祭葬諡襄壯○予福建陣亡正黃旗三等侍衛委署護軍叅領參忒黑祭葬如例○乙丑。

孝慈高皇后忌辰遣官祭

福陵○

上詣

皇太后宮問安○予浙江陣亡鑲紅旗駐劄杭州協領一等阿達哈哈番多圖祭葬如例○先是將軍鄂內等疏言賊乘船自岳州赴湘陰取糧米火藥副都統德業立提督周卜世等駐扁山不行擒獲俾賊逸出尋賊船由扁山入岳州彼等又不邀擊縱之入城。

上諭以如許錢糧造成船艦調集諸路官兵水陸並進以圍岳州乃賊船衝出既不行阻禦竟致逸出及其入城以如許舟師何以不行

邀擊任意縱入大將軍貝勒察尼其嚴察明白具奏至是察尼疏言德業立周卜世等率一百三十船截剿茲賊賊僅二十餘船未能獲其一船畏縮怯懦縱賊入城議政王大臣等議德業立周卜世等應革職充伍令軍前効力得旨德業立周卜世等本宜如議處分但值剿賊之際可俱革職留任効力贖罪鄂內總統舟師身為主將乃用庸懦之徒致誤大事事平之日從重議處○丙寅予荊州陣亡鑲紅旗一等阿達哈哈番賀色耀州陣亡鑲白旗蒙古駐防江南佐領圖爾孟額各祭葬如例○平南王尚之信疏言剿除海逆亟須船艘其如軍需浩繁勢難營造請暫開海禁許商民造船由廣州至瓊州貿易自便則臣得藉商船由廣海海陵龍門一帶進取以收搗巢之功得旨向因平南王尚之信言粵東雖已底定鄭逆仍踞廈門宜申海禁以絕亂萌故準舊界嚴行禁戢今若復開海禁令

商民貿易自便。恐奸徒乘此與賊交通。侵擾邊海人民。亦未可定。海禁不可輕開。其鼓勵地方官員捐助造船。以備征剿之用。○丁卯。先是鎮南將軍莽依圖疏言。進定廣西。亟需厚集兵力。見在綠旗之兵有名無實。臣思平南王尚之信。練習戎行。器械整備。請調赴梧州。統轄官兵。委以平粵之責。與臣等協謀而行。實於大事有濟。

上命尚之信會同將軍額楚。總督金光祖。巡撫金僞等。定議以聞。至是尚之信奏。臣向以逆賊偏注永興。恐都統王國棟不能制敵。擬於九月初旬。親往策應。頃聞吳三桂已死。永興賊遁。今湖南勢如瓦解。取之甚易。臣當進定廣西。

上諭。乘此逆賊驚擾之時。大兵亟宜前進。剿撫並用。綏定疆圉。授平南王尚之信為奮武大將軍。統兵赴永興。郴州諸處會合大將軍簡親王。將軍穆占等。并力同心。以圖進取。將軍

莽依圖。額楚。傳弘烈。總督金光祖等。各駐本汛。相度機宜。規定廣西。應給尚之信敕印。準滿洲大將軍王等例。遣內閣官員齎往。○予故正黃旗原任都統太子太保二等阿思哈尼哈番庫祿克達爾漢阿賚。祭葬。謚襄武。○陞鑲紅旗前鋒叅領佟佳為滿洲副都統。○陞一等侍衛得爾德為正白旗蒙古副都統。○浙江總督李之芳疏言。錢塘縣孝婦尚氏。翁患膈病。竭乳以供。事姑二十五年。曲盡孝養。婦事舅姑。子事父母。天倫並重。應照孝子一例旌表。部議如所請。從之。○予長沙陣亡鑲紅旗副都統佐領阿爾瑚祭葬。謚敏壯。○予長沙陣亡鑲黃旗蒙古一等阿達哈哈番羅布西巴圖魯。鑲白旗二等阿達哈哈番渾錦。正藍旗三等阿思哈尼哈番愛音查。鑲藍旗二等阿達哈哈番高永印。拜他喇布勒哈番。何見圖。拖沙喇哈番。胡從聖。護軍叅領李古。江西陣亡鑲黃旗三等阿達哈哈番拜海。

拖沙喇哈番牛妞。正黃旗三等阿思哈尼哈番插渾拖沙喇哈番巴西。正白旗一等阿達哈哈番護軍叅領諾羅布。一等阿達哈哈番畢穆璧。正紅旗二等阿思哈尼哈番塞靖叩。鑲白旗一等阿達哈哈番希福。鑲紅旗三等阿達哈哈番託羅。拜他喇布勒哈番查木蘇。鑲藍旗拜他喇布勒哈番阜喇塔。福建陣亡。鑲白旗拖沙喇哈番嫩兒。海安營遊擊周愈吉。各祭葬如例。○予江南出征病故鑲藍旗一等精奇尼哈番庫色爾德。江西出征病故鑲黃旗二等精奇尼哈番劉澤涵。鑲紅旗副都統朱喇禪。長沙出征病故。正白旗副都統二等阿達哈哈番紀圖堪。各祭葬如例。○旌表浙江節婦仁和縣張氏。錢塘縣李氏。凌氏。茹氏。嘉興縣曹氏。石門縣梁氏。費氏。桐鄉縣郁氏。慈谿縣袁氏。山陰縣朱氏等烈婦。永康縣虞氏。各給銀建坊如例。○旌表浙江富陽縣孝子許加賢。父母亡後廬墓六年。不改孺

慕。給銀建坊如例。

冬。十月。戊辰朔。享

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后。

孝昭皇后。

上詣

皇太后宮問安。○頒康熙十八年時憲曆。○諭

大學士等。海澄公黃芳泰等。係有功之人。令

遷移來京。乃保全至意。其家口來時。令沿途

應付驛站。給與食用。俟將到時。即令報部。大

臣官員及親戚等。願往迎者聽。○己巳。加江

西巡撫佟國禎兵部尚書銜。南贛總兵官哲

爾肯。左都督銜叙。鷗鷁寨殺賊功也。○工部

議覆安徽巡撫徐國相疏報本年七月二十一日黃水泛漲將碭山縣石將軍廟蕭縣九里溝二處衝決查本年二月總河靳輔請銀二百五十餘萬兩大修河道動工已及九月未知所修工程何如今又衝決多處應請遣大臣前往查勘得旨著戶部尚書伊桑阿右侍郎田六善前往查勘○庚午

皇太后聖壽節

上率諸王文武大臣侍衛等詣

皇太后宮行禮遵

懿旨停止筵宴

上幸湯泉是日駐蹕邦均北○福建總督姚啟聖疏言海澄地方緊要海澄公又召赴京師不可無總統重臣鎮守漳州亦宜設總兵官駐防得旨向因水師提督駐海澄是以海逆敗遁今該督既行題請其令水師提督駐海澄調海澄總兵官駐漳州至水師提標應設兵丁可於新增兵及所裁海澄公標兵內選

補○辛未

上駐蹕薊州城內○壬申

上至湯泉詣

太皇太后行宮問安駐蹕鮎魚池城內行宮○

癸酉

上兩詣

太皇太后行宮問安○乙亥

上詣

太皇太后行宮問安○丙子諭征南將軍都統

穆占逆渠已斃賊勢潰亂大兵亟宜前進剿

撫並行機不可失大將軍簡親王同內大臣

阿密達前鋒統領希佛等率每佐領十人並

均配綠旗兵與大將軍平南王尚之信公同

定議或取永州或宜取何地相機而舉茶陵

安仁永興郴州諸處俱令將軍穆占鎮守如

地方無虞有機可乘聽其酌量進發○辛巳

上兩詣

太皇太后行宮問安○授故奉國將軍楊岱子

維藩為奉恩將軍○以扎賴特故固山貝子畢立克子納遜襲爵○厄魯特多羅郡王伊斯丹津為隱匿逃人事降為三等公○壬午上兩詣

太皇太后行宮問安○陞叅將趙得壽為福建漳浦總兵官遊擊馬化龍為福建同安總兵官○福建總督姚啟聖疏報遣子姚儀率領官兵敗海賊於同安縣地方擒斬偽副將林欽等五員恢復同安縣城得旨嘉獎下部議叙○癸未

上巡視北邊是日啟行駐蹕鮎魚口○以翰林院侍讀王士正為順天武鄉試正考官翰林院侍講韓爌為副考官○甲申

上駐蹕熊山龍井關○改廣西梧州分巡道為分守蒼梧道照舊兼理驛鹽事務○乙酉

上駐蹕龍井口○丙戌

上駐蹕三屯營城南率內大臣侍衛射復命三屯營副將蘭泗守備千總等官射○丁亥

上駐蹕灤河岸閱三屯營軍容畢副將蘭泗等及兵丁賞賚有差○福建總督姚啟聖疏報海賊劉國軒犯泉州官兵擊却之賊退據長泰臣會同將軍賴塔等率滿漢官兵進討九月十九日大敗賊於蜈蚣山破其七營斬偽總兵以下四千餘級恢復長泰縣城得旨嘉獎下部議叙○戊子

上駐蹕米峪口率內大臣侍衛等射○己丑上還駐蹕灤河岸○福建總督姚啟聖疏言泉州見有閩浙提標綠旗兵丁二萬一千餘臣屢調會剿海寇迄今無一至者若必俟大將軍王令不免坐失機宜請敕提臣馳赴漳州共圖戰守之策得旨據報巡撫吳興祚提督楊捷等兵及滿洲大兵俱於十月初旬由泉州赴漳州如總督提督調用綠旗官兵必俟啟大將軍王未免遷延誤事嗣後一面調遣一面啟知王等至總督提督皆朕信任封疆大臣務彼此輯睦期於疆場有濟○庚寅

上駐蹕四十里堡○辛卯

上回至湯泉詣

太皇太后行宮問安駐蹕鮎魚池城內○河道總督靳輔疏言黃河自徐州而下南北兩岸堤並清河縣南岸白洋河以下兩岸各堤見在酌量僱修委官設兵防守當此伏秋大水幸皆保固無虞惟是徐州以下雖在大修而上流漫衝以致宿徐等州縣處處被災秋成失望臣擬建減水大壩一十三座則水不湧漲其原估堤工亦可量減且告成之後不特無奪河阻運之虞而沿堤田畝水災亦可永止下部議行○靳輔又疏言淮揚運河出口之處是為清口離淮黃交會之處甚近黃漲即灌進運河以致河底墊高歲須挑淺今臣往來相度必須將清口閉斷從文華寺挑新河至七里閘以七里閘為運口由武家墩爛泥淺轉入黃河如此則運口與黃淮交會之處隔遠運河不為黃水所灌自無墊高之患

矣下部議行○先是安遠靖寇大將軍多羅

貝勒察尼令貝子章泰攻湘陰將軍鄂內以舟師不可分遣止之章泰等還駐九貴山至是鄂內疏言九月十八日北風大作飄我君山扁山船風稍息始得收集飄散之船賊乘鳥船五十餘乘間突出前往湘陰臣等未能擊却比其還入岳州又未能邀阻因請罪得旨克取岳州所繫甚要以數百艘之船特遣將率師斷賊餉道截其水路乃鄂內等目視賊船突出不能阻截及其還入岳州又不能邀殺俾賊出入自如肆無畏忌鄂內等即應嚴加處分但方統率大兵泊湖剿賊俟事平之日嚴察重處鄂內及諸將佐俱令立功贖罪今賊已多集糧餉火藥於岳州或仍應困取及作何進發貝勒察尼等速定議以聞○
癸巳月祭
孝昭皇后○丙申
上詣

太皇太后行宮問安○河道總督靳輔疏言江南淮北各州縣漕糧例徵紅米今自黃流汎濫之後原產紅米之區有田土被淹難耕者有被沙淤而民改種白稻者則應徵漕糧亦當各隨土產之便伏乞敕部將江南省漕糧例徵紅米之各州縣嗣後不必拘定米色紅白兼收永為定例在國儲無損而永便農民矣下部議行○湖廣巡撫張朝珍疏言各路軍前投誠官兵發臣標効力者甚衆其間臧否莫辨請以臣標投誠効力各弁并嗣後自軍前發來官兵分布安插於江南河南內地得旨今值剿撫並用之時若以見在武昌投降官兵安置江南河南恐後此來歸者將疑畏不前大將軍順承郡王貝勒察尼等其勿令若輩聚處隨宜分布安置於湖廣諸處俾各得其所○丁酉

今上皇帝生

上之第十一子也

母曰吳雅氏

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十八

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十七年戊午十一月戊戌朔

實錄卷七十八

上兩詣

太皇太后行宮問安○己亥

上以冬至

郊祀還京率內大臣侍衛大學士尚書三品以

上官詣

孝陵奠酒舉哀畢啟行是日駐蹕薊州城內○

鎮東將軍喇哈達疏言海賊斷江東橋等處

阻截援兵泉州守制在籍翰林院侍讀學士

李光地遣人至臣軍中為大兵鄉導由漳平

縣朝天嶺小路入安溪縣李光地復遣人修

通險道接濟軍需又躬迎大兵文臣為國盡

勞請加議叙得旨李光地當閩地變亂之初

不肯從逆具疏密陳機宜殫竭忠貞今又遣

人迎接大兵指引道路平險隘治浮橋餽食

物餉軍率民兵備辦糧米供給兵衆口糧大

志滅賊實心為國深為可嘉著從優授為學

士○寧南靖寇大將軍多羅順承郡王勒爾

錦疏言先後投誠偽官及房縣來歸之偽總

實錄卷七十八

兵何以敬等雖投劄以示鼓舞而止食兵糧

生計難給得旨何以敬等募化來歸宜令得

所以勵來者其悉予半俸○免江南宿州靈

璧縣本年分水災額賦十之三○予湖廣陣

亡正白旗三等阿達哈哈番署叅領諾爾穆

阿達哈哈番阿哈那郎中夸蘭大鄂通武各

祭葬如例○予故鑲黃旗三等精奇尼哈番

阿喇納祭葬如例○庚子

上駐蹕三河縣西棗林莊○辛丑

上還京詣

皇太后宮問安○予江西陣亡鑲白旗二等阿達哈番佐領阿兩錫正藍旗護軍叅領查布旦鑲黃旗護軍叅領邁蘭佐領多波拖沙喇哈番署叅領殷塔錫湖廣陣亡正黃旗護軍叅領費颺五鑲白旗佐領阿必太王府叅領雅木達陝西陣亡正紅旗二等阿達哈哈番覺羅塞爾圖福建陣亡正白旗三等阿達哈哈番署叅領保納各祭葬如例○壬寅

上詣

皇太后宮問安○甲辰遣刑部侍郎禪塔海等監修岳州戰船○乙巳冬至祀

天於

園丘

上親詣行禮○遣官祭

永陵

福陵

昭陵

孝陵

仁孝皇后

孝昭皇后○停止次日朝賀○免河南上蔡遂平二縣本年分水災額賦有差○予陝西陣亡鑲紅旗副都統二等阿達哈哈番佐領擴爾坤祭葬如例○贈寧夏惠安堡陣亡署守備王標為署都司僉書予祭葬給卹銀廕一子以衛千總用千總吳秀給卹銀廕一子以衛千總用外委守備鄒之櫟千總吳振遇各給卹銀○奮威將軍平涼提督王進寶疏言臣子王用予蒙恩授副將職銜隨征効力又功加署都督同知父子同在秦中例應迴避或准入侍禁旅或赴湖廣江西軍前自備戰馬力圖報効得旨陝西有事之時王進寶父子率領官兵剿殺賊寇保守地方著有勞績今秦省仍屬緊要王用予著留伊父處同守地方○丙午

上詣

皇太后宮問安○

上幸湯泉。是日駐蹕邦均南○陞長史覺羅席卜。為鑲紅旗蒙古副都統○丁未。

上至湯泉詣

太皇太后行宮問安。是日駐蹕鮎魚池城內○諭兵部總督董衛國率師赴廣信剿賊。已三月餘。曾否撲滅。迄今尚未報聞。總督提督封疆大吏楊一豹等。乃廣信一帶山谷小寇耳。宜即為掃除。其令總督董衛國提督許貞速靖餘寇。各還駐所○戊申。

上詣

太皇太后行宮問安○己酉。

上詣

太皇太后行宮問安○庚戌。諭內閣學士噶爾圖屯泰曰。遵化所屬有附近湯泉之婁子山。表格莊啟新莊石家莊。梁家莊。此五莊供辦徭役。其一年地丁錢糧俱令蠲免。如今歲已經徵收。准於來歲蠲免。至鮎魚關城內外居

民七十一家免其一年正供外。仍每戶賜銀二兩。爾等從戶部支取。親閱分給。所蠲錢糧。令州官即徧諭婁子山等莊及鮎魚關居民。務使均沾實惠○辛亥。

上詣

太皇太后行宮問安○先是諭議政王大臣等。吳逆既殞。賊心震動。宜遣吳三桂原屬人員前往招撫。山東按察使何毓秀等十員內擇數人。量加職銜。給以敕書。發大將軍安親王簡親王順承郡王。貝勒察尼。公圖海將軍穆占莽。依圖軍前。或徑令彼等親往招撫。或聽其遣人先通音問。然後身往招徠。其公議發遣。倘有濟於事。仍量功大小。從優議叙。於是議政王等列何毓秀等名具奏。上命加山東按察使何毓秀太常寺卿。工部郎中張光岳太僕寺卿。奉天府治中佟啟聖。通政使司左通政安邱縣知縣胡端。通政使司右叅議行人司行人崔啟元。鴻臚寺卿武鄉

縣知縣齊漳通政使司左叅議各齎敕諭往諸路大將軍軍前招撫陷賊官員兵民敕曰自逆賊吳三桂煽亂以來所在官兵多被誘惑故陷身賊中莫能自拔朕已洞悉情形屢頒敕諭廣示招徠開其自新之路今逆首吳三桂已伏天誅念在彼脅從文武官員兵民人等皆朕赤子素受國家恩養必非甘心從逆或志存忠義遲回待時或勢被迫驅無由歸化朕甚憫焉茲特命爾等齎敕往陝西大將軍長沙大將軍岳州大將軍征南將軍楊威大將軍荊州大將軍等軍前特行招撫爾等曩在滇黔素多親識易於開導必相信從須宣布德音相機勸諭務令陷賊人員翻然悔悟爭先來歸有密謀內應擒斬賊渠及率領兵民獻城納款者俱赦其前罪論功叙錄加恩安插俾令得所煌煌諭旨朕不食言爾等奉茲委任務須殫心籌畫勿失事機或親身徑前招撫或先遣人曉諭後乃親往俱同

各將軍等酌量而行若招撫成功量功大小從優議叙加恩爾等其勉圖報効以副朕定亂安民至意○安遠靖寇大將軍貝勒察尼疏報十月二十二日偽將軍杜輝已養元姜義乘船二百五十艘犯陸石口將軍鄂內等率師分擊大敗之二十九日署副都統葉儲赫等復率師進擊岳州破賊衆萬餘斬首甚衆下部議叙○予湖廣陣亡鑲白旗佐領寨桑正藍旗佐領拜他喇布勒哈番又一拖沙喇哈番俄齊爾各祭葬如例○以副都統品級新滿洲布克投為奉天副都統○壬子
上詣
太皇太后行宮問安○癸丑
上兩詣
太皇太后行宮問安○甲寅
上詣
太皇太后行宮問安○安遠靖寇大將軍多羅貝勒察尼疏言賊屯岳州府城探知其糧餉

已少。頃賊船悉出意在疏通糧道。犯我柳林嘴。鏖戰移時。復有偽帥率衆五千於高家廟渡江。犯我陸石口營。臣增遣署前鋒統領杭琦率兵堵禦之。得旨岳州乃湖南咽喉。如岳州克復。則常德長沙之賊斷難屯踞。蕩平之績指日可期。今湖水漸涸。賊船難出。故由陸路奮死來犯。苟糧無缺乏。豈肯如此屢出衝突耶。以風濤之險。船艦將士雖有傷折。然賊急迫之形已著。貝勒察尼等速宜水陸圍逼。務期克復。○乙卯。

上率內大臣侍衛大學士尚書三品以上官詣孝陵奠酒舉哀。○丙辰。

上奉

太皇太后還京。是日駐蹕牛門口。○丁巳。

上駐蹕稻地里。○免江南壽州虹縣等十八州縣廣東南海縣本年分水災額賦。○予江西陣亡正黃旗一等侍衛署副都統阿喀尼祭葬如例。○戊午。

上駐蹕鄭家莊。○己未。

上駐蹕三河縣南。○庚申。

上駐蹕牛家甫村。○先是安遠靖寇大將軍多羅貝勒察尼疏言。舟師泊湖以來。頻經出戰。礮多壞損。請發江南子母等礮一千送至岳州。又以君山高家廟陸地設營。請調荊州水營總兵官張忠并標兵赴岳。

上皆從之。至是察尼又疏言。今湖水漸涸。陸地漸出。我兵營伍隔絕。恐賊潛通饋餉。請增發滿漢兵。議政王等議不准行。得旨。因取岳州關係重要。據報賊糧將絕。宜以閒地滿兵量調岳州。大將軍安親王赴永興。每佐領兵二名。已經撤回。今長沙事機少緩。可發每佐領兵或二人或三人赴岳州。江西總督董衛國標下官兵選調二千五百人。就近由銅鼓經武昌赴岳州。營於要地。庶有裨於軍事。此兵俱聽大將軍貝勒察尼等調遣。○免江南霍邱縣本年分水災額賦十之一。○辛酉。

上奉

太皇太后回宮。詣

皇太后宮問安。○予湖廣陣亡正白旗護軍叅

領薩圖陝西陣亡鑲紅旗護軍叅領佐領古

布察各祭葬如例。○壬戌。

上御太和殿視朝。文武陞轉各官謝恩。次厄魯

特進貢使臣等行禮。○

上詣

太皇太后

皇太后宮問安。○揚威大將軍和碩簡親王喇

布疏言。臣欽遵

上諭。率內大臣阿密達前鋒統領希佛學士薩

海副都統寶柱署副都統雅哈喇雅泰等并

滿漢官兵進討。留署前鋒統領薩克察巴圖

魯副都統馬錫泰署副都統額思赫楊古代

等并滿漢官兵。於將軍穆占所協同鎮守。但

茶陵攸縣諸處接壤江西。止以此兵鎮守。力

甚單弱。而臣隊進討之兵。又不便再留。恐大

兵長驅前進之後。賊以大隊來犯。地方不無可虞。得旨簡親王帥每佐領兵九人進征。留每佐領兵一人防守。江西總督董衛國提督許貞進剿廣信諸處餘寇。建昌又有總兵官陳平駐守饒州。逼近廣信。董衛國等既撲剿廣信山寇。其饒州總兵高登科悉統標兵馳赴茶陵攸縣諸處協守。○癸亥。月祭

孝昭皇后。○授福建提督楊捷為昭武將軍。仍管福建陸路提督事務。調京口將軍伯王之鼎為福建水師提督。○以阿祿科爾沁故多羅郡王朱爾扎哈子色楞襲爵。○予湖廣陣亡鑲黃旗二等侍衛署叅領勒提奚陝西陣亡鑲藍旗佐領和濟格爾各祭葬如例。○丙寅。先是將軍額楚抵藤縣疏言。兵多病疫。奉有病者未蘇。可移師去藤之旨。至是額楚疏言。鬱林容縣潯州賊衆聲言三路來犯。大兵不可動移。但臣兵多病疫。見存無幾。請增遣大兵以備進剿。得旨額楚仍駐藤縣。將軍舒

恕於南雄韶州兩處兵內擇有馬者每佐領各一人發額楚軍

十二月丁卯朔

上詣

太皇太后宮問安○戊辰予陝西出征病故三等阿思哈尼哈番署副都統達禮善巴圖魯祭葬謚武毅○己巳免直隸任縣等九縣河南汝陽等二縣本年分旱災額賦有差○寧南靖寇大將軍多羅順承郡王勒爾錦疏言臣所部滿漢兵緣諸路調發見存無幾倘賊窺知我兵攻取岳州竊犯荊州以圖牽制臣等兵單難保無虞乞許臣募綠旗兵萬二千入悉充鎗手以資防禦得旨順承郡王既言荊州兵單宜如所請并會同督撫擇戮力行間有才能者授職管轄兵丁所需交鎗令工部發去如需用輕礮王等具疏以聞○予陝西陣亡鑲藍旗佐領拖沙喇哈番查哈代正藍旗佐領三等阿達哈哈番塔爾尼各祭葬

如例○予陝西出征病故鑲紅旗二等精奇尼哈番渾津祭葬如例○辛未予福建陣亡正白旗二等侍衛署叅領拜思祐朗祭葬如例○癸酉

上詣

太皇太后宮問安○予江西陣亡正白旗一等侍衛署叅領梅黑納湖廣陣亡鑲紅旗佐領克什克各祭葬如例○甲戌

上詣

太皇太后

皇太后宮問安○兵部尚書王熙丁父憂翰林院掌院學士陳廷敬丁母憂吏部奏聞上諭大學士等曰滿大臣有喪特遣大臣往賜茶酒滿漢大臣俱係一體漢大臣有喪亦應遣大臣往賜著大學士明珠翰林院掌院學士喇沙里等攜茶酒往賜○奉命大將軍和碩康親王傑書疏報都統賴塔等率領滿漢官兵於十月二十七日敗賊於柯鏗山萬松

關副都統紀爾他布總督姚啟聖提督楊捷等敗賊劉國軒於江東橋又敗之於潮溝之間副都統胡圖敗賊吳淑於石衛寨斬獲無算盡奪賊寨打沉賊船得旨嘉獎下部議叙○乙亥陞都察院左都御史郭四海為兵部尚書○丙子

上詣

太皇太后

皇太后宮問安○調刑部尚書宋德宜為兵部

尚書○免河南西平縣本年分旱災額賦十分之三○予陝西陣亡正紅旗監察御史聶爾古正白旗前鋒校阿寧安各祭葬如例○予陝西出征病故正白旗副都統俄泰祭葬諡襄壯○陞副都統楊鳳翔為京口將軍○丁丑

上詣

太皇太后宮問安○予陝西陣亡正藍旗佐領恩客佐領委署叅領肯哲各祭葬如例○陞

出征鑲紅旗護軍叅領苗齊納為蒙古副都統○庚辰

上詣

太皇太后宮問安○陞都察院左副都御史金鉉為兵部督捕右侍郎○以右春坊右中允吳珂鳴提督順天學政以兵部郎中楊鍾岳為福建按察使司僉事提調學政戶部郎中吳子雲為河南按察使司僉事提調學政戶部郎中詹惟聖為江西按察使司僉事提調學政禮部郎中桑開運為山東按察使司僉事提調學政刑部郎中劉果為江南按察使司僉事提調學政工部郎中劉霖為浙江按察使司僉事提調學政戶部郎中劉梅為山西按察使司僉事提調學政免江南潁州本年分水災額賦有差○予湖廣陣亡正藍旗拖沙喇哈番準泰正白旗護軍叅領佟安各祭葬如例○辛巳

上詣

太皇太后宮問安○頒日講四書解義於滿漢文武大臣○免江南海州宿遷等十三州縣衛本年分水災額賦○予故原任太子太保禮部尚書王崇簡祭葬謚文貞○予陝西陣亡正藍旗三等阿達哈哈番朔色湖廣陣亡拖沙喇哈番納達里七十三韓褚漢各祭葬如例○壬午陞吏部右侍郎劉捷為刑部尚書○甲申。

上奉

太皇太后幸南苑駐蹕○乙酉。

上詣

太皇太后行宮問安○陞翰林院侍講學士葉方藹為翰林院掌院學士兼禮部侍郎○丙戌。

上詣

太皇太后行宮問安○免湖廣興國等八州縣本年分水災額賦有差○丁亥鎮南將軍莽依圖疏報十二月初三等日逆賊來犯將軍

額楚傳弘烈率兵接戰失利營壘俱陷藤縣失守見存兵力甚薄梧州勢危得旨令梧州可虞大將軍平南王尚之信不必往湖南徑赴梧州與莽依圖等商酌調遣官兵并力剿賊以靖地方如王斷不可離省即速選精兵馳赴又韶州南雄已為內地將軍舒恕可率領每佐領兵二人急赴梧州至將軍額楚傳弘烈等見在討賊俟事平旋師日察議○靖逆將軍甘肅提督侯張勇疏言噶爾丹雖有與默得里蒙古結姻之信但世為仇讐恐爭西海之地甘肅兵單而臣且前赴秦鞏倘兩相戰攻內地難保無事肅州當彼往來之衝宜增兵鎮守得旨大將軍公圖海等身在地方輕重緩急是所悉知應否調總兵官一員暫往鎮守肅州與總督哈占及張勇公議酌行○戊子。

上詣

太皇太后行宮問安○順天府進春○以故三

等阿思哈尼哈番穆庫禮子席喇爾代襲職

○免江南鹽城縣本年分水災額賦十之三

○己丑。

上詣

太皇太后行宮問安○庚寅。

上奉

太皇太后自南苑還宮○先是偽將軍杜輝遣

偽叅將林寧等奉書請降。安遠靖寇大將軍

貝勒察尼等慰諭約期遣回。至是詹事宜昌

阿疏言偽總兵陳華李超率文武官兵兵丁

等投誠。據稱杜輝等事泄。同謀諸人俱被吳

應麒殺死。得旨陳華李超等感戴國恩。與偽

將軍杜輝共約歸正。事泄杜輝被殺。陳華李

超仍來投誠。殊屬可嘉。俱授為都督同知總

兵官。支全俸。留大將軍貝勒軍前俾招徠賊

黨。所屬官兵按原品支俸。家口隨彼等所欲

安插得所○諭兵部陳華李超外投誠官內

擇語言明晰洞曉賊情者二人。令隨詹事宜

昌阿筆帖式馬爾泰馳驛來京○先是。

上命江西總督董衛國率兵往防銅鼓營。至是

董衛國疏言銅鼓營地方寧靜無事。增防逆

賊盤踞岳長。臣願親領標兵五千。更調江西

各營兵數千。赴楚効力。得旨董衛國以銅鼓

營無虞。願親率標兵赴楚効力。可嘉。宜如所

請。統所屬官兵馳赴岳州。多備火器。挨牌鹿

角攜往。擇賢能官留守江西。酌調本省兵接

續前進。其標下官兵勿令分撥他處。聽自統

全部以行○詹事宜昌阿疏言。見今賊糧已

絕。偽屬官兵相繼歸誠。搜獲逆賊往來文書

俱係調諸路逆賊援岳之事。今并賊書密咨

兵部。得旨逆賊食盡勢窮。調取援兵。大將軍

貝勒等宜約會鎮守諸要路。將軍大臣嚴緝

奸細。俾賊內外音問不通。固我營壘。以禦來

援之賊。務期克取岳州。并檄趣江西總督董

衛國速行馳赴○免江南徐州沛縣等四州

縣本年分水災額賦○贈福建殉難南安縣

知縣宋煜為按察使司僉事予祭葬廕一子入監讀書○辛卯

上御太和殿視朝文武陞轉各官謝恩○

上詣

太皇太后

皇太后宮問安○月祭

孝昭皇后○調工部左侍郎董安國為吏部右

侍郎○免江西寧州南昌等六州縣南昌九

江二衛本年分旱災額賦有差○予故鑲白

旗三等阿思哈尼哈番賴達哈巴圖魯祭葬

如例○甲午

上詣

太皇太后宮問安○乙未歲暮禋祭

太廟

上親詣行禮○遣官祭

永陵○

福陵○

昭陵○

孝陵○

仁孝皇后○

孝昭皇后○遣官祭太歲之神○鎮南將軍莽

依圖疏言臣檄大將軍平南王尚之信率兵

來援梧州尚之信報稱見赴湖南會剿無兵

可遣臣思梧州為廣東門戶逆賊近屯榕樹

灘如尚之信不來援地方深為可慮得旨近

已有旨命尚之信不必赴湖南今莽依圖既

以梧州勢迫為言尚之信其親統官兵馳往

梧州剿禦逆賊○撫遠大將軍都統大學士

公圖海疏言今秦省諸要隘守禦已固省城

備有援師臣欲輕騎赴京面奏事宜得旨圖

海檄大將軍敕印前來吳丹仍佩將軍印暫

統大兵○丙申

上詣

太皇太后

皇太后宮問安○旌表八旗節婦滿洲瓦海妻

溫氏等十九人○漢軍成其美妻曹氏等四人○

烈婦滿洲阿蘭泰妻殷氏一人。各給銀建坊如例。○是歲。人丁戶口一千六百八十四萬五千七百三十五。田地山蕩畦地五百六萬四千七百九十二頃八十七畝。徵銀二千一百九十五萬三千五百四兩二錢有奇。米豆麥六百二十萬九千三百四十五石二斗有奇。草二百二十四萬二千六百一十九束。茶十五萬五千三百六十五引。行鹽三百九十三萬二千六百三十引。徵課銀二百三十九萬五千六百七十五兩八錢有奇。鑄錢二萬三千一百三十六萬五千三百六十有奇。

實錄卷七十九

七十九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十八

實錄卷七十八

七十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十九

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未春正月丁酉朔

實錄卷七十九

上詣

堂子行禮還宮拜神畢率諸王貝勒貝子公及內大臣大學士都統尚書精奇尼哈番侍衛等詣

太皇太后

皇太后宮行禮御殿王以下文武各官外藩王及使臣等上表朝賀照例筵宴○朝鮮國王李焞遣陪臣李樞等表賀冬至元旦

萬壽節及進歲貢禮物宴資如例○

上詣

太皇太后

皇太后宮問安○庚子。

上詣

太皇太后宮問安○癸卯。

世祖章皇帝忌辰遣官祭

孝陵○陞太僕寺卿楊雍建為都察院左副都

御史○免浙江西安等五縣康熙十七年分

旱災額賦有差○予長沙陣亡拖沙喇哈番

實錄卷七十九

吳哈納祭葬如例○平南王尚之信疏報康

熙十七年十二月初三日瓊州水師副將王

珍等率領水陸官兵大破海逆楊二等於山

墩地方下部議叙○甲辰

上詣

太皇太后宮問安○免江南宿遷桃源二縣康

熙十七年分水災額賦十之三○乙巳予故

寧古塔副都統三等阿達哈哈番尼哈理祭

葬如例○山東巡撫趙祥星疏言康熙十七

年。東省雨澤愆期。秋成歉薄。除見在賑濟外。請將常平倉穀。贖醵積穀。動支接賑。得旨。據奏山東米價騰貴。百姓饑饉。深軫朕懷。該撫速委地方賢能官員。動支倉穀賑濟。以救飢民。副朕愛民至意。○安南將軍覺羅舒恕疏言。南雄為兩廣咽喉。三省接壤。見在滿漢官兵無多。南安諸處。又安插新附之人。一有不測。全省皆屬可虞。得旨。粵省見在緊要。漕運總督帥顏保。總兵官哲爾肯。各選撥標下兵

平定文三九

一千名。令賢能官員管轄。速往南雄府。此官兵到日。副都統薄濟總統之。防守地方。○湖廣提督桑峨疏報。招撫岳州偽遊擊劉鵬等。文武官七十五員。下部議叙。○丙午。孟春。享太廟。

上親詣行禮。○遣官祭太歲之神。○丁未。

上詣

太皇太后

皇太后宮問安。○陞江西贛州副將周球。為山

西太原總兵官。○戊申。諭戶部。山東河南二省被災。民致饑饉。深軫朕懷。若不亟行賑救。則百姓恐致流離。侍郎察庫。前往河南省。侍郎薩穆哈。前往山東省。會同該巡撫等。確查被災輕重之處。無論正項錢糧。或漕糧。或一應雜項錢糧。酌動賑給飢民。務使得所。勿致流離。以副朕軫恤百姓至意。○安遠靖寇大將軍多羅貝勒察尼疏言。岳州調發兵六千名。請設隨征左右前後四營總兵官分轄。

平定文三九

上從其請。以副將李師膺。為湖廣岳州隨征左營總兵官。柯彩。為隨征右營總兵官。都督同知陳華。為隨征前營總兵官。李超。為隨征後營總兵官。○己酉。安徽巡撫徐國相疏言。鳳陽旱災。請設法賑濟。并動鳳陽倉康熙十六年存穀二萬石。就近分給。得旨。據奏鳳陽地方被旱災黎。衣食無資。深軫朕懷。該撫即速親往。督率所在賢能官賑濟。以救飢民。副朕愛民至意。○庚戌。

上詣

太皇太后宮問安○辛亥祈穀於

上帝。

上親詣行禮○廣東廣西總督金光祖疏報廣西藤縣失陷逆黨愈肆狂逞水程三路逼犯梧州。

上命大將軍平南王尚之信將軍舒恕即遵奉前旨親統官兵倍道速往梧州應援○壬子上詣

太皇太后宮問安○揚威大將軍和碩簡親王喇布疏言停進剿永州耒陽臣等兩起兵內將有馬兵丁每佐領選出三名遣發岳州得旨此兵不必發往岳州令於自京發去護軍驍騎內簡閱有馬堪用者每佐領二名以大臣一員統之速往長沙軍前○先是議調總兵官高登科率其標下官兵協守茶陵攸縣諸處至是巡撫佟國楨疏言逆孽攻陷德興侵逼樂平該府縣官力請留鎮臣駐守饒郡

上命高登科及部下官兵不必調遣湖南仍留

饒郡與該巡撫提督等公商速復德興務滅逆寇○平南王尚之信疏報副都統金榜選等率兵剿雷州土寇於康熙十七年十一月十四日攻開草塘關二十一日敗偽副將陳奇等恢復徐聞縣城追賊至海安偽副將葉可昌等棄城登舟二十三日恢復錦囊城斬賊一百七十餘名救回難民共萬餘口瓊州路通得旨嘉獎下部議叙○乙卯陞左副都御史朱裴為工部右侍郎○封多羅平郡王羅可鐸子納爾圖為長子鎮國公蘭布子吳由為輔國公授鎮國公託克托慧子楊福輔國將軍伯奇子阿齊圖俱為奉國將軍多羅貝勒尚善庶出子塞爾奇為奉恩將軍○丙辰。

上詣

太皇太后宮問安○丁巳調鑲紅旗蒙古都統鎮國公蘇努為滿洲都統○寧南靖寇大將

軍多羅順承郡王勒爾錦疏言。新增兵一萬二千名。請設隨征前後左右四營總兵官分轄。

上從其請。以副將葛秉貞為湖廣荊州隨征前營總兵官。蘭泗為隨征左營總兵官。姚珩為隨征右營總兵官。胡世英為隨征後營總兵官。○戊午。戶部議覆。河南道御史孫必振疏言。河南山東水旱頻仍。粟價騰貴。請將兩省歲輸粟米五十餘萬石。暫徵折色一半。應如所請。俟年歲稍登。仍全徵本色。從之。○己未。

上詣

太皇太后宮問安。○以內閣學士李天馥。國子監祭酒馮源濟。俱充經筵講官。○安遠靖寇大將軍多羅貝勒察尼。詹事府詹事宜昌阿等疏報。逆賊吳應麒等竊踞岳州。堅壘死守。前奉

聖諭。籌畫機宜。指授方畧。命臣等多調舟師。水陸圍困。斷其糧道。逆賊勢蹙。偽總兵王度冲。

偽將軍陳珀等。於本月十八日。各以其舟師來降。吳應麒等棄城遁。遂復岳州。

上諭。大兵既取岳州。逆賊震動之際。其令諸路大將軍王。貝勒等。剿撫兼施。賊有悔過投誠者。免罪叙功錄用。將此恩意。舉行曉諭。○庚申。以和碩額駙諾穆圖為鑲藍旗漢軍副都統。○廣東提督侯襲爵疏言。廣東潮州與閩省接壤。逼近大海。諸島逆孽。窺伺汛兵單弱。請將潮州鎮標中營官兵五百餘。及大埔營官兵六百。潮州水師總兵官一員。並左右二營官兵二千名。照舊復設。以資彈壓。

上允其請。以候補總兵官劉顯芳為廣東潮州水師總兵官。○壬戌。河南巡撫董國興疏言。陳留等二十一州縣災疫並行。請發州縣存貯米粟賑救。得旨。著先差往汝陽等處賑濟。官員會同該撫。速行設法賑濟。○予出征岳州病故都統一等阿達哈哈番肯齊赫祭葬如例。○諭兵部。朕聞大將軍順承郡王。以提

督佟徽年侵剋兵餉八百兩。遂羈繫之。提督乃國家大臣。王何得私行羈繫。况佟徽年原係世家。豈肯私行侵剋。此事當詳察之。○奉命大將軍和碩康親王傑書疏報。逆賊劉國軒等率賊兵八千。至郭塘歐溪頭地方立營。欲斷江東橋以犯長泰。都統賴塔與總督姚啓聖提督楊捷等統領滿漢官兵直逼賊營。令副都統紀爾他布巡撫吳興祚等領兵擊之。大敗逆賊劉國軒。吳淑。何佑等追至江邊。斬首二千餘級。生擒偽總兵一名。偽副將二名。獲器械無算。下部議叙。○甲子。以翰林院侍講學士嚴我斯充日講起居注官。○予秦州陣亡西安佐領飛黑齊祭葬如例。○諭兵部。項筆帖式馬爾泰去時。令其傳諭諸將軍。今岳州既經克復。應發兵一支。從荊河口渡江。立營於華容石首之地。以為根基。若由華容石首前往常德澧州。一路水潦難行。且諸將軍亦曾奏此路水澤甚多。艱於前進。今在

岳州滿漢官兵甚多。宜乘賊未及固守湘陰之先。水陸並進。乘機急取湘陰。即望長沙進發。若少遲疑觀望。則賊堅守城池。湘陰江中水洲。恐賊立營其上。預備火器。我舟師欲過甚難。不可不乘其未及堅守城池江洲之先。急取湘陰也。岳州地最險阻。偏師足守。其取湘陰。往長沙。應令貝子章泰署前鋒統領杭奇率每佐領滿洲甲兵十名。提督桑峨總兵官萬正色。全率所部兵。并多發綠旗兵整備。大礮烏鎗火器。水陸夾攻。著行文大將軍貝勒。及安親王等知之。○乙丑。皇子萬黼薨。○諭大學士等。今正剿滅逆孽之時。議政王大臣等。如有滅寇事宜。及應行應革事。各行意見。即在會議處敷陳奏聞。以便酌量採擇施行。爾等其傳諭議政王大臣等。二月。丙寅朔。鎮南將軍莽依圖疏報。逆賊吳世琮等犯梧州。臣同傅弘烈等率滿漢官兵拒戰。大敗之。賊棄營夜遁。下部議叙。○丁卯。

遣大學士明珠祭

先師孔子○陞宗人府府丞馬汝驥為都察院左副都御史○陞王府長史馬緝為鑲白旗護軍統領○予故護軍統領額司泰祭葬如例○撫遠大將軍都統大學士公圖海自陝西軍中來京

陞見。

上遣禮部侍郎額星格齋茶酒出德勝門迎勞之○戊辰祭

大社

大稷。

上親詣行禮○定遠平寇大將軍和碩安親王岳樂等疏報岳州恢復長沙逆賊震恐不能久立於正月二十九日棄城潛遁我師遂入城安撫人民下部知之○安塘筆帖式報大將軍安親王岳樂已復長沙今亟進取衡州移咨大將軍多羅貝勒察尼令酌撥烏船沙船及官兵察尼遂遣自荊州來水師營總兵

官張忠等率綠旗官兵三千八百沙船一百快船八十前赴長沙。

上諭賊失岳州長沙諸要地正當驚惶騷動之時乘機進取衡州擊滅逆賊殊為要務宜將岳州所有大兵并船礮速行多撥增發大將軍安親王軍前大將軍貝勒察尼等除先遣總兵官張忠標兵外今更速發滿洲大兵多撥船礮迅赴長沙既而安親王岳樂等疏報賊離衡山縣二十里許水陸立營。

上復諭宜乘賊寇驚動之際速取衡州此剿滅衡州賊衆較諸處不同所調岳州舟師火器早至一日於大事有一日之益調遣船礮官兵如或稍遲使賊江中置樁預為堅守阻我舟師致遲進取衡州事機則皆貝勒察尼誤之也諭到貝勒察尼即撥舟師火器速發安親王軍前於滅賊機宜勿致有誤其大將軍簡親王等亦已率兵進取衡州兩軍相合之後總用大將軍安親王印信協力剿滅逆孽

恢復衡州諸路。如有分兵之處。仍各用大將軍印信施行。○己巳。

上詣

太皇太后

皇太后宮問安。○諭戶部。江西舊欠錢糧。屢經督撫及科道等官奏請蠲免。朕已洞悉。但當逆賊煽亂之時。各省地方與賊接壤者。被其侵犯。迫而從逆。情非得已。故於平定之後。其舊欠錢糧。悉行蠲免。江西於賊未到之先。地方奸徒。輒行倡亂。廣信。南康。饒州。奉新。寧州。宜黃。安仁。永新。永豐。彭澤。湖口。廬溪。玉山。鉛山等處。所在背叛。忠義全無。紳衿兵民人等。或附和嘯聚。抗拒官軍。或運送糧米。助張賊勢。或布散偽劄。煽誘良民。或窩藏奸細。潛通消息。輕負國恩。相率從逆。以致寇氛益熾。兵力多分。遲延平定之期。勞師費餉。揆厥所由。良可痛恨。即今田廬蕩析。家室仳離。皆其自作之孽。通賦未蠲。職此之故。但思逆寇漸經

殲除。地方凋敝。舊欠追比。民困愈深。朕心殊為不忍。其康熙十六年以前舊欠錢糧。著盡行蠲免。爾部即行該督撫。通行曉示。務使小民均沾實惠。以昭朕愛養百姓至意。○陞大理寺寺丞施維翰。為太僕寺卿。○贈肇慶陣亡建城守備翟永昌。為署都司僉書。予祭葬。給卹銀三百兩。廕一子。以衛千總推用。○禮部題。朝鮮國貢使失火。燒燬布疋。應行文令該國王察議。其布疋下次補進。得旨。使臣免察議。布疋亦免補進。○庚午。

上御太和殿視朝。文武陞轉各官謝恩。次喀爾喀進貢使臣行禮。○辛未。以大學士馮溥。兵部尚書宋德宜。為會試正考官。翰林院掌院學士葉方藹。都察院左副都御史楊雍建。為副考官。○調鑲白旗蒙古副都統恰塔。為滿洲副都統。○壬申。陞太常寺卿焦毓璠。為通政使司通政使。○癸酉。

太皇太后聖壽節。遵

懿旨以朝

日齋戒。更於初十日行禮。○甲戌春分朝

日於東郊。遣都統賽音達禮行禮。○

上詣

太皇太后宮問安。○先是海逆鄭錦乘耿精忠叛竊據漳泉諸郡。後耿精忠降。諸郡以次收復。鄭錦屢敗。仍遁入海。而廈門金門猶為所據。

上欲乘勝蕩平海逆。乃厚集舟師。規取廈門金門二島。以圖澎湖臺灣。又以曩時征取廈門金門。曾用荷蘭國夾板船。特諭荷蘭國王。令具夾板船二十艘。載勁兵協力攻取二島。至是奉命大將軍和碩康親王傑書等議奏。戰艦水師未備。荷蘭國舟師又不能預定來會時日。海賊見據海澄廈門之固。勢難急圖。上諭征剿海寇。調發滿洲綠旗官兵甚多。福建經制兵外。又增兵數萬。授水陸提督為將軍。以統之。宜乘此兵力。速行進討。若如大將軍

康親王所奏。需以歲月。則供億煩費。必將撤還大軍。海寇何由殄滅。其令康親王會同將軍總督巡撫提督等詳議以聞。○安遠靖寇大將軍多羅貝勒察尼等疏言。賊渠吳應麒等從岳州遁去。輔國公溫齊等率兵追殺二百餘里。斬賊甚多。我兵因未攜燹具而還。上責之曰。逆賊吳應麒等迫於饑餓。徒步敗遁。我騎兵追躡二百餘里。因未攜燹具。遂爾還師。並未大敗賊衆。岳州雖得。不過賊所棄之空城。而窮寇吳應麒究未擒斬。朕心未愜。今以追殺賊衆地方里數度之。虛實即立見矣。○平南王尚之信等疏言。臣等共議將軍莽依圖。舒恕等同將軍傅弘烈守梧州。臣駐封川縣。總督金光祖駐肇慶府。將軍額楚等駐德慶州。如有機會。一面奏聞。一面舉行。上諭今長沙岳州諸處俱已恢復。偽將軍總兵文武官員。船艦兵卒來歸者甚衆。又彝陵州對岸之鎮荊山。盤踞賊寇。盡行潛遁。分逐諸

路潰敗之賊。多所斬戮。大將軍順承郡王等已渡江平定湖南。安親王又進取衡州諸處。宜乘此各路賊寇渙解之際。平定廣西。大將軍平南王尚之信。將軍莽依圖。舒恕。額楚。傅弘烈。總督金光祖等。勿失事機。速定廣西。○安遠靖寇大將軍多羅貝勒察尼疏報。都統覺羅朱滿等。率兵抵湘陰。環城立營。正擬攻取。賊衆棄城遁。我軍分二隊追擊。擒斬賊兵無算。恢復湘陰縣城。得旨嘉獎。下部議叙。○湖廣提督桑峨疏報。臣與撫遠將軍固山貝子章泰各領滿漢官兵。進取華容。石首。二縣。賊衆望風棄城奔竄。我兵遂入城。下部知之。○厄魯特噶爾丹台吉等遣使進貢。賞賚如例。○乙亥。

上率諸王。文武大臣侍衛等詣太皇太后宮。補行慶賀禮。親撰表文詩篇。書萬壽無疆扁額恭進。表文曰。伏以時值陽和。萬國祝呼嵩之盛。天開旭景。千秋樂無疆之休。

山川獻瑞於

慈宮。八方同慶。河漢呈祥於

內殿。四海咸清。遠通

尊親。寰宇忻忭。恭惟

聖祖母昭聖慈壽恭簡安懿章慶敦惠溫莊康和仁宣太皇太后陛下。性成仁聖。德配坤貞。日月並光。昭率土而作範。雨露浹洽。明物理而垂恩。遇佳節於雍熙。被春風之浩蕩。壽祉綿洪。億禩。福星臨耀。兆年昭淑。美之弘規。崇高厚之懿訓。岡陵擬頌。進扁額以敷揚。葵藿申誠。賦詩詞而拜舞。懽生丹陛。喜溢彤墀。臣服膺

誨言。仰承咻煦。實邦家之共戴。顧慈孝之相成。伏願純嘏尤繁。錫齡彌廣。瑤池稱北斗之樽。寶冊上南極之籙。臣踴躍懽忭之至。謹奉表稱賀以聞。詩曰。和風瑞氣滿簾櫳。

慈壽無疆。祝上官。喜得萬方同孝養。千秋福德並蒼穹。透戶卿雲接御香。彤墀新柳拜韶陽。

宮中堯舜兼文母。恭捧南山萬壽觴○

上御經筵○命江西總督董衛國率標下官兵速赴大將軍安親王軍前。聽王調度。協力進取衡州諸處○奉命大將軍和碩康親王傑書等疏言。據福建總督姚啓聖等啓。進取廈門金門。須發江浙巨艦二百艘。增閩省兵二萬。迅調荷蘭舟師來會。方可大舉。進剿之期。必俟入秋。北風起後。彼時戰艦師旅。一切不悞。自能奏功。得旨。翦滅海寇。事綦重要。其令江南浙江總督京口將軍。發江浙戰艦各百艘。於進剿期內。送至福建。仍許福建增兵二萬。大將軍康親王等。并檄荷蘭國。迅調舟師。務令如期而至○丙子。

孝康章皇后忌辰。遣官祭

孝陵○定遠平寇大將軍和碩安親王岳樂疏報。前鋒叅領沙納哈等。率兵至湘潭。賊望風驚遁。恢復縣城。得旨嘉獎。下部議叙○丁丑。

上詣

太皇太后宮問安○

上幸南苑行圍○戊寅。陞湖廣驛鹽道余三綬為山東按察使。司按察使○己卯。郭爾羅斯輔國公昂阿故。遣官致祭○庚辰。上還宮。詣

太皇太后宮問安○寧南靖寇大將軍多羅順承郡王勒爾錦疏言。臣兵在彝陵諸處。更番來往。水土不宜。致馬多斃。請以近地所備馬。速行撥給。以資進剿。得旨。茲正前往征剿之際。於武昌預備馬內。撥一千匹。委才能官員速送。大將軍順承郡王軍前○予岳州陣亡叅領二等阿達哈哈。番薩賴。等。阿達哈哈。番署叅領西巴里。各祭葬如例○辛巳。寧南靖寇大將軍多羅順承郡王勒爾錦疏報。臣聞岳州賊潰。即遣署都統多莫克圖等。率師前進。於正月二十七日渡江。太平街虎渡口諸賊。悉皆潰遁。臣率大兵於二十九日渡江。次元始。於是前隊官兵。分路追剿。松滋枝江。

宜都諸縣及澧州。以次恢復。守百里洲。偽將洪福率舟師。繳偽印劄。降。得旨嘉獎。下部議叙。○諭議政王大臣等。今岳州彝陵之賊。以舟來降。長沙之賊。焚舟潰遁。諸處賊寇。因感逃竄。無有舟楫。宜固守荆襄。乘機速滅賊黨。貝勒察尼。酌留官兵於岳州。水陸齊進。速會順承郡王軍。合力亟取常德。沅州。鎮遠。諸處。至恢復常德。諸郡之後。順承郡王勒爾錦。貝勒察尼等。會同安親王。簡親王等。作何進取雲貴。定議具奏。其大兵進討雲貴。宜設將軍。總督巡撫。提督。隨大兵進征。吏部。兵部。開列應補者。以聞。尋吏部。兵部。以應補官列名具奏。

上諭雲南將軍。不必添設。可調湖廣提督桑峨。為雲南提督。湖南提督趙賴。為貴州提督。四川總督周有德。為雲貴總督。以原任雲南巡撫李天浴。為雲南巡撫。副都御史楊雍建。為貴州巡撫。○予岳州陣亡署叅領三等阿達。

哈哈番巴圖。拖沙喇哈番阿爾賽。各祭葬。如例。○予故副都統三等阿思哈尼哈番。署前鋒統領喇住。祭葬。如例。○壬午。

上詣

太皇太后

皇太后宮問安。○諭吏部。朕以萬幾之暇。留心經史。思得博學鴻儒。備顧問。著作之選。故特頒諭旨。令內外諸臣。各舉所知。膺薦人員。已經陸續到部。欲行考試。因天寒晷短。恐其難於屬文。弗獲展厥蘊抱。今天氣已漸融和。應定期考試。所有合行事宜。爾部會同翰林院。詳議具奏。○予岳州陣亡佐領委署叅領渾蓋。佐領顧英。各祭葬。如例。○癸未。予吳逆下投誠事洩。被戮偽將軍杜輝。祭一次。○甲申。遣官祭先農之神。○撫遠大將軍都統大學士公圖海。仍赴陝西。

上遣禮部侍郎楊正中。齎茶酒。送之於廣寧門。

外○予岳州陣亡佐領薩爾渣均州陣亡佐領署叅領王秉仁南漳陣亡佐領羅世潤各祭葬如例○乙酉。

上諭刑部民間鬻身為廝養者多藉口投充營伍挾制家長勒索身契及妻子財物又有桀黠之徒乘戎馬往來之際發人塚墓或利所有或挾私仇其情罪尤屬可惡著嚴議具奏尋議背主投營勒索身契及妻子財物者照光棍例治罪其無挾制勒索等情者枷責給還家長乘機發塚見棺毀棺見屍索財取贖者論流徙絞斬如律又營將知其背家長而不舉發者分別專管兼轄統轄謫調鐫級有差不知而不舉發者奪俸從之○陞護軍統領夸札為鑲紅旗蒙古都統○丙戌安遠靖寇大將軍多羅貝勒察尼疏報提督桑峨遣守備吳榮進取安鄉縣賊衆悉遁偽員外郎等三員詣軍前投誠下部知之○旌表直隸烈婦傅華祝妻劉氏楊煜妻胡氏各給銀建

坊如例○己丑清明節遣官祭

永陵。

福陵。

昭陵。

孝陵。

仁孝皇后。

孝昭皇后○庚寅。

上至鞏華城行

孝昭皇后期年致祭禮是日回宮○壬辰寧南

靖寇大將軍多羅順承郡王勒爾錦等疏報是月十四日臣抵澧州遣固山貝子準達等率領官兵進取常德未至之先賊縱火焚城中廬舍并江中船艦而遁偽按察使陳寶鎬等迎降我師於十八日入常德府城下部知之○勒爾錦又疏報慈利石門二縣九溪永定二衛偽總兵黃志功偽巡撫李益陽等率衆投誠並繳偽敕印劄下部知之○癸巳遣官祭

歷代帝王○以原任奉天府府尹耿効忠為順天府府尹○吏部議覆都察院左都御史魏象樞條奏學道考試十弊。一童生府考無名。徑取入學。二額外溢取童生。撥發別學。三私查印簿。某卷某號即某人。以便賄賣。四解部冊籍遲延。更改等第。五先開六等草單。嚇詐保等銀兩。六將文章充武童。入學後。夤緣改武為文。七將生童遠調考試。八縱容教官包攬通賄。九曲徇情面。孤寒棄斥。十將額外溢取童生。混附生員冊內報部。以上十弊。允當嚴禁。應如所題。嗣後考核學道。俱注剔除十弊具題。從之。○甲午。吏部議覆。江西巡撫佟國楨疏報。楊梅土城。被賊眾圍困焚殺。巡檢宋淶。奮身拒賊。夫婦子姪并僕六人。同被焚死。情堪憫惻。應照例贈主簿。從之。○揚威大將軍和碩簡親王喇布疏報。臣遣前鋒統領希佛等。率官兵進取衡州。是月十三日夜半。抵城下。署前鋒叅領戴屯等。奪門入城。逆

賊吳國貴。身國相等驚遁。恢復府城。得旨嘉獎。下部議叙。○廣東廣西總督金光祖疏言。廣西舊設提督標下官兵四千六百餘人。自馬雄變後。未及復設。當此用兵之際。必仍設提督。總統水陸之兵。方於戰守有賴。其提標應設官兵。即於廣西見在各營抽撥補入經制。

上從其請。陞南贛總兵官哲爾肯為廣西水陸提督總兵官。○乙未。

上詣

太皇太后

皇太后宮問安。○皇子生。逾期年而薨。未命名。○陞光祿寺卿趙璟為太常寺卿。○陞順天府府尹徐世茂為宗人府府丞。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之七十九

實錄卷之七十九

二十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未三月丙申朔

實錄卷八十

上詣

太皇太后宮問安○試內外諸臣薦舉博學鴻儒一百四十三人。於體仁閣賜宴。試題璿璣玉衡賦。省耕詩五言排律二十韻○旌表江南烈婦太平縣崔氏。吳氏。節婦歙縣程氏。汪氏。全椒縣晉氏。和州陳氏。劉氏。各給銀建坊如例○丁酉。

上詣

太皇太后宮問安○

上幸保定縣一路行圍。是日啓行。駐蹕南哥驛。

○吏部議覆。江南道御史范承勲疏言。定例降調官員。果係清廉良吏。許督撫題請留任。原為愛惜人材起見。故雖降調以示懲。而又題留以示勸。至革職與降調。雖稍有重輕。同一誣誤。請將誣誤革職之員。果有潔已愛民者。督撫核實。許與降調官員一體題留。嗣後誣誤革職官員內。果有清廉愛民者。未經離任。許督撫保留。若離任具題者。不准從之。○

以故鑲黃旗三等精奇尼哈番阿玉璽子濟納襲職。○安遠靖寇大將軍多羅貝勒察尼疏言。偽總兵王度冲等。統官兵船艦投誠。宜從優議叙。又言伊等願改陸路効用。

上諭。偽總兵王度冲。偽將軍陳珀。可為總兵官。俱兼右都督。偽總兵龍韜。張宣。柯喬棟。可為總兵官。俱兼都督僉事。令彼等俱入陸路。同大兵効力。○揚威大將軍和碩簡親王喇布疏言。臣等騰寫欽頒敕諭。遣人前往招撫逆

賊。有偽總兵卓英。於二月初六日。率領偽官

八員。兵丁四千名投誠。下部議叙。○征南將軍都統穆占疏言。臣等遣人齎敕。前往新田。寧遠。道州。諸處招撫。有偽總兵李魁等。文武官七十餘員。率領兵丁家口投誠。下部議叙。○戊戌。

上駐蹕保定縣東。○己亥。

上駐蹕十里舖西。○安徽巡撫徐國相疏言。鳳陽府屬。去秋民被旱災。臣前經題請賑濟。已

將康熙十五十六兩年倉糧。并勸助米共二萬石。分給災黎。但戶口十五萬餘。發米二萬石。僅供一月。請借正項錢糧三萬兩。接賑至四月。俟麥熟後。方可停止。下部議行。○庚子。

上駐蹕十里舖。○予故原任湖廣提督總兵官左都督胡茂貞。祭葬如例。○驍騎校阿育錫以創發故。照陣亡例。給施沙喇哈番。予祭葬。○甲辰。

上駐蹕採蒲臺東。○吏部題。鑲藍旗一等阿思

哈尼哈番拔圖。並無嫡親子孫兄弟。應將其從姪班大爾沙襲職。但班大爾沙本身。有一等阿達哈哈番。又一拖沙喇哈番。應合并為一等精奇尼哈番。又一拖沙喇哈番。與班大爾沙承襲。從之。○兵部題。湖廣原設提督一員。康熙十七年。因江西提督趙賴。調赴攸縣剿賊。授為湖南提督。今長沙諸府。已經恢復。湖南提督員缺。應行裁去。湖廣仍設提督一員。得旨。彝陵總兵官徐治都。陞補湖廣提督。

○昭武將軍福建提督楊捷疏報。臣會同平南將軍賴塔等。於下坑山等處。擊敗逆賊。擒斬甚多。獲盔甲器械無算。下部議叙。○揚威大將軍和碩簡親王喇布疏報。夸蘭大阿進泰等。率領滿漢官兵。進取祁陽縣。直逼城下。賊衆惶懼登舟。我兵奮擊。擒斬無算。偽總兵都督同知董世興等。開城門迎降。恢復縣城。得旨嘉獎。下部議叙。○丙午。

上回鑾。駐蹕十里鋪。○贈湖廣陣亡遊擊傅桂

芳。都司僉書。予祭葬。廕一子。以守備用。○陞副都統佟佳。為鑲紅旗護軍統領。○正黃旗蒙古副都統穆理渾。以病乞休。命以原品致仕。○征南將軍都統穆占疏報。臣等率領官兵。追擊常寧縣賊衆。偽將軍郭應甫等迎敵。我兵奮勇前進。陣斬八百餘級。餘賊悉遁。恢復縣城。又總兵官李國樑。帶本標官兵。至新田縣。賊衆敗遁。恢復縣城。得旨嘉獎。下部議叙。○揚威大將軍和碩簡親王喇布疏報。二月初七日。遣署副都統雅哈喇等。進取耒陽縣。十五日。復調提督趙賴標下官兵。前往夾攻。賊衆敗遁。恢復縣城。得旨嘉獎。下部議叙。○丁未。

上駐蹕保定縣東。○寧南靖寇大將軍多羅順承郡王勒爾錦疏報。二月十九日。副都統莽奕祿。領兵進取桃源縣。二十一日。偽知縣張文明等。呈繳偽印投誠。又永定營偽副將楊達武。率標下官七員。兵五百名。下岡宣撫司。

向日葵等土官十七員俱呈繳偽印割投誠
下部議叙○戊申。

上駐蹕南哥驛○已酉。

上還宮。詣

太皇太后

皇太后宮問安○陞鑲白旗護軍叅領喀佳為
蒙古副都統○以故一等精奇尼哈番庫塞
爾德子輝色襲職○以陝西平涼慶陽二府
西和禮縣二縣平固慶三衛地方新復盡免
康熙十四年分額賦○庚戌。

上詣

太皇太后宮問安○諭議政王木庫等今湖南
賊寇悉已敗遁順承郡王勒爾錦與貝勒察
尼等合兵一處簡親王方在衡州穆占已至
永州進取廣西事屬最要順承郡王等所部
兵為數甚多可撥每佐領護軍二人駟騎二
人令貝子章泰率往安親王軍前安親王親
統大兵前赴衡州進取寶慶諸處簡親王可

與穆占等合兵自永州進定廣西○奉命大
將軍和碩康親王傑書等疏言臣等已將徵
調舟師敕諭令荷蘭國人齎往因趕塘石碑
洋諸地為海寇所阻不得行故未達而還。

上諭頃因定海舟師少已特增兵今荷蘭國人
為寇所阻何以不行撲滅俾得前行音問既
未能通舟師必不能如期而至如此則我兵
遇有機會可不俟荷蘭舟師即進剿耶抑必
俟彼船至日方舉事耶茲以剿蕩海寇增調
師旅修理戰艦糜費軍餉甚多大將軍王等
宜規取廈門金門速靖海氛不必專候荷蘭
舟師○以故正黃旗三等阿思哈尼哈番查
渾弟三等侍衛恩克襲職○旌表江南烈女
何衷宸聘妻周氏馬京騏聘妻王氏貞女張
翼聘妻顧氏烈婦龔氏羅氏張氏杭氏各給
銀建坊如例○壬子調鑲紅旗蒙古副都統
覺羅席卜為滿洲副都統○癸丑。
萬壽節。

上率諸王貝勒貝子。令內大臣大學士都統尚書精奇尼哈番侍衛等詣

太皇太后

皇太后宮行禮。御殿王以下文武各官行慶賀禮。次厄魯特噶爾丹使臣等行禮。停止筵宴

○遣官祭

福陵。

昭陵。

孝陵。

仁孝皇后。

孝昭皇后○遣官祭真武東嶽城隍之神○甲

寅。福建總督姚啓聖疏報。偽總兵廖璵黃靖等率衆踞水晶坪。聯絡山海賊寇。為害地方。臣遣官招撫。廖璵等即率偽官三百餘員兵一萬二千餘人詣軍前降。下部議叙○乙卯。

上詣

太皇太后

皇太后宮問安○策試天下貢士馬教思等。

於

太和殿前。制曰。朕惟古帝王統御天下。建極綏猷。莫不簡賢任能。又寧兆庶。官方澄叙。府事修和。農務興而野無曠土。國計裕而泉貨流通。豫大豐亨。洵邦隆之上理也。朕荷

天眷命。嗣續鴻圖。宵旰靡寧。孜孜求治。每思民生休戚。關乎吏治之賢否。安全噢咻。端藉循良。故於監司守令之任。務加遴選。乃龔黃之績未聞。而貪黷之風如故。或吏道雜而多端。激揚之法未善歟。或大法小廉表率未得其人歟。國家藏富於民。必使人無游惰。然後田野闢而生聚蕃。比年以來。勸農墾荒之令屢下。乃地利未盡。汙萊尚多。抑有司奉行弗力耶。將督課者循名而未責其實也。自昔九府圜法。所以便民利用。鼓鑄之設。其來舊矣。邇以銅不足用。鑄造未敷。有以開採議者。有以禁民耗銅議者。果行之可永利乎。或二者之外。別有良策歟。爾多士留心經濟。其詳切數

陳。勿泛勿隱。朕將親覽焉。○丙辰。諭兵部。我國家開創大業。軍法最為嚴明。凡擊斬賊衆。攻取城池。必據實奏報。復行確覈。功罪昭著。從無虛偽冒功之弊。今自用兵以來。每覽各處奏捷章疏。其中固有實建功績者。亦有虛詞妄報者。如擊敗賊兵。動稱斬殺甚多。或云數千。或云萬餘。或云不計其數。甚至賊棄空城。尚云如何攻取。如何恢復。妄行虛報。微功小寇。任意鋪張。議叙之時。冀幸濫邀陞賞。殊非人臣事上勿欺實心為國之誼。嗣今諸領兵大將軍。將軍。督撫。提鎮等。務期洗心滌慮。勿蹈前轍。凡報捷。必確覈功績。據實上聞。如因循陋習。冒濫軍功。定以軍法從重治罪。必無寬貸。爾部即通加嚴飭。并曉諭官兵。一體遵行。○涼州提督孫思克。以病求罷。慰留之。○征南將軍都統穆占等疏報。賊渠吳國貴等。遁往永州。為守城計。臣遣官兵追及之。於白水市諸處。擊敗賊衆。斬殺甚多。是月初九

日。遂復永州。於是道州。永明。江華。東安等縣。所有之賊。聞風俱棄城而遁。得旨嘉獎。下部議叙。○丁巳。陞護軍叅領沙納哈為正黃旗蒙古副都統。○揚威大將軍和碩簡親王喇布疏報。衡州諸郡既復。即令提督趙賴率所部官兵。往取寶慶府。趙賴等未至。賊先於城內外縱火而遁。我兵遂於是月初五日入城。下部知之。○戊午。

上詣

太皇太后宮問安。○

上御太和殿傳臚。賜殿試貢士歸允肅等一百五十一人。進士及第出身有差。○己未。諭禮部。自古帝王。敦重倫常。篤念勲舊。必有褒嘉之典。以示推恩。孝昭皇后。德著椒宮。母儀天下。懿範如在。每切追思。其父公過必隆。替纓世裔。宣力累朝。忠殫謀猷。功存弼亮。况篤生賢淑。佐理宮闈。宜加表揚。垂諸永久。已敕所司。特為建祠。其妻縣主。夙懋溫恭。克昭家訓。

宜並祔享。朕親製碑文。勒之貞珉。告成之日。應賜諭祭。爾部詳察典例以聞。○刑部等衙門議覆。御史黃斐疏言。殺人羣盜中。有同行而非手刃人者。宜許其自首減罪。因具兩議上請。一照律勿聽自首。一如斐言。

上曰。同行為盜。雖未手刃人。若聽其自首減罪。恐有兇徒。懷仇報怨。投入羣盜。令其黨殺人。而後自首。或親自手刃。卸罪逸賊。俱未可知。應從依律論罪之議。○廣東廣西總督金光祖疏報。潮州地方濱海。賊艘出沒。臣遣提督侯襲爵大敗海賊楊金目等。於山頭仔地方。斬首千餘級。水溺者不計其數。沉燒賊船二百餘隻。下部議叙。○庚申。岳州陣亡諸將喪至。遣侍衛薩哈達等十二員齋茶酒致奠。○辛酉。諭禮部。時已入夏。天氣亢旱。農務方興。雨澤未降。恐麥禾不及時長養。朕心深為惓切。爾部可同順天府官員。竭誠祈禱。○壬戌。

上詣

太皇太后宮問安。○諭諸渾托和。項器皿遺失。爾等雖願賠償。念爾等貧困。皆免賠償。至於茶膳房遺失器皿。亦皆免賠。令廣儲司如數補造。○癸亥。諭兵部。逆賊從湖南敗遁日久。我大兵即當尾擊。若推諉逡巡。不速行追躡。俾賊復得固守。則勞費倍多。乃順承郡王等。至今猶未亟進。殊為不合。爾部速移文順承郡王等。乘賊守備未固。兼程前往。○寧南靖寇大將軍多羅順承郡王勒爾錦疏報。彝陵後營遊擊許嘉謨等。於二月二十二日。率兵至青石渡。賊首潘龍等迎敵。我兵左右夾剿。追至平峪舖。斬首及落崖死者無算。恢復衡山縣城。又二十六日。進取歸州。賊首廖進忠等。率賊數千。於馬黃山迎敵。我兵三路夾攻。賊衆向巴東逃遁。二十七日。看守巴東偽副將金勤等。遣偽守備王坦齋投誠。遂遣守備于騰雲等。領兵前往。正遇金勤等與賊對壘。我兵衝擊。追至西壤地方。大敗賊衆。歸州。巴

東。相繼恢復。得旨嘉獎。下部議叙。○予浙江陣亡正藍旗佐領委署叅領綽羅代。鑲白旗佐領諾木齊。各祭葬如例。○甲子。諭吏部。薦舉到文學人員。已經親試。其取中一等彭孫適。倪燦。張烈。汪彰。喬萊。王頊齡。李因篤。秦松齡。周清原。陳維崧。徐嘉炎。陸莒。馮勗。錢中諧。汪楫。袁佑。朱彝尊。湯斌。汪琬。邱象隨。二等李來泰。潘耒。沈珩。施閏章。米漢雲。黃與堅。李鎧。徐鉉。沈筠。周慶曾。尤侗。范必英。崔如岳。張鴻烈。方象瑛。李澄中。吳元龍。龐塏。毛奇齡。金甫。吳任臣。陳鴻績。曹宜溥。毛升芳。曹禾。黎騫。高詠。龍燮。邵吳遠。嚴繩孫。俱著纂修明史。其見任。候補。及已仕未仕各員。作何分別。授以職銜。其餘見任者。仍歸原任。候補者。仍令候補未仕者。俱著回籍。內有年老者。作何量給職銜。以示恩榮。爾部一并詳議具奏。告病者。不必補試。○予福建陣亡正藍旗佐領委署叅領勒德禮。祭葬如例。

夏四月乙丑朔。享

太廟。

上親詣行禮。○丙寅。

上詣

太皇太后

皇太后宮問安。○遣理藩院郎中額爾塞。員外郎占木巴拉。齎敕往諭達賴巴圖爾。台吉等。去年閏三月。吳喇忒巴達里台吉等。男婦子女。馬駝盈甲。為賊刼掠。茲墨爾根台吉遣人將巴達里台吉之子納木。及其妹送到。訊之。納木云。去年為厄魯特厄爾德尼和碩齊刼去。今墨爾根台吉察獲送還。誠屬可嘉。夫勸善懲惡。國之法也。今聞厄爾德尼和碩齊等在額濟內河之地。爾達賴巴圖爾。台吉。墨爾根台吉。其將厄爾德尼和碩齊等。嚴加治罪。所掠人畜財物。照數察還。如此。則同修和好。邊境生民得安矣。墨爾根台吉察還所掠之人。可嘉。事畢之日。應加恩賚。○命鄖陽撫治

楊茂勲陞補四川總督。仍駐鄖陽。俟恢復四川之日赴任。○丁卯。纂修

玉牒。命鎮國公蘇努為總裁官。輔國公品級富爾泰。大學士勒德洪。杜立德。禮部尚書吳正治。內閣學士噶爾圖。侍郎額星格。為副總裁官。○以故二等精奇尼哈番。渾津子阿禮渾襲職。○戊辰。諭刑部。今已入夏。亢暘不雨。耕種愆期。民生何賴。或內外問刑衙門。有無知而罹法網。小過而陷重辟。株連無辜。淹禁日久。刑獄重地。人命攸關。審擬未當。有干

天和。朕每思及此。深用警惕。茲特遣索額圖。明珠。杜立德等。會同三法司。將已結大案。見在監禁者。逐一詳加審理。務期明允。無使冤滯。其在外直隸各省監候重犯。應遣三法司滿漢賢能司官。前往察審。凡罪可矜疑者。會同該撫臬司。詳開情由具奏。俾無枉無縱。以祈天庥。副朕慎刑愛民至意。○湖廣岳州水師總兵官萬正色。條奏閩海情形。水陸戰守機宜。

上諭萬正色剿寇洞庭。著有勞績。今岳州長沙諸處。悉已恢復。無煩水師。且萬正色閩人。稔知水性。茲剿滅海寇之際。從優加太子少保。調為福建水師總兵官。率所部官兵。剋期速赴閩中。其標下兵。有不諳水性者。仍留岳州。以見在投誠兵內。習水性者。補額攜往。至閩之日。即以所條奏事宜。與大將軍康親王等。會議酌行。旋陞萬正色為福建水師提督。統轄全閩水師營務。以專職掌。○刑部尚書劉捷。以病乞休。允之。○己巳。以江西陣亡二等阿思哈尼哈番塞靖叩子昌壽襲職。○庚午。

上詣

太皇太后

皇太后宮問安。○貴州提督趙賴疏言。逆賊胡國柱。郭壯圖。吳國貴。吳應麒輩。嫌隙已生。勢不兩立。宜乘渙散之會。指名招徠。

上諭諸路大將軍將軍等。乘逆賊互相猜疑之際。其明諭以投誠人員。寬賞前罪。從優恩擢。

賊中渠帥分路遣人指名招撫○免江南宿遷縣水淹田地康熙十四年以前未完地丁漕糧○以福建殉難總兵官二等阿達哈哈番吳萬福孫吳瑞麟襲職○辛未安塘筆帖式報偽將軍王鳳岐等三人選船艦兵卒水陸齊下截禦巴東諸處以乘不備又有劉李楊王諸賊帥率衆屯踞巫山及草毛諸處上諭逆賊至巫山潛生奸計或窺伺夔山俟江水泛漲之時乘虛突犯彝陵荊州殆未可定今固山貝子準達都統根特等已率兵前赴荊州而彝陵又有大兵及提督徐治都在彼宜悉錄報文移貝子準達等提督徐治都令於荊州彝陵諸處水陸密防賊果來犯即行剿禦○寧南靖寇大將軍多羅順承郡王勒爾錦疏言都統覺羅巴爾布啓稱二月初二日分兵二隊攻金頂山及灘內所立之營兵鋒一至賊皆遁走隨遣署護軍統領董吉等率兵由陸路追之及於南津關口江北岸之

賊列陣迎拒我兵敗之斬殺甚衆

上諭國家軍令本甚嚴明凡攻逐賊寇大臣身先士卒是以官兵鼓舞奮勇野戰必勝攻城必克所向無敵都統巴爾布統兵駐彝陵大兵既復岳州不於賊方震動之時偵察虛實即行剿滅乃稱二月初二日分兵二隊攻取金頂山及灘內所立之營兵鋒一至賊悉遁走身統兵衆逼賊而營對壘之賊已遁尚爾不知又不自思贖罪率官兵疾追殄殲賊醜止遣董吉等前往巴爾布自率兵赴荊以來曾無奮力報効遲悞觀望其罪良多既至彝陵與賊對壘不躬親抵敵反云初二日撥兵前進作攻戰之形明屬欺罔且鎮荊山之賊遁於何處踞於何地並未察明以報著順承郡王等一一嚴取供詞以聞○兵部題彝陵總兵官徐治都已補湖廣提督查提督舊駐武昌但彝陵宜都接壤川省地方緊要應令徐治都暫駐彝陵其彝陵總兵官暫駐宜都

俟事平。各照舊駐劄。從之。○壬申。

上詣

太皇太后宮。問安。○封鎮國公蘭布子賚式。為

輔國公。○癸酉。遣滿漢大學士各一員。恭點

孝昭皇后神主。是日。恭奉

神牌。升祔

奉先殿。奉安於

仁孝皇后神牌之右。○兵部題。奉旨。諸王長史

散騎郎等官。俱行具題補授。護衛不行具題

補授。著查例議奏。查臣部定例。諸王護衛。六

品以下典儀。包衣佐領。不行具題。咨送由部

補授。今臣等議得。諸王貝勒等長史。四品五

品典儀。散騎郎。一等二等三等護衛。包衣佐

領。該王貝勒等。擬定咨送。由臣部引見。具題

補授。其六品以下官員。仍照舊例補授。咨送

注冊。從之。○甲戌。諭禮部。民資粒食。以生。今

時值夏令。雨澤未降。久旱傷麥。秋種未下。農

事堪憂。皆由朕躬涼德。政治未協。大小臣工。

不能潔已愛民。勤修職業。致干

天和。朕用是夙夜靡寧。深切警惕。實圖修省。諸

臣亦宜循省過愆。恪共乃職。期於共襄治理。

感召休和。茲當虔誠齋戒。躬詣

天壇。親行祈禱。為民請命。爾部即擇期具儀。以

聞。○乙亥。

上詣

太皇太后

皇太后宮。問安。○戊寅。征南將軍都統穆占疏

言。臣自辰州啓行。追賊二十日。會大雨泥濘。

馬斃甚多。致兵士乏驕。得旨。穆占與大將軍

簡親王。進定廣西。宜速撥武昌馬千匹。送至

穆占軍前。以給乏馬兵士。○己卯。

上詣

天壇祈雨。自西天門步行至祭所。讀祝甫畢。甘

霖隨降。祭畢。

上步行出西天門。始乘馬回宮。○

上詣

太皇太后宮問安○寧南靖寇大將軍多羅順承郡王勒爾錦等疏言。偽將軍胡國柱。在辰龍關。偽將軍吳應麒等。在辰州。以木塞隘口而營。

上責之曰。順承郡王勒爾錦等。當逆賊驚遁之際。宜亟遣賢能將帥追剿。乘賊不備。速行撲滅。乃明知巴爾布怯懦。令率官兵進取辰州。巴爾布遲滯觀望。延引時日。不疾驅而進。致辰龍關復為賊守。勒爾錦。巴爾布等。宜即行議處。但見統大兵征剿。候事平凱旋之日。再行察議。○庚辰。調倉場侍郎邵甘。為兵部督捕左侍郎。轉刑部右侍郎。禪塔海。為左侍郎。陞詹事宜昌阿。為刑部右侍郎。○以原任刑部侍郎于嗣登。為光祿寺卿。○陞署副將胡世英。為湖廣隨征總兵官。○辛巳。

孝端文皇后忌辰。遣官祭

昭陵○

上出德勝門觀禾。路經固倫端順長公主。及輔

政大臣一等公索尼墓。遣內大臣武默納。各以酒奠之。○陞吏部左侍郎覺羅舒恕。為都察院左都御史。通政使焦毓瑞。為都察院左副都御史。○壬午。諭差往直隸各省察審刑獄刑部郎中索爾遜。員外郎宋俄託等。朕因天時久旱。深切軫懷。誠恐外省罪犯中。或有冤抑。陷於無辜。特選爾等賢能官員。體朕矜恤庶獄之意。前往察審。凡事務推勘確實。從公審斷。勿徇一時私見。顛倒是非。負朕愛民

至意。仍宜兼程速往。作速清結。倘或遲延時日。恐無賴之徒。借端生事。造作虛詞。妄行訐訟。反為良民之累。且爾等所審案件。或當或否。朕無不洞悉。爾等慎之。○授一甲進士歸允肅。為翰林院修撰。孫卓。茹薦馨。為編修。○諭議政王大臣等。覽學士孔郭岱等報廣西悉已底定。宜速移文。令簡親王及穆占等之兵。不必進廣西。但莽依圖。舒恕。額楚等。兵力稍單。簡親王及穆占等兵內。選有馬精兵每

佐領三人或四人遣前鋒統領希佛率赴莽依圖等軍前於通雲南要路宜從何路協力

前進公議進發至於廣西見無官兵平南王

或宜同大兵前進或宜駐廣西適中要地亦

同將軍大臣等共議而行其昇陵兵徒爾坐

守似屬無用宜整繕甲兵自歸州巴東作進

兵狀以制之巴爾布本在昇陵即遣彼往歸

州巴東効力并令都統噶爾漢等率兵同總

督楊茂勳提督佟國瑤等前進宜由何路協

力撲滅山賊或規取興安聽其酌便而行○

福建總督姚啓聖疏報木武鎮偽總兵陳士

愷率偽文武官五十五員兵一千四百三十

一名投誠下部議叙○河道總督靳輔疏言

清水潭屢塞屢衝山陽高郵等七州縣田地

被水淹沒十餘年來每歲損課數十萬兩臣

親率河官六十餘員於康熙十七年九月興

工築東西長隄二道於十八年三月工竣七

州縣田畝盡行涸出運艘民船永可安瀾矣

報聞○陞隨征長史花色為鑲紅旗蒙古副都統○癸未。

上詣

太皇太后宮問安○陞太僕寺卿席蘭太為通

政使司通政使光祿寺卿佛倫為大理寺卿

○福建巡撫吳興祚疏言閩省戊午科鄉試

前奉旨准於康熙十八年補行今海氛未靖

再請展限至康熙十九年舉行從之○征南

將軍都統穆占疏言原任雲南鶴慶總兵官

柯鐸於康熙十二年赴任身陷吳逆屢欲逃

歸被賊看守不得脫今大兵進剿乘賊夜防

稍懈即於全州滾崖逃出投奔臣之軍前呈

繳偽親軍右翼將軍銀印下部知之○福建

總督姚啓聖疏報海逆偽總兵鄭奇烈率偽

官五十三員兵丁一千餘名投誠下部議叙

○乙酉敕諭雲南貴州大小文武官員軍民

人等逆賊煽亂以來爾等被其迫脅臨身賊

中莫能自拔地方百姓久遭荼毒誅求苛擾

困苦日深。在彼情形。朕已洞悉。每一念及。深為惻然。故屢頒敕諭。廣示招徠。開以自新之路。今湖南悉皆平定。廣西亦已納款。獨爾滇黔一隅。民生尚在水火之中。朕以仁覆天下。為心。豈忍西南萬姓。顛連無告。莫之拯救。且當時倡叛。罪止吳三桂一人。所屬人員。均係脅從。情可矜恕。今特頒敕諭。再行招撫。爾等其各體朕寬大好生之心。翻然悔悟。爭先來歸。於各路大將軍將軍等軍前投誠。皆赦其前罪。論功叙錄。加恩安插。令之得所。爾等勿得仍懷疑畏。坐失事機。有負朕嘉與維新至意。○揚威大將軍和碩簡親王喇布疏報。偽副總兵周嘉貞。率偽文武官六十一名。兵丁九千三百四十餘名。家眷六千五百餘名。口投誠。下部議叙。○廣東廣西總督金光祖疏報。逆賊吳世琮等。踞潯州府。聞大兵前進。即焚營棄城遁。副將林大忠。入城撫定人民。下部知之。○陞太僕寺卿施維翰。為宗人府府

丞。○陞左都督管遊擊事許盛。為南贛總兵官。○丙戌。

上詣

太皇太后宮。問安。○諭兵部。湖南廣西。已經底定。滇黔。指日蕩平。凡在京在外。大小文武官員內。有家口陷於賊中者。有孑身投誠。家口仍在彼地者。有前以抗賊被害。而家口尚有遺留者。大兵到日。一一清查。務加保全。俾之得所。聽其家屬完聚。爾部即通行傳諭。各路大將軍。將軍。督撫。提鎮等。遵行。○又諭兵部。逆賊吳三桂。煽亂以來。各處大小文武官員。其或勢窮力竭。迫而從賊。朕久已洞悉。其悔罪來歸者。槩行寬宥。惟祖澤清父子兄弟。向受國家恩養甚厚。前祖澤清叛時。意其必係被賊迫脅。不得已而從逆。及其既降復叛。則甘心附賊。可知情罪重大。國法難容。不許招撫。亦不許其投誠。爾部即密諭各路大將軍。將軍。督撫。提督等。遵行。○予福建陣亡饒黃

旗佐領悠德赫祭葬如例○丁亥諭兵部今湖南廣西皆已底定大兵多集湖南遣侍郎宜昌阿學士噶爾圖赴順承郡王安親王簡親王軍前酌留進剿平定地方之兵餘兵防守荆岳及蒙古烏喇寧古塔之兵應行調還事宜一一詳議速奏其招撫敕諭齎付大將軍等令其酌行招徠伊等不必留彼招撫軍事議畢即還○以左都御史魏象樞為刑部尚書陞太常寺卿趙璟為通政使司通政使○征南將軍都統穆占疏報臣遣右營遊擊張德恩等領兵恢復灌陽縣都督僉事純輔弼等領兵恢復興安縣又遣投誠偽總兵陳邦賢領兵恢復全州得旨嘉獎下部議叙○戊子轉吏部右侍郎折爾肯為左侍郎陞內閣學士屯泰為吏部右侍郎左副都御史喀爾圖為總督倉場戶部侍郎○庚寅諭戶部江南財賦繁多如舊欠無徵錢糧更行追比恐累小民其康熙十年十一十二年錢糧俱

行蠲免其十三十四十五十六等年錢糧俱令於十九年始分年帶徵以舒民力著該撫通行曉諭務令均沾實惠以副朕休養斯民至意○壬辰寧南靖寇大將軍多羅順承郡王勒爾錦疏言將軍鄂內等啓稱遣署副都統圖爾度渾等偵探辰龍關賊情形賊跨路連設五營力為堅守山險林深前鋒未得擒獲生口距辰龍關二十里止行一馬且不能轉旋辰龍關一帶山俱峻險林木森密徒步亦不易至且時值盛暑霖雨雖大兵前進亦不能行不如暫留為便上諭辰龍關乃通雲貴孔道衆皆知之甚悉據奏辰龍關相距二十里止行一馬且不能轉旋辰龍關一帶山俱險峻林木森密徒步亦不易至俟復辰龍關時必於此路明白丈量苟與所奏不符圖爾度渾等從重治罪今當廣西全定賊逃竄之際宜分路前進底定疆宇前鋒屬在顏行捕獲生口乃其專責順

承郡王。委無能之圖爾度渾為副都統。俾之前行。致前鋒不能捕一生口。圖爾度渾等乃又急行退還。順承郡王勒爾錦。可率其王府佐領之兵。還赴荊州。率巴爾布等。進定歸州。巴東。圖爾度渾。可革去署副都統職。以叅領隨順承郡王還荊。貝勒察尼。仍用其原大將軍印。統兵平定地方。○厄魯特噶爾瑪戴青和碩齊等。遣使進貢。賞賚如例。○癸巳。

上詣

太皇太后

皇太后宮問安

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十一

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫太保兼太子太傅保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫太保兼太子太傅保和殿大學士仍兼

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未五月甲午朔

上詣

太皇太后

皇太后宮問安○陞侍講學士庫勒納為詹事

府詹事大理寺少卿張問政為太僕寺卿○

調河南河北總兵官傅魁為廣西左江總兵

官○乙未諭翰林院選拔庶常原以作養人

材今科進士特加簡閱取吳震方張廷瓚秦

宗游田需陳捷趙執信曹鑑倫馬教思劉果

實沈朝初楊大鶴陸祖修方俸陸興李孚青

余艷雪王沛思丁曄莊廷裕汪晉徵王承祐

宋敏求潘應賓顧鐔梁弓陳紫芝張克嶷張

光多盧熙任璿趙作舟楊雍等三十二員俱

著改為庶吉士并修撰歸允肅編修孫卓茹

薦馨分別滿漢書教習○都察院左都御史

陞刑部尚書魏象樞疏請仍留臣左都御史

任庶得勉竭愚悃激濁揚清為朝廷振肅綱

紀得旨魏象樞著加刑部尚書銜仍留左都

御史任○陞僉都御史王盛唐為太常寺卿

○丙申

仁孝皇后忌辰遣官致祭○丁酉

上詣

太皇太后

皇太后宮問安○陞大理寺卿佛倫為內閣學

士兼禮部侍郎○征南將軍都統穆占疏報

千總陳有聲等領兵進取恭城縣偽知縣張

魁臣以城降下部議叙○己亥轉戶部右侍

郎田六善為左侍郎調工部右侍郎朱裴為

戶部右侍郎○庚子。

上詣

太皇太后

皇太后宮問安○辛丑。

上詣

太皇太后

皇太后宮問安○陞內閣侍讀學士禧佛為內

閣學士兼禮部侍郎○壬寅。

上出阜成門觀禾。駐蹕潭柘寺○癸卯。

上回宮○遣官封洞庭湖神。敕曰。頃者逆氛未

靖。天討用加。地當師旅之屯。衆賴精英之佑。

閱時八月。波浪不驚。俾我六軍。舳艫共濟。堅

城立拔。餘孽宵奔。眷言捷伐之奇勲。實屬神

功之丕顯。特申昭報。式考彝章。封為洞庭湖

之神。載諸祀典。專官告祭。惟神鑒知○甲辰。

上詣

太皇太后宮問安○乙巳。調福建水師提督伯

王之鼎為四川提督○丙午。遣官祭

關聖帝君○丁未。祭

地於

方澤。

上親詣行禮○征南將軍都統穆占疏言。廣西

投誠偽將軍劉彥明。徐洪貞。線成仁等。仍為

都統。副都統。令其總轄原管之兵。及綠旗之

兵。頗於事有益。得旨。劉彥明等。所領投誠綠

旗兵內。有願歸農者。皆令歸農。願入伍者。撥

入廣西經制兵內。其定南王下舊兵。有老弱

者。裁去。不必足從前三千之額。數年以來。定

南王官兵。分散各處。收聚甚難。宜令督捕理

事官麻勒吉。前赴廣西。暫行統轄。定南王下

藩兵。有分散者。令其察訪料理。一切調度軍

務。會同將軍莽依圖等。商議舉行。其廣西文

武各官。並定南王下各官職名。麻勒吉俱察

明繕冊以聞。劉彥明等為都統副都統之處

俟冊到日再議○戊申。

上詣

太皇太后宮問安○

上御太和殿視朝。京察留任滿漢各官及文武

陞轉各官謝恩。次喀爾喀進貢使臣等行禮

○巳酉。揚威大將軍和碩簡親王喇布疏報。

偽將軍全鉞。偽總兵馬隆興。熊天章等率衆

投誠。其屬下兵丁分別歸農補伍。下部議叙

○庚戌。授薦舉博學宏詞邵吳遠為侍讀。湯

斌。李來泰。施閏章。吳元龍為侍講。彭孫適。張

烈。汪霽。喬萊。王頊齡。陸萊。錢中諧。袁佑。汪琬。

沈珩。米漢雯。黃與堅。李鎧。沈筠。周慶曾。方象

瑛。金甫。曹禾為編修。倪燦。李因篤。秦松齡。周

清原。陳維崧。徐嘉炎。馮勗。汪楫。朱彝尊。邱象

隨。潘耒。徐鉉。尤侗。范必英。崔如岳。張鴻烈。李

澄中。龐塏。毛奇齡。吳任臣。陳鴻績。曹宜溥。毛

升芳。黎塞。高詠。龍燮。嚴繩孫為檢討○陞左

副都御史馬汝驥為總督倉場。戶部右侍郎

○奉命大將軍和碩康親王傑書疏報海賊

偽總統劉國軒等侵犯江東橋。平南將軍賴

塔等統官兵迎擊。賊敗走太平寨。我兵進追。殺賊千餘人。下部議叙○揚威大將軍和碩簡親王喇布疏報。吳三桂偽侍郎范思徵。偽總兵曾大捷等投誠。下部知之○辛亥。

上詣

太皇太后宮問安○命加副將徐升耀都督僉事。齎敕招撫王屏藩等。敕曰。自吳逆煽亂以來。所在官民多被誘惑。陷身賊中。莫能自拔。朕已洞悉情形。屢頒敕諭。廣示招徠。開以自新之路。念爾等素受國恩。必非甘於從逆。或心存忠義。遲回有待。或勢被驅迫。歸化無由。朕甚憫焉。茲湖南廣西俱經恢復。各路兵馬齊進滇黔。爾所悉知。四川一隅。皆朕赤子。人罹兵燹。不得早見太平。每一念及。殊用惻然。特遣副將加都督僉事徐升耀前往宣布朕意。爾其翻然改悟。勿失機會。率先來歸。朕必赦其前愆。論功叙錄。爾無懷疑畏。勉圖後効。以副朕定亂安人至意○癸丑。議政王大臣

等議奏。廣西官兵乏糧。請令兩廣督撫。由廣東設策運糧。得旨。不必自廣東輓運。令遣戶部賢能官二員。採買湖廣米。運至廣西軍前。其湖廣武岡諸處官兵。亦令料理備辦。○吏部議覆。揚威大將軍和碩簡親王喇布疏言。原任湖廣益陽縣知縣授叅議道。劄付徐璫。齎諭招撫吳三桂偽將軍胡國柱。夏國相。馬寶等。被殺。請敕議叙。今奉旨。議得徐璫。冒險招撫。捐軀盡忠。應照例贈湖廣按察使司僉事。予祭葬。廕一子入監讀書。從之。○陞內閣侍讀學士舒恕。為光祿寺卿。翰林院侍讀學士色楞。為太僕寺卿。○予故原任兵部右侍郎李贊元。祭葬如例。○以故三等阿思哈尼哈番達禮善巴圖魯孫劉占。襲職。○甲寅。直隸各省督撫。遵例自陳。得旨。江西巡撫佟國楨。著降二級調用。甘肅巡撫鄂善。著解任。廣東巡撫佟養鉅。著革職。○先是。湖南用兵。令江南造烏船百艘。送岳州軍前。至是。岳州既

復。無須舟艦。

上諭。議政王大臣等。萬正色赴閩時。即令其領在岳烏船。并水手以行。至江南浙江。更選戰艦共百艘。攜往。以資征剿。○乙卯。

上詣

太皇太后

皇太后宮。問安。○丙辰。贈廣西陣亡平樂都司僉書吳錫綬。為遊擊。予祭葬。給卹銀。廕一子。以守備用。○丁巳。命翰林院掌院學士喇沙里。葉方藹。教習庶吉士。○己未。命內閣學士徐元文。為明史監修總裁官。掌院學士葉方藹。右庶子張玉書。為總裁官。○陞山西按察使穆臣。為都察院左副都御史。郎中科爾坤。為大理寺卿。○陞河南管河道王日藻。為浙江按察使。司按察使。○安遠靖寇大將軍多羅貝勒察尼疏言。臣等前進雲貴荆岳彝襄諸處。相隔漸遠。調遣防守事宜。必致有悞。上諭。大將軍貝勒察尼等。親統大兵。前往進剿。

自澧州以南軍務聽大將軍貝勒察尼調度。荊州。岳州。彝陵。襄陽等處軍務聽大將軍順承郡王調度。○涼州提督孫思克疏言。厄魯特巴圖爾濟農遣人來見。臣云。我台吉率眾部落駐蕭州邊外。有表恭請。

聖安。懇乞代奏。臣謹以原文奏覽。部議以濟農等不往伊叔兄處。仍在近邊遊牧。殊屬不合。所奏應無庸議。得旨。拉篤祜見在甘肅地方。著率領張勇。孫思克。標下賢能官員通事。親赴巴圖爾濟農所。詳細察訊。殺掠吳喇忒者。實係何人。據實奏聞。其畢馬拉吉里第台吉。墨爾根台吉。所報之文。并發拉篤祜知之。○辛酉。鎮南將軍莽依圖疏言。桂林相近之兵。請速調一支。往駐桂林。以張聲勢。臣俟副都統額赫納兵至貴縣。即前赴橫州。以絕柳州南寧之路。

上命簡親王及穆占等兵內撥每佐領三人。或四人。遣一副都統率赴麻勒吉所。令麻勒吉

統轄鎮守桂林。○壬戌。

上出朝陽門觀禾。駐蹕窩頭。○轉刑部右侍郎馮魁為左侍郎。陞左副都御史焦毓瑞為刑部右侍郎。○旌表順天府烈婦鄭良王妻劉氏。給銀建坊如例。○癸亥。

上回宮。

六月甲子朔。陞宗人府府丞施維翰為都察院左副都御史。○陞

孝陵副將盧崇耀為湖廣永州總兵官。○乙丑。上詣

太皇太后宮問安。○丙寅。殉難廣西巡撫馬雄鎮之子馬世濟疏請赴粵西。取父骸骨。得旨。馬雄鎮當地方叛亂之時。不肯從逆。克篤忠貞。捐軀殉難。深為可憫。其骸骨并家口。令馬世濟馳驛前往搬取。仍著麻勒吉等預為察明料理。交與馬世濟。到日從優議卹。○丁卯。大學士馮溥以疾求罷。慰留之。○戊辰。雲南提督桑峨疏言。新任湖廣提督暫駐彝陵。請

以彝陵官兵隸其標下。湖廣提標官兵姑屬臣統領。得旨提督桑峨隨大兵進取雲貴。其湖廣提標官兵准入雲南提督標下。俟底定之日。仍回楚中。彝陵鎮標官兵准為湖廣提標。至於隨桑峨前往官兵。方事剿賊收疆。標下官員。可各加銜一等兵卒。可動正項錢糧賞賚。以示鼓勵。○予故正藍旗一等精奇尼哈番鄂諾爾。祭葬如例。○旌表江南高郵州烈婦黃立功妻李氏。給銀建坊如例。○庚午。命吏部尚書黃機。以吏部尚書管刑部尚書事。○陞湖南布政使安世鼎為江西巡撫。陝西布政使巴錫為甘肅巡撫。湖北糧道李為霖為雲南按察使。司按察使。○辛未。

上詣

太皇太后宮問安。○諭戶部。民生以食為天。必蓋藏素裕。而後水旱無虞。自古耕九餘三。重農貴粟。所以藏富於民。經久不匱。洵國家之要務也。比以連年豐稔。粒米充盈。小民不知

積蓄。忘其狼戾。故去年山東河南一逢歲歉。即以饑饉流移見告。雖議蠲議賑。加意撫綏。而被災之民。生計難遂。良由地方有司各官平日不以民食為重。未行申明勸諭之故。近據四方奏報。雨澤霑足。可望有年。恐豐熟之後。百姓仍前不加撙節。妄行耗費。著各該地方大吏。督率有司。曉諭小民。務令力田節用。多積米糧。俾俯仰有資。凶荒可備。以副朕愛養斯民至意。○揚威大將軍和碩簡親王喇布疏報。偽總兵姜繼尚。彭萬里。鍾爾弘等。率領將弁兵丁家口投誠。下部知之。○壬申。平南王尚之信疏言。粵東之變。起自新會江門。江門水師之叛。由於逆弁趙天元一人。請以趙天元賜臣。使得明正其罪。立置典刑。

上諭趙天元不思圖報國恩。乘粵西逆賊侵犯粵東。首獻江門背叛。致粵東變亂。及粵東歸正後。又從逆賊。數犯疆圉。今度不能免脫。窘困至極。方始來降。情罪重大。趙天元本係平

南王所屬之人。王其立誅之。○甲戌。

上詣

太皇太后

皇太后宮問安。○安遠靖寇大將軍多羅貝勒察尼等。取都統巴爾布供辭以聞。

上命議政王大臣等集議。尋議政王大臣等議奏。都統覺羅巴爾布。自率大兵往湖廣以來。並未前進効力。因其怯懦。削去叅贊。令其贖罪圖功。乃身率大兵。坐駐彝陵。大兵既復岳州。不乘賊中震駭之時。探其虛實。力行剿滅。以贖前愆。鎮荆山對壘之賊。迄於逃遁。竟未之知。乃誑云。分布官兵進攻。巧為飾辨。又不親身追殺逸寇。止遣夸蘭大二人前往。其後令巴爾布率領官兵。攻取辰州。又遲回瞻顧。遷延時日。竟不速進。致賊復踞辰龍關。得為守備。巴爾布怯懦退縮。一步不能前進。貽誤大事。失機甚多。今奉旨取供。巴爾布又不即行認罪。據實供招。反為巧飾。殊失大臣之體。

宜將巴爾布都統阿達哈哈番佐領及所加之級。盡行削去。羈繫荊州。彼所襲其父拜他喇布勒哈番與應襲之人承襲。從之。○以奉天府府尹金鼎為宗人府府丞。○以湖廣投誠陳珀為援剿左路總兵官。王度冲為援剿右路總兵官。○乙亥。寧南靖寇大將軍多羅順承郡王勒爾錦疏言。前者渡江。已簡兵士有馬者攜往。所留守彝陵諸處兵。多係無馬。今平定疆土。兵力單弱。請悉以所有前鋒護軍。調益臣軍。

上諭。前令順承郡王等。固守荆襄諸處。而順承郡王遣貝子準達。都統根特等。率兵前守荊州彝陵。今撤還順承郡王至荊州彝陵。令平定歸州巴東。乃復請益前鋒護軍。惟於身之所在。必欲厚其兵力。所奏殊屬不合。念見在進兵平定疆土。除將軍噶爾漢等。所統進剿兵外。其荊州彝陵諸處所在之兵。許酌量調往。○丁丑。廣東廣西總督金光祖疏報。欽州

遊擊劉世貴於四月二十三日率兵進取靈山縣。偽將軍郭義以城降。下部議叙。○戊寅。上御太和殿視朝。文武陞轉各官謝恩。次喀爾喀進貢使臣等行禮。○

上詣

太皇太后宮問安。○平南王尚之信疏報。五月二十六日。偽將軍馬承蔭總兵齊人龍等。繳偽敕印來降。下部知之。○予長沙陣亡正黃旗拖沙喇哈番瑟冷祭葬如例。○贈湖廣殉難益陽縣知縣徐礪。按察使司僉事。予祭葬如例。○已卯。陞吏部郎中柯鼎。為貴州布政使。司布政使。兵部郎中李輝祖。為貴州按察使。司按察使。○一等阿思哈尼哈番阿哈泰。補授總管旗分遊牧地方。叅領品級章京。以其子特穆爾替職。○陞前鋒統領希佛。為正紅旗滿洲都統。○江西提督許貞疏報。饒南總兵官高登科等。及浙省官兵。會剿玉山賊。連次奏捷。生擒偽總兵曾文瑞。陣斬偽總兵

柯伯龍等十員。偽都督陳輝投誠。下部議叙。○許貞又報。臣親率官兵。進剿洪山。詹源。江許山賊巢。前後陣斬偽官二十五員。賊兵二千四百有餘。下部議叙。○庚辰。陞都察院左僉都御史郝浴。為左副都御史。○壬午。鎮安將軍噶爾漢疏言。臣等率領官兵。逼臨賊境。見山高路狹。草木叢塞。今值六月。時多雷雨。若山水暴下。則魚貫之兵。必至斷絕。不能相顧矣。且輓運亦難。是以暫撤兵衆。俟木落水。涸。更率官兵。先滅山寇。續取興安。

上諭。噶爾漢自任將軍以來。初無勞績。惟間往襄均諸處。今當逆賊震動之時。遣噶爾漢會同總督提督等。剿滅山寇。或有克取興安之機。酌便而行。乃不率兵破賊。以圖報効。反稱草木叢塞。竟以兵還。若此。當草木未盛之先。亦曾効力前進否。噶爾漢不行努力。以贖前愆。反規避退兵。殊屬不合。即應嚴察議處。但見在統兵進剿。俟大兵旋日。察議。又近日陝

西大將軍圖海奏稱四川逆賊出寶雞立營則興安之地已空。噶爾漢其統兵而前擊破賊寇。恢復興安諸處。毋失機宜。○陞江南按察使崔維雅為湖南布政使。司布政使。○癸未。以原任陝西按察使庫爾喀為山西按察使。司按察使。○甲申。

上詣

太皇太后

皇太后宮問安。○先因馬承廕郭義等尚未投

誠。

上命簡親王喇布及將軍穆占等撥每佐領兵或三人或四人遣一副都統率往桂林。至是喇布奏稱分兵發往桂林鎮守永州則臣等所部進剿之兵力殊單弱。

上諭。今馬承廕郭義等俱已投誠則平南王及莽依圖等兵皆可達桂林簡親王等不必分兵發往。仍與安親王約剿殺賊寇。○乙酉。予故太子太保內大臣一等阿思哈尼哈番希

爾根祭葬如例。○丙戌。免河南鄭州本年分電災額賦有差。○丁亥。巡察潮惠等處海口吏部主事塞楞額等疏言粵東馬窖鷗汀背諸處乃瀕海要地宜嚴加防閑請調撥官兵分駐各口庶居民儲粟不致侵掠而奸徒私通貿易之弊亦可杜絕。

上諭。巡視海疆嚴禁奸民貿易潛資寇糧乃平海機宜所關。馬窖鷗汀背石井寨諸處俱沿海要地。其令廣東總督巡撫提督等速撥官兵防禦海寇杜絕奸民私通糧糈。塞楞額等乃特遣嚴察海疆之員。何地緊要宜添兵防守。即移文該督撫提鎮調兵駐防。如汛守官員不加嚴緝或私縱奸民通賊貿易接濟糧米等物。塞楞額等即指名叅奏。○陞通政使趙璟為工部右侍郎。○戊子。

上詣

太皇太后宮問安。○以原任奉天府府尹梁拱宸補原官。○陞署副將程福良為陝西興安

總兵官○先是提督趙良棟疏言。湖南已經平定。應復漢中興安。臣願獨當一路。竭忠自効。

上命大將軍圖海等確議。至是圖海等奏稱。棧道益門鎮各口。逆賊率衆來犯。據險為營。今令提督趙良棟進臨武寨。相機而行。俟臣等擊破益門鎮諸處賊壘。如有進取之機。酌量分道而行。

上諭。湖南逆賊大敗。困蹙遁走。大將軍安親王簡親王等。三路進發。平定武岡新寧諸處。剿殺賊寇。貝勒察尼等。進取辰州。順承郡王。及將軍噶爾漢等。亦從鄖陽彝陵。規定蜀賊。又馬承蔭郭義等。並皆薙髮。廣西盡平。平南王將軍莽依圖等。亦統兵進剿。今逆賊震懾。正當剿撫並用之時。大將軍圖海。與將軍總督提督等。共議。亟殲侵犯寶雞之賊。恢復漢興。以平蜀地。○已丑。奉命大將軍和碩康親王傑書等。疏言。閩中濱海要汛。及墩臺營寨。俱

綠旗官兵防守。滿洲大兵。惟駐形勝之地。相為聲援。滿洲兵數頗多。宜酌量撤還。得旨。滿兵既云宜撤。當如奏。撤回。但海氛未靖。止先撤內府佐領官兵一千。俟此兵到日。再議發往更代。○陞甘肅按察使舒淑布。為陝西布政使。司布政使。○庚寅。以翰林院侍講朱馬泰。充日講起居注官。○刑部侍郎宜昌阿等。至湖廣。傳諭諸大將軍等。酌議撤兵。大將軍貝勒察尼議奏。臣察見在進剿常德桃源護軍。每佐領各五人有餘。驍騎兵每佐領各七人有餘。漢軍共一千二百餘人。綠旗兵二萬七千餘人。兵力足以前進。其在常德者。外藩蒙古兵四百餘人。在澧州者。外藩蒙古兵二千三百餘人。應行撤還。松滋宜都。驍騎兵五百人。漢軍一百人。綠旗兵四百餘人。足以鎮守疆圉。二處所有外藩蒙古兵五百人。亦應撤還。其在岳州滿兵。每佐領各三人有餘。漢軍共三百餘人。俱撤還荊州。并入荊州兵內。

共成每佐領五人之數。俾之鎮守。其餘滿兵。每佐領各二人有餘。鎮守荊州外藩蒙古兵二千餘人。鎮守岳州外藩蒙古兵六百。亦俱應撤還。大將軍簡親王喇布議奏。烏喇寧古塔之兵。宜遵旨撤還。但新寧諸處。見有賊寇。請暫留烏喇寧古塔兵一千二百餘人。臣等二路之兵。合而為一。每佐領兵各十一人。有餘。於其中選每佐領八人。及綠旗官兵一萬二千餘人。率之前往。與安親王相期進剿。

新寧賊寇。俟破賊之後。烏喇寧古塔兵。即行撤還。其永州。宜撥滿兵無馬者。每佐領三人。綠旗兵二千人鎮守。令總兵官蔡元等。率綠旗官兵三千五百人。鎮守全州。其兩支外藩蒙古兵一千七百餘人。應行撤還。大將軍安親王岳樂議奏。臣所統護軍驍騎兵。每佐領共十五人。蒙古兵一百餘人。簡親王等既進取新寧。臣當率每佐領兵各十一人。綠旗官兵一萬人。與簡親王相期。進剿武岡東口之

賊。其衡州。宜留每佐領滿兵各一人。綠旗兵一千二百人。總兵官張忠標兵二千人防守。寶慶。宜留每佐領滿兵各一人。綠旗兵一千人防守。岳州。宜撥每佐領滿兵各二人前往。與鎮守岳州綠旗官兵。協同防守。其外藩蒙古兵。應行撤還。簡親王等。倘不進取新寧。其前欲攜往進剿綠旗官兵一萬二千餘人。及得勝等。礮。祈發臣軍前。以便攻剿武岡新寧東口賊寇。

上諭。安親王兵。可兩路進取武岡東口。簡親王等兵。與安親王兵。約期進取新寧。破新寧賊後。烏喇寧古塔兵。聽令發還。貝勒察尼等兵。攻取辰州等處。蕩滅寇賊。衡永荆岳諸地。俱如所奏。留兵鎮守。其諸處撤回滿洲蒙古兵。俱令大臣官員。沿途嚴加鈐束。○諭兵部。爾部見餵馬匹。及營驛之馬。可選擇二千。送至武昌。令善加芻秣備用。○辛卯。以內閣學士佛倫。充經筵講官。○旌表直隸烈婦。許文方。

妻馮氏。給銀建坊如例○壬辰。

上詣

太皇太后宮問安

實錄卷八十一

五十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十二

監修總裁官光祿大夫太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加三級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔚廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未秋七月癸巳親享

實錄卷八十二

太廟遣內大臣塔達行禮○予岳州陣亡正紅

旗佐領勒畢祭葬如例○甲午宗人府導旨

議盛京

三陵每年四時祭祀應令盛京將軍副都統侍

郎內派令致祭

孝陵仍遣在京大臣致祭如有大事致祭

四陵俱應於和碩親王以下鎮國將軍及覺羅

民官文武大臣內遣祭得旨是○河道總督

靳輔疏言淮河東岸自翟家壩至周橋聞乃

淮揚運河上游門戶。山鹽等七州縣民生關鍵也。當黃河循禹故道之時。淮流安瀾直下。此地未聞水患。迨黃流南徙奪淮。淮流不能暢注。於是壅遏四漫。山陽寶應高郵江都四州縣。河西低窪之區。盡成澤國者。六百餘年矣。明萬曆初。河道廢壞。雖不若今日之甚。而清口淤高堰決。與今日情形相似。彼時河臣潘季馴築堤堵決。治效班班可考。然此處不議加高。蓋明代祖陵在西。故停河東之障以洩水。殊不知如慮淮漲西侵。何難兩岸並築。而顧留患門庭。歷年既久。遂致成河九道。使淮揚疊受水災。臣不能不憾潘季馴以善治河稱。而亦有此失著也。

實錄卷八十二

二

皇上軫念運道民生。大發帑金命臣遍為修治。今翟家壩成河九道之處。計共寬一千三百二十三丈二尺。今已盡合龍門。臣更查山陽寶應高郵江都四州縣。河西諸湖。今亦逐漸涸出。臣擬設法招墾。庶幾增賦足民。下部知

之○乙未。

上詣

太皇太后宮問安○陞刑部郎中索爾遜為甘肅按察使司按察使○吏部等衙門議奏。殉難首領佐貳等六品七品官之子。以縣丞錄用。八品九品官之子。以縣主簿錄用。未入流之子。以州吏目錄用。著為例。從之○贈殉難江西廣昌縣巡檢舒學文。金山衛經歷。廕一子入監讀書○丙申。以故一等阿思哈尼哈

實錄卷八十二

三

番穆赫林之子他布代襲職○戊戌。予江西陣亡佐領傅喀平涼陣亡佐領噶答渾。浙江陣亡佐領布席泰各祭葬如例○征南將軍都統穆占疏報。招撫偽總兵路奇遇等。文武各官共一百七十九員。下部議叙○己亥。

上詣

太皇太后宮問安○撫蠻滅寇將軍廣西巡撫傅弘烈疏言。奉頒招撫敕諭。當即會同平南王尚之信。委僉事職銜王繩武。通判職銜俞

音齋往吳世琮營被害。應賜恩卹。從之。○庚子。免山東新泰縣本年分電災額賦十之三。○戶部郎中布詹等奉差浙江巡海。

上諭之曰。浙江沿海地方。關係緊要。爾等前往詳察。設立巡海官兵。如額兵單弱。分防不敷。即酌議增設。至於奸惡兵民。販賣糧米。因內地利少。出海利多。冒死越界。勾連貿易者有之。欲滅海寇。必斷內地私販。爾等宜加巡察。如將軍督撫提鎮所屬人員。有犯禁者。即鞠

審以聞。務期不時訪緝。杜絕往來販賣。庶奸宄屏跡。海氛可靖矣。○辛丑。陞大理寺卿科爾坤為都察院左副都御史。○陞江南分巡江蘇道金鎮為江蘇按察使。司按察使。○壬寅。刑部侍郎宜昌阿等疏言。大將軍貝勒察尼軍前。見有湖廣經制隨征綠旗兵共二萬七千人。宜令河南總兵官周邦寧還豫鎮守。得旨。河南境內遼瀾提督既已裁缺。內鄉浙川二縣各口。俱在深山。今又值旱災。總兵官

周邦寧。可統標兵一千五百。即還豫鎮守。○陞太僕寺卿張問政為通政使司通政使。○癸卯。

上詣

太皇太后

皇太后宮。問安。○諭刑部。向來死罪重犯。因有論功免死之例。以致惡人希圖倖免。臨陣退縮。殺人刳財。恣肆愈多。以後死罪犯人。不得論功議免。著照其應得之罪。議擬具題。候旨

定奪。○平南王尚之信疏言。臣先因患痔。由橫州還封川。今病日加。有事醫療。故臣於六月十八日還會城。

上諭。今正進討逆賊。剿撫並施之會。尚之信所部往定廣西官兵。令學士孔郭岱等盡率赴將軍莽依圖軍前。聽莽依圖統攝調遣。孔郭岱等。即同莽依圖進剿。其奮武大將軍印敕。仍留與尚之信。○甲辰。靖逆將軍甘肅提督侯張勇疏言。噶爾丹將侵吐魯番。漸次內移。

住居西套。前哨已至哈密。去肅州僅十數日。傳聞雖未可盡信。然其情叵測。謹以奏聞。

上命檄知大將軍圖海○乙巳。陞蒙古副都統沙納哈。為前鋒統領○免山東長山。益都等七縣本年分旱災額賦有差○丙午。先是。輔國公溫齊等。圍困岳州時。賊遁不追。且妄報殺賊之數。

上令嚴取供詞以聞。至是。大將軍貝勒察尼等。取供具奏。

上諭。我國家由來軍法嚴明。曾無虛偽多報首功之事。溫齊乃有罪之人。不思効力自贖。岳州徒步奔逸之寇。不即窮追。且殺賊不過三百餘人。與原疏迥異。彼時一等台吉格勒爾圖。尚欲追剿賊寇。乘勝復城。乃溫齊反稱道隘馬疲。不可前進。選悞退却。大悞軍機。可削去溫齊公爵。罷其叅贊。署副都統達賴。削去阿思哈尼哈番。佐領。及所加之級。喀佳。削去副都統。麻尼。削去護軍叅領。佐領。及所加之

級○定遠平寇大將軍和碩安親王岳樂疏報。招撫偽知府金世正等二百八十六員。下部議叙○宣義將軍尚之孝疏報。招撫偽總兵林興隆等二十員。偽兵六千五百一十三名。下部議叙○陞郎中明愛為大理寺卿○丁未。中元節。遣官祭

永陵。

福陵。

昭陵。

孝陵。

仁孝皇后。

孝昭皇后○和碩純親王隆禧疾篤。

上親詣王第視之。立傳醫調治。午時。還宮。以王疾奏聞。

太皇太后。

上復詣王第視之。以王疾篤。還奏。

太皇太后。申時。王薨。

上聞訃痛悼。傳諭輟朝三日。隨以王訃奏聞。

太皇太后驚慟。欲親臨其喪。

上奏曰。

太皇太后痛念亡孫。洵屬至情。但恐

聖體萬一勞頓。深為未便。再三勸諫方止。

上欲詣王第。後奉

太皇太后諭曰。爾日親萬幾。若再悲哀。則爾身

益瘁。可勿往。

上敬遵

慈諭。遂留

太皇太后宮中。勸慰竟夕。未還宮。○定遠平寇

大將軍和碩安親王岳樂疏報。招撫偽總兵

王熙忠等十二員。兵二千名。下部議叙。○戊

申。

上詣

太皇太后

皇太后宮問安。○己酉。

上兩詣

太皇太后宮問安。○

上臨純親王隆禧第。舉哀。○辛亥。

上兩詣

太皇太后

皇太后宮問安。○定遠平寇大將軍和碩安親

王岳樂疏報。六月初七日。漢軍都統釋迦保

等。率領滿漢官兵。於寶慶府巖溪地方。大敗

逆賊偽揚總兵。斬首七百餘級。獲賊船四十

餘艘。下部議叙。○岳樂又疏報。漢軍都統釋

迦保。招撫偽副將陳起鳳。偽知縣廖新等。及

兵丁五百名。下部議叙。○壬子。

上兩詣

太皇太后

皇太后宮問安。○遣官祭和碩純親王隆禧。命

發帑。派內務府官。監修墳塋。立碑。加祭一次

○建義將軍侯林興珠疏言。投誠偽總兵王

度冲。偽將軍陳珀。標兵各一千人。見留軍前。

其父母妻子。俱在雲南。恐乘間逸去。宣洩軍

情。請調內地補伍。

上諭投誠官兵。見隨大兵進剿。若盡撤往內地。則此後歸誠者。將瞻顧不前。大將軍貝勒察尼等。身在常德。洞悉情形。其有家口在滇。實屬可疑者。酌量設法。撤至內地。補入營伍。○

癸丑。

上兩詣

太皇太后

皇太后宮問安。○寧南靖寇大將軍多羅順承郡王勒爾錦等疏言。湖南各大將軍麾下。所有蒙古兵。已盡遣還。其在彝陵襄陽等處。蒙古兵一千七百餘人。亦應撤回京師。得旨。彝陵襄陽諸處。蒙古兵。准令撤還。於荊州諸處。滿洲綠旗官兵內。酌量抽撥。鎮守地方。○諭兵部。柯鐸等投誠官員。遇便一一遣發荊州。即傳諭大將軍王。將軍等知之。○甲寅。

上兩詣

太皇太后

皇太后宮問安。○湖廣提督徐治都疏言。設五

板船一百艘。令彝陵鎮臣胡世英統之。以備水路。臣親調官兵。偕襄陽鎮臣。水陸並發。前赴歸州興安巴東形勝之地。剿撫逆賊。得旨。所用戰艦。督撫等委官速造。毋悞軍需。徐治都。即偕彝陵襄陽總兵官。赴歸州諸處討賊。剿撫並用。速奏膚功。○乙卯。

上兩詣

太皇太后

皇太后宮問安。○兵部議奏。外委千總魏士曾。齎札往招偽將軍吳應麒。被殺。應贈千總。廕子弟一人。以衛千總用。得旨。著加贈守備。○鎮南將軍莽依圖疏報。偽將軍吳世琮等。圍南寧日久。城中食盡。旦夕且陷。投誠馬承蔭。請救。總督金光祖。遣總兵官譚昇。楊國泰等。率兵往南寧援之。吳世琮率眾渡江越嶺。於新村西山之巔。列鹿角逆戰。臣與將軍覺羅舒恕。額楚。都統勒貝等。分路撲剿。殺賊甚多。吳世琮負重傷。遂解南寧之圍。又太平偽

知府林輔世。新泰偽叅將何應魁。率城內文武官投誠。得旨嘉獎。下部議叙。○丙辰。

上兩詣

太皇太后

皇太后宮問安。○江西提督許貞疏言。玉山常

山。德興。一帶地方。逆賊偽英義將軍程碧。於

五月二十三日。被臣標守備鄭武等所擒。下

部議叙。○旌表福建節婦古田縣郭聖昌妻

黃氏。給銀建坊如例。○丁巳。諭兵部。江西南

昌備養之馬二千四百餘匹。湖廣武昌備養

之馬一千匹。移文該撫。令遣能員。解赴長沙。

沿途愛護。勿致缺額。付巡撫韓世琦。加意飼

秣。毋令羸瘦。馬畢到長沙。仍令韓世琦報部

○撫遠大將軍都統大學士公圖海疏言。益

門鎮逆賊既敗。即遣兵追剿。而賊毀偏橋。無

路可通。俟提督孫思克。趙良棟到日。會議進

兵。得旨。逆賊既敗。所在震動。自宜努力窮追。

收復疆土。前稱逆賊屯踞寶雞。圖海等欲調

各路之兵進剿。及賊敗之後。又不乘機撲滅。反藉稱賊毀偏橋無路可通。竟爾却還。如此懦怯。易退。何時乃得破賊。圖海等速調提督孫思克。趙良棟等。平定漢中四川諸處。剿殺逆賊。毋失機會。○鎮南將軍莽依圖疏言。南寧地方險隘。輓運維艱。議令將軍額楚。都統馬九玉。帥兵屯駐永淳。

上諭。今當逆賊震盪搖動之時。凡為將帥者。各宜不失機會。努力疾行。滅賊以定疆圉。莽依圖等。既大敗南寧逆賊吳世琮等。自當乘勢直取雲南。乃稱南寧險隘。輓運艱難。令額楚等往駐永淳。懦怯如此。逆賊何時得滅。滇南何日得平。今粵西底定。乘賊大敗之後。莽依圖等。速調都統希佛等兵。自南寧取路進剿。直抵滇中。○戊午。命山東巡撫趙祥星。發漕米五萬八百七十石。銀二萬二千六百餘兩。賑沂州等十三州縣饑民。○免山東淄川等五縣本年分旱災額賦有差。○庚申。京師地

震○

上詣

太皇太后

皇太后宮問安○諭戶部工部朕御極以來孜孜求治期於上合

天心下安黎庶夙夜兢惕不敢怠荒乃於本月二十八日巳時地忽大震變出非常皆因朕躬不德政治未協大小臣工弗能恪共職業以致陰陽不和災異示警深思愆咎悚息靡寧茲當力圖修省以迓

天庥念京城內外軍民房屋多有傾倒無力修葺恐致失業壓倒人口不能棺殮良可憫惻作何加恩軫恤速議以聞仍通行曉諭咸使聞知○諭大學士等地震傾倒民居朕心憫念至於窮苦兵丁出征在外房屋毀壞妻子露處無力修葺更堪憫惻可敕該部行令八旗都統副都統叅領親行詳察毋致遺漏○又諭大學士等地震示警災及軍民朕高居

御物勤恤民隱遇茲變異惻怛彌殷其摧塌房屋壓傷人口惟恐五城御史不能逐戶細察止憑司坊官員總甲人等開報未盡詳確不得均沾實惠應分遣不在五城滿漢御史詳加稽察著都察院遵行○諭吏部等衙門自古帝王撫御萬方兢兢業業勤求治理必欲陰陽順序和氣迎庥或遇災異示警務省愆思過實修人事挽回

天心茲者地震之變謹告非常反覆思維深切悚惕蓋由朕躬不德敷治未均用人行政多未允符內外臣工不能精白乃心恪盡職掌或罔上行私或貪縱無忌或因循推諉或恣肆虐民是非顛倒措置乖方大臣不法小臣不廉上干

天和召茲災青若不洗心滌慮痛除積習無以昭感格而致嘉祥朕力勤政務實圖修省目今應行應革事宜令部院三品以上官及科道在外各該督撫明白條奏直言無隱其在

京三品以上堂官。併督撫提鎮。俱據實自陳。毋得浮泛塞責。爾部即遵行。仍通諭內外軍民人等。咸使聞知。○召內閣九卿詹事科道滿漢各官齊集。命大學士明珠等傳諭曰。茲者異常地震。爾九卿大臣各官。其意若何。朕每念及。甚為悚惕。豈非由朕躬料理機務未當。大小臣工。所行不公不法。科道各官。不直行參奏。無以仰合。

天意。以致變生耶。今朕躬力圖修省。務欲挽回天意。爾各官亦宜洗滌肺腸。公忠自矢。痛改前非。存心愛民。為國。且爾等自被任以來。家計頗已饒裕。乃全無為國報効之心。爾等所善之人。即以為善。而奏聞。爾等所不合之人。即不行奏請。此等不公事情。朕聞見最確。欲即行處分。猶望改過。雖知之而不令議罪也。今見所行。愈加貪黷。習以為常。且從前遇此等災變之事。朕亦屢加申飭。但在朕前。則云欽遵申飭之旨。究竟全不奉行。前此大奸大惡。

之人。朕重加處分。爾等亦所明知。此即榜樣也。再科道各官。向來於大奸大惡之人。未見糾參。或因事體曖昧。未有憑據。難於舉發。此後科道各官。如有確見。即行據實參奏。若依然虛飾。如前所行奸惡。巧為掩飾。不加省改。或事情發覺。或經朕訪出。雖欲寬免。國法具在。決不貸宥。其即傳諭諸臣。咸使知之。○兵部議覆。福建總督姚啟聖疏言。永定縣所拏逆賊人口。內有難民。懇敕部咨行廣東江寧督撫清查。給還本家。查賊冠子女。原無查放之例。但據該督稱係難民。其中恐有被賊所擄。後為我兵所拏。亦未可定。應咨該督撫。除所拏逆賊家口。仍應存留外。其果係被賊所擄難民男婦。按冊清查。即行追出。遞送福建。給還本家。從之。○辛酉。

上詣

太皇太后

皇太后宮問安。○以故三等精奇尼哈番阿喇

納之弟畢力克襲職○戶部工部遵諭議地震傾倒房屋無力修葺者旗人房屋每間給銀四兩民間房屋每間給銀二兩壓倒人口不能棺殮者每名給銀二兩得旨所議尚少著發內帑銀十萬兩酌量給發○壬戌上詣

太皇太后宮問安○命滿漢大學士以下副都御史以上各官集左翼門

上遣侍衛費耀色齎諭旨仍口傳

上諭曰頃者地震示警實因一切政事不協天心故召此災變在朕固宜受譴爾諸臣亦無所辭責然朕不敢諉過臣下唯有力圖修省以冀消弭茲朕於宮中勤思召災之由力求弭災之道約舉大端凡有六事爾等其詳議舉行勿仍以空文塞責傳諭畢宣讀

上諭曰朕薄德寡識愆尤實多遭此地震大變中夜撫膺自思如臨冰淵兢惕悚惶益加修省朕意中素有數事使爾諸大臣總督巡撫

司道有司各官咸共聞知務期洗心滌慮實意為國為民斯於國家有所裨益即爾等亦並受其福庶幾

天和可致若仍虛文掩飾致負朕意詢訪得實決不為爾等姑容也○民生困苦已極大臣長吏之家日益富饒民間情形雖未昭著近因家無衣食將子女入京賤鬻者不可勝數非其明驗乎此皆地方官吏諂媚上官苛派百姓總督巡撫司道又轉而饋送在京大臣以天生有限之物力民間易盡之脂膏盡歸貪吏私橐小民愁怨之氣上干

天和以致召水旱日食星變地震泉涸之異○大臣朋比徇私者甚多每遇會推選用時皆舉其平素往來交好之人但云辦事有能並不問其操守清正如此而謂不上干

天和者未之有也○用兵地方諸王將軍大臣於攻城克敵之時不思安民定難以立功名但志在肥己多掠佔小民子女或借名通賊

將良民廬舍焚燬。子女俘獲財物攘取。名雖救民於水火。實則陷民於水火之中也。如此。有不上干

天和者乎。一。外官於民生疾苦。不使上聞。朝廷一切為民詔旨。亦不使下達。雖遇水旱災荒。奏聞部覆。或則蠲免錢糧分數。或則給發銀米賑濟。皆地方官吏。苟且侵漁。捏報虛數。以致百姓不沾寔惠。是使窮民而益窮也。如此。有不上干

天和者乎。一。大小問刑官員。將刑獄供招。不行連結。使良民久羈囹圄。改造口供。草率定案。証據無憑。枉坐人罪。其間又有衙門蠹役。恐嚇索詐。致一事而破數家之產。如此。有不上干

天和者乎。一。包衣下人。及諸王貝勒大臣家人。侵佔小民生理。所在指稱名色。以網市利。干預詞訟。肆行非法。有司不敢犯其鋒。反行賄賂。甚且身為奴僕。而鮮衣良馬。遠勝仕宦之

人。如此。則貴賤倒置。所關匪細。以上數條。事雖異而原則同。總之。大臣廉則督撫有所畏。督撫不敢枉法以行私。督撫清正。則屬下官吏操守自潔。雖有一二不肖有司。亦必改心易慮。不致大為民害。此事朕非不素知。但以正在用兵之際。毋示寬容。今

上天屢垂警戒。敢不昭布朕心。嚴行戒飭。以勉思共回

天意。作何立法嚴禁。務期盡除積弊。著九卿詹事科道會同詳議以聞

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之八十二

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之八十三

監修總裁官光祿大夫太子太傅保和殿大學士兼戶部尚書三等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管文部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未八月癸亥朔

上詣

太皇太后宮問安○諭議政王大臣等攻擊海

賊營壘宜用火礮內造西洋礮甚利且輕便

易運可令湖廣巡撫張朝珍以湖廣所有西

洋礮二十具委官遞送福建總督姚啓聖軍

前用資剿禦○福建總督姚啓聖疏言海逆

鄭錦以臺灣為巢穴志必不降斷不可遣人

招撫其偽武平侯劉國軒乃賊中渠帥頗能

用兵請赦其前罪授以公爵偽將軍吳淑本

無反志。由部將迫脅。請亦赦其前罪。授以侯爵。至偽總兵陳昌林陞江欽。吳潛均請畀以總兵官。實授管事。此數人若解體投誠。則鄭錦勢孤。海寇根株立可芟滅。

上諭。凡逆賊有率眾來歸。及獻城納款者。必俟投至之日。方論功議叙。豈有未經投順。先爵以公侯之理。劉國軒等果輸誠立効。率眾來歸。當赦其前罪。仍行論功。該督可遣人以此意往諭之。○先是。總督姚啓聖疏言。平南將軍賴塔。久鎮潮州。兵民俱已心服。今在漳州。宜令兼轄潮州。

實錄卷八十三

二

上允之。命賴塔兼轄潮州。至是。賴塔疏言。臣身在漳州。與賊對壘。且滿洲大兵。係大將軍康熙親王傑書統轄。潮州地處遙遠。實難兼轄。上諭。成命已頒。仍令將軍賴塔兼轄潮州。如須用滿洲大兵。許一面酌量調遣。一面申報大將軍康熙親王。○先是。海澄公黃芳泰。題請暫駐汀州。為其殉難兄黃芳度營葬。至是。總督

姚啓聖疏言。汀漳二郡。多有冒稱海澄公家人者。即有奸宄。有司不敢問。且偽將軍吳淑。吳潛等。曾害黃芳度。因黃芳泰在汀。不敢來漳歸順。黃芳泰不宜久留汀州。

上命黃芳泰。攜家赴京師。○甲子。

上詣

太皇太后宮。問安。○諭內閣。戶部。官員兵丁。房屋墻垣。頃因地震。塌毀甚多。一時不能修葺。四品官員以下。見食半俸。此一次。仍行全給。

實錄卷八十三

二

其護軍撥什庫。披甲當差人役。錢糧著即支與兩月。令其修理。○撫蠻滅寇將軍廣西巡撫傅弘烈疏報。賊范齊韓。踞柳城融縣。窺伺桂柳。接應南寧。臣檄永寧遊擊鄧林才。會合馬承蔭兵。協剿擒斬甚眾。恢復柳城融縣二縣。桂柳路通。得旨嘉獎。下部議叙。○喀爾喀車臣汗。遣使進九白年貢。宴賚如例。○乙丑。上詣

太皇太后宮。問安。○以故二等阿思哈尼哈番

韓壽子牛扭襲職○廣西提督哲爾肯疏言。臣駐潯州三合嘴。彈壓兩江。接應大兵。但慶遠。太平。思恩三府。逼近交趾。聯接雲貴。為粵西藩籬。今逆寇苗蠻。嘯聚負固。尚未克復。臣請統兵先往南寧。會同將軍莽依圖。相機剿撫。

上諭。哲爾肯身在地方。有保守西粵之責。關係甚重。今既請統兵前往。令速赴南寧。偕將軍莽依圖。總督金光祖等。乘逆賊震動。共議剿撫。以靖封疆。其原駐潯州三合嘴之地。倘屬緊要。總督提督。可發兵汛守○丁卯。遣大學士李蔚。祭先師孔子○

上詣太皇太后宮。問安○鎮安將軍噶爾漢疏報。臣率兵偕總督楊茂勲。提督佟國瑤等。進剿興安賊。

上諭。噶爾漢等。既率兵前進。均州。鄖陽諸處。緊

要。大將軍順承郡王等。於荊州。岳州。澧州等兵內。酌量抽調。固守均。鄖諸處○戊辰。祭大社。

大稷。

上親詣行禮○已巳。

上詣太皇太后

皇太后宮。問安○陞左通政伊圖。為太僕寺卿○定遠平寇大將軍和碩安親王岳樂疏報。

臣等率兵自寶慶起行。七月二十日。抵紫陽河。見對岸有賊營。令建義將軍侯林興。珠提督趙國祚。副將尼滿。率兵渡河進擊。又鑲黃旗署護軍統領瓦代。督標遊擊牛鳳翔。渡河繞出賊營後夾擊。賊棄營遁。追殺賊二百餘人。生擒偽都司一名。下部議叙○庚午。原任廣西提督馬雄之子馬承蔭。疏請効力贖罪。上諭。議政王大臣等。馬承蔭不忘國恩。誠心率眾齋繳偽勅印投誠。可嘉。應授馬承蔭伯爵。

給與將軍敕印。隨大兵進剿。其標下應設官兵等處。令理事官麻勒吉等與總督金光祖同馬承蔭確議以聞。其餘兵丁有願歸農者。安插得所。願為兵者。選撥入伍。至同來歸附文武官員。酌量給劄。以示鼓勵。○陞前鋒叅領索諾木為鑲白旗蒙古副都統。○辛未。

太宗文皇帝忌辰。遣官祭

昭陵。○以左副都御史施維翰為山東巡撫。○

壬申。以故二等精奇尼哈番劉澤涵子劉俊

傑襲職。○陞叅領王之弼為正紅旗漢軍副

都統。○偏沅巡撫韓世琦疏報。湖南郡邑。次

第恢復。而安化與辰屬溆浦相連。叢山峻嶺。

猶有餘孽。守備雷如等。分路衝殺。賊死者甚

多。餘賊敗遁。下部議叙。○癸酉。

太祖高皇帝忌辰。遣官祭

福陵。○轉工部右侍郎趙璟為左侍郎。陞通政

使張問政為工部右侍郎。○九卿等遵諭議

覆。○督撫司道官員赴任時。謁見在京大臣。

各官或自任所差人問候。及在京家人。提塘人等來往。大臣各官之家。將督撫司道并不行出首之大臣官員。俱革職。若不知者。降二級。兩家家人。俱正法。提塘有職者。革職。無職者。亦照家人正法。其在京大臣各官與督撫司道等。彼此餽送。及差人遠赴任所。將大臣各官。並不行舉首之督撫司道。亦俱革職。若有因事營求。苛派餽送。大臣官員者。將餽送收受之人。俱革職。拏問。○會推官員貪污者。將原舉官。從重治罪。○領兵諸王將軍。借通賊為名。將良民廬舍燒燬。擄掠子女。搶奪財物。將領兵將軍。叅贊大臣。夸蘭大等。俱革職。諸王貝勒等。交宗人府從重治罪。若分遣之兵丁。搶掠者。將統領頭目等官。分別革職。降級。兵鞭責。係家人正法。其主知情者。革職。不知情者。降二級。閒散人鞭責。其擄掠人口。仍給本家。如督撫不行具題。俱行革職。○凡州縣官。將民生疾苦。不詳報上司者。革職。永不

叙用。或州縣已報。上司不為題達者。將上司俱革職。至發倉賑饑。及蠲免錢糧。州縣官侵蝕肥己者。革職拏問。上司官不行稽察。俱行革職。一凡刑獄不速結者。無故將平人久禁者。承審官皆革職。因而致死。及故勘致死者。俱照例處分。若改造口供。故行出入者。革職。誤擬死罪。已決者抵死。枉坐人罪者。承審官革職。衙役詐贓十兩以上者。并妻子安插奉天。一百二十兩者。照枉法擬絞。一包衣下人。王貝勒貝子。公大臣家人。領資本霸佔關津生理。倚勢欺凌者。在原犯事處。立斬示衆。該管官革職。若係宗室王以下。公以上家人。親王。罰銀一萬兩。郡王。罰銀五千兩。貝勒。罰銀二千五百兩。貝子。罰銀一千三百兩。公。罰銀七百兩。仍交宗人府。從重議處。其管家務官。俱革職。若係民公。侯。伯。大臣官員家人。將伊主俱行革職。汎地文武官。不行查拏者。俱革職。至王以下大臣各官。將銀借貸與民。指名

貿易。霸佔地方者。亦照此定例治罪。又包衣下人。及諸王貝勒大臣家人。如有在外指稱名色。以網利干訟。肆行非法。及有司畏勢。反行財賄者。行賄官革職。伊家主及該管官。知而使去者。革職。王以下。宗室以上。交與該衙門從重議處。其去人。枷號三個月。鞭一百。伊家主不知。私自去者。照光棍例處決。至奴僕服飾。各有定例。若違法越分。將其主罰俸一年。閒人。鞭責八十。民。責三十板。越分穿用之人。係旗下奴僕。枷號。民。責四十板。其物入官。如該管官不行查出。被旁人拏送。將越分穿用之物。給與所拏之人。將佐領。驍騎校。罰俸三個月。小撥什庫。鞭五十。民之該管官。亦罰俸三個月。總甲。責二十板。應通行曉諭內外軍民人等。一體遵行。得旨。依議。嚴飭通行。○福建巡撫吳興祚疏報。招撫偽總兵蔡冲琿等三員。偽官八十五員。兵丁一萬二千五百一十七名。招回島民三千一百九十餘名。共

獲大小船六十七隻。分撥水師營用。下部議叙。○甲戌。諭吏部等衙門。凡為臣子者。同寅協恭。自古皆然。今各部院辦理事務大小漢官。凡事推諉。滿官事之得當。則歸功於己。如事失宜。則卸過於人。至於入署。不待事畢。諉於滿官。祇圖早歸。宴會嬉遊。不為國家盡力。擔當料理公務。自此以後。各宜協力同心。務盡厥職。不可仍前推諉。至科道各官。平日章奏內。將一二可行之事。隱附私情。希圖作弊。凡有條議。鮮非無因。閱覽奏疏。多以己為至公至廉。其囑託公事。肆行妄為。外播威勢。挾制多端。地方督撫等官。莫不畏懼。小民困苦。未必不由於此。作何懲戒。著九卿詹事科道詳議具奏。尋九卿等議覆。嗣後漢官推諉滿官。瞻徇延挨者。革職。科道條奏有囑託挾制等弊者。革職提問。至大臣科道官員原籍子弟。有挾勢妄行者。照律處分。父兄不約束。督撫不題叅者。皆革職。從之。○九卿議覆。吏科

掌印給事中李宗孔條奏。一。江西總督董衛國。不能料理政務。致失民心。浙江巡撫陳秉直。察吏無能。賢否混淆。俱應解任。一。良民男婦子女。身陷賊營。官兵敗賊後。應令親屬認識。酌量給價取贖。一。大計停止。已經六年。應行令各省督撫。於文到一月內。將所屬官員。秉公舉劾。如舉劾不當。將督撫藩臬等官。從重處分。俱應如所請。得旨。董衛國著留任。軍前戴罪圖功。陳秉直著解任。餘依議。○乙亥。鎮南將軍莽依圖疏言。當逆賊圍困南寧時。郭義。齊人龍。悉力固守。數與賊戰。非他處投誠者可比。今聞左江總兵官缺員。以湖北總兵官傅魁調補。倘念邊疆要地。乞以郭義或齊人龍補授。茲缺。用開歸誠之路。上諭。郭義原係左江總兵官。率眾歸誠。勤勞昭著。仍復原任。齊人龍亦有勞績。如有應補之缺。聽該將軍題補。其湖北總兵官原缺。尚未補人。令傅魁仍回原任。○陞前鋒叅領喀齊

藍為正黃旗蒙古副都統○陞徐州副將惠

占春為山東沂州總兵官○叅領李林盛為山

東登州總兵官○奉命大將軍和碩康親王

傑書疏報偽總兵楊彩黃栢偽水師三鎮總

兵吳定芳偽副將陳化甲等各率偽官兵丁

投誠下部議叙○丙子戶部議覆廣東廣西

總督金光祖疏言粵西土瘠民貧地丁額銀

請折徵米穀應如所請每銀一兩折收米一

石支給官兵俟事平之後照舊徵銀其逆賊

加派之項通行禁止從之○兵部議奏投誠

吳應昌係逆賊吳三桂之姪不便留在廣西

應令將軍傅弘烈撥發官兵沿途護送來京

得旨吳應昌係逆賊親支傾心投誠可嘉著

送至大將軍簡親王軍前酌給劄付令其招

撫餘賊○撫蠻滅寇將軍廣西巡撫傅弘烈

疏報偽總兵左旌王定邦等投誠又偽總兵

史自安等獻城投誠又叅議道劉曉招撫偽

總兵李蒼唐良等下部議叙○丁丑

上詣

太皇太后

皇太后宮問安○以地震遣官告祭

天壇○免山東莒州蒙陰等六州縣本年分旱

災額賦有差○己卯吏部左侍郎董安國以

自陳革職兵部右侍郎孫光祀以自陳降三

級調用○庚辰

上詣

太皇太后宮問安○諭戶部通州三河等處地

震災變壓傷人口無人收瘞殊為可憫戶部

工部會同將旗下及民人房屋并各寺廟內

有見被壓埋者作何察明數目速議以聞部

議遣司官四員前往驗視

上令動支帑銀帶去有主收殮者即給銀兩無

主收殮者著所遣司官同地方官設處埋瘞

○揚威大將軍和碩簡親王喇布疏言臣遣

將軍穆占於本月初一日克復新寧縣今與

大將軍安親王岳樂剋期進勦武岡逆賊

上諭。屯聚新寧賊寇。已遁走武岡。簡親王等。速統大兵。即會合安親王等兵。克復武岡楓木嶺諸處。以定靖沅。其由鎮遠進平雲貴。應行事宜。確議以聞。倘逆賊不支。屢致遁逃。安親王等。乘其無措。隨行追躡。以期蕩平。如賊由武岡遁去。烏喇寧古塔之兵。可遣還京師。○定遠平寇大將軍和碩安親王岳樂疏報。賊首吳國貴。盤踞武岡。率偽將軍胡國柱等。以餘賊二萬。逆戰隘口。將軍侯林興珠。提督趙國祚等。率兵奮擊。大敗之。吳國貴中礮死。餘賊棄武岡而遁。貝子章泰等。復率兵追及於木爪橋。又大敗之。遂復武岡州城。及楓木嶺。得旨嘉獎。下部議叙。○旌表湖廣黃陂縣節婦樂氏。給銀建坊如例。○辛巳秋分。夕月於西郊。遣內大臣輝塞行禮。○予故都察院左都御史穆臣。祭葬如例。○癸未。轉戶部右侍郎薩穆哈。為左侍郎。以原任戶部右侍郎達都補原官。○甲申。以故武昌衛一等阿思

哈尼哈番徐自貴子徐承祖襲職。○乙酉。

上詣

太皇太后

皇太后宮問安。○免江南徐州豐蕭沛泗州縣。

本年分旱災額賦十之三。○丙戌。遣官祭

歷代帝王。○遣官祭城隍之神。○吏科給事

中姚締虞疏言。科道乃朝廷耳目之官。原期

知無不言。有聞則告。已故憲臣艾元徵有請

禁風聞條奏。從此言官氣靡。中外無顧忌矣。

試觀

世祖章皇帝時。諸臣奏議。何如鯁直。即未禁風

聞以前。諸臣奏議。亦猶有可觀。伏乞敕下在

廷諸臣會議。嗣後如有矢志忠誠。指斥奸佞

者。即少差謬。亦賜矜全。如或快已。恩讐受人

指使者。縱彈劾得實。亦難免於徇私之罪。如

此。則言官有所顧忌。而不敢妄言。中外諸臣

有所顧忌。而不敢妄為矣。得旨。九卿詹事科

道。會同確議具奏。○丁亥。

上詣

太皇太后

皇太后宮問安○予故平寇將軍委署副都統
原任兵部尚書科爾科代祭葬如例○喀爾
喀土謝圖汗遣使進九白年貢宴賚如例○
戊子諭九卿詹事科道自古設立臺省原係
朝廷耳目之官上之則匡過陳善下之則激
濁揚清務求知無不言言無不盡乃稱厥職
近見直言讜論者不過幾人徇私好名者不
可勝數朕自臨御以來畧知此情每期言路
諸臣化其偏私實陳得失輔登上理頃有以
風聞言事請者試約畧論之如今之章奏已
見施行者雖不明言為風聞何嘗不是風聞
今若開風聞之條使言事者果能奉公無私
知之既確言之當理即當敷陳何必名為風
聞方入告也倘生事之小人恃為可以風聞
但徇己之好惡必致擅作威福以行其私彼
言之者既無確見聽之者安能問其是非故

曰無稽之言勿聽弗詢之謀勿庸正所以誠
言之無據謀之自專也況天下之太臣民之
衆導之以理曉之以法待臣下須寬仁有容
不因細事而即黜之所以體羣工也用人則
隨才器使無求全責備之心蓋以人材有不
齊也若關天下之重朋黨徇私之情皆國家
可叅可言之大事不但科道而已有志之臣
民槩可以言之何在區區風聞之言能斂戢
奸貪之志氣哉治國家者在有治人不患無

治法爾○山東巡撫施維翰請訓旨

上曰近日山東兵丁鼓譟極為可惡爾到地方
宜嚴行禁戢施維翰奏曰兵民皆朝廷赤子
止因巡撫提督文武不和遂致兵丁生變臣
當與提督臣同心協力調劑兵民

上曰文武協和自然地方安輯○己丑諭大學
士等自古帝王治天下之道因革損益期於
盡善原無數百年不敝之法果屬不可行者
自應叅酌時宜歸於可久至於制度既定事

可遵行。不宜議論紛紜。朝更夕改。近閱奏章。亦有不思事之可否。但欲徒為更張。或粗識數字。即為大言準之事理。殊屬茫昧。如逞空言。無補實用。其誰不能。且明末一切事例。游移不定。上無道揆。下無法守。以致淪亡。此皆爾等所親見。亦眾所共知。今後凡條奏本章。爾大學士等務加詳酌。○諭議政王大臣等。今我大兵數路並進。深入剿賊。轉運糧餉。殊為重要。聞今歲湖南亢旱。所運糧餉。一時不前。殆未可定。令學士佛倫。侍郎金鉉。并遴選部院賢能官員。前往湖廣。同督撫商酌。總理諸路大兵糧餉。○靖逆將軍甘肅提督侯張勇疏言。噶爾丹遣其寨桑莽奈致書於臣。云我向欲通使。因地方有事未暇。今特遣人獻馬三匹。貂裘一襲。又云西北一帶地方。皆得之矣。惟西海。尚係我祖與伊祖同奪取者。今伊等獨據之。欲往索取。因係將軍所轄之地。不敢輕舉。臣念彼遠餽。受其裘馬。厚賞來使。

而遣之。前此噶爾丹。曾遣人調集甘州南山一帶番目赴西套。臣因遴選通事。密探噶爾丹年紀性情。並與兵往侵西海之故。歸覆云。噶爾丹申年所生。年三十六歲。為人兇惡。耽於酒色。去歲舉兵欲侵西海。行十一日。撤歸。今夏又兩次出兵。至纏頭回子之地而還。見近邊諸將軍統兵駐扎。不敢輕犯。臣查近者入邊行劫。皆係噶爾丹擊敗來奔。貧無所依之人。詳視噶爾丹情形。尚無興兵之舉。河西地方似可無患。謹將噶爾丹原書。一并呈覽。奏入。命檄知大將軍圖海。○庚寅。撫遠大將軍都統大學士公圖海疏言。進取漢中興安兵。分為四路。臣與將軍佛尼勒等。由興安進。總兵官程福亮為後援。駐守舊縣關諸處。將軍畢力克圖。提督孫思克等。由畧陽進。西寧總兵官朱衣客為後援。駐守西河諸處。將軍王進寶。漢中總兵官費雅達等。由棧道進。延綏總兵官高孟為後援。駐守寶雞。寧夏提督

趙良棟由徽州之巴都山進。臣等於九月初

八日。四路並發。疏入。

上諭。今將軍莽依圖等。大敗逆賊吳世琮。平定粵西。進取雲貴。大將軍安親王。恢復武岡州。楓木嶺。擊殺賊渠吳國貴。大將軍貝勒察尼。由常德進取辰州。將軍噶爾漢等。自鄖陽進取興安。宜乘賊處處敗衄。逃遁震動之時。分路撲滅。大將軍公圖海。亟統大兵乘機剿滅。漢中諸處賊寇。速定四川。如賊敗走。即亟躡其後。直搗窮追。勿使占踞險要。○禮部議准。福建巡撫吳興祚疏言。琉球國王世子尚貞。咨稱康熙十三十五年。正當貢期。聞閩省變亂。未曾入貢。今特進康熙十七年分所貢方物。至來年冬汛。再遣使補康熙十三十五年之貢。得旨。琉球國康熙十三十五年貢物。免其補進。○辛卯。

上詣

太皇太后宮問安。○召滿漢九卿詹事科道等

官集中左門。

上先召吏部侍郎哲爾肯屯泰。至內殿。諭曰。朕親決幾務。十年餘矣。科道為朝廷耳目之官。每覽奏疏。實能為國。有裨政事者甚多。草率塞責者甚多。爾可傳諭九卿各官。並將朕諭旨宣示。少頃進見。朕將面詢得失。各據所懷。直陳勿隱。哲爾肯屯泰。出至中左門。向各官先宣。

口諭訖。隨讀

上諭曰。今將科道兩衙門本章情弊。無益國計民生之處。一一講究。卿等必有至公之衆論。以佐朕意。卿等但有所見。即直言。不可隱諱。即如科道條陳一事。部議准行。又有科道官言其不可者。今日之所謂是。明日又轉而為非。朝更夕改。茫無成憲。難取信於天下。豈治道至理哉。姑舉其大槩。如舉才能一事。是因人材不一。有能理繁者。有有操守者。有練習其事者。自古選賢任能。為治之大道。與論俸

不同其法未嘗不善。即

世祖章皇帝時亦曾有諭常行選擇之條。偶有徇私作弊之人。將不肖寡廉者薦之。因一人而其法遂壞。自朕親政以來。如鹽差關差數行更換。以後條陳不知又改幾次也。又如戶部銷筭錢糧一事。因督撫所報不合時價。故部議駁回。而科道輒有言者。以為督撫地方大臣斷無虛估價值。肥己行私。凡有銷筭皆不應駁查。及部議徑准督撫之銷筭。不行再駁。則科道又以督撫冒破錢糧。一束草原價若干。開銷若干。一石豆原價若干。開銷若干。不特草豆為然。凡馬匹等項。事事皆有虛冒。部中不行詳查。聚聽督撫開銷。以徇情面。由此觀之。部議不行駁回。則以為徇督撫之私情。駁回。則以為督撫地方大臣不宜疑其有所虛冒。又恐衙役往來騷擾生事。或應駁不應駁。何者為是。兩說俱無定論。是皆大者餘難悉述。今日面諭尚有未盡之言。故先以上

諭使曉朕意。隨命九卿詹事科道各官至御榻前。

上問曰。科臣姚締虞所奏風聞言事疏。爾等如何定議。吏部尚書郝惟訥。戶部尚書梁清標等奏。言官奏事原不禁其風聞。但風聞叅奏。審問全虛者。定有處分之例。今若不加處分。恐有借稱風聞挾私報怨者。亦未可定。仍應照定例行。兵部尚書郭四海。左都御史魏象樞。戶部侍郎田六善等奏。見行例。科道奏事全虛者。處分一款。得實者。即免議。人人原可盡言。但要虛公體訪。不宜又開風聞之例。上顧科道諸臣。問曰。風聞言事。爾等以為可行否。如有欲言。可悉陳奏。吏科掌印給事中李宗孔。禮科掌印給事中余國柱等奏。言官風聞言事。

皇上原未禁止。但徑開風聞之例。恐有未便。上曰。此係明末陋習。若此例一開。恐有不肖言官。借端挾制。罔上行私。顛倒是非。誣害良善。

等弊。

上問姚締虞曰。爾云言官風聞言事。爾意如何。姚締虞奏。

皇上從不曾處分言官。但有處分條例在。言官皆生畏懼。

上曰。人臣為國。不擇利害。有志之士。雖死不畏。況降級乎。爾等皆以風聞為言。朕亦何嘗無風聞。姑舉一二端言之。君臣分義。休戚相關。當吳逆初叛時。諸臣中有一聞變亂。即遣妻

子回原籍者。此屬何心。視國如家之誼。當如是耶。又有佔人田土。受人賄賂。徇情行私。大為不法者。爾言官何曾一言參奏。言官奏事。宜將國家重大事務。確加敷陳。今爾等所言。多舉細事。無關治要。嗣後慎勿草率塞責。如有大奸大貪。叅劾得實。朕法在必行。決不姑貸。

上又諭曰。滿漢論事。往往不能和衷。漢官每謂滿官偏執。若漢官肯實心為公。據理辨論。滿

官豈有不從之理。若滿官堅意偏執。漢官即當奏聞。

上又諭曰。從來有治人。無治法。為政全在得人。人臣事君。全在辨心術之公私。今爾諸臣之才。皆能料理政務。但徇私利已者多。公忠為國者少。若諸臣肯洗心滌慮。公爾忘私。國爾忘家。和衷協恭。實盡職業。庶務何患不就理。國家何患不治平哉。爾諸臣其勉之。○壬辰上詣

太皇太后宮問安。○揚威大將軍和碩簡親王喇布疏言。臣探得安親王大兵已克武岡。賊寇敗遁。故臣遣烏喇寧古塔兵還京。臣統兵一支。駐劄東安縣。以將軍印信給與都統穆占。令其率兵一支。駐新寧候旨。

上諭。逆賊既敗。簡親王等宜統兵隨後速追。與大將軍安親王共破賊寇。乃不行追剿。反勒兵新寧。以致軍機大悞。理應嚴加處分。但今方統兵進剿。俟回師之日。察議。簡親王其速

率兵往會安親王平定靖州沅州諸處俟
至鎮遠日平定雲貴事宜定議以聞○調兵
部左侍郎楊永寧為吏部左侍郎管右侍郎
事

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之八十三

實錄卷八十三

上六

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之八十四

監修總裁官光祿大夫太保無太子太傅保和殿大學士兼戶部尚書三等伯加四

級臣馬齊光祿大夫經筵日講官起居注少保無太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未九月癸巳朔

實錄卷八十四

一

上詣

太皇太后宮問安○喀爾喀墨爾根台吉等遣
使進九白年貢宴賚如例○甲午以侍講學
士崔蔚林充日講起居注官○奉命大將軍
和碩康親王傑書疏報偽總兵張文魁投誠
下部知之○安塘筆帖式報大將軍貝勒察
尼遣署前鋒統領蘇虎濟偵視辰龍關賊勢
蘇虎濟還言辰龍關路徑堙塞甚固賊與民
一無所見河渠畢涸大兵不可立營

上諭今賊勢大敗。正在摧破。凡為將軍大臣者。各宜盡心効力。乘賊無措。即行追剿。速靖地方。武岡州楓木嶺。係辰龍關後路。逆賊必自震動。貝勒察尼等。遣蘇虎濟偵視。蘇虎濟不探聽賊中確音。遽報賊與民一無所見。復云大兵不能立營。規避退縮。殊為不合。貝勒察尼等。其速取辰龍關。前至鎮遠。與大將軍安親王等兵會。共議進定雲貴事宜。以聞。又諭議政王大臣等。以內廐馬一千匹。兵部太僕寺馬一千匹。頒給進取辰州大兵。○乙未。

上詣

太皇太后

皇太后宮。問安。○陞太常寺卿王盛唐為通政使司通政使。○免江南宿遷縣康熙十六年分水災額賦有差。○諭議政王大臣等。今者武岡州楓木嶺。俱經恢復。賊不能踞辰龍關。必至自遁。安親王。簡親王。貝勒察尼等。所部大兵。皆宜速赴沅州。如有破賊機會。聽爾等

酌量而行。大兵宜撤其半還京師。到日。別撥禁兵更代。以休養之兵力。收定餘地。大兵作何分撤。安親王等。其確議奏聞。駐沅州候旨。○諭理藩院蒙古兵。隨大兵征剿。雖未有奇功顯績。然勤勞數年。宜加恩賚。今將至京師。其將領賜以鞍馬。餘衆各給以羊。宜迎至相鄉縣。將到日。令先期報知。遣蒙古內大臣二人。前往勞之。○議政王大臣等。議覆。理事官麻勒吉等疏言。劉彥明等率領投誠之綠旗兵三千。除歸農外。尚餘一千二百名。應立二營。設副將一員。守備千總各二員。管轄鎮守桂林。即以投誠將弁補授。應如所請。將此兵丁歸入廣西額兵數內。從之。○議政王大臣等。又議覆。理事官麻勒吉疏言。定南王藩下。既留旗兵。應照前設都統一員。副都統二員。叅領三員。佐領十五員。驍騎校十五員。應如所題。將投誠之偽將軍劉彥明。管都統事。偽將軍徐弘鎮。徐上達。管副都統事。令麻勒吉

會同劉彥明揀選人材壯健遼東舊人留為披甲從之○丙申以鑲藍旗二等阿思哈尼哈番軍務革職甘度海之弟蘇白赫襲職○丁酉

上詣

太皇太后宮問安○厄魯特噶爾丹台吉遣使進貢請安并遵諭覆奏疏曰前使西白里達爾漢和碩齊同行佟噶爾代因其妄為已治罪矣從前回子充諸台吉之使而往原不之

知今接來文問之回子僉云前充諸台吉之使而往者部內並不查訊已年以後乃不准放入信如所言是回子詐冒向不責罰以致縱惡若本地從前遣使皆與文并發即如今次所遣阿卜都拉額爾克寨桑是也奏入

上嘉納之給賞如十六年例○戊戌陞大理寺卿李本晟為浙江巡撫○達賴喇嘛厄魯特達賴汗遣使進貢賞賚如例○理藩院題噶爾丹稱為博碩克圖汗遣使貢獻鎖子甲鳥

鎗馬駝貂皮等物來使云達賴喇嘛加噶爾丹台吉以博碩克圖汗之號是以奉貢入告從前厄魯特喀爾喀有奏請敕印來貢者准其納貢授以敕印並加恩賚從無以擅稱汗號者准其納貢之例但噶爾丹台吉敬貢方物特遣使入告應准其獻納從之○己亥

上詣

太皇太后

皇太后宮問安○以故正藍旗一等精奇尼哈番鄂諾爾之子索諾慕襲職○庚子涼州提督孫思克疏言漢中興安未便進取

上諭議政王大臣等孫思克奏稱賊多步行踰嶺登山如履平地小路曲徑賊所稔知我兵前進恐賊由紆徑潛躡我後以絕餉道為害滋甚朕思秦地綠旗之兵為數甚多其中步兵不少且各省綠旗兵向推秦兵精銳賊能跋涉山嶺我兵秦養有年何獨不能况漢中興安為秦內地滿漢大兵經行熟悉何得視

同絕域。輒荒誕其辭。凡將帥用兵。前進衝鋒。後顧餉道。務詳度。以合機宜。乃一定之道也。倘以賊間道潛來。斷絕餉道為憂。怯懦不前。則永無破賊之日矣。又疏言。大將軍公圖海。分滿漢兵為四路。雖分賊勢。終憂兵單。綠旗兵每人止有一馬。且未必皆強壯。可用之兵。惟滿洲大兵堪任。第為數無多。雖欲另調。又恐秦地三邊。番彘甚衆。當此秋高馬肥。思逞之候。實無兵可調。不若俟來春二三月間。塞外草尚未生。水泉猶涸之時。多調邊兵。以資戰守。各路進發。朕思秦中滿兵不少。綠旗兵較各省更多。今稱兵力單弱。顯屬畏縮。憚於進兵。且各省綠旗兵。亦止一馬。曾無多給。而且越境征剿。粵東粵西閩楚諸處。今又進定滇黔。較之平定境內。漢興勞逸何如耶。向者凡將軍提鎮官募兵時。必選精壯。勿使濫收充數。定例嚴明。今若以秦兵皆非強壯。難以應用。則孫思克職任何事。觀此。則欺蔽之情。

更顯然矣。且有將軍公圖海在彼。乃妄議大兵多寡。殊屬狂妄。又云。番彘馬肥。思逞。欲俟來春二三月間。草尚未生。水泉猶涸之時。進取。設或二三月間。進取之後。四五月間。番彘馬肥。思逞。將若之何。正值秋成涼爽。各處賊寇大敗震驚之餘。不速行蕩平。反欲於來春青黃不接之時。進取。是何意耶。又奏稱秦省大半皆山。地瘠民貧。不產杭稻。所種惟麥豆之屬。向有捐納一事。稍裨用兵。今例已停罷。民受採買之苦。且山路險阻。必資負戴馱運。其雇賃之價。數倍於應輸之賦。今各路需餉甚多。山徑狹隘。輓運維艱。時當初冬。草枯葉落。畜牧無資。欲俟來春。調集官兵。務期兵強糧足。共圖進取者。職此之故。朕思粵東粵西諸省。山嶺亦多。何曾豫備糧餉。官兵豈有止食稻米。不食他粟之理。至於捐納。各省俱停止。留粵西事例。以資平滇軍需之用。自定秦省數年以來。未曾勞民轉運。且漢興雖

多險阻。乃陝西內地。非隔省百姓轉輸可止。今恐輓運累民。至春又誰為轉送耶。當逆賊敗遁之時。急令進兵者。正為早定地方。以安百姓耳。採買恐累於民。巡撫抗愛題奏。已經改定。今以請開事例。轉運維艱。為辭。其規避進兵明甚。又疏稱八旗出征官兵。今年七月二十八日。京師地震。房屋傾壞。壓斃人民。聞之各懷內顧之憂。臣所以暫停進取。以回天意。俟人心稍定。再議進兵未晚。朕思八旗官兵。世受豢養。朕之如意。臣僚士卒。尤為渥厚。不特房屋傾圮細故。即赴湯蹈火。誼亦難辭。孫思克封疆大臣。凡事不加詳察。妄言人情皆動。以惑軍心。殊失大臣之體。細察孫思克疏內前後情由。惟耽安逸。怯於進兵。列款巧奏。且自秦省有事。孫思克等係封疆大臣。俱應按律議處。念同大兵進剿。宥過計功。給以世襲之官。加以不次之擢。當捐軀報國。破賊安疆。自請前進効力。乃孫思克身任提督。統

轄全師。不思奮力前進。反煽惑滿漢。動搖民心。飾辭妄奏。深負朕擢用之恩。情罪殊屬可惡。其令翰林學士喇沙里。速往嚴取口供來奏。尋喇沙里取供還奏。

上曰。孫思克理應嚴察治罪。但今方統兵與大兵分路進剿。俟事平日再議。○辛丑。

上詣

太皇太后宮問安。○諭護軍統領吳丹。近者廣西南寧賊將吳世琮被誅。湖南武岡州吳國貴。亦已授首。廣西湖南俱經投誠。賊意懈弛。賊兵潰散。天下之人咸知賊勢必敗。罔不引領望諸將軍早靖逆氣。爾等陝西將士。駐紮善地。為無傷斃。人無疾病。不思速滅賊寇。支吾推諉。進取無期。又有何人代為爾等破賊耶。爾在朕左右。稔知朕意。應勇果任事。參贊大將軍機宜。以立功勲。頃大將軍稱言來京。陛見。面奏軍國大事。此至陳奏。並無成算。有失眾望。此固軍前將士所悉知也。若失此機

會可乘之時。萬一賊據四川。貴州。雲南。以為巢穴。致歲月相持。彼時悔無及矣。宜速行籌畫。○壬寅。學士佛倫等疏言。大兵進取辰沅。不久即至鎮遠。臣等先於荊州。常德。澧州諸處。豫備進剿兵餉。付督撫等運至鎮遠。但黔地人夫不足。將湖南人夫。作何分派。運送收貯。宜會同酌議。請留湖南巡撫韓世琦。與臣同駐鎮遠。

上諭。總督蔡毓榮。酌量留司道各官。同駐鎮遠。協理糧務。○佛倫等又疏言。鎮遠至黔中。不通水道。大兵糧餉。皆資陸運。今臣等酌量安塘數處。豫集人夫。聯續起運。抵黔。豫為之備。其大兵到滇。支給事宜。令黔撫楊雍建。同滇中督撫等。公同料理。但黔民稀少。遭亂流亡者多。請敕將軍。督撫。招徠土民。互相貿易。庶於糧餉有裨。從之。○乙巳。諭大學士等。今聞錢法漸弛。鼓鑄收銅等項。滋生弊端。以致制錢日少。價值騰貴。著戶部。工部。都察院堂官。

同詣錢局親察。每鑄錢一文。必重一錢。應作何釐剔弊端。俾制錢充裕。永可遵行。著徹底確察。逐一議具奏。至於部院衙門各處。所有廢銅器。毀壞銅鐘。及廢紅衣大小銅礮。并直隸各省所存廢紅衣大小銅礮。著盡行確察。解部鼓鑄。○諭禮部。前以地震示警。朕恐懼修省。夙夜靡寧。已經遣官虔告郊壇。乃精誠未達。迄今時復震動未已。朕心益用悚惕。茲當虔誠齋戒。躬詣

天壇。親行祈禱。爾部即擇期具儀以奏。○陞光祿寺卿于嗣登。為太常寺卿。○丙午。

上詣

太皇太后

皇太后宮問安。○以內閣學士李天馥。為武會試正考官。翰林院侍講學士崔蔚林。為副考官。○予故原任廣東援剿提督左都督太子太保三等阿思哈尼哈番。許天寵。祭葬如例。○諭刑部。國家設立法制。原以禁暴止奸。安

全良善故律例繁簡。因時制宜。總期合於古帝王欽恤民命之意。向因人心滋偽。輕視法網。及強暴之徒。凌虐小民。故於定律之外。復嚴設條例。俾其畏而知儆。免罹刑辟。乃近來犯法者多。而奸宄未見少止。人命關係重大。朕心深用惻然。其定律之外。所有條例。如罪不至死而新例議死。或情罪原輕而新例過嚴者。應去應存。著九卿詹事科道會同詳加酌定。確議具奏。○鎮南將軍莽依圖疏言。靖南王下都統馬九玉等所屬官兵。遣令平定廣西。自至臣軍以來。管副將事王承業。管叅將事李雲。曹應鵠。張朝瑞。童茂等。首舉逆賊吳世琮書札。且擊殺賊寇。救援南寧。得彼之力為多。進剿雲南時。倘不攜若屬以往。則如此整練精兵。得之甚難。但彼等俱未給有定銜。指有定缺。恐或不能實心奮力。請量給官職。并都統馬九玉酌量鼓勵。庶深入剿殺。實為有濟。

上命議政王貝勒大臣等集議。尋議政王大臣等議覆王承業等。隨大兵進剿廣西逆賊。著有勞績。宜將五營官兵。設為援剿營。王承業。李雲。曹應鵠。張朝瑞。俱授為副將。童茂。授為叅將。其所屬官員。俟該將軍具題到日。聽兵部議覆。都統馬九玉。係旗下官員。俟叙滿洲官員之日。一併議叙。得旨。馬九玉自閩中以至兩粵。同大兵効力可嘉。著加太子少保。餘依議。○議政王大臣等遵諭議覆。前奉諭旨。近來漢軍內好章京甚少。漢軍叅領佐領缺出。將外任副叅遊守等官補授。今議得嗣後八旗漢軍叅領缺出。以外任之副將叅將遊擊等官補授。佐領缺出。以外任之都司守備等官補授。從之。○庚戌。上以地震。率諸王文武官員。詣天壇祈禱。○辛亥。上詣太皇太后。

皇太后宮問安○鎮南將軍莽依圖疏言。湖南大兵。見在武岡諸處禦敵。臣等一軍。先向雲南進發。則廣西恐有他虞。

上諭。桂林要地。宜發滿兵防守。議政王大臣會議具奏。尋議政王大臣等議。覆據將軍莽依圖咨文。都統希佛等。已罷往南寧。從賓州桃屯之地。還守桂林。宜令希佛。姑駐桂林鎮守。莽依圖。平定廣西境內未靖之地。

上諭。希佛所攜兵馬。若駐守桂林。則莽依圖所部前進之兵。不免單弱。宜令大將軍安親王。簡親王等。以上三旗及簡親王所屬王府佐領兵。盡行撥發。併添撥每佐領下甲兵。或二人。或三人。令簡親王親率。速往桂林駐守。令副都統布舒庫參贊。簡親王到桂林日。希佛悉率所部兵。會莽依圖前進。恢復疆土。內大臣阿密達。都統穆占。會安親王。公同商酌而行。俟到沅之日。其分兵遣還事宜。定議以聞。○壬子。工部議覆。河道總督靳輔疏言。請將

南旺夏鎮北河分司分管諸務。俱歸濟寧道兼轄。應如所請。從之。○癸丑。以故郭爾羅斯輔國公昂阿之子莽色襲爵。○戶部議覆。江寧巡撫慕天顏疏言。天時亢旱。各屬報災。請借動庫銀五六萬兩。遣官往湖廣買米。運至江南平糶。應如所請。從之。○甲寅。諭大學士等。朕每日聽政。一切折出票簽。應商酌者。皆國家切要政務。得失所繫。今後起居注官。除照常記注外。遇有折本啟奏。俱令侍班記注。

惟會議機密事情。及召諸臣近前口諭。記注官不必侍班。○廣東廣西總督金光祖疏言。官兵分路搜山。於八月十七日。擒獲祖澤清。并其子祖良樞。

上諭。逆渠祖澤清。背負國恩。屢行反叛。情罪重大。命平南王。總督。巡撫。遣官械送祖澤清父子。及家人來京。○乙卯。

上詣

太皇太后

皇太后宮問安○丁巳。陞太常寺卿于嗣登為大理寺卿○陞福建按察使于成龍為福建布政使司布政使○已未。

孝慈高皇后忌辰遣官祭

福陵○喀爾喀車臣濟農遣使進九白年貢。宴賚如例○庚申。

上詣

太皇太后宮問安○諭大學士等。厄魯特部落厄爾德尼和碩齊等。搶掠吳喇忒人畜。深為可惡。今噶爾丹正遣使來。可寫敕付彼齎往。若收回人眾則已。如不收回。當另有處置。即令鄂爾多斯部落圖之。亦不為難也。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十四

實錄卷八十四

七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十五

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未冬十月壬戌朔享

實錄卷八十五

太廟

上親詣行禮○遣官祭

永陵

福陵

昭陵

孝陵

仁孝皇后

孝昭皇后○頒康熙十九年時憲曆○荊州凱

旋科爾沁公圖納黑等將至都城遣內大臣

塔達攜茶郊迎之○遣內大臣奇塔特迎奠

出征病故一等台吉塞白克喪○癸亥

上詣

太皇太后

皇太后宮問安○予故刑部尚書劉捷祭葬謚

端敏○甲子

皇太后聖壽節

上率諸王文武大臣侍衛等詣

皇太后宮行禮○遵

實錄卷八十五

懿旨停止筵宴○陞左通政李廷松為光祿寺

卿○以故鑲白旗三等阿思哈尼哈番喇住

子素拜襲職○乙丑吏部議覆吏科等衙門

掌印給事中蘇拜等疏叅山東巡撫趙祥星

江寧巡撫慕天顏戶部侍郎察庫工部侍郎

祁通額等行濫名污求賜處分查戶部侍郎

察庫見有婪賄一案臣部會同法司另行議

覆山東巡撫趙祥星已經京察革職不議外

祁通額不合擅役民車將馬匹發民喂養及

發私書與戲子。往各州縣索銀。蓋造房屋違禁貼金。應革職。慕天顏將被災地方。捏報豐稔。旋又報災。誑奏不合。應降四級調用。得旨。祁通額著降五級留任。戴罪効力。修理陵工。慕天顏降四級留任。○湖廣巡撫張朝珍。甘肅巡撫巴錫。遵諭自陳。吏部察議。俱擬降調。上曰。督撫係封疆大臣。凡有旨下部院察議者。爾等務將其人事跡。據實詳察。若爾等真見為堪用之人。即應舉出奏明。至各省舉劾官員。亦應據實詳察。若有真見為循良者。亦即指實奏明。傳諭滿漢諸臣知之。張朝珍。巴錫俱著留任。○諭兵部。內大臣坤巴圖魯侍衛都統畢力克圖。侍衛覺和託等。出師日久。年已衰邁。不能馳驅。左都御史舒恕患病果真。此等實係衰病大臣官員。可察明撤還京師。至副都統博濟等。兵見駐南雄。今南雄已為內地。博濟甫往。未經効力。且大將軍簡親王兵少。博濟可率其衆。前赴廣西。吉安所駐滿

兵。亦令前赴大將軍安親王軍前。如有非要地而駐兵者。俱察遣用兵所在。俾之進剿。可移文諸路大將軍。將軍等。各察所部。列名以聞。大臣官員稱病留止城邑者。亦令察明具奏。尋大將軍公圖海疏言。坤巴圖魯侍衛覺和託二人。遵旨令其還京師外。臣於十月初二日。四路並進。已近賊境。畢力克圖別率一軍。亦由畧陽一路。進逼賊境。或仍撤彼還京。或俟恢復漢中興安之日。遣還伏候

審裁。得旨。畢力克圖。俟恢復漢中興安之日。遣還京師。○戶部議覆。安徽巡撫徐國相疏言。鳳陽廬州安慶三府屬。連年罹災。請將康熙十八年漕糧正米。並行月糧。俱照見折漕米之例。折銀解部。所有耗贈米銀。槩予豁免。應如所請。從之。○福建總督姚啟聖疏報。偽總兵都督同知紀朝佐率衆歸誠。下部知之。○旌表山西烈婦宋氏。給銀建坊如例。○丙寅上御太和殿視朝。文武陞轉各官謝恩。○陞鴻

臚寺卿李仙根。為都察院左副都御史。○戶部等衙門。會議錢法十二條。○順治錢。初重一錢。後改鑄重一錢二分五厘。又改鑄重一錢四分。今應仍鑄一錢四分重之錢行使。○因銅少以致錢貴。查鹽課與開差一體。應將兩淮。兩浙。長蘆。河東。課銀。俱交見出差御史督各運司官。照部定價。買銅解送。○各開差官員。所辦銅觔。應買廢錢舊器皿等銅解送。或將紅銅六十觔。鉛四十觔。折作銅一百觔解送。不許解送煨化板塊之銅。如此。則無煨錢之弊。○四。開差官員買銅。應慎選殷實老成人役買辦。○五。寶泉寶源二局。爐頭匠役。包攬買交者。枷責。并妻子流上陽堡。官員徇庇者革職。○六。各開官員。差滿回部。所欠銅觔。應嚴立限期。限內不完者。革職。所欠銅觔。變產追完。辦銅人役。仍照前定例治罪。○七。查戶部寶泉局。有滿漢侍郎管理。今亦應令滿漢侍郎親身帶領監督等。公同秤收發鑄。○八。開採銅

鉛。凡一切有銅及白黑鉛處。所有民具。呈願採。該地方督撫。即選委能員。監管採取。○九。查定例。凡民間必用之銅器。五觔以下者。仍許造賣外。其非必用之器。不許製造。應再行嚴禁。照例治罪。○十。化錢為銅。已經禁止。定有處分之例。未定有鼓勵拏獲之例。嗣後有出首拏獲者。審實。將所獲之銅。一半入官。一半給賞。○十一。京城錢少價貴。應頒發制錢式樣。行令各省巡撫鼓鑄。○十二。寶泉寶源二局土砂煤炭灰內。有滴流之銅。應專差官會同該監督。召人淘取。所得淘取之銅。照部定價收買。從之。○丁卯。策試天下武舉於太和殿前。○戊辰。上御瀛臺紫光閣。閱視武舉騎射技勇。○諭議政王大臣等。福建滿兵為數甚多。可否撤還其半。其移咨大將軍康親王等。公同酌議。如克取廈門諸處。及鎮守地方。雖撤滿兵之半。尚可足用。宜令何人統率回京。其留守之兵

何人統率。以及滿兵撤還之後。俾必無他虞。令還京及駐守之人。詳議具保。限四十日內具題。○鎮安將軍噶爾漢等疏言。臣等率兵至白河縣。偵知前路山徑狹隘。馬匹難行。因復商酌。簡選兵馬。從上津路進發。

上諭。將軍噶爾漢。總督楊茂勳。提督佟國瑤。身臨賊境。深知其地險要。可從上津一路進師。視陝西大兵進剿之會。與大將軍公圖海等夾攻興安賊寇。迅復疆土。可移咨圖海知之。

○予故鑲紅旗三等阿思哈尼哈番圖理祭葬如例。○已巳。諭大學士等曰。朕比見中外章疏冗長。非徒浮泛無益。且令閱者厭倦。又見直隸各省奏讞獄詞。其中多改飾口供。未必皆得情實。朕愛惜生民。惟恐一夫有傷。自吳逆叛亂以來。命將出師。慮其在外騷擾。莫不諄切告誡。前歲江西大軍。擄掠民間。朕殊為痛恨。嗣後嚴加飭諭。聞諸路禁軍。已無敢復蹈前轍矣。○戶部題。鳳陽臨淮。饑民乏食。

多致離散。臣部司官詹布禮等。察勘情形。既確。應敕安徽撫臣徐國相。親往鳳陽賑濟。以救災民。得旨。鳳陽臨淮民饑。深軫朕懷。該撫不拘何項錢糧。速行動支賑濟。務令得所。毋致離散。○陞太僕寺卿伊闡為太常寺卿。○庚午。

上御瀛臺紫光閣。閱視武舉騎射技勇。○辛未。上詣

太皇太后宮問安。○

上御太和殿傳臚。賜殿試武舉羅淇等一百一人。武進士及第出身有差。○遣內閣學士禧佛。郎中倭黑。齎敕往陝西。諭將軍張勇。王進寶。提督趙良棟。孫思克曰。自逆賊吳三桂背恩反叛。遣發大兵。各路征剿。平定疆圉。撲滅賊寇。湖南。廣西。福建。諸處。以次恢復。餘賊逃潰。盤踞水陸險隘。冀圖抗拒。此等殘寇。雖無煩速剿。不久自當殄滅。但朕軫念民生。急於拯救。令其得所。故欲掃除餘孽。以靖土宇。今

賊既敗遁。負險無容。專恃馬兵。若用綠旗步兵之力。於滅賊殊為有濟。況我綠旗兵較之賊兵甚強。爾等素受國家厚恩。戮力行間。樹績邊疆甚多。殫矢忠貞。圖報恩眷。朕所悉知。爾等當各率所屬綠旗兵。平定漢中興安。恢復四川。宜分幾道進兵。作何調度。始能恢復。其詳議具奏。如爾等盡力報効。恢復漢中四川。朕必不拘成例。優與加恩。爾等官兵前進。則滿洲大兵亦即相繼進剿。接運糧餉。不致匱乏。茲事所係。甚為重大。速詳加酌定。以聞。又令禧佛等傳諭張勇等曰。自古漢人逆亂。亦惟以漢兵剿平。彼時豈有滿兵助戰哉。今逆賊大敗。乘此逃散之際。理宜速定四川。天下綠旗兵。無如陝西強壯。而其數較各省倍衆。在陝西大臣官員。又皆具有才能。將滅之寇。何難剿除。爾等不即平定四川。豈綠爾等名位事權輕歟。倘謂地屬險隘。自古以來。險隘之地。若不攻取。豈有自定之理。作何調度。

官兵幾路進剿事宜。確議以聞。○又遣給事中莫羅。郎中伊爾格圖。齎敕赴湖廣。詹事庫勒納。郎中額爾赫圖。齎敕赴廣西。其敕諭與諭陝西諸將。大指畧同。○喀爾喀扎薩克圖汗。遣使進九白年貢。宴賚如例。○壬申。遣檄噶爾丹。收捕厄爾德尼和碩齊等。理藩院郎中額爾塞等歸奏曰。臣等至達賴巴圖爾台吉。所交授敕諭。達賴巴圖爾台吉等覆稱。厄爾德尼和碩齊及滾布等。原係噶爾丹之叔楚虎爾吳巴錫屬下之人。今與野獸同羣。遠徙游牧。我等不便查議。毛濟喇克台吉久居此地。巴圖爾濟農向曾奏請。皇上由內地來至我處。皆無刼掠吳喇忒之事。上諭理藩院。厄爾德尼和碩齊既係噶爾丹之叔。楚虎爾吳巴錫屬下之人。應檄噶爾丹將厄爾德尼和碩齊等。即行收捕。照伊例治罪。勿使妄行刼掠。並將從前所掠吳喇忒人畜察還。如不能收捕。仍在沿邊生事。當另行裁

度爾院即備印。發噶爾丹兩次所遣來使。各馳一文前去。檄到。務令噶爾丹速覆。○都察院左都御史魏象樞疏薦清廉十人。原任戶部侍郎雷虎。原任戶部侍郎班迪。原任兵部督捕侍郎達哈他。原任刑部侍郎高珩。原任大理寺卿胡密色。原任吏部郎中內陞宋文運。原任國史院侍讀蕭惟豫。原任湖廣布政使未任告病畢振姬。原任直隸內黃縣降調知縣張沐。原任江南嘉定縣革職知縣陸隴其等。得旨雷虎朕亦素聞其清。因補授戶部侍郎。凡事偷安。督修

孝陵。又造冊不明。革退。今既經魏象樞特薦。著授為內閣學士兼禮部侍郎。班迪為戶部侍郎。聞其清慎。因差往江西審事不明。降級。令其隨旗上朝。非係未悉其人。餘下所司詳議。○癸酉。

上詣

太皇太后宮問安。○

上諭大學士等曰。逆黨吳應麒夏國相等。俱吳三桂族戚。同謀叛逆。本非脅從。今招撫敕書中。若加脅從等字。反令生疑。不如聲明其罪。許以革面歸誠。王者之言。昭如星日。一以至誠相感。庶可招徠遠人。若王屏藩傾心向化。則西蜀不血刃而定矣。其中有二大事。關係最要。如賊黨中有素受吳逆厚恩。不忍加害其孫。能幡然悔悟。挈之來歸者。非惟宥罪。且當叙功。又有心切歸誠。繫念妻子在滇。不忍分割者。許其一面密通聲息。一面撤兵回滇。潛為內應。功成之後。一併議叙。庶可速其來歸耳。爾等即以此意撰擬。○甲戌。冊封

嬪吳雅氏為德嬪。○乙亥。免山西文水壽陽二

縣本年分電災額賦有差。○丙子。揚威大將

軍和碩簡親王喇布等疏報。招撫偽副將張朝貴等七十一員。發偏沅巡撫張朝珍安插。

下部知之。○福建總督姚啟聖疏報。寧海將軍喇哈達遣遊擊趙雲等直搗賊巢。殺賊兵

五百三十餘名。船寨房屋旗械盡行燒燬。下部議叙。○廣西提督哲爾肯疏報。泗城土知府岑繼祿。向化歸誠。下部知之。○湖廣長沙陣亡將士等喪至。遣一等侍衛馬塔。奠爾渾以茶酒往奠之。○予江西陣亡把總陳潤。蔡廷珍卹銀。廕子弟一人。以衛千總用。○丁丑上詣

太皇太后宮問安。○吏部議覆奉天府府尹梁拱宸疏言。奉天所屬一府二州七縣。正印佐貳雜職等官三十餘員。有劾無舉。恐賢能者不知所勸。應照直隸各省之例。遇薦舉之年。酌薦一員。應如所請。從之。○戶部議覆奉天府府尹梁拱宸疏言。奉天錦州等處。旗下荒地甚多。民欲耕種。旗下指為圍地。如檔冊未經圈給。而妄稱為圍地者。察出從重治罪。應如所請。將被圍之地。槩行查明。除旗下額地之外。俱退與州縣官員勸民墾種。得旨。旗下額地之外。其餘未墾之地。著嚴加詳察具奏。

○戊寅。

上詣

太皇太后

皇太后宮問安。○己卯。戶部議覆。河道總督靳輔疏言。江南宿遷沐陽。贛榆三縣。漕糧舊徵粳米。近年為黃河漫溢。田地皆成沙土。止產粟米。請嗣後漕糧改徵粟米。以從民便。應如所請。從之。○廣東提督侯襲爵疏言。海逆盤踞井洲諸島。臣與潮州鎮臣馬三奇等。率兵水陸夾擊。攻破井洲島。焚燒賊船賊巢。斬殺甚多。生擒偽參將等員。獲器械偽劄無算。下部議叙。○荊州叅贊軍務蒙古台吉溫布率所屬將士凱旋。遣散秩大臣博落特等。迎勞之於天津。○韶州贛州陣亡將士喪至。遣一等侍衛吳達禪等。以茶酒往奠之。○撫蠻滅寇將軍廣西巡撫傅弘烈疏言。粵西進雲貴有二道。一由南寧。將軍莽依圖。已遵旨統滿漢大兵前進矣。臣願親率官兵。由慶遠一路。

直取雲貴。

上諭粵西初經恢復。傳弘烈仍駐會城。同理事官麻勒吉等。平定境土。撫綏百姓。供應大兵糧餉。其傳弘烈標下官兵。可選精銳。聽王與將軍進剿調用。○庚辰。以故一等阿思哈尼哈番希爾根之孫佐領商錫太襲職。○免湖廣湖北。康熙十三年至十七年。近賊地方額賦。○以故真人張洪任之子張繼宗襲爵。○辛巳。諭五城御史。流民就食京城甚多。賑濟銀米。皆增一倍。○壬午。

上詣

太皇太后宮。問安。○靖逆將軍甘肅提督侯張勇疏言。時屆嚴冬。堅冰載路。轉餉維艱。祈暫止陝西兵進。征漢中興安。及進取荊州。常德。衡州。永州。廣西諸路兵馬。俟明春再行齊發。上曰。近閱大將軍公圖海等奏。分兵四路。進取漢中興安。而諸路大將軍將軍等。各領大兵。相機剿賊。平定疆圉。將軍侯張勇所請。不准。

行。○諭議政王大臣等。背恩反叛之罪。在吳

三桂。其吳應麒。胡國柱等。咸係附和之人。今雖諸路賊寇敗遁。破滅在即。朕俯念黎民。早欲使疆圉平定。其吳應麒。胡國柱。夏國相。王屏藩。馬寶。郭壯圖。各書敕一道。分發各路大將軍。將軍。總督。提督。巡撫等。招撫。敕曰。諭王屏藩。胡國柱。馬寶。郭壯圖。夏國相。吳應麒。爾等本係吳三桂藩下之人。曾授世職。當吳三桂反叛時。爾等率同逆黨。抗拒大兵。其後力窮敗遁。今復竊踞一隅。遲迴觀望。荼毒生民。茲湖南。廣西。漢中。俱經底定。賊勢摧敗。殄滅可期。爾等所明知也。每念滇黔。皆朕赤子。久罹兵燹。不得早見太平。朕心殊為憫惻。今特降專敕。詳加開諭。爾等若悔罪歸誠。其從前抗拒之罪。悉為赦免。仍論功叙錄。至爾等標下將士。如同心歸正。亦槩從寬宥。酌量加恩。但念繫戀父母妻子。人之常情。或因父母妻子尚在滇黔。心懷瞻顧。爾等皆掌握兵柄之

人。非微末將弁。若即率所部兵。徑還雲南。誰能阻遏。一路先退。諸路亦必相率遁逃。誰能自立。大兵到日。相機接應。不特保全家口。亦可建立功名。或能開導吳世璠。共來歸順。厥功尤懋。煌煌諭旨。炳如星日。朕不食言。近日歸正各員。朕皆赦其前罪。論功錄用。亦爾等所知。爾等其盡釋疑畏。勉圖後効。以副朕懷。遠矜全至意。○又諭兵部。今茲招撫。與往者不同。因彼情實昭然。故特頒敕書。令各大將軍將軍等。加意曉諭。以革其心。勿得視為泛常。○癸未。

上詣

太皇太后宮。問安。○福建總督姚啟聖疏報雙頭洞係浙閩交界。賊首陳起萬等嘯聚。臣會同提臣楊捷。撫臣吳興祚。於五月初九日。至流江地方。水陸夾擊。大敗賊衆。殺傷無數。獲其船隻器械。下部議叙。○轉兵部右侍郎焦毓瑞。為左侍郎。陞內閣學士項景襄。為兵部

右侍郎。○甲申。兵部議覆奉命大將軍和碩康親王傑書題請。叅將曾承補授興化總兵。上曰。總兵封疆要職。自當遴選。總督既未列名。豈可遽將叅將超補。況地方漸次平定。必須遴選得人。庶不致貽誤軍機也。○諭奉命大將軍和碩康親王傑書曰。自數年用兵以來。所費錢糧不貲。以致民力疲困。今大破湖南賊寇。餘孽遁入雲貴。扼據險要。抵死支持。其勢旦夕殄滅。惟福建海賊竊踞海澄。倚廈門金門為營窟。騎兵無所用其力。惟藉水師樓櫓攻取。甚屬緊要。王等曾言。今歲荷蘭國船若到。於八月內。進攻海寇。倘荷蘭國船愆期。當內徙邊海人民。堅壁清野。以待其困。今歲因荷蘭國之船未至。故前議不行。近者福建綠旗兵丁。較取廈門金門時。漸增數倍。即無滿兵。止以綠旗兵丁。剿滅賊寇。未為不足。見在福建滿兵甚多。應即掣一半。以省糧餉。以甦民力。但耿精忠尚在閩中。虞有意外之變。

故暫為停止。朕思即令耿精忠來京。此輩惶
恐疑畏。或生他故。如留耿精忠在彼。王親率
滿兵一半回京。似屬不可。設必候諸處底定。
則福建需用糧餉。較之他省。不啻什百。為今
之計。王當開諭耿精忠。令其陳奏請安。詣京
陛見。倘耿精忠因王之言。具疏止。可令其自
來。若耿精忠未能即行。王獨率滿兵一半先
回。則勢更有所不可也。此事關係甚為重大。
王當詳細籌畫具奏。○荊州陣亡。夸蘭大吳
喇忒蒙克喪至。遣一等侍衛和善。以茶酒往
奠之。○乙酉。陞山西分守冀寧道張所志為
福建按察使。司按察使。○和碩康親王傑書
母和碩妃薨逝。予祭一次。○戊子。

上詣

太皇太后宮。問安。○先是。吏戶兵刑四部會議
私採人參條例請旨。

上曰。採參本以養人。定例過嚴。則無知小民。動
罹法網。反致傷生。其令議政王大臣九卿詹

事科道會同詳議以聞。至是。議政王大臣等
議為首者絞。為從者枷責。

上曰。邇來採參。必越佛阿喇地方。較前稍遠。是
以價日貴。而盜者愈多。不若令佛阿喇駐防
官兵中途察緝。則法不待嚴。而弊自可絕矣。
○吏部議覆。都察院左都御史魏象樞薦舉
清廉一疏。查原任侍郎雷虎。班迪。已經奉旨
無庸議外。原任督捕侍郎達哈他。京察降級。
原任大理寺卿胡密色。京察革職。隨旗上朝。
俱無庸議。原任刑部侍郎高珩。原任吏部郎
中內陞未補宋文運。俱告假回籍。應移咨該
撫給文赴部候補。原任國史院侍讀蕭惟豫。
終養回籍。俟伊事完之日。該撫給文赴部候
補。原任湖廣布政使畢振姬。年老告病回籍。
無庸議。原任內黃知縣張沐。降調回籍。原任
嘉定知縣陸隴其。革職回籍。俱移咨該撫。給
文赴部補用。得旨。依議補用。原任知縣張沐
陸隴其。係保舉廉能之員。如直隸清苑。江南

無錫等縣最稱繁劇難治。必用之此等地方。庶其才可以表見。○以原任刑部侍郎高珩為刑部右侍郎。○予湖廣陣亡遊擊贈都督僉事杜英。遊擊贈叅將佟大年。守備贈署遊擊韓璽。聖守備贈署遊擊于守印。守備贈都司僉書化嘉誥各祭葬如例。○定遠平寇大將軍和碩安親王岳樂疏報。臣至寶慶府有偽知縣周冠等。帶領兵丁四百二十三名投誠。交巡撫韓世琦安插。下部知之。○奮威將軍平涼提督王進寶疏報。臣率兵進取四川。與賊戰於利橋紅花鋪諸處。大敗之。復鳳縣兩當縣。得旨嘉獎。下部議叙。○辰州永興陣亡叅贊軍務都統宜理布。叅贊軍務護軍統領哈克山。及諸將士喪至。遣內大臣公噶布喇等四十七員各以茶酒往奠之。復遣侍衛費耀色等齎賜宜理布之母銀六百兩。傳諭曰。宜理布時侍朕前。深悉其人。今出師著有勞績。方謂成功之後。即可凱旋相見。忽聞陣

歿。朕還顧議政王大臣。不覺悽愴痛悼。茲聞爾家費用不給。特賜白金六百兩。為治喪之資。又遣內大臣舅舅佟國維等齎賜哈克山之弟巴克山銀五百兩。傳諭曰。哈克山臨陣捐軀。戮力盡瘁。殊為可嘉。特賜白金五百兩。又傳諭正白旗大臣侍衛。退朝後。於宜理布未出喪以前。即赴喪次。舉殯時。除直日大臣侍衛外。餘俱往送。其哈克山噶爾度色黑郭色。門都那穆渾。舉殯時。分遣內大臣。或散秩大臣一員。併侍衛等往送。○己丑。

上詣

太皇太后宮。問安。○先是。河道總督靳輔疏請於節省河工錢糧內。動支銀十四萬餘兩。另開運河於駱馬湖之旁。以便輓運。命九卿詹事科道會議。至是。九卿等議覆。應如所請。上曰。諸臣意見若何。左都御史魏象樞奏曰。河臣動用錢糧二百餘萬。為一勞永逸之計。前奏隄壩已修築七分。今又欲復開河道。所為

一勞永逸者安在。臣等恐將來漕運有阻。故議從其請耳。

上曰。以朕揆之。憲臣之言為是。漕運關係自應從其所請。但河道雖開。必上流浩瀚。方免淤滯。今歲雨少水涸。恐未必有濟。即目前河工告竣。亦因天旱易修。豈得遽恃為永固耶。○庚寅。

上詣

太皇太后宮。問安。○戶部議覆。護理江西巡撫

印務王新命疏言。江西自變叛之後。逃丁荒地。雖於康熙十七十八兩年之間。招補開墾。而見在荒缺者過半。暫請開除額賦。應如所請。從之。○陝西提督趙良棟疏報。臣率領大軍。由密樹關進取徽州。復遣兵於黃渚關。以牽賊勢。及抵密樹關。連戰敗賊。賊不能支。遂棄徽州遁走。恢復州城。得旨嘉獎。下部議叙。○奉命大將軍和碩康親王傑書疏報。都統喇哈達。遣副都統倭申巴圖魯。率領官兵。於

十月二十六日。進抵東石地方。擊敗賊衆。殺逆賊偽參將林英。擒偽總兵陳深等。及賊兵一百六十三名。下部議叙。○浙江巡撫陳秉直疏言。杭屬田少山多。所恃以養生辦課者。惟桑麻竹木是賴。今駐防廝卒。以樵採為名。任意砍伐。請行禁止。得旨。駐防兵丁及家人等。可嚴行申飭。有違禁擾民者。該督撫即指名參奏。如不參奏。別經發覺。將該督撫一併議處。○調正紅旗蒙古副都統紀爾他布。為滿洲副都統。○辛卯。

上詣

太皇太后宮。問安。○諭九卿詹事科道等曰。過來諸事。爾等全不擔當。或遇事有疑難。即以未經與聞。不同啟奏。或托言他事及病。不赴會議。在部辦事。或推諉不肯列名。或有過。卸於司屬。意圖僥倖。若果應坐罪。豈推卸便可脫免乎。又有臨事全無一語。及既退之後。輒云我曾如此立論。而某官不肯見從。朝廷不

曾俞允此豈臣子靖共之道乎至部院衙門司官亦多偷安廢弛各堂官宜將此等司官指名題叅九卿會議處有規避者著都察院及科道官糾叅嗣後爾等當直據所見陳奏審酌可否自在於朕爾等勉之○免山西遼州本年分電災額賦有差○朝鮮國王李燭因表文違式免議謝恩遣陪臣李侶等進貢方物却之

實錄卷八十五

二十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未十一月壬辰朔以原任翰

林院掌院學士徐元文為內閣學士兼禮部

侍郎諭大學士等內閣與翰林官不妨互為

調用其行坐處照進衙門先後以定次第○

陞大理寺少卿張雲翼為太僕寺卿○先是

上特遣大臣往廣西湖南陝西令手將軍總督

提督等詳議剿滅賊寇事宜具奏至是總督

金光祖疏言今方自粵西進取雲貴而雲貴

督撫提督俱見在湖南請於諸臣中酌分一

二來粵以資彈壓

上諭雲南巡撫李天浴可前往廣西同王將軍等進剿并撫定新復地方○戶部議覆湖廣巡撫張朝珍疏言本省起運軍需米豆草束路經長江及灘高水急之地有實在漂沒者應取有司官印結准其豁免又各省派養之馬瘦病倒斃難於賠補請開馬禁許賣馬人等將馬數呈明兵部頒給部單准赴某地方貿易以便購買補足應如所請從之○癸巳上詣

太皇太后宮問安○命安徽巡撫徐國相親往盱眙滁州等五州縣賑濟饑民○安遠靖寇大將軍多羅貝勒察尼疏請撤辰溪大兵令都統鄂內等率還京師。

上諭每佐領兵可撤還六人鄂內熟諳軍務其留之軍前更擇以次人員令率兵還京辰溪可加意固守貝勒察尼等今方與賊對壘所撤之兵雖少而湖南諸處初定投誠官兵甚多恐乘此撤兵之際或有他虞察尼等宜密

加防守每事相機詳慮而行○免河南封邱等十五州縣本年分旱災額賦有差○乙未諭議政王大臣等鄂爾多斯多羅郡王古魯當榆林總兵官遣使請兵不及候旨即調兵應援及聞神木變叛又即遣其子統兵先行嗣復力疾親往為國効力撫降神木縣古魯可封和碩親王○兵部議覆廣西提督哲爾肯疏言提標設兵舊制馬一步九今廣西餘孽未靖需用戰馬甚多請改增為步八馬二以資戰守應如所請從之○丙申

上詣

太皇太后宮問安○奮威將軍平涼提督王進寶疏報十月二十二日進兵武關三面夾擊陣斬賊千餘人生擒偽總兵羅朝興等遂奪其關下部議叙○戊戌陞安徽按察使薛柱斗為湖南布政使司布政使○奮威將軍平涼提督王進寶疏報十月二十七日追剿賊衆入雞頭關抵漢中賊首王屏藩引賊兵自

青石關走廣元。恢復漢中府。復遣官兵追擊。直抵青石關。得旨嘉獎。下部議叙。○己亥。湖廣陣亡驍騎參領鄂爾綴。吳達納。海瀾。喪至。遣一等侍衛額度勒祐。和善。薩哈達。以茶酒往奠之。○戶部議覆。山東巡撫施維翰疏。請動支濟南府節年存倉米穀。散賑饑民。應如所請。得旨。依議速行。○予廣東陣亡三等阿達哈哈番署驍騎參領覺羅吳素。祭葬如例。○庚子。湖廣提督徐治都。疏請調發撫標官兵。及武昌漢陽各營官兵。進剿蜀寇。

上諭。將軍王進寶。統率官兵。於棧道險峻之地。屢敗賊寇。直前恢復漢中。逆賊王屏藩所部之賊。不及千人。已經敗遁。今當逆賊敗奔震動之時。進定四川。最為重要。可如徐治都所請。令巡撫張朝珍。調標兵千人。併武昌漢陽營兵一千二百人。速行遣發。如或稽延。治巡撫以貽誤軍機之罪。倘徐治都遲滯不進。亦以貽誤軍機之罪罪之。○陝西提督趙良棟。

疏報。臣帥兵敗賊於打火店。王家臺。追抵白水江。賊對岸拒守。十月二十五日。臣師始渡江。追擊賊衆。過八堵山。斬獲甚多。二十七日。抵畧陽。偽吳將軍等棄城遁。恢復畧陽。但大將軍等三路官兵。不知近遠。而臣以一旅尾擊而前。似已深入。倘少遲延。萬一蜀糧得至。賊心一堅。復出守險。則再進甚難。

上諭。曩者大將軍圖海疏言。親率將軍佛尼勒等。由興安路進兵。將軍畢力克圖。提督孫思克等。由畧陽路進兵。將軍王進寶等。由棧道進兵。提督趙良棟。由徽州路進兵。今王進寶擊敗棧道之賊。直前恢復漢中。趙良棟擊敗賊衆。恢復徽州。直抵畧陽。惟圖海畢力克圖等。兩路之師。如何擊賊。已抵何所。迄今尚未有確報。且畢力克圖等。未至所指之地。而趙良棟已抵畧陽。彼等所行者何事。當此逆賊搖動之時。圖海畢力克圖。孫思克等。可速統兵剿賊。進定疆圉。各路之兵。宜令互通音問。

又王進寶趙良棟等統兵深入畢力克圖孫思克等應速以兵繼其後。倘若遲緩不前致有隔絕。即以遲悞軍機之罪罪之。○宣義將軍尚之孝奏報大將軍康親王咨稱福建江西接壤之地尚有逆賊江機楊一豹擾害建寧邵武諸處。令臣速進兵剿滅。臣星夜至汀州整頓甲兵進剿。

上諭尚之孝速先平建寧諸處之賊。仍遵前旨率兵赴江西與總督巡撫提督等共商剿撫江西餘寇。○辛丑諭戶部前者大兵進剿四川已破朝天等關。直至保寧恢復在邇。因周有德張德地席卜臣駐廣元不將糧餉極力轉送軍前。陝西總督巡撫亦不將糧餉極力運送以致大兵糧餉不繼難於久駐。遂爾退回。貽悞軍機關係重大。此數年以來使逆賊逋誅封疆未復。兵民苦累。休養無期。皆周有德張德地席卜臣陝西總督巡撫怠玩遲延之故。每念及此深可痛恨。今大兵分路進取

已恢復漢中。不日前抵蜀疆。相機剿撫底定可期。軍前糧餉最為緊要。其令陝西督撫諸臣殫心經理設策輸運務使士馬飽騰。捷音早奏。以副朕定亂安民至意。如督撫諸臣漫不經心泄泄從事致饋餉缺乏有悞軍機俱以軍法從事決不姑恕。爾部速傳諭遵行。○免廣東廣州肇慶二府康熙二十三年分未完額賦。○壬寅陞署都督僉事高鼎為福建興化總兵官。○癸卯命各路凱旋官兵有被傷者到京之日即行給賞。

上聞翰林院掌院學士喇沙里病故。諭大學士等曰喇沙里侍從有年小心勤慎翻譯經書明白精詳咸稱朕意。即翰林諸臣亦皆稱其賢。今一旦溘逝朕心惻憫。隨遣一等侍衛對秦三等侍衛二格齎銀三百兩賜喇沙里之子三等侍衛俄爾濟圖。仍傳諭曰爾父喇沙里自任講官以來在內則經筵盡瘁在外則扈從勤勞曾無一時一事少曠厥職。居官勤

慎內外諸臣罕有其匹。方欲畀以大任。倏聞奄逝。不勝痛惜。初不知病勢危篤。未遣使視疾。心甚悼焉。念爾父家無餘資。賜銀三百兩。為治喪之費。其議卹典禮。俟禮部具題。再加優給。○郭爾羅斯三等台吉鄂齊爾等。自荊州凱旋。遣內大臣壽世特等迎勞之。○甲辰上詣

太皇太后宮問安。○杜爾伯特三等台吉俄木布等。自荊州凱旋。遣內大臣塔達等迎勞之。○諭議政王大臣等。將軍王進寶副朕超擢顯用之意。親統官兵。冒險前進。首先恢復漢中。提督趙良棟亦副朕優擢之意。親統官兵。恢復徽州。隨取畧陽。彼等皆報朕之恩。實心効力。今乘此破賊之勢。即恢復保寧。平定四川。亦有何難。進取漢中各路官兵。王進寶趙良棟等。作何調遣。前取保寧。平定四川。可詳加定議。知會大將軍酌量而行。大將軍公圖海率領大兵之半。屯駐鳳翔。防守陝西通省。

以護軍統領吳丹為將軍。率大兵之半。繼王進寶趙良棟後。務俾糧餉無或斷絕。與總督哈占等會議而行。提督孫思克止率其所部兵。駐防原守汛地。湖廣提督徐治都速統舟師。乘茲勝勢。沿江直取重慶。將軍噶爾漢總督楊茂勳。提督佟國瑤等。已進興安。迄今尚未奏捷。怯懦已甚。俟恢復興安之日。噶爾漢等俱撤還原守地方。前所有功績。盡行削去。該部嚴察議處。噶爾漢佟國瑤。令防守鄖陽諸處。楊茂勳率所部官兵。速自鄖陽啟行。由荊門當陽。迅至彝陵。與徐治都直從江路而進。奮力平定四川。以贖其罪。○陞陝西按察使麻爾圖為陝西布政使司布政使。○陞浙江衢州副將李承恩為福建同安總兵官。○裁浙江水師提督。併提標中軍參將。守備千把等員。設總兵官一員。鎮守黃巖。○乙巳。諭戶部。兵部。前據大將軍等疏稱。王屏藩諸賊。於漢中興安諸處。擁衆數萬。堅守抗拒。以此

推之。必廣儲糧餉。為數年之備。今我大兵驟入。恢復之地。賊所聚糧。必已多得。當此逆賊軍敗懷疑。人心渙散之會。削平地方。似尚不難。惟蜀路運糧。最為重要。宜於所復城池村落。遍訪賊積米穀。悉行察收。俾進蜀官兵。不誤支給。則於國家大事。裨益非細。諸將軍大臣等。俱宜殫心儲備。所獲漢中諸處錢糧米穀。節省支用。副朕減寇安民至意。嗣後所至之地。惟宜以此為急務。爾部即遵諭速行。

戶部議覆直隸巡撫金世德疏言。本年地震。通州。三河。平谷。被災最重。應將本年地丁錢糧。盡行蠲免。其香河。武清。永清。寶坻等縣。被災稍次者。蠲免額賦十之三。薊州。固安縣。被災又次者。免十之二。應如所請。得旨。依議。通州等處人民被災。朕心深為惻憫。這蠲免錢糧。著該撫率地方官。殫心料理。務俾小民得沾實惠。以副朕軫恤災傷之意。○丙午。荊州出征被創身故扎魯特二等台吉和克津。陣

亡科爾沁驍騎校扎木束等喪至。遣內大臣公噶布喇。散秩大臣博落特等。以茶酒往奠之。○免長蘆竈地本年分旱災額賦有差。○奮威將軍平涼提督王進寶疏報。偽將軍楊永祚。偽總兵孫啟耀等投誠。下部知之。○戊申。

上詣

太皇太后

皇太后宮問安。○己酉。湖廣總督蔡毓榮疏言。

辰沅水路。直達武陵。賊據上游。於白溶諸處泊船最多。賊既依陸路之險。又從水路窺伺。若我師悉由陸路進攻。恐賊輕舟順流。以襲我師之後。

上諭。賊據水路。我師船艦。不可不備。該督其動支正項錢糧。造八槳小船二百。配撥官兵。水手舵工。訓練熟習。以濟剿禦。○庚戌。冬至。祀天於圜丘。

上親詣行禮○停止次日朝賀○遣官祭

永陵。

福陵。

昭陵。

孝陵。

仁孝皇后。

孝昭皇后○福建總督姚啟聖疏言臣以進攻厦門金門等島酌撥兵一萬四千名赴水師提督萬正色軍前第沿海諸汛地兵力單弱

請召募新兵補額得旨進取厦門金門諸處事關重要該督調發兵丁聽萬正色統領尅期破賊其所請募兵補額俟大將軍康親王題明滿兵應撤應留之處再議○辛亥岳州陣亡護軍校署章京希禮布喪至遣二等待衛達爾賽以茶酒往奠之○補行福建戊午科鄉試以戶部郎中劉元勳為正考官大理寺評事白夢鼐為副考官○壬子諭議政王大臣等今將軍王進寶等率領官兵真入漢

中諸處逆賊王屏藩等分道敗遁當此蜀賊震動之際速由重慶夔州進兵則恢復蜀省不難今湖廣船艦已成前雖有旨令提督徐治都等率舟師溯江而上直取重慶又令總督楊茂勳速往會徐治都協力進剿恐復觀望遲延亦未可知著差郎中蘇赫臣赴楊茂勳軍前趣兵速赴彝陵尅期前進并令與楊茂勳同行不時偵探軍情以聞○先是福建巡撫吳興祚請修理戰艦

上遣吏部郎中薩耳圖等往閩督修至是吳興祚又疏言戰艦二百五十艘見在修理若待竣工齊發恐悞風汛之期請以修繕已畢者同新造烏船配兵先發餘俟薩耳圖等督趣告竣

上諭戰艦乃破賊急需其令巡撫吳興祚同薩耳圖等速行修治無悞萬正色師期○安南國王黎惟禎慶賀大捷疏言逆賊吳三桂變亂數年阻臣國入貢之路又屢差偽官多方

脅誘令臣服從。臣區區忠悃。不敢從逆。乃有本國逆臣莫元清。背恩從賊。與吳三桂密相締結。領兵馬萬餘。潛入臣國高平。圖為掩襲。今幸仰仗

天威。滇南逆黨。指日成擒。臣請繕修貢儀。一面遣陪臣赴京朝賀。一面遣兵擒追逆黨莫元清。明正其罪。得旨著議政王大臣等會議。尋議覆。該國王不忘

皇恩。竭盡忠誠。不肯從逆。今又慶賀進貢。應交與禮部照安南國王進貢舊例遵行。至該國王既稱莫元清投順逆賊。差兵追擒。應無庸議。從之。○甲寅。陝西提督趙良棟疏言。臣攻取畧陽。隨發兵三路進剿。數次擊敗賊衆。共斬六千餘人。恢復陽平關。

上諭。議政王大臣等。陽平關逼近寧羗。係入蜀之路。沔縣亦與漢中相近。今提督趙良棟恢復徽州。直取畧陽。陽平關。其意或欲進定四川。倘不及與將軍王進寶等共議。乘機徑往

定蜀。則滿洲大兵。不可不為後繼。茲事最關重大。其檄趣將軍吳丹。偕總督哈占。速統大兵。為進定四川官兵。後應運致糧餉。相繼不絕。毋使軍機有悞。○昭武將軍福建提督楊捷疏報。江西賊首偽都督呂貴等。率賊三千餘人。犯崇汛。建寧城守遊擊李英。率領官兵破賊於岑陽山。悉殲其衆。下部議叙。○乙卯。定遠平寇大將軍和碩安親王岳樂疏言。臣等遵旨公議。每佐領留兵十二人。防守武岡州諸處。其每佐領八人。前鋒二百人。護軍每佐領三人。驍騎并漢軍。每佐領五人。俱行遣還。令固山貝子章泰。內大臣阿密達。護軍統領桑遏。署護軍統領。伯郎肅。輔國將軍宗室瓦山。前鋒統領碩岱。副都統伊巴漢。署副都統。穆森。雅哈喇等。率之而行。其留守之兵。令實授都統品級穆占等統領。於是議政王大臣等議奏。頃者大將軍貝勒察尼。每佐領發回兵八人。奉旨每佐領撤還六人。今安親王

軍前所有滿兵亦宜每佐領撤還六人。大臣官員留者與發回者俱如王奏。

上諭安親王自統兵以來各處立功甚多。隨往官兵亦多効力。如王所題令其親率每佐領兵八人還京。固山貝子章泰授為定遠平寇大將軍。以王敕印留與章泰。令章泰穆占同心協意商榷而行。但見在與賊對壘。所撤之兵數雖不多。而湖南初經底定。投誠之兵甚衆。乘此撤兵之時。恐姦宄竊發。亦未可定。章泰等宜熟計防守。其間有可行之機。務乘時進取。毋失事會。○岳樂又奏岳州今係內地。岳州兵每佐領二人。似宜撤還京師。

上曰岳州今不必守。大將軍順承郡王應於岳州。荊州諸處兵內撥征行在先。進剿勞苦者每佐領二人。與安親王率還大兵。一同啟行。又漢中諸處已經恢復。順承郡王所統兵內若有應發回者。速行奏聞。○陞福建驛傳道王國泰為江南安徽按察使司按察使。○丁

已。諭兵部。江西提督趙國祚老病不能効力。准以原品解任。提督員缺。停其補授。全省地方。俱令提督許貞統轄。○免山東鄒平等十州縣本年分旱災額賦有差。○己未。奉命大將軍和碩康親王傑書疏報。靖南王耿精忠。平南將軍都統賴塔等。調遣官兵。敗海寇於鰲頭山。下部議叙。○庚申。陞護軍統領喇賽為鑲藍旗蒙古都統。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十六

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十七

監修總裁官光祿大夫太保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保無太子太保保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍無理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十八年己未十二月壬戌朔陞護軍統

實錄卷八十七

領馬緝為鑲白旗滿洲都統○先是湖廣總

督蔡毓榮疏言大兵進取辰龍關必由楓木

嶺一路齊進請專責一人總統之至是議政

王大臣等以蔡毓榮周有德二人請旨簡用

上命蔡毓榮為綏遠將軍賜敕諭曰大兵進剿

雲貴各路綠旗官兵必須專責一人總轄調

遣始克允濟特授爾為綏遠將軍總轄常德

武岡等處所有各省調撥官兵及湖廣全省

綠旗兵馬聽爾酌量調度前進底定疆圉總

督董衛國周有德提督桑峨趙賴周卜世俱

聽爾節制商酌而行一切平定雲貴及剿撫

事宜惟爾專責至楚中見任文職官員聽爾

遴選賢能攜赴軍前調用如有能備芻糧克

濟軍機及官兵有能首先奪關冒險直入擊

敗賊衆者爾即開列勞績具疏奏聞論功加

等議叙如有臨陣退縮違糧違悞者副將知

府以下各官即以軍法從事其以上各官指

名飛章奏効從重治罪水陸兵將不相習者

實錄卷八十七

爾即具奏酌行更調爾定期進取恢復地方

將破賊事宜密行知會廣西陝西等處王將

軍提督等齊乘機會而行爾須嚴督兵將相

機前進力行剿除毋得遲延坐失時會仍嚴

加偵探毋致疎虞大兵一到抗拒不順者戮

之有先被賊脅從即時迎降者俱免誅戮有

能擒殺賊渠投誠者分別陞賞須嚴禁兵將

申明紀律經過地方毋得騷擾百姓歸順良

民加意撫恤爾膺茲重任宜摠忠竭力籌畫

周詳。剿撫無施。早奏膚功。以副朕簡擢至意。○陞長史殷圖為正紅旗蒙古副都統。○癸亥。陞工部郎中葉穆濟為陝西按察使。司按察使。○以故三等阿思哈尼哈番多爾濟子胡圖克襲職。○甲子。

太和殿災。○撫遠大將軍都統大學士公圖海疏報。十月十五日。臣等率大兵至鎮安縣。探賊在梁河關。分路進剿。令署理西安將軍事務佛尼勒等為頭隊。臣親率護軍統領吳丹等為二隊。行至火神崖。偽總兵王遇隆。領兵拒戰。佛尼勒等滿漢官兵奮勇衝殺。渡乾王河。奪取梁河關。臣等乘勝追剿。偽將軍韓晉卿遁入四川。臣等於十一月初二日。至興安州。偽將軍謝四。偽總兵王永世等。併偽文武官共三百八十二員。兵丁一萬四千三百餘名。至軍前投誠。恢復興安州。平利。紫陽。石泉。漢陰。洵陽。白河。諸縣。及湖廣竹山。竹溪。上津等縣。得旨嘉獎。下部議叙。○圖海又疏報。

平逆將軍畢力克圖等於十月十四日。恢復成縣。偽副將王先生。率偽遊擊等官十九員。兵丁三百六十名投誠。叅將康調元等於十月二十九日。恢復階州。偽王將軍等敗走。渡白水江。十一月十六日。恢復文縣。偽洮泯道王文衡。率偽文武官迎降。得旨嘉獎。下部議叙。○乙丑。

上詣

太皇太后宮。問安。○皇子允祺生。○免河南祥符等七州縣本年分旱災額賦。有差。○調鑲藍旗蒙古副都統馬爾翰為滿洲副都統。○天津總兵官陳奇疏言。臣兄原任陝西提督陳福。殞命行營。妻子淪陷蜀中。仰懇查訪。得旨。提督陳福當日効力巖疆。家口淪陷在蜀。深為可憫。其令入川各路將軍。多方尋訪。以聞。○丙寅。太監劉忠傳。

太皇太后旨。諭領侍衛內大臣阿魯哈等曰。皇帝自入秋以來。未甚爽健。且此數年間。種種

憂勞心懷不暢。頃者抱恙。今雖痊愈。尚未甘飲食。南苑潔靜。宜暫往彼。頤養。阿魯哈等隨導。

懿旨奏聞。

上曰。

太皇太后念朕躬偶恙。屢蒙降旨。朕欽承

慈命。明日幸南苑。

上召大學士等至懋勤殿。諭曰。君臣誼均一體。

分勢雖懸。而情意不隔。安危欣戚。無不可相

告語者。堂陛之義。固宜如是也。邇者朕體初

平。忽遇殿廷不戒。被燬於火。爾諸臣因朕偶

恙。復覩此災。愛主心切。必謂朕當過於憂慮。

朕披閱經史。頗明大道。朕之一身上受

祖宗之付託。下繫臣民之瞻仰。為任匪輕。寧不

自愛。惟是今秋有地震之變。又各處饑饉。洊

臻寇盜未息。此朕早作夜思。中心惶懼。寢食

靡寧者。至於殿廷告災。乃

上天致警。敢不夙夜祗畏。修省厥愆。然其所關

止屬朕躬。臨御之所。但得海宇清晏。置斯民於衽席之上。則朕今所居較諸前代茅茨土階。尚或過矣。豈至以露處為慮哉。朕自五齡。即知讀書。八齡踐阼。統蒞萬方。

太皇太后嘗問朕何欲。朕敬對曰。臣無他欲。惟願天下乂安。生民樂業。共享太平之福而已。當時左右實共聞之。自茲迄今。謹持此心。兢兢業業。恒如一日。可以質諸寤寐。倘有政治失宜。皆朕躬之咎。從不諉過臣下。惓惓之意。茲與爾等悉之。爾等可傳諭九卿詹事科道等官。仍繕寫諭旨。頒示各衙門。諭禮部本月初三日。太和殿災。變出非常。朕心深切警惕。茲欲詔誥天下。爾部即擇期具儀。以聞。

丁卯

上幸南苑行圍。○免直隸順天等府屬五十七州縣衛本年分水旱等災額賦有差。又發倉庫銀米賑濟饑民。○以福建海澄等十三縣歷年被兵。將未徵地丁銀米并鹽課銀盡行

蠲免○江西巡撫安世鼎疏報永豐興國縣交界鵝公山。偽總兵陳維貴等率衆就撫。下部知之○戊辰。以右都督管總兵官事蔡元為江南京口右路水師總兵官○己巳。福建水師提督萬正色疏言。新船雖竣。舊船尚在。督修。且檄調諸路兵。及礮手。猶未悉至。臣即以新船配官兵。先赴定海訓練。俟舟師輳集。定期水陸夾攻。

上諭。江南總督阿席熙。速選善用礮者二千人。送該提督軍前。福建總督姚啟聖等。亦速遣士卒。修整舟艦。提督萬正色。其嚴飭將士。凡大兵所至。務當撫綏被寇之人。毋妄肆淫掠。負朕恤民至意○庚午。

上召侍郎達都問曰。爾自福建來。海寇形勢何如。今歲有蕩平之機否。達都奏曰。臣來時。廈門。金門。賊勢大挫。賊船較前甚少。聞海中糧米無從湊集。賊不能久待。不日可以底定。

上曰。今海禁已嚴。賊糧何從而來。達都奏曰。賊

所恃屯糧之處。俱為大兵所有。惟向廣東高州海島。稍稍竊運而已。

上曰。當賊匱糧之際。我大兵速取海澄等要害之處。則賊失所憑依。全閩地方。可不久大定。若謂賊勢較前已減。姑俟相機徐圖。則賊何時可盡滅乎。夫師行既勞。民力重困。若能一舉滅賊。地方速平。則大兵無野處之苦。民困亦自此甦矣○以故鑲藍旗二等阿思哈尼哈番陳奇模子陳鎮襲職○辛未。諭安親王爾率領林興珠來京。其所部兵。令賢能官暫理○諭兵部。凡隨征總兵官及給劄總兵官等。非屬要地者。該督撫提等。俱遣令馳驛來京。朕將親閱。酌量擢用○免湖廣江夏等四十七州縣。武昌等十衛。本年分旱災額賦。有差○免山東濟寧州單縣。本年分旱災額賦。有差○癸酉。陞副將曾承為福建興化總兵官。福建水師提督萬正色疏言。臣標前後二營。已設官兵。尚餘新募水師萬餘人。請增

置援剿左右前後四鎮。各設總兵等官。即以
投誠總兵林賢等補授。下議政王大臣等集
議。議政王大臣等奏。宜如所請。得旨。林賢。授
為署守備。充福建援剿左鎮總兵官。陳龍。仍
以署叅將。充福建援剿右鎮總兵官。黃鎬。授
為署守備。充福建援剿前鎮總兵官。楊嘉瑞。
仍以都司僉書。充福建援剿後鎮總兵官。○
甲戌。定遠平寇大將軍和碩安親王岳樂疏。
報擒獲偽太子朱慈燦。或在軍前正法。或解
送京師。

上諭。朕曾以此事問之在內舊太監。據云。彼時
朱慈燦年甚小。必不能逸出。今安得尚存。大
約是假。朕思歷年已久。至今始出。自然近偽。
但事跡未明。不便即在軍前完結。今王不日
回京。可將朱慈燦帶來。俟到日。請旨定奪。○
撫蠻滅寇將軍廣西巡撫傅弘烈疏言。先遣
叅將溫紹賢等。從小路斷賊楓木嶺糧道。請
親統官兵進剿。

上諭。應如所奏。命傅弘烈親率所屬官兵。恢復
滇黔諸處。與大將軍平南王尚之信將軍莽
依圖等協力同心。酌量以行。其粵西巡撫事
務著麻勒吉署理。○以故鑲紅旗三等阿思
哈尼哈番圖理兄子齊勒襲職。○戶部議覆
總督河道帶管漕務靳輔疏言。江南山東二
省旱蝗為災。應允漕米。勢必遠處採買。請不
拘米色兌運。以恤災黎。應如所請。報可。○定
遠平寇大將軍和碩安親王岳樂等疏報。江
西省安石寨。瑯川寨。偽總兵黃瑞等率眾投
誠。下部知之。○乙亥。以江南蘇州。松江。常州。
鎮江等府屬各州縣旱災。停徵康熙十七年
分未完漕項錢糧。○內閣學士徐元文疏言。
纂修明史。請以翰林院侍讀學士傅臘塔。內
閣侍讀學士王國安。為明史館提調官。右春
坊右庶子盧琦。翰林院侍讀王士正。侍講董
訥。主鴻緒。右春坊右諭德孟亮。揆。左春坊左
中允李錄。予。左春坊左贊善陳諭。翰林院編

修翁叔元。沈涵。李應鴈。李濤。檢討李振裕。沈上墉。徐潮。王尹方。李柟等。為纂修官。會同薦舉。考授翰林院編修彭孫通等五十員分纂。從之。○陞副都統額赫納。為鑲藍旗護軍統領。○丙子。

上問戶部尚書伊桑阿等曰。各省災荒。共蠲免錢糧幾何。伊桑阿奏曰。見今所報江南等省約五十萬。尚有數省未經報到。

上曰。被災省分。若不蠲免錢糧。民生可憫。應將該省所報。逐一察明。使百姓獲沾實惠。○直隸巡撫金世德。引疾求罷。慰留之。○丁丑。陞湖廣左路副將和善。為武岡州總兵官。○戊寅。

上自南苑回宮。○己卯。

上詣

太皇太后

皇太后宮。問安。○以

太和殿災。頒詔天下。詔曰。朕躬膺

天眷。統御寰區。夙夜祇承。罔敢怠忽。期於陰陽順序。中外敎寧。共享昇平之化。乃於康熙十八年十二月初三日。太和殿災。朕心惶懼。莫究所由。固朕不德之所致歟。抑用人失當而致然歟。茲乃力圖修省。挽回

天意。爰稽典制。特布詔條。消咎徵於已往。迓福祉於將來。於戲。朝乾夕惕。答

上天仁愛之心。錫極綏猷。慰下土瞻依之望。布告天下。咸使聞知。○詔內恩款一十三條。○

諭議政王大臣等。將軍王進寶提督趙良棟等。已定漢中。今又進平四川。逆賊敗遁。乘此震動之際。諸路將軍等。宜各率所屬官兵。平定疆土。如必欲會齊。偕發。或姑聽他路先往。似此觀望。即坐失機宜。速移檄各路將軍。毋得彼此瞻顧。務期努力。收輯疆圉。○陝西巡撫抗愛疏言。進剿四川大兵。俱抵漢中。日需糧餉。皆於西安鳳翔二府所屬取給。但山路狹隘。轉運艱難。若止從陸路輸送。勢必難繼。

必水陸並運。庶於軍需有濟。宜選賢能道官一員。急赴畧陽。兼營船艦。由水道運致。從之。○撫遠大將軍都統大學士公圖海疏言。臣欽遵

上諭。以建威將軍印。給護軍統領吳丹。同署理西安將軍事務。佛尼勒。分統大兵之半。以行。又以漢中要地。雖有陝督哈占。率兵屯駐。經理糧餉。然滿洲大兵。不可不留駐守。請於見存半兵內。撥發千人。令署副都統鄂克濟哈。領振武將軍印。同副都統恰塔。鎮守漢中。今鄂克濟哈。已赴京師。姑以副都統翁愛代之。俟鄂克濟哈還日。調翁愛往鳳翔。臣率將軍王輔臣。都統海爾圖。副都統索諾木等。亦往鳳翔防守。從之。○庚辰。

上以譚弘之叛。或由迫脅所致。令其姪前副將譚天叙。齎敕往撫。敕曰。爾譚弘。昔自蜀中率衆來歸。優加侯爵。久受國家養。當吳三桂反叛之時。爾被其迫脅。為賊固守。抗拒有日。

茲者湖南、廣西、漢興諸處。已經底定。各路兵馬奮力齊進。賊勢摧敗。殄滅可期。諒爾亦所悉知。爾乃深達時命之人。豈肯玉石俱焚。朕念爾宿將舊勲。夙沐厚恩。必非甘心從逆。特降專敕。詳加開諭。恐爾尚懷猶豫。特遣爾姪副將譚天叙。前往宣布朕意。爾若果能翻然悔悟。棄逆效順。爾之前罪。俱行赦免。仍優加叙錄。至爾標下將士。如同心歸順。亦一概寬宥。酌量加恩。若能獻地輸誠。厥功尤懋。近日各處歸正人員。朕皆赦其前罪。論功錄用。亦爾所知。爾其勉勵忠忱。無懷疑懼。以副朕矜宥保全至意。○敕諭松潘土司番民。朕撫御寰區。恒期中外臣民。各得其所。綏乂之懷。遐邇初無異視。爾等俱係世守疆土之臣。尤當鼓勵忠義。報効朝廷。自吳三桂叛亂以來。吳之茂盤踞松潘。荼毒肆虐。蹂躪地方。困苦已極。念爾等皆係國家赤子。今被其迫脅。雖素懷忠藎。莫能自伸。朕心深為憫惻。茲湖南、廣

西漢中興安諸處俱經底定。各路兵馬奮力齊進。賊勢摧敗。立見蕩平。正爾等出離水火之日。不宜坐失機會。今特降專敕。詳加開諭。爾等果能感戴國恩。倡義聯絡。執擒吳之茂。以獻建功樹績。朕即優加叙錄。寵以封爵。撰給敕命。以酬爾勲庸。大兵到日。爾等若相機策應。協同剿寇。亦爾等之功。爾等宜速乘時會早奏膚功。以副朕懷遠矜全至意。○陞太常寺卿伊圖為大理寺卿。○免浙江黃巖等六縣本年分旱災額賦有差。○戶部議覆山東巡撫施維翰疏言。鄒平等二十三州縣饑民甚衆。所留漕米不敷賑濟。尚少米三萬二千四百九十九石有奇。行令該撫將德州臨清二倉米石照數動支。親往賑給。得旨。賑濟饑民。撫臣宜殫心料理。務使均沾實惠。各得其所。以副朕愛養斯民至意。○福建陣亡病故諸將喪至。遣內大臣塔達等以茶酒往奠之。○辛巳。先是平南將軍賴塔等疏請調發

廣東潮州碣石兩鎮舟師協力進剿。上允之。至是。廣東提督侯襲爵疏言。潮碣舳舻船止。堪防守海港。難入巨洋。且經制兵寡。汛守不足。逆艘飄忽往來。日夜捍禦。無可調遣。上諭廣東提督侯襲爵。既言潮碣兩鎮戰船難以出海。汛兵尚患不足。宜停其調發。提督萬正色等不必待廣東舟艦。即率水陸兵乘機進剿。侯襲爵仍分撥舟師作進攻狀。以分賊勢。○諭議政王大臣等。總督姚啟聖提督萬正色欲厚集水陸兵破滅海寇。進取廈門金門。屢經具題。事關重大。當日破賊克金廈二島。曾用荷蘭夾板船。今入海征剿。既乏堅固巨艦。荷蘭舟師又不時至。戰艦無多。遽以入海。恐變出萬一。未能得志。爾等其集議以聞。尋議政王大臣等奏請救下福建總督姚啟聖巡撫吳興祚提督楊捷萬正色度兵力足以辦賊。必無疎虞。果有確見聽其酌量而行。如少有疑慮。不可以前經具題憚於更改。勉

強從事。應令總督巡撫提督會商定議奏聞。從之。○免江南壽州等八十二州縣廬州等十三衛。本年分旱災額賦有差。○壬午。陝西提督趙良棟疏言。臣所屬兵勢單弱。請調興安一路兵。及副將楊三虎兵。簡選進定四川。上諭。平定四川。事關重大。其所請調興安進征之兵。及楊三虎兵。俱如所題調發。提督趙良棟與將軍王進寶分兵兩路前進。趙良棟授為勇畧將軍。給之敕印。不拘陝西通省。及各處官兵。凡係王進寶趙良棟兩將軍所調。大將軍公圖海以身任之。速為遣發。務至彼等所指之地。勿致有誤。若漫不經意。調遣遲延。恐誤進定四川重務。○諭兵部將軍王進寶趙良棟統兵進定四川。其標下官員各加一級。○贈陝西陣亡守備杜進才都司僉書。予祭葬如例。○調鑲藍旗蒙古副都統馬錫泰為滿洲副都統。○陞副將王英為福建同安總兵官。○癸未。戶部議發盛京成熟地畝分

給新滿洲

上曰。田畝。百姓生業所關。以熟地撥給新滿洲。恐生民困苦。可更議兩便之法。尋議奉天所屬東自撫順起。西至寧遠州老君屯。南自蓋平縣攔石起。北至開原縣除馬廠羊草等甸地外。實丈出五百四十八萬四千一百五十五晌。分定旗地。四百六十萬五千三百八十晌。民地。八十七萬八千七百七十五晌。新滿洲遷來。若撥種豆地。每晌給豆種一金斗。撥種穀米粘米高糧地。每晌給各種六升。旗人民人。無力開墾荒甸。又復霸佔者。嚴查治罪。從之。○甲申。吏部請補科員。

上曰。近來科道官。山東獨多。何也。科道為耳目之官。各省均用。乃能周知地方利弊。可令確議以聞。○諭大學士等。科道內陞外轉。關係勸懲。在外道員。職掌甚要。科道外轉。以道員用。殊為太過。應以在外小品官用。五部郎中俸深者。以道府兼陞。吏部司官。外轉以道員

用殊為太過。亦應以在外小品官用。令九卿詹事會同議奏。○寧南靖寇大將軍多羅順承郡王勒爾錦疏言。臣遵旨撤鎮守岳州兵。每佐領各二人。與安親王所統還師齊發外。荊州諸處亦宜撤。每佐領各二人。但大兵鎮守要地。發回二人。頗屬未便。今合滿洲蒙古漢軍。每佐領一人。令署副都統教哈率之還京。

上諭。前大將軍安親王。請撤岳州兵。每佐領各二人。已令順承郡王。合岳州荊州兵內察其征行在先。進剿勞苦者。每佐領遣還二人。與安親王率回大兵齊發。今順承郡王不以勞苦之兵。分別撤回。止撤鎮守岳州兵。每佐領各二人。不合。理宜駁察。但此兵已行。可如所撤來京。○命和碩純親王隆禧。子富爾祜倫襲爵。○陞前鋒叅領尼雅翰為鑲藍旗蒙古副都統。○丙戌。陝西總督哈占疏。言請將西寧總兵官朱衣客。調赴漢中。防守朝天廣元

諸處。提督孫思克。暫駐莊浪防守。

上諭。漢中有將軍鄂克濟哈駐守。朱衣客。或令防守朝天廣元。或令進剿四川。令將軍王進寶。趙良棟。會議酌行。甘肅涼州諸處。有靖逆將軍侯張勇駐守。足資彈壓。其莊浪與涼州。西寧。蘭州。臨洮。鄰近。緩急皆可相顧。即如所請。令孫思克官兵。暫駐莊浪。防守河東河西諸處。○建威將軍吳丹疏。言。總督哈占既駐漢中。請敕西安甘肅二巡撫。速趣運餉至漢中。畧陽。

上諭。官兵進剿四川。輓運糧餉。事最重大。即如所請。令西安甘肅兩巡撫。速備糧餉。運至漢中。畧陽。漢中既有將軍鄂克濟哈駐守。哈占標下官兵。酌量留駐外。其餘悉聽將軍王進寶。趙良棟。調用。○戊子。

上詣

太皇太后宮問安。○己丑。歲暮。祫祭太廟。

上親詣行禮○遣官祭

永陵。

福陵。

昭陵。

孝陵。

仁孝皇后。

孝昭皇后○遣官祭太歲之神○旌表八旗節

婦。滿洲。我爾精阿妻費莫氏等二十八人。蒙古

拜都妻鞠忒氏等五人。漢軍。班瑜妻王氏等

二人。烈婦。滿洲。常壽妻三氏等三人。各給銀

建坊如例○是歲。人丁戶口一千六百九十

一萬四千二百五十六。田地。山。蕩。畦地。五百

十三萬六千三百五十三。頃。四十一畝。徵銀

二千二百一十三萬四千六十八兩八錢有

奇。米。豆。麥。六百二十三萬一千四百六十一

石五斗有奇。草。二百二十四萬二千六百一

十九束。茶。十五萬五千三百六十五引。行鹽

三百九十五萬七千二百八十三引。徵課銀

二百三十九萬九千四百六十八兩有奇。鑄

錢。二萬三千一百三十六萬五千三百六十

有奇

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之八十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十八

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十九年庚申春正月辛卯朔

實錄卷八十八

上詣

堂子行禮還宮。拜神畢。率諸王貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮。停止朝賀筵宴。○朝鮮國王李

燾遣陪臣李觀徵等表賀冬至元旦

萬壽節及進歲貢禮物。宴賚如例。○癸巳

上詣

太皇太后

皇太后宮問安。○甲午。勇畧將軍陝西提督趙

良棟疏報。臣率兵從白水壩浮水渡江擊賊。

大敗之。追至青川石峽溝復敗其伏兵。龍安

府偽總兵姜應熊等降。遂復龍安府。得旨嘉

獎。下部議叙。○諭兵部。將軍王進寶趙良棟

標下綠旗兵既恢復漢中畧陽諸處又進定

四川。其酌量加恩賞賚。○乙未。孟春。享

太廟。

實錄卷八十八

上親詣行禮。○遣官祭太歲之神。○順天府進

春。○丙申。諭奉命大將軍和碩康親王傑書

王所奏據實指參事已經覽悉。朕思凡行一

事必前後計慮。果有裨於國家始可舉行。若

輕率妄動必致舛錯。今廣西湖南漢中興安

等處俱已底定。逆賊餘黨引領以冀歸正者

不止百千。若將耿精忠即行正法不但已經

投誠之人以為後日亦必如此聲明其罪。即

未經投誠之人。睹此寒心。亦未可知。關係實

重。前朕手諭欲令耿精忠來京者。蓋掣回福建一半滿兵之意。非欲即行處決。俾其先來也。如王善能勸諭。令至京師。諸事皆得平妥。王但當加意開導之。不可輕舉。彼如必不赴京。再行詳悉。密奏候旨。○丁酉。

世祖章皇帝忌辰。遣官祭

孝陵。○勇畧將軍陝西提督趙良棟疏言。臣往者請於興安一路官兵。分撥四千。今到大安驛。止有靖寇將軍標兵一千。總督標兵一千。

平定本八八

臣不得已。選寧夏兵四千五百人。畧陽營四百人。陽平營二百人。甘肅撫標四百人。西寧鎮標三千五百人。共一萬一千。帥之自大安驛。同將軍王進寶。進取四川。

上諭大將軍公圖海。部文到日。即速遣趙良棟。所謂之兵。不可有誤。至興安一路官兵。前奏調發四千。今趙良棟疏言。僅得二千。其缺誤之故。令總督哈占核明以聞。○陞陝西關西道劉顯第。為四川布政使司布政使。○戊戌。

上詣

太皇太后宮。問安。○諭議政王大臣等。進取四川。以滿洲大兵為後應。最為要策。宜令將軍吳丹。繼將軍王進寶軍之後。將軍鄂克濟哈。繼將軍趙良棟軍之後。陝西已有將軍張勇。提督孫思克。巡撫杭愛。巴錫等鎮守。宜令大將軍圖海。帥師前赴漢中。接濟進蜀諸軍糧餉。鄂克濟哈率漢中滿兵。馳往合之。吳丹官兵均分統率。以為王進寶趙良棟後繼。轉餉源源不絕。相隨而進。○庚子。

平定本八八

上詣

太皇太后宮。問安。○辛丑。祈穀於

上帝。

上親詣行禮。○壬寅。勇畧將軍陝西提督趙良棟疏報。招撫偽知州蔡廓。偽副將郝俊龍等七員。偽遊擊知州知縣等官五十七員。兵丁三千三百餘名。又生擒賊兵二百六十七名。下部議叙。○癸卯。以公福善。為領侍衛內大臣。○甲辰。

上詣

太皇太后

皇太后宮問安○勇畧將軍陝西提督趙良棟疏報。偽總兵潘九蘭。偽知州田大有等。三百一十六員投誠。下部議叙○乙巳。奮威將軍平涼提督王進寶疏報。康熙十八年十二月二十七日。臣率官兵至神宣驛。聞朝天關有賊踞守。臣即飭令官兵奮勇撲剿。過關二十日。馳至廣元縣。分途追擊。擒斬賊兵無算。恢復縣城。得旨嘉獎。下部議叙○丙午。封固山貝子章泰子額圖。為鎮國公。授輔國公。化善子馬錫禮。為三等輔國將軍。輔國將軍杜爾霸子噶通圖。為三等奉國將軍○丁未。

上詣

太皇太后宮問安○諭議政王大臣等。將軍趙良棟攻克白水壩。青川。招撫龍安。成都。指日可復。將軍王進寶。亦分兵三路。於正月初旬。進逼保寧。逆賊王屏藩等。因迫。必各潰遁。其移檄嚴飭。

楊茂勳。徐治都等。乘機急取重慶。夔州。剿禦逆寇。如遲延觀望。悞此事機。嚴治其罪○昭義將軍伯馬承蔭。標兵以餉匱鼓譟。大將軍簡親王喇布。即撥餉給發。兵遂寧戢。理事官麻勒吉等。疏言。馬承蔭。黃明。葉秉忠。在賊中俱係偽將軍。今同來歸誠。馬承蔭。授為將軍。伯馬承蔭。葉秉忠。未授職銜。致兵眾肆行。葉秉忠。已年老乞休。無復異志。惟黃明。強悍。為柳州官兵所懾服。若不調用。他所恐終為患。

上諭。授黃明。為援剿總兵官。率馬承蔭。標兵一千。赴將軍莽依圖。軍前。隨大兵進剿雲貴。葉秉忠。授總兵官職銜。許其休致○陞左僉都御史劉如漢。為太常寺卿○戊申。

上詣

太皇太后宮問安○己酉。兵部題。福建凱旋官兵叙功事。

上曰。此等官兵。在外効力。極其勞苦。有功之人。著先行議叙。其有罪者。俟全師回日。再加詳

議○庚戌先是命昭義將軍伯馬承蔭設立五營會剿雲貴至是揚威大將軍和碩簡親王喇布疏言五營兵少應增援剿二營共為七營營各一千人。

上諭凡將軍標下無設七營之例馬承蔭所屬官兵黃明率一千隨征雲貴外廣西省城甚重其更撥一千赴大將軍簡親王軍前馬承蔭標下仍立五營兵五千參將守備各官聽馬承蔭選擇具奏○辛亥。

上詣

太皇太后

皇太后宮問安○陞詹事庫勒納為翰林院掌院學士兼禮部侍郎○諭定遠平寇大將軍和碩安親王岳樂褒德賞功國家之令典安內攘外社稷之崇勲王連年以來遠莅巖疆親經百戰櫛風沐雨歷暑逾寒競揚貔虎之雄克清梟獍之孽湖湘諸處已見蕩平滇黔餘氛俱成坐困更體朕軫念窮荒之心廣示

招徠深加撫恤王師所至遐邇來歸捷奏屢宣中外稱慶朕既嘉碩畫益篤親親爰命班師副朕懷想頃者聞王已抵武昌奏凱可期特遣使臣慰勞兼賜駱駝良馬以示優眷王其按程而來朕將計日以待○諭九卿等科道官內陞外轉原以示勸懲也今見才優者猶知憚於外轉其或才力不及不稱言職之人安於外轉道員者甚多是但以示勸非所以示懲也故令九卿詹事科道會議務期得當魏象樞等奏稱恐天下不肖之輩不識朝廷慎重道員之意疑為厭薄言路之端等語通年以來姚文然李之芳施維翰等內陞未久即任以大僚督撫亦因其克盡言職才能素著之故也此無論天下智愚不肖當亦知朝廷無厭薄言路之意矣其外轉者或係素無建白或係昧於事理或係任臆妄言或係才力不及原非因其條奏而外轉也又稱近年外轉之科道並無貪污溺職之一人而五

部郎中俸深陞道。如范永茂。高恒豫。盧元培。程汝璞等。職私累累。劣蹟彰彰。不知凡幾等語。科道外轉者。豈並無溺職之一人乎。五部俸深陞道員者甚多。豈盡係貪劣之人乎。如陳丹赤等。優者匿而不言。獨舉范永茂等四人。不辨賢否而槩言之。可乎。魏象樞去歲七月內。曾於朕前。面奏科道官所行。皆係徇私。有負朝廷耳目之任。罪皆應死。今甫數月。復言外轉者。並無溺職之一人。前後參差。何其速耶。爾等所奏。理不宜批答。因註語內。有以存國體之語。故令諸臣知之。至若外轉科道。以小品官員用。遂至有傷國體。朕殊不解。故特諭諸臣。示以朕意。○壬子。

上詣

太皇太后宮。問安。

上幸鞏華城。道經西山之麓。遣內大臣覺羅武默納。致奠配享。

太廟昭勲公圖賴墓。是日。駐蹕神山頭。○贈故

翰林院掌院學士兼禮部侍郎喇沙里禮部尚書。予祭葬。謚文敏。○癸丑。

上駐蹕南口。○甲寅。

上駐蹕鞏華城。○諭議政王大臣等將軍趙良棟等軍。深入四川。保寧。重慶。夔州。諸處。速宜平定。將軍吳丹。王進寶等軍。雖抵保寧。必於鰲龍山。相對立營。果爾。則恐稽時日。今宜面鰲龍山。分兵堅壘。別遣一軍。渡昭化江。壁錦屏山下。滿漢兵合勢。以規取重慶。夔州。若下重慶。諸處。則保寧賊兵。歸路阻絕。可計日而克。假使賊衆勢迫來降。則民免重困。而全蜀亦不久大定矣。其趣總督楊茂勲。提督徐治都等。速行進兵。提督王之鼎。亦速入蜀。會趙良棟軍。○調陝西巡撫杭愛。為四川巡撫。○調正黃旗蒙古副都統布舒庫。為滿洲副都統。○乙卯。

上回宮。○勇畧將軍陝西提督趙良棟。疏報。臣率官兵。自龍安進剿。追至舊州。明月江。賊斷

橋守江。臣督兵浮水渡江擊賊。令總兵官王進才等分兩路直取成都。而親率大兵繼進。至綿竹。偽勁武將軍汪文元迎降。本月十一日。至成都二十里鋪。偽巡撫張文德等率文武偽官二百餘人迎降。遂復成都。得旨嘉獎。下部議叙。○丙辰。

上詣

太皇太后

皇太后宮問安。○奮威將軍平涼提督王進寶疏報。臣等既復朝天關。廣元縣遂分三路趣保寧。去城二十里據孔道而軍。是月十三日。賊二萬餘來犯。臣分遣官兵大敗之。追剿至錦屏山。破賊四壘。賊退保橋。我兵又擊之。奪橋斬關入城。賊渠王屏藩偽將軍陳君極。自經死。生擒偽將軍吳之茂。張起龍偽總兵郭天春等十七員。遂復保寧。得旨嘉獎。下部議叙。○丁巳。諭議政王大臣等。覽將軍吳丹王進寶等奏我兵大敗逆賊。恢復保寧。偽將軍

王屏藩縊死。吳之茂。張起龍就擒。將軍趙良棟前奏大敗逆賊。恢復成都。今正當賊衆動搖之際。王進寶。趙良棟宜同心協力。惟期有濟大事。剿撫餘賊。綏輯地方。商酌而行。作何區畫。仍令奏聞。王屏藩等俱係賊帥。其首級并吳之茂。張起龍。悉解來京。諸路將軍等宜乘此時分路速進。其移檄湖廣廣西諸處大將軍總督提鎮等咸使知之。○戊午。諭都察院京師重地。遣御史巡視五城。專為嚴察奸宄。今無知之徒。所在聚會煽惑愚民。深為可惡。五城御史不加嚴察。所司何事。可嚴飭之。○以勇畧將軍陝西提督趙良棟為雲南貴州總督。加兵部尚書銜。仍兼管將軍事務。○調正藍旗蒙古副都統龔圖為滿洲副都統。○己未。奮威將軍平涼提督王進寶疏言。原任關南道胡昇猷被難數載。未授偽職。請令四川督撫酌量另用。

上諭胡昇猷人品甚優。身陷賊中者數年。首計

逼辱守節不屈可嘉。川省現在用兵。應即於其地要缺補用。

二月辛酉朔。諭議政王大臣等。今成都保寧皆已恢復。宜乘此機會。速定雲貴。四川既平。湖廣已屬內地。其令順承郡王勒爾錦貝子準達都統范達禮等。盡率所部兵。沂江而上。規取重慶。順承郡王等。即於重慶駐守。將軍吳丹鄂克濟哈。與趙良棟等。同進取雲貴。吳丹鄂克濟哈。於順承郡王軍中簡精銳馬兵。將之前行。總督楊茂勲。提督王之鼎。駐守成都。將軍王進寶。駐守四川。徐治都還軍守彝陵。荊州諸處。戶部題。四川久為賊據。苛虐橫征。小民相率流亡。請敕督撫。急行招徠撫綏。以副。

皇上愛民至意。得旨。總督楊茂勲等。速赴任督理軍餉。并招徠流民。俾安生業。毋悞農時。○廣東巡撫金僞疏言。海賊謝昌李積鳳等。不時侵掠沿海地方。請調平南王藩下都統王

國棟等。前往剿禦。得旨。都統王國棟等。身在省會。不宜縱賊披猖。著同副都統尚之瑋。總兵官寧天祚等。率藩下舟師。速圖剿禦。賊退之後。更有侵犯內地者。即與巡撫金僞會商撲滅。○奮威將軍平涼提督王進寶疏報。右路總兵官楊宗道等。於正月初四日。率兵進取昭化縣。大敗賊衆。恢復縣城。隨於初六日。率兵至劍州。偽彭總兵等望風逃竄。我兵隨入城。又初八日。蒼溪縣偽知縣王璋等獻城投誠。呈繳偽印偽劄。得旨嘉獎。下部議叙。○先是廣東高州總兵官祖澤清據城叛。官軍討之。勢感乞降。

上貫其罪。授鑒儀衛鑒儀使。祖澤清不思効力。贖罪。復行叛逆。至是為官軍所執。械送京師。上命將祖澤清及子祖良榘。俱凌遲處死。諸子家口籍沒入官。○壬戌。

上詣

太皇太后宮。問安。○癸亥。以內閣學士噶爾圖

翰林院侍讀學士牛紐俱充經筵講官○免陝西吳堡縣康熙十八年分旱災額賦有差○甲子。賜卓異山西布政使穆爾賽等蟒服有差○陞甘肅布政使鄂愷為陝西巡撫○陞護軍叅領葉儲赫為鑲藍旗蒙古副都統○琉球國王嗣尚貞遣使進貢宴賚如例○厄魯特厄爾德尼布穆台吉等遣使進貢賞賚如例○乙丑。皇子允祚生○諭兵部四川關係重要。新經恢復。宜簡才畧優長。邊疆著績者。方克勝任。高孟以都督同知授為四川北總兵官。王用予以都督同知授為四川松潘總兵官。王朝海以副將授為四川重慶總兵官。王進才以叅將授為四川建昌總兵官○陞翰林院侍讀學士格爾古德為詹事府詹事○丙寅。奮威將軍平涼提督王進寶疏報。臣與將軍吳丹遣鎮守西安將軍佛尼勒。總兵官王朝海等率兵取順慶。我兵前進沿途招撫鹽亭。潼川。中江。南部諸州縣。悉下

之。正月十八日。抵順慶。偽知府彭天壽等率眾迎降。於是蓬州。廣安州。合州。西充。岳池。營山。渠縣。鄰水。儀隴。遂寧。蓬溪諸州縣。相繼悉定。得旨嘉獎。下部議叙○予故原任太子少保正白旗漢軍副都統徐大貴祭葬。謚勤果○丁卯。遣大學士杜立德祭先師孔子○諭戶部。前因各省地方多有饑饉。已經遣官賑濟。今見京師附近之地。四方饑民。流移在道。朕心深為憫惻。若不急行安插。令其得所。將來必至鬻賣子女。難以生全。作何設法。令其各歸原籍。著該地方官加意撫綏。安集復業。以免流離。九卿詹事科道詳議具奏○諭戶部。積穀原備境內凶荒。若撥解外郡。則未獲賑濟之利。反受轉運之累。人將憚於從事。必致捐助寥寥。嗣後常平積穀。留本州縣備賑。義倉社倉積穀。留本村鎮備賑。永免協濟外郡。以為樂輸者勸○諭議政王大臣等。今四川已定。楊茂勳等所乘船俱

無所用。糧餉關係重要。其令郎中蘇赫臣。員外郎噶通薩親督糧務。即以此船載楚餉。沂江運至順承郡王軍前。勿令斷絕。有誤軍需。○諭議政王大臣等。成都保寧順慶諸府。今已恢復。四川底定。湖廣大兵。今正分道進定雲貴。其廣西滿洲綠旗大兵。休息日久。亦當乘機速進。大將軍簡親王。留每佐領兵一人於桂林。其餘官兵。王盡帥之。往屯柳州。大將軍平南王。可駐守貴縣。將軍莽依圖馬承蔭。都統馬九玉。總督金光祖等。可各率所部官兵。并酌調平南王藩下官兵。分道進取雲貴。○戊辰。祭

大社。

大稷。

上親詣行禮○

太皇太后聖壽節。

上率諸王文武大臣。侍衛等。詣

太皇太后宮行禮。遵

懿旨。停止筵宴○己巳。

上幸南苑行圍○直隸巡撫金世德。以病求罷。允之○陞原任四川關南道胡昇猷。為四川按察使司按察使○以故二等阿思哈尼哈番徐大貴。孫徐永泰襲職○庚午。以翰林院侍講阿哈達。充日講起居注官○辛未。

孝康章皇后忌辰。遣官祭

孝陵○壬申。命翰林院掌院學士庫勒納。教習

庶吉士○阿霸哈納多羅貝勒色冷墨爾根

故。遣官致祭○甲戌。以湖廣武昌等府。兵興

後。頻遭水旱。命該撫動支積穀一萬一千餘

石。速行賑濟○乙亥。陞福建布政使于成龍。

為直隸巡撫○吏部遵旨議覆。內閣學士兼

修明史徐元文疏言。纂修明史。宜舉遺獻。請

將揚州府前明科臣李清。紹興府名儒黃宗

羲。延致來京。如果老疾不能就道。令該有司

就家錄所著書送館。至監生姜宸英。貢生萬

言。應速行文該督撫移送。其候補主事汪懋

麟。丁憂服滿到部。應以原銜食俸。入館修史。原任副使道曹溶。布衣黃虞稷。現在丁憂。俟服闋後。咨送到館。告成日。一并甄叙。從之。○

命五城煮粥。賑濟流移饑民。於常例外再展限兩月。○湖廣提督徐治都疏報。臣會同川督楊茂勳。於正月二十一日。進剿川賊楊來嘉。四路進兵。大敗賊衆。陣斬三千餘級。生擒偽將軍王鳳岐等。恢復巫山縣城。隨於二十七日。進取夔州。得旨嘉獎。下部議叙。○丙子。大閱於南苑。命鑲黃旗。正黃旗。正白旗。包衣佐領下官兵。擐甲序列。瞭鷹臺東。烏鎗兵。以次排列北向。

上躬擐甲。御瞭鷹臺。命內大臣。侍衛。禁軍等。按翼分列。鳴號角。列陣乃進。鎗礮齊發。每十步一進。十進而止。閱畢。樹侯於臺下。

上馬步射。命內大臣。侍衛。各以次射畢。列坐。賜宴。

上回宮。詣

太皇太后宮。問安。○免湖廣安化等二十六州縣。康熙十八年分旱災額賦有差。○丁丑。上詣

太皇太后

皇太后宮。問安。○以浙江杭州等府。康熙十八年分旱災歲收歉薄。恐米價騰貴。命戶部檄巡撫李本晟。動支庫銀四萬兩。往湖廣江西。糴米平糶。○戊寅。以原任奉天將軍倭內。為正黃旗蒙古副都統。○湖廣提督徐治都疏報。臣等率兵抵巫山縣。偽將軍楊來嘉等擁衆拒守。我兵擊敗之。乘勝長驅。是月初一日。至夔州。偽將軍劉之衛。率偽總兵瞿洪陞等出降。遂復其城。得旨嘉獎。下部議叙。○徐治都又疏報。譚弘遣子偽左路將軍譚天秘。齎辨明脅從疏。并繳到偽敕印牌劄。官兵數目文冊。本月十三日。譚弘率子姪偽總兵譚地。晉。譚地升等。詣軍門降。下部議叙。○己卯。春分。朝

日於東郊。

上親詣行禮○庚辰。諭議政王大臣等。今四川底定。大兵宜速赴重慶。進取滇黔。否則逆賊復犯重慶。亦未可料。其移文吳丹。鄂克濟哈。即馳赴重慶。精簡士馬。進取雲貴○陞吏部郎中雅思哈為甘肅布政使。司布政使○勇畧將軍陝西提督趙良棟疏言。自恢復龍安以後。招撫偽將軍一員。偽總兵二十四員。偽副叅以下等官三百餘員。偽巡撫一員。偽司道以下等官一百餘員。俱應隨宜安插。得旨。投誠官內著挑選總兵官六員。每總兵官留兵五百名。設遊擊一員。守備一員。把總二員。隨趙良棟進剿雲貴。餘令解散為民。其文職官員。選其堪用者。暫行委署。其不堪用之人。如係旗下官員。令其回旗。至逆賊吳三桂屬下之人。查明暫留成都。如係各省民人。俱發回原籍。偽巡撫張文德。亦令回京○四川總督楊茂勲疏報。臣於正月三十日。遣兵進取

大昌。大寧二縣。擊敗賊衆。克復城池。得旨嘉獎。下部議叙○辛巳。

上詣

太皇太后

皇太后宮問安○以四川平定。裁郢陽撫治缺

○理藩院兵部會題。福建諸處凱旋外藩蒙古公台吉官兵。陝西凱旋鄂爾多斯王古魯等三旗貝子台吉官兵。功績均應議叙。若令俱至京師。人數衆多。恐致糜餉。宜俟草青時。令齊集適中之處。理藩院遣官四員。兩路分往。察核軍功案籍。照例議叙。得旨。議叙軍功事關重要。其令理藩院侍郎達哈塔。兵部員外郎杜楞。往彼察核○壬午。

上詣

太皇太后

皇太后宮問安○

上御弘德殿。講官進講畢。

上諭曰。人品辨別。只在心術公私。凡人口之所

言與身之所行往往不相符合。故去私最難也。○予故精奇尼哈番又一拖沙喇哈番艾音塔睦祭葬如例。○給事中姚祖頊奏請獎叙被難人員。

上諭大學士等曰。初逆賊反叛時。克殫忠義。或從賊所設計來歸。或大兵已至。尚為賊困。此等人。錄其善而獎其忠。方為允當。亦有大兵已恢復地方。奸猾之徒。先附賊妄行。因賊眾潰散。焚毀偽劄。逃避山林。文飾耳目。以圖僥

倖者。今姚祖頊請旌獎。甚為失當。可加嚴飭。嗣後科道官條奏。朕先行披覽。仍面加詳問。如此。則人之才能。及所奏之意。咸可知矣。○癸未。

上詣

太皇太后

皇太后宮問安。○先是。命福建總督巡撫提督酌定進剿海寇機宜。巡撫吳興祚疏言。臣詢之習知賊中情形者云。賊踪雖多。不如我新

造鳥船。堅固便捷。今鄭錦悉調舟艦。皆在海壇齊集。宜乘風汛甚利。將士方銳。先攻取海壇。破賊藩籬。則廈門金門自可乘勝而下。臣已與提臣萬正色決策。萬正色以水師直攻海壇。臣率標兵赴同安。同督臣姚啟聖提臣楊捷調陸路兵。規取廈門。萬正色亦疏言。荷蘭國船遲速莫必。轉盼三四月間。南風一作我舟師即難前進。今新舊大小船隻俱集定海大洋。撫臣吳興祚前來閱視。知其可用。臣已與決計進討。吳興祚率標兵馳赴同安。為臣聲援。督臣姚啟聖提臣楊捷調陸路兵。據圍頭以遏賊出入。臣定於二月初四日進取海壇。至是萬正色疏報。臣統率官兵由定海進發。於本月初六日抵海壇。賊乘舟逆戰。臣分前鋒兵為六隊直衝而入。親統巨艦繼之。又以輕舟繞出其左右。并力夾攻。礮火齊發。擊沉賊船十六艘。溺水死者三千餘人。餘賊潰遁。我舟師遂駐泊於海壇。

上諭今巡撫吳興祚提督萬正色灼見賊勢乘機進剿已經克復海壇將軍賴塔總督姚啟聖提督楊捷其會商分撥滿洲綠旗水陸官兵以策應進剿之師○甲申

上至鞏華城駐蹕○遣官祭

先農之神○以一等伯費揚古為領侍衛內大臣○予江西陣亡鑲藍旗一等精奇尼哈番阿南達祭葬如例○乙酉

孝昭皇后忌辰行再期致祭禮○

上回宮○丙戌諭戶部尚書伊桑阿朕聞宣府等處歲值大祲貧民乏食鬻賣妻子以自求活夫人孰不愛其室家哉至欲延一朝夕之命割其所親憫惻莫甚焉其遣爾部郎中明額禮馳驛速往會同地方官賑濟急拯艱厄以紓朕懷○戊子

上詣

太皇太后宮問安

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之八十九

監修總裁官光祿大夫保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太傅保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣永斌等奉

敕修

康熙十九年庚申三月庚寅朔

實錄卷八十九

上詣

太皇太后

皇太后宮問安○以江西陣亡一等精奇尼哈

番阿南達子六格襲職○辛卯遣官祭

歷代帝王○建威將軍吳丹疏報二月十六

日大兵至重慶偽文武官出城迎降於是達

州東鄉太平新寧南江安岳等州縣悉定偽

將軍楊來嘉彭時亨偽總兵江有倉等亦各

遣人詣軍門繳印歸誠得旨嘉獎下部議叙

○壬辰陞湖北按察使佟康年為福建布政

使司布政使○陞長史方額為正藍旗蒙古

副都統○癸巳理藩院題出征陣亡病故外

藩蒙古官兵請加恩賜

上命理藩院堂官一員親往分給○甲午奮威

將軍平涼提督王進寶以病辭職慰留之○

乙未清明節遣官祭

永陵

福陵

昭陵

孝陵

仁孝皇后

孝昭皇后○以大理寺卿伊圖為雲南巡撫○

平南王尚之信下護衛張永祥張士選赴京

首告尚之信謀叛事

上命刑部侍郎宜昌阿郎中宋俄託等以巡視

海疆赴廣東察其狀諭之曰爾等攜帶張永

祥張士選以往密詢都統王國棟副都統尚

之璋。若事有實迹。王國棟等自任能執尚之信。即一面奏聞。一面赴潮州。頃尚之信具疏。自請撤還省會。爾等抵廣東日。詳察情形。如應撤還。即具疏言。省會不可無尚之信。彼時當獨調之還。爾等臨事之時。無多株連。倘有意外。聽酌便行事。是日。宜昌阿等啟行。○丁酉。

上以定遠平寇大將軍和碩安親王岳樂。自湖廣凱旋。率在京諸王。貝勒。貝子。公。及滿漢大臣。出郊迎勞。是日。駐蹕蘆溝橋。○以原任陝西西安布政使顏敏為廣西布政使。司布政使。陞江西驛鹽道副使黃元驥為廣西按察使。司按察使。○調江西總兵官蔡璋為廣東順德水師總兵官。○戊戌。

上自駐蹕所。率諸王大臣等。迎凱旋大軍於二十里外。大軍既至。上率出迎諸王大臣。及凱旋王大臣官員等。拜天畢。

上御黃幄。和碩安親王岳樂率凱旋將帥行禮。次投誠將軍林興珠行禮。

上召安親王岳樂近前。

上親起抱見。命近。

御座左側坐。諸大臣依次列坐。其行間効力軍士。亦依次列坐。賜茶畢。

上回宮。○湖廣提督桑峨疏報。招撫偽遊擊劉鵬等。文武官共七十五員。兵丁一百六十三名。下部議叙。○辛丑。揚威大將軍和碩簡親王喇布疏報。臣親率兵往柳州。二月二十八日。至永福縣。聞馬承蔭反。給傳弘烈登舟遣兵襲破其營。臣等即欲進剿。因滿兵力薄。又念省城至重。公議暫還桂林。得旨覽奏。馬承蔭復叛。今湖廣綠旗兵。已取楓木嶺。武岡州。

滿漢兵甚多。廣西去武岡為近。宜調貝子章泰軍中滿兵。每佐領六人。綠旗精兵二千人。令都統夸札帥之。速赴簡親王軍前。與平南王等協力剿賊。夸札至廣西。即令叅贊軍事。

○寧南靖寇大將軍多羅順承郡王勒爾錦疏言。將軍噶爾漢之兵。若留之荊州。防禦地方。誠有裨益。

上允所請。即命噶爾漢。以兵駐守荊州等處。

壬寅。宗人府。內閣。禮部等官。恭進

玉牒。

上御中和殿受之。總裁纂修官員行禮。○諭議

政王大臣等。前遣往廣西大兵。勞苦日久。宜

令番休。可撥京師每佐領護軍二人。驍騎三

人。漢軍一千人。令都統馬緝趙璉。副都統洪

世祿。祖植椿等。率往更替。○癸卯。

上詣

太皇太后

皇太后宮。問安。○戶部議覆護理直隸巡撫事

守道董秉忠疏言。請發積穀。賑濟霸州等八

十二州縣。衛饑民。應如所請。得旨。著遣爾部

堂官一員。速往察明。即動支正項錢糧。賑濟

務。令饑民咸沾實惠。○諭兵部。頃簡親王喇

布奏。馬承廕反叛。恐此賊自廣西侵犯廣東。

今閩疆悉定。可令將軍賴塔。即率滿兵二千。

馳赴潮州。防守廣東全省。○福建水師提督

萬正色疏報。我師既攻復海壇。逆賊朱天貴。

遁據南日。湄州等嶼。臣咨會撫臣吳興祚。陸

路聲援。臣親率水師。於二月十四日。自海壇

進剿。逆賊南遁。我師尾至平海嶼。與撫臣會

師。朱天貴復合偽將軍林陞。駕艚三百餘艘。

踞崇武嶼。臣於二十日。乘風自平海南下。賊

率艚迎戰。臣揮兵掩擊。大敗賊眾。沉賊艚二

十餘隻。陣斬偽總兵吳丙。偽副將林勲等。擒

殺甚眾。克復湄州。南日。平海。崇武諸嶼。得旨

嘉獎。下部議叙。○奉命大將軍和碩康親王

傑書疏報。海中大定。小定地方。逼近廈門。金

門。係我師必由之道。逆賊鄭錦。遣偽將軍張

志。屯糧聚眾。欲據此地。以與我師相拒。臣遣

駐防杭州副都統倭申。巴圖魯。率滿洲綠旗

官兵。齊進大定地方。奮勇剿殺。賊不能支。皆

逃往小定。我兵尾追。賊衆不得船者。淦入海中。焚燬賊巢。還回百姓。所有大定小定地方。悉行恢復。得旨嘉獎。下部議叙。○甲辰。傑書又疏報。二月二十三日。大兵水陸分進。規取玉洲。賊首劉國軒。向石馬海澄奔竄。我兵追剿甚急。劉國軒復走廈門。偽總兵蘇堪等。守海澄。隨遣官諭以投誠。蘇堪即開西門迎接官兵入城。玉洲。石馬。海澄等地方。悉行恢復。得旨嘉獎。下部議叙。○福建總督姚啟聖疏報。臣等見水師提督萬正色。孤軍獨下。於二月二十三日。同總兵趙得壽。黃大來。平南將軍賴塔。分統水陸官兵。七路進剿。將弁俱各奮勇。攻破陳州。馬州。灣腰山。觀音山。展旗等寨。二十九處。殺賊甚衆。下部議叙。○乙巳。吏部題。故三等阿思哈尼哈番克什克圖無子。應將原立職。已雅爾圖之子滿都戶承襲。從之。○福建巡撫吳興祚疏報。二月二十六日。臣同寧海將軍喇哈達。總兵王英等。由同安

進剿逆賊。至兩洲灣尾等地方。宣諭偽將。獻城投降。隨分兵三路。徑渡廈門。逆賊潰敗。二十八日。進廈門城。安撫人民。即遣官兵。進取金門。得旨嘉獎。下部議叙。○丙午。命內閣學士佛倫。兵部督捕侍郎金鑑。督理湖南四川糧餉。○陞太常寺卿劉如漢。為大理寺卿。○勇畧將軍陝西提督趙良棟。疏辭雲南貴州總督。得旨。卿久鎮巖疆。勞績素著。簡督雲貴。正資料理。著祇遵成命。不必控辭。○丁未。萬壽節。上率諸王。貝勒。貝子。公。內大臣。大學士。都統。尚書。精奇尼哈番。侍衛等。詣太皇太后。皇太后宮行禮。停止朝賀筵宴。○遣官祭福陵。昭陵。孝陵。仁孝皇后。

孝昭皇后○遣官祭真武東嶽城隍之神○己酉。

上詣

太皇太后

皇太后宮問安○安遠靖寇大將軍多羅貝勒察尼疏報。是月十三日。我兵取辰龍關。抵辰州。賊潰遁。偽知府傅祖祿等。以城降。偽將軍楊有祿。周禎。楊寶蔭。祖述。舜等。各率兵投誠。綏遠將軍湖廣總督蔡毓榮亦疏報。復銅仁府。瀘溪。淑浦。麻陽。三縣。得旨嘉獎。下部議叙。○諭議政王大臣等。今楓木嶺。辰龍關。俱已恢復。四川。廣西。悉皆底定。雲貴不日可平。若行招撫。更可速定。雲貴人民。亦得早安其生。張起龍。本吳三桂屬下之人。宜使招撫雲貴。可賞其罪。捧敕前往。○壬子。

上詣

太皇太后

皇太后宮問安○勇畧將軍雲南貴州總督趙

良棟疏言。湖廣大兵。若作速前驅。賊自奔潰。請敕湖廣官兵。限以立取貴州。令廣西兵。一

路自泗城州。渡八答河。由安籠。出雲南。交水。一路自思恩府。渡八礙。青羊江。由廣南府。出雲南。維摩州。四川兵。一路自成都府。走黎雅。天全。招討司。過大渡河。即由瀘江。建昌。會川。金沙江。出雲南。武定府。一路自保寧府。下七星關。或走永寧。出烟方。堂堂可渡橋。并請敕各路將軍大臣。嚴督滿漢官兵。加意秣馬。川陝督撫等。迅備糧餉。湖廣廣西統兵將軍。速整軍旅。定期八月終。諸路齊進。直搗雲南。得旨。趙良棟。身在行間。熟悉地方情形。具疏入告。宜悉如所請。錄其疏。發湖廣廣西將軍大臣。視雲南可取。或賊內亂。有機可乘。毋俟定期。即便宜帥師直進。苟未有機。會其以趙良棟所奏。定期進兵。機宜詳加商酌。於何所約會齊舉。定議以聞。○癸丑。

上御弘德殿。諭講官張玉書等曰。人品邪正。固

在臣下。而鑑別全在人主。從來人心多偽。最為難知。張王書奏曰。古來大奸似忠。大詐似信。惟

聖明在上。自無遁情也。○諭督理川湖糧餉內閣學士佛倫。督捕侍郎金鉉曰。大兵進剿雲貴。務在安輯人民。撫綏苗蠻。其敕將軍以下諸臣。嚴禁官軍擄掠。○甲寅。

上御太和門視朝。文武陞轉各官謝恩。○諭兵部。曩者有事之時。所選發人員之中。馬山。偏圖。勞績屢著。軍務素嫻。四什六。亦堪任使。宜用之。邊疆重地。可發往將軍總督趙良棟軍前。若四川需用。即授為總兵官。否則令趙良棟帥之。隨征雲貴。即於要地任用。其標下官兵。願隨者攜往。準出征例。給與糧餉。此等人員。爾部詳察議奏。○免江南山陽等十一州縣。康熙十八年分水災額賦有差。○浙江總督李之芳疏報。海逆聯踪飄突。臣密飭定海舟師。操練精熟。遇警即行剿滅。二月十八日。

遊擊衛聖疇等。於孝順洋瞭有賊船。率領官兵血戰。沉賊船十四隻。燒燬五隻。陣斬偽叅將童耀等一十九員。擒獲偽官兵一百餘名。下部議叙。○丁巳。九卿會推江西按察使。左通政張可前。大理寺少卿張永祺。合詞保舉。福建副使道張仲舉。畫題時。廣西道御史唐朝彛曰。我閩人也。知張仲舉為官平常。不應保舉。九卿因不復保舉。都察院及六科給事中。合疏公忝。下吏部議。尋議覆。唐朝彛當九卿會推時。並無一言。畫題時。乃言張仲舉居官平常。又不明指其過。身為言官。殊負職掌。應革職。

上曰。廷推事關重大。或舉或否。原許各據所見。倘眾口附和。而無一人爭執。豈能無黨同之弊。今若將唐朝彛議處。將來推舉之人。或有徇私請託者。誰肯直言指摘耶。著從寬免。○戊午。

上詣

太皇太后宮問安○陞湖廣武昌道吳毓珍為湖北按察使司按察使。湖南糧儲道柯永昇為江西按察使司按察使○免山東淄川等十三州縣康熙十八年分旱災額賦有差○己未。

上詣

太皇太后

皇太后宮問安○三等阿思哈尼哈番達賴軍機革職。以其兄子達成襲替○巡視中城御

史洪之傑疏言。饑民自去冬流集京師。五城賑粥全活。且復屢寬賑限。至三月終停止。今為期已滿。請將五城賑餘銀米酌給遣回。得旨。今非麥熟之時。若資遣還鄉。仍恐失所。著添設賑廠於五城關廂外。再行賑粥兩月。俟麥收之時。聽其各回鄉里○諭議政王大臣等。四川與雲貴接壤。逆賊必乘間來犯。其檄將軍總督趙良棟。吳丹。鄂克濟哈等。當此進取之時。宜於各要路立營。深溝高壘。堅為守

禦

夏四月。庚申朔。享

太廟。

上親詣行禮○諭大學士等。陰陽不和。蓋由人事失當。思欲感通。必須處置得宜。頃者年復不登。饑民就食。多聚京師。故令增設各廠。煮糜救饑。今四方失業之民。因此而來者愈眾。反致流離道路。有轉徙溝壑之虞。且天氣漸向炎熱。老幼羸弱。聚之蒸為疾疫。轉益災沴。朕甚憂焉。作何設法。令其各歸原籍。仍令各該地方官拊循周恤。毋致流移失所。饑民內有疾疫者。令五城作何給以藥餌。醫治拯救。去歲三冬無雪。今春無雨。刑獄淹禁。恐有冤抑。應作何清理。乞食饑民。不許入裏城。今應否聽其出入。用兵地方。殉難諸臣卹典。原該事平定議。今應否即與舉行。以上數事。皆朕意念所及。爾等會同各部院。詳議具奏。此外如有應行應革。關切時務者。可各抒所見。一

并議奏。於是大學士會同六部都察院議奏。饑民若令各回原籍。給以路費。恐近處饑民聞風而至。則給費遣回之事。似不便行。應展限兩個月。仍煮粥賑濟。其饑民內有患病者。應令太醫院及五城醫生診視遣員管理。至於淹禁人犯。應令三法司再加詳審。有應寬釋者。即題請寬釋。其乞食饑民。若特傳諭令其入城。未免煩雜。若下令禁止。又恐將有事之人。一槩阻絕。似亦不必另議。至各處用兵地方官員殉難者。應令該部酌議。即行卹。從之。○辛酉。

上詣

太皇太后宮。問安。○諭刑部。去歲三冬無雪。今春雨澤愆期。天氣亢暘。農事可慮。朕念切民瘼。夙夜焦勞。或因刑獄淹禁。中有冤枉。致干天和。亦未可知。茲特遣明珠。杜立德。希福。李天馥等。會同三法司。將已結重案。逐一詳加審鞫。如有罪可矜疑者。即與察明事由。開列具

奏。務期情法允協。有枉必伸。以副朕欽恤獄讞至意。○調平南將軍正白旗蒙古都統賴塔。為滿洲都統。陞正藍旗蒙古副都統覺羅夸代。為護軍統領。○壬戌。

上御懋勤殿。講官進講畢。

上曰。觀尚書內古來君臣。無不交相勸勉。如此何憂天下不治。葉方藹奏曰。

皇上念及此。真四海蒼生之福。○諭吏部。兵部。自吳逆叛亂以來。各用兵地方文武官員。有矢志忠貞。克篤臣誼。抗賊不屈。捐軀殉難者。幽忠難泯。大節可風。彼時即宜錫以卹典。但以各處尚未蕩平。其中有情節未確。應行核實者。有正在招撫。未便遽行者。不得已而緩至今日。朕每念及。深為惻然。茲諸路會剿大勢底定。餘氛指日殲滅。其殉難各官。應加褒卹。以慰忠魂。爾等即詳察議奏。○陞光祿寺卿李廷松。為太常寺卿。○癸亥。

上詣

太皇太后

皇太后宮問安○陞鎮南將軍江寧副都統莽依圖為鑲白旗護軍統領○定遠平寇大將軍固山貝子章泰等疏報恭贊軍務都統穆占會同總督董衛國率官兵進取沅州擊敗偽將軍吳應麒等恢復沅州又遣官兵恢復靖州通道縣黎平府偽知府劉應偽副將周鼎等率偽文武官及土司等來降得旨嘉獎下部議叙○丙寅復設四川永寧總兵官員缺○丁卯諭吏部朕萬幾之暇留心經史雖遜志時敏夙夜孜孜而研究闡發良資講幄之功日講起居注各官俱以學行優長簡備顧問講解明晰奉職勤勞所纂講義典確精詳深裨治理侍讀學士張英供奉內廷日侍左右恪恭匪懈勤慎可嘉高士奇杜訥學問淹通居職勤慎供奉有年應授為翰林官兩部一併從優議叙具奏以後著益殫心職業佐助典學以副朕崇儒重道稽古右文至意

○戊辰

上詣

太皇太后宮問安○

上御懋勤殿講官進講畢

上曰律與例不容偏廢律有正條自應從律若無正條非比例何以定罪總之用律用例俱在得人○己巳

上御懋勤殿講官進講畢

上曰堯舜禹湯以來心法治法具在尚書爾等每日悉心講解朕孜孜典學雖不能媲古帝王而此心朝夕懋勉未嘗稍懈也庫勒納奏曰書經應講者已畢自明日始當以易經進講

上曰朕思經史俱關治理自宜進講爾等可進講易經將通鑑講章陸續送入令張英在內每晚進講通鑑○庚午

上詣

太皇太后

皇太后宮問安○諭禮部農務為國家之本。粒食乃兆姓所資。必雨暘時若。而後秋成可期。自去冬以來。雨雪未降。今時已入夏。甘霖尚稽。久旱傷麥。秋種未布。農事深為可虞。且失業之民。饑饉流移。尤堪憫惻。或因政治未協。致干

天和。朕用是夙夜靡寧。循省愆愆。茲當虔誠齋戒。躬詣

天壇。親行祈禱。為民請命。爾部即擇吉具儀來

奏○陞江西布政使司布政使王新命。為湖廣巡撫○旌表河南烈婦鄭慈妻李氏。給銀建坊如例○辛未。諭吏部。比來言官言事。鮮非無因。意所不欲。即行彈劾。倘遇勢要之人。縱知其貪穢。亦不肯糾劾。總由心術不正之故。若言官正。則外吏自不敢肆行貪婪矣○壬申。

上詣

太皇太后宮問安○平南將軍都統賴塔疏言

臣所部兵止二千。鎮守廣東全省。設遇警他援。兵力單弱。請增發二千人。

上諭康親王傑書。再撥兵一千。增遣將軍賴塔軍前。其餘或悉還京師。或酌量留之。先後還京。詳議以聞○癸酉。諭刑部。國家設立法制。原以禁暴止奸。安全良善。故律例繁簡。因時制宜。總期合於古帝王欽恤民命之意。向因人心滋偽。輕視法網。及強暴之徒。凌虐小民。故於定律之外。復嚴設條例。俾其畏而知警。免罹刑辟。乃近來犯法者多。而奸宄未見衰止。人命關係重大。朕心深用惻然。其定律之外。所有條例。如罪不至死。而新例議死。或情罪原輕。而新例過嚴者。應去應存。著九卿詹事科道。會同詳加酌定。確議具奏○丙子。

孝端文皇后忌辰。遣官祭

昭陵○

上躬詣

天壇禱雨。自西天門。步行至

壇祭畢。仍步出西天門。乘馬回宮。詣

太皇太后

皇太后宮。問安。○丁丑。雨。○戊寅。靖南王耿精忠。疏請陛見。得旨。耿精忠著來京。○己卯。翰林院掌院學士葉方藹。請頒發尚書講義。得旨。尚書紀載帝王道法。關切治理。朕留心研究。期於貫通。講幄諸臣。講解明晰。深於典學。有裨。著即刊刻頒行。○定遠平寇大將軍固山貝子章泰。疏報。恢復沅州之後。偽義勝將軍吳有蛟。偽叅將徐國貞。偽按察使謝龍等。并貴州黎平府龍里蠻彝長官司楊勝締等。各率偽官兵投誠。呈繳偽印劄。下部議叙。○奮威將軍平涼提督王進寶。以疾求罷。命回固原任調理。標下官兵。著伊子王用予。暫行統領。駐扎保寧。進剿雲貴之時。隨征前進。○庚辰。

上詣

太皇太后

皇太后宮。問安。○諭戶部。前差爾部侍郎薩穆哈。賑濟直隸饑民。僅至春麥收成之時停止。今聞春麥已枯。秋成難保。其間災重地方。麥既無望。饑民何以聊生。可憫殊甚。仍著薩穆哈等。前往賑濟。直接秋收。勿令災黎。有失生理。○以纂修

玉牒告成。賜總裁輔國公都統蘇努等。及纂修官侍讀學士達岱等。銀幣有差。○兵部議覆。奮威將軍平涼提督王進寶。疏言。見在恢復重慶。所有招撫偽總兵路之嵩。江有倉。偽將軍楊來嘉等。望風向化。繳有印劄。應否議叙。查恢復重慶。係逆賊投順之後。非係攻克。應無庸議。至其傾心歸誠。情有可矜。應行令該將軍酌量給劄。令其効力。得旨。路之嵩。江有倉。楊來嘉。俱著來京。引見。酌用。○壬午。定遠平寇大將軍固山貝子章泰。疏言。留守武岡州。每佐領驍騎二人。有奇。已選其中有馬者。先令赴大將軍簡親王喇布軍前。又自沅州。

撥每佐領護軍二人。驍騎三人。亦選有馬者。及總兵官趙應奎。并其標兵三千餘人。俱令都統夸札。率之前往。馬瘦及無馬者。見留臣軍。候旨調遣。

上諭。今大將軍貝勒貝子。大兵俱抵沅州。總計兵數。每佐領二十人有奇。又總督董衛國。蔡毓榮。提督趙賴。桑峨。周卜世等兵甚多。皆由鎮遠一路。進取貴州。值此廣需糧餉之際。大將軍貝勒貝子等。於前發兵內。視無馬不能行者。遣每佐領若干人。還京。率滿洲兵。每佐領若干。綠旗兵若干。進取雲貴。集議速奏。遇有機會。仍進發無悞。○調福建同安總兵官李承恩。為陝西延綏總兵官。以勇畧將軍趙良棟子廕生趙弘燦。為陝西寧夏總兵官。○甲申。

上幸西山一帶觀禾。回宮。○乙酉。

上詣

太皇太后宮。問安。○陞鴻臚寺少卿宋文運。為

光祿寺卿。○戊子。福建水師提督萬正色疏言。閩省之患。海甚於山。防守之宜。水重於陸。海澄。廈門。浯嶼。金門。圍頭。海壇。平海。定海。烽火門。日湖。獺窟。水寧。銅山。南澳等十四處。或孤懸海上。或濱海要衝。若以兵三萬人。設鎮分防。不時巡緝。則賊不能肆犯。我兵得以乘機滅寇矣。

上諭。海防設兵。所關最要。令兵部侍郎溫代前往。會同尚書介山。侍郎吳努春。及總督巡撫提督。親詣諸處。詳閱定議。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之八十九

實錄卷八十九

十五

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十

監修總裁官光祿大夫太保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保無太子太傅保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍無理戶部尚書事務加五級又加一級臣舒赫德錫

總裁官光祿大夫文華殿大學士兼吏部尚書臣朱軾等奉

敕修

康熙十九年庚申五月己丑朔

實錄卷九十

上詣

太皇太后

皇太后宮問安○湖廣陣亡正藍旗阿達哈哈

番圖赫德鑲白旗驍騎校珍特喪至遣一等

侍衛鄂七爾羅奇往奠之○庚寅雲南巡撫

伊闢奏請將隨行人員坐名題補

上諭大學士等曰此等坐名隨行人員果堪用

者亦復何害乃一時倉卒奏請往往不能盡

當如知府知縣等官俱將此輩補授徒悞地

方。此後坐名題補各員。槩為停止。吏部仍照例銓補。○諭吏部等衙門。致治安民之道。首在懲戒貪蠹。嚴禁科派。而後積弊可清。閭閻不擾。近見街道衙門蠹役。詐索害民。又聞提督步兵衙門。五城司坊。街道巡捕營等衙門。各官不能潔已奉公。恪遵法紀。縱容衙役。朘削小民。或沿習陋規。科斂行戶。或借端挾詐。官役分肥。肆意橫行。無辜受害。種種弊端。深可痛恨。向來雖經嚴禁。定有處分之例。但恐小民未能悉知。仍被奸徒擾害。應再加嚴飭。務令家喻戶曉。以副朕安全生民至意。○辛卯。

實錄卷九十一

二

仁孝皇后忌辰。遣官致祭。○壬辰。命甘肅巡撫自鞏昌移駐蘭州。○吏部遵諭。議叙日講官起居注官。得旨。翰林院掌院學士葉方藹。加禮部尚書銜。詹事府詹事沈荃。加禮部侍郎銜。侍讀學士蔣弘道。侍講學士崔蔚林。嚴我斯。加詹事府詹事銜。侍講董訥。王鴻緒。加侍

讀學士銜。侍讀學士張英。授為翰林院學士。兼禮部侍郎。內閣中書高士奇。授為翰林院侍講。食原品。州同俸。杜訥。授為翰林院編修。左春坊左庶子張玉書。加詹事府詹事銜。翰林院學士庫勒納。詹事府詹事格爾古德。侍讀學士牛紐。常書侍講學士朱馬泰。侍讀阿哈達。俱於見任內。各加一級。○癸巳。

上詣

太皇太后

實錄卷九十二

三

皇太后宮問安。○延綏總兵官李承恩。陛見。上諭之曰。近來綠旗兵丁。有名無實者甚多。爾歷外任三十餘年。皆所素知。應加意詳察。榆林。乃邊陲要地。爾當整頓兵馬。固守地方。撫綏兵民。互相輯睦。以副朕委任之意。○乙未。諭大學士等。嗣後投誠官員。不必令隨大兵進剿。督撫提督。酌遣來京候缺。叙用。○丙申。先是。令江寧將軍額楚。帥師還江寧。至是。額楚疏報。馬承蔭叛於柳州。將軍莽依圖等率

大兵進剿。今聞賊將何繼祖。王弘勳等。兩路來侵。

上命額楚帥師暫守南寧。俟莽依圖等平定柳州。仍還駐江寧。○丁酉。

上詣

太皇太后宮問安。○予故奉國將軍哈爾薩祭一次。○戊戌。戶部議覆郎中蘇赫臣等疏言。重慶大兵需用糧米。應令該撫及江水未漲時運送。得旨。糧餉關係軍機。不可少有貽誤。宜令沿途各官速行運送。怠玩遲悞者。即以軍法從事。○予故直隸巡撫金世德祭葬。謚清惠。○己亥。

上詣

太皇太后

皇太后宮問安。○庚子。安遠靖寇大將軍多羅貝勒察尼疏言。臣兵自常德進辰沅。沿途靈雨泥濘。馬匹疲乏者甚多。且糧餉迄今猶未運致。

上諭貝勒察尼。帥師暫屯沅州。如將軍趙良棟

所奏。約齊舉行。若此際有可進雲貴之機。仍

毋俟定期。酌量進發。其糧餉稽悞之故。令巡

撫韓世琦。察明具奏。○陞浙江按察使王日

藻。為江西布政使司布政使。○辛丑。遣官祭

關聖帝君。○諭兵部。移文各路大將軍。督撫

提鎮等。凡有平定雲貴恢復城池者。俱令察

訪吳三桂與達賴喇嘛相通書札。隨得隨繳。

○陞正藍旗叅領尚依圖。為江寧副都統。○

刑部右侍郎馮甦疏言。請遣能員赴打箭爐

地方。偵賊情形。仍移書達賴喇嘛。令勿納殘

賊入其境內。議政王大臣等會議。達賴喇嘛

處。當吳三桂叛時。已經遣諭。無庸再遣。打箭

爐地方。應移文四川總督。令選賢能人員。不

時偵探防禦。

上諭。打箭爐等處地方。應選堪用之員。如拉篤

祐其人者。遣往彼地。不時偵探。○癸卯。諭大

學士等。向以亢陽。齋居虔禱。雖雨澤薄降。四

野田疇尚未霑足。今茲不雨。為時又久。旱魃為災。朕甚懼焉。意者政事之失宜者多歟。不然。天心仁愛下民。何其宜雨而久不雨也。日者以政理之故。勤求言矣。而言者文繁無益。其集九卿詹事科道掌印不掌印各官。問今有何事當行。何事當革。悉意以陳。毋有所隱。於是大學士傳諭旨。同九卿等入見。戶部尚書伊桑阿等各以所見陳奏。

上曰。爾等所奏。尚屬膚詞。倘大小臣工。俱能秉公奉法。則天下何難治平。凡在朕前所言。似乎公正。退而種種行私。徇情作弊。爾等撫衷自問。能無內愧乎。至於科道官。瞻顧私情。罔克糾舉。內外官員。恣行無忌。職此之由。爾等意中。若尚有未盡事宜。可一并親寫來奏。諸臣出。復命大學士持

上諭遍諭諸臣曰。朝廷致治。惟在端本澄源。臣子服官。首宜奉公杜弊。大臣為小臣之表率。京官乃外吏之觀型。大法則小廉。源清則流

潔。此從來不易之理。如大臣果能精白乃心。恪遵法紀。勤修職業。公爾忘私。小臣自有所顧畏。不敢妄行。在外督撫各官。自應慎守功令。潔己愛民。乃大臣等。每自謂清正無私。粉飾空言。至其所行。徃徃營私作弊。有玷官方。深負委任之意。科道係耳目之官。凡有弊端。自當據實叅奏。且居處甚近。如此情弊。豈無見聞。乃瞻徇情面。緘默不言。即有條奏。多係繁文。言官職掌。殊為未盡。如肯從公糾舉。孰敢恣行無忌。朕以為目今之弊。莫大於此。近因天氣亢旱。朕夙夜焦思。念慮所及。無不舉行。感格之道。猶恐未盡。故特召爾等。各面陳所見。因宣諭朕意。令爾等知之。○陞光祿寺卿宋文運。為順天府府尹。○甲辰。調福建興化總兵官高鼎。為四川松潘總兵官。○平南將軍都統賴塔疏報。四月二十一日。臣會同提督侯襲爵。率領滿漢官兵。大敗海寇於潮州府之大濠堡。磊石等處地方。下部議叙。○

乙巳。定遠平寇大將軍固山貝子章泰等疏報。沅州既克。偽將軍吳有爵崔世祿等率眾降。

上命遣送來京。○山東巡撫施維翰疏報。河道總督靳輔丁憂。得旨。河工漕運。事關重大。見今工程未完。不便即准守制。俟工成之日。著靳輔自行題請。○丙午。奉命大將軍和碩康親王傑書疏報。平南將軍賴塔等遣發官兵。追剿海逆劉國軒等。於三月十二日克取銅山。焚燬賊巢。得旨嘉獎。下部議叙。○丁未。陞陝西督糧道教化新。為浙江按察使。司按察使。○奉命大將軍和碩康親王傑書疏報。寧海將軍喇哈達等陸續招撫到偽總兵楊祿張輝等大小偽官共二千五百餘員。兵丁二萬五千九百餘名。下部議叙。○戊申。

上詣

太皇太后

皇太后宮。問安。○免江西南昌寧州等五十六

州縣。并南昌等十衛所。康熙十八年分旱災額賦有差。○己酉。九卿等議覆。都察院左副都御史郝浴疏言。死罪減等者。請照例發遣烏喇。其餘軍流罪犯。應照律審擬。免發奉天等處。應如所請。從之。○予故三等阿思哈尼哈番古魯祭葬如例。○戶部題。山海關往來貿易者頗多。應設官抽分。以佐軍餉。其收稅官。應令滿洲部員輪差。從之。○癸丑。夏至。祭地於

方澤。

上親詣行禮。○

上詣

太皇太后

皇太后宮。問安。○甲寅。雲南巡撫伊闕陛辭。

上諭之曰。朕觀文武調和。則諸事易於就理。文武不和。則諸事掣肘。難以徑行。爾至任所。宜善加調協。文武一心。撫綏凋敝之民。務俾得所。庶不負朕倚毗之意也。○遣理藩院郎中

詹壁拉往邊地偵探。

上諭之曰。爾往駐松潘等處。凡有聞見。當如拉篤祐。不時奏報。仍將遣爾前往之故。明諭厄魯特達賴巴圖爾。台吉知之。然達賴巴圖爾。台吉等消息。亦應密探。若得賊寇交通書信。即以奏聞。并探往來貿易者。凡奉使邊陲。潛行詞察。良非細故。宜慎自防護。常近大軍左右。毋忽。○丁巳。綏遠將軍湖廣總督蔡毓榮疏言。原任宜都遊擊嚴弘。身被賊擒。堅拒偽職。乘間來歸。應行議叙。得旨。嚴弘當逆賊初叛時。獨守宜都。後被賊擒。不受偽職。保守原受敕書。乘間來歸。忠貞可嘉。著從優議叙。尋部議。應加都督同知。即以總兵官補用。從之。○調山西太原總兵官林本真。為浙江黃巖總兵官。○贈福建殉難福寧總兵官左都督吳萬福。太子少保。給卹銀。予祭葬。加祭一次。謚忠愍。廕子弟一人。以守備用。浙江黃巖總兵官阿爾泰。給卹銀。予祭葬。廕子弟一人。以

守備用。福州府知府王之儀。太僕寺卿。建寧府同知俞三畏。按察使司副使。侯官縣知縣。劉嘉猷。尤溪縣知縣。李塤。俱按察使司僉事。各予祭葬。廕一子入監讀書。福州左營千總。廖有功。給卹銀。廕子弟一人。以衛千總用。六月。戊午朔。

上詣

太皇太后宮。問安。○安遠靖寇大將軍多羅貝勒。察尼等疏言。臣等合計兩軍。共前鋒四百有奇。護軍驍騎。每佐領二十餘人。內留前鋒三百人。每佐領護軍六人。驍騎九人。進取雲貴。餘悉還京師。

上命貝子章泰。帥師進征。貝勒察尼。察滿兵出征在先。効力勞苦。及無馬者。帥之還京。○辛酉。陞叅領盧揚祖。為鑲白旗漢軍副都統。○壬戌。

上詣

太皇太后宮。問安。○

上御太和門視朝。文武陞轉各官謝恩。次厄魯特喀爾喀進貢使臣等行禮。○以輔國將軍喇克達為正藍旗蒙古副都統。○癸亥。予永興陣亡正藍旗前鋒叅領拖沙喇哈番門都祭葬如例。○兵部議覆提督許貞疏言。請以南昌水師兵一千名。隸其標下。應不准行。得旨。水師營兵。歸提督標下。未免糜費錢糧。前以尚之孝標兵。補江西各營老弱缺數。可於此內撥一千人與許貞。缺少不必再補。如此則錢糧不至糜費。亦於許貞有益。○勇畧將軍雲南貴州總督趙良棟疏報。四月初八日。賊以勁卒犯永寧。官兵鏖戰彌日。賊猶不却。投誠總兵官李芳述等奮勇衝擊。斬偽總兵毛有貴等。賊始大敗逃遁。陣斬千餘人。下部議叙。○趙良棟又疏言。投誠總兵官李芳述前既率眾來降。今復固守永寧。不為賊誘。請破格加恩。

上命李芳述為隨征總兵官。隸趙良棟標下。隨

征効力。○遣官齎敕往福建封天妃為護國庇民妙靈昭應弘仁普濟天妃。○甲子。

上詣

太皇太后宮問安。○諭恪純長公主。公主被反叛所累。屢年困頓。朕每念及。未嘗不為惻然。不意深染時症。遣乳媪暨親近侍衛往視及回。轉奏公主之語。不勝感歎。又聞病勢危篤。即命該部院衙門。將服飾執事等項。星夜製辦。今公主體中大愈。將此各項盡送公主處。以示朕惓惓注念之意。○予故三等阿思哈尼哈番張時薦祭葬如例。○綏遠將軍湖廣總督蔡毓榮疏報。投誠偽總兵李者祿會同隨征總兵官鄧秉志等攻取思南府。與賊兵酣戰兩晝夜。斬賊一千餘人。恢復府城。得旨嘉獎。下部議叙。○廣東廣西總督金光祖疏報。官兵進取武宣縣。逆賊范齊韓等宵遁。黃明等猶據縣城抗拒。水師總兵官譚昇等奮擊大破之。斬獲無算。恢復縣城。得旨嘉獎。下

部議叙○丙寅。

上詣

太皇太后

皇太后宮問安○因修理

乾清宮。是日。

上移駐瀛臺○予永興陣亡正藍旗叅贊護軍統領三等阿達哈哈番哈克山祭葬。謚武毅○丁卯。先是以雲南貴州提督桑峨總兵官周邦寧等自常德澧州退還。

上命大將軍察取供詞。至是。安遠靖寇大將軍多羅貝勒察尼取供具奏。兵部議覆桑峨職任總統。調度全省官兵。一聞賊警。不即直赴常德。以扼要害。乃遷延日久。始自荊州進發。致常德為賊所據。又不入守澧州。但於城外駐營六日。復致澧州被陷。且稱彝陵一路。賊警甚急。託故引還。應行革職。周邦寧偕桑峨赴常德時。託病留澧州。迨桑峨還。自常德又不入澧州防守。即同桑峨奔還。應削去所加

五級。仍降一級調用。得旨。桑峨革職。周邦寧削去所加五級。仍降一級。俱留原任。戴罪圖功○福建巡撫吳興祚疏報。臺灣逆黨劉天福率眾投誠。下部知之○戊辰。黃巖總兵官林本直謝恩入見。

上諭曰。黃巖要鎮。今海賊雖已敗遁。恐其出沒不常。又沿海之民。或有奸宄勾連外寇。為害匪細。尤宜加意嚴防。林本直奏曰。

聖諭明見萬里。沿海之地。必精練水師。方可成功。臣西北人。恐未深諳。

上曰。自古用將。何分南北。惟在得人耳。且靖寇本以衛民。攘外必先寧內。為將之道。尤在得民心而已○授故奉國將軍哈爾薩子札海為奉恩將軍○以故三等阿思哈尼哈番張時薦子張國柱襲職○以戶部郎中田雯為江南按察使司僉事。提調學政○辛未。諭大學士等。直隸各省。銅鐵紅衣大小礮甚多。或遣部院堂官。賢能司官。逐省察明大小礮數。

丈尺觔兩酌量每省應用者。以鐵礮存留。其銅礮及所餘鐵礮堪用者俱取至京。不堪用鐵礮悉令銷燬。可令議政王大臣等會議以聞。尋議政王大臣等議覆。應遣官分省察驗。並定嚴禁私鑄火礮之例。從之。○壬申。福建總督姚啟聖疏報。臺灣偽將軍朱天貴率領偽官兵丁船隻投誠。下部議叙。○予陣亡鑲黃旗拖沙喇哈番音達渾祭葬如例。○甲戌。奉命大將軍和碩康親王傑書疏報。偽將軍江機等聚眾恃險。通連海寇。為福建江西浙江三省之害已久。今福建巡撫吳興祚等宣示招撫。江機等率領偽官一千一百三十八員兵丁四萬三千六百二十九名投誠。各分別歸農補伍。下部議叙。○丙子。廣東巡撫金僑疏報。逆賊流言欲分調尚之信所部兵往雲南安置各營。於是藩兵八千人聞之盡恐。五月十三日夜遂鼓譟叛。營遁歸。上命將軍賴塔侍郎宜昌阿總督金光祖巡撫

金僑都統王國棟等設策安撫。逃兵發回廣西。○丁丑。先是。

上軫念饑民就食京師者眾。已命五城粥廠展限兩月。至是期滿。

上念饑民冒暑枵腹難以回籍。又展限三月。復遣太醫院醫生三十員分治五城。抱病饑民以全活之。○以故一等精奇尼哈番兼一拖沙喇哈番艾音塔睦子拱圖襲職。○和碩安親王岳樂疏言。故平南王尚可喜妻舒氏。胡氏首告孽子尚之信。罪逆當誅。乞傳諭官吏密圖擒拏。請旨正法。得旨。尚之信並原告干証著侍郎宜昌阿等押解來京質審。○戊寅。上詣

太皇太后宮問安。○以故一等精奇尼哈番董學禮子董永蕃襲職。○陞右通政崔澄為光祿寺卿。○庚辰。鎮南將軍莽依圖疏報。大兵進剿柳州。路經賓州陶登地方。有賊二萬突來侵犯。都統希福副都統馬世泰率兵攻擊。

逆賊大敗。拋棄盔甲器械走入深山。下部議叙。○揚威大將軍和碩簡親王喇布疏報。官兵恢復雜容縣。得旨嘉獎。下部議叙。○以候補總兵官嚴弘為湖廣彝陵總兵官。○戶部題前以大兵征剿逆賊。將湖廣漕糧一十六萬三千餘石。俱留供應。又將江南浙江二省漕糧五十四萬餘石。改折充餉。今京城支放數多。各省運米數少。相應將康熙十九年分湖廣漕糧起運。及江南浙江二省改折。仍徵本色。亦照舊起運。從之。○廣東巡撫金偁疏報。委署虎門副將張瑜進剿逆賊謝昌等。五月十二日。於大澳海面。分兵三路。與賊船三百餘接戰。我兵奮勇衝擊。賊敗走。即乘夜窮追。十三日早。至風頭港。又有賊船數百。我兵復擊敗之。生擒偽將軍洪元懿。燬賊船二百餘。斬賊二千餘級。溺死者萬餘人。謝昌等由外洋遠遁。下部議叙。○福建總督姚啟聖疏言。臣前任藩司時。親抵粵東。招撫征逆將軍

劉進忠等。獨有偽總兵馬興龍。從中梗阻。臣多方勸諭。方肯隨眾就撫。詎意受撫之後。密挈眷口。復叛入海。臣偵馬興龍逆踪往來。銅山南澳等處。臣密遣總兵官朱光祖。招撫偽將軍朱天貴等。諭以如遇馬興龍。用心縻繫。今朱天貴已暗拘馬興龍父子及弟五人。沉死海中。各偽鎮始隨朱天貴投誠。朱天貴於未經投誠之先。而能誅已撫復叛之賊。實心報國。功不可泯。下部議叙。○辛巳。以正白旗蒙古副都統伊巴漢為前鋒統領。○壬午。刑部題。兵丁陳德擅殺雷元伯。應斬監候。上諭曰。凡大兵經過之地。將弁宜嚴加約束。務令秋毫無犯。屢經降旨申飭。今兵丁陳德任意逗遛。擾害小民。殺死人命。該管將弁所司何事。爾等不行嚴察。竟置不議。殊屬未合。可一并嚴加議處。尋議。該管官夸闌大馬順德署副都統馬爾齊哈。約束不嚴。各擬降罰。得旨。馬爾齊哈等。縱所管兵丁。擾害地方。殺傷

官兵深為可惡。嗣後大兵陸續回京。若不嚴加懲創。則將卒無所警戒。所議尚輕。馬爾齊哈著降四級。仍留叅領。馬順德著革職。○揚威大將軍和碩簡親王喇布疏報。臣與將軍莽依圖。總督金光祖等。率滿漢官兵。分路進剿。馬承蔭五月初四日。金光祖統兵敗賊於武宣。遂復縣城。初八日。莽依圖兵大敗賊於陶登。乘勝前進。遂定象州。臣兵於初四日至雒容縣。即進取柳州。十七日。馬承蔭率偽文武官弁六百六十餘員。兵七千三百餘名。詣軍門降。柳州平。得旨嘉獎。下部議叙。○奉命大將軍和碩康親王傑書疏言。今當需餉之時。在閩大兵。理應全撤。但福建投誠之人甚多。廈門金門諸處。新經恢復。人心未定。宜留大兵一千二百人。駐守福州。六百人。駐守泉州。一千二百人。駐守漳州。餘兵。臣與叅贊副都統禪布。先率入京。至於沿海綠旗官兵。設防之外。孰宜先撤。孰宜鎮守。應令尚書介山。

侍郎吳努春溫代等會同總督巡撫提督議覆。從之。○甲申。

上以御書大軸。賜大學士索額圖。勒德洪明珠。李蔚。杜立德。馮溥。諭曰。朕萬幾餘暇。留心經史。時取古人墨蹟臨摹。雖好慕不衰。未窺其堂奧。歲月既深。偶成卷軸。卿等佐理勤勞。朝夕問對。因思古之君臣。美惡皆可相勸。故以平日所書者。賜卿。方將勉所未逮。非謂書法已工也。卿等其知朕意。又以

御書卷軸。賜學士庫勒納。葉方藹。詹事格。爾古德。沈荃。侍讀學士牛紐。常書崔蔚林。蔣弘道。侍講學士張玉書。嚴我斯。侍講董訥。王鴻緒。各一。諭曰。爾等日侍講筵。夙夜匪懈。啟沃之暇。每以朕書為請。朕萬幾餘閒。研精典籍。間取古人墨蹟臨摹。爾等既為文學侍從之臣。即有成就德業之責。故因所請。輒以頒賜。朕意其悉之。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十

實錄卷之九十

二十一

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十一

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十九年庚申秋七月戊子朔享

實錄卷九十一

一

太廟

上親詣行禮○辛卯諭兵部初馬承蔭及所部

官兵背叛蹂躪疆土擾掠生民罪惡已極後

見湖南平定廣西恢復窮迫請降朕欲生民

早獲寧息悉貫前罪封以伯爵授為將軍仍

令管兵標員亦分營補用及大兵規取雲貴

無故背恩復叛致誤征討大事今因兵敗勢

蹙復窘急來歸令內閣學士薩慕哈速往撥

滿漢官兵押解馬承蔭及標下守備以上官

來京。其標兵令督撫提鎮等分隸各營汰其老弱。猶兵亦宜散置。切勿令其黨聚。廣東諸處被難人民。詳察遣還故土。提督哲爾肯可屯駐柳州。○浙江總督李之芳疏報。偽定北將軍劉天福率偽左都督劉祖漢等。偽官一百八十員。兵二千餘名投誠。下部知之。○壬辰。

上詣

太皇太后

實錄卷九十一

皇太后宮問安。○甲午。四川道御史張志棟疏言。各部主事。不係正途出身者。請令各部堂官保舉。方許陞轉。九卿議不准行。

上曰。各部主事。日後皆陞道府。與其俟為道府後。令督撫保舉。何如為主事時。即令堂官保舉之為愈耶。今後應令不係正途出身之主事。歷俸三年。果能勝任。該衙門堂官保舉。方許陞轉。○吏部議覆。都察院左副都御史郝浴疏言。考選科道官。應將正途加捐者。仍照

例考選。其非正途出身之員。雖經保舉。止照常陞轉。不准考選。應如所請。從之。○乙未。旌表陝西節婦富平縣古氏。賈氏。華陰縣馬氏。雷氏。各給銀建坊如例。○陝西總督哈占疏言。秦餉由畧陽陽平運至保寧。應令四川督撫接應至敘州。又四川巡撫杭愛疏言。四川官員。部選者俱未蒞任。且民間無船。不能接運。疏入。得旨。蜀撫既以官少船缺為言。仍令陝西總督哈占巡撫鄂愷。甘肅巡撫巴錫。即以畧陽糧艘運官。竟運至敘州。四川督撫速趣空船使回。大兵進剿雲貴。需餉至急。既已尅期進取。輓運無過今秋。川陝督撫。自宜殫心籌畫。勿誤軍需。乃妄分彼此。互相推諉。遲延至今。殊負職任。嗣後當同心商酌。不拘疆界。速為饋運。無誤進取。如仍推諉遲延。有失軍機。經管督撫以下各官。俱以軍法從事。○丙申。免山東益都等五縣。本年分電災額賦有差。○丁酉。先是都察院左都御史覺羅舒

恕以病還京。

上諭議政王大臣等曰。左都御史覺羅舒恕當進定廣西之時。奏稱病劇。乞還肇慶調治。朕以舒恕身為將軍。病篤必實。令其暫回肇慶。後又以敕印。私繳將軍莽依圖。莽依圖代為題請。朕以舒恕之病危篤。欲其生還。召回京師。今觀舒恕全無病狀。神色如故。舒恕前在高州。奔回肇慶。復自廣州敗還。不據韶州。南雄諸要地。竟還贛州。江西全省。因而震動。及在江西。又復擄掠。大擾百姓。以巡撫金雋之言。盡洩於平南王。又恐嚇將軍巡撫傅弘烈云。爾若題請進兵。我必殺爾。舒恕身為將軍。負如許重罪。不思戮力以贖罪愆。反詐稱患病。凡為將帥者。倘皆如此。肆行欺罔。軍法何以得申。舒恕應羈候宗人府。俟旋師之日。嚴察議奏。至是。革舒恕左都御史。佐領及世職。○戊戌。贈福建殉難浙閩總督范承謨。太子少保兵部尚書。予祭葬。加祭一次。謚忠貞。廕

一子入監讀書。巡海道陳啟泰。通政使司通政使。並妻劉氏。予祭葬。廕一子入監讀書。○己亥。貴州巡撫楊雍建疏言。撫標見有二營。請再設一營。以備戰撫。部議不准行。得旨。貴州係新經恢復之地。最為緊要。應准該撫所請。設立三營。後不為例。○庚子。

上詣

太皇太后

皇太后宮。問安。○旌表安徽節婦。桐城縣吳氏。

貴池縣章氏。青陽縣陳氏。建德縣黃氏。當塗

縣張氏。楊氏。江氏。宿州吳氏。烈婦。舒城縣楊

氏。各給銀建坊如例。○壬寅。中元節。遣官祭

永陵。

福陵。

昭陵。

孝陵。

仁孝皇后。

孝昭皇后。○甲辰。吏部議覆。都察院左副都御

史郝浴疏言各部院司官賢否不一請令各堂官留心查驗每歲終各舉劾一人舉者照薦舉註冊劾者照例處分以昭懲勸應如所請從之○兵部議覆奉天將軍安珠護疏言招徠居住金州百姓五百七十六丁內編五十副甲令五丁幫一甲各設馬一匹給與弓箭再編五十副甲令四丁幫一甲設立標鎗鳥鎗不給月糧但免其輸納錢糧其金州巡檢應行裁去改為金州營設立守備千總等官應如所請從之○兵部題遣本部郎中喀霓布往福建料理凱旋官兵夫船事務得旨朕聞往來官兵所用船及人夫皆借端勒索往往額外多派折價入已沿途生事又輒將緯夫肆行鞭撻民甚苦之各該管將軍不加禁制任其妄行地方官復行苛斂希圖分取互相隱飾種種私弊甚為可惡此後合行嚴禁如仍前所為事發之日從重治罪又諭曰此等事科道雖有風聞因無實據未便題參

地方督撫又以官兵勞苦不行劾奏以致如此自後事發該將軍及地方官從重治罪不宥○四川總督楊茂勲疏報原石柱宣慰司馬萬年酉陽宣慰司冉永沛投誠下部知之○乙巳陞吏部左侍郎折爾肯為都察院左都御史○丙午

上詣

太皇太后

皇太后宮問安○贈廣西殉難巡撫馬雄鎮太子少保兵部尚書並妻李氏予祭葬加祭一次謚文毅廕一子入監讀書○戊申免直隸廣平縣康熙十八年分水災額賦有差○先是建威將軍護軍統領吳丹勇畧將軍雲南貴州總督趙良棟等疏言四川兩路進取雲貴請調綠旗官兵隨征

上諭趙良棟曾任陝西提督吳丹等在秦亦久地勢軍機知之甚悉綠旗兵作何調發留守公同詳議一面調遣一面奏聞已而吳丹等

覆秦。雲南乃逆賊根本。彼必死守。進征官兵。不可單弱。永寧建昌兩路。各得兵二萬。方克有濟。除四川見兵外。其不足之數。已移文大將軍公圖海。總督哈占。速於各路調足發往。從之。○已酉。先是。

上命寧南靖寇大將軍多羅順承郡王勒爾錦率兵赴重慶。勒爾錦不能前進。半途自返。至是具疏自劾。請解大將軍任。發往沅州軍前効力。得旨。勒爾錦既託故還荊州。又奏請發沅州効力。不合。其攜大將軍敕印。率所屬護衛各官。王府佐領兵。同沅州官兵。還京。○以一等侍衛郎談為正白旗蒙古副都統。○予故正黃旗都統一等精奇尼哈番祖永烈祭葬如例。○庚戌。調戶部左侍郎薩穆哈為吏部左侍郎。○壬子。皇子允祐生。○靖逆將軍甘肅提督侯張勇疏言。將軍趙良棟請調涼州鎮兵三千赴四川。今將軍王進寶已還固原治疾。請令提督孫思克還兵駐甘肅涼州。

鎮守河西。臣率本標兵三千。往守四川。庶不誤進剿。

上諭。秦省乃邊疆要地。將軍侯張勇。毋往四川。仍防守秦中。今進取雲南期迫。若調沿邊之兵。恐致有誤。張勇簡標兵三千。令賢能官率之。速赴四川。○癸丑。予故一等精奇尼哈番內大臣哈岱祭葬。謚勤壯。○廣東廣西總督金光祖疏言。尚之信藩下鼓譟逃亡之兵。聚衆妄行。臣見與賊對壘。請發兵助剿。

上諭。近將軍賴塔都統王國棟報遣總兵官甯天祚等率兵剿撫鼓譟之兵。若甯天祚等力不能剿。著將軍賴塔巡撫金僞提督侯襲爵都統王國棟公同酌議。增兵速行剿撫。以靖疆圉。○乙卯。

上詣

太皇太后宮問安。○轉戶部右侍郎達都為左侍郎。調盛京工部侍郎覺羅沙賴為戶部右侍郎。

八月丁巳朔遣大學士李蔚祭

先師孔子○敘招撫逆賊功加福建總督姚啟聖兵部尚書銜○廣東廣西總督金光祖疏言臣標都司李英妻蔣氏康熙十三年二月遭孫延齡叛被拘不辱服毒死部議與例不符不准賜卹

上特命給銀建坊旌表○予湖廣永興陣亡正白旗滿洲都統議政大臣一等伯宜理布祭葬加祭二次謚武壯○戊午祭

大社

大稷

上親詣行禮○

上詣

太皇太后

皇太后宮問安○已未戶部郎中鄂齊理奉差往盛京踏勘滿洲新開荒地事竣回奏

上曰爾往勘開荒田畝自何處起至何處止鄂齊理奏東至撫順西至山海關南至蓋州北

至開原皆經查勘

上曰田畝總數若干所收錢糧若干鄂齊理奏計田萬頃有奇徵收錢糧約僅有萬兩據將軍安珠護若將滿洲自開地畝盡撤入官恐難度日

上是之○庚申諭兵部廈門金門諸處悉設兵鎮守福建大兵宜量行撤還將軍喇哈達副都統馬思文率千人守福州副都統紀爾他布倭申巴圖魯率千人守漳州兩軍悉令喇哈達統轄餘兵一千令尚書介山侍郎吳努春率之回京○諭兵部閩省近海要區總督提督標下可各設五營兵五千人巡撫標下設二營兵一千五百人至通省防守兵依舊額留五萬一千七百五十人餘一萬九千九十五人俱行裁汰提督駐鎮海澄其銅山廈門諸處分設總兵官副將鎮守見在水師留二萬人其餘五千人亦行裁汰○以故二等精奇尼哈番綽爾濟姪寶柱襲職○以湖廣

永興陣亡一等伯宜理布子阿席坦襲爵○辛酉諭兵部臺灣澎湖暫停進兵令總督巡撫等招撫賊寇如有進取機宜仍令明晰具奏○壬戌

上詣

太皇太后宮問安○以原任工部侍郎廖旦為盛京工部侍郎○以江西陣亡三等阿思哈尼哈番愛音查子雅岱襲職○戶部議覆盛京戶部侍郎塞赫等疏言察過未墾荒地荒甸一百五十四萬七千六百餘晌內除皇莊喂馬打草地二萬二千四百餘晌仍有一百五十二萬五千二百餘晌應照侍郎塞赫等所題將此地畝註冊有民願開墾者州縣申報府尹給地耕種徵糧若旗人有力願墾者亦將人名地數呈部註冊若自京城移住官兵當差及安莊人等有將在京地畝退還交部願領盛京地畝者將彼處旗人墾過餘地并未墾地畝之內酌量撥給得旨盛京田地

關係旗丁民人生計最為緊要著兩部賢能司官二員前往會同奉天將軍副都統侍郎等及府尹將各處田地清丈明白務令旗民咸利設立邊界永安生業○戶部題三等阿思哈尼哈番三等侍衛恩克係承襲伯父喀藍圖之職乃並不祭掃喀藍圖墳塋又將部議給伊寡嫂養贍之一半俸銀俸米霸占不給將寡婦之披甲錢糧自行收用應將恩克三等侍衛革去將三等阿思哈尼哈番世職與喀藍圖親兄之孫拜音乂克襲職其家產歸併拜音乂克承受從之○甲子先是令大將軍固山貝子章泰等由沅州取貴州大將軍和碩簡親王喇布等由廣西取雲南將軍吳丹趙良棟會兵取遵義後亦進貴州至是章泰疏言貴州地方褊小難以得糧上諭吳丹等得遵義後毋經貴州即進取雲南大兵進剿之期定議奏聞後即檄湖廣廣西大將軍將軍等如期會舉○綏遠將軍湖廣

總督蔡毓榮疏言請特降敕旨招撫逆賊吳世璠。兵部議從其請。

上諭大學士等曰吳世璠為賊渠魁恃其險阻抗拒官兵殘害生民罪惡重大朕敕炳如日星豈可輕頒且賊勢迫自行納款如未至窮促雖招撫何益况前招撫賊將吳應麒胡國柱敕內俱有曉諭吳世璠歸誠之語蔡毓榮將此處並不揆度不圖早滅逆寇乃欲降敕招撫率意妄奏兵部竟准議行均屬不合此疏可付兵部令該部密行嚴飭○建威將軍吳丹疏言土司副將加都督僉事銜徐升耀往保寧招撫賊首王屏藩等遇害請加恩卹得旨徐升耀係土司官員乃克篤忠貞捐軀殉難深為可憫作何恩卹著從優議奏尋部議照陣亡總兵官例贈左都督俟克復雲南之日查伊子弟一人授以管土兵守備給卹銀從之○乙丑

太宗文皇帝忌辰遣官祭

昭陵○丁卯

太祖高皇帝忌辰遣官祭

福陵○戊辰

上詣

太皇太后宮問安○

上御經筵○福建總督姚啟聖疏報偽將軍楊彪即楊一豹率領偽官兵三萬一千餘員名投誠下部議敘○綏遠將軍湖廣總督蔡毓榮疏報逆賊馬承廕下偽總兵劉應龍擁眾駐扎梅寨地方貴州提督趙賴遣官招撫劉應龍親率所部呈繳偽札來降下部議敘○已巳諭兵部前因尚之信屬員張永祥等首尚之信諸不法事朕欲明其虛實故令尚之信來京非以張永祥所言皆實必欲治尚之信以法也平南藩下官兵本朝養四十餘年世受國恩最為深厚初無欲行解散之心且諸官兵尚屬尚之孝何嫌何疑以致逃避嗣後諸官兵宜常念國恩釋去嫌疑各保身

家妻子以副朕恩養保全至意。其令將軍賴塔侍郎宜昌阿等宣布朕意。咸使聞知。○諭兵部廣東省會地關重要。合計廣西見有大將軍簡親王兵。及將軍莽依圖兵。與都統馬緝等率往之兵。每佐領共有二十八人。今宜檄簡親王。令簡軍中精騎每佐領五人。俾副都統博濟率之。馳赴將軍賴塔軍。協守廣東省城。并檄馬緝速赴簡親王軍。至所撤福建兵。已就道者。令其來京。如未啟行。仍暫留福建。總漕帥顏保。見在江西吉安。令率所部速赴廣東。視南雄韶州。何地緊要。酌量駐鎮。以安輯人心。○以江南江常等府水災。遣都察院左副都御史科爾坤。前往察看。○庚午。以原任大學士巴泰。為正黃旗漢軍都統。○辛未。

上詣

太皇太后

皇太后宮問安○

上御太和門視朝。文武陞轉各官謝恩。次朝鮮國使臣等行禮。○厄魯特噶爾丹博碩克圖汗。遣使進貢。賞賚如例。○壬申。諭揚威大將軍和碩簡親王喇布。聞南寧距雲南邊界。路僅七站。向因逆賊尚之信。馬承廕背叛。或可輕進。今若輩皆已無濟。復何所瞻顧而遲延也。見在廣西滿兵。每佐領幾三十人。宜精選強壯有馬者。各十人。益以綠旗官兵。協力進剿。賊可立破矣。王其速圖之。進兵之時。令巴爾堪。哈爾哈齊。為夸蘭太。責以軍前報効。○癸酉。陞翰林院侍讀學士李光地。為內閣學士。兼禮部侍郎。○乙亥。朝鮮國王李煥。遣陪臣沈益顯等。為太和殿災。請安。及頒詔謝恩。進貢禮物。宴賚如例。○丁丑。

上詣

太皇太后宮問安○敘南漳等處殺賊功。加襄陽總兵官劉成龍等。為左都督。仍紀餘功二

次遊擊梁汝貴等二十八員。各加等議敘。有差。○戊寅。保和殿大學士索額圖。以病求罷。命於內大臣處上朝。○己卯。諭吏部。科道為耳目之官。關係最要。必選用得人。方能稱職。漢官皆由行取考選補授。惟滿官論俸敘陞。著吏部。都察院。將見在滿洲給事中。監察御史。會同選擇。堪用者。仍留原任。不稱職者。對品調於部院衙門用。○以隨征湖廣荊州左路總兵官蘭泗。為貴州安籠總兵官。湖廣均房總兵官肆什六。為貴州大定總兵官。湖廣荊州前路總兵官葛秉貞。為貴州黔西總兵官。○免直隸天津衛。本年分旱災額賦十之三。○江南總督阿席熙疏報。偽總兵張寅。於七月二十六日。率領官兵船隻。由長江直抵江寧。繳印割投誠。下部議敘。○庚辰。出征福建。鑲黃旗拖沙喇哈番前鋒叅領署前鋒統領吳木篤。創發故照陣亡例。贈前鋒統領。予祭葬。加祭一次。謚襄壯。○壬午。諭兵部。頃聞

鎮南將軍莽依圖。以疾卒於軍中。統兵重任。不可久懸。其以都統勒貝。代莽依圖為鎮南將軍。率師進討。○福建總督姚啟聖。以病求罷。慰留之。○山西巡撫圖克善。以病求罷。允之。○癸未。

上詣

太皇太后

皇太后宮問安。○甲申。先是吳三桂反。尚之信欲其父尚可喜從賊。迫之不已。尚可喜憤死。尚之信遂降賊。及其歸正。仍懷兩端。

上數命進兵潮州。湖南尚之信不行。永興危急。亦坐視不救。後雖出師。輒自引退。總兵官時應運。水師遊擊張瑜。出剿賊。尚之信俱密止之。令頓兵不進。及尚之信協剿廣西。復與尚之璋等謀。令以計調還廣州。冒兵餉擅殺無罪人。甚至希邀異數。毀訛乘輿。於是藩下人張允祥。張士選。來京告其諸不法事。尚之信母舒氏。胡氏。都統王國棟。廣東廣西總督金

光祖廣東巡撫金僞亦相繼疏列其罪。

上遣刑部侍郎宜昌阿與王國棟等謀密檄總督金光祖提督哲爾肯總兵官班際盛副都統金榜選等執之於武宣尚之信具疏辨。上不忍遽置於法命至京對簿尚之信謀益急令其弟尚之節等陰糾黨與誘殺王國棟欲為亂將軍賴塔急率兵圍之尚之節等就擒賴塔等訊鞫悉得其狀而舒氏胡氏復飾言尚之信無謀叛逆前告變疏皆王國棟等偽為也事聞下議政王大臣等集議於是議政王大臣等議覆尚之信當依謀反律毋母弟凡同謀者俱棄市家產籍沒其諸弟尚之孝尚之璋尚之隆等雖不同謀法應革職枷責得旨平南王尚可喜航海歸誠効力行間鎮守粵東著有勞績及吳逆叛堅守臣節不肯從逆為逆子尚之信所逼憤恨殞命朕每念及深為憫惻其妻舒氏胡氏從寬免死並免籍沒尚之孝尚之璋尚之隆等俱從寬免革

職枷責尚之信不忠不孝罪大惡極法應立斬姑念曾授親王從寬賜死其餘逆黨尚之節李天植等悉按律正法○吏部遵旨會議將滿洲六科滿洲漢軍監察御史等分別留任去任具奏得旨吏科給事中蘇拜等六員滿御史單壁等十五員漢軍御史祝鍾靈等二員俱著留任吏科給事中勒色里等五員滿御史哲備等八員漢軍御史郎廷秀等五員俱著革任餘如議○乙酉喀爾喀車臣汗遣使進九白年貢宴賚如例○丙戌秋分夕月於西郊遣理藩院尚書阿穆瑚珅行禮○諭侍郎宜昌阿等爾等所行事宜俱各得當甚為嘉悅朕意所及數事特行密諭一尚之信雖經犯法伊等妻子不可令卑賤小人凌辱應查明嚴禁遣人護送來京一廣東所有大市小市之利經藩下諸人霸占者無算可會同巡撫詳察應歸百姓者題明仍歸百姓則廣東人民得沾無窮之惠矣一聞藩下所屬

私市私稅。每歲所獲銀兩。不下數百萬。當盡充國賦。以濟軍需。一。各省商販人等。欲藉藩下行勢。投入者甚多。皆須查明。應斷出者。即行斷出。其不應斷出者。宜盡行遣發。來京勿致逃亡隱漏。一。尚之信等所有貲財。用充軍餉。已有諭旨。務須詳行稽查。毋致有遺漏侵剋等弊。

閏八月。丁亥朔。九卿議覆。河道總督靳輔疏。報。山陽清河等五縣。河水衝決隄岸。請將臣嚴加處分。應令靳輔將河隄決口。即行修築。俟工竣之日。遣大臣往閱。如修築不堅固。另行議處。從之。○免山東嘉祥縣本年分水災額賦十之二。○戊子。理藩院題。喀爾喀進貢前俱以車臣濟農為首。今扎薩克圖汗將車臣濟農革去。以額爾德尼濟農為首進貢。而達賴喇嘛所給文內。又並無額爾德尼濟農為首字樣。已諭令來使查明另奏。其所貢之物。應否收納。俟查明到日。再議具奏。得旨。外

藩蒙古頭目進貢。其物應否收納。理應即行議定。何必據達賴喇嘛文之有無。若必據此為証。似在我疆內之外藩蒙古。悉惟達賴喇嘛之言是聽矣。以後蒙古進物。應否收納。著該衙門即定議具奏。不必以達賴喇嘛之文為據。○己丑。勇畧將軍雲南貴州總督趙良棟疏。報。偽將軍海潮龍投誠。繳送劄印。欲聯絡迤西一帶。身任前驅。請敕諸路將軍大臣。速發官兵糧餉。以為接應。

上諭。今進取雲貴。為期已近。將軍吳丹。率兵進瀘州。取合江。仍兩路進取雲南。湖廣大將軍將軍。總督等。宜速取貴州。大將軍公圖海等。趣所調陝西兵往四川。海潮龍感戴國恩。率眾獻地。先機効順。可嘉。授為懷忠將軍。令統所部。為前導。破賊。至賊帥張國柱。李本深。王會。高啟隆。俱係舊臣。或一時迫脅降賊。亦未可定。宜如招馬寶等例。書赦罪敕。馳檄發趙良棟。相機招撫。陝西四川督撫等。速運糧餉。

毋誤兩路大兵進剿機宜○喀爾喀扎薩克圖汗遣使進九白年貢宴賚如例○庚寅免山東金鄉魚臺單縣本年分水災額賦有差○辛卯和碩額駙耿聚忠疏言福州府舊有旗兵三千今調千人駐防杭州其親戚及未披甲已退甲閒丁甚多或移或留請旨裁奪得旨尚書介山率兵還日即移調杭官兵閒散人口留駐杭州以馬九玉為將軍統福州府靖南藩下官兵侍郎吳努春著於馬九玉未至之先暫行管理○壬辰陞山西布政使穆爾賽為山西巡撫○甲午兵部題提督桑峨不能愛恤本標官兵以致逃散理應即加議處但曾奉旨革職戴罪圖功應俟事平日嚴加議罪得旨領兵官平時不能愛養軍士致軍士無以資生始有鼓譟逃散之事凡用兵地方與賊對壘理宜撫循軍士以剿滅賊寇恢復地方為念今所至之處苦累兵丁殊屬不合桑峨著即議罪○乙未諭兵部今四

方悉就蕩平惟滇黔餘孽尚爾稽誅前經會議各路官兵俱於八月內進剿茲師期已屆士馬飽騰正宜分路並進奮勇長驅掃除殘寇以靖邊圉爾部其速傳諭湖南四川廣西諸大將軍將軍督撫提鎮等整頓兵馬速行進剿勿得借端推諉延緩時日有逗留不前者即加重處又聞各路統領綠旗將帥不恤軍士令為滿洲大兵蓋房秣馬及私行役使恣意虐害以致兵卒苦累如桑峨標兵逃亡千餘皆由於此不思為將者與士卒甘苦相同加意愛養方可責其用命罔惜卒伍惟便私圖貽誤軍機深為可惡爾部即通行嚴飭嗣後仍蹈前轍指名叅奏從重治罪○調四川松潘總兵官王用予為陝西固原總兵官○四川總督楊茂勲疏報逆賊偽將軍胡國柱王會等領賊兵戰象突犯納谿瀘州總兵官謝泗等兵力單弱退保隆昌得旨進剿雲貴各路大兵雲集四川據奏瀘州納谿二處

乃為賊破。其領兵將軍諛督撫提鎮各官防禦何事。殊屬怠玩。著嚴議具奏。○丙申。

上詣

太皇太后

皇太后宮問安。○定遠平寇大將軍固山貝子章泰疏言。蔡毓榮奉有調遣漢兵之旨。今進取貴州。滿漢既已合兵。若各自調遣。彼此不相知會。恐於事機無濟。

上諭蔡毓榮進取貴州。凡屬軍機。俱關白大將軍商酌行之。○喀爾喀土謝圖汗遣使進九白年貢。宴賚如例。○丁酉。

上幸南苑行圍。○戊戌。議政王大臣等議覆兵科給事中余國柱請撤回尚之信標下官兵疏。應將尚之信標下十五佐領官兵分入上三旗。令駐廣東。另設將軍副都統管轄。其三總兵標下兵丁有願為兵者為兵。願為民者為民。得旨。廣東係邊疆地方。仍留二總兵標下官兵。令新設將軍等管轄。其一總兵標下

官兵應行裁去。餘如議。○癸卯。

上回宮。詣

太皇太后宮問安。○乙巳。予陣亡正黃旗護軍叅領一等阿達哈哈番又一拖沙喇哈番佐領噶爾度祭葬如例。○丙午。遣官祭歷代帝王。○遣官祭城隍之神。○丁未。諭議政王大臣等。四川漢中滿洲大兵雖為數不少。今當進定雲貴之際。宜添發大兵。在京滿洲蒙古每佐領下各護軍二人。驍騎四人。八旗漢軍兵丁共撥千人。令護軍統領佟佳副都統得爾德莫達率赴四川。既至。將軍吳丹鄂克濟哈等酌量分為二路。此兵未到之先。四川萬一有警。大將軍公圖海便宜調漢中滿漢兵往援。酌調西安之兵赴漢中。檄到總督哈占。即簡本標及別部精銳。帥之馳赴永寧會吳丹軍。凡綠旗兵俱令哈占統轄。同心協力。進定雲南。都統范達禮率所部兵星赴重慶。如兵少。簡將軍噶爾漢兵率之前行。大

將軍貝子章泰將軍蔡毓榮勒貝馬九玉總督金光祖等各路應期速進。漢軍都統不必自京別遣。其兵即令都統海爾圖率往。原任總督張長庚布政使劉顯貴軍中著有能聲。其以張長庚為副都統。劉顯貴為參蘭大。後凡委署參蘭大參領等官。於滿洲蒙古漢軍廢員內。察精壯者以聞。○諭兵部。護軍統領佟佳等率兵抵懷慶時。若由潼關經西安出棧道。其途甚遠。宜自懷慶由鄧州出商州直赴漢中。此路險易遠近。可行與否。確探明白。並開晰道里報部。○戊申。工部右侍郎張問政以疾乞休。允之。○予故鑲黃旗領侍衛內大臣一等阿思哈尼哈番阿魯哈祭葬。加祭一次。謚勤僖。○己酉。免直隸宣府蔚州衛本年分電災額賦有差。○壬子。

上詣

太皇太后

皇太后宮問安。○陞江南提督王永譽為廣東

將軍。○出征病故。一等待衛副都統管理武備院事。禪布。擢回。賜銀四百兩。○甲寅。都統希福疏言。南寧僻處邊疆。兵丁缺馬。今專從一路深入。陸途險遠。且無水路。恐誤軍機。上諭。今進定雲貴。期會已近。廣西兵為數不少。大將軍簡親王等。以柳州南寧桂林。駐兵之馬。通融給將軍勒貝軍。毋誤進剿機宜。都統馬緝帥兵出京。已各報稱。方至永州。其趣馬緝速赴南寧。送往廣西之馬。并移文嚴趣之。

御批卷九二

云九

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十一

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十二

監修總裁官光祿大夫太保無太子太傅母和碩大學士兼戶部尚書二子伯加四

級臣馬齊光祿大夫經筵日講官起居注少保無太子太保保和殿大學士仍兼

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣薛廷錫

均裁官光祿大夫文華殿大學士兼吏部尚書臣朱軾等奉

敕修

康熙十九年庚申九月丙辰朔

實錄卷九十二

上詣

太皇太后

皇太后宮問安○陞宗人府府丞金鼎為工部

右侍郎○予故原任兵部尚書喀代祭葬如

例○江南總督阿席熙疏報偽副將沈茂等

聯踪海上歷有年所今率領偽官兵投誠下

部知之○定遠平寇大將軍固山貝子章泰

疏報將軍總督蔡毓榮等率綠旗官兵分三

路於閏八月十二日自沅州啟行臣率滿漢

兵亦於十八日自沅州啟行進取貴州

上諭今大將軍貝子章泰等既奏進兵日期其

移會廣西四川將軍總督等俱令如期速行

剿賊○戊午以阿霸哈納故多羅貝勒色冷

墨爾根子納木喀爾襲爵○已未免直隸深

井堡本年分電災額賦有差○以隨征總兵

官柯彩為貴州威寧總兵官○調福建提督

楊捷為江南提督○喀爾喀額爾德尼濟農

遣使進九白年貢宴賚如例○庚申陞工科

實錄卷九十二

給事中那鼎為山西布政使司布政使○陞

叅領噶爾馬席希叅領綽爾濟札克俱為歸

化城副都統○戶部題尚之信等有私行收

稅之項已令督撫嚴查題明豁免今耿精忠

在福建恐亦有私行收稅之處應行文督撫

查明報部一體豁免從之○辛酉

上詣

太皇太后

皇太后宮問安○壬戌勇畧將軍雲南貴州總

督趙良棟疏言李芳述鄒九疇係投誠後遵旨設立領兵之總兵也。值仁懷合江失守。瀘州復陷。賊正鴟張勢在危急。逆孽狡謀乘隙搖惑。該總兵等矢心報國。不為餌誘。擒綁逆差。鎮靖人心。又隨征之副將蔣榮德及投誠偽總兵未經受職之瞿洪等。同心協力。保守孤城。奮志滅賊。請加恩典。以示獎勵。下部議敘。○癸亥。先是綏遠將軍湖廣總督蔡毓榮疏言。臣已統兵入貴州境。恐大兵進征之後。內地兵單。請調提督徐治都駐常德防守。上從之。至是。徐治都疏報瀘州永寧敘州諸處俱陷。譚弘等復叛。夔州府民亦變。

上諭。今譚弘復叛。夔州民變。將軍噶爾漢都統范達禮。副都統塞格簡。荊州大兵每佐領三人率之。提督徐治都。毋往常德。亦率綠旗兵俱速赴夔州。諸處剿滅叛賊。餘兵署副都統諾敏率之。鎮守荊州。仍檄貝子準達率兵前來兩路夾剿。毋失機宜。尋復諭常德要地。亟

宜堅守。令襄陽總兵官劉成龍往鎮常德。河南南汝總兵官周邦寧往駐襄陽。○勇畧將軍雲南貴州總督趙良棟疏言。湖廣大兵已集沅州。永寧一路兵應直進雲南。今將軍吳丹兵啟行。將及一月。猶未渡江。如永寧不保。賊勢愈張。請嚴飭湖廣兵取貴陽。分兵以取遵義。令吳丹擊敗永寧賊。即乘勝進取雲南。上諭。大將軍貝子章泰等可率兵速取貴陽。分兵以取遵義。將軍吳丹往取瀘州。行及一月。逗留猶未渡江。不合。其速令取瀘州。剿除來犯永寧諸處賊寇。今湖廣四川大兵各路分進。廣西將軍大臣不得以兵士無馬為辭。將軍勒貝體朕擢用之意。速率大兵乘機由南寧進定雲南。○甲子。

上詣

太皇太后

皇太后宮問安。○乙丑。諭議政王大臣等。據將軍噶爾漢等奏逆賊譚弘率眾至巫山。譚弘

小醜耳。我兵但奮力進擊。彼自漸滅。將軍噶爾漢提督徐治都等。其溯江而上。速定疆圉。大將軍貝子章泰等。果如前疏。訂期亟進。克復貴陽。賊勢何至滋蔓。今宜令章泰同將軍蔡毓榮等於文到日。速進取貴陽。以圖遵義。四川諸將。若能奮擊雲南貴州出犯之賊。則譚弘無所逃匿。自當摧陷。今宜令專意進剿。勿復觀望。前此曾命總督哈占。馳赴將軍吳丹軍。今宜令由保寧江直進。破譚弘以會吳丹。并行文大將軍公圖海。酌發軍中滿漢兵。為之聲援。以分賊勢。至運餉四川。不由彝陵江。俱自陝西轉運敘州。兵糧度可無虞。頃令護軍統領佟佳等。率增發四川滿兵。赴原指之地。其漢軍官兵一千人。文到日。即由荆門州。一月內赴彝陵鎮守。著戶部郎中額爾赫圖。馳赴彝陵。趣將軍噶爾漢等兵。速滅譚弘諸賊。額爾赫圖。凡事俱準蘇赫臣例以行。吏部郎中范承勳。亦馳驛追及副都統張長庚。

軍。趣其兼程而往。一月內抵彝陵。范承勳仍自彝陵。趣官兵追及噶爾漢等軍。與額爾赫圖同。趣官兵擊賊。○敕諭進剿四川將軍吳丹。鄂克濟哈趙良棟。總督楊茂勳。巡撫杭愛。提督王之鼎等。近覽都統噶爾漢提督徐治都奏。譚弘叛逆。夔州巫山。亦俱變亂。朕思譚弘變起倉卒。四川兵民聞之。必為震動。譚弘雖盤踞萬縣。實屬疥癬。但破出犯之賊。則譚弘無路可歸。自必授首。其所以至此者。皆由各將軍大臣。逗留不進所致。今諸路調兵分途進擊。爾等可速長驅。勿以譚弘等小醜之故。遂猶豫不前。并以大兵雲集。譚弘不日殲滅。曉諭兵民。爾等其速慰四川通省兵民之心。以副朕委任至意。○諭議政王大臣等。頃因逆賊侵逼四川。滿漢大兵已諸路進剿。大將軍貝子章泰。將軍總督蔡毓榮等。於是月十二日。以次進定貴州。今廣西一路。亟宜速入。以定雲南。將軍賴塔在福建。廣東勞績素

著可授為大將軍。赴廣西。調遣廣西滿漢大兵。由南寧直進。速定雲南。賴塔行日。選廣州大兵內精銳有馬者。或五百人。或千人。親帥之赴南寧。廣西所有一應大兵。俱聽簡擇。率往。副都統博濟統餘兵。暫守廣東。賴塔敕印。可速送往。其原在平南藩下官兵。如可帶往。聽賴塔酌量。率之前行。○又諭。沅州兵出征日久。今應更代。可發每旗前鋒三十人。每佐領護軍一人。驍騎三人。內府兵六百人。漢軍每佐領二人。付紀哈里。席卜。率之前往。並撥內廐。及兵部馬匹。同發沅州軍前。○免山西大同。太原。二府屬州縣衛所。本年分旱災額賦有差。○丙寅。

上詣

太皇太后宮。問安。○以一等侍衛阿喇尼為理藩院右侍郎。陞太常寺卿李廷松為宗人府府丞。○戶部議覆。和碩額駙尚之隆疏言。臣父尚可喜在日。曾題請蓋州地方安插。并帶

佐領二員。及佐領下兵丁。防守彼處地方。今蒙

皇恩。搬取臣父骸骨。並臣母及家口前來。臣不敢照前復請兵丁。惟懇

皇上恩賜開散佐領二員。以便統轄家口。查蓋州係滿洲官兵駐防之所。不便給與。海州向有平南王尚可喜莊地。應酌量撥給。并賜開散佐領二員。管轄家口。從之。○免山東濟寧州。本年分水災額賦十之三。○戊辰。諭兵部覽安塘筆帖式蘇擺報。九月初六日。副都統塞格率每佐領兵一人。往守彝陵。夫譚弘向在保寧屢經奔敗。兵仗全無。今乘黔賊侵犯瀘州。招集無賴。持挺肆行劫掠。將軍噶爾漢等。不親身馳赴巫山。夔州。剿除小醜。乃遣副都統塞格率每佐領兵一人。往鎮彝陵。殊屬不合。如此遲延觀望。倘此寇與黔賊合勢。彼時破之不恭難乎。噶爾漢等聞命。即統率官兵。星夜馳赴巫山。夔州。扼其要害。俾游行羣

醜不致滋蔓速為剿除。若仍逗留致逆賊與黔賊合勢。至於猖獗。將噶爾漢等治以失誤軍機之罪。爾部其速行檄知。尋噶爾漢疏言都統范達禮病甚不能同往。

上諭。范達禮令在荊州養病。俟病愈仍追及噶爾漢軍。進兵之際。轉運糧餉。關係甚重。地方各官倘有違誤。即以軍法從事。○免山西忻州清源縣本年分旱災額賦有差。○已已。

上詣

太皇太后

皇太后宮問安。○以戶部郎中王如辰為廣西按察使司僉事。提調學政。○庚午。

上御太和門視朝。文武陞轉各官謝恩。次喀爾喀進貢使臣等行禮。○戶部議覆先經直隸巡撫于成龍以武清等十四州縣衛被災分數題報奉旨差戶部郎中額爾赫圖查勘。今據回奏。交河阜城二縣被災分數應如原報。唐山等八縣衛應比原報減二分。大城等四

縣應不准災。請照所定分數蠲免。得旨。各縣地方自去年被災。民生困苦。俱著照原報分數蠲免。○癸酉。

上詣

太皇太后

皇太后宮問安。○乙亥。以故一等精奇尼哈番祖永烈弟祖永煦襲職。○丙子。諭議政王大臣等。今大將軍貝子章泰率兵進取雲貴。彝陵。荊州。諸處宜發大兵護軍統領佟佳所率之兵。令母往四川。撥每佐領護軍驍騎各二人。佟佳同副都統一員率之。自荊門州赴彝陵。餘兵付一副都統率之。俾兼程赴荊州。副都統紀哈里等率兵赴四川。○以察哈爾故一等阿思哈尼哈番都爾巴之子古魯札重襲職。○丁丑。

上詣

太皇太后

皇太后宮問安。○陞江南狼山總兵官諾邁為

福建提督○戊寅建威將軍護軍統領吳丹等疏報。臣統領官兵進取瀘州。八月十八日署西安將軍。事佛尼勒。領頭隊官兵至豹子山。瀘州賊渡江遁。前鋒參領博鼎駐防西安。夸蘭大倭黑。追擊之。賊大敗。擒斬溺水死者無算。恢復瀘州。得旨嘉獎。下部議敘。○刑部議覆。撫遠大將軍都統大學士公圖海疏報。據投誠總兵楊勇祖之子楊廷卓。城固縣民戴時坤。舉首偽朱三太子。廣散剗付。行文漢中興安等州縣。又據漢中通判孫世哲報。於三河口地方。拏獲賊首朱道士。有偽安國大將軍木印剗付。及兵械等。朱道士供稱。原名朱次門。後改名楊起隆。於康熙十二年間到京。見吳應熊。招集黨羽。期十二月二十三日五更。放火舉事。二十一日晚。事洩逃竄。復改姓任。為道士。本年七月。至漢中糾黨舉事。聞事洩。欲逃入山。於三河口被獲。查偽朱三。即楊起隆。於康熙十二年。通行緝拏。獲日與已。

獲之楊起隆妻馬氏。親隨小廝小六兒。並原夥鄭得勝等。認識審理。伊等見在監禁。相應將楊起隆解部。與馬氏等認識審理。從之。○辛巳。

上詣

太皇太后

皇太后宮。問安。○諭兵部。進川大兵。分路前取雲貴。近又報四川小醜竊發。保寧漢中一帶。關係重要。其移文將軍王進寶。馳赴保寧。無寧漢中諸處。○免山西遼州等七州縣衛本年分電災額賦有差。○予故一等侍衛副都統管理武備院事禪卜祭葬。謚勇恪。○壬午。孝慈高皇后忌辰。遣官祭福陵。○甲申。

上詣

太皇太后

皇太后宮。問安。○陞太僕寺卿張雲翼為太常寺卿。○乙酉。免廣西通省州縣康熙十八年

分未完額賦

冬十月丙戌朔享

太廟。

上親詣行禮○遣官祭

永陵。

福陵。

昭陵。

孝陵。

仁孝皇后。

孝昭皇后○頒康熙二十年時憲曆○丁亥諭

議政王大臣等四川統兵諸將似有不睦之

形其遣給事中莫羅等往諭之并詳察地方

情形遣學士額庫禮郎中阿濟力等往廣西

收集滿漢官兵盡付大將軍賴塔統領趣令

進取雲南○諭學士額庫禮郎中阿濟力曰

爾等到南寧如賴塔未至將軍勒貝等簡兵

已畢即趣令啟行於途中候賴塔以進如勒

貝等簡兵未畢當檄趣賴塔速來到日即趣

令前進署巡撫事右理事官麻勒吉等委賢

能司道等官運致糧餉毋使有誤至分選滿

漢官兵如有爭競爾等即為裁決俟大兵啟

行而還○給四川殉難郎中兼佐領拖畢泰

拜他喇布勒哈番予祭葬如例撥什庫巴代

拖沙喇哈番予卹銀○戊子。

皇太后聖壽節。

上率諸王文武大臣侍衛等詣

皇太后宮行禮遵

懿旨停止筵宴○彗星見翼宿度○己丑。

上幸南苑行圍○諭議政王大臣等都統馬緝

等出師以來即耽延遲緩今大將軍賴塔等

自南寧進取雲貴馬緝等宜率兵急進如仍

耽延遲緩兵部嚴察議處○癸巳命滿漢科

道官各一員稽察錢局一年更換○署廣西

巡撫右理事官麻勒吉疏報七月十四日逆

賊攻陷養利州新太叅將昂三等率領官兵

於閏八月十一日敗賊於養利州之大橋賊

棄城遁。又逆賊鄒總兵等踞天河縣。副將熊經等率領官兵。於九月初二日。連敗賊衆。恢復縣城。獲關防器械馬匹無算。得旨嘉獎。下部議敘。○甲午。

上回宮。詣

太皇太后

皇太后宮。問安。○勇畧將軍雲南貴州總督趙良棟疏報。賊寇侵犯。仁懷失守。將軍吳丹擁重兵二萬。不急赴援。以致永寧復陷。得旨。成都去永寧路不過七八百里。吳丹不急赴援。遲至六十餘日。貽誤已甚。可速解將軍任。還漢中。同大將軍公圖海鎮守。其四川官兵俱付將軍鄂克濟哈。與趙良棟會商進剿。蜀中情形。不時奏報。○諭議政王大臣等。前以蜀地與雲貴相接。逆賊必來侵犯。而將軍總督趙良棟題報。我兵已抵金沙江。曾特諭趙良棟。及吳丹。鄂克濟哈等。於諸要路。俱立營。浚濠築壘。堅為防守。汛守官兵糧餉。運給勿誤。

今逆賊攻陷永寧。建昌路阻。在蜀諸將軍大臣。率如許滿漢官兵。所守禦者何事。若遵前諭。加意奉行。永寧建昌。何致失陷。譚弘。彭時亨。何至變亂。伊等殊負委任之意。今宜協力剿賊。速行恢復。永寧建昌。諸處至漢中地方。關係甚要。著授叅領郝佛為副都統。簡前鋒及每佐領護軍驍騎各三人。無程率往西安。以巡撫布政司。文武官員馬匹。易其疲馬。馳赴漢中。○喀爾喀澤卜尊丹巴胡土克圖。遣使進貢。賞賚如例。○丙申。

上詣

太皇太后

皇太后宮。問安。○陞大理寺少卿王繼貞。為太僕寺卿。○丁酉。諭大學士等。蒙古王貝勒貝子。公等。今冬來朝。正著停止。以後年節。仍著來朝。○免福建泰寧縣康熙十八年分水災額賦有差。○予福建陣亡正藍旗叅領成貴。祭葬如例。○奮威將軍平涼提督王進寶。

疏言。臣標兵除調征湖廣外。其餘臣子王用予。統領進剿。又陝西總督哈占。調去二千餘名。臣今無兵可統。不得不於臣標帶回。及留守步兵內。姑為抽選。并於固鎮營中。量行調撥。以足千餘之數。更請敕督臣。以固鎮官兵發還。付臣統轄。得旨。逆賊既侵犯四川。譚弘。彭時亨復叛。保寧最屬要地。令將軍王進寶。速調固原各營官兵。無程馳赴保寧。規定四川。陝西總督哈占。兩次所調之兵。仍令王進寶統領。○蕩寇將軍固山貝子準達疏報逆賊譚弘。彭時亨等。攻陷涪州。

上諭將軍噶爾漢等。選每佐領兵三人。提督徐治都。親統漢兵。速赴夔州諸處。剿滅叛寇。○戊戌。以內大臣阿密達。為正白旗蒙古都統。○昭武將軍福建陸路提督楊捷。以病乞休。得旨。楊捷已調補江南提督。可加意調理。速赴新任。不必以病求罷。○浙江提督石調聲疏報。海逆偽都督劉敏。偽總兵魏國柱等。帶

領偽官兵七百餘人。登岸投誠。下部知之。○已亥。

上詣

太皇太后

皇太后宮問安。○禮部題奉命大將軍和碩康親王傑書凱旋。應在蘆溝橋行拜

天禮畢。即赴鞏華城。

仁孝皇后

孝昭皇后梓宮前行禮。然後遣大臣告以王母妃之喪。始歸私第。得旨。王出征後。有母妃之喪。在王亦屬大故。蘆溝橋行禮畢。應即歸私第。臨喪盡哀。後再詣鞏華城。○陝西總督哈占疏言。臣進兵保寧。所需糧餉。若以秦省運到之米支給。不足於用。倘督餉各官。不盡心料理。軍需告匱。貽誤匪輕。得旨。兵餉關係緊要。四川督撫。同郎中蘇赫臣。速委賢能司道。董理蜀中諸軍糧餉。無誤師行。○哈占又疏言。逆賊譚弘。彭時亨等。合兵一處。去保寧不

遠糧餉皆由此經過。最關緊要。臣自漢中往保寧。恐所統兵無幾。戰守不足。請敕護軍統領佟佳等遣兵速往應援。得旨前已令副都統紀哈里等速進四川。保寧順慶所關緊要。總督哈占速往保寧。偕總兵官高孟剿滅逆賊。○哈占又疏言。畧陽為水陸交會。陽平為四川孔道。廣元寧羗又屬全省咽喉。俱轉餉必由之地。逆賊譚弘等肆行猖獗。此數處官兵不過百餘人。難以防禦。而部推陽平叅將高明霄尚未抵任。請撥兵防守。得旨畧陽陽平寧羗廣元諸處。皆糧運所經。且為大兵後路。關係最要。陝西甘肅巡撫提督其酌撥官兵。加意防守。陽平叅將高明霄速催赴任。如仍遲延。嚴加議處。○庚子。

上御太和門視朝。文武陞轉各官謝恩。次喀爾喀使臣等行禮。○
上諭大學士等曰。各旗差遣家人。或往外省索債。或令隨官赴任。或以情面干求外官者甚

多。借端營私。小民最為苦累。此皆不察之故。今若詳加察究。則各旗不遣家僕出外者。能有幾人。此等累民之事。應行禁止。令吏兵刑三部及都察院會同定例嚴禁。尋議旗人私往外省地方。借端挾詐。囑託行私。犯擾小民等弊者。係平人。枷號三月。鞭一百。係官革職。鞭一百。不准折贖。夫察之佐領。罰俸三月。驍騎校。罰俸六月。其差遣家僕之人。係閑人。鞭一百。係官革職。差去之僕。枷號一月。鞭一百。從之。○辛丑。

上詣

太皇太后

皇太后宮問安。○考試漢科道官於體仁閣下。

○鎮安將軍都統噶爾漢疏報。副都統塞格於十月初六日恢復巫山縣。水師遊擊劉進朝等敗賊於跳石。擒偽總兵一員。得旨嘉獎。下部議敘。○諭將軍噶爾漢等覽奏恢復巫山縣。生擒偽總兵。知爾等用命疾馳。朕心甚

慰。今宜速進殲除逆賊。安定地方。譚弘。彭時亨等諸逆。或勢感投降。或竟行剿滅。悉皆誅戮。妻子家口。賞給有功官兵。○壬寅。

上以奉命大將軍和碩康親王傑書。自福建凱旋。率在京諸王。貝勒。貝子。公。及滿漢大臣。出郊迎勞。是日駐蹕蘆溝橋。○癸卯。

上自駐蹕所。率諸王大臣等。迎凱旋大軍於二十里外。大軍既至。

上率出迎諸王大臣。及凱旋王大臣官員等。拜天畢。

上御黃幄。和碩康親王傑書。率凱旋將帥行禮。

上召康親王傑書近前。

上就御座抱見。命近

御座右側坐。諸王大臣。依次列坐。其行間効力

軍士。亦依次列坐。賜茶畢。

上回宮。○甲辰。

上詣

太皇太后宮。問安。○命給事中莫羅等傳諭大

將軍圖海曰。爾前奏暫停諸路進兵。其說雖

是。但恐停止進兵。賊愈滋蔓。前爾面請緩兵

朕下詔督戰。始復岳州。湖南逆賊悉潰。後又

請暫停入川之師。朕趣進兵。遂平四川。今賊

以全力逼犯四川。若從廣西南寧湖廣沅州。

進取貴州。則寇蜀之賊自潰。從此諸逆漸平。

地方悉定。諸軍可以凱旋矣。至投誠官員。豈

可深信。宜留置左右。時加防範。朕前屢次密

諭。今譚弘。彭時亨等果復叛亂。朕向謂此輩

俱在爾軍中。不意竟置之別所。此等反叛之

賊。受爾何恩。而乃輕信如是也。嗣後宜密防

之。○乙巳。諭吏部。言官職司耳目。必學識優

長。練達政務。乃克勝任。近以科臣孫纘條奏

行取考選。應加考試。因將見任科道各官。俱

行親試。觀其才品。以昭澄敘。姚締虞。王曰溫

李迥。條奏詳明。克稱言職。并張鵬等俱著留

任。其益加勉勵。殫心職業。以副任用。傅廷俊

和鹽鼎孫纘。才識庸常。不稱言職。俱著降三

級調用。不准以加級紀錄抵銷。爾部即遵諭行。○丙午。

上詣

太皇太后

皇太后宮。問安。○丁未。

上御懋勤殿。親講易經噬嗑卦辭。講官庫勒納。葉方藹等進所撰乾坤二卦總論。

上覽畢。曰。卦爻之義。原各不同。即如噬嗑一卦。中四爻。主用刑者言。初上二爻。主受刑者言。

每爻各有取義。必得總論發揮。方覺全卦之義了然。諸卦可俱倣此撰進。○封和碩安親王岳樂女為郡主。授其壻鼎格。為和碩額駙。○戊申。諭大學士等曰。居官者宜以清廉為尚。官皆清廉。百姓自得遂其生矣。今朝臣有如于成龍之清者否。馮溥奏曰。順天府尹宋文運亦有清名。其家甚貧。

上曰。清廉不在貧富。謂富者必貪。而貧者必廉。可乎。亦視其人居心何如耳。○刑部右侍郎

高珩以老乞休。允之。○免江南泰州。清河等

二十三州縣衛。本年分水災額賦有差。○陞

正黃旗叅領金世榮。為江南狼山總兵官。○

定遠平寇大將軍固山貝子章泰疏報。臣自

平溪衛。與征南將軍穆占。綏遠將軍總督蔡

毓榮等。領兵前進。於十月十一日。抵鎮遠府。

逆賊偽將軍張足法。楊應選等。夜遁。恢復府

城。江西總督董衛國。追敗賊於石巷口。及大

岩門。抵油閘關。穆占追剿逸賊。復偏橋衛。興

隆衛。得旨嘉獎。下部議敘。○諭兵部。大兵已

復鎮遠。鎮遠至貴陽。道路平坦。料賊不守貴

陽。必據雞公背。鐵索橋諸處。茲大兵進征。平

定地方。拯救生民。大將軍將軍大臣等。務同

心協力。以濟大事。作速進取。貴陽。即分兵取

遵義諸處。倘怠緩遲延。如入川諸大臣。彼此

不睦。貽誤兵機。軍法森嚴。必不爾宥。前恢復

四川時。曾敕諸將軍。固守疆圉。堵禦賊寇。因

其彼此不睦。疎於防守。使逆賊狂逞。失陷地

方不能如期進定雲南。今大將軍貝子章泰等已復鎮遠。規取貴陽。遵義。遵義為賊後路。寇川逆賊勢必退歸。在川將軍及大臣等宜偵探虛實。乘勢長驅。毋失機會。如仍前不睦。貽誤兵機。定行治罪。大將軍賴塔等亦應統領廣西滿漢兵。速進雲南。早奏膚功。以副委任之意。○鎮安將軍都統噶爾漢等疏報。臣等統領大兵。自巫山克捷。進取夔州。賊望風奔潰。遂復夔州。本月十四日。又敗賊譚弘標。下偽楊總兵於錯開峽。殺溺賊衆無算。得旨嘉獎。下部議敘。○諭兵部。將軍噶爾漢提督徐治都等。恢復夔州。但不知重慶消息。可否相通。令噶爾漢等速行奏聞。至萬縣在萬山之中。噶爾漢等防禦諸路。其熟計保全。今夔州既復。宜令總督哈占。速從保寧追剿。哈占速進。則賊不日撲滅。至兩路分兵恢復鎮遠。夔州事宜。應移會在蜀大臣。并檄知廣西大將軍賴塔等。乘此機會。速定雲南。○辛亥。議

政王大臣等議奏。多羅順承郡王勒爾錦多羅貝勒察尼。出師湖廣。罪案。

上諭大學士等曰。勒爾錦察尼。統領大兵。不能竭力底定地方。但斂取督撫司道等官財物。希圖肥家。貽誤國事。疲敝兵馬。困苦民生。失機之罪。最為重大。前屢旨申飭。竟置不聞。安坐軍中。致失大計。一切罪犯。孰有重於此者乎。朕嘗揆度事務。幸因修造戰船。圍困岳州。賊勢窮蹙。為我兵所敗。故地方以次戡定。否則不知作何景象矣。我

太祖

太宗時。軍令極嚴。今議政王大臣等。因事已平定。不復經意。所議之罪。不協事情。緊從輕典可乎。王貝勒等。輒言從前未經戰陣。凡行間皆與衆人商確。自此以後。豈遂無用兵之事耶。若皆以未經領軍為言。則誰當領軍者。王與貝勒。俱朕至親。朕本欲寬釋。但貽誤國家大事。罪實難逭。其餘尚可從寬。王貝勒決不

容姑貸也。爾等可傳諭議政王大臣等知之。

○壬子。

上詣

太皇太后宮問安。○勇畧將軍雲南貴州總督

趙良棟疏。恭西寧總兵官朱衣客率官兵八

千往援建昌。於天王廟失利。棄越舊衛渡河

退回。

上命革朱衣客職。擬罪以聞。○癸丑。

上詣

太皇太后宮問安。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十三

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷王光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙十九年庚申十一月丙辰朔冬至祀

實錄卷九十三

天於

園丘

上親詣行禮○遣官祭

永陵

福陵

昭陵

孝陵

仁孝皇后

孝昭皇后○停止次日朝賀○彗星夕見於西

方○丁巳正黃旗蒙古副都統倭內巴圖魯以疾乞休命以原品解任○戊午四川道御史張志棟疏叅刑部尚書黃機年老大理寺少卿張永祺國子監祭酒馮源濟物望不孚均應議處

上諭大學士等曰張志棟叅張永祺馮源濟二人品行不端甚當又叅刑部尚書黃機衰老宜罷此言太過當國家用人正須老成練達之輩從來才德難以兼全聞黃機居鄉謹飭

實錄卷九十三

安靜是一老成人也○敕平定神木等處功授鄂爾多斯固山貝子古木布拉錫固山貝子古祿西希卜俱為多羅貝勒○命旗下從征僕人得功牌二次者許令出戶○福建海澄陣亡鑲藍旗前鋒校卦色喪還遣一等侍衛達爾賽以茶酒往奠之○庚申

上詣

太皇太后宮問安○辛酉議政王大臣等議覆多羅順承郡王勒爾錦貝勒察尼師師討賊

不速扼要害。乃退縮不前。老師糜餉。坐失事機。幾至誤國。應革去王。貝勒。並議政。及宗人府之職。籍其家屬財產。仍行拘禁。貝勒尚善。公蘭布。不速。剿賊寇。恢復疆土。退縮貽誤。俱宜從重議處。但既卒於軍。應革其多羅貝勒。鎮國公。都統。朱滿。不速。據岳州。前驅破賊。退縮不前。幾至誤國。應革去都統。拜他喇布勒哈番佐領。及所加之級。立絞。籍其家。其妻與未分家之子。並交內務府。都統鄂內。不速。據要地。渡江破賊。坐守彝陵。聽賊渡江。竊踞要害。退縮不前。幾至誤國。應革去都統。一等阿達哈哈番。兼一拖沙喇哈番佐領。及所加之級。鞭一百。不許折贖。本身及妻。未分家之子。沒入官。家產交內務府。護軍統領伊爾度齊。棄太平街不守。不剿滅虎渡口賊寇。致太平街失陷。應革職正法。但已身故。宜革去一等阿達哈哈番。兼一拖沙喇哈番。籍沒家產。其妻及未分家之子。並交內務府。護軍統領額

司泰。不渡江。速據要害。長驅剿賊。又不攻取岳州。退縮貽誤。宜從重議處。但已身故。宜籍沒家產。給予本主。散秩大臣多謨克圖。身為叅贊。率蒙古兵前往。不即協力渡江。恢復疆圍。得賊空營。冒為已功。復不力拒虎渡口出犯之賊。致已獲之太平街。復陷於賊。宜革去散秩大臣。拜他喇布勒哈番。及所加之級。副都統巴喀。得賊空營。亦冒為已功。不力拒虎渡口出犯之賊。致太平街復陷。宜革去副都統。佐領。及所加之級。公圖納黑。不速剿賊。耽延時日。應行察議。但賊已固守之後。伊始至軍。且屢有渡江擊賊之請。應免察議。署前鋒統領噶爾弼。係貝勒尚善叅贊。坐延時日。寸步不前。及奉諭申飭。仍不思殫力破賊。推諉巧飾。執意退縮。希冀全身。不取岳州。亦應察議。但已身故。無庸議。疏入。

上諭。勒爾錦。不渡江剿賊。平定疆圍。遷延瞻顧。貽誤國家大事。情罪重大。削去郡王。并議政。

宗人府之職。仍令羈禁。察尼應如議處分。但既克岳州。且從前有效力之請。著從寬免羈禁籍沒。革去貝勒。并議政宗人府之職。為閒散宗室。尚善。革去貝勒。蘭布。革去鎮國公。朱滿。從寬免死。著革職。鞭一百。不許折贖。籍沒其家。鄂內。屢戰湖中。又恢復岳州。從寬免籍沒鞭責。著革職。伊爾度齊。多謨克圖。巴喀等。俱革職。餘依議。○召大學士。九卿。詹事。科道。諭曰。白氣見於西方。

天象垂戒。必有徵驗。爾等各抒所見。奏聞。工部侍郎趙璟。金鼎奏。近聞陝西轉餉入蜀。人民滋困。押運官又不知軫恤。請敕部議作何休息。兵部尚書宋德宜奏。陝西四川。不必各設總督。宜以一人統理兩省。庶人民勞逸。可以酌劑均平。

上諭吏部。改陝西總督哈占。為川陝總督。其四川總督楊茂勳。令解任。隨大軍進取雲南。○壬戌。以故一等精奇尼哈番哈代孫阿拉納

襲職。○甲子。建威將軍吳丹疏言。蜀省諸要路。應增兵分守。

上諭。大將軍公圖海。身任疆場。署副都統。郝佛所率之兵。至漢中時。宜如何調遣。如何鎮守之處。聽其酌行。其副都統覺羅紀哈里席卜。及護軍統領佟佳等。速行前往。會噶爾漢等軍。到日。如重慶可通。即由重慶。迅赴瀘州。剿賊。○鎮安將軍都統噶爾漢疏言。臣等相繼進剿。聞敗遁之賊。與四川雲陽賊。合浚濠築壘。水陸相拒。臣念巫山夔州。乃大兵後路。須兵固守。

上諭。將軍噶爾漢提督徐治都。率兵恢復四川巫山。夔州。更進取雲陽諸處。賊方合力。櫻城拒敵。可移檄守荊州。副都統諾敏。發紅衣礮八位。礮手各二人。星夜送至軍前。備攻城之用。徐治都所增標兵五千。招募不免遲緩。其以均州房縣所裁鎮標之兵。及內地綠旗兵調往。至巫山夔州諸要地。宜速發兵鎮守。副

都統得爾德。可率兵往彝陵。彈壓地方。○定遠平寇大將軍固山貝子章泰疏報。臣等恢復鎮遠。即分遣滿漢官兵。進取貴陽。十月十七日。復平越府。並復新添龍里二衛。二十一日。我兵直抵省城。逆渠吳世璠。偽將軍劉國炳。吳應麒等。率眾夜遁。遂復貴陽府。其餘安順。石阡。都勻。諸府。亦以次收復。貴州全定。得旨嘉獎。下部議敘。○乙丑。諭議政王大臣等。聞將軍噶爾漢。提督徐治都。以偏師深入四川。兩次擊敗賊寇。恢復巫山。夔州。今又圍困雲陽縣。總督哈占。進兵已久。何以至今未達。應亟進兵。從後夾剿。如仍前遲延觀望。貽誤軍機。即以軍法從事。決不姑恕。速移檄趣之。又諭。四川逆賊猖獗。皆由諸將畏怯瞻顧。不竭力剿禦所致。今大將軍貝子章泰等。擊敗賊渠吳世璠。恢復鎮遠。平越。貴陽。諸府。四川漢中將軍大臣。宜乘此機會。并力進剿。毋得仍前觀望。坐失事機。○諭兵部。將軍噶爾漢

等。深入剿賊。轉運糧餉。最為重要。郎中范承勳。已至彝陵。自湖廣進蜀。一路官兵糧餉。可令范承勳身自督趣。毋誤轉運。○九卿議覆。江寧巡撫慕天顏疏言。水利關係民生。臣於蘇常等府。擇其工易費簡者。已次第勸民疏濬。惟常熟縣之白茆港。武進縣之孟瀆河。係蘇常等府。河水出江要道。淤塞甚多。請動正帑銀十萬四千兩。開深建閘。不惟水利克修。飢民亦得赴工覓食。寓賑於工。數善俱備。應如所請。從之。○丙寅。撫遠大將軍都統大學士公圖海疏言。瀘州逃散綠旗官兵。不敢還營。近永寧失陷。建昌路阻。若不速行收撫。將來或投入賊營。或相聚為亂。其害匪細。宜招撫還營。仍給糧補伍。得旨著總督哈占。將軍王進寶。速招逃兵入伍。俾贖罪圖功。○丁卯。振武將軍鄂克濟哈等疏報。臣等於閏八月十八日。率領官兵。恢復瀘州。九月十二日。進兵至托川。呀。與賊遇。自午至酉。我師奮勇攻

擊賊大敗。棄營宵遁。下部議敘。○戊辰。調正藍旗蒙古副都統宗室喇克達。為滿洲副都統。○庚午。四川陝西總督哈占疏報。臣於十月二十四日。已抵保寧。一面酌撥官兵防守。昭化蒼溪諸隘。一面揀選精銳。付總兵官高孟。一路由順慶。蓬州。進取營山。一路由南部。進取營山。復由營山。會取渠縣。俟剿滅逆賊彭時亨。平定川北之後。再進剿川東逆賊譚弘。得旨。保寧關係重要。總督哈占暫駐鎮守。俟將軍王進寶到日。哈占即率大兵剿譚彭二賊。○吏部議覆。直隸巡撫于成龍疏言。凡州縣被劾者。例經府道揭報。督撫訪聞。乃州縣於叅後。復撫拾往事。詳揭府道。漸不可長。請定反噬訐告處分之例。查定例。京察大計。降革官員。有駕言控告者。將所告不准行。有冠帶者革職。無冠帶者送刑部治罪。嗣後被叅官員。將上司訐告者。照此例一體處分。從之。○轉固山貝子宗人府右宗正準達。為左

宗正。固山貝子傅善。為右宗正。○陞鑲黃旗滿洲副都統紀哈里。為蒙古都統。○壬申。上詣

太皇太后宮問安。○癸酉。轉刑部尚書黃機。為吏部尚書。○甲戌。賜諸王。貝勒。貝子。公。內大臣。都統以下。阿思哈尼哈番以上。並滿大學士。學士。九卿。詹事。國子監祭酒等官。清文日講書經解義。各一部。○振武將軍鄂克濟哈疏言。吳丹解將軍任後。兩路官兵。俱臣統領。但建昌。永寧。相去千餘里。一身不能兼顧。請分設一師。進取永寧。

上命署西安將軍佛尼勒。為建威將軍。調遣永寧一路滿漢大兵。與總督哈占。會商剿賊。○予故理藩院侍郎博羅特。祭葬如例。○以散秩大臣一等侯巴渾德。為正黃旗蒙古都統。○乙亥。贈廣東陣亡茂名縣縣丞陶之俊。衛經歷。予祭葬。廕一子入監讀書。○丙子。四川陝西總督哈占疏報。川北總兵官高孟。調遣

官兵擊敗賊衆於南溪橋等處。恢復營山縣。得旨嘉獎。下部議敘。○戊寅。

上詣

太皇太后

皇太后宮問安。○調都察院左都御史魏象樞為刑部尚書。○辛巳。以原任吏部左侍郎陳一炳為刑部左侍郎。管右侍郎事。○壬午。和碩純親王富爾祜倫薨。

上輟朝三日。○癸未。四川陝西總督哈占疏報

川北總兵官高孟進兵羅石橋地方。大敗賊兵。斬獲甚衆。又圍逸賊於靈鷲寨。殺偽總兵魏仰武等。下部議敘。○甲申。綏遠將軍湖廣總督蔡毓榮疏報。山西提督周卜世等於本月十四日進兵攻奪塘頭隘口。十五日恢復思南府。得旨嘉獎。下部議敘。○定遠平寇大將軍固山貝子章泰疏報。偽侍郎郭昌邱元偽總兵臧世遠。齊聘金文臺等。率偽文武各官一百七十五員。兵一千三百餘名投誠。下

部知之。○乙酉。

上詣

太皇太后宮問安。○刑部等衙門議覆。大將軍圖海拏解來京之偽朱三。即楊起隆。又名朱慈瑞。與康熙十二年拏禁之楊起隆妻馬氏。及原夥鄭得勝等。並不認識。且面有刺字疤痕。明係旗下逃人。入楊起隆夥內。知其緣由。遂假借楊起隆之名。於陝西造反。應照律凌遲處死。其馬氏等仍監禁。俟緝獲楊起隆。另結從之。

十二月丙戌朔。予福建陣亡阿達哈哈番滕天成。祭葬如例。○丁亥。賜漢大學士。學士。九卿。詹事。國子監祭酒等官。漢文日講書經解義。各一部。○諭議政王大臣等。今貴州底定。大兵宜速取雲南。況大將軍賴塔兵已抵南寧。大將軍固山貝子章泰。毋分兵向遵義。即速行進定雲南。章泰軍中統領綠旗兵將軍總督提督。隨征總兵官甚多。兵數亦衆。章泰

等進兵時。可於諸大臣內。酌留貴陽。厚其兵力。俾守黔中。至固原總兵官王用予。前曾請取遵義。今宜令王用予速取遵義。即鎮守之。○福建水師提督萬正色。以病乞休。慰留之。○己丑。

上詣

太皇太后

皇太后宮問安。○免直隸唐縣等十三州縣衛本年分旱災額賦有差。○庚寅。湖廣巡撫王

新命疏報。逆賊譚弘。侵犯夔州。掠取糧艘。得旨。夔州乃運糧要地。令護軍統領佟佳。署副都統張長庚。率兵速取夔州。並令王新命速發徐治都新添標兵前往。更檄副都統得爾德。總兵官嚴弘。加意防守。彝陵諸要害。○四川陝西總督哈占疏言。臣今奉命為川陝總督。或駐兩省適中之地。調兵剿寇。或俟將軍王進寶至保寧。臣仍親往滅賊。伏請上裁。得旨。大將軍固山貝子章泰等。已平貴州。

進取雲南。大將軍賴塔。已統率大兵進發。總督哈占。可速剿滅逆賊譚弘。彭時亨等。即遵前旨。同滿漢大兵進討。如或違誤。定如前旨處分。○辛卯。達賴喇嘛達賴汗等。遣使進貢。賞賚如例。○壬辰。陞內閣學士徐元文。為都察院左都御史。○諭議政王大臣等。今大將軍賴塔等。率兵進定雲南。不日自當恢復。一應事機。俱宜預定。移知。大兵直抵賊巢。若賊不能支。窮蹙來降。勿謂輸誠。待以寬典。逆賊吳世璠。吳應麒。胡國柱。夏國相等。諸首惡。俱令駢斬。傳首京師。至盡節官員。察明以聞。大將軍章泰。賴塔等。會合之時。宜作何留兵鎮雲南。及宜發還餘兵。並詳議具奏。○癸巳。以隨征總兵官李芳述。為陝西西寧總兵官。仍令進剿雲南。○署廣西巡撫右理事官麻勒吉疏報。撫蠻滅寇將軍傅弘烈。於貴陽陷賊。賊授以偽職。不屈。十月初六日遇害。得旨。傅弘烈自投誠以來。効力粵西。著有勞績。陷賊。

不屈捐軀殉難。忠節可嘉。深為可憫。應得卹典。著從優議奏。○甲午。諭兵部。覽將軍噶爾漢提督徐治都奏。請調總兵官劉成龍。赴伊軍前。調荊州副都統一員。鎮常德。但今大兵直抵雲南。湖南已入內地。常德不必添發滿兵。劉成龍可速赴噶爾漢等軍前。署副都統。諾敏。率所部往鎮常德。○四川陝西總督哈占疏報。川北總兵官高孟。大敗逆賊彭時亨於渠縣。恢復縣城。得旨嘉獎。下部議敘。○乙未。陞左僉都御史高爾位。為奉天府府尹。○定遠平寇大將軍固山貝子章泰疏報。雲南提督桑峨。援剿左路總兵官陳珀等。自貴陽進剿。十一月初十日。大敗賊於永寧州。復其城。追至雞公背鐵索橋。賊焚橋遁。得旨嘉獎。下部議敘。○以原任四川總督楊茂勲。暫管四川提督事務。調山西太原總兵官周球。為陝西漢中總兵官。○丙申。兵部題請補廣東副都統。

上諭大學士等曰。總兵官拜音達禮。當廣東變亂時。奮勇而出。殊為可嘉。可調為廣東副都統。○丁酉。兵科給事中額倫疏言。各省漕糧。應令道員押運。

上諭大學士等曰。此言極當。自宜允行。運糧為國家要務。今河道狹淺。恐誤運務。著遣大臣一員。將通州以南水淺處。察勘挑濬。爾等可傳諭工部。○以公倭赫。為鑲黃旗蒙古副都統。○定遠平寇大將軍固山貝子章泰疏報。十一月初九日。偽總兵蔡國昌。率所屬弁兵一千一百餘名。及平遠府偽知府鄭開樞等。投誠獻平遠府城。隨令蔡國昌仍統原兵。鎮守平遠。偽文武官員。各給劄付。照舊供職。下部議敘。○戊戌。

上詣

太皇太后

皇太后宮。問安。○以正黃旗護軍叅領班達爾沙。為蒙古副都統。○以多羅順承郡王勒爾

錦因軍機獲罪削爵。命其子勒爾貝襲封多羅順承郡王。○己亥。陞長史楊岱為正藍旗蒙古副都統。○庚子。

上御太和門視朝。王以下文武大臣官員謝賜日講書經解義恩。又文武陞轉各官謝恩。次喀爾喀。厄魯特。進貢使臣等行禮。○

上幸南苑行圍。○辛丑。定遠平寇大將軍固山貝子章泰疏報。普安州土官龍天祐。永寧州土官沙起龍。禮廷試等。傾心向化。各率土兵。

剿敗賊衆。造盤江浮橋。以濟大軍。得旨嘉獎。下議政王大臣等議敘。○揚威大將軍和碩簡親王喇布疏報。偽將軍饒一龍。總兵劉晉文。尹泰。蔡琦等。率文武偽官三十九員。兵五百三十八名。投誠。獻慶遠府城。下部議敘。○敘恢復鳳縣。兩當。武關。漢中。保寧功。授奮威將軍左都督一等阿思哈尼哈番。又一拖沙喇哈番王進寶。為三等精奇尼哈番。准襲十次。陝西固原總兵官右都督王用子。為左都

督。給一拖沙喇哈番。四川重慶總兵官署都督僉事王朝海。為左都督。陝西漢中總兵官署都督僉事費雅達。為署都督同知。副將王萬祥以下。三百七十一員。各加銜有差。○壬寅。議政王大臣等題。順承郡王勒爾錦。以罪削爵。其戶口及所屬佐領。應給與襲爵之子勒爾貝。貝勒察尼。以罪削爵。其所屬佐領。應給與其子察納。得旨。勒爾錦所屬佐領內。著撥兩佐領。給公納墨孫。其餘佐領房產。俱給勒爾貝。察尼所屬佐領。俱給信郡王鄂札。○四川陝西總督哈占疏報。川北總兵官高孟分遣官兵。追逆賊彭時亨。於十一月二十五日。大敗賊衆。恢復廣安州城。得旨嘉獎。下部議敘。○調鑲黃旗蒙古副都統公倭赫。為滿洲副都統。○甲辰。鎮安將軍都統噶爾漢疏言。請自巫山巴東。以至彝陵。俱令副都統得爾德等鎮守。臣等庶可撤防守地方之兵。合力剿賊。而餉道亦可無虞。

上諭副都統得爾德巡撫王新命總兵官嚴弘酌撥滿漢兵固守巫山巴東夔陵諸處保護糧餉勿致疎虞○四川陝西總督哈占疏報偽將軍董清芳率領偽副將易林元等十五員兵二百五十名投誠下部知之○乙巳福建總督姚啟聖疏言請於漳州府設爐鼓鑄錢背用漳字其民間所用前明小錢給價收買銷毀從之○丙午

上駐蹕神山頭○丁未

上駐蹕鞏華城○以海上投誠總兵官朱天貴為浙江平陽總兵官○予廣東陣亡拜他喇布勒哈番又一拖沙喇哈番查漢泰祭葬如例○戊申

上還宮詣

太皇太后

皇太后宮問安○予福建陣亡正藍旗四品典儀賽住祭葬如例○己酉陞四川督標中軍副將吉孫畧為山西太原總兵官○直隸宣

府所屬懷安衛蔚州衛東城西城永衝沙堡地一千八百頃有奇額賦永行豁免○庚戌

上詣

太皇太后

皇太后宮問安○以左副都御史郝浴為廣西巡撫○以鑲黃旗護軍統領二等伯噶都為領侍衛內大臣○敘招撫難民功加江西巡撫安世鼎兵部尚書銜○癸丑歲暮祫祭

太廟

上親詣行禮○遣官祭

永陵

福陵

昭陵

孝陵

仁孝皇后

孝昭皇后○遣官祭太歲之神○旌表八旗節婦滿洲海薩妻清氏等二十九人蒙古西他喇妻阿氏等三人漢軍王朝佐妻尚氏等三

人烈婦滿洲滿圖妻覺羅氏等三人各給銀
建坊如例○是歲人丁戶口一千七百九萬
四千六百三十七田地山蕩畦地五百二十
二萬七千六百六十六頃八十七畝徵銀二
千二百一十五萬五千六百七兩三錢有奇
米豆麥六百二十五萬三百四十五石七斗
有奇草二百四十五萬二千六百一十九束
茶十五萬五千三百六十五引行鹽三百九
十八萬三千七十二引徵課銀三百三十九
萬九千四百六十八兩三錢有奇鑄錢三萬
三千一百三十六萬五千三百六十有奇

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十四

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍無

官吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍無理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十年辛酉春正月乙卯朔

實錄卷九十四

上詣

堂子行禮還宮拜神畢率諸貝勒貝子公內

大臣大學士都統尚書精奇尼哈番侍衛等

詣

太皇太后

皇太后宮行禮御太和門王以下文武各官外

藩王及使臣上表朝賀停止筵宴○朝鮮國

王李焞遣陪臣金壽興等表賀冬季元旦

萬壽節及進歲貢禮物宴賚如例○丁巳

上詣

太皇太后

皇太后宮問安○定遠平寇大將軍固山貝子

章泰等疏言據雲南提督桑峨等報賊衆一

萬三千人欲據盤江臣即遣前鋒統領薩克

察巴圖魯等率兵至鐵索橋諸處令其固守

上諭廣西大兵已入滇境貝子章泰等兵宜乘

機速行進剿今大兵秣馬貴陽已經月餘且

鐵索橋盤江最為要地提督桑峨等既報逆

實錄卷九十四

賊欲據盤江貝子章泰總督蔡毓榮等不躬

親馳赴扼據要害撲滅賊寇止遣薩克察巴

圖魯等率兵前往殊非事宜章泰等其親統

大兵迅往剿賊平定滇中勿失機會○己未

孟春享

太廟

上親詣行禮○出征病故都統范達禮櫬回遣

大臣一員侍衛四員往奠茶酒○庚申

上詣

太皇太后宮問安○辛酉。

世祖章皇帝忌辰。遣官祭

孝陵○定遠平寇大將軍固山貝子章泰等疏

言。雲南土司龍天佑迎降。請身率土兵防守

要隘。

上命以龍天佑為都督僉事。管領土司總兵官

○甲子。

上詣

太皇太后

甲子 卷八十九

皇太后宮問安○丙寅。諭議政王大臣等曰。貝

子章泰等。若乘逆賊敗走雲南之際。即行追

躡。則雲南蚤已蕩平。乃先借秣馬逗遛。今復

以逆賊肆犯推諉。殊屬不合。目前逆賊困迫

已極。旦夕滅亡。若不乘機剪除。恢復滇土。更

需何日。且大將軍賴塔等。兵抵田州。即進定

雲南。為日已久。章泰等於諭旨到日。即率滿

洲綠旗大兵之半。速進雲南。至於貴州。亦屬

重要。可選賢能大臣。及總督提督等。統所留

之兵。令其固守。章泰等若仍前逗遛。不疾馳

進定雲南。旋師日。從重治罪○雲南提督桑

峨疏言。雞公背鐵索橋。乃險要重地。悉為我

有。滇省蕩平。可立而待。雲南舊設七鎮。分汛

防守。請敕部豫選能員。馳赴軍前。

上命以候補總兵官馬山。偏圖為雲南總兵官。

其餘五鎮員缺。俟雲南收復日。遴補○已巳。

上御太和門視朝。文武陞轉各官謝恩。次厄魯

特進貢使臣等行禮○庚午。

上詣

太皇太后

皇太后宮問安○辛未。理藩院議覆。工科給事

中雅齊納疏言。外藩蒙古入貢。每有奸惡通

事。詭計騙誘。宜加嚴禁。應如所請。

上曰。此奏極為中理。光棍人等。每指稱通事。豫

往邊外。羈占外藩貿易之事。情罪可惡。應令

理藩院。嚴行禁止○壬申。定遠平寇大將軍

固山貝子章泰等疏報。原任貴州提督從逆

李本深及大小文武官悉繳偽印劄。相繼歸誠。

上命解送李本深來京。餘員量行安插。俾其得所。○癸酉。

上詣

太皇太后

皇太后宮問安。○定遠平寇大將軍固山貝子章泰等疏報雲南提督桑峨招撫到偽總兵徐朝慶劉大壽及偽文武官員羅應鳳等俱

至軍前。繳偽印劄投誠。下兵部知之。○四川陝西總督哈占疏報川北總兵官高孟恢復鐵山關後。即率兵至達州。賊棄城遁。官兵追剿。殺賊兵一百餘人。獲器械無算。恢復州城。得旨嘉獎。下部議叙。○甲戌。授和碩康親王傑書庶出子尼他哈和碩顯懿親王福壽庶出子拜查禮。輔國公化善子薩木黨俱為三等輔國將軍。輔國公法塞子阿裕爾。輔國將軍泰布子索達塞。輔國將軍巴爾善子增壽。

俱為三等奉國將軍。○鎮安將軍都統噶爾漢疏報。逆賊譚弘已於康熙十九年十二月十一日死。臣等率兵進剿。敗賊衆於雲陽縣地方。擒偽總兵向旭輝等。恢復縣城。譚弘子譚天秘。震懼焚萬縣巢穴而遁。萬縣開縣建始縣梁山縣忠州悉平。得旨嘉獎。下部議叙。○廣西提督哲爾肯疏報大桂山賊寇黃明等投誠。下部知之。○乙亥。以覺羅席特庫為鑲黃旗蒙古副都統。○命兵部右侍郎溫代督理挑濬通州運河。○丙子。諭兵部。今譚弘黨羽俱已就戮。萬縣諸地悉經收復。將軍噶爾漢其簡選士馬疾赴重慶。盡統貝子準達軍。速定遵義。副都統得爾德等兵亦聽調用。萬縣地處狹隘。難以飼馬。可趨至重慶。秣馬而進。噶爾漢軍中効力有年。困乏無馬者。悉令準達率還荊州。至於夔州要地。令提督徐治都率標兵暫駐防守。總督哈占可率所屬兵馳赴叙州府。與大兵協力。前驅剿滅。○丁

丑。予故原任工部右侍郎張問政祭葬如例。
○予故廣東陣亡佐領岳洛祭葬如例。○定
遠平寇大將軍固山貝子章泰疏報偽文武
官升周文智等共二百九十三員各獻偽印
陸續投誠下部知之。○戊寅。

上詣

太皇太后

皇太后宮問安。○郎中額爾赫圖疏言軍糧僅
供目下之用。請速撥餉米接濟。

上諭大兵糧餉所關重大。巡撫王新命可先撥
湖廣銀十萬兩。星夜解交郎中額爾赫圖。至
由川江運送兵米。亦宜乘此水退之時。源源
不絕。速運軍前。如或遲緩。貽誤軍機。所司各
官俱按軍法重懲。不宥。○辛巳。祈穀於
上帝。

上親詣行禮。○撫遠大將軍都統大學士公圖
海疏言。逆賊併力來犯四川叙州諸處。臣請
親率兵赴援。

上諭大將軍公圖海既調副都統翁愛率所部
官兵自成都往援叙州。總督哈占總兵官高
孟。又各率官兵赴叙。圖海其仍駐漢中。防守
秦蜀。○諭翰林院日講官敷陳經史。日侍顧
問。贊襄典學。職務繁多。宜廣其員。以彰右文
之治。見在滿官足用。漢官尚宜增添。著即開
列應用各員職名具奏。○諭都察院祭祀以
承上下神祇。理宜敬慎。近見陪祭各官跡涉
慢易。班行不整。笑語自如。殊失執事有恪之
道。爾衙門職在察劾。未見指名奏所司何
事。其嚴飭之。○諭吏部都察院國家設官分
職。各有專司。必勤勵辦事。乃克勝任。近見各
衙門官員有虛糜俸祿。懶惰不上衙門者。有
老疾孱弱。不能任事者。應分別勤惰。以示勸
懲。堂上官員。爾等開列具奏。所屬官員會同
各該堂官分別議奏。○諭三法司帝王以德
化民。以刑弼教。莫不敬慎庶獄。刑期無刑。故
讞決之司。所關最重。必聽斷明允。擬議持平。

乃能使民無冤抑。可幾刑措之風。近覽法司章奏。議決重犯甚多。愚民無知。身陷法網。或由教化未孚。或為饑寒所迫。以致習俗日偷。愍不畏法。每念及此。深為憫惻。在外督撫臬司。及問刑各官。審理重案。有律例未請定擬。失當草率完結者。有膠執成見。改竄供招。深文羅織者。有偏私索詐。受囑徇情。顛倒是非者。有一於此。民枉何由得伸。以後著嚴加申飭。內外大小問刑各衙門。洗心滌慮。持廉秉公。務期原情準法。協於至當。不得故縱市恩。亦不得苛刻失入。痛改積習。加意祥刑。以副朕尚德好生。欽恤民命至意。○癸未。陞大理寺卿劉汝漢為都察院左副都御史。○贈殉難撫蠻滅寇將軍太子太保廣西巡撫傅弘烈。太子太師。予祭葬。加祭一次。謚忠毅。廕一子入監讀書。○贈陣亡遊擊陳璠叅將。都司僉書蕭萬奇。遊擊。守備高有功。馮俊。都司僉書。各予祭葬如例。○朝鮮國王李煒妃金氏

故。遣官致祭。○甲申。

上詣

太皇太后

皇太后宮。問安。○以都察院左都御史徐元文。

充經筵講官。○以一等侍衛費賜古。為內務

府總管

二月。乙酉朔。春分。朝

日於東郊。遣理藩院尚書阿穆瑚朗行禮。○丁

亥。遣大學士杜立德。祭

先師孔子。○

上詣

太皇太后

皇太后宮。問安。○吏部。都察院。遵諭開列各衙

門堂官具題。得旨。禮部尚書塞色黑。戶部左

侍郎田六善。右侍郎朱裴。俱著原品休致。○

戊子。祭

大社。

大稷。

上親詣行禮○已丑。

上御太和門視朝。文武陞轉各官謝恩○直隸巡撫于成龍來京陛見。

上召至懋勤殿。問曰。爾為今時清官第一。殊屬難得。聞爾昔在黃州。土寇嘯聚。爾往招之。即時投順解散。何以致之。于成龍奏曰。此皆藉皇上威德。臣有何能。

上因問屬吏亦有清廉者否。于成龍以知縣謝錫來。同知何如玉。羅京對。

上曰。爾前所叅知縣趙履謙甚當。于成龍奏曰。趙履謙過而不改。臣不得已而叅之。

上曰。為政之道。當知大體。小聰小察。不足為多。且人貴始終一節。爾其勉之。○以正黃旗故阿思哈尼哈番又一拖沙喇哈番圖美子拖克他漢襲職。○庚寅。理藩院左侍郎達哈塔以病乞休。允之。○兵部題。恢復海壇。及廈門。金門地方。係提督萬正色密遣人至偽總督朱天貴處。豫定投誠。然後率兵進取。以致各

島敗遁。恢復空地。並無殺賊攻克之處。應俟提督萬正色巡撫吳興祚明白回奏之日。再議。得旨。進剿海賊一案。原係吳興祚萬正色會同定議。不俟荷蘭國船隻。即奮勇前往。志靖海氛。萬正色領水師。先行出洋。吳興祚率陸兵。互為聲援。驅除海逆。克奏膚功。爾部乃稱萬正色與朱天貴密約投誠。任意妄奏。以為濫冒軍功。殊屬不合。著遵前旨。即行議叙。○科爾沁多羅貝勒鄂緝爾故。遣官致祭。○辛卯。

上詣

太皇太后

皇太后宮問安。○福建總督姚啟聖。巡撫吳興祚先後具疏。請開邊界。俾沿海人民復業。得旨。廈門。金門諸處。已設官兵防守。應如所題。照舊展界。如有奸民。借此通賊者。仍令嚴行察緝。○蕩寇將軍固山貝子準達疏報。正月初二初三兩日。我師水陸進剿。大敗賊衆於

牌華洞等處地方斬獲無算。恢復長壽。墊江等縣。得旨嘉獎。下部議叙。○壬辰。

太皇太后聖壽節。

上率王以下。文武大臣侍衛等詣

太皇太后宮行禮。遵

懿旨。停止筵宴。○癸巳。諭戶部。直省清察隱占

田畝。州縣有司。或利其陞叙。虛報田糧。攤派

民間。致滋苦累。亦未可定。爾部可檄行直省

督撫。著嚴行察覈。以除其弊。○吏部。都察院

遵諭甄別各部院司屬官員。年老懶惰。不稱

職者。共十一員。均應照例處分。得旨。翰林院

侍讀李來泰。從寬免革職。仍留任。餘依議。○

甲午。以重修

奉先殿告成。告祭

太廟。遣內大臣公福善行禮。○皇子允禩生。○

上以逆賊尚之信。在廣東令其部人。私充鹽商。

據津口立總店。又逆賊耿精忠。在福建橫征

鹽課。擅設報船。苛派夫驛。勒索銀米。久為民

害。命該部檄各督撫。悉革除之。又逆賊吳三桂。在雲南。曾以沐氏莊田。賜給為藩莊。其藩下官兵。侵占民田。擅為已利。命戶部檄該督撫。事平之日。察出給還小民。○陞詹事格爾古德。為內閣學士兼禮部侍郎。太常寺卿張雲翼。為大理寺卿。○以翰林院侍讀學士孫在豐。侍講湯斌。檢討秦松齡。編修曹禾。檢討朱彝尊。嚴繩孫。左春坊左贊善徐乾學。編修王頊齡。檢討潘耒。充日講起居注官。○九卿議覆。奉差盛京查議鹽政戶部侍郎達都疏言。盛京地方。係招徠安插之民。其烏喇以內居住之人。並新滿洲邊外蒙古等。盡屬窮苦。自康熙十八年。召募商人。呂進寅等。領引行鹽徵課。無幾。而鹽價騰貴。將及二倍。窮民難以資生。請停止銷引。民人有情愿煎鹽發賣者。聽其自行貿易。不許豪強霸佔。更敕奉天將軍。并戶部侍郎。查緝嚴禁。應如所請。從之。○授雲南土司總兵龍天佑。為都督同知。以

自首偽將軍線纈。所授偽牌故也。○乙未恭捧

太祖高皇帝。

孝慈高皇后。

太宗文皇帝。

孝端文皇后。

世祖章皇帝。

孝康章皇后。

仁孝皇后。

孝昭皇后神位。入

奉先殿。

上親詣致祭行禮。○

孝康章皇后忌辰。遣官祭

孝陵。○丙申。遣官祭

先農之神。○諭學士庫勒納等。立隸巡撫于

成龍。自起家外吏。即以廉明著聞。歷陞巡撫。

益勵清操。自始至終。迄無改轍。凡在親戚交

遊相請託者。槩行峻拒。所屬人員並戚友間。

有餽遺。一介不取。朕甚嘉之。知其歷官廉潔。

家計涼薄。茲特賜內帑白金一千兩。朕親乘

良馬一匹。于成龍既膺寵賚。想當益加砥礪。

朕又親製詩一章。嘉其廉能。當更賜之。○戶

部題。故平南王尚可喜子尚之隆。請給其父

在日所賜海州房地。得旨。平南王忠誠勞勩。

堅守臣節。其房地。遣司官一員。速往撥給。

丁酉。

上詣

太皇太后

皇太后宮問安。○

上御經筵。○遣官祭

歷代帝王。○遣都察院左副都御史科爾坤

等前往陝西察審寧夏道柏成棟揭甘肅巡

撫巴錫貪賄一案。諭之曰。屬官訐告上司。原

無此例。爾等前往務期虛公詳審。若巴錫等

負朕擢用。果有貪穢之迹。可嚴加議罪。若柏

成棟等自知有罪。懼禍誣告。其情可惡。應從

重定罪以聞○戶部議覆兵科給事中額倫疏言漕運關係國計運官職分雖卑領運糧數萬石嗣後不必輪流坐派請選年壯賢能者庶克勝任至運丁亦應令漕臣選殷實者充運庶不致欠糧誤漕又通惠河分司向係三年更差今一年一替為期不久則於河道淤淺之處不能悉知挑修不能遍及請仍三年更替俱應如所請從之○戶部議覆奉差大同賑濟員外郎多鼐等疏言大同府屬所貯米穀八千餘石不敷賑濟應令多鼐等會同巡撫將大同奏銷存剩豆石并見貯庫銀五萬兩動支給賑得旨依議速行○四川陝西總督哈占疏報川北總兵官高孟等率兵至東鄉縣偽總兵李正國帶賊四千有餘盤踞縣城我兵分路夾剿奪門而入殺賊兵一千六百餘名生擒二百餘名恢復縣城得旨嘉獎下部議叙○戊戌廣西巡撫郝浴陛辭上諭之曰為外官者以愛養百姓懲貪獎廉為

要。不必以苛察為明。務使德勝於才。始為可貴。若專徇情面。不顧公事。則悖理甚矣。又廣西乃出米之地。爾宜多方設法。廣儲糧米。以應軍需。○添設欽天監滿監副一員○己亥。孝昭皇后三週忌辰。遣皇子諸王以下。八旗四品以上官致祭。○調兵部尚書郭四海為禮部尚書。陞內閣學士李天馥為戶部左侍郎。都察院左副都御史李仙根為戶部右侍郎。轉理藩院右侍郎阿喇尼為左侍郎。陞大理寺卿明愛為理藩院右侍郎。○庚子。清明節。遣官祭
永陵。
福陵。
昭陵。
孝陵。
仁孝皇后。
孝昭皇后○陞內閣侍讀學士達岱為詹事府詹事○辛丑。以奉移

仁孝皇后

孝昭皇后梓宮往陵寢遣皇子諸王以下八旗三品以上官致祭○旌表福建節婦寧化縣賴朝會妻黎氏給銀建坊如例○四川陝西總督哈占疏報總兵官高孟領兵進剿逆賊彭時亨於月城寨地方大敗賊衆擒斬無算下部議叙○厄魯特噶爾瑪戴青和碩齊等遣使進貢賞賚如例○壬寅

上詣

太皇太后宮問安○

上至鞏華城駐蹕○鎮安將軍都統噶爾漢疏報彝陵總兵官嚴弘招撫到偽總兵趙克禮恢復施州衛城得旨嘉獎下部議叙○癸卯

仁孝皇后

孝昭皇后梓宮啟行。

上親臨送王以下滿漢官員及公主王妃以下大臣命婦以上俱齊集舉哀跪送是日

上駐蹕奶子坊○山西巡撫穆爾賽疏言請發

帑銀二十萬賑濟饑民戶部議給其半。

上曰聞太原大同等處百姓甚饑朕心深為憫惻亟宜賑濟俾各得所著照該撫所請發銀二十萬兩遣郎中明額禮等速往分行賑給○甲辰

上駐蹕平家灘○乙巳

上駐蹕加官營○征南大將軍都統賴塔疏報偽將軍何繼祖等擁衆萬餘距安籠所三十里堅據石門坎隘口拒敵臣等統領滿漢官兵至西隆州先令都統勒貝希福馬緝護軍統領額赫納等率前隊官兵進剿臣與副都統洪世祿赫勒布總督金光祖分兵二隊以繼其後本年正月初一日大敗賊衆斬殺甚多奪石門坎隘口恢復安籠所城偽總兵陳義魁率衆迎降得旨嘉獎下部議叙○丙午

上駐蹕新屯○丁未

上駐蹕孫家莊○叙克復海壇廈門金門功給福建巡撫吳興祚拜他喇布勒哈番又一拖

沙喇哈番。水師提督太子少保左都督萬正

色。拜他喇布勒哈番。授援剿左鎮總兵官林

賢。右鎮總兵官陳龍。前鎮總兵官黃鎬。後鎮

總兵官楊嘉瑞。為左都督。恭將以下。各給世

職有差。○旌表福建烈女武平縣鍾廷楷聘

妻林氏。給銀建坊如例。○戊申。

上駐蹕黃家莊。○四川陝西總督哈占疏言永

寧一路大兵急需糧餉。秦民輸運軍需。困敝

已極。若於永寧瀘州諸處採買支給。兵民兩

便。得旨。陝西巡撫鄂愷等支西安庫銀六萬

兩。遣賢能官會同永寧道於永寧瀘州諸處

採買。四川巡撫抗愛。布政使劉顯第等督趣

監運。勿誤軍需。○己酉。

上謁

孝陵。舉哀行禮畢。親往

仁孝皇后

孝昭皇后地宮相視。○是日駐蹕龍門口南。○

庚戌。

上駐蹕馬蘭峪城南。○是日。

仁孝皇后

孝昭皇后梓宮至

陵所。奉安於享殿。○辛亥。

上率諸王以下。滿漢三品官以上。詣

孝陵致祭。○貴州巡撫楊雍建疏言貴陽省會

尚有未燬民居。宜令流散人民。復其本業。量

減徭役。俾得補葺室廬。至貴陽南北大路。居

民皆新經招集。亦應量減差徭。其供應夫役

私派。並請禁止。得旨。該撫速行設策招集流

民還業。務令得所。除供應大兵諸正役外。有

以私事借端多索人夫擾民者。即指名劾奏。

兼檄在黔將軍提鎮。令嚴加禁緝。○征南將

軍都統穆占等疏報。偽大將軍高啟隆。偽將

軍夏國相。王會。王永清。張足法。楊應選。儂朋

等。擁眾二萬餘人。屯踞平遠西南山上。臣與

提督趙賴。率滿漢官兵。於正月二十二日進

擊。連敗之高啟隆等。俱遁走。王會率其標下

弁兵詣軍前降。遂復平遠府。得旨嘉獎下部議叙。

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十四

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十五

監修總裁官光祿大夫太保無太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保無太子太保保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍無理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十年辛酉三月甲寅朔宣威將軍鄂

實錄卷九十五

克濟哈等以建昌官兵棄城突出自勦不能救援乞嚴加處分。

上諭將軍鄂克濟哈久駐成都既不能退叙州諸處來犯之賊復不馳援建昌以致失陷著解將軍任還漢中同大將軍公圖海守漢中諸處以都統覺羅紀哈里為宣威將軍統其所部官兵馳赴將軍總督趙良棟軍前會商剿賊○丙辰貴州巡撫楊雍建以軍興旁午請停貴州本年鄉試於壬戌年補行從之○

定遠平寇大將軍固山貝子章泰疏報臣等統兵於二月初五日。至安南衛。偽將軍線絨等率衆萬餘據江西坡。臣令總兵官白成勛等進擊抵沙子哨賊列陣驅象下山拒戰。自午至酉。我軍分三隊奮擊斬獲無算賊帥夜遁。初十日遣副都統龔圖署副都統達漢泰等自臘茄坡追賊再戰復敗之。恢復新興所。普安州二城得旨嘉獎。下部議叙。○建威將軍佛尼勒疏報副將李常輔遊擊周應鳳等於二月十九日進兵恢復五龍縣城得旨嘉獎。下部議叙。○丁巳。蕩寇將軍固山貝子準達疏言請仍率原轄之兵進取遵義。上諭準達自抵重慶並無寸功。今若復令統兵必誤事機。其遵前旨率疲兵速回荊州。令將軍噶爾漢疾馳進取遵義。○戊午。以仁孝皇后孝昭皇后梓宮奉安地宮。遣官告祭天地。

實錄卷九十五

二

宗廟。

社稷。

孝陵○己未。

上於

孝陵繚垣內東南駐蹕○庚申。

上詣

孝陵奠酒舉哀○遣康親王傑書莊親王博果

鐸分詣

仁孝皇后

孝昭皇后梓宮前。讀文致祭。奉移

梓宮於地宮前享殿○遣官祭

昌瑞山

后土之神○辛酉。

上臨享殿。王以下滿漢大臣齊集。寅時奉移

仁孝皇后

孝昭皇后梓宮安葬地宮。

仁孝皇后居左。

孝昭皇后居右。

上親奠酒。王以下滿漢大臣等行禮。賜

皇后陵總管禪佈等銀幣有差。○是日。

上回鑾。駐蹕孫家莊北。○壬戌。建威將軍佛尼勒疏報。偽將軍胡國柱等率賊衆二萬餘。犯賓壩大溪口諸處。臣率滿漢官兵進擊大破之。乘勝恢復馬湖府。得旨嘉獎。下部議叙。○癸亥。

上駐蹕三河縣東。○先是命鎮安將軍噶爾漢同總兵官王用子進取遵義。至是江西總督董衛國疏報。山西提督周卜世等率兵恢復遵義府。殺賊甚衆。偽將軍馬寶棄城走。復犯瀘州。叙州諸處。

上諭噶爾漢不必赴遵義。率兵馳赴叙州。速剿逆賊。竟入雲南。王用子亦率兵與噶爾漢同至叙州。滅賊之後。即駐叙州鎮守。○甲子。

上駐蹕通州河東。○征南大將軍都統賴塔疏報。賊將何繼祖等自石門坎敗遁。至新城所。會偽將軍詹養等率衆二萬人。據黃草壩。驅

衆迎敵。臣於二月初二日。分布滿漢官兵。自

卯戰至未。賊大敗。奪其營二十二。生擒偽將軍詹養。王有功。及賊衆千餘。今獲象馬無算。得旨賴塔自閩廣深入雲南。獨先諸路大敗逆賊。調度有方。將士奮勇殊屬可嘉。有功人員。俱著從優議叙。○征南將軍都統穆占等疏報。二月初八日。遣副都統莽奕祿遊擊王成功等領兵四千追剿。賊將張足法等拒敵。我兵連奪三山。賊敗走高家橋。再戰。又奪其橋。陣斬千餘人。墜崖死者無算。擒獲甚多。下部議叙。○穆占又疏報。二月十八日。收復黔西大定府城。擒偽巡撫張維堅等斬之。水西土司安勝祖等效順助餉。又率其屬阿五等協力剿賊。得旨嘉獎。下部議叙。○乙丑。

上回宮。詣

太皇太后

皇太后宮問安。○丙寅。

上詣

太皇太后

皇太后宮問安○甘肅巡撫巴錫疏報慶陽所屬地方有賊渠耿飛。僭稱王。設偽總兵副將等官。

上命大將軍公圖海將軍侯張勇提督孫思克等。速遣官兵赴剿○贈福建殉難邵武府知府張瑞午。建昌府知府高天爵。俱太僕寺卿。邵武府同知高舉。按察使司副使。各予祭葬。廕一子入監讀書。武舉胡守謙給卹銀。廕一子以衛千總用。胡守謙妻殉死。旌表如例○戊辰。

上御太和門視朝。文武陞轉各官謝恩。次喀爾喀進貢使臣等行禮○已巳。

上詣

太皇太后宮問安○征南大將軍都統賴塔疏報。大兵自黃草壩前進。二月十二日。抵曲靖府。偽總兵尹士元。偽道員劉世忠。率各偽官投誠。臣即於是日遣兵進取交水城。斷賊中

路。據守中路偽將軍線絨等皆遁走。十五日。都統希福馬緝等自曲靖府起行。恢復馬龍州。易龍所。十六日。恢復楊林城。聞賊於渾水塘。嵩明州等處立營。乃遣李蘭大碩塔等。先剿嵩明州賊。奪門入城。賊皆遁走。追殺甚多。生擒偽遊擊一人。守備二人。賊兵百餘人。是夜。渾水營七賊亦皆遁走。得旨嘉獎。下部議叙○定遠平寇大將軍固山貝子章泰。征南大將軍都統賴塔。綏遠將軍湖廣總督蔡毓榮等。各疏報。臣等統兵先後至雲南省城。營於歸化寺。二月二十一日。賊吳世璠遣偽將軍胡國柄等率馬步兵萬餘人出城列象陣拒戰。臣等率滿漢兵分隊進擊。自卯至酉。大敗賊衆。追至城門。陣斬偽將軍胡國柄。劉起龍。及偽總兵九員。生擒六百餘人。獲甲仗旗幟馬匹無算。得旨嘉獎。下部議叙○陞光祿寺卿恕舒為大理寺卿○以刑部郎中錢捷為貴州按察使司僉事提調學政○庚午。諭

戶部倉場侍郎等曰。近聞各倉發米。多雜土塵。有賄賂者給好米。經營之人。種種作弊。上下串通。侵欺盜取者甚多。此米係人生命。朕一經體察。務將始末澄清。爾等應知此等情弊。若不加嚴察。永行杜絕。是知而自取戮矣。○陞翰林院侍講學士張玉書。為內閣學士兼禮部侍郎。○辛未。

萬壽節。

上率諸王。貝勒。貝子。公。內大臣。大學士。都統。尚書。精奇尼哈番。侍衛等詣

太皇太后

皇太后宮行禮。御太和門。王以下。文武各官。上

表慶賀。停止筵宴。○遣官祭

福陵。

昭陵。

孝陵。

仁孝皇后。

孝昭皇后陵。○遣官祭真武東嶽城隍之神。○

壬申。陞左都御史折爾肯為兵部尚書。○以翰林院侍讀阿山充日講起居注官。○癸酉。

太皇太后聖躬違和。

上奉

太皇太后。幸遵化州湯泉。是日啟行。

上詣

太皇太后宮。候

太皇太后登輦。

上隨輦步行。出東華門。始乘馬。至進膳駐輦處。

上親扶

太皇太后降輦。入行宮。俟膳畢。候

太皇太后登輦。

上扶輦行數武。始乘馬隨行。駐蹕李家橋。○諭

內大臣等。今當田禾發生之候。駐扎車馬。應

擇荒野之地。以避田禾。可令戶部司官。隨後

稽察。犯者嚴加議處。回鑾時。仍即從原路行。

朕將親察之。○調戶部左侍郎達都為吏部

左侍郎。管右侍郎事。○陞光祿寺卿崔澄為

太常寺卿。兵部郎中阿蘭泰為光祿寺卿。先是諭兵部。佛尼勒報。瀘州江岸屯賊敗走。今大將軍貝子章泰賴塔等兵已抵雲南省城。大敗賊衆。其城旦夕可下。度叙州賊將胡國柱等聞之。必將逃遁。佛尼勒。趙良棟等可即躡追剿滅。至是賴塔等疏言。大兵已逼雲南省城下。掘壕圍之。吳世璠嬰城死守。又陰調在蜀賊將馬寶。胡國柱。夏國相等歸援。又將軍佛尼勒等復疏報。叙州賊將胡國柱等悉遁。

上諭。逆賊胡國柱等。退援雲南。事關重大。將軍佛尼勒。趙良棟等。於文到之日。即各統官兵。速行躡擊。勿令得援雲南。將軍噶爾漢。紀哈里等到日。亦與佛尼勒等。協同追剿。如有遲延觀望者。治以失機之罪。○監察御史常錫布疏言。貝勒以下。降封至輔國公者。請停其降封。將一子世襲公爵。從之。○甲戌。

上駐蹕三河縣圖東馬房。○乙亥。

上駐蹕薊州鄭家莊北。○吏部尚書吳達禮。以病乞休。允之。○丙子。

上駐蹕遵化州稻地里。○諭大學士等曰。國家事務。關係重大。必當敬慎詳審。今自京所奏政事。三日彙送一次。朕恐一時有不及檢。爾等其詳閱之。學士亦公同理事之官。如有意見。亦應陳說。毋謂大學士等閱畢。即緘默不言。舊例。批紅本發出之事。內有不合。尚令啟奏。今雖已發本章。爾等務加公同詳閱。○丁丑。

上駐蹕遵化州蔡家莊南。○戊寅。

上駐蹕遷安縣白布店村北灤河岸。○陞順天府府尹宋文運為都察院左副都御史。○庚辰。

太皇太后駕至湯泉。

上駐蹕遵化州城東南。○辛巳。

上詣

太皇太后行宮。問安畢。率諸王大臣侍衛等詣

孝陵奠酒舉哀。次至

仁孝皇后

孝昭皇后陵。命皇子等行禮。奠酒。是日。駐蹕鮎

魚池城內。○宴衍聖公孔毓圻等於禮部。○

壬午。

上詣

太皇太后行宮問安。○

上詣

孝陵致祭。○癸未。祭純親王隆禧。

上親臨奠酒舉哀。○遣皇子等詣

仁孝皇后

孝昭皇后陵致祭。○以原任副都統蘇虎濟為

孝陵總管

夏。四月。甲申朔。享

太廟。遣內大臣伯噶都行禮。○

上詣

太皇太后行宮問安。○建威將軍佛尼勒疏報

固原總兵官王用子。率兵恢復納溪。江安。仁

懷合江等處。偽將軍何德成等率所屬兵丁

投誠。得旨嘉獎。下部議叙。○予故輔國將軍

恩克布祭葬。謚溫僖。○乙酉。

上駐蹕

孝陵紅門外。○葬純親王隆禧。

上親臨奠酒舉哀。諭內大臣覺羅塔達等純親

王櫬。於今日酉時安窆。朕欲親視。因恭親王

常寧等奏言。王妃櫬在旁。恐屬不便。請於未

葬前往視。即回。故朕先行。爾內大臣侍衛等

俟視安葬事畢。乃還。○丁亥。

上詣

太皇太后行宮問安。○裁江南安徽驛傳道江

寧船政同知。二缺。○定遠平寇大將軍固山

貝子章泰疏報。偽將軍韓天福等擒防守武

定。偽總兵王來吉。何興祚。獻武定府城。投誠。

下部議叙。○戊子。

上詣

太皇太后行宮問安。○

上駐蹕三屯營西南○命學士禧佛往遵化州諭知州鄭僑生曰鮎魚池周圍地畝不許蹂踐雖屢經傳旨嚴諭未必無碍田禾著知州親行細察所傷地畝若干應納錢糧若干俟回鑒日轉奏○庚寅

上駐蹕喜峯口外北臺○征南將軍都統穆占等疏報偽將軍楊應選率領所屬弁兵投誠下部知之○浙江總督李之芳疏報偽將軍劉天福等率衆投誠下部知之○刑部議覆安徽巡撫徐國相疏言捕役緝盜有司混給批牌以致任意越境作奸害及無辜嗣後關提人犯應令有司詳請本省督撫移咨鄰省督撫轉飭該地方官添差緝捕不許擅給批牌竟行拘提從之○辛卯

上駐蹕寬城北五里○壬辰
上駐蹕達希喀布泰地方喀喇沁杜楞郡王札什鎮國公烏忒巴喇等來朝○勇畧將軍雲南貴州總督趙良棟疏報偽副將劉友功程

應貴等率衆投誠下部知之○建威將軍佛尼勒疏報三月十五日偽將軍宋國輔陸道清等率偽弁兵投誠獻永寧城下部議叙○癸巳

上駐蹕察罕和屯翁牛特鎮國公奇他忒等來朝○甲午

上駐蹕烏闌布爾哈蘇地方教漢多羅郡王扎穆蘇薩穆珀爾等來朝○贈四川殉難提督伯王之鼎太子少保給拜他喇布勒哈番予祭葬加祭一次謚忠毅總兵官費雅達左都督太子少保給拜他喇布勒哈番予祭葬加祭一次謚忠勇○乙未

上駐蹕西爾哈畢喇地方土默特固山貝子滾濟斯札布來朝○丙申

上駐蹕拜察地方○湖廣提督徐治都疏言逆賊譚弘之子譚天秘勢窮力蹙遁入山麓臣率官兵進剿因轉餉維艱臣已留兵扼守要地并相機招撫於三月初十日自萬縣還駐

夔州。

上諭巡撫王新命。郎中范承勲等。乘川峽未漲。速運糧米。用濟軍需。苟有稽延。俱以貽誤軍機治罪。○建威將軍佛尼勒疏言。臣所部兵。由陝入蜀。征剿歷有年所。致馬匹軍械缺壞。如率此兵前進。似屬無濟。請以重慶護軍統領佟佳等所部。每佐領護軍各二人。將軍噶爾漢等所部。兵內撥每佐領驍騎各三人。西安副都統翁愛所部。兵八百人。付臣等統領。進定雲南。又將軍紀哈里所部。兵盡發建昌一路。漢中。陝西。諸處竟致空虛。請以年久困乏之兵。遣赴大將軍公圖海軍。令防守漢中諸路。

上諭。今諸路逆賊。俱遁還雲南。將軍噶爾漢。即馳會將軍佛尼勒軍。每佐領簡六七十人。以留駐兵丁之馬給之。躬自統率。同總督哈占等。前進雲南。佛尼勒量率留兵防守叙州諸處。其無馬之兵。令署副都統覺和託率赴漢中。

將軍紀哈里。每佐領簡官兵六七十人。同總督趙良棟。速進雲南。如有無馬者。令副都統恰塔。率回成都防守。○殉難雲南貴州總督甘文焜。親回京師。遣大臣一員。侍衛十員。往奠茶酒。加贈兵部尚書。予祭葬。謚忠果。廕一子入監讀書。○丁酉。

上駐蹕和爾和地方。○諭喀喇沁杜楞郡王扎什等曰。喀喇沁故塔布囊何濟吉爾出征時。最著勤勞。今朕至此地。遣散秩大臣等。齊爾等。攜茶酒往奠。○戊戌。

上駐蹕畢爾漢地方。科爾沁台吉敦羅卜來朝。○己亥。駕旋駐蹕烏蘭岡安地方。○庚子。孝端文皇后忌辰。遣官祭昭陵。○

上駐蹕穆雷布爾車爾地方。科爾沁和碩卓禮克圖親王鄂輯爾等來朝。○辛丑。

上駐蹕胡西漢台地方。○以左副都御史劉如

漢為江西巡撫○壬寅。

上駐蹕塔奔海拉斯台地方○削原任山西巡撫圖克善兵部尚書銜。以捏報平陽府蒲縣開墾地畝故也○癸卯。

上駐蹕鄂倫蒿齊忒地方○甲辰。

上駐蹕察罕和屯南。奈曼固山貝子吳勒木濟來朝○議政王大臣等奏克取雲南省城。所關至要。向趣大將軍賴塔等軍。曾遣學士額庫禮前往。今趣將軍紀哈里。噶爾漢等。兩路之兵。應遣部院賢能官各一員前往。

上曰。自京遣官。有需時日。前遣理餉郎中額爾赫圖。范承勲。見在軍中。可令額爾赫圖。赴紀哈里軍。范承勲。赴噶爾漢軍。速趣大兵前進。仍令兼理糧務。大兵進止。逆賊情形。其令不時奏聞○雲南巡撫伊闡疏言。兩路大兵。齊集滇中。請亟令貴州。廣西。二路協濟銀米。

上諭。廣西雲南。相去遼遠。路險山多。且有苗蠻盤踞。大兵糧餉。若由廣西轉運。必致有誤。其

遣戶部郎中明額禮薩木哈。馳赴雲南。與大將軍。將軍。督撫提督等。會同酌議。撫恤人民。設法採買。勿誤軍需。不必由廣西貴州起運○予福建陣亡漢軍佐領金世礪。祭葬如例○乙巳。

上駐蹕達希喀布泰地方○以京畿旱。諭禮部及內務府虔誠祈雨○丙午。

上駐蹕冰窖地方○丁未。

上駐蹕灤陽城○戊申。

上至湯泉。詣

太皇太后行宮。問安。駐蹕鮎魚池城○征南將軍都統穆占疏言。平遠。大定。黔西。遵義。悉經恢復。諸處向有賊將。俱奔赴雲南。貴州無警。臣同副都統花色。宜思。孝。遵。大將軍。章。泰。等。檄率護軍。驍騎。漢軍。兵。每佐領。四人。進征雲南。餘兵。付前鋒統領薩克察巴圖魯。總督董衛國等。留鎮貴州。

上諭。賊雖奔散。黔省有土司苗蠻。雜處。關係匪

輕將軍穆占酌量率兵仍回貴州統攝官兵固守疆土副都統花色宜思考既已前赴雲南薩克察巴圖魯不必赴雲南○調鑲黃旗蒙古副都統覺羅席特庫為滿洲副都統○已酉

上詣

太皇太后行宮問安○免鮎魚關湯泉郭家莊等處田地本年分額賦○定遠平寇大將軍固山貝子章泰等疏報臣等率大兵圍雲南

省城宣布

皇上好生之仁遣使招撫諸路今有大理府偽定遠大將軍東平公張國柱臨安偽總兵徐秉明李三柳羅文獻永順鎮偽總兵郭壯興范應泰姚安府偽親軍車騎後將軍劉漢章偽總兵謝文明自蜀遁回偽親軍鐵騎左將軍楊洪德及偽將軍趙玉楊開運高啟隆劉魁白起昇儂朋邵文魁劉培吾偽總兵高攀喜楊斌等各率所屬偽弁兵呈繳印劄相繼

詣軍門降下部知之○庚戌

上詣

太皇太后行宮問安○叙克復辰龍等處關隘功授援剿右路總兵官王度冲為左都督○辛亥

上詣

孝陵奠酒舉哀次至

仁孝皇后

孝昭皇后陵奠酒舉哀○

上詣

太皇太后行宮問安○勇畧將軍雲南貴州總督趙良棟疏言軍糧告匱臣令各營暫還銅河

上諭大兵見圍雲南省城自蜀前進之兵關係至急郎中蘇赫臣等與該督撫會商務殫心竭力速設策運餉勿誤軍需如誤饋餉致失軍機以軍法從事○壬子

上奉

太皇太后回鑾。親扶登輦。行數步。乃乘馬隨行。駐蹕薊州所屬七里峯村東。○轉戶部右侍郎覺羅沙賴。為左侍郎。陞左副都御史科爾坤。為戶部右侍郎。○以戶科給事中孫蕙。為福建鄉試正考官。吏部主事劉始恢。為副考官。

實錄卷九十五

三

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十五

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十六

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十年辛酉五月癸丑朔

實錄卷九十六

二

上駐蹕三河縣東。○山西提督周卜世疏報遵義賊兵肆亂。臣遣總兵官李師膺。遊擊張所元等。率兵往剿。有真安州偽知州金仕俊。仁懷縣偽知縣吳逢聖。相繼投誠。遂復真安州及仁懷。綏陽。桐梓。三縣。得旨嘉獎。下部議叙。○陝西巡撫鄂愷疏報。慶陽土寇耿飛等投誠。下部知之。○河道總督靳輔疏言。臣前請大修黃河。限三年水歸故道。今限滿而水猶未歸。一應大工細冊。尚未清造。請下部議處。

得旨。靳輔著革職。令戴罪督修。○甲寅。

上駐蹕通州所屬崇閣廟南。○乙卯。

上奉

太皇太后回宮。詣

皇太后宮。問安。○

仁孝皇后忌辰。遣官祭

陵。○丙辰。

上詣

太皇太后

皇太后宮。問安。○丁巳。

四川陝西總督哈占疏

言。臣兵發永寧。由赤水畢節。追剿逆賊馬寶。

進攻雲南。但兵少力弱。而永寧新復。壞接貴

州。土司雜處。請敕固原總兵官王用予。率兵

為臣後應。得旨。著王用予。速率所部兵。馳赴

永寧固守。○懷忠將軍海潮。龍疏言。兵以食

為重。若不安撫百姓。綏輯土司。萬一遠避深

山。則軍糈何措。

上命大將軍貝子章泰等。加意獎勵。苗蠻勿致

有誤兵餉。○戊午。夏至。祭

地於

方澤。遣內大臣伯噶都行禮。○己未。

上詣

太皇太后

皇太后宮。問安。○諭理藩院蘇尼特等旗被災。

今雖賑以銀米。止可供一歲之用。又聞別旗

亦皆罹災。甚是饑饉。倘秋草不肥。何以為生。

此事重大。應豫為久遠生全之計。爾等速遣

司官前往。相閱情形。以聞。○庚申。以一等公

內大臣舅舅佟國綱。為鑲黃旗漢軍都統。○

調刑部尚書介山。為吏部尚書。陞漕運總督

帥顏保。為工部尚書。○陞河南按察使石琳。

為浙江布政使。司布政使。○歸化城土默特

都統古魯故。以其子拉察布襲職。○贈陣亡

副將李國柱。署都督僉事。叅將李心廣。副將。

各予祭葬如例。○辛酉。陞左僉都御史余國

柱。為左副都御史。○江西巡撫劉如漢。丁父

憂。准回籍守制。○壬戌。

上詣

太皇太后

皇太后宮問安。○諭戶部。比年以來。宣府大同。疊罹饑饉。而邊外蒙古。亦復凶荒。故發宣大二府存貯米石。盡用賑濟。朕思邊境糧儲所關最要。古稱三年九年之蓄。蓋合侯甸藩畿。通為之計。豈僅謂公廩之充盈已也。養人足食。道貴變通。可發京倉米二十萬石。運往宣大備用。其運送米石。用就近地方驛站車夫。不致糜費。爾部派才能官一員。前往會同該撫。確議以聞。○陞吏部左侍郎薩穆哈為都察院左都御史。○癸亥。諭理藩院。今遣官往外藩蒙古地方賑濟。務期貧人均沾實惠。毋受豪強囑託。致有濫冒偏枯。爾等應加嚴飭。以副朕柔遠之意。○以步軍總尉密雅納。為昭陵總管。○福建道御史呂兆琳疏言。天時亢旱。應敕大小臣工。實心修省。得旨。近如地震。

星變。朕心存敬畏。無不力行修省。以弭天災。亦屢下嚴旨。敕各官警懼。恐罔知悔改者尚多。今後著內外大小臣工。益加洗心滌慮。實圖修省。咸使知之。○甲子。諭戶部。宣府太原大同等處。近罹災傷。人民困苦。所徵房稅銀兩。著悉與除免。○隨內大臣班尚之。奏請迎其父。尚可喜喪。

上曰。尚可喜當通城皆叛時。矢志不移。臨歿猶被服。

太宗皇帝所賜朝衣。言雖死。必葬於海州。倘有知覺。必効力於

先帝。其忠誠之心。始終無二。今尚之孝前徙。可令其將還京之日。豫行啟奏。遣官往德州前後。迎其骸骨。○陞正白旗蒙古副都統杭奇。為護軍統領。○乙丑。遣官祭

關聖帝君。○諭大學士等曰。科道官職司耳目。行取知縣內。如有曾經從賊。并曾受偽職。及身在賊中之人。名義已壞。科道不當選用。

爾等識之。○陞內閣侍讀學士蘇拜為都察院左副都御史。○丙寅。陞原任浙江布政使內陞李士楨為江西巡撫。陝西平慶道郎廷樞為廣東按察使司按察使。○廣東巡撫金僑疏報海賊楊二等攻犯瓊州。據海口所城。又攻陷澄邁。定安。二縣。總兵官蔡璋等於三月十五日督舟師渡瓊。賊分兵迎敵。我兵奮勇夾擊。於十六日克復縣所三城。楊二等勢窮逃竄。擒斬偽總督周勝。偽總兵陳魯等。焚毀賊船一百餘隻。見獲三十餘隻。得旨嘉獎。下部議叙。○給雲南殉難筆帖式亞圖華珊。拖沙喇哈番。達賴喇嘛班禪胡土克圖。遣使進貢。賞賚如例。○丁卯。

上御太和門視朝。文武陞轉各官謝恩。次厄魯特達賴喇嘛進貢使臣等行禮。○

上詣

太皇太后

皇太子宫問安。○己巳。以翰林院侍讀邵吳遠

為廣東鄉試正考官。內閣中書高曰聰為副考官。○調正白旗蒙古副都統郎談為滿洲副都統。○庚午。廣西提督哲爾肯疏言逆賊黃明。馬承烈等於三月十八日走湖廣靖州。或赴楚界投誠。或入猺峒負固。俱未可定。

上命巡撫韓世琦。總兵官和山等就近速行剿撫。務盡根株。○兵部題。殉難雲南巡撫朱國治喪。觀家屬請令大將軍貝子章泰等察明送京。得旨。吳三桂反叛以來。地方官有從逆者。亦間有逃歸者。如朱國治。仗節不屈。罵賊身死。殊可嘉尚。如議速行。○辛未。調戶部左侍郎覺羅沙賴為吏部左侍郎。管右侍郎事。○以內閣學士禧佛。充經筵講官。○以督捕左侍郎邵甘為漕運總督。○壬申。湖廣巡撫王新命疏言。楚省鄉試中額。因逆賊變亂。於康熙十六年。改照中省取中。今湖南既已平定。應仍改為大省額數取中。從之。○癸酉。陞陝西榆林道遲日翼為河南按察使司按察

使○甲戌以翰林院侍讀學士胡簡敬充日講起居注官○陞右通政熊一瀟為順天府府尹○刑部題立決人犯請交六月節停刑得旨六月節若在五月內即以交節日停刑若六月方交六月節即以六月初一日停刑至立秋雖在六月內必俟交過七月初一日方令行刑○乙亥陞護軍叅領佛爾諾為鑲黃旗蒙古副都統前鋒叅領噶哈為正紅旗蒙古副都統○宣威將軍都統紀哈里等疏言將軍趙良棟統綠旗官兵自雅州前進臣盡率前鋒及每佐領護軍驍騎各一合繼其後因見在米少騎兵止齋二十日糧步兵止齋十五日糧請嚴飭運送接濟

上諭將軍紀哈里噶爾漢等兩路進兵糧餉最急總督哈占巡撫杭愛郎中蘇赫臣額爾赫圖范承勲等將進征大兵裹帶之糧及接濟之米陸續速運務令無誤如少稽遲從重治罪○陞光祿寺卿阿蘭泰為內閣學士兼禮

部侍郎轉戶部右侍郎科爾坤為左侍郎陞學士額庫禮為戶部右侍郎○丙子

上詣

太皇太后

皇太后宮問安○陞大理寺少卿馬世濟為光祿寺卿○丁丑召進貢土默特台吉達賴等問曰蘇尼特等旗蒙古甚饑近來如何台吉巴雅禮奏曰前者蒙古饑荒殊甚蒙

皇上軫念運米賑濟皆獲更生目今得雨青草已長馬畜漸肥不致流散矣

上曰朕以蒙古饑荒深切焦勞今聞爾奏大慰朕懷○陞驍騎叅領瓦禮祐為寧古塔副都統○予故吏部尚書吳達禮祭葬如例○戊寅諭大學士等曰宣府大同諸處今雖得雨田禾長盛但三月中大風壞麥不得收刈民間甚饑雖行賑恤猶未能蘇前撫臣疏稱饑民因得賑濟又得雨澤不至流離各圖生業以今觀之殊為不然著將應徵康熙二十年

諸項錢糧。及歷年帶徵錢糧。槩行蠲免。戶部仍遣賢能司官。往同巡撫。設法賑濟。務使均沾實惠。又諭戶部。前因大同等處地方。自去歲饑荒。百姓無食。流離失所。已經發銀二十萬兩。遣官賑濟。又將應徵房稅。悉與豁除。務期小民家室復完。不失故業。今差官各處察看閭閻。尚多逃亡。田土仍然荒棄。耕種無資。衣食奚賴。朕心深為憫惻。雖已將本年應徵地丁各項正賦。并歷年帶徵拖欠錢糧。盡行蠲免。猶恐小民困苦已極。無濟目前。此外有何應行事宜。可以速拯災黎。俾得存活者。爾部即行詳議具奏。以副朕軫恤百姓至意。○贈四川殉難副將楊三虎。左都督。都司僉書陳先鳳。恭將。守備劉應科。遊擊。守備陳田伊。署遊擊。及隨征官何成德。王永世。劉魁。傅汝友等。各予祭葬如例。○陞護軍叅領傅爾祐。為正白旗蒙古副都統。○己卯。

上詣

太皇太后宮問安。○予故太子少保護軍統領查哈太祭葬如例。○庚辰。

上詣

太皇太后

皇太后宮問安。○辛巳。定遠平寇大將軍固山貝子章泰等疏言。大兵抵雲南會城。偽將軍李發美舉首逆賊吳世璠與達賴喇嘛偽書。以鶴慶麗江二府降。下部議叙。○陝西莊浪海德寺喇嘛噶布褚綽斯岡札木蘇入貢。賞賚如例。

六月壬午朔。

上詣

太皇太后宮問安。○大學士等奏追贈諸王謚號。查前明時親王謚號係用一字。郡王以下護國將軍以上皆用二字。

上曰。以後追謚郡王滿漢文亦俱用一字。○癸未。調兵部右侍郎溫代為督捕左侍郎。○甲申。工部議覆。差往通州督理運河兵部右侍

郎溫代疏言通州以南至天津每年挑河嵩屬各州縣官。但州縣官有催徵捕緝等事。請將每年河道所用錢糧。交與分司官員。將近河地方通判。州同。主簿。典史等官。酌量挑選。令其管理。應如所請。從之。○直隸巡撫于成龍題直隸地方旗民雜處失事甚多。道廳正印等官為盜案干連沉滯深為可憫。祈寬限緝獲。

上曰。朕親視畿輔。自山海關以西。永平以東。一面傍海。一面臨邊。盜賊無地潛藏。故剽劫猶少。至玉田。豐潤。遵化。薊州。霸州。保定。諸處民居稠密。盜賊所以繁也。今處分例太嚴。恐官民俱累。著九卿詳議以聞。尋議凡道路村莊失事。承緝州縣官。及專汛武職。一年限滿不獲。降一級留任。再限一年緝拏。無級可降之官。革職。仍留任。再限一年緝拏。如再不獲。分別調用。革任。其同城之知府與捕盜之同知。通判。初叅停陞。罰俸六個月。限一年緝拏。

如不獲。罰俸一年。照案緝拏。道官及兼轄武職。初叅。罰俸六個月。免其停陞。限一年緝拏。限滿不獲。罰俸一年。若未滿一年之限。陞遷者。照離任官例。於新任內。罰俸一年。從之。○乙酉。以故一等阿思哈尼哈番劉天秀親兄之孫劉成謨襲職。○丙戌。差往大同賑濟戶部員外郎穆稱額。蘇赫等。奏請訓旨。

上諭之曰。前爾等奏。饑民因賑濟。又得雨澤。不至流離。各安生業。頃朕復遣人往視。人民饑餒流亡如故。雨澤猶然未降。則所云賑濟尚未遍及矣。前此姑置不問。爾母自護前非。朕知之最悉。今往同撫臣賑濟。務令饑民得遂其生。及作何設法拯救。著確議奏聞。○刑部左侍郎馮甦請假葬親。允之。○戊子。戶科給事中孫蕙疏言。陝西遭賊蹂躪。又運入川兵。餉民生艱苦。請將通省房號銀兩蠲免。部議不准。得旨。秦省連歲運糧。民生苦累。其應徵房號銀兩。著通行蠲免。○定遠平寇大將軍

固山貝子章泰等疏言將軍穆占宜令率官兵還黔。但今楚雄府有偽將軍陳光祿等復叛。臣等擬令都統希福等率兵往剿。如又量撥官兵。付穆占率回黔中。則圍城兵力不支。況諸路賊勢悉向雲南。請就近令常德滿兵進貴州。遣貴州薩克察巴圖魯等兵赴雲南。則攻圍調遣似有裨益。得旨。平定滇中。最為要計。將軍穆占不必遣還貴州。令署前鋒統領薩克察巴圖魯率所部每佐領兵三人。速赴雲南。常德署副都統諾敏率所部兵速往貴州。與總督董衛國提督趙賴周卜世等固守貴州。荊州副都統莫達率所部每佐領兵二人。赴常德鎮守。○福建總督姚啟聖等疏報逆賊鄭錦已於正月二十七日死。其長子為衆所殺。偽侍衛馮錫范立鄭錦次子鄭克塽。鄭克塽即馮錫范壻也。得旨。鄭錦既伏冥誅。賊中必乖離擾亂。宜乘機規定澎湖臺灣。總督姚啟聖巡撫吳興祚提督諾邁萬正色

等。其與將軍喇哈達侍郎吳努春同心合志。將綠旗舟師分領前進。務期剿撫並用底定海疆。毋誤事機。○庚寅。

上詣

太皇太后

皇太后宮問安。○以故一等精奇尼哈番祖植松子祖興邦襲職。○辛卯。予廣東陣亡拖沙喇哈番邁圖祭葬如例。○工科給事中雅齊納疏言。鳳陽倉抽稅。應照潼關山海關例。將六部賢能滿官差遣從之。○廣東巡撫金傷疏言。平南藩都統王國棟職居藩屬。心在朝廷。每恐尚之信恣肆橫行。與臣密商奏。逆藩就繫禍患。削平。詎逆黨李天植誘脅不從。反將王國棟攢殺支解。報國孤忠。臨難不屈。允宜賜卹。以慰忠魂。得旨。王國棟矢志忠貞。臨難不屈。乃被逆害。深為可憫。作何恩卹。著議奏。尋給王國棟拜他喇布勒哈番又一拖沙喇哈番世職。予祭葬。謚恪愍。○壬辰。陞內

閣學士禧佛。為兵部右侍郎。○陞雲南布政使王繼文。為雲南巡撫。隨征雲南戶部郎中田啟光。為雲南布政使司布政使。○癸巳。免雲南新復地方康熙二十年夏糧。○甲午。

上詣

太皇太后

皇太后宮。問安。○諭議政王大臣等曰。爾等傳諭大將軍貝子章泰賴塔將軍總督趙良棟等。見在投誠人員內。有原屬吳三桂下舊人。且親近知賊情始末。及吳應麒腹心信用者。大將軍等親加詳察。令馳驛來京。至投誠土司偽總兵陸道清。及海潮龍心腹。同往達賴喇嘛處者。并切知賊情始末人員。令趙良棟親加詳察。亦令馳驛來京。○予故工部尚書陳鼐永祭葬。謚文和。○丙申。諭禮部奉聖夫人朴氏。保育

先皇。恭勤素著。護朕冲幼。淑惠彌昭。提抱之殷。靡間於夙夜。恩勤之篤。久歷夫歲時。朕眷念

前勞。已錫封典。茲聞奄逝。軫悼良深。應得恩卹。宜從優厚。爾部即詳察定例以聞。尋禮部議。照公夫人例。給與祭葬。得旨。加祭一次。餘如議。○戊戌。

上移駐瀛臺避暑。○吏部尚書介山。自福建班師回京。

上諭曰。爾出征甚勞。察哈爾衆兵進征。亦為勞瘁。茲回本地。宜加給行糧。○以翰林院侍講湯斌。為浙江鄉試正考官。禮部郎中于覺世。為副考官。檢討秦松齡。為江西鄉試正考官。內閣中書鄭載勳。為副考官。侍講李來泰。為湖廣鄉試正考官。吏部員外郎李含春。為副考官。○正紅旗二等阿達哈哈番達色。出征福建。以阻隔海澄。自縊身死。命如陣亡例。予祭葬。○庚子。鎮安將軍都統噶爾漢疏言。臣兵自重慶啟行。因副都統得爾德兵馬匹疲瘦。令於重慶秣馬十日。即赴軍前。及檄令率所部兵。馳赴叙州。乃不遵檄前往。比臣兵抵

瀘州督趣攜帶糧糗。得爾德率兵至。稱兵馬疲瘦。宜遣赴叙州。惟彼一身。務欲隨征。不從臣約束。得旨。副都統得爾德兵。沿途取支芻秣。且荊州彝陵。飼馬四月有餘。而馬仍疲瘦。及令率所部兵赴叙州。復不遵將軍調遣。欲予身前進。殊屬不合。宜將得爾德即嚴察議處。但見在行間。俟師旋。察議。仍令得爾德率所部兵赴叙州。聽將軍佛尼勒調遣。○癸卯。予故太子太保左都督候補提督馬寧祭葬如例。○工部議覆河道總督靳輔疏言。請於徐州長樁大壩之後。創築月隄。長一千六百八十九丈。應如所請。從之。○乙巳。陞侍讀學士席柱為內閣學士兼禮部侍郎。○丙午。吏部議覆湖廣道御史房廷禎疏言。捐納歲貢終非正途。不應考選科道。應如所請。又督撫子弟。應照在京三品京堂子弟例。亦不與考選。應不准行。得旨。漢軍漢人。捐納歲貢。俱不准作正途考選。京官三品以上子弟。既不與

考選。總督巡撫子弟。亦不准考選。○丁未。上詣

太皇太后

皇太后宮問安。○以工科給事中許承宣為陝西鄉試正考官。翰林院編修汪霽為副考官。編修馮雲驪為江南鄉試正考官。檢討朱彝尊為副考官。○庚戌。免偏沅平溪清浪偏橋鎮遠四衛房號稅。○辛亥。諭大學士等曰。行取官員吏部已經引見。其各部主事等漢官朕尚未知其人。科道為耳目之司。選擇不可不慎。爾等即傳諭九卿詹事科道。令各舉所知。將居官潔清。辦事才能者。從公保舉。不可以同年同鄉親黨。徇情私保。即總督巡撫所舉有不當。亦著指陳勿隱。○以隨征阿思哈尼哈番王麟為四川永寧總兵官。

秋。七月。壬子朔。享

太廟。遣內大臣覺羅塔達行禮。○授故輔國將軍恩克布子榮貴為奉國將軍。○癸丑。轉刑

部右侍郎陳一炳為左侍郎以候補侍郎杜璚為刑部右侍郎○阿霸哈納固山貝子董宜斯噶卜故遣官致祭○甲寅兵部以投誠總兵路之嵩題補廣東惠州副將

上諭路之嵩原係守備從賊為偽總兵今因投誠補授副將則見任効力人員更補何缺此等投誠之人該部暫行停補○丁巳諭大學士等曰刑部關係民命必擇精敏才幹者始克勝任禮部尚書郭四海向在兵部具有才能今令其以禮部尚書銜管刑部事○予故三等精奇尼哈番散秩大臣綽爾濟祭葬如例○湖廣提督徐治都疏報逆賊譚天秘已離桃花洞於六月二十四日前赴四川陝西總督哈占軍前投誠下部知之○戊午

上詣

太皇太后

皇太后宮問安○庚申戶部議覆四川巡撫杭愛疏言蜀省久為賊踞百姓逃亡所存惟兵

各弁兵竟有強佔民田抗賦不納者今逆孽漸平若不急行清理勢必仍踵故轍查四川通省地方向係肥饒而所徵錢糧甚少良由文武官員兵丁佔種民田今逃亡漸歸如有承認原田者應令退還給民如仍行強佔者照例治罪惟開墾年久無主承認者許令自首輸課免其從前隱漏之罪從之○辛酉

上詣

太皇太后

皇太后宮問安○定遠平寇大將軍固山貝子章泰等疏報都統希福提督桑峨率兵徃楚雄追剿逆賊馬寶至烏木山賊據險以拒我兵奮擊大敗之擒斬甚衆馬寶越山而遁僅以身免下部議叙○予福建陣亡武備院員外郎昌壽祭葬如例○壬戌

上詣

太皇太后宮問安○大學士等以三法司奏讞盜案請旨

上曰朕常於刑部人命事情冀其尚有可生之路。細加詳閱奈求其生而不得耳。明珠奏曰。此乃

皇上好生之仁也。○陞正藍旗副都統宗室喇克達為蒙古都統。○甲子。諭吏部。兵部。凡官員祖母。母。並妻緣事者。即議鞭責折贖。於大體不合。如果事犯重大。不妨削其封誥治罪。若鞭責折贖小過。或將伊夫。或伊子孫品級俸祿議罰。爾等會議定例具奏。○乙丑。兵部議覆廣東將軍王永譽疏言。尚之信所屬人員。請編為十五佐領。撥入上三旗。應如所請。從之。○以翰林院侍講施閏章為河南鄉試正考官。吏部員外郎劉元慧為副考官。○勇畧將軍雲南貴州總督趙良棟疏報總兵官李芳述等率兵追剿逆賊胡國柱等敗走。恢復建昌。得旨嘉獎。下部議叙。○烏朱穆泰多羅額爾德尼貝勒莫利海故。遣官致祭。○丙寅。中元節。遣官祭。

永陵。

福陵。

昭陵。

孝陵。

仁孝皇后。

孝昭皇后陵。○諭戶部。京倉通倉糧米歷來缺額。其監督官員交盤時。有賄與銀兩者。亦有雜以灰土者。放米時有與旗下官員銀兩抵完者。其貧人所得米糧缺少。此等情弊朕悉知之。如盡行究察。從前經管各官有一得免者乎。其飭所司嚴革諸弊。○諭大學士等。近來投誠守備千總等官。或帶偽總兵副將劄付。即照伊偽劄。反加優叙先用。其綠旗官員。於軍前効力顯著者。並不得表見淹滯者頗多。所在統兵將帥。知悉此情者。已經回京。在彼無人代奏。此等官員甚為屈抑。其特行宣諭。以示獎勵。○丁卯。上詣。

太皇太后

皇太后宮問安○調正藍旗蒙古副都統楊岱為滿洲副都統○陞山東按察使余三級為廣東布政使司布政使○戊辰定遠平寇大將軍固山貝子章泰征南大將軍都統賴塔等疏報偽國公馬寶偽將軍巴養元等繳印投降於本月初五日俱至軍前。

上諭逆賊馬寶所在抗拒大兵今無地可遁力窮勢迫始來投誠殊屬可惡所犯情罪重大斷不可宥大將軍貝子章泰等其執馬寶撥官兵嚴解來京其餘偽屬官兵大將軍如常發落尋章泰等又疏言馬寶等背叛國恩臣事吳世璠屢次招撫不即悔罪投誠反奔尋甸攜妻子赴楚雄糾集逆黨蹂躪疆圉為大兵所敗窮威已極方率眾不滿百人往姚安投降非首先向化歸誠可比偽將軍巴養元趙國祚鄭旺李繼業偽總兵郎應壁等亦與馬寶同在一所若輩宜作何發落一并請旨。

上命將巴養元等亦同馬寶執送京師○安塘筆帖式報偽將軍胡國柱王叙等所部賊眾自姚安逃散過半胡國柱等俱遁入山中上命以此事移知將軍紀哈里噶爾漢趙良棟總督哈占令速行進剿○諭兵部大將軍圖海年老有疾今四川雲南漸次平定可令攜大將軍敕印同鄂克濟哈還京師留將軍吳丹守漢中將軍王輔臣著同圖海來京陛見○諭兵部在外武職官員有未經從逆効力行間勤勞日久者枕戈卧甲躬冒矢石建立功績雖經叙錄加銜加級亦不能即補實缺仍留該標投閒置散虛糜歲月或赴部候補又因無缺守候遲延資斧匱乏俱深可憫此等軍前効力之人應令本身赴部驗明原劄即行錄用推補爾部即遵諭行已已

上詣

太皇太后

皇太后宮問安○庚午以原任內閣學士兼禮

部侍郎王守才補原官○辛未議政王大臣等議覆賜給銀米之蘇尼特多羅郡王薩穆札等十五旗蒙古已得生理毋庸再議其蘇尼特杜楞郡王阿毓錫等不能贍養之蒙古應令於左右兩翼察哈爾地方住牧以科爾沁所協助牲畜與鄂爾多斯所罰牲畜給與從之○壬申。

上詣

太皇太后宮問安○召大學士以下各部院衙門員外郎以上官員至瀛臺命內大臣佟國維等傳諭曰內閣及部院各衙門諸臣比年以來辦事勤勞今特召集爾等賜宴因朕方駐瀛臺即以太液池中魚藕等物賜諸臣共食之又賜彩緞表裏大學士率諸臣叩謝各依次坐。

上命內大臣等以金尊賜飲一巡宴畢諸臣各謝恩出○諭吏部兵部大同地方連年旱荒百姓困苦以致流離失所就食他方因而田

地荒蕪生計不遂今已履行賑濟蠲免各項錢糧又聞雨澤霑足秋成有望但饑饉之後安養生全須廉能官吏方能加意招徠留心撫字見任府州縣衛所等官貪劣不職者照常叅處外其才具平常者該撫酌量更調本省簡僻之缺仍於通省見任官員內選擇清廉受民者調補大同所屬地方若果能撫循使戶口充實田地開墾著有成效該撫特行舉薦該部從優敘錄以副朕獎勵循良愛養百姓至意○癸酉。

上詣

太皇太后

皇太后宮問安○以翰林院編修曹禾為山東鄉試正考官刑部郎中林堯著為副考官翰林院編修嚴繩孫為山西鄉試正考官戶部郎中楊引祚為副考官○吏部題廣東廉州府知府佟國勳招民應加議叙得旨前因用兵之際故招徠流移准令議叙今湖廣江西

福建廣東廣西既已蕩平。俱屬內地。其招民議叙。不准行。惟四川雲貴。招徠流移者。仍准照例議叙。○乙亥。諭兵部。鐵索橋係運餉及大兵往返要路。關係重大。大將軍貝子章泰行文修理。該撫理宜速行葺治。乃至今尚未興工。殊辜職任。著該撫將鐵索橋速行修理。以便行軍轉餉。○丙子。

上御太和門視朝。文武陞轉各官謝恩。次喀爾喀進貢使臣等行禮。○郎中賽柱等。以往賑

蘇尼特等處事竣回奏。

上切責之曰。前遣爾等往賑時。曾於朕前推諉。事關重大。及至彼處。復奏糧運艱難。若非侍郎阿喇尼陳奏。爾等即不顧而歸矣。朕軫念蒙古饑荒。死亡流散。陸續運米至彼。蒙古方得更生。若聽爾等之言。此數萬生靈。置之何地乎。爾等但有便利處。則趨之。勞苦處。則避之。大虧職守。○予故雲南巡撫伊圖祭葬如例。○戊寅。

上詣

太皇太后

皇太后宮問安。○己卯。諭議政王大臣等曰。今諸路逆賊。俱已殲除。應以見在舟師。破滅海賊。原任右都督施琅。係海上投誠。且曾任福建水師提督。熟悉彼處地利。海寇情形。可仍以右都督充福建水師提督總兵官。加太子少保。前往福建。到日。即與將軍總督巡撫提督商酌。剋期統領舟師。進取澎湖臺灣。其萬正色。改為陸路提督。諾邁還京候補。○諭吏部。庶吉士田需等。教習已久。今加考試。應分別授職。除歸允肅孫卓。已授修撰編修外。清書庶吉士。田需張廷瓚。顧藻。丁疇。趙執信。沈朝初。潘應賓。楊雍。楊大鶴。盧熙。王沛。思。曹鑑倫。漢書庶吉士。陳捷。方韓。秦宗。游。馬。教。思。余艷。雪。莊。延。裕。俱著授為翰林院編修檢討。汪晉徵。王承祐。吳震。方陳。紫。芝。楊爾淑。俱以科道用。張克嶷。張光豸。沈一揆。高聯。趙作舟。俱

以部屬用。爾部即遵諭行

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十六

實錄卷九十六

臣

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十七

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍無

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔚廷錫

總裁官光祿大夫文華殿大學士兼吏部尚書臣朱軾等奉

敕修

康熙二十年辛酉八月辛巳朔日食○喀爾

實錄卷九十七

喀土謝圖汗遣使進九白年貢宴賚如例○

癸未

上詣

太皇太后宮問安○罷和碩莊親王博果鐸議

政○甲申理藩院侍郎明愛等以奉遣往遷

蘇尼特等被荒蒙古駐近邊八旗蒙古地方

請訓旨

上諭之曰此等蒙古饑饉殊甚故令遷移當聽
其徐來不可促之恐斃於道路見今所給牲

畜必當節省。以備來年之用。恐今歲食盡。來年禾稼不登。又致饑饉。爾等前往詳視。先所給米穀。今年足用則已。如不足。再行議奏。遷移到日。交與八旗蒙古分駐。善為撫恤。務令得所。若不善養。以致死亡。必將本旗總管議罪。朕亦不時遣官往察。爾等將此旨傳諭。○丙戌。

上詣

太皇太后宮問安。○以翰林院修撰歸允肅為

順天鄉試正考官。編修沈珩為副考官。○丁

亥。遣大學士馮溥祭

先師孔子。○免直隸保安州。本年分旱災額

賦有差。○陞福建興泉道張仲舉為山東按

察使司按察使。○戊子。祭

大社

大稷。遣內大臣公噶布喇行禮。○福建總督姚

啟聖疏言。臣軍前所轄舟師。乃平陽總兵官

朱天貴舊部。若令他人統轄。恐一時未能馴

習。且朱天貴聲名素為海寇所憚。來歸之時。已與賊相攻成讐。今若令將原軍。必能竭力圖報。請敕下浙江總督。速發朱天貴并原帶部下精兵三百人。至福建。同臣等協力進剿。從之。○己丑。

太宗文皇帝忌辰。遣官祭

昭陵。○

上詣

太皇太后宮問安。○勇畧將軍雲南貴州總督

趙良棟疏言。建昌衛土司安泰寧招聚賊衆

逆跡顯然。請行剿滅。

上諭。建昌地關重要。川陝總督哈占將軍王進

寶。四川巡撫杭愛等多方招撫。土司安泰寧

勿致生事。若抗拒不服。該將軍酌撥官兵。速

行翦除。○陞護軍叅領孫塔哈為正藍旗蒙

古副都統。○庚寅。理藩院郎中麻拉等。以奉

遣往察張家口外貧困八旗蒙古請訓旨。

上諭之曰。此等蒙古因遇災荒。先經賑濟糧米。

牲畜。令聞其尚無生計。爾等前往詳察。果係窮困之人。作何再賑。俾得資生。即行議奏。聞遇有牲畜者。爾等勿以為有此。即可度日。不行察出。其畜牧之物。令若食盡。明年必致又饑。其稍有牲畜而米穀缺乏。生業艱難者。亦以實聞。務加詳慎。毋忽。○辛卯秋分。夕月於西郊。遣都察院左都御史薩穆哈行禮。○太祖高皇帝忌辰。遣官祭福陵。○

上詣

太皇太后宮問安。○旌表福建烈婦。福清縣陳起璋妻林氏。莆田縣蔡貞啟妻戴氏。各給銀建坊如例。○癸巳。

上詣

太皇太后宮問安。○甲午。征南大將軍都統賴塔疏言。進剿滇南時。曾留部兵每佐領三人。駐扎廣西南寧府。今雲南。南寧相距甚遠。難以遙制。乞撤此兵還京師。

上諭雲南省城尚未恢復。南寧之兵不便撤還。雲南。南寧相距甚遠。賴塔難以遙制。此兵可令大將軍簡親王喇布。兼轄。○福建水師提督施琅請訓旨。

上諭之曰。爾至地方。當與文武各官同心協力。以靖海疆。寇氛一日不靖。則民生一日不寧。爾當相機進取。以副朕委任至意。○喀爾喀車臣汗。遣使進九白年貢。宴賚如例。○丙申。諭刑部。商民領吳逆資本者甚多。隱匿者亦或有之。若據告追究。恐無賴之徒。借此詐害富民。有累百姓。商人為四民之一。富民亦國家所庇。藏富於民。不在計此錄兩。以後有首告者。應不准行。○丁酉。

上詣

太皇太后宮問安。○諭刑部。凡重案悉歸爾部擬罪。關係緊要。早完一日。牽連者得早安一日。如遇齋戒。不能審結。犯人均繫日久甚苦。亦應於齋戒前。速行完結。再犯人各有應得。

之罪。今聞爾部枷孔大小不一。板有厚薄。賄囑者板薄而孔大。否則板厚而孔小。所帶項鎖亦有輕重。又聞爾部發在各門罪婦。輒為門軍污穢。恐嚇索詐。分外苛擾。此等情弊。爾等宜親行嚴察禁止。○戊戌。

上詣

太皇太后宮問安。○改貴州平大黔威道為分巡貴西道。轄貴陽安順平大黔寧等處。駐劄安順。添設分守貴東道。轄鎮遠平越黎平都勻思州銅仁思南石阡等處。駐劄平越。○己亥。諭理藩院。朕聞爾衙門。每差司官等往蒙古地方。常有需索。致供應食物繁費。怨聲沸騰。爾等宜嚴飭之。○定遠平寇大將軍固山貝子章泰等疏言。逆賊馬寶等俱已投降。夏國相黨與解散。奔竄廣南。惟胡國柱率眾往鶴慶麗江。尚未撲滅。見有都統希福提督桑峨率兵追捕。逆賊形勢與前不同。臣所有兵力。似已足用。據報將軍噶爾漢總督哈占率

兵已抵貴州威寧。總理糧餉學士佛倫等言。此兵皆至雲南。則糧餉不足供用。故臣等公議。令哈占兵還四川。噶爾漢兵至日。以廝役補充缺額。兵量行察汰。則糧餉不多糜。而圍城亦足用。

上諭。雲南兵既足用。總督哈占盡率彼攜往之兵。還四川。駐守要地。兼顧川陝。四川所有滿兵。留一千。令副都統得爾德率之。防守要地。其餘俱令還京。西安滿兵。自四川回者。令將軍佛尼勒率之。鎮守漢中。漢中所有滿兵。俱令還京。荊州內地。貝子準達及所統兵。亦令還京。柳州留每佐領兵三人。南寧留每佐領兵一人。其餘俱令大將軍簡親王喇布率領還京。副都統莫達等兵。令駐守貴陽。署都統諾敏兵。令退駐沅州。○諭禮部。聞雲南官兵疾疫者甚多。彼地苦無良醫。其令太醫院醫官胡養龍。王元佐。馳驛前往調治。○陞鑲白旗滿洲副都統塞格。為護軍統領。○庚子。免

山西榆社縣本年分電災額賦有差○辛丑先是順治十二年間設立喀爾喀八扎薩克每歲獻納年貢。羅卜臧台吉其一也。康熙元年右翼扎薩克圖汗與羅卜臧台吉等內自相亂。扎薩克圖汗旗破身亡。而羅卜臧台吉避入厄魯特噶爾丹部下。康熙九年特旨以扎薩克圖汗之子襲為扎薩克圖汗。而封阿海台吉之子阿海戴青為遵義彭楚克台吉。授為扎薩克。各賜以敕印。獻納年貢。至是噶爾丹送羅卜臧台吉歸扎薩克圖汗。扎薩克圖汗以羅卜臧台吉向係扎薩克。仍令循舊制入貢。奏至。

上允之○癸卯。予故原任蒙古都統太子少師察哈爾佐領畢力克圖祭葬。加祭一次。諡恪僖○甲辰。

上詣

太皇太后

皇太后宮問安○乙巳。

上御太和門視朝。文武陞轉各官謝恩。次喀爾喀進貢使臣等行禮○

上御經筵○丙午。

上幸南苑行圍○調鑲白旗蒙古副都統莽依祿為滿洲副都統○巴圖爾額爾克濟農遣使進貢請罪。疏言厄魯特時值大壞不能存活。特來歸命。原無違悖。

聖主之心。祇以竊取牲畜。深自悔罪。思欲賠償。因將他人所掠吳喇忒人口。寧夏馬匹。竭力奏納。伏乞

聖主鑒憐。得旨此案前曾檄諭噶爾丹未經覆奏。著將原由明白開列。再行檄諭。俟覆奏到日再議。貢物著察收○戊申。遣官祭

歷代帝王○遣官祭城隍之神○免順天府霸州本年分水災額賦十之三○以原任福建巡海道陳啟泰全家殉難。其子陳汝器赴漳扶櫬。被刦下海。幽囚兩載。冒險逃歸。父子忠義。優贈陳啟泰工部右侍郎。旌其妻劉氏。

各予祭葬如例。陳汝器以通政使司左右通政。大理寺少卿員缺用○己酉。

上自南苑駐蹕里二泗

九月。庚戌朔○辛亥。

上駐蹕香河縣王家擺村南○免山西遼州本年分電災額賦有差○先是順治七年定例。禁民間房地售與旗下。違者房地並價入官。至是戶部題。查出康熙十七年以前犯禁鬻地之民。應追價銀六萬四千餘兩。

上命悉豁除之○予廣東陣亡二等阿達哈哈番黑塞祭葬如例○壬子。

上駐蹕武清縣楊村北○癸丑。

上駐蹕武清縣汧沽港北○故平南王尚可喜喪。來自廣東。停泊丁字沽。遣內大臣覺羅塔達。翰林院學士庫勒納。侍衛敦柱。往奠。又傳諭尚可喜衆子曰。王素篤忠貞。若人人盡能如王。天下安得有事。朕每念王至老懷誠克盡忠。盡心甚眷注。殊為傷悼。王停柩處若近

行在。朕當親臨酹酒。因相去尚遠。故特遣內大臣塔達。學士庫勒納。親隨侍衛敦柱。往奠○都察院左副都御史余國柱疏言。各部院衙門。歲終舉劾。劾者照例處分。舉者註冊。但既行五年京察。又有不時指叅之例。應將每歲年終舉劾之例。停止。從之○甲寅。

上駐蹕東安縣葛漁城南○丙辰。

上駐蹕信安鎮○丁巳。

上駐蹕霸州城東南○戊午。

上駐蹕雄縣○召霸州知州吳鑑。保定縣知縣李文英。問曰。朕巡幸霸州。見地土為水淹沒。被災若何。民生若何。吳鑑奏曰。今年渾河水決。東北三十餘里。西南二十餘里。俱被水淹。上曰。決口在何處。被災幾分。爾將被災之處。申報巡撫幾次。吳鑑奏曰。決口在南孟地方。被災十分。九月曾報巡撫一次。

上曰。隄若不修。民生必不得安。著速為修治。問李文英曰。爾縣內報過巡撫被災幾分。李文

英奏曰臣縣內南境幸無水患北境約有四分已報巡撫。

上曰朕昨過縣南境親見尚有積水爾反云未曾被淹何也李文英奏曰境南窪下向有積水今年並無被災之處。

上曰知州知縣最為親民之官必忠勤守法愛惜百姓方為稱職若肆其貪殘貽害地方國家自有定法也○已未撫遠大將軍都統大學士公圖海疏言投誠總兵官趙良友謝泗等請以四川陝西兩省應得之缺補用兵丁亦遇缺補伍兵部議如所請。

上曰趙良友其人尚可用謝泗屢行反叛屢來投誠聞此人甚惡著令來京候補兵丁令於缺額處充補○庚申。

上駐蹕任邱縣大務里北○直隸巡撫于成龍詣行宮請安。

上召入密詢百姓生業地方事宜賜以御衣○壬戌。

上回鑾駐蹕雄縣南○癸亥。

上駐蹕霸州城東南○廣東廣西總督金光祖疏言宜山縣委署知縣王坤罵賊不屈兄弟被害吏部議覆王坤係外委之官無議卹之例應令該督酌量加恩得旨王坤非部選之員罵賊不屈兄弟殉難深為可憫著贈按察司僉事予祭葬廕一子入監讀書○甲子。

上駐蹕永清縣南哥驛村東○乙丑。

上駐蹕南苑○丙寅。

上還宮詣

太皇太后

皇太后宮問安○靖逆將軍甘肅提督侯張勇疏報蒙古訴稱邊內番人火其經卷祠廟戮其人民以此舉兵犯邊。

上諭大學士等曰朕聞吳三桂反叛時我邊內住牧番人於蒙古多爾濟台吉處附從供應後吳三桂既平地方安定番人竟將多爾濟台吉祠廟折毀經卷焚燒殺戮蒙古人口蒙

古以此弄兵。若果如此。則蒙古之來。蓋亦有故。應遣官嚴察。如曲在番人。將番人嚴懲。曲在蒙古。遣使嚴加譴責。使邊人心服。邊釁無可乘矣。可即遣兵部理藩院司官前往。○丁卯。領侍衛內大臣公噶布喇病篤。

上遣侍衛武格。帶御醫往視。及噶布喇故。又遣一等侍衛費耀色。三等侍衛蘇達齋。卹銀五千兩。駱駝四隻。騾二頭。鞍馬三匹。散馬七匹。

賜之。○兵部議覆撫遠大將軍都統大學士公圖海疏言。將軍王輔臣。自漢中來至西安。於八月二十九日病故。其婿薛英等請。擯骸骨家口。往平涼。其標下官兵。作何區處。乞敕部定議。查王輔臣所轄官兵。原係多事之時。添設。今四川。陝西。俱已平定。兵宜裁去。其官弁。聽該督酌量題補。王輔臣骸骨家口。應送至京師。從之。○戊辰。宗人府題。凡王以下。八分公以上。撫養之女。曾呈報宗人府。禮部。請旨准行撫養者。隨養父品級陞降。未經奉旨。

私自撫養者。仍照生父陞降。從之。○己巳。諭戶部。頃者朕巡行近畿。至霸州地方。見其田畝。窪下多遭水患。小民生計無資。何以供納正賦。其見在被淹田地。應徵本年錢糧。著察明酌量蠲免。以示朕勤恤民隱至意。○宣威將軍都統覺羅紀哈里。率所部兵。往大將軍貝子章泰軍前。合圍雲南省城。行至武定府。以疾身故。

上諭將軍紀哈里。既以病故。此兵抵滇。令大將軍貝子章泰統轄。其將軍敕印。章泰仍行收貯。○戶部題。漕運遲滯。

上以問大學士等。明珠對曰。今惟有急濬運河。速催輸運而已。

上曰。黃河至通州。相隔千有餘里。重運日行止可二十里。如此。則明歲漕糧。愈致遲悞。今歲漕米。著即於臨德等倉收貯。來春俟河南山東空回。船剝運。庶可無悞也。○諭刑部。本年秋審情實各犯。俱著停刑。○庚午。大學士等。

奏新設巡倉御史。例給敕書。查歷來巡倉御史敕書。與巡方御史一例。事權至重。恐後來奉差者借端生事。特刪改進呈。

上曰。爾等所言良是。今運丁困苦。輓運甚難。宜加意軫恤。往年漕艘許帶貨物貿易。近來已有禁令。朕親見船大水淺。運動甚難。若許帶貨。愈致膠淺。仍應嚴行稽察。其糧米雜和灰土。不准收納。屢行嚴飭。若米色可用。該旗官兵故意勒捐不收者。亦應嚴行禁止。可將此數款。一一載入。○辛未。

上詣

太皇太后

皇太后宮。問安。○諭議政王大臣等曰。雲南省城圍困已久。若不速為克取。未免勞敝兵民。糜費糧餉。今逆賊外援已絕。株守孤城。窮迫已極。我軍中戴罪圖功之員不少。宜令其攻城建績。以贖前愆。且投誠官兵內。亦多有欲立功贖罪者。今惟遷延時日。待賊食盡。恐糧

餉漸至於虛糜。兵丁亦苦於疾病。其移檄大將軍貝子章泰。賴塔等。均派戴罪官兵。及投誠綠旗官兵。速行攻取雲南省城。○諭禮部。古帝王敦重倫常。推恩勲戚。生則被以顯榮。歿則必存優卹。歷稽前代舊典。昭然。今仁孝皇后之父領侍衛內大臣公噶布喇。嘗纓世裔。宣力累朝。恭謹持身。忠勤奉職。忽聞奄逝。深軫朕懷。應作何恩卹。著察例從優議奏。○諭大學士明珠等曰。烏朱穆泰等各旗蒙古。住牧於喀爾喀巴爾虎之間。先竊彼兩地馬畜。以致喀爾喀巴爾虎等亦竊其馬畜。以報之。曩無盜賊時。驅馬北至涼地。牧養肥壯。收回儘可度冬。自盜賊繁興。夜間不敢放馬。拘於欄柵中。牢籠防護。馬不得肥。以致不能度冬。斃者甚多。且喀爾喀巴爾虎等結黨行竊。夜襲邊汛。我汛地之人畏懼。四五汛并居一處。兩汛之間。或距一日二日之程。其間盜賊公行出入。此汛雖覺。不能即達知彼汛。且貧

窮蒙古馬畜被竊急報該王貝勒及總統扎薩克等間有不肖者或貪飲沉醉不即遣人緝拏詳細察究縱有首告置若罔聞耽延時日有報一馬被竊者守候食費竟至數馬今有馬被竊不敢舉首多行隱匿誠以此也朕聞之深為惻然軫念作何籌畫得以屏息盜賊貧窮者各遂其生其令議政王貝勒大臣蒙古內大臣散秩大臣及來朝貢之外藩蒙古王以下一等台吉以上公同詳議具奏尋議政王大臣等議覆據外藩王貝勒公台吉等言各汛地應多增人數嚴密防守向來守汛不用內地十旗之兵今此十旗亦應照各旗一體守汛遇有馬畜被竊等事告之該扎薩克立即准行一切事件俱限日歸結違則嚴加治罪又圖納黑公議云蒙古遊牧地方之外邊汛之內各形勝處應屯兵百許掘濠障守查緝外賊之入內賊之出盜賊似可屏息又蒙古內大臣議云凡汛哨俱按該管旗

分地方安置嗣後管扎薩克之諸王貝勒貝子公台吉等果能撫養旗人屏息盜賊俾屬下蒙古各得其生則進級議叙如該旗盜賊繁多屬下流離貧困則酌議罪奏入諭曰喀爾喀各旗蒙古向來敬慎職貢本朝無故添汛置戍於理未協其一切事件限日歸結所議誠是朕思喀爾喀等歷世恭順往來進貢殊堪憐憫應遣賢能大臣前往喀爾喀厄魯特處大恩賚以示系遠至意即令遣往之大臣諭以前此內地蒙古盜竊馬畜以致喀爾喀巴爾虎亦行報復彼此互相盜竊不已其內地蒙古已經嚴察禁飭外爾等所屬亦應嚴加約束爾地亦宜設汛置哨遇有盜竊著兩汛互相覺察○諭大學士等曰蒙古四十九旗事務除該王貝勒貝子公台吉等管轄外再於每旗王以下台吉以上揀選一二有才幹者協理辦事著傳諭外藩王等遵行○壬申諭戶部積貯為國家大計歲運漕米充

實京倉最為緊要。旗丁人等輓運動勞宜加存恤。朕頃巡行近畿。至通惠河一帶。見南來漕艘。旗甲人丁資用艱難。生計窘迫。深為可憫。若不預為籌畫。恐其苦累難支。以致沿途遲滯。貽誤倉儲。所關匪細。前以軍需浩繁。漕運額設錢糧。節經裁減。今應作何酌復。欵項爾部詳議具奏。尋戶部議覆。應復運丁工食銀十五萬兩。從之。○癸酉。

上詣

太皇太后宮問安。○甲戌。

上御太和門視朝。文武陞轉各官謝恩。○議政王大臣等議奏。原任總兵官馬寶身受國恩。不思報効。值逆賊吳三桂反叛。首先從逆。於各處抗敵官兵。及大兵平定貴州。圍困雲南省城。馬寶尚不迎降。後在楚雄大敗。無處可奔。窮迫已極。始行來歸。應凌遲處死。梟示。從之。○定遠平寇大將軍固山貝子章泰等疏言前奉

上諭。令副都統得爾德率兵守四川。今得爾德呈請願留雲南効力。

上諭。得爾德既抵雲南。即留軍前。其留蜀官兵。令叅領傅喀統之。鎮守蜀地。○乙亥。章泰等又疏言。見在雲南大兵需餉甚多。倘有不繼。所關甚大。今議臣與賴塔等二路兵內。查有中傷殘廢老邁官兵。及陣亡病故官兵骸骨。俱令佐領播濟等率之。於本月六日啟行。移駐湖廣荊州。以節省雲南軍餉。

上諭。廢殘官兵。及亡故官兵骸骨。若留於荊州。亦徒費錢糧。可俱攜至京師。此官兵。及大將軍簡親王喇布率還之兵。何隊先至武昌。俱著候齊。令喇布一同攜歸。○丙子。

孝慈高皇后忌辰。遣官祭

福陵。○

上詣

太皇太后宮問安。○丁丑。兵部題。耿昭忠等呈稱。家口甚多。難以養贍。乞照漢軍例。披甲食

糧既可當差効力。又可均贍老幼家口。應如所請。編為五佐領。令在京佐領管轄。每佐領下設驍騎校一員。小撥什庫各四名。馬甲各五十四名。步軍撥什庫兵各十三名。此五佐領俱係耿昭忠。耿聚忠等屬下。不便分晰。應將伊等本身。一并俱歸入正黃旗漢軍旗下。從之。

實錄卷九十八

三十二

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十七

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十八

監修總裁官光祿大夫太保兼太子太傅保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣翁同書

總裁官光祿大夫文華殿大學士兼吏部尚書臣朱軾等奉

敕修

康熙二十年辛酉冬十月庚辰朔享

實錄卷九十八

太廟

上親詣行禮○遣官祭

永陵

福陵

昭陵

孝陵

仁孝皇后

孝昭皇后陵○

上詣

太皇太后宮問安○頌康熙二十一年時憲曆
○辛巳。陞前鋒叅領達克薩哈為鑲白旗蒙古副都統○壬午。

皇太后聖壽節。

上率王以下文武大臣侍衛等詣

皇太后宮行禮。遵

懿旨停止筵宴○

上詣

太皇太后

實錄卷九十八

二

皇太后宮問安○癸未。偏沅巡撫韓世琦疏報。

臣與鎮臣和山。盧崇耀等於九月十三日。會

剿古州八萬彊地方逆賊黃明。大破之。陣斬

偽總兵蘇養雲等八員。兵二千餘名。擒偽副

將李貴元等九員。兵二百九十七名。下部議

叙○甲申。

上詣

太皇太后

皇太后宮問安○定遠平寇大將軍固山貝子

章泰等疏言。中甸諸處從來皆隸麗江。原為

內地。吳逆陰蓄異志。於康熙九年割給蒙古。

此地遠在金沙江外。我朝從未遣兵駐守。且

逆賊胡國柱等復奔鶴慶麗江。而雲南省城

尚未恢復。不便即議遣發官兵駐守。

上諭兵部。中甸最為要地。從前鶴慶麗江。雖設

總兵官一員。令其兼轄中甸。但無專汛官兵。

似猶可慮。其移文大將軍貝子章泰。賴塔。將

軍總督趙良棟。巡撫王繼文。提督桑峨。酌量

實錄卷九十八

遣撥綠旗官兵前往鎮守。俟達賴喇嘛使至。

理藩院。以遣兵鎮守之故。移文曉諭○予故

內大臣一等公噶布喇祭葬。加祭三次。諡恪

僖○厄魯特噶爾丹博碩克圖汗遣使進貢。

賞賚如例○免山東蒙陰縣本年分水災額

賦十之三○乙酉。撫遠大將軍都統大學士

公圖海還朝。

上召見乾清門。嘉勞之○丙戌。諭戶部。今歲漕

船守凍。運船旗丁。悉係南人。既貧苦可念。北

地寒冷。又非其所習。應作何處置。不致有饑寒之累。著即議奏。○丁亥。戶部議覆。工科給事中雅齊納疏言。今歲漕船甚遲。若候入倉回空。必致守凍。有悞次年新運。請將糧船未經入倉之米。即撥給官兵。於河干支領。應如所請。從之。○賑濟寧古塔地方。電災兵丁。○戊子。叙招撫遵義難民功。加湖廣岳州左鎮總兵官李師膺。為都督同知。餘員俱加等授。職有差。○己丑。

上詣

太皇太后

皇太后宮問安。○庚寅。吐魯番阿奔木匝法爾蘇耳覃馬哈麻特額敏巴哈。薦爾漢遣亦思喇木和者進貢。并疏言。前遣使進貢。曾奉上諭。五年一次進貢。因臣國地方。遭逢荒亂。以故未得如期進貢。今幸安寧。遣亦思喇木和者。前往進貢。但

天朝建都極東。臣地居極西。以後應否照舊進

貢。請賜裁奪。下部議。○壬辰。宗人府以和碩純親王。應否襲爵。請旨。得旨。王以冲年薨逝。其子已經襲爵。旋復薨逝。朕心深切軫悼。但既無繼嗣。不必再議襲封。○諭議政王大臣等。今逆賊殄滅。疆宇以次平定。耿精忠。尚之信。屬下旗員。俱應撤還京師。量行安插。除將軍馬九玉。并隨伊出征官員外。其在福建及移駐杭州。耿精忠屬下官員。在廣東。尚之信屬下官員。悉令來京。啟行之時。該將軍大臣。撥滿洲官。每翼各一員。并酌發綠旗官兵護行。沿途勿使生事。○喀爾喀扎薩克圖汗。遣使進九白年貢。宴賚如例。○癸巳。

上詣

太皇太后

皇太后宮問安。○議政王大臣等。議奏。固山貝子準達。率蒙古兵。前赴荊州。不即與順承郡王勒爾錦。詳議渡江討賊。失悞機會。又賊犯鎮荊山。不能攻擊。致鎮荊山為賊所據。遺棄

陣亡兵丁尸骸。副都統蘇虎濟遣人請援。不即遣兵往助。屢命進剿逆賊譚弘。彭時亨等托故逗留。不行前進。準達宜解宗人府左宗正任。降固山貝子為鎮國公。從之。○甲午。

上詣

太皇太后宮問安○

上御太和門視朝。文武陞轉各官謝恩。次喀爾喀。厄魯特。吐魯番。使臣等行禮。○丁酉。

上詣

太皇太后宮問安○定遠平寇大將軍固山貝子章泰疏言。署副都統郝佛。率每佐領兵一人。自四川來至雲南。今雲南糧餉甚艱。且滿漢官兵亦已足用。大渡河與雲南相去甚遠。恐後來勞憊之兵。難以全至。不可不預為籌畫。

上諭雲南見在糧餉未充。兵已足用。其自蜀赴滇之兵。已渡大渡河者。副都統席卜率之。駐建昌。仍聽大將軍貝子章泰等調遣。未渡河

者。令席卜委一人為首領。還駐成都。聽總督哈占統轄。○以翰林院侍讀學士董訥為順天武鄉試正考官。編修王頊齡為副考官。○喀爾喀彭楚克台吉等。遣使進九白年貢。宴賚如例。○戊戌。

上幸蘆溝橋。閱放紅衣大礮。回宮。○叙恢復海澄廈門功。加福寧總兵官黃大來為右都督。漳州總兵官吳三畏為都督同知。餘員俱加等授職有差。○己亥。喀爾喀車臣汗遣使察罕衣忒黑爾圖等進貢。

上命理藩院尚書阿穆瑚瑯等傳諭曰。朕聞邊地之人。與爾邊人互相竊奪。念爾汗每年進貢不絕。朕即戒飭我邊地之人。爾亦須加慎。鈴束。又巴爾虎納木渣爾。喀木濟漢人等。於我邊地。每行竊盜。此皆爾之所屬。因念爾恭順。不加處分。已行文爾處往察。如果爾之所屬。爾即拘齊照例治罪。若非爾所屬。即回文報明。○叙投誠殺賊恢復鐵索橋功。加土司

總兵官龍天祐為左都督○庚子。

上詣

太皇太后宮問安○以理藩院差遣事煩令每旗添設員外郎各一員○以固山貝子章泰為宗人府左宗正○辛丑。

上詣

太皇太后宮問安○壬寅以烏朱穆秦故多羅額爾德尼貝勒莫利海子鄂齊爾圖襲爵○予故內大臣二等阿思哈尼哈番塞爾格克。

祭葬諡勤敏○癸卯。

上詣

太皇太后

皇太后宮問安○禮部議覆吐魯番貢物請照康熙十二年例進貢得旨吐魯番地處僻遠犬馬等物嗣後免其進貢○殉難四川提督王之鼎喪至遣內大臣塔達公福善齋茶酒往郊外迎奠○予故散秩大臣佐領巴特瑪祭葬如例○甲辰諭禮部朕恭奉

聖祖母太皇太后慈諭自古帝王慎簡淑德備秩宮闈以襄內政歷稽往制典禮攸隆貴妃佟氏溫惠端良壺儀懋著今進封為皇貴妃鈕祜盧氏恭和淑慧令範克昭今冊封為貴妃惠嬪納喇氏宜嬪郭羅洛氏德嬪吳雅氏榮嬪馬佳氏秉質柔嘉恪勤內職今進封惠嬪為惠妃宜嬪為宜妃德嬪為德妃榮嬪為榮妃爾部即選擇吉期開列儀注具奏○議政王大臣等議奏雲南大兵供億浩繁將軍總督趙良棟自陝西率領進剿官兵宜暫留五千於雲南餘俱令發還陝西俟雲南省城既復所留之兵亦即發回。

上諭將軍總督趙良棟宜設督標經制官兵可取前任雲貴總督標下隨征之兵補入如不足更以雲南投誠支糧之兵補入其管兵官員聽趙良棟選才能擬補具題既設此兵其原統進征雲南綠旗官兵勞苦日久俱令發回陝西固守各汛陝西為邊疆重地關係甚

要。趙良棟進剿時。曾留官兵於四川。防守要隘。總督哈占。可撥四川官兵。更代防守。此陝西官兵。亦速發回原汛。固守疆圉。○調吏部右侍郎管刑部左侍郎事陳一炳。為兵部右侍郎。○乙巳。

上幸南苑行圍。回宮。○贈陝西陣亡副將李弘鑒都督僉事。守備米之順都司僉書。予祭葬。各廕一子。以衛守備用。○丙午。理藩院題盜馬罪犯阿畢大等五人。應立決。家產妻子。請給失馬之人。

上曰。朕念人命關係重大。每於無可寬貸之中。示以法外得生之路。書所謂罪疑惟輕也。阿畢大等家產妻子。既給失馬之人。若本犯免死。給與為奴。則失馬者。得人役使。於法未為不當。嗣後著為定例。○福建水師提督施琅疏言。督撫均有封疆重寄。今姚啟聖。吳興祚。俱決意進兵。臣職領水師。征剿事宜。理當獨任。但二臣詞意懇切。非臣所能禁止。且未奉

有督撫同進之旨。相應奏聞。得旨。總督姚啟聖。統轄福建全省兵馬。同提督施琅。進取澎湖。臺灣。巡撫吳興祚。有刑名錢糧諸務。不必進剿。○丁未。

上詣

太皇太后宮問安。○陞左通政張可前為太僕寺卿。○湖廣提督徐治都疏言。臣所領在重慶夔州綠旗官兵。多患病疫。得旨。徐治都標下官兵。進剿四川。効力日久。今哈占已經回川。將徐治都所屬官兵。著令速回湖廣。○諭兵部。凡馳遞軍機。轉輸兵餉。所關綦重。刻不容緩。今修造鐵索橋。恐稽遲時日。聞盤江可造浮橋。貴州巡撫楊雍建。速行監造浮橋。其鐵索橋。俟錢糧充足之日。該督撫題明。動支正項錢糧修造。○戊申。

上詣

太皇太后宮問安。○蘇尼特多羅杜楞郡王阿毓錫等。來朝進貢。

上命內大臣奇塔特等傳諭曰。去歲因爾國饑荒。朕心憫念。近狀如何。阿毓錫奏曰。去歲甚苦。今歲蒙

皇上賑濟。米粟牲畜已得甦息。又諭曰。觀爾屬下衆台吉服用甚是不堪。爾為部落之主。所屬人等當矜恤撫養。豈可不撫恤下人。獨自享用乎。且爾國之人與喀爾喀不和。互相侵擾偷盜。亦為非宜。理應各加嚴禁。視爾等所屬相宜地方。飼牧牲畜。令得遂生。朕為爾外藩人等。每常留意。是以凡事盡知。朕所以再三教誨者。無非欲俾天下人民各得其所。安生樂業耳。爾其切識朕諭。善養爾民。○己酉。免直隸保定縣本年分水災額賦十之三。○予故陝西興安總兵官都督同知陳奇謨祭葬如例。十一月。庚戌朔。轉刑部右侍郎杜臻為左侍郎。陞翰林院掌院學士葉方藹為刑部右侍郎。兼翰林院學士。○辛亥。

上誥

太皇太后宮問安。○諭大學士等曰。近日言官叅奏。原任太僕寺卿王繼貞。原任總兵官郭義。朕念從賊者。前既有旨寬宥。今又加誅戮。於前旨未符。若大惡如馬寶。夏國相。胡國柱。王永清等。朕決不恕。其餘若盡論誅。則金光祖等諸人亦皆誅之。不太甚乎。其失節從賊者。令革職放回原籍。以示寬典。○壬子。增順天鄉試生員中額五名。○甲寅。

上御太和門視朝。文武陞轉各官謝恩。次蘇尼特喀爾喀進貢使臣等行禮。○以原任福建提督諾邁為鑲藍旗漢軍都統。○光祿寺卿馬世濟疏言。孫延齡反叛時。父馬雄鎮母李氏妻董氏全家殉節。今父已追封太子少保。兵部尚書。乞照父品級。封母李氏。賜給誥命。得旨。馬雄鎮夫竭忠盡全家死節。深為可憫。李氏照其夫所封品級。給與誥命。董氏亦照夫品級。給與應得誥命。○丙辰。諭吏部。兵部。

總督哈占蔡毓榮率兵剿賊直抵雲貴勞績懋著。可復其原官。○免直隸霸州本年分水災額賦十之三。○丁巳。

上詣

太皇太后

皇太后宮問安。○以原任翰林院掌院學士陳

廷敬補原官。○戊午。

上詣

太皇太后宮問安。○辛酉。冬至。祀

天於

圜丘。

上親詣行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵。○

上諭大學士明珠曰。朕頃駐固安。任邱。聞戶部

官員。將各州縣均派草豆。甚為擾民。工部向

民間私借柴炭。亦多擾累。又聞部院各官。借

稱預備差遣。傳集窮民。跟隨苦累。俱宜嚴禁。

每次巡幸。騷擾百姓者。多係部院各官。可傳

諭嚴飭。以後毋得再蹈前轍。○予故固山貝

子顧爾瑪渾祭葬。諡溫簡。○壬戌。

上率王以下。文武大臣侍衛等詣

太皇太后

皇太后宮。行冬至慶賀禮。御太和門。王以下。文

武各官。上表朝賀。次吐魯番進貢使臣等行

禮。○

上詣

太皇太后

皇太后宮問安。○兵部議覆。浙江總督李之芳

疏言。海島賊寇。相繼來歸。浙省地方無事。請

撤回巡察海口郎中布詹等。并停止更換差

員。應如所請。從之。○癸亥。定遠平寇大將軍

固山貝子章泰征南大將軍都統賴塔等疏報。十月初八日。臣等統率滿漢官兵進薄雲南省城下。并力環攻。賊勢惶迫無措。二十八日夜。偽將軍線絨。胡國柱。吳世吉。黃明。原任都統何進忠。原任巡撫林天擎等。謀擒逆首吳世璠。郭壯圖。以獻。吳世璠聞變自殺。郭壯圖及其子郭宗汾皆自刎死。二十九日。線絨等率衆出城降。遂擒首謀獻計之偽大學士方光琛。及其子方學潛。姪方學範至軍前。磔之。戮吳世璠屍。傳首京師。偽官弁一千五百八十餘員。兵五千一百三十餘名。俱投誠。雲南平。得旨覽貝子等奏。統領滿漢官兵。遵奉成命。恢復雲南省城。疆宇蕩平。具見籌畫周詳。調度有方。剿撫並用。克奏膚功。朕心深為嘉悅。著從優議叙。具奏。○章泰。賴塔等又疏報。偽將軍夏國相等。敗遁廣南。臣檄令土官儂朋及防守臨安總兵官李國樑率師追剿。直抵西板橋。環圍之。塞其去路。夏國相與偽

將軍王永清。黃福。李攀龍。楊松魁。率偽屬官兵。至軍前。各繳偽印。割降。臣等公議。斬李攀龍等於軍前。夏國相為吳三桂壻。乃賊渠著名者。宜送京師正法。又都統希福追剿逆賊胡國柱等。至雲龍州之青里屋。胡國柱度不能脫。遂自縊。偽帥王叙。李匡皆自焚死。偽將軍王公良等。率餘衆來降。下部議叙。○

上以雲南報捷。詣

太皇太后

皇太后宮奏聞。行禮。王以下文武各官集

乾清門行慶賀禮。

上命大學士明珠傳諭文武大小官員曰。雲南

底定。朕當速詣

孝陵。躬行昭告。爾等聞之。想有同慶。王以下文

武各官奏曰。恭聞捷音。普天同慶。

皇上躬詣

孝陵致告。上慰

世祖章皇帝在天之靈。下遂中外臣民引領之

望。臣等不勝懼忭。○是日。

上詣

孝陵。駐蹕薊州。○琉球國中山王世子尚貞遣陪臣毛見龍等表貢方物。并疏言臣父尚質於康熙七年十一月十七日卒。謹遵舊典。請賜襲封。下禮部議。○予故內大臣三等伯阿喇密祭葬如例。○甲子。

上謁

孝陵。率皇子。王。大臣。侍衛等。行禮。奠酒。舉哀畢。

至

皇后陵寢。

上親奠酒。皇子等。行禮。舉哀。是日。駐蹕薊州孫家莊北。○乙丑。遣皇子等詣和碩純親王隆禧墓奠酒。○丁卯。

上率皇子。王。大臣。侍衛等。詣

孝陵。讀文。行大祭禮。○戊辰。

上駐蹕遵化州湯泉。○遣皇子等詣

仁孝皇后。

孝昭皇后陵。讀文致祭。○庚午。

上駐蹕羅文峪口。○辛未。

上出羅文峪口。駐蹕龍灣。○命定遠平寇大將軍固山貝子章泰。勇畧將軍雲南貴州總督趙良棟。來京陛見。○宴賚吐魯番貢使亦思喇木和者等如例。○免湖廣江陵監利二縣本年分水災額賦十之三。○陞叅領俞維邦為正藍旗漢軍副都統。○壬申。

上進龍井關口。駐蹕漢爾莊西南。○癸酉。

上駐蹕三屯營東。○甲戌。

上駐蹕米峪口。○戶部議覆。正白旗滿洲副都統郎談疏言。寧古塔捕海獺官明阿納。呈稱。明阿納父爾濟肯。幼時為朝鮮國人。擄去娶妻。生明阿納。後蒙敕諭朝鮮。父子得歸故土。而明阿納之母。因係朝鮮人。未許同歸。父母分離之時。年僅二十。今將五十年矣。父不再室。母不再嫁。懇恩令父母團聚。以遂終養之情。應如所請。移咨朝鮮國王。查明阿納之母。

交送寧古塔將軍。令其團聚。從之。○乙亥。

上聞居民有為虎傷者。是日。圍獵南山。

上親殪二大虎。并一小虎。民絕虎患。○丙子。

上駐蹕三屯營南。○予故二等阿思哈尼哈番

原任理藩院左侍郎達哈塔。祭葬如例。○丁

丑。

上駐蹕遵化州金山寺東。○戊寅。

上駐蹕遵化州湯泉。○以故二等阿思哈尼哈

番達哈塔子鏗特。襲職。○戶部議覆。福建總

督姚啟聖疏言。福州等府。夏秋亢旱。米價日

增。請於廣東之潮州。浙江之平陽。買米平糶。

查海禁未開。恐有不肖之徒。借端販賣。應不

准行。得旨。閩省被災。准其赴潮州等處買米

接濟。如有借端通海者。事覺。將該督撫及押

運官。一并治罪。○以川黔底定。撤回山西。陝

西。四川等處。安塘筆帖式。撥什庫。披甲人員

之半。○己卯。

上率王大臣等。謁

孝陵。奠酒。舉哀。畢。至

仁孝皇后。

孝昭皇后陵。奠酒。舉哀。是日。回鑾。駐蹕。淋河西

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十八

大清聖祖合天弘運文武睿哲恭儉寬裕孝敬誠信中和功德大成仁皇帝實錄卷之九十九

監修總裁官光祿大夫孫保和殿大學士兼戶部尚書二等伯加四

級臣馬齊光祿大夫經筵日講官起居注少保兼太子太保保和殿大學士仍兼

管吏部戶部尚書翰林院掌院事加二級又加一級臣張廷玉光祿大夫經筵講

官太子太傅文華殿大學士仍兼理戶部尚書事務加五級又加二級臣蔣廷錫

總裁官光祿大夫文華殿大學士兼吏部尚書臣朱軾等奉

敕修

康熙二十年辛酉十二月庚辰朔

實錄卷九十九

上駐蹕薊州孫家莊西○免江南六合縣本年

分水災額賦十之三○辛巳

上駐蹕三河縣夏店南○綏遠將軍湖廣總督

蔡毓榮疏言逆氛既靖正臣束身待罪之時

請賜解職俾臣得入覲

天顏出廬父墓

上慰留之○免直隸文安縣本年分水災額賦

十之三○壬午

上回宮詣

太皇太后

皇太后宮問安○癸未調正紅旗蒙古副都統

殷圖為滿洲副都統○甲申免江西新建等

十四州縣衛所本年分水災額賦十之三○

諭禮部逆賊吳三桂背恩反叛煽惑地方罪

惡貫盈已服冥殛逆孽吳世璠敗遁雲南竊

據省城今大將軍貝子章泰等遵奉成命統

兵進剿吳世璠窘迫自刎逆黨咸服厥辜偽

官軍人民等革心來歸疆域大定念數年以

實錄卷九十九

來大兵進剿士卒疲於荷戈民生困於轉運

今通寇蕩平兵民得以休息此皆仰荷

天地

祖宗眷祐應行告祭禮仍布告中外與民更始

以昭維新之化爾部即擇吉具儀以聞○贈

雲南殉難安邱縣知縣胡端通政使司左叅

議予祭葬廕一子入監讀書○丙戌

上詣

太皇太后宮問安○丁亥內閣翰林院進呈蒙

海昇平告祭

天地

太廟

社稷文。

上曰。吳三桂反叛以來。勞師動衆。兵民困苦已極。若以為摧枯拉朽。容易成功。則辭過其實。惟此艱難之故。全賴

天地鴻庥。

祖宗福庇。乃能奏績。其以此意撰擬。朕將親裁焉。○吏科掌印給事中費仰楨等疏言。武功既定。海宇永寧。請合萬國之歡心。加上

太皇太后

皇太后徽號。以隆孝治。

上是其言。下部詳察典禮以聞。○諭奉天將軍安珠護。今雲南等處。俱已底定。海宇清平。告

祭

天地

太廟。

社稷畢。即應於

陵寢行告祭禮。盛京者。

祖宗開創根本重地。朕時思念不忘。今值天下晏安。意欲躬詣

山陵告祭。前幸盛京時。未至

永陵致奠。迄今尚歉於懷。茲若果往。當身歷其處。仰瞻

祖宗發祥舊址。爾可密遣副都統穆泰暨賢能官員。將所行途程。與駐蹕之處。自興京通鳥喇徑路。詳看繪圖。於同往官員內。擇通曉者一員來奏。恐踏看未周。不能詳記道里山川也。因無定期。未行明示。若俟定後商酌。恐不及矣。故爾密諭。○以翰林院掌院學士兼禮部侍郎陳廷敬。充日講起居注官。○戊子。湖廣道御史何嘉祐疏言。天下蕩平。皆賴

皇上一人功德所致。請加上

兩宮徽號。以廣

聖孝。上

皇上尊號以彰功德。

上諭大學士等曰。加上

太皇太后

皇太后徽號。前已有旨。但奏稱天下蕩平。皆朕一人功德所致。則徬徨靡寧耳。前議撤三藩時。令議政王大臣等會議。言不可撤者甚多。言宜撤者甚少。朕決意撤回。乃吳三桂背叛。各處驛騷。兵民困苦。今蒙

天地鴻庥。

祖宗福庇。數年之內。幸得殲滅賊寇。若再延數年。兵損民困。則朕決意遷撤之舉。何以自解耶。此奏無益。○諭大學士等曰。賞罰乃國家之大柄。忠逆實臣節之大防。從古帝王敷治。戡亂未有忠不賞而逆不罰者。但其中情有輕重。故法有寬嚴。必功罪分明。予奪精確。始稱允協。前總兵官王永清。身膺重任。甘心從賊。及大兵抵滇。圍困省城。為日甚久。猶不歸順。乃與夏國相。隨在奔竄。迨計無復之始。來

投誠。故拏禁其子。封其家產。今文武官員。見在雲南。仍不投順者。可察出。如王永清之例。一并封拏。其應作何結案。曾經議政王等議。俟雲南省城克復之後。再議。今議此案時。應將從賊受職。歸順後。未經定議官員品秩。稍大者。通行察出。具奏。其從賊官員。前已歸順。曾經奉旨從寬免罪者。不必舉行察議。此內有原為大吏。覲顏從逆。又受偽職者。名節棄滅。大玷人臣之誼。若輩不合。仍令居官。應俱革任。著議奏。倘其間有効力真確。功績甚著之人。應酌量留任。仍於各名下。明白開注勞績。見在候缺者。俱停其錄用。至明歲以後。文武各官。舉行大計軍政。凡屬從賊受職。歸順者。俟督撫提鎮。開造計冊到日。吏兵二部。應行察明。罷黜。著議政王。具勒。大臣。會議具奏。○議政王大臣等議奏。雲南已經恢復。其湖廣。荊州。陝西。漢中。應設兵駐防。荊州應設滿洲將軍一員。副都統二員。八旗。每旗各設協

領一員。佐領七員。防禦七員。驍騎校七員。兵丁每佐領撥出六名發往。漢中應設漢軍將軍一員。副都統二員。八旗每旗各設協領一員。叅領一員。防禦十員。驍騎校五員。撥出兵丁三千名發往。從之。○叙恢復海澄廈門金門十九寨功。授昭武將軍福建提督楊捷。三等阿達哈哈番。加漳浦總兵官趙得壽。福寧總兵官黃大來。漳州總兵官吳三畏。俱左都督。給一拜他喇布勒哈番。其副將以下。分別議叙。○己丑。大學士圖海。馮溥。以病乞休。俱慰留之。○辛卯。

上詣

太皇太后

皇太后宮問安。○壬辰。賜朝鮮琉球國進貢使臣等銀幣有差。○工部侍郎祁通額。以病乞休。允之。○戶部議覆貴州巡撫楊雍建疏言貴陽等七府漢土司錢糧。若歸并附近知縣管理。恐呼應不靈。請仍令該土司管理。責令

知府督催。應如所請。從之。○癸巳。召議政王大臣。大學士。學士。九卿。詹事。科道等官。至乾清門。命大學士勒德洪等傳諭曰。頃九卿等以大慙既除。寰宇底定。奏請上朕尊號。朕思曩者平南王尚可喜。奏請回籍時。朕與閣臣面議。圖海言斷不可遷移。朕以三藩俱握兵柄。恐日久滋蔓。馴致不測。故決意撤回。不圖吳三桂背恩反叛。天下騷動。偽檄一傳。四方響應。八年之間。兵民交困。賴

上天眷祐。

祖宗福庇。逆賊蕩平。倘復再延數年。百姓不幾疲敝耶。憶爾時。惟有莫洛米斯翰明珠蘇拜塞克德等言。應遷移。其餘並未言遷移。吳三桂必致反叛也。議事之人。至今尚多。試問當日曾有言吳三桂必反者否。及吳逆倡叛。四方擾亂。多有退而非毀。謂因遷移所致。若彼時朕諉過於人。將會議言應撤者。盡行誅戮。則彼等含冤泉壤矣。朕素不肯諉過臣下。即

今部院事有錯悞。朕亦自任。朕自少時。以三藩勢焰日熾。不可不撤。豈因吳三桂反叛。遂讓過於人耶。今亂賊雖已削平。而瘡痍尚未全復。君臣之間。宜益加修省。恤兵養民。布宣德化。務以廉潔為本。共致太平。若遂以為功德。崇上尊稱。濫邀恩賞。實可耻也。和碩裕親王福全奏曰。吳逆反叛以來。臣忝列議政。常見一切調度。將士翦除逆寇。非臣等意見所能及。皆奉

上諭遵行所致。實

皇上功德。理應崇上

尊號。和碩康親王傑書。和碩安親王岳樂奏曰。臣等前在行間。凡恢復城池。剿禦賊寇。盡出自

皇上廟算。籌畫周詳。臣等凜奉敕諭遵行而已。非臣等意慮設施。克收成效。理應加上

鴻稱。以顯功德。

上復召大學士勒德洪。尚書伊桑阿。左都御史

徐元文。侍郎李天馥。學士噶爾圖等。諭曰。頃九卿等。以逆首既除。四方底定。奏請上朕尊號。朕自御極以來。日夜孜孜。以乂安民生為念。乃逆賊吳三桂。一倡變亂。遂至塗炭八年。當吳三桂初叛時。散布偽劄。煽惑人心。各省兵民。相率背叛。此皆德澤素未孚洽。吏治不能剔釐所致。幸賴

上天眷祐。

祖宗威靈。滿洲兵士之力。逆渠授首。奸黨悉除。地方平靖。獨念數年之中。水旱頻仍。災異疊見。師旅疲於徵調。被創者未起。閭閻敝於轉運。困苦者未甦。且因軍興不給。裁減官員俸祿。及各項錢糧。并增加各項銀兩。仍未復舊。每一軫念。甚歎於懷。若大小臣工。人人廉潔。俾生民得所。風俗淳厚。教化振興。天下共享太平之福。雖不上尊號。令名實多。如一切政治不能修舉。則上尊號何益。朕斷不受此虛名也。朕自幼讀書。覽古人君行事。始終一轍。

者甚少。嘗以為戒。惟恐幾務或曠。鮮克有終。以故宵衣旰食。初寒盛暑。不敢少間。偶有違和。亦勉出聽斷。或中夜有機。宜奏報。未嘗不披衣而起。朕非不知燕息自怡。蓋所愛不在一身。總為天下生靈之計。政事務求當理。官職務在得人。期於家給人足。百姓樂業而已。今吏鮮潔清之効。民無康阜之休。君臣之間。全無功績可紀。倘復上朕尊號。加爾等官秩。則徒有負愧。何尊榮之有。至於

太皇太后

皇太后。加上徽號。詔赦天下。理所宜然。其上朕尊號之事。斷不可行。乃朕實意。非粉飾之詞也。自今以往。大小臣工。宜各洗心滌慮。砥節勵行。休養蒼黎。培復元氣。爾等可向九卿各官。悉諭朕意。不必再行陳請。○以故一等精奇尼哈番唐翰輔子唐之汾襲職。故二等阿思哈尼哈番郭麗子阿哈納襲職。○裁陝西甘肅靖邊衛同知缺。○贈廣東殉難署遊擊

管都司僉書事白虎署叅將。予祭葬。廕一子以衛守備用。○乙未。調工部尚書帥顏保為禮部尚書。○丁酉。

上以滇逆蕩平。遣官祭告

天地

太廟

社稷

上詣

太皇太后

皇太后宮問安。○諭禮部。獻歲

太皇太后壽。屆七袞。海臻景福。諸王大臣宜行慶賀之禮。各視官爵為差。其慶賀日期。爾部選定以聞。○以故一等阿思哈尼哈番席卜弟准塔襲職。○陞左都御史薩穆哈為工部尚書。轉工部右侍郎。黨務禮為左侍郎。陞左副都御史蘇拜為工部右侍郎。○補行廣西鄉試。以編修喬萊為正考官。員外郎楊佐國為副考官。○戊戌。以冊封皇妃。遣官告祭

太廟

奉先殿○遣大學士勒德洪明珠詣

慈寧宮奏加上

徽號禮儀

太皇太后諭曰自叛逆構亂於今八年皇帝焦心勞思運奇制勝故得寇盜削平海宇寧謐皇帝應受尊號以答臣民之望予處深宮之中不與外事受此尊號於心未愜此典禮不必行勒德洪等奉

太皇太后旨還奏

上復遣詣

慈寧宮奏曰歷稽往代國家凡有大慶必歸美於尊親

太皇太后鑒臣微忱特允奏請臣雖無尊號傳示中外亦有榮光

太皇太后復不允勒德洪等還奏

上復遣詣

慈寧宮奏曰自寇亂用兵以來將士疲勞生民

困苦瘡痍未復喘息未蘇雖兵戈乍戢疆宇初平國家紀綱正宜整頓地方元氣正宜培養臣何敢宴然自處以為太平無事受納尊號惟祈

太皇太后聖心懽豫俯體羣情允行大典臣實幸甚天下幸甚

太皇太后曰皇帝既惓惓懇請至於再三予亦不能固辭可照禮儀行○免浙江黃巖等一十二縣衛本年分水災額賦有差○以懷忠將軍海潮龍湖廣左路副將李懋功恭領牛鳳翔高必盛俱為雲南總兵官○太子太傅都統大學士公圖海故命大臣侍衛往奠茶酒賜銀三千兩及蟒緞鞍馬○己亥

上詣

太皇太后宮問安○

上御太和門王以下文武各官上表行慶賀禮頒詔天下詔曰朕纘承丕緒統御寰區仰惟天地眷祐之庥

祖宗付託之重

聖祖母太皇太后慈訓之殷。蚤夜孜孜。勤求化理。期於兵革寢息。海宇乂安。不意逆賊吳三桂。負國深恩。倡為變亂。陰結奸黨。同惡相援。抗違詔令。竊據疆土。滇黔。閩浙。楚蜀。關隴。兩粵。豫章之間。所在騷騷。肆騁痛毒。吳三桂僭稱偽號。逆焰彌滋。負罪尤甚。朕恭行天討。分命六師。剿撫並施。德威互濟。或繫頸於闕下。或駢戮於師中。擒捕誅鋤。以次收服。乃吳三桂既膺神殛。逆孫吳世璠猶復鴟張。踞六詔之一隅。延殘喘以拒命。朕惟賊患一日不除。則民生一日不靖。策厲將士。屢趣師期。於是虎旅協心。進逼城下。賊衆計窮。勢蹙。通款軍門。約日獻城。兇渠授首。師克之日。市肆不擾。邊境晏如。捷書既至。上慰

郊

廟

社稷之靈。下抒中外臣民之憤。神人胥悅。遐邇

騰歡。念自變亂以來。軍民荼苦。如在水火。披堅執銳。卒歲靡寧。行齋居送。千里相望。被兵之地。既罹於鋒刃。供億之衆。復困於徵輸。朕憫恤民艱。不忍輒加額賦。間施權宜之令。用濟征繕之需。意在除殘。事非獲已。而身處宮寢之內。外廛閭閻之依。中夜屢興。旰食不暇。怒焉思治。八載於茲。今羣逆削平。疆圉底定。悉翦歷年之蠹賊。永消異日之隱憂。用是蕩滌煩苛。維新庶政。大沛寬和之澤。冀臻熙皞之風。於戲。體覆載好生之德。秋肅必繼以春溫。法帝王更化之模。義正尤期於仁育。誕告天下。咸使聞知。○詔內恩。凡四十五條。○命大學士勒德洪。持節進封貴妃佟氏。為皇貴妃。冊文曰。朕惟五典慎徽。嫡內重嬪虞之化。二南正始。關雎資佐。妣之賢。遐稽歷代之彝章。式進宸闈之位序。咨爾貴妃佟氏。毓生名閭。協輔中閨。溫惠宅心。端良著德。凜芳規於圖史。夙夜維勤。表懿範於珩璜。言容有

度。茲仰承

太皇太后慈諭。以冊寶進封爾為皇貴妃。爾其
光昭內則。用迓景福於方來。益慎婦儀。茂衍
鴻庥於有永。欽哉。大學士明珠持節冊封鈕
祜盧氏為

貴妃。冊文曰。朕惟王化始於宜家。端重宮闈
之秩。坤教主乎治內。允資輔翼之賢。爰沛新
恩。式循往制。咨爾鈕祜盧氏。篤生勲闕。克奉
芳型。秉德恭和。賦姿淑慧。佩詩書之訓。聲華
茂著。掖庭敷綸綍之榮。寵錫用光典冊。茲仰
承

太皇太后慈諭。以冊寶封爾為貴妃。爾其祗勤
夙夜。襄壺範而彌嗣徽音。衍慶家邦。佐婦職
而永膺渥眷。欽哉。○命大學士李蔚持節進
封惠嬪納喇氏為

惠妃。冊文曰。朕惟治本齊家。茂衍六宮之慶。
職宜佐內。備資四德之賢。恪恭久効於閨闈。
升序用光。以綸綍。咨爾惠嬪納喇氏。柔嘉成

性。淑慎持躬。動諧珩珮之和。克嫻於禮。敬凜
夙宵之節。靡懈於勤。茲仰承

太皇太后慈諭。以冊印進封爾為惠妃。爾其祗
膺晉秩。副象服之有加。懋贊坤儀。迓鴻庥之
方至。欽哉。尚書吳正治持節進封宜嬪郭羅
洛氏為

宜妃。冊文同。○命侍郎額星格持節進封
德嬪吳雅氏為

德妃。冊文曰。朕惟治本齊家。茂衍六宮之慶。職
宜佐內。備資四德之賢。恪恭久効於閨闈。升
序用光。以綸綍。咨爾德嬪吳雅氏。柔嘉成性。
淑慎持躬。動諧珩珮之和。克嫻於禮。敬凜夙
宵之節。靡懈於勤。茲仰承

太皇太后慈諭。以冊印進封爾為德妃。爾其祗
膺晉秩。副象服之有加。懋贊坤儀。迓鴻庥之
方至。欽哉。侍郎楊正中持節進封榮嬪馬佳
氏為

榮妃。冊文同。○庚子。

上詣

太皇太后宮問安○諭禮部朕惟戡定本啟佑之恩顯揚備尊親之禮成功既告盛德宜彰所以展孝忱昭慶典也逆賊吳三桂背恩反叛數年以來朕仰承

聖祖母昭聖慈壽恭簡安懿章慶敦惠溫莊康熙和仁宣太皇太后暨

聖母仁憲恪順誠惠純淑皇太后慈訓剿除叛亂克奏教寧思上答乎弘仁應進崇夫顯號

謹加上

太皇太后徽號曰

昭聖慈壽恭簡安懿章慶敦惠溫莊康熙和仁宣弘靖太皇太后

皇太后徽號曰

仁憲恪順誠惠純淑端禧皇太后播徽音於四海介景福於萬年爾部即擇吉具儀以聞○以翰林院掌院學士兼禮部侍郎陳廷敬充經筵講官○以公彭春為正紅旗蒙古副都

統○辛丑

上詣

太皇太后宮問安○命安親王岳樂掌宗人府事○調江西巡撫李士楨為廣東巡撫陞福建布政使佟康年為江西巡撫○禮部題琉球國中山王世子尚貞應照例襲封為中山王并賜故王尚質卹銀一百兩絹五十疋令來使齎去又查順治十一年初封尚質加賜王緞三十疋妃緞二十疋曾奉有後不為例之旨應無庸議得旨琉球國世子尚貞父子世守臣節忠誠可嘉王與妃可照前例賞賜○調湖廣南漳總兵官劉成龍為廣東瓊州總兵官江西廣信總兵官高登科為廣東右翼總兵官○壬寅以加上

太皇太后

皇太后徽號遣官告祭

天地

太廟

社稷○

上詣

太皇太后官行禮。恭上奏言。恭惟

聖祖母昭聖慈壽恭簡安懿章慶敦惠溫莊康和仁宣太皇太后陛下。仁覆如天。坤貞應地。臣祇遵

懿訓。綏靖寰區。叛逆削平。兵民休息。屬神人之胥慶。合宇宙以同庥。此皆垂裕之恩。莫罄顯揚之願。敬稽彝典。仰奉

徽稱。用將率土之歡。永介萬年之壽。伏祈

聖慈俞鑒。俾展微忱。益昌有永之休。普鴻名於寶冊。共上無疆之祝。綿景運於金甌。又詣

皇太后官行禮。恭上奏言。恭惟

聖母仁憲恪順誠惠純淑皇太后陛下。厚德凝祥。至和集祉。臣祇遵

慈佑。蕩定邊方。反側悉平。兵民永息。既騰歡於遐邇。宜增喜於宮闈。聿臻綏靖之休。彌念尊親之戴。敬稽彝典。仰奉

徽稱。伏祈

聖慈俞鑒。俾展微忱。答臣民欣忭之心。光崇典冊。衍朝野昇平之慶。瑞洽寰區。裁直隸各省。添設驛站。并加增協濟夫馬。○癸卯。

上率諸王。貝勒。貝子。公。內大臣。大學士。都統。副都統。尚書。侍郎。侍衛等。恭奉冊寶詣

太皇太后官行禮。冊文曰。厚德發祥。錫中天之景命。鴻稱歸美。合萬國之歡心。

宗社凝庥。家邦衍慶。欽惟

聖祖母昭聖慈壽恭簡安懿章慶敦惠溫莊康和仁宣太皇太后。仁恩持載。聖則含弘。澤上際而下蟠。運開昌曆。化東漸而西被。功出

慈宸。乃者兇逆背恩。亂常干紀。遂致八年之久。重貽

聖善之憂。賴光訓之昭宣。屬兵戈之永戢。太平有象。彌彰燕翼之勤。盛德難名。莫罄尊親之戴。謹告

天地。

宗廟。

社稷率諸王。貝勒。文武羣臣。恭奉冊寶。加上徽號曰。

昭聖慈壽恭簡安懿章慶敦惠溫莊康和仁宣弘靖太皇太后。伏願永隆啟佑。長享怡愉。綿寶祚於重闈。福延奕世。綏皇圖於函寓。壽並兩儀。寶文曰。

昭聖慈壽恭簡安懿章慶敦惠溫莊康和仁宣弘靖太皇太后之寶。又恭奉冊寶詣。

皇太后宮行禮。冊文曰。慈儀垂裕。符泰運於三階。鴻號顯揚。播徽音於萬國。承顏有喜。介福無疆。欽惟。

聖母仁憲恪順誠惠純淑皇太后。德備安貞。道偕博厚。仁庥錫祉。衍家邦昌熾之祥。壽域凝和。洽海寓清寧之慶。乃者逆渠犯順。遘徽弗寧。仰賴弘慈。聿臻大定。獲際昇平之誕奏。爰晉崇顯之隆稱。謹告。

天地。

宗廟。

社稷率諸王。貝勒。文武羣臣。恭奉冊寶。加上徽號曰。

仁憲恪順誠惠純淑端禧皇太后。伏願純嘏彌增。嘉徵洊至。珙球咸集。九州奉尊養之歡。文軌來同。億載永升恒之頌。寶文曰。

仁憲恪順誠惠純淑端禧皇太后之寶。

上御太和門。王以下。文武各官。上表行慶賀禮。頒詔天下。詔曰。朕惟帝王。續承鴻緒。首重尊親。顯號洊加。彝章具在。矧式遏禍亂。耆定厥功。實稟誨育之恩。應極尊崇之典。比者逆賊吳三桂反叛。煽動多方。朕夙夜靡寧。肆張天討。仰承。

聖祖母昭聖慈壽恭簡安懿章慶敦惠溫莊康和仁宣太皇太后。

聖母仁憲恪順誠惠純淑皇太后懿訓。次第翦滅。克奏蕩平。上慰。

宗廟之靈。下拯生民之厄。非藉。

慈庇。曷克臻此。茲用晉休稱。載揚

盛德。謹告

天地。

宗廟。

社稷。於康熙二十年十二月二十四日。率諸王。

貝勒。文武羣臣。恭奉冊寶。加上

聖祖母昭聖慈壽恭簡安懿章慶敦惠溫莊康和仁宣太皇太后徽號曰。

昭聖慈壽恭簡安懿章慶敦惠溫莊康和仁宣

弘靖太皇太后。

聖母仁憲恪順誠惠純淑皇太后徽號曰。

仁憲恪順誠惠純淑端禧皇太后。禮既備於

兩宮。澤宜敷於四海。於戲。慶洽宮闈。華展因心

之孝。恩覃中外。丕昭錫類之仁。布告天下。咸

使聞知。○詔內恩欵。凡十二條。○陞福建巡

撫吳興祚。為廣東廣西總督。直隸巡撫于成

龍。為江南江西總督。以左副都御史余國柱。

為江寧巡撫。○封故固山貝子額爾瑪渾子

瓦山。為輔國公。○甲辰。

上詣

太皇太后

皇太后宮問安。○順天府進春。○丁未。歲暮。裕

祭

太廟。

上親詣行禮。○遣官祭

永陵。

福陵。

昭陵。

孝陵。

仁孝皇后。

孝昭皇后陵。○遣官祭太歲之神。○

上詣

太皇太后


皇太后宮問安。○戊申。賜朝正外藩王。貝勒。貝

子。公。及內大臣。大學士。上三旗都統。副都統。

尚書。侍郎。學士。侍衛等宴。○旌表八旗節婦

滿洲渣哈喇妻伊氏等二十七人。烈婦滿洲
噶布喇妻朱氏。蒙古奇塔特妻孫氏。各給銀
建坊如例。○是歲人丁戶口一千七百二十
三萬五千三百六十八。田地山蕩畦地五百
三十一萬五千三百七十二頃六十畝。徵銀
二千二百一十八萬三千七百六十兩有奇。
米豆麥六百二十七萬一千一百八石四斗
有奇。草二百四十五萬五千七百五十束。茶
十五萬五千三百六十五引。行鹽三百九十
八萬三千七十二引。徵課銀二百三十九萬
九千四百六十八兩有奇。鑄錢二萬三千一
百三十九萬八千六百有奇。

大清聖祖合天弘運文武睿哲恭儉寬裕孝敬
誠信中和功德大成仁皇帝實錄卷之九十九



統一書號: 11018·1355—4

定價: 58.00 元